


Tuhun tsaa tsa nacoꝝ jutu mañi yo Jesucristo
tsi yo



New Testament in Mixtec, San Juan Colorado (MX:mjc:Mixtec,
San Juan Colorado)

Tuhun tsa a naco jutu mañi yo Jesucristo tsi yo New Testament in Mixtec, San Juan Colorado (MX:mjc:Mixtec, San Juan Colorado)

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

c270ec54-172a-541f-83e6-7760f619c744

Contents

San Mateo	1
Marcos	44
Lucas	72
Juan	118
Los Hechos	151
Romanos	193
I Corintios	210
II Corintios	226
Gálatas	238
Efesios	244
Filipenses	250
Colosenses	255
I Tesalonicenses	259
II Tesalonicenses	263
I Timoteo	265
II Timoteo	270
Tito	274
Filemón	276
Hebreos	277
Santiago	290
I San Pedro	294
II San Pedro	299
I San Juan	302
II San Juan	307
III San Juan	308
San Judas	309
El Apocalipsis	311

Tuhun Nyoo Tsa Tyaa Ra Mateo

Nyivi ra Jesucristo tsa tsicoq tsa ndi cumañi ca cacu ra

(Lc. 3.23-38)

¹ Ihya nyecú tandihi sivi nyivi ra Jesucristo tsa tsicoq tsa ndi cumañi ca cacu ra. Nyivi ra David tan nyivi ra Abraham cuvɪ tsi ra.

² Sehe ra Abraham cuvɪ tsi ra Isaac, tan sehe ra Isaac cuvɪ tsi ra Jacob. Tan sehe ra Jacob cuvɪ tsi ra Judá tsihin tandihi ra yañi ra. ³ Tan ra Fares tsihin ra Zara sehe ra Judá tsihin ña Tamar cuvɪ tsi ra naha. Tan sehe ra Fares cuvɪ tsi ra Esrom, ra cuvɪ jutu ra Aram. ⁴ Tan sehe ra Aram cuvɪ tsi ra Aminadab, jutu ra Naasón. Tan sehe ra Naasón cuvɪ tsi ra Salmón. ⁵ Tan ra Booz, sehe ra Salmón tsihin ña Rahab cuvɪ tsi ra. Tan sehe ra Booz tsihin ña Rut cuvɪ tsi ra Obed, jutu ra Isaí. ⁶ Tan ra David, ra cuvɪ rey, sehe ra Isaí cuvɪ tsi ra. Tan sehe ra rey David tsihin ñaha tsa cuvɪ ñasiihi ra Urías cuvɪ tsi ra Salomón.

⁷ Tan sehe ra Salomón cuvɪ tsi ra Roboam, ra cuvɪ jutu ra Abías. Tan sehe ra Abías cuvɪ tsi ra Aza. ⁸ Tan sehe ra Aza cuvɪ tsi ra Josafat, ra cuvɪ jutu ra Joram. Tan sehe ra Joram cuvɪ tsi ra Uzías. ⁹ Tan sehe ra Uzías cuvɪ tsi ra Jotam, ra cuvɪ jutu ra Acáz. Tan sehe ra Acáz cuvɪ tsi ra Ezequías. ¹⁰ Tan sehe ra Ezequías cuvɪ tsi ra Manasés, ra cuvɪ jutu ra Amón. Tan sehe ra Amón cuvɪ tsi ra Josías. ¹¹ Tan sehe ra Josías cuvɪ tsi ra Jeconías tsihin tandihi ra yañi ra. Tsicoq ra naha quivi tɪn ra ñuu Babilonia naha ra tsi nyivi Israel, tsa cua cuhun ñi cuvɪ ñi musu ra ñuu Babilonia can naha ra.

¹² Tsa yaha can, tan tsicoq sehe ra Jeconías, tan ra ican cuvɪ ra Salatiel, jutu ra Zorobabel. ¹³ Tan sehe ra Zorobabel cuvɪ tsi ra Abiud, ra cuvɪ jutu ra Eliaquim. Tan sehe ra Eliaquim cuvɪ tsi ra Azor. ¹⁴ Tan sehe ra Azor cuvɪ tsi ra Sadoc, ra cuvɪ jutu ra Aquim. Tan sehe ra Aquim cuvɪ tsi ra Eliud. ¹⁵ Tan sehe ra Eliud cuvɪ tsi ra Eleazar, ra cuvɪ jutu ra Matán. Tan sehe ra Matán cuvɪ tsi ra Jacob. ¹⁶ Tan ra Jacob cuvɪ jutu ra José, yɪ ña María. Juvín ña cuvɪ sihi ra Jesús ra cuvɪ Cristo, o cuñi tsi catyí, ra tsa jaquitsi Nyoo tyin quihí ndaha tsi yo.

¹⁷ Tacan tsicoq utsi cumi taahan tata ra Abraham nda cuanda cacu ra David. Tan ra David, tsicoq utsi cumi tata ra nda cuanda quivi tɪn ra ñuu Babilonia naha ra tsi nyivi Israel. Tan nda cuanda quivi can tsicoq utsi cumi ca tata ñi nda cuanda quivi cacu ra Cristo.

Nu cacu ra Jesucristo
(Lc. 2.1-7)

¹⁸ Tyehen cuvɪ tan cacu ra Jesucristo: tsa yaha cundaa tyiñu tsa cua tindaha ña María tsihin ra José. Tan tsa ndi cumañi ca naquihin ra tsi ña, ñihí sehe ña tsa cuenda Tatyí li Nyoo. ¹⁹ Tan ra José, ra cua cuvɪ yɪ ña, vaha xaan iñi ra. Ña cuñi ra cuhva ra ticanuu tsi ña. Yacan cuenda tsicá iñi ra tsa nacoo xeehe ra tsi ña tan ña cua tindaha ca ra tsihin ña. ²⁰ Tan tsitsi tsa tsicá iñi ra yacan, quituvɪ iin ángel Jutu Mañi yo nuu ra nu quixi ra. Tan nyehe ra ñumaahna, tan catyí ángel can tsihin ra:

—José, tata ra David, ña caca iñi un quihin un tsi ña María cuvɪ ña ñasiihi un, tyin sehe ña tsa cua cacu, sehe Tatyí li Nyoo cuvɪ tsi. ²¹ Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu ñayivi —catyí ángel can tsihin ra José.

²² Tacan cuvɪ tyin tacan tan cundaa tsa cahan ra cuvɪ ndusu yuhu Jutu Mañi yo tahañ tsanaha.

²³ Tan catyí ra tyehen:

Ñaha yoco tsa ñaha ca coo yɪ, cua cuhun sehe ña.

Tan cua coo iin sehe ña. Tan cua cunañi ra: Emanuel.

Tan sivi can cuñi tsi catyí: “Nyoo iyó ra tsihin yo.”

²⁴ Tan tsa ndoto ra José, javaha ra tumaa catyí ángel can tsihin ra. Quihin ra tsi ña María tyin cuvɪ ña ñasiihi ra. ²⁵ Maa tyin ña quixi ra tsihin ña nda cuanda tsa yaha cacu sehe ña. Tan jacunañi ra tsi lee can: Jesús.

2

Nu cuahán ra tsitó xaan, ra cuvɪ rey, cua nyehe ra naha nu cacu ra Jesús

¹ Cacú ra Jesús ñuu Belén tsa canyíi nu cuvɪ Judea. Tan quivi can ra cuvɪ rey Judea nañi ra Herodes. Tacan tan tsaá juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuvɪ ra naha. ² Tsicá tuhun ra naha tsi nyivi tan catyí ra naha:

—¿Nu maa nyii ra cuvɪ rey cuenda nyivi Israel? Tyin ityi nu caná ñicanyii nyehe ndi tiñuu tsa tsahá cuenda tyin cacu ra ityi ihya. Tan vatsí ndi vatsí jacahnu ndi tsi ra —catyí ra naha.

³ Quivi tsa tsitó ra rey Herodes tsa cahan ra can naha ra, tuñu xaan cuñi ra cuvɪ. Tacan tucu tandihi nyivi ñuu Jerusalén can.

⁴ Tacan tan cana ra Herodes tsi tandihi ra jutu tsa cuvɪ ityi nuu tsihin ra cuvɪ jutu tan tsihin tandihi ra cuvɪ maestro cuenda ley vehe ñuhu naha ra. Tan tsicá tuhun ra tsi ra naha numaa nda taahán tsi cacu ra Cristo. ⁵ Tan nacahan ra can naha ra tan catyí ra naha:

—Ñuu Belén tsa canyíi Judea, ndacan taahán tsi cacu ra tyin tyehen tyaa ra cuvî ndusu yuhu Nyoo nu tutu tahān tsanaha:

⁶ Tan yoocho Belén ñavin iin ñuu luhlu ñi cuvî un tsa nuu tandihi maa ñuu tsa cayucú Judá

tyin nuu yoocho cua quita ra cua quihî ndaha tsi nyivî ñuu yu Israel. Maa ra cua jaha cuenda ra tsi ñi.

Tacan catyî nu tutu Nyoo, —catyî ra can naha ra tsihin ra Herodes.

⁷ Tacan tan cana xeehe ra Herodes tsi ra tsitô xaan can naha ra, tan tsicā tuhun ra tsi ra naha nāa quivî tan nāa hora quituvî tiñuu can. ⁸ Tacan tan jacuhun ra tsi ra naha nda ñuu Belén, tan catyî ra tsihin ra naha:

—Cuaahan ndo, tan ndaca tuhun vaha ndo tsa cuenda ra lee can. Tatun nañihi ndo tsi ra, quitsi catyî tuhun ndo tsihin yu, tyin cuhun ndihi yu cujacadnu yu tsi ra —catyî ra Herodes tsihin ra naha.

⁹ Tsa tsiñî ra tsa tsitô xaan can naha ra tsa cahān ra Herodes, tan quihî ra naha ityî cuahān ra naha. Tan tiñuu tsa nyehē ra naha ityî nu canā ñicanyî can, cuahān tsi ityî nuu ra naha. Tan tsicuiñî tsi maa maa siquî nu canyîi ra lee can. ¹⁰ Tan tsa nyehē ra tsitô xaan can naha ra tyin tsicuiñî tiñuu can, si xaan cuñî ra naha. ¹¹ Tan quihvî ra naha tsitsi vehe nu canyîi lee can. Tan nyehē ra naha tsi ra tsihin ña María, sihi ra. Tan tsicuiñî tsiti ra naha tyin jacahnu ra naha tsi lee can. Tacan tan nuñā ra naha yuhu caja tsa ndahā ra naha. Tan tava ra naha regalo tsa cuvî xuhun cuaan, tan cutu vixi, tan ndutya tamî tsa nañî mirra. Tan tsahā ra naha tsi lee can. ¹² Tsa yahā tsa nyehē ra naha tsi ra Jesús tan cuanuhû ra naha. Tan tsa cuanuhû ra naha nyehē ra naha ñumaahna tan catyî tsi tyin ña taahān tsi cuhun ra naha cucatyî tuhun ra naha tsihin ra Herodes. Yacan cuenda siin ityî cuanuhû ra naha.

Nu tsinû xeehe ra José tan ña María tsihin lee sehe ñi nda Egipto

¹³ Tsa yahā cuahān ra tsa tsitô xaan can naha ra, tacan tan iin ángel Jutu Mañi yo quituvî nuu ra José tsitsi ñumaahna. Tan catyî ángel can tsihin ra:

—Ndúvita, quihin tsi lee ihya, tsihin sihi ra, tan cuhun ndo nda ñuu Egipto. Ndoo ndo ndacan nda cuanda cahan nyico yu tsihin un. Tyin ra Herodes cua nanducu ra tsi ra lee ihya tyin cuñî ra cahñi ra tsi ra —catyî ángel can tsihin ra José.

¹⁴ Tacan tan nduvitā ra José tsacuaa can. Tan quihî ra tsi lee can tsihin sihi tsi. Tan cuahān ñi nda Egipto. ¹⁵ Ndacan tsicoq ñi nda cuanda tsa tsihî ra Herodes. Tacan cuvî tyin cundaq tsa cahān ra cuvî ndusu yuhu

Jutu Mañi yo tahān tsanaha jahā Nyoo. Tyehen catyî ra: “Nda Egipto canā yu tsi Sehe yu”, catyî ra.

Nu tava tyiñu ra Herodes na cahñi ra naha tsi ra nyihi

¹⁶ [Tsa ndi cumañi ca cúu ra Herodes tan ndi ndatú ra tsa quitsi nyico ra tsitô xaan can naha ra] tan tsa tuvî iñi ra Herodes tyin ra tsitô xaan can naha ra jandavî ñaha ra naha tsi ra, tan nduxaan xaan ra. Tan tava tyiñu ra na cahñi andaru tsi tandihi ra nyihi tsa iyó ñuu Belén can tan inga ñuu tsa cayucú yatyn ñi, ra nyihi tsa ndi cacú nda cuanda ra nyihi tsa uvi cuiya. Tacan javahā ra tyin tsicā iñi ra tyin tacan cuiya ra Jesús tumaa catyî ra tsitô xaan can naha ra tsihin ra.

¹⁷ Tacan cuvî tyin cundaq tsa cahān Nyoo tan tyaa ra Jeremías, ra cuvî ndusu yuhu ra tahān tsanaha. Tyaa ra tyehen:

¹⁸ Tsiñî yo iin ndusu ñuu Ramá, tsacú tsaa nyivî, tan iyo taahān ñi.

Juvin ñi nyivî cuvî tata ña Raquel, nyivî Israel, tsacú tsaa ñi tsa cuenda sehe ñi.

Maa tyin ña cuñî ñi tsa naquihin ndaahvi nyivî tsi ñi tyin tsa yahā tsihi sehe ñi, catyî tsi nu tutu Nyoo.

¹⁹ Maa tyin tsa yahā tsa tsihî ra Herodes, tacan tan quituvî nyico iin ángel Jutu Mañi yo nuu ra José nu quixî ra nda Egipto. Tan catyî ra tsihin ra:

²⁰ —Ndúvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihî nyivî nducú cahñi tsi ra lee ihya.

²¹ Tacan tan nduvitā ra José, tan quihî ra tsi lee can tan tsihin sihi ra. Tan cuanuhû ñi nda Israel. ²² Maa tyin quivî tsitô ra José tyin ra Arquelao, sehe ra Herodes, cuvî ra rey nda Judea, nayuhvî ra tan ña cuñî ra cuhun ra ndacan. Tan cuanuhû ñi nda Galilea tyin tacan jacotô Nyoo tsi ra tsitsi ñumaahna. ²³ Tsa tsaa ñi ícan, tan cuahān ñi nda ñuu Nazaret, cua cōo ñi. Tan ícan tsicoq ñi. Tacan cuvî tyin cundaq tsa cahān ra cuvî ndusu yuhu Nyoo tahān tsanaha. Tyin catyî ra naha tyin ra Jesús ra ñuu Nazaret cua cuvî ra.

3

Nu cahān ra Juan tuhun Nyoo tsihin nyivî (Mt. 1.1-8; Lc. 3.1-9, 15-17; Jn. 1.19-28)

¹ Quivî tsa ndi iyó ñi ñuu Nazaret, ra Juan, ra jacoondutý tsi nyivî, cuahān ra nu tsiquî tsa iyó Judea. Tan quitsahā caahān ra tuhun Nyoo tsihin nyivî tsa tsaa nu nyii ra. ² Tan catyî ra:

—Ndú uvi iñi ndo cuatyî ndo tyin tsa cuñî tsaa quivî cundaca ñaha Nyoo tsi yo.

³ Juvin ra Juan cuvî ra tsa cahān ra Isaías ra cuvî ndusu yuhu Nyoo tahān tsanaha. Tan tyaa ra tsa tsahā Nyoo tsi ra tyehen:

Cua tyaa soho yo ndusu ra nu caná tsaa ra nu tsiqui tan catyí ra:

“Nuña ndo iin ityi cuiti.

Tan natyiso vaha ndo tsi ndo tyin tsa vatsi Jutu Mañi yo,” catyí tuhun tsa tyaa ra Isaías.

⁴ Tan ra Juan nditsí ra jahma tsinú tsihin ixi camellu. Tan cinturón ra, ñiñ cuví tsi. Tan tica xama tsatsí ra tan tsihi ra ndutya ñuñu.

⁵ Quitsí nyivi ñuu Jerusalén tan tandihi ñuu tsa cayucú Judea, tan nyivi tsa iyó yatyin ñi ityi yutya cahnu Jordán can; quitsí tyaa soho ñi tuhun caahán ra. ⁶ Tan tsa yaha nahma ñi cuatyí ñi, ra Juan jacoondutya ra tsi ñi yutya cahnu Jordán ican.

⁷ Maa tyin nyehe ra Juan tyin cuaha xaan ra fariseo, ra tsa tyaa yahvi xaan ley vehe ñuhu, tan cuaha xaan ra saduceo, quitsí ra naha tyin coondutya ra naha. Tan catyí ra tsihin ra naha:

—¡Nyooho, tumaa tata coo xaan cuví ndo! ¿A cuñí maa ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví. ⁸ Nasama ndo cuhva iyó ndo, na nyehe yo tyin tsa ndu uví iñi ndo cuatyí ndo nuu Nyoo. ⁹ Maa tyin ña nduyaa ndo tan catyí ndo tyin nyivi tata ra Abraham cuví ndo. Tyin vasu tsihin yuu ihya, Nyoo cuví jananduvi ra nyivi ra Abraham. ¹⁰ Tsa ndatú yatsa Nyoo tsi tandihi ndo tsa cuví ndo tumaa yutun tsa ña tsahá tsiti vaha. Cua tyahnya tun tan cua cayu tun, tacan cua javaha Nyoo tsihin ndo —catyí ra Juan—. ¹¹ Tsa nditsa tyin yuhu jacoondutya yu tsi nyivi tsihin ndutya, tan cuví tsi iin seña tyin tsa ndu uví iñi ñi cuatyí ñi. Maa tyin tsa yaha jacoondutya yu tsi ñi tsihin ndutya, vatsí inga ra cua jacoondutya tsi ñi tsihin Tatyí Ii Nyoo tan tsihin ñuhu ihñi. Iyó ca tunyee iñi Nyoo tsi maa ra tan ñavin ca yuhu. Tan ndi tsa cuiso yu nditsan ra tan nduve yahvi nyaá yu, tyin maa ra cahnu ca cuví ra. ¹² Tan ra ican ndahá ra pala tyin cua jandava ra trigu. Cua tava siin ra trigu vaha, tan cua natyihí vaha ra itsi. Tan cua cahmí ra tsahan tsa quita tsihin trigu can tsihin ñuhu tsa ña cua ndahva maa —catyí ra Juan.

*Nu tsicoondutya ra Jesús
(Mr. 1.9-11; Lc. 3.21-22)*

¹³ Tacan tan quita ra Jesús Galilea tan tsaa ra yutya cahnu Jordán nu nyíi ra Juan, tyin cuñí ra tsa jacoondutya ra Juan tsi ra. ¹⁴ Tsa jhna ñi ña cuñí ra Juan jacoondutya ra tsi ra, tan quitsaha catyí ra tsihin ra:

—Cuñí un tsa jacoondutya yu tsi un, maa tyin ña taahán tsi tsa jacoondutya yu tsi un. Maa un taahán tsi jacoondutya tsi yu —catyí ra.

¹⁵ Maa tyin ra Jesús catyí ra tsihin ra:

—Tsa vityin, na cuví tsi cuhva catyí yu tsihin un. Tyin cuñí tsi tsa javaha yo tandihi

tsa vaha tsa cuñí Nyoo —catyí ra tsihin ra Juan.

Tacan tan ndoo ra Juan vaha.

¹⁶ Tsa yaha tsicoondutya ra Jesús tan quita ra tsitsi ndutya. Tan nuña andivi, tan ra Jesús nyehe ra vatsí nuú Tatyí Ii Nyoo, tumaa iin paloma. Tan tsaa tsi sigui ra. ¹⁷ Tacan tan cahan iin ndusu ityi andivi, tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan siñ xaan cuñí yu tsihin ra —catyí ndusu can.

4

*Nu nducú cuhva nu ña vaha tsi ra Jesús
(Mr. 1.12-13; Lc. 4.1-13)*

¹ Tacan tan tsindaca Tatyí Ii Nyoo tsi ra Jesús iin nu tsiqui, tyin cua nducu cuhva nu ña vaha tsi ra.

² Tsicoq nyitya ra uvi xico nduvi tan uvi xico tsacuaa. Tsa yaha can tan quitsí socó tsi ra. ³ Tacan tan natuhvú nu ña vaha nu nyaá ra, tyin cuñí nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahan tsihin yuu ihya, na nanduvi tsi paan —catyí nu ña vaha tsihin ra Jesús.

⁴ Maa tyin ra Jesús nacahan ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyivi tan coonyito ñi, tyin coonyito ñi tsihin tandihi tuhun caahán Nyoo” —catyí ra Jesús tsihin nu ña vaha.

⁵ Tacan tan quihñ nu ña vaha tsi ra. Tan cuahán ra tsihin nu nda ñuu ii Jerusalén. Tan jandaa nu tsi ra jiñi vehe ñuhu cahnu.

⁶ Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda cuanda nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un.

Cua janahndi ra naha tsi un,

tan ña cua nañi tsaha un nuu yuu.

⁷ Tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

⁸ Tacan tan quihñ nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janaha nu tandihi tsa cahnu cuví nu ndaca ñaha rey tan ra cumí tyiñu naha ra tsi nyivi iyó nu ñuhu ñayivi. ⁹ Tan catyí nu tsihin ra:

—Yuhu cuhva yu tandihi maa tsa janaha yu tsi un, tatun yoocho tan cuñi tsiti un nuu yu tan jacahnu un tsi yu.

¹⁰ Tacan tan nacahan ra Jesús tan catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jacahnu tsi intuhun ñi maa Jutu Nyoo, tan jaha tyiñu tyiñu ra.”

¹¹ Tacan tan cuahán nu ña vaha, tan ndoo ra Jesús. Tan tsaa ángel tan jatyinyee ra naha tsi ra.

Nu quitsahá caahán ra Jesús tuhun Nyoo tsihin nyivi tsa iyó ñuu tsa cayucú Galilea (Mr. 1.14-15; Lc. 4.14-15)

¹² Quivi tsa tsito ra Jesús tyin ra Juan nyii ra vehe caa, cuahán ra nda Galilea. ¹³ Maa tyin ña ndoo ra ñuu Nazaret, nu tsahnu ra. Cuahán ra cua coo ra nda ñuu Capernaum, iin ñuu tsa canyí yatyin ñi yuhu miñi, nu ñuhu ra Neftalí yatyin ñuhu ra Zabulón. ¹⁴ Tacan tan cundaa tsa cahan ra Isaías, ra cuví ndusu yuhu Nyoo, tahañ tsanaha. Tan catyí ra:

¹⁵ Ñuhu ra Zabulón tan ñuhu ra Neftalí tsa cayucú yuhu miñi inga tsiyo yutya cahnu Jordán, tsa cuví Galilea nu iyó nyivi tsa ñavin nyivi Israel cuví.

¹⁶ Nyivi iyó nu naa, ñi iyó nu iyó tixahñu tuhun tsihi, nyehé ñi iin ñuhu nditsin tsa jandunditsín nu yucú ñi, catyí ra Isaías.

¹⁷ Nda cuanda quivi can, tan quitsahá caahán ra Jesús tuhun Nyoo tsihin nyivi, tan catyí ra tsihin ñi:

—Ndu uvi iñi ndo cuatyí ndo tyin tsa cuñí tsaa quivi cundaca ñaha Nyoo tsi ndo—catyí ra Jesús tsihin nyivi.

Nu cana ra Jesús tsi cumi taahan ra tsa tiñ tyaca

(Mr. 1.16-20; Lc. 5.1-11)

¹⁸ Ra Jesús tsicá ra yuhu miñi tsa nañi Ndutya Ñuhu Galilea. Tan nyehé ra tsi uvi taahan ra tsihin yañi ra, ra Simón tsa nañi tucu Pedro, tan ra Andrés. Ra tiñ tyaca cuví ra naha. Tan cañi ra naha traya ra naha nu ndutya. ¹⁹ Tacan tan catyí ra Jesús tsihin nduvi taahan ra naha:

—Naha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tiñ ndo tyaca, tacan cua ñihi ndo nyivi cua cuví nyivi Nyoo—catyí ra Jesús tsihin ra naha.

²⁰ Juvin ñi cuhva can nacoq ra naha traya can, tan cuahán ra naha tsihin ra Jesús.

²¹ Luxu ñi tsicá ra naha ityí nuu, tan nyehé ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan cana ra Jesús tsi ra naha. ²² Juvin ñi cuhva can tan nacoq ra naha tsi jutu ra naha tan yutun ndoo can, tan cuahán ra naha tsihin ra.

Nu cuaha xaan nyivi jacuahá ra Jesús (Lc. 6.17-19)

²³ Cuahán ra Jesús tsicá ra tandihi ñuu cuenda Galilea jacuahá ra tsi nyivi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvahá ra tsi nyivi cuuhví tsihin tandihi ñi nuu cuehe tsa yihí tsi ñi. ²⁴ Tacan tan tsito tandihi nyivi ñuu cuenda Siria tuhun ra Jesús. Tan tsindacá ñi tandihi nyivi cuuhví tsi ra: juhva ñi yihí tatyí ña vaha. Tan yihí ñi tsihi naaha ñi. Tan yihí ñi ndohó ñi cuehe xii. Tan janduvahá ra Jesús tsi tandihi ñi. ²⁵ Cuaha xaan nyivi nyicun tsi ra Jesús: nyivi iyó ñuu tsa cayucú Galilea, nyivi tsa quee nu utsi taahan ñuu tsa nañi Decápolis, nyivi iyó ñuu Jerusalén tan tandihi ca ñuu tsa cayucú Judea, tan nyivi iyó inga tsiyo yutya cahnu Jordán.

5

Nu cahan ra Jesús tsihin nyivi nu tsiqui (Lc. 6.20-23)

¹ Nyehe ra Jesús tyin cuaha xaan nyivi, tan ndaa ra iin nuu yucu. Tan tsicunyaq ra ican. Tacan tan nyivi tsicá tsihin ra, tsinunduvj ñi tsi ra. ² Tacan tan quitsahá jacuahá ra tsi ñi tan catyí ra:

³ Nasocó Nyoo tsi tandihi nyivi tsa tsito tyin tsiñi ñuhu ra tsi ñi, tan tsa cuenda ñi cuví nu ndacá ñaha ra.

⁴ “Tan tandihi nyivi tsa cuihya cuñí tsa cuenda cuatyí ñi, nasocó Nyoo tsi ñi tan ña cua coo ca ñi tucuihya iñi.

⁵ “Tan tandihi nyivi tsa ña cahnu jahá ñi tsi ñi, nasocó Nyoo tsi ñi, tan cua naquihín cuenda ñi ñuhu ñayivi tsa catyí Nyoo tyin cuhva ra tsi ñi.

⁶ “Tan tandihi nyivi tsa cuñí xaan javaha cuhva catyí Nyoo, nasocó Nyoo tsi ñi, tan cua jatyinyee ra tsi ñi tan cua cuví javaha ñi cuhva cuñí maa ra.

⁷ “Tan tandihi nyivi tsa cundaahví iñi tsi inga nyivi, nasocó Nyoo tsi ñi, tan cua cundaahví iñi ra tsi ñi.

⁸ “Tan tandihi nyivi tsa janduvahá Nyoo añima, nasocó ra tsi ñi, tan cua nyehé ñi tsi ra.

⁹ “Tan nyivi tsa nducú cuhva tsa coo vaha nyivi tsihin Nyoo tan tsihin inga nyivi, nasocó ra tsi ñi tan cua catyí ra tyin sehe ra cuví tsi ñi.

¹⁰ “Tan tandihi nyivi tsa javahá cuhva cuñí Nyoo tan ndasi cuñí nyivi nyehé ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra. ¹¹ “Nasocó Nyoo tsi nyooho tsa caahán nyivi ndavaha ñi tsata, tan javahá ñi tsa uhví tsi ndo, tan caahán ñi cuendu tsa ña nditsa sigui ndo tsa cuenda tsa tsinú iñi ndo tsi yu. ¹² Cusi iñi ndo tun tacan javahá nyivi tsihin ndo; sii cuñi ndo,

tyin cahnu xaan tan sii xaan caá tsa cua ñihi ndo nda gloria. Tyin juvin ñi tacan javahá nyivi tsa ña vaha tsihin tandihi ra cuvɪ ndusu yuhu Nyoo tahán tsanaha.

Tatun jandihi yo tsa tsinú iñi yo tsi Nyoo cuvɪyo tumaa ñii tsa ndihi tsa uhva (Mr. 9.50; Lc. 14.34-35)

¹³ 'Nyooho tsa tsinú iñi tsi yu, tumaa ñii vaha cuvɪ ndo. Maa tyin tatun ñii, tan ndihi tsa uhva tsi, ña cua jandu uhva ca tsi tsa catsi yo. Ña vaha ca ñii can. Tacan tan javita yo can, tan cuañi nyivi tsata can.

Tatun tyaá yahvi vaha yo tuhun caahán Nyoo, cuvɪyo tumaa ñuhɪ tsa jandunditsín nu tsicá nyivi nu naa

¹⁴ 'Nyooho cuvɪ ndo tumaa ñuhɪ tsa jandunditsín nu tsicá nyivi. Iin ñuu tsa canyii jiñi iin yucu, ña cua cuvi quihí xeehe tsi. ¹⁵ Ña tuhvá yo tyaá ñuhɪ tyuma, tan tyihí xeehe yo itsi tsitsi iin caja. Tyin tuhvá yo tyaá ñuhɪ tan tyiniyí yo itsi iin nu sucun tyin tacan tan jandunditsín tsi nu yucú yo tsitsi vehe yo. ¹⁶ Tan tacan taahán tsi jandunditsín tucu nyooho tsihin ñuhɪ Nyoo tsa iyó añima ndo nu tsicá nyivi. Tacan tan nyehe ñi tsa vaha tsa javahá ndo, tan jacahnu ñi tsi Jutu yo Nyoo, ra nyaá gloria.

Nu jacuahá ra Jesús tyin ñiñi xaan javaha yo tandihi tuhun tsa tsahá Nyoo tsi yo tan jacuahá yo itsi tsi nyivi

¹⁷ 'Ña cuñi ndo tyin yuhu vatsi janaa yu ley tsa tsahá Nyoo tsi ra Moisés tyin tyaa ra. Tan ndi ña vatsi janaa yu tuhun tsa tyaa tandihi ra cuvɪ ndusu yuhu Nyoo tahán tsanaha. Ñavin tyiñu can vatsi yu. Yuhu vatsi yu vatsi tyaa yahvi yu tsa caahán ley can, tan catyí tuhun yu tsihin ndo náa cuñi tsi catyí ley can. ¹⁸ Tsa nditsa catyí yu tsihin ndo tyin tsitsi tsa ndi iyó ñuhu ñayivi tan andivi, ña cua naa ndi luxu ley tsa tyaa ra Moisés tyin tandihi maa tsa tyaa ra naha tan cua cundaa tsi. ¹⁹ Yacan cuenda, ra tsa ña tyaá yahvi cuhva catyí Nyoo, vasu iin tsa luhlu ñi; tan janahá ra tsi nyivi na javaha ñi tacan, luxu cuii ñi cua cuvi ra nu ndacá ñaha Nyoo. Maa tyin ra tsa tyaá yahvi tandihi, tan janahá ra tsi inga nyivi, cahnu xaan cua cuvi ra nu ndacá ñaha Nyoo. ²⁰ Catyí yu tsihin ndo tyin tun ña tyaá yahvi vaha ca ndo tsi Nyoo tan ñavin ca tumaa javahá ra cuvɪ maestro cuenda ley vehe ñuhu naha ra, tan ra cuvɪ fariseo naha ra, ña cuvɪ quihvi ndo nu ndacá ñaha Nyoo.

Nu caahán ra Jesús tsihin yo tyin ña taahán tsi cahan yo tsi nyivi

²¹ 'Nyooho tsa cuaha tsaha tsiñi ndo tsa catyí Nyoo tsihin nyivi tsicoq tahán tsanaha. Catyí ra: "Ña cahñi ndo tsi nyivi, tyin tatun cahñi ndo nyivi, taahán tsi tsa cutuñi ndo."

²² Maa tyin yuhu, catyí yu tsihin ndo, tyin vasu tsa cuxaán ñi ndo tsi iin nyivi, vasu tsa caahán nyaa ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyí ndo tyin soho xaan caá ñi, taahán tsi cahun ndo anyaya tsa cuenda cuatyí can.

²³ 'Tan yacan cuenda quivi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javahá un tsi yañi un, ²⁴ nacoo tsa cuahán tsihin un ityi nu altar vehe ñuhu. Tan cahun jihna un ndacan un tucahnu iñi tsi yañi un. Tacan tan cahun un nda vehe ñuhu inga tsaha, tan cuhva cuenda un tsa cua jamañi un tsi Nyoo.

²⁵ 'Tatun iin ra tsicán cuatyí tsaha un, tan cuahán un tsihin ra nda nu nyaá ra cumi tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumi tyiñu, tyin ra cumi tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihí ra naha tsi un vehe caa. ²⁶ Tan tsa nditsa catyí yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandihi xuhun tsa cua ndacan ra naha.

Nu caahán ra Jesús tyin ndi tsa tsicá iñi yo tsa coo inga ñaha, o inga rayii tsi yo, tan ña vaha

²⁷ 'Nyooho tsa tsiñi ndo tyin catyí Nyoo tahán tsanaha tyin nyooho tsa iyó ñasihi, ña cua coo inga ñaha tsi ndo, tan ndi ñaha tsa iyó yii tan ña taahán tsi coo inga rayii tsi ña. ²⁸ Maa tyin yuhu catyí yu tsihin ndo, nyooho tsa nyehé iin ñaha tan cuñi ndo coo ndo tsihin ña, tsa tsicoq cuatyí ndo.

²⁹ 'Tatun tinuu cuaha un janacavá tsi un tsitsi catyí, vaha taxin ca tava un tinuu un tan javita un can. Tyin vaha ca quihvi un nu ndacá ñaha Nyoo tsihin intuhun ñi tinuu un, tan ñavin ca tsa cahun un anyaya tsihin nduvi taahan tsi. ³⁰ O tatun iin ndaha un janacavá tsi un tsitsi cuatyí, vaha taxin ca cahnya un ndaha un tan javita un can. Tyin vaha ca tsa quihvi un nu ndacá ñaha Nyoo tsihin tsa lundu ndaha un, tan ñavin ca tsa nani un tan cahun un anyaya.

Nu caahán ra Jesús tyin ña vaha tsa nacoo ihñi rayii tsi ñasihi ra

(Mt. 19.9; Mr. 10.11-12; Lc. 16.18)

³¹ 'Tan juvin ñi catyí Nyoo tsihin nyivi tsicoq tahán tsanaha tyin yoo ra nacoo ihñi ñasihi ra, cuñi tsi tsa caní ra tutu tsa tindahá ra tsihin ña. ³² Maa tyin catyí yu tsihin ndo tyin nduve ndatu iyó tsi rayii tsa nacoo ra ñasihi ra tatun ña quituví ña tsihin inga rayii. Tyin tatun nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatun quihin ña inga rayii cua coo

ndihi cuatyí ña. Tan tacan ra tsa cua quihin tsi ña cua coo ndihi cuatyí ra.

Ña cahan yo “naha Nyoo maa”

³³ “Tan tsiñi ndihi ndo, tyin catyi tucu Nyoo tsihin nyivi tsioco tahañ tsanaha: “Tatun catyi ndo ‘naha Nyoo maa’ tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo.” ³⁴ Maa tyin yuhu catyi yu tsihin ndo tyin ña cahan ndo “naha Nyoo maa”. Tan ña cahan ndo tuhun andivi, tyin yacan cuví nu nyaá Nyoo. ³⁵ Tan ndi tuhun ñuhu ñayivi ihya ña cahan ndo, tyin ihya cuví nu tsañi Nyoo. Tan ndi ña cahan ndo tuhun ñuu Jerusalén, tyin ican cuví ñuu maa Nyoo tsa cuví ra Rey cahnu ca. ³⁶ Tan ndi ña cahan ndo tuhun jiñi ndo, tyin ña cuví jan-ducuitsin ndo tan ndi tsa jandutuun ndo ndi intuhun ixi jiñi ndo. ³⁷ Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyi ndo “naha Nyoo maa” nu ña vaha jacahán tsi ndo tsa cahan ndo tacan.

Nu caahán ra Jesús tyin tatun javahá nyivi tsa ña vaha tsihin yo, na javaha yo tsa vaha tsihin ñi

(Lc. 6.29-30)

³⁸ Tan tsiñi tucu ndo tsa catyi Nyoo tahañ tsanaha: “Tatun cañi nyivi tsi ndo, tan tavá ñi iin nuhu ndo, o iin tinuu ndo, taahán tsi tyin javaha ndihi ra cumi tyiñu tacan tsihin ñi, tumaa tsa javahá ñi tsihin ndo.” ³⁹ Maa tyin yuhu catyi yu tsihin ndo, tyin ña javaha ndo tsa ña vaha tsa javahá nyivi tsa caahán nyihe tsi ndo. Tyin tun yóo cañi iin tsiyo nuu ndo, taahán tsi tsa cuhva ndihi ndo inga tsiyo na cañi ndihi ñi, tan ña cuxaan ndo tsi ñi. ⁴⁰ O tatun tsiacán ñi cuatyí saha ndo, tan cuñi ñi quihin nyaa ñi iin camisa ndo. Taahán tsi cuhva ndihi ndo camarra ndo tsi ñi tan ña cua cuxaan ndo tsi ñi. ⁴¹ O tatun yóo cuñi cundaca ndo ndaha tyiñu ñi iin kilómetro, taahán tsi cundaca ndo can uvi kilómetro. ⁴² Tatun yóo nyivi tsiacán tumañi iñi tsi ndo, cuhva ndo tsa nducu ñi. Ña catyi ndo tyin ña javaha ndo tumañi iñi can tsi ñi.

Na cuñi yo tsi nyivi xaan iñi tsi yo

(Lc. 6.27-28, 32-36)

⁴³ “Tan tsiñi tucu ndo tyin catyi Nyoo tahañ tsanaha: “cuñi ndo tsi ra vaha iñi tsi ndo. Tan xaan cuñi ndo nyihe ndo tsi ra xaan iñi tsi ndo.” ⁴⁴ Maa tyin yuhu catyi yu tsihin ndo, cuñi ndo tsi nyivi xaan iñi tsi ndo. Tan javaha ndo tsa vaha tsihin nyivi caahán tsi ndo, tan tsi nyivi ña cuñi nyihe tsi ndo. Tan ndacan tahvi ndo tsi Nyoo tsa cuenda nyivi tsa caahán nyaa tsi ndo tan tsa cuenda ñi tsa jacuvi tsa uhvi tsi ndo. ⁴⁵ Tatun javahá ndo tacan, cuví ndo sehe Jutu yo ra nyaá gloria. Tyin maa ra jacaná ra ñicanyii, tan

jacuún ra savi nuu tyiñu jahá nyivi vaha tan nyivi ña vaha. ⁴⁶ Tatun nyoocho tan cuñi ndo tsi nyivi vaha iñi tsi ndo tan ndasi cuñi ndo nyihe ndo tsi nyivi xaan iñi tsi ndo, nduve tsa vaha cua ñihi ndo. Tyin juvin ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñi maa ndo tyin quihni xaan iyó ra can naha ra. ⁴⁷ Tatun tsaahá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyivi, nduve tsa vaha xaan javahá ndo. Tyin juvin ñi tacan javahá nyivi tsa ña tsitó tuhun Nyoo. ⁴⁸ Tumaa Jutu yo tsa nyaá gloria cuiti xaan iyó ra, tacan taahán tsi coo tucu nyoocho.

6

Nu caahán ra Jesús nácaa javaha yo tumañi iñi

¹ “Jaha ndo cuenda tan ña nduyaa ndo náa tumañi iñi javaha ndo tsi nyivi. Tyin tatun javaha ndo tumañi iñi tyin nyihe nyivi, Jutu yo, ra nyaá gloria, nduve náa cua cuhva ra tsi ndo. ² Tun cua javaha ndo tumañi iñi, ña cua jacoto ndo tsi inga nyivi tyin javahá ndo tumañi iñi. Ña javaha ndo tumaa icá ra tsa jahá tyin vaha xaan ra tan tsiacán nuu ra naha nuyahvi tan tsitsi vehe ñuhu. Javahá ra naha tumañi iñi tyin na catyi nyivi tyin vaha xaan iñi ra naha. Yacan ñi ñihi ra can naha ra, tan nduve náa cua cuhva Nyoo tsi ra naha. ³ Yacan cuenda quivi javahá ndo tumañi iñi tsi nyivi ndaahvi, ña jacoto ndo ndi tsi ra tsa vaha xaan ca iñi tsi ndo. ⁴ Xeehe ñi jatyinyee ndo tsi ñi ndaahvi. Tan Jutu yo Nyoo cua nyihe ra tsa javahá ndo tacan. Tan cua cuhva ra tsa vaha tsi ndo.

Nu caahán ra Jesús nácaa ndacan tahvi yo tsi Jutu yo Nyoo

(Lc. 11.2-4)

⁵ “Tatun cua ndacan tahvi ndo tsi Nyoo, ña javaha ndo tumaa javahá ra tsa jahá tyin vaha xaan ra naha. Tyin ra ican naha ra tuhvá ra naha tsiacán tahvi tsi Nyoo nu tuvi nyivi, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyivi tyin vaha xaan ra naha. Tsa nditsa catyi yu tsihin ndo tyin yacan ñi ñihi ra naha. ⁶ Maa tyin nyoocho quivi tsa ndacan tahvi ndo tsi Nyoo, ña ndacan tahvi ndo tsi ra nu nyihe nyivi tsi ndo. Quihvi ndo tsitsi vehe ndo tan nacasí ndo yuvehe ndo tan ndacan tahvi ndo tsihin tsa nñi iñi aña ndo. Tan intuhun ñi maa Nyoo Jutu yo cua nyihe ra tsa javahá ndo tacan tyin nuu maa ra tsiacán tahvi ndo, tan ñavin nuu nyivi. Tan cua cuhva ra tsa vaha tsi ndo.

⁷ “Tatun cua cahan ndo tsihin Nyoo, ñavin juvin ñi tuhun tsa nduve yahvi nyaa cahan ndo. Tacan javahá nyivi tsa ña tsitó tsi Nyoo. Cuñi maa ñi tyin tacan tan cua tyaa soho

Nyoo tsa caahán ñi, tyin cuaha xaan tsaha caahán ñi juvin ñi tuhun tsa tsa yahá cahan ñi. ⁸ Ñajavaha ndo tacan. Tyin Nyoo tsa tsitó ra náa tsiñi ñuhu tsi ndo tsa ndi cumañi ca ndacan ndo tsi ra. ⁹ Yacan cuenda nyoocho, tatun cua ndacan tahvi ndo tsi Nyoo, tyehen catyi ndo:

Jutu Mañi ndi, tsa nyaá un gloria.

Jacahnú xaan ndi tsi un.

¹⁰ Na quitsi tsa ndaca ñaha un nu ñuhu ñayivi ihya,

tan na javaha tandihi nyivi tandihi cuhva cuñi maa un, tumaa cuvi nda gloria.

¹¹ Cuhva tsa catsi ndi tahan tahan quivi.

¹² Jaha tucahnu iñi tsi ndi náa tsa ña vaha javahá ndi, tumaa tsa jahá maa ndi tucahnu iñi tsi nyivi tsa javahá tsa ña vaha tsi ndi.

¹³ Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuvi ra jacacú tsi ndi ndaha nu ña vaha.

Tan maa un cuvi ra ndacá ñaha tsi ndi. Tan iyó tandihi tunyee iñi tsi un. Tan taahán tsi tyin jacahnu tandihi nyivi tsi maa ñi un tandihi maa quivi tan na ña cundihi tsi. Na cuvi tsi tacan ñi.

Tyehen taahán tsi ndacan tahvi ndo tsi Nyoo.

¹⁴ Tyin tatun nyoocho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo. ¹⁵ Maa tyin tatun ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyi ra Jesús.

Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi

¹⁶ Tan catyi tucu ra Jesús tsihin nyivi:

—Quivi tsa iyó nyitya ndo tyin nanducú ndo tsi Nyoo, ña cuiihya nyehe ndo, tumaa javahá nyivi jahá tyin vaha xaan ñi. Tyin cahyí ñi nyaa nuu ñi tyin cuñi ñi tsa nyehe nyivi tyin iyó nyitya ñi tan nanducú ñi tsi Nyoo. Catyi yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi. ¹⁷ Maa tyin nyoocho quivi tsa iyó nyitya ndo tyin nanducú ndo tsi Nyoo, nacatya ndo nuu ndo. Tan tyíhi ndo cuca jiñi ndo. ¹⁸ Tacan tan ña cua tuvi iñi nyivi tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehe tsa javahá ndo tsa xeehe ñi. Tan cuaha tsa vaha cua cuhva ra tsi ndo.

Tsa vaha tsa iyó nda gloria

(*Lc. 12.33-34*)

¹⁹ Ña jacaya ndo tsa cuca tsa iyó nu ñuhu ñayivi ihya. Tyin coto tivi tsi jaha tiquixin o jaha cuxi. O cuvi quihvi ñasuhu, tan suhu nu tandihi tsa jacaya ndo. ²⁰ Vaha ca jacaya

ndo tsa cuca tsa iyó nda gloria. Tyin ña cua cundihi tsi ndacan. Tyin ña cuvi tivi tsi ndacan, tan nduve quiti jativi itsi, ndi nduve ñasuhu. ²¹ Tyin nu natyihí vaha ndo tsa cuca, ican cua cunyaa ndihi aña ndo.

Nu caahán ra Jesús tyin na jaha yo cuenda ñuhu nditsin tsa tyihí ra aña yo

(*Lc. 11.34-36*)

²² Tinuu ndo cuvi ñuhu nditsin tsi ndo. Tatun vaha tinuu ndo, tani cuñi ñuhu ndo tan iyó ñuhu nditsin. [Tan tuhun ihya cuñi tsi catyi tyin tatun iyó ñuhu nditsin Nyoo aña ndo cuvi ndo nyivi vaha.] ²³ Maa tyin tatun ña vaha tinuu ndo, tandihi cuñi ñuhu ndo tan nyii tsi nu naa. Tan tacan tucu tatun nduve ñuhu Nyoo iyó aña ndo, [cuví ndo tumaa iin ra cuaa. Nu naa cuahán ndo tan ña cuvi nyehe ndo ityi vaha tsa cuahán nu nyaá Nyoo].

Nu caahán ra Jesús tyin ña cuvi tyaaayahvi yo tsi Nyoo tatun cuñi xaan ca yo xuhun

(*Lc. 16.13*)

²⁴ Iin musu ña cuvi coo uvi tsitoho ra. Tyin musu can cuñi ca ra tsi iin ra tan ñavin ca tsi inga ra. Tan tyaa yahvi ra tsi iin ra, tan ñavin ca tsi inga ra. Tan tacan tucu nyoocho, ña cuvi cuñi ndo tsi Nyoo, tan cuñi tucu ndo xuhun.

Nu caahán ra Jesús tyin ña caca xaan iñi yo nda ndihi tsa tsiñi ñuhu tsi yo

(*Lc. 12.22-31*)

²⁵ Yacan cuenda catyi yu tsihin ndo, tyin ña caca xaan iñi ndo nácaa ñihí ndo tsa catsi ndo tan tsa coho ndo. Ndi ña caca iñi ndo nácaa ca ñihí ndo jahma ndo. Tyin nu Nyoo nyaá yahvi ca ñayivi tsa iyó yo tan ñavin ca tsa catsi yo. Tan nyaá yahvi ca cuñi ñuhu yo tan ñavin ca jahma yo. [Tyin maa ra tsahá ra ñayivi iyó yo. Tan ña yii cuhva ra inga tsa tsiñi ñuhu tsi yo]. ²⁶ Nyehe ndo cuhva iyó saa. Ña tatsí ti itu. Tan ña jahá tyiñu ti. Tan ndi ña tyihí vaha ti tsa catsi ti. Maa tyin tsatsi ti tyin Jutu yo Nyoo ra nyaá gloria tsahá ra tsa catsi ti naha ti. Tan nuu Nyoo cahnu ca cuvi nyoocho tan ñavin ca saa can naha ti. ²⁷ Tan vasu ndi maa tsicá xaan iñi ndo maa tyin ña cua cuvi jandusucun ca ndo ndi luxu ca tsi ndo.

²⁸ Tan tatun ndi luxu can ña cuvi tsi ndo, ñácaa tsa tsicá xaan iñi ndo tsa cuenda jahma ndo? Nyehe ndo nácaa iyó yutun ita tsitsi cuhu, tyin ña jahá tyiñu tun tan ndi ña tavi tun yuhva. ²⁹ Maa tyin catyi yu tsihin ndo tyin ndi ra cuvi rey Salomón tsihin tandihi tsa cuca ra, tan ña tsinditsi ra jahma sii ca caá tan ñavin ca tsa jacunditsi Nyoo tsi yutun ita can. ³⁰ Tatun tacan ñi jacunditsi Nyoo tsi yutun ita tsa iyó tsitsi cuhu vityin, tan tyaan cua cuvi tun nducu tan cayu tun. ¿A ña ca jatyinyee cuaha ca ra tsi ndo? Tyin

nyooho cahnú ca cuví ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra. ³¹ Yacan cuenda ña cua caca xaan iñi yo tan catyí yo: “¿Náa cua catsi yo, o náa cua coho yo, o nácaa cua ñihi yo jahma cunditsi yo?” ³² Tyin nyivi tsa ña tsitó tsi Nyoo tsicá xaan iñi ñi yacan. Maa tyin nyooho ña caca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndihi tsa tsíñi ñuhu tsi ndo. ³³ Yacan cuenda, caca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandihi tsa tsíñi ñuhu tsi ndo. ³⁴ Jahá cuenda Nyoo tsi ndo vityin tan ityaan. Yacan ña caca iñi ndo tsa tsíñi ñuhu tsi ndo ityaan. Caca iñi ndo tan nyehe ndo nácaa yahá ndo quívi vityin jahá Nyoo.

7

Ña cahan yo tsa caá inga nyívi
(Lc. 6.37-38, 41-42)

¹ Ña cahan ndo tsa caá inga nyívi, tacan tan Nyoo ña cua cahan ra tsa caá ndo. ² Tyin tumaa caahán ndo tsa caá inga nyívi, tacan cua javaha Nyoo tsihin ndo. Tan tumaa tsa javahá ndo tsihin inga nyívi, juvin ñi tacan cua javaha Nyoo tsihin ndo. ³ ¿Nácaa tyin nyehe un tsahan luhlu tsa nyíi tinuu yañi un, tan ña jahá un cuenda yutun cahnú tsa nyíi tinuu maa un? ⁴ Tatun tinuu maa un nyíi iin yutun cahnú, ¿nácaa cuví catyí un tsihin ra yañi un: “Naha, na tava yu tsahan luhlu tsa nyíi tinuu un?” ⁵ ¡Yooho tsa jahá tyin vaha xaan un! Tava jihna yutun cahnú tsa nyíi tinuu un. Tyin tacan tan cuví nyehe vaha un tsahan luhlu tsa cua tava un tinuu yañi un.

⁶ Ña jañihi ndo cahan ndo tuhun Nyoo tsihin nyívi ña cuñi coto tyin coto cañi ñi tsi ndo. Tyin cuví ñi tumaa ina tsa caán xaan tsi ndo, tan tumaa quini tsa tsacá tsaha iin ndaha tyíñu tsa yahvi nyaá, tyin caahán ñi tsa ndavaha ñi siquí tuhun Nyoo.

Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo
(Lc. 11.9-13; 6.31)

⁷ Ndacan ndo tsa tsíñi ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña. ⁸ Tyin tandihi nyívi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

⁹ Tacan tucu nyooho tsihin sehe ndo. Tsahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi? ¹⁰ O tatun tsicán tsi tyaca, ¿a cua cuhva ndo iin coo itsi? ¹¹ Nyooho vasu ndi maa quíñi iyó

ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatun ndacan ndo tsi ra.

¹² Tumaa cuñi ndo tsa javaha nyívi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsahá Nyoo tsi ra Moisés tan tacan tucu nyaá nu tandihi libru tsa tyaa ra cuví ndusu yuhu Nyoo tahañ tsanaha.

Yuvehe tihin tan ityi cuñi tsa cuahán nu nyaá Nyoo
(Lc. 13.24)

¹³ Ndücu ndo cuhva quihvi ndo yuvehe tihin. Tyin quihin yuvehe, tan quihin ityi tsa cuahán nda nu cunaa nyívi anyaya. Tan cuaha xaan nyívi cuahán ityi can. ¹⁴ Maa tyin tihin yuvehe tan cuñi ityi tsa cuahán nu cuahán nyívi tsa ñihi ñayívi nyito coo ñi. Maa tyin ña cuaha nyívi nañihi ityi can.

Tsihin tsa javahá nyívi, tan nacotó yo tatun nyívi vaha, a nyívi ña vaha cuví ñi
(Lc. 6.43-44)

¹⁵ Jahá ndo cuenda tsi ndo tsihin ra vatya naha ra. Tyin catyí ra naha tyin ndusu yuhu Nyoo cuví ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuví ra naha. Maa tyin tumaa quiti xaan cuví ra naha. ¹⁶ Nyooho cuví nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuví ra naha. Tyin iin tinyata ña cua cuhva tun mangu, tan ndi iñu nduhva ña cuví cuhva tsi yucu vixi. ¹⁷ Tan tacan tucu tandihi yutun vaha. Tsahá tun tsiti vaha. Tan tandihi yutun ña vaha, tsahá tun tsiti ña vaha. ¹⁸ Tyin yutun vaha, ña cuví cuhva tun tsiti ña vaha. Tan ndi yutun ña vaha ña cuví cuhva tun tsiti vaha. ¹⁹ Tan tandihi yutun tsa ña tsahá tsiti vaha, cahnya yo tsi tun. Tan cayu tun. ²⁰ Tan tacan tsihin tsa javahá nyívi, cuví nacoto ndo tsi ñi tatun nyívi vaha o nyívi ña vaha cuví ñi.

Nu catyí ra Jesús tyin ña tandihi nyívi tan cua quihvi ñi nu ndacá ñaha Nyoo
(Lc. 13.25-27)

²¹ Ña tandihi nyívi tsa catyí tsihin yu: “Jutu Mañi yu, Jutu Mañi yu”, cua quihvi ñi nu ndacá ñaha Nyoo nda gloria. Maa tyin nyívi tsa javahá tsa catyí maa Nyoo Jutu yu, juvin ñi can cua quihvi nu ndacá ñaha ra. ²² Quívi tatsi tuñi Nyoo tsi nyívi, cuaha xaan ñi cua catyí ñi tsihin yu tyehen: “Jutu Mañi yu, nyuhu cahan ndi tuhun cun tsihin nyívi. Tan tsihin sivi un tava ndi tatyi ña vaha tsa yihí tsi ñi. Tan cuaha xaan tsa iyo javahá ndi tsihin sivi un”, cua catyí ñi tsihin yu. ²³ Tacan tan yuhu cua catyí yu tsihin ñi: “Ña nacotó yu tsi nyooho. Cätsiyo nyaha ndo nu

nyaá yu tandihí nyoocho tsa javahá maa maa ñi tsa ña vaha”, cua catyí yu tsihin ñi.

Nu caahán ra Jesús nácaa cua cacu nyívi tsa tyaa yahvi tuhun caahán ra, tan nyívi tsa ña tyaa yahvi tsa caahán ra, ña cua cacu ñi
(Lc. 6.47-49; Mr. 1.22)

²⁴ Tacan catyí yu tsihin ndo, tyin nyívi tsa tsiñi tsa caahán yu tan javahá ñi cuhva cuñi yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava. ²⁵ Tan quitsahá cuún ñihi savi. Tan cuaha xaan ndutya ñuhu yahá tsata vehe can. Tan ñihi xaan quitsahá yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava. ²⁶ Maa tyin nyívi tsa tsiñi tuhun caahán yu, tan ña javahá ñi cuhva cuñi yu; cuví ñi tumaa iin ra soho, ra tsa javahá vehe nu nyiti. ²⁷ Tan quitsahá cuún ñihi savi. Tan cuaha xaan ndutya ñuhu yahá nu nyaá vehe ra. Tan ñihi xaan yihí tatyí. Tan vehe can iin yaha cuí ñi nduva tsi tan cunaq tsi —catyí ra Jesús tsihin ñi tsa nyicún tsi ra.

²⁸ Cuhva tsa ndihí cahán ra Jesús tsihin ñi, iyo xaan cuñi ñi tsihin tsa caahán ra, ²⁹ tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

8

Nu janduvahá ra Jesús tsi iin ra ndohó cuehe tyaahyú

(Mr. 1.40-45; Lc. 5.12-16)

¹ Cuhva tsa nuu ra Jesús yucu can, cuaha xaan nyívi nyicún tsi ra. ² Tan tsaq iin ra ndohó cuehe tyaahyú, tan tsiuñiñi tsiñi ra nuu ra Jesús, tan catyí ra tsihin ra:

—Jutu Mañi yu, tatun yoocho tan cuñi un, cuví janduvaha un tsi yu —catyí ra tsihin ra.

³ Tacan tan tyiso ndaha ra Jesús jiñi ra cuuhví can, tan catyí ra tsihin ra:

—Cuñi yu janduvaha yu tsi un. Cua nduvaha un vityin —catyí ra.

Tan iin yaha ñi nduvahá ra. ⁴ Tacan tan catyí ra Jesús tsihin ra:

—Jihna, coto ñahñi catyí tuhun un tsihin nyívi. Maa tyin çaahan nu nyaá ra cuví jutu, tan janaha un tsi un tsi ra. Tan cuhva un tsa taahán tsi jamañi un nuu Nyoo tumaa catyí ley Nyoo tsa tyaa ra Moisés. Tan cua cuví tsi iin tsa ndaa tsi ra jutu can tan tsi nyívi tyin tsa nduvahá un.

Nu janduvahá ra Jesús tsi musu iin ra cuví capitán

(Lc. 7.1-10)

⁵ Quiñi tsa tsaq ra Jesús ñuu Capernaum, iin ra cuví capitán, ra ñuu Roma, tsaq ra nu nyíi ra Jesús tan caahán ndaahvi ra tsihin ra, ⁶ tan catyí ra:

—Jutu Mañi yu, musu yu ñihi xaan cuuhví ra, canyíi ra nu cama. Ña cuví nduvita ra tyin nduxii ra, tan yaha xaan cuhva cuñi ra.

⁷ Tan catyí ra Jesús tsihin ra:

—Cuhun maa yu tan cujanduvaha yu tsi ra —catyí ra tsihin ra.

⁸ Nacahan ra capitán can tan catyí ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun cahán ñi un tan musu yu cua nduvaha ra. ⁹ Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

¹⁰ Tan tsa tsiñi ra Jesús tsa cahán ra can, tan iyo xaan cuñi ra. Tan catyí ra tsihin nyívi tsa nyicún tsi ra:

—Tsa nditsa catyí yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya. ¹¹ Tan catyí yu tsihin ndo tyin cuaha nyívi inga ñuu cua quitsi ityi nu caná ñicanyii, tan ityi nu tyisó ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo. ¹² Tan nyívi tsa taahán tsi cuhun gloria, ña cua cuhun ñi, tyin cua cuhun ñi nu naa. Tan cua vacu tsaa ñi tan catsan ña cua cuví nuhu ñi tsa cuenda tsa xaan cuñi ñi tyin nyehe ñi tundoho —catyí ra Jesús tsihin nyívi nyicún tsi ra.

¹³ Tacan tan catyí ra tsihin ra capitán can:

—Çaahan, tan na nduvaha musu un tsa cuenda tyin tsinú iñi un tsi yu —catyí ra Jesús tsihin ra capitán.

Tan juvin ñi cuhva can nduvahá musu ra.

Nu janduvahá ra Jesús tsi tyiso ra Pedro

(Mr. 1.29-31; Lc. 4.38-39)

¹⁴ Tsa yahá can, tan cuahán ra Jesús yuvehe ra Pedro. Tan nyehe ra tsi ña tyiso ra, canyíi ña nu tsito tyin yihí cahñi tsi ña.

¹⁵ Tan tñin ra ndaha ña, tan iin yaha ñi quita cahñi tsi ña. Tan nduvitá ña, tan quitsahá nanducú ña tsa catsi ra naha.

Nu cuaha xaan nyívi cuuhví janduvahá ra Jesús

(Mr. 1.32-34; Lc. 4.40-41)

¹⁶ Tan tsa cunaaha, cuaha xaan nyívi yihí tatyí ña vaha tsindacá nyívi tsi ra Jesús. Tan tsihin intuhun ñi tuhun cahán ra Jesús tan quita tatyí ña vaha tsi ñi. Tan tandihí ñi cuuhví iin yaha ñi nduvahá ñi. ¹⁷ Tacan cuví tyin can tundaq tsa cahán Jutu Mañi yo tsihin yuhu ra Isaías, ra cuví ndusu yuhu ra tañan tsanaha. Tan catyí ra tyehen: “Maa ra quihñin ra cuehe tsa yihí tsi yo, tan quihñin nyaá ra tsa uhvi tsi yo.”

Nyívi tsa cuñi quihvi cuenda ra Jesús
(Lc. 9.57-62)

¹⁸ Tan tsa nyehe ra Jesús tyin cuaha xaan nyivi tsinu nduvi nu nyii ra, catyí ra tsihin ra tsicá tsihin ra tyin cua yaha ra naha inga tsiyo miñi. ¹⁹ Tacan tan tsaá iin ra maestro cuenda ley vehe ñuhu tan catyí ra tsihin ra:

—Maestro, cuñi yu cunyicun yu tsi un tandihi ñi ityi nu cuahán un —catyí ra.

²⁰ Tan ra Jesús catyí ra tsihin ra:

—Ñacuii iyó vehe ti. Tan saa iyó taca ti. Maa tyin yuhu Rayii tsa quee nda gloria, nduve nu maa cunyanaa luxu jiñi yu iyó —catyí ra.

²¹ Inga ra tsa tsicá tsihin ra nacahan ra tsihin ra:

—Taa, cuhva na cahun jihna yu cucutsi yu tsi jutu yu, —catyí ra.

²² Tan catyí ra Jesús tsihin ra:

—Naha yoocho quitsi nyicun un tsi yu. Tan nyivi ña iyó Nyoo aña na cucutsi tahan maa ñi tsi ñi tsitsi ñuhu tun tsihi ñi —catyí ra.

Nu jacutaxín ra Jesús tatyí xaan nu miñi
(Mr. 4.35-41; Lc. 8.22-25)

²³ Tacan tan quihvi ra tsitsi yutun ndoo tan ra tsicá tsihin ra cuahán ra naha tsihin ra. ²⁴ Tan ñihi xaan quitsaha yihí tatyí nu miñi can, tan cuaha xaan ndutya quihvi tsitsi yutun ndoo ra naha. Maa tyin ra Jesús quixi ra. ²⁵ Tan ra tsicá tsihin ra jandoto ra naha tsi ra, tan catyí ra naha:

—Jutu Mañi yu, jácacu tsi yo, tyin cuñi cunaa yo!

²⁶ Tan catyí ra Jesús tsihin ra naha:

—¿Nacuenda yuuhvi xaan ndo? ¡Nyoocho tsa luxu xaan tsinú iñi tsi yu! —catyí ra Jesús.

Tacan tan nduvita ra tan cahan ra tsihin tatyí tan tsihin ndutya, tan cutaxín tsi. ²⁷ Tan iyo xaan cuñi ra naha tan catyí ra naha:

—¿Yóo ra cuví ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

Nu nduvahá uvi ra ñuu Gadara ra yihí tatyí ña vaha naha ra
(Mr. 5.1-20; Lc. 8.26-39)

²⁸ Tacan tan tsaá ra naha inga tsiyo miñi nda nu ñuhu Gadara. Tan tsaá uvi taahan ra yihí tatyí ña vaha. Tan quita ra naha nu ñaña cumi sandu. Xaan xaan ra naha, tan yofi maa cuví yaha ityi can. ²⁹ Tan caná tsaá ra naha, tan catyí ra naha:

—¿Náa cuñi un tsihin ndi, yoocho Jesús Sehe Nyoo? ¿A vatsí un vatsí janyehe un tundoho tsi ndi tsa ndi cumañi ca tsaa quivi? —catyí ra naha jahá tatyí ña vaha can.

³⁰ Tan yatyin ñi can yucú cuaha quini tsatsi ti naha ti. ³¹ Tan catyí nu tatyí ña vaha can tsihin ra Jesús:

—Tatun cua tava un tsi ndi, cuhva tsa quihvi ndi tsitsi quini can naha ti —catyí nu tatyí ña vaha can nahnu.

³² —Vaha. Quihvi ndo —catyí ra Jesús.

Tan quita nu tatyí ña vaha can nahnu, tan quihvi nahnu tsitsi tandihi quini tsa nyecú can. Tan tandihi quini can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

³³ Tan ra jahá cuenda tsi quini can, tsinú xaan ra naha cuahán ra naha tsitsi ñuu, tan nacatyí tuhun ra naha tandihi tsa cuví tsi ra tsa yihí tatyí ña vaha can naha ra. ³⁴ Tacan tan tandihi nyivi ñuu can, tsaahan ñi tsinyehe ñi tsi ra Jesús, tan cahan ndaahvi ñi tsihin ra na quita ra ñuu can.

9

Nu janduvahá ra Jesús tsi iin ra xii
(Mr. 2.1-12; Lc. 5.17-26)

¹ Tacan tan quihvi ra Jesús tsitsi iin yutun ndoo tan yahá ra miñi, tan tsaá ra nda ñuu nu iyó ra. ² Nu nyii ra ican, tsindaca nyivi tsi iin ra cuuhvi tsa ña cuví nacanda tyin nduxij ra, tan canyí ra nu tsito. Tan tsa nyehe ra Jesús tyin tsinú xaan iñi ñi tsi ra, quitsaha caahán ra tsihin ra cuuhvi can:

—Jandu iin iñi un, sehe yu, tyin tsa tsicoo tucahnu iñi cuatyí un —catyí ra Jesús tsihin ra.

³ Tacan tan quitsaha tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsicoo cuatyí ra nu Nyoo tsihin tuhun caahán ra”, cuñi ra naha tsicá iñi ra naha.

⁴ Maa tyin ra Jesús tsitó ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha?

⁵ Tyin ¿ndáa tsa yii ca catyí yo: a yii ca catyí yo: “Cuatyí un tsa yaha ndatsi”, o yii ca catyí yo: “Nduvita tan çaça un”? ⁶ Vityin cua janaha yu tsi ndo tyin yuhu Rayii tsa quee nda gloria, iyó ndatu tsi yu nu ñuhu ñayivi ihya tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhvi can:

—Nduvita, naquihin tsito un tan cuanuhu nda yuvehe un —catyí ra.

⁷ Tacan tan nduvita ra tan cuanuhu ra nda yuvehe ra. ⁸ Tan nyivi tsa nyehe tsa cuví, nayuhvi xaan ñi. Tan quitsaha jacahnú ñi tsi Nyoo tyin tsaahá ra tunyee iñi tsi nyivi.

Nu caná ra Jesús tsi ra Mateo
(Mr. 2.13-17; Lc. 5.27-32)

⁹ Yaha can tan quita ra Jesús ican. Tan nyehe ra tsi iin ra tsa nañi Mateo, nyaá ra naquihin ra xuhun tsa tyahvi nyivi Israel tsi ra ndacá ñaha. Tan catyí ra tsihin ra:

—Cohon tsihin yu.

Tacan tan nduvitá ra Mateo tan cuahán ra tsihin ra Jesús.

¹⁰ Tacan tan cuví tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tavá xuhun cuenda ra ndaca ñaha tsaq, tan tsihin inga ca ra iyó cuatyí naha ra. Tan tsinyecú ra naha iin ñi nu mesa tsihin ra Jesús tan tsihin ra tsicá tsihin ra. ¹¹ Tan tsa nyehe ra fariseo naha ra tyin nyaá ra Jesús tsihin ra iyó cuatyí naha ra, tan tsicá tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsi ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

¹² Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi ñuhu doctor tsi ñi. ¹³ Cuaahan ndo tan cutuhva ndo cuhva catyí nu tutu Nyoo, nu catyí tsi tyehen: “Yuhu cuñi yu tsa cundaahvi iñi ndo tsi nyivi, tyin yacan cuví tsa ñiñi xaan ca tan ñavin ca tsa cahñi ndo quiti tan cuhva cuenda ndo tsi yu.” Yuhu ña vatsi yu jatinyee yu tsi nyivi tsa tsicá iñi tyin vaha ñi, vatsi yu jatinyee yu tsi nyivi tsitó tyin iyó cuatyí ñi, na ndu uvi iñi ñi cuatyí ñi.

Nu tsicá tuhun nyivi tsi ra Jesús tatun taahán tsi tsa coo nyitya ñi
(Mr. 2:18-20; Lc. 5:33-35)

¹⁴ Tacan tan ra nyicún tsi ra Juan, ra ja-coondutya tsi nyivi, natuhvá ra naha nu nyaá ra Jesús tan tsicá tuhun ra naha tsi ra tan catyí ra naha:

—¿Nacuvi tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yoocho ña tuhvá ra naha coo nyitya?

¹⁵ Tan nacahan ra Jesús tan catyí ra:

—¿A cuví cunyecu cuihya nyivi yucú vico tindaha tun nyíi ra cua tindaha tsihin ñi? Maa tyin coo quivi cua quita ra tindaha ican nu yucú ñi. Tacan tan cua coo ñi tucuihya iñi tan cua coo nyitya ñi.

Nu caahán ra Jesús tyin ña nacatsí tahan tuhun tsahnu tsa iyó nyivi tsihin tuhun tsaa tsa jacuahá ra tsi ñi

(Mr. 2:21-22; Lc. 5:36-39)

¹⁶ Ña tuhvá nyivi naquicú iin jahma tuhuh tsihin iin jahma tsaa, tyin cua nandiyi nu naquicú ñi tsihin tsa tsaa can, tan cua tyahnya tsi inga tsaha. ¹⁷ Tan tacan tucu, ña cuví tyihí nyivi vinu tsaa tsitsi ñi tsahnu tyin tatun tacan javaha ñi, cua tyahnya ñi can, tan cua tiví vinu can tan cua tiví ndihi tucu ñi can. Yacan cuenda taahán tsi tyihí yo vinu tsaa tsitsi ñi tsaa. Tyin tacan tan ña tyahnya ñi can tan ndi vinu can ña tiví tsi.

Nu nduvahá ñaha sehe ra Jairo tan ñaha tsa tñin jahma ra Jesús

(Mr. 5:21-43; Lc. 8:40-56)

¹⁸ Tsitsi tsa caahán ra Jesús tuhun ihya, tsaq iin ra cumí tyiñu cuenda vehe ñuhu nyivi Judea tan tsicuiñi tsi ra nuu ra Jesús, tan catyí ra:

—Ndi tsihi cuii ñi sehe yu, maa tyin tatun yoocho tan cuhun un tan tyiso ndaha un jiñi ña, cua nandoto ña —catyí ra tsihin ra Jesús.

¹⁹ Nduvitá ra Jesús tsihin ra tsicá tsihin ra tan cuahán ra naha tsihin ra.

²⁰ Tacan tan iin ñaha cuuhví natuhvá ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuñu ñiñi ña. Tan tyanaq ña ndaha ña jahma ra, ²¹ tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

²² Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Janduní iñi un, xihí, tsa nduvahá un tyin tsinú iñi un —catyí ra.

Tan juvin ñi cuhva can tan tsicuiñi tsa cuñu ñiñi ña.

²³ Yahá can tan tsaq ra Jesús vehe ra cumí tyiñu can, tan nyehe ra tyin ra música ndatú ra naha tsa cucutsi ra naha tsi ndiyi can. Tan nyivi tsa yucú can iyo xaan tsacú ñi. ²⁴ Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixí ña —catyí ra.

Tan tsa cahan ra tacan quitsahá tsacú naaha ñi. ²⁵ Tan ra Jesús tava ra tsi ñi ityi tsata vehe. Tacan tan quihví ra tsitsi vehe nu canyí ñaha can, tan tñin ra ndaha ñaha luhlu can, tan nduvitá ña. ²⁶ Tan tandihí nyivi iyó ityi ñuu can tsitó ñi tsa nandoto ñaha luhlu can.

Nu janduvahá ra Jesús tsi uvi taahan ra cuaa

²⁷ Tsa quitá ra Jesús ican, tan uvi taahan ra cuaa nyicún tsi ra, caná tsaa ra naha tan catyí ra naha:

—¿Cundahvi iñi tsi ndi, yoocho ra cuví tata ra David! —catyí ra naha.

²⁸ Tan tsa yahá quihví ra Jesús tsitsi vehe, ra cuaa can, natuhvá ra naha nu nyaá ra, tan maa ra Jesús quitsahá tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi ndo?

Tan nacahan ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

²⁹ Tacan tan tyanaq ra Jesús ndaha ra tinuu ra naha tan catyí ra tsihin ra naha:

—Na cuvi maa tumaa cuhva tsinú iñi ndo —catyí ra.

³⁰ Tan nduvahá tinuu ra naha. Tan catyí ra Jesús tsihin ra naha:

—Coto ñahñi catyi tuhun ndo tsihin ndi intuhun nyivi.

³¹ Maa tyin cuahán ra naha tan quitsaha catyi tuhun ra naha tsa javaha ra Jesús tsihin ra naha tsihin tandihi nyivi iyó ityi ñuu can.

Nu janduvaha ra Jesús tsi iin ra ñiihi

³² Tsa cuahán ra naha, juhva nyivi tsindaca ñi tsi iin ra ñiihi tsa yihí tatyí ña vaha nu nyii ra Jesús. ³³ Tan tsa tava ra Jesús tatyí ña vaha can, tacan tan nacahan ra can. Tan iyo xaan cuñi nyivi, tan catyi ñi:

—Ñaha ca maa nyehe yo ñuu Israel ihya ndi intuhun ra tava tatyí ña vaha tsi nyivi —catyi ñi.

³⁴ Maa tyin ra cuví fariseo naha ra, catyi ra naha:

—Ra ihya tava ra tatyí ña vaha tsihin tunyee iñi nu ña vaha tsa cuví ityi nuu tsihin nahnu —catyi ra naha.

Nu caahán ra Jesús tyin ña cuaha maa nyivi jahá tyiñu cuenda Nyoo iyó

³⁵ Ra Jesús tsahan ra tandihi ñuu jacuahá ra tsi nyivi tsitsi vehe ñuhu intuhun intuhun ñuu. Caahán ra tuhun Nyoo nácaa ndacá ñaha ra tsi nyivi. Tan janduvahá ra tandihi nuu cuehe tsa ndohó ñi. ³⁶ Tan tsa nyehe ra tsi nyivi, cundaahvi xaan iñi ra nyehe ra tsi ñi, tyin nyehe ñi tundoho tan iyó ñi tucuihaya iñi, tumaa mbee ticatyí tsa nduve tsitoho iyó. ³⁷ Tacan tan catyi ra tsihin ra tsicá tsihin ra:

—Tsa nditsa, cuaha xaan tyiñu iyó, maa tyin ra jahá tyiñu, ña cuaha ra naha. ³⁸ Yacan cuenda, ndacan ndo tsi Ra Jatsii tyiñu ihya, na jaquitsi ca ra musu naquihin vaha cosecha ra.

10

Nu nacatsi ra Jesús tsa utsi uvi ra cua caca tyiñu ra

(Mr. 3.13-19; Lc. 6.12-16)

¹ Tacan tan cana ra Jesús tsi tsa utsi uvi ra tsicá tsihin ra tan tsaha ra ndatu tsi ra naha na tava ra naha tatyí ña vaha tsa yihí añima nyivi, tan na janduvaha ra naha tsi nyivi cuuhvi náa ndihi ca nu cuehe tan tsa uhvi.

² Ihya nyaá sivi tsa utsi uvi ra tsicá tyiñu ra: jihna ca, ra Simón, tsa nañi tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha; ³ tan ra Felipe; ra Bartolomé; ra Tomás; tan ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañi tucu Tadeo; ⁴ tan ra Simón ra nyii cuenda partido tsa cuñi cuhun cuatyí siqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

Nu tava tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo (Mr. 6.7-13; Lc. 9.1-6)

⁵ Tan tava tyiñu ra Jesús tsi tsa utsi uvi ra can naha ra, tan catyi ra tsihin ra naha:

—Ña cuhun ndo nu iyó nyivi tsa ñavin nyivi Israel cuví, tan ndi ña quihvi ndo ñuu tsa cayucú Samaria. ⁶ Cuaahan ndo nu yucú mbee tsa tsinaa tsa cuví nyivi Israel. ⁷ Cuaahan ndo cua cahan ndo tyin tsa tsaa quivi tsa cua cundaca ñaha Nyoo tsi nyivi. ⁸ Janduvaha ndo tsi nyivi cuuhvi, nyivi ndohó cuehe tyaahyú, tan nyivi yihí inga cuehe tsi. Janandoto ndo ndi. Tava ndo tatyí ña vaha yihí tsi nyivi. Tyin nyoocho naquihin ndo tunyee iñi ihya tsa cuatu ñi, janduvaha ndo nyivi tsihin tsi, tan ña ndacan ndo xuhun tsi ñi.

⁹ Ña cuiso ndo xuhun; ndi xuhun cuaan, ndi xuhun cuitsin, ndi xuhun cuaha.

¹⁰ Tan ña cuiso ndo ndi yunu tsa cuenda tsa caca ityi ndo. Intuhun ñi camisa tsa nditsin ndo cuhun tsihin ndo. Tan ña cuiso ndo inga pari nditsan. Tan ndi ña cundaha ndo yutun. Tyin ra jahá tyiñu, iyó ndatu tsi ra tsa coo yahvi ra.

¹¹ Tatun tsaa ndo iin ñuu cahnu o iin ñuu luhlu, nducu ndo iin nyivi vaha iñi, tan ndo ndo yuvehe ñi nda cuanda quita ndo ñuu can. ¹² Tatun cua quihvi ndo iin vehe, cuhva ndo nacumi tsi nyivi iyó yuvehe can. Tan catyi ndo tsihin ñi: “Na coo tsa vaha Nyoo añima ndo”. ¹³ Tan tatun nyivi iyó yuvehe can tan nacotó ñi tyin tsíñi ñuhu tsa vaha can tsi ñi, can ndoo can tsihin ñi. Maa tyin tatun ña tsitó ñi tyin tsíñi ñuhu tsa vaha can tsi ñi, naquihin nyico ndo can. ¹⁴ Tan tatun ña cuñi nyivi quihin cuenda ñi tsi ndo, tan ndi ña cuñi ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin ndoo maa cuatyí ñi siqui ñi. ¹⁵ Tsa nditsa catyi yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

Nu catyi tuhun tsi náa ndihi tundoho cua nyehe nyivi tsicá tyiñu Nyoo

¹⁶ Ñehe ndo! Tumaa mbee ticatyí cuví ndo, tan jacuhún yu tsi ndo nu yucú quit xaan. Nyityi jaha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan ti. ¹⁷ Jaha ndo cuenda tsi ndo tsihin nyivi tyin cua cuhva cuenda ñi tsi ndo tsi ra cumi tyiñu naha ra. Tan cua cañi ñi tsi ndo tsitsi vehe ñuhu. ¹⁸ Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví. ¹⁹ Maa tyin tatun nacuhva cuenda ñi tsi ndo tsi ra cumi tyiñu naha ra, ña caca iñi ndo nácaa cua cahan ndo, tyin

tatun tsaa cuhva tsa cua cahan ndo, Nyoo cua cuhva ra tuhun cahan ndo. ²⁰ Tyin ñavin maa ndo cua cahan, tyin maa Tatyi Ii Jutu yo Nyoo tsa iyó aña ndo cua cuhva ra tsa cahan ndo.

²¹ Yihí rayii cua xico ra naha juvin ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyivi cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyivi na cahñi nyivi can tsi ñi. ²² Tandihí nyivi, ndasi cua cuñi ñi nyehe ñi tsi ndo tsa cuenda yuhu. Maa tyin tatun ña jandihí ndo tsa tsinú iñi ndo tsi yu, tacan tan cua cacu ndo. ²³ Tatun nyaa ndaha ñi tsi ndo iin ñuu, cuhun ndo inga ñuu. Tyin tsa nditsa catyí yu tsihin ndo tyin tsa ndi cumañi ca cuhun ndo tandihí ñuu nu iyó nyivi Israel tan cua quitsi nyico yuhu, Rayii tsa quee nda gloria.

²⁴ Iin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra. ²⁵ Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho ra. Yacan cuenda tatun maa yu, ra jatsii vehe, tan catyí nyivi tyin cuví yu Beelzebú, nu cuví ityi nuu tsihin nu ña vaha, tacan tucu cua catyí ñi tsihin nyivi cuenda yu.

¿Yóo tsii taahán tsi nayuhvi yo, a tsii nyivi o tsii Nyoo?

(Lc. 12.2-7)

²⁶ Yacan cuenda ña nayuhvi ndo tsi nyivi, tyin nduve tsa nyii xeehe tsa ña cua quituvi. Tan nduve tsa xeehe tsa ña cua coto nyivi. ²⁷ Tandihí tsa caahán yu tsihin ndo tsacuaa, cahan ndo can tsinu cahñi. Tan tandihí tsa caahán xeehe yu tsihin ndo, ndaa ndo jiñi vehe caña tsaa ndo can, na coto tandihí nyivi. ²⁸ Ña nayuhvi ndo tsi nyivi tsahñi cuñu ñuhu yo, tyin ña cuví cahñi ñi aña yo. Vaha ca nayuhvi ndo tsi maa Nyoo, ra cuví janaa cuñu ñuhu ndo tan aña ndo tsitsi anyaya.

²⁹ Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cuhva maa Nyoo Jutu yo. ³⁰ Tyin nda cuanda ixi jiñi ndo tan tsitó Nyoo najava taahan tsi iyó, tyin tsa nacahvi ra intuhun intuhun tsi. ³¹ Yacan cuenda ña nayuhvi ndo. Nyoo, nyaá yahvi ca ndo nu Nyoo tan ñavin ca tsa cuaha saa.

Ña cua nayuhvi yo cahan yo tuhun ra Jesucristo tsihin nyivi

(Lc. 12.8-9)

³² Tandihí nyivi tsa caahán catsi tsihin nyivi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria

tyin nacotó yu tsi ñi. ³³ Maa tyin nyivi cua tyihí xeehe tsi yu nuu inga nyivi, tacan tucu yuhu cua tyihí xeehe yu tsi ñi nuu Jutu yu ra nyaá gloria.

Nu caahán ra Jesús tyin tsa cuenda ra tan cua cañi tahan nyivi tsihin tahan ñi

(Lc. 12.51-53; 14.26-27)

³⁴ Ña cuñi ndo tyin yuhu vatsí cuhva yu tsa coo taxin nyivi nu ñuhu ñayivi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan. ³⁵ Tyin yihí ñi cua tsinu iñi ñi tsi yu, maa tyin inga ñi ña cua tsinu iñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña. ³⁶ Tan yacan cuenda juvin ñi maa nyivi vehe ndo cua cuxaan iñi tsi ndo.

³⁷ Nyivi tsa cuñi ca tsi jutu ñi a tsi sihi ñi tan ñavin ca tsi yuhu, ña cuví cuví ñi nyivi cuenda yu. Tan nyivi cuñi ca tsi sehe yii ñi a sehe sihi ñi, tan ñavin ca tsi yuhu, ña cuví cuví ñi nyivi cuenda yu. ³⁸ Tan nyivi tsa ña cuñi nyehe tundoho tan ndi ña cuñi ñi cuhva ñi ñayivi iyó ñi tsa cuenda yu, ña taahán tsi cuví ñi nyivi cuenda yu. ³⁹ Tyin nyivi cuñi xaan ca ñayivi iyó ñi, cua cunaa ñi. Maa tyin nyivi cua cuhva ñayivi iyó ñi tsa cuenda yu, cua ñihi ñi ñayivi nyito coo ñi.

Nu caahán ra Jesús nácaa cua ñihi yo tsa vaha Nyoo

(Mr. 9.41)

⁴⁰ Nyivi tsa naquihín cuenda tsi nyoocho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquitsí tsi yu. ⁴¹ Nyivi naquihín cuenda tsi iin ra cuví ndusu yuhu Nyoo tyin Nyoo jaquitsí tsi ra, cua ñihi ndihi ñi tsa vaha tsa cua ñihi ra cuví ndusu yuhu Nyoo can. Tan nyivi naquihín cuenda tsi iin ra vaha tsa cuenda tyin ra vaha cuví ra, juvin ñi tsa vaha tsa cua ñihi ra vaha can cua ñihi ñi. ⁴² Tan yóo nyivi tsa cuhva intuhun vasu ndutya vitsin coho nyivi tsa nyicún tsi yu, cua ñihi ndihi ñi tsa cua cuhva Nyoo tsi ñi tsa nyicún tsi yu —catyí ra Jesús.

11

Nu jacuhun ra Juan tsi ra tsicá tsihin ra nu nyii ra Jesús

(Lc. 7.18-35)

¹ Tsa ndihí cahan ra Jesús tsihin tsa utsi uvi ra tsicá tsihin ra, tacan tan quita ra ican, tyin cua cahan ra tuhun Nyoo tsihin nyivi tsa iyó ñuu tsa cayucú ityi can.

² Tan ra Juan nyii ra vehe caa quivi can, tan ñihí tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyii ra. ³ Tan catyí ra naha tsihin ra:

—¿A juvin yooho cuví ra Cristo tsa nyaa tsa cua quitsi jacacu tsi ndi? O tatun ñavin un cuví, cuatu ndi tsi inga ra—catyí ra naha tsihin ra Jesús.

⁴ Nacahan ra Jesús tan catyí ra:

—Cuaahan ndo tan catyí tuhun ndo tsihin ra Juan tandihi tsa nyehé ndo, tan tsa tsiñi ndo. ⁵ Tan catyí ndo tsihin ra: nyivi cuaa nanyehé ñi, nyivi coxo nacacá ñi, nyivi ndohó cuehe tyaahyú nduvahá ñi, nyivi soho nacuñi ñi, tan nandotó nyivi tsa tsa tsihi, tan nyivi ndaahvi tsiñi ñi tuhun Nyoo nácaa cua cacu ñi.

⁶ Tan catyí ndo tsihin ra tyin sii xaan cua cuví tsi nyivi tsa nyicún tsi yu tun ña ndu uvi ñi ñi—catyí ra Jesús tsihin ra naha.

⁷ Tsa cuahán ra naha, tan quitsahá caahán ra Jesús tuhun ra Juan tsihin nyivi, tan catyí ra:

—Quivi tsa tsahan ndo tsinyehé ndo nu tsiqui, ¿náa cua nyehe ndo cuñi maa ndo? ¿A nyehe ndo iin ndoo tsa janduvá tatyí? ⁸ ¿O náa cuví tsa tsinyehé ndo? ¿A iin ra nditsi jahma vaha cua nyehe ndo? Ñavin. Tyin tsitó ndo tyin ra nditsi jahma vaha, iyó ra vehe ra cuví rey. ⁹ ¿A ña tsahan ndo tsinyehé ndo tsi iin ra cuví ndusu yuhu Nyoo? Juvín. Tyin ra ican cahnu ca cuví ra tan ñavin ca tandihi ra cuví ndusu yuhu Nyoo. ¹⁰ Juvín ñi tuhun ra Juan cuví tsa nyaá nuu tutu Nyoo. Tan catyí tsi tyehen:

Yuhu cua jacuhun yu iin ra cahan tuhun yu tsa ndi cumañi ca cuhun yu.

Tyin natyiso vaha ra ityi nu cua cuhun un.

¹¹ Tsa nditsa catyí yu tsihin ndo, tyin tsitsi tsa tandihi nyivi tsa tsicoq tan nyivi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyivi. Maa tyin ra tsa ndaca ñaha Nyoo aña, vasu ra lihli ñi cuví ra, cahnu ca ra cuví ra tan ñavin ca ra Juan.

¹² Nda cuanda quivi tsa tsaq ra Juan tan nda vityin, nyivi ñihi ñi, nducú xaan ñi cuhva ñihi ñi tsa cundaca ñaha Nyoo tsi ñi. ¹³ Ra Moisés cahan ra tuhun nácaa cua cundaca ñaha Nyoo tsi nyivi, tan tacan tucu tandihi ra cuví ndusu yuhu Nyoo. Tacan tan quitsi ra Juan jacotó ra tsi nyivi tyin tsa tsaq quivi tsa cua cundaca ñaha Nyoo. ¹⁴ Tan ra Juan cuví ra Elías ra tsa nyaá tsa cua quitsi, tun nyoocho tan cuñi ndo tsinu ñi ndo tsa caahán yu. ¹⁵ Nyoocho tsa iyó soho, tyaa soho ndo tsa caahán yu.

¹⁶ ¿Náa tsihin jandu inducu yu tsi nyoocho, nyivi tsa iyó quivi ihya? Tumaa ra nyihi cuví nyoocho. Tyin ra nyihi jasiqui nuyahvi. Caná tsa tahan ra naha tan catyí ra naha: ¹⁷ “Tivi ndi tiyoo tan ña tsañi ndo yaa. Tan tsitá ndi yaa cuihiya, tan ña tsacu ndo”, catyí ra nyihi. [Tan tacan cuví nyoocho tyin ndi intuhun cuhva ña taahán ñi ndo.] ¹⁸ Tyin ra Juan, ra jacoondutyá, quitsi ra tan ña

tsatsi vaha ra, tan ña tsihi ra vinu. Tan nyoocho catyí ndo tyin tatyí ña vaha yihi tsi ra. ¹⁹ Yahá can tan tsaq tucu yuhu Rayi tsa quee nda gloria. Tan tsatsi yu tan tsihi yu. Tan catyí ndo tyin tsatsi xaan yu tan tsihi xaan yu vinu, catyí ndo. Tan ña taahán ñi ndo tsa cutahán yu tsihin ra iyó cuatyí naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuñi ra tsi nyivi naquihín tuhun caahán yu tan tuhun cahan ra Juan, tan ñi ican cua janaha ñi tsi ndo tyin vaha tsa tsiñi tuñi Nyoo—catyí ra Jesús.

Nyivi ña cuñi naquihin cuenda tuhun caahán ra Jesús cua nyehe ñi tundoho (Lc. 10.13-15)

²⁰ Tacan tan quitsahá caahán ra Jesús tsihin nyivi tandihi ñuu nu javahá ra cuaaha tsa iyo, tyin ña nasamá ñi cuhva iyó ñi, tan catyí ra:

²¹ —¡Ndahvi nyoocho, nyivi ñuu Corazin! ¡Ndahvi nyoocho nyivi ñuu Betsaida! Tyin nyehé ndo tsa iyo tsa javahá yu tan ña nasamá ndo cuhva iyó ndo. Tan ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehe nyoocho vityin, numi xaan cua cunditsi ñi jahma tucuihiya ñi tan cua coso ñi nyaa nuu ñi: tyin ndu uvi ñi ñi cuatyí ñi. ²² Maa tyin catyí yu tsihin ndo tyin ñihi ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón. ²³ Tan nyoocho nyivi ñuu Capernaum, cuñi maa ndo tyin cundaa ndo nda gloria, maa tyin cua nuu ndo nda cuanda nu yucú nyivi tsihi anyaya. Tun tsatyin tsicoq tsa iyo nyehe ñi ñuu Sodoma tumaa tsa nyehé ndo ihya, ñuu can ña tsinaa tsi tan iyó tsi nda cuanda vityin. ²⁴ Maa tyin catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi nyoocho tan ñavin ca nyivi ñuu Sodoma.

“Cuhva ndo tsi ndo tsi yu, tan cuhva yu tsa quitatu ndo”, catyí ra Jesucristo (Lc. 10.21-22)

²⁵ Quivi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuu ñayivi. Tyin tyihi xeehe un tuhun ihya nuu ra tsitó xaan tan ra nyiti yu xaan naha ra. Tan jandunditsi un tuhun ihya nuu ra nyihi. ²⁶ Tacan Tyaa, tyin tacan cuñi maa un—catyí ra Jesús.

²⁷ Tacan tan catyí tucu ra tsihin nyivi:

—Jutu yu nacuhva cuenda ra tandihi tsa iyó tsi ra tsi yu. Yofi maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yofi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyivi tsa cuñi yu tsa nacotó tsi Jutu yu, cua janaha yu tsi ra tsi ñi. ²⁸ Tandihí nyoocho tsa tatú tyin jahá tyiñu

ndo, tan tsihin tundoho tsa iyó ndo, ñaha ndo nu nyaá yu, tan yuhu cua cuhva yu tsa quitatu ndo. ²⁹ Cuhva ndo tsa cundaca ñaha yu tsi ndo tan cutuhva ndo cuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu aña ndo. ³⁰ Ña yí tsa cuhva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

12

Quivi quitatú nyívi cuví tsi tan ra tsicá tsihin ra Jesús tuhún ra naha yoco itya trigu (Mr. 2:23-28; Lc. 6:1-5)

¹ Iin quivi quitatú nyívi, yahá ra Jesús mahñu nu iyó tsa tatsi nyívi. Tan tsaá soco tsi ra tsicá tsihin ra. Tan quitsahá tuhún ra naha yoco trigu can tan tsatsí ra naha. ² Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quivi quitatú yo —catyí ra naha tsihin ra.

³ Tan ra Jesús catyí ra tsihin ra naha:

—¿A ñaha ca cahvi ndo tsa javahá ra David tsihin ra cutahan tsihin ra quivi tsa tsaá soco tsi ra naha? ⁴ Quihví ra tsitsi vehe Nyoo, quihñ ra paan ii, tan tsatsí ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can. ⁵ ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiñu ra naha tsitsi vehe ñuhu quivi quitatú yo? Tan ñavin cuatyí cuví can. ⁶ Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu. ⁷ Nyoocho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñi ca yu javaha ndo cuví tsa cundaahvi iñi ndo nyehe ndo tsi nyívi tahan ndo, tan ñavin ca tsa cahñi ndo quiñi tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata nyívi tsa nduve cuatyí. ⁸ Yuhu, Rayñ tsa quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

Nu janduvahá ra Jesús tsi iin ra na ityi ndaha

(Mr. 3:1-6; Lc. 6:6-11)

⁹ Tacan tan quita ra Jesús ican, tan cuahán ra vehe ñuhu. ¹⁰ Tan ican nyíi iin ra tsa na ityi ndaha. Tan yucú tucu juhva ra nducú cuhva nácaa tan tyaa ra naha cuatyí tsi ra Jesús. Yacan cuenda tsicá tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyívi cuuhví quivi quitatú yo? —catyí ra naha tsihin ra Jesús.

¹¹ Tan nacahan ra Jesús tan catyí ra:

—¿Ndáa nyoocho, taton canacava iin mbee jana ndo tsitsi iin yavi quivi quitatú yo, a ña cua cuhun ndo tan tava ndo tsi ti? ¹² Tan ¿a ña nyaá yahvi ca iin nyívi tan ñavin ca mbee? Yacan cuenda taahán tsi javaha yo tsa vaha quivi quitatú yo —catyí ra.

¹³ Tacan tan catyí ra Jesús tsihin ra tsa na ityi ndaha can:

—Janacaa ndaha un —catyí ra.

Tan cuhva tsa janacaa ra ndaha ra, iin yaha ñi nduvahá tsi tumaa inga tsiyo. ¹⁴ Tacan tan quita ra fariseo naha ra cua natuhun tahan ra naha nácaa cua cahñi ra naha tsi ra Jesús.

Tsa cahan ra Isaías, ra cuví ndusu yuhu Nyoo, tsa cuenda ra Jesús tsihin tsanaha

¹⁵ Tsa tsito ra Jesús tyin nducú ra naha tsi ra, quita ra ican. Tan cuaha nyívi tsinyicun tsi ra. Tan maa ra janduvahá ra tsi tandihí ñi cuuhví. ¹⁶ Tan catyí ra tsihin ñi tyin na ña catyí tuhun ñi yóo ra cuví ra. ¹⁷ Tacan cuví tyin tacan cahan ra Isaías, ra cuví ndusu yuhu Nyoo tsihin tsanaha. Tan tyehen tyaa ra tuhun Nyoo:

¹⁸ Ra ihya cuví musu yu, ra tsa nacatsí vaha yu.

Cuñi xaan yu tsi ra, tan sii xaan cuñi yu tsihin ra.

Cua cuhva yu Tatyí Ii yu tsi ra.

Tan cua jacoto ra tsi nyívi tsa ñavin nyívi Israel cuví, nácaa cua janduvaha yu tsi ñi nuu yu.

¹⁹ Tan ña cua cahan yuhu ra tan ndi ña cua cana tsaa ra, tan ña cua cahan ñihi ra ityi cahnu.

²⁰ Tan ndi intuhun ndoo yacua, tan ña cua cahnu ndihí ra.

Tan ndi ña cua ndahva ndihí ra tiñuhu lihli nu caná luxu yuhma.

Nda cuanda coto tandihí nyívi tyin maa ra cuví ra ndacá ñaha tsi ñi.

²¹ Tan tandihí nyívi, tan cua cuita iñi ñi tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo (Mr. 3:20-30; Lc. 11:14-23; 12:10)

²² Tacan tan tsindaca nyívi tsi iin ra yihí tatyí ña vaha nu nyíi ra Jesús, cuaa ra tan ñihi ra. Tan ra Jesús janduvahá ra tsi ra. Tacan tan nacahan ra, tan nanyehé ra. ²³ Iyo xaan cuñi tandihí nyívi, tan catyí ñi:

—¿A ñavin ra ihya cuví tata ra rey David? —catyí ñi.

²⁴ Tan cuhva tsa tsiñi ra fariseo naha ra tsa caahán ñi, catyí ra naha:

—Tsihin tunyee iñi nu Beelzebú, nu cuví ityi nuu tsihin nu ña vaha nahnu, tavá ra ihya tatyí ña vaha —catyí ra naha.

²⁵ Maa tyin ra Jesús tsitó ra tsa tsicá iñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha,

tacan tan cundihi tyiñu tsa ndacá ñaha ra naha. Tan tatun iin ñuu o tandihi nyivi iin vehe tan cusin ñi, tacan tan cua tñi nu yucú ñi. ²⁶ Tan tacan tucu tatun nu ña vaha tan tava nu juvin ñi tahan maa nu, cuñi tsi catyi tyin ña iin ñi cuví nahnu, tan cundihi tunyee iñi tsa iyó tsi nahnu. ²⁷ Tan nyooho catyi ndo tyin tsihin tunyee iñi nu Beelzebú tavá yu tsi nu tatyí ña vaha nahnu. Tun tsatyin tavá yu tsi nahnu tumaa cuhva catyi ndo, yóo tsahá tunyee iñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá iñi ndo. ²⁸ Yacan cuenda catyi yu tsihin ndo, tyin yuhu tavá yu tatyí ña vaha tsihin tunyee iñi Tatyí Ii Nyoo. Tan cuñi tsi catyi yacan tyin nditsa tyin tsa tsaa cuhva ndacá ñaha Nyoo nu yucú ndo.

²⁹ Tan iyóo cuví quihvi tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun cuhñi jñha ra tsi ra can, tacan tan cuví quihin nyaa ra tandihi tsa iyó tsi ra.

³⁰ Nyivi tsa ña nyaá tumañi iñi tsihin yu, ñi xaan iñi tsi yu cuví ñi. Ñi tsa ña jatinyeé tsi yu tsa caahán yu tuhun Nyoo tsihin nyivi, cuñi tsi catyi tyin ña tsahá ñi tsa coto nyivi tuhun caahán yu.

³¹ Yacan cuenda catyi yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatun cua cahan ñi ndavaha ñi siqui Tatyí Ii Nyoo, yacan nditsa, ña cua jaha Nyoo tucahnu iñi tsi ñi. ³² Tan yóo nyivi tsa caahán tsa ndavaha ñi siqui yuhu Rayi tsa quee nda gloria, Nyoo cua jaha ra tucahnu iñi tsi ña cuenda can. Maa tyin nyivi tsa caahán tsa ndavaha ñi siqui Tatyí Ii Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayivi ihyá, tan ndi inga ñuu ñayivi tsa cua coo.

Tsihin tsa javahá nyivi tan nacoto yo tsi ñi tatun vaha ñi a ña vaha ñi
(Lc. 6.43-45)

³³ Iin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo tatun yutun vaha cuví tun tsa cuenda tsiti tun. ³⁴ ¡Nyooho, nyivi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyivi caquiñi cuví ndo? Tyin tsa quitá tsitsi añima yo, yacan caahán yo. ³⁵ Nyivi vaha, vaha caahán ñi tyin yihí tsa vaha añima ñi. Tan nyivi caquiñi, tsa caquiñi caahán ñi, tyin tsa caquiñi yihí tsitsi añima ñi. ³⁶ Tan yuhu catyi yu tsihin ndo tyin quivi cua tatsi tuñi Nyoo tsi tandihi nyivi, cua cuhva cuenda ñi tandihi tuhun tsa ña vaha cahan ñi. ³⁷ Tyin tsa cuenda tsa caahán ndo, tan cua catyi Nyoo tun vaha ndo o ña vaha ndo.

Nyivi ña vaha, tsa iyo ñi cuñi ñi nyehe ñi
(Mr. 8.12; Lc. 11.29-32)

³⁸ Tacan tan juhva ra fariseo tan ra maestro cuenda ley vehe ñuhu catyi ra naha tsihin ra Jesús:

—Maestro, cuñi ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

³⁹ Tan nacahan ra Jesús tan catyi ra:

—Nyivi ña vaha tan nyivi tsa nyicún inga nyoo cuñi ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javahá Nyoo tsihin ra Jonás ra cuví ndusu yuhu ra tahanan tsanaha. ⁴⁰ Tyin tumaa tsinyi ra Jonás tsitsi tyaca cahnun uñi quivi tan uñi tsacuaa, tacan cua cunyii yuhu Rayi tsa quee nda gloria tsitsi ñuhu uñi quivi tan uñi tsacuaa. ⁴¹ Tan quivi cua tatsi tuñi Nyoo tsi tandihi nyivi, cua nduvita nyivi tsicoo ñuu Nínive tahanan tsanaha tan cua catyi ñi na tatsi tuñi Nyoo tsi nyooho nyivi tsa iyó vityin. Tan cua catyi ñi tyin cua cunaa ndo, tyin maa ñi tsa cuví ñi ñuu Nínive, nasamā ñi cuhva iyó ñi quivi cahan ra Jonás tuhun Nyoo tsihin ñi. Tan ihyá nyií ra cahnun ca cuví tan ñavin ca ra Jonás. [Tan ña cuñi ndo tyaa soho ndo tsa caahán yu.] ⁴² Tan tacan tucu ñaha tsa tsindacá ñaha ityi Sur, cua nduvita ña quivi cua cutufi nyivi tan cua catyi ña tyin cua cunaa nyooho nyivi iyó vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa cahan ra Salomón. Tan vityin cahnun ca ra caahán tsihin ndo tan ñavin ca ra Salomón.

Nu caahán ra Jesús tsihin yo nácaa quihvi nu tatyí ña vaha añima yo inga tsaha tatun naa iñi yo tsi Nyoo
(Lc. 11.24-26)

⁴³ Tatun iin nu tatyí ña vaha quita nu tsitsi añima iin nyivi, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu: ⁴⁴ “Cunuhu yu nda vehe yu nu quee yu.” Tacan tan cuahán nyico nu añima nu quee nu. Tan nyehe nu tyin ndi xaan, tan yoñi iyó, tan sii xaan caá. ⁴⁵ Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihi tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuví tsi nyivi quini iyó —catyi ra Jesús.

Nu tsahá cuenda ra Jesús tyin tumaa cuví yañi ra, tan tumaa cuví sihi ra, cuví tsi nyivi tsa javahá cuhva cuñi Nyoo
(Mr. 3.31-35; Lc. 8.19-21)

⁴⁶ Ndi caahán ca ra Jesús tsihin nyivi, tan tsaa sihi ra tan yañi ra, tan nyecú ñi ityi tsata

vehe, tan cuñí ñi cahan ñi tsihin ra. ⁴⁷ Tacan tan jacotó iin ra tsi ra Jesús, tan catyí ra:

—Sihi un tsihin ra yañi un naha ra nyecú ñi tsata vehe. Tan cuñí ñi cahan ñi tsihin un.

⁴⁸ Tan nacahan ra Jesús tan catyí ra tsihin ra can:

—¿Yóo cuví sihi yu tan yóo cuví yañi yu? —catyí ra.

⁴⁹ Tacan tan janahá ndaha ra nu nyecú ra tsicá tsihin ra, tan catyí ra:

—Ra ihya naha ra cuví sihi yu tan yañi yu. ⁵⁰ Tyin tandihi nyívi tsa javahá cuhva cuñí Jutu yu, ra nyaá gloria, juvin ñi can cuví yañi yu, tan cuhva yu, tan sihi yu —catyí ra Jesús.

13

Nu caahán ra Jesús tyin tumaa iin ra tatsí, tacan cuví ra caahán tuhun Nyoo

(Mr. 4.1-9; Lc. 8.4-8)

¹ Quívi can quitá ra Jesús vehe nu nyíi ra tan cuahán ra, tsicunyaá ra yuhu miñi. ² Tan cuaha xaan nyívi ndu iin nu nyaá ra, yacan cuenda quihví ra tsitsi iin yutun ndoo tan tsinyaá ra. Tan tandihi nyívi ndoo ñi yuhu ndutya. ³ Tacan tan quitsahá jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quitá iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra. ⁴ Tan cuhva tsa quitá ra tsiti can, cucoyo juhva tsi yuhu ityi. Tan quítsi saa tan tsatsí ti tsiti can.

⁵ Tan juhva ca tsiti can cucoyo tyañu yuu nu ña cuaha nyahyu yihí. Tan ícan caná tsiti can tsa numi ñi tyin ña cuaha nyahyu yihí tyañu yuu can. ⁶ Maa tyin cuhva tsa caná ñicanyii, numi ñi na ityi tsi, tyin ña cunu yihí yoho tsaha tsi. ⁷ Juhva ca tsiti can cucoyo tyañu iñu. Tan quívi caná trigu can tsahnú tsi iin caa ñi tsihin iñu can, tan iñu can numi xaan ca tsahnú tsi tan tsahñi tsi trigu can. ⁸ Maa tyin juhva ca tsiti can cucoyo nu ñuhu vaha. Tan quívi tsahnú tsi, vaha xaan tsahá tsi tsiti. Tyin tsa iin tsiti can, cientu tsiti quitá tsihin tsi. Tan inga tsiti can, uñi xico, tan inga tsi oco utsi tsiti tsahá tsi. ⁹ ¡Tatun nyaá soho ndo, tyaa soho ndo tuhun caahán yu! —catyí ra Jesús.

Nu catyí tuhun ra Jesús nacuenda jacuahá ra tsi nyívi tan ña catyí tuhun catsi un tsihin ñi

(Mr. 4.10-12; Lc. 8.9-10)

¹⁰ Tacan tan natuhvá ra tsicá tsihin ra Jesús, tan tsicá tuhun ra naha tsi ra, tan catyí ra naha:

—¿Nacuenda tyin tsihin cuhva ñi jacuahá un tsi nyívi, tan ña catyí tuhun catsi un tsihin ñi? —catyí ra naha.

¹¹ Tan nacahan ra Jesús tan catyí ra:

—Tsi nyoocho jacotó Nyoo tuhun xeehe, cuhva ndacá ñaha ra, maa tyin nyívi ihya

ña cuví coto ñi tsa tsahá Nyoo tsi nyoocho.

¹² Tyin tandihi nyívi tsa cutuñi iñi tsa caahán yu tan javahá ñi, cuaha ca cua cutuñi iñi ñi. Tan nyívi tsa ña cutuñi iñi, tan ña cuñí ñi javaha ñi, cua quihin nyaa ndihi yu tsa luxu ñi tsa tsitó ñi. ¹³ Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñi ñi maa tyin ña cutuñi iñi ñi, tumaa tsa ña tsiñi ñi cuví can. ¹⁴ Tyin tacan tan cundaa tsa cahan ra Isaías ra cuví ndusu yuhu Nyoo tahanan tsanaha, tan catyí ra:

Tsa nditsa tyin nyoocho tsiñi ndo tuhun yu, maa tyin ña cutuñi iñi ndo.

Cua nyehe ndo tsa javahá yu, tan ña cua cutuñi iñi ndo.

¹⁵ Tyin tsa ndundava xaan añima nyívi ihya, tan ña catsi vaha tsiñi ñi.

tan ndasi tinuu ñi,

na ña cua nyehe ñi tsihin tinuu ñi,

tan ña cua cuñi ñi tsihin soho ñi.

Tan ndi ña cua cutuñi iñi ñi tsihin añima ñi.

Tan ndi ña cua nanducu ñi tsi yu, na janduvaha yu tsi ñi.

¹⁶ Maa tyin si xaan cuví tsi nyoocho, tyin nyehé ndo tsihin tinuu ndo, tan tsiñi ndo tsihin soho ndo. ¹⁷ Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyívi vaha, cuñi ñi nyehe ñi tsa nyehé nyoocho tsa javahá yu, maa tyin ña nyehé ñi. Tan cuñi ñi tyaa soho ñi tandihi tsa tsiñi nyoocho vityin, maa tyin ña tsiñi ñi.

Nu catyí tuhun ra Jesús tsa cuñi tsi catyí cuhva tsa cahan ra tsihin nyívi tsa cuenda ra tatsi can

(Mr. 4.13-20; Lc. 8.11-15)

¹⁸ Tyaa soho ndo tsa cuñi tsi catyí cuhva tsa cahan yu tsa cuenda ra tsa tatsi tsiti trigu can: ¹⁹ Nyívi tsa tsiñi tuhun nácaa cuñi Nyoo cundaca ñaha ra añima ñi, tan ña cutuñi iñi ñi, cuví ñi tumaa nu cucoyo tsiti trigu yuhu ityi. Tan quítsi nu ña vaha tan quihin nyaa nu tuhun Nyoo tsa iyó añima ñi. ²⁰ Tan tumaa nu cucoyo tsiti can tyañu yuu, juvin ñi nyívi tsa tsiñi tuhun Nyoo cuví can. Tan si xaan naquihin vaha ñi itsi juhva ñi quívi. ²¹ Tyin nduve ñuhu cunu ícan, yacan cuenda caná tsiti can, maa tyin ña cuví cuhun yoho tsi. Tan tacan cuví nyívi can. Juhva ñi quívi tsinú iñi ñi. Maa tyin quívi tsa quitsahá nyehe ñi tundoho, tan caahán ndasi nyívi tsata ñi tsa cuenda tuhun Nyoo, tacan tan jandihí ñi tsa tsinú iñi ñi. ²² Tan tumaa nu cucoyo tsiti can tsitsi iñu, juvin ñi nyívi tsa tsiñi tuhun Nyoo cuví can. Tsiñi ñi, maa tyin ña cuñi ñi javaha ñi tumaa tsiñi ñi. Tyin tyaa xaan ca iñi ñi tundoho ñayívi tan ñavin ca tuhun Nyoo. Tan nyíyo ca iñi ñi tsa cuca. Tan tandihi tuhun can jatyañu tsi tsi ñi, tan cuví ñi tumaa yutun tsa ña tsahá tsiti. ²³ Tan

ñuhu vaha nu cucoyo tsiti can, yacan cuvi inga nyivi tsa tsiniñi tuhun Nyoo, tan cutuñiñi ñi, tan javahá ñi tandiñi tuhun caahán ra. Yihí ñi cuvi ñi tumaa tsiti tsa cana tan tsahá tsi iin cientu tsiti, tan inga ñi cuvi ñi tumaa tsiti tsa tsahá uñi xico, o tumaa tsiti tsa tsahá oco utsi tsiti intuhun intuhun.

Nu caahán ra Jesús nácaa cuahán tuhun trigu tan cuhu ña vaha

²⁴ Tan cahan tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyivi cuvi tsi tumaa iin ra tsa tatsi tsiti trigu nu ñuhu ra. ²⁵ Tan cuhva tsa quixi tandiñi ra jahá tyiñu naha ra, quihvi iin ra xaan iñi tsi ra jatsii can, tan quití ra tsiti cuhu ña vaha, tan cuahán ra. ²⁶ Tan quivi cana tsiti trigu can, tan cana yoco tsi, cana ndiñi tucu cuhu ña vaha can. ²⁷ Tacan tan ra cuvi musu can naha ra, tsahan ra naha tsicatyí tuhun ra naha tsihin tsitoho ra naha: “Tata, maa ñi tsiti trigu tatsi ndi, ¿tan nacuenda tyin cana cuhu ña vaha can?” catyí ra naha. ²⁸ Tan nacañan ra can tan catyí ra: “Iyó iin ra xaan iñi tsi yu javahá tsehe, tun cuvi.” Tacan tan musu can, catyí ra naha tsihin tsitoho ra: “¿A cuñi un tyin cuhun ndi tan tuhun ndi cuhu ña vaha can?” ²⁹ Tan tsitoho ra naha catyí ra: “Ña tuhun ndo, tyin coto tuhun ndiñi ndo trigu can. ³⁰ Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñi ra naha cuenda jucun, tan cahmí ra naha. Tan yaha can tan natyihi vaha ra naha tsa vaha can tsitsi yaca yu.”

Nu caahán ra Jesús tyin tumaa tsiti mostaza cuvi tsa ndacá ñaha Nyoo tsi yo
(Mr. 4.30-32; Lc. 13.18-19)

³¹ Tacan tan cahan ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuvi tsi tumaa iin tsiti mostaza tsa tatsi iin ra nu ñuhu ra. ³² Tyin tsiti can lihli ñi tsi tan ñavin ca tandiñi ca tsiti. Maa tyin quivi tsahnú tsi cuvi tsi iin yutun. Tan quitsi saa, tan javahá ti taca ti soco tun —catyí ra Jesús.

Nu caahán ra Jesús tyin tumaa yutsan iya tacan cuvi tsa ndacá ñaha Nyoo tsi yo
(Lc. 13.20-21)

³³ Tan cahan ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuvi tsi tumaa yutsan iya tsa nasaca nuu iin ñaha tsihin uñi jahma yutyi paan. Tyin tumaa ndaá tandiñi yutsan paan can jahá tsa luxu ñi yutsan iya can, tacan cuvi tsa ndacá ñaha Nyoo tsi yo —catyí ra.

Nu catyí tuhun ra Jesús nacuenda jacuahá ra tsi nyivi tsihin cuhva
(Mr. 4.33-34)

³⁴ Tandiñi tuhun can cahan ra Jesús tsihin nyivi tsihin cuhva. Tan tandiñi tsa cahan ra tsihin ñi ña cahan catsi maa ra, maa ñi maa tsihin cuhva cahan ra. ³⁵ Tacan cuvi tyin tacan tan cundaa tsa cahan Jutu Mañi yo tsihin yuhu ra cuvi ndusu yuhu ra tahán tsanaha tan tyaa ra tyehen:

Tsihin cuhva cua cahan yu tsihin nyivi.

Cua cahan yu tsihin ñi tuhun tsa yihí xeehe nda cuanda tsa javahá Nyoo ñuhu ñayivi.

Nu caahán ra Jesús náa cuñi tsi catyí cuhu ña vaha tsa caná tsihin tsiti trigu can

³⁶ Tacan tan jacunuhu ra Jesús tsi nyivi, tan quihvi ra tsitsi vehe nu nyii ra. Tan natuhva ra tsicá tsihin ra nu nyaá ra, tan catyí ra naha tsihin ra:

—Catyí tuhun tsihin ndi náa cuñi tsi catyí tsa cahan un tsihin nyivi tsa cuenda cuhu ña vaha tan trigu can.

³⁷ Tacan tan quitsahá catyí ra Jesús tsihin ra naha:

—Ra tsa tatsi tsiti trigu can cuvi yuhu Rayi tsa quee nda gloria. ³⁸ Tan ñuhu can cuvi nyivi iyó nu ñuhu ñayivi. Tan tsiti trigu can cuvi nyivi tsa ndacá ñaha Nyoo. Tan cuhu ña vaha can cuvi nyivi tsa nyicún tsi nu ña vaha. ³⁹ Tan nu tsa tatsi cuhu ña vaha can, nu ican cuvi nu ña vaha juven ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñi tsi catyí quivi cua cundiñi ñuhu ñayivi. Tan ra tsa cua naquihin tsiti can, cuvi ra ángel naha ra. ⁴⁰ Tumaa jataca ra naha cuhu ña vaha can tyin cayu tsi, tacan cua cuvi quivi cua cundiñi ñayivi. ⁴¹ Yuhu Rayi tsa quee nda gloria cua jaquitsi yu ángel tan jataca ra naha tsi nyivi natyuhu tsi inga nyivi na javaha ñi tsa ña vaha tan inga nyivi tsa iyó cuatyí. ⁴² Tan cua tyihi ra naha tsi ñi tsitsi ono nu cayú ñuhu. Tan ican cua vacu tsaa ñi tan cahyu ña cua cuvi nuhu ñi. ⁴³ Nyoocho tan nyivi javahá cuhva cuñi Nyoo cua quituvi ndo nuu Jutu yo. Tan cua cuvi ndo tumaa tsa nditsin ñuhu ñicanyii, nu ndacá ñaha Jutu yo. Tatun iyó soho ndo, tyaa soho ndo tsa caahán yu.

Xuhun cuaan tsa yihí xeehe

⁴⁴ Tsa ndacá ñaha Nyoo tsi nyivi cuvi tsi tumaa xuhun cuaan tsa yihí xeehe tsitsi ñuhu. Tan iin ra nañihí ra xuhun cuaan can, tan tyihí xeehe nyico ra inga tsaha, tan sii xaan cuñi ra cuanuhu ra tan xico ra tandiñi tsa iyó tsi ra. Tacan tan jatá ra ñuhu nu yihí xeehe xuhun cuaan can.

Iin cuhva tsa cahan ra Jesús cuenda iin yuu xiñu tsa yahvi xaan nyaá

⁴⁵ "Tan tsa ndacá ñaha Nyoo tsi nyivi, cuví tucu tsi tumaa iin ra najatá yuu xiñu tan naxicó nyico ra, ⁴⁶ tan tsa ñihí ra iin tsa yahví xaan nyaá, xicó ra tandihí maa tsa cumí ra, tan jatá ra yuu xiñu vaha can.

Nu caahán ra Jesús iin cuhva cuenda traya

⁴⁷ "Tan juvin ñi cuví tucu tsa ndacá ñaha Nyoo tsi nyivi tumaa iin traya tsa cañí ra naha nu ndutya ñuhu, tan ñihí ra naha tandihí nuu tyaca. ⁴⁸ Tan tsa tsitú traya can tsihin tyaca, tavá ra naha traya can nu ityi. Tan ican nacatsí ra naha tsi ti, naquihín vaha ra naha quiti vaha tsitsi iin tyica, tan javitá ra naha quiti ña vaha can. ⁴⁹ Tan tacan cua cuví quivi naa ñayivi, cua quitsi ángel, quitsi tava siin ra naha tsi nyivi vaha tan nyivi ña vaha. ⁵⁰ Tan cua tyihí ra naha tsi nyivi ña vaha can anyaya nu cayú ñuhu, nu cua vacu tsaa ñi tan cahyu ña cua cuví nuhu ñi.

Nu caahán ra Jesús tyin vaha tuhun tsahnu Nyoo tan tuhun tsaa Nyoo

⁵¹ Tacan tan ra Jesús tsicá tuhun ra tsi ra tsicá tsihin ra, tan catyí ra tsihin ra naha:

—¿A cutuñi ñi ndo tandihí tsa cahan yu?

Tan nacahan ra naha tan catyí ra naha:

—Cutuñi ñi ndi, Jutu Mañi yu.

⁵² Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndihí ra nácaa ndacá ñaha Nyoo tsihin tandihí tuhun tsaa tsa caahán yu, cua cuví ra tumaa iin ra jatsií vehe tan cua jacuaha ra nduvi taahan tuhun vaha can tsi nyivi —catyí ra Jesús.

Nu tsinuhu ra Jesús ñuu Nazaret nu tsahnu ra

(Mr. 6.1-6; Lc. 4.16-30)

⁵³ Tsa ndihí cahan ra Jesús cuhva ihya tan quita ra cuahán ra. ⁵⁴ Tan tsaa nyico ra ñuu ra. Tan quitsahá jacuahá ra tsitsí vehe ñuhu ñuu can. Tan iyo cuñi nyivi tan catyí ñi:

—¿Nu maa tahan cutuhvá ra ihya tsa tsitó xaan ra? ¿Tan nácaa cuví javaha ra tsa iyo? ⁵⁵ Tyin sehe ra tahví yutun can cuví tsi ra. Tan ña María cuví sihi ra. Tan yañi ra cuví tsi ra Jacobo, ra José, ra Simón tan ra Judas. ⁵⁶ Tan cuhva ra iyo tucu ñi ityi nu iyo yo. Tun tacan, ¿nu maa tahan cutuhvá ra tandihí tsa tsitó ra? —catyí ñi.

⁵⁷ Tan yacan cuenda ña cuñi ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandihí nyivi tandihí ñi ityi jahá ñi tsa ñayivi tsi ra ndusu yuhu Nyoo, maa tyin nyivi ñuu ra ña tyaa yahvi ñi tsi ra tan ndi nyivi vehe ra —catyí ra Jesús.

⁵⁸ Tan ña cuaha tsa iyo javahá ra ñuu ra tsa cuenda tyin ña tsinú ñi ñi tsi ra.

14

Nu catyí tsi nácaa tsihi ra Juan, ra jacoondutya tsi nyivi

(Mr. 6.14-29; Lc. 9.7-9)

¹ Quivi can ra Herodes, ra ndacá ñaha nicahnu nu cuví Galilea, ñihí tuhun ra tsa javahá ra Jesús. ² Tan catyí ra tsihin ra yucú tsihin ra:

—Ra ican cuví ra Juan, ra jacoondutya tsi nyivi, ra tsa tsihi tan vityin nandotó nyico ra. Yacan cuenda iyo tunyee ñi tsi ra tsa javahá ra tsa iyo.

³⁻⁴ Tacan catyí ra tyin juvin ñi maa ra tava tyiñu tyin tiin ra naha tsi ra Juan. Tan cuhni ra naha tsi ra tsihin cadena, tan tyihí ra naha tsi ra vehe caa. Tacan javahá ra Herodes tyin xaan cuñi ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasihi ra Felipe, yañi ra.

⁵ Yacan cuenda ra Herodes cuñi ra cahni ra tsi ra Juan, maa tyin yuuhví ra tsi nyivi, tyin tandihí ñi tsinú ñi ñi tyin ra Juan, ndusu yuhu Nyoo cuví ra. ⁶ Tan iin quivi iyo vico ra Herodes, tan sehe ña Herodías quitsahá tsañi ña yaa nu yucú ñi vico can. Tan tahañ xaan ñi ra Herodes. ⁷ Tan catyí ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyí ra Herodes.

⁸ Tacan tan natyuhu sihi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra jacoondutya tsi nyivi, tsi yu nu iin coho —catyí ña.

⁹ Tsa tsiiñi ra rey Herodes tsa cahan ña, nducuihiya cuñi ra. Maa tyin tsa cuenda tsa cahan ra tyin tandihí tsa cua ndacan ña tan cua cuhva ra, yacan cuenda ña cuví jandaví ñaha ra tyin tandihí nyivi yucú vico can tan tsiiñi ñi tsa cahan ra. Yacan cuenda tava tyiñu ra na cuhva ra naha jiñi ra Juan tsi ña nu iin coho. ¹⁰ Tan tava tyiñu ra na cucahnya ra naha jucun ra Juan nu nyii ra vehe caa. ¹¹ Tacan tan tsindacá ra naha jiñi ra Juan tsi ña, nyii tsi nu iin coho. Tan tsahá ra naha tsi ñaha tyuvaa can. Tan maa ña nacuhvá cuenda ña tsi sihi ña.

¹² Tacan tan tsaa ra nyicun tsi ra Juan naha ra tan naquihín ra naha cuñu ñuhu ra, tan tyihí ra naha tsitsi ñuhu. Yahá can tan tsahan ra naha tsijacotó ra naha tsi ra Jesús.

Nu jacatsi ra Jesús tsi uhun mil rayii

(Mr. 6.30-44; Lc. 9.10-17; Jn. 6.1-14)

¹³ Tsa tsitó ra Jesús tsa tahañ ra Juan, quihín ra iin yutun ndoo, tan cuahán in-tuhun ñi maa ra nu taxin caa. Tan tsa tsitó nyivi, quita ñi ñuu ñi, tan cuahán tsihin tsaha ñi nu nyii ra. ¹⁴ Tsa quita ra Jesús tsitsi yutun ndoo can, tan nyehe ra tyin cuaha xaan nyivi nyicun tsi ra. Tan cundaahví ñi

ra nyehe ra tsi ñi. Tan janduvahā ra tsi nyivi cuuhvi tsa tsaa tsihin ñi. ¹⁵ Tan tsa cuñi cuaa, tacan tan natuhva ra tsicā tsihin ra Jesús nu nyaā ra, tan catyí ra naha tsihin ra:

—Tsa cueñi xaan, tan yofi nyivi iyó yatyin ñi ihya. Yacan cuenda vaha ca cahan un tsihin nyivi ihya na cunuhu ñi nda ñuu cujata ñi tsa catsi ñi —catyí ra naha tsihin ra Jesús.

¹⁶ Tan ra Jesús catyí ra:

—Nduve náa nducu ñi cuhun ñi. Cuhva nyooho tsa catsi ñi.

¹⁷ Tan nacahan ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

¹⁸ Tan catyí ra Jesús:

—Ndāca ndo can tsi yu.

¹⁹ Tacan tan catyí ra tsihin nyivi tyin na cunyecū ñi nu cuhu can. Yahā tsa tsinyecū ñi tan quihñ ra uhun taahan paan can, tan nduvi tyaca can. Tan nanyehe ndaa ra ityi siqui, tan nacuhva ra tyahvi nyoo tsi Nyoo tan tsahnū cuatyí ra paan can. Tan tsahā ra tsi ra tsicā tsihin ra, na tsatsa ra naha tsi nyivi can. ²⁰ Tan tandihi nyivi tsatsi ñi tan ndaha vaha iñi ñi. Yahā can tan ndoo ca tsa ñahñu, tan jacutū ra naha utsi uvi tyica tsihin tsa ñahñu ican. ²¹ Tan tsa tandihi ñi tsa tsatsi can, quita maa tumaa uhun mil tsa maa ñi maa rayi. Tan siin maa ñiñaha tan tsa nyihi.

Nu tsicā ra Jesús nu ndutya

(Mr. 6.45-52; Jn. 6.16-21)

²² Tsa yaha can tan catyí ra Jesús tsihin ra tsicā tsihin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi. ²³ Tsa yahā tsa jacunuhu ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyii ra can tan cuaa. ²⁴ Tan tsitsi tsa tsicān tahvi ra tsi Nyoo, yutun ndoo can tsa cuahán cuui tsi nda mahñu miñi. Tan ndutya miñi can cañi tsi tsi yutun ndoo can tsa cuenda tyin ñihi xaan yihí tatyí nu cuahán ra naha. ²⁵ Tan tsa cua tuvi cuahán ndihi ra Jesús nu cuahán ra naha tsihin yutun ndoo can, tan tsicā tsihin tsaha ra cuahán ra nu ndutya. ²⁶ Tan cuhva tsa nyehe ra naha tsi ra, tsicā ra nu ndutya can, nayuhvi xaan ra naha. Tan canā tsaa ra naha, tan catyí ra naha:

—Jihna ndo xin. Tatyí vatsí can!

²⁷ Maa tyin nacahan ra Jesús tsihin ra naha, tan catyí ra:

—iÑa nayuhvi ndo tyin maa yu cuví! —catyí ra.

²⁸ Tacan tan nacahan ra Pedro tan catyí ra:

—Jutu Mañi yu, tatun maa un vatsí juvin, cuhva tsa quitsi ndihi yu nu vatsí un.

²⁹ Tan ra Jesús catyí ra tsihin ra:

—Naha jiin.

Tacan tan quita ra Pedro tsitsi yutun ndoo can, tan quitsahā tsicā ra nu ndutya tan cuahán ra nda nu vatsí ra Jesús. ³⁰ Maa tyin cuhva tsa tuvi iñi ra tyin ñihi xaan quitsahā yihí tatyí, nayuhvi xaan ra, tacan tan quitsahā cuñi nyee ra, tan quitsahā canā tsaa ra tan catyí ra:

—Jācacu tsi yu, Jutu Mañi yu!

³¹ Tan iin yaha ñi tññ ra Jesús ndaha ra, tan catyí ra tsihin ra:

—¿Nacuenda tsa nayuhvi un, yoocho tsa luxu xaan tsinñ iñi tsi yu? —catyí ra Jesús tsihin ra.

³² Tan cuhva tsa quihvi ra naha tsitsi yutun ndoo can, cutaxin tatyí can. ³³ Tacan tan ra yucú tsitsi yutun ndoo can tsicuiñi tsiti ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yoocho —catyí ra naha.

Nu janduvahā ra Jesús tsi nyivi cuuhvi tsa iyó Genesaret

(Mr. 6.53-56)

³⁴ Tsa yahā sava ra naha miñi can, tsaa ra naha ñuhu Genesaret. ³⁵ Tan cuhva tsa nacotó nyivi iyó ican tsi ra Jesús tyin juvin ra cuví, jacotó ñi tsi tandihi nyivi iyó taniñ cahnu can. Tan tsindaca ñi tandihi nyivi cuuhvi nu nyii ra. ³⁶ Tan caahán ndaahvi ñi tsihin ra, na cuhva ra tsa tññ ñi vasu luxu jahma ra. Tan tandihi ñi tsa tññ jahma ra, nduvahā ñi.

15

Tsa jativi tsi nyivi nuu Nyoo

(Mr. 7.1-23)

¹ Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahan ra naha nu nyii ra Jesús tan tsicā tuhun ra naha tsi ra, tan catyí ra naha:

² —¿Nacuenda ña javahā ra tsicā tsihin un naha ra cuhva nacotó tsi saahnu yo?, tyin catyí ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicā tsihin un ña tyaā yahvi ra naha tuhun tsahnū can —catyí ra naha.

³ Tan tsicā tuhun ra Jesús tsi ra naha, tan catyí ra:

—¿Nacuenda tyaā yahvi xaan ca ndo tuhun tsahnū tsa iyó ndo tan ña cuñi ndo tyaā yahvi ndo tsa caahán Nyoo? ⁴ Tyin Nyoo catyí ra: “Tyaā yahvi ndo tsi jutu ndo tan tsi sihi ndo, tyin tandihi nyivi tsa caahán ndavaha ñi siqui jutu ñi o sihi ñi, cua cúu ñi”, catyí Nyoo. ⁵ Maa tyin nyoocho catyí ndo tyin cuví catyí ndo tsihin jutu ndo o tsihin sihi ndo tyehen: “Ña cuví jatinyee yu tsi un tyin tsa tsahā yu tandihi tsa iyó tsi yu tsi

Nyoo.” ⁶ Tatin tsa catyí ndo yacan, ña cuñí tsi tsa jatinyee ndo tsi jutu ndo o tsi sihi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo. ⁷ ¡Nyoocho cuñí ndo tyin vaha xaan ndo, maa tyin ña nditsa ndo! Nditsa tsa cahán ra Isaías, ra cuví ndusu yuhu Nyoo, siqui ndo jahá Nyoo. Tan catyí ra tyehen:

⁸ Nyívi ihya, jacahnú ñi tsi yu tsihin yuhu ñi. Maa tyin ñavin tsihin tsa ñi ñi ñi.

⁹ Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaías tuhun ndo jahá Nyoo, catyí ra Jesús tsihin ra ican naha ra.

¹⁰ Tacan tan caná ra Jesús tsi nyívi tan catyí ra tsihin ñi:

—Tyaa soho ndo tsa caahán yu, tan nducu ndo cuhva cutuñi ñi ndo. ¹¹ Tyin nyívi tsa tiví nuu Nyoo, ñavin tsa quihví yuhu ñi jatívi tsi ñi. Tyin tiví ñi jahá tsa quitá yuhu ñi.

¹² Tacan tan natuhvá ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñí ra naha tsa tsiní ra naha tsa cahán un.

¹³ Tan maa ra Jesús nacahán ra tan catyí ra:

—Tandihi yutun tsa ña tatsí Jutu yu, ra nyaá gloria, cua tuhun ra nda cuanda yoho tun. ¹⁴ Jaña ndo tsi ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatin iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

¹⁵ Tacan tan quitsahá catyí ra Pedro tsihin ra Jesús:

—Catyí tuhun tsihin ndi náa cuñí tsi catyí tsa cahán un nañi.

¹⁶ Tacan tan ra Jesús catyí ra tsihin ra naha:

—Ndi nyoocho tan ña cutuñí ndihi ñi ndo.

¹⁷ ¿A ña cutuñí ñi ndo tyin tsa tsatsí yo, tsitsi yo cuahán tsi? Yahá can tan cua quita nyico tsi. ¹⁸ Maa tyin tuhun tsa quitá yuhu yo, tsitsi añima yo queé can tan nyívi tiví ñi nuu Nyoo jahá tsa caahán ñi. ¹⁹ Tyin tsa caquiñi tsicá ñi ñi tsitsi añima ñi quitá can, tan cuñí ñi cahñi ñi nyívi. Cuñí ñi suhu ñi. Yihí nyívi caahán ñi cuendu, o jacuñi nyaá ñi tsi inga can nyívi. Yihí ra cuñí ra coo inga ñaha ra, o ñiñaha iyó yí tsicá nuu ñi tsihin inga rayí. Yihí ra tsicoó ra tsihin ñaha tan ña tindaha ra tsihin ña. Tan yihí rayí quixí ra tsihin juvin ñi maa rayí. Tan ñiñaha yihí ñi quixí ñi tsihin juvin ñi maa ñaha. Tan tandihi ca maa tsa caquiñi tsa javahá ñi tsihin cuñi

ñuhu ñi. ²⁰ Yacan cuví tsa jatívi tsi nyívi nuu Nyoo. Tyin tsa ña nacatya ñi ndaha ñi tsa ndi cumañi ca catsi ñi, ña jatívi can tsi ñi —catyí ra Jesús.

Nu tsinu ñi iin ñaha inga ñuu tsi ra Jesús (Mr. 7:24-30)

²¹ Quitá ra Jesús ñuu can tan cuahán ra ityi ñuu Tiro tan Sidón. ²² Tan ityi can iyó iin ñaha Canaán. Tan tsa nyehe ña tsi ra Jesús natuhvá ña nu nyaá ra tan caná tsa ña tan catyí ña:

—Jutu Mañi yu, tata ra David, cundaahvi ñi tsi yu, tyin sehe yu yihí tatyi ña vaha tsi ña, tan nyehe xaan ña tundoho jahá nu —catyí ña tsihin ra Jesús.

²³ Maa tyin tumaa tsa ña tsiní ñi ra Jesús jahá ra tsi ra tan ña nacahán ra tsa iin yaha ñi. Tacan tan natuhvá ra tsicá tsihin ra tan catyí ra naha tsihin ra:

—Cahan tsihin ña na cunuho ña tyin ut-san xaan yo tsa caná tsa ña tsata yo.

²⁴ Tacan tan catyí ra Jesús tsihin ra naha:

—Vatsí yu jahá Nyoo ñuu Israel tyin naquihin ndaahvi yu nyívi ñuu can tsa cuví ñi tumaa mbee tsa cuanaá. Tan tsa cuenda nyívi can vatsí yu.

²⁵ Tan ñaha can natuhvá ña nu nyaá ra tan tsicuñi tsi ña nuu ra, tan catyí ña tsihin ra:

—Jutu Mañi yu, ¡jatinyee tsi yu!

²⁶ Tan ra Jesús catyí ra tsihin ña:

—Ña vaha tsa quihin nyaá yo paan yuhu sehe yo, tan cuhva yo catsi ina —catyí ra tsihin ña.

²⁷ Maa tyin ña ndasi cuñí ña tsa cahán ra, tan catyí ña tsihin ra:

—Nditsa, Jutu Mañi yu. Maa tyin nda cuanda ina tan tsatsí ti titsehe tsa cucoyo xuu mesa tsitoho ti —catyí ña.

²⁸ Tacan tan catyí ra Jesús tsihin ña:

—Yoocho ñaha, tsinú xaan ñi un tsi yu. Na cuví maa cuhva tsicá ñi un.

Tan juvin ñi cuhva can tan nduvahá sehe ña.

Nu cuaha xaan nyívi cuuhví janduvahá ra Jesús

²⁹ Tsa yaha yacan tan ra Jesús cuahán ra ityi yuhu miñi Galilea, tan ndaa ra iin jiñi yucu tan ican tsinyaa ra. ³⁰ Tan cuaha xaan nyívi cuahán ñi nu nyaá ra cuandacá ñi nyívi cuuhví tyin janduvahá ra tsi ñi. Yihí ñi coxo ñi, cuaa ñi, ñiñi ñi, lundu ñi. Tan yihí ñi yihí inga ca nu cuehe tsi ñi. Tan tsaquin nyecu ñi tsi tandihi ñi cuuhví can nu nyaá ra Jesús. Tan janduvahá ra tsi ñi. ³¹ Tan iyo xaan cuñi nyívi can nyehe ñi tyin nacahán ñi ñiñi tan nduvahá ñi lundu, tan nacacá ñi coxo, tan nanyehé ñi cuaa. Tan quitsahá jacahnu xaan ñi tsi Nyoo ñi, tsa cuví ñi nyívi Israel.

Nu tsahá ra Jesús tsa catsi cumi mil rayí (Mr. 8:1-10)

³² Tacan tan cana ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñí yu nyehé yu tsi nyívi ihya, tyin tsa uñi quívi yucú ñi ihya tsihin yo, tan nduve náa catsi ñi. Tan ña cuñí yu jacunuhu yu tsi ñi yuvehe ñi tyin ñaha ca catsi ñi, tan coto cúu naaha ñi ityi cuanuhú ñi —catyí ra Jesús.

³³ Tacan tan ra tsicá tsihin ra catyí ra naha tsihin ra:

—¿Tan numaa cua ñihi yo tsa catsi nyívi cuaaha ihya, tyin ihya nduve nyívi iyó?

³⁴ Tacan tan ra Jesús tsicá tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

³⁵ Tan catyí ra tsihin nyívi na cunyeu ñi nu ñihu. ³⁶ Tacan tan quihín ra tsa utsa paan can tan tyaca can, tan nacuhva ra tyahvi nyoo tsi Nyoo. Tan quitsaha tsahnú cuatyí ra paan tsihin tyaca, tan tsaha ra tsi ra tsicá tsihin ra tyin na tsatsa ra naha tsi nyívi. ³⁷ Tandihí ñi tsatsí ñi, tan ndahá vaha iñi ñi. Tan tsa ndihí tsatsí ñi tan naquihín ra naha tsa ñahñu tsa ndoo can tan quita utsa tyica cuví tsi. ³⁸ Tan ra tsa tsatsí can naha ra quita maa cumi mil ra naha tan sin maa ñiñaha tan tsa nyihi. ³⁹ Yahá can tan jacunuhu ra tsi ñi, tan quihvi ra tsitsi yutun ndoo, tan cuahán ra ityi Magdala.

16

Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo

(Mr. 8.11-13; Lc. 12.54-56)

¹ Tacan tan ra fariseo naha ra tan ra saduceo naha ra tsahan ra naha nu nyíi ra Jesús, tyin cuñí ra naha nducu cuhva ra naha tsi ra. Tan catyí ra naha na javaha ra iin tsa iyo tsihin tunyee iñi Nyoo. ² Maa tyin nacahan ra Jesús tan catyí ra tsihin ra naha:

—Tsa cueñi, tuhva ndo catyí: “Sii xaan caa ityaan cua cuvi tyin cuaaha xaan nu vico”.

³ Tan tsa tuvi catyí tucu ndo tyin ña sii maa caa cua cuvi, tyin iñi naaha xaan tan cuaaha xaan vico, catyí ndo. ¿Nacuenda tyin tsitó tucu ndo yacan tan tsa cuví vityin ña cuví nacoto ndo, nyoocho ra jandaví ñaha? ⁴ Nyívi tsa iyó vityin, quíñi xaan iyó ñi tan ña tsinú iñi ñi tsi Nyoo. Maa ñi tsa iyo cuñí ñi nyehé ñi. Maa tyin yuhu ña cua javaha yu tsa iyo nyehé ñi, tyin tumaa tsa cuví tsi ra Jonás, yacan ña cua nyehé ñi —catyí ra Jesús tsihin ra naha; tsahan cuahán ra.

Tuhun caahán ra fariseo naha ra cuví tsi tumaa yutsan iya

(Mr. 8.14-21)

⁵ Cuhva tsa yahá ra tsicá tsihin ra Jesús inga tsiyo miñi can, nducuhun iñi ra naha tyin nduve paan tsa catsi ra naha ndahá ra naha. ⁶ Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

⁷ Tacan tan quitsahá natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

⁸ Tan tsa tuví iñi ra Jesús tsa tsicá iñi ra naha, catyí ra tsihin ra naha:

—Nyoocho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo? ⁹ ¿A ñaha ca cutuñi iñi ndo? ¿A ña nducuhún iñi ndo quívi tsa jacatsí yu tsi uhun mil rayíi tsihin uhun taahan ñi paan, tan najava taahan tyica jacutu ndo tsihin tsa ñahñu tsa ndoo can? ¹⁰ ¿A tsa naá ndihí tucu iñi ndo quívi tsa jacatsí yu cumi mil rayíi, tan najava taahan tyica jacutu ndo tsihin tsa ndoo tsa utsa taahan ñi paan? ¹¹ ¿Nacuenda ña tuví iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

¹² Tacan tan cutuñi iñi ra naha tyin ñavin tsa cuenda yutsan iya paan can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

Nu catyí ra Pedro tyin ra Jesús cuví ra Cristo, ra jacacú tsi yo

(Mr. 8.27-30; Lc. 9.18-21)

¹³ Cuhva tsa tsaá ra Jesús ityi ñuu Cesarea Filipino, tsicá tuhun ra tsi ra tsicá tsihin ra tan catyí ra:

—¿Náa catyí nyívi? ¿Yóo ra cuví yu, Rayíi tsa quee nda gloria? —catyí ra.

¹⁴ Tan nacahan ra naha tan catyí ra naha:

—Yihí nyívi catyí ñi tyin ra Juan ra jacoondutya tsi nyívi cuví un. Tan inga nyívi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahan tsanaha cuví un.

¹⁵ Tacan tan catyí ra tsihin ra naha:

—Tan nyoocho, ¿yóo ra cuví yu, catyí ndo?

¹⁶ Tacan tan nacahan ra Simón Pedro tan catyí ra:

—Yocho cuví ra Cristo, Sehe Nyoo nyitó —catyí ra.

¹⁷ Tan nacahan ra Jesús tan catyí ra:

—Sii xaan cuví tsi yocho, Simón, sehe ra Jonás, tyin ñavin nyívi janahá tuhun ihya tsi un, tyin maa Jutu yu, ra nyaá gloria janahá tsi un. ¹⁸ Tan yuhu catyí yu tsihin un tyin yocho cuví ra Pedro. Tan siquí cava ihya,

cua javaha yu vehe ñuhu yu. Tan ña cua tani tsi jaha tuhun tsihi. ¹⁹ Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihi tsa cuhñi un ihya nu ñuhu ñayivi, tsa nuuhñi jahá Nyoo nda gloria. Tan tandihi tsa ndatsi un ihya nu ñuhu ñayivi, tsa ndatsi maa Nyoo nda gloria.

²⁰ Tacan tan catyí ra Jesús tsihin ra tsicá tsihin ra tyin ña cahan ra naha tsihin nyivi tun juvin ra cuví ra Cristo ra tsa quee nu nyaá Nyoo.

Nu caahán ra Jesús tyin cua cahñi nyivi tsi ra

(Mr. 8.31—9.1; Lc. 9.22-27)

²¹ Nda quivi can quitsahá catyí ra Jesús tsihin ra tsicá tsihin ra, tyin cuñi tsi tsa cuhun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi ra naha tsi ra, maa tyin tsa tsinu uñi quivi cua nandoto ra inga tsaha. ²² Tacan tan quihñ ra Pedro tsi ra tan quitá siin ra tsihin ra tan quitsahá caahán ra tsihin ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

²³ Tan nanyico coo ra Jesús, tan quitsahá caahán ra tsihin ra Pedro:

—Jatsiyo nyaha tsi un, cuihna! Tyin cuñi un casi un tsi yu. Tyin yoocho ña tsicá iñi un cuhva cuñi Nyoo, tyin cuhva cuñi nyivi tsicá iñi un —catyí ra.

²⁴ Tacan tan ra Jesús catyí ra tsihin ra tsicá tsihin ra:

—Tatun ndáa nyoocho cuñi cunyicun tsi yu, cahnya iñi ndo tsa cuñi maa ndo javaha ndo, tacan tan cuvi javaha ndo tsa cuñi Nyoo. Tan ña cua ndu uvi iñi ndo tsa yihí ndo cuenda yu, vasu tandihi quivi nyehé ndo tundoho. Tyin yacan cuví cruu tsa taahán tsi cuiso ndo tatun cua cunyicun ndo tsi yu. ²⁵ Tan nyoocho tsa ña cuñi nyehé tundoho, tan ña cuñi ndo cuhva ndo ñayivi iyó ndo tsa cuenda yu, cua nyehé ndo tundoho anyaya. Maa tyin nyoocho tsa cua cuhva ñayivi ndo tsa cuenda yu, cua cacu ndo.

²⁶ Tyin nduve yahvi nyaá tsa cua ñihi ndo tandihi tsa iyó nu ñuhu ñayivi tun añima ndo tan ña cua cacu tsi. Tyin nduve maa náa tsihin tan cuvi tyahvi ndo tan ña cua cunaa añima ndo. ²⁷ Tyin yuhu, Rayii tsa quee nda gloria, cua quitsi nyico yu inga tsaha, maa tyin tsihin tsa cahnu cuví Jutu yu, tan cua quitsi ángel tsihin yu. Tacan tan cua tyahvi yu tsi intuhun intuhun ndo tsa cuenda tsa javahá ndo. ²⁸ Tan tsa nditsa catyí yu tsihin ndo, tyin yihí nyoocho tsa yucú ihya vityin, cua nyehé ndo nu vatsí yu tsa cua cundaca

ñaha yu, tsa ndi cumañi ca cúu ndo —catyí ra Jesús.

17

Nu nyehe uñi taahán ra tsicá tsihin ra Jesús nácaa tsa si caá xiñu ra Jesús nu ndacá ñaha ra nda gloria

(Mr. 9.2-13; Lc. 9.28-36)

¹ Tan tsa yaha iñu quivi, tan quihñ ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha. ² Tan ican nasama cuhva caá ra Jesús nuu ra yucú tsihin ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhu. ³ Tacan tan nyehe ra naha tsi ra Moisés tan ra Elías, natuhún ra naha tsihin ra Jesús. ⁴ Tan quitsahá caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñi un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

⁵ Tsitsi tsa caahán ra Pedro, quitsi iin vico tsa xiñu xaan siqui ra naha. Tan tyasi tsi tsi ra naha. Tan tsiñi ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñi xaan yu tsi ra. Tan si xaan cuñi yu tsihin ra. Tyaa yahvi ndo tsa caahán ra —catyí ndusu can.

⁶ Tsa tsiñi ra tsicá tsihin ra Jesús tuhun ihya, tsicavá tsihin nuu ra naha nda nu ñuhu, tyin nayuhvi xaan ra naha. ⁷ Tacan tan natuhvá ra Jesús nu cayucú ra naha, tan tñ ra tsi ra naha, tan catyí ra:

—Ndúvita ndo, tan ña nayuhvi ndo.

⁸ Tan cuhva tsa janyehe ra naha, intuhun ña ra Jesús nyaá, tan nduve inga uvi ca ra naha.

⁹ Tan cuhva tsa vatsí nuu ra naha yucu can, catyí ra Jesús tsihin ra naha:

—Ña cahan ndo tsa nyehé ndo ihya tsihin nyivi. Tsa yaha tsa cúu Rayii tsa quee nda gloria tan nandoto ra, tacan tan cua cahan ndo can —catyí ra.

¹⁰ Tacan tan tsicá tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

¹¹ Tan nacahan ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihi. ¹² Maa tyin yuhu catyí yu tsihin ndo tyin tsa yaha quitsi ra Elías, tan ña nacoto nyivi tsi ra, tan javahá ñi tsihin ra tandihi cuhva cuñi maa ñi. Tan tacan tucu yuhu, Rayii tsa quee nda gloria, cua janyehe ñi tundoho tsi yu —catyí ra tsihin ra naha.

¹³ Tacan tan cutuñi iñi ra naha tyin tuhun ra Juan, ra jacoondutya, caahán ra Jesús.

Nu janduvahā ra Jesús tsi iin ra luhlu tsa tsihi naaha jahā tatyí ña vaha

(Mr. 9.14-29; Lc. 9.37-43)

¹⁴ Cuhva tsa tsaā ra naha nu yucú nyívi, natuhvā iin ra tan tsicuiñi tsiti ra nuu ra Jesús, tan catyí ra tsihin ra:

¹⁵ —Tata, cundaahvi iñi tsi sehe yu, tyin yihí cuehe tsihi naaha tsi ra, tan tuhvā ra nduva ndasava, tan cuaha xaan tundoho nyehé ra jahā cuehe can. Tan yihí tsaha nduvā ra nu ñuhu tan cayú ra, tan nduvā tucu ra nu yihí ndutya. ¹⁶ Tan tsindacā yu tsi ra tsi ra tsicá tsihin un, maa tyin ña cuví janduvahā ra naha tsi ra—catyí ra.

¹⁷ Tan nacahan ra Jesús tan catyí ra:

—iNyooho, nyívi tsa ña tsinú iñi cuví ndo! iTan caquiñi ndo! iNdáa nda quívi cua cunyii yu tsihin ndo? iTan ndáa nda quívi cua cunyeé iñi yu tsihin ndo, tyin nyoooho ña tsinú vaha maa iñi ndo tsi yu? iTindaca ndo tsi ra luhlu tsi yu—catyí ra.

¹⁸ Tacan tan tavā ra Jesús tsi nu tatyí ña vaha can, tan quitā nu tsi ra luhlu can. Tan juvin ñi cuhva can nduvahā ra.

¹⁹ Tsa yahā can tan tsicā tuhun siin ra tsicá tsihin ra Jesús tsi ra tan catyí ra naha:

—iNacuenda tyin nyuhu ña cuví tava ndi tatyí ña vaha can?

²⁰ Tan ra Jesús nacahan ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsiti mostaza, cuví catyí ndo tsihin yucu ihya na catsiyo tsi tan cuhun tsi inga ityi, tan yucu ihya cuhun tsi inga ityi. Tan nduve tsa ña cua cuví javaha ndo tatun nditsa tsa tsinú iñi ndo tsi yu. ²¹ Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo—catyí ra Jesús tsihin ra naha.

Inga tsaha cahan ra Jesús tsa cua cahñi nyívi tsi ra

(Mr. 9.30-32; Lc. 9.43-45)

²² Yucú ra naha Galilea can, tan ra Jesús catyí ra tsihin ra naha:

—Yuhu, Rayi tsa quee nda gloria, iin ra cua nacuhva cuenda ra tsi yu tsi ra xaan iñi tsi yu naha ra. ²³ Tan cua cahñi ra naha tsi yu. Maa tyin tsa tsinu uñi quívi tan cua nandoto yu—catyí ra.

Tsa tsihi ra naha tuhun ihya, cuiihya xaan cuñi ra naha cuví.

Nu tyahví ra naha cuenda tsa nduvaha vehe ñuhu cahnu

²⁴ Cuhva tsa tsaā ra Jesús tan ra tsicá tsihin ra ñuu Capernaum, ra tavá xuhun cuenda vehe ñuhu naha ra, tsahān ra naha tsinyehé

ra naha nu nyíi ra Pedro tan tsicā tuhun ra naha tsi ra tan catyí ra naha:

—iA ña tuhvā ra jacuahā tsi ndo tyahví xuhun tsa cuenda vehe ñuhu cahnu? —catyí ra naha tsihin ra Pedro.

²⁵ Tan nacahan ra Pedro tan catyí ra:

—Tuhvā ra.

Tan tsa quihvi ra Pedro tsitsi vehe nu iyó ra naha, jihna ca ra Jesús nacahan tan catyí ra:

—iNacaa cuñi yooho, Simón? iYóo tsi quihín ra cuví rey tsa iyó nu ñuhu ñayivi ihya yahvi? iA tsi nyívi ñuu maa ra o tsi inga nyívi?

²⁶ Nacahan ra Pedro tan catyí ra:

—Tsi inga nyívi.

Tan catyí ra Jesús tsihin ra:

—Tun tacan, nyívi ñuu maa ra ña taahán tsi tyahvi ñi. ²⁷ Maa tyin ña cuñi yo tsa cahan ra naha siqui yo, yacan cuenda vaha ca tsa cuhun un yuhu miñi can, tan jacuhun un yiqui tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu ti cua ñihi un xuhun. Tan tsihin yacan ñi cua tyahvi un tsa cuenda yo—catyí ra Jesús tsihin ra Pedro.

18

Nu janahā ra Jesús yóo ra cahnu ca cuví nuu tandihi nyívi tsa ndacá ñaha Nyoo

(Mr. 9.33-37; Lc. 9.46-48)

¹ Quívi can natuhvā ra tsicá tsihin ra Jesús nu nyaá ra, tan tsicā tuhun ra naha tsi ra tan catyí ra naha:

—iYóo ra cahnu ca cuví nu ndacá ñaha Nyoo?

² Tacan tan ra Jesús canā ra tsi iin ra luhlu, tan tyaa ra tsi ra mahñu ra naha. ³ Tan catyí ra:

—Tsa nditsa catyí yu tsihin ndo, tyin tatun nyoooho tan ña cua nasama ndo cuhva iyó ndo tan ña janduluhlu ndo tsi ndo tumaa ra nyihi, ña cua cuví quihvi ndo nu ndacá ñaha Nyoo. ⁴ Tyin ra tsa cahnu ca cuví nuu Nyoo, juvin ra cuví ra tsa janduluhlu tsi, tumaa ra luhlu ihya. ⁵ Nyívi tsa naquihín tsi iin nyívi tumaa ra luhlu ihya, tyin tsinú iñi ñi tsi yu, yuhu naquihín cuenda ñi.

Nu caahán ra Jesús tsihin yo nacaa jaha cuenda yo tsi yo coto javaha yo tsa ña vaha

(Mt. 5.29-30; Mr. 9.42-48; Lc. 17.1-2)

⁶ Tatun yóo nyívi natyuhú tsi iin nyívi tsa ñaha ca tsinú vaha iñi tsi yu, na javaha ñi tsa caquiñi, vaha ca na cunuhñi iin yuu yoso vee jucun ñi natyuhú can, tan cujaneñi nyívi tsi ñi nu cunu ndutya ñuhu. ⁷ iNdahvi nyívi ñuu ñayivi, tyin tacan iyó tsa jatívi tsi ñi! iTan ndahvi tucu ra ndaahvi tsa jatívi tsi ñi!

⁸ Yacan cuenda tatun ndaha un o tsaha un javahā tsa ña vaha, cahnya can tan javita un. Tyin vaha ca quihvi un nu coo un

tsihin Nyoo tsihin tsa lundu ndaha un o lundu tsaha un, tan ñavin ca tsa nanii un tan jacuhun Nyoo tsi un nu cayú ñuhu tsa ña cua ndahva maa. ⁹ Tun javahá un tsa ña vaha jahá tinuu un, tava can tan javita un. Tyin vaha ca quihvi un nu coo un tsihin Nyoo tsihin intuhun tinuu un, tan ñavin ca tsa jacuhun Nyoo tsi un tsihin nduvi tinuu un nu cayú ñuhu tsitsi anyaya.

Nu cahan ra Jesús tyin tumaa mbee tsa cunaa, tacan cuví yo
(Lc. 15.3-7)

¹⁰ Ña caca iñi ndo tyin ra nyihi cuenda yu ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria. ¹¹ Tyin yuhu, Rayí tsa quee nda gloria, vatsí jacacu yu tsi nyivi tsa cuanaa.

¹² ¿Nacaa cuñi nyoocho? Tatun iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cuhun ra cunanducu ra tsi quiti tsa cuanaa can? ¹³ Tan tatun nañihi ra tsi ti, tsa nditsa tyin si ca cua cuñi ra tsihin quiti can, tan ñavin ca tsihin tsa cumi xico tsahun cumi quiti tsa ña tsinaa. ¹⁴ Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyivi tsa cuví tumaa ra nyihi ihya.

Nacaa taahán tsi jahá tahan yo tucahnu iñi tsi yo

(Lc. 17.3)

¹⁵ Tatun ra yañi un tan javahá ra tsa ña vaha tsi un, cahan tsihin intuhun ñi maa ra tan catyí un tsihin ra tyin ña vaha cuhva javahá ra. Tan tatun tyaa yahvi ra tuhun caahán un, tsa jahá canaa un tsi ra inga tsaha cuenda Nyoo cuví can. ¹⁶ Maa tyin tatun ña tyaa yahvi ra tsi un, tacan tan cana un tsi iin o uvi ra tyin cuví ra naha tsa ndaa tsa cuenda tsa cua cahan un tsihin ra can. ¹⁷ Tatun ña tyaa yahvi ra ndi maa tsi ra tsa tsahan tsihin un naha ra, tacan tan cahan tsihin tandihí nyivi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jahá ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tavá xuhun cuenda ra ndacá ñaha nda ñuu Roma.

¹⁸ Tsa nditsa catyí yu tsihin ndo, tyin tandihí tsa cuñi ndo ihya nu ñuhu ñayivi, tsa nuuhñi tsi jahá maa Nyoo nda gloria. Tan tandihí tsa ndatsi ndo ihya nu ñuhu ñayivi, tsa ndatsi maa Nyoo nda gloria.

¹⁹ Tan juvin ñi catyí tucu yu tsihin ndo, tatun uvi ndo ihya nu ñuhu ñayivi, tan tsa natuhun tahan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo. ²⁰ Tyin nu yucú uvi o uñi nyivi tan

jacahnú ñi tsi yu, ican nyaá yu mahñu ñi —catyí ra Jesús.

²¹ Tacan tan tsahan ra Pedro tsindaca tuhun ra tsi ra Jesús tan catyí ra:

—Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahán tsi jaha yu tucahnu iñi tsi ra? ¿A utsa taahan tsaha?

²² Tan nacahan ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahán tsi jaha un tucahnu iñi.

Nu cahan ra Jesús iin cuhva cuenda iin ra tsa ña cuñi jaha tucahnu iñi

²³ Yacan cuenda tsa ndacá ñaha Nyoo tsi nyivi cuví tsi tumaa iin rey tsa nacana tsi tandihí musu ra tyin cua nyehe ra nácaa nyaá cuenda ra naha tsi ra. ²⁴ Tan cuhva tsa quitsahá natavá ra cuenda, tan tsindaca ra tsi iin musu tsa cuaha millón pesu nyaá cuenda tsi ra. ²⁵ Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasihi ra, tan tsihin sehe ra tan tandihí tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.”

²⁶ Tacan tan musu can tsicuiñi tsiti ra nuu tsitoho ra, tan cahan ndaahvi ra tsihin ra, tan catyí ra: “Tata, jahá tumañi iñi, cuatu un luxu, tan tyahvi yu tandihí tsa nyaá cuenda yu tsi un nda ñihi yu xuhun”, catyí ra. ²⁷ Tan cundahvi iñi tsitoho ra tsi ra, tan jahá ra tucahnu iñi tsi ra, tan janaa ra tandihí tsa nyaá cuenda ra, tan jandoq nuña ra tsi ra. ²⁸ Maa tyin cuhva tsa quita musu can, nañihí ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tiñ ra tsi ra can, tan quitsahá tiñ ra jucun ra, tan catyí ra tsihin ra: “Tyahvi tsa nyaá cuenda un tsi yu.” ²⁹ Tacan tan tsicuiñi tsiti ra can nuu ra, tan cahan ndaahvi ra tsihin ra tan catyí ra: “Cuatu luxu tan nda ñihi yu xuhun tan cua tyahvi yu tandihí tsa nyaá cuenda yu tsi un”, catyí ra. ³⁰ Maa tyin maa ra ña cuñi ra cuatu ra, tan tsahan ra tsityihí ra tsi ra can vehe caa nda cuanda tsa tyahvi ra tsa nyaá cuenda ra tsi ra. ³¹ Tsa nyehe inga ca musu tsa javahá ra, cuihaya xaan cuñi ra naha, tan tsahan ra naha tsinacatyí tuhun ra naha tsihin tsitoho ra naha tsa ña vaha tsa javahá ra can. ³² Tacan tan tsitoho ra can tava tyiñu ra na quitsi ra can. Tan tsa saaq ra, tan catyí ra tsihin ra: “Musu ña vaha cuví un. Yuhu jahá yu tucahnu iñi tandihí tsa nyaá cuenda un tsi yu, tyin cahan ndaahvi un tsihin yu. ³³ Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, catyí ra tsihin ra. ³⁴ Tan cuxaan xaan tsitoho ra, tan tava tyiñu ra

na tatsi tuñi ra naha tsi ra nda cuanda tsa tyahvi ra tandihi tsa nyaá cuenda ra.

³⁵ Tan nu ndihi cahān ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyooho tatun ña jaha ndo tuc-ahnu iñi tsi nyivi ndo tsihin tsa ñi iñi añima ndo.

19

Nu caahán ra Jesús tyin ña vaha tsa nacoo ihñi rayi tsi ñasihi ra

(Mr. 10.1-12; Lc. 16.18)

¹ Tsa yahā tsa cahān ra Jesús tuhun ihya, tan quita ra cuenda Galilea can, tan cuahán ra cuenda Judea inga tsiyo yutya cahnu Jordán, ityi nu caná ñicanyii. ² Cuaha xaan nyivi tsinyicun tsi ra, tan janduvahā ra tsi nyivi cuuhvi.

³ Tacan tan juhva ra fariseo naha ra natuhvā ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuvi tyaa ra naha cuatyí siqui ra. Tan tsicā tuhun ra naha tsi ra tan catyí ra naha:

—¿A vaha tsa nacoo rayi tsi ñasihi ra tsa cuenda náa ñi tsihi tsahā ña tsi ra?

⁴ Tan nacahān ra tan catyí ra:

—¿A ña tuhvā ndo cahvi nu tutu Nyoo nu catyí tsi tyin ra tsa javahā tsi ndo nda quivi jihna ñi, javahā ra rayi tan ñaha? ⁵ Tan catyí tsi tyehen: “Taahán tsi nacoo rayi tsi jutu ra tan sihi ra, tan ndu iin ra tsihin ñasihi ra. Tan tsa nduvi taahan ñi cua cuvi ñi tumaa tsa intuhun ña nyivi.” ⁶ Yacan cuenda, ñavin ca uvi taahan ñi, maa tyin nduvi ñi intuhun ña nyivi cuvi ñi. Yacan cuenda, ña taahán tsi tsa nacoo tahan ñi tsi ñi tyin maa Nyoo tsa jandu iin tsi ñi —catyí ra.

⁷ Tacan tan tsicā tuhun ra naha tsi ra Jesús tan catyí ra naha:

—¿Nacuenda tsa tyaa ra Moisés tyin cuvi can iin rayi tutu cuenda ley ra tan nacoo ra ñasihi ra?

⁸ Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsahā ra Moisés ndatu tsa nacoo ndo ñasihi ndo. Maa tyin quivi jihna ñi ñavin tacan tsicoq nyivi. ⁹ Yuhu catyí yu tsihin ndo tyehen: Ra tsa nacoo ñasihi, tan ñavin tsa cuenda tsa quituví ña tsihin inga rayi, tan tindahā ra tsihin inga ñaha, tsicoó cuatyí ra nuu Nyoo. Tan ra tsa tindahā tsihin ñaha tsa nacoo rayi can, juvin ñi tsicoó tucu cuatyí ra can —catyí ra.

¹⁰ Tacan tan ra tsicā tsihin ra, catyí ra naha tsihin ra:

—Tatun tacan taahán tsi coo rayi tsihin ñasihi ra, vaha ca ña tindaha yo.

¹¹ Tan ra Jesús catyí ra tsihin ra naha:

—Ña tandihi nyivi cuvi naquihin cuenda tuhun ihya. Maa tyin nyivi tsa tsahā Nyoo cuvi naquihin cuenda ñi can. ¹² Tsa ña tindaha nyivi, cuaha ñi cuenda cuvi tsi. Yihí ñi ña cuñi ñi tindaha ñi tyin iin cuhva caa maa ñi nda cacú ñi. Tan inga ñi ña cuñi ñi tindaha ñi tyin tsa nducapun ñi jaha nyivi. Tan yihí ñi ña tindahā ñi tsa cuenda tsa cuñi ñi javaha ñi maa ñi maa tyiñu Nyoo, na nducuaha ca añima tsa ndacá ñaha Nyoo. Tandihi nyivi tsa cuvi javaha yacan na javaha ñi —catyí ra Jesús.

Nu nasocó ra Jesús tsi tsa nyihi

(Mr. 10.13-16; Lc. 18.15-17)

¹³ Tacan tan quitsi ndaca nyivi juhva tsa nyihi tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra tsicā tsihin ra quitsahā caahán ra naha tsi nyivi tsa cuahán tsihin tsa nyihi can. ¹⁴ Maa tyin ra Jesús catyí ra:

—Jaña ndo tsi tsa nyihi na quitsi maa tsi naha tsi nu nyaá yu. Tan ña casi ndo. Tyin nyivi ndacá ñaha Nyoo cuvi ñi tumaa tsa nyihi ihya —catyí ra.

¹⁵ Tacan tan tyiso ndaha ra jiñi tsi naha tsi. Yahā can tan cuahán ra.

Nu tsahā ra Jesús cuhva tyin yí xaan nacuhva cuenda iin ra cuca tsi ra tsi Nyoo

(Mr. 10.17-31; Lc. 18.18-30)

¹⁶ Iin ra tyuvaa tsahan ra tsindacā tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayivi nyito tsa ña cua naa maa?

¹⁷ Tan ra Jesús catyí ra tsihin ra:

—¿Nacuenda catyí un tyin ra vaha cuvi yu? Intuhun ñi maa Nyoo cuvi ra vaha. [Tan tsa catyí un tyin vaha yu, nacotó un tyin Nyoo cuvi yu.] Maa tyin tatun cuñi un coo un ñayivi tsa ña cua naa maa, javaha tandihi tuhun tsa tsahā Nyoo tyin javaha yo —catyí ra tsihin ra.

¹⁸ Tan ra tyuvaa can catyí ra:

—¿Ndáa tsa cuvi can?

Tan ra Jesús catyí ra tsihin ra:

—Ña cahñi un nyivi. Ña coo inga ñaha tsi un. Ña suhu un tsa tsii nyivi. Ña cahān un cuendu siqui nyivi. ¹⁹ Tyaa yahvi tsi jutu un tan tsi sihi un. Tan cuñi tsi nyivi, tumaa tsa cuñi un tsi maa un.

²⁰ Tan ra tyuvaa can, catyí ra tsihin ra:

—Tandihí maa yacan tan tyaa yahvi yu nda tahan luhlu yu tan nda cuanda vityin. ¿Náa ca cumañi tsi yu?

²¹ Tan ra Jesús catyí ra tsihin ra:

—Tatun cuñi un tsa iin ndaha ñi cuvi un iin ra cuiti nuu Nyoo, cyaahan tan xico un tsa iyó tsi un, tan cuhva un tsi nyivi ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

²² Maa tyin cuhva tsa tsiñi ra tyuvaa can tsa cahān ra Jesús tsihin ra, cuihiya xaan cuñi ra cuvī tan cuanuhū ra tyin cuca xaan ra.

²³ Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yī xaan tan cuvī nacuhva cuenda nyivi cuca tsi ñi na cundaca ñaha Nyoo tsi ñi. ²⁴ Catyí yu tsihin ndo inga tsaha, tyin vasu yī xaan yaha iin camellu xuu iin yiqui tucu, maa tyin yī xaan ca tsa quihvi iin nyivi cuca nu ndacá ñaha Nyoo —catyí ra Jesús.

²⁵ Tsa tsiñi ra tsicá tsihin ra Jesús tsa cahān ra, iyo xaan cuñi ra naha, tan quit-sahā tsicá tuhun tahan ra naha, tan catyí ra naha:

—Tun tacan, yoñi cua cuvī cacu

²⁶ Tacan tan nanyehē ra Jesús nu nyecú ra naha tan catyí ra:

—Nyivi ña cuvī javaha ñi yacan, maa tyin Nyoo cuvī javaha ra tandihī.

²⁷ Tacan tan quitsahā caahán ra Pedro tsihin ra:

—Jutu Mañi yu, nyuhu tandihī maa tsa iyó tsi ndi nacoq ndi tan nyicún ndi tsi un. ¿Náa cua ñihi ndi? —catyí ra tsihin ra.

²⁸ Tan nacahān ra Jesús tan catyí ra:

—Tsa nditsa catyí yu tsihin ndo, tyin quivi tsa cua ndutsaa tandihī tsa iyó, yacan cuvī quivi cua cunyaa yuhu Rayi tsa quee nda gloria nu tyayu sī xaan caá tan cua cundaca ñaha yu. Tan nyoocho tsa nyicún tsi yu, cua cunyecu ndihī ndo nu utsi uvi taahan tyayu sī caá. Tan cua cundaca ñaha ndo tsi tandihī nyivi cuvī tata tsa utsi uvi taahan sehe ra Israel. ²⁹ Tan tandihī nyoocho tan tandihī inga nyivi tsa nacoq vehe, o yañi ñi, o cuhva ñi, o jutu ñi, o sīhi ñi, o ñasīhi ñi, o sehe ñi, o ñihu ñi, tsa cuenda yuhu, cua ñihi ñi iin cientu ca tsaha siqui can, tan cua ñihi tucu ñi ñayivi nyito tsa ña cua naa maa coo ñi. ³⁰ Cuaha xaan nyivi cuahán ityi nuu vityin, ñi ican cua cuhun nu ndihī ña. Tan cuaha xaan nyivi cuahán nu ndihī vityin, ñi ican cua cuhun ityi nuu.

20

Nu jacuahā ra Jesús iin cuhva cuenda ra jahā tyiñu

¹ Tsa ndacá ñaha Nyoo tsi nyivi, cuvī tsi tumaa iin ra iyó cora uvas. Tan tuvi ñi quita ra cuahán ra cuanducú ra musu jahā tyiñu nu tyiñu jahá ra. ² Tan ndoq ra tuhun tsihin musu can tyin cua tyahvi ra yahvi tsa iin quivi. Tan jacuhūn ra tsi ra naha cua jahā tyiñu ra naha nu iyó tyiñu jahá ra. ³ Yahā can tan cuahán ra inga tsaha cuhva caa iin tsa tuvi. Tan nyehe ra tsi juhva ca ra yucú taxin nuyahvi can. ⁴ Tan catyí ra tsihin ra naha: “Cuaahan ndihī tucu nyoocho jahā tyiñu ndo

nu tyiñu jahá yu, tan cua tyahvi maa yu tsi ndo nácaa taahán tsi tsi ndo.” Tacan tan cuahán ndihī tucu ra can naha ra. ⁵ Tan tsitoho cora can quita ra inga tsaha tsa ora. Tan juvin ñi musu nducú ra. Tan caa uñi tsa tseñi, quita ra inga tsaha nducú ra musu. ⁶ Yahā can tan quita nyico ra caa uhun tsa tseñi tan nyehe ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.” ⁷ Tan nacahān ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí ra tsihin ra naha: “Cuaahan ndihī ndo jahā tyiñu ndo nu tyiñu jahá yu. Tan tyahvi maa yu tsi ndo nácaa taahán tsi tsi ndo”, catyí ra. ⁸ Tan cuhva tsa cua cuaa, tsitoho tyiñu can catyí ra tsihin ra yihī ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvi nu ndihī naha ra, tan nu cua ndihī tan tyahvi un tsi ra tsa quihvi tsa jihna ñi naha ra”, catyí ra. ⁹ Tacan tan tsaq ra tsa quihvi caa uhun tsa tseñi can naha ra. Tan intuhun intuhun ra naha quihñ ra naha yahvi nanii iin quivi. ¹⁰ Yahā can, tan cuhva tsa tahān tsi tsi ra tsa quihvi tsa jihna ñi can naha ra, cuñi maa ra naha tyin cuaha ca cua tyahvi ra tsi ra naha. Maa tyin inducu ñi yahvi iin quivi quihñ ra naha. ¹¹ Tan cuhva tsa quihñ ra naha, quitsahā caahán ra naha tsi tsitoho tyiñu can. ¹² Tan catyí ra naha: “Ra tsa tsaq nu ndihī ihya naha ra, intuhun ñi hora jahā tyiñu ra naha. Tan iin ñi yahvi tyahvi un tsi ra naha tsihin tucu nyuhu tan nduvi nduvi jahā tyiñu ndi nu ihñi”, catyí ra naha. ¹³ Maa tyin nacahān tsitoho tyiñu can, tan catyí ra tsihin iin ra can: “¿Tsaal, nduve tsa ña vaha javahā yu tsihin un. ¿A ñavin yahvi tsa iin quivi ndoo yu tuhun tyin cua tyahvi yu tsi un? ¹⁴ Quihñ yahvi un, tan cuanuhu. ¿A nduve ndatu iyó tsi yu tsa tyahvi yu tsi ra tsa quihvi nu ndihī iin ñi cuhva tsa tyahvi yu tsi yoocho? ¹⁵ ¿A nduve ndatu iyó tsi yu tsa javaha yu náa cuñi maa yu tsihin xuhun yu? ¿A ndasi cuñi un tyin vaha iñi yu tsihin inga ra can naha ra?” catyí ra. ¹⁶ Tacan nyivi quihvi nu ndihī, cuhun ñi ityi nuu. Tan nyivi cuahán ityi nuu, nda nu ndihī ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsi ra.

Inga tsaha jacotó ra Jesús cuhva cua cahñi nyivi tsi ra

(Mr. 10.32-34; Lc. 18.31-34)

¹⁷ Cuhva tsa cuñi cuhun ra Jesús nda ñuu Jerusalén, cana sīn ra tsi tsa utsi uvi ra tsicá tsihin ra tan catyí ra tsihin ra naha:

¹⁸ —Nyehe ndo tyin cuahán yo Jerusalén vityin. Tan ndacan cua nacuhva cuenda nyivi tsi yuhu, Rayi tsa quee nda gloria, tsi

ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyi ra naha tyin taahán tsi cúu yu. ¹⁹ Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quivi cua nandoto yu —catyi ra Jesús tsihin ra naha.

Nu tsicán sihi ra Jacobo tan ra Juan iin tumañi iñi tsi ra Jesús
(Mr. 10.35-45)

²⁰ Tacan tan ñasihi ra Zebedeo natuhva ña nu nyii ra Jesús tsihin nduvi sehe ña, ra Jacobo tan ra Juan. Tan tsicuiñi tsiiti ña nuu ra tyin cua ndacan ña iin tumañi iñi tsi ra. ²¹ Tan tsicā tuhun ra Jesús tsi ña tan catyi ra:

—¿Náa cuñi un?

Tan catyi ña:

—Quivi tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

²² Maa tyin nacahan ra Jesús tan catyi ra:

—Nyooho ña tsitó ndo tsa tsicán ndo. ¿A cuví nyehe nyooho tundoho tsa cua nyehe yuhu? ¿A cuví cahun ndo tuhun tsihihi tumaac cua cahun yuhu? —catyi ra.

Tan nacahan ra naha tan catyi ra naha:

—Cuví maa.

²³ Tan catyi ra Jesús tsihin ra naha:

—Tsa nditsa tyin cua nyehe ndo tundoho, tan cua cahun ndo tuhun tsihihi tumaac cahun yuhu tuhun tsihihi. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahán tsi cuhva yacan tsi ndo, tyin tsa tsitó maa Jutu yu yóo cua cuhva ra can —catyi ra Jesús tsihin ra naha.

²⁴ Tan tsa tsiñi tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra. ²⁵ Maa tyin cana ra Jesús tsi ra naha tan catyi ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha. ²⁶ Maa tyin ñavin tacan taahán tsi javaha nyooho. Tyin ra tsa cuñi nducahu ca cuví nu Nyoo, cuñi tsi cuví ra musu tandihi nyooho.

²⁷ Tan ndáa nyooho tsa cuñi ndo cuví ndo ityi nuu, cuñi tsi cuví ndo musu tandihi ca ra naha. ²⁸ Tumaac yuhu, Rayii tsa quee nda gloria, ña vatsi yu tyin jatinyee nyivi tsi yu. Maa tyin yuhu vatsi yu vatsi jatinyee yu tsi maa ñi, tan cua cuhva yu ñayivi yu tsa cuenda ñi. Tyin tsihin yacan cua tyahvi yu cuatyti tandihi ñi.

Nu janduvahā ra Jesús tsi uvi taahan ra cuaa
(Mr. 10.46-52; Lc. 18.35-43)

²⁹ Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyivi cuahán cua nyicun tsi ra naha. ³⁰ Tan yuhu ityi can nyecú uvi taahan ra cuaa. Tan cuhva tsa tsiñi ra naha tyin cua yaha ra Jesús, quitsahā caná tsaa ra naha. Tan catyi ra naha:

—Jutu Mañi yu, tata ra David, cundaahvi iñi tsi ndi! —catyi ra naha.

³¹ Tan nyivi quitsahā caahán ñi tsihin ra naha na casi ra naha yuhu ra naha. Maa tyin ñihi ca canā tsaa ra naha:

—Jutu Mañi yu, tata ra David, cundaahvi iñi tsi ndi!

³² Tacan tan tsicuiñi ra Jesús tan cana ra tsi nduvi taahan ra cuaa can, tan tsicā tuhun ra tsi ra naha tan catyi ra:

—¿Náa cuñi ndo javaha yu tsi ndo?

³³ Tan nacahan ra naha tan catyi ra naha:

—Jutu Mañi yu, jananyehe tsi ndi.

³⁴ Tacan tan cundaahvi iñi ra Jesús tsi ra naha, tan tñin ra tinuu ra naha. Tan iin yaha ñi nanyehe ra naha, tan cuiti cuanyicún ndihi ra naha tsi ra Jesús.

21

Nu cuahán ra Jesús ñuu Jerusalén
(Mr. 11.1-11; Lc. 19.28-40; Jn. 12.12-19)

¹ Tsa cua tsaa ra naha ñuu Jerusalén, tan tsaa ra naha ñuu Betfagé, yatyin ñi yucú Olivo nu iyó yutun olivo. Tacan tan tava tyiñu ra Jesús tsi uvi ra tsicá tsihin ra. ² Tan catyi ra tsihin ra naha:

—Cuaahan ndo ñuu tsa canyii ityi nuu ihya. Tan ican cua ñihi ndo iin urru sihi, nuuhñi ti. Tan ndacá ti iin urru luhlu. Ndatsi ndo tsi ti, tan quitsi ndaca ndo tsi ti naha ti tsi yu. ³ Tan tatun yóo tsicá tuhun tsi ndo: “¿Náa cuú ndo tsi ti naha ti?”, tan catyi ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa tyin numi ñi cua quitsi ndaca nyico ndi tsi ti naha ti”, catyi ndo tsihin ñi —catyi ra.

⁴ Tacan cuví tyin cundaa tsa cahan ra cuví ndusu yuhu Jutu Mañi yo tahañ tsanaha nu catyi ra tyehen:

⁵ Cahan ndo tsihin nyivi ñuu Sión:

“Nyehe ndo, vatsi rey ndo nu iyó ndo.

Ndaahvi ñi vatsi ra yosó ra iin urru luhlu, sehe iin quititi tsa tuhvá nyisó carga”, catyi ra cuví ndusu yuhu Nyoo can.

⁶ Tacan tan cuahán ra tsicá tsihin ra Jesús, tan javahā ra naha tumaac tsa cahan ra tsihin ra naha. ⁷ Quitsi ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaā ra Jesús tsi ti. ⁸ Tan cuaha xaan nyivi tsaquín ñi jahma ñi nu ñuhu ityi nu cuahán ra, tan inga ñi tsahnya ñi ndaha yutun tsaquín ñi tsitsi ityi. ⁹ Tan nyivi tsa cuahán ityi nuu tan ityi tsata, quitsahā caná tsaa ñi tan catyi ñi:

—¡Cahnu xaan cuví ra cuví tata ra rey David! ¡Cahnu xaan cuví ra tsa jaquitsi Jutu Mañi yo Nyoo! ¡Tan na jacahnu yo tsi Nyoo ra nyaá gloria! —catyí ñi.

¹⁰ Cuhva tsa tsaa ra Jesús ñuu Jerusalén can, tandihi maa nyivi ñuu quitsaha cuvaá jahá ñi, tan cuaha xaan ñi tsicá tuhun tahan ñi tsi ñi, tan catyí ñi:

—¿Yóo ra cuví ra ihya?

¹¹ Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyí Galilea cuví ra —catyí ñi.

Nu tava ra Jesús tsi nyivi xicó tsitsi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹² Yahá can tan quihvi ra Jesús tsitsi vehe ñuhu cahnu Nyoo. Tan tava ra tsi tandihi nyivi jatá tan xicó ican. Tan janduvá ra mesa nu nasamá ñi xuhun. Tan janduvá ra tyayu nu xicó ñi paloma. ¹³ Tan catyí ra tsihin nyivi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyoocho jananduví ndo vehe ihya, vehe ñasuhu —catyí ra tsihin ñi.

¹⁴ Tan tsa tsito juhva ra cuaa tan ra coxo naha ra tyin nyí ra Jesús tsitsi vehe ñuhu cahnu, quihvi ra naha tan janduvahá ra Jesús tsi ra naha. ¹⁵ Tan nyehe ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javahá ra Jesús tsa iyo. Tan tsiñi ra naha tyin caná tsaa tsa nyihi tsitsi vehe ñuhu, tan catyí tsa nyihi can:

—¡Cahnu xaan cuví ra cuví tata ra rey David! —catyí tsi naha tsi.

Tacan tan cuxaan ra naha tsa tsiñi ra naha tsa caahán tsa nyihi can. ¹⁶ Tan catyí ra naha tsihin ra Jesús:

—¿A tsiñi un tsa caahán tsa nyihi can?

Tan nacahan ra Jesús tan catyí ra:

—Tsiñi yu. Maa tyin ¿a ñaha ca cahvi nyoocho nu tutu Nyoo nu catyí tsi tyehen? Jutu Mañi yu, tsa nyihi tan lee tsa ndi tyaxín si xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

¹⁷ Tacan tan nacoó ra tsi ra naha, tan quita ra ñuu can cuahán ra ñuu Betania. Tan ican ndoo ra tsacuaa can.

Nu cahan ra Jesús tsi yutun higo tsa ña tsahá tsiti

(Mr. 11.12-14, 20-26)

¹⁸ Tan tsa tuvi cuí ñi inga quívi can, vatsi nyico ra Jesús nda ñuu Jerusalén, tan tsaa soco tsi ra. ¹⁹ Tan nyehe ra nyaá iin yutun higo yatyn ñi yuhu ityi can. Tan natuhvá ra nu nyaá tun, maa tyin nduve maa náa nañihi ra nuu tun. Maa ñi ndaha tun iñi. Tacan tan catyí ra tsihin tun:

—¡Ndi inga tsaha ña cua cuhva ca un tsiti!

Tan juvin ñi cuhva can na ityi tun. ²⁰ Tan tsa nyehe ra tsicá tsihin ra tsa javahá ra tsi tun, iyo xaan cuñi ra naha, tan tsicá tuhun ra naha tsi ra tan catyí ra naha:

—¿Nacuenda tsa numi xaan na ityi yutun higo can?

²¹ Tan nacahan ra Jesús tan catyí ra:

—Tsa nditsa catyí yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javahá yu tsihin yutun higo ihya ñi cuví javaha tucu nyoocho, tyin cuví ndihi tucu catyí ndo tsihin yucu ihya: “Cúatsiyo ihya tan cuhun un nda tsitsi ndutya ñuhu.” Tan cua cuhun tsi. ²² Tan tandihi tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñihi ndo —catyí ra Jesús.

Nu tsicá tuhun ra cumi tyiñu vehe ñuhu naha ra tsi ra Jesús yóo tava tyiñu tsi ra tyin cahan ra tsihin nyivi

(Mr. 11.27-33; Lc. 20.1-8)

²³ Yahá can tan quihvi ra Jesús tsitsi vehe ñuhu cahnu, tan tsitsi tsa jacuahá ra ican, natuhvá ra jutu tsa cuví ityi nuu naha ra nu nyaá ra, tan ra cuví mandoñi ñuu Israel naha ra. Tan tsicá tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

²⁴⁻²⁵ Tan nacahan ra Jesús tan catyí ra:

—Yuhu tucu cuñi yu ndaca tuhun yu tsi nyoocho. ¿Yóo jaquitsi tsi ra Juan tyin ja-coondutya ra tsi nyivi? ¿A Nyoo jaquitsi tsi ra, o nyivi? Tatun catyí tuhun ndo tsihin yu, cua catyí tuhun tucu yuhu tsihin ndo yóo tava tyiñu tsi yu tsa javahá yu tyehen—catyí ra Jesús tsihin ra naha.

Tacan tan ra ican naha ra quitsaha caahán yuhu tahan ra naha, tan catyí ra naha:

—Tatun catyí yo tyin Nyoo jaquitsi tsi ra Juan, cua catyí ra tsihin yo: “Tun tacan, ¿nacuenta ña tsinú iñi ndo tsi ra?” ²⁶ Tan tatun catyí yo tyin nyivi jaquitsi tsi ra, yu-uhvi yo coto cuxaan nyivi tsi yo, tyin tandihi ñi tsinú iñi ñi tyin ra Juan, cuenda Nyoo cahan ra —catyí ra naha.

²⁷ Tacan tan catyí ra naha tsihin ra Jesús:

—Ña tsitó ndi.

Tacan tan ra Jesús catyí ra tsihin ra naha:

—Tan ndi yuhu, tan ña catyí tuhun yu tsihin ndo yóo tava tyiñu tsi yu.

Nu caahán ra Jesús iin cuhva cuenda uvi taahan sehe iin rayi

²⁸ Ra Jesús catyí ra tsihin ra cumi tyiñu vehe ñuhu naha ra:

—¿Nacaa catyí ndo cuenda tsa cua cahan yu ihya? Iin rayi, iyó uvi taahan sehe ra. Tan catyí ra tsihin iin sehe ra: “Cuaahan cua jaha tyiñu nu iyó tyiñu jahá yu.” ²⁹ Tan

nacahan sehe ra tan catyí ra: “¡Ña cuhun yu!” Maa tyin yaha can tan nasama cuhva tsicá iñi ra tan tsahan ra tsijaha tyiñu ra. ³⁰ Yaha can tan jutu ra cahan ra tsihin inga sehe ra. Tan catyí tucu ra tsihin na na cuhun ra cujaha tyiñu ra. Tan ra ican numi ñi quihñ ra tyiñu tan catyí ra: “Vaha, tyaa, cuhun maa yu.” Maa tyin ña tsahan ra. ³¹ Tsitsi tsa nduvi taahan ra can naha ra, ¿ndáa ra javahá tsa cahan jutu ra? —catyí ra Jesús.

Tan nacahan ra naha tan catyí ra naha:

—Ra tsa cahan ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyivi caquiñi tumaa ra tsa tavá xuhun cuenda ra ndacá ñaha tan ñi sñi iñi caca nuu, jihna ca ñi cua quihvi nu ndacá ñaha Nyoo tan ñavin ca nyooho. ³² Tyin ra Juan, ra jacoondutya tsi nyivi, quitsi ra jacuahá ra tsi ndo nácaa taahán tsi coo cuiñi ndo, tan nyooho ña tsinu iñi ndo tsi ra. Maa tyin ra tavá xuhun naha ra tan ñi sñi iñi caca nuu tsinu iñi ñi tsi ra. Tan nyooho vasu ndi maa nyehe ndo yacan, maa tyin ña nasama ndo cuhva iyó ndo, tan ña tsinu iñi ndo tsi ra.

Nu caahán ra Jesús tyin tumaa cuví juhva nu caquiñi nahnu, tacan cuví ra tsa cua cahñi tsi ra

(Mr. 12.1-12; Lc. 20.9-19)

³³ Tyaa soho ndo inga cuhva ihya: Tsicoo iin rayiñ, tan iyó ñuhu ra. Tan tatsi ra yoho yucu vixi tsa nañi uvas, tan tyihñ ra cora. Tan javahá ra iin nu cua tava ra ndutya uvas can. Tan javahá tucu ra iin vehe sucun tyin cuví jaha cuenda ra tandihñ.

Yahá can tan tsahá nuu ra ñuhu can tsi juhva ra cua jaha tyiñu naha ra, tan cuahán ra inga ñuu. ³⁴ Tan tsa tsaa quivi tsa iyó uvas can, jacuhun ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahán tsi tsi ra. ³⁵ Maa tyin ra jahá tyiñu can tiñ ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra. ³⁶ Tacan tan tsa inga tsaha, cuaha ca musu jacuhun tsitoho cora can tan ñavin ca tsa jihna ñi. Maa tyin tumaa tsa javahá ra naha tsihin ra tsa tsahan jihna naha ra, tacan ñi javahá nyico ra naha tsihin ra ihya naha ra.

³⁷ Nu ndihñ jacuhun ra tsi maa maa sehe ra, tyin cuiñi maa ra tyin cua tyaa yahvi ra naha tsi sehe ra. ³⁸ Maa tyin cuhva tsa nyehe ra jahá tyiñu can naha ra tsi sehe ra, natuhun tahan ra naha tan catyí ra naha: “Ra ihya cua ndoo tsihin tandihñ tsa iyó ihya. Na cahñi yo tsi ra tan ndoo maa yo tsihin cora ihya”, catyí ra naha. ³⁹ Tacan tan tiñ ra naha tsi ra, tan tavá ra naha tsi ra ityi tsata

cora can, tan tsahñi ra naha tsi ra —catyí ra Jesús.

⁴⁰ Tacan tan tsicá tuhun ra Jesús tsi ra naha tan catyí ra:

—Quivi cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

⁴¹ Tan nacahan ra naha tan catyí ra naha:

—Ña cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jaha tyiñu naha ra, tan quivi coo uvas, cua nacuhva cuenda ra naha juhva tsa taahán tsi tsi ra cuví tsitoho cora can.

⁴² Tacan tan catyí ra Jesús tsihin ra naha:

—¿A ñaha ca cahvi nyoocho nu tutu Nyoo nu catyí tsi tyehen?

Yuu tsa javitá ihñi ra javahá vehe,

Yacan cuví yuu tsa ñiñi ca.

Jutu yo Nyoo cuví ra tsa javahá tandihñ can. Tan iyo xaan cuiñi yo nyehé yo, catyí tsi.

⁴³ Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyivi tsa javahá cuhva cuiñi ra tyin nditsa tsahá ñi tsi ñi cundaca ñaha ra. ⁴⁴ Tan tsa cuenda yuu can, yóo nyivi tsa nduva siqui tsi, cua tahnu cuatyí ñi. Tan tatun yuu can tan canacava tsi siqui yóo nyivi, cua taxin nyihñ ñi —catyí ra Jesús.

⁴⁵ Cuhva tsa tuvñi iñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cahan ra Jesús cuhva ihya, ⁴⁶ cuiñi ra naha tiñ ra naha tsi ra, maa tyin yuuhvi ra naha tsi nyivi tyin tsinu iñi ñi tyin ra Jesús caahán ra cuenda Nyoo.

22

Nu cahan ra Jesús iin cuhva cuenda vico tindaha

(Lc. 14.15-24)

¹ Quitsahá caahán ra Jesús tsihin nyivi inga tsaha tsihin cuhva, tan catyí ra:

² —Tsa ndacá ñaha Nyoo tsi nyivi cuví tsi tumaa iin rey tsa javahá iin vico tsa cuenda tsa cua tindaha sehe ra. ³ Tan jacuhun ra tsi musu ra na cucana ra naha tsi nyivi tsa jacoto ra tyin cuhun ñi, maa tyin ñi ican, ña cuiñi ñi cuhun ñi. ⁴ Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quiti xaahan. Tan tsa iyó vaha tandihñ. Yacan na quitsi ñi”, catyí ra. ⁵ Maa tyin ñi ican ña tyaa yahvi ñi tsa cahan ra. Iin ra tsahan ra nu iyó cora ra, inga ra tsahan ra nu jahá tyiñu ra. ⁶ Tan inga ra naha tiñ ra naha tsi musu rey can naha ra tan cañi xaan ra naha tsi ra naha nda cuenda tsahñi ra naha tsi ra naha. ⁷ Tacan tan ra rey can cuxaagñ xaan

ra, tan jacuhun ra tsi andaru ra na cucahñi ra naha tsi ra tsa tsahñi tsi musu can naha ra, tan cahmi ra naha ñuu ra naha. ⁸ Tacan tan catyí ra rey can tsihin musu ra: “Tandihí tan tsa iyó vaha tsa cuenda vico tindaha, maa tyin ñi cana yu, ña taahán tsi tsa quitsi ñi. ⁹ Cuaahan ndo ityi cahnu tan cana ndo tsi tandihí nyivi tsa nañihi ndo na quitsi ñi vico tindaha”, catyí ra rey can. ¹⁰ Musu can cuahán ra naha tandihí ñi ityi, tan jandu iin ra naha tsi tandihí nyivi nañihi ra naha: ñi caquiñi tan ñi vaha iñi. Tacan tan tsitu tsitsi vehe ra tsihin nyivi.

¹¹ Tacan tan quihvi ra rey can cua nyehe ra tsi tandihí nyivi tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsi. ¹² Tan catyí ra rey tsihin ra: “Tsaa, ¿nacuenda nyii un ihya tan nduve jahma vico tindaha nditsi un?” Tan ña nacahan maa ra can. ¹³ Tacan tan catyí ra rey can tsihin ra tyihí mesa can naha ra: “Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra”, catyí ra. ¹⁴ Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

Nu caahán ra Jesús tsa cuenda tsa tyahvi nyivi xuhun tsi ra ndacá ñaha nda ñuu Roma
(Mr. 12.13-17; Lc. 20.20-26)

¹⁵ Tacan tan cuahán ra fariseo naha ra tan ndoo ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siqui ra. ¹⁶ Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñi un nyehe un tsi nyivi cuca tan nyivi ndaahvi. ¹⁷ ¿Nacaa tsicá tucu iñi yooho: A vaha tyahvi yo tsa tsicán ra ndacá ñaha nda ñuu Roma, o ña vaha?

¹⁸ Tan ra Jesús tuví iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuví tyin nducú cuhva ndo tsi yu? ¹⁹ Janaha jihna ndo iin xuhun tsa tuhva yo tyahví tsi ra ndacá ñaha tsi yu —catyí ra.

Tan tsindacá ra naha iin xuhun tsa nañi denario tsi ra. ²⁰ Tan tsa nyehe ra Jesús xuhun can, tsicá tuhun ra tsi ra naha tan catyí ra:

—¿Yóo nuu tan yóo sivi nyaá ihya?

²¹ Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

²² Tsa tsiiñi ra naha tsa cahan ra Jesús, iyo xaan cuñi ra naha. Tan cuahán ra naha.

Nu cuñi ra cuvi saduceo naha ra jandavi ñaha ra naha tsi ra Jesús

(Mr. 12.18-27; Lc. 20.27-40)

²³ Juvín ñi quivi can juhva ra cuvi saduceo naha ra tsahan ra naha nu nyii ra Jesús. Tan ra cuvi saduceo can ña tsinú iñi ra naha tsa cua nandoto ndiyi quivi tsa cua naa ñuu ñayivi. Yacan cuenda tsicá tuhun ra naha tsi ra Jesús, tan catyí ra naha:

²⁴ —Maestro, ra Moisés catyí ra tyin tatun iin ra tindaha tan tsihi ra tan ña tsicoq sehe ra, taahán tsi tsa tindaha yañi ra tsihin ñasihi ra. Tacan tan cua coo sehe ra tsihin ña tsa cuenda ra yañi ra tsa tsihi. ²⁵ Vaha. Tun iin ra tan iyó utsa sehe yii ra, tan ra tsa jihna ñi tindaha ra. Tan nduve sehe ra tsicoq tsihin ñasihi ra tan tsihi ra. Ndoq ñasihi ra tsi yañi ra tsa tsinu uvi. ²⁶ Tan juvin ñi tsihi ndihi ra can. Tan ndoo ñaha can tsihin ra tsa tsinu uñi, maa tyin juvin ñi tacan tahán ndihi ra. Tan inducu ñi tahán tandihí tsa utsa ra naha. ²⁷ Tan nu ndihi ña tsihi ndihi maa ñaha can. ²⁸ Tatun nditsa tsa cua nandoto nyivi tsihi, ¿ndaa tsa utsa taahan ra can naha ra cua cuvi yii ña? Tyin tandihí maa ra naha tindaha tsihin ña —catyí ra naha.

²⁹ Tan nacahan ra Jesús tsihin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuvi tunyee iñi tsa iyó tsi Nyoo. ³⁰ Tyin quivi cua nandoto nyivi tsihi, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuvi ñi tumaa cuvi ángel tsa iyó gloria. ³¹ Tyin tuhun Nyoo tsahá cuenda tsi nácaa cuvi tuhun tsa cua nandoto nyivi tsa tsihi. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

³² —Yuhu cuvi Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito añima ra can naha ra, vasu tsanaha tsihi ra naha. Tyin Nyoo ñavin Nyoo cuenda nyivi tsihi cuvi ra, tyin Nyoo cuvi ra Nyoo cuenda nyivi nyito —catyí ra.

³³ Tan tsa tsiiñi nyivi tsa caahán ra Jesús, iyo xaan cuñi ñi.

Ley tsa ñiñi ca tsa tsaha Nyoo

(Mr. 12.28-34)

³⁴ Tsa tsito ra fariseo naha ra tyin ra Jesús tyasi ra yuhu ra saduceo naha ra, ndu iin ra naha. ³⁵ Tan iin ra tsa nyii tsihin ra naha cuvi ra maestro cuenda ley vehe ñuhu tan

cuñi ra nducu cuhva ra tsi ra Jesús. Tan tsica tuhun ra tsi ra, tan catyi ra:

³⁶—Maestro, ¿ndáa ley cuví tsa ñiñi ca?

³⁷Tan catyi ra Jesús tsihin ra:

—“Cuñi tsi Jutu Mañi yo Nyoo tsihin tsa nii ñi un tan tsihin tsa nii ñi aña un, tan tsihin tandihi tsa tsiñi tuñi jiñi un.” ³⁸Ley ihya cuví tsa ñiñi ca, tan tsa jihna ñi taahán tsi javaha yo. ³⁹Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyi tsi tyehen: “Cuñi tsi nyivi tahan un tumaa cuñi un tsi maa un.” ⁴⁰Tatun tyaá yahvi ndo nduvi taahan ley ihya, tsa tyaá yahvi ndihi ndo tandihi ca ley tsa tyaá ra Moisés jahá Nyoo, tan tandihi tuhun tsa jacuahá ra cuví ndusu yuhu Nyoo tahan tsanaha.

Ra Cristo cuví ra Sehe Nyoo tan juvin ñi cuví ra tata ra David

(Mr. 12.35-37; Lc. 20.41-44)

⁴¹Tsitsi tsa ndi yucú ra fariseo naha ra nu ndu ñi ra naha, ⁴²ra Jesús tsicá tuhun ra tsi ra naha, tan catyi ra:

—¿Nacaa tsicá ñi nyoocho cuenda ra cuví Cristo? ¿Yóo tata cuví ra, cuñi maa ndo?

Tan nacahan ra naha tan catyi ra naha:

—Tata ra David cuví ra.

⁴³Tacan tan ra Jesús catyi ra tsihin ra naha:

—Tun tacan, ¿nacuenta jacahan Tatyí Ii Nyoo tsi ra David tyin ra ndacá ñaha tsi ra cuví ra Cristo tan catyi ra tyehen?:

⁴⁴Nyoo cahan tsihin Jutu Mañi yu, ra Cristo, tan catyi ra tsihin ra:

“Cunyaá xiin cuaha yu nda cuenda caquin yu tsi ra xaan ñi tsi un naha ra tsaha un”, catyi ra David.

⁴⁵¿Nacaa cuví cuú tucu ra Cristo tata ra David, tan juvin ñi maa ra David catyi ra tyin ra Cristo Jutu Mañi ra cuví tsi ra? —catyi ra Jesús.

⁴⁶Tan yofi maa cuví nacahan nu cahan ra ndi intuhun maa tuhun. Tan nda quivi can, yofi ca maa cuñi nducu tuhun tsi ra.

23

Nu caahán ra Jesús tyin cuaha xaan cu-atyi ra maestro cuenda ley vehe ñuhu naha ra tan ra fariseo naha ra

(Mr. 12.38-40; Lc. 11.37-54; 20.45-47)

¹Tacan tan ra Jesús catyi ra tsihin tandihi nyivi, tan tsihin ra tsicá tsihin ra:

²—Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyi ley tsa tyaá ra Moisés. ³Yacan cuenda tyaá yahvi ndo tsa caahán ra naha tan javaha ndo tandihi cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, siin tsa jacuahá ra, tan siin tsa javahá ra naha. ⁴Janducuahá ca ra naha ley

tsa tsahá Nyoo tahan tsanaha. Tan cuñi ra naha tsa javaha nyivi tandihi can. Maa tyin ña cunye ñi javahá ñi tandihi can, tan ndi maa ra naha tan ña cuñi ra naha javaha ra naha can. ⁵Tyin maa ra naha tyaá ra naha caha ñi nu yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyivi. Tan tsinditsi ra naha jahma nañi ca tan ñavin ca tsa iyó tsi inga ca nyivi. Javahá ra naha tandihi can tyin na nyehe nyivi tyin vaha xaan ca ra naha. ⁶Tan nu vaha ca, cuñi ra naha cunye cu ra naha nu iyó vico tan catsi ra naha. Tan nu vaha ca cuñi ra naha cunye cu ra naha tsitsi vehe ñuhu. ⁷Tan nu tsicá nuu ra naha cuñi ra naha tyin cuhva nyivi nacumi tsi ra naha tyin jahá ñi tsa ñayivi tsi ra naha. Tan cuñi tucu ra naha tsa catyi ñi “maestro” tsihin ra naha.

⁸“Maa tyin nyoocho, ña cuhva ndo tsa cahan nyivi “maestro” tsihin ndo. Tyin intuhun ñi maa ra Cristo cuví maestro tsa nyii tsihin ndo, tan tandihi ca maa ra naha yañi ndo cuví tsi ra naha. ⁹Tan ña cahan ndo Jutu ndo tsihin ndi intuhun rayi ñuu ñayivi ihya, tyin intuhun ñi ra nyaá gloria cuví Jutu ndo. ¹⁰Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo. ¹¹Ra tsa jahá tyiñu tyiñu tandihi ca ra naha, ra ican cuví ra cahnu ca nu yucú ndo. ¹²Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi ra cua nducahnu ra jaha Nyoo.

¹³“Ndahvi nyoocho ra cuví maestro cuenda ley vehe ñuhu tan nyoocho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuví quihvi nyivi. Tan ndi maa ndo ña quihvi ndo, tan ndi ñi tsahá ndo tsa quihvi nyivi tsa cuñi quihvi.

¹⁴“Ndahvi nyoocho ra cuví maestro cuenda ley tan nyoocho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo cua ndacan tahvi ndo tsi Nyoo nu tuvi nyivi tyin jahá ndo tyin vaha xaan ndo. Maa tyin nduve náa catyi tyin quihín nyaa ndo vehe ñi ndaahvi tsa tsihi yí tyin ña cuví tyahvi ñi xuhun tsa tsicán ndo tsi ñi. Yacan cuenda cahnu ca tundoho cua nyehe ndo jaha Nyoo.

¹⁵“Ndahvi nyoocho ra maestro cuenda ley vehe ñuhu tan nyoocho ra fariseo! ¡jahá ndo tyin vaha xaan ndo, tan ña nditsa! Tyin nanducú ndo ñi cahnu nu ñuhu ñayivi tyin cuñi ndo nañihi ndo vasu intuhun nyivi cun-yicun tsi ndo. Tatun tsa quihvi ñi cuenda ndo, quini ca iyó ñi jahá ndo, tan ñavin ca maa ndo. Tan cua cuhun ñi anyaya tsihin ndo.

¹⁶“Ndahvi nyoocho ra ndaahvi! Tyin cuñi ndo jaquihin ityi ndo tsi nyivi, ¡maa tyin

cuaa ndo! Caahán ndo tyin yóo nyívi cua cahan “Naha Nyoo” tsa cuenda vehe ñuhu, nduve ñi náa cua cuvi tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo. ¹⁷ ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu íi tsi xuhun cuaan can? ¹⁸ Tan juvin ñi catyí tucu ndo tyin yóo nyívi cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuvi tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañí ñi nu altar, tacan tan taahán tsi javaha ñi tsa cahan ñi, catyí ndo. ¹⁹ ¡Soho xaan ndo tan cuaa ndo! ¿Ndáa tsa cahnu ca cuví? ¿A tsa jamañí ndo nu altar can, o maa altar tsa jandu íi tsa jamañí ndo? ²⁰ Tyin nyívi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndihi ñi tsa cuenda tandihí tsa yosó nu altar can. ²¹ Tan nyívi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuenda cuenda Nyoo caahán ñi tuhun, tyin iyó ra ican. ²² Tan tacan tucu nyívi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

²³ ¡Ndahvi nyoocho ra cuví maestro cuenda ley vehe ñuhu tan nyoocho ra cuví fariseo! Jahá ndo tyin vaha xaan ndo tyin cahví ndo ndaha menta tan tsiti anis tsihin tsiti comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyaa yahvi ndo ley nahnu ca tsa taahán tsi javaha yo: tsa javahá yo tsa vaha tsihin tandihí nyívi, tsa cundaahvi iñi yo tsi ñi, tsa tsinú iñi yo tsi Nyoo tan ña nacoo yo tsi ra. Cuñí tsi javaha ndo tandihí can, tan ña cua jandihí ndo tsa cuhva ndo diezmo can. ²⁴ Nyoocho ra cuaa, cuñí ndo jaquihin ityi ndo tsi nyívi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyihi ñi. Tan cuví tsi tumaa tsa tavá ndo tyucun luhlu nu tsa tsatsi ndo tan coco ndo iin camellu.

²⁵ ¡Ndahvi nyoocho ra cuví maestro cuenda ley vehe ñuhu tan nyoocho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví aña ndo tan tsitu tsi tsihin tsa caquiñi: tsa suhú ndo tan tsa tsicá iñi ndo tsa coo cuaha ndaha tyiñu ndo. ²⁶ ¡Nyoocho ra fariseo cuaa! Nacatyá jihna

ndo ityi tsitsi vasu tan coho, tacan tan cua ndoo ndihi ityi tsata.

²⁷ ¡Ndahvi nyoocho ra cuví maestro cuenda ley vehe ñuhu tan nyoocho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndiyi tsa nacahyi, tyin ityi tsata tsi sii xaan caá, maa tyin ityi tsitsi tsitu yiqui ndiyi, tan tandihí nuu tsa caquiñi. ²⁸ Tacan cuví nyoocho, tyin cuñí nyívi tyin vaha xaan iñi ndo, maa tyin aña ndo ican quitá tsa jandaví ñaha ndo tan tandihí tsa caquiñi ndo.

²⁹ ¡Ndahvi nyoocho ra cuví maestro cuenda ley vehe ñuhu, tan nyoocho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyacuí ndo ñaña ra cuví ndusu yuhu Nyoo, tan nacahyi ndo ñaña nyívi vaha tsicoq tahañ tsanaha. ³⁰ Tacan tan catyí ndo: “Tun tsatyin tsicoq yo quívi tsicoq tsii tsaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo”, catyí ndo. ³¹ ¡Tsihin yacan ñi tan nacotó ndo tyin cuví ndo tata nyívi tsahñi tsi ra cuví ndusu yuhu Nyoo! ³² ¡Yacan vityin nyehé maa ndo na jaha ndo, javaha ndihi ndo tsa javahá tsii tsaahnu ndo, tun cuñí ndo!

³³ ¡Nyoocho nyívi caquiñi cuví ndo, tan nyívi cuví tata coo! ¿Nacaa cua cacu ndo tan ña cua cuhun ndo anyaya? Ña cua cuví. ³⁴ Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsaa ra naha nu yucú ndo. Maa tyin nyoocho cua cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaan ndaha ndo tsi ra naha tan iin tan iin ñuu. ³⁵ Yacan cuenda, tsata nyoocho cua cunyaan cuatyí tsa cuenda tandihí ra vaha tsa tsahñi tsii tsaahnu ndo nda cuanda tsihi ra Abel tan nda cuanda quívi tsihi ra Zacarías, sehe ra Berequías, tsa tsahñi ra naha tsitsi vehe ñuhu yatyin nu nyaá altar tsa yosó tsa jamañi yo tsi Nyoo. ³⁶ Tsa nditsa catyí yu tsihin ndo, tyin tandihí cuatyí can cua coso siqui nyoocho, nyívi tsa iyó vityin —catyí ra Jesús tsihin ra naha.

Nu nducuihya cuñí ra Jesús nyehé ra tsi nyívi ñuu Jerusalén

(Lc. 13.34-35)

³⁷ ¡Ñuu Jerusalén! ¡Ndahvi nyoocho nyívi ñuu Jerusalén! Tyin tsahñi ndo tsi ra cuví ndusu yuhu Nyoo. Tan cañi ndo yuu tsi tandihí ra tsa jaquitsi Nyoo nu yucú ndo. Tan yuhu cuaaha xaan tsaha cuñi yu jaha cuenda yu tsi ndo, tumaa iin ndivi siihi tsa jahá cuenda tsi sehe ti, tan naquihín vaha ti sehe ti tsitsi nditsin ti, maa tyin ña cuñi ndo. ³⁸ Nyehé ndo vityin, tyin tsa nacog ihñi Nyoo tsi ndo. ³⁹ Tan catyí yu tsihin ndo, tyin

ña cua nyehe ca ndo tsi yu nda cuanda quita quivi tsa cua catyi ndo tyin cahnu xaan cuvi ra vatsi tsihin sivi Nyoo Jutu yo —catyi ra Jesús.

24

Nu caahán ra Jesús tyin cua tani vehe ñuhu cahnu

(Mr. 13.1-2; Lc. 21.5-6)

¹Quita ra Jesús tsitsi vehe ñuhu cahnu can, tan tsa cuñi cuhun ra, tan natuhva ra tsicá tsihin ra nu nyaá ra, tan quitsaha caahán ra naha cuhva caá vehe ñuhu can tsihin ra.

²Maa tyin nacahan ra Jesús tan catyi ra:

—¿A nyehé ndo tandihi tsa iyó ihya? Tsa nditsa catyi yu tsihin ndo, tyin ihya ndi intuhun ca yuu tan ña cua coso tsata inga tsi. Tandihi maa can tan cua tani —catyi ra.

Nu caahán ra Jesús náa cua cuvi tsa ndi cumañi ca naa ñuhu ñayivi

(Mr. 13.23-23; Lc. 21.7-24; 17.22-24)

³Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahan ra naha nu nyaá ra tan nducú tuhun xeehe ra naha tsi ra tan catyi ra naha:

—Cuñi ndi tsa catyi tuhun un tsihin ndi, ama cua cuvi tandihi tsa cahán un. ¿Nacaa tan coto ndi tatun tsa cuyatyin tsa cua quitsi un inga tsaha tan tsa cua naa ñuhu ñayivi?

⁴Tacan tan nacahan ra Jesús:

—Jaha vaha ndo cuenda coto jandavi ñaha nyivi tsi ndo. ⁵Tyin cuaha xaan ra cua quitsi, tan cua cutyiñu ra naha sivi yu, tan cua catyi ra naha: “Yuhu cuvi ra Cristo, ra tsa jaquitsi Nyoo.” Tan cuaha nyivi cua jandavi ñaha ra naha. ⁶Tan cua ñihi tuhun ndo tyin iyó cuatyí tan cañi tahan nyivi ityi can tan ityi ihya. Maa tyin ña nayuhvi ndo, tyin tacan taahán maa tsi cua cuvi tsa ndi cumañi ca naa ñuhu ñayivi. ⁷Tyin nyivi iin ñuu cua cañi tahan ñi tsihin nyivi inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi. ⁸Tandihí yacan cua cuvi nu ndi cua quitsaha nyehe nyivi tundoho.

⁹Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñi ra naha tsi ndo. Tan tandihí nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu.

¹⁰Quivi can cuaha xaan nyivi cua jaña ñi tsa tsinú ñi ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi. ¹¹Tan cuaha xaan ra caahán cuendu cua coo, tan cua catyi ra naha tyin cuenda Nyoo caahán ra naha. Tan cuaha xaan nyivi cua jandavi ñaha ra naha. ¹²Tan cuaha xaan tsa caquiñi cua coo. Yacan cuenda cua jandihí ñi tsa cuñi tahan ñi tsi ñi. ¹³Maa tyin

nyivi tsa tsinú ñi tsi yu nda cuanda nu ndihí, tan ña cua ndu uvi ñi ñi, cua cacu ñi. ¹⁴Tan taniñi cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quivi cua coto nyivi tandihí ñuu tuhun vaha ihya, tacan tan cua naa ñayivi.

¹⁵’Ra Daniel, ra cuvi ndusu yuhu Nyoo, tyaa ra nu tutu Nyoo tyin coo tsa cua janducaquiñi, tsa cua jativi. Quivi tsa cua nyehe ndo can tsitsi vehe ñuhu Nu li, (nyooho tsa cahví, na cutuñi ñi ndo). ¹⁶Tyin quivi can, nyivi tsa iyó Judea taahán tsi tsa quita ñi ican tan cuhun ñi ityi yucu. ¹⁷Tan nyivi yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi. ¹⁸Tan nyivi yucú tsitsi cuhu ña cua cunuhu jihna ñi cunaquihin ñi jahma ñi. ¹⁹¡Ndahvi ñiñaha tsa ñuhú sehe quivi can! O tatun iyó sehe ñi tsa tyaxín, ¡ndahvi ñi can! ²⁰Ndacán ndo tsi Nyoo na ña tahan tsi cunu ndo quivi vitsin, tan ndi quivi quitatú yo. ²¹Tyin tundoho tsa cua nyehe nyivi quivi can, ñaha ca maa coo can nda quivi tsa tsinú ñuhu ñayivi. Tan ndi ityi nuu ca ña cua nyehe nyivi tundoho tacan inga tsaha. ²²Tyin tatun ña cua janducuiti Nyoo quivi can, yofi maa cua cacu. Maa tyin cua janducuiti ra tsa cuenda tsa cuñi ra tsi nyivi nacatsi maa ra.

²³’Tatun yóo cua cahan tsihin ndo: “Jihna ndo, ihya nyaá ra Cristo” o “Nyehe ndo, ndacan nyaá ra Cristo”, ña tsinu ñi ndo.

²⁴Tyin cua quitsi ra jandavi ñaha naha ra tan cua catyi ra naha tyin ra Cristo cuvi ra naha. Cua catyi ra naha tyin ndusu yuhu Nyoo cuvi ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyivi tsa nacatsi maa Nyoo tun tsatyin cuvi jaha ra naha. ²⁵Vaha tyin tsa tsitó ndo vityin ihya, jaha ndo cuenda tsi ndo quivi can. ²⁶Yacan cuenda tatun catyi nyivi tsihin ndo: “Nyehe ndo, va ra Cristo nyii nu tsiqui can”, Ña cuhun ndo. O tatun catyi ñi tsihin ndo: “Nyehe ndo, nyii ra tsitsi cuarto ihya”, ña tsinu ñi ndo. ²⁷Tyin tumaa tsa cañi tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayii tsa quee nda gloria. ²⁸Tumaa nataká nditsii nu cayucú tsa ñi, tacan cua nataka nyivi yihí cuenda yu quivi quitsi yu inga tsaha.

Nacaa cua quitsi Rayii tsa quee nda gloria inga tsaha

(Mr. 13.24-37; Lc. 21.25-33; 17.26-30, 34-36)

²⁹’Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihí tsa iyó andivi cua nacanda. ³⁰Tacan tan cua quituvi seña ityi andivi tyin vatsi yuhu Rayii tsa quee nda gloria. Cua

quitsi yu nu vico ityi andívi tsihin tunyee ifi cahnu tan tsihin tsa cahnu cuví Nyoo. Tan tandíhi nyívi iyó nu ñuhu ñayívi, cua vacu tsaá xaan ñi tsa cua nyehé ñi tsi yu. ³¹ Tan cuaha ángel cuenda yu cua jaquitsi yu tyin ñihi cua tíví ra naha cutu tan cua jandu iin ra naha tsi nyívi nacatsí maa Nyoo. Cua quita ñi taníi cahnu nu ñuhu ñayívi, nda cuanda nu ndíhi ñuhu ñayívi tan nda cuanda nu ndíhi andívi.

³² Cutuñi ifi ndo iin cuhva yutun tsa nañi higo: Tatun tsa yutya soco tun, tan tsa cana ndaha yutya tun, nyooho tsitó ndo tyin tsa cua coo tsiti tun. ³³ Tan juvin ñi tacan, tatun tsa cuví tandíhi yacan nyehé ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi. ³⁴ Tsa nditsa catyí yu tsihin ndo tyin tandíhi yacan cua cuví jihna, tsa ndi cumañi ca cúu nyívi iyó nu ñuhu ñayívi. ³⁵ Tan coo quívi cua cuna andívi tan tsihin ñuhu ñayívi, maa tyin tuhun caahán yuhu, ña cua cundihi tsi tyin cua cundaa tandíhi tsi.

³⁶ Maa tyin quívi tan hora tsa cua cuví yacan, yofí tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

³⁷ Tumaa cuví quívi tsa tsicoo ra Noé, tacan cua cuví quívi tsa cua quitsi nyico yuhu Rayíi tsa quee nda gloria. ³⁸ Quívi tsa ndi cumañi ca cuun savi xaan, nyívi can, tsatsí ñi, tsihi ñi, tindahá ñi, tan tsahá ñi tsi sehe sihi ñi tindaha nda cuanda quívi quihví ra Noé tsitsi yutun ndoo. ³⁹ Tan sana ifi ñi tan tsaá savi tan tañi tandíhi ñi. Tan tacan sana ifi ñi tan cua tahan tsi quívi quitsi nyico yuhu Rayíi tsa quee nda gloria. ⁴⁰ Tan tatun yucú uvi taahan rayíi tsitsi cuhu quívi can, intuhun ñi ra cua quihín yu, tan cua nacoo yu tsi inga ra. ⁴¹ Tan quívi can uvi taahan ñaha cua nyico ñi. Intuhun ña cua naquihín yu, tan inga ña cua ndoo ña. ⁴² Cúatu vaha ndo tyin ña tsitó ndo náa hora cua quitsi ra ndacá ñaha tsi ndo. ⁴³ Tan coto ndo tuhun ihya tyin tatun iin tsitoho vehe tan tsitó ra náa cuhva cua quihví ñasuhu tsitsi vehe ra, cua cuatu vaha ra tan ña cua cuhva ra tsa quihví ñasuhu can. ⁴⁴ Yacan cuenda nyooho, cúatu vaha ndo. Tyin sana ifi ndo, tan cua quitsi nyico yuhu Rayíi tsa quee nda gloria.

*Musu vaha tan musu ña vaha
(Lc. 12.41-48)*

⁴⁵ Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandíhi ca musu. ⁴⁶ Tan sii xaan cuñi ra cuví musu vaha can, tatun cuhva tsa jahá tyiñu ra tan tsaá tsitoho ra. Tyin tyaá yahvi ra tandíhi tsa taahán tsi ica ra. ⁴⁷ Tan tsa nditsa catyí yu tsihin ndo, tyin

tsitoho ra cua nacuhva ra tandíhi cuii tsa cumí ra, cua quíhi ndaha ra, tyin vaha tyaá yahvi ra tsihin tyiñu jahá ra. ⁴⁸ Maa tyin iin musu ña vaha tsicá ifi ra tyin cua cucuee tsitoho ra. ⁴⁹ Tacan tan quitsaha cañi ra tsi inga musu, tan tsatsí ra tan tsihi ra nyixi tsihin ra tsiñi naha ra. ⁵⁰ Tacan tan sana ifi ra tan cua tsaá tsitoho ra quívi tsa ña ndatú ra tsi ra, tan hora tsa ña tsitó ra. ⁵¹ Tacan tan tsitoho ra ñihi xaan cua tatsi tuñi ra tsi ra tumaa tuhvá maa ra ica tsihin nyívi tsa jahá tyin vaha xaan ñi tan ña ica ñi tsa vaha. Tacan tan cua vacu ra cuví musu ña vaha can tan cahyu ña cua cuví nuhu ra tsa nyehé ra tundoho.

25

Nu cahán ra Jesús iin cuhva cuenda utsi taahan ñaha yoco

¹ Tsa ndacá ñaha Nyoo tsi nyívi cuví tsi tumaa utsi taahan ñaha yoco tsa quihín lámpara tsa yihí acetye tan cuahán ñi iin vico tindaha tyin cua jatahan ñi tsi ra tsa cua tindaha. ² Uhun taahan ñi, soho xaan ñuhú ifi ñi, tan inga uhun taahan ñi can catsi xaan tsicá ifi ñi. ³ Ñi tsa soho ñuhú ifi can, nyisó ñi lámpara ñi maa tyin ña quihín ñi juhva ca acetye tsa natyihí ñi tsitsi lámpara ñi tatun ndíhi tsi. ⁴ Tan ñi tsa catsi tsicá ifi can, nyisó siin ñi inga yutyi acetye tsa cua natyihí ñi tsitsi lámpara can tatun ndíhi acetye tsa yihí tsitsi lámpara can. ⁵ Tan ra tsa cua tindaha can cucuee xaan ra, tacan tan tñi ñumaahna tsi tandíhi ñi, tan quixí ñi. ⁶ Tacan tan maa ñuu tsiñi ñi iin ndusu tsa catyí tyehen: “¡Tsa vatsi ra tsa cua tindaha! ¡Quita ndo, jatahan ndo tsi ra!” ⁷ Tandíhi ñi can nduvita ñi tan quitsaha janduvahá ñi lámpara ñi. ⁸ Tacan tan quitsaha caahán tsa uhun ñi soho ñuhú ifi can tsihin inga uhun ñi can tan catyí ñi: “Cuhva ndo juhva acetye ndahá ndo tsi ndi, tyin cuñi ndahva lámpara ndi”, catyí ñi. ⁹ Maa tyin ñi yoco tsa catsi tsicá ifi can nacahan ñi tyehen: “Ña cua cuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca cuhun maa ndo kujata ndo nu cuyahví tsi.” ¹⁰ Maa tyin tsitsi tsa cuahán tsa uhun ñi soho ñuhú ifi can cuajata ñi acetye, tan tsaá ra tsa cua tindaha can. Tan ñi yoco tsa ndatú vaha can, quihví ñi tsihin ra tsitsi vehe nu cua coo vico tindaha. Tan tsicundasi yuvehe can. ¹¹ Yahá can tan tsaá nyico ñi soho ñuhú ifi can, tan catyí ñi: “¡Yooho tata! ¡Nuña yuvehe na quihví ndi!”, catyí ñi. ¹² Maa tyin maa ra nacahan ra, tan catyí ra: “Tsa nditsa catyí yu tsihin ndo tyin ña nacotó yu tsi ndo.”

¹³ Tacan tan quitsaha caahán ra Jesús:

—Cúatu vaha ndo, tyin ña tsitó ndo ndaa quívi tan náa hora cua quitsi nyico yuhu Rayíi tsa quee nda gloria.

*Nu caahán ra Jesús tsihin yo na jaha tyiñu
yo tsihin tsa tsahá Nyoo tsi yo
(Lc. 19.11-27)*

¹⁴ Tsa ndacá ñaha Nyoo tsi nyivi cuví tsi tumaa iin rayi tsa nyaá cua quita cuhun inga ñuu nu cañi. Tan caná ra tsi musu ra, tan tsahá cuenda ra xuhun ra tsi ra naha tyin jaha cuenda ra naha.

¹⁵ Iin ra tsahá ra uhun mil xuhun, tan inga ra tsahá ra uvi mil xuhun, tan inga ra tsahá ra iin mil. Tsahá ra tsi intuhun intuhun ra nácaa cuhva tsító ra jaha tyiñu ra naha tan cua nandaa siqui xuhun can. Tacan tan cuahán ra. ¹⁶ Musu tsa quihin uhun mil xuhun can, ñihi jahá tyiñu ra tsihin xuhun can, tan jahá canaa ra inga uhun mil ca siqui tsi. ¹⁷ Tan juvin ñi tacan tucu ra tsa quihin uvi mil can, jahá canaa ra uvi mil ca tsihin xuhun can. ¹⁸ Maa tyin ra tsa quihin intuhun ñi mil can, tsahan ra tan tsatyá ra iin yavi tsitsi ñuhu tan tyihí xeehe ra xuhun tsitoho ra.

¹⁹ Cuaha quivi yahá tan tsaá nyico tsitoho musu can. Tan quitsahá natavá cuenda ra tsihin intuhun intuhun ra naha. ²⁰ Jihna ca ra tsa quihin uhun mil xuhun can tsaá, tan nacuhvá cuenda ra uhun mil ca siqui can, tan catyí ra: “Taa, uhun mil tsahá un tsi yu, juhun inga uhun mil ihya tsa jahá canaa yu siqui tsi.” ²¹ Tan tsitoho ra catyí ra tsihin ra: “Vaha. Iin musu vaha xaan cuví un. Tan javahá un tandihi tsa cahán yu tsihin un. Luxu ñi xuhun tsahá yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan si cuñi un tsihin yu.” ²² Yahá can tan tsaá musu tsa quihin uvi mil xuhun can, tan catyí ra: “Taa, uvi mil ñi tsahá un tsi yu, juhun uvi mil ca ihya tsa jahá canaa yu siqui tsi.” ²³ Tan catyí tsitoho ra tsihin ra: “Vaha. Iin musu vaha xaan cuví un, tan javahá un tandihi tsa cahán yu tsihin un. Luxu ñi xuhun tsahá yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan si cuñi un tsihin yu”, catyí ra. ²⁴ Tan cuhva tsa tsaá musu tsa quihin intuhun ñi mil xuhun can, catyí ra tsihin tsitoho ra: “Taa, yuhu tsító yu tyin xaan xaan un tan cuñi un naquihin un xuhun nu ña jahá tyiñu un, tan cuñi un naquihin un cosecha nu ña tatsj un. ²⁵ Yacan cuenda nayuhví yu tan tsahan yu tan tyihí xeehe yu xuhun un tsitsi ñuhu. Juhun xuhun ihya tsa tsahá un tsi yu”, catyí ra. ²⁶ Tacan tan nacahan tsitoho ra, tan catyí ra tsihin ra: “Musu ña vaha cuví un, tan musu jutsan cuví yooho. Tatun tsító un tyin naquihin yu nu ña jahá tyiñu yu, tan quihin yu cosecha nu ña tatsj yu, ²⁷ ¿nácaa tyin ña tsityihí un xuhun yu nu banco? Tun tsatyin tacan javahá un, tsa cua quitsi nyico yu cuví naquihin yu xuhun can

tsihin xuhun siqui tsa jahá canaa tsi”, catyí ra. ²⁸ Tacan tan quitsahá caahán ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cuhva ndo tsi ra tsa ndahá utsi mil. ²⁹ Tyin nyivi jahá tyiñu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyivi tsa ña cuñi jaha tyiñu tsihin tsa tsahá yu, nda cuanda tsa luxu tsa cumí ñi, cua quihin nyaa ndihi yu. ³⁰ Tan musu tsa ña tsiniñu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsaa ra, tan cahyu ña cua cuví nuhu ra tsihin tsa nyehé ra tundoho.”

*Nu cahán ra Jesús tyin cua cutuñi tandihi
nyivi*

³¹ Quivi cua quitsi nyico yuhu Rayi tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu si caá tan cua cundaca ñaha yu. ³² Tandihí cuñi nyivi iyó naní cahnú nu ñuhu ñayivi cua nataca ñi nuu yu. Tan cua natava siin yu tsi intuhun intuhun ñi, tumaa ra jahá cuenda mbee tavá siin ra tsi mbee ticatyí tan tavá siin tucu ra tsi mbee chivo. ³³ Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyin yu. ³⁴ Tacan tan yuhu tsa cuví yu Rey cua catyí yu tsihin nyivi nyecú tsiyo cuaha yu: “Naha nyooho nyivi tsa nasoco Jutu yu. Na quihin cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javahá ra ihya quivi javahá ra ñuhu ñayivi. ³⁵ Tyin quivi tsisoco yu, nyoocho tsahá ndo tsa tsatsj yu. Quivi na ityi ñi yu, tsahá ndo ndutya tsihi yu. Tan quivi tsicá nuu yu cuví yu ra inga ñuu, tsahá ndo nu quixi yu. ³⁶ Quivi cumañi jahma yu, tsahá ndo jahma tsinditsj yu. Quivi cuhví yu, tsinyehé ndo nu canyí yu. Tan quivi tsinyi yu vehe caa, tsinyehé ndo nu nyí yu”. Tacan cua cahán yu tsihin ñi. ³⁷ Tan ñi tsa vaha ñi can cua ndaca tuhun ñi tsi yu, tan catyí ñi: “Jutu Mañi yu, ¿ama nyehé ndi tsisoco un, tan tsahá ndi tsa tsatsj un? ¿Ama nyehé ndi na ityi ñi un tan tsahá ndi tsa tsihi un? ³⁸ ¿Ama nyehé ndi tsi un tsicá nuu un cuví un ra inga ñuu tan tsahá ndi vehe nu quixi un? ¿Ama cumañi jahma un, tan tsahá ndi jahma tsinditsj un? ³⁹ ¿Ama nyehé ndi cuhví un, o tsinyi yu vehe caa, tan tsahan ndi tsinyehé ndi tsi un?” cua catyí ñi. ⁴⁰ Tan yuhu tsa cuví Rey cua catyí yu tsihin ñi: “Tsa nditsa catyí yu tsihin ndo, tyin tandihí tumañi ñi tsa javahá ndo tsi ra ndaahví, ra yañi yu, tsi yuhu javahá ndo tumañi ñi”, cua catyí yu tsihin ñi.

⁴¹ Tacan tan yuhu tsa cuví Rey cua cahán yu tsihin nyivi tsa yucú tsiyo satyin yu tyehen: “Catsiyo ndo nuu yu, nyoocho, nyivi taahán tsi cuhun anyaya. Cuahan ndo nu ñuhu tsa ña cua ndahva maa. Tsinu anyaya

can tyin ican cua coo nu ña vaha tan tatyí ña vaha cuenda nu. ⁴² Tyin tsisoco yu tan nyoocho ña tsahá ndo tsa catsi yu. Na ityi iñi yu tan ña tsahá ndo ndutya coho yu. ⁴³ Tsiçá nuu yu cuví yu iin ra inga ñuu, tan ña tsahá ndo nu cusu yu. Cumañi jahma yu tan ña tsahá ndo jahma cunditsi yu. Nacuhvi yu tan tsinyi yu vehe caa, maa tyin ña tsahan ndo tsinyehé ndo tsi yu nu tsinyi yu”, cua catyi yu tsihin ñi. ⁴⁴ Tacan tan cua catyi ñi tsihin yu: “Jutu Mañi yu, çama nyehe ndi tsisoco un, o na ityi iñi un, o tsicá nuu un cuví un ra inga ñuu, o nduve jahma un, o nacuhvi un, o tsinyi un vehe caa, tan ña jatinyee ndi tsi un?” cua catyi ñi. ⁴⁵ Tan yuhu tsa cuví yu Rey cua catyi yu tsihin ñi: “Tsa nditsa caahan yu tsihin ndo tyin tandihi maa tsa ña javahá ndo tsihin nyivi ndaahvi ihya, ña javahá ndi ndo tsihin yu, cuví can”, cua catyi yu tsihin ñi. ⁴⁶ Tacan tan ñi can cua cuhun ñi nu cayú ñuhu tsa ña cua ndahva maa. Tan nyivi vaha can cua cuhun ñi coo ñi ñayivi nyito tsa ña cua naa maa.

26

Nu nducú ra mandoñi naha ra cuhva nácaa tan tiin ra naha tsi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva tsa ndihi cahan ra Jesús tandihi tuhun can, tan quitsahá catyi ra tsihin ra tsicá tsihin ra:

² —Nyoocho tsitó ndo tyin ndi cumañi uvi ca quivi tan tahan tsi vico pascua. Tan yuhu, Rayi tsa queç nda gloria, cua cuhva cuenda nyivi tsi yu na tyaa ra cumi tyiñu tsi yu nu cruu —catyi ra.

³ Quivi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iin ra naha nuquehe vehe tyiñu ra Caifás, ra jutu tsaahnu tsa cuví ityi nuu. ⁴ Tan jandaa ra naha tyiñu nácaa cua jandavi ñaha ra naha tsi ra Jesús tan tiin ra naha tsi ra tan cahñi ra naha tsi ra. ⁵ Tan catyi ra naha:

—Ña cua cahñi yo tsi ra quivi maa vico, coto nduvaa xaan nyivi —catyi ra naha.

Nu tyosó iin ñaha ndutya tami jiñi ra Jesús

(Mr. 14.3-9; Jn. 12.1-8)

⁶ Ra Jesús nyii ra ñuu Betania, vehe ra Simón, ra tsa yihi cuehe tyaa hyu. ⁷ Tan natuhvá iin ñaha nu nyaá ra Jesús, ndahá ña iin yutyi yuu vaha tsitú can yihi ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyoso ña ndutya can jiñi ra. ⁸ Tsa nyehe ra tsicá tsihin ra, nduxaan ra naha tan catyi ra naha:

—¿Nacuenda jativi ña ndutya tami can?

⁹ Vaha ca tun tsatyin xico ña can, tan ñihi cuaha ña xuhun tsihin can. Tan cuví

jatinyee ña tsi nyivi ndaahvi tsihin xuhun can —catyi ra naha.

¹⁰ Tan tsa tsiñi ra Jesús tsa caahan ra naha, tacan tan catyi ra tsihin ra naha:

—¿Nacuenda cuñi ndo jandu uvi iñi ndo tsi ñaha ihya? Tan tsa javahá ña tsihin yu, tsa vaha cuví tsi. ¹¹ Tyin nyivi ndaahvi tandihi ñi quivi cua coo ñi tsihin ndo, maa tyin yuhu, ña naha ca cua cunyi yu tsihin ndo. ¹² Tyoso ña ndutya tami siqui cuñu ñuhu yu, tyin janduvahá ña itsi tyin cua cuhun tsi tsitsi ñuhu. ¹³ Tsa nditsa catyi yu tsihin ndo, tyin tandihi ñi nu cua cahan nyivi tuhun Nyoo tani cahnu ñuhu ñayivi, cua nacatyí tuhun tucu ñi tsa javahá ñaha ihya, na nducuhun iñi nyivi tsi ña —catyi ra Jesús.

Nu xico ra Judas Iscariote tsi ra Jesús

(Mr. 14.10-11; Lc. 22.3-6)

¹⁴ Tacan tan iin ra tsicá tsihin ra Jesús, ra tsa nañi Judas Iscariote, tsahan ra tsicahan ra tsihin ra jutu tsa cuví ityi nuu naha ra.

¹⁵ Tan catyi ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ndo?

Tacan tan ra jutu can naha ra tsahá ra naha oco utsi xuhun cuitsin tsi ra. ¹⁶ Tan nda quivi can tan quitsahá nducú ra Judas cuhva cua nacuhva cuenda ra tsi ra Jesús tsi ra jutu can naha ra.

Nu cuxiñi ra Jesús tsihin ra tsicá tsihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Quivi jihna ñi tsa quitsahá vico nu tsatsi nyivi paan tsa nduve yutsan iya yihi, ra tsicá tsihin ra Jesús natuhvá ra naha nu nyaá ra tan quitsahá tsicá tuhun ra naha tsi ra tan catyi ra naha:

—¿Numaa cuñi un tsa cujanduvaha ndi tsa cuxiñi un cuenda vico pascua ihya?

¹⁸ Tan catyi ra Jesús tsihin ra naha:

—Cuaahan ndo tsitsi ñuu nda vehe rayi ihya. Tan catyi ndo tsihin ra: “Ra Maestro catyi ra tyin tsa yatyin cua cúu ra, tan vehe maa un cua jacahnu ndi vico pascua”, catyi ndo tsihin ra —catyi ra Jesús.

¹⁹ Tacan tan javahá ra naha cuhva cahan ra Jesús tsihin ra naha. Tan janduvahá ra naha tsa cuxiñi ra naha vico pascua can.

²⁰ Tsa cunaaha tan tsicunyaá ra Jesús nu mesa tsihin tandihi utsi uvi ra tsicá tsihin ra. ²¹ Tan tsitsi tsa tsatsi ra naha, catyi ra Jesús tsihin ra naha:

—Tsa nditsa catyi yu tsihin ndo tyin iin nyoocho cua xico ndo tsi yu tsi ra xaan iñi tsi yu.

²² Tan nducuihyá xaan cuñi ra naha, tan quitsahá tsicá tuhun tan iin tan iin ra naha tsi ra tan catyi ra naha:

—Jutu Mañi yu, ça ñavin yuhu cuví can?

²³ Tan nacahan ra Jesús tan catyi ra:

—Ra tsa tsatsí iin ñi coho tsihin yu, ra ican cua xico tsi yu. ²⁴ Yuhu, Rayii tsa quee nda gloria, cua tahan yu tumaa tsa caahán nu tutu Nyoo. Maa tyin ndahvi ra ndaahvi tsa cua xico tsi yu. Vaha vihi ca tun tsatyin ña cacu ra —catyí ra Jesús.

²⁵ Tacan tan nacahan ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahan ra Jesús, tan catyí ra:

—Juvín un.

²⁶ Tsitsi tsa tsatsí ra naha, ra Jesús quihín ra paan tan nacuhva ra tyahvi nyoo tsi Nyoo, tan tsahnú sava ra, tan tsahá ra tsi ra tsicá tsihin ra, tan catyí ra tsihin ra naha:

—Çatsi ndo. Paan ihya cuví tumaa cuñu ñuhu yu.

²⁷ Yahá can tan quihín tucu ra vasu vinu, tan nacuhva ra tyahvi nyoo tsi Nyoo, tan jahahá ra tsi tandihi ra naha tan catyí ra:

—Coho tandihi ndo vinu ihya. ²⁸ Tyin cuví tsi tumaa niñi yu. Tan tsihin niñi yu cua cundaa tyiñu tsa ndoo Nyoo tsihin ndo, tyin cua cati niñi yu tsa cuenda tsa vaha tsi nyivi cuaha, tyin tsihin niñi yu cua coo tucahnu iñi cuatyí ñi. ²⁹ Tan catyí yu tsihin ndo, tyin ña cua coho ca yu tahan vinu tsa cuvi ndutya uvas ihya, nda cuanda tsa coho yu vinu tsaa tsihin ndo nda nu ndacá ñaha Jutu yu gloria —catyí ra.

Nu cahan ra Jesús tyin cua cahan ra Pedro tyin ña nacotó ra tsi ra

(Mr. 14.26-31; Lc. 22.31-34; Jn. 13.36-38)

³⁰ Tsa yahá tsa tsita ra naha iin yaa Nyoo, tan cuahán ra naha yucu Olivo. ³¹ Tacan tan quitsahá caahán ra Jesús tsihin ra naha:

—Tandihi nyoocho tan cua nacoo ihñi ndo tsi yu vityin tsacuaa ihya. Tyin nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi. ³² Maa tyin tsa yahá nandoto yu, jihna ca yu cua cuhun Galilea, tsa ndi cumañi ca cuhun nyoocho.

³³ Tacan tan nacahan ra Pedro tan catyí ra:

—Vasu ndi maa tandihi ra tan ndu uvi iñi ra naha tsa nyicún ra naha tsi un, maa tyin yuhu ña cua ndu uvi iñi yu.

³⁴ Tacan tan catyí ra Jesús tsihin ra:

—Tsa nditsa catyí yu tsihin un tyin juvín ñi maa tsacuaa vityin, tsa ndi cumañi ca vacu tsitoocho, uñi tsaha cua cahan un tyin ña nacotó un tsi yu —catyí ra Jesús.

³⁵ Tan ra Pedro catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra.

Tan juvín ñi tacan catyí tandihi ca ra tsicá tsihin ra.

Nu tsicqn tahvi ra Jesús tsi Nyoo nda Getsemani

(Mr. 14.32-42; Lc. 22.39-46)

³⁶ Tacan tan tsaa ra Jesús tsihin ra tsicá tsihin ra iin nu iyó cuaha yutun nu nañi Getsemani, tan catyí ra tsihin ra naha:

—Cunyecu ndo ihya tsitsi tsa cuahán yu ndacan cua ndacan tahvi yu.

³⁷ Tan quihín ra tsi ra Pedro tan nduvi sehe ra Zebedeo cuahán tsihin ra. Tan quitsi tucuiihya iñi cahnu tsi ra, tan tsa tuñu cuñi ra. ³⁸ Tacan tan catyí ra tsihin ra naha:

—Cahnu xaan tucuiihya iñi nyaá añima yu, nda cuanda cuñi cahñi ña can tsi yu. Ndogo ndo ihya tan cgo nyito ndo tsihin yu —catyí ra.

³⁹ Tacan tan cuahán ra Jesús luxu ca ityi nuu tan tsicuiñi tsiti ra tan tsaquín ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatyin cuvi jatsiyo nyaha un tundoho ihya siqui yu, vaha xaan. Maa tyin na ña cuvi cuhva cuñi maa yu, tan na cuvi cuhva cuñi maa un —catyí ra.

⁴⁰ Tacan tan tsaa ra nu yucú ra tsicá tsihin ra, tan nyehe ra tyin quixí ra naha. Tan catyí ra tsihin ra Pedro:

—¿A ña cuví coo nyito ndo tsihin yu vasu tan intuhun hora? ⁴¹ Cgo nyito ndo, tan ndacan tahvi ndo tsi Nyoo; tacan tan ña cua javaha ndo cuhva cuñi nu ña vaha. Tsa nditsa tyin añima ndo, cuñi xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñi —catyí ra Jesús.

⁴² Tan tsa tsahan ra tsa tsinu uvi tsaha, tsicqn tahvi ra tyehen:

—Tyaa, tatun ña cuvi tsa jatsiyo nyaha un tundoho ihya siqui yu, na cuvi cuhva cuñi maa un —catyí ra.

⁴³ Tacan tan tsaa ra inga tsaha tan nyehe ra tyin quixí nyico ra tsicá tsihin ra, tyin tsicundasí maa tinuu ra naha tsihin tsa cuñi xaan ra naha cusu ra naha. ⁴⁴ Tacan tan nacoq ra tsi ra naha, tan cuahán ra tsa tsinu uñi tsaha cua ndacan tahvi ra. Tan tsicqn tahvi ra tsi Nyoo juvín ñi maa tsihin tuhun tsa tsa yahá cahan ra. ⁴⁵ Tacan tan tsaa nyico ra nu yucú ra tsicá tsihin ra, tan catyí ra tsihin ra naha:

—Vityin cusu ndo tan quitatu ndo. Tyin tsa tsaa cuhva tsa cua nacuhva cuenda ra can tsi Rayii tsa quee nda gloria tsi ra iyó cuatyí naha ra. ⁴⁶ Nduvita ndo, cohon ndo. Tyin tsa vatsí ra tsa xico tsi yu —catyí ra Jesús.

Nu tsahq cuenda ra Judas tsi ra Jesús tsi nu xaan iñi tsi ra nahnú

(Mr. 14.43-50; Lc. 22.47-53; Jn. 18.2-11)

⁴⁷ Ndi caahán ca ra Jesús yacan, tan tsaa ra Judas, ra tsa cuví iin ra tsicá tsihin ra Jesús. Tan tsihin ra Judas tsaa tucu cuaha

xaan nyivi ndahá mityi tan yutun jacuhun ra cuví jutu tsa cuví ityi nuu naha ra tan ra cuví mandoñi nyivi Israel naha ra. ⁴⁸ Tan ra Judas, ra tsa tsahá cuenda tsi ra Jesús, tsa yahá tsahá ra iin seña tsi ra can naha ra, tyin coto ra naha yóo cua tiin ra naha. Tyin tsa yahá cahan ra tsihin ra naha:

—Ra tsa cua tyayuhu yu, ra ican cuví ra tsa cua tiin ndo.

⁴⁹ Tacan tan natuhvā ra Judas nu nyaá ra Jesús tan catyí ra:

—Nacumi tsi un, Maestro.

Tan tyayuhu ra tsi ra.

⁵⁰ Tacan tan nacahan ra Jesús tan catyí ra tsihin ra:

—¿Náa tyiñu vatsi un ñih?

Tacan tan natuhvā ra can naha ra tan tiin ra naha tsi ra Jesús.

⁵¹ Tacan tan iin ra cutahán tsihin ra Jesús, tavā ra mityi tan tsahnyā ra soho musu jutu tsaahnu tsa cuví ityi nuu. ⁵² Tan catyí ra Jesús tsihin ra:

—Natyihí mityi un tsitsi vena un. Tyin tandihí nyivi tsa cañi tahan tsihin mityi, juvin ñi tsihin mityi cua cúu ñi. ⁵³ ¿A ña tsitó un tyin tatun yuhu tan cuñi yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mīl ángel, tan jacacu ra naha tsi yu? ⁵⁴ Maa tyin tatun tacan javaha yu, ¿nácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

⁵⁵ Tacan tan catyí ra Jesús tsihin tandihí nyivi:

—¿A vatsi tiin ndo tsi yu tumaa cua tiin ndo iin ñasuhu? tyin ndahá ndo mityi tan yutun. Tandihí quivi tsinyi yu jacuahā yu tsi ndo tsitsi vehe ñuhu cahnu, tan ña tiin ndo tsi yu. ⁵⁶ Tandihí yacan cuví tyin tacan tan cundaa cuhva catyí tuhun Nyoo, tsa tyaa ra cuví ndusu yuhu Nyoo tahan tsanaha.

Tacan tan tandihí ra tsicá tsihin ra, tsinu ra naha. Tan ndoq intuhun ña maa ra.

Nu tsicā tuhun ra mandoñi naha ra tsi ra Jesús tatun Sehe Nyoo cuví tsi ra

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Tan ra tsa tiin tsi ra Jesús, tsindacā ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra. ⁵⁸ Tan ra Pedro cuahán ra tsata ra naha, tan tsag ra nda nuquehe vehe ra Caifás can. Tan quihvī ra tan ndoq ra nyií ra tsihin vitya can naha ra, tyin cua nyehe ra nácaa cua quita tuhun can.

⁵⁹ Ra jutu tsa cuví ityi nuu naha ra, tan ra mandoñi naha ra, tan tandihí ra cumí tyiñu naha ra, nducū ra naha tsi ra cahan cuendu siqui ra Jesús. Tyin tacan tan cuví cahñi ra naha tsi ra. ⁶⁰ Maa tyin ña ñihī maa ra naha

cuatyí tyaa ra naha siqui ra, vasu ndi maa cuaha nyivi tsahan ñi tsicahan ñi cuendu siqui ra. Tan nu ndihí tuhun, tsag uvi ca tsa ndaa tsa caahán cuendu. ⁶¹ Tan catyí ra naha:

—Ra ihya, catyí ra tyin cuví canī ra vehe ñuhu cahnu Nyoo, tan tsitsi tsa uñi quivi cua janduvita ra tsi inga tsaha —catyí ra naha.

⁶² Tacan tan ra jutu tsa cuví ityi nuu can, nduvita ra, tan catyí ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

⁶³ Maa tyin ra Jesús ña nacahan ra. Tacan tan catyí ra jutu tsaahnu tsa cuví ityi nuu tsihin ra:

—Tsihin sivi Nyoo nyitó, catyí yu tsihin un tyin catyí un tsa nditsa vaha. ¿A ra Cristo Sehe Nyoo cuví tsi un? —catyí ra.

⁶⁴ Tan catyí ra Jesús tsihin ra:

—Juvín yu cuví. Tan catyí tucu yu tsihin ndo, tyin cua nyehe ndo tsi yuhu, Rayií tsa quee nda gloria, cunyaa yu xiin cuaha Nyoo ra iyó tandihí tunyee iñi, tan cua nyehe ndo nu cua quitsi yu nu vico ityi andiví inga tsaha —catyí ra.

⁶⁵ Tacan tan ra jutu tsaahnu tsa cuví ityi nuu can tsahnyā ra jahma ra tumaa iin seña tyin cuñi maa ra tyin ña vaha tsa caahán ra Jesús, tan catyí ra tsihin tandihí ca ra naha:

—Ra ihya tsicoo cuatyí ra nuu Nyoo tsihin tsa caahán ra. ¡Nyehe ndo vityin! Ña cuñi ca tsi tsa nducu yo inga tsa ndaa tyin tsa tsiñi maa ndo tsa ña vaha tsa cahan ra. ⁶⁶ ¿Náa catyí ndo vityin?

Tan nacahan ra naha tan catyí ra naha:

—Iyó cuatyí ra, yacan taahán tsi tsa cúu ra.

⁶⁷ Tacan tan tiví sī ra naha nuu ra tan cañi ra naha tsi ra. Inga ra cañi ra naha nuu ra tsihin tsiqui. ⁶⁸ Tan catyí ra naha tsihin ra:

—Tatun nditsa tyin ra Cristo cuví un, ¡nacoto yóo cañi tsi un!

Nu cahan ra Pedro tyin ña nacotó ra tsi ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Tsitsi tsa ndi nyií ra Pedro nuquehe ityi tsata vehe can, tan iin ñaha tsa cuví musu jutu can, natuhvā ña nu nyaá ra tan catyí ña tsihin ra:

—Yooho tucu tsicā un tsihin ra Jesús, ra Galilea can.

⁷⁰ Tan ra Pedro catyí ra nuu tandihí nyivi yucú can:

—Ña tsica yu tsihin ra can. Ña tsitó yu náa caahán un.

⁷¹ Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsicā ndihí tucu ra ihya tsihin ra Jesús, ra ñuu Nazaret —catyí ña.

⁷² Tan inga tsaha tyihí xeehē ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

⁷³ Tañi cuii ca, tan ra yucú can natuhvā ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

⁷⁴ Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvin ñi cuhva can navacú tsitoocho. ⁷⁵ Tacan tan nducuhun iñi ra Pedro tsa cahán ra Jesús tsihin ra: “Tsa ndi cumañi ca vacu tsitoocho, yoocho tsa yahā cahán un uñi tsaha tyin ña nacotó un tsi yu”, catyí ra Jesús, nducuhun iñi ra. Tacan tan quita ra ican, tan tsacú xaan ra tsa cuihva cuñi ra tsa javahā ra tacan.

27

Nu nacuhvā cuenda ra naha tsi ra Jesús tsi ra Pilato

(Mr. 15.1; Lc. 23.1-2; Jn. 18.28-32)

¹ Tan tsa tuví inga quiví, tandihí ra jutu tsa cuví ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús. ² Tan nu-uhñi ra jahā ra naha. Tan tsahán ra naha tsinacuhvā cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

Nu tsihi ra Judas

³ Tsa nyehe ra Judas, ra tsa xico tsi ra Jesús, tyin cua cúu ra, tan ndu uví iñi ra tsa javahā ra, tan nacuhvā ra tsa oco utsi xuhun cuitsin can tsi ra jutu tsa cuví ityi nuu naha ra, tan tsi ra mandoñi ñuu naha ra. ⁴ Tan catyí ra:

—Tsicoq cuatyí yu, tyin tsahā cuenda yu tsi iin ra nduve cuatyí na cúu ra.

Tan nacahán ra naha tan catyí ra naha:

—¿Nacuenda nyuhu? ¡Nyehe maa yooho!

⁵ Tacan tan tyoso ihñi ra Judas xuhun can tsitsi vehe ñuhu cahnu, tan quita ra cuahán ra tsityihí ra yoho jucun ra tan ticaq ra tsi ra iin nu yutun, tan tsihi ra.

⁶ Ra cuví ityi nuu tsihin jutu can naha ra naquihñi ra naha xuhun can tan catyí ra naha:

—Ña cuví tyihi yo xuhun ihya tsitsi caja nu yihí xuhun tsa tsahá nyiví tsi Nyoo tyin xuhun tsa cuyahví ra tsa cua cati niñi cuví can.

⁷ Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahā

Quisi” tsihin xuhun can. Tyin coo nu cucutsi ra naha tsi nyivi inga ñuu tun tsiihí ñi ñuu can. ⁸ Yacan cuenda nañi ñuhu can nda cuanda vityin “Ñuhu Cuenda Tsa Tsatí Nifi Nyivi”. ⁹ Tacan cuví tyin cundaq tsa tyaa ra Jeremías, ra cuví ndusu yuhu Nyoo tahanan tsanaha nu catyí tsi tyehen: “Juvín ñi maa ra naha quihñi nyico tsa oco utsi xuhun cuitsin, tsa jatā ra naha tsi ra Cristo. ¹⁰ Tan tsihin can, jatā ra naha ñuhu tsa nañi “Ñuhu Ra Javahā Quisi”, tacan catyí Jutu Mafi yo tsihin yu”, catyí tsi.

Nu nyehe ra Pilato tyin nduve cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹ Tsindacā ra mandoñi can naha ra tsi ra Jesús nuu ra ndacá ñaha, tan ra can tsicā tuhun ra tsi ra, tan catyí ra:

—¿A yoocho cuví rey cuenda nyivi Israel?

Tan ra Jesús catyí ra tsihin ra:

—Juvín yu, tumaa cuhva catyí maa un.

¹² Tan cuhva tsa tyaa ra jutu can naha ra tan ra mandoñi naha ra cuatyí siqui ra, ña nacahán maa ra. ¹³ Tacan tan catyí ra Pilato tsihin ra:

—¿A ña tsiñi un tandihí tsa caahán ra naha siqui un?

¹⁴ Maa tyin ra Jesús ña nacahán maa ra. Tan iyo xaan cuñi ra ndacá ñaha can tyin ña nacahán ra.

Nu cahán ra cumí tyiñu tyin taahán tsi cúu ra Jesús

(Mr. 15.6-20; Lc. 23.13-25; Jn. 18.38—19.16)

¹⁵ Tan vico pascua tuhvā ra ndacá ñaha jañá intuhun ra yucú vehe caa. Ndáa ra tsa nacatsi maa nyivi, juvin ra cua quita nuña. ¹⁶ Tan quiví can nyii iin ra tsa nañi Barrabás vehe caa. Tan tandihí nyivi tsitó tuhun ra. ¹⁷ Tan cuhva tsa ndu iin nyivi, ra Pilato tsicā tuhun ra tsi ñi, tan catyí ra:

—¿Ndáa ra cuñi ndo tsa tava nuña yu? ¿A ra Barrabás, o ra Jesús, ra tsa nañi Cristo? —catyí ra.

¹⁸ Tyin tsitó ra tyin tsa cuenda tsa ndasi cuñi ra jutu can naha ra nyehe ra naha tsi ra Jesús, yacan cuenda tsahā cuenda ra naha tsi ra tsi ra Pilato.

¹⁹ Tsitsi tsa nyaá ra Pilato nu tyayu ra, nu jahā tyiñu ra, jacuhun ñasihí ra tyiñu tsi ra tan catyí ña: “Ña tyihi un tsi un tsihin ra vaha can. Tyin cuñi nyehe yu ñumaahna tsa cuenda ra. Tan jayuhví xaan tsi tsi yu”, catyí ña.

²⁰ Maa tyin ra jutu can naha ra tan ra mandoñi naha ra, cuñihí ra naha natyuhú ra naha tsi nyivi na ndacan ñi tsa jaña ra Pilato tsi ra Barrabás, tan na cúu ra Jesús. ²¹ Tacan tan ra ndacá ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñi ndo tsa jaña yu?

Tan nacahan ñi, tan catyi ñi:

—Jaña tsi ra Barrabás.

²² Tan ra Pilato tsicā tuhun ra tsi ñi, tan catyi ra:

—¿Tan náa cua javaha yu tsihin ra Jesús tsa nañi Cristo ihya?

Tandihi ñi nacahan ñi tan catyi ñi:

—¡Tyā tsi ra nu cruu na cúu ra!

²³ Tacan tan catyi ra Pilato tsihin ñi:

—Tan ¿náa tsa ña vaha javahā ra?

Maa tyin maa ñi canā tsaa ñi inga tsaha tan catyi ñi:

—¡Tyā tsi ra nu cruu na cúu ra!

²⁴ Tsa nyehe ra Pilato tyin ña cuvī jaha ra tsi nyivi, tyin ñihi xaan cuvaá jahá ñi. Tacan tan tsican ra ndutya, tan nacatya ra ndaha ra nuu nyivi can, tan catyi ra:

—Ña cua ndoo cuatyī tsa cua cúu ra vaha ihya siqui yuhu, tyin siqui nyoocho cua ndoo cuatyī can.

²⁵ Tan tandihi nyivi nacahan ñi, tan catyi ñi:

—Na ndoo maa tsi siqui ndi tan siqui sehe ndi.

²⁶ Tacan tan ra Pilato jaña ra tsi ra Barrabás, tan tava tyiñu ra na ndoho ra Jesús, tan nacuhva cuenda ra tsi ra tsi ra andaru naha ra na cúu ra nu cruu.

²⁷ Tacan tan ra andaru cuenda ra Pilato, ra ndacá ñahan can tsindacā ra naha tsi ra Jesús nda vehe tyiñu ra Pilato, tan jandu iñ ra naha tsi tandihi ca andaru nu nyaá ra. ²⁸ Tacan tan tava ra naha jahma ra tan jacunditsi ra naha iin jahma cuaaha tsi ra. ²⁹ Tan tyihī ra naha iin corona tsa tsinu tsihin iñu jiñi ra. Tan tsahā ra naha iin yutun tatun na cundaha ra tsihin ndaha cuaaha ra. Tacan tan tsicuiñi tsiñi ra naha nuu ra, tan tsacu nducu ra naha tsi ra tan catyi ra naha:

—¡Nacumi tsi un, yooho Rey cuenda nyivi Israel!

³⁰ Tan tivī sū ra naha tsi ra. Tan quihñ ra naha yutun tatun can tan cañi ra naha jiñi ra. ³¹ Tsa yahā tsa tsacu nducu ra naha tsi ra tan tava ra naha jahma cuaaha tsa nditsi ra, tan jacunditsi nyico ra naha jahma maa ra tsi ra. Tacan tan cuahán ra naha tsihin ra cua cahñi ra naha tsi ra nu cruu.

Nu tyaa ra naha tsi ra Jesús nu cruu

(Mr. 15.21-32; Lc. 23.26-43; Jn. 19.17-27)

³² Tsa quitā ra naha ican, tahān ra naha tsi iin ra ñuu Cirene, tsa nañi Simón. Tan jañiñi ra naha tsi ra na cuiso ra cruu ra Jesús.

³³ Tan tsaa ra naha iin nu nañi Gólgota, tan cuñi tsi catyi “Yiqui Jiñi Ndiyi”. ³⁴ Tan ican tsahā ra naha vinu nasacā tsihin ndutya uva xaan coho ra Jesús. Tan tsa yahā tsa tsihi ra luxu can, ña cuñi ca ra coho ra.

³⁵ Tan tsa yahā tsa tyaa ra naha tsi ra nu cruu, tacan tan ra andaru can quihñ ra naha jahma ra tan tava cuenda ra naha tyin cua nyehe ra naha ndáa ra jaha canaa intuhun intuhun jahma ra. Tacan cuvī tyin cundaa tuhun tsa tyaa iin ra cuvī ndusu yuhu Nyoo tahān tsanaha nu catyi tsi tyehehen: “Tava cuenda ra naha tan tsatsā ra naha jahma yu”, catyi tsi. ³⁶ Tacan tan tsinyecu ra naha ican tyin jaha cuenda ra naha tsi ra. ³⁷ Tan ityi jiñi ra tyaa ra naha letra tsa catyi nacuenda cua cúu ra. Tan catyi tsi tyehehen: “Ra ihya cuvī ra Jesús, rey cuenda nyivi ñuu Israel.”

³⁸ Tan tyaa tucu ra naha uvi taahan ra suhu tsihin ra nu uvi taahan ca cruu. Iin ra tyaa ra naha xiin cuaaha ra, tan inga ra xiin satyin ra. ³⁹ Tan nyivi tsa yahā ican, caahán ñi tsi ra, tan javicó ñi jiñi ñi tsa tsacú nducu ñi tsi ra. ⁴⁰ Tan catyi ñi tsihin ra:

—¡Yooho tsa cahān un tyin cua canī un vehe ñuhu cahnu, tan tsitsi tsa uñi quivi tan cua janduvaha nyico un itsi, jacacu tsi maa un vityin nu cruu juvin, tatun nditsa tyin Sehe Nyoo cuvī tsi un! —catyi ñi tsihin ra.

⁴¹ Tan juvin ñi tacan tsacú nducu ra jutu tsa cuvī ityi nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún tahanan ra naha tan catyi ra naha:

⁴² —Jacacu ra tsi inga nyivi, maa tyin ña cuvī jacacu ra tsi maa ra. Tun nditsa tyin Rey cuenda nyivi Israel cuvī ra, na nuu ra nu cruu can, tan cua tsinu iñi yo tsi ra. ⁴³ Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñi ra tsi ra. Tyin catyi ra tsihin yo tyin Sehe Nyoo cuvī tsi ra.

⁴⁴ Tan nda cuenda nu ñasuhu nahnu tsa nyaá nu cruu xiin ra tan tsacu nducu ndihi nahnu tsi ra.

Nu tsihi ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tacan tan ndunaā taniī cahnu ñuhu ñayivi tsa ora tan nda cuanda caa uñi tsa señi. ⁴⁶ Tan juvin ñi cuhva can, ñihi xaan canā tsaa ra Jesús. Tan catyi ra:

—Elí, Elí, ¿lama sabactani? —tan cuñi tsi catyi: Nyoo Jutu yu, Nyoo Jutu yu, ¿nacuenta nacoq iñhi un tsi yu?

⁴⁷ Juhva ra yucú can naha ra, tsiñi ra naha tsa cahān ra, tan catyi ra naha:

—Ra Elías, ra cuvī ndusu yuhu Nyoo tsanaha, canā tsaa ra.

⁴⁸ Tan juvin ñi cuhva can, cuahán iin ra cua quihñ ra iin yahma cuhva caá catyi, tan jatyiñ ra tsihin vinu iya, tan tyaa ra nu yutun, tan jatuhva ra yuhu ra Jesús tyin na coho ra. ⁴⁹ Maa tyin inga ra naha catyi ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

⁵⁰ Inga tsaha cana tsaa ñihi ra Jesús, tacan tan tsihi ra. ⁵¹ Tan juvin ñi cuhva can ndata sava jahma tsa ticaá tsitsi vehe ñuhu cahnu tyasi Nu Ii Xaan, nda cuanda ityi siqui tan nda cuanda ityi tsaha. Tan ñihi xaan taan. Tan tahvi cuatyí cava nahnu. ⁵² Tan nuña yuhu ñaña. Tan cuaha nyivi tsa tsinú iñi tsi Nyoo tan tsihi ñi, nandoto ñi. ⁵³ Tan tsa yaha nandoto ra Jesús quita ñi nu ñaña tan quihvi ñi tsitsi ñuu Jerusalén, tan cuaha nyivi nyehe tsi ñi. ⁵⁴ Tacan tan ra capitán tan ra andaru tsa jahá cuenda tsi ra Jesús, nayuhvi xaan ra naha tsa taan, tan tsa nyehe ra naha inga ca tsa cuvi. Tan catyí ra naha:

—Nditsa nditsa cui, tyin Sehe Nyoo cuvi tsi ra ihya.

⁵⁵ Cuaha ñiñaha tsa tsinyicun tsi ra Jesús nda Galilea tan jatinyee ñi tsi ra, yucu ñi nyehe ñi ndasava. ⁵⁶ Tan juhva ñi ican cuvi ñi ihya: ña María tsa quee Magdala, tan ña María sihi ra Jacobo tan ra José, tan ñasihi ra Zebedeo.

Nu tsicutsi ra naha tsi ra Jesús

(Mr. 15.42-47; Lc. 23.50-56; Jn. 19.38-42)

⁵⁷ Cuhva tsa cuñi cuaa, quitsi iin ra cuca tsa nañi José, ra ñuu Arimatea. Tan tsinú iñi ra tsi ra Jesús. ⁵⁸ Tan tsahan ra tsicahan ra tsihin ra Pilato, tan tsican ra cuñu ñuhu ra Jesús. Tacan tan tava tyiñu ra Pilato na cuhva ra andaru naha ra cuñu ñuhu ra Jesús tsi ra. ⁵⁹ Tacan tan quihñi ra José cuñu ñuhu ra, tan cava nuu ra iin jahma cuitsin vaha tsi ra. ⁶⁰ Tan tyihí ra cuñu ñuhu ra Jesús tsitsi iin ñaña tsaa tsa cuvi iin yavi yuu tsa tava tyiñu ra tsatyá ra naha. Tan tsa yaha tsa nacasí ra yuhu ñaña can tsihin iin yuu cahnu, tan cuahán ra. ⁶¹ Tan ña María tsa quee Magdala, tan inga ña María, ndoo ñi yucu ñi yuhu ñaña can.

Nu jahá cuenda ra andaru ñaña ra Jesús

⁶² Tan tsa inga quivi, quivi quitatú nyivi cuvi can, tan ra jutu tsa cuvi ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato. ⁶³ Tan catyí ra naha tsihin ra:

—Yooho taa, nducuhun iñi ndi tyin ra vatya can, catyí ra tahan nyito ra tyin tsa yaha tsa uñi quivi tsa cua cúu ra tan cua nandoto ra. ⁶⁴ Yacan cuenda tava tyiñu na jaha cuenda vaha ra andaru naha ra ñaña can, nda yaha tsa uñi quivi, coto cuhun ra tsicá tsihin ra tsa tsacuaa, tan suhu ra naha cuñu ñuhu ra. Yaha can tan cua catyí ra naha tsihin nyivi tyin tsa nandoto ra. Tatun tacan cua cuvi, yaha ca cuhva cua cuvi tan ñavin ca tsa jihna ñi —catyí ra naha.

⁶⁵ Tan ra Pilato catyí ra:

—Quihin ndo andaru ihya. Cuaahan ndo, tan jaha cuenda vaha ndo ñaña can, nácaa cunye maa ndo jaha cuenda ndo —catyí ra.

⁶⁶ Tacan tan cuahán ra naha, tan jahá cuenda vaha ra naha ñaña can, tan tyaa ra naha iin tsa tyaa ra naha tsata yuu tsa ndasí can tyin tatun nacanda yuu can coto ra naha. Tan nacoq ra naha tsi ra andaru jahá cuenda ra naha ican.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

¹ Tsa yaha quivi tsa quitatú nyivi, cuhva tsa cuñi cunditsin, nu quitsaha tsaha vitya, tan ña María tsa quee Magdala can, tan inga ña María tsahan ñi nu ñaña. ² Tan ñihi xaan taan tyin quitsi iin ángel Jutu Mañi yo quee ra andivi, tan tsaa ra nu ñaña can. Tan jatsiyo ra yuu tsa ndasí yuhu can, tan tsicunya ra tsata can. ³ Tan xiñu xaan ra, tumaa tsa cañi tatsa. Tan cuitsin xaan jahma ra. ⁴ Cuhva tsa nyehe ra andaru can naha ra tsi ra, nayuhvi xaan ra naha tan quitsaha ñihi ra naha, tan nda cuanda tsihi naaha ra naha tsihin tsa yuuhvi ra naha. ⁵ Tacan tan catyí ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihi nu cruu nanducú ndo. ⁶ Yoñi ca ra nyii ihya, tyin tsa nandoto ra, tumaa catyí ra. Naha ndo tan nyehe ndo nu tinyi ra naha tsi ra. ⁷ Janumi xaan ndo cuhun ndo cucatyí tuhun ndo tsihin ra tsicá tsihin ra tyin tsa nandoto ra, tan tsa cuahán ra nda Galilea, cua cuatu ra tsi ra naha ndacan. Yacan cuvi tsa catyí tuhun yu tsihin ndo —catyí ángel can tsihin ñi.

⁸ Tacan tan numi ñi quita ñi nu ñaña can. Yuuhvi ñi, tan si xaan cuñi tucu ñi. Tan tsinú xaan ñi cuahán ñi cua catyí tuhun ñi tsihin ra tsicá tsihin ra Jesús. ⁹ Tan cuhva can quituví ra Jesús nuu ñi tan tsahá ra nacumi tsi ñi. Tacan tan natuhva ñi nu nyaá ra tan tsicuiñi tsiti ñi nuu ra tan jacahnu ñi tsi ra, tan tsicunumi nyaá ñi tsaha ra. ¹⁰ Tan catyí ra tsihin ñi:

—Ña nayuhvi ndo. Cuaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyí ra tsihin ñi.

Tuhun tsa nacatyí tuhun ra andaru naha ra

¹¹ Tsitsi tsa cuahán ñi can, juhva andaru tsa jahá cuenda ican, cuahán ra naha nda ñuu, cua nacatyí tuhun ra naha tsa cuvi can tsihin ra jutu tsa cuvi ityi nuu naha ra. ¹² Tacan tan ra jutu can naha ra tsahan ra naha tsicahan ra naha tsihin ra mandoñi ñuu naha ra na natuhun tahan ra naha nácaa cua javaha ra naha. Tacan tan cuaha

xaan xuhun tsahā ra naha tsi ra andaru can naha ra. ¹³ Tan catyí ra naha tsihin ra naha:

—Nyooho cua cahan ndo tyin tsa tsacuaa tsitsi tsa quixí ndo, tsahan ra tsica tsihin ra Jesús tan quihín ra naha cuñu ñuhu ra. ¹⁴ Tan tatun cua coto ra ndacá ñaha tuhun ihya, cua nyehe maa ndi nácaa cua cahan ndi tsihin ra, tan nyooho ña caca iñi ndo. Nduve náa cua tahan ndo. ¹⁵ Tacan tan quihín ra andaru can xuhun can, tan cuahán ra naha cuajavahá ra naha cuhva catyí ra naha tsihin ra naha. Tan nda quivi vityín tan tacan caahán nyivi ñuu Israel.

Nu tavā tyiñu ra Jesús tsi ra tsicá tyiñu ra

(Mr. 16.14-18; Lc. 24.36-49; Jn. 20.19-23)

¹⁶ Tan tacan, tandihí tsa utsi iin ra tsica tsihin ra, cuahán ra naha nda Galilea nda yucu nu catyí maa ra Jesús tsihin ra naha tyin cuhun ra naha. ¹⁷ Tan cuhva tsa nyehe ra naha tsi ra Jesús, jacahnū ra naha tsi ra, maa tyin juhva ra naha uvi ñi tsicá iñi ra naha. ¹⁸ Tacan tan natuhvā ra Jesús nu nyecú ra naha tan catyí ra tsihin ra naha:

—Nyoo tsahā ra tsa cundaca ñaha yuhu tandihí andiví tan nu ñuhu ñayivi ihya.

¹⁹ Yacan cuenda, cuaahan ndo tandihí nu iyó nyivi, tandihí ñi ñuu, tan catyí ndo tsihin ñi na cunyicun ñi tsi yu. Tan jacoondutya ndo tsi ñi tsihin sivi Jutu yo Nyoo tan tsihin sivi yuhu Sehe ra, tan tsihin sivi Tatyí Ii ra.

²⁰ Tan jacuaha ndo tsi ñi na tyaa yahvi ñi tandihí tsa catyí yu tyin javaha ndo. Tan coto ndo tyin yuhu cunyaa yu tsihin ndo tandihí quivi nda cuanda naa ñayivi —catyí ra Jesucristo tsihin ra tavā tyiñu ra.

Tan na cuvi tsi tacan ñi.

Tuhun Nyoo Tsa Tyaa ra Marcos

Nu caahán ra Juan, ra jacoondutya tsi nyivi, tuhun Nyoo

(Mt. 3.1-12; Lc. 3.1-9, 15-17; Jn. 1.19-28)

¹ Tyehen quitsahá tuhun ra Jesucristo, Sehe Nyoo. ² Tsanaha ra Isaías, ra cuví ndusu yuhu Nyoo, tyaa ra nácaa cua quitsi ra Jesucristo, Sehe Nyoo. Tan catyí tsi tyehen:

Cua jacuhun yu iin ra cua jacoto tsi nyivi na janduvaha ñi tsi ñi tsa ndi cumañi ca cuhun un nu yucú ñi, catyí Nyoo tsihin ra Cristo.

³ Cua tyaa soho yo ndusu ra nu cana tsaa ra nu tsiqui, tan catyí ra:

“Ñuñá ndo iin ityi cuiti

tan natyiso vaha ndo tsi ndo tyin tsa vatsi Jutu Mañi yo”, catyí tuhun tsa tyaa ra Isaías.

⁴ Tacan cuví; quitsi ra Juan nu tsiqui, tan javahá ra cuhva tyaa ra Isaías. Catyí ra tsihin nyivi tyehen: “Ndu uvi iñi ndo cuatyí ndo tan cõondutya ndo tyin tacan tan jaha Nyoo tucahun iñi tsi ndo tsa cuenda cuatyí ndo.” ⁵ Tan tandihí nyivi iyó ñuu tsa cayucú Judea tumaa ñuu Jerusalén tan inga ca ñuu tsahan ñi tsityaa soho ñi tuhun caahán ra Juan. Tsa tsiñi ñi tsa caahán ra, ndu uvi iñi ñi cuhva iyó ñi tan nahma ñi cuatyí ñi nu Nyoo. Tacan tan tsicoondutya ñi yutya Jordán.

⁶ Tan jahma ra Juan tsinu tsi tsihin ixi camellu. Tan cinturón ra cuví ñi. Tan maa ñi tica xama tsatsi ra, tan tsihi ra ndutya ñuñu tsa iyó tsitsi cuhu. ⁷ Caahán ra tuhun Nyoo tsihin nyivi tan catyí ra:

—Tsa yatyin cuí quitsi ra tsa cahnu ca cuví tan ñavin ca yuhu. Tan ndi ña taahán tsi tsi yu tsa ndatsi yu ñi nditsan ra, tyin cahnu ca cuví maa ra tan ñavin ca yuhu.

⁸ Yuhu jacoondutya yu tsi ndo tsihin ndutya ñi. Maa tyin maa ra cua jacoondutya ra tsi ndo tsihin Tatyí li Nyoo —catyí ra Juan.

Nu tsicoondutya ra Jesús

(Mt. 3.13-17; Lc. 3.21-22)

⁹ Quívi can quitá ra Jesús ñuu Nazaret, tsa canyií Galilea, tan cuahán ra nu nyii ra Juan yutya Jordán tyin jacoondutya ra tsi ra. ¹⁰ Tsa quitá ra Jesús tsitsi ndutya tsa yahá tsicoondutya ra, nuñá andívi tan nyehé ra vatsi nuú Tatyí li Nyoo siqui ra tan caá tsi tumaa caá iin paloma. ¹¹ Tan nacahan iin ndusu ityi andívi tan catyí tsi tsihin ra tyehen:

—Yoocho cuví Sehe yu tan cuñi xaan yu tsi un. Tan si xaan cuñi yu nyehé yu tsi un —catyí ndusu can.

Nu nducú cuhva nu ña vaha tsi ra Jesús

(Mt. 4.1-11; Lc. 4.1-13)

¹² Tsa yahá tsa tsicoondutya ra Jesús tan tsindaca Tatyí li Nyoo tsi ra nu tsiqui. ¹³ Tan tsinyii ra ican uvi xico quívi nu nduve nyivi iyó, maa ñi quiti xaan iyó. Tan nducú cuhva nu ña vaha tsi ra. Yahá can tan tsaa ángel Nyoo tan jatyinyee ra naha tsi ra.

Nu quitsahá caahán ra Jesús tuhun Nyoo tsihin nyivi iyó Galilea

(Mt. 4.12-17; Lc. 4.14-15)

¹⁴ Tsa yahá tsa tyihí nyivi tsi ra Juan vehe caa, tan tsinuhá ra Jesús Galilea tan caahán ra tsihin nyivi nácaa ndacá ñaha Nyoo. ¹⁵ Tan catyí ra:

—Tsa tsaa quívi tsa cua cundaca ñaha Nyoo tsi nyivi iyó nu ñuhu ñayivi ihya. Yacan cuenda ndu uvi iñi ndo cuatyí ndo, tan tsinu iñi ndo tuhun tsa jacacú Nyoo tsi nyivi —catyí ra Jesús.

Nu caná ra Jesús cumi taahan ra tiin tyaca

(Mt. 4.18-22; Lc. 5.1-11)

¹⁶ Iin quívi cuahán ra Jesús tsicá ra yuhu miñi tsa nañi Nduya Ñuhu Galilea. Tan nyehé ra tsi ra Simón tan ra Andrés, yañi ra Simón, cañi ra naha traya ra naha nu ndutya, tyin ra tiin tyaca cuví ra naha. ¹⁷ Tan catyí ra Jesús tsihin ra naha:

—Naha ndo, quitsi nyicun ndo tsi yu, tan yuhu cua jatyinyee yu tsi ndo tyin tumaa tsa tiin ndo tyaca ihya, tacan cua ñihi ndo nyivi cua cuvi nyivi Nyoo —catyí ra Jesús tsihin ra Simón tan tsihin ra Andrés.

¹⁸ Juvín ñi cuhva can tan nacoq ra naha traya can, tan cuahán ra naha cuanyicún ra naha tsi ra.

¹⁹ Ña cuaha ñi tsicá ra naha, tan nyehé ra Jesús tsi uvi taahan sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya. ²⁰ Caná ra tsi nduvi taahan ra naha. Tan nacoq ra naha tsi ra Zebedeo, jutu ra naha, tsitsi yutun ndoo can tsihin ra cuví musu ra naha. Tan cuahán ra naha tsihin ra Jesús.

Nu quitá tatyí ña vaha tsi iin rayii

(Lc. 4.31-37)

²¹ Tsa tsaa ra Jesús ñuu Capernaum tsihin ra tsicá tsihin ra, quihvi ra Jesús tsitsi vehe ñuhu quívi quitatú nyivi. Tacan tan quitsahá jacuahá ra tuhun Nyoo tsi nyivi. ²² Tan iyo xaan cuñi ñi tsa tsiñi ñi tsa caahán ra, tyin jacuahá ra tumaa iin ra iyó vaha ndatu. Ña caahán ra cuhva caahán ra maestro cuenda ley vehe ñuhu naha ra. ²³ Tan tsitsi vehe ñuhu can nyii iin ra yihí tatyí ña vaha. Tan caná tsaa ra tan catyí ra:

²⁴ —¿Nacuvi tyihí un tsi un tsihin nyuhu, yoocho Jesús, ra ñuu Nazaret? ¿A vatsi un vatsi janaa un tsi ndi? Yuhu nacotó vaha yu

tsi un, tan tsitó yu tyin Sehe li Nyoo cuví un —catyí ra can tsihin ra Jesús jahá nu tatyí ña vaha can.

²⁵ Tacan tan nduxaḡan ra Jesús tsi nu tan catyí ra tsihin nu:

—¡Ña caḡan ca un! ¡Quita tsi ra ihya! —catyí ra tsihin nu.

²⁶ Tacan tan quitsahá nihi rayii can jahá nu. Tan ñihi xaan caná tsaa ra jahá nu, tan quita nu tsi ra. ²⁷ Tandihí nyívi iyo xaan cuñí ñi tan tsicá tuhun tahan ñi tsi ñi, tan catyí ñi:

—¿Náa cuví tsa nyehé yo ihya? ¿Náa tuhun tsaa jacuahá ra ihya? ¡Tyin iyó vaha tunyee iñi tsi ra, nda cuenda tatyí ña vaha tan tyaa yahvi tsi ra! —catyí ñi.

²⁸ Tan numi ñi tsitó nyívi iyó tandihí ñuu tsa cayucú Galilea tuhun ra Jesús.

*Nu nduvahá tyiso ra Simón Pedro
(Mt. 8.14-15; Lc. 4.38-39)*

²⁹ Tsa ndihí jacuahá ra Jesús tsi nyívi tsitsi vehe ñuhu, quita ra cuahán ra vehe ra Simón tan ra Andrés. Tan cuahán ndihí ra Jacobo tan ra Juan tsihin ra. ³⁰ Tan ña tyiso ra Simón cuuhví ña tsihin cañi canyí ña nu tsito. Tan catyí tuhun nyívi ña tsihin ra Jesús tyin cuuhví ña. ³¹ Tacan tan natuhvá ra Jesús yuhu tsito nu canyí ña, tiñ ra ndaha ña, tan cañihí ra tsi ña. Juvín ñi cuhva can, quita cañi tsi ña, tan quitsahá nanducú ña tsa catsi ra naha.

Nu cuaha xaan nyívi cuuhví janduvahá ra Jesús

(Mt. 8.16-17; Lc. 4.40-41)

³² Tsa tsa cuñí cuaa tsa tsa yahá tyiso ñicanyii, tandihí nyívi cuuhví tan nyívi yihí tatyí ña vaha tsindacá nyívi tsi ñi nu nyii ra Jesús. ³³ Tan ndu iñ tandihí nyívi ñuu can nu yucú ra naha. ³⁴ Tan janduvahá ra tsi tandihí ñi tsa yihí siñ siñ cuehe, tan cuaha tatyí ña vaha tava ra. Maa tyin ña tsahá ra tsa cahan tatyí ña vaha can, tyin tsitó nahnu yóo ra cuví ra.

Nu tsicá ra Jesús caahán ra tuhun Nyoo tandihí ñuu tsa cayucú Galilea

(Lc. 4.42-44)

³⁵ Ra Jesús nduvitá ra tsa ndi naa ca inga quívi, quita ra ñuu can tan cuahán ra iñ nu taxin caá cuandacán tahvi ra tsi Nyoo. ³⁶ Tsa nyehé ra Simón tyin nduve ra, tacan tan cuahán ra tsihin tandihí ca ra naha cuandanducú ra naha tsi ra. ³⁷ Tan tsa nañihí ra naha tsi ra, catyí ra naha tsihin ra:

—Tandihí nyívi tan nanducú ñi tsi un —catyí ra naha.

³⁸ Maa tyin catyí ra tsihin ra naha:

—Cohon ndo ñuu tsa cayucú yatyin ñi ihya, tyin cuñí tsi cahan ndihí yu tuhun Nyoo ican, tyin yacan tyiñu vatsí yu —catyí ra Jesús tsihin ra naha.

³⁹ Tan tacan tsicá ra Jesús caahán ra tuhun Nyoo tsihin nyívi tsitsi vehe ñuhu tan iñ tan iñ ñuu tsa cayucú Galilea. Tan tava ra tatyí ña vaha tsi nyívi.

Nu janduvahá ra Jesús tsi ra ndohó cuehe tyaaḡyú

(Mt. 8.1-4; Lc. 5.12-16)

⁴⁰ Tsa ndi cuahán ra Jesús tsicá ra tan quita iñ ra ndohó cuehe tyaaḡyú tsicuiñi tsiti ra nuu ra, tan catyí ra tsihin ra:

—Tun yooḡo tan cuñí un, cuví janduvaha un tsi yu —catyí ra.

⁴¹ Tan cundaahví iñ ra Jesús nyehé ra tsi ra, tan tyiso ndaha ra jiñi ra, tan catyí ra tsihin ra:

—Cuñí yu janduvaha yu tsi un. Tan vityin tsa nduvahá un —catyí ra tsihin ra.

⁴² Tsa caḡan ra Jesús tacan tsihin ra, juvín ñi cuhva can tan nduvahá ra. ⁴³ Tacan tan catyí ra Jesús tyin tsa cuví cunuḡu ra, maa tyin caḡan vaha xaan ra tsihin ra na javaha ra tyehen:

⁴⁴ —Coto catyí tuhun un tsihin nyívi yóo janduvahá tsi un. Maa tyin cūaahan nu nyaá ra cuví jutu, tan janaha un tsi un tsi ra. Tan cūhva tsa catyí ra Moisés tyin cuhva ndo tsa cuenda tsa nduvahá ndo tun cuhví ndo. Yacan cua cuví tsa ndaa tsi ra jutu tan tsi nyívi tyin tsa nduvahá un —catyí ra Jesús tsihin ra.

⁴⁵ Maa tyin ra ican cuahán ra, tan quitsahá catyí tuhun ra tsihin tandihí nyívi nácaa nduvahá ra. Yacan cuenda ña cuví ca quihví nditsín ra Jesús tsitsi ndi intuhun maa ñuu. Tan tsicá ra ityí tsata ñuu ñi nu nduve nyívi iyó, maa tyin tandihí ñi ityí tan quita nyívi, tan tsinyehé ñi tsi ra.

2

*Nu janduvahá ra Jesús tsi iñ ra xii
(Mt. 9.1-8; Lc. 5.17-26)*

¹ Tsa yahá juhva quívi tan cuahán ra Jesús ñuu Capernaum inga tsaha. Tan tsa tsitó nyívi tyin tsaḡ nuḡu ra yuvehe ra, ² iñ yaha ñi ndu cuaha ñi yuvehe ra tan ña tsitahan maa ñi tsitsi vehe tan ndi yuvehe. Tan caahán ra tuhun Nyoo tsihin ñi. ³ Tacan tan tsaḡ cumi taahan rayii nyisó ra naha iñ ra xii. Cuñí ra naha cuḡan ra naha tsihin ra nda nu nyaá ra Jesús. ⁴ Maa tyin ña cuví yaha ra naha yuvehe tan cuḡan ra naha nu nyaá ra Jesús tyin cuaha xaan nyívi nyecú yuvehe can. Yacan cuenda ndaa ra naha jiñi vehe, tan jatsiyó ra naha juhva tyiyo ndihí cuhva nu nyaá ñi ra Jesús. Tacan tan januu ra naha tsi ra cuuhví can nu nyaá ra Jesús tsihin iñ tsito. ⁵ Tsa nyehé ra Jesús tyin tsinú xaan iñi ra can naha ra, catyí ra tsihin ra cuuhví can:

—Vityin, tsa jahā yu tucahnu iñi tsi un tsa cuenda tandihi cuatyí un —catyí ra Jesús tsihin ra.

⁶Tan nyecú juhva ra cuví maestro cuenda ley vehe ñuhu naha ra ican, tacan tan quitsahā tsicá iñi ra naha tuhun ihya: ⁷“¿Nacuenda tyin caná iñi ra ihya caahán ra tyehen? Tan intuhun ñi maa Nyoo cuví ra jahā tucahnu iñi tsi yo. Tsocoo cuatyí ra nuu Nyoo tsa cuenda tsa caahán ra tacan”, cuñi ra naha, tsicá iñi ra naha. ⁸Maa tyin ra Jesús iin yaha ñi tuví iñi ra cuhva tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan? ⁹¿Náa yii ca cahan yo; “Cuatyí un tsa yaha ndatsí”, o catyí yo: “Nduvita, naquihin tsito un tan caca”? ¹⁰Vaha. Cua janaha yu tsi ndo tyin yuhu, tsa cuví yu Rayii quee nda gloria, iyó ndatu tsi yu nu ñuhu ñayiví ihya tsa jaha yu tucahnu iñi tsi nyiví tsa cuenda cuatyí ñi —catyí ra Jesús tsihin ra naha.

Tacan tan nacahan ra tsihin ra cuuhví can:

¹¹—Catyí yu tsihin un; nduvita, naquihin tsito un, tan cuanuhu yuvehe un —catyí ra Jesús tsihin ra.

¹²Tan iin yaha ñi nduvitā ra cuuhví can, naquihin ra tsito ra, tan cuanuhū ra. Tan iyo xaan cuñi tandihi maa nyiví tsa nyehe can, tan quitsahā jacahnú ñi tsi Nyoo, tan catyí ñi:

—Ndi iin tsaha maa tan ñaha ca nyehe yo tsehe —catyí ñi.

Nu canā ra Jesús tsi ra Leví

(Mt. 9.9-13; Lc. 5.27-32)

¹³Tsa yahā yacan tan cuahán ra Jesús yuhu miñi inga tsaha. Tacan tan tsaa cuaha nyiví nu nyii ra, tan quitsahā jacuahá ra tsi ñi. ¹⁴Tsa ndihí jacuahā ra tsi ñi, tan cuanuhū ra. Tan tsa cuahán ra yahā ra nu nyaá vehe nu tyahví nyiví xuhun cuenda ra ndacá ñaha ñuu Roma, tan ican nyaá ra Leví, sehe ra Alfeo, naquihin cuenda ra xuhun can. Nyehe ra Jesús tsi ra, tan catyí ra tsihin ra:

—Cohon tsihin yu.

Tacan tan nduvitā ra Leví, tan cuahán ra tsihin ra.

¹⁵Yahā can tan cuahán ra Jesús cuacatsí ra yuvehe ra Leví tsihin ra tsicá tsihin ra. Tsinyaā ra nu mesa tan tsinyecú ndihi tucu ra tavá xuhun cuenda ra ndacá ñaha tan inga ca nyiví iyó cuatyí. Tyin cuaha xaan nyiví nyicún tsi ra. ¹⁶Maa tyin tsa nyehe ra cuví maestro cuenda ley vehe ñuhu tan ra cuví fariseo naha ra tyin tsatsí ra Jesús tsihin ra tavá xuhun tan ra iyó cuatyí, catyí ra naha tsihin ra tsicá tsihin ra:

—¿Nacuenda tyin tsatsí tan tsihi ra maestro ndo tsihin ra tavá xuhun tan ra iyó cuatyí?

¹⁷Tsa tsiñi ra Jesús tsa cahan ra naha tan catyí ra:

—Yuhu ña vatsí yu vatsí jatyinyee yu tsi nyiví cuñi tyin vaha iyó ñi; vatsí yu vatsí jatyinyee yu tsi nyiví tsitó tyin iyó cuatyí ñi tumaa nyiví cuuhví, tyin nyiví cuuhví tsiñi ñuhu doctor tsi ñi. Maa tyin nyiví vaha cuñi, ña tsiñi ñuhu doctor tsi ñi —catyí ra Jesús tsihin ra naha.

Nu tsicā tuhun nyiví tsi ra Jesús tun taahán tsi coo nyitya ñi

(Mt. 9.14-15; Lc. 5.33-35)

¹⁸Iin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahan juhva nyiví nu nyii ra Jesús, tan tsicā tuhun ñi tsi ra, tan catyí ñi:

—¿Nacuenda tyin tsocoo nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yoocho ña tsocoo nyitya ra naha? —catyí ñi.

¹⁹Nacahan ra Jesús tan catyí ra:

—¿A cuví coo nyitya nyiví yucú nu iyó vico tindaha tun ndi nyii ra cua tindaha tsihin ñi? Ña cuví coo nyitya ñi tun ndi nyii ra tsihin ñi. ²⁰Maa tyin coo quivi ña cua cunyi ca ra tsihin ñi. Tacan tan cua coo nyitya ñi —catyí ra Jesús tsihin ñi.

Nu caahán ra Jesús tyin ña nacatsi tahan tuhun tsahnú tsa iyó nyiví tsihin tuhun tsaa tsa jacuahá ra tsi ñi

(Mt. 9.16-17; Lc. 5.36-39)

²¹Tan catyí ra Jesús:

—Ña tuhvá nyiví natyaá jahma tsaa iin jahma tuuhu, tyin jahma tsaa can cua nandiyi can tan cua nducahnu ca nu ndatā jahma tuuhu can jaha can. ²²Tacan tucu ñi ñi yihí vinu tun tyihí yo vinu tsaa tsitsi ñi; tsahnu cua ndata ñi can, tan cua cati vinu can tan cua tiví can. Yacan cuenda cuñi tsi tsa tyihí yo vinu tsaa tsitsi ñi; tsaa —catyí ra Jesús.

Nu jocón ra tsicá tsihin ra Jesús yoco trigu quivi quitatú nyiví

(Mt. 12.1-8; Lc. 6.1-5)

²³Iin tsaha yahā ra Jesús tsitsi tsa tatsi nyiví tan cuví tsi quivi quitatú ñi. Tan tsa yahā ra tsicá tsihin ra quitsahā tuhun ra naha yoco trigu. ²⁴Tacan tan tsa nyehe ra fariseo naha ra can quitsahā caahán ra naha tsihin ra Jesús:

—¡Nyehe tsa javahá ra tsicá tsihin un naha ra! Jahá tyiñu ra naha tan ña taahán tsi jahá tyiñu yo quivi ihya —catyí ra naha.

²⁵Tan nacahan ra Jesús tsihin ra naha:

—¿A ñaha ca cahví ndo nu tutu nu tsahā cuenda tsi tsa javahā ra David tan ra cutahán tsihin ra quivi tsisoco ra naha? ²⁶Ra David quihví ra tsitsi vehe Nyoo quivi cuví ra Abiatar jutu tsahnu cuví ityi nuu. Tan quihin ra paan ii, tsa taahán tsi catsi maa

ñi maa ra jutu naha ra. Maa ra tan tandihi ra cutahán tsihin ra tsatsi ra naha paan can —catyí ra Jesús.

²⁷ Tacan tan catyí ra Jesús tsihin ra naha:

—Nyoo javahá ra quivi quitatú yo tyin tacan tan cuví quitatu cuñu ñuhu yo; tan ñavin maa yo tsinu tsa cuenda quivi quitatú yo. ²⁸ Yacan cuenda yuhu tsa cuví yu Rayii quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

3

Nu nduvahá ra na ityi iin ndaha
(Mt. 12.9-14; Lc. 6.6-11)

¹ Tsa quihvi ra Jesús inga tsaha tsitsi vehe ñuhu, nyii iin ra na ityi iin ndaha ican. ² Tan ra cuví fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityi ndaha can tyin cuví tsi quivi quitatú nyivi. Tyin tun cua janduvaha ra tsi ra can, tacan tan cua cuví tyaa ra naha cuatyí siqui ra. ³ Tacan tan catyí ra Jesús tsihin ra na ityi ndaha can:

—Nduvita nyityi tan cunyaa un mahñu ihya.

⁴ Tacan tan tsicá tuhun ra tsi ra tsa yucú ican naha ra, tan catyí ra tsihin ra naha:

—¿Náa taahán tsi javaha yo quivi quitatú yo? ¿A taahán tsi javaha yo tsa vaha o tsa ña vaha? ¿A taahán tsi janduvaha yo nyivi, o cahñi yo tsi ñi? —catyí ra Jesús.

Maa tyin ña nacahan ra naha. ⁵ Tacan tan nanyehé xaan ra Jesús nuu ra naha, tan nducuiihya cuñi ra tyin ña cuñi ra naha cutuñi iñi ra naha. Tan catyí ra tsihin ra cuuhví can:

—Jandundoo ndaha un.

Tacan tan jandundoo ra can ndaha ra, tan iin yaha ñi nduvahá ndaha ra. ⁶ Tacan tan quitá ra fariseo naha ra, tan quitsahá natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

Nu cuaha xaan nyivi cuahán cuanyehé nu nyii ra Jesús yuhu miñi

⁷ Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyivi iyó Galilea cuahán cuanyicún tsi ra naha.

⁸ Tsa tsito nyivi tyin nahnú xaan tsa iyo javahá ra, cuaha ñi tsahan nu nyii ra tyin cuñi ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsiyo yutya Jordán. Tan quee tucu juhva ñi ñuu Tiro tan ñuu Sidón tan tandihi ca ñuu tsa cayucú yatyin nu cayucú nduvi ñuu can. ⁹ Tsa nyehe ra Jesús tsaa nyivi, catyí ra tsihin ra tsicá tsihin ra na

caquin nyaa vaha ra naha iin yutun ndoo tyin tun cua ndutuvi ca nyivi, cuví quihvi ra tsitsi yutun ndoo can tyin tacan tan ña cua tindahñi ñi tsi ra. ¹⁰ Tsa cuaha xaan nyivi janduvahá ra, yacan cuenda tsahan cuaha ca nyivi cuuhvi nu nyii ra. Tsicá iñi maa ñi tyin tun nañi luxu ndaha ñi tsi ra tan cua nduvaha ñi. ¹¹ Yihí ñi cuuhvi can yihí tatyí ña vaha tsi ñi. Tan tsa natuhvá ñi tsa yihí tatyí ña vaha nu nyaá ra Jesús tsicuiñi tsiti ñi, tan nu tatyí ña vaha tsa yihí tsi ñi cana tsaa nu tan catyí nu tsihin ra:

—¡Yooho cuví Sehe Nyoo!

¹² Tan tandihi ñi cuhva tsa caahán tatyí ña vaha yoo ra cuví ra, tyasí ra nu cahan nu.

Nu nacatsi ra Jesús tsi utsi uvi ra caca tyiñi ra

(Mt. 10.1-4; Lc. 6.12-16)

¹³ Tsa yahá yacan tan ndaa ra Jesús iin yucu tan cana ra tsi ra tsa cuñi maa ra cana ra. Tacan tan cuahán ra naha nu nyii ra.

¹⁴ Tan tsitsi tsa tandihi ra tsa cana ra, nacatsi ra utsi uvi ra naha tyin caca ra naha tsihin ra, tan caca ra naha cahan ra naha tuhun Nyoo. ¹⁵ Tan tsahá ra ndatu tsi ra naha tsa janduvaha ra naha tsi nyivi cuuhvi, tan tava ra naha tatyí ña vaha yihí tsi nyivi. ¹⁶ Ihya nycú sivi ra naha: ra Simón, tsa jacunañi tucu ra Jesús Pedro; ¹⁷ tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihya cuñi tsi catyí: “ra caahán tumaa ñihi caahán savi”. ¹⁸ Tan tandihi ca ra naha nañi ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañi tucu Simón, iin ra tsa cuñi cuhun cuatyí siqui ñuu Roma tsa ndacá ñaha tsi ñi; ¹⁹ tan ra Judas Iscariote, tsa xico tsi ra Jesús.

Tsa yahá yacan tan cuahán ra Jesús tsitsi iin vehe tsihin ra tsicá tsihin ra.

Nu xaan iñi tsi ra Jesús catyí nahnú tyin tsihin tunyee iñi nu ña vaha javahá ra tsa iyo
(Mt. 12.22-32; Lc. 11.14-23; 12.10)

²⁰ Tan nducuahá nyivi nu yucú ra naha inga tsaha, tan nda cuanda ña cuyatyí ca ra naha catsi ra naha. ²¹ Tsa tsito nyivi ra Jesús tyin nyii ra ican, tsahan ñi tsiquihñi ñi tsi ra tyin cunuhu ra tsihin ñi, tyin catyí nyivi tsihin ñi tyin ndusaná iñi ra.

²² Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaa ra naha nu nyii ra Jesús tan catyí ra naha:

—Ra ihya tavá ra tatyí ña vaha tsi nyivi tsihin tunyee iñi nu Beelzebú, tsa cuví ityi nuu tsihin tandihi tatyí ña vaha —catyí ra naha.

²³ Tsa tuví iñi ra Jesús tyin tacan caahán ra naha, cana ra tsi ra naha tan tsahá ra

iin cuhva tsi ra naha, tan catyí ra tsihin ra naha:

—¿A cuví tavá nu ña vaha juvin ñi maa tahan nu? Ña cuví. ²⁴ Tyin tun ra ndacá ñaha naha ra tan cua natahvi sava ra naha, tan cua quítsaha cañi tahan ra naha, cua cundihi tsa ndacá ñaha ra naha. ²⁵ Tacan tucu ñi tun nyivi iyó iin caa ñi iin vehe tan cañi tahan ñi, cua cusin ñi tan ña cua cuví coo vaha ñi. ²⁶ Tan tun nu ña vaha tan ndusiin nu tan nduvita iin nu siqui inga nu, ¿náa cua tahan nahnu? Cua ndusiin nahnu tan cua cundihi nahnu.

²⁷ Yoñi cuví quihvi tsitsi vehe iin ra xaan tan suhu ra tsa iyó tsi ra, tun ña cuhñi jihna ra tsi ra. Maa ñi cuñí tsi cuhñi jihna ra tsi ra jatsii vehe can tan cuví quihvi ra suhu ra tsa tsii ra.

²⁸ Tsa nditsa catyí yu tsihin ndo tyin cuví coo tucahnu iñi tsi nyivi tsa cuenda tandihi nuu cuatyí javahá ñi, tan tsa cuenda tucu tsa caahán ñi tsa ña vaha. ²⁹ Maa tyin tun cahan ñi ndavaha ñi siqui Tatyí Ii Nyoo, ña cua jaha maa Nyoo tucahnu iñi tsi ñi; cua coo cuatyí ñi yoso cuahan quivi —catyí ra Jesús.

³⁰ Tacan cahan ra Jesús tsihin ra maestro cuenda ley vehe ñuhu naha ra, tyin catyí ra naha tyin tatyí ña vaha yihí tsi ra.

Nu catyí ra Jesús tyin nyivi tyaa yahvi tuhun Nyoo, juvin ñi cuví yañi ra, tan sihi ra
(Mt. 12.46-50; Lc. 8.19-21)

³¹ Tacan tan tsaá sihi ra Jesús tan yañi ra nu nyii ra, maa tyin ndoo ñi ityi tsata vehe, tan catyí ñi tsihin ra nyecú ican naha ra tyin cana ra naha tsi ra Jesús. ³² Tan catyí nyivi nyecú nanii canduvi xiin ra Jesús tsihin ra:

—Sihi un, yañi un tan cuhva un nanducú ñi tsi un nyecú ñi tsata vehe can —catyí ñi tsihin ra.

³³ Maa tyin catyí ra:

—¿Yóo cuví sihi yu tan yañi yu?

³⁴ Tacan tan nanyehé ra nanii canduvi nu nyaá ra, tan catyí ra:

—Nyivi nyecú ihya cuví sihi yu, yañi yu tan cuhva yu. ³⁵ Tyin tandihi nyivi javahá cuhva cuñí Nyoo, juvin ñi cuví yañi yu, cuhva yu tan sihi yu —catyí ra Jesús.

4

Nu caahán ra Jesús tyin ra caahán tuhun Nyoo cuví ra tumaa iin ra tatsí
(Mt. 13.1-9; Lc. 8.4-8)

¹ Quítsaha jacuahá ra Jesús inga tsaha yuhu miñi. Tan cuaha xaan nyivi ndu iin nu nyii ra. Tan tsa cuenda tsa cuaha xaan ñi cuví, quihvi ra tsitsi yutun ndoo tsa canyií nu ndutya yuhu miñi can, tan tsinyaá ra tsitsi can. Tan ndoo tandihi maa nyivi nu nyiti. ² Tacan tan cuaha xaan tsa jacuahá ra tsi ñi tsihin cuhva. Tan tsitsi tsa jacuahá ra tsi ñi, catyí ra tsihin ñi:

³ —Tyaa soho ndo tsa cua cahan yu. Iin ra quita ra yuvehe ra. Tan cuahán ra cua tatsi ra trigu nu ñuhu ra. ⁴ Tan cuhva tsa quiti ra tsiti trigu can, cucoyo juhva tsi yuhu ityi. Maa tyin quítsi saa tan tsatsí ti naha ti itsi. ⁵ Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi cana tsiti can tyin ña cuaha nyahyu yihí tyafu yuu can. ⁶ Maa tyin tsa cana ñicanyii, iin yaha ñi na ityi tsi tyin ña cunu cuahán yoho tsi. ⁷ Tan juhva ca tsiti can cucoyo tsi tyafu iñu. Quivi cana tsiti can, tsahnú tsi iin caa ñi tsihin iñu can. Maa tyin iñu can numi ca tsahnú can tan tsahnú can trigu can. Yacan cuenda ña tsahá trigu can tsiti. ⁸ Maa tyin juhva ca tsiti can cucoyo tsi nu ñuhu vaha. Cana tsi tan tsahnú tsi, tan cuaha tsiti tsahá tsi. Tyin tsa intuhun tsiti can, tsahá tsi oco utsi tsiti tsitsi yoco tsi. Tan inga tsiti can tsahá tsi uñi xico, tan inga tsi tsahá tsi iin cientu —catyí ra Jesús tsihin ñi.

⁹ Tan catyí nyico ra tsihin ñi:

—Nyooho tsa iyó soho, tyaa soho ndo tsa caahán yu.

Nu tsahá cuenda ra Jesús nacuenda jacuahá ra tsi nyivi tsihin cuhva
(Mt. 13.10-17; Lc. 8.9-10)

¹⁰ Tsa yaha yacan tan ndoo maa ña ra Jesús tsihin ra tsicá tsihin ra tan nyivi nyicún tsi ra. Tan tsicá tuhun ñi:

—¿Náa cuñí tsi catyí tsa cahan un nañi?

¹¹ Tan catyí ra tsihin ñi:

—Maa Nyoo catyí tyin jacotó yu tsi ndo tuhun xeehe nácaa ndacá ñaha ra. Maa tyin inga ca nyivi jacotó yu can tsi ñi tsihin cuhva ñi tyin ña cuñí ñi cunycun vaha ñi tsi yu.

¹² Tyin vasu ndi maa nyehé ñi tsa javahá yu, cua cuví tsi tumaa tsa ña nditsin nyehé ñi; vasu ndi maa tsiñí ñi, ña cua cutuñí iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tucahnu iñi tsi ñi tsa cuenda cuatyí ñi —catyí ra Jesús tsihin ñi.

Nu tsahá cuenda ra Jesús tsa cuñí tsi catyí tuhun ra tatsí
(Mt. 13.18-23; Lc. 8.11-15)

¹³ Tan catyí ndihi ra tsihin ñi:

—Tun ña cutuñí iñi ndo tuhun cahan yu nañi, ndi ña cua cutuñí iñi ndo tandihi ca tsa cua jacuahá yu tsi ndo tsihin cuhva ñi.

¹⁴ Ra tatsí trigu can cuví ra caahán tuhun

Nyoo. ¹⁵ Yihí nyivi cuví ñi tumaa nu cucoyo tsiti trigu yuhu ityi tyin tsiñí ñi tuhun Nyoo, maa tyin yaha can, tan iin yaha ñi naá nyico iñi ñi tsa caahán Nyoo tsihin ñi tyin quihín nyaá nu ña vaha tuhun Nyoo tsa tatsí ra añima ñi. ¹⁶ Tan juhva nyivi cuví ñi tumaa nu cucoyo tsiti trigu tsata yuu tyin sii xaan cuñí ñi tsiñí ñi tuhun Nyoo juhva ñi quivi.

¹⁷ Maa tyin ña ndoo tsi añima ñi tan ña cuví

cuahnu ñi tan juhva ñi quivi tsinú iñi ñi, yacan cuenda cuví ñi tumaa nu cucoyo tsiti tsata yuu tyin tsata yuu can luxu cuii ñi nyahyu yihí. Yacan cuenda ña tsahnú tsi tyin ña ñihí tsi nu cuhun yoho tsi. Tacan cuví nyivi can, tyin quivi vatsí tundoho siqui ñi, tan caahán nyivi ñi tsi tsa cuenda tuhun Nyoo, ndu uvi iñi ñi tan jandihi ñi tsa tsinú iñi ñi tsi Nyoo. ¹⁸ Tan juhva nyivi cuví ñi tumaa nu cucoyo tsiti tyañu iñu tyin tsiñi ñi tuhun Nyoo, ¹⁹ maa tyin tsicá xaan iñi ñi tundoho ñayivi ihya tan ña tsicá iñi ñi tuhun Nyoo. Nyiyo iñi ñi tsa cuca, tan cuñi ñi coo tandihi tsa iyó nu ñuhu ñayivi ihya tsi ñi. Tan tandihi yacan jatyañu can tsi ñi, tan cuví ñi tumaa cuví yutun tsa ña tsahá tsiti. ²⁰ Maa tyin nyivi tsa tsiñi tuhun Nyoo tan naquihín vaha ñi itsi, tan javahá ñi tandihi tsa caahán tsi, juvin ñi cuví tumaa ñuhu vaha nu cucoyo tsiti can tyin tsiti tsa cucoyo can caná vaha tsi, tsahnú tsi, tan yihí tsi tsahá tsi oco utsi tsiti. Inga tsi tsahá tsi uñi xico tsiti, tan inga tsi tsahá tsi cientu tsiti.

Nu cahán ra Jesús tyin ña taahán tsi tyihí xeehe yo ñuhu Nyoo tsa jandunditsín añima yo coto quihin nyaa ra itsi

(Lc. 8.16-18)

²¹ Tan catyí tucu ra tyehen tsihin ñi:

—¿A tsicán yo ñuhu tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyí yo can iin nu sucun tyin tacan tan janditsin can naní tsitsi vehe. ²² Tyin nduve tsa yihí xeehe tan ña cua quituvi, tan ndi tsa xeehe tan ña cua coto nyivi. Tyin tandihi maa tan cua quita nu nditsin tan coto yo can. ²³ Nyooho tsa iyó soho, tyaa soho ndo tsa caahán yu —catyí ra Jesús tsihin ñi.

²⁴ Tan catyí tucu ra:

—Tyaa soho vaha ndo tsa caahán yu tyin tun tyaa yahvi ndo tuhun tsiñi ndo, cuaha ca tsa cua cuhva Nyoo tsi ndo. ²⁵ Tyin nyivi tyaa soho tsa caahán yu, cuaha ca cua cuhva Nyoo tsi ñi. Maa tyin nyivi tsa ña tyaa soho, cua quihin nyaa ra nda cuenda tsa luxu tsa iyó tsi ñi tsa tsa yaha ñihí ñi.

Nu tsahá ra Jesús iin cuhva nácaa tsahnú iin tsiti

²⁶ Tan catyí tucu ra Jesús:

—Tsa ndacá ñaha Nyoo tsi nyivi cuví tsi tumaa tsiti tsa tatsi nyivi. ²⁷ Tyin nyivi tatsi ñi maa ñi tsiti can tan cuanuhú ñi yuvehe ñi. Tan tatun tsa yaha cuaha quivi tsa tatsi ñi, tacan tan cuahán ñi cuanyehé ñi inga tsaha. Tsa tsaá ñi tsa caná tsi, tsa tsahnú tsi. Maa tyin ña tsitó ñi nácaa caná tsi tan tsahnú tsi, ²⁸ tyin juvin ñi maa ñuhu jacuahnú itsi. Tsa jihna ñi caná nuu tsi, yaha can tan quita yoco tsi. Tsa yaha quita yoco tsi, tacan tan tsahá tsi tsiti. ²⁹ Tan tatun tsa tsitsa tsiti tsi,

tacan tan jocón ñi itsi tyin tsa tahán maa tsi quivi coyo tsi —catyí ra Jesús.

Nu caahán ra Jesús tyin tumaa cuví tsiti mostaza, tacan cuví tsa ndacá ñaha Nyoo tsi yo

(Mt. 13.31-32; Lc. 13.18-19)

³⁰ Tan catyí tucu ra Jesús:

—¿Nacaa cuví tsa ndacá ñaha Nyoo tsi nyivi? ¿A cuví jandu inducu yo itsi tsihin náa tsihin? Cuví. ³¹ Tyin cuví tsi tumaa iin tsiti mostaza tsa tatsi nyivi. Tsiti can cuví tsa nyihí ca tan ñavin ca tandihi ca tsiti tsa iyó nu ñuhu ñayivi. ³² Maa tyin tsa yaha tatsi tsi, caná tsi tan ndunahnú tsi, tan cuví tsi yutun tumaa nducuaya. Ndunahnú soco tun, tan cuahán saa cua quitatu ti naha ti nuu tun.

Nu tsahá cuenda ra Jesús nacuenda jacuahá ra tsi nyivi tsihin cuhva ñi

(Mt. 13.34-35)

³³ Tacan jacuahá ra Jesús tsi nyivi, tsihin cuaha cuhva, ndihi cuhva cuví cutuñi iñi ñi. ³⁴ Tan tandihi tsaha tsa cahán ra tsihin ñi maa ñi maa tsihin cuhva cahán ra. Maa tyin cahán catsi ra tsihin ra tsicá tsihin ra.

Nu jacutaxín ra Jesús tatyí xaan nu miñi

(Mt. 8.23-27; Lc. 8.22-25)

³⁵ Tsa tseñi juvin ñi maa quivi can, catyí ra Jesús tsihin ra tsicá tsihin ra:

—Cohon ndo inga tsiyo miñi.

³⁶ Tacan tan ra Jesús tan ra tsicá tsihin ra nacoo ra naha tsi nyivi tan quihvi ra naha tsitsi yutun ndoo nu nyaá maa ra Jesús, tan cuahán ra naha. Tan cuanyicún tucu inga ca yutun ndoo nu yihí juhva nyivi tsi ra naha.

³⁷ Tan quitsahá yihí tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsahá cuñi cutu yutun ndoo can. ³⁸ Tan ra Jesús canyí ra quixí ra tsa yatyn xuu yutun ndoo can, tan nyanaá iin jahma jiñi ra. Jandotó ra naha tsi ra, tan catyí ra naha tsihin ra:

—¡Maestro! ¿a ña jahá un cuenda tyin cuñi nyee yo?

³⁹ Tacan tan nduvitá ra Jesús tan jacutaxín ra tatyí xaan can. Tan catyí ra tsihin ndutya:

—¡Taxin ñi!

Tan cutaxín tatyí can tan ndutya can. Tacan tan taxin cuii ñi cuví. ⁴⁰ Tacan tan catyí ra Jesús tsihin ra tsicá tsihin ra:

—¿Nacuenda yuuhví xaan ndo? ¿A ña tsinu iñi ndo? —catyí ra tsihin ra naha.

⁴¹ Maa tyin iyo xaan cuñi ra naha tsa nyehe ra naha tsa cuví. Tan tsicá tuhun tahan ra naha tan catyí ra naha:

—¿Yóo ra cuví ra ihya? Tyin nda cuenda tatyí tan ndutya tyaa yahvi tsi naha tsi tsi ra —catyí ra naha.

5

Nu caahán ra Jesús tyin ra caahán tuhun Nyoo cuví ra tumaa iin ra tatsi Nu nduvaha iin ra Gadara tsa yihí tatyí ña vaha

(Mt. 8.28-34; Lc. 8.26-39)

¹ Tsaq ra naha inga tsiyo miñi nda nu ñuhu cuenda Gadara. ² Tsa quitā ra Jesús tsitsi yutun ndoo, tan quitā iin ra yihí tatyí ña vaha nu ndaa cumi santu, tan tsaq ra nu nyaá ra. ³ Tan nu ndaa can iyó maa ra can. Tsaahñi ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñi ra. ⁴ Cuaha xaan tsaha tsahñi nyivi tsaha ra tan ndaha ra tsihin cadena, maa tyin tsaahnyá cuatyí ra can. Tan yohi maa cuví cunyeet tsi ra. ⁵ Tan tsicá nuu maa ra caná tsaq ra jiñi yucu tan nu ndaa cumi santu tsa tsa cuaa tan tsa tsinu cahñi. Tan jañicueehé ra tsi ra tsihin yuu. ⁶ Maa tyin ndi cañi ca quitā ra Jesús, tan nyehe ra can tsi ra, tan tsinú xaan ra tsahān ra, tsicuiñi tsiti ra nuu ra. ⁷ Tan canā tsaq ra tan catyí ra:

—¿Nacuenda tyihí un tsi un tsihin yuhu, yoocho Jesús, Sehe Nyoo, nyaá gloria? Tsihin sivi Nyoo caahán ndaahvi yu tsihin un, ña janyehe un tundoho tsi yu.

⁸ Tacan catyí nu tatyí ña vaha can tsihin ra Jesús tyin tsa yahā cahān ra tsihin nu tyehen:

—¡Yoocho tatyí ña vaha, jaña tsi ra ihya! —catyí ra.

⁹ Tan ra Jesús tsicā tuhun ra tsi nu, tan catyí ra:

—¿Náa nañi un?

Tan catyí nu tatyí ña vaha can tsihin ra:

—Yuhu nañi yu Legión, tyin cuaha xaan ndi.

¹⁰ Tan caahán ndaahvi nu tsihin ra Jesús na ña jacuhun cañi ra tsi nahnu. ¹¹ Yatyin ñi yucu can yucú cuaha quini tsatsi ti naha ti. ¹² Tacan tan catyí tandihí nahnu tsihin ra Jesús:

—Jacuhun tsi ndi tsitsi quini nyecú ican, tan cuhva ndatu tsa quihvi ndi tsitsi ti naha ti —catyí nahnu.

¹³ Tacan tan tsahā ra Jesús ndatu tsi nahnu, tan quihvi nahnu tsitsi quini can. Quitā nahnu tsi ra can tan quitā tumaa uvi mil quini yucú can. Tsa quihvi nahnu tsitsi ti naha ti, quitsahā tsinú ti naha ti, tan yahā ti naha ti yuhu xahva tan cucoyo ti naha ti tsitsi miñi, tan tsihi ti naha ti tsitsi ndutya.

¹⁴ Tacan tan ra jahá cuenda quini can naha ra, nayuhvi xaan ra naha tan tsinú xaan ra naha cuahán ra naha cuanuhú ra naha cuacatyí tuhun ra naha tsa cuví can tsihin nyivi ñuu can tan inga ca nyivi tsa taahán ra naha ityi cuhu. Tan tandihí nyivi tsa cahān ra naha tsihin, tsahān ñi tsinyehé ñi tsa cuví can. ¹⁵ Cuhva tsa tsaq ñi nu nyii ra Jesús, nayuhvi xaan ñi tsa nyehe ñi tsi ra tsa

yihí tatyí ña vaha can. Nyaá taxin ra, nditsí ra jahma, tan vaha cuñi ra. ¹⁶ Tan tandihí maa nyivi tsa nyehe tsa tahān ra can tan tsa tahān quini can, catyí tuhun ñi can tsihin inga ca nyivi. ¹⁷ Tacan tan quitsahā caahán ndaahvi ñi tsihin ra Jesús, na ña ndoo ra nu ñuhu ñi.

¹⁸ Tsa tsa cua quihvi nyico ra Jesús tsitsi yutun ndoo can, ra tsa yihí tatyí ña vaha can caahán ndaahvi ra tsihin ra Jesús na cuhva ra cuhun ra tsihin ra. ¹⁹ Maa tyin ña tsahā ra Jesús cuhun ra tsihin ra, tan catyí ra tsihin ra:

—Cuanuhu yuvehe un nu iyó nyivi un, tan catyí tuhun tsihin ñi tandihí tsa javahā Jutu Mañi yo Nyoo tsihin un, tan nácaa cundaahvi iñi ra tsi un.

²⁰ Tacan tan cuanuhú ra tan quitsahā catyí tuhun ra tsihin nyivi iyó tandihí ñuu tsa cayucú Decápolis tandihí tsa javahā ra Jesús tsihin ra. Tan iyo xaan cuñi ñi.

Nu nduvahā sehe ra Jairo tan ñaha tsa tñin jahma ra Jesús

(Mt. 9.18-26; Lc. 8.40-56)

²¹ Tsa tsaq ra Jesús tsihin yutun ndoo nda inga tsiyo miñi can, tsaq cuaha nyivi nu tsaq ra. Tan ndoo ra yuhu miñi ican. ²² Tacan tan tsaq iin ra nyisó tyiñu vehe ñuhu, nañi ra Jairo. Cuhva tsa nyehe ra tsi ra Jesús, tsicuiñi tsiti ra nuu ra. ²³ Tan caahán ndaahvi ra tsihin ra tan catyí ra:

—Cohon tsihin yu yuvehe yu tan tyiso ndaha un jiñi ñaha sehe yu, na nduvaha ña tyin tsa cuñi cúu cuiñi ña ñi.

²⁴ Tacan tan cuahán ra Jesús tsihin ra, tan cuaha xaan nyivi cuahán cuanyicún tsi ra, nda cuanda catyihí tahan ña maa ñi.

²⁵ Tsihin nyivi can cuahán ndihí iin ñaha cuuhvi. Naha ihya tsa quitā maa uvi cuiya ndohó ña cuehe tsa cuún niñi ña. ²⁶ Tan cuaha xaan tundoho nyehe ña tsihin tsa cuaha doctor. Tandihí xuhun ña janaq ña tsihin ra naha, maa tyin nduve maa náa catyí janaq ña xuhun ña tyin vihi ca nduñihí cuuhvi ña. ²⁷ Tsa tsiñi ña caahán nyivi tyin tsaq ra Jesús, natuhvā ña ityi tsata ra tan tñin ña jahma ra. ²⁸ Tyin tsicá iñi maa ña: “Tatun tñin yu vasu tan jahma ra, cua nduvaha yu”.

²⁹ Tsa tñin ña jahma ra iin yaha ñi cutaxin tsa cuún niñi ña. Tan tuví iñi cuñu ñuhu ña tyin tsa janduvahā ra tsi ña. ³⁰ Tsa tuví iñi ra Jesús tyin nduvahā iin nyivi tsihin tunyee iñi tsa iyó tsi ra. Tacan tan nanyico coo ra ityi tsata ra tan tsicā tuhun ra tan catyí ra:

—¿Yoo tñin jahma yu?

³¹ Tacan tan catyí ra tsicá tsihin ra:

—¿Nacuenda tsicá tuhun ca un: yoo tñin jahma un? tan nyehe vaha un tyin cuaha xaan nyivi nyicún tsi un tan tyañu xaan jahá ñi —catyí ra naha tsihin ra.

³² Maa tyin ra Jesús nanyehé ra naniñi ñi tyin cuñi ra coto ra yóo tñin jahma ra. ³³ Tacan tan ñaha can tsahan ña tsicuiñi tsiti ña nuu ra Jesús tyin tsitó vaha ña tyin tsa nduvahá ña. Yuuhvi ña tan nihi ña tsahan ña tsicatyí tuhun ña tandihi tsa nditsa tsihin ra. ³⁴ Tan catyí ra Jesús tsihin ña:

—Nduvahá un tyin tsinú iñi un. Na cuhun vaha un, tan na ña cuhvi ca un —catyí ra Jesús tsihin ña.

³⁵ Ndi caahán ca ra Jesús tan tsaa nyivi quee yuvehe nu cuahán ra, tan catyí ñi tsihin ra jatsii vehe can, ra nyisó tyiñu vehe ñuhu:

—Tsa tsihi ñaha luhlu sehe un. Ña cahan yuhu ca un tan ña jatyañu ca un tsi ra Mae-stro ihya —catyí ñi tsihin ra.

³⁶ Maa tyin ra Jesús ña tyaa yahvi ra tsa caahán ñi, tan catyí ra tsihin ra nyisó tyiñu vehe ñuhu:

—Ña nayuhvi un; tsinu iñi yoocho —catyí ra tsihin ra.

³⁷ Tan ña tsahá ra cuhun cuaha nyivi tsihin ra. Tan quihñ ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra. ³⁸ Tsa tsaa ra naha yuvehe ra nyisó tyiñu vehe ñuhu, nyehe ra Jesús tyin tsacú xaan nyivi tan caná tsaa ñi. ³⁹ Quihvi ra tsitsi vehe tan tsicá tuhun ra tsi ñi:

—¿Nacuvi tyin iyo xaan jacuvaá ndo, tan tsacú xaan ndo? Ñaha luhlu ihya quixi ña; ñavin tsihi ña —catyí ra tsihin ñi.

⁴⁰ Maa tyin ña tsinu iñi ñi tan tsacú naaha ñi nyehé ñi tsi ra. Tacan tan tava ra tsi tandihi ñi nuquehe, tan quihñ ra tsi jutu ñaha luhlu tsa tsihi can tan sihi ña tan ra tsa tsaa tsihin ra, tan quihvi tandihi ñi nu canyí ña. ⁴¹ Tan tñin ra ndaha ña, tan catyí ra tsihin ña:

—Talita cumi —tan cuñi tsi catyí tsi tye-hen: Catyí yu tsihin yoocho ñaha luhlu, jnduvita!

⁴² Juvín ñi cuhva can tan nduvitá ña, tan nacacá ña. Utsi uvi cuiya ña. Tan tsa nyehe nyivi tsa iyo tsa javahá ra Jesús, iyo xaan cuñi ñi cuvi. ⁴³ Maa tyin ra Jesús ñihi tsahá cuenda ra tsi ñi tyin na ña cahan ñi tsa nyehe ñi tsihin ndi intuhun maa nyivi. Tan tava tyiñu ra tsi sihi ña na cuhva ña tsa catsi ña.

6

Nu tsinuhu ra Jesús ñuu Nazaret nu tsahnura

(Mt. 13.53-58; Lc. 4.16-30)

¹ Tacan tan quita ra Jesús ican, tan cuanuhu ra nda ñuu ra. Tan ra tsicá tsihin ra cuahán ndihi ra naha tsihin ra. ² Tan tsa tahañ tsi quivi quitatú nyivi, tacan tan cuahán ra naha vehe ñuhu tan quitsahá jacuahá ra Jesús tsi nyivi. Tan cuaha ñi yucú

tyaa soho ñi tsa caahán ra. Iyo cuñi ñi tsa tsiñi ñi tsa caahán ra, tan catyí ñi:

—¿Numaa tahan cutuhva ra ihya tandihi tsa tsitó ra? ¿Yóo tsahá tsa tsiñi tuñi iñi ra? ¿Tan nácaa cutuhva ra javahá ra tsa iyo? ³ Tan ra tahvi yutun cuvi ra. Tan sehe ña María cuvi ra. Tan yañi ra cuvi ra Jacobo, ra José, ra Judas, tan ra Simón, tan ñiñaha cuhva ra iyo ñi nu iyo yo ihya —catyí ñi.

Tan ña cuñi ñi tyaa yahvi ñi tsi ra. ⁴ Maa tyin catyí ra tsihin ñi:

—Tandihí ñi ityi tan jahá tandihí nyivi tsa ñayivi tsi ra cuvi ndusu yuhu Nyoo, maa tyin nyivi ñuu ra, tan nyivi ra, tan nyivi vehe ra ña tyaa yahvi ñi tsi ra —catyí ra Jesús.

⁵ Tan tyiso ndaha ra jiñi juhva nyivi cuuhvi, tan janduvahá ra tsi ñi, maa tyin ña cuvi javahá ra inga ca tsa iyo. ⁶ Tan iyo cuñi ra tyin ña tsinú iñi ñi tsi ra. Tacan tan cuahán ra cuajacuahá ra tsi nyivi iyo tandihí ñi ñuu nyihi tsa cayucú yatyin ñi ñuu can.

Nu jacuhun ra Jesús tsi ra tsicá tsihin ra cucahan ra naha tuhun Nyoo

(Mt. 10.5-15; Lc. 9.1-6)

⁷ Tsa yahá yacan tan caná ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha tuhun Nyoo. Tacan tan quitsahá jacuhun ra uvi uvi ra naha. Tan tsahá ra ndatu tsi ra naha tsa tava ra naha tatyí ña vaha tsi nyivi. ⁸ Tan catyí ra tsihin ra naha tyin ña cundaha ra naha tsa cundaha ra naha; ndi marali, ndi tsa catsi ra naha, tan ndi xuhun. Nduve náa cundaha ra naha; maa tyin cuvi cundaha ra naha yutun ñi. ⁹ Tan cunyah nditsan tsaha ra naha. Tan ña cundaha ra naha inga nditsi jahma, na cuhun ra naha tsihin cuhva nditsi ñi maa ra naha. ¹⁰ Tan catyí ra tsihin ra naha:

—Cuhva tsa tsaa ndo iin ñuu, quihvi ndo iin vehe, tan ndo ndo ican nda cuanda quita ndo ñuu can. ¹¹ Tan tatun tsaa ndo iin ñuu tan ña naquihin cuenda nyivi iyo ñuu can tsi ndo, tan ña cuñi ñi tyaa soho ñi tsa cua cahan ndo, quita ndo ican tan naquisi ndo nyaca tsaha ndo tan yacan janaha tyin ndoo cuatyí ñi siqui ñi. Tsa nditsa catyí yu tsihin ndo, tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra —catyí ra Jesús tsihin ra naha.

¹² Tacan tan cuahán ra naha cuacahán ra naha tuhun Nyoo tsihin nyivi. Tan catyí ra naha tyin na ndu uvi iñi ñi cuatyí ñi, tan na nanducu ñi tsi Nyoo. ¹³ Tan cuaha ñi nyivi tava ra naha tatyí ña vaha. Tan tyihí ra naha acetye tsi nyivi cuuhvi tan nduvahá ñi.

Nu tsahá cuenda tsi nácaa tsihi ra Juan, ra jacoondutyá tsi nyivi

(Mt. 14.1-12; Lc. 9.7-9)

¹⁴ Ra rey Herodes tsitó ra tsa javahá ra Jesús tyin tandihi nyivi tan caahán ñi tsa javahá ra, tan tsicá ñi ra tyehen:

—Ra ihya cuví ra Juan, ra jacoondutyá tsi nyivi, ra tsa tsihi. Vityin nandoto ra. Juvín ra cuví can, yacan cuenda iyó tunyee ñi tsi ra—cuñí ra Herodes, tsicá ñi ra.

¹⁵ Yihí nyivi catyí ñi:

—Ra Elías, ra cuví ndusu yuhu Nyoo tahañ tsanaha, cuví ra.

Tan catyí tucu inga ñi:

—Ndusu yuhu Nyoo cuví ra, tumaa ra tsicoo tahañ tsanaha naha ra—catyí ñi.

¹⁶ Tsa tsiñi ra Herodes tandihi tsa caahán nyivi, tan catyí ra:

—Ra ihya cuví ra Juan tsa tava tyiñu yu tyahnya jucun. Vityin nandoto ra—catyí ra Herodes.

¹⁷ Tacan catyí ra tyin juvin ñi maa ra tava tyiñu na tyihí ra naha tsi ra Juan vehe caa tan cuhñi ra naha tsi ra tsihin carena. Tacan javahá ra Herodes tsihin ra Juan tsacatyí ña Herodías tsa cuví ñasihi ra Felipe yañi ra. Ra Herodes quihñ ra tsi ña Herodías tyin cuví ña ñasihi ra ¹⁸ Tan tsa tacan javahá ra, catyí ra Juan tsihin ra tyin ña vaha tsa quihñ ra tsi ña Herodías tyin ñasihi yañi ra cuví ña.

¹⁹ Yacan cuenda ndasi cuñí ña Herodías nyehé ña tsi ra Juan. Cuñí ña cahñi ña tsi ra, maa tyin ña cuví, ²⁰ tyin ña tsahá ra Herodes tyin tsitó ra tyin ra vaha cuví ra Juan tan cuñi iyó ra nuu Nyoo, tan yuuhví ra Herodes tsi ra. Yacan cuenda jahá cuenda vaha ra tsi ra. Vasu ndi maa ña cutuñi ñi ra Herodes tandihi tsa caahán ra Juan, maa tyin vaha cuñí ra tyaá soho ra tsa caahán ra. ²¹ Maa tyin tsa tahañ tsi quivi cacu ra Herodes javahá ra iin vico. Tan cana ra tsi ra cumí tyiñu naha ra, tan ra yihí ndaha andaru naha ra, tan nyivi cuca tsa iyó ityi Galilea. Quivi ihya tsican ña Herodías tsa cuñí ña tsi ra Herodes. ²² Tyin ñaha sehe ña tsahañ ña tsicuañi ña yaa nu iyó vico ra Herodes. Tan tahañ xaan ñi ra Herodes tan ra nyecú cuxiñi tsihin ra cuhva tsañi ña. Tacan tan catyí ra Herodes tsihin ña:

—Ndacan tsi yu náa cuñí maa un. Náa tahañ ñi maa tsi cua ndacan un tsi yu cua cuhva maa yu can tsi un. ²³ Tsitó maa Nyoo tyin cua cuhva yu tsa cua ndacan un. Tun ndacan un sava ñuhu tsa ndacá ñaha yu, cua cuhva yu can tsi un—catyí ra tsihin ña.

²⁴ Tacan tan quita ña, cuahán ña cuandacá tuhun ña tsi sihi ña tan catyí ña:

—¿Náa ndacan yu tsi ra?

Tan catyí sihi ña:

—Ndacan jiñi ra Juan, ra jacoondutyá tsi nyivi tsi ra—catyí ña.

²⁵ Tacan tan numi ñi quihvi nyico ñaha tyuvaa can nu nyii ra rey Herodes, tan catyí ña tsihin ra:

—Cuñí yu jiñi ra Juan, ra jacoondutyá tsi nyivi. Cahnya jucun ra tan tinyii un jiñi ra nuu iin coho, cuhva un tsi yu vityin vityin ñi—catyí ña tsihin ra.

²⁶ Tacan tan cuihya xaan cuñí ra rey can cuví. Maa tyin tsa cuenda tsa cahan ra tyin cua cuhva maa ra tsa cua ndacan ña, ña cuñí ra jandaví ñaha ra tsi ña tyin tandihi maa nyivi yucú vico can tan tsiñi ñi tsa cahan ra, yacan cuenda tsahá ra tsa tsican ña. ²⁷ Numi ñi tava tyiñu ra rey can tsi iin andaru na cuquihñ ra jiñi ra Juan. ²⁸ Tsahañ andaru can tsitsi vehe caa, tan tsahnya ra jucun ra Juan. Tan tsindacá ra jiñi ra Juan tsi ñaha tyuvaa can, nyii tsi nu iin coho. Tan nacuhva cuenda ña can tsi sihi ña.

²⁹ Tsa tsitó ra nyicún tsi ra Juan tsa cuví, tsahañ ra naha tsiquihñ ra naha cuñu ñuhu ra, tan tsicutsi ra naha can.

Nu jacatsi ra Jesús uhun mil rayñi

(Mt. 14.13-21; Lc. 9.10-17; Jn. 6.1-14)

³⁰ Tsa yaha yacan tan ndu iin ra tsicá tyiñu ra Jesús tsihin ra, tan catyí tuhun ra naha tsihin ra tandihi tsa javahá ra naha, tan tsa jacuahá ra naha nu tsahañ ra naha tsicahañ ra naha tuhun Nyoo tsihin nyivi. ³¹ Tan catyí ra Jesús tsihin ra naha:

—Cohon ndo iin nu taxin caa, quitatu yo luxu.

Tacan catyí ra tsihin ra naha tyin cuaha xaan nyivi cuahán tan vatsi, tan ndi ña cuyatyí ra naha catsi ra naha jahá ñi. ³² Tacan tan quihvi ra Jesús tsihin ra naha tsitsi iin yutun ndoo tan cuahán ra naha iin nu taxin caa. ³³ Maa tyin cuaha xaan nyivi nyehé ñi cuahán ra naha. Tan nacotó ñi tsi ra Jesús. Tacan tan cuahán ñi tsihin tsaha ñi, quita ñi tandihi ñi ñuu tan jihna ca ñi tsaa nu cua tsaa ra Jesús. ³⁴ Cuhva tsa tsaa ra naha, quita ra Jesús tsitsi yutun ndoo tan nyehé ra tyin cuaha xaan nyivi yucú ican. Tan cundaahvi ñi ra nyehé ra tsi ñi, tyin yucú ñi tumaa tsiyucú mbee tun nduve ra jahá cuenda tsi ti naha ti. Tacan tan quitsahá jacuahá ra cuaha xaan tuhun vaha tsi ñi. ³⁵ Tsa tsa cua cuiso ñicanyii, tan natuhva ra tsicá tsihin ra Jesús xiin ra tan catyí ra naha tsihin ra:

—Tsa cueñi xaan, tan nduve nyivi iyó yatyin ñi ihya. ³⁶ Vaha ca jacunuho un tsi nyivi tyin ihya nduve tsa catsi ñi. Tan na cujata ñi paan catsi ñi vehe tsa iyó tsitsi cuhu ihya tan ñuu tsa cayucú yatyin ñi—catyí ra naha tsihin ra.

³⁷ Maa tyin nacahan ra Jesús, tan catyí ra:

—Cuhva nyoocho tsa catsi ñi.

Tacan tan nacahan ra naha tan catyí ra naha:

—Vasu ndi maa jaha tyiñu ndi iñu yoo, ña cua ñihi ndi xuhun jata ndi paan catsi tandihi nyivi ihya.

³⁸ Tan catyí ra Jesús tsihin ra naha:

—Nyehe jihna ndo najava paan ndahá ndo —catyí ra.

Cuhva tsa tsitö ra naha najava paan ndahá ra naha, tacan tan tsicahān ra naha tsihin ra tan catyí ra naha:

—Ndahá ndi uhun taahan ñi paan tan uvi taahan ñi tyaca.

³⁹ Tacan tan catyí ra tsihin nyivi na cun-yecu ñi nu cuhu can. ⁴⁰ Tan tsinyecu cuenda cientu tan cuenda uvi xico utsi ñi tsa iin cuhva tsinyecu ñi. ⁴¹ Tacan tan quihñ ra Jesús tsa uhun paan can tan nduvi tyaca can. Tan nanyehē ndaa ra ityi siquí, tan nacuhvā ra tyahvi nyoo tsi Nyoo, tsa yahā tan tsahnū cuatyí ra paan can, tan tsahā ra can tsi ra tsicá tsihin ra tyin tsatsa ra naha can tsi nyivi. Tsa ndihí tsatsā ra naha paan can, tan tsatsā ndihí ra naha tyaca. ⁴² Tsatsi tandihí ñi tan ndahā iñi ñi. ⁴³ Tan jacutū ra naha utsi uvi tyica tsihin paan tan tyaca tsa ndog. ⁴⁴ Tan uhun mil rayñ tsatsi paan can.

Nu tsicá ra Jesús nu ndutya

(Mt. 14.22-27; Jn. 6.16-21)

⁴⁵ Tacan tan catyí ra Jesús tsihin ra tsicá tsihin ra na yaha sava ñi ra naha nu miñi can tan cuhun cuee ñi ra naha nda ñuu Betsaida tsitsi tsa ndi jacunuhu ra tsi nyivi yuvehe ñi. ⁴⁶ Tsa yahā cuanuhu nyivi, tacan tan cuahán ra Jesús cuandacán tahvi ra tsi Nyoo iin jiñi yucu. ⁴⁷ Tsa tsa cuñi cuaa, yutun ndoo nu cuahán ra tsicá tsihin ra Jesús tsa cuahán can nda mahñu miñi, tan maa ra ndi nyii ra yuhu miñi can. ⁴⁸ Tan tsa nyehe ra tyin ña cuví jacacá vaha ra naha yutun ndoo jahá tatyí, tacan tan cuahán tsihin tsaha ra nu ndutya nu cuahán ra naha tsa tsa cuñi tuvi, nyicún tsicá nyicún tsicá ñi ra tsi ra naha. Tan tsa cua yaha tsiyo ra nu cuahán ra naha. ⁴⁹ Maa tyin tsa nyehe ra naha tsicá ra nu ndutya, tsicā iñi ra naha tyin tatyí cuví ra, tacan tan quitsahā caná tsaa ra naha ⁵⁰ tyin tandihí ra naha nyehe ra naha tsi ra tan nayuhví ra naha. Maa tyin nacahān ra tan catyí ra tsihin ra naha:

—iÑa nayuhvi ndo tyin maa yu cuví!

⁵¹ Tacan tan quihví ra tsitsi yutun ndoo nu yucú ra naha, tan tsa yahā quihví ra, iin yaha ñi cutaxñ tatyí can. Tan iyo xaan cuñi ra naha cuví ⁵² tyin ñaha ca cutuñi iñi ra naha tsa iyo tsa javahā ra tsihin paan, tyin ndi ndava añima ra naha.

Nu janduvahā ra Jesús nyivi cuuhví tsa iyo nduhva tsa nañi Genesaret

(Mt. 14.34-36)

⁵³ Yahā sava ra naha nu miñi can tan tsaa ra naha Genesaret inga tsiyo yuhu miñi can, tan tsahñi ra naha yutun ndoo can yatyin ñi yuhu ndutya. ⁵⁴ Cuhva tsa quitā ñi ra naha tsitsi yutun ndoo can, tan nacotö nyivi tsi ra Jesús. ⁵⁵ Tacan tan tsinú xaan ñi cuahán ñi cuajacotó ñi tsi nyivi iyó naniñ cahnu ityi

can tyin tsaa ra Jesús. Tan tsaa cuaha nyivi quee tandihí ñi ñuu nu nyii ra, tan yucú nyivi cuuhví nu tsitö tsaa tsihin ñi. ⁵⁶ Tan tandihí ñi ityi nu cuahán ra tsitsi ñuu nyihí o tsitsi ñuu nahnu, o tsitsi cuhu, tsaquín nyivi nyivi cuuhví yuhu ityi. Tan caahán ndaahvi ñi tsihin ra na cuhva ra tññ ñi cuuhví can vasu tan yuhu jahma ra tan nduvaha ñi. Tan tandihí maa nyivi tsa tññ jahma ra nduvahā ñi.

7

Tsa jativí tsi nyivi nu Nyoo
(Mt. 15.1-20)

¹ Tacan tan tsaa juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyii ra Jesús. ² Ra ihya naha ra nyehe ra naha tyin juhva ra tsicá tsihin ra Jesús ña nacatyā ra naha ndaha ra naha tan tsatsí ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahā ra can naha ra. ³ Tyin ra fariseo naha ra javahā ra naha tumaa catyí costumbre tsii tsaahnu ra naha tacan tucu ñi tandihí ca nyivi Israel ña cuví catsi ñi tun ña nacatyā ñi ndaha ñi cuaha tsaha tumaa iyó maa ñi. ⁴ Tan tatun ña nacatyā ñi ndaha ñi tsa tsaa ñi quee ñi nuyahvi, ña cuví catsi ñi. Iyó cuaha ca costumbre tsa tuhvā ñi javahā tumaa tsa nacatyā ñi vasu, jarra, tan tandihí ndaha tyiñu tsa tsinú tsihin caa tsa iyó tsi ñi tan nda cuanda cama ñi. ⁵ Tacan tan tsicā tuhun ra fariseo tan ra maestro cuenda ley naha ra tsi ra Jesús, tan catyí ra naha:

—iNacuenda tyin ña javahā ra tsicá tsihin un naha ra cuhva nacoq tsii tsaahnu yo naha ra? Tyin ña nacatyā jihna ra naha ndaha ra naha tumaa iyó maa yo tan tsatsí ra naha —catyí ra naha tsihin ra.

⁶ Tan nacahān ra Jesús, tan catyí ra:

—Nditsa tsa cahān ra Isaías, ra cuví ndusu yuhu Nyoo tuhun nyoocho tsa jahá ndo tyin vaha xaan ndo tan ña nditsa ndo. Tyin catyí ra tyehen:

Nyivi ihya jacahnú ñi tsi yu tsihin yuhu ñi. Maa tyin ñavin tsihin tsa nñi iñi añima ñi.

⁷ Yacan cuenda nduve yahvi nyaá jacahnú ñi tsi yu,

tyin maa ñi maa tuhun caahán nyivi jacuahá ñi tan ñavin tuhun yu jacuahá ñi, catyí ra Isaías tuhun ndo jahā Nyoo, catyí ra Jesús tsihin ra naha.

⁸ Tyin nyoocho nacoq ndo cuhva caahán Nyoo, tan nyicún ndo cuhva caahán nyivi ñi, tumaa tuhvā ndo nacatyā ndaha tyiñu ndo, tan inga ca tsa tuhvā ndo javahā. ⁹ Nyoocho tyaa tsiyo ndo tuhun caahán Nyoo, tacan tan javahā ndo tuhun tsahnu tsa nacoq tsii tsaahnu ndo. ¹⁰ Tyin catyí ley Nyoo tsa tyaa ra Moisés: “Tyaa yahvi ndo tsi jutu ndo tan tsi sihi ndo, tyin tandihí nyivi tsa cua cahān

ndavaha ñi tsi jutu o tsi sihi, cua cúu ñi” catyí ley Nyoo tsa tyaa ra Moisés. ¹¹ Maa tyin nyooho catyí ndo tyin cuví catyí iin nyívi tsihin jutu ñi o sihi ñi tyehen: “Ña cuví jatyinyee yu tsi un tyin tandihí tsa iyó tsi yu cuví tsi Corbán.” (Tuhun ihya cuñí tsi catyí: “Tsa ndihí can tsahá cuenda yu tsi Nyoo.”) ¹² Tan tatun catyí nyívi tacan, ña cuñí ca tsi jatyinyee ñi tsi jutu ñi o tsi sihi ñi, catyí ndo. ¹³ Yacan cuví tsa javahá ndo vityin, tyaa tsiyo ndo tuhun caahán Nyoo, tsahan tyaa yahvi ca ndo tuhun tsahnu cuhva iyó maa ndo. Tan cuaha ca tsa tacan caá javahá ndo —catyí ra Jesús.

¹⁴ Tacan tan cana nyico ra Jesús tsi nyívi tan catyí ra tsihin ñi:

—Tyaa soho vaha tandihí ndo tsa cua cahan yu, tan nducu ndo cuhva cutuñi iñi ndo.

¹⁵ Tsa quihví yuhu nyívi, ña cuví jatívi tsi tsi ñi. Tsa jatívi tsi ñi cuví tsa quitá añima ñi.

¹⁶ Nyooho tsa iyó soho, tyaa soho ndo tsa caahán yu —catyí ra Jesús tsihin ñi.

¹⁷ Tsa yahá nacoo ra Jesús tsi nyívi, tan quihví ra tsitsi vehe, tacan tan tsicá tuhun ra tsicá tsihin ra náa cuñí tsi catyí tsa cahan ra. ¹⁸ Tan catyí ra tsihin ra naha:

—¿A ndi nyooho tan ña cutuñi iñi ndo? ¿A ña tsitó ndo tyin tsa quihví tsitsi yo ña cuví jatívi tsi tsi yo? ¹⁹ Tyin tsitsi yo quihví tsi tan ñavin añima yo. Yaha can tan quitá tsi tsitsi cuñi ñuhu yo —catyí ra Jesús.

Tsihin tsehe janaha ra tyin tandihí nyayu tan vaha catsi yo itsi. ²⁰ Tan catyí tucu ra:

—Tsa quitá añima nyívi, yacan jatívi tsi ñi. ²¹ Tyin tsa caquiñi tsa tsicá iñi ñi tsitsi añima ñi quitá can, tacan tan rayi cuñi ra coo inga ñaha tsi ra, o ñiñaha cuñi ñi coo inga rayi tsi ñi. Yihí ra tsicoó ra tsihin inga ñaha tan ña tindaha ra tsihin ña. Yihí rayi tsicoó ra tsihin ra ndusihi. Tan yihí ñiñaha tsicoó ñi tsihin ñi nduyi. Tan yihí ñi cuñi ñi cahñi ñi nyívi, ²² o cuñi ñi suhu ñi. Yihí ñi cuñi ñi coo tsa tsii inga nyívi tsi ñi; yihí ñi javahá ñi tsa caquiñi; yihí ñi jandaví ñaha ñi; yihí ñi iyó inga viciu tsi ñi; yihí ñi nyiyo iñi ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi. ²³ Tandihí tsa ña vaha ihya, quitá can tsitsi añima nyívi, tan jatívi can tsi ñi —catyí ra Jesús tsihin ra naha.

Nu tsiny iñi iin ñaha inga ñuu tsi ra Jesús (Mt. 15.21-28)

²⁴ Tsa yahá yacan tan quitá ra Jesús ñuu can, tan cuahán ra ñuhu nu canyíi ñuu Tiro tan ñuu Sidón. Tsa tsaa ra ican, quihví xeehe ra tsitsi iin vehe tyin ña cuñi ra coto nyívi numaa nyíi ra. Maa tyin ña cuví cunyíi xeehe ra ²⁵ tyin yatyi xaan tsitó sihi iin ñaha tyuvaa tsa yihí tatyí ña vaha nu nyíi ra.

Tacan tan cuahán ña nu nyíi ra. Tsa tsaa ña tan tsicuiñi tsiti ña nuu ra. ²⁶ Ñaha can, ñavin ñaha Israel cuví ña, tyin ñaha ñuu Sirofenicia cuví ña. Tsa ña nu nyíi ra Jesús tan caahán ndaahvi ña tsihin ra tyin na tava ra tatyí ña vaha yihí tsi sehe ña. ²⁷ Maa tyin catyí ra Jesús tsihin ña:

—Ña cahan yuhu ca un; na catsi jinha nyívi Israel, ñi cuví sehe Nyoo, tyin ña vaha quihín nyaa yo paan yuhu sehe yo tan cuhva yo itsi catsi ina —catyí ra Jesús tsihin ña.

²⁸ Tan nacahan ña tan catyí ña:

—Nditsa, Jutu Mañi yu, maa tyin nda cuanda ina cuví ndatú ti tan tsatsi ti titsehe tsa cucoyó xuu mesa jahá sehe tsitoho ti —catyí ña tsihin ra.

²⁹ Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yahá quitá tatyí ña vaha tsi sehe un. Cuanuhu vityin —catyí ra tsihin ña.

³⁰ Tan cuhva tsa tsaa ña yuvehe ña, canyíi taxin sehe ña nu cama, tyin tsa yahá quitá tatyí ña vaha tsi ña.

Nu janduvahá ra Jesús tsi ra soho tan ñihi

³¹ Quitá nyico ra Jesús ñuhu nu canyíi ñuu Tiro, tan yahá ra ñuu Sidón, tan cuahán ra inga ca ñuu tsa cayucú Decápolis. Yahá ra ican tan tsaa ra miñi Galilea. ³² Tsa tsaa ra Jesús ican, tsahan nyívi tsindaca ñi iin ra soho tsa ña cuví cahan nu nyíi ra. Cahan ndaahvi ñi tsihin ra na tyiso ra ndaha ra jiñi ra can. ³³ Tacan tan quihín ra tsi ra can cuahán tsiyo tsihin ra nu nduve nyívi. Tan tyaxín ra nundaha ra tsitsi soho ra can, tan tiví sii ra, tan tiñ ra nu yaa ra can. ³⁴ Tacan tan nanyehé ndaa ra ityi andivi. Tan ixtá tatyí ra, tan catyí ra:

—¡Efata! —tan tuhun ihya cuñi tsi catyí: ¡Nuñal!

³⁵ Tan tsihin can nuñá soho ra can, tan nduvahá yaa ra, tan cuví nacahan ra. ³⁶ Tan catyí ra Jesús tsihin ñi tyin ña cahan ñi can tsihin nyívi, maa tyin vasu ndi maa caahán ra tacan tsihin ñi, cuñihí ca ñi caahán ñi tsa javahá ra. ³⁷ Iyo cuñi ñi tan catyí ñi:

—Tandihí tsa javahá ra tan vaha javahá ra itsi. Nyívi soho nacuñi ñi jahá ra tan nyívi ñihi nacahan ñi.

8

Nu tsahá ra Jesús tsa catsi cumi mil nyívi (Mt. 15.32-39)

¹ Quívi can nataca cuaha nyico nyívi nu nyíi ra Jesús. Tan nduve maa tsa catsi ñi iyó. Tacan tan cana ra Jesús tsi ra tsicá tsihin ra, tan catyí ra tsihin ra naha:

² —Ndaahvi xaan cuñi yu nyehé yu nyívi ihya, tyin tsa uñi quívi yucú ñi tsihin yo, tan

nduve ca tsa catsi ñi. ³ Tyin tun jacuhun yu tsi ñi yuvehe ñi tsa ndi cumañi ca catsi ñi, cua cūu naaha ñi ityi cuhun ñi, tyin yihí ñi cañi xaan quee ñi —catyí ra Jesús tsihin ra naha.

⁴ Tan nacahan ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyivi ihya, tan nduve nyivi iyó ihya tan xico ñi tsa catsi yo?

⁵ Tan tsicá tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Utsa taahan ñi.

⁶ Tacan tan catyí ra tsihin nyivi na cun-yecu ñi nu ñuhu. Tsa yaha cahān ra yacan, tacan tan quihñ ra tsa utsa paan can, tan nacuhva ra tyahvi nyoo tsi Nyoo tsa cuenda can. Tsahan tsahnū cuatyí ra can tan tsaha ra can tsi ra tsicá tsihin ra, tyin tsatsa ra naha can tsi nyivi. ⁷ Tan ndahá tucu ra naha juhva tyaca nyihi. Tsahā ndihi ra Jesús tyahvi nyoo tsi Nyoo tsa cuenda can, tacan tan tsahā ra can tsi ra naha tyin tsatsa ra naha tsi nyivi. ⁸ Tandihí ñi tsatsj ñi, tan ndahā vaha iñi ñi. Tsa ndihj tsatsj ñi tan jacutu ra naha utsa tyica tsihin tsa ndoo. ⁹ Tan quita maa cumi mil nyivi jacatsj ra. Yahā can tan jacunuhū ra tsi ñi. ¹⁰ Tsa yaha cuanuhu ñi, tacan tan quihvi ra tsihin ra tsicá tsihin ra tsitsi iin yutun ndoo. Tan cuahān ra naha ityi Dalmanuta.

Nu tsicán ra fariseo naha ra tsi ra Jesús tyin javaha ra iin tsa iyo

(Mt. 16.1-4; Lc. 12.54-56)

¹¹ Tsaā ra fariseo naha ra nu nyii ra Jesús, tan quitsahā caahān yuhu tahan ra naha tsihin ra. Nducú cuhva ra naha tsi ra tun nditsa tyin Nyoo jaquitsj tsi ra, yacan cuenda catyí ra naha tsihin ra tyin javaha ra iin tsa iyo nyehe ra naha. ¹² Tacan tan ra Jesús ñihi xaan ixtā tatyí ra, tan catyí ra:

—¿Nacuenda tyin tsicán nyivi iyó vityin tsa iyo? Tsa nditsa catyí yu tsihin ndo tyin ña cua nyehe ndo ndi intuhun tsa iyo —catyí ra tsihin ra naha.

¹³ Tacan tan nacoq ra tsi ra naha, tan quihvi nyico ra tsitsi yutun ndoo tan cuahān ra inga tsiyo miñi.

Nu catyí ra Jesús tyin tsa jacuahá ra fariseo naha ra cuví can tumaa yutsan iya

(Mt. 16.5-12)

¹⁴ Ra tsicá tsihin ra Jesús naq iñi ra naha cundaha ra naha tsa catsi ra naha. Tan intuhun ñi paan ndahā ra naha yucú ra naha tsitsi yutun ndoo can. ¹⁵ Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo naha ra tan ra Herodes —catyí ra tsihin ra naha.

¹⁶ Tan ra tsicá tsihin ra quitsahā natuhñn tahan ra naha tan catyí ra naha:

—Caahān ra tyehen tsihin yo tyin nduve paan ndahá yo catsi yo —catyí ra naha.

¹⁷ Tsa tuvj iñi ra Jesús tsa tsicá iñi ra naha, tan catyí ra tsihin ra naha:

—¿Nacuenda tsicá xaan iñi ndo tyin nduve tsa catsi ndo ndahá ndo? ¿A ñaha ca cutuñi iñi ndo? ¿A ñaha ca coto ndo? ¿Nacuenda ndi ndava xaan añima ndo? ¹⁸ Nyecú tinuu ndo, tan ña nyehé ndo. Nyecú soho ndo, tan ña tsiñi ndo. ¿A ña nducuhñn iñi ndo tsa javahā yu ¹⁹ quivi tsa jacatsj yu uhun mil rayñ tsihin uhun taahan ñi paan? ¿A ña ñuhú iñi ndo najava tyica jacutu ndo tsihin tsa ndoq? —catyí ra Jesús, tsicā tuhun ra tsi ra tsicá tsihin ra.

Nacahan ra naha tan catyí ra naha:

—Utsi uvi tyica.

²⁰ Tan catyí nyico ra Jesús tsihin ra naha:

—Tan quivi jacatsj yu cumi mil nyivi tsihin utsa taahan ñi paan, ¿najava tyica jacutu ndo tsihin tsa ndoo?

Nacahan ra naha tan catyí ra naha:

—Utsa taahan tyica.

²¹ Tacan tan catyí ra Jesús tsihin ra naha:

—¿A ñaha ca cutuñi iñi ndo? —catyí ra tsihin ra naha.

Nu janduvahā ra Jesús iin ra cuaa nda ñuu Betsaida

²² Tsa yaha yacan tan cuahān ra Jesús tsihin ra tsicá tsihin ra nda ñuu Betsaida. Tsa tsaā ra naha ican, tsindacā nyivi ñuu can iin ra cuaa nu yucú ra naha. Tan cahān ndaahvi ñi tsihin ra Jesús tyin tiñ ra tsi ra cuaa can tan janduvaha ra tsi ra. ²³ Tacan tan tiñ ra ndaha ra cuaa can, tan quihñ ra tsi ra cuahān tsihin ra ityi tsata ñuu. Tyaañ sñ ra nu ndaha ra tan tiñ ra tinuu ra can, tan tyiso ra ndaha ra soco ra can, tan tsicā tuhun ra tsi ra tun nditsin nyehé ra luxu. ²⁴ Ra cuaa can nanyehē ra tan catyí ra:

—Nyehe yu juhva nyivi, tan caā ñi tumaa caā yutun, maa tyin tsicá ñi —catyí ra.

²⁵ Tacan tan tiñ nyico ra Jesús tinuu ra inga tsaha, tan nanyehē vaha ra tan nduvahā ra. Nanyehē catsi vaha ra tandihí tsa iyo. ²⁶ Tacan tan jacunuhū ra Jesús tsi ra yuvehe ra, tan catyí ra tsihin ra:

—Ña quihvi un tsitsi ñuu ihya tan ña nācatyí tuhun tsehe tsihin nyivi —catyí ra Jesús tsihin ra.

Nu cahān ra Pedro tyin ra Jesús cuví Cristo, ra jacacú tsi yo

(Mt. 16.13-20; Lc. 9.18-21)

²⁷ Yahā can tan cuahān ra Jesús tsihin ra tsicá tsihin ra ñuu tsa cayucú yatyin ñi ñuu Cesarea tsa javahā ra Felipe. Tsitsi tsa cuahān ra naha, tan tsicā tuhun ra Jesús tsi ra naha, tan catyí ra:

—¿Náa caahán nyívi tuhun yu? ¿Yóo ra cuví yu catyí ñi? —catyí ra tsihin ra naha.

²⁸ Nacahan ra naha tan catyí ra naha:

—Yihí nyívi catyí ñi tyin ra Juan, ra ja-coondutya tsi nyívi, cuví un. Inga ñi catyí ñi tyin ra Elías. Yihí ñi catyí tucu ñi tyin inga ra cuví ndusu yuhu Nyoo cuví un —catyí ra naha tsihin ra.

²⁹ Tacan tan tsicá tuhun ra tsi maa ra naha, tan catyí ra:

—Tan nyooho, ¿yóo ra cuví yu, cuñi ndo?

Tan nacahan ra Pedro tsihin ra:

—Yooho cuví ra Cristo, ra jacacú tsi nyívi.

³⁰ Maa tyin cahan ra Jesús tsihin tandihí ra naha tyin ña cahan ra naha can tsihin ndi intuhun maa nyívi.

Nu cahan ra Jesús tyin cua cúu ra

(Mt. 16.21-28; Lc. 9.22-27)

³¹ Tacan tan quitsahá jacuahá ra tyin Rayii tsa quee nda gloria cua nyehe xaan ra tundoho. Tan ña cua tsinu iñi ra mandohí naha ra tan ra jutu cuví ityí nuu tsihin ra jutu naha ra tsi ra tan ndi ra maestro cuenda ley vehe ñuhu naha ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cahñi nyívi tsi ra maa tyin cua nandoto ra tsa tsinu uñi quívi. ³² Tacan cahan catsi ra tsihin ra naha. Tacan tan quihin ra Pedro tsi ra cuahán tsihin ra tsata vehe tan quitsahá caahán ra tsihin ra Jesús tyin ña vaha tsa cahan ra. ³³ Maa tyin ra Jesús nanyico coo ra, tan nanyehé ra nu nyecú inga ra tsicá tsihin ra. Tan quitsahá caahán ra tsihin ra Pedro, tan catyí ra:

—¡Cuatsiyo nuu yu ihya, cuihna! Tyin yooho ña tsicá iñi un tumaa tsicá iñi Nyoo, tyin tsicá iñi un tumaa tsicá iñi nyívi —catyí ra Jesús tsihin ra Pedro.

³⁴ Tacan tan cana ra Jesús tsi nyívi tan tsi ra tsicá tsihin ra tan catyí ra:

—Tatun ndáa nyooho cuñi cunyicun tsi yu, cahnaya iñi ndo nacoo ndo tsa cuñi maa ndo javaha ndo, tyin tacan tan cuví javaha ndo cuhva cuñi Nyoo. Tan ña cua ndu uvi iñi ndo tsa yihí ndo cuenda yu, vasu ndi maa tandihí quívi nyehé ndo tundoho tsa cuenda yu. Tyin yacan cuví cruu tsa taahán tsi cuiso ndo tun cunyicun ndo tsi yu. ³⁵ Tyin nyooho tsa ña cuñi nyehe tundoho tan cuhva ndo ñayívi ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayívi tsa cuenda yu tan tsa cuenda tuhun Nyoo, cua cacu ndo. ³⁶ Tyin nduve yahvi nyaá cua ñihí ndo tandihí tsa iyó nu ñuhu ñayívi ihya tun ña cua cacu añima ndo.

³⁷ Tyin nduve maa náa tsihin tyahvi ndo tan cuví cacu añima ndo tan ña cunaa tsi. ³⁸ Tyin nyívi cua nducahan nuu tsa cuenda yu tan tsa cuenda tuhun caahán yu quívi cahan ñi tsihin nyívi caquihí tsa ña tyáa yahvi tuhun

Nyoo, yuhu Rayii tsa quee nda gloria cua nducahan nuu yu nyehe yu tsi ñi quívi quitsi yu tsihin ángel cuenda Nyoo Jutu yu tan tsihin tsa sñi caá ra.

9

¹ Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nácaa ndacá ñaha Nyoo tsihin tunyee iñi ra tsa ndi cumañi ca cúu ndo.

Nu nyehe uñi ra tsicá tsihin ra Jesús nu nasamq cuhva caá ra

(Mt. 17.1-13; Lc. 9.28-36)

² Tsa yaha iñu quívi, tacan tan quihin ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasamq cuhva caá ra tan nyehe ra yucú tsihin ra can. ³ Xiñu xaan tan cuitsin xaan jahma ra cuví tumaa cuitsin vico. Ndi intuhun maa nyívi iyó nu ñuhu ñayívi ihya tan ña cuví janducuitsin ñi jahma tumaa cuitsin jahma ra. ⁴ Tan nyehe ra naha tyin nyaá ra Elías tan ra Moisés tsihin ra, natuhún ra naha tsihin ra. ⁵ Tacan tan catyí ra Pedro tsihin ra Jesús:

—Maestro, ¡vaha xaan tyin yucú ndi ihya! Cua javaha ndi uñi taahan tyahva; iin tsa cuenda un, iin tsa cuenda ra Moisés, tan iin tsa cuenda ra Elías —catyí ra Pedro. ⁶ Cahan ra tacan tyin ña tsitó ra náa cahan ra tyin maa ra tan ra yucú tsihin ra nayuhvi xaan ra naha.

⁷ Tacan tan nuu iin vico siquí ra naha tan tyasi tsi tsi ra naha. Tan tsitsi vico can nacahan iin ndusu tan catyí tsi:

—Ra ihya cuví Sehe yu, tan cuñi xaan yu tsi ra. Tyáa yahvi ndo tsa caahán ra —catyí ndusu can.

⁸ Tan cuhva tsa nanyehé ra naha, nduve ca ra Elías tan ra Moisés nyaá, intuhun ña maa ra Jesús nyaá.

⁹ Tan cuhva tsa vatsí nuu ra naha yucu can, catyí ra Jesús tsihin ra naha tyin ña cahan naha ra naha tsa nyehe ra naha. Cuví cahan maa ra naha can nda yaha nandoto Rayii quee nda gloria, tan rayii can cuví maa ra. ¹⁰ Yacan cuenda ña cahan maa ra naha tuhun can, tan natuhún tahan ra naha náa cuñi tsi catyí tuhun tsa cua nandoto ra. ¹¹ Tacan tan tsicá tuhun ra naha tsi ra Jesús tan catyí ra naha:

—¿Nacuenda tyin catyí ra cuví maestro cuenda ley vehe ñuhu naha ra tyin jhna ca ra Elías taahán tsi quitsi nu ñuhu ñayívi ihya inga tsaha?

¹² Tan nacahan ra, tan catyí ra:

—Nditsa tyin jhna ca ra Elías taahán tsi quitsi tsa ndi cumañi ca quitsi yuhu tyin janduvaha ra tandihí. ¿Tan náa catyí tuhun Nyoo cuenda yuhu Rayii quee nda gloria? Catyí tsi tyin cua nyehe yu tundoho, tan ña

cua cuñi nyivi nyehe ñi tsi yu. ¹³ Maa tyin yuhu catyí yu tsihin ndo tyin tsa yaha quítsi ra Elías. Tan nyivi javaha ñi tsihin ra cuhva cuñi maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

Nu janduvahā ra Jesús iin ra tyuvaa tsa yihí tatyí ña vaha

(Mt. 17.14-21; Lc. 9.37-43)

¹⁴ Tsa yaha yacan tan cuahán ra naha nu yucú tandihí ca ra tsicá tsihin ra naha. Tsa tsaā ra naha ican, nyehe ra naha tyin yucú cuaha nyivi nanii canduvi. Tan yucú tucu ra maestro cuenda ley vehe ñuhu naha ra, tan caahán yuhu tahan ra naha tsihin ra tsicá tsihin ra Jesús. ¹⁵ Tsa nyehe nyivi can tsi ra Jesús, iyo xaan cuñi tandihí ñi cuví. Tacan tan tsahan ñi nu nyaá ra tsicuhvá ñi nacumi tsi ra. ¹⁶ Tacan tan tsicā tuhun ra tsi ñi tan catyí ra:

—¿Nacuenda caahán yuhu tahan ndo? —catyí ra.

¹⁷ Tacan tan nacahan iin ra tsa nyaá tyañu tandihí nyivi can, tan catyí ra:

—Maestro, vatsí yu vatsí ndacá yu sehe yu tsi un tyin yihí tatyí ña vaha tsi ra tan nduñihí ra jahā nu. ¹⁸ Tyin tandihí ñi nu tiín tatyí can tsi ra, janduvá nu tsi ra, tan quita tiñuu yuhu ra, tan jacahyú ra nuhu ra, tan janduyutún nu tsi ra. Tsa yaha cahan yu tsihin ra tsicá tsihin un naha ra tyin tava ra naha tatyí ña vaha can, maa tyin ña cuví tava ra naha tsi nu —catyí ra can tsihin ra Jesús.

¹⁹ Nacahan ra Jesús tan catyí ra:

—¡Nyooho nyivi ña tsinú iñi tan caquiñi! ¿Ndáa nda quivi cua cunyí yu tsihin ndo? ¿Tan najava ca quivi cua cunyeey iñi yu nyehe yu tsi ndo tyin ña tsinú vaha iñi ndo tsi yu? Ndāca ndo tsi ra luhlu can tsi yu ihya —catyí ra.

²⁰ Tacan tan tsindacā jutu ra luhlu can tsi ra tsi ra Jesús. Tan cuhva tsa nyehe nu tatyí ña vaha can tsi ra Jesús, janduvá nu tsi ra luhlu can tan quitsahā tsicó tui ra nu ñuhu jahā nu. Tan quita tiñuu yuhu ra. ²¹ Tacan tan tsicā tuhun ra Jesús tsi jutu ra luhlu can tan catyí ra:

—¿Ama quitsahā taahán ra tyehen?

Tan nacahan jutu ra luhlu can, tan catyí ra:

—Nda ndi luhlu xaan ra. ²² Tan cuaha tsaha tyihí tatyí ña vaha can tsi ra nu cayú ñuhu, tan nu ndutyi. Cuñi nu cahñi nu tsi ra. Maa tyin tun cuví javaha un náa javaha un tsihin ra, cundaahvi iñi tsi ndi, tan jatyinyee tsi ndi —catyí jutu ra luhlu can tsihin ra Jesús.

²³ Tan catyí ra Jesús tsihin ra:

—Tun tsinú iñi un, tandihí tan cua cuví tyin tsa cuenda ra tsa tsinú iñi tandihí tan cuví —catyí ra Jesús.

²⁴ Tacan tan canā tsaā jutu ra tan catyí ra tsihin ra Jesús:

—¡Tsinú iñi yu! ¡Jatyinyee tsi yu na tsinu ca iñi yu! —catyí ra tsihin ra.

²⁵ Cuhva tsa nyehe ra Jesús tyin cuaha nyivi ndu iñi nu nyaá ra, tacan tan tava ra tatyí ña vaha can, tan catyí ra tsihin nu:

—Yooho tatyí ña vaha tsa janduñihí tan jasohó tsi ra ihya, quita tsi ra catyí yu tsihin un. Jaña tsi ra, tan ña quihvi ca un tsi ra —catyí ra Jesús tsihin nu tatyí ña vaha can.

²⁶ Tacan tan quifñi xaan canā tsaā nu tatyí can tan janduvá nu tsi ra inga tsaha, tan quita nu tsi ra. Tan jacúu naaha nu tsi ra. Tan cuñi maa nyivi tyin tsa tsihi ra. ²⁷ Maa tyin ra Jesús tiñi ra ndaha ra luhlu can, tan cañihí ra tsi ra, tan tsinyaa nyityi ra.

²⁸ Tacan tan quihvi ra Jesús tsitsi iin vehe, tan tsicā tuhun ra tsicá tsihin ra tsi ra tan catyí ra naha:

—¿Nacuenda tyin ña cuví tava nyuhu tatyí ña vaha can?

²⁹ Tacan tan catyí ra Jesús:

—Tsa cuenda tyin tahan tatyí ña vaha ihya ña cuví quita nu jaha yo tun ña coonyitya yo tan ña ndacan tahvi yo tsi Nyoo —catyí ra tsihin ra naha.

Nu cahan ra Jesús inga tsaha tyin cua cahñi nyivi tsi ra

(Mt. 17.22-23; Lc. 9.43-45)

³⁰ Quivi tsa quita ra Jesús ican, tan ra tsicá tsihin ra yaha ra naha ñuhu Galilea. Tan ña cuñi ra Jesús tsa coto nyivi iyó ican tyin nyíi ra nu iyó ñi. ³¹ Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayi tsa quee nda gloria cua nacuhva cuenda nyivi tsi yu tsi ra xaan iñi tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi. ³² Maa tyin ra ican naha ra ña cutuñi iñi ra naha tsa caahán ra tsihin ra naha. Tan ña cuñi ra naha ndaca tuhun ra naha tsi ra tyin yuuhvi ra naha.

Nu janahá ra Jesús yóo ra cahnu ca cuví tsitsi tsa tandihí nyivi tsa ndacá ñaha Nyoo

(Mt. 18.1-5; Lc. 9.46-48)

³³ Tan tsa tsaā ra Jesús ñuu Capernaum tan ra tsicá tsihin ra, tsa tsa yucú ra naha tsitsi vehe, tan tsicā tuhun ra Jesús tsi ra naha tan catyí ra:

—¿Náa natuhún xaan ndo ityi vatsí yo? —catyí ra tsicā tuhun ra.

³⁴ Tsa cahan ra Jesús tacan, taxin ña cuví ra naha, tyin ityi vatsí ra naha natuhun ra naha yóo ra cahnu ca cuví tsa nuu tandihí ra naha. ³⁵ Tacan tan tsinyaa ra Jesús tan canā ra tsi tandihí tsa utsi uvi ra tsicá tsihin ra, tan catyí ra tsihin ra naha:

—Nyooho tsa cuñi cuví ityi nuu, cuñi tsi cuví ndo nda nu ndihí ña tsa nuu tandihí

ndo, tan jatinyee ndo tsi tandihi nyivi —catyi ra Jesús tsihin ra naha.

³⁶ Tacan tan quihin ra iin ra luhlu tyaa ra mahnu ra naha. Tan tyihj jucun ndaha ra tsi ra luhlu can, tan catyi ra:

³⁷ —Nyivi naquihin iin nyivi tumaa ra luhlu ihya, yuhu naquihin cuenda fi. Tyin naquihin cuenda fi tsi fi tsa cuenda tsa cuñi fi tsi yu. Tan nyivi naquihin cuenda tsi yuhu, naquihin cuenda tucu fi tsi ra tsa jaquitsj tsi yu tan ñavin maa fi maa yu naquihin cuenda fi.

Nyivi tsa ña cuxaán tsi yo, juvin fi ican jatinyee tsi yo

(Mt. 10.42; Lc. 9.49-50)

³⁸ Tacan tan catyi ra Juan tsihin ra Jesús: —Maestro, nyehé ndi iin ra tava tatyí ña vaha tsi nyivi tsihin sivi un. Maa tyin tyasi ndi nu javaha ra tacan tyin ñavin tsihin yo tsicá ra —catyi ra Juan tsihin ra Jesús.

³⁹ Maa tyin catyi ra Jesús tsihin ra:

—Ña casi ndo nu javaha nyivi tacan. Tyin ndi intuhun fi tsa javaha tsa iyo tsihin sivi yu tan ña cua cana iñi fi cahan fi ndavaha fi tsi yu. ⁴⁰ Tyin nyivi tsa ña xaan iñi tsi yo, tsihin yo cutahán fi. ⁴¹ Tan nyivi tsa cua cuhva vasu tan iin yatsin ndutya coho ndo tyin tsinú iñi ndo tsi yu, cua cuhva Nyoo tsa cua cuhva ra tsi fi.

Nu tsahá cuenda ra Jesús tsi yo nácaa jaha cuenda yo tsi yo tan ña javaha yo tsa ña vaha
(Mt. 18.6-9; Lc. 17.1-2)

⁴² Nyivi cua natyuhu tsi iin nyivi tsa ñaha ca tsinú vaha iñi tsi yu tyin javaha fi tsa caquiñi, vaha ca cuhñi nyivi yuu yoso vee jucun fi tan cujanehñi fi tsi fi tsitsi nu cunu ndutya ñuhu. ⁴³ Tatun ndaha un javahá tsa ña vaha, casi nu javahá can tacan. Tatun ña cuvi, cahnya can tan javita un, tyin vaha ca quihvi un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un. ⁴⁴ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. ⁴⁵ Tatun tsaha un tan javahá tsa ña vaha, casi nu javahá can tacan. Tatun ña cuvi, cahnya can tan javita un, tyin vaha ca cuhun un coo un tsihin Nyoo tsihin tsa intuhun fi tsaha un tan ñavin ca tsa cuhun un tsihin nduvi tsaha un anyaya nu ña cua ndahva maa ñuhu. ⁴⁶ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. ⁴⁷ Tun tinuu un javahá tsa ña vaha, casi nu javahá can tacan. Tatun ña cuvi, tava can tan javita un tyin vaha ca quihvi un nu ndacá ñaha Nyoo tsihin iin tinuu un tan ñavin ca tsa jacuhun Nyoo tsi un anyaya tsihin nduvi tinuu un. ⁴⁸ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

⁴⁹ Maa tyin tandihi nyivi nyicún tsi yuhu, fi tsa nyehé tundoho tsa cuenda yu cuvi tsi tumaa tsa cayú fi tsihin ñuhu, tyin tsihin yacan cua nduvaha fi jahá Nyoo, tumaa tuhvá nyayu nduvahá tsihin fi. ⁵⁰ Vaha xaan fi. Maa tyin tun ndihi tsa uhva tsi, ña jandu uhva ca tsi tan ña cuvi ca cuatyíñu nyivi itsi. Yacan cuenda nyoooh, ña jandihi ndo tsa coo tuhun Nyoo añima ndo tyin cuvi tsi tumaa fi. Tyin tacan tan cuvi coo taxin ndo tsihin tahan ndo.

10

Nu caahán ra Jesús tyin ña vaha nacoo rayii ñasihi ra

(Mt. 19.1-12; Lc. 16.18)

¹ Quita ra Jesús ñuu Capernaum tan cuahán ra cuenda Judea inga tsiyo yutya Jordán. Tan ndu iin cuaha nyico nyivi nu nyii ra, tacan tan quitsahá jacuahá ra tsi fi tumaa tuhvá maa ra javahá. ² Tacan tan natuhva juhva ra fariseo naha ra nu nyaá ra Jesús, tan nducú ra naha cuhva tyaa ra naha cuatyí tsi ra. Tan tsicá tuhun ra naha tsi ra tatun vaha nacoo rayii ñasihi ra. ³ Tacan tan nacahan ra Jesús tan catyi ra:

—¿Náa catyi ra Moisés tyin javahá ndo?

⁴ Tan nacahan ra naha tan catyi ra naha:

—Ra Moisés catyi ra tyin cuvi can ndi tutu cuenda ley ndi, tacan tan cuvi nacoo ndi ñasihi ndi —catyi ra naha tsihin ra.

⁵ Tacan tan catyi ra Jesús tsihin ra naha:

—Cati ra Moisés tyin cuvi javaha ndo tacan tsa cuenda tsa ndava añima ndo. ⁶ Maa tyin quivi jihna fi, quivi javaha Nyoo tandihi maa tsa iyó, catyi nu tutu ra tyin javahá ra rayii tan ñaha. ⁷ “Yacan cuenda taahán tsi nacoo rayii jutu ra tan sihi ra tan ndu iin ra tsihin ñasihi ra. ⁸ Tan nduvi fi cua cuvi fi tumaa intuhun ña nyivi.” Yacan cuenda ñavin ca uvi taahan fi, tyin intuhun ña nyivi cua cuvi fi. ⁹ Yacan cuenda, ña cuvi jasiin nyivi tsa jandu iin Nyoo —catyi ra Jesús tsihin ra naha.

¹⁰ Yahá can tan cuanuhu ra nda yuvehe, tan quitsahá nducú tuhun nyico ra tsicá tsihin ra siqui tuhun can. ¹¹ Tan catyi ra Jesús tsihin ra naha:

—Ra tsa cua nacoo ñasihi tan quihin ra inga ñaha, cua coo cuatyí ra nu Nyoo. ¹² Tacan tucu fi ñaha: Tun nacoo ña tsi yí ña tan tindaha ña tsihin inga rayii, juvin fi cua coo tucu cuatyí ña —catyi ra Jesús.

Nu nasoco ra Jesús tsi tsa nyihi

(Mt. 19.13-15; Lc. 18.15-17)

¹³ Tacan tan tsindaca nyivi juhva tsa nyihi tsi ra Jesús tyin tyiso ra ndaha ra jiñi tsi naha tsi tan nasoco ra tsi naha tsi. Maa tyin ra tsicá tsihin ra quitsahá cuxaán ra naha tsi nyivi cuahán cuandacá tsa nyihi. ¹⁴ Maa tyin

tsa nyehe ra Jesús tsa javahá ra naha tacan, cuxaan ra tsi ra naha, tan catyí ra:

—Cuhva ndo tsa quitsi tsa nyihi nu nyaá yu. Na çasi ndo itsi naha tsi tyin nyivi ndacá ñaha Nyoo cuví ñi tumaa cuví tsa nyihi tyin tsinú ñi ñi tsi Nyoo. ¹⁵ Tan tsa nditsa catyí yu tsihin ndo tun ña cuita ñi nyivi tsi Nyoo tumaa nyitá ñi iin ra luhlu tsi jutu ra, ña cua cuví quihvi ñi nu ndacá ñaha Nyoo —catyí ra Jesús tsihin ra naha.

¹⁶ Tacan tan quihñ ra intuhun intuhun tsa nyihi can tan tyiso ndaha ra jiñi tsi naha tsi, tan tsican tahvi ra tsi Nyoo na nasoco ra itsi naha tsi.

Nu tsahá cuenda ra Jesús tyin yíi xaan nacuhva cuenda iin ra cuca tsi ra tsi Nyoo (Mt. 19.16-30; Lc. 18.18-30)

¹⁷ Yahá yacan tan cuahán ra Jesús. Tan tsinú xaan iin rayii cuahán ra cuanyicún ra tsi ra. Tsa tahan ra tsi ra, tsicuñi tsi ra nuu ra, tan tsicá tuhun ra tsi ra, tan catyí ra:

—Maestro, vaha xaan un. ¿Náa taahán tsi javaha yu tan cuví coo yu ñayivi nyito tsa ña cua naa maa? —catyí ra tsihin ra Jesús.

¹⁸ Tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi ra vaha iyó tan ra ican cuví Nyoo. Tan tsa catyí un tyin vaha yu, nacotó un tyin Nyoo cuví yu. ¹⁹ Yoocho tsitó un tsa catyí Nyoo tyin javaha yo: “Na coo inga ñaha tsi un. Na cahñi un nyivi. Na suhu un. Na cahan un cuendu. Na jandavi ñaha un tsi nyivi. Tyaa yahvi tsi jutu un tan tsi sihi un” —catyí ra Jesús tsihin ra.

²⁰ Nacahan ra tan catyí ra:

—Maestro, tandihi tuhun ihya tan tyaá yahvi yu itsi nda ndi luhlu yu tan nda cuanda vityin —catyí ra.

²¹ Tacan tan sii cuñi ra Jesús nyehé ra tsi ra. Tan catyí ra tsihin ra:

—Intuhun ña tsa cumañi javaha un. Cuaahan yuvehe un tan xico un tandihi tsa iyó tsi un, tan cuhva un xuhun can tsi nyivi ndaahvi. Tacan tan coo tsa cuca tsi un nda gloria. Yaha can tan quitsi un quitsi nyicun un tsi yu vasu ndi maa nyehe un tundoho tan cahñi nyivi tsi un —catyí ra Jesús tsihin ra.

²² Tsa tsiñi ra tyuvaa can tsa cahan ra Jesús tacan, cuihaya xaan cuñi ra cuví, tan tsihin tucuihaya ñi cuanuhu ra yuvehe ra tyin cuca xaan ra.

²³ Tacan tan nanyehe ra Jesús naniñ canduvi nu nyaá ra, tan catyí ra tsihin ra tsicá tsihin ra:

—¡Yíi xaan tan cuví nacuhva cuenda nyivi cuca tsi ñi tsi Nyoo na cundaca ñaha ra tsi ñi! —catyí ra tsihin ra naha.

²⁴ Tsa tsiñi ra tsicá tsihin ra tsa caahán ra, iyo xaan cuñi ra naha cuví. Maa tyin catyí tucu ra tsihin ra naha inga tsaha:

—¡Sehe yu, nyivi tyaá xaan jiñi tandihi tsa cuca, yíi xaan tan quihvi ñi nu ndacá ñaha Nyoo! ²⁵ Yatyí ca cuví yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra Jesús.

²⁶ Tsa tsiñi ra naha tuhun ihya, iyo xaan cuñi ra naha cuví, tan quitsahá tsicá tuhun tahan ra naha, tan catyí ra naha:

—Tun tacan, ¿yóo cua cacu? —catyí ra naha.

²⁷ Tacan tan nanyehe ra Jesús tsi ra naha tan catyí ra tsihin ra naha:

—Nyivi ña cuví javaha ñi tsehe, maa tyin Nyoo cuví javaha ra tyin tsa cuenda Nyoo nduve maa tsa yíi.

²⁸ Tacan tan catyí ra Pedro tsihin ra:

—Jutu Mañi yu, tandihi maa tsa iyó tsi ndi nacoq ndi can tan nyicún ndi tsi un.

²⁹ Nacahan ra Jesús tan catyí ra:

—Tsa nditsa catyí yu tsihin ndo tyin tandihi nyoocho tan tandihi inga ca nyivi tsa cua nacoq vehe, o yañi, o cuhva, o jutu, o sihi, o ñasihi, o sehe, o ñuhu, tsa cuenda yuhu tan tsa cuenda tsa jacoto ñi tsi nyivi tyin cuñi Nyoo jacacu ra tsi ñi, ³⁰ cua ñihi ñi cientu ca tsaha siqui tsa nacoq ñi nu ñuhu ñayivi ihya. Cua ñihi ñi vehe, cua ñihi ñi nyivi cua cuví yañi ñi, cuhva ñi, sihi ñi, sehe ñi, tan cua ñihi tucu ñi ñuhu ñi, vasu ndi maa cua janyehe nyivi tundoho tsi ñi. Tan nu inga ñuhu ñayivi tsaa tsa vatsí, cua ñihi ñi ñayivi nyito tsa ña cua naa maa coo ñi. ³¹ Cuaha ñi nyivi cuahán ityi nuu vityin, cua cuhun ñi nda nu ndihi ña. Tan nyivi cuahán nu ndihi ña vityin, cuaha ñi cua cuhun ityi nuu —catyí ra Jesús.

Nu jacotó nyico ra Jesús nácaa cua cahñi nyivi tsi ra

(Mt. 20.17-19; Lc. 18.31-34)

³² Tsa tsa cuñi cuhun ra Jesús tan ra tsicá tsihin ra ñuu Jerusalén, cuahán ra Jesús ityi nuu tandihi nyivi tsa cuahán cuanyicún tsi ra. Iyo xaan cuñi ñi tan tsihin tsa yuuhvi ñi cuahán ñi. Tacan tan tavañi sñi ra tsi tsa utsi uvi ra tsicá maa tsihin ra. Tan quitsahá catyí tuhun ra tsihin ra naha tsa cua tahan ra. ³³ Tan catyí ra:

—Vityin tsa cua cuyatyin yo ñuu Jerusalén nu cua nacuhva cuenda nyivi tsi yuhu, Rayii queeñ nda gloria. Cua cuhva cuenda ñi tsi yu tsi ra jutu cuví ityi nuu naha ra, tan tsi ra maestro cuenda ley vehe ñuhu naha ra. Ra ihya naha ra cua catyí ra naha tyin taahán tsi cúu yu tan cua nacuhva cuenda ra naha tsi yu tsi ra ñuu Roma naha ra. ³⁴ Cua vacu nducu ra naha tsi yu, cua cañi ra naha tsi yu, cua tivi siñ ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi —catyí ra Jesús.

Nu tsicán ra Jacobo tan ra Juan iin tumañi iñi tsi ra Jesús

(Mt. 20.20-28)

³⁵ Tacan tan ra Jacobo tan ra Juan, sehe ra Zebedeo, natuhva ra naha nu nyaá ra Jesús, tan catyí ra naha tsihin ra:

—Maestro, jaha tumañi iñi tan javaha un tsa cua ndacan ndi tsi un —catyí ra naha.

³⁶ Tacan tan tsicá tuhun ra Jesús tsi ra naha tan catyí ra:

—¿Náa cuñi ndo javaha yu?

³⁷ Tan nacahan ra naha tan catyí ra naha:

—Cuñi ndi tsa cuhva un cunyecu ndi tsihin un nu ndacá ñaha un, iin ndi xiin cuaha un, tan inga ndi xiin satyin un —catyí ra naha tsihin ra Jesús.

³⁸ Tacan tan catyí ra Jesús tsihin ra naha:

—Nyooho ña tsitó ndo náa tsicán ndo.

¿A cuví nyehe ndo tundoho tsa cua nyehe yuhu? ¿A cuví cúu ndo tumaa cua cúu yu? —catyí ra tsihin ra naha.

³⁹ Tan nacahan ra naha:

—Cuví maa.

Tan catyí ra Jesús

—Nditsa tyin cua nyehe ndo tundoho tan cua cúu ndo tumaa cua tahan yuhu. ⁴⁰ Maa tyin tsa cunyaa iin ndo xiin cuaha yu tan iin ndo xiin satyin yu, ñavin yuhu taahán tsi cuhva yacan, tyin maa Nyoo cua catyí yóo cua ñihi can —catyí ra Jesús tsihin ra naha.

⁴¹ Tsa tsíñi tsa utsi ca ra tsicá tsihin ra Jesús yacan, cuxaḡaḡa ra naha tsi ra Jacobo tan ra Juan. ⁴² Maa tyin cana ra Jesús tsi ra naha tan catyí ra tsihin ra naha:

—Tsa tsitó ndo tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. ⁴³ Maa tyin ñavin tacan taahán tsi javaha nyooho tyin ra tsa cuñi cuví ra cahnu ityi nuu Nyoo, cuñi tsi cuví ra musu tandihi ndo. ⁴⁴ Tan nyooho tsa cuñi cuví ityi nuu, cuñi tsi cuví ndo musu tandihi ca ndo. ⁴⁵ Tyin yuhu, Rayi tsa quee nda gloria, ña vatsi yu tyin cuñi yu jatyinyee nyivi tsi yu. Yuhu vatsi yu vatsi jatyinyee yu tsi maa ñi tan cuhva yu ñayivi yu tsa cuenda ñi tumaa iin tsa tyahvi yu tan jacacu yu cuaha ñi —catyí ra Jesús.

Nu jananyehé ra Jesús tsi ra Bartimeo

(Mt. 20.29-34; Lc. 18.35-43)

⁴⁶ Tacan tan tsaḡaḡa ra naha ñuu Jericó. Tan yaha ñi ra naha ñuu can. Tan cuhva tsa cua quita ra Jesús ñuu can tsihin ra tsicá tsihin ra, cuaha nyivi cuahán cua nyicun tsi ra naha. Tan ityi yahá ra naha nyaá iin ra cuaa nañi Bartimeo, sehe ra Timeo, tsicán ra caridaa. ⁴⁷ Tan cuhva tsa tsitó ra cuaa can tyin tsa cua cuyatyin yaha ra Jesús, ra ñuu Nazaret, nu nyaá ra, quitsahá caná tsaa ra, tan catyí ra:

—¡Jesús, tata ra David, cundaahvi iñi tsi yu! —catyí ra caná tsaa ra.

⁴⁸ Tacan tan quitsahá cuxaan nyivi tsi ra tan catyí ñi tsihin ra na cutaxin ra, maa tyin cuñihí ca ra caná tsaa ra tan catyí ra:

—¡Tata ra David, cundaahvi iñi tsi yu! —catyí ra.

⁴⁹ Tacan tan tsicuiñi ra Jesús tan catyí ra:

—Cuaquihin ndo tsi ra.

Tan tsiquihin ra naha tsi ra cuaa can tan catyí ra naha tsihin ra:

—Jandu iin iñi un. Nduvita, cōhon tyin caná ra tsi un —catyí ra naha tsihin ra.

⁵⁰ Tacan tan janehñi ra jahma ndasi ra nda sava. Tan cuahan ra iin yaha ñi nda nu nyaá ra Jesús. ⁵¹ Tacan tan tsicá tuhun ra Jesús tsi ra:

—¿Náa cuñi un javaha yu?

Tan nacahan ra cuaa can tan catyí ra:

—Maestro, cuñi yu janduvaha un tinuu yu na nanyehé nyico yu —catyí ra.

⁵² Tan catyí ra Jesús tsihin ra:

—Cuanuhu. Tsa nduvahá un tyin tsinú iñi un tsi yu.

Juvin ñi cuhva can tan nanyehé ra can. Tan cueta cuahán ra cuanyicún ra tsi ra Jesús.

11

Nu quihvi ra Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

¹ Tsa tsa cuñi tsaa ra Jesús tan nyivi nyicún tsi ra nda ñuu Jerusalén, yatyin nu canyí ñuu Betfagé tan ñuu Betania, tan yatyin ñi yucu nu iyó yutun Olivo, tan catyí ra Jesús tsihin uvi ra tsicá tsihin ra:

² —Cuaahan ndo ñuu tsa canyí ityi nuu ihya. Tsa tsaa ndo ícan cua nañihi ndo iin urru. Quiti yoco cuví ti, nyaá ti nuuhñi ti, tan ñaha ca quihí tyayu ti. Ndatsi ndo tsi ti, tan quihin ndo tsi ti quitsi ndaca ndo tsi yu.

³ Tatun cusana ndaca tuhun nyivi tsi ndo: “¿Nacuu ndo urru ihya?” Tacan tan catyí ndo tsihin ñi: “Tsíñi ñuhu ti tsi Jutu Mañi yo, maa tyin cua jaquitsi nyico ñi maa ra tsi ti”, catyí ndo tsihin ñi —catyí ra Jesús tsihin ra naha.

⁴ Tacan tan cuahán ra naha, tan tsa tsaḡaḡa ra naha, nañihí ra naha urru can nuuhñi ti tsitsi ityi tsata yuhu iin cora. Tan ndatsi ra naha tsi ti. ⁵ Tan catyí juhva ra yucú ícan naha ra tsihin ra naha:

—¿Náa javahá ndo? ¿Nacuenda ndatsi ndo urru can? —catyí ra naha tsihin ra naha.

⁶ Tacan tan nacahan ra naha tumaa cahan ra Jesús tsihin ra naha. Tan tsahá ra can naha ra quihin ra naha urru can. ⁷ Tacan tan tsindacá ra naha urru can tsi ra Jesús. Tyiso ra naha jahma ra naha tsata ti, tan tsicoso ra Jesús tsi ti. ⁸ Tan tsaquín cuaha nyivi jahma ñi tsitsi ityi nu yahá ra, tan inga ñi tsahnyá ñi ndaha yutun tan tsaquín ñi tsitsi ityi.

⁹ Tacan tan nyivi tsa cuahán ityi nuu ra tan ityi tsata ra, quitsahá caná tsaa ñi tan catyí ñi:

—¡Cahnu xaan cuví Nyoo! ¡Na jacahnu yo tsi Jutu Mañi yo, ra tsa jaquitsi Nyoo!
¹⁰ ¡Na jacahnu yo tsi ra vatsi cundaca ñaha tumaa tsindaca ñaha ra David, tsi tsaahnu yo! ¡Cahnu xaan cuví ra nyaá gloria! —catyí ñi.

¹¹ Tacan tan quihvi ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yahá nyehe ra tandihi tsa iyó nuquehe vehe ñuhu can, cuahán ra ñuu Betania tsihin tsa utsi uvi ra tsicá tsihin ra tyin tsa cueñi xaan.

Nu cahan ra Jesús tsi yutun higo tsa ña tsahá tsiti

(Mt. 21.18-19)

¹² Tsa tuvi inga quivi tsa quitá ra Jesús tan ra tsicá tsihin ra ñuu Betania, tsaa soco tsi ra Jesús.
¹³ Tsa quitá ra naha ndasava nyehe ra Jesús nu nyaá iin yutun higo tsa iyó numa. Tsañan ra tsinyehe ra tun iñi tsiti tun, maa tyin nduve tsiti tun, maa ñi maa ndaha tun iñi, tyin ñaha ca tahan tsi quivi cuhva tun tsiti.
¹⁴ Tacan tan cahan ra Jesús tsi tun, tan catyí ra:

—Ndi iin sava ca quivi ña cua quee ca tsiti catyí nyivi nuu un —catyí ra tsihin tun.

Tan tsiñi ra tsicá tsihin ra tsa caahán ra.

Nu jacunú ra Jesús nyivi xicó nuquehe vehe ñuhu cahnu

(Mt. 21.12-17; Lc. 19.45-48; Jn. 2.13-22)

¹⁵ Tsa tsaa ra naha ñuu Jerusalén, cuahán nyico ra Jesús vehe ñuhu cahnu tan quitsahá jacunú ra nyivi xicó tan jatá tsa yucú nuquehe yuvehe ñuhu can. Janduvá ra mesa nu nyecú nyivi samá xuhun nyivi. Tan janduvá tucu ra tyayu nu nyecú nyivi xicó paloma.
¹⁶ Tan ña tsahá ca ra yaha sava ñi nuquehe vehe ñuhu can tsihin ndaha tyiñu.
¹⁷ Tan quitsahá jacuahá ra tsi nyivi, tan catyí ra:

—¿A ña tsitó ndo tyin nu tutu Nyoo catyí tsi tyin vehe Nyoo cua cunañi tsi tyehen: “vehe nu cua ndacan tahvi nyivi queé nani nu ñuhu ñayivi tsi Nyoo”? Tan nyoocho jananduvi ndo itsi vehe ñasuhu —catyí ra tsihin ñi.

¹⁸ Tsa tsiñi ra jutu cuví ityi nuu naha ra tan ra maestro cuenda ley vehe ñuhu naha ra tsa caahán ra, tan quitsahá nducú ra naha cuhva cahñi ra naha tsi ra tyin yuuhvi ra naha nyehe ra naha tsi ra tsa cuenda tsa janahá ra tsi nyivi tan yuuhvi tucu ra naha tyin tsa cuaha xaan nyivi nyicún tsi ra.
¹⁹ Maa tyin tsa tsa cuñi cuaa, quitá ra Jesús ñuu can tsihin ra tsicá tsihin ra.

Nu na ityi yutun higo

(Mt. 21.20-22)

²⁰ Tsa tuvi inga quivi, yahá nyico ra naha nu nyaá yutun higo tsa cahan ra Jesús. Tan nyehe ra naha tyin na ityi tun tan nda cuanda yoho tun na ityi.
²¹ Tacan tan tsa nyehe ra Pedro yutun higo can, nducuhun iñi ra tsa javahá ra Jesús tan catyí ra tsihin ra Jesús:

—¡Maestro, jihna! Tsa na ityi yutun tsa cahan un —catyí ra.

²² Nacahan ra Jesús, tan catyí ra:

—Tsinu iñi ndo tsi Nyoo.
²³ Tyin tsa nditsa catyí yu tsihin ndo tyin nyivi cua cahan tsihin yucu ihya tyehen: “Cuatsiyo ihya tan cuaahan tsitsi ndutya ñuhu”, tan tatun tsinú iñi ñi tyin cua cundaa tsa cahan ñi tan ña uvi tsicá iñi ñi, cua cundaa tsi.
²⁴ Yacan cuenda catyí yu tsihin ndo tyin tandihi tsa cua ndacan ndo tsi Nyoo tsa cua ndacan tahvi ndo tsi ra, tun tsinú iñi ndo tyin tsa naquihin cuenda ndo can, cua naquihin ndo can.
²⁵ Tan tsa cua ndacan tahvi ndo tsi Nyoo, tun nducuhun iñi ndo tyin xaan cuñi ndo tsihin nyivi, jaha ndo tucahnu iñi tsi ñi, tyin tacan tan jaha Jutu ndo, ra nyaá gloria, tucahnu iñi tsi maa ndo tsa cuenda cuatyí ndo.
²⁶ Maa tyin tun ña jaha ndo tucahnu iñi tsi nyivi, ndi Jutu ndo, ra nyaá gloria, tan ña cua jaha ra tucahnu iñi tsi maa ndo.

Nu tsicá tuhun ra cumi tyiñu vehe ñuhu naha ra tsi ra Jesús yóo tavá tyiñu tsi ra tsa cahan ra tsihin nyivi

(Mt. 21.23-27; Lc. 20.1-8)

²⁷ Tacan tan tsaa nyico ra naha ñuu Jerusalén. Tsa nyii ra Jesús tsicá nuu ra nuquehe vehe ñuhu cahnu, natuhvá ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra nu nyaá ra.
²⁸ Tan tsicá tuhun ra naha tsi ra tan catyí ra naha:

—¿Yóo tavá tyiñu tsi un tsa javahá un tyehen? —catyí ra naha.

²⁹⁻³⁰ Tan nacahan ra Jesús, tan catyí ra:

—Cuñi tucu yuhu ndaca tuhun yu tsa ndaca tuhun yu tsi nyoocho. ¿Yóo jaquitsi tsi ra Juan tyin jacoondutya ra tsi nyivi? ¿A Nyoo o nyivi? Tatun catyí tuhun ndo tsihin yu yóo jaquitsi tsi ra, cua catyí tuhun tucu yuhu tsihin nyoocho yóo tavá tyiñu tsi yu javahá yu tyehen —catyí ra Jesús tsihin ra naha.

³¹ Tacan tan quitsahá caahán yuhu tahan ra naha, tan catyí ra naha:

—Tun catyí yo tyin Nyoo jaquitsi tsi ra Juan, cua catyí ra tsihin yo tyehen: “Tun Nyoo jaquitsi tsi ra, ¿nacuada ña tsinú iñi ndo tsa cahan ra?”
³² ¿A vaha tun catyí yo tyin nyivi jaquitsi tsi ra? Ña cuvi —catyí ra naha, tyin yuuhvi ra naha tsi nyivi, tyin tandihi ñi tan tsinú iñi ñi tyin ndusu yuhu Nyoo cuví ra.

³³ Tacan tan catyí ra naha tsihin ra Jesús:

—Ña tsitó ndi.

Tacan tan catyí ra Jesús tsihin ra naha:

—Tun ña tsitó ndo, ndi yuhu tucu, tan ña cua catyí tuhun yu tsihin ndo yóo tava tyiñu tsi yu tsa javahá yu tyehen —catyí ra Jesús tsihin ra naha.

12

Nu caahán ra Jesús tuhun ra ña vaha jaha tyiñu

(Mt. 21.33-46; Lc. 20.9-19)

¹ Tacan tan quitsahá caahán ra Jesús tsihin ra naha tsihin cuhva ihya, tan catyí ra:

—Tsicoq iin rayi tsa tatsi yoho yucu vixi tsa nañi uva, ra ican tyasi ra iin cora nanii canduvi nu tatsi ra yucu vixi can. Tan javahá ra iin nu cua tava ra ndutya uvas can. Tan javahá tucu ra iin vehe sucun tyin tacan tan cuvi jaha cuenda ra nanii cahnu nu ndaha tyiñu ra.

² Tsa yahá yacan tan tsahá nuu ra ñuhu can tsi juhva rayi tyin jaha tyiñu ra naha tsihin tsi. Tacan tan cuahán ra inga ñuu. ³ Tsa tahañ tsi quivi iyó uvas can, jacuhun ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra. ⁴ Maa tyin ra ican naha ra tiñ ra naha tsi ra. Tan cañi ra naha tsi ra. Tan jacunuhu ra naha tsi ra tsihin ndaha ndi ra. ⁵ Tacan tan tsitoho ñuhu can jacuhun nyico ra inga musu, maa tyin cañi ra naha tsi ra can tsihin yuu, tan tahvi ra naha jiñi ra, tan cañan nyaa ra naha tsi ra. ⁶ Tsitoho ñuhu can jacuhun nyico ra inga musu. Tan tsahñi ra naha tsi ra. Yahá yacan tan cuaha ca ra naha jacuhun ra. Maa tyin cañi ra naha tsi juhva ra naha tan tsahñi ra naha juhva ca ra naha.

⁷ Tan cumañi intuhun ña ra tsa cuvi jacuhun ra. Tan ra ican cuvi sehe ra tsa cuvi xaan ra. Nu ndiñi tuhun jacuhun ra sehe ra tyin cuñi maa ra tsicá iñi ra: “Tun jacuhun yo sehe yo, cua tyaa yahvi ra naha tsi ra tyin sehe yo cuvi ra”, cuñi ra. ⁸ Maa tyin tsa nyehé ra jahá tyiñu can naha ra tsi ra sehe ra, natuhun tahañ ra naha tan catyí ra naha: “Ra ihya cua naquihin cora ihya. Yacan vaha ca cahñi yo tsi ra, tan ndoo maa yo tsihin can”, catyí ra naha. ⁹ Tacan tan tiñ ra naha tsi ra tan tsahñi ra naha tsi ra. Tan tava ra naha cuñu ñuhu ra ityi tsata cora can —catyí ra Jesús.

¹⁰ Tacan tan tsicá tuhun ra Jesús tsi ra naha tan catyí ra:

—¿Náa cua javaha tsitoho ñuhu can? Cua cuhun ra tan cua cahñi ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tsihin can. ¹¹ ¿A ñaha ca cahvi ndo nu tutu Nyoo nu catyí tsi tyehen? Yuu tsa javitá ra javahá vehe naha ra, yacan cuvi yuu tsa tsifí ñuhu ca.

¹² Maa Nyoo Jutu yo jahá tsa cahnu ca cuvi yuu ihya. Tan iyo xaan cuñi yo nyehé yo can, catyí tsi —catyí ra Jesús tsihin ra naha.

¹³ Tacan tan ra jutu cuvi ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducú ra naha cuhva tyihi ra naha tsi ra Jesús vehe caa tyin tsitó ra naha tyin tuhun maa ra naha caahán ra tsa tsatyíñu ra cuhva can. Maa tyin ña tiñ ra naha tsi ra tyin yuuhvi ra naha nyehé ra naha tsi nyivi. Nacoq ra naha tsi ra, tan cuahán ra naha.

Nu caahán ra Jesús siqui tuhun tsa tyahvi nyivi xuhun tsi ra ñuu Roma tsa ndacá ñaha tsi nyivi Israel

(Mt. 22.15-22; Lc. 20.20-26)

¹⁴ Tacan tan jacuhun ra naha juhva ra yihi cuenda ra Herodes tan juhva ra fariseo naha ra nu nyii ra Jesús tyin nducu ra naha cuhva cahan ra Jesús iin tsa ña vaha tyin tacan tan cuvi tyaa ra naha cuatyí tsi ra. ¹⁵ Tsa tsaa ra can naha ra tan quitsahá caahán ra naha tsihin ra Jesús tan catyí ra naha:

—Maestro, tsitó ndi tyin tsa nditsa caahán un. Tan inducu ñi cuñi un nyehé un nyivi cuca tan nyivi ndaahvi. Tan nditsa tyin ityi Nyoo janahá un. Yacan cuenda cuñi ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi yo, ra tsa nyaá nda ñuu Roma, o ña vaha? ¿A taahán tsi tyahvi yo can, o ña taahán tsi? —catyí ra naha tsihin ra Jesús.

¹⁶ Tan tsitó ra Jesús tyin ñavin tsa vaha tsicá iñi ra naha, yacan cuenda catyí ra tsihin ra naha:

—¿Nacuvi tyin nducú cuhva ndo tsi yu? Ndaca ndo iin xuhun tsi yu ihya, na nyehé yu —catyí ra.

¹⁷ Tsindacá ra naha xuhun can tsi ra. Tsa nyehé ra can tan tsicá tuhun ra tsi ra naha, tan catyí ra:

—¿Yóo nuu tan yóo sivi nyaá tsata xuhun ihya? —catyí ra tsihin ra naha.

Nacahan ra naha tan catyí ra naha:

—Nuu ra ndacá ñaha tan sivi ra.

¹⁸ Tacan tan catyí ra Jesús tsihin ra naha:

—Tun tacan, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi Nyoo —catyí ra Jesús tsihin ra naha.

Tan iyo xaan cuñi ra naha tsihin tsa nahan ra.

Nu cuñi ra saduceo naha ra jandavi ñaha ra naha tsi ra Jesús

(Mt. 22.23-33; Lc. 20.27-40)

¹⁹ Tacan tan cuahán juhva ra saduceo naha ra nu nyii ra Jesús. Tan ra saduceo can naha ra catyí ra naha tyin ña cua nandoto nyivi. Yacan cuenda cahan ra naha tyehen tan catyí ra naha tsihin ra Jesús:

¹⁹ —Maestro, ra Moisés tyaa ra nácaa taahán tsi javaha yo tatun iin rayii tsihi tan ndoq ñasihí ra tan nduve sehe ña tsicoq tsihin ra. Catyi ra tyin taahán tsi tindaha yañi ra tsihin ñaha can. Tyin tacan tan cua coo sehe ra tsihin ña tsa cuenda ra yañi ra tsa tsihi. ²⁰ Iin tsaha iin rayii tsicoq utsa sehe yii ra. Ra tsa jihna ñi tindaha ra tsihin iin ñaha, maa tyin nduve sehe ra tsicoq tsihin ña, tan tsihi ra. ²¹ Tacan tan tindaha ra yañi ra tsa tsinu uvi tsihin ñaha tsa ndoq can. Maa tyin juvin ñi ña tsicoq sehe ra tsihin ña tan tsihi ra. Juvin ñi tacan tahan tucu ra tsa tsinu uñi. ²² Tandihí tsa utsa ra naha tindaha ra naha tsihin ñaha can. Tan ndi intuhun ra naha tan ña tsicoq sehe ra naha tsihin ña. Tan nu ndihí tuhun, tsihi ndihí maa ña. ²³ Tan vityin, tun nditsa tsa cua nandoto nyivi, ñndáa tsa utsa taahan ra can naha ra cua cuvi yii ña quivi cua nandoto ñi? Tyin tandihí maa ra naha tan tindaha ra naha tsihin ña —catyi ra naha tsihin ra Jesús.

²⁴ Tacan tan nacahan ra Jesús tan catyi ra tsihin ra naha:

—Caahán soho ñi maa nyoocho, tyin ña tsitó ndo tsa catyi tuhun Nyoo, tan ndi ña tsitó ndo nácaa tsa cahnu cuvi tunyee iñi tsa iyó tsi Nyoo. ²⁵ Quivi cua nandoto nyivi, ndi ña cua tindaha ñi tan ndi ña cua tindaha sehe ñi, tyin cua cuvi ñi tumaa ángel iyó gloria. ²⁶ Tan tuhun tsa cua nandoto nyivi, ña ñaha ca cahvi ndo nu libru tsa tyaa ra Moisés nu catyi tsi nácaa cahan Nyoo tsihin ra nu cayú yutun iñu? Tyin catyi ra tsihin ra tyehen: “Yuhu cuvi Nyoo ra Abraham, ra Isaac, tan ra Jacob”, catyi Nyoo tsihin ra Moisés. ²⁷ Ihya nyehé yo tyin nyito añima ra can naha ra vasu ndi maa tsanaha tsihi ra naha tyin Nyoo ñavin Nyoo nyivi tsihi cuvi ra, tyin Nyoo cuvi ra Nyoo nyivi nyito. Yacan cuenda catyi yu tyin nyoocho caahán soho ñi maa ndo —catyi ra Jesús tsihin ra naha.

Ley tsa ñiñi ca tsa tsaha Nyoo
(Mt. 22.34-40)

²⁸ Ña naha ñi tan tsaa iin ra maestro cuenda ley vehe ñuhu, tan tsiñi ra tsa caahán ra Jesús tsihin ra saduceo can naha ra. Tan cuhva tsa tsito ra tsa ra Jesús vaha nacahan ra tsihin ra naha, tsicá tuhun ra tsi ra tan catyi ra:

—Tsitsi tsa tandihí ley, ñndáa tsa ñiñi ca cuñi tsi javaha yo? —catyi ra.

²⁹ Tan nacahan ra Jesús tan catyi ra:

—Ley tsa jihna ñi tan ñiñi ca cuñi tsi javaha yo tsa nuu tandihí ley, cuvi ley ihya: “Nyoocho nyivi Israel, tyaa soho ndo: intuhun ñi maa Nyoo Jutu yo iyó. ³⁰ Cuñi ndo tsi Jutu Mañi yo Nyoo tsihin tsa ñi iñi ndo, tan tsihin tsa ñi iñi añima ndo, tan tsihin tandihí tsa tsiñi tuñi jiñi ndo, tan tsihin

tandihí tunyee iñi tsa iyó tsi ndo.” Ley ihya cuvi tsa ñiñi ca tan tsa jihna ñi taahán tsi javaha yo. ³¹ Tan tsa tsinu uvi tsa yatyiñ inducu ñi caahán tsi tsihin tsa jihna ñi tan catyi tsi tyehen: “Cuñi tahan ndo tsi ndo tumaa cuñi ndo tsi maa ndo.” Nduve ca ley tsa ñiñi ca javaha yo tsa nuu nduvi tsehe —catyi ra Jesús.

³² Tacan tan ra maestro cuenda ley can catyi ra tsihin ra:

—Vaha xaan nacahan un, Maestro. Nditsa tsa caahán un. Intuhun ñi Nyoo iyó, tan nduve inga ca Nyoo iyó. ³³ Tan tsa cuñi yo tsi Nyoo tsihin tsa ñi iñi yo, tan tsihin tandihí tsa tsiñi tuñi jiñi yo, tan tsihin tsa ñi iñi añima yo, tan tsihin tandihí tunyee iñi iyó tsi yo, tan tsa cuñi tahan yo tsi yo tumaa cuñi yo tsi maa yo, tandihí yacan tan cahnu ca cuvi can tan ñavin ca tsa jamañi yo tsi Nyoo, tsa tsahñi yo quiti tan tsahmí yo can nu altar —catyi ra maestro cuenda ley can tsihin ra Jesús.

³⁴ Tsa nyehé ra Jesús tyin vaha nacahan ra tsihin tsa catsi jiñi ra, tan catyi ra tsihin ra:

—Luxu cuñi ña tan ñiñi un cuhva nácaa nacuhva cuenda un añima un tsi Nyoo na cundaca ñaha ra tsi un —catyi ra Jesús tsihin ra.

Ndi intuhun ca maa nyivi tan ña cana ca iñi ñi ndaca tuhun ñi náa ndaca tuhun ñi tsi ra Jesús.

Ra Cristo Sehe Nyoo tsi ra tan juvin ñi cuvi tucu ra tata ra David

(Mt. 22.41-46; Lc. 20.41-44)

³⁵ Jacuahá ra Jesús tsitsi vehe ñuhu cahnu, tan catyi ra:

—Ñacuenda tyin catyi ra maestro cuenda ley vehe ñuhu naha ra tyin tata ra David cuvi ra Cristo? ³⁶ Tan juvin ñi maa ra David catyi tuhun ra Cristo tyehen:

Nyoo cahan ra tsihin Jutu Mañi yu, tan catyi ra:

“Cunyaa xiin cuaha yu ihya nda cuanda caquin yu tsi ra xaan iñi tsi un naha ra tsaha un”, catyi ra David tahan tsanaha jaha Tatyí li Nyoo.

³⁷ ¿Nacaa cuvi cuú tucu ra Cristo tata ra David, tan juvin ñi maa ra David catyi tyin ra Cristo cuvi Jutu Mañi ra? —catyi ra Jesús.

Tan cuaha nyivi yucú tyaa soho tsa caahán ra tan sñi xaan cuñi ñi.

Nu caahan ra Jesús tyin iyó cuaha cuatyí ra maestro cuenda ley vehe ñuhu naha ra

(Mt. 23.1-36; Lc. 11.37-54; 20.45-47)

³⁸ Quitsaha jacuahá ra Jesús tan catyi ra tyehen:

—Jaha ndo cuenda tsi ndo tsihin ra maestro cuenda ley vehe ñuhu naha ra, tyin taahán xaan iñi ra naha cunditsí ra naha jahma nañi tan caca nuu ra naha nuyahvi na jaha ndo tsa ñayivi tsi ra naha, tan cuhva

ndo nacumi tsi ra naha. ³⁹ Tan nanducú ra naha tyayu vaha ca cunyecu ra naha tsitsi vehe ñuhu. Tan tsa cua catsi ra naha nu iyó vico, nanducú ra naha nu vaha ca cunyecu ra naha. ⁴⁰ Tan quihín nyaá ra naha vehe ñi ndaahvi tsa tsihi yíi tyin ña cuví tyahvi ñi xuhun tsa tsicán ra naha tsi ñi. Tan cuñí ra naha tsa vaha cahan nyivi tuhun ra naha. Yacan cuenda naha tsicán tahvi ra naha tsi Nyoo nu tuvi nyivi. Maa tyin nduve náa catyi javahá ra naha tacan tyin ñihi ca cua tatsi tuñi Nyoo tsi ra naha —catyi ra Jesús.

Tsa tsahá ñaha ndaahvi tsihi yíi
(Lc. 21.1-4)

⁴¹ Iin tsaha nyíi ra Jesús tsitsi vehe ñuhu cahnu tan nyaá ra yatyin ñi nu nyíi tsatun nu tyihí nyivi xuhun tsa tsahá ñi tsi Nyoo. Tan nyehé ra nu tyihí nyivi xuhun tsitsi tsatun can. Tan cuaha nyivi cuca tyihí ñi cuaha xaan xuhun. ⁴² Tsitsi tsa nyaá ra ican tsaá iin ñaha ndaahvi tsihi yíi, tan tyihí ña uvi taahan ñi xuhun nyihí tsa caaha xaan nyaá. ⁴³ Tacan tan cana ra Jesús tsi ra tsicá tsihin ra, tan catyi ra tsihin ra naha:

—Tsa nditsa catyi yu tsihin ndo tyin nuu Nyoo cuaha ca xuhun tsahá ñaha ndaahvi ihya tan ñavin ca inga nyivi. ⁴⁴ Tyin tsahá ñi tsa ndog siqui xuhun ñi. Maa tyin ñaha ihya tyihí ña tandihi tsa iyó tsi ña —catyi ra Jesús.

13

Nu caahán ra Jesús tyin cua tani vehe ñuhu cahnu

(Mt. 24.1-2; Lc. 21.5-6)

¹ Cuhva tsa cua quita ra Jesús tsitsi vehe ñuhu cahnu can, iin ra tsicá tsihin ra catyi ra tsihin ra:

—¡Maestro, nyehe jihna tsa sii caá yuu yihí vehe ihya! ¡Nyehe tsa nahnu vehe ihya! —catyi ra tsihin ra Jesús.

² Maa tyin nacahan ra Jesús, tan catyi ra tsihin ra:

—Nditsa nahnu vehe ihya tan sii caá tsi nyehé yo vityin. Maa tyin catyi yu tsihin un tyin coo quívi nduve ca maa náa cua ndoo ihya. Ndi intuhun yuu tan ña cua coso tahan tsi tsihin inga tsi, tyin tandihi maa tsi tan cua tani tsi —catyi ra Jesús.

Nu tsahá cuenda ra Jesús náa cua cuví tsa ndi cumañi ca naa ñuhu ñayivi

(Mt. 24.3-28; Lc. 21.7-24; 17.22-24)

³ Tacan tan cuahán ra Jesús tsihin ra tsicá tsihin ra yucu yutun Olivo tsa canyii inga tsiyo nu nditsin nyehé tsi vehe ñuhu cahnu. Tsa tsinyaá ra Jesús ican, ra Pedro, ra Jacobo, ra Juan, tan ra Andrés tsicá tuhun xeehe ra naha tsi ra tan catyi ra naha:

⁴ —Cuñí ndi tsa catyi tuhun un tsihin ndi ama cua cuví tandihi tsa cahan un. ¿Nacaa tan coto ndi tatun tsa cuyatyin cundaa tandihi can? —catyi ra naha.

⁵ Nacahan ra Jesús tan catyi ra:

—Jaha ndo cuenda tsi ndo coto jandavi ñaha nyivi tsi ndo. ⁶ Tyin cuaha xaan nyivi cua quitsi, tan cua cuatyíñu ñi sivi yu, tan cua catyi ñi: “Yuhu cuví ra Cristo, ra tsa jaquitsi Nyoo.” Tan cuaha xaan nyivi cua jandavi ñaha ñi.

⁷ ‘Maa tyin tun ñihi tuhun ndo tyin iyó cuatyí tan cañi tahan nyivi ityi can tan ityi ihya, ña nayuhvi ndo tyin tacan taahán maa tsi cuví tsa ndi cumañi ca naa ñuhu ñayivi. ⁸ Tyin nyivi iin ñuu cua cañi tahan ñi tsihin nyivi inga ñuu, tan cua coo cuatyí iin ñuu tsihin inga ñuu. Tan cuaha ñi ityi cua taan ñihi, tan cua coo tama, tan cua nduvaa nyivi. Vasu ndi maa nyehe nyivi tundoho ihya, ña cua naa naha ñuhu ñayivi tyin ndi nyaa ca cua nyehe ñi tundoho.

⁹ ‘Maa tyin jaha ndo cuenda tsi ndo tyin cua cuhva cuenda nyivi tsi ndo tsi ra cumi tyiñu naha ra. Tan cua cañi ñi tsi ndo tsitsi vehe ñuhu. Cua cuhva cuenda ñi tsi ndo tsi ra cumi tyiñu tan tsi ra cuví rey tsacatyí yuhu. Tyin tacan tan cuví cahan ndo tuhun yu nuu ra naha. ¹⁰ Tyin tsa ndi cumañi ca naa ñuhu ñayivi, cuñí tsi coto tandihi nyivi inga ñuu tyin Nyoo jacacú ra tsi nyivi. ¹¹ Tan cuhva tsa cua cundaca ñi tsi ndo nuu ra cumi tyiñu naha ra, ña caca iñi ndo náa cua cahan ndo. Tyin juven ñi maa hora can tan cua cuhva Nyoo tsa cahan ndo. Tyin ñavin maa ndo cua cahan; tyin maa Tatyí li Nyoo cua cahan. ¹² Yihí ra naha cua nacuhva cuenda ra naha juven ñi maa yañi ra naha tan cua ndacan ra naha tsa cúu ra can naha ra. Yihí nyivi cua nacuhva cuenda ñi juven ñi maa sehe ñi. Tan yihí ñi cua nacuhva cuenda ñi nda cuanda jutu ñi tan sihi ñi tyin cúu ñi. ¹³ Tandihí nyivi iyó nu ñuhu ñayivi ndasi cua cuñí ñi nyehe ñi tsi ndo tsacatyí yuhu. Maa tyin nyooho tsa cua cunyeé iñi tsinú iñi tsi yu nda nu ndihi, cua cacu ndo.

¹⁴ ‘Tandihí nyooho tsa cahví nu tutu Nyoo nu tyaa ra Daniel, ra cuví ndusu yuhu Nyoo tsa tsicoo tahan tsanaha, cutufi iñi ndo tyin iyó tsa janducaquini tan tsa jativi. Quívi tsa nyehe ndo tyin tsa nyii yacan nu ña taahán tsi cunyii can, nyooho nyivi iyó Judea, quita ndo ñuu ndo tan cahun ndo ityi yucu. ¹⁵ Nyooho tsa cua cuyucu jiñi vehe quívi can, cua nuu ndo, maa tyin ña cua nuu ndo tsa quihvi ndo tsitsi vehe ndo tan tava ndo tsa iyó tsi ndo. ¹⁶ Nyooho tsa cua cuyucu tsitsi cuhu, ña cua cunuhu jihna ndo cuquihin ndo jahma ndo. ¹⁷ ¡Ndahvi ñiñaha tsa ñuhú sehe quívi can! ¡Tan ndahvi ñi iyó sehe lee tsa ndi tyaxin! ¡Ndahvi ñi! ¹⁸ Ndacan tahvi ndo tsi Nyoo na ña tahan tsi cunu ndo quívi vitsin. ¹⁹ Tyin tundoho tsa cua nyehe nyivi quívi can, ñaha ca maa coo can ndaha tsinu maa ñuhu ñayivi nda

cuanda vityin. Tan ndi ityi nuu ca tan ña cua nyehe nyivi tahan tundoho can inga tsaha. ²⁰ Tun tsatyin Jutu Mañi yo tan ña jandihi ra tsa cua nyehe yo tundoho quivi can, yofii maa cua cacu. Maa tyin cua jandihi ra can tsa cuenda tsa cuñi ra tsi nyivi yihi cuenda ra, nyivi nacatsj vaha maa ra.

²¹ 'Tatun catyi nyivi tsihin ndo: "Jihna ndo, ihya nyaá ra Cristo" o "Nyehe ndo, ican nyaá ra Cristo", ña tsinu iñi ndo. ²² Tyin cua quitsi nyivi jandavi ñaha tan cua catyi ñi tyin ra Cristo cuvi ñi. Cua catyi ñi tyin ndusu yuhu Nyoo cuvi ñi. Maa tyin ña nditsa ñi. Cua javaha ñi tsa nyityi, tan tsa iyo nahnun tyin cua jandavi ñaha ñi nda cuanda nyivi nacatsj maa Nyoo, tatun cunye ñi javaha ñi tacan. ²³ Maa tyin nyoocho jaha cuenda vaha ndo tsi ndo vityin tsa tsa tsitó ndo tandihi yacan tsa ndi cumañi ca tahan tsi quivi can —catyi ra Jesús.

Nu jacoto ra Jesús nácaa cua quitsi nyico ra inga tsaha

(Mt. 24.29-35, 42-44; Lc. 21.25-36)

²⁴ Tan catyi nyico ra Jesús tyehen:

—Maa tyin tsa cua yaha nyehe nyivi tundoho quivi can, cua ndunaa ñicanyii, yoo ña cua jandunditsin ca tsi, ²⁵ tan cua cucoyo tiñuu. Tan tandihi tsa iyó andivi tan cua nacanda tsi naha tsi. ²⁶ Tacan tan cua nyehe ndo tsi yuhu, Rayii tsa quee nda gloria, vatsi yu nu vico tsihin tunyee iñi cahnu tan tsihin tsa cahnu cuvi Nyoo. ²⁷ Tan cuaha ángel cuenda yu cua jaquitsi yu tyin jandu iin ra naha nyivi nacatsj maa Nyoo. Cua quita ñi naniñ cahnu nu ñuhu ñayivi, nda nu ndihi ñuhu ñayivi tan nda nu ndihi andivi.

²⁸ 'Cutuñi iñi ndo cuhva iyó yutun tsa nañi higo: Tun tsa nduyutyá soco tun tan cana ndaha yutya tun, tsitó ndo tyin tsa cua quee tsiti tun. ²⁹ Tan juven ñi tacan, tatun tsa cuvi tandihi tsa iyo tsa caahán yu tuhun tsihin ndo, cua coto ndo tyin tsa cuyatyin quitsi yu; tan tsa nyanaa yu yuvehe cuvi tsi. ³⁰ Tsa nditsa catyi yu tsihin ndo tyin tsa ndi cumañi ca cúu nyivi iyó nu ñuhu ñayivi ihya tan cua cuvi tandihi tsa caahán yu tuhun tsihin ndo. ³¹ Tan coo quivi cua cundihi andivi tan cua cundihi ñuhu ñayivi, maa tyin tuhun caahán yuhu, ña cua cundihi maa tsi tyin tandihi tsi tan cua cundaa tsi.

³² 'Maa tyin quivi tan hora tsa cua cuvi tandihi yacan, yofii maa tsitó can, ndi maa ca ángel tan ña tsitó ra naha, ndi yuhu tsa cuvi yu Sehe Nyoo tan ña tsitó yu. Intuhun ñi maa Nyoo Jutu yo tsitó ama cua javaha ra tandihi.

³³ 'Yacan cuenda coo nyito vaha ndo, tan jaha cuenda ndo tsi ndo, tan ndacan tahvi ndo tsi Nyoo, tyin ña tsitó ndo náa quivi tan náa cuhva cua quitsi nyico yu. ³⁴ Tumaa iin rayii tsa cua cuhun nu cañi. Ra ican tsa

ndi cumañi ca cuhun ra, tsahá cuenda ra vehe ra tsi musu ra. Tan tsahá ra tyiñu tsi intuhun intuhun ra naha. Tan tava tyiñu ra tsi ra jahá cuenda yuvehe na jaha cuenda vaha ra. ³⁵ Yacan cuenda nyoocho coo nyito ndo tyin ña tsitó ndo náa cuhva cua quitsi yu tsa cuvi yu tumaa tsitoho vehe can, tyin cuvi quitsi yu tsa cua cunaaha, maa ñuu, o cuhva tsacú tsitoocho, o tsa cua cana ñicanyii. ³⁶ Yacan cuenda coonyito vaha ndo tan ña cusu ndo tyin sana iñi ndo tan cua quitsi yu. ³⁷ Tsa caahán yu tsihin nyoocho, caahán tucu yu tsihin tandihi ca nyivi: Coo nyito ndo.

14

Nu nducy ra jutu cuvi ityi nuu naha ra cuhva tiin ra naha tsi ra Jesús

(Mt. 26.1-5; Lc. 22.1-2; Jn. 11.45-53)

¹ Tsa ndi cumañi uvi quivi ca tan tahan tsi vico pascua tan vico nu tuhvá nyivi tsatsi paan tsa nduve yutsan iya yihí. Ra jutu tsa cuvi ityi nuu naha ra tan ra maestro cuenda ley vehe ñuhu naha ra nducy ra naha cuhva tiin xeehe ra naha tsi ra Jesús tan cahñi ra naha tsi ra. ² Maa tyin natuhun tahan ra naha tan catyi ra naha:

—Ña cua tiin naha yo tsi ra quivi maa vico tyin coto nduvaa xaan nyivi —catyi ra naha.

Nu tyihi iin ñaha ndutya tami jiñi ra Jesús

(Mt. 26.6-13; Jn. 12.1-8)

³ Tsa ndi cumañi ca tahan tsi vico can, nyii ra Jesús ñuu Betania, vehe ra Simón, ra tsa tsindohó cuehe tyaahty. Tsitsi tsa nyaá ra Jesús tsatsi ra, tsaá iin ñaha ndahá ña iin yutyi tsa tsing tsihin yuu tsa nañi alabastro. Tsiñu can yihí ndutya tami tsa nañi nardo. Tan yahvi xaan nyaá ndutya tami can. Nuñá ña yuhu yutyi can tan tava ña ndutya tami can tan tyihí ña can jiñi ra Jesús. ⁴ Maa tyin juhva ra tsa yucú ican naha ra nduxaan ra naha tan catyi ra naha:

—¿Nacuenda tyin jativi ñaha ihya ndutya tami can? ⁵ Tun tsatyin xico ña can, cuaha xaan xuhun cua ñihi ña tsihin can, tan cuvi jatinyee ña tsi nyivi ndaahvi tsihin xuhun can —catyi ra naha.

Tan cuxaan ra naha tsi ña.

⁶ Maa tyin ra Jesús catyi ra:

—¡Jaña ndo tsi ña! ¿Nacuenda cuñi ndo jandu uvi iñi ndo tsi ña? Tan tsa vaha javahá ña tsihin yu. ⁷ Tyin nyivi ndaahvi tandihi ñi quivi cua cuyucu ñi tsihin ndo, maa tyin yuhu, ña naha ca cunyii yu tsihin ndo. ⁸ Naha ihya javahá ña ndihi cuhva cuvi ñi javahá ña. Tyihí ña ndutya tami cuñu ñuhu yu, tumaa tuhvá maa yo javahá tsihin cuñu ñuhu nyivi tsa ndi cumañi ca quihvi ñuhu ñi. ⁹ Tsa nditsa catyi yu tsihin ndo, tyin tandihi ityi nu cua cahan nyivi tuhun Nyoo naniñ cahnu nu ñuhu ñayivi, cua cahan ñi

tuhun ñaha ihya tan tsa javahā ña, tyin tacan tan ña naa iñi nyivi tsi ña —catyí ra Jesús.

*Nu xico ra Judas tsi ra Jesús
(Mt. 26.14-16; Lc. 22.3-6)*

¹⁰ Tsa yahā yacan tan quita iin ra tsitsi tsa utsi uvi ra tsicá tsihin ra Jesús. Ra ihya cuví ra Judas Iscariote. Tsaḥan ra tsicahān ra tsihin ra jutu cuví ityi nuu naha ra, tan jandaḥ ra tyiñu tsihin ra naha tyin cua cuhva cuenda ra tsi ra Jesús tsi ra naha. ¹¹ Cuhva tsa tsiñi ra naha tsa caahān ra, si xaan cuñi ra naha cuví, tan catyí ra naha tsihin ra tyin cuhva ra naha xuhun tsi ra. Tacan tan quitsahā nducú ra Judas cuhva cuhva cuenda ra tsi ra Jesús tsi ra naha.

*Nu cuxiñi ra Jesús tsihin ra tsicá tsihin ra
(Mt. 26.17-29; Lc. 22.7-23; Jn. 13.21-30; 1 Co. 11.23-26)*

¹² Quivi jihna ñi tsa quitsahā vico nu tsatsi nyivi paan tsa nduve yutsan iya yihí tan quivi tuhva ñi tsañi mbee lee tan jamañi ñi tsi Nyoo, ra tsicá tsihin ra Jesús tsicá tuhun ra naha tsi ra, tan catyí ra naha:

—¿Numaa cuñi un cuhun ndi janduvaha ndi tsa cuxiñi un cuenda vico pascua ihya?

¹³ Tacan tan tava tyiñu ra tsi uvi taahan ra naha tan catyí ra tsihin ra naha:

—Cuaahan ndo tsitsi ñuu, tan ican cua nañi ndo iin rayi yosó soco iin quivi ndutya. Tsa nyehe ndo tsi ra, cuanyicun ndo tsi ra. ¹⁴ Tsa tsaa ndo yuvehe nu cua quihvi ra, catyí ndo tyehen tsihin tsitoho vehe can: “Ra Maestro cuñi ra coto ra numaa nyaá cuarto nu cua jacahnu ra vico tsihin ra tsicá tsihin ra”, catyí ndo. ¹⁵ Tan cua janaha ra iin cuarto cahnu nu tsinu uvi pisu tsi ndo. Tsa nduvahā maa tsitsi tsi jahā ra, javaha ndo tsa cuxiñi yo tsitsi vehe can—catyí ra Jesús tsihin ra naha.

¹⁶ Tacan tan cuahān ra naha. Tsa tsaa ra naha tsitsi ñuu can, nañiñi ra naha tandiñi maa cuhva catyí ra Jesús tsihin ra naha. Tan javahā ra naha tsa cua cuxiñi ra naha cuenda vico pascua. ¹⁷ Tsa ndiñi javahā ra naha tsa cua cuxiñi ra naha, tacan tan cuahān nyico ra naha nu nyii ra Jesús. Tan tsa cunaaha, cuahān ra Jesús, cuacuxiñi ra tsihin tsa utsi uvi ra tsicá tsihin ra. ¹⁸ Tan cuhva tsa nyecú ra naha tsatsí ra naha nu mesa, tan catyí ra Jesús:

—Tsa nditsa catyí yu tsihin ndo tyin iin nyoocho tsa tsatsí tsihin yu cua xico tsi yu tsi ra xaan iñi tsi yu.

¹⁹ Tacan tan nducuihyā xaan cuñi ra naha, tan quitsahā tsicá tuhun tan iin tan iin ra naha tsi ra, tan catyí ra naha:

—¿A yuhu?

Tacan tan tsicá tuhun tucu inga ra tan catyí ra:

—¿A yuhu?

²⁰ Tan nacahān ra Jesús tan catyí ra:

—Ña tandiñi ndo. Intuhun ñi ra tsitsi tsa utsi uvi ndo. Tan ra ican cuví ra tsa jatyi paan iin ñi tsitsi coho tsihin yu. ²¹ Tyin yuhu, Rayi tsa quee nda gloria, cua tahan yu tumaa caahān maa nu tutu Nyoo tyin cua tahan yu. Maa tyin jndahvi ra ndaahvi tsa cua xico tsi yu! Vaha ca tun tsatyin ña cacu ra —catyí ra Jesús.

²² Tan tsitsi tsa tsatsí ra naha, tacan tan quihñi ra Jesús iin paan tan nacuhva ra tyahvi nyoo tsi Nyoo tsa cuenda can, tan tsahnu sava ra can, tan tsahā ra can tsi ra tsicá tsihin ra, tan catyí ra:

—Catsi ndo paan ihya tyin tsehe cuví tumaa cuñu ñuhu yu —catyí ra tsihin ra naha.

²³ Tsa yahā yacan quihñi ndiñi ra vasu nu yihí vinu. Tsa yahā tsahā ra tyahvi nyoo tsi Nyoo, tacan tan tsahā ra can tsi ra naha. Tandihí ra naha tan tsiñi ra naha vinu tsa yihí tsitsi vasu can. ²⁴ Tan catyí ra tsihin ra naha:

—Vinu ihya cuví tumaa ñiñi yu tyin tsihin ñiñi yu cua ndoo Nyoo tuhun tsaa tsihin ndo tyin cua cati ñiñi yu tsa cuenda tsa vaha tsi nyoocho tan tsa vaha tsi cuaha nyivi. ²⁵ Tsa nditsa catyí yu tsihin ndo tyin ña cua coho ca yu vinu tsa cuví ndutya yucu vixi uva, nda cuenda coho yu vinu tsaa nda nu ndacá ñaha Nyoo quivi tsaa yu ndacan —catyí ra Jesús tsihin ra naha.

Nu jacotó ra Jesús tyin cua cahan ra Pedro tyin ña nacotó ra tsi ra

(Mt. 26.30-35; Lc. 22.31-34; Jn. 13.36-38)

²⁶ Tsa ndiñi tsita ra naha yaa Nyoo, tan cuahān ra naha yucu yutun Olivo. ²⁷ Tacan tan catyí ra Jesús tsihin tandiñi ra naha:

—Tandiñi maa ndo tan cua nacoo ihñi ndo tsi yu tsa cuaa vityin tyin catyí nu tutu Nyoo tyehen: “Tandiñi mbee ticatyí jana yu cua cuhun tsiyo ti naha ti siin siin ityi tyin cua cahñi yu tsi ra jahá cuenda tsi ti naha ti”, catyí tsi. ²⁸ Maa tyin tsa yaha nandoto yu, jihna ca yu cua cuhun Galilea tsa ndi cumañi ca cuhun nyoocho —catyí ra Jesús tsihin ra naha.

²⁹ Tacan tan catyí ra Pedro tsihin ra:

—Vasu ndi maa nacoo ihñi tandiñi ra naha tsi un, maa tyin yuhu ña cua nacoo ihñi maa yu tsi un —catyí ra tsihin ra Jesús.

³⁰ Maa tyin ra Jesús catyí ra tsihin ra:

—Tsa nditsa catyí yu tsihin un, tyin tsa cuaa vityin, tsa ndi cumañi ca vacu tsitoocho tsa tsinu uvi tsaha, uñi tsaha ca cahan un tyin ña nacotó un tsi yu —catyí ra Jesús tsihin ra Pedro.

³¹ Maa tyin jañiñi ra Pedro tan catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra Pedro.

Tan juvin ñi tacan catyí tandiñi ca ra naha.

Nu nyií ra Jesús Getsemaní tsicán tahvi ra tsi Nyoo

(Mt. 26.36-46; Lc. 22.39-46)

³² Tacan tan tsaá ra Jesús tan ra tsicá tsihin ra iin nu nañi Getsemaní. Tan catyí ra Jesús tsihin ra naha:

—Ndoo ndo ihya tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

³³ Tan quihín ra tsi ra Pedro, ra Jacobo tan ra Juan cuahán tsihin ra. Tan tsaá tucuiihsa iñi cahnu tsi ra tan tuñu cuñi ra. ³⁴ Tan catyí ra tsihin ra naha:

—Cuiihsa xaan cuñi yu; cahñi ña maa tucuiihsa iñi ihsa tsi yu, cuñi yu. Ndoo ndo ihsa, tan ña cusu ndo —catyí ra.

³⁵ Tacan tan cuahán ra luxa ca ityi nuu. Tan tsicuiñi tsiti ra nu ñuhu tan tsaquín ra nuu ra nda nu ñuhu. Tan tsicán tahvi ra tsi Nyoo tan catyí ra:

—Tun tsatyin cuvi ña cuhva un nyehe yu tundoho tsa cua nyehe yu —catyí ra tsicán tahvi ra.

³⁶ Tan tsa tsicán tahvi ra, catyí ra:

—Jutu Mañi yu, tsa cuenda yoocho nduve tsa ña cuvi javaha un. Tun yoocho tan cuñi un cuvi jatsiyo un tundoho ihsa siqui yu. Maa tyin na cuvi maa cuhva cuñi maa un, tan ñavin cuhva cuñi maa yu —catyí ra Jesús tsicán tahvi ra.

³⁷ Tacan tan cuahán ra nu nacoq ra tsi uñi ra tsicá tsihin ra. Tsa tsaá ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cunyeé iñi un coo nyito un tsihin yu ndi intuhun hora? ³⁸ Ña cusu ndo; ndacan tahvi ndo tsi Nyoo, tyin tacan tan ña cua javaha ndo cuhva cuñi nu ña vaha. Tsa nditsa tyin aña ndo cuñi xaan tsi nanducu tsi tsi Nyoo, maa tyin cuñi ñuhu ndo cuvi tsa vita cuñi —catyí ra Jesús tsihin ra naha.

³⁹ Tacan tan cuahán nyico ra inga tsaha. Tan tsicán tahvi ra tsi Nyoo juvin iñi tsihin tuhun tsa cahán ra tsa jihna ñi. ⁴⁰ Tacan tan tsaá nyico ra inga tsaha, nu yucú ra naha tan nyehe ra tyin quixí nyico ra naha, tyin tsindasí maa tinuu ra naha jahá ñumaahna. Tan ña tsitó ra naha náa nacahan ra naha tsihin ra. Ndi maa ra tan ña cahán ca ra. ⁴¹ Tan cuahán nyico ra. Tsa tsaá ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan quitatu ndo tyin tsa cundaq tyiñu. Ra tsa cua cuhva cuenda tsi yu tsi ra xaan iñi tsi yu naha ra tsa vatsí ra tyin tsa tahañ tsi hora tsa cua cuhva cuenda ra tsi yuhu, Rayi tsa quee nda gloria. ⁴² Ndúvita ndo, cohon ndo tyin tsa vatsí ra tsa xico tsi yu —catyí ra Jesús tsihin ra naha.

Nu tsahq cuenda ra Judas tsi ra Jesús tsi nu xaan iñi tsi ra nahnú

(Mt. 26.47-56; Lc. 22.47-53; Jn. 18.2-11)

⁴³ Ra jutu cuvi ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra; cuaha xaan nyivi jacuhún ra naha tsihin ra Judas, iin ra tsicá tsihin ra Jesús, tyin tñi ñi tsi ra Jesús. Juhva ñi ndahá mityi tan juhva ñi ndahá yutun. Ndi caahán ca ra Jesús nyaá ra tan tsaá ra Judas tsihin nyivi cuaha can. ⁴⁴ Tsa ndi cumañi ca cuhun ra Judas, ra tsa xico tsi ra Jesús, tsa catyí maa ra tsihin nyivi náa cua javaha ra tan coto ñi ndáa ra cuvi ra Jesús. Tan cahán ra tyehen:

—Ra tsa cua tyaa yuhu yu, ra ican cuvi ra Jesús tsa cua quihín ndo. Quihín ndo tsi ra tan jahá cuenda vaha ndo coto cunu ra —catyí ra nu quitsi tsi.

⁴⁵ Tsa tsaá ra Judas nu nyií ra Jesús natuhva ra nu nyaá ra tan catyí ra tsihin ra: —Maestro.

Tan tyaa yuhu ra tsi ra. ⁴⁶ Tacan tan quihín ra naha tsi ra Jesús cuahán tsihin ra naha.

⁴⁷ Maa tyin iin ra nyií tsihin ra Jesús, tava ra mityi ra tan tsahnya ra soho musu ra jutu tsaahnu cuvi ityi nuu. ⁴⁸ Tacan tan catyí ra Jesús tsihin ra quihín tsi ra:

—¿A ñasuhu cuvi yuhu? tyin vatsí ndo vatsi quihín ndo tsi yu tsihin mityi tan yutun. ⁴⁹ Ndihi quivi tsinyi yu jacuahá yu tsi ndo tsitsi vehe ñuhu cahnu, tan ña quihín ndo tsi yu. Tandihí tsehe cuvi tyin tacan tan cundaq tsa catyí nu tutu Nyoo —catyí ra Jesús tsihin ra naha.

⁵⁰ Tacan tan tsinu tandihí ra tsicá tsihin ra, tan ndoo intuhun ña maa ra jahá ra naha. ⁵¹ Maa tyin ndoo intuhun ca ra tyuvaa tan cuahán ra cuanyicún ra tsi ra, ndasí ra tsihin iin ticatyí tan tñi ndihí ra naha tsi ra. ⁵² Maa tyin nacoq iñi ra ticatyí can tan tsinu tandihí ra.

Nu tsicq tuhun ra mandoñi naha ra tsi ra Jesús tun juvin Sehe Nyoo tsi ra

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tacan tan tsindacá ra naha tsi ra Jesús tsi ra jutu tsaahnu cuvi ityi nuu tan ndu iin tucu tandihí ra jutu cuvi ityi nuu naha ra tan ra cuvi mandoñi nyivi Israel naha ra, tan ra maestro cuenda ley vehe ñuhu naha ra. ⁵⁴ Ra Pedro nyicún tsica nyicún tsica ñi ra tsi ra naha cuahán ra. Tan tsaá ra nda nuquehe yuvehe ra jutu tsaahnu cuvi ityi nuu can. Tan ndoo ra tuñu ra ñuhu tsihin ra vitya naha ra.

⁵⁵ Ra cuvi jutu ityi nuu naha ra, tan tandihí ca ra cumi tyiñu naha ra nducú ra naha cuatyí tyaa ra naha siqui ra Jesús, tyin tacan tan cuvi cahñi ra naha tsi ra. Maa tyin

ña ñihĩ maa ra naha cuatyĩ tyaa ra naha tsi ra. ⁵⁶ Cuaha xaan nyivi caħan cuendu siqui ra, maa tyin ña nacatsĩ tahaan maa tuhun caahán ndi intuhun ñi. ⁵⁷ Yihĩ ñi nduvitá ñi tan caħan ñi maa ñi maa cuendu siqui ra, tan catyĩ ñi:

⁵⁸ —Nyuhu tsiñĩ ndi tsa caħan ra tan catyĩ ra tyehen: “Yuhu cua canĩ yu vehe ñuhu cahnu tsa javahá nyivi. Tan cua janduvita yu inga vehe ñuhu tsitsi tsa uñi quivĩ ñi. Maa tyin ñavin tahaan vehe ñuhu tsa javahá nyivi” catyĩ ra —catyĩ ñi.

⁵⁹ Vasu ndi maa tacan caahán ñi, maa tyin ña nacatsĩ tahaan maa tsa caħan ñi.

⁶⁰ Tacan tan nduvitá ra jutu tsaahnu cuvĩ ityĩ nuu mahĩu tandihĩ ra yucú ican naha ra, tan tsicá tuhun ra tsi ra Jesús, tan catyĩ ra:

—¿A ña cua nacahan un nu caahán nyivi ihya? ¿A nditsa tsa caahán ñi, o ña nditsa? —catyĩ ra

⁶¹ Maa tyin ña nacahan maa ra Jesús tan nduve maa náa caħan ra. Tacan tan ra jutu tsaahnu cuvĩ ityĩ nuu tsicá tuhun ra tsi ra inga tsaha, tan catyĩ ra:

—¿A yooħo cuvĩ ra Cristo, Sehe Nyoo ii tsa tsahá tsa vaha?

⁶² Tan ra Jesús catyĩ ra tsihin ra:

—Juvĩ. Nyooħo cua nyehe ndo tsi yuhu, Rayĩ tsa quee nda gloria, nyaá yu xiin cuaha Nyoo, ra iyó tandihĩ tunyee iñi, tan cua nyehe tucu ndo nu quĩsi yu nu vico ityĩ andivĩ —catyĩ ra tsihin ra.

⁶³ Tacan tan tsahnyá ra jutu tsaahnu cuvĩ ityĩ nuu jahma ra tumaa iin seña tyin ña taahán iñi ra tsa caahán ra Jesús tyin cuñi maa ra tyin ña vaha tsa caahán ra, tan catyĩ ra:

—Ña tsiñĩ ñuhu ca tsa nducu yo tsi ra cuvĩ tsa ndaa. ⁶⁴ Tyin tsa tsiñĩ maa ndo tsa caħan ra. Tsiçoo cuatyĩ ra nuu Nyoo tsihin tuhun caħan ra. ¿Náa catyĩ ndo vityin? —catyĩ ra.

Tacan tan nacahan tandihĩ ra naha tan catyĩ ra naha tyin taahán tsi cúu ra.

⁶⁵ Tacan tan quĩtsahá tivĩ sũ juhva ra naha tsi ra. Tyasĩ ra naha nuu ra, tan cañĩ ra naha tsi ra tsihin tsiqui tan catyĩ ra naha tsihin ra:

—¿Cahan tsihin ndi yóo cañĩ tsi un! —catyĩ ra naha tsihin ra.

Tan cañĩ tucu ra vitya naha ra nuu ra.

Nu caħan ra Pedro tyin ña nacotó ra tsi ra Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Tsitsi tsa ndi nyiĩ ra Pedro nuquehe tsata vehe ra jutu tsaahnu cuvĩ ityĩ nuu, tsaa iin ñaha cuvĩ musu ra jutu can. ⁶⁷ Cuhva tsa nyehe ñaha can tsi ra Pedro nyaá ra tuñú ra ñuhu, quĩtsahá nyehé xaan ña tsi ra, tan catyĩ ña tsihin ra:

—Tsicá tucu yooħo tsihin ra Jesús, ra ñuu Nazaret can —catyĩ ña tsihin ra.

⁶⁸ Maa tyin ra Pedro tyihĩ xeehe ra, tan catyĩ ra:

—Yuhu ña nacotó yu tsi ra can, tan ndi ña tsitó yu náa caahán un —catyĩ ra tsihin ña.

Tacan tan quĩtá ra ityĩ yuhu cora. Tan tsacú ñi tsitooħo. ⁶⁹ Tacan tan ñaha can nanyehe nyico ña nu nyaá ra inga tsaha tan catyĩ ña tsihin ra nyecú ican naha ra:

—Ra vaha iñi tsi ra can cuvĩ ra ihya —catyĩ ña.

⁷⁰ Maa tyin tyihĩ xeehe nyico ra inga tsaha. Tacan tan ña naha ñi tan catyĩ ra yucú ican naha ra tsihin ra Pedro:

—Nditsa tyin ra vaha iñi tsi ra can cuvĩ yooħo, tyin ra Galilea cuvĩ un, tan caahán un tumaa caahán nyivi Galilea —catyĩ ra naha tsihin ra.

⁷¹ Tacan tan iyo xaan caahán ra Pedro, tan catyĩ ra:

—¿Tsitó vaha maa Nyoo tyin ña nacotó yu tsi ra tsa caahán ndo tuhun! ¿Na cahĩi maa Nyoo tsi yu tun ña nditsa yu tsa caahán yu! —catyĩ ra.

⁷² Juvĩ ñi cuhva can navacú tsitooħo tsa tsinu uvi tsaha. Tacan tan nducuhun iñi ra Pedro tsa caħan ra Jesús tsihin ra: “Tsa ndi cumañi ca vacu tsitooħo uvi tsaha, yooħo tsa yahá caħan un uñi tsaha tyin ña nacotó un tsi yu.” Tsa nducuhun iñi ra Pedro tsehe, quĩtsahá ra tsacú ra.

15

Nu jaqueé yuhu ra Pilato tsi ra Jesús

(Mt. 27.1-2, 11-14; Lc. 23.1-5; Jn. 18.28-38)

¹ Tan tsa tuvĩ inga quivĩ ndu iin ra jutu cuvĩ ityĩ nuu naha ra tsihin ra mandoñi naha ra tsihin ra maestro cuenda ley vehe ñuhu naha ra, tan tandihĩ ca ra cumĩ tyiñu tsa yihĩ ndaha tsi nyivi Israel. Nuuhĩ ñi maa ra Jesús tan tsindacá ra naha tsi ra nuu ra Pilato. ² Tan tsicá tuhun ra Pilato tsi ra, tan catyĩ ra:

—¿A juvĩ un cuvĩ rey nyivi Israel?

Nacahan ra Jesús tan catyĩ ra:

—Juvĩ yu, tumaa caahán maa un.

³ Tan cuaha xaan cuendu caħan ra cuvĩ jutu ityĩ nuu naha ra siqui ra Jesús. ⁴ Tacan tan tsicá tuhun nyico ra Pilato tsi ra inga tsaha, tan catyĩ ra:

—¿A ña cua nacahan maa un? Nyehe, cuaha xaan cuatyĩ tyaa ra naha siqui un —catyĩ ra.

⁵ Maa tyin ra Jesús ña nacahan maa ra. Yacan cuenda ña ñihĩ ra Pilato náa caħan ra.

Nu tsahá ra Pilato ndatu tsa cúu ra Jesús

(Mt. 27.15-31; Lc. 23.13-25; Jn. 18.38—19.16)

⁶ Vico pascua tuhvá ra Pilato nacoó nuña iin ra yucú vehe caa. Tan tavá ra ndáa ra cuñí maa nyivi tyin tava ra. ⁷ Quiví can nyií iin ra nañí Barrabás vehe caa, tsihin inga ca ra tsahñí nyivi nu cuvaq nyivi siquí ra ndacá ñaha. ⁸ Tan tsahan nyivi tsicahan ñi tsihin ra Pilato na jaña ra iin ra yucú vehe can tumaa tuhvá maa ra javahá. ⁹ Tan nacahan ra Pilato, tan catyí ra:

—¿A cuñí ndo tsa jaña yu tsi ra cuví Rey ndo?

¹⁰ Tacan cahan ra tyin tuví iñi ra tyin tsahá cuenda ra jutu cuví ityi nuu naha ra tsi ra Jesús tsi ra tsa cuenda tsa ndasi cuñí ra naha nyehe ra naha tsi ra tyin cuaha nyivi nyicún tsi ra. ¹¹ Maa tyin ra jutu cuví ityi nuu can naha ra natyuhú ra naha tsi nyivi tsa cahan ñi na tava ra Pilato tsi ra Barrabás vehe caa. ¹² Tacan tan tsicá tuhun ra Pilato tsi ñi, tan catyí ra:

—¿Tun tacan, náa cuñí ndo javaha yu tsihin ra tsa jacunañí ndo Rey cuenda ndo? —catyí ra tsihin ñi.

¹³ Tacan tan cana tsaa ñi, tan catyí ñi:

—¡Tyaa tsi ra nu cruu na cúu ra! —catyí ñi.

¹⁴ Tan catyí ra Pilato tsihin ñi:

—Maa tyin, ¿náa tsa ña vaha javahá ra? —catyí ra.

Ñi ican quitsahá caná tsaa nyico ñi tan catyí ñi:

—¡Tyaa tsi ra nu cruu na cúu ra! —catyí ñi.

¹⁵ Tacan tan tsa cuñí ra Pilato ndoo vaha ra nuu nyivi, tavá ra tsi ra Barrabás vehe caa. Tsa yahá tavá ra tsi ra can, tavá tyiñu ra na ndoho ra Jesús. Tsa yahá ndohó ra Jesús, tan tsahá cuenda ra tsi ra tsi andaru na ticaa ra naha tsi ra nu cruu.

¹⁶ Tacan tan tsindacá ra andaru can naha ra tsi ra nuquehe vehe tyiñu. Tan jandu iin ra naha tandihí ca andaru. ¹⁷ Tan jacunditsí ra naha iin jahma cuaaha tuun tsi ra. Tan javahá ra naha iin corona iñu. Tan tyihí ra naha can jiñi ra. ¹⁸ Tsa yahá yacan tan quitsahá caná tsaa ra naha tsata ra tan tsacú nducu ra naha tsi ra, tan catyí ra naha:

—¡Nacumi tsi un, yooho Rey nyivi Israel! —catyí ra naha.

¹⁹ Tan cañí ra naha jiñi ra tsihin yutun, tan tiví sii ra naha tsi ra. Tan tsicuiñí tsi ra naha nuu ra jahá ra naha tyin jacahnú ra naha tsi ra. ²⁰ Tsa yahá tsacú nducu ra naha tsi ra, tavá ra naha jahma cuaaha tuun tsa jacunditsí ra naha tsi ra. Tacan tan jacunditsí nyico ra naha jahma maa ra tsi ra. Tan cuahán ra naha tsihin ra cuaticaá ra naha tsi ra nu cruu.

Nu tyaa ra naha tsi ra Jesús nu cruu

(Mt. 27.32-44; Lc. 23.26-43; Jn. 19.17-27)

²¹ Ityi cuahán ra naha tsihin ra naha iin ra ñuu Cirene tsa nañí Simón. Tan cuví ra jutu ra Alejandro tan ra Rufo. Ndi vatsí nuhu ra

quee ra cuhu. Cuhva tsa cua yaha ra, jañiñí ra andaru naha ra tsi ra na cuiso ra cruu ra Jesús.

²² Tan tsindacá ra naha tsi ra Jesús iin nu nañí Gólgota, tan cuñí tsi catyí Yiquí Jiñi Ndiyi. ²³ Tan ican jacohó ra naha vinu sacá nuu tsihin numeri tsa nañí mirra tsi ra. Maa tyin ra Jesús ña cuñí ra coho ra can. ²⁴ Tsa yahá tyaa ra andaru naha ra tsi ra nu cruu, quihín ra naha jahma ra tan tavá cuenda ra naha tyin cuñí ra naha coto ra naha yóo cua jaha canaa intuhun intuhun jahma can.

²⁵ Tyaa ra naha tsi ra nu cruu caa iin tsa tuvi. ²⁶ Tan letra tsa tyaa ra naha jiñi cruu ra, catyí tsi nacuenta cua cúu ra. Tan catyí tsi tyehen: “Ra ihya cuví Rey nyivi Israel.” ²⁷ Tan tyaa ndihi ra naha uvi taahan ñasuhu tsihin ra. Iin iin ra naha tsa iin nu cruu. Iin ra xiin cuaha ra, tan inga ra xiin satyín ra. ²⁸ Tacan cuví tan cundaá cuhva catyí nu tutu Nyoo tyehen: “Javahá nyivi tsihin ra tumaa javahá ñi tsihin ra caquiñi.” ²⁹ Tan nyivi yahá ican jacuñí nyaa ñi tsi ra, tan javicó ñi jiñi ñi tsa tsacú nducu ñi tsi ra, tan catyí ñi:

—¡Jaan! ¡Yooho tsa cahan tyin cua cani un vehe ñuhu cahnu, tan tsitsi tsa uñi quivi cua janduvaha nyico un itsi, ³⁰ jacacu tsi un vityin tan nuu nu cruu juvin! —catyí ñi.

³¹ Tan juvin ñi tacan tsacú nducu tutu ra jutu cuví ityi nuu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyí ra naha:

—¡Jacacu ra tsi inga ca nyivi, maa tyin ña cuví jacacu ra tsi maa ra! ³² Tun nuu ra nu cruu vityin nyehe yo, tacan tan cua tsinu iñi yo tyin juvin ra cuví ra Cristo, Rey cuenda yo tsa cuví yo nyivi Israel —catyí ra naha.

Tan nda cuenda nu ñasuhu tsa ticaá nu cruu nduvi tsiyo xiin ra tan tsacú nducu ndihí nahnu tsi ra.

Nu tsihi ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva tsa cua tahan hora, ndunaq nanii cahnu nda cuanda caa uñi tsa tseñi. ³⁴ Tan juvin ñi cuhva can cana tsaa ra Jesús tsihin tandihí tunyee iñi ra, tan catyí ra:

—Eloi, Eloi, ¿lama sabactani? —tan cuñí tsi catyí: Nyoo Jutu yu, Nyoo Jutu yu, ¿nacuenta nacoq ihñi un tsi yu? —catyí ra.

³⁵ Juhva ra yucú ican naha ra tsiñí ra naha tsa cahan ra tan catyí ra naha:

—¡Jihna ndo! Caná tsaa ra tsi ra Elías, ra cuví ndusu yuhu Nyoo tsihin tsihana —catyí ra naha.

³⁶ Tacan tan tsinú xaan iin ra tsiquihín ra iin yahma tsa caá tumaa caá catyí, tan jatyií ra can tsihin vinu iya. Tan tyaa ra can iin nu yutun tan jatuhvá ra yuhu ra Jesús tyin coho ra vinu can, tan catyí ra:

—Na cuatu nuu yo. Nyehe yo tun quitsi ra Elías januu ra tsi ra nu cruu can —catyí ra.

³⁷ Tacan tan ñihi xaan cana tsaa ra Jesús, tan tsihi ra. ³⁸ Tan jahma tsa ticaá tsitsi vehe ñuhu cahnu ndatá sava tsi, nda siqui tan nda cuanda ityi tsaha. ³⁹ Tan ra capitán tsa yihí ndaha andaru tsa nyaá yatyin ñi nu ticaá ra Jesús nyehe ra nácaa cana tsaa ra, tan nácaa tsihi ra, tacan tan catyí ra:

—Nditsa nditsa cuii tyin Sehe Nyoo tsi ra ihya —catyí ra.

⁴⁰ Tan ndasava ñi nyecú tucu juhva ñiñaha nyehe ñi. Tan mahñu ñi can nyii ña María tsa quee ñuu Magdala, tan ña María sihi ra José tan ra Jacobo ra tyuvaa ca. Tan nyii tucu ña Salomé. ⁴¹ Ñiñaha ihya tsinyicun ñi tsi ra Jesús, tan jatyinyee ñi tsi ra quivi tsicá nuu ra ityi Galilea. Tan yucú cuaha tucu ñiñaha inga ñuu tsa tsaa tsihin ra ñuu Jerusalén ícan.

Nu tsicutsi ra naha tsi ra Jesús

(Mt. 27.57-61; Lc. 23.50-56; Jn. 19.38-42)

⁴² Quivi tsa tuhvá nyivi janduvaha tsa catsi ñi cuenda inga quivi tuhvá ñi quitatu, juvin ñi tseñi can ⁴³ tsaa ra José ra ñuu Arimatea nu nyii ra Pilato. Ra José can cuvi ra iin ra nyisó tyiñu cahnu vehe tyiñu, tan ndatú tucu maa ra tsi ra tsa cua jaquitsi Nyoo tyin cundaca ñaha nu ñuhu ñayivi. Ña nayuhvi ra tan tsahan ra tsindacan ra cuñu ñuhu ra Jesús tsi ra Pilato. ⁴⁴ Tsa tsito ra Pilato tyin tsa yaha tsihi ra Jesús, iyo xaan cuñí ra. Tacan tan cana ra tsi iin capitán tan tsicá tuhun ra tsi ra tun nditsa tyin tsa tsihi ra Jesús. ⁴⁵ Tan tsa tsito vaha ra Pilato tyin tsa yaha tsihi ra Jesús, tava tyiñu ra na cuhva ra andaru naha ra cuñu ñuhu ra tsi ra José. ⁴⁶ Tacan tan tsijatá ra José iin jahma cuitsin tsa tsinu tsihin jahma vaha tsa nañi linu, tan januu ra cuñu ñuhu ra Jesús nu cruu. Yaha can tan cava nuu ra jahma can cuñu ñuhu ra. Tacan tan tyihi ra cuñu ñuhu ra tsitsi iin ñaña tsa nyaá nduvahá tsitsi iin cava. Tan tyasi ra yuhu ñaña can tsihin iin yuu cahnu. ⁴⁷ Tan ña María, tsa quee ñuu Magdala, tan ña María, sihi ra José, tsahan ñi, tsinyehe ñi nu tinyi ra José can cuñu ñuhu ra Jesús.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Tsa yaha quivi quitatú nyivi, ña María ñuu Magdala, tan ña María sihi ra Jacobo, tan ña Salomé jatá ñi ndutya tami tyin cuñí ñi cuhun ñi cutiyi ñi can cuñu ñuhu ra Jesús. ² Tacan tan cuahán ñi nu nyaá ñaña ra tsa cunditsin cuii ñi quivi quitsahá vitya. Tan tsaa ñi ican cuhva tsa cua cana cuii ñi ñicanyii. ³ Tan ityi cuahán ñi natuhun tahan ñi tan catyí ñi:

—¿Yóo cua jatsiyo yuu yuhu ñaña can? —catyí ñi.

⁴ Maa tyin cuhva tsa tsaa ñi nyehe ñi tyin tsa catsiyo yuu cahnu tsa ndasí yuhu ñaña can. ⁵ Tan cuhva tsa quihvi ñi tsitsi cava nu nyaá ñaña can, nyehe ñi nyaá iin ángel tsiyo cuaha. Tan caá ra tumaa caá iin ra tyuvaa. Nditsi ra jahma cuitsin cañi. Tan nayuhvi xaan ñi. ⁶ Maa tyin catyí ra tsihin ñi:

—Ña nayuhvi ndo. Tsitó yu tyin nanducú ndo tsi ra Jesús, ra ñuu Nazaret, ra tsa tsihi nu cruu. Maa tyin nduve ca ra nyii ihya vityin tyin tsa nandoto ra. Nyehe ndo nu tinyi ra naha tsi ra. ⁷ Cuaahan ndo tan jacoto ndo tsi ra Pedro tan tsi inga ca ra tsicá tsihin ra Jesús. Tan catyí ndo tsihin ra naha tyin tsa cuahán ra Galilea tan cua cuatu ra tsi ra naha ndacan, tumaa catyí maa ra tsihin ra naha tsa ndi cumañi ca cúu ra —catyí ángel can tsihin ñi.

⁸ Tacan tan tsinú xaan ñi cuahán ñi, tyin nihi ñi jahá tsa yuuhvi ñi. Tan ña cahan maa ñi tsa cahan ñi tsihin ndi intuhun maa nyivi tyin yuuhvi xaan ñi.

Nu quituvi ra Jesús nuu ña María quee ñuu Magdala

(Jn. 20.11-18)

⁹ Ra Jesús nandoto ra quivi quitsahá vitya. Tan quituvi ra jihna cuii ca nuu ña María ñuu Magdala. Juvin ña cuvi ña tsa tava ra utsa tatyí ña vaha. ¹⁰ Tsahan ña tsijacoto ña tsi ra tsicá tsihin ra, tyin yucú ra naha tsihin tucuiihya iñi tan tsacú ra naha. ¹¹ Maa tyin cuhva tsa tsiñi ra naha tyin nyito ra Jesús tan nyehe ña tsi ra, ña tsinu iñi ra naha.

Nu quituvi ra Jesús nuu uvi ra tsicá tsihin ra

(Lc. 24.13-35)

¹² Tsa yaha yacan, tan quituvi ra Jesús nuu uvi ra tsa cuahán ityi cuhu naha ra. Maa tyin siin cuhva caá ra nyehe ra naha. ¹³ Tan tsinuhú ra naha tsijacoto ra naha tsi tandihi ca ra naha. Maa tyin juvin ñi ña tsinu iñi ra naha tsa cahan ra can naha ra.

Nu tsaha ra Jesús tyiñu tsi ra tsa tsicá tsihin ra

(Mt. 28.16-20; Lc. 24.36-49; Jn. 20.19-23)

¹⁴ Yaha yacan tan quituvi ra Jesús nuu tandihi tsa utsi iin ra tsa tsicá tsihin ra, tsitsi tsa nyecú ra naha nu mesa. Tan cuxaan ra tsi ra naha tsa cuenda tsa ña tsinu iñi ra naha, tan tsa cuenda tucu tsa ndava añima ra naha tan ña tsinu iñi ra naha tsa cahan nyivi tsa nyehe tsi ra tsa yaha nandoto ra. ¹⁵ Tan catyí ra tsihin ra naha:

—Cuaahan ndo nani cahnu nu ñuhu ñayivi, tan cahan ndo tuhun Nyoo tsihin tandihi nyivi, tan catyí ndo tsihin ñi nácaa jacacú Nyoo tsi ñi. ¹⁶ Tan nyivi tsa cua tsinu iñi tan coondutya ñi, cua cacu ñi. Maa tyin

ñi tsa ña cua tsinu iñi cua ndoo cuatyí ñi siqui ñi tan cua cunaa ñi. ¹⁷ Tan tandihí tsa iyo ihya cua javaha nyiví tsa cua tsinu iñi tsi yu: Tsihin sivi yu cua tava ñi tatyí ña vaha, tan cua cahan ñi inga yuhu tsa ña tuhvá ñi cahan. ¹⁸ Cua tiin ñi coo, tan tatun coho ñi o catsi ñi tsa yihí venenu, ña cua jacuehe can tsi ñi. Cua tyiso ndaha ñi jiñi nyiví cuuhví, tan cua nduvaha nyiví.

*Nu ndaa ra Jesús andiví
(Lc. 24.50-53)*

¹⁹ Tsa ndihí cahan Jutu Mañi yo Jesús tsihin ra naha, tacan tan ndaa ra andiví, tan tsinyaá ra xiin cuaha Nyoo. ²⁰ Tacan tan ra tsicá tsihin ra quitá ra naha tan tsahan ra naha tandihí ñi ityi tsicahan ra naha tuhun Nyoo nácaa jacacú ra tsi yo. Juvin ñi maa Jutu Mañi yo jatyinyee tsi ra naha tyin tsahá ra tsa javaha ra naha cuaha tsa iyo. Tan tsihin yacan nyehe nyiví tyin nditsa tsa caahán ra naha.

Tan na cuvi tsi tacan ñi.

Tuhun Nyoo Tsa Tyaa Ra Lucas

Nu quitsahā jacotó ra Lucas tuhun ra Cristo tsi ra Teófilo

¹ Cuaha ñi nyivi nducú ñi cuhva tyaa ñi nuu tutu tandihi tsa cuvī nu yucú ndi ihya. Tyaa ñi cuhva ² nacatyí tuhun nyivi tsihin yo, ñi tsa nyehe tan cahan tuhun ra Jesús nda quivi jihna ñi. ³ Tan yuhu tucu tsa yaha cahvī yu tan nducú tuhun vaha yu tandihi tsa cuvī nda nu quitsahā. Yacan cuenda cuñi yu tyaa yu tuhun ihya tsa cuenda un, yoohe Teófilo, nda nu quitsahā tan nda nu ndihi. ⁴ Tyin tacan tan coto un tyin nditsa tsa jacuahā nyivi tsi un.

Nu jacotó iin ángel tsi ra Zacarías ama cua cacu ra Juan, ra cua jacoondutya tsi nyivi

⁵ Quivi tsa cuvī ra Herodes rey tanii cahnu cuenda Judea, tsicoq iin ra cuvī jutu, nañi ra Zacarías. Tan yihí ra cuenda ra cuvī jutu naha ra tsa nañi Abías. Tan ñasihi ra nañi ña Elisabet. Tata ra Aarón, ra cuvī jutu tahan tsanaha, cuvī ña. ⁶ Tan nduve maa cuatyí ñi nuu Nyoo. Tyin vaha xaan tyaá yahvi ñi tuhun caahán Nyoo Jutu yo. Tan yoñi maa cuvī tyaa cuatyí tsi ñi. ⁷ Tan nduve maa sehe ñi tsicoq. Tyin ña Elisabet, ña cuvī coo sehe ña. Tan tsa tsahnu xaan nduvi taahan ñi.

⁸ Iin quivi taahán tsi tandihi ra jutu tsa cutahan tsihin ra Zacarías, tsa jaha tyiñu ra naha tyiñu Nyoo. ⁹ Tan cuhva iyó maa ra cuvī jutu naha ra, tava ra naha suerte, ndaa ra cua tahan tsi quihvi tsitsi vehe ñuhu Jutu Nyoo, tyin cahmí ra cutu. Quivi can tahan tsi tsi ra Zacarías. ¹⁰ Tan cuaha nyivi yucú ityi tsata vehe ñuhu tsicán tahvi ñi tsi Nyoo, tsitsi tsa tsahmí ra cutu can. ¹¹ Tan tsitsi tsa ndi nyii ra ican tan quituvj iin ángel Jutu Nyoo nu nyii ra. Tan nyaá nyityi ángel can ityi xiin cuaha nu nyaá altar nu tsahmí ra cutu. ¹² Tan tsa nyehe ra Zacarías tsi ángel ican, iyo xaan cuñi ra. Tan nayuhvi xaan ra. ¹³ Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñi ra tsa cahan un tsihin ra. Tan cua coo iin sehe ña Elisabet ñasihi un. Tan cua cunañi ra Juan. ¹⁴ Si xaan cua cuñi un. Tan cuaha xaan nyivi cua cusii ndihi iñi quivi cua cacu ra. ¹⁵ Tyin sehe un, cahnu xaan cua cuvī ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quihvi Tatyí Ii Nyoo tsi ra tsa ndi cumañi ca cacu ra tan tandihi tyembru tsa cua coo ra. ¹⁶ Tan cuaha xaan nyivi Israel cua cunyicun ñi tsi Jutu yo Nyoo jaha ra. ¹⁷ Juvín ra cua cuhun ityi nuu Jutu Mañi yo. Tan cua coo tunyee iñi Nyoo tsi ra. Tan cua quihvi xaan Tatyí Ii Nyoo tsi ra. Tyin cua cuvī ra tumaa ra Elías,

ra cuvī ndusu yuhu Nyoo tahan tsanaha. Tan cua cuhva cuenda ra nácaa coo vaha nyivi iyó sehe tsihin sehe ñi. Tan cua janaha ra tsi nyivi caquiñi, na tyaa yahvi ñi tuhun caahán Nyoo. Tacan cua janduvaha ra tsi nyivi tan cua cuatu vaha ñi tsi Nyoo —catyí ángel tsihin ra Zacarías.

¹⁸ Tan tsicā tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe ñasihi yu? Tyin yuhu tsa tsahnu xaan yu. Tan tacan tucu ñasihi yu —catyí ra.

¹⁹ Tan ángel can nacahan ra tan catyí ra:

—Yuhu Gabriel nañi yu. Tan tsicā yu tyiñu Nyoo. Maa ra tava tyiñu tsi yu tyin jacotó yu tyiñu ihya tsi un tan jacotó yu tuhun vaha ihya tsi un. ²⁰ Tan vityin cua nduñihi un. Tyin ña tsinú iñi un tsa caahán yu tsihin un. Tan ña cua cuvī cahan un nda cuenda tsa yaha cacu sehe ñasihi un. Tan nda quivi cundaa tandihi tsa cahan yu tsihin un —catyí ángel ican tsihin ra.

²¹ Tan nyivi tsa ndatú tsi ra Zacarías ityi tsata vehe ñuhu, iyo xaan cuñi ñi tyin cucuee xaan ra tsitsi vehe ñuhu can. ²² Tan cuhva tsa quitā ra Zacarías, ña cuvī maa cahan ra tsihin ñi. Tan tuvj iñi ñi tyin iyó tsa nyehe ra tsitsi vehe ñuhu can. Tacan tan quitsahā caahán ra tsihin ñi tsihin ndaha ra. Tyin ña cuvī cahan ra.

²³ Tan quivi ndihi tyiñu jahá ra Zacarías vehe ñuhu can, tan cuanuñu ra yuvehe ra. ²⁴ Tsa yaha quivi can tan tsicuhun sehe ñasihi ra, ña Elisabet. Tan ña quitā maa ña tsata vehe tsa tandihi tsa uhun yoo. Tan tsicā iñi ña: ²⁵ “Tyehen javaha Jutu Mañi yu tsihin yu, tyin tacan tan ña cahan nyaa ca nyivi tsi yu”, cuñi ña tsicā iñi ña.

Nu jacotó iin ángel tsi ña María tyin cua cacu ra Jesús

²⁶ Tsa quitā iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyii Galilea. ²⁷ Tyin cahan ra tsihin iin ñaha yoco tsa nañi María. Tan tsa nyaá maa tsa cua tindaha ña tsihin ra nañi José, ra cuvī tata ra rey David. ²⁸ Tan quihvi ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandihi ca ñaha —catyí ángel ican tsihin ña.

²⁹ Tan tsa tsiñi ña tsa cahan ra, iyo xaan cuñi ña tsa cahan ra. Tan tsicā iñi ña: “¿Nacuenda tacan caahán ra ihya nacumi tsi yo?” tsicā iñi ña.

³⁰ Tan catyí ángel ican:

—Ña nayuhvi un, María, tyin ñihí un tumañi iñi Nyoo. ³¹ Vityin cua cuhun sehe un. Tan cua cunañi ra Jesús. ³² Cahnu xaan

ra cua cuvi ra. Tan Sehe Nyoo cahnu cua cuvi ra. Tan cua cuvi ra rey jaha Nyoo Jutu yo, tumaa cuvi ra David, tsii tsaahnu ra. ³³ Tyin cua cundaca ñaha ra tsi nyivi Israel tandihi maa tyembu. Tan ña cua ndihi maa tsa cundaca ñaha ra —catyí ángel can tsihin ña.

³⁴ Tacan tan tsicá tuhun ña María tsi ángel, tan catyí ña:

—¿Nacaa cua cuvi can? Tyin yuhu, ñaha ca coo yíi yu.

³⁵ Tan nacahan ángel tan catyí ra:

—Maa Tatyí Ii Nyoo cua quitsi siqui un. Tan tunyee iñi Nyoo, ra nyaá gloria, cua quitsi tan cua casi tsi siqui un tumaa iin vico. Yacan cuenda Ra Ii tsa cua cacu cua cunañi ra Sehe Nyoo. ³⁶ Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyivi tyin ñaha can ña cuvi coo sehe ña. Maa tyin vityin tsa ñuhú sehe ña. Tsa iñu yoo tsa ñuhú sehe ña. ³⁷ Tyin Nyoo nduve tsa ña cuvi jaha ra —catyí ángel tsihin ña.

³⁸ Tan catyí ña María:

—Yuhu cuvi yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

Nu cuahán ña María cuanyehé ña nu nyii ña Elisabet

³⁹ Tan iin quivi can, numi ñi cuahán ña María iin ñuu tsa canyii Judea nu maa ñi maa yucu iyó. ⁴⁰ Tan quihvi ña tsitsi vehe ra Zacarías. Tan nacuhva ña nacumi tsi ña Elisabet. ⁴¹ Tan tsa tsiiñi ña Elisabet tsa cahán ña María, tan natuñu sehe ña tsitsi ña. Tan ñihi nyaá Tatyí Ii Nyoo tsihin ña. ⁴² Tan ñihi xaan nacahan ña, tan catyí ña:

—Nyoo nasocó xaan ra tsi un, María, tan ñavin ca tandihi ca ñiñaha. Tan nasocó ra tsi sehe un. ⁴³ ¿Tan yóo cuvi yuhu? Tyin quitsi sihi Jutu Mañi yu quitsi nyehe ña nu nyaá yu. ⁴⁴ Cuhva tsa tsiiñi yu tsa cahán un, tan natuñu sehe yu tsitsi yu. Tyin sii xaan cuñi ra. ⁴⁵ Tan sii xaan cuñi tucu maa añima un tyin tsinú iñi un. Tyin cua cuvi cuhva tsa cahán Nyoo tsihin un —catyí ña Elisabet.

⁴⁶ Tan catyí ña María:

—Jacahnú yu tsi Nyoo tsihin tandihi añima yu.

⁴⁷ Tan sii xaan cuñi añima yu tsihin Nyoo ra jacacú tsi yu.

⁴⁸ Tyin cuvi yuhu iin ñaha ndaahvi tan Nyoo nyehe ndaahvi ra tsi yu.

Tan vityin tandihi quivi cua cahán nyivi tyin cahnu xaan tumañi iñi ñiñi yu.

⁴⁹ Tyin Nyoo, cahnu xaan cuvi ra. Tan cahnu tsa javahá ra tsihin yu.

Tan ii xaan sivi ra.

⁵⁰ Tan ndaahvi cuñi ra tsihin tandihi nyivi tsa cua coo tan tyaa yahvi ñi tsi ra.

⁵¹ Cahnu xaan tsa javahá ra tsihin tunyee iñi tsa iyó tsi ra.

Jatsiyó ra tsi nyivi tsa cahnu xaan tsicá iñi ñi.

⁵² Quinyaa ra tunyee iñi iyó tsi nu cuvi rey.

Tan cua janducahnu ra tsi nyivi ndaahvi.

⁵³ Tsaá Nyoo tsa vaha tsi nyivi cuñi coto tsa vaha.

Tan nyivi cuca tsa cuñi tyin nduve tsa tsiiñi ñuuu tsi ñi, tsihin ndaha ndii ñi, jacuhún ra tsi ñi.

⁵⁴ Jatyinyeé ra tsi nyivi Israel tsa cuvi ñi musu ra.

Tan ña naá iñi ra tsi ñi. Nyehé ndaahvi ra tsi ñi.

⁵⁵ Tumaa cuhva catyí Nyoo tsihin ra Abraham, tsii tsaahnu yo, tan tsihin sehe ra, tacan ñi javahá maa Nyoo —catyí ña María.

⁵⁶ Tan ña María ndog ña tsihin ña Elisabet uñi yoo. Tan tsa yahá uñi yoo can tan cuanuhú ña nda yuvehe ña.

Quivi cacú ra Juan, ra tsa jacoondutyá tsi nyivi

⁵⁷ Tsa tsaá quivi tsa cacú sehe ña Elisabet, jacacú ña iin rayii. ⁵⁸ Tan nyivi vehe ña tsihin nyivi tsa iyó yatyin ñi yuvehe ña, sii xaan cuñi ñi. Tacan tucu maa ña. Tyin vaha xaan tsa javahá Nyoo tsihin ña. ⁵⁹ Tan tsa quita una quivi tsa cacú ra, tan tyaa ra naha tuñi Nyoo tsi ra tumaa cuhva iyó maa ñi. Tan cuñi ra naha tsa cunañi ra Zacarías tumaa nañi maa jutu ra. ⁶⁰ Maa tyin sihi ra catyí ña:

—Ña cuvi. Tyin Juan cua cunañi ra.

⁶¹ Tan catyí ra naha:

—¿Nacuenda jacunañi un Juan tsi ra? Tan yoiñi nyivi ndo nañi tacan —catyí ra naha.

⁶² Tan quitsahá tsicá tuhun ra naha tsihin ndaha ra naha tsi jutu ra. Tyin coto ra naha náa sivi cuñi ra tsa cunañi ra. ⁶³ Tan tsicán jutu ra iin vitu, tan nuu vitu ican tyaa ra: “Juan cua cunañi ra”, tyaa ra.

Tan tandihi maa ra ican naha ra iyo xaan cuñi ra naha tsa tacan. ⁶⁴ Juvín ñi maa hora can nacahan ra Zacarías. Tan quitsahá jacahnú ra tsi Nyoo. ⁶⁵ Tan tandihi maa nyivi iyó yatyin yuvehe ñi, iyo xaan cuñi ñi cuvi. Tan tandihi maa nyivi tsa iyó yucu iyó Judea ican nacatyí tuhun tahan ñi tsa cuvi can. ⁶⁶ Tan tandihi maa nyivi tsa tsito can, tsicá iñi ñi, tan tsicá tuhun tahan ñi tsi ñi: —¿Yóo ra cua cuvi ra lee ihya? —catyí ñi. Tyin nditsa, Nyoo nasocó xaan ra tsi ra.

Nu jacahnú ra Zacarías tsi Nyoo

⁶⁷ Ra Zacarías jutu ra Juan, ñihi nyaá Tatyí Ii Nyoo tsihin ra. Tan tsaá cuenda ra tsa caahan Nyoo tsihin ra, tan catyí ra:

⁶⁸ —Cahnu xaan ra cuvi Jutu yo Nyoo cuenda yo nyivi Israel.

Tyin quitsi ra nu yucú yo, tsa cuvi yo nyivi maa ra. Tan jacacú ra tsi yo.

⁶⁹ Tan tsaḥa ra iin ra tsa cahnu xaan cuví tsi yo, ra cua jacacu tsi yo.

Tata ra David, ra tsa cuví musu Nyoo cuví ra.

⁷⁰ Tacan cua javaha ra, catyí Nyoo taḥan tsanaha, quívi cahan ra cuví ndusu yuhu ra, tan catyí ra naha tyehen:

⁷¹ Cua jacacu Nyoo tsi yo ndaha nu xaan iñi tsi yo, tan nuu tandihí nu tsa ndasi cuñí nyehe tsi yo.

⁷² Tan cua cundaahví iñi ra nyehe ra tsi nyívi yo tsa tsicoḡ taḥan tsanaha.

Tan cua nducuhun iñi ra tsa cahan ra tsihin ñi taḥan tsanaha.

⁷³ Cahan maa Nyoo tsihin ra Abraham, tsii tsaahnu yo,

⁷⁴ tan catyí ra tyin cua jacacu ra tsi yo ndaha nu xaan iñi tsi yo.

Tyin ña cua nayuhví ca yo jacahnu yo tsi ra.

⁷⁵ Tan maa ra cua janaha ra cuhva coo yo.

Tan vaha cua coo yo nuu ra tan coo yo maa ñi tsa cuenda maa ra tandihí quívi tsa cua coo yo ñayívi —catyí ra Zacarías.

⁷⁶ Tan catyí ra Zacarías tsihin lee can:

—Sehe luhlu yu, yooho cua cuví un ndusu yuhu Nyoo, ra nyaá gloria.

Tyin cuhun un ityi nuu Jutu Mañi yo. Tan cua cahan un tuhun ra tsihin nyívi tyin tsa cuñí quitsi ra.

⁷⁷ Tan cua jacoto un tsi nyívi tyin cua jaha Nyoo tucahnu iñi tsi ñi.

Tacan tan cacu añima ñi.

⁷⁸ Tyin Jutu yo Nyoo cuñí ra tsi yo. Tan cundaahví xaan iñi ra tsi yo.

Tan cua jaquitsi ra iin ra jatyinyee tsi yo. Tan cuví ra tumaa ñuhu ñicanyii.

⁷⁹ Tyin cua janaha ra ñuhu nditsin nu iyó nyívi nu naa, nu ndatú tuhun tsihi tsi ñi.

Cua janaha ra ityi ra tsi yo, ityi vaha —catyí ra Zacarías.

⁸⁰ Tan ra luhlu can cua cuahnu ca ra. Ñihi xaan tsicoḡ tunyee iñi tsi ra tsihin Tatyí li Nyoo. Tan tsicoḡ ra iin tsiqui ndii nda cuanda quívi tsa nacotoḡ nyívi Israel tsi ra.

2

*Quívi cacu ra Jesús
(Mt. 1.18-25)*

¹ Quívi ican tsicoḡ iin ra ndacá ñaha, ra cuví rey cahnu, nañi ra Augusto. Tava tyiñu ra tsi ra nyisó tyiñu naha ra na tyaa ra naha sivi tandihí nyívi tanii cahnu ñuu ñayívi. ² Ihya cuví tsa jihna ñi tsinyaá sivi nyívi. Tan ra Cirenio cuví ra ra ndacá ñaha tandihí ñuu nu cuví Siria. ³ Tan tandihí nyívi cuanuhú ñi ñuu ñi, tyin cua ndaca ñi sivi ñi. ⁴ Yacan quee ra José ñuu Nazaret tsa canyii Galilea. Tan cuahán ra ñuu Belén tsa canyii Judea, nu cacu ra rey David, tyin tata ra David cuví ra. ⁵ Cuahán ra cuandacá ra

sivi ra tsihin ña María, tan tsa nyaá maa tsa cua tindaha ñi. Tan ñuhú sehe ña. ⁶ Tan tsa ndi yucú ca ñi ñuu Belén ican tan quitsaha cuuhví tsitsi ña tyin tsa cua cacu sehe ña. ⁷ Tan ican cacu sehe nuu ña. Tan cava nuu ña jahma tsi ra. Tan nacaquin ña tsi ra tsitsi iin canuva nu tsatsí quiti itya. Tyin ña ñihí ñi iin vehe coo ñi.

Cuhva cahan ángel tsihin ra jahá cuenda mbee

⁸ Yatyin ñi ñuu Belén can yucú ra jahá cuenda mbee tsa tsacuaa. ⁹ Tan sana iñi ra naha quituví iin ángel Nyoo. Tan jandunditsin Jutu yo Nyoo tanii cahnu nu yucú ra naha. Tan nayuhví xaan ra naha.

¹⁰ —Ña nayuhví ndo —catyí ángel can—. Tyin vatsi cahan yu iin tsa vaha xaan tsihin ndo. Sii xaan cua cuñi tandihí cuíi maa nyívi tsa cuenda tsi. ¹¹ Vityin nda ñuu ra David cacu iin ra cua jacacu tsi nyívi. Cuví ra Cristo, ra cuví Jutu Mañi yo. ¹² Tan tsihin cuhva ihya cua nacoto ndo tsi ra: cua nañihí ndo tsi ra lee ican, cava nuu ra jahma tan canyii ra tsitsi iin canuva nu tsatsí quiti —catyí ángel can tsihin ra jahá cuenda mbee can.

¹³ Tan juvin ñi cuhva ican quituví cuaha xaan ángel tsihin ángel can, tan jacahnú xaan ra naha tsi Nyoo, tan catyí ra naha:

¹⁴ Cahnu xaan cuví Nyoo, ra nyaá gloria.

Tan nu ñuhu ñayívi, na coo tsa vaha añima nyívi tsa ñihí tumañi iñi Nyoo, catyí ra ángel naha ra.

¹⁵ Tacan tan tsa cuanuhú ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunyehe yo náa cuví. Tyin maa Jutu yo Nyoo jacotoḡ tsi yo —catyí ra naha.

¹⁶ Tacan tan numi xaan cuahán ra naha, tan nañihí ra naha tsi ra lee can tsihin ña María tan tsihin ra José. Tan canyii ra lee can tsitsi iin canuva nu tsatsí quiti itya. ¹⁷ Tan cuhva tsa nyehe ra naha tsi ra, quitsaha natuhún ra naha tandihí tuhun cahan ángel tsihin ra naha tsa cuenda lee ican tsihin ñi. ¹⁸ Tan tandihí nyívi tsa tsiñi tuhun caahán ra naha, iyo xaan cuñí ñi. ¹⁹ Maa tyin ña María naquihín cuenda ña tuhun ican tsitsi añima ña, tan tandihí tuhun ican tsicá iñi ña. ²⁰ Tan cuanuhú ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihí tsa nyehe ra naha tan tsa tsiñi ra naha. Tyin cundaá cuhva tsa catyí ángel ican tsihin ra naha.

Nu tyaa cuenda ñi tsi ra Jesús ndaha Nyoo tsitsi vehe ñuhu cahnu

²¹ Tsa ndu una quívi ra Jesús, tan tyaa ñi tuñi Nyoo tsi ra tyin tacan catyí tuhun tsaahnu maa ñi. Tan jacunañi ñi Jesús tsi ra. Juvín ñi maa sivi tsa catyí ángel tsihin ña

María quivi tsa ndi cumañi ca cuhun ra Jesús tsitsi ña.

²² Tan tsa yaha quivi cuhva catyí ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacu sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo. ²³ Tacan ñi javaha ñi tyin catyí ley Nyoo tyin: “Tandihi sehe nuu ñi tsa cuví rayíi, cua tyaa cuenda ñi tsi ra ndaha Jutu yo Nyoo”, catyí ley ican. ²⁴ Tan tsahan ñi tsijamañi ñi uvi taahan quiti, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curuu a uvi taahan paloma”, catyí ley can.

²⁵ Tan quivi can iyó iin ra ñuu Jerusalén nañi ra Simeón. Iin ra cuiti xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihi ca nyivi ñuu Israel ican. Tan nyaá Tatyí Ii Nyoo tsihin ra Simeón. ²⁶ Tan jacotó Tatyí Ii tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsi Jutu yo Nyoo. ²⁷ Tan Tatyí Ii jacuhun ra tsi ra Simeón can nda vehe ñuhu. Tan juvin ñi cuhva can tsaa jutu ra tan sihi ra Jesús tsihin maa ra nu cuví vehe ñuhu cahnu can, tyin javaha ñi cuhva catyí maa ley. ²⁸ Tan cuhva tsa tsaa ñi nu nyaá ra Simeón tan quihñ ra Simeón tsi ra Jesús. Tan tyihí jucun ndaha ra tsi ra. Tacan tan quitsaha jacahnú ra tsi Nyoo, tan catyí ra:

²⁹ —Jutu Mañi yu, vityin tsa cundaq cuhva tsa catyí maa un tsihin yu, tsa cuví yu musu un,

cuví jaña ndaha un tsi yu vityin, tan na cúu yu tsihin tsa vaha.

³⁰ Tyin tsa nyehe tsihin nuu yu tsi ra cua jacacu tsi ndi.

³¹ Tsa iyó ra ihya ityi nuu tandihi nyivi.

³² Tan cua cuví ra ñuhú tsa cua jandunditsin añauma nyivi tsa ñavin nyivi Israel cuví. Tan cahnu ca cua jaha ra tsi nyivi Israel, tsa cuví ndi nyivi cuenda maa un —catyí ra Simeón.

³³ Tan ra José tsihin sihi ra Jesús, iyo xaan cuñi ñi tsa tsiñi ñi tsa cahñ ra Simeón tsa cuenda lee ican. ³⁴ Tacan tan tsicán tahvi ra Simeón tsa cuenda ñi. Tan catyí ra tsihin ña María sihi ra Jesús:

—Nyehe tsi lee ihya. Cuaha xaan nyivi Israel ñuu Nyoo cua tsinu iñi tsi ra quivi coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsaha ra tsi ra tan cuví ra tumaa seña tsa cuenda yo. ³⁵ Tacan tan coto tandihi yo náa tsicá iñi nyivi tun tsinú iñi ñi o ña tsinú iñi ñi tsi ra. Maa tyin tsa cuenda yoohe, María, tsehe cuví tumaa iin mityi xaan tsa cua yaha añauma un —catyí ra Simeón tsihin ña.

³⁶ Tan ican, tsitsi vehe ñuhu cahnu can, nyíi tucu iin ñaha tsa cuví ndusu yuhu Nyoo.

Nañi ña Ana, tan sehe ra Fanuel, iin ra cuví tata ra Aser; cuví tsi ña. Tan tsa tsahnú xaan ña. Tan nda luhlu ña tan tindaha ña, maa tyin utsa cuiya ñi tsicoo ña tsihin yíi ña tan tsihi ra. ³⁷ Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo, tan tsicán tahvi ña tan iyó nyitya ña. ³⁸ Tan juvin ñi tsa ndi nyíi ca ra José tan ña María tsihin lee ican, tan tsaa ña Ana nu yucú ñi. Tan quitsaha nacuhvá ña tyahvi nyoo tsi Nyoo. Tan cahñ ña tuhun ra Jesús tsihin tandihi nyivi tsa yucú ican, nyíi tsa ndatú tsa cacu ñuu Jerusalén.

Nu cuanuhu ñi nda ñuu Nazaret

³⁹ Tacan tan tsa yaha tsa javaha ñi tandihi maa tsa taahán tsi javaha ñi cuhva catyí ley Jutu yo Nyoo, tan cuanuhu ñi nda ñuu Nazaret tsa canyí Galilea nu cuví ñuu maa ñi. ⁴⁰ Tan ra luhlu Jesús vatsi cuahnú ca ra. Tan cua ndunye ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

Nu cahñ ra luhlu Jesús tsihin ra maestro cuenda ley vehe ñuhu naha ra

⁴¹ Ra José tsihin sihi ra Jesús tuhva ñi tsicá vico pascua nda ñuu Jerusalén ndihi ñi cuiya. ⁴² Tan tsa quitá tsa utsi uvi cuiya ra Jesús, tan tsahan tandihi ñi nda ñuu Jerusalén, cuhva tuhun tsa iyó maa ñi. ⁴³ Tan quivi ndihi vico, tan vatsi nuhu ñi, maa tyin ra luhlu Jesús ndoo ra ñuu Jerusalén can. Tan ña jaha jutu ra tan sihi ra cuenda. ⁴⁴ Tsicá iñi maa ñi tyin vatsi maa ra tyañu tandihi nyivi ican. Tan ndihi iin quivi tsicá ityi ñi. Tacan tan quitsaha nanducú ñi tsi ra tyañu nyivi nacotó tsi ñi. ⁴⁵ Maa tyin ña nañiñi ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

⁴⁶ Tan tsa yaha uñi quivi tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley vehe ñuhu naha ra. Tyaa soho ra tuhun caahán ra naha. Tan tsicá tuhun ra tsi ra naha. ⁴⁷ Tan tandihi nyivi tsiñi tsa caahán ra, iyo xaan cuñi ñi tsihin tsa tsiñi tuñi tsa iyó tsi ra, tan tsihin tsa nacatyí tuhun ra. ⁴⁸ Cuhva tsa nyehe jutu ra tan sihi ra tsi ra, iyo xaan cuñi ñi, tan sihi ra catyí ña tsihin ra:

—Sehe luhlu yu. ¿Nacuvi tyin javaha un tyehen? Jutu un tan yuhu tuñú xaan cuñi ndi tan nanducú xaan ndi tsi un —catyí ña.

⁴⁹ Tacan tan catyí ra Jesús:

—¿Nacuenda nanducú ndo tsi yu? ¿A ña tsitó ndo tyin ñiñi ca cuñi tsi nyehe yu tyiñu Jutu yu? —catyí ra.

⁵⁰ Maa tyin ña cutuñi iñi ñi tsa caahán ra tsihin ñi.

⁵¹ Tacan tan cuanuhu ra tsihin ñi nda ñuu Nazaret. Tan vaha javahá ra tyin tyaa yahvi ra tsi ñi. Tan sihi ra naquihñ vaha ña

tandihí tuhun ihya tsitsi añima ña. ⁵² Tan ra Jesús cua cuahnu ca ra tan tsaa ca tsa tsíñi tuñi jiñi ra. Tan sii xaan cuñi Nyoo tsihin ra, tacan tucu nyivi, sii xaan cuñi ñi tsihin ra.

3

Nu cahan ra Juan, ra jacoondutyá tsi nyivi, tuhun Nyoo nuu tsiqui
(Mt. 3.1-12; Mr. 1.1-8; Jn. 1.19-28)

¹ Tsa quita tsahun cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea tsihin Traconite. Tan ra Lisnias ndacá ñaha ra Abilinia quivi can. ² Tan ra Anás tsihin ra Caifás cuví ra naha jutu tsaahnu tsa cuví ityi nuu. Quivi can cahan Nyoo tsihin ra Juan sehe ra Zacarías iin nu tsiqui. ³ Tan ra Juan tsicá nuu ra tandihí nuu tsa cayucú yatyin ñi yutya cahnu Jordán, caahán ra tuhun Nyoo tsihin nyivi. Tan catyí ra tsihin ñi tyin na ndu uvi iñi ñi cuatyí ñi tan coondutyá ñi. Tacan tan Nyoo cua jaha ra tucahnu iñi cuatyí ñi, catyí ra. ⁴ Tumaa caahán tuhun tsa nyaá nu libru tsa tyaa ra Isaías, ra cuví ndusu yuhu Nyoo tahanan. Tan catyí ra:

Cua tyaa soho yo ndusu ra nu caná tsaa ra nu tsiqui tan catyí ra:

“Nuñia ndo iin ityi cuiti tan natyiso vaha ndo tsi ndo tyin tsa vatsi Jutu Mañi yo.

⁵ Tumaa tsa tahví ndo yucu tan jandutú ndo xahva cunu,

jandoo ndo ityi yacua, tan janduvahá ndo nu quíñi.

⁶ Tacan tan tandihí nyivi cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan cahan ra Juan tsihin nyivi.

⁷ Tan tsa cuahán nyivi tsa cuñi ñi jacoondutyá ra tsi ñi, tan catyí ra tsihin ñi:

—¡Nyooho cuví ndo tumaa tata cool! ¿A cuñi ndo tyin tsihin tsa coondutyá ñi ndo tan ña cua tatsi tuñi ca Nyoo tsi ndo? Ña cuví. ⁸ Yacan nasama ndo cuhva iyó ndo, na nyehe yo tyin tsa ndu uvi iñi ndo cuatyí ndo nuu Nyoo. Tan ña nduyaa ndo cahan ndo tyin nyivi tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyivi ra Abraham. ⁹ Tsa ndatú yatsa Nyoo tsi tandihí ndo tyin cuví ndo tumaa yutun tsa ña tsahá tsiti vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

¹⁰ Tacan tan nducú tuhun ñi tsi ra tan catyí ñi:

—¿Tan nácaa javaha ndi? —catyí ñi.

¹¹ Tacan tan nacahan ra Juan:

—Ra tsa iyó uvi taahan jahma, taahán tsi cuhva ra intuhun tsi tsi ra tsa nduve jahma.

Tan ra tsa iyó tsa catsi, taahán tsi cuhva ra luxu catsi ra tsa nduve tsa catsi —catyí ra.

¹² Tan tsaa tucu ra tsa tavá xuhun cuenda ra ndacá ñaha nda nuu Roma, tsa cuñi ra naha coondutyá ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

¹³ Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

¹⁴ Tacan tan tsicá tuhun tucu andarú naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahan ra Juan tan catyí ra:

—Ña quinyaa ca ndo tsa tsii nyivi. Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndoo ndo vaha tsihin yahvi ndo —catyí ra Juan.

¹⁵ Tan quivi can tandihí nyivi ndatú ñi tsi ra Cristo. Tan tsicá iñi ñi tun juvin ra Juan cuví Cristo. ¹⁶ Maa tyin ra Juan catyí ra tsihin tandihí ñi:

—Tsa nditsa tyin jacoondutyá yu tsi ndo tsihin ndutyá. Maa tyin vatsi inga ra tsa cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuvi yu musu ra tan ndatsi yu ñi nditsan ra. Tan ra ican cua jacoondutyá ra tsi ndo tsihin Tatyí Ii Nyoo, tan tsihin ñuhú ihñi. ¹⁷ Tan ra ican ndahá ra pala tyin cua jandava ra trigu. Cua natava siin ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tsihin trigu can tsihin ñuhú tsa ña cua ndahva maa —catyí ra Juan tsihin ñi.

¹⁸ Tan tacan cahan ra Juan tsihin nyivi can. Tan náa ndihi ca maa cuhva cahan ra tan jacotó ra tsi ñi nácaa tsa cua quitsi Sehe Nyoo. ¹⁹ Tacan tucu ñi nduxaan ra Juan tsi ra Herodes, ra ndacá ñaha Galilea, tsa cuenda tsa naquihñi ra tsi ña Herodías, ñasihñi ra Felipe, yañi ra, tsihin tsa cuenda náa ndihi tsa ña vaha javahá ra. ²⁰ Maa tyin ña tyaa yahvi maa ra Herodes tuhun cahan ra Juan. Nu ndihi tuhun tinyij ra tsi ra Juan tsitsi vehe caa.

Nu jacoondutyá ra Juan tsi ra Jesucristo
(Mt. 3.13-17; Mr. 1.9-11)

²¹ Tsa ndi cumañi ca cuhun ra Juan vehe caa tan jacoondutyá ra tsi tandihí nyivi. Tan jacoondutyá ndihi ra tsi ra Jesús. Tsa yaha tsicoondutyá ra, tsican tahvi ra tsi Nyoo, tacan tan nuña andivi. ²² Tan nuu Tatyí Ii Nyoo siqui ra tumaa iin paloma. Tan cahan iin ndusu ityi siqui andivi, tan catyí tsi tyehen:

—Yoocho cuví Sehe yu, tan cuñi xaan yu tsi un. Tan sii xaan cuñi yu nyehé yu tsi un —catyí ndusu ican tsihin ra.

Cuhva quitsi tata ra Jesucristo
(Mt. 1.1-17)

²³ Tan tsa iyó maa tan oco utsi cuiya ra Jesús tan quitsahá jahá tyiñu ra tyiñu Nyoo. Tan tandihi nyivi cuñi maa ñi tyin sehe ra José cuví tsi ra. Tan ra José, sehe ra Eli cuví tsi ra. ²⁴ Tan ra Eli, sehe ra Matat cuví tsi ra. Tan ra Matat, sehe ra Levi cuví tsi ra. Tan ra Levi, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra. ²⁵ Tan ra José, sehe ra Matatías cuví tsi ra. Tan ra Matatías, sehe ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Esli cuví tsi ra. Tan ra Esli, sehe ra Nagai cuví tsi ra. ²⁶ Tan ra Nagai, sehe ra Maat cuví tsi ra. Tan ra Maat, sehe ra Matatías cuví tsi ra. Tan ra Matatías, sehe ra Semei cuví tsi ra. Tan ra Semei, sehe ra José cuví tsi ra. Tan ra José, sehe ra Judá cuví tsi ra. ²⁷ Tan ra Judá, sehe ra Joana cuví tsi ra. Tan ra Joana, sehe ra Resa cuví tsi ra. Tan ra Resa, sehe ra Zorobabel cuví tsi ra. Tan ra Zorobabel, sehe ra Salatiel cuví tsi ra. Tan ra Salatiel, sehe ra Neri cuví tsi ra. ²⁸ Tan ra Neri, sehe ra Melqui cuví tsi ra. Tan ra Melqui, sehe ra Adi cuví tsi ra. Tan ra Adi, sehe ra Cosam cuví tsi ra. Tan ra Cosam, sehe ra Elmodam cuví tsi ra. Tan ra Elmodam, sehe ra Er cuví tsi ra. ²⁹ Tan ra Er, sehe ra Josué cuví tsi ra. Tan ra Josué, sehe ra Eliezer cuví tsi ra. Tan ra Eliezer, sehe ra Jorim cuví tsi ra. Tan ra Jorim, sehe ra Matat cuví tsi ra. ³⁰ Tan ra Matat, sehe ra Levi cuví tsi ra. Tan ra Levi, sehe ra Simeón cuví tsi ra. Tan ra Simeón, sehe ra Judá cuví tsi ra. Tan ra Judá, sehe ra José cuví tsi ra. Tan ra José, sehe ra Jonán cuví tsi ra. Tan ra Jonán, sehe ra Eliaquim cuví tsi ra. ³¹ Tan ra Eliaquim, sehe ra Melea cuví tsi ra. Tan ra Melea, sehe ra Mainán cuví tsi ra. Tan ra Mainán, sehe ra Matata cuví tsi ra. Tan ra Matata, sehe ra Natán cuví tsi ra. ³² Tan ra Natán, sehe ra David cuví tsi ra. Tan ra David, sehe ra Isaí cuví tsi ra. Tan ra Isaí, sehe ra Obed cuví tsi ra. Tan ra Obed, sehe ra Booz cuví tsi ra. Tan ra Booz, sehe ra Salmón cuví tsi ra. Tan ra Salmón, sehe ra Naasón cuví tsi ra. ³³ Tan ra Naasón, sehe ra Aminadab cuví tsi ra. Tan ra Aminadab, sehe ra Aram cuví tsi ra. Tan ra Aram, sehe ra Esrom cuví tsi ra. Tan ra Esrom, sehe ra Fares cuví tsi ra. Tan ra Fares, sehe ra Judá cuví tsi ra. ³⁴ Tan ra Judá, sehe ra Jacob cuví tsi ra. Tan ra Jacob, sehe ra Isaac cuví tsi ra. Tan ra Isaac, sehe ra Abraham cuví tsi ra. Tan ra Abraham, sehe ra Taré cuví tsi ra. Tan ra Taré, sehe ra Nacor cuví tsi ra. ³⁵ Tan ra Nacor, sehe ra Serug cuví tsi ra. Tan ra Serug, sehe ra Ragau cuví tsi ra. Tan ra Ragau, sehe ra Peleg cuví tsi ra. Tan ra Peleg, sehe ra Heber cuví tsi ra. Tan ra Heber, sehe ra Sala cuví tsi ra. ³⁶ Tan

ra Sala, sehe ra Cainán cuví tsi ra. Tan ra Cainán, sehe ra Arfaxad cuví tsi ra. Tan ra Arfaxad, sehe ra Sem cuví tsi ra. Tan ra Sem, sehe ra Noé cuví tsi ra. Tan ra Noé, sehe ra Lamec cuví tsi ra. ³⁷ Tan ra Lamec, sehe ra Matusalén cuví tsi ra. Tan ra Matusalén, sehe ra Enoc cuví tsi ra. Tan ra Enoc, sehe ra Jared cuví tsi ra. Tan ra Jared, sehe ra Mahalaleel cuví tsi ra. Tan ra Mahalaleel, sehe ra Cainán cuví tsi ra. ³⁸ Tan ra Cainán, sehe ra Enós cuví tsi ra. Tan ra Enós, sehe ra Set cuví tsi ra. Tan ra Set, sehe ra Adán cuví tsi ra. Tan ra Adán, sehe Nyoo cuví tsi ra.

4

Nu nducy cuhva nu ña vaha tsi ra Jesús
(Mt. 4.1-11; Mr. 1.12-13)

¹ Tan ñihi nyaá Tatyí li Nyoo tsihin ra Jesús tsa yaha tsicoondutya ra, quita ra yutya Jordán tan cuanuhu ra. Tan quihín Tatyí li Nyoo tsi ra, tan tsahan ra iin nu cuví nu tsiqui ² nu tsinyí ra uvi xico nduvi. Tan ña tsatsi maa ra tandihi quivi ican. Yaha can tan quitsi tsa tsisocó ra. Tan nducy cuhva nu ña vaha tsi ra. ³ Tan catyí nu tsihin ra:

—Tatun juvin Sehe Nyoo cuví tsi un, cahan tsihin yuu ihya, na nanduvi tsi paan catsi un.

⁴ Tan ra Jesús nacahan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyivi coonyito ñi, tyin coonyito ñi tsihin tandihi tuhun caahan Nyoo —catyí ra Jesús tsihin nu ña vaha.

⁵ Tacan tan quihín nu ña vaha tsi ra Jesús, cuahan ra iin jiñi yucu sucun. Tan iin yaha ñi janaha nu tandihi tsa cuca nu ndacá ñaha nu ñuu ñayivi ihya tsi ra Jesús. ⁶ Tan catyí nu tsihin ra:

—Cuhva yu tandihi tsa nyehé un tun cuñi un tyin maa Nyoo tsa tsa cundaca ñaha yu tandihi can, tan ndáa ra cuñi yu cuhva yu can, cuvi tsi ra. ⁷ Tatun yoocho tan cuñi tsiti un nuu yu ihya tan jacahnu un tsi yu, tandihi can cua cuhva yu tsi un —catyí nu ña vaha tsihin ra.

⁸ Tan nacahan ra Jesús, tan catyí ra:

—Jatsiyo nyaha tsi un nuu yu, cuhna. Tyin nu tutu Nyoo catyí: “Jacahnu tsi intuhun ñi maa Jutu Nyoo. Tan tyiñu intuhun ñi maa ra taahan tsi javaha un.”

⁹ Tacan tan quihín nu ña vaha tsi ra Jesús inga tsa. Tan cuahan nu tsihin ra nda ñuu Jerusalén. Tan jandaa nu tsi ra iin nu sucun xaan nda jiñi vehe ñuhu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuanda nu ñuhu. ¹⁰ Tyin catyí tsi nu tutu Nyoo tyin: Nyoo cua tava tyiñu ra tsi ángel ra tan jaha cuenda ra naha tsi un.

¹¹ Cua janahndi ra naha tsi un. Tan ña cua nañi tsaha un nu yuu.

¹² Tacan tan nacahan ra Jesús tan catyí ra: —Tan juvin ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

¹³ Tan tsa ndihí nducu cuhva nu ña vaha tsi ra Jesús, tacan tan nacoq nuu nu tsi ra.

Nu quitsahá caahán ra Jesús tuhun Nyoo tsihin nyívi

(Mt. 4.12-17; Mr. 1.14-15)

¹⁴ Tan tsa yahá tsa nducu cuhva nu ña vaha tsi ra Jesús tan cuanuhu ra nda Galilea tsihin tsa tsitú tunyee iñi Tatyi Ii Nyoo tsi ra. Tan tsitó nyívi tuhun ra ñi cahnu Galilea can. ¹⁵ Tan jacuahá ra tsi nyívi nu cuví vehe ñuhu tandihí ñi ñuu. Tan tandihí ñi jacahnu ñi tsi ra.

Tsa tsaq nyico ra Jesús ñuu Nazaret nu tsahnú ra

(Mt. 13.53-58; Mr. 6.1-6)

¹⁶ Tacan tan tsaq nyico ra Jesús ñuu Nazaret nu tsahnú ra. Tan iin quívi quitatú nyívi, quihví ra tsitsi vehe ñuhu, tumaa tsa tuhvá maa ra tsicá. Tan nduvitá ra cua cahvi ra tuhun Nyoo. ¹⁷ Tan tsahá ra naha iin libru tsa tyaa ra Isaías ra cuví ndusu yuhu Nyoo. Tan cuhva tsa nuña ra, nañihí ra iin nu catyí tsi:

¹⁸ Iyó Tatyi Ii Nyoo tsihin yu, tyin maa Nyoo tava tyiñu tsi yu cahan yu tuhun ra tsihin nyívi ndaahvi.

Tan janduvaha yu tsi nyívi tsa uhvi añima. Tan maa ra tava tyiñu tsi yu tyin jacoto yu tsi nyívi yihí ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua jananyehe yu tsi nyívi cuaa.

Tan cua nacoq nuña yu tsi nyívi tsa iyó tundoho.

¹⁹ Tan jacoto yu tsi nyívi tyin tsa quita quívi tsa nyaá Nyoo tumañi iñi tsihin ñi.

²⁰ Tacan tan ndihí cahví ra tan nacasí ra nuu libru can. Tan nacuhvá ra tsi iin ra tsa jatinyeé tsihin tyiñu vehe ñuhu can. Tan tsinyaa ra Jesús. Tacan tan tandihí nyívi tsa nyecú ican, ndoq ñi tsa nyehé ñi tsi ra.

²¹ Tacan tan catyí ra tsihin ñi:

—Vityin quívi ihya tsa cundaa cuhva catyí tuhun Nyoo tsa cahví yu tsiñi ndo —catyí ra Jesús tsihin ñi.

²² Tan tandihí nyívi tsa nyecú can, vaha xaan cahan ñi tuhun ra. Tan iyo xaan cuñí ñi tsihin tandihí tsa vaha tsa cahan ra. Tacan tan quitsahá tsicá tuhun tahan ñi:

—¿A ñavin ra ihya cuví sehe ra José?

²³ Tan nacahan ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyívi, janduvaha jihna tsi maa un.” Tan cuñí tucu ndo catyí ndo: “Tandihí tsa javaha

un ñuu Capernaum tsitó ndi, javaha ndihí tucu can ñuu maa un ihya.”

²⁴ Tan cahan ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyívi ñuu ra naha tsi ra naha. ²⁵ Tan tsa nditsa tyin cuaha xaan ñi ndaahvi tsa tsihi yí tsicoq Israel ihya quívi tsa tava Nyoo tyiñu tsi ra Elías, ra cuví ndusu yuhu ra, tan ra ican cuví iin ra Israel ihya tsicá ra cahan ra tuhun Nyoo. Tan quívi can ña cuyn maa savi uñi cuiya sasava. Tan tsicoq tama cahnu xaan. ²⁶ Tan ñavin tsa cuenda ndi intuhun maa ñi Israel ihya tava Nyoo tyiñu tsi ra Elías cuahán ra. Maa tyin tsahan ra jatinyeé ra tsi iin ñaha ndaahvi tsihi yí tsa tsicoq ñuu Sarepta tsa canyíi Sidón.

²⁷ Tacan tucu quívi tsicá inga ra cuví ndusu yuhu Nyoo cuenda nyívi Israel, ra Eliseo. Cuaha xaan ra cuuhví tsihin cuhe tyaahyú tsicoq Israel ihya, tan ndi intuhun ra naha tan ña nduvahá ra naha. Nduvahá intuhun ñi ra Naamán ra quee ñuu Siria —catyí ra Jesús.

²⁸ Tsa yahá tsiñi ñi tandihí tuhun can, tandihí nyívi tsa yucú tsitsi vehe ñuhu can xaan xaan cuñí ñi cuví. ²⁹ Tan nduvitá ñi. Tan tava ñi tsi ra Jesús nda jiñi yucu sucun nda yuhu ñuu, tsa cuñí ñi janacava ñi tsi ra ican. ³⁰ Maa tyin ra Jesús yahá ra tyañu ñi tan cuahán ra.

Nu quita tatyi ña vaha tsa yihí tsi iin rayii
(Mr. 1.21-28)

³¹ Tan cuahán ra Jesús ñuu Capernaum tsa canyíi Galilea. Tan jacuahá ra tsi nyívi tsitsi vehe ñuhu tandihí sauru, quívi tuhvá nyívi quitatú. ³² Tan iyo xaan cuñí ñi tsihin tsa cahan ra. Tyin ñihi xaan cahan ra tumaa tuhvá ra cumí tyiñu caahán. ³³ Tan iin quívi nyíi ra Jesús vehe ñuhu tan iin ra yihí tatyi ña vaha catyí ra caná tsa ra jahá tatyi ña vaha can:

³⁴ —Yooho Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu nacotó vaha yu tsi un. Yooho cuví Sehe Ii Nyoo.

³⁵ Tacan tan nduxaān ra Jesús tsi tatyi ña vaha tsa yihí tsi ra can tan catyí ra:

—Taxin ñi coo yooho. Quita tsi ra ihya —catyí ra Jesús tsihin nu.

Tacan tan nyehé ñi nyívi nduva ra can nu ñuhu jahá tatyi ña vaha can, tan nduve ca náa javahá nu tsi ra can. Tan quita nu cuahán nu. ³⁶ Tandihí nyívi tsa nyehé can, iyo xaan cuñí ñi tan yuuhví ñi cuví. Tan quitsahá tsicá tuhun tahan ñi:

—¿Náa tuhun cuví tsa caahán ra ihya? Tyin nda cuanda tsihin tatyi ña vaha tan

ñihi caahán ra, tan quitá tatyí ña vaha ican —catyí ñi.

³⁷ Tacan tan tandihí ñi ityi quitá natuhun nyivi tuhun ra Jesús.

Nu janduvahá ra Jesús tsi ña tyiso ra Simón Pedro

(Mt. 8.14-15; Mr. 1.29-31)

³⁸ Tacan tan quitá ra Jesús tsitsi vehe ñuhu can. Tan cuahán ra vehe ra Simón. Tan nu tsaa ra can, canyii ña tyiso ra Simón cuuhví ña tan ñihi xaan yihí cahñi tsi ña. Tacan tan caahán ndaahvi ñi tsihin ra na janduvaha ra tsi ña. ³⁹ Tacan tan natuhvá ra nu canyii ña tan nacañi nuu ra jiñi ra tan cahan ra tsihin cahñi can na quita tsi. Tacan tan quitá cahñi can iin yaha ñi, tan nduvitá ña can, quitsahá nanducú ña tsa catsi ra Jesús.

Nu cuaha xaan nyivi cuuhví janduvahá ra Jesús

(Mt. 8.16-17; Mr. 1.32-34)

⁴⁰ Tan tsa tyiso ñicanyii, tandihí nyivi tsa iyó ñi cuuhví vehe ñi tsihin siin siin nuu cuehe, quitsi ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhví can tan janduvahá ra tsi ñi. ⁴¹ Tan cuaha xaan nyivi quitá tatyí ña vaha tan cana tsaa nahnu, tan catyí nahnu:

—Yoocho cuví Sehe Nyoo.

Maa tyin ra Jesús nduxaan ra tsi nahnu tan ña tsahá ra tsa cahan nahnu, tyin tsitó nahnu tyin juvin ra cuví Cristo.

Nu tsicá ra Jesús cahan ra tuhun Nyoo tandihí nuu cayucú Galilea

(Mr. 1.35-39)

⁴² Tsa tuví inga quiví, tan quee ra Jesús ñuu can. Tan cuahán ra iin nu taxin caá. Tan nyivi nanducú ñi tsi ra. Tan tsaa ñi nda nu nyii ra ican. Tan cuñi ñi tsa ña cuhun ca ra. ⁴³ Tacan tan catyí ra Jesús tsihin ñi:

—Ndi cuñi ca tsi jacoto yu tsi nyivi tandihí ca ñuu nácaa tan quihví Nyoo añima ñi tan cundaca ñaha ra tsi ñi. Tyin yacan cuenda vatsi yu nu ñuhu ñayivi ihya.

⁴⁴ Tan tacan ñi tsicá ra Jesús caahán ra tuhun Nyoo vehe ñuhu tandihí ñi ñuu tsa cayucú Galilea.

5

Nu tsahá ra Jesús ndatu tsa cuaha xaan tyaca ñihi ra naha

(Mt. 4.18-22; Mr. 1.16-20)

¹ Iin quiví nyaá ra Jesús yuhu miñi nu cuví Genesaret. Tan tsaa cuaha xaan nyivi, tyin cuñi ñi tyaa soho ñi tuhun Nyoo. Tan tihín xaan nyii ra Jesús tyañu ñi. ² Tan nyehe ra uvi taahan yutun ndoo yatyin ñi yuhu miñi ican. Yoñi yucú tsitsi yutun ndoo can tyin tsa quitá ra tiin tyaca. Tan nacatyá ra naha traya. ³ Tacan tan quihví ra Jesús tsitsi iin yutun ndoo tsa cuví tsi ra Simón.

Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaá ra Jesús tsitsi yutun ndoo can. Tan quitsahá caahán ra tsihin nyivi. ⁴ Cuhva tsa ndihí cahan ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tiin ndo tyaca.

⁵ Tan nacahan ra Simón tan catyí ra:

—Maestro, tsa jahá tyiñu xaan ndi ñiñu maa tan ndi intuhun maa tyaca ña ñihi ndi. Maa tyin tatun maa un catyí, cua jacuhun nyico ndi traya.

⁶ Cuhva tsa jacuhun nyico ra naha traya ra, tan cuaha xaan tyaca ñihi ra naha. Ndihi maa traya can quitsahá tyaahnyá tsihin tsa vee tyaca can. ⁷ Tacan tan jandahá ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaa ra can naha ra. Tan jacutu ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca. ⁸ Tsa nyehe ra Simón Pedro tsa cuví tacan, tan tsicuiñi tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

⁹ Tyin ra Simón tsihin tandihí ra yucú tsihin ra, nayuhví xaan ra naha tsa cuenda tsa cuaha xaan tyaca ñihi ra naha. ¹⁰ Tacan tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhví xaan ra naha. Tan ra Jesús catyí ra tsihin ra Simón:

—Ña nayuhví un, tyin vityin tan nda nu cuahán ca tsi ityi nuu, tumaa tsa tiin ndo tyaca ihya, tacan cua ñihi un nyivi cua cuví nyivi Nyoo, tan cua tava un tsi ñi nu caquiñi, na quihví ñi cuenda Nyoo —catyí ra Jesús tsihin ra Simón.

¹¹ Tacan tan tava ra naha yutun ndoo can nda nu ñuhu ityi. Tan nacoq ra naha tandihí tsa iyó tsi ra naha. Tan cuahán ra naha tsihin ra Jesús.

Nu janduvahá ra Jesús tsi iin ra ndohó cuehe tyaahyú

(Mt. 8.1-4; Mr. 1.40-45)

¹² Iin quiví nyii ra Jesús iin ñuu nu iyó iin ra ndohó cuehe tyaahyú. Tan tsa nyehe ra tsi ra Jesús, tan tsicuiñi tsiti ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tsihin ra Jesús, tan catyí ra:

—Jutu Mañi yu, tun yoocho tan cuñi un, cuví janduvaha un tsi yu —catyí ra.

¹³ Tacan tan tyiso ndaha ra Jesús jiñi ra cuuhví can, tan catyí ra:

—Cuñi yu janduvaha yu tsi un. Cua nduvaha un vityin —catyí ra Jesús tsihin ra cuuhví can.

Tan iin yaha ñi nduvahā ra. ¹⁴ Tacan tan catyí ra Jesús tsihin ra:

—Coto catyí tuhun un tsihin nyívi. Intuhun ñi tsa cua cahan yu tsihin un, cūaahan nu nyaá ra cuví jutu. Tan janaha tsi un tsi ra. Tan cūhva tsa taahán tsi jamañi un tumaa tsa caahán ley tsa tyaa ra Moisés, tan cua cuví tsi iin tsandaa tsi ra jutu can tan tsi nyívi tyin tsa nduvahā un —catyí ra Jesús tsihin ra.

¹⁵ Vasu ndi maa tsa ña cuñi ra Jesús tsa coto nyívi, ñihi ca quitá tuhun ra. Tan cuaha xaan nyívi ndu iin tyin cuñi ñi tyaa soho ñi tsa caahán ra tan janduvaha ra tsi ñi. ¹⁶ Maa tyin ra Jesús, jatsiyó, jatsiyó ñi ra tsi ra nu iyó nyívi. Tan cuahán ra nu taxin caá, cua ndacan tahvi ra tsi Nyoo Jutu ra.

Nu janduvahā ra Jesús tsi iin ra xii

(Mt. 9.1-8; Mr. 2.1-12)

¹⁷ Iin quívi jacuahá ra Jesús tsi nyívi. Tan yucú juhva ra fariseo, ra tyaa yahvi xaan ley Nyoo tsa tyaa ra Moisés tsanaha. Tan yucú tucu juhva ra maestro cuenda ley vehe ñuhu ican. Quitá ra naha ñuu Jerusalén, tan inga ñuu nyihi tanñi cahnu Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyívi cuuhví. ¹⁸ Tacan tan tsaa ra naha tan nyisó ra naha iin ra cuuhví tsihin cuehe xii nu tsito. Tan cuñi ra naha quihvi ra naha tsitsi vehe tan caquin ra naha tsi ra cuuhví can nu nyii ra Jesús. ¹⁹ Maa tyin ña ñihi ra naha nu quihvi ra naha tyin tuvi xaan nyívi. Tacan tan ndaa ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nuu nyii ra Jesús tyañu nu tuvi nyívi can. ²⁰ Tan nyehē ra Jesús tyin tsinú xaan iñi ra naha tsi ra. Tan catyí ra tsihin ra cuuhví can:

—Tsa tsicoo tucahnu iñi tsi un, tsa cuenda cuatyí un —catyí ra Jesús tsihin ra can.

²¹ Tacan tan ra maestro cuenda ley vehe ñuhu tsihin ra cuví fariseo, quitsahā tsicá iñi ra naha: “¿Yóo ra cuví ra ihya? Tsicoo cuatyí ra nuu Nyoo tsa cuenda tsa caahán ra. Tyin catyí ra tyin tsa tsicoo tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñi ra naha tsicá iñi ra naha.

²² Maa tyin ra Jesús tsitó ra tsa tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan? ²³ ¿Náa tsa yii ca catyí yo? ¿A yii catyí yo: “Cuatyí un tsa yahā ndatsi”, a yii ca catyí yo tsihin iin nyívi xii: “Nduvita tan caca un”? ²⁴ Maa tyin vityin cua janaha yu tsi ndo tyin yuhu Rayñi tsa quee nda gloria iyó ndatu tsi yu tsa jahá yu tucahnu iñi tsi ndo —catyí ra Jesús.

Tsa yahā cahān ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

²⁵ Tan nduvitā ra can, tan naquihin ra tsito ra. Tan cuanuhu ra yuvehe ra, juvin ñi jacahnú ra tsi Nyoo. ²⁶ Tandihí nyívi iyo xaan cuñi ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

Nu cana ra Jesús tsi ra Leví

(Mt. 9.9-13; Mr. 2.13-17)

²⁷ Yahā can tan quitā ra Jesús vehe can. Tan nanyehē ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañi ra Leví. Tan nyaá ra nu tyahví nyívi. Tan catyí ra Jesús tsihin ra:

—Cohon tsihin yu —catyí ra.

²⁸ Tacan tan nduvitā ra Leví. Tan nacoq ra tandihí tsa iyó tsi ra. Tan cuahán ra tsihin ra Jesús.

²⁹ Tacan tan javahā ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyívi. ³⁰ Tan ra fariseo naha ra tsihin ra cuví maestro cuenda ley vehe ñuhu naha ra, quitsahā caahán nyaa ra naha tsi ra tsicá tsihin ra Jesús:

—¿Nacuvi tsatsí ndo tan tsihi ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

³¹ Tan ra Jesús nacahān ra, tan catyí ra:

—Ña tsiñi ñuhu doctor tsi ra tsa vaha maa. Ra cuuhví, cuví ra tsiñi ñuhu doctor. ³² Yuhu ña vatsí yu jatyyinyee yu tsi nyívi tsa tsicá iñi tyin vaha ñi, vatsí yu jatyyinyee yu tsi nyívi tsitó tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

Nu janahā ra Jesús tyin tatun tsa cuahān ra cua coo nyitya nyívi nyicún tsi ra

(Mt. 9.14-15; Mr. 2.18-20)

³³ Tacan tan tsicā tuhun ra naha tsi ra Jesús, tan catyí ra naha:

—Ra tsicá tsihin ra Juan tsicoó nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yoocho, ndihí quívi tsatsí ra naha tan tsihi ra naha. ¿Nacuvi? —catyí ra naha.

³⁴ Tan nacahān ra Jesús, tan catyí ra:

—¿A cuví coonyitya nyívi yucú vico tindaha jaha ndo tatun nyii ra tsa cua tindaha tsihin ñi? Ña cuvi. [Tyin sñi cuñi ñi, tan cuñi ñi catsi ñi.] ³⁵ Maa tyin cua quita quívi tsa cua jatsiyo ra tindaha ican tsi ra nu yucú ñi. Tacan tan cua coonyitya ñi.

Nu jacuahá ra Jesús tyin ña nacatsi tahan tuhun tsahnú tsa iyó nyívi tsihin tuhun tsaa tsa jacuahá ra

(Mt. 9.16-17; Mr. 2.21-22)

³⁶ Tacan tan cahān tucu ra Jesús iin cuhva tsihin nyívi, tan catyí ra:

—Yoñi tsaahnyá iin jahma tsaa, tan naquicú ñi tsihin jahma tuuhu. Tyin tatun javaha ñi tacan, nandiyi jahma tsaa can. Tan ña ndoo vaha tsi tsihin jahma tuuhu can.

³⁷ Tan tacan tucu, ña cuví tyihi nyivi vinu tsaa tsitsi ñi tsaahnu. Tyin cua tyahnya ñi can tsihin vinu tsaa can. Tan cua tiví vinu can tan tiví ndihi tucu ñi tsaahnu can. ³⁸ Yacan cuenda taahán tsi tyihi yo vinu tsaa tsitsi ñi tsaa. Tyin tacan tan nduvi taahan tsi tan cua jaha cuenda tahan tsi itsi. ³⁹ Tan yoñi tsihi vinu tsahnu, tan cuñí ñi coho ñi vinu tsaa. Tyin catyí ñi, vaha ca vinu tsahnu. [Vinu tsahnu can cuñí tsi catyí tyin cuví tsi cuhva iyó maa ñi.]

6

Nu tuhun ra tsicá tsihin ra Jesús yoco itya trigu quivi quitatú nyivi

(Mt. 12.1-8; Mr. 2.23-28)

¹ Iin quivi quitatú nyivi, yahá ra Jesús mahñu tsa tatsi nyivi. Tan ra tsicá tsihin ra tuhún ra naha yoco trigu. Tan jocón ra naha can tsihin ndaha ra naha. Tan tsatsi ra naha tsiti can. ² Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quivi quitatú yo? ³ Tan nacahan ra Jesús, tan catyí ra:

—¿A ñaha ca cahví ndo nu tsahá cuenda tsi tsa javahá ra David tan ra cutahán tsihin ra quivi tsa tsisocó ra naha? ⁴ Quihví ra tsitsi vehe Nyoo. Tan quihín ra paan tsa tyiso nyivi nuu altar Nyoo. Tan tsatsi ra. Tan tsahá ndihi ra tsi ra tsa cutahán tsihin ra. Tan maa ñi maa ra cuví jutu naha ra taahán tsi catsi paan can —catyí ra Jesús.

⁵ Tacan tan catyí ra Jesús:

—Rayi tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quivi quitatú yo —catyí ra.

Nu janduvahá ra Jesús tsi iin ra na ityi ndaha

(Mt. 12.9-14; Mr. 3.1-6)

⁶ Inga quivi quitatú nyivi quihví ra Jesús tsitsi vehe ñuhu. Tan quitsahá jacuahá ra tsi nyivi. Tan nyehe ra tsi iin ra tsa na ityi ndaha cuaha. ⁷ Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican quivi quitatú nyivi, tyin tacan tan cuví tyaa ra naha cuatyí tsi ra Jesús. ⁸ Maa tyin ra Jesús tsitó ra tsa tsicá iñi ra naha. Tan catyí ra tsihin ra na ityi ndaha can:

—Nduvita. Cunya nyityi mahñu ra naha ihya.

Tacan tan ra na ityi ndaha can nduvita ra. Tan tsinyaa nyityi ra mahñu ra naha.

⁹ Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Náa taahán tsi javaha yo quivi quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyivi, o cahñi ndihi yo tsi ñi?

¹⁰ Tacan tan ra Jesús nyehé ra intuhun intuhun ra naha. Yahá can tan catyí ra tsihin ra tsa na ityi ndaha can:

—Cañihi ndaha un.

Tacan tan ra na ityi ndaha ican cañihi ra ndaha ra. Tan nduvahá ndaha ra. ¹¹ Maa tyin ra yucú ican naha ra, cuxaán ra naha. Tan quitsahá tsicá tuhun tahan ra naha tsi ra naha:

—¿Nacaa javaha yo tan cuvi casi yo nu caahán ra Jesús ihya? —catyí ra naha.

Nu nacatsi ra Jesús tsa utsi uvi taahan ra cua caca tyiñu ra

(Mt. 10.1-4; Mr. 3.13-19)

¹² Quivi ican ndaa ra Jesús iin yucu. Tan ñiñu maa tsican tahvi ra tsi Nyoo. ¹³ Tan tsa tuvi, caná ra tsi tandihi ra nyicún tsi ra. Tan nacatsi ra utsi uvi taahan ra naha. Tan jacunañi ra tsi ra naha apóstol, tan cuñí tsi catyí tsi “ra tsa tavá tyiñu Nyoo”. ¹⁴ Tan ihya nyaá sivi tandihi tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé; ¹⁵ ra Mateo; ra Tomás; ra Jacobo, sehe ra Alfeo; tan ra Simón ra nyanaá cuví ra cuenda partido tsa cuñí cuhun cuatyí siqui ñuu Roma tsa ndacá ñaha tsi ñi; ¹⁶ tan ra Judas, yañi ra Jacobo; tan ra Judas Iscariote, ra tsa xicó tsi ra Jesús.

Nu jacuahá ra Jesús tsi nyivi cuaha

(Mt. 4.23-25)

¹⁷ Tacan tan nuu ra Jesús yucu ican tsihin tsa utsi uvi ra naha. Tan ndu iin nyivi tsa nyicún tsi ra tsaha yucu can. Tan tsaá cuaha tucu nyivi quee ñuu Jerusalén tsihin tandihi ca ñuu cayucú Judea, tsihin tucu nyivi quee ityi yuhu ndutya ñuhu tsa cayucú yatyin ñi ñuu Tiro tsihin ñuu Sidón. Tan tsaá ñi tyin tyaa soho ñi tuhun caahán ra Jesús. Tan tandihi nyivi cuuhví cuñí ñi tsa janduvaha ra tsi ñi. ¹⁸ Tan tandihi nyivi tsa yihí tatyí ña vaha janduvahá ra tsi ñi. ¹⁹ Tan tandihi ñi cuñí ñi tiin ñi tsi ra, tyin janduvaha ra tsi ñi tsihin tunyee iñi tsa iyó tsi ra.

Tsehe cahan ra Jesús tsihin nyivi tsa naquihin ndaahvi ra

(Mt. 5.1-12)

²⁰ Tacan tan nanyehé ra Jesús tsi ra tsicá tsihin ra. Tan catyí ra tsihin ra naha:

—Tandhi nyoocho tsa ndaahvi, sii xaan cua cuñi ndo, tyin taahán tsi cundaca ñaha Nyoo tsi ndo.

²¹ "Tandihí nyoooho tsa tsisocó vityin, sîi xaan cua cuñi ndo. Tyin coo quivi ña cua cusoco ca maa ndo. Tan tandihí nyoooho tsa tsacú tsa cuiihya cuñi ndo, sîi xaan cua cuñi ndo tyin ña cua coo ca ndo tucuiihya iñi. Tan cua vacu naaha xaan ndo tsihin tsa sîi cuñi ndo.

²² 'Cusîi iñi ndo, quivi ndasi cuñi nyivi nyehe ñi tsi ndo, quivi tava ñi tsi ndo nu iyó ñi, quivi nduxaan ñi tsi ndo, quivi catyi ñi tyin nyivi ña vaha cuvî ndo tyin tsinú iñi ndo tsi maa yu tsa cuvî yu Rayîi quee nda gloria. ²³ Sîi cuñi ndo quivi can tyin tacan tucu javahá nyivi ñi tahañ tsanaha. Cuxaan ñi tsi ra cuvî ndusu yuhu Nyoo. Ndava ndo tsihin tsa sîi cuñi ndo. Tyin cahnu xaan ndatu cua ñihi ndo nda gloria.

Tsehe cahan ra Jesús tsihin nyivi ña tsinú iñi tsi ra

²⁴ 'Maa tyin ndahvi nyoooho, ñi cuca. Tyin vityin sîi xaan cuñi ndo tsihin tandihí tsa cuca ndo. Maa tyin cua coo quivi maa ñi maa tundoho cua nyehe ndo. Tyin nduve tsa cua ñihi ndo nu nyaá Nyoo.

²⁵ 'Tan ndahvi nyoooho tsa cuñi maa ndo tyin nduve tsa cumañi tsi ndo tsa vityin, tyin coo quivi cua cusoco ndo. Nyoooho tsa sîi cuñi vityin, ndahvi nyoooho, tyin coo quivi cua coo ndo tucuiihya iñi. Tan cua vacu xaan ndo. ²⁶ Tan ndahvi nyoooho tsa vaha caahán nyivi tuhun ndo. Tyin tacan caa tucu nyivi tsicog tsanaha, vaha xaan cahan ñi tuhun ra tsa cahan tsa ña nditsa tsihin ñi.

Cuñi ndo tsi nyivi xaan iñi tsi ndo
(Mt. 5.38-48; 7.12)

²⁷ "Tandihí nyoooho tsa tsiñi tsa caahán yu, catyi yu tsihin ndo tyin: Cuñi ndo tsi nyivi xaan iñi tsi ndo. Javaha ndo tsa vaha tsihin nyivi tsa ndasi cuñi nyehe tsi ndo. ²⁸ Cahan ndo tsa vaha tsihin nyivi tsa caahán ndavaha ñi tsi ndo. Tan ndacan tahvi ndo tsi Nyoo tsa cuenda nyivi caahán nyaa tsi ndo. ²⁹ Tatun iin ra cañi iin tsiyo nuu ndo, cuhva ndihí ndo inga tsiyo, nacañi ndihí maa ra. Tatun iin ra quinyaá tsaqueta nditsi ndo, cuhva ndihí ndo camiseta ndo. ³⁰ Cuhva ndo náa ndihí tsicán nyivi tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi. ³¹ Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi.

³² "Tatun cuñi ndo tsi maa ñi maa nyivi tsa cuñi tsi ndo, nduve tsa vaha javahá ndo. Tyin tacan icá tucu nyivi quiñi iyó. ³³ Tan tatun tsihin nyivi tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyivi, nduve tsa vaha icá ndo cuvî can, tyin nyivi caquiñi, tacan icá tucu ñi can. ³⁴ Tatun javahá ndo tumañi iñi tsi iin nyivi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha

icá ndo. Tyin nyivi caquiñi, tacan icá ñi. Tatun náa tumañi iñi javahá ñi tsi nyivi vaha iñi tsi ñi, ndatú ñi tsa nacuhva tucu ñi can tumañi iñi tsi ñi. ³⁵ Maa tyin nyoooho, cuñi ndo tsi nyivi xaan iñi tsi ndo. Tan javaha ndo tsa vaha tsihin ñi. Tan cuhva nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan cua cuvi ndo sehe maa Nyoo, ra nyaá gloria. Tyin Nyoo vaha iñi ra nda cuanda tsihin nyivi tsa ña nacuhvá tyahvi nyoo tsi ra, tan tsihin nyivi caquiñi. ³⁶ Cú uhvi iñi ndo tsi nyivi, tumaa uhvi cuñi Nyoo Jutu yo nyehé ra tsi yo.

Ña cahan nyaa yo tsi inga nyivi
(Mr. 7.1-5)

³⁷ 'Ña cahan nyaa ndo tsi nyivi, tacan tan Nyoo ña cua cahan nyaa ra tsi maa ndo. Ña catyi ndo tsa cuhun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyivi. Tan Nyoo cua jaha ra tucahnu iñi tsi maa ndo. ³⁸ Cuhva ndo tsa tsiñi ñuhu tsi nyivi. Tacan tan cua cuhva tucu maa Nyoo tsa tsiñi ñuhu tsi maa ndo. Cuaha cua cuhva ra tsi ndo. Tyin tumaa cuhva cua cuhva ndo tsi nyivi, tacan cuhva cua cuhva Nyoo tsi ndo —catyi ra Jesús.

³⁹ Tan tsahá ra Jesús cuhva ihya tsi ñi, tan catyi ra:

—Iin ra cuaa ña cuvî janaha ra ityi tsi inga ra cuaa. Tyin nduvi taahan ra naha ña nyehé ra naha ityi cuahán ra naha. Tan cuvî canacava ra naha tsitsi iin xahva. ⁴⁰ Ndi intuhun ra cutuhvá ña cua cuvî coto ra tsa tsitó ra jacuahá tsi ra. Tyin ndi quitsahá cahvi ra. Cua coto ra nda ndihí cahvi ra.

⁴¹ '¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un? ⁴² Tatun tinuu maa un nyii iin yutun cahnu, ¿nácaa cua cuvî catyi un tsihin ra yañi un: "Ñaha, na tava yu tsahan luhlu tsa nyii tinuu un."? ¿Yoooho tsa jahá tyin vaha xaan un! Tava jihna yutun cahnu tsa nyii tinuu maa un. Tyin tacan tan cuvî nyehe vaha un tsahan luhlu tsa cua tava un tinuu yañi un.

Tsihin tsa javahá nyivi tan nacoto yo tsi ñi tatun ñi vaha, a ñi ña vaha cuvî ñi
(Mt. 7.17-20; 12.34-35)

⁴³ 'Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha. ⁴⁴ Tandihí yutun nacotó yo tsi tun tsihin tsiñi tun. Tyin tiñata, ña cua cuhva tun mangu. Tan ndi intuhun iñu nduuhva ña cua cuhva tun uvas [tsa cuvî yucu vixi]. ⁴⁵ Tan tacan tandihí nyivi vaha, vaha caahán ñi, tyin yihí tsa vaha añima ñi. Maa tyin nyivi ña vaha, maa ñi maa tsa ña vaha caahán ñi tyin yihí tsa caquiñi añima ñi. Tyin tsihin

yuhu yo caahán yo tandihi tsa quitá tsitsi añima yo.

Cua cacu nyivi tsa tyaa yahvi tuhun caahán ra Jesús, tan nyivi ña tyaa yahvi tsa caahán ra, ña cua cacu ñi

(Mt. 7:24-27)

⁴⁶ '¿Nacuenda catyí ndo tsihin yu, "Jutu Mañi yu, Jutu Mañi yu", tan ña javahá ndo tsa caahán yu? ⁴⁷ Vityin cua catyí yu tsihin ndo yó ndacú nyoocho tsa vatsí ndo tsi maa yu, tan tyaa soho ndo tsa caahán yu, tan javahá ndo cuhva catyí yu. ⁴⁸ Cuví ndo tumaa cuví iin ra tsitó janduvita vehe. Tyin jihna ca tahví cunu xaan ra tan tahanan ra yuu. Tan tyaa ra tyihyo tsaha vehe can tsata yuu can. Tan quivi nduñihí cuñi savi, ndutya can tsatyá xaan tsi tsaha vehe, maa tyin vehe can ña tani maa tsi tyin vaha xaan quita tyihyo tsaha tsi. ⁴⁹ Maa tyin nyivi tsa tsini tsa caahán yu tan ña javahá ñi tsa caahán yu, cuví ñi tumaa iin ra javahá vehe tan ña vaha javahá ra itsi. Tyin nduve tyihyo tsaha tsi javahá ra. Tan quivi tsaa savi, tan cuñihí cuñi savi, tan yahá ndutya cuaha tsaha vehe can. Tan vehe can, iin yaha ñi tani tsi —tacan catyí ra Jesús.

7

Nu janduvahá ra Jesús musu iin ra capitán andaru

(Mt. 8:5-13)

¹ Ndihi cahan ra Jesús tsihin nyivi, tacan tan cuanuhu ra inga tsaha nda ñuu Capernaum. ² Tan ñuu can iyó iin ra capitán. Tan iyó iin musu ra tsa cuñi xaan ra. Tan cuuhví ra can. Tan tsa cuñi cúu ra. ³ Tan tsa tsitó ra capitán can tuhun ra Jesús, tacan tan tava tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra. ^{4,5} Tacan tan tsaa ra tsahnu ican naha ra nu nyii ra Jesús. Tan quitsahá caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyivi cuví ra tsihin yo tsa cuví yo nyivi Israel. Nda cuanda javahá ña ra iin vehe ñuhu yo. Tan taahán tsi tyin jatinyee un tsi ra. Tyin cuuhví xaan musu ra. Tan cuñi ra tyin janduvaha un tsi ra.

⁶ Tacan tan cuahán ra Jesús tsihin ra naha. Maa tyin tsa ndi cumañi ca tsaa ra nda vehe ra capitán can, tan ra capitán can tava tyiñu ra tsi ra vaha iñi tsi ra. Tacan tan tsaa ra naha nu nyii ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehe ra. Tyin ña cahnu cuví ra tan cuhun un vehe ra, catyí ra. ⁷ Yacan ña cana iñi ra quitsi ra nu nyii un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu

ra, catyí ra? ⁸ Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tava tyiñu ra tsi iin ra cuatyí ican, na cuhun ra, cuahán ra. Tatun catyí ra tsihin inga ra, na quitsi ra, vatsi ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yoocho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

⁹ Tsa tsini ra Jesús tsa cahan ra can naha ra, tan iyo xaan cuñi ra. Tan nanyehé ra tsi nyivi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihi yu tsi ndi intuhun ra Israel tsa tsinú xaan iñi tumaa ra ican —catyí ra Jesús.

¹⁰ Tacan tan cuanuhu ra vaha iñi tsi ra capitán can naha ra. Tan tsa tsaa ra naha nda yuvehe, tan nyehé ra naha tyin tsa nduvahá musu ra.

Nu janandotó ra Jesús tsi sehe iin ñaha ndaahvi tsihi yí

¹¹ Tsa yahá yacan tan cuahán ra Jesús iin ñuu tsa nañi Nain. Tan cuahán tucu ra tsicá tsihin ra. Tan cuahán ndihi tucu cuaha xaan nyivi. ¹² Tacan tan cuhva tsa cua tsaa ra yatyin ñuu ican, nyehé ra tyin cuaha xaan nyivi quitá ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsihi yí. Tan intuhun ñi maa ra cuví sehe ña, tan tsihi ra. ¹³ Tan tsa nyehé ra Jesús tsi ña, tan cundaahví iñi ra nyehé ra tsi ña. Tan catyí ra tsihin ña:

—Ña vacu un.

¹⁴ Tsahan natuhvá ra tan tiñ ra tsatun tsa nyii ndiyi can. Tacan tan ra nyisó tsi ndiyi can naha ra tsicuiñi ra naha. Tan catyí ra Jesús tsihin ndiyi can:

—Nduvita, yoocho ra tyuvaa —catyí ra.

¹⁵ Tacan tan nduvita ndiyi can. Tan nacunyaá ra. Tacan tan quitsahá caahán ra. Tan ra Jesús nacuhvá cuenda ra tsi ra tsi sihi ra. ¹⁶ Tsa nyehé ñi tsa tacan nandotó ra jahá ra Jesús tan yuuhví xaan ñi, tan quitsahá jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaa nu yucú yo ihya.

Tan catyí tucu ñi:

—Maa Nyoo cuví ra vatsi nu iyó yo, vatsi jatinyee ra tsi yo —catyí ñi.

¹⁷ Tan tandihi maa nyivi tani cahnu Judea, tsitó ñi tsa javahá ra Jesús.

Nu jacuhun ra Juan uvi taahan ra tsa tsicá tsihin ra nu nyii ra Jesús

(Mt. 11:2-19)

¹⁸ Tan ra tsicá tsihin ra Juan naha ra nacatyí tuhun ra naha tsa javahá ra Jesús. Tacan tan caná ra Juan tsi uvi taahan ra naha. ¹⁹ Tan tava tyiñu ra tsi ra naha na

cuhun ra naha nu nyii ra Jesús, tan ndaca tuhun ra naha tsi ra tatun juvin ra cuví Cristo, ra tsa cua jaquitsi Nyoo. Tyin tatun ñavin ra Cristo cuví ra, cuatu ra naha tsi inga ra. ²⁰ Tacan tan ra tsa jacuhun ra Juan, cuahán ra naha. Tan tsaa ra naha nu nyii ra Jesús. Tan catyí ra naha:

—Ra Juan, ra jacoondutyá, tava tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

²¹ Tan tsa ndi yucú ra tsa jacuhun ra Juan naha ra tan cuaha xaan nyivi cuuhví janduvahá ra Jesús. Tan tacan tucu nyivi yihí tatyí ña vaha. Tan cuaha tucu nyivi cuaa nanyehé ñi jahá ra. ²² Tacan tan catyí ra Jesús tsihin ra tsa jacuhun ra Juan naha ra:

—Cuahan ndo. Tan nacatyí tuhun ndo tsihin ra Juan tandihí tsa nyehe ndo, tan tandihí tsa tsiñi ndo. Tan catyí ndo tsihin ra: ra cuaa nanyehé ra, ra coxo nacacá ra, ra ndoho cuehe tyaa yú nduvahá ra, ra soho nacuñi ra, ndiyi nandoto, tan caahán yu tuhun Nyoo tsihin ñi ndaahvi nácaa cacu ñi. Tan catyí ndo tsihin ra tyin ²³ sií xaan cuñí ñi nyicún tsi yu tun ña ndu uví ñi —catyí ra Jesús tsihin ra naha.

²⁴ Cuahán ra tsa jacuhun ra Juan naha ra, tan quitsahá caahán ra Jesús tuhun ra Juan tsihin nyivi. Tan catyí ra:

—¿Náa nyehe ndo quivi tsahan ndo nuu tsiqui ndii ican? ¿A nyehe ndo iin ndoo tsa janduvá tatyí? ²⁵ ¿A iin ra tsa nditsí jahma vaha nyehe ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey. ²⁶ ¿A ña nyehe ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo. ²⁷ Juvín ñi tuhun ra Juan cuví tsa nyaá nuu tutu tsa tyaa ra Isaías tahán tsanaha. Tan caahán Nyoo tuhun ra tyehen:

Yuhu cua jacuhun yu iin ra cua cahan tuhun yu tsa ndi cumañi ca cuhun un.

Na natyiso vaha ra ityi nu cua cuhun un.

²⁸ Tan catyí yu tsihin ndo tyin tsitsi tsa tandihí ra tsa cacu jahá ñiñaha, yofi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo aña vasa iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

²⁹ Tandihí nyivi tan ra tava xuhun naha ra, tsa tsicoondutyá jahá ra Juan, nacoto ñi tyin cuhva javahá Nyoo, cuiti xaan tsi. ³⁰ Maa tyin tandihí ra fariseo tsihin ra maestro cuenda ley vehe ñuhu, ña cuñí ra naha tsa jacoondutyá ra Juan tsi ra naha, tyin ña cuñí ra naha quihin ra naha tsa tsahá Nyoo tsi ra naha —catyí ra Jesús. ³¹ Tan catyí tucu ra:

—¿Náa cua jandu inducu yu tsihin nyooho, nyivi iyó quivi ihya? ¿Yóo caá tumaa caá ndo? ³² Tumaa ra nyihí cuví nyoooho. Tyin ra nyihí jasiquí nuyahvi. Tan caná tsaa tahan ra naha, tan catyí ra naha: “Tivi ndi tiyoo tan ña tsañi ndo yaa. Tan tsitá ndi yaa cuihiya, tan ña tsacú ndo”. catyí ra nyihí. [Tan tacan ñi cuví nyoooho tyin ndi intuhun cuhva ña taahán ñi ndo.] ³³ Tyin ra Juan, ra jacoondutyá, quitsí ra tan ña tsatsí vaha ra. Tan ña tsihi ra vinu. Tan nyooho catyí ndo tyin tatyí ña vaha yihí tsi ra. ³⁴ Tan quitsí tucu yuhu tan cuví yu Rayií tsa quee nda gloria. [Tan tsatsí yu tan tsihi yu.] Tan nyooho catyí ndo tyin tsatsí xaan yu tan tsihi xaan yu vinu. Tan ña taahán ñi ndo tsa cutahán yu tsihin ra iyó cuatyí naha ra, tan tsihin ra tava xuhun naha ra. ³⁵ Maa tyin catyí yu tsihin ndo tyin tsa tsiñi tuñi Nyoo tsahá ra tsi nyivi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.

Nu nyii ra Jesús vehe ra Simón ra cuví fariseo

³⁶ Iin ra fariseo tsa nañi Simón jacoto ra tsi ra Jesús tyin cuhun ra cucatsi ra nda yuvehe ra. Tan tsaa ra Jesús vehe ra, tan tsicunyaá ra nu mesa. ³⁷ Tacan tan iin ñaha sií ñi ñuu ican tsitó ña tyin nyii ra Jesús ican. Tan tsaa ña tsihin iin yutyi yuu xiñu tsitú tsi ndutya tami. ³⁸ Tan tsinyaá ña yatyin ñi tsaha ra. Tan quitsahá tsacú ña tyin ndu uví ñi ña cuatyí ña. Tan cuñi ndutya nuu ña. Tan tsihin ndutya nuu ña nacatyá ña tsaha ra Jesús. Yahá can tan jana ityi ña tsaha ra tsihin ixi jiñi ña. Tan tyayuhu ña tsaha ra. Tacan tan tyoso ña ndutya tami ican tsata tsaha ra. ³⁹ Tsa nyehe ra fariseo can tsa tacan ica ña, tan tsicá ñi ra: “Tatun nditsa tsa Nyoo jaquitsí tsi ra ihya, cua nacoto ra yóo ñaha tiin tsaha ra, tyin ñaha ican, ñaha iyó cuatyí cuví ña.”

⁴⁰ Tacan tan ra Jesús catyí ra tsihin ra fariseo ican:

—Yooho Simón, iyó iin tsa cua cahan yu tsihin un —catyí ra tsihin ra.

Tacan tan nacahan ra Simón, tan catyí ra:

—Vaha, cahan tsihin yu, Maestro —catyí ra.

⁴¹ Tan catyí ra Jesús tyehen tsihin ra:

—Uvi taahan rayií nyaá cuenda ra xuhun tsi iin ra tsa tuhvá tsahá nuu xuhun. Tan iin ra ican nyaá cuenda ra uhun ciento denario. Tan inga ra nyaá cuenda ra uvi xico utsi ñi denario. ⁴² Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ican, jahá ra tucahnu ñi tsi nduvi taahan ra naha. Tan vityin catyí tsihin yu, yooho Simón, ¿ndáa ra cua cuñi ca

tsi ra tsa tsahá nuu xuhun ican? —catyí ra Jesús.

⁴³ Tacan tan nacahan ra Simón, tan catyí ra:

—Ra tsa cuaha ca jahá ra tucahnu iñi tsi —catyí ra.

Tacan tan catyí ra Jesús:

—Nditsa tsa caahán un —catyí ra.

⁴⁴ Tacan tan nanyehé ra Jesús tsi ñaha ican, tan catyí ra tsihin ra Simón:

—¿A nyehé un tsi ñaha ihya? Yuhu quihvi yu tsitsi vehe un, tan ña tsahá un ndutya tsa ndoo tsaha yu tumaa cuhva tsa iyó yo. Tan ñaha ihya nacatya ña tsaha yu tsihin ndutya nuu ña. Tan jana ityi ña tsihin ixi jiñi ña. ⁴⁵ Yoocho ña tyayuhú un ndaha yu, tumaa cuhva tsa iyó yo, maa tyin maa ña nda cuanda tsa quihvi yu ihya tan ña jandihí ña tsa tyayuhú ña tsaha yu. ⁴⁶ Tan yoocho ña tyihí un acetye jiñi yu, maa tyin ñaha ihya tyihí ña ndutya tami tsaha yu. ⁴⁷ Tan catyí yu tsihin un, yoocho Simón, vasu cahnu xaan cuatyí ña, maa tyin jahá yu tucahnu iñi tsi ña. Yacan cuenda cuñi xaan ña tsi yu. Tan nyivi tsa jahá yu tucahnu iñi luxu ñi cuatyí ñi, luxu ñi cuñi ñi tsi yu —catyí ra Jesús.

⁴⁸ Tacan tan catyí ra Jesús tsihin ña can:

—Cuatyí un tsa yahá catsiyo, tyin tsa jahá Nyoo tucahnu iñi tsi un —catyí ra Jesús tsihin ña.

⁴⁹ Tacan tan ra yucú tsihin ra quitsahá tsicá iñi ra naha: “¿Yóo ra cuví ra ihya? tyin jahá ra tucahnu iñi cuatyí nyivi.”

⁵⁰ Tacan tan catyí ra Jesús tsihin ñaha ican:

—Cuaahan vityin, tsa cacú un tyin tsinu iñi un tsi yu. Cuaahan tsihin tsa vaha —catyí ra tsihin ña.

8

Ñiñaha tsa jatyinyee tsi ra Jesús

¹ Tsa yahá can, tan cuahán ra Jesús tsicá ra iin iin ñuu nahnu tan iin iin ñuu nyihi. Tan caahán ra tsihin nyivi. Tan jacotó ra tsi ñi tuhun vaha nácaa cuñi Nyoo cundaca ñaha ra tsi ñi. Tan tsa utsi uvi taahan ra tsa tava tyiñu ra, cuahán ra naha tsihin ra. ² Tan cuahán tucu juhva ñiñaha tsa janduvahá ra: ñi cuhvi tan ñi yihí tatyí ña vaha. Tan tsihin ñi cuahán ña María tsa quee ñuu Magdala, tan juvin ña cuví ña yihí utsa tatyí ña vaha tan nduvahá ña. ³ Tan cuahán tucu ña Juana, ñasihi ra Chuzá, ra cumí tyiñu cuenda ra Herodes, tan ña Susana tsihin tandihí ca ñiñaha tsa jatyinyee tsi ra Jesús tsihin tsa iyó tsi ñi.

Nu caahán ra Jesús tyin tumaa iin ra tatsí tacan cuví ra caahán tuhun Nyoo
(Mt. 13.1-9; Mr. 4.1-9)

⁴ Tan cuaha xaan nyivi quee ñi iin iin ñuu, tyin cua nyehé ñi nu caahán ra Jesús tuhun Nyoo. Tan tuvi xaan ñi nyecú, tan quitsahá

caahán ra tsihin ñi tsihin iin cuhva tsahá cuenda ra, tan catyí ra:

⁵ —Quitá iin ra vehe ra. Cuahán ra nu iyó tyiñu jahá ra, tyin cua tatsí ra tsiti trigu nu ñuhu ra. Tan cuhva tsa tatsí ra quití ra tsiti can, tan cucoyo juhva yuhu ityi. Tan tsahí nyivi tsata can. Tan quitsí saa tan tsatsí ti.

⁶ Tan juhva ca tsiti can cucoyo tyañu yuu. Cana tsiti ican. Maa tyin na ityi tsi tyin luxu cuii ñi ñuhu yihí tsaha tsi. Tan nduve catsin.

⁷ Tan juhva ca tsiti cucoyo tyañu iñu. Maa tyin quivi cana trigu iin caa ñi tsihin iñu can, iñu can tsahí tsi trigu can. ⁸ Maa tyin juhva ca tsiti cucoyo nu ñuhu vaha. Tan quivi tsahnú tsi, vaha xaan tsahá tsi tsiti. Tyin tsa iin ñi tsiti ican, cientu tsiti quitá tsihin tsi —catyí ra Jesús.

Tan tsa yahá tsahá ra cuhva can, tan quitsahá cana tsaa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

Nu jacotó ra Jesús nacuenta jacuahá ra tsi nyivi tsihin cuhva caahán ra tsihin ñi

(Mt. 13.10-17; Mr. 4.10-12)

⁹ Yahá can tan ra tsicá tsihin ra, nducu tuhun ra naha tsi ra náa cuñi tsi catyí cuhva tsa cahan ra tsihin nyivi. ¹⁰ Tacan tan catyí ra tsihin ra naha:

—Tsi nyoocho jacotó Nyoo tuhun xeehe, nácaa ndacá ñaha ra. Maa tyin tandihí ca ñi ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsini ñi maa tyin ña cua cutuñi iñi ñi náa tuhun cuví can.

Nu tsahá cuenda ra Jesús cuenda ra tsa tatsí

(Mt. 13.18-23; Mr. 4.13-20)

¹¹ Cuhva tsa tsahá yu tsi ñi, cuñi tsi catyí tsi tyehen: tsiti can, tuhun Nyoo cuví tsi.

¹² Tan nu cucoyo tsiti trigu ican yuhu ityi, nyivi tsa tsini tuhun Nyoo cuví can. Maa tyin quitsí nu ña vaha tan quinyaa nu tuhun Nyoo tsi ñi tan coto tsinu iñi ñi tan cacu ñi.

¹³ Tan nu cucoyo tsiti can tyañu yuu, juvin ñi nyivi tsa tsini tuhun Nyoo cuví can. Si xaan naquihin vaha ñi itsi juhva ñi quivi.

Maa tyin ña yihí vaha yoho ñi, juhva ñi quivi tsinu iñi ñi, tan quivi tsa quitsahá nyehé ñi tundoho, tan jandihí ñi tsa tsinu iñi ñi. ¹⁴ Tan nu cucoyo tsiti tyañu iñu, juvin ñi nyivi tsini tuhun Nyoo cuví can. Tsini ñi tuhun Nyoo maa tyin ña nasama ñi cuhva iyó ñi. Tyin yihí ñi, tyaa ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi si ca cuñi ñi tsihin tsa si caa tsa iyó nu ñuhu ñayivi. Tan cuví ñi tumaa cuví yutun tsa ña tsahá tsiti.

¹⁵ Maa tyin nu cucoyo tsiti nu ñuhu vaha, yacan cuví nyivi tsa tsini tuhun Nyoo, tan

vaha añaima ñi tyin tsinú iñi ñi tsihin tanñi añaima ñi. Tan vaha tyaá soho ñi tuhun Nyoo, tan ña naá maa iñi ñi tuhun ra. Tan javahá ñi tandihí tuhun caahán ra.

Nu cañan ra Jesús tyin ña cua tyihi xeehe yo ñuhý tsa jandunditsin Nyoo añaima yo coto quinyaa ra itsi

(Mr. 4.21-25)

¹⁶ Ndi intuhun yo ña tyaá yo ñuhý tyuma tan tyihí xeehe yo xuu tsito a inga nu xeehe. Tyaá yo ñuhý tyuma maa tyin tsaquín nyaa yo can iin nu sucun, tacan tan quihví nyívi tsitsi vehe maa tyin nditsin. ¹⁷ Tyin nduve iin tsa nyíi xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo. ¹⁸ Yacan cuenda tyaa soho ndo tuhun caahán yu. Tyin tatun tyaá yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua tyaa soho ndo, tacan tan cua quinyaa Nyoo nda cuanda tsa luxu ñi tsa cuñi maa ndo tyin cumí ndo.

Nu tsaha cuenda ra Jesús tyin tumaa yañi ra, tan tumaa sihi ra, tacan cuví nyívi tyaá yahvi tuhun Nyoo

(Mt. 12.46-50; Mr. 3.31-35)

¹⁹ Tacan tan tsaá sihi ra Jesús tsihin yañi ra nu nyíi ra. Maa tyin ña cuví tsaá ñi tyin tuvi xaan nyívi. ²⁰ Tacan tan jacoto nyívi nyecú ican tsi ra Jesús, tan catyí ñi:

—Sihi un tsihin ra yañi un naha ra nyecú ñi tsata vehe. Tan cuñi ñi cahan ñi tsihin un.

²¹ Tacan tan nacahan ra Jesús, tan catyí ra:

—Tandihí maa nyívi tsa tyaá soho tuhun Nyoo tsa caahán yu tan tyaá yahvi ñi itsi, juvin ñi cuví sihi yu, tan juvin ñi cuví yañi yu —catyí ra Jesús.

Nu jacutaxin ra Jesús tatyí ñihi nu miñi

(Mt. 8.23-27; Mr. 4.35-41)

²² Cuví tsi iin quiví quihví ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsiyo miñi ihya.

Tacan tan cuahán ra naha tsihin yutun ndoo ican. ²³ Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaá tatyí ñihi xaan. Tan quitsahá tyihí tsi ndutya tsitsi yutun ndoo ican. Tan cuñi nyee yutun ndoo can tyin cuaha xaan ndutya quihví. ²⁴ Tacan tan jandoto ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñi nyee yo tsitsi ndutya —catyí ra naha.

Tacan tan nduvitá ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi. ²⁵ Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñi ra naha. Tan quitsahá tsicá tuhun tahan ra naha:

—¿Yóo ra cuví ra ihya? Tyin nda cuanda tatyí tan ndutya tan tyaá yahvi tsi tsa caahán ra.

Nu nduvahá iin ra yihí tatyí ña vaha nda Gadara

(Mt. 8.28-34; Mr. 5.1-20)

²⁶ Tacan tan tsaá ra naha nda Gadara tsa canyíi yuhu miñi ityi nuu Galilea tsa canyíi inga tsiyo miñi can. ²⁷ Tan quita ra Jesús tsitsi yutun ndoo ican. Tan ican tsaá iin ra ñuu tsa canyíi Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsí ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu. ²⁸⁻²⁹ Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsaahñi ndaha ra tan tsaha ra tsihin cadena. Maa tyin tatyí ña vaha ican tsahá tunyee iñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyívi iyó. Ra ican tsaá ra nu nyíi ra Jesús. Tan cuhva tsa nyehe ra can tsi ra Jesús, tsicuñi tsi tsi ra nuu ra. Tan caná tsaá ra tan catyí ra:

—¿Nacuvi tyihí un tsi un tsihin yuhu, yoohe Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí ña vaha ican tsihin ra Jesús, tyin ra Jesús tava tyiñu ra tsi nu tsa quita nu tsi ra ndaahví ican.

³⁰ Tan nducú tuhun ra Jesús tsi tatyí ña vaha ican, tan catyí ra:

—¿Náa nañi un?

Tan tatyí ña vaha ican jacahan nu tsi ra can, tan catyí ra:

—Nyuhu nañi ndi, Legión.

Tacan catyí ra tyin cuaha xaan tatyí ña vaha yihí tsi ra. [Cuenda mil nahnu yihí tsi ra.] ³¹ Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunú nu cua nyehe nahnu tundoho tan ña cuví maa quita nahnu. ³² Tan tsicán nahnu tsi ra Jesús na cuhva ra quihví nahnu tsitsi quini tsa yucú yuhu miñi ican tsatsi ti naha ti. Tacan tan tsahá ra Jesús ndatu tsa quihví nahnu tsitsi quini ican naha ti. ³³ Tan quita nahnu tsi ra ndaahví can. Tan quihví nahnu tsitsi quini ican naha ti. Tacan tan tsinú quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tsihi ti naha ti tsitsi ndutya.

³⁴ Tacan tan ra jahá cuenda tsi quini ican naha ra, nayuhví xaan ra naha. Tan tsinú ra naha cuahán ra naha cua nacatyí tuhun ra naha tsa cuví can tsihin nyívi nda ñuu. Tan tandihí ñi nyívi tsa nyehe ra naha, tan nacatyí tuhun ra naha tsa cuví ican.

³⁵ Tacan tan tsahan nyivi tsinyehē ñi náa tsa cuvī, tan tsaā ñi nu nyii ra Jesús. Tan nañihī ñi tsi ra tsa tsa yaha quita tatyī ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñi jifi ra. Tan nayuhvi xaan ñi cuvī. ³⁶ Tacan tan tandihī ñi tsa nyehe tsa cuvī ican, nacatyí tuhun ñi tsihin tandihī ca nyivi nácaa quita tatyī ña vaha tsi ra ndaahvi can, tan nduvahā ra. ³⁷⁻³⁹ Tacan tan tandihī nyivi iyó Gadara can quitsahā caahán ñi tsihin ra Jesús na cunuha ra ityi nu quee ra. Tyin nayuhvi xaan ñi tsa javahā ra tsihin nu tatyī ña vaha ican. Tacan tan ra tsa quita nu tatyī ña vaha can nahnu, cahan ndaahvi ra tsihin ra Jesús, na cuhva ra cuhun ndihī ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyivi vehe un náa ndihī tsa javahā Nyoo tsihin un —catyí ra.

Tacan tan ra Jesús quihvi ra tsitsi yutun ndoo ican. Tan cuanuhu ra tsihin ra tsicá tsihin ra. Tacan tan ra ndaahvi tsa nduvahā ican, cuanuhu ra nda ñuu ra. Tan ityi cuahán ra nacatyí tuhun ra tsihin tandihī nyivi ñuu ican nácaa janduvahā ra Jesús tsi ra.

Nu nduvahā ña sehe ra Jairo tan ñaha tsa tñ jahma ra Jesús

(Mt. 9.18-26; Mr. 5.21-43)

⁴⁰ Quivi tsa tsaā ra Jesús inga tsaha tsa tsahan ra inga tsiyo miñi can, cuaha xaan nyivi ndatú tsi ra. Tan sii xaan cuñi ñi tyin tsaā nyico ra. ⁴¹ Tacan tan tsaā iin ra tsa nañi Jairo, ra cuvi ityi nuu vehe ñuhu, tan tsicuiñi tsi ra nuu ra Jesús. Tan quitsahā caahán ndaahvi ra tsihin ra na cuhun ra vehe ra. ⁴² Tyin iyó iin ñaha sehe ra, tan iyó utsi uvi cuiya ña. Tan tsa cuñi cúu ña jahá cuehe. Tacan tan cuahán ra Jesús vehe ra. Tan cuaha xaan nyivi cuahán tsihin ra, tan tyañu xaan nu cuahán ra tyañu ñi. ⁴³ Tan tsihin nyivi ican cuahán iin ñaha cuuhvi. Tsa iyó utsi uvi cuiya ndohó ña cuehe tsa cuún niñi ña. Tan tsa ndihī maa xuhun ña janaa ña tsihin doctor tan ña nduvahā ña. ⁴⁴ Maa tyin tsaā ña nu cuahán ra Jesús, ityi tsata ra. Tan tñ ña jahma ra. Tan iin yaha ñi, tan tsicuiñi tsa cuún niñi ña.

⁴⁵ Tacan tan catyí ra Jesús:

—¿Yóo tñ jahma yu?

Tan tandihī ñi cuahán tsihin ra catyí ñi:

—Yoñi.

Tan ra Pedro tsihin ra cutahan tsihin ra, catyí ra naha tsihin ra Jesús:

—Maestro, cuaha xaan nyivi cuahán tsihin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo tñ jahma yu?” —catyí ra naha.

⁴⁶ Maa tyin ra Jesús catyí ra:

—Tsitó maa yu tyin iyó iin nyivi tñ jahma yu, tyin tuvī iñi yu cuahán juhva tunyee iñi tsa iyó tsi yu —catyí ra.

⁴⁷ Tacan tan ñaha can nyehe ña tyin tsa tsitó ra. Tan quitsahā niñi ña tsihin tsa yuuhvi ña. Tan tsicuiñi tsi ña nuu ra. Tan nacatyí tuhun ña tsihin ra nacuenda tñ ña jahma ra, tan nácaa nduvahā ña iin yaha ñi ican. Tan tsiñi tandihī nyivi tsa nacatyí tuhun ña. ⁴⁸ Tacan tan catyí ra Jesús tsihin ña:

—Tsa nduvahā un tyin tsinú iñi un tsi yu. Cuahan tsihin tsa vaha —catyí ra.

⁴⁹ Ndi caahán ca ra Jesús, tan tsaā ñi iin ra quee vehe ra Jairo, ra cuvi ityi nuu vehe ñuhu. Tan catyí ra tsihin ra Jairo:

—Sehe un tsa yaha tsihi ña. Ña cuhva ca un tsihi tsi ra Maestro ihya —catyí ra.

⁵⁰ Maa tyin tsa tsiñi ra Jesús tsa cahan ra ican, tan catyí ra tsihin ra Jairo:

—Ña nayuhvi un. Tsinu iñi. Tan ña sehe un cua nduvahā ña —catyí ra.

⁵¹ Tan cuhva tsa tsaā ra Jesús vehe ra Jairo, ña tsahā ra quihvi nyivi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihvi ñi tsitsi vehe nu canyi ñaha luhlu tsa tsihi can. ⁵² Tan tandihī ñi tsacú xaan ñi tsa cuenda tyin tsihi ña. Maa tyin ra Jesús catyí ra tsihin ñi:

—Ña vacu ca ndo. Tyin ña tsihi ña. Quixi ña —catyí ra.

⁵³ Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tsihi ña. ⁵⁴ Tacan tan tñ ra Jesús ndaha ña. Tan tsa nacahan ra tan catyí ra tsihin ña:

—Nduvita, ñaha luhlu —catyí ra.

⁵⁵ Tacan tan nandoto ña. Tan iin yaha ñi nduvita ña. Tan catyí ra Jesús:

—Cuhva ndo tsa catsi ña.

⁵⁶ Tan jutu ña tsihin sihi ña, iyo xaan cuñi ñi. Maa tyin catyí ra Jesús tsihin ñi tyin yofi maa tsihin cua cahan ñi tsa cuvī ican.

9

Nu tava ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo

(Mt. 10.5-15; Mr. 6.7-13)

¹ Canā ra Jesús tsa utsi uvi taahan ra tsicá tsihin ra. Tan tsahā ra tunyee iñi cahnu tsi ra naha tyin cuvi tava ra naha tatyí ña vaha tsi nyivi, tan cuvi janduvaha ra naha tsi nyivi cuuhvi.

² Tan tava tyiñu ra tsi ra naha na cahan ra naha nácaa ndacá ñaha Nyoo tsi nyivi. Tan tava tucu ra tyiñu tsi ra naha na janduvaha ra naha tsi nyivi cuuhvi. ³ Tan catyí ra tsihin ra naha:

—Nduve tsa cuiso ndo ityi cuhun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cuhun tsihin ndo. ⁴ Tan ndáa cuví ñi vehe tsaa ndo, ndo ndo ican nda cuanda quita quivi tsa cuhun ndo inga ñuu. ⁵ Tan nu ña cuñi nyivi tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaha ndo. Tan yacan janahá tyin ndoó cuatyí ñi siqui ñi —catyí ra Jesús tsihin ra naha.

⁶ Tacan tan cuahán ra naha tandihí maa ñuu. Tan caahán ra naha tuhun Nyoo tan nácaa cuñi tsi tan cacu ñi. Tan janduvahá ra naha tsi nyivi cuuhví.

Nu cuñi ra Herodes coto ra yóo ra cuví ra tsicá nuu caahán tuhun Nyoo tan janduvahá ra nyivi

(Mt. 14.1-12; Mr. 6. 14-29)

⁷ Ra Herodes, ra cuví ra ndacá ñaha [tanii cahnu Galilea], ñihí tuhun ra tsa javahá ra Jesús. Tan ña ñihí vaha ra cuhva yóo ra cuví ra. Tyin yihí nyivi catyí ñi tyin ra Juan nandoto. ⁸ Tan yihí ñi catyí ñi tyin ra Elías quituví nyico. Tan yihí ñi catyí ñi tyin inga ra cuví ndusu yuhu Nyoo tsanaha nandoto. ⁹ Maa tyin catyí ra Herodes:

—Maa maa yu tyihí tyiñu tsa tyahnya jucun ra Juan. Tun tacan, ¿yóo ra cuví ra tsa caahán xaan nyivi tuhun catyí ñi tsiñi yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehe ra tsi ra.

Nu tsahá ra Jesús tsa catsi uhun mil rayii
(Mt. 14.13-21; Mr. 6.30-44; Jn 6.1-14)

¹⁰ Tan cuhva tsa tsaa nyico ra tava tyiñu ra Jesús, tan nacatyí tuhun ra naha tsihin ra Jesús tandihí maa tsa cuví nu tsahan ra naha. Tacan tan tava siin ra Jesús tsi ra naha tan cuahán ra naha yatyin ñi iin ñuu tsa nañi Betsaida. ¹¹ Maa tyin cuhva tsa ñihí tuhun nyivi tyin cuahán ra Jesús ndacan, tan cuahán ñi nda nu nyii ra. Tan naquihín cuenda ra tsi ñi. Tacan tan quitsahá caahán ra tsihin ñi nácaa ndacá ñaha Nyoo tsi ñi. Tan janduvahá ra tsi nyivi cuuhví.

¹² Tan tsa tseñi cuñi ña, tsa utsi uvi taahan ra tsicá tsihin ra Jesús catyí ra naha tsihin ra:

—Çahan tsihin nyivi ihya, na cunuhu ñi na quitatu ñi, na nanducu ñi tsa catsi ñi ñuu tsa canyií yatyin ñi ihya, tyin ihya nduve maa tsa catsi yo iyó —catyí ra naha.

¹³ Tacan tan catyí ra Jesús tsihin ra naha:

—Çuhva nyoocho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa

tyin ña ñihí tsa catsi tandihí nyivi ihya. Ndi maa cuhun ndi cujata ndi, maa tyin ña cua ñihí tsa catsi ñi tyin cuaha xaan ñi —catyí ra naha.

¹⁴ Tyin vasiqui quitá maa uhun mil rayii yucú ican. Tan siin maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyivi tsa uvi xico utsi taahan ñi iin iin nu cunyecu ñi.

¹⁵ Tacan tan tsicunyecu tandihí ñi jahá ra naha. ¹⁶ Tan quihín ra Jesús uhun taahan paan ican tsihin uvi taahan tyaca ican. Tan nanyehe ndaa ra ityi andiví, tan nacuhva ra tyahvi nyoo tsi Nyoo tsa cuenda can. Tan tsahnya sava ra paan tan tyaca ican. Tan tsahá ra tsi ra tsicá tsihin ra, na tsatsa ra naha can tsi nyivi. ¹⁷ Tacan tan tandihí ñi tsatsi ñi, tan ndaha vaha iñi ñi. Yahá can tan ndoó ca tsa ñahñu, tan jacutu ra naha utsi uvi taahan tyica tsihin tsa ñahñu ican.

Nu catyí ra Pedro tyin ra Jesús cuví ra Cristo, ra jacacú tsi yo

(Mt. 16.13-19; Mr. 8.27-29)

¹⁸ Iin quivi quitá siin ra Jesús tsihin ra tsicá tsihin ra. Tan tsican tahvi ra tsi Nyoo. Tan nu ndihí tsican tahvi ra, tan tsicá tuhun ra tsi ra tsicá tsihin ra tan catyí ra tsihin ra naha:

—¿Náa catyí nyivi tuhun yu, yóo ra cuví yu, catyí ñi?

¹⁹ Tan nacahan ra tsicá tsihin ra, tan catyí ra naha:

—Yihí ñi catyí ñi tyin ra Juan, ra jacoondutyá tsi nyivi, cuví un. Tan yihí ñi catyí ñi tyin ra Elías cuví un. Tan yihí ñi catyí ñi tyin inga ra cuví ndusu yuhu Nyoo tahanan tsanaha cuví un —catyí ra naha.

²⁰ Tacan tan nducú tuhun ra Jesús tsi ra naha, tan catyí ra:

—Tan nyoocho, ¿yóo ra cuví yuhu, cuñi maa ndo?

Tan nacahan ra Pedro, tan catyí ra:

—Yoocho cuví ra Cristo, ra tsa quee nu nyaá Nyoo.

²¹ Tan catyí ra Jesús tsihin ra naha tyin ña cahan ra naha can tsihin nyivi.

Nu jacoto ra Jesús nácaa cua cahñi nyivi tsi ra

(Mt. 16.20-28; Mr. 8.30—9.1)

²² Tacan tan catyí ra tsihin ra naha inga tsaha:

—Yuhu Rayii tsa quee nda gloria cuví yu. Tan taahán tsi tyin cuaha xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quivi cua nandoto yu —catyí ra Jesús.

²³ Tacan tan catyí ra tsihin ra naha:

—Nyooho tsa cuñí cunyicun tsi yu, cahnya iñi ndo tsa cuñí maa ndo javaha ndo, tacan tan cuvi javaha ndo tsa cuñí Nyoo. Ña ndu uvi iñi ndo tsa yihí ndo cuenda yu vasu tandihí quivi nyehé ndo tundoho. Tyin yacan cuvi tumaa cruu tsa taahán tsi cuiso ndo tatun cua cunyicun ndo tsi yu. ²⁴ Tan nyooho tsa ña cuñí nyehe tundoho tan ña cuñí ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyooho tsa cua cuhva ñayivi iyó ndo tsa cuenda yu, cua cacu ndo. ²⁵ Nduve yahvi nyaá cua ñihí ndo tandihí tsa iyó nu ñuhu ñayivi ihya, tun ña cua cacu añima ndo. ²⁶ Tyin tatun cahan nuu ndo tsa xaan cuñí nyivi nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsaa quivi quitsi yu inga tsaha. Tyin cua quitsi nyico yuhu Rayi tsa quee nda gloria tsihin tsa cahnu cuvi yu, tan tsa cahnu cuvi Nyoo Jutu yo, tan ángel tsa cuenda ra. ²⁷ Tan tsa nditsa catyí yu tsihin ndo tyin yihí ndo tsa nyecú ndo ihya vityin, ña cua cúu ndo nda cuenda yaha nyehe ndo nácaa cuvi nu ndacá ñaha Nyoo.

Nu uñi taahan ra tsicá tsihin ra Jesús nyehé ra naha nácaa cuvi nu ndacá ñaha Nyoo (Mt. 17.1-8; Mr. 9.2-8)

²⁸ Una quivi yaha tsa cahan ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tsihin ra. ²⁹ Tan tsa ndi tsicán tahvi ca ra Jesús, tan nasama cuhva caá nuu ra tan jahma ra. Si xaan cuitsin tsi tan xiñu tsi. ³⁰ Tacan tan quituví uvi taahan ra natuhún tsihin ra, ra Moisés tan ra Elías. ³¹ Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra. ³² Tan vasu cuñí xaan ra Pedro naha ra cusu ra naha, maa tyin ña quixí maa ra naha tyin nyehé ra naha tsa nditsin cuvi nu nyaá ra Jesús tsihin ra nyecú tsihin ra. ³³ Cuhva tsa cuahán ra tsinyecú tsihin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

³⁴ Tan tsa ndi caahán ca ra tan quitsi iin vico siquí ra naha. Tan nayuhvi xaan ra naha tsa quihvi ra naha tsitsi vico ican. ³⁵ Tacan tan tsitsi vico ican tsiñi ra naha iin ndusu tsa catyí:

—Juvín ra ihya cuvi Sehe yu, tan cuñí xaan yu tsi ra. Tyaa soho ndo tsa caahán ra —catyí ndusu ican.

³⁶ Tan tsa yaha cahan ndusu ican, tan nanyehé ra naha tyin intuhun ña maa ra

Jesús nyaá ican. Tan yofí maa tsihin cahan ra naha tsa nyehe ra naha.

Nu janduvahá ra Jesús tsi iin ra luhlu tsa yihí tatyí ña vaha

(Mt. 17.14-21; Mr. 9.14-29)

³⁷ Tan tsa inga quivi tsa nuu ra Jesús yucu ican, cuaha xaan nyivi tsijatahan tsi ra. ³⁸ Tacan tan caná tsaa iin ra cuahán tsihin nyivi cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahvi iñi tsi sehe yu. Tyin intuhun ñi maa ra cuvi sehe yu. ³⁹ Tan tuhvá tatyí ña vaha quihvi tsi ra. Tan tuhvá ra caná tsaa jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahán ra jahá nu. Tan ña cuñí maa nu tatyí ña vaha ican jaña nu tsi ra. ⁴⁰ Tsa cahan yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuvi tava ra naha tsi nu —catyí ra.

⁴¹ Tacan tan nacahan ra Jesús tan catyí ra: —Nyooho, nyivi ña tsinú vaha iñi. Tan caquiñi ndo. ¿Najava taahan ca quivi cunyaa yu tsihin ndo tan cunyeé iñi yu nyehe yu tsi ndo nda cuenda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndaca sehe un tsi yu.

⁴² Tan cuhva tsa natuhva ra luhlu can nu nyaá ra Jesús, tan janduvá nu tatyí ña vaha ican tsi ra ndasava. Maa tyin ra Jesús tava ra tsi nu tatyí ña vaha ican. Tan janduvahá ra tsi ra. Tacan tan nacuhva cuenda ra tsi ra tsi jutu ra. ⁴³ Tan tandihí nyivi, iyo xaan cuñí ñi tsa cahnu tsa javaha Nyoo nu yucú ñi.

Tsitsi tsa iyo cuñí nyivi tsa javaha ra Jesús, tan catyí ra tsihin ra tsicá tsihin ra:

Nu cahan ra Jesús inga tsaha tyin cua cahñi nyivi tsi ra

(Mt. 17.22-23; Mr. 9.30-32)

⁴⁴ —Tyaa soho vaha ndo tuhun caahán yu. Tan ña naa iñi ndo. Tyin Rayi tsa quee nda gloria, cua cuhva cuenda nyivi tsi ra tsi ra xaan iñi tsi ra —catyí ra Jesús.

⁴⁵ Maa tyin ra tsicá tsihin ra ña cutuñi iñi ra naha nacuenda cahan ra tacan. Tyin Nyoo ña tsahá ra tsa cutuñi iñi ra naha. Tan yuuhvi ra naha nducu tuhun ra naha tsi ra Jesús náa cuvi tsa caahán ra.

Nu janahá ra Jesús yóo ra tsa cahnu ca cuvi nu ndacá ñaha Nyoo

(Mt. 18.1-5; Mr. 9.33-37)

⁴⁶ Tacan tan ra tsicá tsihin ra quitsaha caahán yuhu tahan ra naha, ndaa ra cahnu ca cuvi tsitsi tsa utsi uvi taahan ra naha.

⁴⁷ Tan tsitó ra Jesús tsa tsicá iñi ra naha, tan quihín ra iin ra luhlu. ⁴⁸ Tan catyí ra tsihin ra naha:

—Tatun tsihin sivi yu naquihín cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquitsi tsi yu, naquihín cuenda ndo. Tyin nu yucú ndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

Nyivi tsa ña cuxaán tsi yo, juvin ñi ican jatyiinyeé tsi yo

(Mr. 9:38-40)

⁴⁹ Tacan tan ra Juan catyí ra tsihin ra Jesús:

—Maestro, nyehe ndi tsi iin ra tavá tatyí ña vaha. Caahán ra sivi un tan tavá ra tatyí ña vaha. Maa tyin ña tsahá ca ndi javaha ra tacan. Tyin ñavin tsihin yo tsicá ra —catyí ra.

⁵⁰ Tacan tan catyí ra Jesús tsihin ra:

—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

Nu cahan ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha

⁵¹ Tuví iñi ra Jesús tyin tsa nyaa naa yatyiin quivi tsa cunuho ra gloria. Tan jandu iin ra iñi ra, tan quihín ra ityi tan cuahán ra ñuu Jerusalén. ⁵² Tan tavá tyiñu ra na cuhun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús. ⁵³ Maa tyin nyivi Samaria ican, ña cuñí ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñí ñi nyehe ñi tsi nyivi ñuu Jerusalén. ⁵⁴ Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñí un tsa ica yo tumaa ica ra Elías? Cua ndacan yo tsi Nyoo na jaquitsi ra ñuhu andivi tyin cayu ñi Samaria ican tyin ña cuñí ñi tsa ndoo yo ñuu ñi —catyí ra naha.

⁵⁵ Tacan tan nyehe ra Jesús nuu ra naha. Tan cuxaán ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñí iñi ndo náa tyiñu vatsí yuhu. ⁵⁶ Tyin Rayii tsa quee nda gloria, ña vatsi ra tyin janaa ra tsi nyivi, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

Nyivi tsa cuñí quihvi cuenda ra Jesús

(Mt. 8:19-22)

⁵⁷ Tan tsitsi tsa tsicá ityi ra naha, quita iin ra, tan catyí ra tsihin ra Jesús:

—Jutu Mañi yu, cuñí yu cunyicun yu tsi un. Tan cuhun yu tsihin un tandihí ñi ityi cuhun un —catyí ra.

⁵⁸ Tacan tan catyí ra Jesús tsihin ra:

—¿A nditsa un? Tyin ñicuii iyó vehe ti. Tan saa iyó taca ti. Maa tyin Rayii tsa quee nda gloria ndi nu cava jiñi ra tan nduve iyó —catyí ra tsihin ra ican.

⁵⁹ Tacan tan catyí ra Jesús tsihin inga ra:

—Cohon tsihin yu.

Tacan tan nacahan ra ican, tan catyí ra:

—Taa, cūatu nuu tsi yu, na cuhun jihna yu cucutsi yu tsi jutu yu —catyí ra.

⁶⁰ Tacan tan ra Jesús nacahan ra tan catyí ra tsihin ra:

—Nacoo tsi nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi. Maa tyin yooho cūaahan cahan un tuhun Nyoo tsihin nyivi na cūhva cuenda ñi tsi ñi tsi Nyoo na cundaca ñaha ra tsi ñi —catyí ra.

⁶¹ Tacan tan catyí inga ra tsihin ra Jesús:

—Cuñí yu cunyicun yu tsi un, tata. Maa tyin cūhva na cuhun jihna yu cūcahan yu tsihin nyivi vehe yu —catyí ra.

⁶² Tan ra Jesús catyí ra tsihin ra:

—Tumaa iin ra tahvi ñuhu tsihin indiqui, tatun nanyehe tsata ra, ña quita vaha yucun nu jahá tyiñu ra. Tan tacan cuví iin ra nyicún tsi yu, tatun cuñí nyico ra tsa tsa nacoq ra, ña cuví cūhva ra tsi ra cundaca ñaha Nyoo —catyí ra Jesús tsihin ra.

10

Nu tavq ra Jesús tyiñu tsi uñi xico utsi taahan ra cua cahan tuhun Nyoo tsihin nyivi

¹ Tsa yaha can tan nacatsí Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandihí ñi ñuu, uvi uvi ra cuahan tsa iin nu cuahán ra nu cua cuhun ra Jesús. ² Tan catyí ra tsihin ra naha:

—Tumaa iin itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyiinye ra naha tsi ndo cahan ndo tuhun Nyoo tsihin nyivi. ³ Tan cūaahan ndo tan nyehe ndo tyin cua jacuhun yu tsi ndo tumaa mbee mahñu lobo tsa cuví quiti xaan. Tyin lobo tuhvá ti tsahñí tsi mbee. Tan tacan tucu cua cuñi nyivi cahñi ñi tsi ndo. ⁴ Tan ña cua cuiso ndo ndi marali tan ndi nu yihi xuhun ndo, tan ndi inga pari nditsan ndo ña cuiso ndo. Janumi ndo. Tun taahán ndo nyivi ityi cuahán ndo cūhva ndo nacumi tsi ñi tan ña cucuiñi ndo natuhun ndo tsihin ñi. ⁵ Cuhva tsa quihvi ndo tsitsi vehe iin nyivi, cahan ndo tsihin ñi. Tan catyí ndo, na coo tsa vaha añima ñi. ⁶ Tan tacan tucu tatun iyó nyivi vaha iñi vehe ican, cua ndoo tsa vaha can tsihin ñi. Maa tyin tatun yofi ñi vaha añima, ña cua ndoo tsa vaha tsihin ñi. ⁷ Tan ndoo ndo juvin ñi maa vehe ican. Tatun tsahá ñi tsa catsi ndo, catsi ndo. Tatun tsahá ñi tsa coho ndo, cōho ndo itsi. Tyin ra jahá tyiñu,

iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsaá quívi tsa cuhun ndo inga ñuu. ⁸ Tan nu tsaá ndo iin ñuu tan vaha cahan ñi tsihin ndo, catsi ndo tandihí tsa cuhva ñi catsi ndo. ⁹ Tan janduvaha ndo tsi ñi cuuhví ñuu ican. Tan catyí ndo tsihin ñi: “Tsa nyanaá yatyin Nyoo, ra cuñí quihvi añima ndo cundaca ñaha ra tsi ndo.” ¹⁰ Maa tyin tatun tsaá ndo iin ñuu tan ña cuñí nyívi tyaa soho ñi tsa caahán ndo, quita ndo ityi cahnu. Tan catyí ndo tsihin ñi: ¹¹ “Nda cuanda nyaca ñuhu ñuu ndo tsa iñi tsaha ndi, tan cua naquisi ndi. Tyin cuñí tsi catyí tyin cuatyí ndo ndoó can siquí ndo. Tyin Nyoo nyanaá yatyin ra tsihin ndo tan ña tyaa soho ndo tsa caahán ra nácaa cuñí tsi tsa cundaca ñaha ra tsi ndo.” Tacan catyí ndo tsihin ñi —catyí ra Jesús tsihin ra tsa uñi xico utsi can naha ra.

¹² Tan catyí tucu ra tsihin ra naha:

—Quívi cua tatsi tuñi Nyoo tsi nyívi, yaha ca cuhva cua nyehe nyívi ñuu ican tundoho tan ñavin ca nyívi tsicoo tahán tsanaha ñuu Sodoma, —catyí ra Jesús.

*Nyívi ña tyaa soho tuhun caahán ra Jesús
cua nyehe ñi tundoho
(Mt. 11.20-24)*

¹³ Tan catyí ra Jesús:

—jNdahvi nyoooho, nyívi ñuu Corazin! Tan jndahvi nyoooho nyívi ñuu Betsaida! Tyin nyehé ndo tsa iyo javahá yu, tan ña cuñí ndo nasamá ndo cuhva iyó ndo. Maa tyin nyívi ñuu Tiro tan ñuu Sidón nduve tsa nyehe ñi. Maa tyin tun tsatyin nyehé ñi tsa nyehé nyoooho vityin, numi xaan cua cunditsi ñi jahma tucuiihya iñi tan cunyecu ñi nu nyaa: tsa ndu uvi iñi ñi cuatyí ñi cuví can. ¹⁴ Yacan cuenda, nyoooho nyívi ñuu Corazin tsihin ñuu Betsaida, ñihi ca cua tatsi tuñi Nyoo tsi ndo tan ñavin ca nyívi ñuu Tiro tan nyívi ñuu Sidón can. ¹⁵ Tan nyoooho nyívi ñuu Capernaum, cuñí maa ndo tyin cundaa ndo nda cuanda andívi. Maa tyin cua nuu ndo nda cuanda nu yucú ndiyi anyaya, tyin ña tyaa yahvi ndo tuhun Nyoo —catyí ra Jesús.

¹⁶ Tan catyí ra tsihin tsa uñi xico utsi taahan ra can naha ra:

—Nyívi tsa tyaa soho tsa caahán nyoooho, tsa caahán yuhu tyaa soho ñi. Tan nyívi ña tyaa soho tsa caahán nyoooho, tsa caahán yuhu ña tyaa yahvi ñi. Tan ñi ña tyaa yahvi tsa caahán yuhu, tsa caahán ra tsa jaquitsi tsi yu, ña tyaa yahvi ñi —catyí ra Jesús tsihin ra naha.

*Nu tsaq nyico tsa uñi xico utsi ra tsa
tsahan tsicahan tuhun Nyoo*

¹⁷ Ihya cuví nu tsaq nyico tsa uñi xico utsi ra tsa tsahan tsicahan tuhun Nyoo tsihin nyívi. Tan sii xaan cuñí ra naha. Tan catyí ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyaa yahvi nahnú tsa cahan ndi tsihin sivi un —catyí ra naha.

¹⁸ Tacan tan catyí ra Jesús tsihin ra naha:

—Tacan tyin yuhu nyehe yu andívi nu canacava nu ña vaha, nu nañi Satanás. Tu-maa cañi iin tatsa savi, tacan canacava nu. ¹⁹ Tan maa yuhu, tsaha tunyee iñi tsi ndo tyin cuví cañi tahan ndo tsihin nu ña vaha. Tan cuví cuañi ndo tsata coo tan tujuhma, tan nduve tsa cua jaha ti naha ti tsi ndo. ²⁰ Maa tyin ña cusii xaan iñi ndo tyin cuví tava ndo tatyí ña vaha ican. Cusii ca iñi ndo tyin nyaa sivi ndo nu libru Nyoo nda gloria —catyí ra Jesús tsihin ra naha.

*Nu jacahnú ra Jesús tsi Nyoo tsa sii cuñi
ra tyin janahá Nyoo tsa vaha tsi nyívi ndaahvi
(Mt. 11.25-27; 13.16-17)*

²¹ Tacan tan sii xaan cuñi ra Jesús jahá Tatyí li Nyoo, tan catyí ra:

—Jacahnú yu tsi un, Jutu yu, tyin yooho cuví ra ndacá ñaha andívi tan nu ñuhu ñayívi ihya. Tyin maa un janahá un tuhun maa un tsi nyívi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñi maa un —catyí ra Jesús.

²² Tan catyí ra Jesús tsihin tandihí ra naha:

—Tandihí maa tsaha Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yoo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yoo ra cuví Nyoo Jutu, intuhun ñi Sehe ra tsitó tsi ra. Tan coto tucu nyívi tsa cuñi Sehe Nyoo jacoto ra tsi ñi —catyí ra Jesús.

²³ Tacan tan nanyehe ra nu nyecú ra tsicá tsihin ra. Tan caahán xeehe ra tsihin ra naha:

—Sii xaan cuñi nyoooho tan nyívi tsa iyó vityin tyin nyehé ndo tsa javahá yu. ²⁴ Tyin cuaha xaan rey tan ra cuví ndusu yuhu Nyoo tahán tsanaha, cuñi ra naha nyehe ra naha tsa nyehé nyoooho vityin. Maa tyin ña nyehe ra naha. Tan cuñi ra naha tyaa soho ra naha tsa tsiiñi nyoooho vityin. Maa tyin ña tsiiñi ra naha —catyí ra Jesús tsihin ra tsa tsicá tsihin ra.

*Nu jacuahq ra Jesús tsi yo tyin taahán tsi
jatyinyee yo tsi tandihí ñi maa nyívi*

²⁵ Tacan tan tsaq iin ra maestro cuenda ley vehe ñuhu. Tan quitsaha tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cuhun yu coo yu ñayívi nyito tsa ña cua naa maa?

²⁶ Tacan tan nacahan ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

²⁷ Tacan tan nacahan ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin taniñ añima yo tan tsihin tandihi cuhva tsicá iñi yo, tan tsihin tandihi tunyee iñi tsa iyó tsi yo, tan tsihin tandihi tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

²⁸ Tacan tan catyí ra Jesús tsihin ra:

—Nditsa tsa caahan un. Tacan javaha un tan coo un ñayivi nyito tsa ña cua naa maa —catyí ra Jesús.

²⁹ Maa tyin ra maestro cuenda ley can cuñi ra cuví ra ra vaha nuu ra Jesús, tan catyí ra tsihin ra:

—¿Tan yóo nyivi cuñi yu? —catyí ra.

³⁰ Tacan tan nacahan ra Jesús, tan catyí ra:

—Iin ra quee ñuu Jerusalén cuahán ra nda ñuu Jericó. Tan tahanan ra tsi nu ñasuhu nahnu. Tan suhú nahnu tandihi maa tsa nyisó ra, nda cuanda jahma ra. Tan cañi nahnu tsi ra nda cuanda tsaquin taxin ña nahnu tsi ra. Tan nacoó ihñi nahnu tsi ra ican. ³¹ Tacan tan yaha iin ra cuví jutu ityi can. Maa tyin tsa nyehe ra tsi ra canyií ican, ndasava ñi yaha tsiyo ra. ³² Tacan tan yaha tucu iin ra yihí cuenda vehe ñuhu, ra cuví tata ra Leví. Maa tyin tsa nyehe ra tsi ra canyií ican, juven ñi ndasava yaha ra. ³³ Tacan tucu iin ra Samaria yaha ra juven ñi ityi can. Tan nyehe ra tsi ra canyií ican, tan quitsi tsa ndaahvi cuñi ra nyehe ra tsi ra. ³⁴ Tan natuhva ra nu canyií ra, tan quitsaha tyaá ra numeri tsi ra, tyihí ra acetye tsihin vinu nu uhvi can. Tan tyaá ra iin jahma vita nu uhvi can. Yaha can tan jandaá ra tsi ra tsata burru jana ra, tan quihín ra tsi ra, cuahán tsihin ra nu nyaá iin vehe. Tan jaha cuenda ra tsi ra. ³⁵ Tan tsa inga quivi tsa cuñi cuhun ra Samaria. Tan tava ra uvi taahan xuhun. Tan tsahá ra tsi ra jatsii vehe can. Tan catyí ra tsihin ra: “Jaha cuenda vaha tsi ra ihya. Tan cuhva tsa catsi ra. Tan jata un numeri tsi ra na nduvaha ñi ra. Tatun cuñi ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

³⁶ Nu ndihí nacatyí tuhun ra Jesús, tan nducu tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndáa ra cuví ra vaha iñi tsa ra ndaahvi tsa tsinyaa ndaha nu ñasuhu nahnu? —catyí ra Jesús.

³⁷ Tacan tan catyí ra maestro ican:

—Ra tsa cundaahvi iñi tsi ra —catyí ra.

Tacan tan catyí ra Jesús:

—Cuaahan tan ica tucu yoocho tacan tsihin nyivi tsa nyehé tundoho —catyí ra.

Nu tsinyaaq ra Jesús vehe ña Marta tsihin ña María

³⁸ Tan quihín ra Jesús ityi cuahán ra. Tan tsaa ra iin ñuu. Tan ican iyó iin ñaha tsa nañi Marta. Tan tsaa ra vehe ña. Tan tsahá ña quihvi ra tsitsi vehe ña. ³⁹ Tan ña Marta, iyó iin tahanan ña nañi María. Tan ña María tsicunyyaa ña yatyn ñi tsaha ra Jesús, tyin tyaa soho ña tsa caahan ra. ⁴⁰ Tan ña Marta cuaha xaan tyiñu javahá ña. Tan tsaa ña nu nyaá ra Jesús, tan catyí ña tsihin ra:

—Yoocho tata. ¿A ña tsicá iñi yoocho tyin ña tahanan yu nacoó ña tsi intuhun ñi maa yu tsihin tyiñu ihya? Cahan tsihin ña na jatynyee ña tsi yu —catyí ña tsihin ra.

⁴¹ Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñi un tsihin tyiñu can. ⁴² Maa tyin iyó intuhun tsa ñiñi ca taahan tsi caca iñi yo. Tan ña María ihya nacatsi ña tyiñu vaha ca javahá ña. Tan yoñi cuví quinyaa can tsi ña —catyí ra Jesús tsihin ña Marta.

11

Nu jacuahá ra Jesús tsi ra tsicá tsihin ra nácaa ndacan tahvi ra naha tsi Nyoo (Mt. 6.9-15; 7.7-11)

¹ Cuví iin tsaha tsa tsicán tahvi ra Jesús. Tsa ndihí tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janahá ra Juan tsi ra tsicá tsihin ra —catyí ra.

² Tacan tan catyí ra Jesús tsihin ra:

—Cua cuhva yu cuhva tsi ndo nácaa. Tye-hen ndacan tahvi ndo, catyí ndo:

Jutu Mañi ndi, yoocho tsa nyaá un gloria. Jacahnú xaan ndi tsi un.

Na quitsi quivi tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihi cuhva cuñi maa un, tumaa cuhva cuví nda gloria.

³ Cuhva tsa catsi ndi tan yaha ndi iin quivi.

⁴ Jaha tucahnu iñi tsi ndi tsa cuenda cuatyí ndi. Tyin nyuhu jahá tucu maa ndi tucahnu iñi tsi nyivi xaan iñi tsi ndi.

Ña cua cuhva un tsa nducu cuhva nu ña vaha tsi ndi. Tan jacacu tsi ndi tan ña cua cunye nu ña vaha tsihin ndi.

Tacan ndacan tahvi ndo —catyí ra Jesús.

⁵ Tan catyí tucu ra:

—Na catyí yo tyin iin nyoocho iyó iin ra vaha iñi tsi ndo, tan tsaa ra vehe ndo tsa tsa cuaa tan catyí ra tsihin ndo: “Jaha tumañi iñi tsi, xin. Cuhva nuu uñi taahan paan tsi yu. ⁶ Tyin iin ra vaha iñi tsi yu ndi tsaa ra yuvehe yu. Tan cañi xaan quee ra. Tan nduve tsa cuhva yu catsi ra.” ⁷ Tan nyoocho cua nacahan ndo tan catyí ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan

ña cuví nduvita yu tan cuhva yu tsa cuhva yu tsi un tsa vityin.” Tacan cua catyí ndo tsihin ra. ⁸ Tan catyí yu tsihin ndo. Vasu ra vaha iñi ndo cuví tsi ra can, ña cua nduvita ndo tan cuhva ndo tsa nducú ra tsa numi ñi. Maa tyin tatun caahán yuhu ra tsihin ndo, jandatsan ra yuvehe ndo tan caná tsaa ra tsi ndo tsa ña cua cuví cusu ndo, tacan tan cua nduvita ndo tan cuhva ndo tsa nducú ra. Tacan tan ña cua jatyañu ca ra tsi ndo. ⁹ Tan tacan tucu nyoocho tsihin Nyoo, ndacan ndo tsi ra. Tan cua cuhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña. ¹⁰ Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

¹¹ “Tacan tucu nyoocho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi tun tsicán tsi paan. Tan ña tuhvá ndo cuhva iin coo itsi tun tsicán tsi tyaca. ¹² Tan ña tuhvá ndo cuhva tujuhma tsi sehe ndo tatun tsicán tsi ndivi catsi tsi. ¹³ Nyoocho quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyí lí ra cunyaa añima ndo tun ndacan ndo tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo (Mt. 12.22-30; Mr. 3.20-27)

¹⁴ Ra Jesús tava ra tatyí ña vaha tsa janduñihi tsi iin rayi. Tsa quita nu tatyí can tsi ra can, cuví nacahan ra. Tacan tan iyo xaan cuñi nyivi tsa nyehe ñi tsa cuví. ¹⁵ Tan yihí ñi catyí ñi:

—Ra ihya, tava ra tatyí ña vaha tsihin tunyee iñi nu Beelzebú nu cuví ityi nuu tsihin tandihi tatyí ña vaha —catyí ñi.

¹⁶ Tan yihí ñi cuñi ñi nducu cuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andivi. ¹⁷ Maa tyin ra Jesús tsitó ra tsa tsicá iñi ñi. Tan catyí ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihi tyiñu tsa ndacá ñaha ra naha. Tan tatun iin vehe tan natahvi nyivi tsihin tahan ñi, tacan tan cua tivi nu yucú ñi.

¹⁸ Tan tacan tucu nu ña vaha, tatun natahvi nahnu, cua cundihi tunyee iñi tsa iyó tsi nahnu. Caahán yu tyeheh tsihin ndo, tyin catyí ndo tyin tsihin tunyee iñi nu Beelzebú tava yu tsi nu tatyí ña vaha nahnu. ¹⁹ Maa tyin tun tsatyin tava yu tsi nahnu tumaa cuhva catyí ndo, ndaca tuhun ndo tsi ra nyecú tsihin ndo yóo tsahá tunyee iñi tsi ra naha tan tava ra naha tsi nahnu. Maa ra naha cua cahan tsa nditsa tsihin ndo tyin nyoocho soho xaan tsicá iñi ndo. ²⁰ Maa tyin catyí yu tsihin ndo tyin yuhu tava yu tatyí ña vaha tsihin tunyee iñi Nyoo. Tan cuñi tsi

catyí yacan tyin nditsa tyin Nyoo, ra taahán tsi cundaca ñaha tsi nyivi, tsa tsaa ra nu yucú ndo.

Nu jacuahá ra Jesús tyin ñihi ca tunyee iñi Nyoo tan ñavin ca tunyee iñi nu ña vaha

²¹ “Tatun iin ra tan iyó xaan tunyee iñi tsi ra tan nyisó ra mityi ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuví quinyaa ñasuhu. ²² Maa tyin tatun quitsi iin ra tsa cuaha ca tunyee iñi iyó, tan cañi tahan ra tsihin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

²³ Nyivi ña jahá tyiñu tsihin yu, jativí ñi tyiñu jahá yu. Tan tatun ña caahán ñi tuhun Nyoo tsihin nyivi, tyin cunyicun ñi tsi yu; cuñi tsi catyí tsi tyin ña tsahá ñi tsa cunyicun nyivi tsi yu.

Nu jacuahá ra Jesús tsi yo nácaa quihvi tatyí ña vaha tsi yo inga tsaha tatun naa iñi yo

²⁴ “Tatun iin nu tatyí ña vaha quita nu tsi iin nyivi, tsicá nuu nu iin ñuhu ityi, nanducú nu nu quitatu nu. Maa tyin ña nañihi maa nu nu quitatu nu, tacan tan tsicá iñi nu: “Cunuhu nyico yu nda vehe yu nu quee yu.”

²⁵ Tacan tan tsaa nyico nu añima nu quee nu. Tan nyehé nu tyin ndi xaan tan sii xaan caá. ²⁶ Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi tandihi nahnu añima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

Nyivi tsa nditsa iyó vaha ñi nu ñuhu ñayivi

²⁷ Tsitsi tsa ndi caahán ca ra Jesús yacan, tan caná tsaa iin ñaha tsa nyii mahñu nyivi ican. Tan catyí ña:

—¡Náa tsa sii cuñi ñaha tsa jacacú tsi un, ñaha tsa jacaxin tsi un! —catyí ña.

²⁸ Maa tyin ra Jesús catyí ra:

—Sii xaan ca cuñi nyivi tsa tsiñi tuhun caahán Nyoo tan tyaá yahvi ñi itsi —catyí ra.

Nyivi ña vaha, maa ñi maa tsa iyo cuñi ñi nyehe ñi

(Mt. 12.38-42; Mr. 8.12)

²⁹ Tacan tan tsaa ca nyivi nu nyii ra Jesús. Tan catyí ra tsihin ñi:

—Nyivi tsa iyó vityin quiñi xaan iyó ñi. Tan nyiyo xaan iñi ñi. Cuñi ñi nyehe jihna ñi tsa iyo. Maa tyin intuhun ñi tsa iyo cua nyehe ñi, yacan cuví tsa javahá Nyoo tsihin ra Jonás, ra cuví ndusu yuhu Nyoo tsanaha. Nduve inga ca tsa iyo cua nyehe ñi. ³⁰ Tumaa tsa janahá ra Jonás tsi nyivi ñuu Ninive tahan tsanaha tyin ii Nyoo, tacan tucu yuhu, Rayi tsa quee nda gloria, janahá yu tsi nyivi tsa iyó vityin tyin ii Nyoo.

³¹ Quiví cua tatsi tuñi Nyoo tsi nyívi, cua nan-doto ñaha cuví reina ityi sur tahān tsanaha, tan cua catyi ña tyin cuhun ndo anyaya tyin maa ña vasu cañi ñuu ña, maa tyin quitsi ña, quitsi tyaa soho ña tsa tsiñi tuñi tsa cahān ra Salomón. Tan vityin cahnu ca cuví ra nyaá tsihin ndo tan ñavin ca ra Salomón. ³² Tan quiví cua cutuñi tandihi nyívi, cua nandoto nyívi tsicoq ñuu Nínive tahān tsanaha, tan cua catyi ñi tyin nyooho nyívi tsa iyó vityin cuhun ndo anyaya, tyin nyívi Nínive ican, nasama ñi cuhva iyó ñi quiví cahān ra Jonás tuhun Nyoo tsihin ñi. Tan vityin cahnu ca cuví ra nyaá tsihin ndo tan ñavin ca ra Jonás.

Nu janahā ra Jesús tyin na jaha yo cuenda añima yo na coo tsa nditsin jahá Nyoo
(Mt. 5.15; 6.22-23)

³³ Ndi intuhun ndo tan ña tuhvá ndo tyaa ñuhū tyuma tan tyihí xeehe ndo can, a tinyíi ndo can tsitsi iin caja. Tyin ñuhū can taahān tsi cunyi can nu sucun. Tyin tatun quihvi nyívi tsitsi vehe ndo, nditsin. ³⁴ Tinuu yo, iin ñuhū nditsin cuví tsi tsa cuenda cuñi ñuhū yo. Tan tacan tucu tsa nditsin Nyoo, tsa cuenda añima yo. Tatun iyó tsa nditsin jahá Nyoo añima yo, vaha nyívi cuví yo. Tatun nduve tsa nditsin jahá Nyoo añima yo, tumaa iin ra cuaa cuví yo, ña cuví nyehe yo ityi vaha tsa cuahān nu nyaá Nyoo. ³⁵ Yacan cuenda jaha ndo cuenda tsi ndo, na coo tsa nditsin jahá Nyoo añima ndo, tan ña coo tsa naa. ³⁶ Tatun tsitú añima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsin tsi tanii cahnu ndo. Tumaa tsa nyaá iin ñuhū tyuma jandunditsin tsi tanii cahnu ndo cuví can —catyi ra Jesús.

Nu cuxaān ra Jesús tsihin ra maestro cuenda ley vehe ñuhu naha ra tan tsihin ra fariseo naha ra

(Mt. 23.1-36; Mr. 12.38-40; Lc. 20.45-47)

³⁷ Tsa ndihí cahān ra Jesús tsihin nyívi, iin ra fariseo, catyi ra tsihin ra, na cuhun ra cucatsi ra yuvehe ra. Tan tsaā ra Jesús vehe ra. Tan quihvi ra tsicunyaā ra nu mesa.

³⁸ Tacan tan ra fariseo ican iyo cuñi ra tyin ña nacyatā ra Jesús ndaha ra tsa ndi cumañi ca catsi ra, tumaa cuhva iyó maa ra naha. ³⁹ Maa tyin Jutu Mañi yo Jesús catyi ra tsihin ra:

—Nyooho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñi xaan caā can tyin ña nacyatā ndo can. Tacan cuví nyooho. Tyin cuñi nyívi tyin vaha ndo. Maa tyin xeehe ñi suhú ndo tan javahá ndo tsa ña vaha. ⁴⁰ Ndava xaan iñi ndo. ¿A ña tsitó ndo tyin ra tsa javahā ityi tsata ndo, juvin ñi maa ra javahā ityi tsitsi ndo? ⁴¹ Taahān tsi javaha ndo tumañi iñi tsi nyívi ndaahvi, tan jatyinyee ndo tsi ñi tsihin

tanii añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

⁴² ¡Ndahvi nyooho ra fariseo! tyin nyooho, cahvi ndo ndaha menta tan ndaha lura tan náa ndihí ca yucu tsa tsatsí ndo, tan tavá ndo intuhun tsi tsa iin iin utsi tan tsahá ndo tsi Nyoo, maa tyin ña tyaa yahvi ndo tsa vaha tsa cuñi Nyoo javaha yo tan tsa cuñi yo tsi ra. Taahān tsi tsa cuñi vaha ca ndo tsi Nyoo tan javaha ndo cuhva cuñi ra, tan ña jandihi ndo tsa cuhva ndo diezmo can. ⁴³ ¡Ndahvi nyooho tsa cuví ndo fariseo! tyin cuñi ndo cunyaa ndo nu tyayu vaha tsitsi vehe ñuhu. Tan cuñi ndo tsa tyaa yahvi nyívi tsi ndo nuyahvi. ⁴⁴ ¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña nditsa ndo. Cuví ndo tumaa iin ñaña ndiyi tsa ña nditsin ca canyii. Tyin tsañi nyívi tsata can tan ña tsitó ñi tyin nyii ndiyi tsitsi ñaña ican. Tyin nduve ca cuhva canyii nu nyii ndiyi ican. Cuñi maa nyívi tyin vaho ndo, tan ña tsitó ñi tyin ña vaha añima ndo —catyi ra Jesús.

⁴⁵ Tacan tan nacahān iin ra maestro cuenda ley vehe ñuhu, tan catyi ra:

—Maestro, tsa catyi un tacan, caahān nyaa ndihí un tsi ndi —catyi ra.

⁴⁶ Tacan tan catyi ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsahā Nyoo tahān tsanaha. Tan ña taahān tsi. Tan yofi ndoyó carga can, tan jañiñi ca ndo na javaha nyívi can, tan maa ndo ndi luxu ña jatyinyee ndo tsi ñi. ⁴⁷ ¡Ndahvi nyooho! tyin janduvahá vaha ndo ñaña nu ñuhú yiqui ra cuví ndusu yuhu Nyoo tsa tsahñi ra cuví tsi tsahnu ndo tahān tsanaha. ⁴⁸ Yacan cuñi tsi catyi tyin ndoó ndo vaha tsa javahā tsii tsahnu ndo naha ra. Tyin tsii tsahnu ndo tsahñi ra naha tsi ra cuví ndusu yuhu Nyoo. Tan nyooho janduvahá ca ndo ñaña ra naha. ⁴⁹ Yacan cuenda catyi Nyoo tahān tsanaha tsihin tsa tsiñi tuñi ra tyin cua jaquitsi ra tsi ra cua cuví ndusu yuhu ra tan ra caca tyiñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha. ⁵⁰ Tan nditsa tyin tacan javahá ndo. Nyoo ca tatsi tuñi ra tsi ndo tan tsi nyívi iyó vityin tsa cuenda tandihi ra cuví ndusu yuhu ra tsa tsahñi tsii tsahnu ndo naha ra nda cuanda tsinu ñuhu ñayivi tan nda cuanda vityin. ⁵¹ Nda cuanda ñiñi ra Abel tsa tsatí tsa tsahñi ra Caín yañi ra tsi ra, tan nda cuanda ñiñi ra Zacarías tsa tsahñi nyívi tsitsi vehe ñuhu yatyin nu nyaá altar. Yacan cuenda catyi Nyoo tyin cua tatsi tuñi ra tsi nyívi tsa iyó vityin tsa catyi cuatyí nyívi tsa tsicoq tahān tsanaha. ⁵² ¡Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu

quihví nyívi ityi nu nyaá Nyoo. Tan ndi maa ndo ña quihví ndo nu nyaá Nyoo. Tan ndi ña tsahá ndo tsa quihví inga nyívi tsa cuñi quihvi —catyí ra Jesús.

⁵³ Ndihi cahan ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaagn xaan ra naha tan quitsahá nducú tuhun xaan ra naha tsi ra Jesús. ⁵⁴ Tyin cuñi ra naha tsa cahan ra Jesús iin tsa ña vaha, tyin tacan tan cuvi tyaa ra naha cuatyí tsi ra.

12

Nu jacuahá ra Jesús tyin ña cuví tyihi xeehe yo cuatyí yo

¹ Cuenda mil nyívi ndu iin nda cuenda catyihí tahan ña ñi, tyin cuaha xaan ñi. Tacan tan ra Jesús cahan jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyí ra tsa cuví tumaa yutsan iya. Tyin ndaá paanjahá yutsan iya, tan tacan cuví cuatyí ra can naha ra. Tyin jahá ra naha tyin vaha ra. Maa tyin ña cuví tyihi xeehe ra naha cuatyí ra naha.

² Tyin nduve iin tsa yihí xeehe tan cuñi yo, tyin ña cua quituvi. Tan nduve tsa xeehe tan cuñi yo, tyin ña cua coto nyívi. ³ Yacan cuenda, náa ndihi tsa caahán ndo nu xeehe, cua quita tsi nu nditsin. Tan náa ndihi tsa caahán ndo tsitsi vehe ndo, cua cana tsaa nyívi jiñi vehe.

¿Yóo taahán tsi nayuhviyo, a tsi nyívi a tsi Nyoo?

(Mt. 10.28-31)

⁴ Tan catyí yu tsihin ndo tsa cuví ndo ra vaha iñi tsi yu, tyin ña nayuhvi ndo tsi nu tsaññi cuñu ñuhu yo. Tyin yaha can tan nduve ca tsa cuví javaha nu tsi yo. ⁵ Maa tyin cua catyí yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

⁶ Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihí ñi ti, Nyoo ña naá iñi ra tsi ndi intuhun ti. ⁷ Tan nyoocho, nyaá yahvi ca ndo nu Nyoo tan ñavin ca tsa cuaha saa can, tan nda cuenda ixi jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuenda ña nayuhvi ndo.

Na ña nayuhviyo cahan yo tuhun ra Jesu-cristo tsihin nyívi

(Mt. 10.32-33; 12.32; 10.19-20)

⁸ Catyí yu tsihin ndo tyin tandihí nyoocho tsa janahá ndo tsi nyívi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayii nda gloria quee yu. ⁹ Maa tyin nyoocho

tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyívi cuenda yu cuví ndo.

¹⁰ Tan vasu cuxaan nyívi tsi yuhu, Rayii tsa quee nda gloria, Nyoo cua jaha ra tucahnu iñi tsi ñi. Maa tyin nyívi caahán tsa ndavaha ñi siqui Tatyi Ii Nyoo ña cua coo tucahnu iñi tsi ñi cuenda yacan.

¹¹ Quivi tsa cua cundaca nyívi tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo. ¹² Tyin cuhva tsa cua nacahan ndo, cua cuhva maa Tatyi Ii Nyoo náa tuhun taahán tsi cahan ndo —catyí ra Jesús.

Nu tsahá cuenda ra Jesús tyin ña taahán tsi nyíyo iñi yo tsa cuca

¹³ Iin ra tsa nyii tsihin nyívi cuaha tsa ndu iin nu nyii ra Jesús, catyí ra tsihin ra Jesús:

—Maestro, cahan tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

¹⁴ Tacan tan catyí ra Jesús tsihin ra:

—¿Tsa, yóo tsahá tsi yu tsa cuví yu juez tan natahvi yu ndaha tyiñu ndo? —catyí ra.

¹⁵ Tan yahá can tan catyí ra nuu nyívi cuaha can:

—Jaha xaan ndo cuenda tan ña nyiyo xaan iñi ndo tyin ña tsinú ñuhu tsa coo cuaha ndaha tyiñu yo tan coonyito yo.

¹⁶ Tacan tan tsahá cuenda ra Jesús iin cuhva tsi tandihí nyívi, tan catyí ra:

—Tsicoo iin ra cuca. Tan cuaha xaan ndaha tyiñu ñihí ra nu jahá tyiñu ra.

¹⁷ Tacan tan tsicá iñi ra: “¿Nacaa javaha yu? Nduve nu quihí tandihí ndaha tyiñu ihya.”

¹⁸ Tan catyí ra: “Tsa tsitó yu nácaa cua javaha yu. Cua cani yu tandihí yaca nyihí yu, tan cua javaha yu tsa nahnu ca, tan natyihí yu tandihí ndaha tyiñu can tsihin tandihí ca tsa iyó tsi yu tsitsi can. ¹⁹ Tacan tan cua catyí yu tsihin yu: Cuaha xaan ndaha tyiñu naquihñin vaha un, tan vityin cuahán maa cuiya, quitatu, catsi vaha, cõho vaha, tan cusi iñi.”

²⁰ Tan Nyoo catyí ra tsihin ra can: “Ra soho, tsacuaa vityin cua cúu un, tan tsa naquihñin vaha un ¿Yóo tsii cua cuví yacan?” catyí Nyoo tsihin ra can. ²¹ Tacan cuví iin ra tsa jatácá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

Ña caca xaan iñi yo náa ndihi tsa tsinú ñuhu tsi yo

(Mt. 6.25-34)

²² Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihí ndo tsa catsi ndo, tan ndi jahma tsa cunditsi ndo. ²³ Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsí yo. ²⁴ Jaha ndo cuenda saa

tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsi ti, tyin Nyoo tsahá ra tsa catsi ti. Tan nuu Nyoo nyaá yahvi ca nyooho tan ñavin ca saa. ²⁵ Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo. ²⁶ Tatun ndi luxu can tan ña cuví jahá ndo, ¿nacuenda tsa tsicá xaan iñi ndo tandihí ca tsa tsiñí ñuhu tsi ndo?

²⁷ 'Jaha ndo cuenda nácaa iyó yutun ita tyin ña jahá tyiñu tun tan ndi ña tavi tun yuhva. Maa tyin catyí yu tsihin ndo tyin ndi ra rey Salomón tsihin tandihí tsa cuca ra tan ña sii cáá tsa tsinditsi ra tumaa tsa jacunditsi Nyoo tsi yutun ita ícan. ²⁸ Tatun tacan ñi jacunditsi Nyoo tsi yutun ita tsa iyó nu tsiqui vityin, tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra. ²⁹ Ña caca xaan iñi ndo tuhun tsa catsi ndo tan tsa coho ndo. ³⁰ Tyin nyivi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñí ñuhu tsi ndo. ³¹ Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihí tsa tsiñí ñuhu tsi ndo.

Tsa vaha tsa iyó gloria
(Mt. 6.19-21)

³² 'Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñí ra tsi ndo. Yacan cuenda cua cuhva ra quihvi ndo nu ndacá ñaha ra. ³³ Xico ndo tsa iyó tsi ndo. Tan jatyinyee ndo tsi nyivi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihí tsa vaha. Tyin yofi yóo jatívi can ndacan, ndi nu ñasuhu, tan ndi quiti. ³⁴ Tyin nuu iyó tsa cuca ndo, ícan cuví nu nyita iñi ndo. Tan ndacan cua coo ndihí añima ndo —catyí ra.

Nu jacuahá ra Jesús tsi yo nácaa cuatu yo tsi ra quivi quitsi ra inga tsaha

³⁵ 'Cuatu vaha ndo tsi yu tsihin ñuhu nditsin Nyoo quivi quitsi yu inga tsaha. ³⁶ Tan cuví ndo tumaa musu tsa ndatú tsi tsitoho ra naha náa cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsaa ra. ³⁷⁻³⁸ Tan sii xaan cua cuñi ra naha nyehe ra naha tsi ra cuví tsitoho ra naha. Tyin ndatú ra naha tsi ra nda cuanda tsa tsaa ra, vasu ñuu taxin, vasu tsa naha ca. Tan cua tyaa ra tsi ra musu ícan naha ra yuhu mesa tan cuhva ra tsa catsi ra naha. Tacan tan sii xaan cua cuñi musu can naha ra. ³⁹ Tan coto ndo tyin tatun tsitoho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ícan tsitsi vehe ra. ⁴⁰ Tan tacan

cuví tucu nyooho, cuatu ndo. Tyin yuhu, Rayii tsa quee nda gloria, sana iñi ndo tan cua quitsi yu —catyí ra Jesús.

Musu vaha tan musu ña vaha
(Mt. 24.45-51)

⁴¹ Tacan tan quitsahá nducú tuhun ra Pedro tsi ra Jesús:

—Jutu Mafi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihí nyivi?

⁴² Tacan tan nacahan ra Jesús, tan catyí ra tsihin ra:

—Musu tsa tyaa soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha cuhva tsahá ra tsa catsi tandihí ca musu ícan. ⁴³ Tan sii xaan cuñí musu ícan tatun cuhva tsa jahá tyiñu ra, tan cua tsaa tsitoho ra. Tyin tyaa yahvi ra tandihí tsa taahán tsi íca ra. ⁴⁴ Tan catyí yu tsihin ndo tyin tsa nditsa. Tyin tsitoho ra cua nacuhva ra tandihí tsa cumí ra, cua quihí ndaha ra. Tyin vaha tyaa yahvi ra tsihin tyiñu jahá ra. ⁴⁵ Maa tyin tatun tsicá iñi musu ícan tyin naha xaan cuahán tsitoho ra, tan quitsahá cañí ra tsi inga musu tsa cutahán tsihin ra tan ñiñaha jahá tyiñu ícan, tan ña cuñí ra jaha tyiñu ra. Tyiñu tsatsi ñi tan tyiñu tsiñí nyixi ñi iyó ra. ⁴⁶ Tacan tan sana iñi ra cua tsaa tsitoho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra ícá tsihin nyivi tsa ña tsiñú iñi tsa caahán ra.

⁴⁷ 'Tan iin musu tsa tsitó nácaa iyó tsitoho ra tan ña javahá ra cuhva cuñí tsitoho ra, cuaha xaan tundoho cua nyehe ra. ⁴⁸ Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitó ra can, tan javahá ra. Tatun iin musu tan cuaha tsa tsahá tsitoho ra tsi ra, cuaha tyiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsitoho ra.

Nu cahán ra Jesús tyin tsacatyí ra cua cañi tahan nyivi tsihin nyivi ñi
(Mt. 10.34-36)

⁴⁹ 'Tumaa tsa jatahán yu ñuhu nu ñuhu ñayivi, tacan cuví tyiñu vatsí yu. ¡Tan cuñí xaan yu tsa nacayu catyin ña ñuhu ihya! ⁵⁰ Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndihí tyiñu jahá yu. ⁵¹ Cuñí maa ndo tyin tsa vatsí cuhva yu tsa taxin coo ndo nu ñuhu ñayivi ihya. Maa tyin yuhu vatsí yu tyin jasiin yu tsi ndo. ⁵² Tyin tsa vityin tan ityi nuu ca, uhun taahan nyivi iin vehe ñi cua cusiin ñi. Uñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin uñi taahan ñi. ⁵³ Tan ra iyó

sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe sihi cua cañi tahan ña tsihin sehe sihi ña. Tan ña cuví sehe sihi can cua cañi tahan ña tsihin sihi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

Nu cahān ra Jesús tsihin nyivi tyin ña nacotó ñi tyin tsa tsaq Sehe Nyoo nu yucú ñi (Mt. 16.1-4; Mr. 8.11-13)

⁵⁴ Catyí tucu ra Jesús tsihin nyivi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuii cuví. ⁵⁵ Tatun tsa nyehé ndo tyin tsa yihí tatyí quee ityí ndutya ñuhu, catyí ndo tyin tsa cua ndu ihñi. Tan quita tsa cuii nu caahán ndo. ⁵⁶ Nyoooh jahá ndo tsa tsitó xaan ndo, tan nacotó ndo tandihí tsa cuví andiví, tan tandihí tsa cuví nu ñuhu ñayiví ihya. Tan ¿nacuenda tsa ña nacotó ndo náa tyembu iyó ndo vityin?

Nducu yo cuhva nácaa coo vaha yo tsihin ra tsicán cuatyí tsaha yo coto cuhun yo anyaya

(Mt. 5.25-26)

⁵⁷ ¿Nacuenda ña jahá ndo cuenda, ndáa tsa vaha tan ndáa tsa ña vaha? ⁵⁸ Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityí cuahán ndo nducu ndo cuhva coo vaha ndo tsihin ra tsa ndi cumañi ca tsa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihí ra naha tsi ndo tsitsi vehe caa. ⁵⁹ Tatun tacan cua cuví, catyí yu tsihin ndo tyin ña cua quita ndo nda cuenda tyahví ndo tandihí tsa taahán tsi tyahví ndo —catyí ra Jesús.

13

Cuñí tsi tsa nasama yo cuhva iyó yo, tun ña cuñí yo cuhun yo anyaya

¹ Tacan tan juvin ñi quiví can nyecu juhva ra naha. Tan quitsahā nacatyí tuhun ra naha tsihin ra Jesús tsa javahā ra Pilato tsihin juhva ra Galilea naha ra. Tyin tava ra tyiñu na cahñi andaru naha ra tsi ra Galilea tsa tsijamañi quiti jana ra naha tsi Nyoo. Tan tacan sacā nuu niñi ra ican naha ra tsihin niñi quiti tsa tsijamañi ra ican naha ra. ² Tan nacahān ra Jesús tan catyí ra tsihin ra naha:

—¿A tsicá iñi nyoooh tyin cahnu xaan ca cuatyí ra Galilea ican naha ra tan ñavin ca tandihí ca ra ñuu ra naha, tan yacan tsihi ra naha? ³ Ñavin. Tyin tatun nyoooh tan ña nasama ndo cuhva iyó ndo, tacan cua cunaa

ndo. ⁴ Tan tsa tsahun uñi taahan ra tsihi can naha ra tsa canacava torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoo ñuu Jerusalén, cuñí maa ndo? ⁵ Ñavin. Tyin tatun nyoooh tan ña nasama ndo cuhva iyó ndo, cua cunaa ndo.

Nu tsaha cuenda ra Jesús iin cuhva nácaa ndatú Nyoo tsa nasama yo cuhva iyó yo

⁶ Tacan tan tsahā cuenda ra Jesús iin cuhva ihya. Tan catyí ra:

—Iin ra iyó yutun tsa nañi higuera tsi ra. Tan nyaá tun nu ñuhu ra. Tan tsahān ra tsinyehē ra tatun iñi tsiti tun. Tan nyehē ra tyin nduve. ⁷ Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehē yu tatun iyó tsiti tun. Tan nduve maa tsiti tun iñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsahá tun”, catyí ra. ⁸ Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihí yu ñuhu tyahyí. ⁹ Vasiqui tacan tan cua cuhva tun tsiti. Maa tyin tatun ña cuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

Quiví quitatú nyivi janduvahā ra Jesús tsi iin ñaha tihí tsata

¹⁰ Iin quiví tsa quitatú nyivi, jacuahā ra Jesús tsi nyivi tsitsi vehe ñuhu. ¹¹ Tan ican nyaá iin ñaha tsa yihí tatyí ña vaha. Tan tsa tsahun uñi cuiya cuuhví ña tsa tihí tsata ña. Tan ña cuví ndundoo ña. ¹² Tacan tan nyehē ra Jesús tsi ña. Tan canā ra tsi ña. Tan quitsahā caahán ra tsihin ña, tan catyí ra:

—Tsa nduvahā un. Nduve ca cuehe ndohó un —catyí ra tsihin ña.

¹³ Tacan tan tyisó ra ndaha ra jiñi ña. Tan iin yaha ñi tan ndundoo ña. Tacan tan quitsahā jacahnú ña tsi Nyoo. ¹⁴ Maa tyin ra cuví ityí nuu vehe ñuhu, cuxaān xaan ra tsi ra. Tyin quiví quitatú janduvahā ra tsi ña. Tan catyí ra tsihin nyivi nyecú ican:

—Iyó iñu taahan quiví taahán tsi jaha tyiñu yo. Tacan quiví quitsi ndo cuvi ndo numeri. Tan ña quitsi ndo quiví quitatú yo —catyí ra.

¹⁵ Tacan tan Jutu Mañi yo Jesús catyí ra tsihin ra:

—Nyoooh tsa jahá ndo tyin vaha ndo. ¿A ña ndatsi tucu nyoooh quiti jana ndo tan jachó ndo ndutya tsi ti quiví quitatú yo?

¹⁶ Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yonñi ndatsi tsi ña. ¿A ña taahán tsi ndatsi yo tsi ña vasu ndi maa quiví quitatú yo cuví vityin? —catyí ra Jesús.

¹⁷ Tacan tan cuhva tsa cahān ra Jesūs ya-can, tandihī maa nu xaan iñi tsi ra nducahan nuu nahnu. Maa tyin tandihī ca maa nyivi sii xaan cuñi ñi tsihin tsa cahnu tsa iyo javahā ra Jesūs.

Nu cahān ra Jesūs tyin tumaa iin tsiti mostaza cuvī tsa ndacá ñaha Nyoo tsi yo

¹⁸ Tacan tan catyí ra Jesūs:

—¿Náa cuvī tsa ndacá ñaha Nyoo tsi yo? ¿Tan náa tsihin jandu inducu yo itsi? ¹⁹ Tumaa iin tsiti mostaza, tacan cuvī tsi. Tyin iin ra tatsj ra iin tsiti ican nu ñuhu ra, tan canā iin yutun luhlu, tan tsahnū tun. Tan cuvī tun iin yutun cahnu xaan. Tacan tan tsaā saa naha ti nuu yutun ican. Tan javahā ti taca ti nuu tun.

Nu cahān ra Jesūs tyin tumaa yutsan iya, tacan cuvī tsa ndacá ñaha Nyoo tsi yo
(Mt. 13.33)

²⁰ Tacan tan catyí ra Jesūs inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo? ²¹ Cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaá tanii yutsan paan ican jahā yutsan iya ican, tacan cuví tsa ndacá ñaha Nyoo tsi yo —catyí ra.

Yuvehe tihin tan ityi cuiñi tsa cuahán nu nyaá Nyoo
(Mt. 7.13-14, 21-23)

²² Ityi cuahán ra Jesūs ñuu Jerusalén caahán ra tuhun Nyoo tsihin nyivi tandihī ñi ñuu nu yahá ra. ²³ Tan iin ra tsicá tuhun ra tsi ra:

—Jutu Mañi yu, ¿a cuaha maa nyivi cua cacu? —catyí ra.

Tacan tan nacahan ra Jesūs, tan catyí ra:

²⁴ —Nanducu ndo cuhva quihvi ndo yuvehe tihin. Tyin tacan cuvī quihvi ndo nu ndacá ñaha Nyoo. Tyin cuaha xaan ndo cuñi ndo quihvi ndo ndacan, tan ña cuvī. ²⁵ Tyin tumaa tsitoho iin vehe, tacan cuvī Nyoo. Tan tsitoho vehe ican cua nacasi ra yuvehe. Tacan tan nyooho tsa nyecú ndo ityi tsata cua jandatsan ndo yuvehe, tan cua catyí ndo: “Nuña yuvehe.” Tan ra ican cua catyí ra tsihin ndo: “Ña tsitó yu ndáa ityi quee nyooho.” ²⁶ Tacan tan nyooho cua catyí ndo: “Nyuhu tsatsj ndi tan tsihi ndi tsihin un. Maa un jacuahā un tuhun Nyoo tsi ndi ityi nu nyecú vehe ndi”, cua catyí ndo tsihin ra. ²⁷ Maa tyin ra ican cua nacahan ra tsihin ndo tan catsan ña cua cuvī nuhu ndo tsa cua nyehe ndo tsi ra Abraham tsihin ra Isaac tan ra Jacob, tan tsihin tandihī ra cuvī ndusu yuhu Nyoo tsa tsicoq tahanan tsanaha. Tyin nyecú ra naha nu ndacá ñaha Nyoo. Tan

nyooho ndooq ndo ityi tsata. ²⁹ Tan cua quitsi nyivi ityi ndutya ñuhu, tan ityi norté, tan ityi nu caná ñicanyii, tan ityi nu tyisó ñicanyii. Tan cua cunyecú ñi catsi ñi tsihin Nyoo nu ndacá ñaha ra. ³⁰ Tan juhva nyivi tsa cuahán ityi nuu vityin, ñi can cuhun nu ndihi. Tan juhva nyivi tsa cuahán nu ndihi ña, ñi can cua cuhun ityi nuu —catyí ra.

Nu cuihya xaan cuñi ra Jesús nyehé ra tsi nyivi ñuu Jerusalén
(Mt. 23.37-39)

³¹ Juvín ñi maa quivi can tsaā juhva ra fariseo. Tan catyí ra naha tsihin ra Jesús:

—Quita ihya tyin ra Herodes cuñi ra cahñi ra tsi un —catyí ra naha.

³² Tan catyí ra Jesús tsihin ra naha:

—Cuaahan ndo tan cahan ndo tsihin ra tsa cuvī tumaa ñicuii, tyin nda cuanda quita quivi tsa ndihi tyiñu jahá yu tsa tavá yu tatyí ña vaha tsi nyivi tan tsa janduvahá yu tsi nyivi cuuhví tsihin cuehe, tacan tan cundihi tyiñu jahá yu. ³³ Maa tyin nda cuanda tahanan tsi tsa ndihi maa tyiñu jahá yu, tacan tan cuhun maa yu cua cúu yu nda ñuu Jerusalén. Tyin ña cuvī cúu iin ra cuvī ndusu yuhu Nyoo ityi tsata ñuu Jerusalén.

³⁴ ¡Ndahvi nyooho nyivi Jerusalén! tyin tsahñi ndo tsi ra cuvī ndusu yuhu Nyoo. Tan cañi ndo yuu tsi tandihī ra tsa jaquitsj Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa jahá cuenda iin ndivi siihi sehe ti, tan naquihín vaha ti tsi ti naha ti tsitsi nditsin ti. Maa tyin maa ndo ña cuñi ndo. ³⁵ Nyehe ndo vityin tyin tsa nacog yu tsi ndo. Tan catyí yu tsihin ndo tyin ña cua nyehe ca ndo tsi yu nda cuanda quita quivi tsa cua catyí ndo tyin cahnu xaan ra vatsi tsihin sivi Nyoo Jutu yo —catyí ra Jesús.

14

Nu janduvahā ra Jesús tsi iin ra cuuhví tsa iyó cuiñu quivi quitatú nyivi

¹ Cuví tsi iin quivi quitatú nyivi. Tan ra Jesús cuahán ra cua catsi ra vehe iin ra cuvī ityi nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuvī tyaa ra naha tsi ra Jesús. ² Tacan tan yatin ñi nuu ra Jesús nyaá iin ra cuuhví tsa iyó cuiñu. ³ Tan catyí ra Jesús tsihin ra maestro cuenda ley vehe ñuhu naha ra tan tsihin ra fariseo naha ra:

—¿A vaha janduvaha yo nyivi cuuhví quivi quitatú yo? ¿Náa catyí ley Nyoo? —catyí ra.

⁴ Tacan tan tandihī ra naha, taxin ña tsinyecú ra naha. Tacan tan tyisó ndaha ra Jesús jiñi ra cuuhví can. Tan janduvahā ra tsi ra. Tan catyí ra tsihin ra na cunuhu ra. ⁵ Tacan tan catyí ra Jesús tsihin ra fariseo naha ra:

—Tatun nyoocho tan canacava iin burru jana ndo, a inga quiti jana ndo, tsitsi xahva, ¿a ña cua tava ndo tsi ti tsa numi ñi, vasu ndi maa quivi quitatú yo cuví? —catyí ra.

⁶ Tacan tan taxin ña tsinyecú ra fariseo naha ra. Tyin ña ñihí ca ra naha náa naca-han ra naha.

Nu jacuahra Jesús tsi yo tyin ña vaha tsa cahnú jaha yo tsi yo

⁷ Nyehe ra Jesús tyin tandihí ra nyecú vico ican nacatsí ra naha tyayu vaha ca cunyecu ra naha. Tacan tan tsaḥa cuenda ra tyehen tsi ra naha:

⁸—Ndáa quivi cuhun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnú ca cuví tan ñavin ca maa ndo, ⁹ tan coto quitsi ra tsa cana tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyoocho tsihin tsa cahan nuu ndo, tan ca cuhva ndo tyayu can. Tacan tan cua cunyecu ndo nu ndihí ña. ¹⁰ Maa tyin catyí yu tsihin ndo, tyin ndáa quivi cana ra tsi ndo, cuaahan ndo, tan ñavin nu vaha cunyecu ndo. Tyin tacan tan cua quitsi maa ra tsa cana tsi ndo tan cua cahan ra tsihin ndo: “Amigos, naha ndo, cunyecu ndo nu tyayu vaha ihya.” Tan tacan cua jacahnú ca ra tsi ndo nu nyivi nyecú yuhu mesa tsihin ndo. ¹¹ Tyin ra tsa cahnú jahá tsi maa ra, cua tahan ra ticanuu. Tan ra tsa ndaahví jahá tsi ra, cahnú ca cua cuví ra —catyí ra Jesús.

¹² Tacan tan catyí tucu ra tsihin ra cana tsi ra nu iyó vico can:

—Ndáa quivi coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuví nyivi un, ndi tsi nyivi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnua ñi cuenda tsa tsaḥan ñi vico vehe un. ¹³ Maa tyin catyí yu tsihin un tyin ndáa quivi coo vico vehe un, cana tsi nyivi ndaahví, nyivi cuuhví, nyivi coxo, tan tsihin nyivi cuaa. ¹⁴ Tacan tan sii cua cuñi un, tyin ñi ican ña cua cuví natyahví ñi tsi un. Maa tyin cua natyahví Nyoo tsi un quivi cua nandoto un tsihin nyivi vaha.

Nu tsaḥa cuenda ra Jesús iin cuhva nácaa caná ra tsi yo na quihvi yo nu ndacá ñaha Nyoo

(Mt. 22.1-10)

¹⁵ Tan tsiñi iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sii xaan cua cuñi nyivi tsa cua catsi nu ndacá ñaha Nyoo —catyí ra.

¹⁶ Tacan tan catyí ra Jesús tsihin ra:

—Iin ra ican jacoo ra iin vico cahnú xaan vehe ra. Tan cana ra cuaha xaan nyivi. ¹⁷ Tacan tan tsaḥa cuhva tsa cua cuxiñi ñi, tan jacuhún ra tsi musu ra na cuquihin ra

tsi ñi, tyin tsa tahañ tsi cuhva cuxiñi ñi. ¹⁸ Maa tyin tandihí ñi ican quitsahá caahán ñi tyin ña cua cuhun ñi. Tan iin ra ican catyí ra: “Ndi jata yu iin ñuhu. Tan cuñi tsi cuhun yu cunyehe yu itsi. Yacan tsiacán yu na jaha ra tucahnú iñi tsi yu tyin ña cua cuhun yu.” ¹⁹ Tacan tan inga ra ican catyí ra: “Ndi jata ñi yu uhun taahan yunta. Tan cuhun yu cunyehe yu tatun vaha ti naha ti. Yacan tsiacán yu tumañi iñi tsi ra na jaha ra tucahnú iñi tsi yu, tyin ña cua cuví cuhun yu.” ²⁰ Tacan tan inga tucu ra ican catyí ra: “Ndi tindaha cuí ñi yu, tan ña cua cuví cuhun yu”, catyí ra. ²¹ Tacan tan musu ra ican cuanuhu ra. Tan catyí tuhun ra tandihí tsa cuví ican tsihin ra tsitoho ra. Tsa tsiñi tsitoho ra tsa tacan, tan cuxaḥan xaan ra. Tan catyí ra tsihin musu ra: “Cuaahan vityin tandihí maa ityi. Tan quitsi ndaca un tsi nyivi ndaahví, nyivi cuuhví, nyivi coxo, tan tsihin nyivi cuaa”, catyí ra. ²² Tan tsa yaha tsa nyico musu ican tan catyí ra tsihin ra tsitoho ra: “Tsa javahá yu tandihí maa tsa cahan un tsihin yu. Tan nuña ca tsitsi vehe”, catyí ra. ²³ Tacan tan tsitoho ra catyí ra tsihin ra: “Cuaahan cua nducu ca nyivi tandihí maa ityi. Tan jañiñi un tsi ñi na quitsi ñi, tyin na cutu tsitsi vehe yu. ²⁴ Tyin catyí yu tsihin un tyin ndi intuhun ñi tsa cana yu tsa jihna, ña cua catsi ñi tsihin yu”, catyí ra —catyí ra Jesús.

Cuaha xaan tundoho nyehé yo tatun cuenda ra Jesús yihí yo

(Mt. 10.37-38)

²⁵ Cuaha xaan nyivi nyicún tsi ra Jesús. Tacan tan nanyehé ra tsi ñi, tan catyí ra tsihin ñi:

²⁶ —Tandihí nyoocho tsa nyicún tsi yu, tatun cuñi ca ndo tsi nyivi ndo tan ñavin ca tsi yuhu, ñavin cuenda yu yihí ndo. Tan tatun cuñi ca ndo tsi maa ndo tsa nuu yuhu, ñavin cuenda yu yihí ndo. ²⁷ Tyin nyoocho tsa ña cuñi nyehe tundoho tsa cunyicun ndo tsi yu, ña taahán tsi cuví ndo nyivi cuenda yu, tyin tsa nyehé ndo tundoho, yacan cuví cruu tsa taahán tsi cuiso ndo. ²⁸ Tyin tun cua javaha ndo iin vehe, nacañi nuu jihna ndo jiñi ndo tan tyihí tuñi iñi ndo tun quita vehe cahnú can tsihin xuhun tsa nyíi tsi ndo. ²⁹ Tyin tatun quitsahá jandaá ndo vehe ican, tan ña cuví jandihí ndo tyin nduve ca xuhun ndo, cua vacu nducu nyivi tsi ndo. ³⁰ Tan cua catyí ñi: “Ra ican quitsahá javahá ra vehe ra, tan ndi ña cuví jandihí ra can”, cua catyí ñi. ³¹ A tatun iin rey tan cuñi ra cañi tahan ra tsihin inga rey ¿a ña cunyaa jihna ra tan nyehe ra tatun ñihí tsa utsi mil ñi andaru tsa cuahán tsihin ra cua cañi tahan ra naha tsihin inga rey tsa vatsí tsihin oco mil andaru ican? ³² Tan tatun tsitó ra tyin ña cua cuví jaha canaa ra tsi inga rey ican,

tacan tan cañi ca vatsi inga rey ican, tan cua jacuhun ra tsi musu ra tyin na catyi tuhun ra naha tsihin inga rey ican na jandihí taxin ra itsi. ³³ Tan tacan cuví nyoocho. Tatun ña cahnya iñi ndo tandihí maa tsa cuñi ndo tan tandihí tsa cumi ndo, ña cua cuví cunycun ndo tsi yu.

Nu jacuahq ra Jesús tyin tumaa ñii tsa ndihí tsa uhva, tacan cuvíyo tatun ndu uvi iñi yo tsa tsinú iñi yo tsi ra

(Mt. 5.13; Mr. 9.50)

³⁴ Vaha ñii tyin jacu uhvā tsi tsa catsi yo. Maa tyin tatun ndihí tsa uhva tsi, ña vaha ca tsi. ³⁵ Nduve ca tyiñu cuví javaha tsi. Ndi ña cuví jatyingee tsi tsi ñuhu. Tan javitā yo itsi tyin ña vaha ca tsi. Nyoocho tsa iyó soho, tyaa soho ndo tuhun caahán yu —catyi ra Jesús.

15

Nu jacuahq ra Jesús tyin tumaa mbee tsa cuanaa tacan cuvíyo

(Mt. 18.10-14)

¹ Tandihí ra tavá xuhun cuenda ra ndacá ñaha nda ñu Roma, tan ra iyó cuatyí naha ra, natuhvā ra naha nu nyii ra Jesús, tan tyaa soho ra naha tsa caahán ra. ² Tacan tan ra fariseo naha ra tsihin ra maestro cuenda ley vehe ñuhu naha ra quitsahā caahán nyaa ra naha tsi ra Jesús, tan catyi ra naha:

—Ra ihya, caahán ra tsihin ra iyó cuatyí naha ra. Tan tsatsí ra tsihin ra naha —catyi ra naha.

³ Tacan tan ra Jesús tsahā cuenda ra cuhva ihya, tan catyi ra:

⁴ —Nyoocho tsa iyó iin cientu mbee jana, tun cunaa intuhun ti, ¿a ña cua nacoo ndo tsi tandihí ca ti, tan cunanducu ndo tsi mbee tsa cunaa can nda cuanda tsa nañihí ndo tsi ti? ⁵ Tan tsa yaha nañihí ndo tsi ti, tyiso soco ndo tsi ti. Tan sii xaan cua cuñi ndo. ⁶ Tan tsa tsaa nyico ndo vehe ndo, tan ndu iin ndo tsihin ra vaha iñi tsi ndo tan tsihin nyivi iyó yatyin yuvehe ndo, tacan tan catyi ndo tsihin ñi tyin na cusii ndihí iñi ñi tsihin ndo tyin nañihí ndo mbee jana ndo tsa tsinaq. ⁷ Tan catyi yu tsihin ndo, tyin tacan tucu sii xaan ca cuñi ángel Nyoo tsa iyó gloria tsacatyí intuhun ra tsa iyó cuatyí tan nasamá ra cuhva iyó ra, tan ñavin ca tsa cumi xico tsahun cumi taahan nyivi tsa nduve cuatyí tan ña cuñi ca tsi tsa nasama ñi cuhva iyó ñi.

Ñaha tsa tsinaq xuhun tan nañihí ña

⁸ Tan catyi yu tsihin ndo, tyin tatun iin ñaha tan iyó utsi taahan xuhun ña, tan cuanaa iin xuhun ña, cua tyaa ña iin candili. Tan cua tihvi ña tanii tsitsi vehe ña. Tan cua nanducu ña xuhun can nda cuanda tsa nañihí ña can. ⁹ Tan tsa yaha nañihí ña, cua cuhun ña cunanducu ña tsi ñi vaha iñi

tsi ña, tsihin nyivi tsa iyó yatyin yuvehe ña, tan cua cahan ña tsihin ñi: “Cusii ndihí iñi ndo tsihin yu tyin tsa nañihí yu xuhun yu tsa tsinaq”, cua catyi ña. ¹⁰ Tan catyi yu tsihin ndo tyin tacan tucu sii cuñi ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyi ra Jesús.

Nu jacuahq ra Jesús nácaa cuñi Nyoo tsi iin ra ndu uvi iñi cuatyí

¹¹ Tacan tan tsahā cuenda ra Jesús inga cuhva ihya tan catyi ra:

—Iin ra, iyó uvi taahan sehe ra. ¹² Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahvī sava ra tsa tsii ra tan tsahā ra tsi nduvi taahan sehe ra. ¹³ Tan ña cuaha ñi quivi tan ra luhlu ican xico ra tandihí maa tsa tsahā jutu ra tsi ra. Tan jandu iin ra xuhun ra, tan quihñ ra ityi, cuahán ra iin ñuu cañi xaan. Tan ndacan tsicoq ra tan janaq ra tandihí maa xuhun ra tsihin tusii iñi. Tan quihñ xaan icá ra tsicá nuu ra. ¹⁴ Tacan tan tsaa tama ityi nu iyó ra. Tan quitsahā tsisocó ra tyin tandihí xuhun ra janaq ra. ¹⁵ Tacan tan tsahan ra tsinducu ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quini jana ra, tyin jaha cuenda ra tsi ti naha ti. ¹⁶ Tan cuví tsi iin tsaha tsisocó xaan ra can. Tan nduve maa tsa catsi ra iyó, ndacua cuñi ra catsi ra tsa tsatsí quini ican naha ti. Tan yoñi maa tsahā tsa catsi ra. ¹⁷ Tacan tan nducuhun iñi ra tsi jutu ra. Tan nacañi jiñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñi cúu yo jahá soco. ¹⁸ Vityin ca cunuhu yo nu nyaá jutu yo. Tan cua catyi yo tsihin ra tyin tsicoq cuatyí yo nuu Nyoo tan tacan tucu nuu maa ra. ¹⁹ Tan ña taahán ca tsi tsi yo tsa cuví yo sehe ra, tan na jaha ra tyin iin musu ña ra cuví tsi yo” cuñi ra tsicá iñi ra.

²⁰ Tacan tan quihñ ra ityi cuanuhu ra nda vehe jutu ra. Tan cañi ca vatsi ra tan nyehē jutu ra tsi ra, tan cundaahvi iñi ra nyehē ra tsi sehe ra. Tan tsinū xaan ra tsijatahan ra tsi ra. Tan tsinumj nyaa ra tsi ra. ²¹ Tacan tan catyi ra tsihin jutu ra: “Tyatya, tsicoq cuatyí yu nuu Nyoo tan tsicoq cuatyí yu nuu tucu maa un. Tan yacan ña taahán ca tsi tsi yu tsa cuví yu sehe un”, catyi ra tsihin jutu ra. ²² Maa tyin jutu ra tavā tyiñu ra, tan catyi ra tsihin musu ra: “Tava ndo jahma vaha tan jacunditsi ndo tsi ra ihya. Tan tyihi ndo iin xehe nundaha ra. Tan tyihi ndihí ndo zapatu tsaha ra. ²³ Tan cahñi ndo iin becerru tsa xaahan vaha ca, tyin catsi yo tsi ti. Tyin vityin cua coo yo vico. ²⁴ Tyin ra sehe yu ihya tsa tsihñ ra cuñi maa yu, tsicā iñi yu. Cuñi maa yu tyin ña cua nyehē ca yu tsi ra, tan tsaa nyico ra”, catyi jutu ra can.

Tacan tan quitsahā tsicoq ñi vico. Tan sii xaan cuñi ñi tyin tsaā nuhu nyico ra.

²⁵ Tacan tan inga sehe ra, ra tsa tsitsa, nyií ra tsicuhu. Tan tsa cua tsaā nuhu ra nda yuvehe ra, tan tsiñi ra tyin iyó yaa. Tan tuiyí ñi ra tyin tsañi ñi yaa. ²⁶ Tacan tan tsa cuyatyn ra nda yuvehe ra tan canā ra tsi iin musu ra. Tan tsicā tuhun ra tsi ra can náa cuví xaan can. ²⁷ Tacan tan musu can catyí ra: “Ra yañi un tsaā nuhu ra. Tan yacan tava jutu un tyiñu tyin na cahñi ra naha iin becerru xaahan. Tyin vaha tsaā ra yañi un, tan nduve náa tahān ra”, catyí musu can tsihin ra. ²⁸ Tacan tan nduxaan xaan cuñi ra can. Tan ña cuñi ra quihvi ra tsitsi vehe. Tan jutu ra tsahān ra tsicahān ndaahvi ra tsihin ra, tyin na quihvi ra tsitsi vehe. ²⁹ Tacan tan nacahān can can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaá yahvi xaan yu tsa caahān un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu. ³⁰ Maa tyin vityin tsaā nuhu nu sehe un ihya, nu tsa janaā xuhun tsihin ñaha sii iñi. Tan tsahā un iin becerru quiti xaahan tsi nu”, catyí ra tsihin jutu ra. ³¹ Tacan tan nacahān jutu ra tan catyí ra tsihin ra: “Sehe yu, yooho tsihin maa yu nyaá un tandihí quivi. Tan tandihí tsa cumí yu, tsií un cuví can. ³² Tan vityin taahān tsi tyin javaha yo vico ihya, tan cusii iñi yo. Tyin tsaā nuhu ra yañi un, ra tsa tsihi, cuñi maa yu. Tumaa tsa nandotó nyico ra cuví can, tyin tsinaā ra, tan nañihí yo tsi ra inga tsaha”, catyí ra tsihin sehe ra —catyí ra Jesús.

16

Nu jacuahá ra Jesús tsiyo nácaa javahayo tumañi iñi tsihin tsa iyó tsi yo

¹ Tacan tan catyí ra Jesús tsihin ra tsicá tsihin ra:

—Iyó iin ra, cuca xaan ra. Tan iyó iin ra yihí ndaha tandihí tyiñu jahá ra cuca can. Tan tsahān iin musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaá ra tandihí tsa iyó tsi ra. ² Tacan tan canā ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsi nu nyaá yu. Vaha ca nacuhva cuenda un tandihí tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra. ³ Tacan tan ra yihí ndaha tyiñu can tsicá iñi ra: “¿Nácaa cua javaha yu vityin? Tsiho yu ña cuñi ca ra tsa jaha tyiñu yu tsihin ra. Tan nduve tunyee iñi iyó tsi yu tsa jaha tyiñu yu tsihin ñuhu. Tan cahān xaan nuu yu caya yu tsitsi ñuu. ⁴ Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu quivi tsa nduve ca tyiñu cua jaha yu, tan vaha cua

tsaa yu vehe ñi”, tsicá iñi ra can. ⁵ Tacan tan canā ra tsi intuhun intuhun ra tsa nyaá cuenda tsi tsiho yu. Tan catyí ra tsihin iin ra ican: “¿Náa nyaá cuenda un tsi tsiho yu?” catyí ra. ⁶ Tacan tan nacahān ra ican tan catyí ra: “Yuhu nyaá cuenda yu cumi mil litru acetey.” Tacan tan ra yihí ndaha tyiñu ican catyí ra tsihin ra: “Quihin un inga tutu ihya. Tan tyaa un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahān ra. ⁷ Tacan tan tsaā inga ra. Tan tsicá tuhun tucu ra tsi ra ican: “¿Náa nyaá cuenda un tsi tsiho yu?” Tan nacahān ra ican: “Nyaá cuenda yu iin mil arroba trigo”, catyí ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra. ⁸ Tacan tan tsiho tsiho ra tsa ña vaha tsa javahā ra. Tan iyo xaan cuñi ra cuca can, tyin yatyi xaan ñihí ra cuhva ica ra —catyí ra Jesús.

Tan catyí ra tsihin ra tsicá tsihin ra:

—Nyivi nu ñuhu ñayivi ihya tsa ña tyaá yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo añima.

⁹ Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatynyee ndo tsi nyivi. Tan quivi tsa cua ndihí tsa cuca, cua ñihí ndo coo ndo nu ña cua naa maa.

¹⁰ Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyíñu vaha ndo itsi. Tyin tatun ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatun cuaha coo tsi ndo. ¹¹ Tan catyí yu tsihin ndo, tatun ña javahá ndo tsa vaha tsihin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo. ¹² Tyin tandihí tsa iyó tsi ndo, maa Nyoo tsahā nuu itsi tsi ndo. Tan tatun ña javahá ndo tumañi iñi tsihin tsi, ña cua cuhva ra tsa cuví tsi ndo.

¹³ Iin musu ña cuví coo uvi taahan tsiho yu. Tyin musu ican cua cuñi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuví cuñi ndo tsi Nyoo tatun cuñi tucu ndo tsa cuca —catyí ra Jesús. ¹⁴ Tan tsa tsiñi ra fariseo naha ra tandihí tsa cahan ra Jesús, tacan tan quitsahā tsacú nducu ra naha tsi ra. Tyin maa ra fariseo naha ra cuñi xaan ra naha xuhun. ¹⁵ Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha añima ndo. Tandihí tsa cahnú cuñi maa nyivi, Nyoo ña cuñi ra nyehe ra yacan.

Ley Nyoo tsa tyaa ra Moisés, tan tsihin tsa ndacá ñaha Nyoo tsiyo

¹⁶ Ley tsa tsahá Nyoo tsi ra Moisés tyin tyaa ra, tan tsihin tuhun tsa tyaa ra cuví ndusu yuhu Nyoo tahān tsanaha, yacan cuví tsa janahá ityi tsi nyívi nda cuanda quívi tsa quítsi ra Juan. Tan ra Juan quit-sahá caahán ra tuhun vaha tyin tsa cuñi quítsi Nyoo tyin cua cundaca ñaha ra. Tan tandihí nyívi nducúv xaan ñi cuhva tsa quihvi ñi nu ndacá ñaha ra.

¹⁷ Tan catyí yu tsihin ndo, tyin vasu cunaa andívi tan nu ñuhu ñayívi ihya, maa tyin tsa cuví ley Nyoo tsa tyaa ra Moisés, ña cua cunaa tsi tyin cua cundaa tandihí tsi.

Nu jacuahá ra Jesús tyin ña vaha tsa nacoo ihívi rayíi ñasihi ra

(Mt. 19.1-12; Mr. 10.1-12)

¹⁸ Tatun iin rayíi tan iyó ñasihi ra, tan nacoo ihívi ra tsi ña, tan tindaha ra tsihin inga ñaha, coo cuatyí ra nuu Nyoo. Tan tatun tindaha inga rayíi tsihin ñaha tsa nacoo yíi, coo tucu cuatyí ra can nuu Nyoo.

Nu jacuahá ra Jesús tsi nyívi cuenda ra cuca tsihin ra Lázaro

¹⁹ Tsioco iin ra cuca. Tan vaha xaan jahma tsinditsi ra. Tan tandihí quívi iyó vico jahá ra tan tsatsi vaha ra. ²⁰ Tan tsioco tucu iin ra ndaahvi tsa tsinañi Lázaro. Tan ra ihya cuaha xaan ndihyí iñi tsi ra. Tan nyaá ra yuvehe ra cuca ican. ²¹ Ra ndaahvi can, cuñi ra catsi ra, vasu tsa cucoyó xuu mesa ra cuca can. Tan nda cuanda ina tan tsaá ti naha ti nu nyaá ra, tan tsacayaá ti nu uhvi ra. ²² Tan iin quívi tsihi ra ndaahvi can. Tan ángel maa Nyoo na quihín tsi ra tan tsindacá ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutsi ñi tsi ra. ²³ Tacan tan ra cuca ican nyehé xaan ra tundoho nu nyíi ra anyaya. Tan nanyehé ra nu cañi xaan nu nyaá ra Abraham tsihin ra Lázaro. ²⁴ Tacan tan caná tsaa ra cuca can tan catyí ra: “Tyatya Abraham, cundaahvi iñi tsi yu. Jaquitsi tsi ra Lázaro tan na jatívi ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhu ihya”, catyí ra. ²⁵ Tan ra Abraham catyí ra tsihin ra: “Ndúcuhun iñi tyin vaha xaan tsioco un nu ñuhu ñayívi. Tan ra Lázaro, tuhun ndaahvi tsioco ra. Tan vityin vaha iyó ra ihya, tan yooho nyehé un tundoho. ²⁶ Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehé ña cuví cuhun ra naha nu nyíi un. Tan ndi ra yucú nu nyíi un, ña cuví quítsi ra naha nyehé”, catyí ra Abraham tsihin ra cuca can. ²⁷ Tacan tan catyí ra cuca ican: “Tyatya Abraham, jaha tumañi iñi tsi yu. Jacuhun tsi ra Lázaro nda vehe jutu yu. ²⁸ Tyin iyó uhun taahan ca ra yañi yu naha

ra. Tan cuñi yu tyin catyí tuhun ra Lázaro tsihin ra naha nácaa nyíi yu nyehé yu tundoho ihya, coto quítsi ndihí ra naha ihya”, catyí ra. ²⁹ Tacan tan catyí ra Abraham: “Iyó ley tsa tyaa ra Moisés. Tan iyó tuhun tsa tyaa ra cuví ndusu yuhu Nyoo tahān tsanaha. Na tyaa yahvi ra yañi un naha ra, tun cuñi ra naha”, catyí ra Abraham. ³⁰ Tacan tan catyí ra cuca ican: “Tyatya Abraham. Ña cua tyaa yahvi ra naha. Maa tyin tatun yóo tsa nandoto, tan cuhun cucahan tsihin ra naha, tacan tan cua tyaa soho ra naha tan cua nasama ra naha cuhva iyó ra naha”, catyí ra cuca ican. ³¹ Tan ra Abraham catyí ra: “Tatun ña cuñi ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuví ndusu yuhu Nyoo tahān tsanaha, vasu ndi maa nandoto iin nyívi tan cahan ñi tsihin ra naha ña cua tsinu iñi ra naha.”

17

Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha
(Mt. 18.6-7, 21-22; Mr. 9.42)

¹ Tyehen catyí ra Jesús tsihin ra tsicá tsihin ra:

—Tacan ñi iyó tsa quíñi caá tsa jatívi tsi nyívi. Maa tyin ndahvi ra ndaahvi tsa jatívi tsi nyívi. ² Vaha taxin ca na cunuhñi iin yuu jucun ra, tan jacuhun nyívi tsi ra nu ndutya ñuhu. Coto jatívi ca ra tsi nyívi ndi nasama cuhva iyó.

³ Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javahá ra. Tun nasama ra cuhva iyó ra, jaha ndo tucahnu iñi tsi ra. ⁴ Tan ndi maa javaha ra tsa ña vaha tsihin ndo utsa tsaha tsa iin quívi, tatun tandihí tsa utsa tsaha tan catyí ra tsihin ndo tyin ndu uvi iñi ra tsa javahá ra; tandihí tsa utsa taahan tsaha can, jaha ndo tucahnu iñi tsi ra.

Nu jacuahá ra Jesús tsi yo tyin tatun tsinu iñi yo tsi ra, cuví javaha yo cuaha tsa vaha

⁵ Tacan tan catyí ra tavá tyiñu ra Jesús tsihin ra:

—Cuhva tsa tsinu ca iñi ndi tsi un —catyí ra naha.

⁶ Tan catyí ra Jesús tsihin ra naha:

—Tatun tsinu iñi ndo tsi yu vasu tumaa cuhva iin tsiti mostaza tsa luhlu cuii ñi tsi, cua cahan ndo tsihin yutun cahnú tsa nañi sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

Nacaa taahán tsi tyaa yahvi yo tsi Nyoo

⁷ Tan catyí ra Jesús:

—Tatun iin nyoocho tan iyó iin musu ndo, tan tsaa ra tsa tsahān ra tsicuhu tsijahá tyiñu ra, a tsijahá cuenda ra quíti jana ndo,

¿a catyí ndo tsihin ra: “Cunya tan catsi un?” Ña tuhvá ndo cahan tacan tsihin ra.⁸ Maa tyin tyehen tuhvá ndo caahán tsihin ra: “Javaha tsa cuxiñi yu. Tan tyiñi un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra.⁹ Ndi ña tuhvá ndo nacuhvá tyahví nyoo tsi ra tyin javahá ra náa tyiñu tava ndo tsi ra.¹⁰ Tacan tucu maa ndo tsihin Nyoo. Quivi ndihí javaha ndo tandihí tsa cahan ra tsihin ndo, taahán tsi catyí ndo tsihin ra: “Nyuhu nduve náa ca tyiñu cuaha xaan javahá ndi. Tyiñu tsa tava ñi un tsi ndi, yacan ñi javahá ndi. Tan ña yaha ca javahá ndi.”

Nu janduvahá ra Jesús tsi utsi taahan ra ndohó cuehe tyahyú

¹¹ Cuahán ra Jesús ityi ñuu Jerusalén tan yahá ra nu cuví xahñu Samaria tsihin Galilea.¹² Tan nu tsaá ra iin ñuu, quita utsi taahan ra cuuhví tsihin cuehe tyahyú. Tan tsicuiñi ra naha ndasava.¹³ Tan caná tsaá ra naha tan catyí ra naha:

—Yooho, Maestro Jesús, cundaahví iñi tsi ndi —catyí ra naha.

¹⁴ Tan tsa nyehe ra Jesús tsi ra naha tan catyí ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahá ndo.

Tacan tan cuahán ra naha. Tan ityi cuahán ra naha tan nduvahá ra naha.

¹⁵ Tacan tan tsa nyehe iin ra ican tyin tsa nduvahá ra, vatsí tsihin tsata nyico ra nu nyii ra Jesús. Tan quitsahá caná tsaá ra, jacahnú ra tsi Nyoo.¹⁶ Tan tsa tsaá ra nu nyii ra Jesús, tsicuiñi tsiti ra, tan nacañi nuu ra jiñi ra nda nu ñuhu nuu ra Jesús. Tan nacuhvá ra tyahví nyoo tsi ra. Ra tsa nduvahá ihya, ra Samaria cuví ra.

¹⁷ Tacan tan catyí ra Jesús:

—¿A ñavin utsi taahan ndo nduvahá? ¿Náa inga iin taahan ca ra naha? ¹⁸ ¿A intuhun ñi maa ra inga ñuu ihya vatsí, vatsí jacahnú tsi Nyoo? —catyí ra Jesús.

¹⁹ Tacan tan catyí ra tsihin ra tsa nduvahá ican:

—Nduvita, cuaahan. Nduvahá un tyin tsinú iñi un tsi Nyoo —catyí ra Jesús tsihin ra.

Cuhva cua quitsi Nyoo cua cundaca ñaha ra nu iyó yo ihya

(Mt. 24.23-28, 36-41)

²⁰ Tsica tuhun ra fariseo naha ra tsi ra Jesús, tan catyí ra naha:

—¿Ama cua quitsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuví tsa ndacá ñaha Nyoo ihya nu ñuhu ñayivi.²¹ Ña cua cuví catyí nyivi: “Juvín ra nyii ihya, juvín ra nyii

ityi ican.” Tyin Nyoo tsa tsaá ra mahñu ndo, tan ndacá ñaha ra tsi nyivi yihí cuenda ra —catyí ra tsihin ra naha.

²² Yahá yacan tan catyí ra tsihin ra tsicá tsihin ra:

—Cua tsaá quivi tsa cua cuñi ndo nyehe ndo tsi yuhu Rayii quee nda gloria. Maa tyin ña cua nyehe ndo tsi yu.²³ Yihí ñi cua catyí ñi tsihin ndo: “Ihya nyii ra.” Inga ñi cua catyí ñi: “Ndacan nyii ra.” Maa tyin coto cuhun ndo cunyehe ndo. Tan ña cunyicun ndo tsi ra can tyin ñavin yu cuví can.²⁴ Tyin tandihí nyivi cua nyehe tsi yuhu, Rayii tsa quee nda gloria, quivi cua quitsi nyico yu inga tsa. Tumaa tsa nyehé tandihí nyivi nu cañi tatsa savi tan quituvi ñuhú tatsa can ni canduvi andivi, tacan cua cuví quivi cua quitsi yu inga tsa.²⁵ Maa tyin cua nyehe jihna yu tundoho cahnu xaan. Tyin nyivi tsa iyó vityin, ndasi cua cuñi ñi nyehe ñi tsi yu.²⁶ Tumaa quivi tsa tsicoo ra Noé, tacan cua cuví quivi cua quitsi nyico yuhu Rayii quee nda gloria.

²⁷ Quivi tsicoo ra Noé, tsatsi nyivi. Tsihi ñi. Tindahá ñi. Tan tsaá ñi sehe sihi ñi tindaha, nda cuanda quivi quihví ra Noé tsitsi yutun ndoo tan cuñ savi xaan. Tan tandihí ñi can tsihi ñi jahá ndutya.²⁸ Tacan tucu cuví quivi tsicoo ra Lot. Tsatsi ñi. Tsihi ñi. Jatá ñi. Xicó ñi. Tatsi ñi itu. Tan javahá ñi vehe ñi.²⁹ Tan quivi tsa quita ra Lot ñuu Sodoma ican, cuñ ñuhú tsihin azufre tsa quee nda andivi. Tan tsahñi ñuhu can tandihí nyivi Sodoma.³⁰ Tacan cua cuví quivi quitsi nyico yu tsa cuví yu Rayii quee nda gloria.

³¹ Tatun nyecú ndo nuquehe quivi quitsi yu, ña quihví ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuhu ca ndo yuvehe ndo.

³² Nducuhun iñi ndo tsa tahanan ñasihi ra Lot.³³ Tandihí nyoocho tsa cuñi tsa iyó nu ñuhu ñayivi ihya, cua cunaa ndo. Tan tandihí nyoocho tsa ña tyaá yahvi tsa iyó nu ñuhu ñayivi ihya, cua cacu ndo.

³⁴ “Tan catyí yu tsihin ndo tyin tsacuaa can, uvi taahan nyivi cua cava iin nu tsito. Iin ñi cua naquihin yu. Tan inga ñi cua ndoo ñi.³⁵ Tan uvi taahan ñiñaha, iin caa ñi cua nyico ñi quivi can. Intuhun ña cua naquihin yu. Tan inga ña cua ndoo ña.³⁶ Tan catyí yu tsihin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyí ra Jesús.

³⁷ Tsa tsiñi ra naha tsa cahan ra Jesús tacan, tsica tuhun ra naha tsi ra:

—¿Numaa tahanan cua cuví yacan, Jutu Mañi yu? —catyí ra naha.

Tacan tan nacahan ra Jesús, tan catyí ra:

—Nu canyii ndiyi, ican cua nataca nditsii.

18

Nu jacuahq̄ ra Jesús tyin tumaa tsa caḥan yuhu iin ñaha tsihi yĩ tsihin juez, tacan taahán tsi ndacan yo tsi Nyoo

¹ Tshá cuenda ra Jesús iin cuhva ihya. Tyin iin nyita ñi cuñi tsi tsa ndacan tahvi ra naha tan ña cundihi iñi ra naha. ² Tan catyí ra:

—Iyó iin ñuu tsa nyaá iin ra cuví juez. Tan juez ican ña tyaá yahvi maa ra tsi Nyoo. Tan ndi nyivi tan ña tyaá yahvi ra. ³ Tan juvin ñuu ican iyó iin ñaha ndaahvi tsa tsihi yĩ. Tan tsaahán ña tsicahán ña tsihin ra can, tyin tsicán ña cuatyí tsaḥa iin nu xaan iñi tsi ña. ⁴ Tan juez ican ña tyaá yahvi nu tsa caahán ña. Ña jandaa maa nu tyiñu tsicán ña. Tan tsanaha xaan tsicán ña. Tacan tan quitsahq̄ tsicá iñi nu juez can: “Vasu ndi maa ña tsinú iñi yu tsi Nyoo, tan nduve náa cuenda yu tsi nyivi, ⁵ maa tyin ñaha ihya tshá xaan ña tsihi tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsihi tsi yu”, cuñi ra tsicá iñi ra.

⁶ Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatyinyee ra tsi ñaha ndaahvi ican. ⁷ Tan vihi ca cuví Nyoo tsihin yo, ¿a ña cua jatyinyee ra tsi nyivi tsa nacatsi ra tsa tsicán ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi? ⁸ Catyí yu tsihin ndo, tyin numi ca cua jatyinyee ra tsi ñi. Maa tyin quivi tsa cua quitsi nyico yu tsa cuví yu Rayi tsa quee nda gloria, tsitó Nyoo tun nañihi ca yu tsi nyivi tsa tsinú tsa cuñi iñi tsi yu —catyí ra Jesús.

Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra

⁹ Tacan tan tsaḥa cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñi ra naha nyehé ra tsi inga nyivi. Tan catyí ra:

¹⁰ —Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ican ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra. ¹¹ Tan ra fariseo ican nduvita nyityi ra, tan quitsahq̄ caahán ra tsihin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu ñavin tumaa inga nyivi cuví yu. Tyin iyó ñi suhú ñi. Quiñi icá ñi. Tan yihí ra naha iyó ñasiihi ra tan iyó inga ñaha ra naha. Tan ña cuví yu tumaa ra tavá xuhun ihya. ¹² Tyin yuhu uvi tsaḥa tsicoó nyitya yu tsa iin vitya. Tan tshá yu utsi taahan xuhun tsa iin iin cientu tsa jahá canaa yu tsi un”, catyí ra can. ¹³ Tan ra tsa tavá xuhun can tsa cañi luxu nyaá ra. Tan ña canq̄ iñi ra nanyehé ndaa

ra. Tan cañi ndaha ra yiqui nyica ra tyin ndu uvi iñi ra cuatyí ra. Tan catyí ra: “Jutu Mañi yu, cundaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

¹⁴ Tan catyí nyico ra Jesús tyehen:

—Catyí yu tsihin ndo tyin Nyoo jahq̄ ra tucahnu iñi tsi ra tavá xuhun ican. Janaq̄ Nyoo cuatyí ra tan cuanuhq̄ ra nda yuvehe ra. Maa tyin ra fariseo ican, nduve tucahnu iñi tsicoq̄ tsi ra, tyin nyivi tsa cahnu xaan jahá ñi tsi ñi, ña cahnu cuví ñi jahá Nyoo, tan nyivi tsa ndaahvi jahá tsi, cua jacahnu Nyoo tsi ñi —catyí ra Jesús.

Nu nasocó ra Jesús tsi tsa nyihi

(Mt. 19.13-15; Mr. 10.13-16)

¹⁵ Tacan tan quitsi ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehé ra tsicá tsihin ra tyin cuaha tsa nyihi tsaá nu nyaá ra, cuxaan ra naha tan ña tsaḥa ra naha cuhun tsa nyihi can. ¹⁶ Tacan tan canq̄ ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya. ¹⁷ Tan catyí yu tsihin ndo tyin tatun ña nyitá iñi ndo tsi Nyoo, tumaa nyitá iñi iin tsa luhlu ihya tsi jutu tsi, ña cua cuví quihvi ndo nu ndacá ñaha Nyoo.

Nu tsaḥa ra Jesús cuhva tyin yĩ xaan nacuhva cuenda iin ra cuca tsi ra tsi Nyoo

(Mt. 19.16-30; Mr. 10.17-31)

¹⁸ Tacan tan iin ra tsa cuví ityi nuu cuenda vehe ñuhu tsicq̄ tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

¹⁹ Tacan tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi maa Nyoo cuví ra vaha. ²⁰ Yooḥo tsitó un tandihi tuhun tsa tsaḥa Nyoo tyin javaha yo: “Tsa ña coo inga ñaha tsi un. Ña cahñi un nyivi. Ña suhu un. Ña cahan un cuendu siquii nyivi. Tan tyaá yahvi un tsi jutu un tan sihi un” —catyí ra Jesús.

²¹ Tacan tan ra ican catyí ra:

—Tandihí maa yacan tan tyaá yahvi yu nda taḥan luhlu yu tan nda cuanda vityin —catyí ra.

²² Tsa tsiñi ra Jesús tsa caḥan ra can, tacan tan catyí ra tsihin ra:

—Maa tyin cumañi javaha un inga tsa taahán tsi javaha yo. Xico tandihí tsa iyó tsi un. Tan cuhva un xuhun can tsi nyivi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

²³ Maa tyin tsa tsiñi ra tsa caḥan ra Jesús, nducuihya xaan cuñi ra, tyin cuca xaan ra.

²⁴ Tan tsa nyehé ra Jesús tyin nducuihya cuñi ra, tan catyí ra:

—Yiḥi xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi.
²⁵ Yatyí xaan ca cuví yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

²⁶ Tan nyivi tsa tsiñi tsa cahán ra catyí ñi:
 —Tatun tacan, ¿yóo cua cuví cacu?
 —catyí ñi.

²⁷ Tacan tan ra Jesús catyí ra:
 —Tandihi tsa ña cuví javahá nyivi, Nyoo cuví javahá ra tandihi —catyí ra.

²⁸ Tacan tan ra Pedro catyí ra:
 —Jutu Mañi yu, nyuhu tandihi maa tsa iyó tsi ndi nacoq ndi, tan nyicún ndi tsi un —catyí ra.

²⁹ Tacan tan catyí ra Jesús tsihin ra:
 —Tsa nditsa catyí yu tsihin ndo, tyin tandihi nyooho tsa nacoq vehe, a ñasihi ndo, a yañi ndo, a jutu ndo, a sehe ndo tsacatyí tsa tsahá ndo tsa cundaca ñaha Nyoo tsi ndo,
³⁰ cuaha xaan tsa vaha cua ñihi ndo ñuu ñayivi ihya tan inga ñayivi tsa cua coo, cua ñihi ndo ñayivi tsa ña cua naa maa —catyí ra Jesús.

Inga tsaha jacoto ra Jesús cuhva cua cahñi nyivi tsi ra

(Mt. 20.17-19; Mr. 10.32-34)

³¹ Tan cana siin ra Jesús tsi tsa utsi uvi taahan ra tsicá tsihin ra, tan catyí ra tsihin ra naha:

—Vityin cuhun yo nda ñuu Jerusalén. Tyin ndacan cua cundaa tyiñu Rayi tsa quee nda gloria: tandihi tyiñu tsa tyaa ra cuví ndusu yuhu Nyoo tahañ tsanaha. ³² Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuví. Tan cua vacu nducu ra naha tsi yu. Tan cua cahan nyaa ra naha tsi yu. Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quivi tan cua nandoto yu inga tsaha —catyí ra Jesús.

³⁴ Maa tyin ña cutuñi iñi ra tsicá tsihin ra tsa cahán ra, tan ndi ña tsitó ra naha náa tuhun cahán ra tsihin ra naha. Tyin ña cuví cutuñi iñi ra naha.

Nu janduvahq ra Jesús iin ra cuaa ñuu Jericó

(Mt. 20.29-34; Mr. 10.46-52)

³⁵ Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra. ³⁶ Tacan tan tsiñi ra cuvaa tsa yahá cuaha nyivi. Tan tsica tuhun ra náa cuenda ñihi xaan cuvaa. ³⁷ Tan catyí tuhun nyivi tsihin ra tyin ra Jesús, ra ñuu Nazaret, vatsí.
³⁸ Tacan tan quitsahq caná tsaa ra tan catyí ra:

—¡Yooho Jesús, tata ra rey David!
 ¡Cundaahvi iñi tsi yu! —catyí ra.

³⁹ Tan ra tsa cuahán ityi nuu ican naha ra, catyí ra naha tsihin ra, nacasi ra yuhu ra. Maa tyin tsaa ca caná tsaa ra, tan catyí ra:
 —¡Yooho, tata ra rey David! ¡Cundaahvi iñi tsi yu! —catyí ra.

⁴⁰ Tacan tan tsiñiñi ra Jesús. Tan tava tyiñu ra na cuhun ra naha cuquihin ra naha tsi ra. Tan cuhva tsa tsaa ra nu nyaá ra Jesús, tan nducú tuhun ra Jesús tsi ra:

⁴¹ —¿Náa cuñi un javaha yu tsihin un?
 Tacan tan ra cuaa ican nacahán ra, tan catyí ra:

—Jutu Mañi yu, cuñi yu nanyehe yu —catyí ra.

⁴² Tacan tan catyí ra Jesús tsihin ra:
 —Nanyehe. Tsa nduvahq tinuu un tyin tsinú iñi un tsi yu —catyí ra.

⁴³ Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jacahnú ra tsi Nyoo. Tan tandihi nyivi tsa nyehe tsa cuví can, jacahnú ndihi tucu maa ñi tsi Nyoo.

19

Nu cuahán ra Jesús vehe ra Zaqueo

¹ Tacan tan quihvi ra Jesús ñuu Jericó. Tan cua yaha ra tsitsi ñuu. ² Tan ñuu can iyó iin ra cuca xaan, nañi ra Zaqueo. Tan cuví ra ityi nuu tsihin ra tava xuhun cuenda ra ndacá ñaha nda ñuu Roma. ³ Ra ihya cuñi xaan ra nacoto ra tsi ra Jesús. Tan ña cuví nyehe ra tsi ra tyin cuaha xaan nyivi cuahan tsihin ra. Tan maa ra ndiqui xaan ra. ⁴ Tacan tan tsinú xaan ra cuahán ra ityi nuu, tan ndaa ra iin nu yutun cahnu tsa nañi sicómoro tsa nyaá yuhu ityi nu cua yaha ra Jesús, tan cuví nyehe ra tsi ra Jesús. ⁵ Tan cuhva tsa quita ra Jesús nu nyaá yutun can, nanyehe ndaa ra ityi siqui tan nyehe ra tsi ra Zaqueo. Tan catyí ra tsihin ra:

—Zaqueo, janumi nuu un nu yutun juven. Tyin vityin cuñi tsi tsa cuhun yu yuvehe un —catyí ra tsihin ra.

⁶ Tacan tan numi xaan nuu ra Zaqueo. Tan sii xaan cuñi ra. Tan quihñ ra tsi ra Jesús cuahán tsihin ra yuvehe ra. ⁷ Tan tsa nyehe nyivi tsa tacan cuví, tandihi ñi quitsahq caahán nyaa ñi tsi ra Jesús. Tan catyí ñi tyin ndoo ra vehe iin ra iyó cuatyí. ⁸ Tan nu nyecú ra naha tsitsi vehe, ra Zaqueo tsinyaa nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandavi ñaha yu tsi nyivi tan suhu yu tsa tsii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

⁹ Tacan tan catyí ra Jesús:
 —Vityin cacu un, tan nyivi ra Abraham cuví tsi un. [Tyin nacuhva cuenda un tsi un tsi Nyoo tumaa nacuhva cuenda ra Abraham tsi ra tsi Nyoo.] ¹⁰ Tyin yuhu, Rayi tsa

queẽ nda gloria, vatsí yu vatsí nanducu yu tan vatsí jacacu yu tsi nyívi tsa cuanaã maa —catyí ra Jesús.

Nu jacuahā ra Jesús tsi yo na jaha tyiñu yo tsihin tsa tsahā Nyoo tsi yo
(Mt. 25.14-30)

¹¹ Tan tsitsi tsa tsiñi nyívi tsa caahán ra Jesús, tan quitsahā tsahá cuenda ra inga cuhva ihya tsi ñi. Tyin tsa cuñí tsaa ra ñuu Jerusalén. Tan nyívi cuñí maa ñi tyin tsa cua quitsaha cundaca ñaha ra ndacan. ¹² Tacan tan catyí ra:

—Tsiçoo iin ra cuca tan tsa cuñí cuhun ra iin ñuu cañi. Tyin ndacan cua quihin cuenda ra tyiñu tsa cuvi ra rey, tyin tacan tan cua quitsi nuhu nyico ra ñuu ra. ¹³ Tsa ndi cumañi ca cuhun ra, cana ra utsi taahan musu ra. Tan tsahā cuenda ra iin xuhun tsi iin iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuenda quitsi nyico yu”, catyí ra. ¹⁴ Maa tyin nyívi ñuu ra, ndasi cuñí ñi nyehé ñi tsi ra tan ña cuñí ñi tsa cundaca ñaha ra tsi ñi. Tan jacuhun ñi tsi ra cuhun cunyicun tsi ra, tyin cahan ra naha tyin ña cuñí ñi tsa cundaca ñaha ra tsi ñi. ¹⁵ Maa tyin ra ican cuvi maa ra rey. Tacan tan tsaā nyico ra nda ñuu ra. Tan quivi tsa tsaā ra, cana ra tsi musu ra, ra tsa nacoō ra xuhun tsihin. Tyin cuñí ra coto ra nácaa xuhun jahā canaa xuhun ra tsa nacoō ra. ¹⁶ Tan tsaā iin ra ican. Tan catyí ra: “Yooho taa, jahā canaa yu utsi taahan ca siqui xuhun tsa nacoō un tsi yu”, catyí ra. ¹⁷ Tacan tan catyí ra rey can tsihin ra: “Vaha xaan. Yooho cuvi musu vaha. Tyin javahā un ndihi tyiñu tsa tava yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra. ¹⁸ Tacan tan tsaā tucu inga ra tsa tsahā ra xuhun. Tan catyí ra: “Juhun xuhun ihya. Jahā canaa yu uhun taahan ca siqui xuhun tsa nacoō un tsi yu”, catyí ra. ¹⁹ Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra. ²⁰ Tacan tan tsaā tucu inga ra can. Tan catyí ra: “Juhun xuhun tsa tsahā un tsi yu. Yuhu naquihin vaha yu itsi tsitsi pañitu. ²¹ Tyin yuuhvi xaan yu tsi un, tyin yooho xaan xaan un. Tyin tuhvā un naquihin tsa ñavin tsa tatsi un. Tan naquihin un ndaha tyiñu quitā nu jahā tyiñu inga nyívi”, catyí ra can. ²² Tacan tan ra rey ican catyí ra tsihin ra: “Yooho musu ña vaha cuvi un. Vityin juvin ñi tsihin tsa cahan un tsi yu, cua cahan yu tsi un. Tatun tsitō un tyin yuhu xaan yu, tan tsitō un tyin naquihin yu tsa ña tatsi yu, tan naquihin yu ndaha tyiñu inga nyívi, ²³ ¿nacuvi tyin ña tsityihj un xuhun yu banco tyin tsaa yu maa tyin tsa nandaa xuhun yu?” catyí ra rey can. ²⁴ Tan catyí ra tsihin ra nyecū ican: “Quinyaa ndo xuhun tsa tsahā yu tsi ra ihya, tan cuhva

ndo tsi ra tsa jahā canaa utsi taahan ca siqui tsa tsahā yu tsi ra”, catyí ra. ²⁵ Tacan tan catyí ra naha tsihin ra rey can: “Maa tyin ra ican, tsa iyō utsi taahan tsi ra”, catyí ra naha. ²⁶ Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jahā tyiñu tsihin tsa tsahā yu tsi ra, cuaha ca cua cuhva yu tsi ra. Tan ra tsa tsahā yu luxu ñi, tan ña cuñí ra jahā tyiñu ra tsihin tsi, cua quinyaa yu tandihí can tsi ra. ²⁷ Tan tandihí nyívi xaan iñi tsi yu, ñi tsa ña cuñí tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihya”, catyí ra rey can —catyí ra Jesús.

Nu tsaā ra Jesús ñuu Jerusalén
(Mt. 21.1-11; Mr. 11.1-11; Jn. 12.12-19)

²⁸ Tsa yahā cahan ra Jesús yacan, tan jañihí ra cuahán ra ñuu Jerusalén. ²⁹ Tacan tan tsa cuñí tsaa ra ñuu Betfagé tsihin ñuu Betania, yatyin ñi iin yucu tsa nañí Olivo, [tyin maa ñi maa yutun olivo iyō ican]. Tava tyiñu ra tsi uvi taahan ra tsicā tsihin ra. ³⁰ Tan catyí ra tsihin ra naha:

—Cuahān ndo ñuu tsa canyí yatyin ñi ihya. Ican cua nañihí ndo iin burru luhlu, quiti tsa ñaha ca quihí tyayu. Nuuhñi ti. Ndatsi ndo tsi ti. Tan quitsi ndaca ndo tsi ti tsi yu. ³¹ Tatun yóo tsicā tuhun tsi ndo: “¿Nacuenda ndatsi ndo tsi ti?” catyí ndo tsihin ñi: “Ndatsi ndi tsi ti tyin tsiñi ñuhu ti tsi ra ndacá ñaha.”

³² Tacan tan ra tsicā tsihin ra, cuahán ra naha. Tan nañihí ra naha tsi ti tumaa tsa cahan maa ra tsihin ra naha. ³³ Tan cuhva tsa ndatsi ra naha tsi ti, tsaā tsitoho ti. Tan nducu tuhun ra can naha ra tsi ra naha tan catyí ra:

—¿Nacuenda ndatsi ndo burru ihya? —catyí ra naha. ³⁴ Tacan tan nacahan ra can naha ra:

—Ndatsi ndi tsi ti tyin tsiñi ñuhu ti tsi ra ndacá ñaha —catyí ra naha.

³⁵ Tacan tan quihin ra naha tsi ti. Tan tsindacā ra naha tsi ti nu nyii ra Jesús. Tan tyiso ra naha jahma ra naha tsata ti. Tacan tan jandaa ra naha tsi ra Jesús tsata ti. ³⁶ Tacan tan cuahán ra Jesús. Tan cuaha xaan nyívi cuahán tsihin ra tsaquín ñi jahma ñi nu ñuhu ityi nu cua yaha ra, yosó ra burru ican. ³⁷ Tsa tsa cua cuyatyin tandihí nyívi tan ra Jesús nu iñi nuu yucu Olivo, quitsahā caná tsaa tandihí ñi tsinú iñi tsi ra tsihin tsa siñi cuñí ñi. Tan jahannú ñi tsi Nyoo tyin cuaha xaan tsa iyo javahā ra nyehe ñi. ³⁸ Tan catyí ñi:

—¡Na jacahnu yo tsi ra Rey ihya tyin vatsí ra tsihin sivi Nyoo Jutu yo! ¡Tan na coo tsa taxin andivi! ¡Tan na jacahnu yo tsi Nyoo! —catyí ñi.

³⁹ Tacan tan juhva ra fariseo tsa cuahán tsihin ñi, catyí ra naha:

—Maestro, jacutaxin tsi nyivi ihya —catyi ra naha.

⁴⁰ Tan nacahan ra Jesús tan catyi ra:

—Tatun nyivi ihya tan cutaxin ñi, yuu cua cana tsaa, tan cua jacahnu tsi tsi yu —catyi ra Jesús.

⁴¹ Tacan tan tsa tsaq ra Jesús yatyin ñi yuhu ñuu Jerusalén, nanyehé ra ñuu can tan quitsahá tsacú ra tsa cuihya cuñi ra. ⁴² Tan catyi ra:

—Vaha xaan tun tsatyin cuvi coto ndo tan cutuñi ñi ndo nácaa ñihi ndo tsa taxin coo aña ndo vityin ihya. Maa tyin xeehe xaan yihí tsa vaha can, tan ña cuvi nañihi ndo can. ⁴³ Coó quivi cua nyehe ndo tundoho jaha nu xaan ñi tsi ndo cua tyihi cutu nahnu tsi ndo. Tandihí ityi cua quitsi nahnu. Tan cañi tahan nahnu tsihin ndo. ⁴⁴ Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi intuhun ca yuu tsa yosó toto tan ña cua nacoo ca nahnu. Tacan cua cuvi tyin maa ndo ña cuñi ndo nacoto ndo tyin tsa vatsi Nyoo, vatsi jacacu ra tsi ndo.

Nu tavá ra Jesús tsi nu xicó tsitsi vehe ñuhu cahnu nahnu

(Mt. 21.12-17; Mr. 11.15-19; Jn. 2.13-22)

⁴⁵ Tacan tan quihvi ra Jesús tsitsi cora vehe ñuhu cahnu. Tan quitsahá tavá ra tandihí nyivi xicó tan nyivi jatá tsa yucú nu quehe. ⁴⁶ Tan catyi ra tsihin nahnu:

—Nu tutu Nyoo catyi tyin vehe Nyoo, nu tsicán tahvi yo tsi ra cuvi tsi. Tan nyoooho jananduví ndo itsi vehe ñasuhu —catyi ra Jesús.

⁴⁷ Tan tandihí quivi tsaahán ra Jesús tsi-jacuahá ra tsi nyivi tsitsi vehe ñuhu cahnu can. Maa tyin ra jutu tsa cuvi ityi nuu naha ra, tan ra maestro cuenda ley vehe ñuhu naha ra, tan ra cuvi mandoñi ñuu Jerusalén can, nducú ra naha cuhva cahñi ra naha tsi ra. ⁴⁸ Maa tyin ña ñihí maa ra naha nácaa javaha ra naha tyin tandihí nyivi tan vaha tyaá soho ñi tsa caahán ra Jesús.

20

Nu tsicá tuhun ra cumi tyiñu vehe ñuhu naha ra tsi ra Jesús yóo tavá tyiñu tsi ra tsa cahan ra tsihin nyivi

(Mt. 21.23-27; Mr. 11.27-33)

¹ Iin quivi jacuahá ra Jesús tsi nyivi tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaq ra jutu tsa cuvi ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuvi mandoñi naha ra. ² Tan catyi ra naha tsihin ra Jesús:

—Catiyí tuhun tsihin ndi ¿yóo tavá tyiñu tsi un javaha un tyiñu ihya? —catyi ra naha.

³ Tacan tan ra Jesús catyi ra tsihin ra naha:

—Yuhu cuñi tucu yu nducu tuhun yu tsi ndo. ⁴ ¿Yóo jaquitsi tsi ra Juan tyin jacoondutya ra tsi nyivi? ¿A Nyoo jaquitsi tsi ra, a nyivi?

⁵ Tacan tan ra ican naha ra quitsahá caahán yuhu tahan ra naha tan catyi ra naha:

—Tun catyi yo tyin Nyoo jaquitsi tsi ra Juan, cua catyi ra tsihin yo nacuenta ña tsinu ñi yo tsa cahan ra Juan. ⁶ Tun catyi tucu yo tyin nyivi jaquitsi tsi ra, tandihí nyivi cua cahñi ñi tsi yo tsihin yuu. Tyin tandihí ñi, tan cuñi ñi tyin ndusu yuhu Nyoo cuvi ra Juan —catyi ra naha.

⁷ Tacan tan nacahan ra naha tsihin ra Jesús tyin ña tsitó ra naha yóo tavá tyiñu tsi ra Juan jacoondutya ra tsi nyivi. ⁸ Tacan tan ra Jesús catyi ra tsihin ra naha:

—Ndi yuhu, tan ña cua catyi tuhun yu tsihin ndo yóo tavá tyiñu tsi yu tsa javaha yu tyiñu ihya.

Nu jacuahá ra Jesús tyin tumaa cuvi juhva ra caquiñi naha ra, tacan cuvi ra tsa cua cahñi tsi ra

(Mt. 21.33-44; Mr. 12.1-11)

⁹ Tacan tan tsahá cuenda ra Jesús iin cuhva ihya tsi nyivi:

—Iin ra, tatsi cuaha ra nu ñuhu ra yoho tsiti yucu tsa cua cuvi vinu. Yahá can tan tsahá nuu ra ñuhu can tsi juhva ra jahá tyiñu. Tacan tan naha cuahán ra inga ñuu.

¹⁰ Tan quivi tsa iñi tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundí ra jacunuhú ra naha tsi ra. ¹¹ Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahan nyaa ra naha tsi ra. Tan jacunuhú ra naha tsi ra. Tan juvin ñi nduve tsa tsahá ra naha cuiso ra cunuhu ra. ¹² Tacan tan ra cuvi tsitoho yoho can jacuhun nyico ra inga ra. Maa tyin juvin ñi tacan javahá nyico ra naha tsihin ra can. Tan jañicuehe ra naha tsi ra. Tan tavá ra naha tsi ra.

¹³ Yahá can tan catyi tsitoho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñi xaan yu. Vasiqi cua tyaa yahvi ra naha tsi ra, tyin sehe yu cuvi tsi ra”, catyi ra. ¹⁴ Maa tyin tsa nyehe ra jahá tyiñu can naha ra tsi ra sehe ra, natuhún tahan ra naha: “Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyi ra naha. ¹⁵ Tacan tan tavá ra naha tsi sehe tsitoho ñuhu ican ityi tsata cora, tan tsahñi ra naha tsi ra —catyi ra Jesús.

Tacan tan catyi ra Jesús tsihin nyivi nyecú ican:

—¿Náa cua javaha tsitohó ñuhu ican tsihin ra can naha ra tyin tsaññi ra naha sehe ra?
¹⁶ Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyivi tsa caahán ra, nayuhvi xaan ñi cuvi. Tan catyí ñi:

—¡Ña cuñi Nyoo tahan yo tacan! —catyí ñi.

¹⁷ Maa tyin ra Jesús nanyehę ra nuu ñi tan catyí ra:

—Tun tacan tsicá iñi ndo ¿náa cuñi tsi catyí tsa nyaá nu tutu Nyoo? Tyin catyí tsi tyehen:

Yuu tsa ña cuñi ra javahá vehe cuatyíñu ra, yacan cuvi yuu tsa tsiñi ñuhu ca.

¹⁸ Yóo nyivi cua canacava tsata yuu can, cua tahnu cuatyí ñi. Tan tatun maa yuu can canacava tsata ñi cua taxin nyihi ñi —catyí ra Jesús.

¹⁹ Tan ra jutu tsa cuvi ityi nuu naha ra tan ra maestro cuenda ley vehe ñuhu naha ra, tuvji iñi ra naha tyin tsa cahan ra Jesús tacan, tsi maa ra naha nañi can. Tan cuñi ra naha tiin ra naha tsi ra tyin cahñi ra naha tsi ra. Maa tyin ña tsitó maa ra naha nácaa javaha ra naha, tyin nayuhvi ra naha tsi nyivi.

Nu jacuahá ra Jesús tsa cuenda tsa tyahvi nyivi xuhun tsi ra ndacá ñaha ñuu Roma
 (Mt. 22.15-22; Mr. 12.13-17)

²⁰ Tacan tan jacuhun ra naha tsi juhva ra nducu cuhva tsi ra Jesús. Tan jahá ra naha tyin ra vaha cuvi ra naha. Tyin tacan tan coto ra naha náa tsa ña vaha cua cahan ra Jesús tan cuvi tiin ra naha tsi ra. Tan cuhva cuenda ra naha tsi ra tsi ra ndacá ñaha. ²¹ Yacan tsicá tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahá un tsa vaha tsi nyivi. Tan ñavin cuhva iyó ñi nyehé un maa tyin nyehé un cuhva iyó añima ñi. Tan maa ñi maa tsa nditsa tyin ityi Nyoo janahá un. ²² Catyí tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyí ra naha.

²³ Tan ra Jesús tuvji iñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñi ndo nducu cuhva ndo tsi yu? ²⁴ Janaha jihna ndo iin xuhun tsi yu, na nyehe yu. ¿Yóo nuu nyaá xuhun can tan yóo sivi nyaá can? —catyí ra.

Tacan tan nacahan ra naha:

—Nuu ra ndacá ñaha, ra cuvi rey cahnu, nyaá can tan juven ñi sivi ra nyaá can —catyí ra naha.

²⁵ Tacan tan catyí ra Jesús:

—Tun tacan, cuhva ndo xuhun can tsi ra ndacá ñaha tyin tsi maa ra cuvi tsi. Tan

cuhva ndo tsi Nyoo tsa taahán tsi tsi ra —catyí ra Jesús tsihin ra naha.

²⁶ Tan ña cuvi maa jandavi ñaha ra naha tsi ra Jesús tsihin tsa caahán ra tacan tsihin nyivi. Tan iyo xaan cuñi ra naha tsa nacahan ra. Tan taxin ña cuvi ra naha.

Nu cuñi ra cuvi saduceo naha ra jandavi ñaha ra naha tsi ra Jesús
 (Mt. 22.23-33; Mr. 12.18-27)

²⁷ Tsa yaha can tan tsaá juhva ra cuvi saduceo nu nyii ra Jesús. Maa ra naha cuvi ra tsa catyí tyin ña nandoto nyivi tun tsa tsihi ñi.

²⁸ Tacan tan catyí ra naha tsihin ra Jesús:

—Maestro, jandoq ra Moisés tyiñu ihya tyin tatun iin ra tsihi tan nandoq ñasihi ra, tatun nduve sehe ra tsicoq tsihin ña, taahán tsi tsa tindaha ra cuvi yañi ra tsihin ña, tan coo sehe ra tsihin ña tsa cuenda ra yañi ra. ²⁹ Maa tyin cuñi ndi coto ndi nácaa, tyin tsicoq iin ra tan tsicoq utsa sehe ra. Tan ra tsa ñihi ca tsicoq ñasihi ra, maa tyin nduve sehe ñi tsicoq, tan tsihi ra. ³⁰ Tacan tan naquihin ra tsa tsinu uvi tsi ña can. Tan nduve tucu sehe ñi tsicoq. Tan tsihi tucu ra can. ³¹ Tan juven ñi tacan javahá ra tsinu uñi. Tandihí tsa utsa ra naha javahá tacan. Ndi intuhun ra tan ña tsicoq sehe ra tsihin ña. ³² Tan nu ndihí tuhun tsihi ndihí maa ña. ³³ Tan cuñi ndi coto ndi yóo ra cua cuvi yii ña tsitsi tsa tandihí tsa utsa taahan ra naha quivi cua nandoto nyivi —catyí ra saduceo naha ra.

³⁴ Tacan tan nacahan ra Jesús, tan catyí ra:

—Ihya nu ñuhu ñayivi, rayii tan ñaha tindahá ñi. ³⁵ Maa tyin nyivi tsa nacatsi Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha. ³⁶ Tan nduve tuhun tsihi iyó ndacan tyin cua cuvi ñi tumaa ángel. Tan cua cuvi ñi sehe Nyoo tyin nandoto ñi. ³⁷ Tan tsa cuenda tuhun tsa nandoto ndiyi. Tsa nditsa cuvi tsi tyin yacan jacoto ra Moisés nu nacatyí tuhun ra nácaa cayú taca iñu can. Tsihin can jacoto ra tsi yo tyin nyivi tsihi cua nandoto ñi. Tyin catyí ra: “Jutu yo Nyoo cuenda ra Abraham, tan cuenda ra Isaac, tan cuenda ra Jacob”, catyí ra Moisés. ³⁸ Tacan catyí ra tyin Nyoo, ñavin Nyoo cuenda nyivi tsihi cuvi ra. Nyoo cuenda nyivi nyito cuvi ra. Tyin tsa cuenda Nyoo tandihí yo tan nyito añima yo vasu tsa tsihi cuñu ñuhu yo —catyí ra Jesús.

³⁹ Tacan tan juhva ra maestro cuenda ley vehe ñuhu naha ra catyí ra naha:

—Vaha xaan nacahan un, Maestro —catyí ra naha.

⁴⁰ Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

Ra Cristo cuví ra tata ra David, tan juvin ñi cuví tucu ra Sehe Nyoo

(Mt. 22.41-46; Mr. 12.35-37)

⁴¹ Tacan tan tsicã tuhun ra Jesús tsi ra naha:

—¿Nacuenda catýi yo tyin ra Cristo tata ra David cuví tsi ra? ⁴²⁻⁴³ Tyin juvin ñi maa ra David catýi ra nu libru Salmo:

Caahán Nyoo Jutu yu tsihin Jutu Mañi yu, ra Cristo, tan catýi ra tsihin ra:

“Cunyaa xiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahnu”, catýi Nyoo tsa tsatyíñu ra yuhu ra David tahañ tsanaha.

⁴⁴ ¿Nacaa tsa tata ra David cuví tucu ra Cristo, tan juvin ñi maa ra David catýi tyin Jutu Mañi ra cuví tsi ra Cristo? —catýi ra Jesús.

Nu cañan ra Jesús tyin cuaha xaan cuatyí ra maestro cuenda ley vehe ñuhu iyó

(Mt. 23.1-36; Mr. 12.38-40, Lc. 11.37-54)

⁴⁵ Tandihí nyívi tsiñi ñi tsa cañan ra Jesús tsihin ra tsicã tsihin ra nu cañan ra tyehen:

⁴⁶ —Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahán xaan iñi ra naha cunditsi ra naha jahma nañi. Tan cuahan ra naha nuyahvi, cuñi ra naha tsa cuhva nyívi yucú nuyahvi nacumi tsi ra naha tsihin tsa jaha ñi tsa ñayívi tsi ra naha. Tan nanducú ra naha tyayu vaha cunyecú ra naha tsitsi vehe ñuhu, tan nu cuahán ra naha vico. ⁴⁷ Tan naha tsicán tahvi ra naha tsi Nyoo nu tuví, tsa cuñi ra naha tsa nyehe nyívi tan catýi ñi tyin vaha xaan nyívi cuví ra naha. Maa tyin juvin ñi maa ra naha cuví ra quinyaá vehe ñi ndaahvi tsa tsihi yú tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catýi ra Jesús.

21

Tsa jamañi iin ñaha ndaahvi tsa tsihi yú
(Mt. 12.41-44)

¹ Tan nyehe ra Jesús tyin cuaha xaan nyívi cuca tyihí ñi xuhun tsitsi caja tsa nyíi tsitsi vehe ñuhu cahnu. ² Tan nyehe tucu ra tsi iin ñaha ndaahvi tsa tsihi yú. Tan tyihí ña uvi taahan ñi xuhun nyíhi. ³ Tan catýi ra:

—Tsa nditsa catýi yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihí ñi cuca can. ⁴ Tyin tsa ndoo ña tyihí ñi. Tan ñaha ihya tyihí ña tandihí tsa iyó tsi ña —catýi ra.

Nu cañan ra Jesús tyin cua tani vehe ñuhu cahnu

(Mt. 24.1-2; Mr. 13.1-2)

⁵ Tacan tan juhva nyívi natuhún ñi tuhun cuenda vehe ñuhu cahnu ican. Tan catýi ñi tyin si xaan caá yuu. Tan si xaan caá tsa jamañi nyívi. Tacan tan catýi ra Jesús:

⁶ —Coo quívi tan cua tani tandihí tsa nyehé ndo ihya. Tan ndi intuhun ca yuu tan ña cua coso ca siqui inga tsi. Ndihi tsi cua cani nu xaan iñi tsi ndo.

Tsa cua cuvi tsa ndi cumañi ca naa ñuhu ñayívi

(Mt. 24.3-28; Mr. 13.3-23)

⁷ Tacan tan nducú tuhun nyívi tsi ra Jesús, tan catýi ñi:

—Maestro, ¿ama cua cuvi tandihí tsa caahán un ihya? ¿Nacaa tan coto ndi tatun tsa cuyatyin tsa naa ñuhu ñayívi? —catýi ñi.

⁸ Tacan tan catýi ra Jesús:

—Jaha vaha ndo cuenda, coto jandavi ñaha nyívi tsi ndo. Tyin cuaha xaan ra cua quitsi, tan cua cuatyíñu ra naha sivi yu, tan cua catýi ra naha: “Yuhu cuví Cristo, ra tsa jaquitsi Nyoo. Tyin tsa cuñi naa ñuu ñayívi”, cua catýi ra. Maa tyin ña cunyicun ndo tsi ra naha. ⁹ Tan quívi cua ñihi tuhun ndo tyin tsa iyó cuatyí tan ñihi cañi tahan nyívi, ña nayuhvi ndo. Tyin tandihí can taahán tsi cuvi tsa jihna ñi. Maa tyin cumañi ca tsa quívi tsa cua naa ñuhu ñayívi.

¹⁰ Tan catýi tucu ra:

—Nyívi iyó iin ñuu cua cañi tahan ñi tsihin nyívi inga ñuu. Tan cua coo cuatyí. ¹¹ Tan ñihi xaan cua taan. Tan cua coo tama. Tan cua coo cuehe tandihí ñi ityi. Tan cua nyehe nyívi tsa yuuhví ityi andívi. Tan cuaha xaan tsa iyo nahnu tsa ña tuhvá nyívi nyehe tan cua nyehe ñi. ¹² Maa tyin tsa ndi cumañi ca cuvi yacan, cua cuxaan iñi nyívi tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihí ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí sivi yuhu.

¹³ Tacan tan cuví cahan ndo tuhun yu tsihin ñi. ¹⁴ Maa tyin jaha ndo cuenda tan ña cua caca iñi ndo náa tuhun cua nacahan ndo tsihin ra ndacá ñaha ican. ¹⁵ Tyin yuhu cua cuhva yu tuhun cua cahan ndo. Tan cua cuhva yu tsa nyityi jiñi ndo nu cua cahan ndo. Ndi intuhun nu xaan iñi tsi ndo tan ña cuvi jaha nahnu tsi ndo. ¹⁶ Maa tyin nyívi cua cuhva cuenda ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuví yañi ndo, nyívi ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi tsi ndo. Tan yihí nyoocho cua cañi nyívi tsi ndo. ¹⁷ Tandihí nyívi tan ndasi cua cuñi ñi nyehe ñi tsi ndo tsacatyí yuhu. ¹⁸ Maa tyin ndi intuhun ixi jiñi ndo tan ña cua cunaa. ¹⁹ Tatun ña ndu uvi iñi ndo tsa nyicun ndo tsi yu, cua cacu ndo.

²⁰ Quívi cua nyehe ndo tyin ñi canduvi yuhu ñuu Jerusalén ihya nyecú andaru, coto ndo tyin tsa cuñi naa ñuu ihya. ²¹ Tan nyívi iyó ñuu tsa cayucú Judea, cua cunu ñi tan xuhun xeehe ñi ityi yucu. Tan nyívi iyó ñuu

Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya. ²² Tyin yacan cuví quivi tsa cua tatsi tuñi Nyoo tsi nyivi ñuu ihya. Tyin tsa cua cuvi tandihi cuhva catyí nu tutu Nyoo. ²³ Tan ndahvi ñiñaha tsa ñuhu sehe quívi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihi nyivi. Tyin cahnu xaan tsa uhvi cua nyehe nyivi ñuu Jerusalén ihya cua jaha Nyoo. ²⁴ Andaru cua cahñi ra naha tsi juhva nyivi tsihin mityi. Tan cua tñin ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuví, cua cuyucu ñi ñuu Jerusalén ihya nda cuanda quivi tsa catyí maa Nyoo.

Nacaa cua quitsi Rayii tsa quee nda gloria inga tsa

(Mt. 24.29-35, 42-44; Mr. 13.24-37)

²⁵ Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu. ²⁶ Tan cua cúu naaha ñi tsihin tsa yuuhvi ñi tsa tsicá iñi ñi náa ndihi tsa cua cuvi ihya nu ñuhu ñayivi. Tyin nda cuanda tsa iyó andivi cua nacanda tan taan. ²⁷ Tacan tan cua nyehe ñi tsi yuhu, Rayii tsa quee nda gloria, vatsi nuu yu tsitsi vico tsihin tunyee iñi Nyoo, tan tsihin tsa cahnu cuví ra. ²⁸ Tan cuhva tsa cua quitsaha yacan tan jandu iin ndo iñi ndo tan cusi iñi ndo tyin numi xaan cua cacu ndo—catyí ra.

²⁹ Tacan tan tsahá cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihi ca yutun. ³⁰ Tatun tsa nduyutyá numa tun tsa cuyatyn cuun savi. ³¹ Tan tacan tucu nyoocho, tatun tsa nyehe ndo tyin tsa quitsaha cuví tandihi tsa cahán yu tsihin ndo, coto ndo tyin tsa nyanaá quivi tsa cundaca ñaha Nyoo nu ñuhu ñayivi ihya.

³² Maa tyin tsa nditsa catyí yu tsihin ndo tyin yacan cua cuvi jihna tsa ndi cumañi ca cúu nyivi tsa iyó nu ñuhu ñayivi. ³³ Coo quivi cua naa andivi tan ñuhu ñayivi, maa tyin tuhun caahán yu, ña cua cundihi tsi.

³⁴ Tan jaha ndo cuenda tsi ndo coto ndundava iñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan iñi ndo tundoho ñayivi ihya. Jaha ndo cuenda coto ndundava iñi ndo tsihin yacan. Tan coto sana iñi ndo tan quita quivi cua quitsi yu tan cua quitsi tundoho cua nyehe ndo. ³⁵ Tyin tacan cua cuvi, tandihi nyivi iyó nu ñuhu ñayivi, sana iñi ñi tan tumaa iin tsa cua nacasi Nyoo nu yucú ñi tan ña cua cuvi quita ñi. ³⁶ Maa tyin nyoocho cuatu ndo. Ndaçan tahvi ndo tsi Nyoo tandihi quivi, na jacacu ra tsi ndo. Tan ña nyehe ndo tandihi tundoho tsa cua coo. Ndaçan tahvi ndo,

tacan tan cua cuvi tsa ndo nu nyaá yuhu, Rayii tsa quee nda gloria—catyí ra Jesús.

³⁷ Tan tandihi quivi jacuahá ra Jesús tsi tandihi nyivi tsitsi vehe ñuhu cahnu. Tan tsa tsacuaa tsicá ra yucu Olivo. ³⁸ Tan tandihi nyivi tsaá ñi tsitsi vehe ñuhu cahnu ndihi tsa tuvi, tyin tyaa soho ñi tsa caahán ra.

22

Nu cua xico ra Judas Iscariote tsi ra Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Tan tsa nyanaá yatyn quivi tsa cua coo vico pascua, vico nu tuhvá nyivi tsatsi paan tsa nduve yutsan iya yihí. ² Tan ra jutu tsa cuví ityi nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cahñi ra naha tsi ra Jesús. Maa tyin yuuhvi ra naha tsi nyivi.

³ Tacan tan quihvi nu ña vaha tsi nu Judas Iscariote. Tan nu ihya cuvi iin tsa utsi uvi taahan ra tsa nacatsi ra Jesús. ⁴ Tan nu ihya, tsahan nu tsicahan nu tsihin jutu tsa cuví ityi nuu tan tsihin ra yihí ndaha tsi ra jahá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha. ⁵ Tan ra ican naha ra sii xaan cuñi ra naha. Tan tyihí ra naha cuhva tyin cuhva ra naha xuhun tsi ra Judas. ⁶ Tan ra Judas ndoo ra vaha. Tan quitsaha nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyivi yucú tsihin ra Jesús.

Nu cuxiñi ra Jesús tsihin ra tsicá tsihin ra

(Mt. 26.17-29; Mr. 14.12-25; Jn. 13.21-30; I Co. 11.23-26)

⁷ Tan tsaá quivi tsa cuvi vico tsa tsatsi nyivi paan tsa nduve yutsan iya yihí. Tan juvin ñi quivi ican tuhvá ñi tsahñi iin mbee luhlu tsa vico pascua can. Tyin catsi ñi tsi ti.

⁸ Tan ra Jesús jacuhun ra tsi ra Pedro tsihin ra Juan, tan catyí ra tsihin ra naha:

—Cuaahan ndo cujanduvaha ndo mbee tsa cua cuxiñi yo cuenda vico pascua—catyí ra.

⁹ Tacan tan nducú tuhun ra naha tsi ra:

—¿Numaa cuñi un javaha ndi tsa cuxiñi yo?—catyí ra naha.

¹⁰ Tacan tan catyí ra Jesús tsihin ra naha:

—Cuaahan ndo tsitsi ñuu. Ican cua nañihi ndo tsi iin ra nyisó iin quiyi ndutya. Cuaahan ndo tsata ra tan quihvi ndo vehe nu quihvi ra. ¹¹ Tan catyí ndo tsihin tsitoho vehe can: “Ra cuví Maestro, cuñi ra coto ra numaa nyaá cuarto nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan catyí ndo tsihin ra. ¹² Tacan tan cua janaha ra iin cuarto cahnu ityi siqui, nu tsinu uvi pisu tsi ndo. Tan tsa nduvahá maa

tsi. Tan ndacan cua javaha ndo tsa cuxiñi yo —catyí ra tsihin ra naha. ¹³ Tacan tan cuahán ra naha. Tan nañihí ra naha tandihí tumaa tsa cahán ra Jesús. Tacan tan na iça vaha ra naha tsa cuxiñi ra naha cuenda vico pascua.

¹⁴ Tacan tan tsa tahán tsi cuhva tsa cuxiñi ra Jesús tsihin tandihí ra tava tyiñu ra, tsinyecu ra naha yuhu mesa. ¹⁵ Tacan tan catyí ra Jesús:

—Cuñí xaan yu cuxiñi yu tsihin ndo cuenda vico pascua ihya tsa ndi cumañi ca nyehe yu tundoho tan cúu yu. ¹⁶ Tan catyí yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyí ra.

¹⁷ Tacan tan quihín ra iin vasu vinu. Nacuhva ra tyahví nyoo tsi Nyoo. Yahá can tan catyí ra tsihin ra nyecú tsihin ra:

—Quihín ndo tsehe. Tan coho ndo luxu luxu. ¹⁸ Tyin catyí yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ñuhu ñayivi ihya —catyí ra.

¹⁹ Yahá can tan quihín ra paan, tan tsahá ra tyahví nyoo tsi Nyoo, tan tsahnya sava ra can. Tsahan tsahá ra can tsi ra naha. Tan catyí ra tsihin ra naha:

—Paan ihya cuví tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñí tsi nducuhun iñi ndo tsi yu tan cuxiñi ndo tyehen —catyí ra.

²⁰ Tan tsa yahá cuxiñi ra naha, tacan tan quihín ra vasu vinu, tan catyí ra:

—Tsihin vinu ihya ndoo Nyoo tyiñu tsihin ndo vityin. Tyin vinu tsa yiñi tsitsi vasu ihya, tumaa niñi yu cuví tsi. Tan tsa vaha tsi nyoocho tan cua cati niñi yu. Tan cua cúu yu.

²¹ Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya. ²² Tyin yuhu, Rayi tsa quee nda gloria, cua tahan yu tumaa tsa nyaá maa tsa cua tahan yu. Maa tyin ñdahvi ra tsa cua nacuhva cuenda tsi yu! —catyí ra Jesús.

²³ Tacan tan ra tsicá tsihin ra Jesús quitsahá nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

Nu cahán yuhu tahan ra tsicá tsihin ra Jesús, yóo ra cahnu ca cuví

²⁴ Yahá can tan quitsahá caahán yuhu tahan ra tsicá tsihin ra Jesús, ndáa ra cahnu ca cuví. ²⁵ Tan ra Jesús catyí ra:

—Tsitó nyoocho tyin ra ndacá ñaha tsi nyivi iyó nu ñuhu ñayivi, ñihi xaan ndacá ñaha ra naha tsi ñi. Tan cuñí ra naha tyin catyí nyivi tyin jatinyeé ra naha tsi ñi. ²⁶ Maa tyin nyoocho ña taahán tsi javaha ndo tumaa javahá

ra ican naha ra. Tyin tatun cuñí ndo cuví ndo ra cuví ityi nuu, taahán tsi janduluhlu ndo tsi ndo. Tan tatun cuñí ndo cundaca ñaha ndo, cuñí tsi tsa cuví ndo musu tandihí ndo. ²⁷ Tyin nu ñuhu ñayivi ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

²⁸ Tan nyoocho cuví ndo tsa nyecú tsihin yu tandihí nu nyehe yu tundoho. ²⁹ Yacan cuenda, yuhu tsahá yu iin nu cua cundaca ñaha ndo tumaa tsa tsahá Jutu yu tsa cundaca ñaha yu. ³⁰ Tyin cua catsi ndo tan cua coho ndo nu mesa tsihin yu nda nu ndacá ñaha yu. Tan ndacan cua cunyecu ndo cundaca ñaha ndo nyivi cuví tata tsa utsi uvi sehe ra Israel.

Nu caahán ra Jesús tyin cua catyí ra Pedro tyin ña nacoto ra tsi ra

(Mt. 26.31-35; Mr. 14.27-31; Jn. 13.36-38)

³¹ Tacan tan catyí ra Jesús tsihin ra Pedro:

—Nyehe vaha un, yooho Simón. Tyin nu ña vaha tsa tsicán ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo. ³² Maa tyin tsicán tahvi xaan yu tsi ra tsa cuenda un, na ña jandihí un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatinyeé un tsi ra yañi un naha ra tsa ña cua jandihí ra naha tsa tsinú iñi ra naha tsi yu —catyí ra Jesús tsihin ra Simón.

³³ Tan ra Simón catyí ra tsihin ra:

—Jutu Mañi yu, tsa ndú iin vaha iñi yu tsa cuhun yu tsihin un vasu vehe caa, vasu cúu yu tsihin un —catyí ra.

³⁴ Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitoocho, yooho cua catyí un uñi tsaha tyin ña nacoto un tsi yu —catyí ra Jesús tsihin ra.

Nu tsa cuñí tsaa cuhva tsa cua nacuhva cuenda ra Judas tsi ra Jesús

³⁵ Tacan tan tsicá tuhun ra Jesús tsi ra tsicá tsihin ra tan catyí ra tsihin ra naha:

—Nducuhun iñi ndo quiví tsa jacuhun yu tsi ndo tsa cahán ndo tsihin nyivi, tan nduve tsa tsindahá ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quiví can? —catyí ra Jesús.

—Nduve —catyí ra naha.

³⁶ Tacan tan catyí ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo.

³⁷ Tyin catyí yu tsihin ndo, tyin tandihí tuhun yu tsa nyaá nu tutu Nyoo cua cundaa tsi, tyehen catyí tsi: “Cua tatsi tuñi nyivi tsi

ra tumaa tsa cuví ra iin ra caquiñi.” Tacan catyí tuhun yu nu tutu Nyoo. Tan tandiñi tsa catyí tsi tsa cuenda yu cua cundaa tsi—catyí ra.

³⁸ Tacan tan catyí ra tsicá tsihin ra:

—Ihya nyecú uvi taahan mityí —catyí ra naha.

—Tsa iyó vaha ñi —catyí ra Jesús.

Nu tsican tahvi ra Jesús tsi Nyoo nda Getsemaní

(Mt. 26.36-46; Mr. 14.32-42)

³⁹ Tacan tan quitá ra Jesús vehe nu nyii ra. Tan cuahán ra yucu Olivo, cuhva tuhvá maa ra tsicá. Tan ra tsicá tsihin ra cuahán ra naha nyicún ra naha tsi ra. ⁴⁰ Tan tsa tsaa ra naha ndacan, catyí ra tsihin ra naha:

—Ndacan tahvi ndo tsi Nyoo tyin tacan tan ña cuví jaha canaa nu ña vaha tsi ndo.

⁴¹ Tacan tan cuahán ra Jesús tsa cañi luxu ca, tumaa tsa cañi tsaa iin yuu tun cañi yo can. Tacan tan tsicuñi tsi ra. Tan quitsaha caahán ra tsihin Nyoo, ⁴² tan catyí ra:

—Tyatya Jutu yu, tun yooho tan cuñi un, jatsiyo tundoho tsa cua nyehe yu ihya. Maa tyin na ña cuví cuhva cuñi maa yu. Na cuví cuhva cuñi maa un —catyí ra Jesús.

⁴³ Tacan tan quituví iin ángel Nyoo, tyin cuhva ra tunyee iñi tsi ra Jesús. ⁴⁴ Tan tsitsi tsa nyehé xaan ra Jesús tundoho tsa cuihaya xaan cuñi ra, tan ñihi ca tsican tahvi ra tsi Nyoo. Tan cuaha xaan tyeen ra quitá tan tsatí tsi nu ñuhu, tan caá tsi tumaa caá ñiñi.

⁴⁵ Tacan tan nduvita ra tsa ndiñi cahán ra tsihin Nyoo. Tan cuahán nyico ra nu yucú ra tsicá tsihin ra. Tan nyehe ra tyin quixí ra naha, tsa cuenda tsa cuihaya xaan cuñi ra naha, ña cunyeé iñi ra naha ñumaahna tan quixí ra naha.

⁴⁶ Tacan tan catyí ra Jesús tsihin ra naha:

—¿Nacuenda quixí ndo? Ndúvita ndo. Tan ndacan tahvi ndo tsi Nyoo, tyin tacan tan ña cuví jaha canaa nu ña vaha tsi ndo.

Nu tsaha cuenda ra Judas tsi ra Jesús tsi nu xaan iñi tsi ra

(Mt. 26.47-56; Mr. 14.43-50; Jn. 18.2-11)

⁴⁷ Ndi caahán ca ra Jesús yacan, tan tsaa cuaha ra catsaa. Tan ityi nuu, vatsí nu Judas, iin ra tsicá tsihin ra Jesús. Tan natuhva nu nu nyaá ra Jesús tyin tyayuhu nu tsi ra.

⁴⁸ Tacan tan cahán ra Jesús tsihin nu:

—Yooho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayii tsa quee nda gloria tsi nu xaan iñi tsi yu nahnu? —catyí ra Jesús.

⁴⁹ Tan ra nyecú tsihin ra Jesús quitsaha nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mityí? —catyí ra naha.

⁵⁰ Tacan tan iin ra can, tsahnya ra soho tsiyo cuaha iin ra tsa cuví musu ra jutu tsahnu tsa cuví ityi nuu.

⁵¹ Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tñin ra Jesús soho ra ican tan janduvahá ra itsi. ⁵² Tan ra jutu tsa cuví ityi nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juven ra naha cuví ra tsahan tsitiin tsi ra Jesús. Tan catyí ra Jesús tsihin ra naha:

—¿A vatsí tiin ndo tsi yu tumaa tiin ndo iin ñasuhu? tyin ndaha ndo mityi tan yu-tun. ⁵³ Ndihi quiví tsinyi yu tsitsi vehe ñuhu cahnu, tan ña tiin ndo tsi yu ndacan. Maa tyin vityin tsaa cuhva tsa nduna tyin nu ña vaha ndacá ñaha. Yacan cuenda vatsí tiin ndo tsi yu.

Nu cahán ra Pedro tyin ña nacotó ra tsi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tacan tan tñin ra naha tsi ra Jesús. Tan tsindacá ra naha tsi ra nda vehe ra jutu tsahnu tsa cuví ityi nuu. Tan ra Pedro ndasava ñi cuahán ra nyicún ra. ⁵⁵ Tan tsa tsaa ra naha vehe ra jutu tsahnu tsa cuví ityi nuu, jatahán ra tsa cuví musu naha ra ñuhu nuquehe. Tan tsinyecú ra naha tanii canduvi nu cayú ñuhu can. Tan tsinyaa ndihi ra Pedro tyañu ra naha. ⁵⁶ Tan tsa ndunditsín tsa cayú ñuhu ican, tacan tan iin ñaha tsa cuví musu jutu can, nyehe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

⁵⁷ Maa tyin ra Pedro catyí ra:

—Yuhu ña nacotó yu tsi ra can.

⁵⁸ Tañi ñi tan nyehe tucu inga nyivi tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

⁵⁹ Tan tsa yahá iin hora, tan nyehe tucu inga ra tsi ra Pedro tan catyí ra tsihin ra:

—Tsa nditsa tyin juven ra ihya cuví iin ra tsa tsicá tsihin ra can. Tyin juven ra Galilea cuví ra —catyí ra.

⁶⁰ Tacan tan catyí ra Pedro:

—Ña tsitó yu náa caahán un —catyí ra.

Tan juven ñi cuhva can, tsitsi tsa ndi caahán ca ra Pedro tan navacu ñi iin tsi-tooho.

⁶¹ Tacan tan ra Jesús nanyehé ra nuu ra Pedro. Tan ra Pedro nducuhún iñi ra tsa cahán ra Jesús tsihin ra: “Tsa ndi cumañi ca navacu tsitoocho, yoocho tsa cahan un uñi tsaha tyin ña nacotó un tsi yu.”

⁶² Tacan tan quitá ra Pedro ityi tsata vehe. Tan tsacú xaan ra tsa cuihaya cuñi ra.

Nu tsacü nducu nyaa ra naha tsi ra Jesús tan cañi ra naha tsi ra

(Mt. 26.67-68; Mr. 14.65)

⁶³ Tacan tan ra jahá cuenda tsi ra Jesús, quitsahá tsacü nducu ra naha tsi ra. Tan cañi ra naha tsi ra. ⁶⁴ Tsahñi ra naha jahma nuu ra, tan quitsahá cañi ra naha nuu ra. Tan catyí ra naha tsihin ra:

—Nacoto yoo ra cañi tsi un —catyí ra naha tsihin ra.

⁶⁵ Tan cuaha xaan ca maa tsa cahan nyaa ra naha tsi ra.

Nu tsicá tuhun mandoñi naha ra tsi ra Jesús tatun Sehe Nyoo cuvi tsi ra

(Mt. 26.59-66; Mr. 14.55-64; Jn. 18.19-24)

⁶⁶ Tan tsa cunditsin inga quivi, tan ndu iin ra cuvi mandoñi tsahnu ñuu can tsihin ra jutu tsa cuvi ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi ra Jesús, cuahán tsihin ra nda nu cua coo Junta Cahnu. Tan nducu tuhun ra naha tsi ra Jesús:

⁶⁷ —Catyí tuhun tsihin ndi tun juvin ra Cristo cuvi un —catyí ra naha tsihin ra.

Tan ra Jesús nacahan ra tan catyí ra:

—Tatun catyí yu tsihin ndo tyin juvin yu cuvi, ña cua tsinu iñi ndo tsa cahan yu. ⁶⁸ Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu. ⁶⁹ Maa tyin vityin tan ityi nuu ca, Rayii tsa quee nda gloria cua cunyaa ra xiin cuaha Nyoo, ra tsa iyó tandihi tunyee iñi —catyí ra Jesús.

⁷⁰ Tacan tan tandihi ra naha tsicá tuhun ra naha tsi ra:

—Tun tacan, Sehe Nyoo cuvi tsi un —catyí ra naha.

Tacan tan nacahan ra Jesús tan catyí ra:

—Juvín, sehe Nyoo tsi yu tumaa catyí maa ndo.

⁷¹ Tacan tan natuhun tahan ra naha:

—Tsiñi ndo tsa caahán ra. Ña cuñi ca tsi tsandaa. Tyin tsa tsiñi maa yo tsa cahan ra —catyí ra naha.

23

Nu nyehe ra Pilato tyin nduve cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tacan tan nduvita tandihi ra naha. Tan tsindaca ra naha tsi ra Jesús nda nu nyaá ra Pilato, [ra ndacá ñaha quee nda ñuu Roma].

² Tacan tan quitsahá tyaá ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyin cuvi

ra Cristo, ra tsa jaquitsi Nyoo tyin cuvi ra rey —catyí ra naha tsihin ra Pilato.

³ Tacan tan ra Pilato tsicá tuhun ra tsi ra Jesús:

—¿A yoocho cuvi Rey cuenda nyivi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

⁴ Tacan tan catyí ra Pilato tsihin ra jutu tsa cuvi ityi nuu naha ra, tan tsihin nyivi:

—Nduve cuatyí ra ihya —catyí ra tsihin ñi.

⁵ Maa tyin jañihí ca ñi caahán ñi. Tan catyí nyico ñi:

—Cahnu xaan cuatyí ra. Tyin cuaha xaan tsihi tsahá ra, tyin jacuahá ra tsi nyivi. Tsa jihna ñi quitsahá caahán ra tsihin nyivi iyó ñuu tsa cayucú Galilea. Tan nanii ityi vatsi ra, jacuahá ra tsi nyivi. Tan vityin tsa tsaá ra Judea ihya tan juvin ñi yacan javahá ra —catyí ñi.

Nu jacuhun ra Pilato tsi ra Jesús nu nyaá ra Herodes, ra cuvi rey nyivi iyó Galilea

⁶ Cuhva tsa tsiñi ra Pilato yacan, tan nducu tuhun ra tatun ra Galilea cuvi ra Jesús. ⁷ Tan catyí nyivi tsihin ra tyin juvin. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuvi ra ndacá ñaha Galilea can. Tan quivi can nyii ra ñuu Jerusalén. ⁸ Tan cuhva tsa nyehe ra Herodes tsi ra Jesús, sii xaan cuñi ra. Tyin tsanaha xaan cuñi ra nyehe ra tsi ra. Tyin ñihí tuhun ra tyin cuaha xaan tsa iyo javahá ra. Tan cuñi xaan ra nyehe ra iin tsa iyo tsa cua javaha ra Jesús. ⁹ Tan cuaha xaan tsa nducu tuhun ra Herodes tsi ra Jesús. Maa tyin ra Jesús ña nacahan maa ra. ¹⁰ Ican nyecú ndihi tucu ra jutu tsa cuvi ityi nuu naha ra, tan ra maestro cuenda ley vehe ñuhu naha ra. Tan tyaá xaan ra naha cuatyí tsi ra Jesús. ¹¹ Tacan tan ra Herodes tsihin andaru cuenda ra, tsacü nducu ra naha tsi ra. Tan jacunditsi nuu ra naha iin jahma yahvi tan sii caá tsi ra Jesús, tumaa caá tsa tuhvá rey tsinditsi. Tacan tan jacuhun nyico ra Herodes tsi ra nda nu nyaá ra Pilato. ¹² Tan quivi can ra Pilato tsihin ra Herodes nduvahá iyó ra naha. Tyin nu quitsi quivi, ña cuvi nyehe tahan ra naha tsi ra naha.

Nu cutuñi ra Jesús tyin cua cúu ra

(Mt. 27.15-26; Mr. 15.6-15; Jn. 18.39-19.16)

¹³ Tacan tan ra Pilato jandu iin ra tsi ra jutu tsa cuvi ityi nuu naha ra, tan ra cumi tyiñu vehe ñuhu naha ra, tan tsihin tandihi nyivi. ¹⁴ Tan catyí ra tsihin ñi:

—Nyoocho quitsi ndaca ndo tsi ra ihya nu nyaá yu. Tan catyí ndo tyin jativí ra tsi nyivi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahan ndo can nañihí yu. ¹⁵ Tan ndi ra

Herodes tan ña nañihĩ ra ndi intuhun cuatyí ra. Yacan jaquitsĩ nyico ra tsi ra inga tsaha nu nyaá yu. Nyehe ndo tyin nduve cuatyí ra. Tan yacan ña taahán tsi tsa cúu ra. ¹⁶ Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

¹⁷ Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá. ¹⁸ Maa tyin tandihĩ nyivi iin caa ñi cana tsaa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

¹⁹ Tan ra Barrabás can nyii ra vehe caa tsa cuenda tsa cañi tahan ra tsihin ra cumí tyiñu ñuu can. Tan inga tuhun tyin tsahñi ra nyivi. ²⁰ Tan ra Pilato cuñi ra jaña ra tsi ra Jesús. Tan quitsaha caahán ra tsihin nyivi can inga tsaha tyin cua jaña ra tsi ra. ²¹ Maa tyin nyivi tsaa ca cana tsaa ñi:

—¡Tyaa tsi ra nu cruu. Na cúu ra nu cruu!

²² —¿Náa tsa ña vaha javahá ra ihya? Tan nyehé yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

²³ Maa tyin nyivi cana tsaa ca ñi, tan catyí ñi tyin nacahñi ra tsi ra Jesús nu cruu. Tan maa ñi tan tsihin ra jutu tsa cuví ityí nuu naha ra, ñihĩ ñi tsa cuñi ñi tyin cana tsaa xaan ñi. ²⁴ Tacan tan javahá ra Pilato cuhva cahán ñi. ²⁵ Tan jaña ra tsi ra Barrabás, ra tsa nyii vehe caa tsa cuenda tsa cañi tahan ra tsihin ra cumí tyiñu tan tsa cuenda tsa tsahñi ra nyivi. Tan nacuhva cuenda ra Pilato tsi ra Jesús tsi ñi cuhva cuñi maa ñi.

Nu tyaa ra naha tsi ra Jesús nu cruu

(Mt. 27.32-44; Mr. 15.21-32; Jn. 19.17-27)

²⁶ Tacan tan quihĩ andaru tsi ra Jesús. Tan cuahán ra tsihin ra naha. Tan tĩn tucu ra naha tsi iin ra ñuu Cirene nañi Simón. Ra ican ndi vatsi nuhu ra quee ra cuhu. Tan jañihĩ ra naha tsi ra tsa cuiso ra cruu ra Jesús. Tan cuhun ra ityí tsata ra.

²⁷ Tan cuaha xaan nyivi cuahán ityí tsata ra Jesús. Tan cuaha xaan ñiñaha tsacú xaan ñi tsa cuihĩya cuñi ñi tsacatyí tundoho tahan ra. ²⁸ Maa tyin ra Jesús nanyehé ra nuu ñi. Tan catyí ra tsihin ñi:

—Tandihĩ nyooho, ñiñaha ñuu Jerusalén ihya, ña vacu ndo tsacatyí yuhu. Vacu ndo, tsacatyí maa ndo tan tsacatyí sehe ndo. ²⁹ Tyin cua quitsi quivi cua nyehé xaan ndo tundoho. Tan cua cahán nyivi tsi tandihĩ ndo tsa cuví ndo ñaha tsa ña cuví coo sehe. Tan cua cahán ñi tsihin ndo: “Vaha xaan tyin nduve sehe ndo tsicoq tyin cuaha xaan tundoho nyehé yo vityin”, cua catyí ñi tsihin ndo. ³⁰ Tyin quivi can cua cuñi ñi nduva yucu tsata ñi tan quihĩ xeehe ñi. ³¹ Tyin tatun tyehen icá nyivi tsihin iin yutun vaha, yaha ca cuhva cua ica ñi tsihin yutun ityí

—catyí ra Jesús tsihin ñiñaha ñuu Jerusalén can.

³² Tan quihĩn tucu andaru can naha ra tsi uvi taahan ra iyó cuatyí, tyin cahñi ndihĩ ra naha tsi ra naha iin caa ñi tsihin ra Jesús.

³³ Tacan tan tsaa ra naha iin nu nañi Yiqui Jiñi Ndiyi. Tan ican tyaa ra naha tsi ra Jesús nu cruu. Tan tacan tyaa ndihĩ tucu ra naha tsi nduvi taahan ra iyó cuatyí can naha ra. Iin ra tyaa ra naha nuu cruu xiin cuaha ra Jesús. Tan inga ra can tyaa ra naha nuu cruu xiin satyin ra. ³⁴ Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tava ra naha suerte tsihin jahma ra Jesús, tyin nyehe ra naha ndáa ra cua jaha canaa jahma can. ³⁵ Tan nyivi nyecú ñi nyehé ñi. Tan ra cumí tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacu ra tsi inga nyivi. Na jacacu ndihĩ tucu maa ra tsi ra vityin, tun nditsa tsa ra Cristo, ra tsa jaquitsĩ Nyoo, cuví ra —catyí ra naha.

³⁶ Tan juvin ñi cahán nyaá ra andaru can naha ra tsi ra. Tan natuhva ra naha nu ticaá ra. Tan tsaha ra naha vinu iya tsihi ra. ³⁷ Tan catyí ra naha tsihin ra:

—Tatun rey cuenda nyivi Israel cuví un, jacacu tsi un —catyí ra naha.

³⁸ Tan jiñi cruu nu nyaá ra Jesús nyaá iin tsa tyaa ra Pilato tsihin sahan griego, sahan latín, tan sahan hebreo. Tyehen caahán letra can: “Juvín ra ihya cuví Rey cuenda nyivi ñuu Israel” —catyí letra can.

³⁹ Tan iin ra tsa iyó cuatyí tsa nyaá nu cruu xiin ra Jesús, quitsaha caahán nyaá ra tsi ra:

—Tatun nditsa tyin ra Cristo cuví un, jacacu tsi un. Tan jacacu ndihĩ tsi nyuhu —catyí ra can.

⁴⁰ Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juvin ñi tundoho tsa taahán ra ihya, tan taahán un vityin. ⁴¹ Maa yo nyehé yo tundoho maa tyin iyó cuatyí yo. Tan ra ihya nduve cuatyí ra iyó —catyí ra can.

⁴² Tacan tan catyí ra can tsihin ra Jesús:

—Yooho Jesús, nducuhun iñi tsi yu quivi cundaca ñaha un —catyí ra.

⁴³ Tacan tan ra Jesús nacahán ra tsihin ra tan catyí ra:

—Tsa nditsa caahán yu tsihin un tyin juvin ñi vityin tan cua cunyaa un tsihin yu nda paraíso [nu yucú añima nyivi tsinú iñi tsi Nyoo] —catyí ra Jesús tsihin ra.

Nu tsihi ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tacan tan cuhva ora quitsahā ndunaā nu űuhu űayivi, nda cuanda caa uñi tsa tseñi.

⁴⁵ Tyin ndunaā űicanyii. Tan jahma tsa ticaā tsitsi vehe űuhu cahnu, ndata sava tsi.

⁴⁶ Tacan tan canā tsaā ra Jesús tan catyi ra: —Tyatya, Jutu yu, tyaa cuenda yu añima yu ndaha un —catyi ra.

Tan cuhva tsa cañan ra tacan, tan tsihi ra.

⁴⁷ Tan ra cavi capitān cuenda andaru can naha ra, nyehe ra tandihi tsa cavi. Tan jacahnu ra tsi Nyoo, tan catyi ra:

—Nduve tsa cuii cuatyí ra ihya tsicoo —catyi ra.

⁴⁸ Tan tandihi nyivi tsa nyecú ican, nyehe ñi tsa cavi. Tan cuahán ñi tan quitsahā cañi ndaha ñi yiqui nyica ñi. Tyin tsitó ñi tyin ña vaha tsa javahā ñi tsihin ra Jesús. ⁴⁹ Tan tandihi nyivi tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehe ñi tandihi tsa cavi can.

Nu cua cutsi ra naha tsi ra Jesús

(Mt. 27:57-61; Mr. 15:42-47; Jn. 19:38-42)

⁵⁰ Tan iyó iin ra vaha, nañi ra José. ra űuu Arimatea tsa canyii Judea. Tan cavi ra iin ra cavi ityi nuu cuenda Junta Cahnu nyivi Israel. ⁵¹ Tan ra José can ndatú ra quivi tsa cua cundaca ñaha Nyoo. Tan ña ndoo ra vaha tsihin tsa javahā ra cutahán tsihin ra, ra cavi jutu tsa cavi ityi nuu naha ra.

⁵² Tacan tan tsahan ra José can tsindacan ra cuñu űuhu ra Jesús tsi ra Pilato. ⁵³ Tan yaha tsa janyu ra José can cuñu űuhu ra Jesús nu cruu, cava nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsa tsa cavi yavi yuu tsa javahā nyivi tan ñaha ca quihvi ndiyi tsitsi can. ⁵⁴ Tan viernes cavi can, quivi tsa janduvahā nyivi tsa catsi ñi tsa sabaru, quivi quitatú ñi. Tan tsa cua tahan tsi quivi can.

⁵⁵ Tan tandihi ñiñaha tsa quee tsihin ra Jesús Galilea, cuahán ñi cua nyehe ñi tsitsi yavi yuu can. Tan nyehe ñi cuhva canyii cuñu űuhu ra. ⁵⁶ Tan cuanuhu ñi nda yuvehe ñi. Tan janduvahā ñi ndutya tami tyin cua tyihi ñi cuñu űuhu ra Jesús. Tacan tan quitatú ñi inga quivi can tumaa catyi maa tuhun tsa tsahā cuenda Nyoo tsi yo.

24

Nu nandoto ra Jesús

(Mt. 28:1-10; Mr. 16:1-8; Jn. 20:1-10)

¹ Tsa tuví tumingu quivi nu quitsahā vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvahā ñi.

² Tan cuhva tsa tsaā ñi, nyehe ñi tyin tsa cuatsiyo yuu tsa ndasí yuhu ñaña can. ³ Tan quihvi ñi tsitsi ñaña can, maa tyin ña nañihi ñi cuñu űuhu Jutu Mañi yo Jesús. ⁴ Tan yucú ñi tsihin tsa yuuhvi ñi. Tan ña tsitó ñi náa

cua javaha ñi. Tan sana iñi ñi quituví uvi taahan rayii nuu ñi. Tan xiñu xaan jahma nditsi ra naha. ⁵ Tan tsihin tsa yuuhvi ñi, tan tsaquin ñi jiñi ñi nda nu űuhu. Tacan tan catyi ra can naha ra tsihin ñi:

—¿Nacuenda nanducú ndo tsi ra nyito nu yucú ndiyi? ⁶ Nduve ca ra nyii ihya, tyin tsa nandoto ra. Nducuhun iñi ndo tsa cañan ra tsihin ndo quivi tsica ra Galilea. ⁷ Catyi ra tyin taahán tsi nacuhva cuenda nyivi tsi ra ndaha ra iyó cuatyí naha ra. Tyin cavi ra Rayii tsa quee nda gloria. Tan taahán tsi tyin cañi ra can naha ra tsi ra nu cruu. Maa tyin tsa tsinu uñi quivi cua nandoto ra. Tacan catyi ra tsihin ndo —catyi ángel can naha ra tsihin ñi.

⁸ Tacan tan nducuhun iñi ñi tsa cañan ra Jesús quivi can. ⁹ Tan cuanuhu ñi. Tan nacatyí tuhun ñi tsihin tsa utsi iin ra tsa tava tyiñu ra Jesús tan tsihin tandihi ca nyivi tsa tsinyicun tsi ra. ¹⁰ Tan ñiñaha tsa tsicatyí tuhun tsihin ra naha cavi ñi: ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha. ¹¹ Maa tyin ra tava tyiñu ra Jesús cuñi maa ra naha tyin caahán ñi maa ñi. Tan ña tsinú iñi ra naha tsa caahán ñi.

¹² Maa tyin ra Pedro nduvitá ra tan tsinú xaan ra cuahán ra cua nyehe ra tsitsi ñaña nu tinyii ra naha ra Jesús tatun nditsa. Tan nyehe ra tsitsi yavi yuu can tyin jahma tsa tsindasí ña ra canyii nda sava. Tacan tan cuanuhu ra yuvehe nu yucú tandihi ca ra naha. Tan iyo xaan cuñi ra tsa cavi.

Tsa cavi ityi cuahán űuu Emaús
(Mr. 16:12-13)

¹³ Juvín ñi maa quivi can, uvi taahan ra tsinyicun tsi ra Jesús cuahán ra naha űuu Emaús, tumaa utsi iin kilómetro tsa quee yo űuu Jerusalén. ¹⁴ Tan cuahán ra naha tan natuhún tahan ra naha náa ndihi tsa cavi. ¹⁵ Tan tsitsi tsa natuhún ra naha, tan ra Jesús tahan ra tsi ra naha ityi cuahán ra naha. ¹⁶ Maa tyin vasu nyehe ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cavi nacoto ra naha tsi ra Jesús. ¹⁷ Tacan tan nducú tuhun ra Jesús tsi ra naha:

—¿Náa natuhún xaan ndo? ¿Nacuenda cui-ihya xaan cuñi ndo? —catyi ra tsihin ra naha.

¹⁸ Tan iin ra tsa nañi Cleofas nacahān ra tan catyi ra:

—Tandihi nyivi tsitó tsa cavi űuu Jerusalén. ¿A ra inga űuu cavi yoocho tyin ña tsito un tsa cavi? —catyi ra.

¹⁹ Tacan tan catyi ra Jesús tsihin ra naha:

—¿Náa cavi?

Tan nacatyí tuhun ra naha tsihin ra:

—Tuhun ra Jesús ra űuu Nazaret. Tyin cavi ra iin ra cavi ndusu yuhu Nyoo. Tan

tsihin tunyee ifi cahnu Nyoo javahā ra tsa cahnu tan caḥan ra tsa vaha nuu Nyoo tan nuu tandiḥi nyivi. ²⁰ Maa tyin ra jutu tsa cuví ityi nuu naha ra tan ra cumí tyiñu cuenda vehe ñuhu, tsahā cuenda ra naha tsi ra tsi ra ndacá ñaha cuenda ñuu Roma. Tan tsahñi ra naha tsi ra. Tan tsihi ra nu cruu. ²¹ Tan vityin tsa quitā uñi quivi tsa cuví yacan. Tan nyuhu cuñi maa ndi tyin juvin ra cua jacacu tsi yo tsa cuví yo nyivi Israel. ²² Maa tyin vityin iyo xaan cuñi ndi tsa nacatyí juhva ñiñaha tsihin ndi. Tyin maa ñi tsahan ñi nu ñaña ra tsa tuvi. ²³ Tan nduve ca cuñu ñuhu ra canyíi. Tan nacatyí tuhun ndiḥi ñi tyin nyehe ñi uvi taahan ángel. Tan catyí ángel can naha ra tsihin ñi tyin ra Jesús nyito ra. ²⁴ Yaha yacan tan tsahan tucu juhva ra cutahán tsihin ndi tsinyeḥe ra naha nu ñaña. Tan nyehe ra naha tyin tsa nditsa cuví tsa caḥan ñiñaha can. Maa tyin ña nyehe ra naha tsi ra Jesús —catyí ra naha tsihin ra Jesús.

²⁵ Tacan tan catyí ra Jesús tsihin ra naha: —Luxu xaan cutuñi ifi ndo. Tan cuee xaan tan tsinu ifi ndo tuhun tsa caḥan ra cuví ndusu yuhu Nyoo taḥan tsanaha. ²⁶ ¿A ña tsitó ndo tyin taahán tsi tsa nyehe jihna ra Cristo tundoho? Yaha can tan tahan tsi cua ñiñi ra tyiñu tsa cua cundaca ñaha ra —catyí ra Jesús tsihin ra naha.

²⁷ Tacan tan quitsahā tsahā cuenda ra nácaa cuahán tuhun maa ra nu tutu Nyoo. Tan quitsahā caahán ra tuhun tsa tyaa ra Moisés taḥan tsanaha. Tan yaha can tan caḥan ra tuhun tandiḥi libru tsa tyaa ra cuví ndusu yuhu Nyoo.

²⁸ Tan cuhva tsa tsaq ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra. ²⁹ Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndqo tsihin ndi tyin tsa cua cuiso ñicanyii —catyí ra naha.

Tacan tan cuahán ra Jesús tsihin ra naha. ³⁰ Tan cuhva tsa tsinyaa ra yuhu mesa tsihin ra naha, quihín ra paan. Tan tsahā ra tyahvi nyoo tsi Nyoo. Tan tsahnū sava ra, tan tsahā ra tsi ra naha. ³¹ Tan iin yaha ñi nuñā nuu ra naha tan nacoto ra naha tsi ra Jesús. Maa tyin ra Jesús naa ihñi ñi ra. ³² Tacan tan quitsahā natuhún tahan ra naha tan catyí ra naha:

—Yacan cuenda vaha xaan cuñi añima yo tsa vatsí ra tsihin yo, tan tsahā cuenda ra tuhun Nyoo tsa nyaá nu tutu Nyoo tsi yo —catyí ra naha.

³³ Ña ndatu ca ra naha, tan cuanuhū ra naha nda ñuu Jerusalén. Tan ñihí tahan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha. ³⁴ Tacan tan tsa utsi iin ra can

naha ra nacatyí tuhun ra naha tsihin ra tsa ndi tsaá can naha ra:

—Nditsa tyin Jutu Mañi yo nandoto ra. Tyin ra Simón nyehe ra tsi ra —catyí ra naha.

³⁵ Tacan tan ra tsa ndi tsaá can nacatyí tuhun ndiḥi ra naha nácaa natuhún ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnū sava ra paan.

Nu quituvi ra Jesús nu yucú ra tsicā tsihin ra

(Mt. 28.16-20; Mr. 16.14-18; Jn. 20. 19-23)

³⁶ Ndi natuhún ca ra naha yacan tan quituvi ra Jesús tyañu ra naha. Tan tsahā ra nacumi tsi ra naha, tan catyí ra:

—Na coo tsa vaha añima ndo.

³⁷ Tacan tan nayuhvi xaan ra naha. Tan cuñi ra naha tyin tatyí ndiyi cuví can.

³⁸ Tacan tan catyí ra Jesús tsihin ra naha:

—¿Nacuenda yuuhvi xaan ndo? ¿Tan nacuenta tsicá xaan ifi ndo? ³⁹ Nyehe ndo ndaha yu. Tan nyehe ndo tsaha yu. Tyin juvin ñi maa yu cuví. Tñin ndo tsi yu tan coto ndo. Tyin tatyí ndiyi nduve cuñu ñuhu can iyó. Tan nduve yiqui can tumaa tsa nyehe ndo tsi yuhu —catyí ra Jesús.

⁴⁰ Tan cuhva tsa caḥan ra yacan, tan janahā ra ndaha ra tsihin tsaha ra tsi ra naha. ⁴¹ Maa tyin maa ra naha, tsa cuenda tsa iyo cuñi ra naha tan si cuñi ra naha, nda cuenda ña cuví ca tsinú vaha ifi ra naha. Yacan nacahān ra Jesús tsihin ra naha:

—¿A iyó tsa catsi yo? —catyí ra.

⁴² Tacan tan tsahā ra naha luxu tyaca tyi-hyo tsihin ndutya ñuñu tsi ra. ⁴³ Tan quihín ra. Tan quitsahā tsatsí ra nu nyecú ra naha.

⁴⁴ Tan catyí ra tsihin ra naha:

—Tandiḥi tsa taḥan yu, yacan cuví tsa catyí yu tsihin ndo quivi can. Tan catyí yu tsihin ndo tyin tacan cua cuví, tumaa cuhva nyaá tuhun tsa tyaa ra Moisés tan ra cuví ndusu yuhu Nyoo tan tsihin tsa nyaá nu libru salmo —catyí ra tsihin ra naha.

⁴⁵ Tacan tan tsahā cuenda ra Jesús cuhva catyí nu tutu Nyoo. Tan cutuñi ifi tandiḥi ra naha jahā ra. ⁴⁶ Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cúu ra Cristo. Tan tsa tsinu uñi quivi cua nandoto ra. ⁴⁷ Tan taahán tsi coto nyivi tuhun ra Cristo, tyin tatun ndu uvi ifi ñi cuatyí ñi, cua coo tucahnū ifi tsi ñi. Tan jihna ñi cua caḥan ra naha tsihin sivi ra Cristo ñuu Jerusalén, yaha can tan tandiḥi ca ñuu taniñ cahnu nu ñuhu ñayivi.

⁴⁸ Tan catyí tucu ra Jesús tsihin ra naha:

—Tan nyooḥo cuví tsandaa tsa cuenda tandiḥi tsehe. ⁴⁹ Tan cua jaquitsi maa yu Tatyí Ii Nyoo siqui ndo tumaa tsa catyí Jutu yu tyin cuhva ra tsi ndo. Maa tyin ndqo

ndo Jerusalén ihya. Tan ña quita ndo nda cuanda tsa ñihi ndo tunyee iñi Nyoo tsa cua quitsi tsi ndo —catyí ra Jesús.

Nu cuanuhu ra Jesús gloria
(Mr. 16.19-20)

⁵⁰ Tacan tan ra Jesús cuahán ra tsihin tandihi ra tsica tsihin ra nda ñuu Betania. Tan cañihí ra ndaha ra. Tan nasoco ra tsi ra naha. ⁵¹ Tan tsitsi tsa nasoco ra tsi ra naha, nandaá ra andivi. ⁵² Tacan tan tandihi ra naha quitsaha jacahnú ra naha tsi ra. Tan sii xaan cuñí ra naha, cuanuhu ra naha nda ñuu Jerusalén. ⁵³ Tan tandihi quivi tsiyucu ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuvi tsi tacan ñi.

Tuhun Nyoo tsa Tyaa Ra Juan

Tuhun tsa Caahán Nyoo nanduví tsi iin rayíi, tan rayíi can cuví ra Cristo

¹ Nda quiví jihna ñi, nda ndi cumañi ca coo tandihí tsa iyó, tan tsa iyó maa ra cuví Tuhun tsa Caahán Nyoo. Nyíi ra tsihin Nyoo. Tan Nyoo cuví ra. ² Tan iyó ra tsihin Nyoo nda quiví jihna ñi. ³ Tan tsihin ra, javahá Nyoo tandihí cuíi maa tsa iyó. Tan nduve tsa javahá Nyoo tsa intuhun ñi maa ra. ⁴ Ra tsa cuví Tuhun tsa Caahán Nyoo iyó ñayívi nyito tsa ña cua naa maa tsi ra. Tan juvin ñayívi can, cuví ñuhú tsa jandunditsín añima nyívi. ⁵ Tan ñuhú can, jandunditsín tsi nu naa. Tan tsa naa can ña cuví jandahva can ñuhú nditsin can.

⁶ Tsiocoq iin ra tsa jaquitsí Nyoo, nañi ra Juan. ⁷ Quitsí ra cuví ra tsa ndaa. Tyin cahán ra tumañi iñi cuenda ra cuví ñuhú can, tyin tacan tan tsinu iñi tandihí nyívi tsi ra. ⁸ Ra Juan, ñavin ñuhú can cuví ra. Iin tsa ndaa cuenda ra cuví ñuhú can cuví ra. ⁹ Tyin ñuhú nditsa can, ndi cua quitsí tsi nu ñuhú ñayívi, tan cua jandunditsín tsi añima tandihí nyívi tsa iyó nu ñuhú ñayívi ihya.

¹⁰ Ra cuví Tuhun tsa Caahán Nyoo quitsí ra nu ñuhú ñayívi. Tan juvin ñi maa ra tsihin Jutu ra javahá ra naha ñuhú ñayívi. Maa tyin nyívi iyó nu ñuhú ñayívi ihya, ña nacotó ñi tsi ra tsa ra Cristo cuví ra. ¹¹ Quitsí ra nu iyó nyívi ñuu ra, nyívi Israel, tan ña naquihín vaha ñi tsi ra. ¹² Maa tyin tandihí nyívi tsa naquihín vaha tsi ra, tan tsinú iñi ñi tyin ra Cristo cuví ra, tsahá ra ndatu tsi ñi tsa cuví ñi sehe Nyoo. ¹³ Juvin ñi nacacú tsaa. Maa tyin ñavin tumaa tsa cacú ñi tsa culeq ñi cuenda cuñi ñuhú ñi. Tan ndi ñavin tsa cuenda tsa cuñi iin rayíi coo ra tsihin iin ñaha. Ñavin tsa cuenda tsa cuñi nyívi coo sehe ñi. Maa tyin nacacú tsaa ñi jahá maa Nyoo.

¹⁴ Tan ra cuví Tuhun tsa Caahán Nyoo nanduví ra iin rayíi. Tan tsiocoq ra tsihin yo. Tan nyehé ndi tsa cahnu cuví ra. Tan cahnu cuví ra tyin Sehe mañi Jutu Nyoo cuví tsi ra. Tsiṭu ra tsihin tsa nditsa tan tsa vaha. ¹⁵ Tan ra Juan can cahán ra tumañi iñi tsa cuenda ra, tan catyí ra:

—Juvín ra ihya cuví ra tsa cahán yu tuhun quiví can, tyin ra tsa vatsí ityí tsata yu, cahnu ca cuví ra tan ñavin ca maa yu. Tyin nda quiví cacú yu tan tsa iyó maa ra —catyí ra Juan.

¹⁶ Tandihí yo naquihín yo tumañi iñi cahnu tsa tsahá ra tsi yo, tyin nasocó xaan ra tsi yo. ¹⁷ Ra Moisés tsahá cuenda ra ley Nyoo tsi yo. Maa tyin ra Jesucristo tsahá ra tsa naquihín yo tsa vaha Nyoo. Tan caahán

ra tsa nditsa tsihin yo. ¹⁸ Tan nduve maa yóo nyehé tsi Nyoo. Intuhun ñi maa Sehe mañi maa ra tsa iyó iin caa ñi tsihin ra nyehé tsi ra. Juvín ra cuví ra tsa tsahá tsa coto yo tsi Jutu ra.

Nu caahán ra Juan, ra jacoondutyá, tumañi iñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹ Ra cuví ityí nuu tsihin nyívi Israel tsa iyó ñuu Jerusalén, tava tyiñu ra naha tsi ra jutu naha ra tsihin inga ca ra cuenda vehe ñuhú naha ra, ra cuví tata ra Leví, na cuhun ra naha nu nyíi ra Juan tan ndaca tuhun ra naha tsi ra yóo ra cuví ra. ²⁰ Tan tsicá tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua jaquitsí Nyoo cuví yu —catyí ra tan ña tyihí xeehe ra.

²¹ Tacan tan tsicá tuhun nyico ra naha tsi ra Juan:

—¿Yóo ra cuví un? ¿A ra Elías, ra cuví ndusu yuhu Nyoo tahañ tsanaha cuví un? —catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihí ca ra naha tsicá tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quitsí cuví un?

Tan nacahan nyico ra Juan tan catyí ra:

—Ñavin.

²² Tan tsicá tuhun nyico ra naha tsi ra Juan inga tsaha:

—¿Yóo ra cuví un? Tyin cuñi tsi catyí tuhun ndi tsihin ra tsa tava tyiñu tsi ndi yóo ra cuví un —catyí ra naha tsihin ra.

²³ Tan nacahan ra Juan:

—Yuhu cuví ndusu iin ra tsa cana tsaa nu tsiqui, tsa catyí: “Nuña ndo tsitsi añima ndo tyin tsa vatsí Jutu Mañi yo.” Tumaa cahán ra Isaías ra cuví ndusu yuhu Nyoo tuhun yu tahañ tsanaha —catyí ra Juan tsihin ra naha.

²⁴ Ra fariseo naha ra cuví ra tava tyiñu tsi ra can naha ra, na ndaca tuhun ra naha tsi ra Juan. ²⁵ Tan tsicá tuhun nyico ra naha tsi ra:

—Tatun ñavin ra Cristo, ra tsa cua jaquitsí Nyoo cuví un, ¿nacuví tyin jacoondutyá un tsi nyívi? tan ndi ñavin ra Elías cuví un, tan ndi ñavin ra cuví ndusu yuhu Nyoo cuví un —catyí ra naha tsihin ra Juan.

²⁶ Tan nacahan ra Juan tan catyí ra:

—Yuhu jacoondutyá yu tsi nyívi tsihin ndutya. Maa tyin mahñu ndo nyíi iin ra tsa ña nacotó ndo. ²⁷ Tan cahnu ca cuví ra can tan ñavin ca yuhu. Ña cahnu cuví yuhu ndi tsa cuví yu musu ra tan cuvi ndatsi yu ñi nditsan ra —catyí ra Juan.

²⁸ Tandihí yacan cuví nu nañí Betábara tsa canyí inga tsiyo yutya cahnu Jordán nu tsinyí ra Juan jacoondutya ra.

Ra Jesucristo, Mbee Ticatyí Luhlu jana Nyoo

²⁹ Tsa inga quívi nyehe ra Juan tsi ra Jesús cuahán ra nu nyí ra, tacan tan catyí ra Juan:

—Nyehe jihna ndo, ra ihya cuví Mbee Ticatyí Luhlu jana Nyoo ra tsa quihín nyaa cuatyí nyívi iyó nu ñuhu ñayívi ihya.

³⁰ Tuhun ra cahan yu quívi catyí yu tsihin ndo tyin ityí tsata yu vatsi inga ra tsa cahnu ca cuví tan ñavin ca maa yu, tyin tsa iyó maa ra tan tsicoq yu. ³¹ Ndi yuhu tan ña nacoto yu tsi ra quívi can. Maa tyin vityin vatsi yu jacoondutya yu tsihin ndutya tyin tacan tan nacoto nyívi Israel ñuu yu tsi ra —catyí ra Juan.

³² Tan catyí nyico ra Juan:

—Yuhu nyehe yu Tatyí Ii Nyoo tsa quitsi ityí andívi tan quitsi tsi tumaa iin paloma, tan ndoo tsi tsihin ra. ³³ Yuhu ñaha ca nacoto yu yóo ra cuví ra quívi can. Maa tyin Nyoo, ra tsa tava tyíñu tsi yu jacoondutya yu tsi nyívi tsihin ndutya, catyí ra tsihin yu: “Quívi nyehe un Tatyí Ii, vatsi nuú tsi siquí iin rayí, tan ndoo tsi tsihin ra, juvin ra can cuví ra tsa ca yu jacoondutya tsi nyívi tsihin Tatyí Ii yu”, catyí Nyoo tsihin yu. ³⁴ Yuhu tsa yahá nyehe yu tsi ra. Tan cuví yu tsa ndaa tyin juvin ra cuví Sehe Nyoo —catyí ra Juan.

Ra tsa quitsahá nyicún jihna tsi ra Jesús

³⁵ Tsa inga quívi nyívi nyico ra Juan nu nyí ra tan yucú ndihí uvi taahan ra tsicá tsihin ra. ³⁶ Tan nyehe ra naha, yahá ra Jesús, tan catyí ra Juan:

—Nyehe jihna ndo, ra ican cuví Mbee Ticatyí Luhlu jana Nyoo —catyí ra.

³⁷ Tsa tsiñí nduvi taahan ra nyicún tsi ra Juan tsa cahan ra, tacan tan cuahan ra naha cuanyicun ra naha tsi ra Jesús. ³⁸ Tacan tan nanyehe ra Jesús ityí tsata ra, tan nyehe ra tyin nyicún ra naha tsi ra, tan catyí ra:

—¿Náa nanducú ndo?

Tacan tan nacahan ra naha tan catyí ra naha:

—Maestro, ¿numaa iyó un?

³⁹ Tan catyí ra Jesús tsihin ra naha:

—Cohon ndo tsihin yu, tan nyehe ndo —catyí ra tsihin ra naha.

Tacan tan cuahán ra naha tsihin ra. Tan nyehe ra naha nu iyó ra. Tan ican yucu ra naha tan cuaa, tyin tsaá ra naha ndacan tumaa caa cumi tsa tseñi.

⁴⁰ Iin ra tsa tsiñí tsa cahan ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro. ⁴¹ Tan ra Andrés numi xaan tsinanducú ra tsi yañi ra, ra Simón Pedro, tan catyí ra tsihin ra:

—Nañihí ndi tsi ra tsa cuví Mesías —catyí ra.

Tan tuhun Mesías can cuñí tsi catyí, ra Cristo, o cuñí tucu tsi catyí, ra tsa nacatsi vaha Nyoo tyin quitsi ra cuví ra rey tsa cuenda yo.

⁴² Tacan tan quihín ra Andrés tsi ra Simón yañi ra cuahán tsihin ra nu nyí ra Jesús. Tsa nyehe ra Jesús tsi ra Simón, tan catyí ra tsihin ra:

—Yooho Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñí tsi catyí tsi “Pedro”, tan tsa nduvi sivi can, cuñí tsi catyí tsi “cava”, [tumaa iin yuu cahnu].

Nu cana ra Jesús tsi ra Felipe tan ra Natanael

⁴³ Tsa inga quívi tyaa ra Jesús cuhva tsa cuhun ra Galilea. Tacan tan nañihí ra tsi ra Felipe. Tan catyí ra tsihin ra:

—Naha quitsi nyicun un tsi yu —catyí ra.

⁴⁴ Ra Felipe ihya, ra ñuu Betsaida cuví ra. Tan ican iyó tucu ra Andrés tan ra Pedro.

⁴⁵ Tacan tan tsañan ra Felipe tsinanducú ra tsi ra Natanael. Tan catyí ra tsihin ra:

—Nyehe ndi tsi ra tsa tyaa ra Moisés tuhun nu libru ley Nyoo, ra tsa cahan tucu ra cuví ndusu yuhu Nyoo tuhun tahañ tsanaha. Tan nañi ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

⁴⁶ Tan catyí ra Natanael:

—¿A cuví quita tsa vaha ñuu Nazaret can? —catyí ra tsihin ra Felipe.

Tan nacahan ra Felipe tan catyí ra:

—Naha tan nyehe un —catyí ra.

⁴⁷ Tacan tan tsa cua cuyatyin ra Natanael nu nyí ra Jesús. Tan nanyehe ra Jesús tyin vatsi ra, tan quitsahá catyí ra:

—¡Jihna ndo! Ihya vatsi iin ra tsa nditsa nditsa tyin ra ñuu Israel cuví ra, tyin ña tuhvá ra jandaví ñaha —catyí ra Jesús.

⁴⁸ Tacan tan tsicá tuhun ra Natanael tsi ra:

—¿Nacaa tsa tsitó un tsi yuhu?

Tan nacahan ra Jesús tan catyí ra:

—Yuhu tsa nyehe maa yu tsi un tsa ndi cumañi ca cana ra Felipe tsi un, tsa ndi nyí un tsa yutun higo can —catyí ra Jesús tsihin ra.

⁴⁹ Tacan tan quitsahá catyí ra Natanael:

—Jutu Mañi yu, yooho cuví Sehe Nyoo. Tan juvin un cuví rey cuenda nyuhu tsa cuví yo nyívi Israel.

⁵⁰ Tan catyí ra Jesús tsihin ra Natanael:

—¿A tsinú iñi un tsi yu tsa cuenda tyin catyí yu tyin nyehe yu tsi un tsa yutun higo? Maa tyin nahnu ca tsa cua nyehe un tan ñavin ca yacan —catyí ra tsihin ra.

⁵¹ Tan catyí ra Jesús tsihin ra naha:

—Tsa nditsa catyí yu tsihin ndo tyin nyoo cua nyehe ndo cua nuña andívi tan cuaha xaan ángel Nyoo cua ndaa, tan cua

nuu ra naha siqui yuhu Rayii tsa quee nda gloria —catyí ra Jesús tsihin ra naha.

2

Nu iyó vico tindaha ñuu Caná iin ñuu tsa canyii Galilea

¹ Tsa yaha uñi quivi tan tsicoo iin vico tindaha ñuu Caná tsa canyii Galilea. Tan ican nyii sihi ra Jesús. ² Tan nyivi javaha vico can cana ndihi ñi tsi ra Jesús tan tsihin tandihi ra tsicá tsihin ra tyin cuhun ra naha. ³ Tacan tan cuahán ra naha. Tan tsitsi tsa yucú ra naha nu iyó vico can, tan ndihi vinu ñi javaha vico can. Tacan tan catyí sihi ra Jesús tsihin ra:

—Nduve ca vinu ñi —catyí ña.

⁴ Tan catyí ra Jesús tsihin ña:

—¿Náa tsa ndihi iñi yo yacan, Miyan? Tyin ñaha ca tsaa hora yu —catyí ra tsihin ña.

⁵ Maa tyin sihi ra cahan ña tsihin ra tsa tyihí mesa nu iyó vico can naha ra:

—Javaha nyooho tandihi tsa cua cahan ra tsihin ndo —catyí ña tsihin ra naha.

⁶ Tan nyecú iñu quisi yuu nahnu tsa yihí ndutya tsa tuhvá ra Israel naha ra tsatyíñu nu nacatyá xaan ra naha ndaha ra naha cuhva tsa iyó maa ra naha. Tan intuhun intuhun quisi can tsitahan uvi xico utsi, a uñi xico utsi, litru ndutya tsitsi can. ⁷ Tacan tan catyí ra Jesús tsihin ra tsa tyihí mesa can naha ra:

—Jacutu ndo quisi ihya tsihin ndutya —catyí ra tsihin ra naha.

Tacan tan tsity cuí quisi can jahá ra naha.

⁸ Tacan tan catyí ra Jesús tsihin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihya —catyí ra Jesús tsihin ra naha.

Tan tacan ica ra naha. ⁹ Ra cuví ityi nuu cuenda vico can tsihi ra naha ndutya tsa nanduví vinu. Maa tyin ña tsitó ra naha nu maa quee can. Maa ñi maa ra tsa tyihí mesa can naha ra tsitó, tyin maa ra naha tava ndutya can. Tacan tan ra cuví ityi nuu cuenda vico can cana ra tsi ra tsa tandaha can. ¹⁰ Tan catyí ra tsihin ra:

—Tandihí nyivi, jihna ca vinu vaha tuhvá ñi tava. Yaha can tan tatun tsa tsihi xaan nyivi, tacan tan tava ñi vinu ndaahvi. Maa tyin yooho tsicumí vaha un vinu vaha. Tan nda vityin tava un can —catyí ra tsihin ra.

¹¹ Tsa javaha ra Jesús ñuu Caná tsa canyii Galilea, yacan cuví tsa iyo tsa jihna ñi javaha ra tan janaha ra tsa cahnu cuví ra tsi nyivi. Tan ra tsicá tsihin ra tsinu iñi ra naha tsi ra tyin ra ican cuví ra tsa jaquitsj Nyoo.

¹² Tsa yaha yacan tan cuahán ra ñuu Capernaum tsihin sihi ra tan tsihin yafi ra. Tan cuahan ndihi ra tsicá tsihin ra. Tan ican tsiyucú ñi juhva quivi.

Nu jacunu ra Jesús tsi nyivi xicó nuquehe yuvehe ñuhu cahnu

(Mt. 21.12-13; Mr. 11.15-18; Lc. 19.45-46)

¹³ Tsa cua tahan tsi quivi vico pascua tsa jacahnú nyivi Israel. Yacan cuenda cuahán ra Jesús ñuu Jerusalén. ¹⁴ Tsa tsaa ra ñuu can, quihvi ra nuquehe vehe ñuhu cahnu, tan nyehe ra yucú cuaha nyivi xicó ñi nuquehe can. Yihí ñi xicó ñi indiqui, mbee ticatyí, tan paloma. Tan yucú ndihi tucu nyivi nasamá xuhun. ¹⁵ Tsa nyehe ra Jesús tandihi yacan, tacan tan javaha ra iin yoho. Tan tsihin yoho can jacunú ra tsi tandihi nyivi nuquehe vehe ñuhu iin cahnu ñi tsihin mbee tan tsihin indiqui jana ñi. Tan ñi nasamá xuhun can, jatucuatyi ra xuhun ñi nu ñuhu tan janduvá ra mesa ñi. ¹⁶ Tan catyí ra tsihin ñi xicó paloma:

—¡Tava ndo paloma can ihya! ¡Ña javaha ndo vehe Jutu yu tumaa iin nuyahvi! —catyí ra tsihin ñi.

¹⁷ Tacan tan ra tsicá tsihin ra, nducuhun iñi ra naha tsa catyí nu tutu Nyoo tyehen: “Cuiñu xaan yu vehe un”, catyí tsi, nducuhun iñi ra naha.

¹⁸ Tacan tan ra cuví ityi nuu tsihin nyivi Israel quitsaha tsicá tuhun ra naha tsi ra Jesús:

—¿Náa seña javaha un nyehe ndi tan janaha un tyin nditsa tsa tsaha Nyoo ndatu tsi un tsa javaha un yacan? —catyí ra naha tsihin ra.

¹⁹ Tan nacahan ra Jesús tan catyí ra:

—Caní ndo vehe ñuhu ihya, tan tsitsi tsa uñi quivi ñi tan cua janduvita nyico yu itsi inga tsaha —catyí ra tsihin ra naha.

²⁰ Tacan tan quitsaha catyí ra nyecú ican naha ra tsihin ra:

—Uvi xico iñu cuiya jahá tyiñu ra naha tan tsinu vehe ñuhu ihya. ¡Tan yooho catyí un tyin tsitsi tsa uñi quivi ñi tan cua janduvita un itsi inga tsaha! —catyí ra naha tsihin ra.

²¹ Maa tyin ñavin tuhun vehe ñuhu can cahan ra Jesús, tyin cahan ra tuhun cuñu ñuhu ra. ²² Yacan cuenda tandihi ra tsicá tsihin ra nducuhun iñi ra naha yacan quivi nandoto ra. Tan cutuñi iñi ra naha tyin tuhun tsa nyaá nuu tutu Nyoo caahán tsi cuenda ra Jesús. Tan tsinu iñi ra naha tsa cahan ra Jesús tan tsa nyaá nu tutu Nyoo.

Ra Jesús tsitó ra tsa iyó añima nyivi

²³ Tsitsi tsa ndi nyii ra Jesús ñuu Jerusalén, quivi iyó vico pascua, cuaha xaan nyivi quitsaha tsinu iñi tsa caahán ra tsa cuenda tsa cuaha tsa iyó javaha ra. ²⁴ Maa tyin ra Jesús ña ñi cuñi ra nyehé ra tsi tandihi ñi tyin tsitó ra cuhva tsicá iñi ñi. ²⁵ Ña tsiñiñuhú tsa nacatyí tuhun yo tsihin ra nácaa iyó nyivi, tyin tsa tsitó maa ra náa iyó tsitsi añima yo.

3

Nu jacuahq ra Jesús tsi ra Nicodemo

¹ Tsi coo iin ra cuví fariseo tsa nañi Nicodemo. Tan cuví ra iin ra cuví ityi nuu tsihin ra Israel naha ra. ² Ra Nicodemo ihya, tsahan ra nu nyi ra Jesús iin tsacuaa. Tan catyí ra tsihin ra:

—Maestro, tsitó ndi tyin Nyoo tava tyiñu tsi un tsa quitsi un jacuaa un tsi ndi. Tyin yofi nyivi tan cuví javaha ñi tsa iyo tsa javahá un, tatun nduve Nyoo iyó tsihin ñi —catyí ra tsihin ra Jesús.

³ Tacan tan catyí ra Jesús tsihin ra:

—Tsa nditsa catyí yu tsihin un tyin tatun ña cua nacacu tsaa nyivi inga tsaha, ña cua cuvi nyehe ñi nu ndacá ñaha Nyoo —catyí ra.

⁴ Tacan tan tsicá tuhun ra Nicodemo tsi ra Jesús tan catyí ra tsihin ra:

—¿Nacaa cuví cacu iin rayi inga tsaha tatun tsa tsahnu ra? ¿A cuví quihvi nyico ra tsitsi sihi ra tan nacacu tsaa ra inga tsaha? —catyí ra.

⁵ Nacahan ra Jesús tan catyí ra:

—Tsa nditsa catyí yu tsihin un tyin ñavin tsihin tsa cacu nyivi tsihin cuñu ñuhu ñi tan cuví quihvi ñi nu ndacá ñaha Nyoo. Maa tyin ñiñi xaan cuñi tsi nacacu tsaa ñi tsihin Tatyí Ii Nyoo. ⁶ Tyin nyivi cacu tsihin cuñu ñuhu, cuñu ñuhu ñi cuví ñi. Tan nyivi nacacu tsaa tsihin Tatyí Ii Nyoo, Tatyí Ii Nyoo iyó añima ñi. ⁷ Na cu iyo iñi un tsa caahán yu tsehe tsihin un tyin tandihi nyivi cuñi tsi nacacu tsaa ñi. ⁸ Tumaa tsa yihí tatyí tandihi ñi ityi tan tsiñi un cucayú vatsi tsi, maa tyin ña tsitó un numaa ityi quee tsi, tan ndáa ityi cuahán tsi; tacan cuví tandihi nyivi nacacu tsaa tsihin Tatyí Ii Nyoo —catyí ra Jesús tsihin ra.

⁹ Tacan tan nducu tuhun nyico ra Nicodemo tsi ra inga tsaha tan catyí ra:

—¿Nacuenda caahán un tacan? —catyí ra tsihin ra.

¹⁰ Nacahan ra Jesús tan catyí ra:

—Yooho tsa cuví un maestro cuenda nyivi Israel, taahán tsi coto un tsehe. ¹¹ Tsa nditsa catyí yu tsihin un tyin caahán ndi tsa tsitó ndi tan cuví ndi tsa ndaa tsa cuenda tsa nyehe ndi. Maa tyin nyooho ña tsinú iñi ndo tsa caahán ndi tsihin ndo. ¹² Tatun ña tsinú iñi ndo tsa caahán yu tuhun nu ñuhu ñayivi ihya tsihin ndo, ¿nacaa cua tsinu iñi ndo tatun cua cahan yu tuhun gloria tsihin ndo?

¹³ Yofi tsahan gloria tsinyehe nacaa iyó. Intuhun ñi maa yuhu Rayi tsa quee nda gloria nyehe yu nacaa iyó gloria, tyin ndacan quee yu. ¹⁴ Tumaa tsa ticaa ra Moisés iin coo tsa tsinu tsihin caa nu yutun iin nu tsiqui, tacan cua ticaa nyivi tsi yuhu Rayi tsa quee nda gloria nuu cruu. ¹⁵ Tacan tan tandihi

nyivi tsa tsinú iñi tsi yu, ña cua cunaa ñi. Tan cua coo ñi ñayivi nyito tsa ña cua naa maa.

Nyoo cuñi xaan ra tsi tandihi nyivi

¹⁶ Nyoo cuñi xaan ra tsi tandihi nyivi iyó nu ñuhu ñayivi. Yacan cuenda tsaha ra tsa cuu Sehe mañi ra nu cruu tsa cuenda ñi. Tyin tacan tan tandihi ñi tsa tsinú iñi tsi Sehe ra, ña cunaa ñi, tan coo ñi ñayivi nyito tsa ña cua naa maa. ¹⁷ Tyin Nyoo jaquitsi ra tsi Sehe ra nu ñuhu ñayivi tyin jacacu ra tsi nyivi, tan ña jaquitsi ra tsi ra tsa jacunaa ra tsi ñi.

¹⁸ Yacan cuenda nyivi tsa tsinú iñi tsi yu tsa cuví yu Sehe Nyoo ña cua cunaa ñi, maa tyin nyivi tsa ña tsinú iñi tsi yu, tsa cunaa ñi tyin ña tsinú iñi tsi yu tsa cuví yu Sehe mañi Nyoo. ¹⁹ Nyivi ña tsinú iñi, tsa cunaa ñi. Tyin quivi quitsi yu jandunditsin yu nu ñuhu ñayivi, ña naquihin cuenda ñi tsi yu tyin taahán xaan ca maa iñi maa ñi iyó ñi nu naa tyin maa ñi tsa ña vaha javahá ñi. ²⁰ Tandihi nyivi javahá tsa ña vaha, ña taahán iñi ñi coo ñi nu nditsin, tyin ña cuñi ñi tsa quituvi tsa ña vaha javahá ñi. ²¹ Maa tyin nyivi taahán iñi tsa nditsa, naquitá ñi nu nditsin tyin tacan tan nyehe nyivi tyin javahá ñi cuhva cuñi Nyoo tyin nyaá ra tsihin ñi —catyí ra Jesús.

Nu caahán ra Juan, ra jacoondutyá tsi nyivi, tuhun ra Jesús inga tsaha

²² Tsa yaha yacan, ra Jesús tan ra tsicá tsihin ra cuahán ra naha nu cuví Judea. Tan ndoo ra naha ican juhva quivi, tyin jacoondutyá ra naha tsi nyivi. ²³ Tacan tucu ra Juan nyi ra jacoondutyá ra tsi nyivi nu cuví Enón yatin ñi nu cuví Salim, tyin ican ñuhú cuaha ndutyá. Tan tsaa nyivi tan tsicoondutyá ñi. ²⁴ Yacan javahá ra Juan tsa ndi cumañi ca quihvi ra vehe caa.

²⁵ Tacan tan quitsahá caahán yuhu tahan juhva ra tsicá tsihin ra Juan tsihin inga ca ra naha tsa cuenda tsa janduvaha nyivi tsi ñi nuu Nyoo. ²⁶ Tacan tan cuahán ra naha nu nyi ra Juan. Tan catyí ra naha tsihin ra:

—Maestro, ra tsa tsinyi tsihin un inga tsiyo yutya cahnu Jordán, ra tsa cahan un tuhun tsihin ndi, vityin jacoondutyá ndihi ra tsi nyivi tan tandihi nyivi nyicun tsi ra —catyí ra naha tsihin ra.

²⁷ Tacan tan catyí ra Juan tsihin ra naha:

—Ndi intuhun yo tan nduve náa cuví javaha yo, tun tsatin ña tsahá Nyoo tunyee iñi ra tsi yo. ²⁸ Nyooho tsa tsitó maa ndo tyin ñavin yuhu cuví ra Cristo tyin tsiñi maa ndo tsa cahan yu quivi catyí catsi yu tyin ra jaquitsi Nyoo ityi nuu ra Cristo cuví yu. ²⁹ Tyin nu iyó vico tandaha, ra tsa nyaá xiin ñaha yoco can, juvin ra cuví ra cua tindaha tsihin ña. Tan ra vaha iñi tsi ra nyi ra ican. Tan cusí iñi ra tsiñi ra tsa caahán ra tsa cua tindaha. Tan tacan tucu yuhu, si cuñi yu

tyin naquihín nyivi tuhun caahán ra Jesús tan nyicún ñi tsi ra. ³⁰ Maa ra cuví ra cahnu ca cuví. Tan yuhu cua nduluhlu yu nuu ra tyin tacan taahán maa tsi.

Ra quee nda gloria tan quitsi ra nu ñuhu ñayivi

³¹ 'Ra tsa quee nda gloria, cahnu ca cuví ra tan ñavin ca tandihi nyivi. Tyin nyivi iyó nu ñuhu ñayivi ihya, cuenda nu ñuhu ñayivi cuví ñi. Tan caahán ñi tuhun tsa iyó nu ñuhu ñayivi. Maa tyin ra tsa quee nda gloria, cahnu cuví ra. ³² Tan caahán ra tsa nyehé ra tan tsa tsifí ra, maa tyin yofiñi tsiñi ñi tsa caahán ra. ³³ Tatun yoo tan tsinú ñi tsa caahán ra, cua cuví yo tsa ndaa tyin Nyoo ña vatya ra. ³⁴ Tyin ra tsa jaquitsi Nyoo, tuhun Nyoo caahán ra tyin Nyoo ña tyihí cuhva ra Tatyí li ra tan tsahá ra itsi tsi ra. Tsahá ra naní Tatyí li ra tsi ra. ³⁵ Nyoo Jutu yo cuñi ra tsi Sehe ra. Tan nacuhva cuenda ra tandihi maa tsi ra. ³⁶ Nyivi tsa tsinú ñi tsa caahán Sehe Nyoo, iyó ñi ñayivi nyito tsa ña cua naa maa. Maa tyin nyivi tsa ña cuñi tsinu ñi tsi ra, ña cua coo ñi ñayivi nyito. Tan cua tatsi tuñi Nyoo tsi ñi.

4

Nu natuhun ra Jesús tsihin iin ñaha Samaria

¹ Tsa tsito ra cuví fariseo naha ra tyin cuaha xaan ca nyivi nyicún tsi ra Jesús tan ñavin ca ra Juan. Tan cuaha xaan ñi tsi-coondutya. ² Maa tyin ñavin maa ra Jesús jacoondutya tsi ñi, tyin ra tsicá tsihin ra jacoondutya tsi ñi. ³ Tan quivi tsa tsito ra Jesús tyin tsito ra naha yacan, quee ra Judea can tan cuanuhu ra nda nu cuví Galilea.

⁴ Tsa cuahán ra, yaha ra nu cuví Samaria tyin cuñi tsi yaha ra ican. ⁵ Tacan tan tsaq ra iin ñuu tsa canyí Samaria tsa nañi Sicar yatyin ñi nu cuví ñuhu ra Jacob nu tsahá ra tsi ra José sehe ra. ⁶ Ican nyaá iin soco pila tsa catyí nyivi tyin tsii ra Jacob cuví. Tsa quita ra Jesús nu nyaá soco can tan tsinyaa ra yuhu soco can tyin tatu xaan ra tyin cañi xaan ityi tsica ra tan maa hora cuví. ⁷⁻⁸ Ra tsicá tsihin ra, yofiñi ra naha nyecú tsihin ra tyin cuahán ra naha tsitsi ñuu, cua jata ra naha tsa catsi ra naha. Juvín ñi cuhva can tan tsaq iin ñaha Samaria tyin cua tava ña ndutya tsitsi soco can. Tacan tan catyí ra Jesús tsihin ña:

—Cuhva luxu ndutya coho yu —catyí ra tsihin ña.

⁹ Tacan tan ñaha Samaria can catyí ña tsihin ra:

—Yoohe tsa cuví un iin ra ñuu Israel, ¿nacuvi tyin tsicán un ndutya coho un tsi yuhu tsa cuví yu ñaha Samaria? —catyí ña.

(Tacan catyí ña tyin nyivi Israel ña vaha iyó ñi tsihin nyivi Samaria.) ¹⁰ Tacan tan nacahan ra Jesús tan catyí ra:

—Tun tsatyin tsitó un tsa tsahá Nyoo, tan tsitó un yoo ra cuví ra tsicán ndutya tsi un, maa un cua ndacan ndutya tsi yu. Tan cua cuhva yu ndutya nyito tsi un —catyí ra tsihin ña.

¹¹ Tacan tan catyí ña tsihin ra:

—Tatta, cunu xaan soco ihya. ¿Nacaa tava tucu un ndutya cuhva un tsi yu? tan ndi nduve náa ndaha un ¿Nu maa cua quihin un ndutya nyito can cuhva un coho yu? ¹² Ra Jacob tsii tsahnu yo, nacoq ra soco ihya tsi ndi. Juvín ihya tsihi maa ra ndutya tan tsihin tandihi sehe ra. Tan juvín ñi ihya tsihi tucu quiti jana ra naha. ¿A cahnu ca ra cuví yoohe tan ñavin ca ra can? —catyí ña tsihin ra.

¹³ Tacan tan nacahan ra Jesús tan catyí ra tsihin ña:

—Tandhi nyivi tsihi ndutya ihya, cua na ityi nyico ñi ñi. ¹⁴ Maa tyin nyivi tsihi ndutya tsa tsahá yuhu, ña cua na ityi ca ñi ñi. Tyin ndutya tsa tsahá yuhu cua cana tsi tsitsi añaña ñi tumaa caná ndutya iin ndohyo, tyin iin ndohyo ña tuhva tsi ndoco. Tan tacan cua coo ñi ñayivi nyito —catyí ra tsihin ña.

¹⁵ Tacan tan quitsahá caahán ña tsihin ra:

—Yoohe tatta, cuhva ndutya can coho yu na ña na ityi ca ñi yu, tan ndi ña quitsi ca yu quitsi tava yu ndutya tsitsi soco ihya —catyí ña tsihin ra.

¹⁶ Tacan tan catyí ra Jesús tsihin ña:

—Cuaahan cua quihin yí un tan quitsi ndo —catyí ra tsihin ña.

¹⁷ Tan nacahan ña tan catyí ña:

—Nduve yí yu iyó.

Tacan tan catyí ra Jesús tsihin ña:

—Nditsa tsa caahán un, tyin nduve yí un iyó. ¹⁸ Tyin tsa uhun yí un tsicoq, tan ra cumí tsi un vityin ñavin yí un tsi ra. —catyí ra tsihin ña.

¹⁹ Tsa tsifí ña tsa cahan ra tacan, quitsahá catyí ña tsihin ra:

—Yoohe tatta, tuví ñi yu tyin ra cuví ndusu yuhu Nyoo cuví un. ²⁰ Tsii tsahnu ndi, ra ñuu ihya naha ra, jacahnu ra naha tsi Nyoo yucu ihya. Maa tyin nyoohe tsa cuví nyivi Israel catyí ndo tyin nda Jerusalén taahán tsi jacahnu yo tsi Nyoo —catyí ña tsihin ra.

²¹ Tacan tan nacahan ra Jesús tan catyí ra tsihin ña:

—Tsinu ñi tsa caahán yu tsihin un. Tyin vatsi hora tsa cua jacahnu ndo tsi Jutu yo Nyoo. Maa tyin ña tsifíñuhu ca tsa quitsi ndo yucu ihya, a cuhun ndo nda Jerusalén. ²² Nyoohe nyivi Samaria, ña tsitó ndo yoo jacahnu ndo. Maa tyin nyuhu tsitó ndi yoo jacahnu ndi. Tan tsitó ndi tyin ca jacacu

iin ra Israel tsi nyivi jaha Nyoo. ²³ Maa tyin cua tsaá hora, tan hora can iyó yo vityin tyin nyivi tsa nditsa jacahnú tsi Nyoo Jutu yo, cua jacahnu ñi tsi ra tsihin añima ñi tan tsihin tsa nditsa. Tumaa jaquihín ityi maa Tatyí li Nyoo tsi ñi. Tyin Nyoo Jutu yo tacan cuñi ra javaha ñi tsa jacahnú tsi ra. ²⁴ Tyin Nyoo Tatyí li cuví ra. Tan nyivi jacahnú tsi ra cuñi tsi jacahnú ñi tsi ra tsihin tsa nditsa tumaa jaquihín ityi maa Tatyí li tsi ñi —catyí ra tsihin ña.

²⁵ Tan nacahan ña tan catyí ña tsihin ra:

—Yuhu tsitó yu tyin cua quitsi ra cuví Mesías, ra Cristo, ra cuví rey tsi yo. Tan quívi quitsi ra, maa ra cua nacatyí tuhun tandíhi tsihin yo —catyí ña tsihin ra.

²⁶ Tacan tan nacahan ra Jesús tan catyí ra tsihin ña:

—Ra tsa caahán un tuhun can, juvin ra caahán tsihin un —catyí ra tsihin ña.

²⁷ Tacan tan tsaá nyico ra tsicá tsihin ra, tan iyo xaan cuñi ra naha tyin natuhún ra Jesús tsihin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñi ra, o ndaca tuhun ra naha tsi ra nacuenda natuhún ra tsihin ñaha can. ²⁸ Tacan tan nacoó ña quívi ña tan cuanuhu ña nda ñuu. Tan catyí ña tsihin nyivi:

²⁹ —Cohon ndo cunyehe ndo tsi iin ra tsa cahan tandíhi cuhva iyó yu. ¿A ñavin ra Cristo tsa cua jaquitsi Nyoo cuví ra? —catyí ña tsihin ñi.

³⁰ Tacan tan quitá nyívi ñuu can tan cuahán ñi cua nyehé ñi nu nyíi ra Jesús. ³¹ Tan tsa ndi cumañi ca tsaá ñi nu nyíi ra, ra tsicá tsihin ra, jañiñi ra naha tsi ra na catsi ra luxu. Tan catyí ra naha tsihin ra:

—Maestro, catsi luxu —catyí ra naha.

³² Maa tyin catyí ra Jesús tsihin ra naha:

—Yuhu iyó iin tsa tsatsi yu tan nyoocho ña tsitó ndo náa cuví can —catyí ra tsihin ra naha.

³³ Tacan tan ra tsicá tsihin ra, quitsahá natuhún tahan ra naha, tan catyí ra naha:

—¿A iyó yóo quítsi quítsi ndaca tsa catsi ra? —catyí ra naha.

³⁴ Maa tyin ra Jesús catyí ra tsihin ra naha:

—Tsa tsatsi yuhu juvin tsi cuví tsa javahá yu cuhva cuñi ra tsa jaquitsi tsi yu, tan javahá yu tyiñu tsaá ra tsi yu. ³⁵ Nyoocho catyí ndo: “Ndi cumañi cumi yoo ca tan tahan tsi naquihin vaha yo tsa tatsi yo.” Maa tyin yuhu catyí yu tsihin ndo: Nyehé ndo tyin tsa ndíhi tsa tatsi ndo cuaan tan tsa nyecú vaha tsi tsa cua naquihin vaha yo itsi. ³⁶ Ra tsa naquihin vaha can ñihí ra yahvi ra. Tan tsa naquihin vaha ra, cuví tsi nyívi tsa cua coo ñayívi nyito tsa ña cua naa maa. Tacan tan ra tsa tatsi tan ra tsa naquihin cusii iñi ra naha. ³⁷ Tan iyó iin cuhva tuhvá nyívi caahán tan catyí ñi tyin siin nyívi tatsi tan siin nyívi naquihin vaha. Tan nditsa

yacan. ³⁸ Yuhu jacuhun yu tsi ndo tyin cua cahnu ndo ñiñi tsa iyó nu ña jahá tyiñu ndo, nu jahá tyiñu inga ra. Tan nyoocho cucahnu ndo tan cua naquihin vaha ndo ñiñi can —catyí ra Jesús tsihin ra naha.

³⁹ Tan cuaha xaan nyívi ñuu Samaria can quitsahá tsinú iñi ñi tsi ra Jesús tsa cuenda tsa cahan ñaha can, tyin catyí ña: “Cahan ra tsihin yu tandíhi cuhva iyó yu”, catyí ña. ⁴⁰ Cuhva tsa tsaá ñi nu nyíi ra Jesús, tan cahan ndaahvi ñi tsihin ra na ndoo ra tsihin ñi. Tan ndoo ra tsihin ñi uvi quívi. ⁴¹ Tan cuaha ca nyívi quitsahá tsinú iñi ñi tsa tsiñi ñi tsa caahán ra. ⁴² Tacan tan quitsahá catyí ñi tsihin ñaha can:

—Vityin tsinú iñi ndi, maa tyin ñavin tsa cuenda tsa cahan un tsihin ndi, tyin tsiñi maa ndi tsihin soho ndi tsa caahán ra, tan tsitó vaha ndi tyin juvin ra cuví ra Cristo ra jacacú tsi nyívi iyó nu ñuhu ñayívi ihya —catyí ñi.

Nu janduvahá ra Jesús sehe iin ra cumi tyiñu

⁴³ Tsa yahá uvi quívi tan quee ra Jesús nu cuví Samaria tan cuahán ra ityi nu cuví Galilea, nu cacú ra. ⁴⁴ Vasu ndi maa juvin ñi maa ra cahan tyin iin ra cuví ndusu yuhu Nyoo, nyívi ñuu ra ña jahá ñi tsa ñayívi tsi ra. ⁴⁵ Tacan tan tsa tsaá ra Galilea, nyívi iyó ican, vaha caahán ñi tsihin ra, tyin tsahan ñi vico Jerusalén, tan nyehé ñi tsa vaha tsa javahá ra.

⁴⁶ Tacan tan cuanuhu nyico ra Jesús nda ñuu Caná tsa canyí Galilea nu nanduví ndutya vinu jahá ra. Tan iyó iin ra nyisó tyiñu cahnu nuu rey. Ra ican iyó iin sehe ra tsa cuuhvi nda ñuu Capernaum. ⁴⁷ Quívi tsa tsitó ra can tyin tsa tsaá nyico ra Jesús nda Galilea tsa tsahan ra nda Judea, tsahan ra tsinyehé ra tsi ra Jesús. Tan tsican ra tumañi iñi tsi ra na cahun ra vehe ra tan janduvaha ra tsi sehe ra, tyin tsa cuñi cúu cuíi ña sehe ra. ⁴⁸ Tacan tan catyí ra Jesús tsihin ra:

—Nyoocho ña cua tsinu iñi ndo tatun ña nyehé jihná ndo tsa iyo —catyí ra tsihin ra.

⁴⁹ Maa tyin ra can catyí ra tsihin ra Jesús:

—Yoocho taa, cohon ñi tsihin yu tsa ndi cumañi ca cúu sehe yu —catyí ra tsihin ra Jesús.

⁵⁰ Tacan tan catyí ra Jesús tsihin ra:

—Cuanuhu yuvehe un. Sehe un nyito ra, tsa nduvahá ra —catyí ra tsihin ra.

Tacan tan ra can tsinu iñi ra tsa cahan ra Jesús tan cuanuhu ra. ⁵¹ Tsa tsa cuyatyin ra yuvehe ra, quitá musu ra tan caahán ra naha tsihin ra:

—¡Taa, sehe un nyito ra; tsa nduvahá ra!

⁵² Tacan tan quitsahá tsicá tuhun ra tsi ra naha náa hora quitsahá vaha cuñi ra. Tan catyí ra naha tsihin ra:

—Icu cuhva caa iin tsa yaha hora quita cahñi tsi ra —catyí ra naha.

⁵³ Tacan tan tsito ra can, tyin hora can cahñan ra Jesús tsihin ra, “Cuanuhu tyin sehe un nyito ra, tsa nduvahá ra.” Tan maa ra can tsihin tandihi nyivi ra quitsahá tsinu iñi ñi tsi ra Jesús.

⁵⁴ Yacan cuví tsa iyo tsa tsinu uvi javahá ra Jesús tsa tsaá nyico ra Galilea tsa yaha tsahan ra Judea.

5

Nu janduvahá ra Jesús iin ra cuuhví

¹ Tsa yaha can tan cuahán ra Jesús ñuu Jerusalén inga tsaha tyin nyivi ñuu Israel jacahnú ñi iin vico. ² Tan yuhu cora cahnu ñuu can iyó iin yuvehe tsa nañi Yuvehe Cuenda Mbee Ticatyí. Tan yatyin ñi nyaá iin vehe cahnu. Tan tsitsi vehe can ñuhú ndutya. Tan tsa tsihin yuhu hebreo nañi vehe can Betesda. Tan iyó uhun corredor. ³ Tan ican yucú cuaha nyivi cuuhví: ñi cuaa, ñi coxo, tan ñi ndohó cuehe xii. Ndatú ñi náa hora nacanda ndutya can. ⁴ Tyin nda naha nda naha ñi tan nuú iin ángel tan jacandá ra ndutya can. Tan nyivi tsa quihví jihna tsa yaha ñi nacandá ndutya can, nduvahá ñi vasu ndi maa cuehe cahnu ndohó ñi. ⁵ Tan ican canyí iin ra cuuhví tan tsa iyó oco tsahun uñi cuiya cuuhví ra. ⁶ Tsa nyehe ra Jesús tsi ra ican canyí ra, tuví iñi ra tyin tsa cuaha xaan cuiya cuuhví ra. Tan tsica tuhun ra tsi ra ndaahvi can, tan catyí ra:

—¿A cuñi un nduvaha un?

⁷ Tan ra cuuhví can nacahan ra tan catyí ra:

—Tata, yoñi maa tyihí tsi yu tsitsi ndutya ihya tatun tsa nacandá tsi. Tyin tahán ñi tsaha tsa cuñi yu quihví yu, inga nyivi quihví jihna —catyí ra cuuhví can tsihin ra Jesús.

⁸ Tacan tan catyí ra Jesús tsihin ra:

—Nduvita, naquihin yuvi un tan caca un —catyí ra tsihin ra.

⁹ Juvin ñi hora can tan nduvahá ra, naquihin ra yuvi ra, tan nacaca ra. Maa tyin quivi quitatú nyivi cuví quivi can. ¹⁰ Yacan ra cuví ituy nuu tsihin nyivi Israel catyí ra naha tsihin ra tsa nduvahá can:

—Quivi quitatú yo cuví vityin, yacan cuenda ña taahán tsi cuiso un yuvi un —catyí ra naha tsihin ra.

¹¹ Tan ra tsa nduvahá can nacahan ra tan catyí ra:

—Ra tsa janduvahá tsi yu, catyí ra tsihin yu: “Naquihin yuvi un tan caca un”, catyí ra tsihin yu.

¹² Tacan tan quitsahá tsicá tuhun ra naha tsi ra, tan catyí ra naha:

—¿Yóo ra cahñan tsihin un tyin naquihin un yuvi un tan caca un? —catyí ra naha.

¹³ Maa tyin ra tsa nduvahá can ña tsitó ra yóo janduvahá tsi ra. Tyin cuaha xaan nyivi nyecú ican, tan ra Jesús nduve ca ra nyaá tyin tsa cuahán ra. ¹⁴ Yaha can tan nañihi ra Jesús tsi ra tsa nduvahá can tsitsi vehe ñuhu cahnu, tan catyí ra tsihin ra:

—Jihna, vityin tsa nduvahá un, ña javaha ca un tsa ña vaha, tyin coto quitsi inga tundoho cahnu ca siqui un —catyí ra tsihin ra.

¹⁵ Tacan tan tsahan ra tsicahan ra tsihin ra Israel naha ra tyin ra Jesús cuví ra janduvahá tsi ra. ¹⁶ Tsa cuenda tsa janduvahá ra Jesús tsi ra can quivi quitatú nyivi, xaan xaan cuñi ra Israel naha ra nyehe ra naha tsi ra. Tan cuñi ra naha cahñi ra naha tsi ra. ¹⁷ Maa tyin ra Jesús catyí ra tsihin ra naha:

—Maa Jutu yu, nda vityin tan jahá tyiñu ra. Tan jahá tyiñu tucu yuhu —catyí ra.

¹⁸ Tan tsa cuenda tsa cahñan ra yacan, xaan ca cuñi ra Israel can naha ra. Tan ñihi ca cuñi ra naha cahñi ra naha tsi ra tyin cuñi maa ra naha tyin ña jahá ra Jesús tsa cahnu cuví quivi quitatú nyivi, tan inga tucu tuhun, iin ñi cuví ra tsihin Nyoo jahá ra tsi ra tyin catyí ra tyin jutu ra cuví tsi Nyoo.

Sehe Nyoo iyó xaan ndatu tsi ra cundaca ñaha ra

¹⁹ Tacan tan catyí ra Jesús tsihin ra naha:

—Tsa nditsa caahán yu tsihin ndo tyin yuhu, Sehe Nyoo cuví tsi yu, tan nduve tsa javahá yu tsa maa ñi maa yu. Tyin javahá yu tsa nyehe yu javahá Jutu yu. Tandihí tsa javahá Jutu yu tan javahá tucu maa yu.

²⁰ Tyin cuñi xaan ra tsi yu, tyin Sehe ra cuví tsi yu, tsa cuenda yacan janahá ra tandihí tsa javahá ra tsi yu. Tan nahnu ca tsa cua janaha ra tsi yu, tan nyooho iyo cua cuñi ndo nyehe ndo can. ²¹ Tumaa janandotó Nyoo Jutu yu ndiyi, tan tsahá ra ñayivi coo ñi, tacan tucu yuhu tsa cuví yu Sehe ra, tsahá yu ñayivi coo nyivi cuñi maa yu cuhva yu.

²² Tacan Nyoo Jutu yu, ña jandaa ca ra cuatyí ndi intuhun nyivi tyin tsa tsahá ra ndatu tsi yuhu tsa cuví yu Sehe ra tyin jandaa yu cuatyí nyivi. ²³ Yacan icá Nyoo Jutu yu tsa cuñi ra jacahnú nyivi tsi Sehe ra tumaa tsa jacahnú maa ñi tsi maa ra. Nyivi tsa ña jacahnú tsi yuhu tsa cuví yu Sehe Nyoo, ndi Jutu yu tan ña jacahnú ñi. Tyin maa ra jaquitsi tsi yu.

²⁴ Tan tsa nditsa caahán yu tyin nyivi tyaa soho tsa caahán yu tan tsinu iñi ñi tsi ra tsa jaquitsi tsi yu, iyó ñi ñayivi nyito tsa ña cua naa maa. Tan ña cua cuhun ca ñi anyaya tsa catyí cuatyí ñi tyin tsa jacacu Nyoo tsi ñi tan ña yihí ndaha ca tuhun tsihi tsi ñi, tan tsahá ra ñayivi nyito iyó ñi. ²⁵ Nyivi; tumaa ndiyi cuví ñi. Tan tsa nditsa caahán yu tsihin ndo tyin vatsi quivi cua cuñi ñi ndusu Sehe Nyoo. Tan nyivi tsa cua tyaa yahvi tsa caahán ra, cua coo ñi ñayivi nyito tsa ña cua naa maa.

Tan vityin cuví quivi tsa caahán yu tuhun. ²⁶ Tyin Nyoo Jutu yu iyó ra ñayivi nyito tsa ña cua naa maa. Tan tsaḥa ra ndatu can tsi yuhu tsa cuví yu Sehe ra tyin cuhva yu ñayivi can coo nyivi. ²⁷ Tan tsaḥa tucu Nyoo ndatu tsi yu tsa jandaa yu cuatyí nyivi, tyin Rayii quee nda gloria cuví yu. ²⁸ Ña iyo cuñi ndo tsa caahán yu tyehen, tyin cua tsaḥa quivi tsa cuñi ndiyi yucú tsitsi ñaña ndusu Sehe Nyoo. ²⁹ Tan cua quita ñi tsitsi ñaña ñi. Tacan tan nyivi tsa javahá tsa vaha cua nandoto ñi tyin coo ñi ñayivi nyitó. Maa tyin nyivi tsa javahá tsa ña vaha cua nandoto ñi tyin cuhun ñi anyaya nu cua tatsi tuñi Nyoo tsi ñi.

Nu janahá tsi tyin ra Jesús iyó ndatu tsi ra tsa cuhva ra ñayivi nyito coo nyivi

³⁰ 'Yuhu ña cuví javaha yu tsa javahá yu tsa intuhun ñi maa yu. Yuhu jandaa yu cuatyí nyivi tumaa cuhva tava tyiñu maa Jutu yu tsi yu. Tan cuhva jandaa yu cuatyí, vaha tsi, tyin ña javahá yu cuhva cuñi maa yu, tyin javahá yu cuhva caahán maa Jutu yu, ra tsa jaquitsí tsi yu. ³¹ Tan tatun juvin ñi maa yu cuví tsa ndaa tsa cuenda yu, nduve yahvi nyaá tsa ndaa can. ³² Maa tyin iyó inga ra cuví tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuví tsa ndaa tan tsa nditsa. ³³ Nyooho tava tyiñu ndo na ndaca tuhun ra naha tsi ra Juan. Tan tuhun tsa caḥan ra, tsa nditsa cuví tsi. ³⁴ Maa tyin yuhu ña tsiñiñuḥu tsa cuví rayii tsa ndaa tsa cuenda yu. Maa tyin caahán yu tuhun tsa caḥan ra Juan tsihin ndo tsa cuenda tsa vaha tsi maa ndo, tyin tacan tan tsinu iñi ndo tsi yu tan cacu ndo. ³⁵ Ra Juan cuví ra tumaa iin lámpara tsa cayú tan jandunditsin tsi. Tan nyoocho juhva ñi quivi cusii iñi ndo tsihin ñuḥu nditsin can. ³⁶ Maa tyin yuhu iyó iin tsa ndaa vaha ca tsi yu tan ñavin ca tsa caahán ra Juan. Tyin tandiḥi tsa javahá yuhu, maa Jutu yu catyí tsihin yu na javaha yu can. Tan yacan cuví tsa ndaa tsa nyehé ndo tyin nditsa tyin maa Jutu yu jaquitsí tsi yu. ³⁷ Tacan tucu Jutu yu, ra tsa jaquitsí tsi yu, cuví ra tsa ndaa tsa cuenda yu. Nyoocho ñaha ca cuñi ndo ndusu ra, tan ndi ñaha ca nyehé ndo tsi ra. ³⁸ Tan ña ndoó tuhun ra tsa caahán yu tsihin ndo tsitsi añima ndo tyin ña tsinu iñi ndo tyin Nyoo jaquitsí tsi yu. ³⁹ Nyoocho tsihin cuenda xaan cahví ndo nu tutu Nyoo, tyin cuñi maa ndo tyin nuu tsi cua ñiñi ndo ñayivi nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi. ⁴⁰ Tan nyoocho ña cuñi ndo quitsi ndo nu nyaá yu tan cuhva yu ñayivi nyito coo ndo.

⁴¹ 'Yuhu ña nducú yu tsa jacahnu nyivi tsi yu. ⁴² Tyin yuhu tsitó yu tsi ndo tan tsitó yu tyin ña cuñi ndo tsi Nyoo. ⁴³ Yuhu vatsi yu cuenda Jutu yu tan nyoocho ña naquihín

ndo tsa caahán yu. Maa tyin tatun inga ra cua quitsí tsa cuenda maa ra, ra ican cua tsinu iñi ndo. ⁴⁴ Nyoocho ña cuví tsinu iñi ndo tsi yu tyin cuñi ndo nduvaha ndo nuu nyivi tahan ndo. Tan ña nducú ndo nduvaha ndo nuu Nyoo, tan intuhun ñi maa ra cuví Nyoo tsa iyó. ⁴⁵ Ña caca iñi ndo tyin cua ndacan yu cuatyí tsaḥa ndo nuu Jutu yu. Nyoocho cuñi maa ndo tyin ley tsa tyaa ra Moisés cua cundaca tsi ndo gloria. Maa tyin ra Moisés cuví ra tsicán cuatyí tsaḥa ndo tyin ña jacuví ndo ley tsa tyaa ra. ⁴⁶ Tyin tun tsatyin nditsa tsa tsinu iñi ndo tsa caḥan ra Moisés, tacan cua tsinu ndiḥi iñi ndo tsa caahán yuhu. Tyin tuhun yuhu cuví tsa tyaa ra. ⁴⁷ Maa tyin tatun ña tsinu iñi ndo tuhun tsa tyaa ra, ¿nácaa cua tsinu iñi ndo tsa caahán yuhu? —catyí ra Jesús tsihin ra cuví ityi nuu tsihin ra Israel naha ra.

6

Nu jacatsí ra Jesús uhun mil rayii
(Mt. 14.13-21; Mr. 6.30-44; Lc. 9.10-17)

¹ Tsa yahá yacan, tan cuahán ra Jesús inga tsiyo miñi cahnu tsa nañi Nduṭya Ñuhu Galilea. Tan juvin ñi nañi tucu tsi Miñi Tiberias. ² Cuaha xaan nyivi cuahán nyicun tsi ra tyin nyehé ñi tsa iyo tsa javahá ra tyin janduvahá ra tsi nyivi cuuhví. ³ Tacan tan ra Jesús ndaa ra iin yucu tan tsinyaa ra ican tsihin ra tsicá tsihin ra. ⁴ Tan tsa cuyatyin cuñi tahan tsi quivi vico pascua tsa jacahnú nyivi Israel. ⁵ Tan nyehé ra Jesús tyin cuaha xaan nyivi nyicun tsi ra, tacan tan quitsahá caahán ra tsihin ra Felipe:

—¿Numaa cua jata yo tsa catsi nyivi cuaha ihya? —catyí ra tsihin ra.

⁶ Caahán ñi maa ra tsihin ra Felipe tyin nducú cuhva ra tsi ra náa cua cahan ra, tyin tsa tsitó maa ra Jesús náa cua javaha ra. ⁷ Tacan tan nacahán ra Felipe tan catyí ra:

—Xuhun tsa quihín yo tsa jahá tyiñu yo tsa uvi cientu quivi, ndi ña cua cutahan can jata yo luxu tsa catsi nyivi ihya —catyí ra Felipe.

⁸ Tan inga ra tsa nyicun tsi ra Jesús, ra Andrés, yañi ra Simón Pedro, catyí ra tsihin ra Jesús:

⁹ —Ihya nyii iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyivi ihya —catyí ra Andrés.

¹⁰ Tacan tan catyí ra Jesús tsihin ra naha: —Cahan ndo tsihin tandiḥi nyivi na cun-yecu ñi —catyí ra.

Tan cuaha xaan itya ican tan tsinyecu ñi, uhun mil rayii, [tan siin maa ñi ñaha tsihin tsa nyihí]. ¹¹ Tacan tan quihín ra Jesús paan can tan tsa yahá tsaḥa ra tyahvi nyoo tsi Nyoo, tan tsaḥa ra can tsi ra tsicá tsihin ra. Tan ra can naha ra, tsaḥa ra naha can tsi

tandihí nyívi tsa nyecú can. Juvín ñi tacan ícá nyico ra tsihin tyaca can. Tan tsatsí ndaha íñi ñi. ¹² Tan cuhva tsa ndaha íñi ñi, ra Jesús catyí ra tsihin ra tsicá tsihin ra:

—Naquihín vaha ndo tsa ñahñu tsa ndoo tyín tacan tan ña tiví tsi —catyí ra tsihin ra naha.

¹³ Naquihín vaha ra naha can, tan jacutú ra naha utsí uvi tyica tsihin tsa ñahñu tsa ndoo tsa uhun taahan paan can. ¹⁴ Tacan tan tsa yahá nyehe nyívi can tsa iyo tsa javahá ra Jesús, tan catyí ñi:

—Nditsa tsa cuii tyín ndusu yuhu Nyoo cuví ra íhya, juvín ra nyaá tsa quítsi maa nu ñuhu ñayívi íhya —catyí ñi.

¹⁵ Maa tyín tsa tuví íñi ra Jesús tyín cuñí ñi tsa quihín ñi tsi ra tsihin tsa ñiñi tyín cuví ra rey cuenda ñi, tacan tan cuahán nyico ra jñi yucu nu sucun ca tyín cunyií intuhun ñi maa ra.

*Nu tsicá ra Jesús nu ndutya
(Mt. 14.22-27; Mr. 6.45-52)*

¹⁶ Tsa cunaaha, nuu ra tsicá tsihin ra Jesús yuhu miñi can. ¹⁷ Tan quihví ra naha tsitsi yutun ndoo tyín cua yaha sava ra naha mahñu miñi can tan cua tsaa ra naha ñuu Capernaum. Tsa cunaaha tan ra Jesús ñaha ca maa tsaa ra. ¹⁸ Tacan tan tsaa tatyí ñihi. Tan iyo nduvitá ndutya miñi can. ¹⁹ Tsa tsa yahá ra naha uhun a íñu kilómetro tsihin yutun ndoo can tan nyehe ra naha vatsí ra Jesús tsicá ra nu ndutya. Tsa nyehe ra naha tyín tsa cua cuyatyín ra nu cuahán yutun ndoo can, nayuhví xaan ra naha. ²⁰ Maa tyín catyí ra Jesús tsihin ra naha:

—¡Maa yu cuví, ña nayuhví ndo!

²¹ Tacan tan tsahá ra naha quihví ra Jesús tsitsi yutun ndoo can. Tan iin yaha ñi tsaa ra naha yuhu miñi nu cuahán ra naha.

Nu nanducú nyívi tsi ra Jesús

²² Tsa tuvi inga quívi tan tsito nyívi tsa ndoo inga tsiyo miñi can tyín ra tsicá tsihin ra Jesús tsa cuahán ra naha tsihin iin yutun ndoo tsa iyó ican. Intuhun ñi maa can iyó. Tan tsito ñi tyín ña cuahán ra Jesús tsihin ra naha. ²³ Maa tyín tsaa taahan ca yutun ndoo tsa quee ñuu Tiberias yatín ñi nu nacuhva Jutu Mañi yo tyahví nyoo tsi Nyoo tan tsatsí nyívi paan. ²⁴ Tacan tan tsa nyehe nyívi tyín nduve ra Jesús tan ndi ra tsicá tsihin ra, quihví ñi tsitsi yutun ndoo tsa tsaa tan cuahán ñi nda ñuu Capernaum cua nanducu ñi tsi ra.

Ra Jesús cuví paan tsa tsahá ñayívi nyito coo yo

²⁵ Tsa tsaa ñi inga tsiyo miñi can, nañihí ñi tsi ra Jesús. Tan tsicá tuhun ñi tsi ra:

—Maestro, ¿náa cuhva tsaa un íhya? —catyí ñi tsihin ra.

²⁶ Maa tyín catyí ra Jesús tsihin ñi:

—Tsa nditsa catyí yu tsihin ndo tyín nyoo nanducú ndo tsi yu maa tyín ñavin cuenda tsa nyehe ndo tsa iyo tsa javahá yu. Nanducú ndo tsi yu tyín tsatsí ndo tan ndaha íñi ndo. ²⁷ Ña jaha tyiñu ndo cuenda tunyee íñi tsa tsatsí ndo tsa cua ndihí ñi maa, jaha tyiñu ndo cuenda tunyee íñi tsa catsi ndo tsa ña cua ndihí tan tsahá tsi ñayívi nyito tsa ña cua naa maa coo ndo. Yacan cuví tsa catsi ndo tsa cua cuhva yuhu tsi ndo tyín Nyoo Jutu yu tava tyiñu ra tsi yu tyín yuhu cuví Rayí tsa quee nda gloria —catyí ra Jesús.

²⁸ Tacan tan quítsahá tsicá tuhun ñi tsi ra tan catyí ñi:

—¿Náa taahán tsi javaha ndi tan cuví javaha ndi cuhva cuñi Nyoo? —catyí ñi.

²⁹ Tacan tan catyí ra Jesús tsihin ñi:

—Tsa cuñi Nyoo javaha ndo, cuví tsa tsinu íñi ndo tsa caahán yuhu, ra tsa jaquitsí ra —catyí ra Jesús tsihin ñi.

³⁰ Tan tsicá tuhun nyico ñi tsi ra, tan catyí ñi:

—¿Náa tsa iyo javaha un nyehe ndi tan tsinu íñi ndi tsa caahán un? ³¹ Tsii tsahnu ndi tsatsí ñi maná nu tsiqui, tumaa tsa caahán tuhun Nyoo tyehen: “Andiví quee paan tsatsí nyívi jaha Nyoo” —catyí ñi tsihin ra Jesús.

³² Tan nacahan ra Jesús tan catyí ra:

—Tsa nditsa caahán yu tsihin ndo. Ñavin ra Moisés tsahá paan tsa quee andiví tsatsí ñi, tyín maa Nyoo Jutu yu cuví ra tsahá paan nditsa tsa quee andiví. ³³ Tyín paan tsa tsahá Nyoo, yacan cuví ra tsa quee andiví. Tan juvín ra cuví ra tsahá ñayívi nyito coo nyívi iyó nu ñuhu ñayívi —catyí ra Jesús.

³⁴ Tacan tan quítsahá catyí ñi tsihin ra:

—Taa, cuhva paan can catsi ndi tandihí ñi quívi —catyí ñi.

³⁵ Tan nacahan ra Jesús tan catyí ra tsihin ñi:

—Yuhu cuví paan tsa tsahá tsa coo nyito añima ndo. Nyívi nyicún tsi yu ña cua cusoco ca ñi, tan ñi tsinú íñi tsa caahán yu ña cua na ityí íñi ñi. ³⁶ Maa tyín tumaa tsa caahán yu tsihin ndo, nyehe vaha ndo tsi yu, maa tyín ña cuñi ndo tsinu íñi ndo tyín juvín yu cuví ra tsa cuví jatynyee tsi ndo ³⁷ Tandihí nyívi tsa tsahá Nyoo Jutu yu tsi yu, nyicún ñi tsi yu, tan ñi tsa nyicún tsi yu, naquihín vaha yu tsi ñi. ³⁸ Tyín yuhu tsa quee andiví; vatsí yu vatsí javahá yu cuhva cuñi ra tsa jaquitsí tsi yu. Ña vatsí yu vatsí javaha yu cuhva cuñi ñi maa yu. ³⁹ Tan cuhva cuñi ra tsa jaquitsí tsi yu, yacan cuví tsehe: tsa ña cunaa ndi intuhun nyívi tsa tsahá ra tsi yu, tan janandoto yu tsi ñi nu cua cundihi quívi. ⁴⁰ Jutu yu, ra tsa jaquitsí tsi yu, cuñi ra tyín tandihí nyívi tsa cutuñi íñi tyín Sehe Nyoo cuví tsi yu, tan tsinu íñi ñi tsa caahán yu,

cua coo ñi ñayivi nyito tsa ña cua naa maa. Tan juvin ñi yu cua janandoto tsi ñi nu cua cundihi quivi—catyí ra Jesús tsihin ñi.

⁴¹ Tsa cuenda tsa cahan ra Jesús yacan, tan quitsahā caahán nyaa nyivi Israel tsi ra tyin catyí ra: “Yuhu cuví paan tsa quee andivi”, catyí ra. ⁴² Tacan tan quitsahā catyí ñi:

—¿A ñavin ra Jesús sehe ra José cuví ra ihya? Yoo tsitó vaha yo tsi jutú ra tan tsi sihi ra. ¿Nacaa tsa catyí ra tyin andivi quee ra? —catyí ñi.

⁴³ Tacan tan catyí ra Jesús tsihin ñi:

—Jandihi ndo tsa caahán nyaa ndo. ⁴⁴ Yoñi maa nyivi cuví quitsi quitsi nyicún tsi yu tatun ñavin Jutu yu, ra tsa jaquitsi tsi yu, caná tsi ñi. Tan cua janandoto yu tsi ñi nu cua cundihi quivi. ⁴⁵ Nu libru tsa tyaá ra cuví ndusu yuhu Nyoo caahán tsi tyehen: “Nyoo cua jacuaha ra tsi tandihi nyivi” catyí tsi. Yacan cuenda nyivi tsa tyaá soho tuhun tsa caahán Nyoo Jutu yu tan cutuhvá ñi tsa caahán ra, juvin ñi nyicún tsi yu.

⁴⁶ Ñavin tsa tyin nyehē ñi tsi Nyoo Jutu yu, tyin yoñi nyehē tsi ra. Intuhun ñi maa yu nyehē tsi ra. Tan juvin yu cuví ra tsa quee nu nyaá ra. ⁴⁷ Tsa nditsa catyí yu tsihin ndo tyin nyivi tsa tsinú ñi tsa caahán yu tsa iyó ñi ñayivi nyito tsa ña cua naa maa. ⁴⁸ Yuhu cuví paan tsa tsahá tsa coo nyito añima ñi. ⁴⁹ Tsi tsaahnu ndo tsatsi ñi maná nu tsiqui, maa tyin juvin ñi tsihi ñi. ⁵⁰ Maa tyin yuhu, tuhun paan tsa quee andivi caahán yu tsihin ndo, tyin nyivi tsa cua catsi paan can, ña cua cúu ñi. ⁵¹ Juvin ñi maa yu cuví paan nyito tsa quee andivi. Nyivi tsa cua catsi paan ihya ña cua cundihi tsa coo ñi, tyin paan tsa cua cuhva yu, yacan cuví cuñu ñuhu yu. Tan cua cuhva yu ñayivi tsa iyó yu tsa cuenda tandihi nyivi iyó nu ñuhu ñayivi —catyí ra Jesús tsihin ñi.

⁵² Tacan tan nyivi Israel can quitsahā natuhún tahan ñi tan catyí ñi:

—¿Nacaa cua cuhva ra tsa catsi yo cuñu ñuhu ra?

⁵³ Tan catyí ra Jesús:

—Tsa nditsa catyí yu tsihin ndo, tyin yuhu cuví Rayi tsa quee nda gloria, tan tatun nyoocho tan ña cua catsi ndo cuñu ñuhu yu, tan ña coho ndo niñi yu, ña cuví coo ndo ñayivi nyitó. ⁵⁴ Nyivi tsatsi cuñu ñuhu yu tan tsihi ñi niñi yu, iyó ñi ñayivi nyito tsa ña cua naa maa. Tan yuhu cua janandoto yu tsi ñi nu cua cundihi quivi. ⁵⁵ Tyin cuñu ñuhu yu yacan cuví paan tsa nditsa tsa taahán tsi catsi ñi, tan niñi yu cuví vinu tsa nditsa tsa taahán tsi coho ñi. ⁵⁶ Nyivi tsatsi cuñu ñuhu yu tan tsihi ñi niñi yu, iin ñi cuví ñi tsihin yu. Tan iin ñi cuví yu tsihin ñi. ⁵⁷ Jutu yu, ra tsa jaquitsi tsi yu, Nyoo nyito cuví ra. Tan yuhu iyó yu tsihin tunyee ñi ra. Tan juvin ñi tacan tucu nyivi tsatsi cuñu ñuhu yu, cua coo

ñi tsihin tunyee ñi tsa iyó tsi yu. ⁵⁸ Tuhun paan tsa quee andivi caahán yu. Paan ihya ñavin tumaa maná tsa tsatsi tsi tsaahnu yo cuví tsi, tyin juvin ñi tsihi ñi. Nyivi tsatsi paan tsa cuví cuñu ñuhu yu, ña cua cundihi maa tsa coo ñi —catyí ra Jesús.

⁵⁹ Juvin yacan jacuaha ra Jesús nu ndu iin nyivi tsitsi vehe ñuhu ñuu Capernaum.

⁶⁰ Cuaha xaan nyivi nyicún tsi ra Jesús. Tan cuhva tsa tsihi ñi yacan catyí ñi:

—Tuhun tsa caahán ra ihya, yi xaan naquihin vaha yo itsi. Yoñi maa cua tsinu ñi tsa caahán ra —catyí ñi.

⁶¹ Tacan tan tuví ñi ra Jesús tyin ña cuñi ñi naquihin ñi tsa caahán ra. Tan tsicā tuhun ra tsi ñi:

—¿A ndasi cuñi ndo tsa caahán yu ihya?

⁶² Tan ¿náa cua javaha ndo tatun nyehe ndo tsi yuhu Rayi tsa quee nda gloria nandaa nyico yu inga tsaha ityi nu quee yu? ⁶³ Tatyí li Nyoo tsahá ñayivi nyito. Tan cuñu ñuhu, ña jatinyee tsi tsa coo yo ñayivi can. Tan tsa caahán yuhu tsihin ndo, Tatyí li Nyoo cuví tsi tan tsahá tsi tsa coo nyitó añima ndo.

⁶⁴ Maa tyin yihi ndo ña tsinú ñi ndo tsi yu —catyí ra Jesús.

Tyin nda quivi jihna tan tsa tsitó maa ra yóo ña cua tsinú ñi tsi ra tan yóo cua xico tsi ra. ⁶⁵ Tan catyí ra:

—Yacan cuenda catyí yu tsihin ndo tyin yoñi nyivi cuví quitsi nyicún tsi yu tatun ñavin maa Nyoo Jutu yu caná tsi ñi —catyí ra Jesús.

⁶⁶ Nda quivi can, tan cuaha xaan nyivi nyicún tsi ra Jesús nacoo ñi tsi ra. Tan ña tsicá ca ñi tsihin ra. ⁶⁷ Tacan tan tsicā tuhun ra Jesús tsi tsa utsi uvi ra tsicá tsihin ra, tan catyí ra:

—¿A cuñi ndihi tucu nyoocho cuhun ndo? —catyí ra tsihin ra naha.

⁶⁸ Maa tyin nacahan ra Simón Pedro tan catyí ra:

—Jutu Mañi yu, ¿yóo cunycun ndi? Tan intuhun ñi maa un caahán tuhun ñayivi nyito tsa ña cua naa maa. ⁶⁹ Nyuhu tsinú ñi ndi, tan tsitó ndi tyin yooho cuví ra Cristo Sehe Nyoo nyito.

⁷⁰ Tan nacahan ra Jesús tan catyí ra:

—¿A ñavin yuhu nacatsi tsi tandihi tsa utsi uvi ndo? Tan intuhun ndo yihi nu ña vaha —catyí ra.

⁷¹ Tuhun tsa caahán ra Jesús ihya, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan ñi tsi ra, vasu iin ra tsa utsi uvi can cuví ra.

7

Nu ña tsinú ñi yañi ra Jesús tsi ra

¹ Tsa yahā yacan, tan nyi ra Jesús tsicá nuu ra nu cuví Galilea. Ña cuñi ra cuhun

ra nu cuví Judea tyin ra cuví ityi nuu tsihin nyívi Israel can naha ra cuñí ra naha cahñí ra naha tsi ra. ² Tan tsa cuyatyin quívi vico tsa jacahnú nyívi Israel ndíhi ñi cuiya. Tan nañí tsi Vico Tyahva. ³ Yacan cuenda catyí ra yañi ra Jesús tsihin ra:

—Ña ndoo un ihya. Cuaahan Judea tyin nyívi nyicún tsi un tsa iyó ndacan nyehe ñi tyíñu javahá un. ⁴ Tyin tatun cuñí yo tsa coto nyívi tsi yo, ña javahá xeehe yo tsa javahá yo. Tan yoocho tatun nditsa tsa javahá un, javaha can nuu tandíhi nyívi —catyí tandíhi yañi ra.

⁵ Tacan catyí ra naha tyin ndi tsa cuví ra naha yañi ra tan ña tsínú iñi ra naha tsi ra.

⁶ Tacan tan catyí ra Jesús tsihin ra naha:

—Ñaha ca tsaa hora tsa cuhun yuhu. Maa tyin nyoocho ndáa quívi ñi cuví cuhun ndo. ⁷ Tyin vaha cuñí nyívi nyehé ñi tsi ndo, maa tyin yuhu ndasi cuñí ñi nyehé ñi tsi yu tsa cuenda tyin caahán catsi yu tsihin ñi tyin ña vaha tsa javahá ñi. ⁸ Cuaahan nyoocho vico can. Yuhu ña cuhun yu tyin ñaha ca tsaa hora tsa taahán tsi cuhun yu —catyí ra.

⁹ Yahá can tan ndoo ra nu cuví Galilea.

Nu nyíi ra Jesús nu iyó vico Tyahva

¹⁰ Tsa yahá cuahán yañi ra Jesús vico can, tsahan cuahán ndíhi ra, maa tyin cuahán xeehe ñi ra. ¹¹ Tan ra cuví ityi nuu tsihin nyívi Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyíi ra can? —catyí ra naha.

¹² Tan caahán nyívi yucú vico can tuhun ra. Yihí ñi catyí ñi: “Iin ra vaha cuví ra.” Tan inga ñi catyí ñi: “Na vaha ra, jandaví ñaha ra tsi nyívi”, catyí ñi.

¹³ Maa tyin yoñi caahán nditsin tuhun ra tsa cuenda tsa yuuhví ñi tsi ra cuví ityi nuu can naha ra.

¹⁴ Tsa cusava iyó vico tan tsaa ra Jesús tsitsi vehe ñuhu cahnu tan quitsahá jacuaha ra tsi nyívi. ¹⁵ Tan ra cuví ityi nuu can iyó cuñí ra naha tan quitsahá natuhun tahan ra naha:

—¿Nacaa tyin tsitó ra ihya tan ña cahví ra? —catyí ra naha.

¹⁶ Tan nacahan ra Jesús tan catyí ra:

—Tuhun tsa jacuahá yu, ñavin tsa cuenda maa yu cuví tsi, maa tyin cuenda ra tsa jaquitsí tsi yu cuví tsi. ¹⁷ Tatun yihí nyoocho tsa cuñí javaha cuhva cuñí Nyoo, cua coto ndo tyin cuenda Nyoo jacuahá yu tan ñavin tsa cuenda maa yu. ¹⁸ Nyívi tsa caahán cuenda maa ñi, caahán ñi tyin cuñí ñi tsa jacahnú nyívi tsi ñi. Maa tyin ra nducú tsa jacahnú nyívi tsi Nyoo, ra tsa jaquitsí tsi ra, ra ican caahán tsa nditsa. Tan ña jandaví ñaha ra.

¹⁹ ¿A ña nditsa tyin ra Moisés tsahá ra ley tsi ndo? Maa tyin ndi intuhun nyoocho tan

ñi tyaá yahvi ndo ley can. ¿Nacuenda cuñí ndo cahñi ndo tsi yu? —catyí ra.

²⁰ Tan nacahan nyívi tan catyí ñi tsihin ra:

—Tatyí ña vaha yihí tsi yoocho. Yoñi cuñí cahñi tsi un —catyí ñi tsihin ra.

²¹ Tan catyí ra Jesús:

—Tsacatyí tsa javahá yu tsa iyo quívi quitatu yo, yacan ndasi cuñí ndo nyehé ndo tsi yu. ²² Maa tyin ra Moisés catyí ra tsihin ndo tyin coo ndo tsihin tsa cunyaa tuñi Nyoo tsi sehe yíi ndo. Vasu ñavin ra quitsahá tsihin tuhun can, maa tyin nyívi cuví nyívi ra ityi tsata, jhna ca ñi javahá tacan. Yacan cuenda javahá ndo can vasu taahán tsi quívi quitatu yo. ²³ Tan vityín, vaha tatun tsa cuenda tsa ña cuñí ndo cumañi ndo ley ra Moisés tan javahá ndo tuhun can vasu quívi quitatú yo cuví. Maa tyin tatun tacan javahá ndo, ¿nacuenta tyin cuxaan ndo tsi yu tsa janduvahá yu tsi ra can quívi quitatú yo? ²⁴ Na tyaá ndo cuatyi síqui nyívi tatun ña tsitó vaha ndo náa javahá ñi. Cúatu ndo nda nyehe vaha ndo, tacan tan coto ndo nácaa tatsi tuñi ndo tsi ñi tsihin tsa ndaa tan tsihin tsa nditsa.

Nu cahán ra Jesús tuhun maa ra

²⁵ Tacan tan juhva nyívi iyó Jerusalén, quitsahá tsicá tuhun ñi:

—¿A ñavin ra ihya nanducú xaan ra naha tyin cua cahñi ra naha tsi ra? ²⁶ Caahán nditsin ra tsihin nyívi. Tan yoñi caahán náa caahán tsihin ra. Vasiqui tsínú ndíhi maa iñi ra cuví ityi nuu naha ra tyin juvin ra ihya cuví ra Cristo ra cuví rey tsa jaquitsí Nyoo. ²⁷ Yoo tsitó vaha yo nu quee ra ihya, tan quívi quitsi ra Cristo yoñi maa cua coto numaa ityi cua quee ra —catyí ñi.

²⁸ Ra Jesús nyíi ra tsitsi vehe ñuhu jacuahá ra, tan tsitó ra tsa natuhún nyívi, yacan cuenda ñihi cahán ra tan catyí ra:

—¡Nyoocho cuñí maa ndo tyin nacotó ndo tsi yu tan tsitó ndo numaa quee yu! Maa tyin yuhu ña vatsí yu cuenda maa yu. Yuhu vatsí yu cuenda ra tsa jaquitsí tsi yu, ra tsa cuví tsa nditsa. Nyoocho ña nacotó ndo tsi ra. ²⁹ Yuhu nacotó yu tsi ra tyin cuenda ra vatsí yu, tan maa ra jaquitsí tsi yu —catyí ra Jesús.

³⁰ Tacan tan cuñi ra naha tyihí ra naha tsi ra tsitsi vehe caa. Maa tyin ndi intuhun ra naha tan ña caná iñi ra naha tñin ra naha tsi ra tsa cuenda tyin ñaha ca tahan tsi quívi tsa taahán maa tsi tñin ra naha tsi ra. ³¹ Maa tyin cuaha xaan nyívi tsínú iñi tsi ra. Tan catyí ñi: —Ra ihya cuví ra Cristo. ¿A cuaha ca tsa iyo cua javaha inga ra tatun quitsi ra tan ñavin ca ra ihya? —catyí ñi.

Nu jacuhún ra cuví fariseo naha ra tsi ra vitya tyin tñin ra naha tsi ra Jesús

³² Tsa tsíñi ra fariseo naha ra tsa caahán nyívi tuhun ra Jesús, maa ra naha tan ra cuví ityi nuu tsihin ra jutu naha ra, jacuhún

ra naha vitya cuenda vehe ñuhu, na tñn ra naha tsi ra Jesús. ³³ Tacan tan catyí ra Jesús:

—Juhva cuii ña quivi cua cunyaa yu tsihin ndo. Yahá can tan cuacunu yu nu nyaá ra tsa jaquitsj tsi yu. ³⁴ Nyoocho cua nanducu ndo tsi yu. Maa tyin ña cua nañihi ndo tsi yu. Tyin ña cua cuvi cuhun ndo nu cua cunyaa yu —catyí ra Jesús.

³⁵ Tacan tan quitsahá natuhún tahan ra cuvi ityi nuu tsihin nyivi Israel naha ra:

—¿Numaa cua cuhun ra ihya tsa ña cua nañihi yo tsi ra? ¿A cuhun ra nu iyó ra Israel ñuu Grecia naha ra tyin jacuaha ra tsi nyivi iyó Grecia can? ³⁶ ¿Náa cuñi tsi catyí tsa caahán ra tsihin yo? Tyin catyí ra: “Cua nanducu ndo tsi yu maa tyin ña cua nañihi ca ndo tsi yu tyin ña cua cuvi cuhun ndo nu cua cunyaa yu” —tacan caahán yuhu tahan ra naha tuhun ra Jesús.

Nyivi tsinú iñi tsi Nyoo cua coo Tatyí Ii ra añima ñi

³⁷ Quivi ndihi tsicoq vico, yacan cuvi quivi tsa ñiñi ca. Tan quivi can nduvitá ra Jesús tan ñiñi caahán ra tan catyí ra:

—Tatun ndáa nyoocho na ityi iñi ndo, naha ndo tan tsinu iñi ndo tsa caahán yu. ³⁸ Tyin nyivi tsa tsinú iñi tsa caahán yu, cua cunu ndutya nyito tsitsi añima ñi tumaa tsinú ndutya iin yutya, tumaa catyí maa nu tutu Nyoo —catyí ra Jesús.

³⁹ Maa tyin tsihin yacan cuñi ra catyí ra tyin ñi tsinú iñi tsi ra cua ñiñi ñi Tatyí Ii Nyoo, tyin quivi can ñaha ca quitsi Tatyí Ii Nyoo tyin ra Jesús, ñaha ca cunu yu ra nda gloria nu cua jacahnu Jutu ra tsi ra.

Nu natahvi sava nyivi tsa cuenda ra Jesús

⁴⁰ Juhva nyivi tsa tsinú yacan, catyí ñi:

—Nditsa tsa cuii tyin ra ihya cuvi ndusu yuhu Nyoo tsa nyaá tsa cua quitsi —catyí ñi.

⁴¹ Tan inga ñi catyí ñi:

—Ra ican cuvi ra Cristo ra tsa jaquitsj Nyoo —catyí ñi.

Maa tyin inga nyivi catyí ñi:

—¿Nacaa tyin ra Galilea cua cuvi ra Cristo?

⁴² Tyin nu tutu Nyoo catyí tsi tyin ra Cristo cua cuvi ra nyivi tata ra rey David, tan ra ñuu Belén tsa canyii nu cuvi Galilea cua cuvi ra, tumaa ra David —catyí ñi.

⁴³ Tacan tan nyivi can natahvi sava ñi tsa cuenda ra Jesús. ⁴⁴ Yihí ñi cuñi ñi quihin ñi tsi ra tan tyihí ñi tsi ra tsitsi vehe caa. Maa tyin yoñi tñn tsi ra.

Ra cuvi ityi nuu vehe ñuhu naha ra ña tsinú iñi ra naha tsi ra Jesús

⁴⁵ Tacan tan ra vitya tsa iyó vehe ñuhu cahnu can, cuanuhu ra naha nu yucú ra fariseo naha ra tsihin ra cuvi ityi nuu tsihin ra jutu naha ra. Tan tsicá tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

⁴⁶ Tan catyí ra vitya can naha ra:

—¿Ndi intuhun tsaha tan yoñi tuhva caahán tumaa caahán ra can! —catyí ra naha.

⁴⁷ Tacan tan catyí ra fariseo naha ra tsihin ra vitya can naha ra:

—¿A jandavi ñaha ndihi ra can tsi nyoocho?

⁴⁸ Nyehé ndo tyin ndi intuhun ra cuvi ityi nuu tsihin ndi, tan ra cuvi fariseo naha ra, tan ña tsinú iñi ra naha tsi ra can. ⁴⁹ Maa ñi maa nyivi ña tsitó ley nyicún tsi ra. Tan ña vaha ñi nuu Nyoo —catyí ra naha.

⁵⁰ Tacan tan ra Nicodemo, ra tsa tsahan nu nyii ra Jesús tsa tsacuaa, cuvi ndihi tucu ra fariseo, tan catyí ra tsihin ra naha:

⁵¹ —Catyí ley tyin ña cuvi tatsi tuñi yo tsi iin nyivi tatun ñaha ca cuñi jihna yo tsa caahán ra, tan coto yo náa javahá ra —catyí ra tsihin ra naha.

⁵² Tacan tan nacahan ra naha tan catyí ra naha tsihin ra:

—¿A juven ñi ra Galilea cuvi ndihi tucu yoocho? Cahvi nu tutu Nyoo tan nyehé un, tyin ndi intuhun ra cuvi ndusu yuhu Nyoo tan ña nyaá tsi tsa quitsi ra nda Galilea —catyí ra naha.

Ñaha tsa quituvi tsihin rayii tsa ñavin yii ña cuvi

⁵³ Tacan tan cuanuhu intuhun intuhun ra naha nda yuvehe ra naha.

8

¹ Maa tyin ra Jesús cuahán ra yucu Olivo.

² Tsa cunditsin inga quivi, cuahán nyico ra Jesús cunda tsaha vehe ñuhu cahnu. Tan tandihi nyivi natuhvá ñi nu nyii ra. Tan tsinyaa ra tan quitsahá caahán ra tsihin ñi.

³ Tacan tan ra jacuahá ley vehe ñuhu tan ra cuvi fariseo naha ra tsaá ra naha tsihin iin ñaha iyó yii tyin tñn ra naha tsi ña nu tsicoq cuatyí ña tsihin inga rayii. Tan tyaa ra naha tsi ña mahñu nyivi tsa nyecú can. ⁴ Tan quitsahá catyí ra naha tsihin ra Jesús:

—Maestro, tñn ndi tsi ñaha ihya nu tsicoq cuatyí ña tsihin inga rayii. ⁵ Tyin ley tsa tyaa ra Moisés catyí tsi tyin ñiñaha tsa javahá tacan taahán tsi cahñi yo tsi ñi tsihin yuu. Tan yoocho, ¿nacaa catyí un? —catyí ra naha tsihin ra.

⁶ Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaa ra naha cuatyí sigui ra. Tacan tan tsinyaa tyayii ra Jesús nu ñuhu tan quitsahá tyaa ra letra nu ñuhú tsihin nundaha ra. ⁷ Maa tyin nducú tuhun ca ra naha tsi ra, tacan tan nduvitá nyityi ra tan catyí ra tsihin ra naha:

—Nyoocho tsa nduve cuatyí jihna ca ndo quihin yuu tan cañi ndo tsi ña —catyí ra tsihin ra naha.

⁸ Tan tsinyaꝯ tyayꝯ nyico ra tan quitsahꝯ jañihí ca ra tyaá ra letra nu ñuhu. ⁹ Tsa tsiñi ra naha tsa caahán ra tacan, tuvꝯ iñi ra naha tyin iyó tucu cuatyí maa ra naha. Tan quitsahꝯ quitꝯ intuhun intuhun ra naha, jihna ca ra tsahnu naha ra quitꝯ. Cuhva tsa ndihí ra naha quitꝯ cuahán tan ndoo intuhun ña maa ra Jesús tsihin ñaha can mahñu nu nyecú nyívi can. ¹⁰ Tacan tan nduvitꝯ nyityi ra Jesús tan nyehe ra tyin tsa cuahán ra naha tan ndoo intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaꝯ cuatyí siqui un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

¹¹ Tan nacahan ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un. Cuaahan vityin. Tan ña javaha ca un cuatyí —catyí ra tsihin ña.

Ra Jesús cuvꝯ tsa nditsin tsa jandunditsin añima nyívi

¹² Tacan tan cahan nyico ra Jesús tsihin nyívi inga tsaha, tan catyí ra tsihin ñi:

—Yuhu cuvꝯ ra tsa jandunditsin añima nyívi iyó nu ñuhu ñayivi. Yoo nyívi tsa nyicún tsi yu, cua coo ñi iin ñayivi nyito nu nditsin. Tan ña cua caca nuu ñi nu naa —catyí ra Jesús tsihin ñi.

¹³ Tacan tan ra cuvꝯ fariseo naha ra catyí ra naha tsihin ra:

—Yooho, caahán un tumañi iñi tsa cuenda maa un. Yacan cuenda nduve yahvi nyaá can —catyí ra naha tsihin ra.

¹⁴ Nacahan ra Jesús tan catyí ra:

—Vasu juvin ñi maa yu caahán tumañi iñi tsa cuenda yu, maa tyin tsa caahán yu iyó yahvi tsi tyin yuhu tsitó yu numaa ityi quee yu tan numaa ityi cua cuhun yu. Maa tyin nyoooho ña tsitó ndo numaa ityi quee yu tan numaa ityi cua cuhun yu. ¹⁵ Nyoooho yatyi xaan caahán ndo tsa caa nyívi. Maa tyin yuhu, ña caahán yu tsa caa ñi. ¹⁶ Tyin tatun cahan yu tsa caa nyívi, tsa nditsa cua cahan yu. Tyin ñavin intuhun ñi maa yu nyehé tsa iyó añima ñi, tyin Jutu yu ra tsa jaquitsi tsi yu, ra ican nyehé iin caa ñi tsihin yu. ¹⁷ Nu ley nyoooho nyaá tyin tatun uvi ra tsahá tsa ndaa, cuñi tsi tsinú iñi yo tsa caahán ra naha. ¹⁸ Tan vityin vaha tyin juvin ñi maa yu cuvꝯ tsa ndaa tsa cuenda maa yu. Tan Jutu yu, ra tsa jaquitsi tsi yu, cuvꝯ inga tsa ndaa —catyí ra Jesús tsihin ra naha.

¹⁹ Tacan tan tsicꝯ tuhun ra naha tsi ra:

—¿Numaa nyíi jutu un?

Tan catyí ra Jesús:

—Nyoooho ña tsitó ndo tsi yuhu. Tan ndi Jutu yu tan ña tsitó ndo. Tun tsatyin tsitó

ndo tsi yu, coto ndihí ndo tsi Jutu yu —catyí ra.

²⁰ Tuhun ihya cahan ra Jesús tsitsi tsa jacuahá ra tsitsi vehe ñuhu cahnu, nu nyíi caja nu tyihí nyívi xuhun. Maa tyin yoñi tyihí tsi ra vehe caa, tyin ñaha ca tahan tsi quívi tsa taahán tsi cuhun ra.

“Nu cuhun yuhu ña cua cuvꝯ cuhun ndo”, catyí ra Cristo

²¹ Tacan tan quitsahꝯ caahán nyico ra Jesús tsihin ra Israel naha ra tan catyí ra:

—Yuhu cua cuhun yu, tan cua nanducu ndo tsi yu, maa tyin cua cúu ndo tan cua ndoo cuatyí ndo siqui ndo. Tyin nu cua cuhun yuhu, nyoooho ña cua cuvꝯ cuhun ndo —catyí ra Jesús tsihin ra naha.

²² Tacan tan catyí ra Israel naha ra:

—¿A cua cahní maa ra tsi ra? tyin catyí ra tyin ña cua cuvꝯ cuhun yo nu cuahán ra —catyí ra naha.

²³ Tacan tan catyí ra Jesús:

—Nyoooho ra cuenda nu ñuhu ihya cuvꝯ ndo. Maa tyin yuhu nda ityi siqui quee yu. Nyoooho cuenda ñuhu ñayivi ihya cuvꝯ ndo. Maa tyin yuhu ñavin cuenda nu ñuhu ñayivi ihya cuvꝯ yu. ²⁴ Yacan cuenda catyí yu tsihin ndo tyin cua cúu ndo tan cua ndoo cuatyí ndo siqui ndo. Tyin tatun ña tsinú iñi ndo tsa yuhu cuvꝯ ra jatsiyó cuatyí ndo, cua ndoo cuatyí ndo siqui ndo quívi cúu ndo —catyí ra Jesús tsihin ra naha.

²⁵ Tacan tan quitsahꝯ tsicá tuhun ra naha tsi ra, tan catyí ra naha:

—¿Yoo ra cuvꝯ yooho?

Nacahan ra Jesús tan catyí ra:

—Tsa yaha cahan yu tsihin ndo nda quívi jihna. ²⁶ Cuaha xaan ca tsa ndi cumañi cahan yu tsihin ndo, tan ndi cumañi cahan yu cuhva iyó ndo. Maa tyin tsa caahán yu tsihin nyívi iyó nu ñuhu ñayivi, cuvꝯ tsi tsa tsiñi yu tsa caahán ra tsa jaquitsi tsi yu. Tan maa ra caahán tsa nditsa —catyí ra Jesús.

²⁷ Maa tyin ra Israel naha ra ña cutuñi iñi ra naha tatun tuhun Nyoo Jutu yo cahan ra tsihin ra naha. ²⁸ Yacan cuenda catyí ra tsihin ra naha:

—Cua tyaa ndo tsi yuhu, ra cuvꝯ Rayꝯ tsa quee nda gloria, nu cruu. Tacan tan cua coto ndo tyin yuhu cuvꝯ yu tsa caahán yu tyin cuvꝯ yu, tan cua coto ndo tyin tyiñi jahá yu ñavin tsa cuenda maa yu javahá yu can, maa tyin caahán yu tsa janahá Jutu yu tsi yu. ²⁹ Tyin Jutu yu, ra tsa jaquitsi tsi yu, nyíi ra tsihin yu. Tan ña nacoó ra tsi yu tsa maa ñi maa yu. Tyin yuhu javahá yu maa ñi maa cuhva cuñi ra —catyí ra Jesús.

³⁰ Tsa cahan ra Jesús yacan, cuaha xaan ra naha quitsahꝯ tsinú iñi tsi ra.

Nyívi cuvꝯ sehe Nyoo tan nyívi javahá tsa caquiñi

³¹ Tacan tan catyí ra Jesús tsihin nyívi Israel, tsa quitsahá tsinú íñi tsi ra:

—Tatun nyooho tan jañihi ca ndo tyaa yahvi ndo cuhva jacuahá yu tsi ndo, cua tsaa ndo cuví ndo nyívi tsa nditsa yihi cuenda yu. ³² Tan cua coto ndo tsa nditsa. Tan tsa nditsa can cua tava nuña tsi ndo —catyí ra.

³³ Tan nacahan ra naha tan catyí ra naha: —Nyuhu nyívi tata ra Abraham cuví ndi. Ndi iin tsaha tan ñaha ca cuví ndi musu nyívi. ¿Nacaa tsa catyí yoocho tyin quita nuña ndi? —catyí ra naha tsihin ra.

³⁴ Tan catyí ra Jesús:

—Tsa nditsa catyí yu tsihin ndo tyin tandihi nyívi javahá tsa caquiñi, musu cuenda tsa caquiñi cuví ñi. ³⁵ Iin musu ña ndoo cuii ra vehe tsitoho ra. Maa tyin ra cuví sehe tsitoho vehe can, ndoo cuii ra vehe jutu ra. ³⁶ Yacan cuenda tatun yuhu tsa cuví yu Sehe Nyoo tan jacacu yu tsi ndo, tsa nditsa cuii tyin ña cua cundaca ñaha ca tsa ña vaha tsi ndo. ³⁷ Tsa tsitó yu tyin tata ra Abraham cuví ndo. Maa tyin yihí ndo cuñi ndo cahñi ndo tsi yu, tyin ña naquihín vaha ndo tsa caahán yu. ³⁸ Yuhu caahán yu tsa janahá Jutu yu tsi yu. Tan nyoocho javahá ndo tsa caahán ra cuví jutu ndo tsihin ndo —catyí ra tsihin ra naha.

³⁹ Tan nacahan ra naha tan catyí ra naha: —Jutu ndi cuví tsi ra Abraham —catyí ra naha.

Maa tyin ra Jesús catyí ra tsihin ra naha:

—Tun tsatyin nditsa tsa tata ra Abraham cuví tsi ndo, cua javaha ndo tsa javahá ra. ⁴⁰ Maa tyin nyoocho, vasu caahán yu tsihin ndo tsa nditsa tsa janahá Nyoo tsi yu, nyoocho cuñi ndo cahñi ndo tsi yu. ¡Ra Abraham ña javahá ra tacan! ⁴¹ Nyoocho javahá ndo tumaa javahá jutu ndo —catyí ra tsihin ra naha.

Tacan tan nacahan ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

⁴² Tacan tan catyí ra Jesús:

—Tun tsatyin nditsa tyin Nyoo cuví jutu ndo, cua cuñi ndo tsi yu. Tyin yuhu quee yu nu nyaá ra tan tsaa yu ihya. Ña vatsí yu cuenda maa yu, tyin maa Nyoo jaquitsi tsi yu. ⁴³ ¿Nacuenda ña cutuñi íñi ndo tsa caahán yu tsihin ndo? Tsa cuenda tyin ña cuñi ndo tyaa soho ndo tsa caahán yu. ⁴⁴ Cuihna cuví jutu ndo. Tan sehe nu tsi ndo. Tan cuñi ndo javaha ndo cuhva cuñi nu. Tan nu ña vaha can cuví nu tsañhi nyívi nda quívi jhna. Tan ña javahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi ñaha nu tsi nyívi tyin cuñi nu tsa coo ñi cuhva iyó nu tyin vatya xaan nu. Tan

jutu nyívi vatya cuví nu. ⁴⁵ Tan yuhu caahán yu tsa nditsa, maa tyin nyoocho ña tsinú íñi ndo tsa caahán yu. ⁴⁶ ¿Ndáa nyoocho tan cuví janaha ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nacaa tsa ña tsinú íñi ndo tsi yu? ⁴⁷ Nyívi cuenda Nyoo tyaa soho ñi tuhun caahán ra. Maa tyin nyoocho ñavin nyívi cuenda Nyoo cuví ndo, yacan cuenda ña cuñi ndo tyaa soho ndo tsa caahán yu —catyí ra Jesús.

Ra Cristo, tsa iyó maa ra nda ndi cumañi ca coo ra Abraham,

⁴⁸ Tacan tan catyí ra Israel naha ra tsihin ra:

—¿A ña nditsa tyin yoocho ra ñuu Samaria cuví un, tan yihí tatyí ña vaha tsi un? —catyí ra naha tsihin ra.

⁴⁹ Tan nacahan ra Jesús tan catyí ra:

—Nduve tatyí ña vaha yihí tsi yuhu. Tsi Jutu yu jacahnú yu. Tan nyoocho caahán ndo ndavaha ñi tsi yu. ⁵⁰ Yuhu ña nducú yu tsa jacahnu nyívi tsi yu, maa tyin iyó iin ra nducú tsa jacahnu ñi tsi yu. Tan maa ra cua jandaa cuatyí ndo tatun ña jacahnú ndo tsi yu. ⁵¹ Tsa nditsa catyí yu tyin nyívi tsa tyaa yahvi tsa caahán yu ña cua tsaa tuhun tsihiñ añima ñi —catyí ra Jesús tsihin ra naha.

⁵² Tacan tan nacahan ra Israel can naha ra tan catyí ra naha:

—Vityin tsitó vaha ndi tyin yihí tatyí ña vaha tsi un. Tyin ra Abraham tan tandihi ca ra cuví ndusu yuhu Nyoo tsihi ra naha. Tan yoocho catyí un tyin nyívi tyaa yahvi tsa caahán un ña cua cúu ñi. ⁵³ ¿A cahnu ca ra cuví yoocho tan ñavin ca ra Abraham jutu yo? Maa ra tsihi ra tan tacan tucu ra cuví ndusu yuhu Nyoo. ¿Yóo ra cuví yoocho cuñi maa un? —catyí ra naha tsihin ra.

⁵⁴ Tan nacahan ra Jesús tan catyí ra:

—Tatun juvin ñi maa yu jacahnú tsi yu, nduve yahvi nyaá yacan. Maa tyin ra jacahnú tsi yu, juvin ra cuví Jutu yu. Tan juvin ra cuví ra tsa caahán nyoocho tuhun tyin Nyoo ndo cuví tsi ra. ⁵⁵ Maa tyin ña nacotó ndo tsi ra. Tan yuhu, nacotó yu tsi ra. Tun tsatyin catyí yu tyin ña nacotó yu tsi ra, cuví yu iin ra vatya tumaa nyoocho. Maa tyin yuhu nditsa tsa nacotó yu tsi ra, tan tyaa yahvi yu tsa caahán ra. ⁵⁶ Ra Abraham tsi tsaahnu yo si xaan cuñi ra tyin cua nyehe ra quívi cua quitsi yuhu nu ñuhu ñayivi. Nyehe ra quitsi yu tan si xaan cuñi ra —catyí ra Jesús tsihin ra naha.

⁵⁷ Tacan tan catyí ra Israel can naha ra tsihin ra Jesús:

—Ndi ñaha ca quita uvi xico utsi cuiya un, ¡tan catyí un tyin nyehe un tsi ra Abraham!

⁵⁸ Tan nacahan ra Jesús tan catyí ra:

—Tsa nditsa catyí yu tsihin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tsihin ra naha.

⁵⁹ Tacan tan quihñ ra naha yuu tyin cua cañi ra naha tsi ra Jesús. Maa tyin iin yaha ñi quihvi xeehe ra tan yaha ra mahñu ra naha tan quitã ra tsitsi vehe ñuhu can cuahán ra.

9

Nu janduvahã ra Jesús tsi iin ra cuaa nda cacũ ra

¹ Cuhva tsa yaha ra Jesús iin nu yaha ra, nyehẽ ra tsi iin ra cuaa nda cacũ ra. ² Tan quitsahã tsicã tuhun ra tsicã tsihin ra tsi ra:

—Maestro, ¿nacuvi tyin cuaa ra ihya cacũ ra? ¿A tsa cuenda cuatyí jutu ra tan sihi ra, o tsa cuenda cuatyí maa ra? —catyí ra naha tsihin ra.

³ Tan nacahan ra Jesús tan catyí ra:

—Ñavin tsa cuenda cuatyí maa ra, tan ndi ñavin tsa cuenda cuatyí jutu ra tan sihi ra. Cuaa maa ra tyin tacan tan cuví janaha Nyoo tunyee ñi ra tsi nyívi tsa cuenda ra can. ⁴ Tsa tsinu cahñi, cuñi tsi tsa javaha yu tyiñu ra tsa jaquitsi tsi yu. Tyin tsa yatyn cuii cua cuaa tan ña cua cuví ca jaha tyiñu yo. ⁵ Tsa ndi nyí yu nu ñuhu ñayivi ihya, ñuhu jandunditsin [cuenda nyívi iyó] nu ñuhu ñayivi ihya cuví yu.

⁶ Tsa yaha tsa cahan ra Jesús tacan, tan tiví si ra nu ñuhu. Tan jatyi ra luxu nyahyu tsihin si ra tan tyaa ra tinuu ra cuaa can. ⁷ Tacan tan catyí ra tsihin ra cuaa can:

—Cuaahan cua nacatya nuu un nda tanque Siloé. —Sivi can cuñi tsi catyí: “Jacuhun Yu Tsi Un.”

Tacan tan ra cuaa can tsahan ra tsi-nacatya ra nuu ra. Tan cuhva tsa tsa nyico ra, tsa nyehé ra. ⁸ Tacan tan nyívi iyó yatyn yuvehe ra, tan nyívi tsa nyehé tsi ra tsa ndi cuaa ra catyí ñi:

—¿A ñavin ra ihya cuví ra tuhvã tsinyaã tsicán xuhun? —catyí ñi.

⁹ Tan yihí ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

¹⁰ Tacan tan quitsahã tsicã tuhun ñi tsi ra:

—¿Tan nácaa tyin cuví nyehé un vityin? —catyí ñi.

¹¹ Tan catyí ra:

—Ra tsa nañi Jesús, ra ican jatyi nyahyu tan tyaa ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tsahan yu. Tan tsa yaha nacatya yu nuu yu tan nanyehẽ yu —catyí ra tsihin ñi.

¹² Tacan tan quitsahã tsicã tuhun ñi tsi ra:

—¿Tan numaa nyí ra can vityin?

Tan catyí ra tsihin ñi:

—Ña tsitó yu —catyí ra.

Nu janahmã ra cuví fariseo naha ra tsi ra cuaa tsa nduvahã

¹³ Tacan tan tsindacã ñi tsi ra tsa nduvahã can nuu ra cuví fariseo naha ra. ¹⁴ Tyin quívi tsa jatyi ra Jesús nyahyu tan janduvahã ra tsi ra can, cuví tsi quívi quitatú nyívi. ¹⁵ Yacan cuenda ra cuví fariseo naha ra tsicã tuhun nyico ra naha tsi ra nácaa tyin nyehé ra. Tan catyí ra tsihin ra naha:

—Tyaa ra nyahyu tinuu yu, tan nacatya nuu yu tan vityin nditsin nyehé yu —catyí ra tsihin ra naha.

¹⁶ Tacan tan catyí juhva ra fariseo naha ra:

—Ra tsa javahã yacan ñavin cuenda Nyoo cuví ra, tyin ña tyaa yahvi ra quívi quitatú yo —catyí ra naha.

Maa tyin catyí inga ra naha

—¿Nacaa tsa cuví javahã ra tsa iyo ihya tatun ra iyó cuatyí cuví ra? —catyí ra naha.

Tan siin siin tsa caahán ra naha. Tan natahvi sava ra naha. ¹⁷ Tan tsicã tuhun nyico ra naha tsi ra nduvahã can inga tsaha, tan catyí ra naha tsihin ra:

—¿Tan yoocho, náa catyí un tuhun ra tsa janduvahã tinuu un? —catyí ra naha.

Tan nacahan ra tan catyí ra:

—Yuhu catyí yu tyin ra cuví ndusu yuhu Nyoo cuví ra —catyí ra.

¹⁸ Maa tyin ra cuví ityi nuu tsihin nyívi Israel ña cuñi ra naha tsinu ñi ra naha tsa cuaa ra can tan nanyehẽ ra. Nda cuanda canã ra naha tsi jutu ra tan tsi sihi ra. ¹⁹ Tan tsicã tuhun ra naha tsi ñi, tan catyí ra naha:

—¿A ra ihya cuví sehe ndo tsa catyí ndo tyin cuaa ra cacũ ra? ¿Nacaa tsa cuví nyehé ra vityin? —catyí ra naha.

²⁰ Nacahan jutu ra tan sihi ra tan catyí ñi:

—Tsitó ndi tyin ra ihya cuví sehe ndi. Tan cuaa ra quívi cacũ ra. ²¹ Maa tyin ña tsitó ndi nácaa tsa cuví nyehé ra vityin. Tan ndi ña tsitó ndi yóo janduvahã tinuu ra. Ndãca tuhun maa ndo tsi ra. Tsa iyó tucu maa cuiya ra. Tan cuví nacatyi tuhun maa ra tsihin ndo —catyí ñi tsihin ra naha.

²² Jutu ra tan sihi ra caahán ñi tacan tsa cuenda tyin yuuhvi ñi tsi ra cuví ityi nuu tsihin nyívi Israel naha ra, tyin tsa natuhun tahan ra naha tyin cua tava cuii ra naha tsi nyívi vehe ñuhu, tun cahan ñi tyin ra Jesús cuví ra Cristo, ra tsa jaquitsi Nyoo. ²³ Yacan cuenda catyí ñi: “Ndãca tuhun ndo tsi maa ra. Ra tsa ñihí cuví ra.”

²⁴ Tacan tan canã nyico ra naha tsi ra tsa nduvahã can inga tsaha. Tan catyí ra naha tsihin ra:

—Nda nuu Nyoo cahan tsa nditsa tsihin ndi. Tyin nyuhu tsitó ndi tyin ra ican, ra iyó cuatyí cuví ra —catyí ra naha.

²⁵ Tacan tan nacahan ra tsa nduvahã can tan catyí ra:

—Yuhu ña tsitó yu taton ra iyó cuatyí cuví ra, a ñavin. Intuhun ñi tsa tsító yu tyin yuhu ra cuaa cuví yu, maa tyin vityin nditsin nyehé yu —catyí ra.

²⁶ Tan tsicá tuhun nyico ra naha tsi ra inga tsaha tan catyí ra naha:

—¿Náa icá ra tsihin un? ¿Nacaa icá ra tan nanyehé un? —catyí ra naha tsihin ra.

²⁷ Tan catyí ra:

—Tsa cahan yu tsihin ndo, tan ña tyaá yahvi ndo tsi yu. ¿Náa cuenda cuñí ndo tsa cahan yu inga tsaha? ¿A cuñí ndihi ndo cunyicun ndo tsi ra can?

²⁸ Tacan tan nduxaḡan ra naha tsi ra, tan catyí ra naha:

—Yooḡo tsa yihí un cuenda ra, maa tyin nyuhu cuenda ra Moisés ra tsa tsicoḡ tsa naha yihí ndi. ²⁹ Nyuhu tsító ndi tyin Nyoo cahan tsihin ra Moisés tahaḡan tsa naha. Maa tyin ra can, ndi ña tsító ndi numaa queḡ ra —catyí ra naha.

³⁰ Tacan tan nacahan ra tsa nduvahḡ can tan catyí ra:

—¿Naa tsa iyo cahnu cuví tsehe! Nyooḡo ña tsító ndo numaa queḡ ra, tan jananyehé ra tsi yu. ³¹ Tsító vaha yo tyin Nyoo ña tyaá soho ra nu caahán ra iyó cuatyí. Maa tyin ra jacahnú tsi ra tan icá ra cuhva cuñí ra, tyaá soho Nyoo tsa caahán ra. ³² Ndi iin tsaha tan ñaha ca cuñí yo taton iyó iin ra jananyehé tsi iin ra cuaa nda cacu ra. ³³ Tun tsatyin ra ihya tan ñavin cuenda Nyoo vatsí ra, nduve tsa cuví javaha ra —catyí ra tsihin ra naha.

³⁴ Tacan tan catyí ra naha tsihin ra:

—Yooḡo ra iyó cuatyí cuví un nda cacu un. ¿Tan cuñí un jacuaḡa un tsi nyuhu? —catyí ra naha.

Tan tavaḡ cuíi ra naha tsi ra vehe ñuhu.

Nyivi tsa nduve tuhun Nyoo iyó añima tumaa tsa cuaa ñi

³⁵ Tsító ra Jesús tyin tavaḡ ra naha tsi ra tsa janduvahḡ ra vehe ñuhu. Tan tsa ñihḡ tahan ra tsihin ra tan catyí ra tsihin ra:

—¿A tsinú iñi yooḡo tsa caahán Rayiḡ tsa queḡ nda gloria? —catyí ra tsihin ra.

³⁶ Tan nacahan ra tan catyí ra:

—Catyí tuhun tsihin yu, taa, yóo ra cuví ra tyin tsinú iñi yu tsi ra —catyí ra tsihin ra.

³⁷ Tan catyí ra Jesús:

—Tsa nyehé un tsi ra. Tan juvin ra natuhún tsihin un —catyí ra tsihin ra.

³⁸ Tacan tan tsicuiñḡ tsi ra tsaha ra Jesús tan catyí ra tsihin ra:

—Tsinú iñi yu tsi un, Jutu Mañi yu —catyí ra tsihin ra Jesús.

³⁹ Tan catyí ra Jesús:

—Yuhu vatsí yu tyin catyí tuhun yu tsa iyó añima nyivi iyó nu ñuhu ñayivi ihya. Tyin nyivi cuaa, ñi ña tsító tuhun Nyoo cua nanyehé ñi tyin coo tuhun Nyoo añima ñi. Tan nyivi cuñí tyin nditsin nyehé ñi, catyí ñi

tyin tsító ñi tuhun Nyoo, coto ñi tyin cuaa ñi tyin ña tsinú iñi tsi yu —catyí ra Jesús.

⁴⁰ Tacan tan juhva ra fariseo tsa nyecú tsihin ra Jesús tsiñḡ ra naha tsa caahán ra, tan catyí ra naha tsihin ra:

—¿A cuaa ndihi tucu nyuhu? —catyí ra naha.

⁴¹ Tacan tan catyí ra Jesús tsihin ra naha:

—Tun tsatyin cuaa ndo cua coto ndo tyin tsiñí ñuhu tuhun Nyoo tsi ndo, tan ña cua coo cuatyí ndo. Maa tyin catyí ndo tyin nyehé ndo tan tsító ndo, yacan cuenda ndoó cuatyí ndo siqui ndo —catyí ra tsihin ra naha.

10

Mbee ticatyí jana Nyoo cuví nyivi yihí cuenda ra, tan tsító ñi tsi ra tsa jaquitsí Nyoo tyin jahá cuenda ra tsi ñi

¹ Caahán nyico ra Jesús tan catyí ra:

—Tsa nditsa catyí yu tsihin ndo, taton iin ra cua quihvi tsitsi cora mbee ticatyí, tan ñavin yuhu cora quihvi ra, ra ican cuví ñasuhu. ² Maa tyin ra tsa quihvi ityi yuhu cora, ra jahá cuenda mbee can cuví ra. ³ Ra nyii yuhu cora can nuña ra tyin quihvi ra jahá cuenda mbee can. Tan mbee can nacotó ti naha ti ndusu ra. Intuhun intuhun ti tan iyó sivi ti jahá ra, caná ra tsi ti tan tavaḡ ra tsi ti ityi tsata cora. ⁴ Tsa yahaḡ tavaḡ ra tsi ti, tan cuahán ra ityi nuu tan nyicún ti naha ti tsi ra, tyin nacotó ti ndusu ra. ⁵ Maa tyin taton nyivi tsa ña nacotó ti ndusu, tsinú ti nuu ñi tan ña cuahán ti cuanyicún ti tsi ñi.

⁶ Tyehen cahan ra Jesús tsihin nyivi. Maa tyin maa ñi ña cutuñí iñi ñi náa tuhun caahán ra tsa caahán ra tacan.

Ra Jesús cuví ra jahá cuenda vaha mbee ticatyí

⁷ Tacan tan catyí ra Jesús tsihin nyivi inga tsaha:

—Tsa nditsa catyí yu tsihin ndo, yuhu cuví tumaa iin yuhu cora nu quihvi nyivi yihí cuenda yu tan cuví ñi tumaa mbee ticatyí jana yu. ⁸ Tandihí ra tsa quitsí tsa ndi cumañi quitsi yu, ra suhu cuví ra naha. Maa tyin mbee jana yu ña tyaḡ yahvi ti naha ti tsa cahan ra naha. ⁹ Yuhu cuví yuvehe gloria. Nyivi tsa cua quihvi yuvehe can, cua cacu ñi tan ña cua cahun ca ñi anyaya. Tan cuví ñi tumaa mbee tsa quihvi tan quitá tsitsi cora can. Tan ñihí ti cuhu tsatsí ti.

¹⁰ Iin ra ñasuhu, vatsí ra, vatsí suhu ra, vatsí cahñi ra, vatsí jativí ra. Maa tyin yuhu vatsí yu tyin coo vaha ndo ñayivi nyitó tsa ña cua naa maa. ¹¹ Yuhu cuví ra vaha jahá cuenda mbee. Tyin ra jahá cuenda mbee tsahá ra ñayivi ra tsa cuenda mbee can. ¹² Maa tyin ra cuví musu, taton nyehé ra vatsí lobo tsa cuví quiti xaan, nacoó ra mbee jana tsitoho ra. Tan tsinú ra. Tyin ñavin jana

maa ra cuví tsi ti naha ti. Tacan tan cua tiin quiti xaan can tsi mbee can. Tan jacunu ti tsi mbee can ityi can tan ityi ihya. ¹³ Musu can tsinú ra tyin jahá tyiñu ra tsa cuenda xuhun ñi. Tan ña jahá cuenda vaha ra tsi mbee can, tyin ñavin jana ra cuví tsi ti naha ti.

¹⁴ Yuhu cuví ra jahá cuenda vaha mbee jana yu. Tan nacotó yu tsi ti naha ti. Tan nacotó tucu maa ti naha ti tsi yu, ¹⁵ tumaa tsa nacotó Jutu yu tsi yu, tan yuhu nacotó yu tsi ra. Yuhu tsahá yu ñayivi yu cuenda mbee jana yu. ¹⁶ Iyó tucu inga mbee jana yu tsa ña yihí tsitsi cora ihya. Cuñí tsi tsa cuhun yu cunaquihin yu tsi ti naha ti. Tan cua tyaa yahvi ti tsi yu. Tan iin ñi nu cua quihí tandihí ti. Tan cua coo intuhun ñi ra cua jaha cuenda tsi ti naha ti.

¹⁷ Jutu yu cuñí ra tsi yu tyin tsahá yu ñayivi yu tsacatyí nyivi. Maa tyin yaha can, tan cua nacuhva nyico ra ñayivi yu. ¹⁸ Yoñi cuví quihin nyaa ñayivi yu, tyin tsa iyó iñi maa yu tan tsahá yu can. Iyó ndatu tsi yu tsa cuhva yu ñayivi yu tan cúu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaa Jutu yu tsi yu —catyí ra Jesús.

¹⁹ Tsa tsiní nyico ra tsa cuví ityi nuu tsihin nyivi Israel naha ra tsa caahán ra Jesús tacan, natahvi sava nyico ra naha inga tsaha. ²⁰ Tan cuaha xaan ra naha catyí:

—¿Nacuenda tyaa yahvi ndo tsi ra can? Tan tatyí ña vaha yihí tsi ra, sana jiñi ra —catyí ra naha.

²¹ Tan inga tucu ra naha catyí:

—Yoñi nyivi yihí tatyí ña vaha tan cuví cahan ñi tacan. ¿A cuví jananyehe tatyí ña vaha can tsi iin ra cuaa? —catyí ra naha.

Nu ña cuñí ra cuví ityi nuu tsihin nyivi Israel tyaa yahvi ra naha tsi ra Jesús

²² Yoo vitsin cuví tan nyivi iyó ñuu Jerusalén jacahnú ñi vico tsa cuenda nu natsinú cuiya nu nacuhva cuenda ñi vehe ñuhu cahnu. ²³ Tan ra Jesús tsicá nuu ra vehe ñuhu can ityi nu nañi corredor ra Salomón. ²⁴ Tan tsinu nduvi ra cuví ityi nuu tsihin nyivi Israel naha ra tsi ra Jesús. Tan quitsahá tsicá tuhun ra naha tsi ra:

—¿Ama cua cahan catsi un tsihin ndi tatun juvin un cuví ra Cristo ra tsa jaquitsí Nyoo? Cahan catsi tsihin ndi vityin ihya —catyí ra naha.

²⁵ Tan catyí ra Jesús:

—Tsa yaha cahan yu tsihin ndo, tan ña tsinu iñi ndo tsa cahan yu. Tyiñu javahá yu nuu Jutu yu yacan cuví tsa ndaa tsa cuenda yu. ²⁶ Maa tyin nyooho ña tsinú iñi ndo tsi yu tyin ñavin mbee jana yu cuví tsi ndo. Tumaa cuhva tsa cahan jihna yu tsihin ndo. ²⁷ Mbee jana yu nacotó ti naha ti ndusu yu, tan yuhu nacotó yu tsi ti naha ti. Tan nyicún ti tsi yu. ²⁸ Yuhu tsahá yu ñayivi nyito tsa ña

cua naa maa coo ti. Tan ña cua cunaa ti. Tan ndi yoñi cuví quihin nyaa tsi ti naha ti tsitsi ndaha yu. ²⁹ Maa Jutu yu tsahá tsi ti naha ti tsi yu. Tan cahnu ca cuví maa ra tan ñavin ca tandihí nyivi. Tan yoñi cuví quihin nyaa tsi ti tsitsi ndaha ra. ³⁰ Yuhu tan Nyoo Jutu yu, iin ñi cuví ndi —catyí ra Jesús.

³¹ Tacan tan ra cuví ityi nuu tsihin nyivi Israel can quihin nyico ra naha yuu tyin cañi ra naha tsi ra. ³² Tan catyí ra Jesús tsihin ra naha:

—Cuaha xaan tsa vaha javahá yu nuu ndo tsihin tunyee iñi Jutu yu. ¿Tan ndaa tsa ña taahán iñi ndo tyin cua cañi ndo tsi yu tsihin yuu? —catyí ra Jesús tsihin ra naha.

³³ Tan catyí ra cuví ityi nuu tsihin nyivi Israel can naha ra:

—Ñavin tsa cuenda tsa vaha javahá un cua cañi ndi tsi un tsihin yuu, cua cañi ndi tsi un tsa cuenda tyin tsicoo cuatyí un nuu Nyoo tsihin tsa caahán un. Tyin iin rayi ñi cuví un, tan jahá un tumaa tsa Nyoo cuví un —catyí ra naha tsihin ra.

³⁴ Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyooho nyoo cuví ndo”, catyí Nyoo.

³⁵ Tsitó yo tyin tsa caahán tuhun Nyoo, ña cua cuví catyí yo tyin ña nditsa. Tan Nyoo jacunañi ra nyoo tsi nyivi naquihin tsa caahán ra. ³⁶ Tatun maa Nyoo nacatsí tsi yuhu tan jaquitsí ra tsi yu nu ñuhu ñayivi ihya ¿nácaa tsa catyí nyooho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu?

³⁷ Tatun ña javahá yu tsa javahá Jutu yu, ña tsinu iñi ndo tsi yu. ³⁸ Maa tyin tatun javahá yu, vasu ña cua tsinu iñi ndo tsi yu, maa tyin tsinu iñi ndo tyiñu javahá yu. Tacan tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

³⁹ Inga nyico tsaha cuñi ra naha tyihi ra naha tsi ra vehe caa, maa tyin ra Jesús cuahán ñi ra.

⁴⁰ Tacan tan cuanuhu ra ityi nu caná ñicanyii inga tsiyo yutya cahnu Jordán nu jacoondutya ra Juan tsa jihna, tan ndoo ra ican. ⁴¹ Cuaha nyivi tsahan tsinyehe tsi ra, tan catyí ñi:

—Nditsa, vasu ndi intuhun tsa iyo ña javahá ra Juan, maa tyin tandihí tsa cahan ra cuenda ra ihya tan nditsa —catyí ñi.

⁴² Tan cuaha xaan nyivi tsa iyó ityi can tsinu iñi tsa caahán ra Jesús.

11

Nu tsihi ra Lázaro

¹ Ñuu Betania tsicoo iin ra cuuhvi tsa nañi Lázaro. Tan ñuu can iyó ña María tsihin ña Marta tahan ña. ² Ña María, cuhva ra Lázaro, juvin ña cuví ñaha tsa tyoso ndutya tami tsaha Jutu Mañi yo, tan jana ityi ña tsaha ra

tsihin ixi jñi ña. ³ Tacan tan nduvi taahan ñi, ña María tan ña tahan ña, jacoto ñi tsi ra Jesús tan catyí ñi:

—Ra vaha iñi tsi un, cuuhví xaan ra.

⁴ Tsa tsiñi ra Jesús yacan tan catyí ra:

—Cuehe can ña cua cahñi can tsi ra. Cuuhví ra tyin quivi nduvaha ra cua nyehe nyivi tyin cahnu xaan cuví Nyoo tan tacan tucu Sehe ra —catyí ra Jesús.

⁵ Cuñi xaan ra Jesús tsi ña Marta tan ña tahan ña, tan ra Lázaro cuhva ñi. ⁶ Maa tyin quivi tsa tsiñi ra tyin cuuhví ra Lázaro, ndoo ra uvi quivi ca nu nyii ra. ⁷ Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

⁸ Tacan tan ra tsicá tsihin ra catyí ra naha tsihin ra:

—Maestro, ñaha ca ndunaha tsa cuñi ra cuví ityi nuu tsihin nyivi Israel naha ra cahñi ra naha tsi un tsihin yuu. Tan vityin, cuñi nyico un cuhun un inga tsaha ¿Nacuenta?

⁹ Tan catyí ra Jesús:

—¿A ñavin utsi uvi hora iyó tsa iin quivi? Tyin tatun tsinu cahñi tsicá nuu iin ra, ña cua nduva ra tyin nditsin nyehe ra ñuhu tsa jandunditsín nu ñuhu ñayivi ihya. ¹⁰ Maa tyin tatun tsacuaa tsicá nuu ra, cuví nduva ihñi ra tyin nduve ñuhu Nyoo jandunditsín nu cuahan ra.

¹¹ Tacan tan quitsahá catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cuhun yu jandoto yu tsi ra —catyí ra tsihin ra naha.

¹² Tacan tan catyí nyico ra tsicá tsihin ra:

—Taa, tatun quixí ra, cuñi tsi catyí can tyin cua nduvaha ra —catyí ra naha.

¹³ Maa tyin ra Jesús cuñi ra catyí ra tyin ra Lázaro tsa tsihi ra. Tan ra tsicá tsihin ra, cuñi maa ra naha tyin nditsa tsa quixí ra. ¹⁴ Tacan tan cahān catsi ra Jesús tsihin ra naha:

—Ra Lázaro tsa tsihi ra. ¹⁵ Tan cusii iñi yu tyin yofi yu nyii ndacan. Tyin tacan vaha ca tsa cuenda nyoocho na tsinu iñi ndo tsa caahān yu. Cohon ndo cunyehe yo tsi ra —catyí ra Jesús tsihin ra naha.

¹⁶ Tacan tan ra Tomás, tsa jacunañi ra naha “tinihi”, catyí ra tsihin inga ra tsicá tsihin ra Jesús:

—Cohon ndihi yo tyin cúu yo iin caa ñi tsihin ra —catyí ra.

Ra Jesús cuví ra janandotó tsi yo tan tsahá ra ñayivi nyito coo yo

¹⁷ Tsa tsaa ra Jesús Betania, ñihi tuhun ra tyin tsa cumi quivi nyii ra Lázaro tsitsi ñuhú. ¹⁸ Ñuu Betania can canyii tsi yatyin ñi nu canyii ñuu Jerusalén, tumaa iin cuhva tsa uvi kilómetro sasava. ¹⁹ Tan cuaha ra cuví ityi nuu tsihin nyivi Israel cuahan cua

nyehe nu nyii ña Marta tan ña María cua jatinyee ra naha tsi ñi tyin tsihi cuhva ñi. ²⁰ Tan ñihi tuhun ña Marta tyin tsa cua tsaa ra Jesús. Tan cuahān ña cua jatahan ña tsi ra. Maa tyin ña María ndoo ña yuvehe. ²¹ Tan catyí ña Marta tsihin ra Jesús:

—Jutu mañi yu, tun tsatyin ihya nyii maa un, ña cua cúu cuhva yu. ²² Maa tyin yuhu tsitó yu tyin Nyoo cua javaha ra tandihi tsa ndacan un tsi ra —catyí ña tsihin ra.

²³ Tan catyí ra Jesús tsihin ña:

—Cuhva un cua nandoto ra.

²⁴ Tan catyí ña Marta:

—Nditsa, tsitó yu tyin cua nandoto ra quivi nandoto ndiyi nu cua cundihí quivi —catyí ña.

²⁵ Tacan tan catyí ra Jesús tsihin ña:

—Yuhu cuví ra janandotó ndiyi. Tan tsahá yu tsa coo nyitó nyivi. Nyivi tsinú iñi tsa caahān yu, vasu tsa tsihi ñi maa tyin coo nyico ñi. ²⁶ Tan tandihi ñi nyitó tan tsinú iñi ñi tsi yu, ña cua cúu ñi. ¿A tsinú iñi un tsa caahān yu ihya? —catyí ra tsihin ña.

²⁷ Tan catyí ña:

—Tsinú iñi yu, Jutu Mañi yu, tyin yooho cuví ra Cristo Sehe Nyoo, ra tsa nyaá tsa quitsi nu ñuhu ñayivi ihya —catyí ña.

Nu tsacū ra Jesús nu ñaña ra Lázaro

²⁸ Tsa yahá tsa cahān ña Marta tacan, tan tsahan ña tsiquihñi ña tsi ña María tahan ña, tan xeehe ñi cahān ña tsihin ña:

—Tsa tsaa Ra Maestro ihya. Tan caná ra tsi un —catyí ña.

²⁹ Tsa tsiñi ña María tsa caahān ña, numi xaan ña nduvitā ña, tan cuahān ña nu nyii ra Jesús. ³⁰ Tan ñaha ca quihvi ra Jesús tsitsi ñuu hora can, ndi nyii ra nu nañihñi ña Marta tsi ra. ³¹ Tan nda yuvehe ña María, yucú ra cuví ityi nuu tsihin nyivi Israel jatinyee ra naha tsi ñi. Tan nyehe ra naha tyin numi quitā ña. Tan cuñi maa ra naha tyin cuahān ña nu ñaña cua vacu ña. Tan cuahān ndihi ra naha tsata ña.

³² Tan cuhva tsa tsaa ña María nu nyii ra Jesús tsicuiñi tsiti ña tsaha ra, tan catyí ña:

—Jutu Mañi yu, tun tsatyin nyii un ihya, ña tsihi ra cuhva yu —catyí ña.

³³ Tsa nyehe ra Jesús tyin tsacú ña María tan tsacú ra Israel tsa cuahan tsihin ña, nducuihiya xaan cuñi ra. ³⁴ Tan tsicā tuhun ra tsi ñi:

—¿Nu maa tinyii ndo tsi ra? —catyí ra.

Tan catyí ñi:

—Jutu Mañi yu, cohon tan nyehe un —catyí ñi tsihin ra.

³⁵ Tan tsacū ra Jesús.

³⁶ Tacan tan catyí ra Israel can naha ra:

—Nyehe ndo tyin yahá xaan cuñi ra tsi ra —catyí ra naha.

³⁷ Maa tyin catyí juhva ra naha:

—Ra ihya jananyehē ra tsi ra cuaa. ¿Nacuvi tyin ña cuví ica ra iin cuhva tan ña cúu ra Lázaro ihya? —catyí ra naha.

Nu janandotō ra Jesús tsi ra Lázaro

³⁸ Nducuihya xaan cuñi nyico ra Jesús inga tsaha tan natuhvā ra nu ñaña can. Tyin tsitsi yavi yuu cuví can. Tan ndasi iin yuu yuhu can. ³⁹ Tan catyí ra Jesús:

—Jatsiyo ndo yuu can —catyí ra.

Tan ña Marta, cuhva ndiyi can, catyí ña:

—Maa tyin tsa caná xico iñi, Jutu Mañi yu, tyin tsa cumi quivi tsa nyii ra ican —catyí ña.

⁴⁰ Maa tyin catyí ra Jesús tsihin ña:

—¿A ña caahán yu tsihin un tyin tatun tsinú iñi un, cua nyehe un tsa cahnu cuví Nyoo? —catyí ra tsihin ña.

⁴¹ Tacan tan jatsiyo ra naha yuu can. Tan nanyehē ndaa ra Jesús ityi andivi, tan catyí ra:

—Tyatya, Jutu Mañi yu, tyahvi nyoo tsi un tyin tsiñi un tsa caahán yu. ⁴² Yuhu tsitó yu tyin maa ñi maa tsiñi un tsa caahán yu. Maa tyin tyehen caahán yu tsa cuenda tsa vaha tsi nyivi nyecú ihya, na tsinu iñi ñi tyin maa un jaquitsi tsi yu —catyí ra Jesús tsihin Nyoo.

⁴³ Tsa yahā tsa cahan ra tacan, canā tsaa ra, tan catyí ra:

—¡Lázaro, quita nu nyii un juvin!

⁴⁴ Tan quita ra tsa tsihi can, cavá nuu iin jahma tsi ra, tan nuuhñi ndaha ra tan tsaha ra tsihin jahma. Tan nuuhñi nuu ra tsihin iin jahma tumaa javahá nyivi Israel tsihin ndiyi. Tan catyí ra Jesús tsihin nyivi nyecú ican:

—Ndatsi ndo tsi ra. Tan jaña ndo tsi ra na cuhun ra —catyí ra Jesús tsihin ñi.

Nu nducú cahñi ra naha tsi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Tan cuaha xaan ra cuví ityi nuu tsihin nyivi Israel tsa tsahan tsihin ña María quit-sahā tsinú iñi ra naha tsa nyehe ra naha tsa javahā ra Jesús. ⁴⁶ Maa tyin juhva ra naha tsahan ra naha tsijacotō ra naha tsi ra fariseo naha ra tsa javahā ra Jesús. ⁴⁷ Tacan tan ra fariseo can naha ra tan ra cuví ityi nuu tsihin ra jutu naha ra jatitahan ra naha tsi ra tuhvā ndu iin naha ra tan catyí ra naha:

—¿Nacaa cua javaha yo? Tyin cuaha xaan tsa iyo javahá ra can. ⁴⁸ Tatun cuhva yo tsa javaha ca ra tacan, tandihi nyivi tan cua tsinu iñi ñi tsi ra. Tan ra cumi tyiñu nda ñuu Roma cua quitsi ra naha tan cua cani ra naha vehe ñuhu yo tan ñuu yo —catyí ra naha.

⁴⁹ Maa tyin ra Caifás ra tsahnu tsa cuví ityi nuu tsihin ra jutu naha ra cuiya can, cahan ra tan catyí ra tsihin ra naha:

—Nyooho nduve maa náa tsitó ndo. ⁵⁰ Ndi ña cutuñi iñi ndo tyin vaha ca tsa cúu in-tuhun ñi rayi tsa cuenda tandihi nyivi ñuu, tan ñavin ca tsa cúu tandihi yo —catyí ra Caifás.

⁵¹ Ra Caifás can ñavin tsa cuñi maa ra tan caahán ra, tyin ra cuví ityi nuu tsihin tandihi jutu cuví ra cuiya can, yacan cuenda maa Nyoo jacahan tsi ra nu catyí ra tyin ra Jesús cua cúu ra tsa cuenda tandihi nyivi ñuu Israel. ⁵² Tan ñavin tsa cuenda maa ñi maa nyivi can, maa tyin cua jandu iin ra tsi tandihi nyivi cuví sehe Nyoo tsa iyó tandihi ca ñuu. ⁵³ Tacan tan nda quivi can tan ra cuví ityi nuu tsihin nyivi Israel can naha ra, nducú ra naha cuhva cahñi ra naha tsi ra Jesús.

⁵⁴ Yacan cuenda ña tsicá nuu nditsin ca ra Jesús nu iyó nyivi Israel. Quee ra Judea can. Tan cuahán ra iin ñuu tsa nañi Efraín tsa canyi yatyin ñi nu tsiqui, nu cuví ñuhu ityi. Tan ndoo ra ican tsihin ra tsicá tsihin ra.

⁵⁵ Ña cuaha ca quivi tan tahan tsi vico cuenda nyivi Israel, vico tsa nañi pascua. Tan cuaha xaan nyivi quee ñi ñuu ñi tan cuahán ñi nda ñuu Jerusalén cua javaha ñi tsa tuhvā maa ñi javahá tsa janduvahá ñi tsi ñi nuu Nyoo tsa ndi cumañi ca tahan tsi quivi vico can. ⁵⁶ Nanducú ñi tsi ra Jesús. Tan cuhva tsa nyecú ñi tsitsi vehe ñuhu cahnu can tan tsicá tuhun tahan ñi, tan catyí ñi:

—¿Nacaa cuñi nyoocho? ¿A cua quitsi ra can vico ihya, o ña cua quitsi ra? —catyí ñi.

⁵⁷ Tan ra cuví fariseo tan ra cuví ityi nuu tsihin jutu, catyí ra naha tyin tatun ndaa nyivi tsitó nu nyii ra Jesús, na catyí tuhun ñi. Tyin cuquihin ra naha tsi ra tyin cunyi ra vehe caa.

12

Nu tyosó ña María ndutya tami tsaha ra Jesús

(Mt. 26.6-13; Mr. 14.3-9)

¹ Cumañi iñu quivi ca tsa tahan tsi vico pascua, tan tsaa ra Jesús ñuu Betania nu iyó ra Lázaro, ra tsa janandotō ra. ² Ican javahā ñi tsa cuxiñi ra Jesús. Ña Marta tyihi ña coho nu mesa. Tan tsinyaa ra Jesús nu mesa. Tan nyaá ndihi tucu ra Lázaro tsihin ra. ³ Tacan tan quihin ña María tumaa sava litru ndutya tami tsa tsinu tsihin maa ñi maa yucu tsa nañi nardo, iin tsa yahvi xaan nyaá. Tan tyiso ña ndutya tami can tsaha ra Jesús. Yahā can tan jana ityi ña tsaha ra tsihin ixi jiñi ña. Nani cahnu maa tsitsi vehe can tsity xico ndutya tami can. ⁴ Tan ican nyii tucu ra Judas Iscariote, sehe ra Simón. Cuví ra iin ra tsicá tsihin ra Jesús. Tan juvin ñi maa ra cuví ra tsa cua xico tsi ra Jesús tsi

nu xaan iñi tsi ra nahn. Tan quitsahā catyí ra Judas can tsihin ñi can:

⁵ —¿Nacuenta ña xico ndo ndutya tami ihya tsi nyivi, tan cuhva ñi cuenda mil tsi ndo tsa cuenda can, (uñi cientu denario) tan jatinyee ndo tsi nyivi ndaahvi? —catyí ra.

⁶ Caahán ra Judas yacan tyin ra ñasuhu cuví ra, ñavin tsa cundaahvi iñi ra nyehé ra tsi nyivi ndaahvi. Tyin maa ra yihí ndaha yitin nu yihí xuhun ra naha, tan tuhvá ra suhu tsa tyihí ra naha tsitsi yitin can. ⁷ Tacan tan catyí ra Jesús tsihin ra:

—Jaña tsi ña, tyin ñaha ihya javahā ña tye-
hen tsa cuenda tsa cua quihvi cuñu ñuhu yu
tsitsi ñuhu. ⁸ Nyivi ndaahvi tacan ñi nyecú
maa ñi tsihin ndo, maa tyin yuhu ña cua
cunyah ca yu tsihin ndo tacan —catyí ra
Jesús tsihin ra Judas.

*Nu nducú cahñi ndihi ra Israel naha ra tsi
ra Lázaro*

⁹ Cuaha xaan nyivi Israel ñihí tuhun ñi
tyin ra Jesús nyii ra Betania, tan tsahān ñi
ican. Ñavin intuhun ñi ra Jesús cuñi ñi nyehe
ñi tyin cuñi ndihi tucu ñi nyehe ñi tsi ra
Lázaro, ra tsa janandotó ra Jesús. ¹⁰ Tacan
tan ra cuví ityi nuu tsihin jutu natuhun
tahan ra naha tyin cua cahñi ndihi ra naha
tsi ra Lázaro. ¹¹ Tyin tsa cuenda ra tan cuaha
xaan nyivi Israel quitá tsiyo ñi tan quitsahā
tsinú iñi ñi tsi ra Jesús.

*Nu quihvi ra Jesús ñuu Jerusalén
(Mt. 21.1-11; Mr. 11.1-11; Lc. 19.28-40)*

¹² Cuaha xaan nyivi tsaa ñi ñuu Jerusalén
tsa cuví vico pascua. Tan tsa inga quivi tsitó
ñi tyin ra Jesús cua tsaa ra ñuu can. ¹³ Tacan
tan tsahnyā ñi ndaha ndicaha tan cuahán ñi
cua jatahan ñi tsi ra Jesús. Tan caná tsaa ñi,
tan catyí ñi:

—¡Cahnu xaan cuví Nyoo! ¡Nasoco xaan
Nyoo tsi ra vatsí ihya tsihin tunyee iñi Nyoo!
¡Nasoco xaan Nyoo tsi Rey cuenda yo nyivi
Israel! —catyí ñi, caná tsaa ñi.

¹⁴ Tan ñihí ra Jesús iin burru tan tsicosó ra
tsi ti tumaa catyí maa nu tutu Nyoo tyehen:

¹⁵ Ña ñayuhvi ndo nyivi ñuu Sión

Nyehe ndo, vatsí Rey ndo.

Yosó ra iin burru —catyí tsi nu tutu Nyoo.

¹⁶ Quiví can ra tsicá tsihin ra Jesús, ña
cutuñi iñi ra naha tsa nyaá nu tutu Nyoo.
Maa tyin tsa yahā cuanuhu ra Jesús nda
gloria, nducuhun iñi ra naha tyin tandihi
yacan nyaá can nu tutu Nyoo tyin tacan cua
tahan ra. Tan tacan tsa cuvi tahān ra.

¹⁷ Nyivi tsa nyehe quivi tsa canā ra Jesús
tsi ra Lázaro tsitsi ñaña, quivi janandotó ra
tsi ra, nacatyí tuhun ñi tsa nyehe ñi. ¹⁸ Yacan
cuenda cuaha xaan nyivi tsijatahan tsi ra
Jesús, tyin tsitó ñi tsa iyo tsa javahā ra.
¹⁹ Tacan tan ra cuví fariseo catyí ra naha
natuhun tahan ra naha:

—Tsa nyehé maa ndo tyin nduve maa náa
cuví javahā yo, tyin tandihi nyivi tan cuahán
ñi cuanyicún ñi tsi ra —catyí ra naha.

*Nu nanducú juhva ra tsa quee Grecia tsi
ra Jesús*

²⁰ Yucú tucu juhva ra Grecia mahñu nyivi
tsa tsahān tsijacahnu vico ñuu Jerusalén.
²¹ Tacan tan natuhvā ra Grecia can naha ra
nu nyaá ra Felipe, ra quee ñuu Betsaida tsa
canyii Galilea, tan cahan ndaahvi ra naha
tsihin ra tan catyí ra naha:

—Taa, cuñi ndi cahan ndi tsihin ra Jesús
—catyí ra naha.

²² Tan tsahān ra Felipe tsicahān ra tsi-
hin ra Andrés. Tan tsahān nduvi ra naha
tsicatyí tuhun ra naha tsihin ra Jesús tyin
ra Grecia can cuñi ra naha cahan ra naha
tsihin ra. ²³ Tan nacahān ra Jesús, tan catyí
ra:

—Vityin tsa tsaa hora tsa cunuhu nyico
yu nda nu quee yu, tan cua jacahnu jutu
yu tsi yu, tsa cuví yu Rayii tsa quee nda
gloria. ²⁴ Tsa nditsa catyí yu tsihin ndo tyin
tatin iin tsiti tan ña cua quihvi tsi ñuhu tan
ñi tyahyu tsi, intuhun ñi tsiti cua cuví tsi.
Maa tyin tatin tyahyu tsi, ndutsaa tsi inga
tsaha tan cua coo cuaha ca tsiti tsi. ²⁵ Nyivi
tsa cuñi xaan ñayivi iyó ñi, cua cunaa ñi.
Maa tyin nyivi ña cuñi ñayivi iyó ñi nu ñuhu
ñayivi ihya, cua ñihí ñi ñayivi nyitó tsa ña cua
naa maa coo ñi. ²⁶ Ndāa nyooho nyivi cuñi
javaha tyiñu nuu yu, naha ndo quitsi nyicun
ndo tsi yu. Tan nu cunyah yu, cunyah ndihi
nyooho tsa jahā tyiñu tyiñu yu. Tyin nyivi
jahā tyiñu tyiñu yu, cua jacahnu jutu yu tsi
ñi.

Nu caahán ra Jesús nácaa cua cúu ra

²⁷ Vityin tsicá xaan iñi yu. Tan ¿náa cua
cahan yu? ¿A catyí yu tsihin jutu yu na
jatsiyo ra tundoho tsa nyaá cua nyehe yu?
Ña cua cahan yu tacan tyin tsa cuenda ya-
can vatsí yu nu ñuhu ñayivi ihya. ²⁸ Vaha ca
cahan yu tsihin jutu yu tan catyí yu: “Jutu
Mañi yu, jacahnu sivi un” —catyí ra Jesús.

Tacan tan cahan iin ndusu ityi andivi tan
catyí tsi tyehen:

—Tsa yahā jacahnu yu sivi yu, tan cua
jacahnu nyico yu inga tsaha —catyí ndusu
can.

²⁹ Tan nyivi nyecú ican, tsiñi ñi ndusu can,
tan catyí ñi tyin savi cahan. Tan inga ñi catyí
tyin iin ángel cahan tsihin ra.

³⁰ Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu
cahan ndusu can, tyin tsa cuenda tsa vaha
tsi maa ndo cuví can. ³¹ Vityin cuví cuhva
tsa cua tatsi tuñi Nyoo tsi nyivi iyó nu ñuhu
ñayivi. Tan vityin cuví cuhva cua tava cuvi
Nyoo tsi nu ndacá ñaha nu ñuhu ñayivi ihya.
³² Tan cuhva tsa cua ticaa nyivi tsi yu nu

cruu, yacan cuví cuhva cua ixta yu tandihí nyívi cahun ñi tsihin yu —catyí ra Jesús.

³³ Caahán ra tacan tsa cuenda tsa cuñí ra cutuñí iñi ñi tyin tacan cua cúu ra. ³⁴ Tan nacahan nyívi tan catyí ñi tsihin ra:

—Tuhvá ndi tsiñí cahví ra naha nu libru ley yo tyin ra cuví Cristo cua coo nyitó ra tan ña cua cúu maa ra. ¿Nacaa tsa catyí yooho tyin cua ticaa nyívi tsi Rayí quee nda gloria nu cruu? Tan ¿yóo ra cuví Rayí tsa quee nda gloria tsa caahán un tuhun? —catyí ñi, tsicá tuhun ñi tsi ra.

³⁵ Tacan tan catyí ra Jesús tsihin ñi:

—Ñuhu tsa jandunditsin nu nycú ndo, juhva ña quívi iyó tsi. Caca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyívi tsicá nu naa ña tsitó ñi nu maa cuahán ñi. ³⁶ Tsinu iñi ndo tsi yuhu ra cuví ñuhu nditsin, tsitsi tsa ndi nyívi yu tsihin ndo. Tacan tan cuví ndo nyívi iyó nu nditsin.

Tsa yahá cahan ra Jesús tacan tan jatsiyo ñi ra tsi ra nuu ñi.

Nu caahán tsi náa cuenda ña tsinú iñi ra cuví ityi nuu tsihin nyívi Israel naha ra tsi ra Jesús

³⁷ Vasu ndi maa cuaha xaan tsa iyo javahá ra Jesús nuu nyívi maa tyín ña tsinú maa iñi ñi tsa caahán ra. ³⁸ Tyin taahán tsi tsa cuví tumaa tsa cahan ra Isaías ra cuví ndusu yuhu Nyoo, nu cahan ra tyehen:

Jutu Mañi yu, yofi cuñí tsinu iñi tsa caahán ndi.

Yofi cutuñí iñi tunyee iñi tsa iyó tsi un, Jutu Mañi yu, catyí ra Isaías tahan tsanaha.

³⁹ Tsa cuenda tsa nyaá nu tutu, yacan cuenda ña cuví tsinu iñi ñi tyin juvin ñi tyaa nyico tucu ra Isaías tyehen:

⁴⁰ Nyoo jacuaa ra tsi ñi. Tan jandundava ra añima ñi,

tan ña cua nyehe ñi tsihin tinuu ñi, tan ña cua cutuñí iñi ñi tsihin añima ñi, tan ndi ña cua nacuhva cuenda ñi tsi ñi tsi ra tan janduvaha ra tsi ñi.

⁴¹ Ra Isaías cahan ra tyehen tyin nyehe ra tsa cahnú cuví Jutu Mañi yo Jesús, tan cahan ra tuhun ra.

⁴² Cuaha xaan nyívi Israel tsinú iñi tsi ra Jesús. Tan nda cuenda juhva ra cuví ityi nuu naha ra. Maa tyín ña jandunditsin ra naha tsi ra naha nuu nyívi tyin yuuhví ra naha tsi ra cuví fariseo naha ra. Coto tava cuí ra can naha ra tsi ra naha vehe ñuhu. ⁴³ Tyín cuñí ra naha nduvaha ra naha nuu nyívi tan ñavin nuu Nyoo.

Tuhun cahan ra Jesús cua tatsi tuñi tsi nyívi

⁴⁴ Ñihi caahán ra Jesús, tan catyí ra:

—Nyívi tsa tsinú iñi tsi yu, ñavin tsi maa ñi maa yu tsinú iñi ñi, tyín tsinú ndihí iñi

ñi tsi ra tsa jaquitsi tsi yu. ⁴⁵ Tan nyívi tsa nyehe tsi yu, nyehe ndihí ñi tsi ra tsa jaquitsi tsi yu. ⁴⁶ Yuhu cuví tumaa ñuhu nditsin tan vatsi yu jandunditsin yu nu ñuhu ñayívi ihya, tyin nyívi tsinú iñi tsi yu ña cua ndoo ñi nu naa. ⁴⁷ Maa tyín tatun yihí ndo tsiñí ndo tsa caahán yu, tan ña javahá ndo tsa caahán yu, ñavin yuhu tatsi tuñi tsi ndo. Tyín ña vatsi yu nu ñuhu ñayívi ihya tyín tatsi tuñi yu tsi nyívi. Vatsi yu tyín vatsi jacacú yu tsi ñi. ⁴⁸ Nyívi tsa ña cuñí naquihin vaha tsa caahán yu tan ña cuñí ñi javaha ñi tumaa cuhva cuñí yu, iyó tsa cua tatsi tuñi tsi ñi. Tuhun tsa caahán yu, yacan cua tatsi tuñi tsi ñi nu cua cundihí quívi. ⁴⁹ Tyín ñavin cuenda maa yu caahán yu. Jutu yu, ra tsa jaquitsi tsi yu, tsahá ra tyiñu tsi yu caahán ra náa cua cahan yu tan náa cua jacuaa yu. ⁵⁰ Tan tsitó yu tyín tyiñu tsa tsahá ra, tsahá tsi ñayívi nyitó tsa ña cua naa maa coo nyívi. Yacan cuenda, tandihí tsa caahán yu, caahán yu cuhva catyí maa Jutu yu tsa cahan yu.

13

Nu nacatyá ra Jesús tsaha ra tsicá tsihin ra

¹ Tsa ndi cumañi ca iin quívi tan tahan tsi vico pascua, tsa tsitó maa ra Jesús tyín tsa cua tsaa hora tsa cua quita ra nu ñuhu ñayívi ihya tan cunuhu ra nu nyaá Jutu ra. Tacan ñi maa cuñí xaan ra tsi nyívi cuenda ra tsa iyó nu ñuhu ñayívi ihya. Tan vityin cua janaha ra tsi ñi tyín cuñí xaan ra tsi ñi tyín cua cúu ra tsa cuenda ñi.

² Tan cuxiñi ra Jesús tsihin ra tsicá tsihin ra. Tan quihvi nu ña vaha añima ra Judas Iscariote sehe ra Simón tan natyuhu nu tsi ra na xico ra tsi ra Jesús tan cuhva cuenda ra tsi ra Jesús tsi nu xaan iñi tsi ra. ³ Maa tyín ra Jesús tsitó ra tyín tsahá Jutu ra tandihí tyiñu tsi ra tyín quihí ndaha ra. Tan tsitó ra tyín nu nyaá Nyoo quee ra tan juvin ñi ndacan cua cunuhu nyico ra. Tan nyaá ra Jesús cuxiñi ra. ⁴ Tacan tan nduvita ra tan tava ra jahma tsa nditsi ra ityi tsata, tan tsahñi ra iin toalla tsitsi ra. ⁵ Tacan tan tyihí ra ndutya tsitsi iin tsicoho tan quitsahá nacatyá ra tsaha ra tsicá tsihin ra. Tan jana ityi ra tsaha ra naha tsihin toalla can.

⁶ Tan tsa cua nacatya ra tsaha ra Simón Pedro tan catyí ra Simón tsihin ra:

—Jutu Mañi yu, ¿a yooho cua nacatya tsaha yu?

⁷ Tacan tan catyí ra Jesús:

—Vityin ña cutuñí iñi un tsa javahá yu, maa tyín cutuñí iñi maa un nu cuahán ca tsi quívi.

⁸ Maa tyín ra Pedro catyí ra tsihin ra:

—Ndi iin tsaha tan ña cua cuhva yu nacatya un tsaha yu.

Tan catyí ra Jesús tsihin ra:

—Tatun ña cua nacatya yu tsaha un, ñavin ca cuenda yu cua cuvi un.

⁹ Tacan tan catyí ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuenda ndaha yu tan jiñi yu —catyí ra.

¹⁰ Maa tyin catyí ra Jesús tsihin ra:

—Nyivi tsa ndi tsityi, ña cuñi tsi tsa ndoo naniñ cahnu cuñi ñuhu ñi. Tsaha ña ñi cuñi tsi ndoo, tyin tsa ndoo maa naniñ ñi. Nyooho tsa ndoo maa ndo, vasu ña tandihi ndo ndoo —catyí ra Jesús.

¹¹ Cahan ra tsa ña tandihi ra naha ndoo tyin tsitó ra yoo cua xico tsi ra tsi nu xaan iñi tsi ra nahnu.

¹² Tsa yaha nacatya ra Jesús tsaha ra tsicá tsihin ra, tan tsinditsi nyico ra jahma ra, tan tsinyaq nyico ra inga tsaha nu mesa tan catyí ra tsihin ra naha:

—¿A cutuñi iñi nyooho tsa javaha yu tsihin ndo? ¹³ Nyooho caahán ndo tsihin yu, “Maestro tan Jutu Mañi yu”, tan nditsa tyin yacan cuvi yu. ¹⁴ Yuhu tsa cuvi yu Ra Jacuahá tan Jutu Mañi ndo, nacatya yu tsaha ndo, tan tacan cuñi tsi tsa nacatya tahan maa ndo tsaha ndo. ¹⁵ Yuhu tsaha yu iin cuhva tsi ndo tyin javaha ndo tumaa cuhva javaha maa yu. ¹⁶ Tsa nditsa catyí yu tsihin ndo tyin ndi iin musu tan ña cahnu ca cuvi ra tan ñavin ca tsitoho ra. Tan ndi iin ra tsa cuahán tyiñu, tan ña cahnu ca cuvi ra tan ñavin ca ra tsa tava tyiñu tsi ra. ¹⁷ Tatun cutuñi iñi ndo yacan, tan javahá ndo can, sii xaan cua coo ndo.

¹⁸ Ñavin tsa cuenda tandihi ndo caahán yu. Yuhu tsitó maa yu yoo nacatsi yu. Maa tyin cuñi tsi tsa cuvi tumaa caahán tuhun Nyoo tyehen: “Ra tsa tsatsi paan tsihin yu, juvin ra cua xico ñaha tsi yu tsi nu xaan iñi tsi yu”, catyí tsi nu tutu Nyoo. ¹⁹ Caahán yu tyehen tsihin ndo tsa ndi cumañi ca cuvi can tyin quivi cua cuvi yacan, cua tsinu iñi ndo tyin yuhu cuvi ra tsa iyó nda ndi cumañi ca coo tandihi tsa iyó. ²⁰ Tsa nditsa catyí yu tsihin ndo tyin nyivi naquihin vaha tsi nyivi tsa jacuhún yu tsi ñi, maa yu naquihin vaha ñi cuvi can. Tan nyivi tsa naquihin vaha tsi yuhu, naquihin vaha ndihi ñi tsi ra tsa jaquitsi tsi yu —catyí ra Jesús.

Nu jacotó ra Jesús tyin cua xico ra Judas tsi ra tsi nu xaan iñi tsi ra nahnu

(Mt. 26.20-25; Mr. 14.17-21; Lc. 22.21-23)

²¹ Tsa yaha tsa cahan ra Jesús yacan, tan quitsaha nducuihyá xaan cuñi añima ra, tan catyí catsi ra:

—Tsa nditsa catyí yu tsihin ndo, tyin iin nyooho cua xico ndo tsi yu tsi nu xaan iñi tsi yu —catyí ra Jesús.

²² Tacan tan ra tsicá tsihin ra, quitsaha nyehé nuu tahan ra naha, tan ña tsitó ra

naha yoo tuhun caahán ra Jesús. ²³ Iin ra tsicá tsihin ra Jesús nyanaá ra tsi ra nu nyaá ra cuxiñi ra. Tan ra ican cuvi ra tsa cuñi xaan ra Jesús. ²⁴ Tan ra Simón Pedro javaha ra seña tsi ra can, na ndaca tuhun ra yoo tuhun caahán ra Jesús. ²⁵ Tacan tan ra ican tsinyaá naa ca ra tsi ra Jesús, tan tsicá tuhun ra tsi ra:

—Jutu Mañi yu, ¿yoo ra cuvi ra tsa caahán un tuhun?

²⁶ Tan nacahan ra Jesús tan catyí ra:

—Cua jatyi yu luxu paan, tan ra tsa cua cuhva yu itsi, ra ican cuvi ra —catyí ra.

Tacan tan quihñ ra luxu paan tan jatyi ra, tan tsaha ra tsi ra Judas Iscariote, sehe ra Simón. ²⁷ Tsa quihñ ra Judas paan can tan quihñ nu ña vaha añima ra. Tacan tan ra Jesús catyí ra tsihin ra:

—Tsa tsicá iñi un javaha un, janumi javaha can —catyí ra Jesús tsihin ra Judas.

²⁸ Maa tyin ndi intuhun ra tsa nyecú nu mesa can, ña cutuñi iñi ra naha nacuenta cahan ra tacan tsihin ra can. ²⁹ Ra Judas cuvi ra yihí ndaha yitin nu yihí xuhun, yacan cuenda yihí ra naha cuñi maa ra naha tyin cuñi ra Jesús tsa cujata ra tsa tsiniñ ñuhu tsi ra naha tsa cuenda vico can, a cuhva ra juhva xuhun can tsi nyivi ndaahvi, cuñi maa ra naha. ³⁰ Tsa yaha quihñ ra Judas paan can, tacan tan quitá ra. Tan tsacuaa cuvi can.

Tyiñu tsa tsa tava ra Jesús tsi yo: tsa cuñi tahan yo tsi yo

³¹ Tsa yaha tsa cuahán ra Judas, tan catyí ra Jesús:

—Vityin cua nyehe nyivi tsa cahnu cuvi yuhu Rayiñ tsa quee nda gloria. Tan cua nyehe ñi tsa cahnu cuvi Nyoo tsa cuenda yu. ³² Tatun Rayiñ tsa quee nda gloria jacahnú ra tsi Nyoo, tacan tucu Nyoo ca jacahnú ra tsi ra. Tsa tsa quivi cua jacahnú ra tsi ra. ³³ Sehe yu, ña naha ca cua cunyi yu tsihin ndo. Nyooho cua nanducu ndo tsi yu, maa tyin tumaa tsa cahan yu tsihin ra cuvi ityi nuu tsihin yo nyivi Israel can naha ra, caahán yu tsihin ndo vityin, tyin ña cua cuvi cuhun ndo nu cua cuhun yu. ³⁴ Tsañá yu iin tyiñu tsa tsi ndo: Cuñi tahan ndo tsi ndo. Tumaa tsa cuñi maa yu tsi ndo, tacan cuñi tsi tsa cuñi tahan ndo tsi ndo. ³⁵ Tatun cuñi tahan ndo tsi ndo, tandihi nyivi tan cua coto ñi tyin nyavi nyicún tsi yu cuvi ndo.

Nu caahán ra Jesús tyin ra Pedro cua cahan ra tyin ña nacotó ra tsi ra

(Mt. 26.31-35; Mr. 14.27-31; Lc. 22.31-34)

³⁶ Ra Simón Pedro tsicá tuhun ra tsi ra Jesús tan catyí ra:

—Jutu Mañi yu, ¿nu maa cua cuhun un? —catyí ra.

Tan nacahan ra Jesús tan catyí ra:

—Nu cuhun yuhu, ña cua cuvi cunyicún un tsi yu vityin. Maa tyin nu cuahán ca tsi quívi, tan cunyicun un tsi yu —catyí ra Jesús.

³⁷ Tacan tan catyí ra Pedro tsihin ra:

—Jutu Mañi yu, ¿nácaa tsa ña cua cuvi cunyicun yu tsi un vityin? Tan tsa iyó vaha ñi yu tsa cuhva yu ñayivi yu tsa cuenda un —catyí ra.

³⁸ Tan nacahan ra Jesús tan catyí ra:

—¿A nditsa tsa cuhva un ñayivi un tsa cuenda yu? Tsa nditsa catyí yu tsihin un, tyin tsa ndi cumañi ca vacu tsaa tsitoocho, yoocho cua cahan un ñi tsaha tyin ña nacotó un tsi yu —catyí ra Jesús tsihin ra Pedro.

14

Ra Jesús cuvi ityi cuhun yo nu nyaá Nyoo Jutu yo

¹ Tan catyí ra Jesús:

—Ña caca xaan ñi ndo. Tsinu ñi ndo tsi Nyoo, tan tsinu ndihi ñi ndo tsi yu. ² Vehe Jutu yu cuaha xaan nu coo ndo iyó. Tun tsatyin ñavin tacan, tsa naha catyí tuhun yu tsihin ndo. Tan cua cuhun yu cua janduvaha yu ñi nu coo ndo. ³ Tsa yaha tsa cuhun yu janduvaha yu nu coo ndo, tan cua quitsi nyico yu inga tsaha, quitsi naquihin yu tsi ndo tyin yucucu ndo nu cua cunyata yu. ⁴ Nyoocho tsa tsitó maa ndo nu maa cuhun yu, tan tsa tsitó ndo ityi.

⁵ Tan catyí ra Tomás tsihin ra:

—Jutu Mañi yu, ña tsitó ndi nu maa cua cuhun un. Tan ¿nácaa coto ndi ityi? —catyí ra.

⁶ Tan catyí ra Jesús:

—Yuhu cuvi ityi tsa cuahán gloria. Tan yuhu cuvi tsa nditsa. Tan juvin ñi yuhu cuvi ra tsahá ñayivi coo ndo. Tan tsa cuenda yuhu ñi, tan cuvi tsaa ndo nu nyaá Jutu yu. ⁷ Tan tsa nacotó ndo tsi yu, tan tsa cuenda yacan nacotó ndihi ndo tsi Jutu yu. Nda vityin tan nu cuahán ca tsi ityi nuu, cua nacotó ndihi ndo tsi ra, tyin tsa nyehé ndo tsi ra —catyí ra Jesús.

⁸ Tacan tan catyí ra Felipe tsihin ra:

—Jutu Mañi yu, cuhva jihna nyehe ndi tsi Nyoo Jutu yo, tan tsihin yacan ñi tan ndoo ndi vaha.

⁹ Tan nacahan ra Jesús, tan catyí ra:

—Yoocho Felipe, tsa naha xaan nyii yu tsihin ndo, tan ¿nácaa tsa caahán un tsa ña nacotó un tsi yu? Nyivi tsa nyehé tsi yu, nyehé ndihi ñi tsi Nyoo Jutu yu. Tan ¿nácaa tsa caahán un tsihin yu: “Cuhva jihna nyehe ndi tsi Nyoo Jutu yo?” ¹⁰ ¿A ña tsinú ñi un tyin iin ñi cuvi yu tsihin Nyoo Jutu yu? Tan maa ra iin ñi cuvi ra tsihin yu. Tsa caahán yu tsihin ndo, ñavin yuhu caahán yacan. Jutu yu tsa iyó tsihin yu, maa ra javahá tyiñu ra tsihin yu. ¹¹ Tsinu ñi ndo tsi yu tyin iin ñi ra cuvi yu tsihin Nyoo Jutu yu. Tan Nyoo

Jutu yu iin ñi cuvi ra tsihin yu. Tatun ña tsinú ñi ndo yacan, cuvi tsinu ñi ndo tsi yu tsa cuenda tyiñu Nyoo Jutu yu tsa javahá yu. ¹² Tsa nditsa caahán yu tsihin ndo tyin nyivi tsinú ñi tsi yu, cua javaha ndihi ñi tsa javahá yu. Tan cahanu ca tsa cua javaha ñi, tyin yuhu cuhun yu nu nyaá Nyoo Jutu yu. ¹³ Tan tandihi tsa cua ndacan ndo tsi jutu yu tsihin sivi yu, cua ñihi ndo can tyin tacan tan jacahnu cuaha ca nyivi tsi Nyoo Jutu yu tsa cuenda yuhu tsa cuvi yu Sehe ra. ¹⁴ Yuhu cua javaha yu náa ndihi tsa ndacan ndo tsa cuenda yu.

Nu caahán ra Jesús tyin cuhva ra Tatyí Ii ra tsi yo

¹⁵ Tatun cuñi ndo tsi yu, tyaa yahvi ndo tsa caahán yu. ¹⁶⁻¹⁷ Tan ndacan tahvi maa yu tsi Nyoo Jutu yu na jaquitsi ra iin ra cua cuhva tunyee ñi tsi ndo. Tan ra ican cuvi Tatyí Ii Nyoo, ra tsa caahán tsa nditsa. Tan iin nyita ñi maa cua cunyata ra tsihin ndo. Maa tyin nyivi tsa taahán ca ñi tsa iyó nu ñuhu ñayivi ihya, ña cua cuvi naquihin ñi Tatyí Ii Nyoo tyin ña nyehe ñi tsi ra. Tan ndi ña tsitó ñi tsi ra. Maa tyin nyoocho tsitó ndo tsi ra tyin nyaá ra tsihin ndo tan tacan ñi cua ndoo ra tsihin ndo. ¹⁸ Ña cua nacao cuvi yu tsi ndo. Cua quitsi nyico yu nu yucú ndo. ¹⁹ Juhva cuvi ña quívi, tan nyivi cuenda nu ñuhu ñayivi ña cua nyehe ca ñi tsi yu. Maa tyin nyoocho cua nyehe ndo tsi yu. Tyin yuhu nyito yu, yacan cuenda nyoocho cua coo ndihi ndo. ²⁰ Quívi can cua coto ndo tyin yuhu iin ñi cuvi yu tsihin Jutu yu. Tan nyoocho iin ñi cuvi ndo tsihin yu. Tan yuhu iin ñi cuvi yu tsihin ndo. ²¹ Nyivi tsa tyaa yahvi tsa caahán yu, tan javahá ñi cuhva caahán yu, ñi ican cuvi ñi tsa cuñi tsi yu. Tan ñi tsa cuñi tsi yu, Jutu yu cua cuñi ra tsi ñi. Tan cuñi ndihi tucu maa yu tsi ñi tan cua janaha yu tsi ñi yóo ra cuvi yu —catyí ra Jesús.

²² Tan catyí ra Judas, ñavin ra Judas Iscariote, inga ra.

—Jutu Mañi yu, ¿nácaa tsa nyuhu ñi cua janaha un tsi un, tan ñavin tsi tandihi nyivi iyó nu ñuhu ñayivi?

²³ Nacahan ra Jesús tan catyí ra:

—Nyivi cuñi tsi yu, javahá ñi tsa caahán yu. Tan Jutu yu cuñi ra tsi ñi. Tan quitsi ndi nu yucú ñi tan coo ndi tsihin ñi. ²⁴ Nyivi ña cuñi tsi yu, ña javahá ñi tsa caahán yu. Tan tuhun tsa caahán yu tsa tyaa soho ndo, ñavin tuhun maa yu cuvi tsi, tyin tuhun caahán Jutu yu, ra tsa jaquitsi tsi yu, cuvi tsi.

²⁵ Caahán yu tandihi tuhun ihya tsihin ndo tsitsi tsa ndi nyii yu tsihin ndo. ²⁶ Maa tyin nu cuahán ca tsi ityi nuu cua jaquitsi Jutu yu Tatyí Ii ra tsihin sivi yu. Tan cua jatinyee ra ican tsi ndo, tan cua cuhva ra tunyee ñi tsi ndo, tan cua janaha ra tandihi

tsi ndo. Tan cua janducuhun iñi ra tsi ndo tsa tsa yaha cahan yu tsihin ndo.

²⁷ Jandoó yu iin tsa taxin coo añima ndo, tumaa tsa taxin cuñi añima maa yu. Yacan tsahá yu tsi ndo. Ñavin tumaa tsa taxin tsa ñihí ndo nu ñuhu ñayivi ihyá. Ña caca xaan iñi ndo tan ña nayuhvi ndo. ²⁸ Tsiñi ndo tsa cahan yu nu catyi yu tyin cua cuhun yu tan cua quitsi nyico yu nu yucú ndo. Tatun cuñi ndo tsi yu, cua cusii iñi ndo tyin catyi yu tyin cuahan yu nu nyaá Jutu yu. Tyin cahnu ca cuvi Jutu yu tan ñavin ca maa yu. ²⁹ Caahán yu tyehen tsihin ndo tsa ndi cumañi ca cuhun yu, tyin quivi cuhun yu, cua tsinu iñi ndo tsi yu.

³⁰ 'Ña cuaha ca cua cahan yu tsihin ndo. Tyin vatsi nu ndacá ñaha nu ñuhu ñayivi ihyá. Maa tyin ña ndacá ñaha nu tsi yu. ³¹ Tyin tacan tan coto nyivi iyó nu ñuhu ñayivi, tyin yuhu cuñi yu tsi Nyoo Jutu yu, tan javahá yu tyiñu tava ra tsi yu.

'Nduvita ndo, tan cohon ndo, na cua tsiyo yu ihyá.

15

Nu cahan ra Jesucristo tyin cuvi ra tumaa yoho tsa cuvi uvas

¹ Yuhu cuvi yoho tsa cuvi uvas tsa nditsa. [Tsa cuvi uvas cuvi tsi tumaa yoho ndit-saahan ndivi maa tyin yucu vixi cuvi tsi.] Tan Jutu yu cuvi ra jahá cuenda yoho can. ² Tsaahnyá ra soco tsa ña tsahá tsiti. Tan nacahnyá ra nuu yoho yucu tsa tsahá tsiti, tan janduvahá ra can, tyin tacan tan cuhva cuaha ca tsi tsiti. ³ Tsa yaha janduvahá Jutu yu tsi nyoocho tsihin tsa jacuahá yu tsi ndo. ⁴ Jañihi ca ndo ndu iin ndo tsihin yu, tumaa tsa iin ñi cuvi yu tsihin ndo. Tumaa iin soco yoho can ña cuvi cuhva tsi tsiti tsa maa ñi maa tsi, tun ña nyanaá tsi tsata yoho cahnu can, tacan nyoocho, ña cua cuvi javaha ndo tsa vaha tatun ña iin ñi cuvi ndo tsihin yu.

⁵ Yuhu cuvi yoho cahnu. Tan nyoocho cuvi soco yoho can. Nyivi tsa nyanaá tsi yu, tan nyanaá yu tsi ñi, cuaha tsa vaha javahá ñi. Tyin nduve náa cuvi javaha ñi tatun ña nyanaá ñi tsi yu. ⁶ Nyivi tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tsahá tsiti. Na ityi can tan jatacá yo can, tsahan tsahmí yo.

⁷ Tatun tacan ñi nyanaá maa ndo tsi yu, tan ña naa iñi ndo tsa jacuahá yu tsi ndo, tacan tan cuvi ndacan ndo náa cuñi maa ndo tsi yu, tan yuhu cua cuhva yu tsa cua ndacan ndo. ⁸ Tatun cuaha tsa vaha javahá ndo, jacahnú xaan ndo tsi Jutu yu cuvi can. Tan tsihin yacan janahá ndo tyin cuvi ndo nyivi tsa nditsa nyicún tsi yu. ⁹ Yuhu cuñi yu tsi ndo, tumaa tsa cuñi Jutu yu tsi yu. Ña naa iñi ndo cuhva cuñi yu tsi ndo. ¹⁰ Tatun tyaa yahvi ndo tsa caahán yu, ña cua naa iñi ndo

tyin cuñi yu tsi ndo. Tumaa tsa javahá maa yu, tyaa yahvi yu tsa caahán Jutu yu. Ña naa iñi yu tsa cuñi xaan ra tsi yu.

¹¹ Caahán yu tyehen tsihin ndo tyin na cusii iñi ndo tsihin yu. Tan cusii ca iñi ndo. ¹² Tuhun tsa caahán yu tsihin ndo, yacan cuvi tsehe: cuñi tahan ndo tsi ndo, tumaa tsa cuñi maa yu tsi ndo. ¹³ Tatun yaha xaan cuñi tahan yo tsi yo, cana maa iñi yo cuhva yo ñayivi iyó yo tsa cuenda inga yo. ¹⁴ Nyoocho cuvi ra vaha iñi tsi yu tatun javahá ndo tsa caahán yu tsihin ndo. ¹⁵ Ña caahán ca yu tyin musu yu cuvi tsi ndo, tyin iin musu ña tsitó ra náa javahá tsitoho ra. Caahán yu tyin ra vaha iñi tsi yu cuvi ndo, tyin tandihi tsa caahán Jutu yu tsihin yu tan jacotó yu itsi tsi ndo. ¹⁶ Ñavin nyoocho nacatsi tsi yuhu tyin maa yu nacatsi tsi ndo. Tan tava tyiñu yu tsi ndo tsa cuhun ndo tan jaha tyiñu ndo. Tan tyiñu jahá ndo cua quita vaha tsi, tumaa iin itu tsa vaha xaan cuvaha. Tan cuaha xaan ñiñi cua coo, tan ña cua tivi maa tsi. Tacan tan cua cuhva Jutu yu tandihi tsa ndacan ndo tsi ra tsihin sivi yu. ¹⁷ Tyehen caahán yu tsihin ndo: Cuñi tahan ndo tsi ndo.

Nyivi taahán iñi tsa iyó nu ñuhu ñayivi, ndasi cuñi ñi nyehé ñi tsi ra Jesús tan tsi nyivi nyicún tsi ra

¹⁸ Tatun ndasi cuñi nyivi taahán iñi tsa iyó nu ñuhu ñayivi ihyá nyehe ñi tsi ndo, coto ndo tyin jihná ca maa yu ndasi cuñi ñi nyehé ñi. ¹⁹ Tun tsatyin nyivi cuenda nu ñuhu ñayivi ihyá cuvi ndo, cua cuñi nyivi tsi ndo tumaa tsa cuñi tahan maa ñi tsi ñi. Maa tyin nyoocho tsa nacatsi yu tsi ndo mahñu ñi. Yacan cuenda ndasi cuñi ñi nyehé ñi tsi ndo, tyin ñavin ca nyivi cuenda nu ñuhu ñayivi ihyá cuvi ndo. ²⁰ Nducuhun iñi ndo tsa cahan yu tsihin ndo, tyin ndi iin musu tan ña cahnu ca cuvi ra tan ñavin ca tsitoho ra. Tatun tyaa yahvi nyivi tsa caahán yu tsihin ñi, tacan cua tyaa yahvi ndihi ñi tsa jacuahá ndo tsi ñi. Tan tatun ndasi icá ñi tsihin yu, ndasi cua ica ndihi ñi tsihin ndo. ²¹ Tandihí yacan cua ica ñi tsihin ndo tsa catyi yuhu, tyin ña nacotó ñi tsi ra tsa jaquitsi tsi yu.

²² Tun tsatyin ña quitsi yu cahan yu tsihin ñi, nduve cuatyí ñi. Maa tyin vityin nduve náa siqui cua tyaa ñi cuatyí ñi, tyin tsa yaha cahan yu tsihin ñi. ²³ Nyivi tsa ndasi cuñi nyehé tsi yu, ndasi cuñi ndihi ñi nyehé ñi tsi Jutu yu. ²⁴ Nduve cuatyí ñi, tun tsatyin ña javahá yu tsa ña cuvi javaha inga nyivi. Maa tyin tsa nyehe ñi tandihí yacan. Vasu ndi maa tsa nyehe ñi can maa tyin ndasi cuñi ñi nyehé ñi tsi yu, tan tsi Jutu yu. ²⁵ Maa tyin tandihí yacan cuvi, tyin cuñi tsi cundaa tumaa cuhva caahán nu tutu ley tsa jacuahá ñi tsa caahán tyehen: "Nduve vihi náa tsaha, tan ndasi cuñi ñi nyehé ñi tsi yu", catyi tsi.

²⁶ 'Maa tyin cua quitsi Tatyí Ii, ra tsa caahán tsa nditsa. Ra ican cuví ra tsa cua cuhva tunyee iñi tsi ndo. Quiví cua tsaa yu nu nyaá Jutu yu tan cua jaquitsi ndi Tatyí Ii nu yucú ndo. Tan cua cahan ra tumañi iñi tsa cuenda yu. ²⁷ Tan nyoocho tucu cua cahan ndo tumañi iñi tsa cuenda yu, tyin yucú ndo tsihin yu nda quiví quitsahá jahá tyiñu yu.

16

¹ 'Caahán yu tyehen tsihin ndo tyin tacan tan ña jandihi ndo tsa tsinú iñi ndo tsi yu. ² Cua tava cuí nyiví tsi ndo vehe ñuhu. Tan coo quiví cua cahñi ñi tsi ndo, tan cua cuñi ñi tyin tyiñu Nyoo javahá ñi. ³ Tacan cua ica ñi tyin ña nacoto ñi tsi Jutu yu tan ndi tsi maa yu. ⁴ Caahán yu tsehe tsihin ndo tyin quiví tsa cua cuví tumaa cuhva caahán yu tsihin ndo, cua nducuhun iñi ndo tyin tsa yaha cahan yu tuhun ihya tsihin ndo.

Ña cahan yu tyehen tsihin ndo nda jihna tyin ndi nyíi maa yu tsihin ndo.

Tyiñu jahá Tatyí Ii Nyoo

⁵ Maa tyin vityin cua cuhun yu tyin cun-yaa yu tsihin ra tsa jaquitsí tsi yu. Ndi intuhun ndo tan ña tsicá tuhun ndo tsi yu nu maa cua cuhun yu. ⁶ Tyin tsa nducuihya cuñi ndo tsa caahán yu tyehen tsihin ndo. ⁷ Caahán yu tsa nditsa tsihin ndo tyin vaha ca tsa cuhun yu cuenda tsa vaha tsi maa ndo. Tyin tatun ña cuhun yu, ña cua quitsi Tatyí Ii tsa cua cuhva tunyee iñi tsi ndo. Maa tyin tatun cuhun yu, cua jaquitsi yu tsi ra. ⁸ Tan quiví quitsi ra, cua jacoto ra tsi nyiví iyó nu ñuhu ñayiví ihya tyin iyó cuatyí ñi. Tan cua janaha ra ityí vaha tsi ñi, cuhva coo vaha ñi. Tan cua jacoto ra tsi ñi tyin cua cutuñi ñi nuu Nyoo. ⁹ Cua jacoto ra tsi ñi tyin iyó cuatyí ñi tyin ña tsinú iñi tsi yu. ¹⁰ Cua jacoto ra tsi ñi tyin iyó ityí vaha, cuhva coo vaha ñi tyin yuhu cua cuhun yu nu nyaá Jutu yu tan ña cua nyehe ca ndo tsi yu. ¹¹ Tan cua coto ñi tyin cua jandaa Nyoo cuatyí ñi tyin tsa yaha cundaa cuatyí nu cuví cuihna, nu ndacá ñaha nu ñuhu ñayiví ihya.

¹² Tan cuaha ca tsa nyaá cahan yu tsihin ndo, maa tyin ña cua cutuñi iñi ndo can vityin. ¹³ Quiví quitsi Tatyí Ii tsa caahán tsa nditsa, maa ra cua janaha tandihi tsa nditsa tsi ndo. Tyin ñavin cuenda maa ra cua cahan ra, tyin cua cahan ra tandihi tsa tsiñi ra. Tan cua jacoto ra náa cua cuví nu cuahán ca tsi ityí nuu. ¹⁴ Cua jacahnu ra tsi yu, tyin cua naquihin ra tuhun yu tan cua janaha ra can tsi ndo. ¹⁵ Tandihí tsa iyó tsi Jutu yu, tsii maa yu cuví ndihí can. Yacan cuenda caahán yu tyin Tatyí Ii cua naquihin ra tuhun yu, tan cua janaha ra tsi nyoocho.

Ra tsicá tsihin ra Jesús cuihiyá xaan cuñi ra naha, maa tyin nu cuahán ca tsi quiví cua cusí iñi ra naha, catyí ra Jesús

¹⁶ 'Ña naha cuí ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu, tyin yuhu cua cuhun yu nu nyaá Jutu yu —catyí ra Jesús.

¹⁷ Tacan tan juhva ra tsicá tsihin ra, tsicá tuhun tahan ra naha tan catyí ra naha:

—¿Náa cuñi tsi cahan yacan? Catyí ra tsihin yo tyin ña naha cuí ca tan ña cua nyehe ca yo tsi ra, tan yaha can tan cua nyehe nyico yo tsi ra inga tsaha tyin cua cuhun ra nu nyaá Jutu ra. ¹⁸ ¿Náa cuñi tsi catyí tsa “ña naha cuí ca” can? Ña cutuñi iñi yo náa tuhun caahán ra —catyí ra naha.

¹⁹ Tan tuví iñi ra Jesús tyin cuñi ra naha ndaca tuhun ra naha tsi ra, tan catyí ra:

—Yuhu cahan yu tsihin ndo tyin ña naha cuí ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo? ²⁰ Tsa nditsa caahán yu tsihin ndo tyin nyoocho cua nducuihya iñi ndo tan cua vacu ndo, maa tyin nyiví cuenda nu ñuhu ñayiví cua cusí iñi ñi. Vasu cuihiya cuñi ndo vityin, tucuihiya iñi can cua nanduví tsi tsa sii. ²¹ Cuhva tsa cua cacu sehe iin ñaha, nyehé ña tundoho. Maa tyin tsa yaha cacu lee can, ndi ña ñuhu ca iñi ña tsa uhvi can tsa cuenda tsa sii cuñi ña tyin cacu iin lee sehe ña. ²² Tacan tucu nyoocho vityin, cuihiya xaan cuñi ndo. Maa tyin cua nyehe nyico yu tsi ndo inga tsaha. Tacan tan cua cusí nyico iñi añima ndo. Tan yofi cuví quihin nyaa tsa sii can tsi ndo.

²³ Quiví can nduve ca tsa cua ndaca tuhun ndo tsi yu. Tsa nditsa caahán yu tsihin ndo tyin Nyoo Jutu yu cua cuhva ra tandihí tsa ndacan ndo tsi ra tsihin sivi yu. ²⁴ Nda vityin tan ñaha ca ndacan ndo tsa ndacan ndo tsihin sivi yu. Ndacan ndo tan cua ñihi ndo tan cusí xaan iñi ndo.

Ra Jesucristo cuví jaha canaa ra tsa ña vaha iyó nu ñuhu ñayiví

²⁵ 'Maa ñi maa tsihin tsa jandu inducú yu tuhun jacuahá yu tsi ndo. Maa tyin nu cuahán ca tsi, ñavin ca tsihin cuhva can cua jacuahá yu tsi ndo, maa tyin cua catyí tuhun catsi yu tuhun Jutu yu tsihin ndo. ²⁶ Quiví can tsihin sivi yu cua ndacan ndo tsa ndacan ndo tsi ra. Tan ña tsiñi ñuhu ca tsa cahan ndaahví yu tsihin Jutu yu tsa cuenda ndo. ²⁷ Tyin maa Nyoo Jutu yu cuñi ra tsi ndo. Cuñi ra tsi ndo tyin nyoocho cuñi ndo tsi yu, tan tsinú iñi ndo tyin nu nyaá Nyoo quee yu. ²⁸ Nu nyaá Jutu yu quee yu tyin quitsi yu nu ñuhu ñayiví ihya. Maa tyin vityin cua nacoo yu ñuhu ñayiví ihya tyin cua cunuhu nyico yu nu nyaá ra —catyí ra Jesús.

²⁹ Tacan tan catyí ra tsicá tsihin ra:

—Vityin nditsa, caahán catsi un tsihin ndi. Ñavin ca tsihin cuhva caahán un tsihin ndi. ³⁰ Vityin nyehé ndi tyin tsitó un tandihi cuii maa, tan ña tsiñi ñuhu ca tsa ndaca tuhun ndi tsi un tan coto un tsa tsicá iñi ndi. Yacan cuenda tsinú iñi ndi tyin nu nyaá Nyoo quee un —catyí ra naha tsihin ra Jesús.

³¹ Tan catyí ra Jesús:

—Tan vityin *ca* tsinú iñi ndo tsi yu? ³² Maa tyin caahán yu tsihin ndo tyin tsa vatsi hora. Tan vityin cuví hora tsa cua cuhun ndo siin siin ityi. Tan cua nacoo ndo tsi yu. Maa tyin ñavin intuhun ñi yu cua ndoo, tyin Jutu yu nyaá ra tsihin yu. ³³ Caahán yu tandihi tsehe tsihin ndo na coo tsa taxin añima ndo tsa cuenda tsa iin ñi cuví ndo tsihin yu. Nu ñuhu ñayivi ihya cua nyehé ndo tundoho, maa tyin janyee ndo iñi ndo, tyin yuhu tsa jahā canaa yu tsa ña vaha tsa iyó nu ñuhu ñayivi ihya.

17

Nu tsicán tahvi ra Jesús tsi Nyoo tsa cuenda ra tsicá tsihin ra

¹ Tsa yahā cahan ra Jesús yacan, nanyehé ndaa ra ityi andivi tan catyí ra:

—Jutu Mañi yu, tsa tsaā hora vityin. Jacahnu tsi yu tsa cuví yu sehe un, tyin tacan tan jacahnu tucu maa yu tsi un. ² Tyin tava tyiñu un tsi yu tsa quihí ndaha yu tandihi nyivi, tan cuhva yu ñayivi nyitó tsa ña cua naa maa tsi tandihi nyivi tsa tsahā un tsi yu. ³ Tatun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquitsi un, tacan tan cuví coo ñi ñayivi nyitó tsa ña cua naa maa.

⁴ Tsa jacahnu yu tsi un nu ñuhu ñayivi ihya tan tyiñu tsa tava tyiñu un tsi yu tsa ndihi tsi javahā yu. ⁵ Tan vityin, Jutu Mañi yu, cua quitsi nuhu nyico yu nu nyaá un, tan cuñi yu tyin nacuhva un tsa cahnu cuví yu tsihin un tsi yu, tumaa tsa tsicoq maa tsi yu nda ndi cumañi ca tsinu ñuhu ñayivi.

⁶ Tandihí ra tsa tsahā un tsi yu naha ra, ra tsa natavā vaha un mahñu nyivi iyó nu ñuhu ñayivi ihya, jacoto yu tsi ra naha yóo ra cuví yooho. Tsii maa un cuví tsi ra naha tan tsahā un tsi ra naha tsi yu. Tan tyaa yahvi ra naha tsa caahán un. ⁷ Vityin tsitó ra naha tyin tandihí tsa tsahā un tsi yu, nu nyaá un quee tsi. ⁸ Tyin catyí tuhun yu tsihin ra naha tsa cahan un tsihin yu, tan naquihñ vaha ra naha itsi. Tan tsitó ra naha tyin nditsa tsa quee yu nu nyaá un, tan tsinú iñi ra naha tyin maa un jaquitsi tsi yu.

⁹ Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandihí nyivi, maa tyin tsicán tahvi yu tsa cuenda ra tsa tsahā un tsi yu naha ra, tyin tsi maa un cuví ra naha. ¹⁰ Tandihí nyivi tsa cuví tsii un,

tsahā tucu un tsi ñi tsi yu. Tan maa ñi janahá tsa cahnu cuví yu.

¹¹ Yuhu ña cua ndoo ca yu nu ñuhu ñayivi ihya, maa tyin maa ra naha cua ndoo ra naha nu ñuhu ñayivi ihya. Tan yuhu cua cunyaa nyico yu tsihin un. Jahā cuenda tsi ra tsa tsahā un tsi yu tsihin tunyee iñi tsa iyó tsi maa un, Jutu Mañi yu. Tan na iin ñi cuví ra naha, tumaa tsa iin ñi cuví maa yu. ¹² Quivi tsinyii yu nu ñuhu ñayivi ihya tsihin ra naha, jahā cuenda yu tsi ra tsa tsahā un tsi yu naha ra tsihin tunyee iñi tsa iyó tsi un. Tan jahā cuenda yu tsi ra naha. Tan ndi intuhun ra naha tan ña tsinaa ra naha. Maa tyin ra tsa tsa nyaá maa tsa cunaa, ra ican ñi cuví ra cuanaa tan quitā cuhva tumaa tsa catyí nu tutu maa un.

¹³ Vityin tsa cua quitsi yu nu nyaá un, maa tyin tsitsi tsa ndi nyii yu nu ñuhu ñayivi ihya, caahán yu tsehe, tyin na cusii iñi ra naha tumaa tsa sii cuñi maa yu. ¹⁴ Yuhu cahan yu tsihin ra naha tsa caahán un, maa tyin nyivi cuenda nu ñuhu ñayivi ndasi cuñi ñi nyehé ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayivi cuví ra naha. Tumaa yuhu, ñavin ra cuenda nu ñuhu ñayivi cuví yu. ¹⁵ Ña tsicán yu tsi un tsa tava un tsi ra nyicún tsi yo naha ra nu ñuhu ñayivi ihya, maa tyin jahā cuenda tsi ra naha coto náa jahā nu ña vaha tsi ra naha. ¹⁶ Tumaa yuhu ñavin ra cuenda nu ñuhu ñayivi cuví yu, tacan tucu ra ihya naha ra, ñavin ra cuenda nu ñuhu ñayivi cuví ra naha. ¹⁷ Jacu ii tsi ra naha tsihin tsa nditsa, na javaha ra naha maa ñi maa cuhva cuñi maa un. Tyin tsa caahán un, yacan cuví tsa nditsa. ¹⁸ Tumaa tsa jaquitsi un tsi yuhu nu yucú nyivi iyó nu ñuhu ñayivi, tacan cua jacuhun ndihi tucu yuhu tsi ra tsa nyicún tsi yo, nacahan ra naha tuhun yu tsihin nyivi tsa ñaha ca coto tuhun yu. ¹⁹ Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

²⁰ Ñavin tsa cuenda ra ihya ñi naha ra tsicán tahvi yu tsi un. Tsicán tahvi ndihi tucu yu tsi un tsa cuenda nyivi tsa cua tsinu iñi tsi yu, tsa cuenda tsa cua cahan ra ihya naha ra ityi nuu ca. ²¹ Tsicán yu tsi un na iin ñi cuví ñi tsihin inga ñi. Tan na iin ñi cuví ñi tsihin yo, Jutu Mañi yu. Tumaa yoocho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandihí nyivi iyó nu ñuhu ñayivi cua tsinu iñi ñi tyin maa un jaquitsi tsi yu. ²² Yuhu tsahā yu tsa cahnu cuví un tsi ñi nyicún tsi yo. Juvín ñi maa tsa cahnu cuví un tsa tsahā un tsi yu tyin tsihin yacan na iin ñi cuví ñi, tumaa yoocho tsihin yuhu, iin ñi cuví yo. ²³ Yuhu nyii yu tsihin ñi. Tan yoocho nyaá un tsihin yu tyin tacan tan iin ña nyivi cua cuví ñi. Tan coto tandihí nyivi iyó nu ñuhu ñayivi tyin

maa un jaquitsi tsi yu, tan cuñi xaan un tsi ñi nyicún tsi yo, tumaa tsa cuñi maa un tsi yu.

²⁴ Jutu Mañi yu, maa un tsaḥa tsi ñi tsi yu. Tan cuñi yu tsa cunyaa ñi tsihin yu nu cua cunyaa yu, tan na nyehe ñi tsa cahnu cuví tsa tsaḥa un tsi yu, tyin cuñi un tsi yu nda ndi cumañi ca tsinu ñuhu ñayivi. ²⁵ Jutu Mañi yu, ra vaha cuví un, tan nyivi cuenda nu ñuhu ñayivi ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihya tsitó ra naha tyin maa un jaquitsi tsi yu. ²⁶ Tsa caḥan yu tsihin ra naha yóo ra cuví un, tan cua caḥan nyico tucu yu inga tsaha, tyin tumaa cuhva cuñi un tsi yu, tacan cua cuñi tahan ra naha tsi ra naha. Tan yuhu cunyaa yu aña maa ra naha.

18

Nu cua tyihi ra Israel naha ra tsi ra Jesús vehe caa

(Mt. 26.47-56; Mr. 14.43-50; Lc. 22.47-53)

¹ Tsa yaha tsa caḥan ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedron. Tan ican iyó iin cora yutun tata. Tan ican quihvi ra Jesús tsihin ra tsicá tsihin ra. ² Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsaahán tsihin ra tsicá tsihin ra. ³ Tan ican tsaḥa ra Judas tsihin andaru cuaha tan cuaha ra vitya cuenda vehe ñuhu tsa jacuhun ra cuví ityi nuu tsihin jutu naha ra tan ra cuví fariseo naha ra. Tsaḥa ra naha ican, nyisó ra naha mityi, tan nyisó ra naha lámpara tan ñuhu yiti. ⁴ Tan ra Jesús tsa tsitó maa ra tandihi tsa cua tahan ra. Quita ra tan tsicá tuhun ra tsi ra naha:

—¿Yóo nanducú ndo? —catyi ra.

⁵ Tan catyi ra naha tsihin ra:

—Ra Jesús ra ñuu Nazaret.

Tan catyi ra Jesús:

—Yuhu cuví —catyi ra.

Tan ra Judas, ra tsa xico tsi ra Jesús tsi nu xaan iñi tsi ra nahnu, nyí ndihi ra tsihin ra naha. ⁶ Cuhva tsa caḥan ra Jesús: “Yuhu cuví”, tandihi ra naha nacacá tsata ra naha tan nduva ra naha nu ñuhu. ⁷ Tacan tan tsicá tuhun nyico ra Jesús tsi ra naha inga tsaha, tan catyi ra:

—¿Yóo nanducú ndo?

Tan catyi ra naha:

—Ra Jesús ra ñuu Nazaret.

⁸ Tan catyi ra Jesús:

—Tsa caḥan yu tsihin ndo tyin yuhu cuví. Tatan yuhu nanducú ndo, jaña ndo tsi ra tsicá tsihin yu naha ra na cunuhun ra naha —catyi ra Jesús tsihin ra naha.

⁹ Yacan caḥan ra Jesús tyin na cundaa tsa caḥan ra nda ityi tsata ca nu catyi ra: “Ra tsa tsaḥa jutu yu tsi yu, ndi intuhun ra naha

tan ña tsinaá ra naha.” ¹⁰ Tacan tan tava ra Simón Pedro mityi tsa ndahá ra tan tsahnya ra soho cuaha iin ra tsa nañi Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra. ¹¹ Maa tyin ra Jesús catyi ra tsihin ra Pedro:

—Natyihí mityi un tsitsi vena un. Tatan Nyoo Jutu yu tan cuñi ra tsa nyehe yu tundoho, taahán tsi tsa nyehe yu can —catyi ra Jesús tsihin ra.

Nu tsindacá ra naha tsi ra Jesús nuu ra cuví ityi nuu tsihin jutu naha ra

(Mt. 26.57-58; Mr. 14.53-54; Lc. 22.54)

¹² Tacan tan andaru can tsihin capitán ra naha, tan vitya cuenda vehe ñuhu naha ra, tijn ra naha tsi ra Jesús, tan tsañi ra naha tsi ra, ¹³ tacan tan tsindacá ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu. ¹⁴ Ra Caifás can cuví ra tsa caḥan tsihin ra cuví ityi nuu tsihin nyivi Israel naha ra tyin vaha ca tsa cúu intuhun ñi rayi tsa cuenda tandihi nyivi ñuu.

Nu caahán ra Pedro tyin ña nacotó ra tsi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro tan inga ra tsa tsicá tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quihvi ra can tsihin ra Jesús nuquehe ra jutu can. ¹⁶ Maa tyin ra Pedro ndoo ra ityi tsata vehe. Yacan cuenda quita ra tsa nacotó ra jutu can, tan caḥan ra tsihin ñaha tsa nyaá yuvehe can. Tan jayahá ra tsi ra Pedro ityi tsitsi nuquehe can. ¹⁷ Tacan tan ñaha tsa nyaá yuvehe can tsicá tuhun ña tsi ra Pedro, tan catyi ña:

—¿A ñavin yooḥo cuví iin ra tsicá tsihin ra can?

Tan catyi ra Pedro:

—Ñavin. Ñavin yu cuví —catyi ra tsihin ña.

¹⁸ Tacan tan ra cuví musu tan ra vitya naha ra tsa yucú ican, jatahan ra naha ñuhu tyin vitsin xaan. Tan nyecú nyityi ra naha tuñu ra naha ñuhu. Tan nyí ndihi tucu ra Pedro tuñu ra ñuhu tsihin ra naha ican.

Nu janahma ra jutu tsaahnu tsi ra Jesús

(Mt. 26.59-66; Mr. 14.55-64; Lc. 22.66-71)

¹⁹ Tacan tan ra jutu tsaahnu can quitsaha tsicá tuhun ra tsi ra Jesús yoo ra cuví ra tsicá tsihin ra, tan náa jacuahá ra tsi nyivi. ²⁰ Tan catyi ra Jesús tsihin ra:

—Yuhu nuu tandihi nyivi caḥan yu. Tan jacuahá yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu ihya nu tuhvá

tandihí nyívi Israel ndu iin. Tan nduve nu cahan xeehe yu. ²¹¿Nacuenda tsicá tuhun un tsi yuhu? Vaha ca ndáca tuhun un tsi nyívi tsa tsiñi tsa cahan yu, tan maa ñi cua catyi tuhun náa cahan yu tsihin ñi tyin maa ñi tsitó náa cahan yu —catyi ra Jesús tsihin ra.

²²Cuhva tsa caahán ra Jesús yacan, tan iin vitya vehe ñuhu tsa yucu ican, cañi ra iin tsiyo nuu ra Jesús tan catyi ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyi ra tsihin ra Jesús.

²³Tan catyi ra Jesús:

—Tatun cahan yu iin tsa ña vaha, cahan tsihin yu nda tsa ña vaha cahan yu. Maa tyin tatun cahan yu tsa vaha, ¿nacuvi tyin cañi un tsi yu? —catyi ra Jesús tsihin ra can.

²⁴Yahá can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu [cuiya can].

Nu caahán nyico ra Pedro inga tsaha tyin ña nacotó ra tsi ra Jesús

(Mt. 26.71-75; Mr. 14.66-72; Lc. 22.58-62)

²⁵Tan nyaá nyityi ra Pedro tuñu ra ñuhu. Tan catyi ra naha tsihin ra:

—¿A ñavin yoocho cuví iin ra tsicá tsihin ra can? —catyi ra naha tsihin ra.

Tan ra Pedro tyihí xeehe ra, tan catyi ra:

—Ñavin. Ñavin yu cuví —catyi ra.

²⁶Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa cuví nyívi ra tsa tsahnya ra Pedro soho, quitsahá tsicá tuhun ra tsi ra tan catyi ra:

—¿Atu ñavin un cuví tsa nyehe yu tsihin ra can tsitsi cora yutun tata can? —catyi ra tsihin ra Pedro.

²⁷Tan tyihí xeehe nyico ra Pedro inga tsaha. Juvín ñi cuhva can tan navacu ñi iin tsitoocho.

Nu cutuñi ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸Yahá can tan quitá ra naha tsihin ra Jesús yuvehe ra Caifás tan tsindacá ra naha tsi ra vehe tyiñu ra ndacá ñaha. Tsa cua cunditsin tan ra Israel ña quihvi ra naha tsitsi vehe tyiñu can tyin ñavin vehe nyívi Israel cuví can. Tyin ica tsa quihvi ñi Israel vehe ndavaha ñi tyin coto ña cua cuví cuxiñi ñi quívi vico pascua. ²⁹Yacan cuenda quitá ra Pilato tyin cahan ra tsihin ra naha, tan catyi ra:

—¿Náa cuatyí tyaá ndo siquí ra ihya? —catyi ra Pilato tsihin ra cuví ityi nuu tsihin nyívi Israel naha ra.

³⁰Tan nacahan ra Israel naha ra tan catyi ra naha:

—Tun tsatyin ñavin iin ra iyó cuatyí cuví ra, ña cua cuhva cuenda ndi tsi ra tsi un —catyi ra naha tsihin ra Pilato.

³¹Tacan tan catyi ra Pilato tsihin ra naha: —Quihin ndo tsi ra, tan tatsi tuñi ndo tsi ra tumaa catyi maa ley ndo.

Tan nacahan ra Israel can naha ra tan catyi ra naha:

—Maa tyin nyuhu nyívi Israel nduve ndatu iyó tsi ndi tsa cahñi ndi tsi nyívi —catyi ra naha.

³²Tacan cundaá tsa cahan ra Jesús nácaa cua cúu ra. ³³Yahá can tan quihvi nyico ra Pilato tsitsi vehe tyiñu can inga tsaha. Tan caná ra tsi ra Jesús tan tsicá tuhun ra tsi ra:

—¿A yoocho cuví rey cuenda nyívi Israel? —catyi ra tsihin ra.

³⁴Tan catyi ra Jesús:

—¿A tsa cuñi ñi maa un tsicá tuhun un tsehe tsi yu o iyó inga nyívi natyuhú tsi un cuhva cahan un tsihin yu? —catyi ra Jesús tsihin ra Pilato.

³⁵Tan catyi ra Pilato:

—Ñavin ra ñuu Israel cuví yuhu. Juvín ñi maa ra ñuu maa un naha ra tan ra cuví ityi nuu tsihin jutu ñuu maa un cuví ra tsahá cuenda tsi un tsi yu. ¿Náa javahá un? —catyi ra tsihin ra Jesús.

³⁶Tacan tan nacahan ra Jesús tan catyi ra:

—Nu ndacá ñaha yu ñavin cuenda nu ñuhu ñayivi ihya cuví tsi. Tun tsatyin ndacá ñaha yu nu ñuhu ñayivi ihya, ra nyicún tsi yu cañi tahan ra naha tyin tacan tan yoñi cua cuhva cuenda tsi yu ndaha ra Israel naha ra. Maa tyin nu ndacá ñaha yu, ñavin cuenda ihya cuví tsi —catyi ra Jesús tsihin ra Pilato.

³⁷Tacan tan catyi ra Pilato tsihin ra:

—¿Tun tacan, rey cuví maa un? —catyi ra Pilato tsihin ra Jesús.

Tan nacahan ra Jesús tan catyi ra:

—Rey cuví yu tumaa tsa caahán maa un. Yacan cuenda cacu yu tan vatsí yu nu ñuhu ñayivi ihya, tyin cahan yu tsa nditsa. Tandihí nyívi tsa tyaá yahvi tsa nditsa, tyaá soho ñi tsa caahán yu —catyi ra Jesús.

³⁸Tan catyi ra Pilato tsihin ra:

—¿Tan náa cuví tsa nditsa? —catyi ra.

Tsa yahá tsa tsicá tuhun ra Pilato yacan, quitá ra tsicahan nyico ra tsihin ra Israel naha ra inga tsaha tan catyi ra:

—Yuhu ña nañihi maa yu ndi intuhun cuatyí ra ihya.

Nu cua cahñi ra naha tsi ra Jesús

(Mt. 27.15-31; Mr. 15.6-20; Lc. 23.13-25)

³⁹Maa tyin nyoocho iyó ndo tuhun tsa tsicán ndo na tava yu tsi iin ra nyíve vehe caa tsa iyó vico pascua ihya. ¿A cuñi ndo tava yu tsi ra tsa cuví rey cuenda ndo tsa cuví ndo nyívi Israel? —catyi ra Pilato tsihin ra naha.

⁴⁰Tacan tan quitsahá caná tsaa tandihí ra naha tan catyi ra naha:

—¡Ña tava un tsi ra can! ¡Tava tsi ra Barrabás! —catyi ra naha.

Tan ra Barrabás can cuví ra iin ñasuhu.

19

¹ Tacan tan quihñ ra Pilato tsi ra Jesús tan tava tyiñu ra na cañi andaru tsi ra. ² Tan andaru can javahā ra naha iin corona iñu tan tyihñ ra naha jiñi ra Jesús. Tan jacunditsi ra naha iin jahma tunduuha tsi ra, tahan tsa tuhvā ra cuví rey tsinditsi. ³ Tacan tan natuhvā ra naha nu nyáá ra tan caahán nyaa ra naha tsi ra, tan catyí ra naha:

—¡Nacumi tsi un yooho Rey cuenda nyivi Israel! —catyí ra naha, tan cañi ra naha nuu ra.

⁴ Tacan tan quita nyico ra Pilato inga tsaha tan catyí ra tsihin ra naha:

—Nyehe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihí yu —catyí ra Pilato tsihin ra naha.

⁵ Tan quita ra Jesús yihí corona iñu jiñi ra, tan nditsi ra jahma tunduuha can. Tacan tan catyí ra Pilato tsihin ra naha:

—¡Ma ra nyaá ihya! —catyí ra tsihin ra naha.

⁶ Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quit-sahā canā tsaa ra naha tan catyí ra naha:

—¡Tyaa tsi ra nu cruu na cúu ra! —catyí ra naha.

Maa tyin catyí ra Pilato tsihin ra naha:

—Quihñ ndo tsi ra tan cāhñi maa ndo tsi ra nu cruu tyin yuhu ndi intuhun cuatyí ra tan ña nañihí yu.

⁷ Maa tyin nacahan ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñi tsi tsa cúu ra tyin jahá ra tsa Sehe Nyoo cuví tsi ra —catyí ra naha.

⁸ Tsa tsiñi ra Pilato yacan, tan nayuhvi xaan ca ra. ⁹ Tan quihvi nyico ra inga tsaha tsitsi vehe tyiñu, tan tsicā tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

¹⁰ Tacan tan catyí ra Pilato tsihin ra:

—¿Nacuenda ña caahán un tsa caahán yu? ¿A ña tsitó un tyin ra cumi tyiñu cuví yu tan iyó ndatu tsi yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

¹¹ Tan nacahan ra Jesús tan catyí ra:

—Tun tsatyin ña tsahā Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavin ca yooho —catyí ra Jesús tsihin ra Pilato.

¹² Tsa ndihí cahan ra Jesús yacan, tan quitsahā nducú ra Pilato cuhva jaña ra tsi ra, maa tyin ra Israel canā tsaa ra naha tsata ra, tan catyí ra naha:

—¡Tatun jaña un tsi ra, ñavin amigo ra César, ra cuví rey cahnu, cuví tsi un! Tyin tandihí ra tsa caahán tyin rey cuví ra naha, ra xaan iñi tsi rey cahnu cuví ra naha —catyí ra naha.

¹³ Tacan tan tsa tsiñi ra Pilato yacan, tava tyiñu ra na quita ra Jesús ityi tsata vehe. Tan tsinyaa ra Pilato nu nañi Gabata nu tuhvā ra jandaá cuatyí nyivi. Tan tsihin yuhu hebreo cuñi tsi catyí: “Nu canyíi yuu”. ¹⁴ Tan cuví tsi iin quivi tsa ndi cumañi ca coo vico pascua, cuhva tsa cua tahan hora. Tacan tan catyí ra Pilato tsihin ra Israel can naha ra:

—¡Ihya nyaá rey ndo!

¹⁵ Maa tyin canā tsaa ra Israel naha ra tan catyí ra naha:

—¡Na cúu ra! ¡Na cúu ra! ¡Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yofi ca rey iyó. Intuhun ñi maa ra César, ra cuví rey cahnu —catyí ra naha.

¹⁶ Tacan tan tsahā cuenda ra Pilato tsi ra Jesús tsi ra naha na tyaa ra naha tsi ra nu cruu. Tan quihñ andaru tsi ra, cuahán ra tsihin ra naha.

Nu tsihi ra Jesucristo nu cruu

(Mt. 27.32-44; Mr. 15.21-32; Lc. 23.26-43)

¹⁷ Tan nyisó ra Jesús cruu ra, cuahán ra iin nu nañi: “Yiqui jiñi Ndiyi”. Tan tsihin yuhu hebreo nañi tsi Gólgota. ¹⁸ Ndacan tyaa ra naha tsi ra nu cruu tsihin nduyu. Tan tyaa ra naha uvi taahan ca ra naha xiin ra. Ticaā ra naha iin ra nu cruu tsa nyaá tsiyo cuaha ra. Tan inga ra tyaa ra naha tsiyo satyin ra. Tan ticaā ra naha tsi ra Jesús mahñu. ¹⁹ Tan tava tyiñu ra Pilato na cunyaa letra jiñi cruu can. Tan catyí tsi tyehen: “Ra Jesús ra ñuu Nazaret, Rey cuenda nyivi ñuu Israel.” ²⁰ Tan cuaha nyivi Israel cahvi ñi tsa caahán can, tyin yatyin ñi ñuu ñi cuví nu tsaquinyaa ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latín. ²¹ Yacan cuenda ra cuví ityi nuu tsihin jutu cahan ra naha tsihin ra Pilato:

—Ña tyaa un: “Rey cuenda nyivi ñuu Israel”, vaha ca tyaa un: “Ra ihya catyí ra tyin rey cuenda nyivi ñuu Israel cuví ra” —catyí ra naha.

²² Maa tyin catyí ra Pilato:

—Tsa tsa yahā tyaa yu, nandoo maa tsi tacan —catyí ra tsihin ra naha.

²³ Tsa yahā tyaa ra andaru can naha ra tsi ra Jesús nu cruu, naquihñ ra naha jahma ra. Tsa cumi taahan ra naha quihñ luxu luxu jahma ra. Tan ndoo jahma ra tsa quicqu

cañi ñi tsa tsindasí ra. ²⁴ Tan andaru can natuhún tahan ra naha:

—Ña cua cahnya yo itsi. Jasiqui suuhva jihna yo na nyehe yo yóo cua jaha canaa jahma can —catyí ra naha.

Tacan cuví tumaa caahán nu tutu Nyoo nu catyí tsi tyehen: “Tsatsá tahan ra naha luxu luxu jahma yu tan jasiqui suuhva ra naha tsihin tsi, nyehe ra naha yóo ra jaha canaa itsi.” Tan yacan cuví tsa javahá ra andaru can naha ra.

²⁵ Tan nyáá sihi ra Jesús yatyin ñi nu nyaá cruu ra. Tan nyaá tucu tahan ña, tan ña María ñasiihi ra Cleofas, tan ña María quee ñuu Magdala. ²⁶ Tan nanyehé ra Jesús tsi sihi ra, nyáá ña yatyin ñi. Tan nanyehé tucu ra tsi ra tsa tsicá tsihin ra, ra tsa cuñí xaan ra. Tan catyí ra tsihin sihi ra:

—Miya, va ra sehe un nyáá tsihin un juvin —catyí ra.

²⁷ Tacan tan catyí ra tsihin ra tsa cuñí xaan ra:

—Tsaa, va sihi un nyáá tsihin un juvin —catyí ra tsihin ra.

Nda quivi can tan quihín ra tsi ña, cuahan tsihin ra yuvehe ra. Tan jahá cuenda ra tsi ña.

Nu tsihi ra Jesús

(Mt. 27.45-56; Mr. 15.33-41; Lc. 23.44-49)

²⁸ Tsa yahá yacan, tsa nyehe ra Jesús tyin tsa ndihí tyiñu jahá ra. Tacan tan catyí ra:

—Na ityi iñi yu —catyí ra.

Tan tsihin yacan cundaa tsa nyaá nu tutu Nyoo nu caahán tsi nácaa cua cúu ra.

²⁹ Tan ican nyaá iin quiyi nu yihí vinu iya. Tacan tan jatyií ra naha tsa cuví yahma tumaa caa catyí tsihin vinu iya can. Tan tyaa ra naha yacan nu iin yutun hisopo. Tan jandaa ra naha tan tyanaa ra naha can yuhu ra. ³⁰ Tsihi ra Jesús vinu can tan catyí ra:

—Tsa iyó vaha tandihí vityin —catyí ra.

Tacan tan nacañi nuu ra jiñi ra tan tsihi ra.

Nu tutsi ra andaru yoco xaan yiqui naha ra Jesús

³¹ Tsa ndi cumañi intuhun ña quivi tan tahan tsi quivi vico cahnú pascua, tan ra cuví ityi nuu tsihin nyivi Israel ña cuñí ra naha tsa ndoo cuñu ñuhu ra tsa tsihi can naha ra nu cruu quivi quitatú, tyin quivi quitatú, quivi ii cuví tsi tsa cuenda ra naha. Yacan cuenda tsicán ra naha tumañi iñi tsi ra Pilato na tava tyiñu ra na cahnú andaru sihin ra tsa ticaa nu cruu can naha ra, tyin tacan tan numi ñi cúu ra naha, tan jatsiyo ra naha cuñu ñuhu ra naha. ³² Tacan tan cuahán andaru nu nyecú cruu can. Tan tsahnú ra naha sihin iin ra ticaá iin tsiyo xiin ra Jesús. Tan tsahnú nyico ra naha sihin inga ra tsa ticaa inga tsiyo xiin ra. ³³ Maa tyin cuhva tsa natuhvá ra naha nu ticaá ra Jesús,

nyehé ra naha tyin tsa tsihi maa ra. Yacan cuenda ña tsahnú ca ra naha sihin ra.

³⁴ Maa tyin iin andaru can tutsi ra yoco xaan yiqui naha ra Jesús. Tan quitañi ñi tan ndutya. ³⁵ Ra tsa nacatyí tuhun yacan, ra tsa nyehe vaha cuví ra. Tan tsa nditsa caahán ra, tyin maa ra tsitó tyin tsa nditsa caahán ra, tacan tan tsinu ndihi tucu iñi nyooho. ³⁶ Tacan cuví tyin tacan tan cundaa tsa catyí tuhun Nyoo nu catyí tsi: “Ndi intuhun yiqui ra tan ña tahnú.” ³⁷ Tan iyó inga nyico nu catyí tsi nu tutu Nyoo tyehen: “Cua nyehe nyivi tsi ra tsa tutsi ra naha yoco xaan.”

Nu quihvi ñuhu ra Jesús

(Mt. 27.57-61; Mr. 15.42-47; Lc. 23.50-56)

³⁸ Tsa yahá yacan, ra José ra ñuu Arimatea tsicán ndatu ra tsi ra Pilato na cuhva ra tsa naquihín ra cuñu ñuhu ra Jesús. Tan ra José can cuví ra iin ra yihí cuenda ra Jesús vasu tsa xeehe ñi tsa cuenda tsa yuuhví ra tsi ra cuví ityi nuu tsihin nyivi Israel. Tacan tan tsahá ra Pilato ndatu tsi ra, tan tsahán ra José tsinaquihín ra cuñu ñuhu ra Jesús. ³⁹ Tsahán ndihi tucu ra Nicodemo, ra tsa tsahán tsicahán tsihin ra Jesús tsa tsa cuaa. Tsaa ra tsihin ndutya tami. Tan iin ndutya tami tsa nañi mirra nasacá nuu tsihin inga tsa nañi áloe. Tan quitañi tsi tumaa oco utsi kilu tsa tandihí tsi. ⁴⁰ Tacan tan ra José tsihin ra Nicodemo quihín ra naha cuñu ñuhu ra Jesús tan cava nuu ra naha tsi ra tsihin jahma cuñi tsa tyihí ra naha ndutya tami can, tumaa iyó maa nyivi Israel tun cua cutsi ñi ndiyi tsitsi ñuhu. ⁴¹ Yatyin nu tsahíñi ra naha tsi ra Jesús nu cruu iyó iin cora yutun tata. Tan tsitsi cora can nyaá iin ñaña tsaa nu ñaha ca cuyucu ndi intuhun ndiyi. ⁴² Ican ñi tinyiñ ra naha cuñu ñuhu ra Jesús tyin yatyin ñi nyaá ñaña can tan tsa cua tahan tsi quivi quitatú nyivi Israel.

20

Nu nandotó ra Jesús

(Mt. 28.1-10; Mr. 16.1-8; Lc. 24.1-12)

¹ Tsa naa ca tsa cuví tumingu, ña María quee ñuu Magdala tsahán ña nu ñaña ra Jesús. Tan nyehe ña tyin nduve ca yuu ndasí yuhu ñaña can. ² Tacan tan tsinú xaan ña cuahán ña nu nyií ra Simón Pedro tan inga ra tsicá tsihin ra Jesús, ra tsa cuñí xaan ra Jesús. Tan catyí ña tsihin ra naha:

—Quihín nyivi cuñu ñuhu Jutu Mañi yo tsitsi ñaña, tan ña tsitó yo nu maa tsindacá ñi itsi —catyí ña María tsihin ra Pedro tan tsihin inga ra can.

³ Tacan tan ra Pedro tan inga ra can cuahán ra naha nu ñaña. ⁴ Tan cuahán nduvi taahan ra naha iin caa ñi, tsinú ra naha. Maa tyin ñihi ca tsinú inga ra can tan ñavin ca ra Pedro, jihna ca ra can tsaa nu

ñaña. ⁵ Quitsahā nyehé ihñi ra tsitsi ñaña, tan nyehe ra jahma cuiñi tsa cava nuu cuiñi ñuhu ra Jesús, canyíi can. Maa tyin ña quihví ra tsitsi ñaña. ⁶ Yahā can tan tsaā ndihi ra Simón Pedro tsata ra, tan ra ican quihví ra tsitsi ñaña can. Juvín ñi nyehe ndihi ra can jahma can canyíi tsi. ⁷ Tan juvín ñi nyehe ndihi ra tyin jahma tsa tsindasi jiñi ra Jesús, ña iin ñi nu canyíi can tsihin inga jahma can, yihí tahnu can tan cayucú siin can. ⁸ Tacan tan quihví ndihi inga ra tsicā tsihin ra Jesús can, ra tsa tsaā tsa jihna nu ñaña can. Tan nyehe ra tsa cuví can, tan tsinuñi ra. ⁹ Tyin tsa jihna, ña cutuñi ñi ra naha tsa caahán nu tutu Nyoo, tyin ra Jesús cuiñi tsi tsa nandoto ra tsa yaha cúu ra. ¹⁰ Tacan tan cuanuhu ra tsicā tsihin ra Jesús nda yuvehe ra naha.

Nu quituví ra Jesús nuu ña María quee ñuu Magdala

(Mr. 16.9-11)

¹¹ Maa tyin tsa tsaā nyico ña María, ndoo ña nyaá ña tsacú xaan ña ityi tsata ñaña can. Tan tsitsi tsa tsacú ña, nyehe ihñi ña tsitsi ñaña can. ¹² Tan nyehe ña uvi taahan ángel nditsí ra naha jahma cuitsin, nyecú ra naha nu tsicava cuiñi ñuhu ra Jesús. Iin ra nyaá ityi nu tsicava jiñi ra, tan inga ra nyaá ityi nu tsicava tsaha ra. ¹³ Tan tsicā tuhun ra ángel can naha ra tsi ña tan catyí ra naha:

—¿Nacuví tsacú xaan un?

Tan catyí ña:

—Tsacú maa yu tyin quihñin nyivi tsi Jutu Mañi yu, tan ña tsitó yu nu maa tinyíi ñi tsi ra —catyí ña tsihin ángel can.

¹⁴ Ndi caahán ca ña yacan, tan nanyico coo ña tan nyehe ña tsi ra Jesús ican. Maa tyin ña tsitó ña tatun ra Jesús cuví ra. ¹⁵ Tacan tan tsicā tuhun ra Jesús tsi ña:

—¿Nacuenda tsacú un? ¿Yóo nanducú un? —catyí ra tsihin ña.

Cuiñi maa ña tyin ra jahá cuenda cora yutun tata can cuví ra. Tan catyí ña:

—Tatta, tatun yoocho quihñin tsi ra Jesús, cahan tsihin yu nu maa tsindaca un tsi ra, tyin cunaquihñin yu tsi ra —catyí ña tsihin ra.

¹⁶ Tacan tan catyí ra Jesús tsihin ña:

—¡María! —catyí ra tsihin ña.

Tan nanyehe ña tan cahan ña tsihin ra tsihin yuhu hebreo, tan catyí ña:

—¡Raboni! —Tan cuiñi tsi catyí can: “Maestro”.

¹⁷ Tan catyí ra Jesús tsihin ña:

—Na tñin un tsi yu, tyin ñaha ca cahun yu nu nyaá Jutu yu. Maa tyin cūaahan tan cahan un tsihin tandihí yañi yu tyin cuahan yu nu nyaá Jutu yu, tan juvín ñi Jutu ndihi ndo cuví tsi ra. Cuahan yu nu nyaá Nyoo yu, tan juvín ñi Nyoo ndo cuví tsi ra —catyí ra Jesús tsihin ña.

¹⁸ Tacan tan tsahan ña María ñuu Magdala can tsijacotó ña tsi ra tsicā tsihin ra Jesús

tyin nyehe ña tsi ra tan cahan ra yacan tsihin ña.

Nu quituví ra Jesús nuu ra tsicā tsihin ra
(Mt. 28.16-20; Mr. 16.14-18; Lc. 24.36-49)

¹⁹ Juvín ñi maa quiví can nu quitsaha vitya, tsa cua cuaa tan ndu iin ra tsicā tsihin ra Jesús. Tan ndasi vaha yuvehe nu yucú ra naha tsa cuenda tsa yuuhví ra naha tsi ra cuví ityi nuu tsihin nyivi Israel. Tan ra Jesús quituví ra tan tsinyaa nyityi ra mahñu ra naha. Tan tsahā ra nacumí tsi ra naha, tan catyí ra:

—Na coo tsa taxin añima ndo —catyí ra.

²⁰ Tsa yahā tsa cahan ra yacan tan janahā ra ndaha ra tan xiin ra tsi ra naha. Tan ra ican naha ra sū xaan cuiñi ra naha tsa nyehe ra naha tsi Jutu Mañi yo. ²¹ Tan catyí nyico ra Jesús inga tsaha tsihin ra naha:

—Na coo tsa taxin añima ndo. Tumaa tsa tava Jutu yu tyiñu tsi yu, tacan tava nyico tucu yuhu tyiñu tsi nyoocho —catyí ra tsihin ra naha.

²² Tacan tan tiví ra tsi ra naha tan catyí ra tsihin ra naha:

—Naquihñin ndo Tatyí Ii Nyoo. ²³ Nyivi tsa jahá ndo tucahnu iñi, iyó tucahnu iñi tsi ñi. Tan nyivi tsa ña jahá ndo tucahnu iñi, nduve tucahnu iñi iyó tsi ñi —catyí ra Jesús tsihin ra naha.

Nu nyehe ra Tomás tsi Jutu Mañi yo tsa yaha nandotó ra

²⁴ Maa tyin ra Tomás, iin rq tsicā tsihin ra Jesús, ra tsa catyí ñi: “ra tinihi”, yoñi ra nyii tsihin ra naha tsa tsahan ra Jesús. ²⁵ Yahā can tan nacatyi tuhun ra tsicā tsihin ra Jesús tsihin ra:

—Nyehe ndi tsi Jutu Mañi yo —catyí ra naha tsihin ra.

Maa tyin ra Tomás catyí ra:

—Tun ña nyehe yu ndaha ra nu caahví nu quihví nduyu, tan ña cuaxin yu nundaha yu nu yihí nduyu can, tan ña cuaxin yu ndaha yu yiqui naha ra, ña cua tsinu iñi yu —catyí ra Tomás.

²⁶ Tsa yahā una quiví yucú nyico ra tsicā tsihin ra Jesús tsitsi iin vehe. Tan nyii ra Tomás tsihin ra naha. Tacan tan vasu ndi maa ndasi vaha yuvehe, maa tyin ra Jesús quihví ra tan tsinyaa nyityi ra mahñu ra naha. Tan tsahā ra nacumí tsi ra naha tan catyí ra:

—Na coo tsa taxin añima ndo.

²⁷ Tacan tan quitsahā catyí ra tsihin ra Tomás:

—Cuaxin nundaha un nu caahví ndaha yu ihya. Tan cuaxin ndaha un yiqui naha yu. Tan ña cuví un ra ndava iñi. Tsinu iñi —catyí ra Jesús tsihin ra Tomás.

²⁸ Tacan tan nacahan ra Tomás tan catyí ra:

—Jutu Mañi yu! ¡Tan Nyoo yu! —catyí ra Tomás.

²⁹ Tan catyí ra Jesús tsihin ra:

—Yooho Tomás, vityin tsinú iñi un tyin nyehé un tsi yu. Sií ca cuñi nyívi tsa nduve tsa nyehe tan tsinú iñi ñi —catyí ra Jesús tsihin ra Tomás.

Nu jacoto ra Juan nacuenda tsinu libru ihya

³⁰ Cuaha ca tsa iyo javaha ra Jesús nuu ra tsica tsihin ra, maa tyin ña tandihí tsi nyaá nu libru ihya. ³¹ Tsinyaa tsa nyaá tyin tacan tan tsinu iñi ndo tyin ra Jesús cuví ra Cristo, ra cuví Sehe Nyoo, tan coo ndo ñayívi nyitó tsa ña cua naa maa.

21

Nu quituvi ra Jesús nuu utsa taahan ra tsica tsihin ra

¹ Tsa yaha can tan quituvi ra Jesús nuu ra tsica tsihin ra inga tsaha. Tyehen quituvi ra yatyin ñi yuhu miñi Tiberias: ² Iin ñi nu yucú ra Simón Pedro tan ra Tomás tsa nañi: “ra tinihi”, tan ra Natanael, ra ñuu Caná nu cuví Galilea. Tan yucú ndihi sehe ra Zebedeo naha ra tan uvi taahan ca ra tsica tsihin ra Jesús. ³ Tan catyí ra Simón Pedro tsihin ra naha:

—Cuahan yu cua tiin yu tyaca —catyí ra.

Tan catyí ra naha tsihin ra:

—Cuhun ndihi ndi tsihin un —catyí ra naha.

Cuahán ra naha tan quihvi ra naha tsitsi iin yutun ndoo, maa tyin tsacuaa can ndi intuhun maa tyaca ña ñihí ra naha. ⁴ Tsa cuñi cunditsin tan quituvi ra Jesús nu nyiti yuhu miñi can. Maa tyin ra tsica tsihin ra, ña nacoto ra naha tsi ra. ⁵ Tacan tan catyí ra tsihin ra naha:

—Nyoocho ra cuatyí, ¿a ñaha ca ñihi ndo tyaca?

Tan nacahan ra naha tan catyí ra naha:

—Ñaha ca ñihi ndi.

⁶ Tacan tan nacahan ra Jesús tan catyí ra:

—Cuaxin ndo traya ndo tsiyo cuaha yutun ndoo juvin, tan cua ñihi ndo tyaca —catyí ra Jesús tsihin ra naha.

Tacan ica ra naha. Yaha can tan ndacua ña cuví ca tava ra naha traya can nu ndutya, tsa cuenda tsa cuaha tyaca yihí tsitsi can. ⁷ Tan ra tsa cuñi xaan ra Jesús catyí ra tsihin ra Pedro:

—Jutu Mañi yo cuví ra! —catyí ra tsihin ra Pedro.

Tsa tsiñi ra Simón Pedro tyin Jutu Mañi yo cuví ra, tsinditsi ra jahma ra, tyin tava ra can tsa cua tiin ra tyaca, tan quihvi ra cuahán ra tsitsi ndutya can. ⁸ Tan inga ra tsa tsica tsihin ra Jesús tsag ra naha nda yuhu miñi can tsihin yutun ndoo, ixtá ra naha traya can tyin tsitu cui can tsihin tyaca,

tyin yatyin ñi yuhu miñi can yucu ra naha tumaa iin cientu metru ñi. ⁹ Tsa nuu ra naha nu ñuhu, nyehe ra naha iin nu cayú tuun ñuhu. Tan canyii iin tyaca tsihin paan nuu tuun ñuhu can. ¹⁰ Tan catyí ra Jesús tsihin ra naha:

—Ndaca ndo taahan tyaca tsa ndi tiñi ndo —catyí ra Jesús tsihin ra naha.

¹¹ Tan ndaa ra Simón Pedro nu yutun ndoo tan quitsahá ixtá caa ra traya tyin tsitu cui can yihí tyaca nahnu. Cientu uvi xico utsi uñi ti yihí tsitsi can. Tan vasu cuaha xaan ti, maa tyin ña taní traya can. ¹² Tacan tan catyí ra Jesús tsihin ra naha:

—Naha ndo tyin curumusa ndo —catyí ra Jesús tsihin ra naha.

Tan ndi intuhun ra tsica tsihin ra, ña cana iñi ra naha ndaca tuhun ra naha yoo ra cuví ra tyin tsitó ra naha tyin Jutu Mañi yo cuví ra. ¹³ Tacan tan natuhva ra Jesús tan quihñi ra paan can, tan tsaha ra tsi ra naha. Tan juvin ñi tacan ica ra tsihin tyaca.

¹⁴ Yacan cuví nu tsinu uñi tsaha quituvi ra Jesús nuu ra tsica tsihin ra tsa yaha nandoto ra.

Nu caahán ra Jesús tsihin ra Simón Pedro

¹⁵ Tsa yaha tsa curumusa ra Jesús, tan tsica tuhun ra tsi ra Simón Pedro:

—Simón, sehe ra Jonás, ¿a cuñi ca un tsi yu tan ñavin ca ra ihya naha ra?

Nacahan ra Pedro tan catyí ra:

—Tacan Jutu Mañi yu, maa un tsitó tyin cuñi yu tsi un —catyí ra Pedro.

Tan catyí ra Jesús tsihin ra:

—Cuhva tsa catsi mbee nyihi jana yu —catyí ra Jesús tsihin ra Pedro.

¹⁶ Tsica tuhun nyico ra Jesús tsi ra inga tsaha:

—Simón sehe ra Jonás, ¿a cuñi un tsi yu? —catyí ra Jesús tsihin ra.

Nacahan ra Pedro tan catyí ra:

—Jutu Mañi yu, maa un tsitó tyin cuñi yu tsi un —catyí ra Pedro tsihin ra.

Tan catyí ra tsihin ra:

—Jaha cuenda mbee jana yu —catyí ra Jesús tsihin ra.

¹⁷ Tan tsinu uñi tsaha tsica tuhun nyico ra tsi ra:

—Simón, sehe ra Jonás, ¿a cuñi un tsi yu? —catyí ra Jesús tsihin ra.

Cuhva tsa tsica tuhun ra tsi ra tsa tsinu uñi tsaha tatun cuñi ra tsi ra, ra Pedro nducui-ihya xaan cuñi ra, tan catyí ra tsihin ra:

—Jutu Mañi yu, maa un tsitó nácaa añima yu tan maa un tsitó tyin cuñi yu tsi un —catyí ra.

Tan catyí ra Jesús tsihin ra:

—Jaha cuenda mbee jana yu. ¹⁸ Tsa nditsa caahán yu tsihin un tyin tsa ndi tyuvaa un tsinditsi maa un jahma un tan cuahán maa un nu cuñi un cuhun un. Maa tyin tatun

tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaca ra tsi un nu ña cuñí un cuhun un —catyí ra Jesús tsihin ra Pedro.

¹⁹ Tsa cahan ra Jesús yacan, cuñí ra cahan ra nácaa cua cúu ra Pedro tan cua jacahnu ra tsi Nyoo tacan. Yahá can tan catyí ra Jesús tsihin ra Pedro:

—¡Naha quitsi nyicun un tsi yu! —catyí ra tsihin ra.

Nu caahán ra Juan tuhun maa ra

²⁰ Tacan tan natsico coo ra Pedro tan nyehe ra tyin nyicún inga ra tsa tsicá tsihin ra Jesús tsi ra naha, ra tsa cuñí xaan ra Jesús. Juvin ra tsinyanaa tsi ra Jesús tsa cuxiñi ra quivi can. Tan tsicá tuhun ra tsi ra tan catyí ra: “Jutu Mañi yu, iyóo ra cua xico tsi un?” catyí ra, tsicá tuhun ra quivi tsa ndi cumañi ca cúu ra Jesús. ²¹ Cuhva tsa nyehe ra Pedro tsi ra, tsicá tuhun ra tsi ra Jesús:

—Jutu Mañi yu, tan ra ihya, ¿náa cua tahan ra? —catyí ra tsihin ra.

²² Nacahan ra Jesús tan catyí ra:

—Tatun cuñí maa yu tsa coo ra nda cuanda quitsi yu inga tsaha, ¿náa cuenda yoocho? Cqhon yoocho tsihin yu —catyí ra Jesús tsihin ra Pedro.

²³ Tacan tan iin yaha ñi tsinu tuhun ihya nu nyecú yañi yo tyin ra ican, ña cua cúu ra. Maa tyin ña catyí ra Jesús tsa ña cua cúu ra can. Tyin catyí ra: “Tatun cuñí yuhu tsa coo ra nda cuanda quitsi yu inga tsaha, ¿náa cuenda yoocho?”

²⁴ Yuhu cuví ra can, ra tsa cahan ra Jesús tuhun. Tan nyehe yu tandihi cuii maa tsa cuví tan tyaa yu nu libru ihya. Yuhu tsitó yu tyin tandihi tsa tyaa yu, tsa nditsa caahán tsi.

²⁵ Iyó cuaha ca tsa javahá ra Jesús. Tun tsatyin tsicunyaá tandihi can nu libru, tsicá iñi yu tyin ndi ña cua cutahan can nanii cahnu nu ñuhu ñayivi.

Tan na cuví tsi tacan ñi.

Tyiñu Tsa Javaha Ra Apóstol: Ra Tsa Tava Tyiñu Ra Jesucristo

Nu catyí ra Jesús tyin cua quitsi Tatyí Ii Nyoo

¹ Yoocho Teófilo, quivi tsa jacuhun yu tutu tsa jihna ñi can tsi un, tyaa yu tandihi tsa quitsahá javahá ra Jesús tan tandihi tsa jacuahá ra nda quivi jihna ñi, ² tan nda quivi nandaa ra andivi. Tan tsa ndi cumañi ca nandaa ra andivi, nacatsi ra tsi ra apóstol cuenda ra. Tan tsihin tunyee iñi Tatyí Ii Nyoo tava tyiñu ra tsi ra naha tyin caca ra naha tyiñu ra. ³ Tan cuaha xaan tundoho nyehe ra Jesús tan tsihi ra. Tan tsa yaha tsa tsihi ra, nandoto ra tan quituvi ra nu yucú ra tsa tava tyiñu ra. Tan tsitsi tsa uvi xico quivi, cuaha xaan tsaha quituvi ra nu yucú ra naha, tyin na coto ra naha tyin nditsa tsa nyito ra. Tan cahan ra Jesús tsihin ra naha nácaa ndacá ñaha Nyoo tsi yo.

⁴ Tsa ndi nyii ra Jesús tsihin ra naha, tan catyí ra tsihin ra naha:

—Ña cua quita ndo Jerusalén ihya, nda cuanda naquihin ndo tsa catyí Jutu yu tyin cuhva ra tsi ndo, tumaa tsa cahan yu tsihin ndo quivi can. ⁵ Nditsa tyin tsihin ndutya jacoondutya ra Juan tsi nyivi. Maa tyin nyooho ña cuaha ca quivi tan coondutya ndo tsihin Tatyí Ii Nyoo —catyí ra Jesús tsihin ra naha.

Nu nandaa ra Jesús andivi

⁶ Tsa ndu iin ra tava tyiñu ra Jesús, tan tsicá tuhun ra naha tsi ra tan catyí ra naha:

—Jutu Mañi yu, ¿a vityin ñi cua jacacu un tsi ñuu Israel ihya tsa ña cua cundaca ñaha ca ra ñuu Roma tsi yo? —catyí ra naha.

⁷ Tan nacahan ra Jesús tan catyí ra tsihin ra naha:

—Ña taahan tsi coto nyoocho ndaa quivi cua cuvi tsa cua javaha Nyoo Jutu yo. Intuhun ñi maa ra cua cahan ama cua cuvi tsi. ⁸ Tyin quivi tsa cua quitsi Tatyí Ii Nyoo siqui ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihya tan tandihi ñuu tsa cayucú Judea tan Samaria, tan nda cuanda nanii cahnú ñuhu ñayivi —catyí ra Jesús tsihin ra naha.

⁹ Tan tsa yaha tsa cahan ra Jesús tuhun ihya, tan tsitsi tsa nyehe ra naha tsi ra, nandaa ra andivi, tan quihvi ra tsitsi vico. Tacan tan ña nyehe ca ra naha tsi ra. ¹⁰ Tan cuhva tsa nyehe ndaa ra naha andivi, quituvi uvi taahan ángel Nyoo tsa nditsi jahma cuitsin yatyin ñi nu nycécú ra naha. ¹¹ Tan catyí

ángel can naha ra tsihin ra tava tyiñu ra Jesús:

—Nyoocho ra Galilea, ¿nacuenta nyehe ndaa xaan ndo andivi? Ra Jesús tsa nyehe ndo nandaa ihya, juvin ra cua quitsi inga tsaha, tan tyehen cua nyehe nyico ndo tsi ra —catyí ángel tsihin ra naha.

Nu nacatsi ra tava tyiñu ra Jesús tsi ra Matías tyin jaha tyiñu ra tyiñu tsa javahá ra Judas

¹² Tacan tan quita ra tava tyiñu ra Jesús nu tsiyucú ra naha yucu nu iyó yutun olivo. Tan cuanuhu ra naha ñuu Jerusalén. Tan yatyin ñi canyiñ ñuu can, tumaa sava hora ñi tan tsaa yo. Tyin sava hora ñi cuví caca nyivi quivi quitatú ñi, tyin tacan catyí maa ley tsa tyaa ra Moisés. ¹³ Tsa tsaa ra naha ñuu Jerusalén can, ndaa ra naha nu tsinu uvi pisu vehe nu iyó ra naha. Tan ra tsa yucú can, cuví ra ihya naha ra: ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñi tsa nasama ra ndacá ñaha, tan tsihin ra Judas yañi ra Jacobo. ¹⁴ Tan tandihi ra ican naha ra ndu iin ra naha tandihi quivi tan tsicán tahvi ra naha tsi Nyoo. Tan yucú ndihi tucu yañi ra Jesús tsihin ra naha, tan tsihin ña María sihi ra, tan cuaha ca maa ñiñaha.

¹⁵ Tan tsa tandihi nyivi tsa ndu iin quivi can quita maa cientu oco ñi. Tacan tan nduvita ra Pedro. Tan catyí ra tsihin ñi:

¹⁶ —Nyoocho yañi, tsa nyaá tucu maa tsa tahan ra Jesús cuhva ihya tan vityin tsa cundaa tsa cahan ra David jahá Tatyí Ii Nyoo nu catyí ra tyin ra Judas cua cuhva cuenda ra tsi ra Jesús tsi ra xaan iñi tsi ra. ¹⁷ Tan ra Judas cuví ra iin ra tsa tsinyi tsihin yo. Tan iin caa ñi jahá tyiñu ra tsihin yo. ¹⁸ Maa tyin sahan ra, tan jatá ra ñuhu tsihin xuhun tsa ñihí ra tsa xico ra tsi ra Jesús. Yaha can tan canacava ra tsihin jiñi ra, tan ndatá tsitsi ra tan quita tandihi tsiti ra. ¹⁹ Tan quivi tsa tsito nyivi iyó Jerusalén ihya tsa tsihi ra, jacunañi ñi ñuhu can Acéldama. Tan tsa tsihin yuhu maa ñi cuñi tsi catyí Ñuhu cuenda tsa Tsatí Niñi Nyivi. ²⁰ Tyin nu libru Salmo catyí tsi cuenda ra Judas tyehen:

Na ndoo maa vehe ra.

Tan ña coo nyivi tsitsi vehe can.

Tan catyí tucu tsi:

Inga ra cua jaha tyiñu tyiñu tsa javahá ra.

²¹⁻²² Tan vityin yucú ra tsa cutahan tsihin yo quivi tsinyi Jutu Mañi yo Jesucristo tsihin yo; nda quivi jacoondutya ra Juan tsi ra, tan nda quivi nandaa ra cuahan ra andivi. Tan vityin ñiñi cuñi tsi tsi inga ra cuvi tsandaa tsihin yo tsa cuenda tsa nandoto ra Cristo —catyí ra Pedro.

²³ Tacan tan cana ra naha tsi uvi taahan ra naha. Cana ra naha tsi ra José tsa nañi

Barsabás, tan juven ñi nañí tucu ra Justo; tan cana tucu ra naha tsi ra Matías. ²⁴ Tan tsican tahvi ra naha tsi Nyoo tan catyí ra naha tyehen:

—Jutu Mañi yu, yoocho tsitó un tsa tsicá iñi ndi tsihin añima ndi. Janaha tsi ndi tsitsi tsa uvi taahan ra ihya naha ra, ndáa ra tsa nacatsi maa un, ²⁵ tyin cuiso ra tyiñu tsa jacunaq ra Judas tsa cuenda cuatyí ra, tan cuahán ra nu taahán maa tsi cahun ra —catyí ra naha, tsican tahvi ra naha tsi Nyoo.

²⁶ Tacan tan tava cuenda ra naha ndáa ra cua tahan tsi cuiso tyiñu can. Tan tahan tsi tsi ra Matías. Ra ícan cuví ra tahan tsi cutahan tsihin tsa utsi iin ra tsa tava tyiñu ra Jesús.

2

Nu nuu Tatyí Ii Nyoo

¹ Tsaq quivi vico Pentecostés, tan ndu iin tandihi nyivi tsa tsinú iñi tsi ra Jesús. ² Tan sana iñi ñi tan tsiñi ñi cucayu ityi andivi. Tumaa cucayu tsa vatsí tatyí xaan. Tan iyo xaan cuví tsitsi vehe nu yucú ñi. ³ Tacan tan quituvi tumaa iin ñuhu tan tsaq tsi siqui intuhun intuhun ñi. ⁴ Tan tandihi ñi tsitú ñi tsihin Tatyí Ii Nyoo. Tan quitsaha caahán ñi inga yuhu cuhva tsa jacahan maa Tatyí Ii Nyoo tsi ñi.

⁵ Tan quivi can cuaha xaan ra ñuu Israel tsaq ra naha ñuu Jersualén. Ra vaha tsicá tsihin Nyoo cuví ra naha. Quee ra naha tandihi ñuu tsa cayucú nu ñuhu ñayivi. ⁶ Tan tsa tsiñi ra can naha ra tsa iyo xaan cuví nu yucú nyivi cuenda ra Cristo, tan cuahán ra naha tan ndu iin ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiñi ra yuhu ra naha tsa caahán ñi jahá Tatyí Ii Nyoo. ⁷ Iyo xaan cuñi ra naha tan quitsaha natuhún tahan ra naha tan catyí ra naha:

—¿A ñavin nyivi ñuhu Galilea cuví tandihi ñi tsa caahán ihya? ⁸ ¿Nacuenda tyin tsiñi yo caahán ñi cuhva caahán intuhun intuhun yo? ⁹ Ihya yucú yo tsa cuví yo nyivi quee Partia, Media, Elam, Mesopotamia, Judea, Capadocia, Ponto, Asia, ¹⁰ Frigia, Panfilia, Egipto, tan nyivi quee ityi nuu ca Cirene ityi Africa. Tan yucú tucu yo tsa cuví yo nyivi ñuu Roma tan iyó yo ñuu ihya. Tan juhva yo cuví yo nyivi Israel nda quivi cacú yo. Tan inga yo cuví yo nyivi nanduví cuenda nyivi Israel tan nyicún yo ley tsa tyaaq ra Moisés. ¹¹ Iyó tucu yo tsa cuví yo nyivi quee Creta tan Arabia. Maa tyin tandihi yo tan tsiñi yo tyin tsihin yuhu tsa caahán maa yo caahán ñi. Tan nacatyí tuhun ñi tsa cahnu tsa javahá Nyoo —catyí ra naha.

¹² Tandihi ra naha, iyo xaan cuñi ra naha, tan tsicá tuhun tahan ra naha tan catyí ra naha:

—¿Náa cuñi tsi catyí tandihi tsa cuví ihya? —catyí ra naha.

¹³ Maa tyin inga ra jacuñi nyaa ra naha tsi ñi, tan catyí ra naha tyin tsiñi ñi.

Nu caahán ra Pedro tsihin nyivi

¹⁴ Tacan tan nduvitá ra Pedro tsihin tsa utsi iin ca ra tava tyiñu ra Jesús. Tan ñihi cahan ra tan catyí ra:

—Nyoocho yañi, tsa cuví ndo ra ñuu Israel, tan tandihi nyoocho tsa iyó ñuu Jerusalén ihya. Cuñi tsi tsa coto ndo tuhun ihya. Tan tyaa soho vaha ndo tsa cua cahan yu tsihin ndo. ¹⁵ Tyin cuñi maa ndo tyin tsiñi ndi. Maa tyin ñavin nyixi tsihi ndi, tyin ña tuhvá nyivi coho nyixi hora ihya, tyin ndi jatyaan. ¹⁶ Maa tyin tsa cuví ihya cuví tsa cahan ra Joel, ra cuví ndusu yuhu Nyoo tahan tsanaha. Tyin catyí ra:

¹⁷ Nu cua ndihi quivi, catyí Nyoo, cua jaquitsi yu Tatyí Ii yu siqui tandihi nyivi. Tan cua cahan sehe ndo tsa cuenda yu. Tan ra cuatyí tan ñi cuatyí cua janaha yu tsa iyo tsi ñi.

Tan nyivi tsahnu cua nyehe ñi ñumaahna jaha yu.

¹⁸ Cua jacuhun yu Tatyí Ii yu siqui ñi tsa jaha tyiñu tsa cuenda yu.

Tan cua cahan ñi tsa cuenda yu, catyí Nyoo.

¹⁹ Tan catyí ra tyin cua janaha ra tsa iyo cua nyehe nyivi ityi andivi.

Tan ityi nu ñuhu ñayivi cua javaha ra tsa iyo, seña ñiñi, seña ñuhu, tan vico yuhma.

²⁰ Tan ñicanyii cua ndunaa tsi.

Tan yoo cua nducuaaha tsi tumaa cuaahna ñiñi.

Tandihí tuhun caahán ra ihya cua cuví tsi tsa ndi cumañi ca tahan tsi quivi quitsi Jutu Mañi yo.

Tan quivi cua quitsi ra, iyo xaan cua cuví.

²¹ Tan tandihi nyivi tsa tsicán tahvi tsi ra cua cacú ñi, catyí ra Joel jahá Nyoo.

²² Tsa yaha nacatyí tuhun ra Pedro yacan, tacan tan catyí ra tsihin ra naha:

—Nyoocho ra Israel, tyaa soho ndo tsa cua cahan yu ihya. Ra Jesús, ra ñuu Nazaret, maa Nyoo nacatsi tsi ra, tan tsa janahá Nyoo tsi yo tyin nditsa tsa nacatsi ra tsi ra, tsahaq ra tunyee iñi tsi ra tan cuaha xaan tsa iyo tan tsa nyityi tan seña javahá ra. Tan tsa tsitó maa ndo tandihi tsa caahán yu ihya. ²³ Maa tyin quivi nacuhvá cuenda ndo tsi ra, javahá ndo tumaa cuhva tyaaq maa Nyoo cuhva nda quivi jihna ñi. Tyin tsahaq cuenda ndo tsi ra tsi ra caquiñi. Tan ticaq ra naha tsi ra nu cruu. Tsahñi ra naha tsi ra jahá ndo. ²⁴ Maa tyin Nyoo janandotó ra tsi ra. Jacacú ra tsi ra tyin ña cuví cundaca ñaha tuhun tsihi tsi ra. ²⁵ Tyin ra David cahan

ra tuhun cahan ra Cristo tahañ tsanaha, tan catyí ra:

Tacan ñi nyehé yu tsi Nyoo Jutu yu ityi nuu yu.

Maa ra nyaá ra ityi xiin cuaha yu tan nduve náa cuví jayuhvi tsi yu.

²⁶ Yacan cuenda sii xaan cuñi yu. Tan jacahnú yu tsi Nyoo tsihin tsa sii cuñi yu.

Tan cuñu ñuhu yu cua quitatu tsi tyin tsitó yu tyin cua nandoto yu inga tsaha.

²⁷ Tyin yoocho, Nyoo Jutu yu, ña cua nacoo ihñi un añaima yu nu yucú añaima nyivi tsa tsihi,

tan ndi ña cua cuhva un tsa tyahyu cuñu ñuhu yu.

Tyin sehe ii maa un cuví tsi yu.

²⁸ Tan jahaná un tsi yu ityi nu coo yu ñayivi ña cua naa maa.

Tan cua jacutu un tsi yu tsihin tusii iñi tyin maa un nyaá tsihin yu, catyí ra David cahan ra tsa cahan ra Cristo tahañ tsanaha.

²⁹ 'Nyoocho yañi, tsitó vaha yo tyin ra David tsii tsaahnu yo tsihi ra tan quihvi ra tsitsi ñuhu. Tan ñaña ra ndi nyaá tsi ihya vityin. ³⁰ Maa tyin ra David cuví ra iin ndusu yuhu Nyoo. Tan tsitó ra tyin Nyoo catyí ra tyin juvin ñi tata maa ra cua cuví ra Cristo.

Tan ra Cristo, cuví ra cua cundaca ñaha tumaa tsa tsindacá ñaha ra David. ³¹ Tan ra David tumaa tsa tyin nyehé ra tsa cua cuví nu cuahán ca tsi ityi nuu. Tan cahan ra tuhun tsa cahan ra Cristo. Tan catyí ra tyin ña cua ndoo añaima ra nu yucú añaima nyivi tsa tsihi.

Tan ndi ña cua tyahyu cuñu ñuhu ra, catyí ra. ³² Tan ra Jesús can janandoto Nyoo tsi ra. Tan tandihi maa ndi cuví ndi tsandaa tsa cuenda tsa nandoto ra. ³³ Jutu Nyoo jacahnú ra tsi ra Jesús, tan tsihin ndaha cuaha ra cañihi ra tsi ra nda gloria. Tan ra Jesús naquihñ cuenda ra Tatyí li tsa catyí Jutu yo Nyoo tahañ tsanaha tyin cuhva ra tsi yo.

Tan yacan cuví tsa tsahá ra tsi ndi vityin. Juvin tsi cuví tsa nyehé ndo tan tsíñi ndo. ³⁴ Tyin ñavin ra David nandaq ityi andivi. Maa tyin maa ra David cahan ra tuhun ra Jesús, tan catyí ra:

Jutu Mañi yo Nyoo catyí ra tsihin Jutu Mañi yu ra Cristo: "Cunya xiin cuaha yu

³⁵ tsitsi tsa cua caquín yu tsi ra xaan iñi tsi un tsaha un", catyí ra David jahá Nyoo.

³⁶ Tacan cahan ra Pedro tsihin ra naha, tan catyí tucu ra:

—Nyoocho tan tandihi ca nyivi Israel, coto vaha ndo tyin tuhun ra Jesús, yacan cuví tsa caahán yu tsihin ndo ihya. Ticaq ndo tsi ra nu cruu. Maa tyin cuví ra Jutu Mañi yo, tan cuví tucu ra Cristo ra ndacá ñaha tsi yo jahá Nyoo —catyí ra Pedro.

³⁷ Cuhva tsa tsíñi ra naha tsa cahan ra Pedro tuhun ihya, cuihya xaan cuñi ra naha cuví. Tan tsicá tuhun ra naha tsi ra Pedro

tan tsi tandihi ca ra tava tyiñu ra Jesús, tan catyí ra naha:

—Yañi, ¿nácaa javaha ndi vityin? —catyí ra naha tsihin ra tava tyiñu ra Jesús.

³⁸ Tacan tan catyí ra Pedro tsihin ra naha: —Intuhun intuhun ndo ndu uvi iñi ndo

cuatyí ndo tan nasama ndo cuhva iyó ndo. Tan cõndutya ndo tsihin sivi ra Jesucristo. Tan cua jaha ra tucahnu iñi cuatyí ndo. Tacan tan cua cuhva Nyoo Tatyí li ra tsi ndo.

³⁹ Tyin tahañ tsanaha catyí Nyoo tyin cuhva ra Tatyí li ra tsi yo, tan tsi sehe yo, tan tsi nyivi tsa cañi iyó. Tyin tandihi nyivi tsa cua nacana Jutu Nyoo cua cuhva ra Tatyí li ra tsi ñi —catyí ra Pedro.

⁴⁰ Tsihin tuhun ihya tan tsihin inga ca tuhun, ra Pedro tsahá cuenda ra tsi ra naha tan catyí ra tsihin ra naha:

—Nducu ndo cuhva na jacacu Nyoo tsi ndo, coto cunaa ndo tsihin nyivi caquiñi iyó nu ñuhu ñayivi ihya —catyí ra tsihin ra naha.

⁴¹ Tacan tan tandihi ra tsa tyaa yahvi tuhun cahan ra Pedro tsicoõndutya ra naha. Tan quitá tumaa uñi mil nyivi tsa tandihi ñi, tan ndu iin ñi tsihin nyivi yihí cuenda ra Jesucristo. ⁴² Tan tandihi quivi ndu iin

tandihi ñi, tan nñi iñi ñi tyaa soho ñi tsa jacuahá tandihi ra tava tyiñu ra Jesucristo tsi ñi. Tan iin ñi cuví ñi tsihin tahañ ñi, tan tsicán tahvi ñi tan tsatsí ñi paan tan tsihi ñi vinu tyin tacañ tan ña cua naa iñi ñi tyin tsihi ra Cristo tsa cuenda cuatyí ñi.

Cuhva iyó nyivi yihí cuenda Jutu Mañi yo Jesucristo quivi can

⁴³ Tan cuaha tsa iyo javahá tandihi ra tsa tava tyiñu ra Jesucristo jahá Nyoo. Tan tandihi ñi iyo cuñi ñi. ⁴⁴ Tandihi ñi yihí cuenda ra Cristo iin caa ñi iyó ñi tsihin tsa iyó tsi ñi. ⁴⁵ Xicó ñi tsa iyó tsi ñi. Tan tsatsá ñi xuhun ñi tsi nyivi tahañ ñi cuhva tsa tsíñi ñuhu tsi intuhun intuhun ñi. ⁴⁶ Tandihi quivi

tan ndu iin ñi nda vehe ñuhu cahnu. Tan nda yuvehe ñi iin caa ñi tsatsí ñi paan tan tsihi ñi vinu. Tan sii cuñi ñi tsatsí ñi tyin iin ñi cuví ñi. ⁴⁷ Tan jacahnú ñi tsi Nyoo. Tan vaha caahán tandihi nyivi tuhun ñi. Tan iin tan iin quivi tan nducuahá ca nyivi quihvi cuenda

Jutu Mañi yo Jesús tyin jacacú ra tsi ñi.

3

Nu nduvahá iin ra coxo

¹ Iin quivi cuahán ra Pedro tsihin ra Juan vehe ñuhu cahnu. Cuví tsi cuhva caa uñi tsa tseñi, cuhva tsa tuhvá nyivi Israel cuahán cuandacán tahvi tsi Nyoo. ² Tan iin ra ndaahvi, coxo ra nda quivi cacú ra, nyaá ra yuhu cora vehe ñuhu cahnu can tandihi

maa quivi. Tyin tsindacá ñi tsi ra na ndacan ra xuhun tsi nyivi quihvi yuhu cora can, tan nañi tsi Yuhu Cora Sii Caá. ³ Tacan tan

nyehę ra coxo can tsi ra Pedro tsihin ra Juan tsa cua quihvi ra naha yuhu cora can. Tan tsican ra xuhun tsi ra naha. ⁴ Tan nyehę ra Pedro tan ra Juan tsi ra. Tan ra Pedro catyi ra tsihin ra:

—Nyehe tsi ndi —catyi ra.

⁵ Tacan tan quitsahę nyehę ra coxo can tsi ra naha. Cuñi maa ra tyin iyó tsa cua cuhva ra naha tsi ra. ⁶ Maa tyin ra Pedro catyi ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin sivi ra Jesucristo ra ñuu Nazaret, nduvita tan caca —catyi ra Pedro tsihin ra.

⁷ Tacan tan tñin ra Pedro ndaha cuaha ra tan cañihį ra tsi ra. Tan juvin ñi cuhva can nacoę tunyee iñi nduvi taahan tsaha ra tan jucun tsaha ra. ⁸ Tacan tan ra coxo can ndava ra, tan nduvita ra tsinyaę nyityi ra. Tan quitsahę tsicá ra. Tan quihvi ra tsihin ra naha tsitsi cora vehe ñuhu can, tsicá ra, tan ndava ra, jacahnú ra tsi Nyoo. ⁹ Tandihį nyivi nyehę ñi tsi ra tyin tsicá ra tan jacahnú ra tsi Nyoo. ¹⁰ Tan iyo xaan cuñi ñi tan yuuhvi ñi tsa cuenda tsa nduvahę ra can. Tyin nacotó ñi tsi ra. Tyin juvin ra cuvi ra tsa tuhvá tsinyaá Yuhu Cora Si Caá can tsicán ra xuhun tsi nyivi.

*Nu caahán ra Pedro tuhun ra Cristo tsi-
hin nyivi nu cuvi corredor cuenda ra Salomón*

¹¹ Ra coxo tsa nduvahę can, ña jaña maa ra tsi ra Pedro tan ra Juan. Tan tandihį nyivi iyo cuñi ñi, tan tsinú xaan ñi tsaę ñi nu cuvi corredor cuenda ra Salomón tyin cua nyehę ñi tsi ra coxo can tyin tsa nduvahę ra. ¹² Tsa nyehę ra Pedro yacan, tan catyi ra tsihin nyivi can:

—Nyooho ra Israel, ¿nacuenta iyo xaan cuñi ndo? Tan ¿nacuenta nyehę xaan ndo tsi nyuhu? ¿A cuñi maa ndo tyin tsihin tunyee iñi maa ndi, a tsa cuenda tsa catsi iyó ndi nuu Nyoo, tan cuvi janduvahę ndi tsi ra coxo ihya? ¹³ Ñavin maa nyuhu janduvahę tsi ra. Nyoo ra cuvi Nyoo tsii tsaañu yo, ra Abraham, ra Isaac tan ra Jacob, ra ican jacahnú tsi Sehe ra tan tsahę ra tunyee iñi tsi ra, ra tsa tsahę cuenda ndo tsi ra Pilato, ra cumi tyiñu. Tan ra Pilato cuñi ra jaña ra tsi ra. Maa tyin nyooho ña tsahę ndo. ¹⁴ Tahan tsi tsa ndacan ndo tsa jaña ra tsi ra vaha, tan ra ii can, maa tyin nyooho tsican ndo tsa jaña ra tsi iin ra tsahñi ndiyi. ¹⁵ Tan nyooho tsahñi ndo tsi ra tsa tsahá ñayivi nyito coo yo tsihin Nyoo. Maa tyin Nyoo Jutu yo janandotę ra tsi ra. Tan ña ndoę ra nu yucú añima nyivi tsa tsihi. Tan nyuhu cuvi ndi tsandaa tsa cuenda tsa nandotę ra. ¹⁶ Tan juvin ra Jesús cuvi ra tsa tsahę tunyee iñi tsi ra coxo ihya tan nduvahę tsaha ra, tyin tsinú iñi ndi tyin iyó tunyee iñi tsi ra Jesús.

Yacan cuenda nduvahę tsaha ra ihya, tan nacotó vaha ndo tsi ra. Tan tandihį nyooho nyehę ndo tyin nduvahę ra tsa cuenda tsa tsinú iñi ndi.

¹⁷ Tsitó yu, —catyi ra Pedro— tyin quivi tsa tsahñi ndo tsi ra Jesús, ña tsitó ndo tyin ña vaha tsa javahá ndo. Tan tacan tucu ra cuvi ityi nuu tsihin ndo, ña tsitó ra naha. ¹⁸ Maa tyin tacan jacuvi ndo tan cundaa tsa cahan ra cuvi ndusu yuhu Nyoo tahan tsanaha, tyin catyi ra naha tyin ra Cristo cua nyehę ra tundoho. ¹⁹ Yacan cuenda ndu uvi iñi ndo cuatyí ndo, tan nacuhva cuenda ndo añima ndo tsi Nyoo, na ndatsi cuatyí ndo. Tacan tan sii xaan cua cuñi añima ndo jaha tunyee iñi Jutu Mañi yo. ²⁰ Tacan tan cua jaquitsi ra tsi ra Jesús ra cuvi Cristo, na quitsi ra inga tsaha. Tyin nda quivi jihna ñi tyaa Nyoo cuhva tyin quitsi ra tsa cuenda yo. ²¹ Taahán tsi tsa ndoó ra Jesucristo gloria tsa vityin nda cuenda quivi cua jandutsaa Nyoo tandihį maa tsa iyó. Tumaa cuhva catyi ra cuvi ndusu yuhu Nyoo tahan tsanaha. ²² Tyin tacan catyi ra Moisés tsihin tsii tsaañu yo: “Cua jaquitsi Jutu yo Nyoo tsi ra tsa cua cahan tuhun ra. Tan juvin ñi nyivi yo cua cuvi ra. Tan cua cahan ra tuhun Nyoo tsihin ndo tumaa caahán yuhu. Tyaa yahvi ndo tandihį tsa cua cahan ra tsihin ndo. ²³ Tyin tandihį nyivi tsa ña cua tyaa soho tsa cua cahan ra, cua cunaa ñi, tyin ña cua cutahan ñi tsihin nyivi tsa nacatsi Nyoo”, catyi ra Moisés.

²⁴ Tan tacan tucu tandihį ra cuvi ndusu yuhu Nyoo nda quivi tsicoę ra Samuel tan nda cuenda vityin, jacotę ra naha tsa cuvi vityin. ²⁵ Tandihį tsa catyi Nyoo tyin cuhva ra tsi yo, cahan ra cuvi ndusu yuhu Nyoo tahan tsanaha. Tandihį can tsii maa ndo cuvi can. Tan tyiñu tsa ndoę Nyoo tsihin ra Abraham tsii tsaañu yo, juvin ñi tsa cuenda maa ndo cuvi yacan. Tyin catyi Nyoo tsihin ra Abraham: “Tandihį nyivi tsa iyó nu ñuhu ñayivi cua nasoco yu tsi ñi tsa cuenda nyivi tata un.” ²⁶ Tan yacan cuenda quivi janandotę Nyoo tsi Sehe ra, jihna ca nu yucú ndo jacuhun ra tsi ra, tyin nasoco ra tsi ndo, tan intuhun intuhun ndo naco ndo tsa caquiñi iyó ndo —catyi ra Pedro tsihin ñi.

4

*Nu tñin ra cuvi ityi nuu vehe ñuhu cahnu
naha ra tsi ra Pedro tan ra Juan*

¹ Ndi caahán ca ra Pedro tan ra Juan tsihin nyivi, tan tsaę ra cuvi jutu naha ra tsihin ra cuvi ityi nuu tsihin ra jahá cuenda vehe ñuhu, tan tsihin ra cuvi saduceo naha ra. ² Nduxaę xaan ra naha tyin ra Pedro tan ra Juan jacuahá ra naha tsi nyivi tan catyi ra naha tyin nditsa tsa cua nandoto nyivi tsa tsa tsihi, tyin ra Jesús nandotę ra. ³ Tacan

tan tñn ra naha tsi nduvi taahan ra tava tyiñu ra Jesús can naha ra. Tan tyihí ra naha tsi ra naha vehe caa. Tan ndoq ra naha nda cuanda inga quivi tyin tsa cueñi cuví cuhva can. ⁴ Maa tyin cuaha ñi tsa tsiñi tuhun caahán ra Pedro quitsahá tsinú ñi ñi. Tan ndu iñ ñi tsihin nyivi yihí cuenda ra Jesús. Tan tsa tandihí ñi quitá maa uhun mñi cuví tsa maa ñi maa rayi naha ra.

⁵ Tsa tuvi inga quivi, nda ñuu Jerusalén ndrui tandihí ra cumí tyiñu cuenda nyivi Israel, tan tsihin ra tsahnu, tan tsihin ra cuví maestro cuenda ley tsa tyaa ra Moisés. ⁶ Tan nyii tucu ra Anás ra jutu tsahnu cuví ityi nuu. Tan nyii tucu ra Caifás, tan ra Juan, tan ra Alejandro. Tan yucú ndihí tucu tandihí rayi tsa cuví nyivi ra jutu tsahnu cuví ityi nuu. ⁷ Tacan tan tava tyiñu ra naha na cuquihin ra naha tsi ra Pedro tan ra Juan. Tan tsindacá ra naha tsi ra naha nda mahñu nu yucú ra naha. Tan tsicá tuhun ra naha tsi ra naha, tan catyí ra naha:

—¿Yóo tsahá ndatu tsi ndo tsa janduvaha ndo tsi ra can? ¿Yóo tsahá tunyee ñi tsi ndo tsa javaha ndo tyeheñ —catyí ra naha tsihin ra Pedro tan ra Juan.

⁸ Tan ra Pedro tsitú ra tsihin Tatyí li Nyoo. Tan nacahan ra tsihin ra naha:

—Nyooho ra ndacá ñaha Israel ñuu yo ihya, tan nyooho ra tsahnu. ⁹ Vityin tsicá tuhun ndo tsi ndi tsa cuenda tsa vaha tsa cuví tsi ra coxo ihya, tyin cuñi ndo coto ndo nácaa nduvahá ra. ¹⁰ Yacan cuenda cua catyí tuhun ndi tsihin ndo na coto tandihí nyivi Israel. Tyin ra ihya nyaá ra nuu tandihí ndo, tyin nduvahá ra tsihin tunyee ñi tsi ra Jesucristo, ra ñuu Nazaret, ra tsa tsahá cuenda ndo na cúu ra nu cruu. Maa tyin Nyoo janandotó ra tsi ra. ¹¹ Tan juvin ra Jesús cuví yuu tsa tsiñi ñuhu ca tsa ña cuñi ra javahá vehe cuatyíñu ra, tumaa cuhva catyí nuu tutu Nyoo. Tan nyooho cuví ra javahá vehe tan ña cuñi ndo yuu tsa tsiñi ñuhu ca can. ¹² Yoñi inga ra cuví jacacú tsi yo. Tyin intuhun ñi maa ra tsahá Nyoo tyin jacacu ra tsi yo —catyí ra Pedro tsihin ra can naha ra.

¹³ Tan ra cumí tyiñu can naha ra iyo xaan cuñi ra naha tsiñi ra naha tsa caahán ra Pedro tan ra Juan tyin nñi xaan ñi ra naha caahán ra naha, tan ñavin ra cahví scuela cuví ra naha. Tacan tan nacotó ra naha tsi ra naha tyin ra ican naha ra cuví ra tsa tsicá tsihin ra Jesús quivi can. ¹⁴ Tan ra tsa nduvahá can, nyaá nyityi ra tsihin ra naha. Yacan cuenda ña cuví cahan ra cumí tyiñu can naha ra tsa ndavaha ñi siquí ra Pedro tan ra Juan. ¹⁵ Tacan tan catyí ra cumí tyiñu naha ra tsihin ra naha:

—Quita nduñi taahan nyooho tsata vehe.

Tan quitá ra naha. Tan ndoq ra cumí tyiñu can naha ra natuhún tahan ra naha. ¹⁶ Tan catyí ra naha:

—¿Náa javaha yo tsihin ra ihya naha ra? Tyin tandihí maa nyivi Jerusalén tsitó ñi tsa iyo tsa javahá ra naha. Tan ña cua cuví catyí yo tyin ña nditsa. ¹⁷ Maa tyin ña cuñi yo tsa cuaha ca nyivi coto tuhun ihya, yacan cuenda vaha ca tsa casi yo tsi ra naha, tan cahan yo tsihin ra naha na ña cahan ca ra naha tuhun ra Jesús tsihin nyivi —catyí ra cumí tyiñu naha ra.

¹⁸ Tacan tan caná ra cumí tyiñu tsi ra Pedro tan ra Juan. Tan catyí ra naha tsihin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyivi. ¹⁹ Maa tyin ra Pedro tan ra Juan nacahan ra naha tan catyí ra naha:

—Tyihí tuñi ndo ñi ndo tan nyehe ndo tatun vaha ca tsa tyaa yahvi ndi tsi maa ndo o vaha ca tsa tyaa yahvi ndi tsi Nyoo. ²⁰ Tyin nyuhu ña cuví tsa jandihí ndi tsa nacatyí tuhun ndi tsa nyehe ndi tan tsa tsiñi ndi —catyí ra naha.

²¹ Tacan tan tyasí nyico ra cumí tyiñu naha ra tsi ra Pedro tan ra Juan. Tan jañá ra naha tsi ra naha tyin ña ñihí ra naha nácaa tatsi tuñi ra naha tsi ra naha. Tyin tandihí nyivi tan jacahnú ñi tsi Nyoo tsa cuenda tsa cuví can. ²² Tyin rayi tsa nduvahá can, tsa yahá uvi xico cuiya ra, tan tacan cuiya tahan ra tundoho tan nduvahá ra jahá Nyoo.

Nu tsicán nyivi yihí cuenda ra Cristo tunyee ñi Nyoo

²³ Tan tsa quitá ra Pedro tan ra Juan, cuahán ra naha nu yucú nyivi yihí cuenda ra Jesús. Tan nacatyí tuhun ra naha tandihí tsa cahan ra tsahnu naha ra tan ra jutu tsa cuví ityi nuu naha ra tsihin ra naha. ²⁴ Cuhva tsa tsiñi tandihí ñi, tan iñ caa ñi quitsahá tsicán tahvi ñi tsi Nyoo. Tan catyí ñi:

—Jutu Mañi yu, yoocho javahá un andivi tan ñuhu ñayivi. Javahá un ndutya ñuhu. Tan tandihí ca tsa iyó, maa un javahá. ²⁵ Tan yoocho tsihin Tatyí li un jacahan un tsi ra David tahan tsanaha. Tan catyí ra:

¿Nacuenda tsa nduxaán nyivi ña tsitó tsi Nyoo?

¿Nacuenda tsicá ñi ñi tuhun tsa nduve yahvi nyaá?

²⁶ Rey naha ra tan tsihin ra tsa ndacá ñaha nu ñuhu ñayivi ihya nduvitá ra naha siquí un, Jutu Mañi yu, tan siquí ra Cristo, ra nyisó tyiñu maa un, catyí ra David.

²⁷ Jutu Mañi yu, nditsa tyin ra Herodes, tan ra Poncio Pilato ndu iñ ra naha ñuu Jerusalén ihya tsihin ra ñuu Roma naha ra tan tsihin ra ñuu Israel naha ra tyin cahñi ra naha tsi ra Jesús Sehe ii un, tsa nacatsí vaha maa un. ²⁸ Tan tacan javahá ra naha, tumaa

cuhva tsa catyí maa un tahañ tsanaha tyin cua cuví. ²⁹ Tan vityin, Jutu Mañi yu, nyehe tyin cuñí ra naha casi ra naha tsi ndi. Tan cuhva tsa nii coo iñi ndi tyin tyiñu maa un javahá ndi, Jutu Mañi yu. Tan na ña nayuhví ndi cahan ndi tuhun maa un. ³⁰ Tan tsihin tunyee iñi maa un tan cua nduvaha nyivi cuuhví, tan cua nyehe ndi seña tan tsa iyo tsa cuenda tunyee iñi ra Jesús Sehe ii un —catyí ñi, tsicán tahvi ñi tsi Nyoo.

³¹ Tan cuhva tsa ndihí tsicán tahvi ñi tsi Nyoo tan tañ nu yucú ñi. Tan tandihí ñi tsiñi ñi tsihin Tatyí Ii Nyoo tan cahan ñi tuhun Nyoo tsihin tsa ña yuuhví ñi.

Nduve tsa cumañi tsi nyivi yihí cuenda ra Cristo

³² Tandihí ñi tsa tsinú iñi, iin ñi cuví ñi, tan iin ñi cuhva tsicá iñi ñi. Ndi intuhun ñi tan ña catyí ñi tyin tsa tsii maa ñi cuví tsa iyó tsi ñi, tyin tsii tandihí ñi cuví can. ³³ Tan tsihin tunyee iñi cahnu, caahán ra tava tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandihí ra naha. ³⁴ Tan ndi intuhun ñi tan nduve tsa cumañi tsi ñi tyin tandihí ñi tsa iyó vehe o ñuhu ñi, xicó ñi can. Tan cua ndaca ñi xuhun can ³⁵ tsi ra tava tyiñu ra Jesús. Tan maa ra naha natsatsá xuhun can tsi intuhun intuhun nyivi cuhva tsa tsiiñi ñuhu tsi ñi. ³⁶ Tacan javahá iin ra tsa nañi José. Ra ican cuví ra tata ra Leví. Tan cacú ra ñuhu Chipre tsa canyí mahñu ndutya ñuhu. Tan ra tava tyiñu ra Jesús jacunañi ra naha tsi ra Bernabé. Tan sivi can cuñi tsi catyí: ra jandu iin iñi nyivi. ³⁷ Tan ra Bernabé can xicó ra ñuhu ra. Tan tsahá ra xuhun can tsi ra tava tyiñu ra Jesús.

5

Cuatyi ra Ananías tsihin ña Safira

¹ Maa tyin iin ra tsa nañi Ananías tsihin ña Safira, ñasihi ra, xicó ñi iin ñuhu. ² Tan tyihí xeehe ñi juhva xuhun. Tacan tan ra Ananías tsindacá ra xuhun tsa ndog ña tsi ra tava tyiñu ra Jesús. Tan catyí ra tyin tandihí xuhun tsa cuyahví ñuhu cuví can. ³ Tacan tan catyí ra Pedro tsihin ra:

—Yoohe Ananías, ¿nacuenta tsa tsahá un tsa quihví nu ña vaha aña un? Tyin cuñi un jandavi ñaha un tsi Tatyí Ii Nyoo, tan catyí un tyin tandihí xuhun tsa cuyahví ñuhu can cuví tsehe, tan ña nditsa un tyin ndog juhva xuhun can tsi un. ⁴ Tsii un cuví ñuhu can, tan tsii un cuví xuhun tsa ñihí un cuenda ñuhu can. ¿Nacuenta tsa cuñi un jandavi ñaha un tsi Nyoo tan catyí un tyin tandihí xuhun can tsahá un? Maa tyin ñavin tsi nyuhu jandavi ñaha un, tyin tsi maa Nyoo jandavi ñaha un —catyí ra Pedro tsihin ra Ananías.

⁵ Tsa tsiiñi ra Ananías tuhun tsa cahan ra Pedro, nduva ra tan tsihi ra. Tan tsa tsito nyivi tuhun ihya tan nayuhví xaan ñi. ⁶ Tacan tan tsaa ra cuatyí naha ra tan cava nuu ra naha jahma cuñu ñuhu ra Ananías. Tan tsahan ra naha tsindacá ra naha tsi ra nu ndaa cumi santu. ⁷ Yahá uñi hora tan tsaa ñasihi ra Ananías tan quihví ña nu yucú ra tava tyiñu ra Jesús, tyin ña tsito ña tsa cuví. ⁸ Tan quitsahá tsicá tuhun ra Pedro tsi ña tan catyí ra tsihin ña:

—¿A tyehen ñi cuví xuhun tsa cuyahví ñuhu ndo? —catyí ra Pedro tsihin ña.

Tacan tan nacahan ña tan catyí ña tsihin ra:

—Tacan ñi cuví xuhun tsa cuyahví tsi —catyí ña tsihin ra.

⁹ Tacan tan catyí ra Pedro tsihin ña:

—¿Nacuenta tsa natuhun tahan ndo tan cuñi ndo jandavi ñaha ndo tsi Tatyí Ii Jutu Mañi yo Nyoo? Ican vatsí ra tsa tsahan tsindacá tsi yí un nu ndaa cumi santu. Tan vityin cua cundaca ndihí ra naha tsi un —catyí ra Pedro tsihin ña Safira.

¹⁰ Tan juvin ñi cuhva can tan nduva ña tsaha ra Pedro, tan cueta tsihi ña. Tan quihví ra cuatyí can naha ra, tan nyehe ra naha tyin canyí ña tsihi ña. Tan cañihí ra naha tsi ña, tan tsindacá ra naha tsi ña nu ndaa cumi sandu. Tan tinyí ra naha tsi ña xiin yí ña. ¹¹ Tan tandihí nyivi yihí cuenda ra Cristo, tan tandihí nyivi tsa tsito tuhun can, nayuhví xaan ñi.

Cuaha xaan tsa iyo tan seña javahá ra tava tyiñu ra Jesús

¹² Cuaha seña tan tsa iyo javahá ra tava tyiñu ra Jesús nu yucú nyivi. Tan tandihí ñi yihí cuenda ra Cristo ndu iin ñi nu cuví corredor cuenda ra Salomón. ¹³ Tan nyivi tsa inga cuenda ña caná iñi ñi cutahan ñi tsihin ñi yihí cuenda ra Cristo. Maa tyin nyivi can vaha caahán ñi siqui ñi yihí cuenda ra Cristo. ¹⁴ Tan cuaha xaan nyivi quitsahá tsinú iñi tsi Jutu Mañi yo Jesús, tahan ñi rayi tan ñaha. ¹⁵ Tan nda cuenda tava ñi tsi nyivi cuuhví ityi cahnu, tsaquín ñi tsi ñi nu tsito. Tyin tatun cua yaha ra Pedro tan yaha tixahñu ra siqui ñi cua nduvaha ñi. ¹⁶ Tacan tucu nyivi iyó yatyin ñi ñuu Jerusalén can, cuandacá ñi tsi nyivi cuuhví tan nyivi tsa yihí tatyí ña vaha. Tan nduvahá tandihí ñi.

Nu nyehé ra Pedro tan ra Juan tundoho

¹⁷ Tacan tan ra jutu tsaahnu tsa cuví ityi nuu, tan ra yihí cuenda ra cuví saduceo naha ra, ndasi cuñi ra naha nyehé ra naha tsi ra tava tyiñu ra Jesús tsa cuenda tsa vaha tsa javahá ra naha tsihin tunyee iñi tsa tsahá Nyoo tsi ra naha. ¹⁸ Tacan tan tñin ra naha tsi ra naha. Tan tyihí ra naha tsi ra naha vehe caa. ¹⁹ Maa tyin tsa cuac can

quitsi iin ángel tsa jaquitsi Jutu Mañi yo, tan nuña ra yuvehe caa can. Tan tava ra tsi ra naha. Tan catyi ra tsihin ra naha:

²⁰—Cuaahan ndo tan cunyacu nyityi ndo vehe ñuhu cahnú. Tan nacatyí tuhun ndo tsihin nyivi nácaa coo ñi ñayivi nyito tsa iyó ndo —catyi ángel can tsihin ra naha.

²¹ Tsa tsiñi ra naha tsa cahán ra ángel can, tan cuahán ra naha. Tan tsa tuvi inga quivi can nañihí nyivi tsi ra naha vehe ñuhu cahnú. Tan quitsahá jacuahá ra naha tsi ñi.

Tan tsitsi tsa jacuahá ra naha tsi ñi, tan ndu iin ra jutu tsaahnu tsa cuvi ityi nuu tan ra tsa yucú tsihin ra. Tan cana ra naha tsi ra cumi tyiñu cuenda nyivi Israel tyin coo ra naha junta. Tacan tan tava tyiñu ra naha na cuquihin ra naha tsi ra tava tyiñu ra Jesús nu yucú ra naha vehe caa can. ²² Maa tyin cuhva tsa tsaá ra vitya naha ra tsitsi vehe caa can, ña nañihí ra naha tsi ra naha. Tan cuanuhú ra naha cua nacatyí tuhun ra naha tsihin ra jutu tsaahnu tsa cuvi ityi nuu.

²³ Tan catyi ra naha tsihin ra:

—Ndasí yuvehe caa can tan tsaá ndi. Tan andaru, yucú ra naha yuvehe jahá cuenda ra naha. Maa tyin cuhva tsa nuña ndi yuvehe can, yofi maa nañihí ndi —catyi ra naha tsihin ra jutu tsaahnu tsa cuvi ityi nuu.

²⁴ Tacan tan ra jutu tsaahnu tsa cuvi ityi nuu can tsihin ra yihí ndaha tsi tandihí ra tsa jahá cuenda vehe ñuhu can tan tsihin ra jutu tsa cuvi ityi nuu naha ra, tsiñi ra naha tsa cahán ra vitya naha ra tsihin ra naha tan iyo xaan cuñi ra naha. Tan natuhun tahan ra naha nácaa javaha ra naha tan cundihi tuhun can. ²⁵ Tacan tan tsaá iin ra tan catyi ra:

—Ra tsa tyihí ndo vehe caa can naha ra, yucú ra naha vehe ñuhu jacuahá ra naha tsi nyivi —catyi ra.

²⁶ Tacan tan ra yihí ndaha tsi ra jahá cuenda vehe ñuhu can, tsahan ra tsihin ra vitya naha ra, tan tsiquihin ra naha tsi ra tava tyiñu ra Jesús tsihin tsa vii ñi tan ña cañi ra naha tsi ra naha, tyin yuuhvi ra naha tsi nyivi coto cañi ñi yuu tsi ra naha.

²⁷ Tsiñaca ra naha tsi ra tava tyiñu ra Jesús nuu ra cumi tyiñu vehe ñuhu cahnú. Tan ra jutu tsaahnu tsa cuvi ityi nuu catyi ra tsihin ra tava tyiñu ra Jesús:

²⁸ —Nyuhu tsa cahán vaha xaan ndi tsihin ndo tyin ña cahan ca ndo tuhun ra Jesús. Maa tyin nyoocho ña tyaá soho ndo tsa cahán ndi. Tan tsa ndihí maa tsitsi ñuu Jerusalén jacotó ndo tuhun ra. Tan cuñi ndo tyaá ndo cuatyí can siqui ndi tyin tsihi ra —catyi ra jutu tsaahnu tsa cuvi ityi nuu tsihin ra naha.

²⁹ Tacan tan nacahan ra Pedro tan inga ra tava tyiñu ra Jesús, tan catyi ra naha:

—Taahán tsi tyaá yahvi jihna ndi tsi Nyoo tan ñavin ca tsi nyoocho. ³⁰ Nyoo cuenda tsi

tsaahnu yo juvin ra janandotó tsi ra Jesús, ra tsa ticaá ndo nu cruu tan tsahñi ndo. ³¹ Tan ra Jesús cuvi ra tsa jacahnú xaan Nyoo, tan tyaá ra tsi ra xiin cuaha ra, tyin cua cundaca ñaha ra tandihí maa. Tan intuhun ñi maa ra cuvi ra jacacú tsi yo. Tyin tacan tsahá ra cuhva tsi yo tsa cuvi yo nyivi Israel na ndu uvi iñi yo cuatyí yo tan jaha ra tucahnu iñi cuatyí yo. ³² Tan nyuhu cuvi ndi tsandaa tsa cuenda tandihí yacan. Tan tacan cuvi tucu Tatyí Ii Nyoo tsa tsahá Nyoo cunyaa añima nyivi tyaá yahvi tsi ra —catyi ra Pedro tsihin ra naha.

³³ Tan tsa tsiñi ra naha tsa cahán ra Pedro, nduxaan xaan ra naha. Tan cuñi ra naha cahñi ra naha tsi ra naha. ³⁴ Maa tyin tsihin ra cumi tyiñu can naha ra nyii iin ra cuvi fariseo tsa nañi Gamaliel. Tan cuvi ra maestro cuenda ley Nyoo tsa tyaá ra Moisés. Tan nyivi tyaá yahvi xaan ñi tsi ra. Tan ra Gamaliel can, nduvitá nyityi ra. Tan caahán ra na quita ra tava tyiñu ra Jesús tañi ñi. Tacan tan quita ra naha. ³⁵ Tan quitsahá caahán ra Gamaliel can tsihin tandihí ca ra cumi tyiñu naha ra, tan catyi ra:

—Yoo, ra tsa ndacá ñaha tsi nyivi Israel, jaha yo cuenda tsi yo tsihin tsa cua javaha yo tsi ra ican naha ra. ³⁶ Nducuhun iñi ndo tyin tsa iyó juhva quivi nduvitá iin ra tsa tsinañi Teudas. Tan catyi ra tyin cuvi ra iin ra vaha. Tan quita maa tumaa cumi cientu rayii tsinyicun tsi ra. Maa tyin yaha can tsahñi nyivi tsi ra. Tan tandihí ra tsa tsinyicun tsi ra cuanuhú ra naha ñuu ra naha. Tan tsindihi tuhun can. ³⁷ Yaha can tan nu cuahán ca tsi ityi nuu, quivi nacahvi ra gobiernu tsi nyivi, tan nduvitá ra Judas ra ityi Galilea. Tan cuaha xaan nyivi tsinyicun tucu tsi ra can. Maa tyin juvin ñi tsahñi nyivi tsi ra. Tan tandihí ñi tsa tsinyicun tsi ra cuanuhú ñi ñuu ñi. ³⁸ Yacan cuenda jaña yo tsi ra ihya naha ra. Tan ña cua tyihí yo tsi yo tsihin ra naha tyin tatun tuhun iin rayii ñi cuvi tsa jacuahá ra naha, cua cundihi tuhun can. ³⁹ Maa tyin tatun nditsa tyin tuhun Nyoo cuvi tsa jacuahá ra naha, ña cua cuvi casi yo. Jaha yo cuenda tsi yo tyin ña vaha cañi tahan yo tsihin Nyoo —catyi ra Gamaliel tsihin ra naha.

⁴⁰ Tandihí ra naha ndoq ra naha vaha tsa ña cua cahñi ra naha tsi ra naha. Tacan tan cana ra naha tsi ra tava tyiñu ra Jesús. Tan catyi ra cumi tyiñu naha ra tsihin ra vitya naha ra na cañi ra naha tsi ra naha. Tan tyasi ra naha nu cahan ra naha tuhun ra Jesús. Tacan tan jaña ra naha tsi ra naha. ⁴¹ Tan quita ra naha nuu ra cumi tyiñu. Tan si xaan cuñi ra naha tyin tsahá Nyoo ndatu tyin nyehé ra naha tundoho tsa cuenda ra Jesús. ⁴² Tan ña jandihí ra naha tsa caahán ra naha. Tan tandihí quivi

jacuahá ra naha tuhun ra Jesucristo vehe ñuhu tan vehe nyivi.

6

Nu nacatsi nyivi yihí cuenda ra Jesús utsa taahan ra naha tyin jaha cuenda ra naha nda tsa tsiñi ñuhu tsi ñi

¹ Tan nu cuahán ca tsi quivi cuaha xaan nyivi yihí cuenda ra Cristo cuví. Tacan tan nyivi tsa caahán yuhu griego quitsahá caahán ñi siqui nyivi tsa caahán yuhu hebreo tan catyí ñi tyin cuhva tsa tsatsá ra naha tsa catsi ñi tandihí quivi ña jahá vaha ra naha cuenda tsi ñi ndaahvi grecia tsa tsiñi yíi. ² Tacan tan tandihí tsa utsi uvi taahan ra tava tyiñu ra Jesús jandu iin ra naha tsi tandihí nyivi yihí cuenda ra Cristo. Tan catyí ra naha tsihin nyivi can:

—Ña vaha tsa jandihí ndi tsa caahán ndi tuhun Nyoo tan tsa tsatsá ndi tsa catsi ndo. ³ Yacan cuenda, nyoocho yañi, nanducu ndo utsa taahan ra nu yucú yo ihya, ra vaha iyó tsihin Nyoo, ra tsa iyó tsa tsiñituñi iñi, ra tsitú tsihin Tatyí li Nyoo. Tan cuhva yo tyiñu ihya tsi ra naha. ⁴ Tan nyuhu cua jañihí ndi ndacan tahvi ndi tsi Nyoo, tan cua jacuahá ca ndi tuhun Nyoo —catyí ra naha.

⁵ Tandihí ñi tan ndoo ñi vaha. Tan nacatsi ñi tsi ra Esteban. Tyin tsinú xaan iñi ra tsi Nyoo. Tan tsitú ra tsihin Tatyí li Nyoo. Tan nacatsi tucu ñi tsi ra Felipe, tan ra Prócoro, tan ra Nicanor, tan ra Timón, tan ra Parmenas, tan ra Nicolás tsa cuví ra iin ra ñuu Antioquía, tan nanduví ra iin ra Israel. ⁶ Tacan tan tsindacá ñi tsi ra naha nu nyecú ra tava tyiñu ra Jesús. Tan tyiso ndaha ra naha jiñi intuhun intuhun ra naha tan tsican tahvi ra naha tsi Nyoo tsa cuenda ra can naha ra.

⁷ Tan tsityá ca tuhun Nyoo. Tan nducuahá ca ñi yihí cuenda ra Cristo ñuu Jerusalén. Tan cuaha xaan ra cuví jutu cuenda nyivi Israel natsinú ndihí iñi ra naha tuhun ra Cristo.

Nu tyihí ra naha tsi ra Esteban vehe caa

⁸ Ra Esteban cuví ra iin ra tsa tsitú tsihin tunyee iñi Nyoo. Tan vaha xaan nyivi cuví ra tyin tsitú añima ra tsihin tsa vaha tsi Nyoo. Tan cuaha xaan tsa iyo tan seña javahá ra nu yucú nyivi. ⁹ Tacan tan juhva ra tsa tsicá vehe ñuhu ñuu Israel tsa nañi Vehe Ñuhu Cuenda Nyivi Ndoó Nuña cutahan ra naha tsihin juhva ra ñuu Cirene naha ra, tan cutahan ndihí juhva ra ñuu Alejandría naha ra, tan ra ityi Cilicia naha ra, tan ra ityi Asia naha ra. Tan quitsahá caahán yuhu tahan ra naha tsihin ra Esteban. ¹⁰ Maa tyin ña cuví jahá canaa ra naha tsi ra, tyin ra Esteban caahán ra tsihin tsa tsiñituñi jiñi ra tsa tsahá Tatyí li Nyoo tsi ra. ¹¹ Tacan tan tyahví ra can naha ra tsi juhva

ra na cahan ra naha cuendu siqui ra Esteban tan catyí ra naha tyin ra Esteban caahán ra ndavaha ñi siqui ra Moisés, tan siqui Nyoo.

¹² Yacan cuenda tandihí nyivi can quitsahá cuvaá ñi tan tsihin ra tsahnu naha ra tan ra cuví maestro cuenda ley Nyoo. Tacan tan tyin ra naha tsi ra Esteban. Tan tsahan ra naha tsindacá ra naha tsi ra nu ndu iin ra cumí tyiñu cuenda vehe ñuhu nyivi Israel. ¹³ Tan nducu ra naha tsi ra cahan cuendu siqui ra Esteban. Tan maa ra naha catyí ra naha tyehen:

—Ra Esteban ihya, ña jandihí ra tsa caahán ra ndavaha ñi siqui vehe ñuhu yo tan siqui ley Nyoo tsa tyag ra Moisés. ¹⁴ Tan tsiñi ndi tsa caahán ra tyin ra Jesús, ra Nazaret can, cua cani ra vehe ñuhu cahnu ihya. Tan cua nasama ra cuhva iyó yo tsa jacuahá ra Moisés tsi yo —catyí ra tsa caahán cuendu siqui ra Esteban.

¹⁵ Tacan tan ra cumí tyiñu naha ra tan ra nyecú ican nyehé ra naha tsi ra Esteban tyin tumaa caá nuu iin ángel, tacan caá nuu ra.

7

Nu caahán ra Esteban tuhun Nyoo tsihin nyivi nducú cahñi tsi ra

¹ Tacan tan ra jutu tsaahnu tsa cuví ityi nuu tsicá tuhun ra tsi ra Esteban, tan catyí ra:

—¿A nditsa tsa caahán ra ihya naha ra siqui un?

² Tacan tan nacahan ra Esteban tan catyí ra:

—Nyoocho yañi, tan nyoocho ra tsahnu, tyag soho ndo tuhun tsa cua cahan yu. Jutu yo Nyoo, ra cahnu ca, quituví ra nuu tsi tsaahnu yo, ra Abraham, quivi nyii ra ityi Mesopotamia tsa ndi cumañi ca cuhun ra coo ra nda ñuu Harán. ³ Tan catyí ra tsihin ra: “Ñacoo ñuu un, tan tsi tandihí nyivi un. Tan cuhun cun inga ñuu tsa cua janaha yu tsi un” catyí Nyoo tsihin ra Abraham. ⁴ Tacan tan ra Abraham quitá ra nu iyó nyivi Caldea ityi Mesopotamia, tan cuahán ra nda ñuu Harán. Tan ndacan cuví nu tsihi jutu ra. Yaha can jaquitsi Nyoo tsi ra ñuhu nu iyó yo ihya vityin. ⁵ Maa tyin nduve ñuhu tsahá Nyoo tsi ra quivi can. Ndi luxu maa nu cuañi ra tan ña tsahá Nyoo. Maa tyin catyí ra tsihin ra Abraham tyin cua cuhva ra. Tan tsa cua cúu ra tan Nyoo cua cuhva ra ñuhu tsi sehe ra. Tacan cahan Nyoo tsihin ra Abraham, vasu tsa ñaha ca coo sehe ra quivi can. ⁶ Tan inga tucu tuhun cahan Nyoo tsihin ra tyin nyivi tata ra cua coo ñi inga ñuu. Tan cua cuví ñi musu nyivi ñuu can. Tan maa nyivi ñuu can cua quihí ndaha ñi tsi ñi. Tan cua nyehe ñi tundoho cumi cientu cuiya. ⁷ Maa tyin cahan tucu Nyoo tsihin ra tyehen: “Nyivi tata un cua nyehe ñi

tundoho jaha nyivi ñuu can. Yacan cuenda yuhu cua tatsi tuñi yu tsi nyivi ñuu can. Tan tsa cua yaha yacan tan cua quita nyivi cuvi tata un ñuu can tan cua quitsi ñi ihya. Tan cua jacahnu ñi tsi yu" catyi Nyoo tsihin ra Abraham.

⁸ "Tacan natuhun Nyoo tsihin ra. Tan ndoq ra tuhun tsihin ra. Tan Nyoo tsaha ra iin cuhva tsa cua javaha ñi coto naa iñi ñi tsa cahan ra. Tsaha cuenda ra tyin tandihi ñi sehe yi ñi tsa cua coo tan cuñi tsi cunyaa tuñi ra itsi naha tsi. Tan tsa yaha una quivi tsa cacu ra Isaac, sehe ra Abraham, tacan javaha ra tsi ra. Tan juvin ñi tacan javaha ndihi tucu ra Isaac tsi ra Jacob, sehe ra. Tan ra Jacob tucu tsihin utsi uvi taahan sehe ra, tyaq ra tuñi can tsi intuhun intuhun sehe yi ra. Tan ra ican naha ra cuvi tsi tsaahnu yo.

⁹ "Tan tsa utsi iin taahan ca sehe ra Jacob ndasi cuñi ra naha nyehe ra naha tsi ra José yañi ra naha, tsa cuenda tyin cuñi ca jutu ra naha tsi ra can. Yacan cuenda xico ra naha tsi ra José na cuvi ra iin musu nda Egipto. Maa tyin ra José, ña nacoq Nyoo tsi ra. ¹⁰ Tan jacacu ra tsi ra nu nyehé ra tundoho. Tan tsaha ra tsa nyityi jiñi ra tsi ra José. Tan tsaha ra tsa vaha coo ra nuu ra Faraón, ra cuvi rey Egipto. Tan rey can tsaha ra tsa cuvi ra José ra cumi tyiñu ñuu tsa cayucu Egipto can. Tan tsindaca ñaha ndihi tucu ra vehe maa rey.

¹¹ "Tacan tan tsicoq tama nanii cahnun ityi Egipto tan ityi Canaán. Tan nyehe xaan nyivi tundoho. Tan tandihi tsi tsaahnu yo ña ñihí ra naha tsa catsi ra naha. ¹² Maa tyin quivi tsito ra Jacob tyin iyó tsa catsi ra naha nda Egipto, tan jacuhun ra tsi sehe ra na cunducu ra naha tsa catsi ra naha. Tan tsahan ra naha iin tsaha. ¹³ Tan tsa tsinu uvi tsaha tsa tsahan ra naha, ra José jacoto ra tsi ra naha tyin yañi ra naha cuvi tsi ra. Tacan tan tsito ra Faraón yóo tata cuvi ra José. ¹⁴ Tacan tan tava tyiñu ra José na quitsi ra Jacob jutu ra, tsihin tandihi nyivi ra. Tan cuvi ñi uñi xico tsahun taahan nyivi. ¹⁵ Tan tacan cuvi tsa cuahán ra Jacob cua coo ra ñuhu Egipto can. Yaha can tan tsihi ra ndacan. Tan tsihi ndihi tucu tandihi sehe ra, ra cuvi tsi tsaahnu yo naha ra. ¹⁶ Tacan tan tsaq quivi tsa tsindaca ñi yiqui ra Jacob tan yiqui sehe ra nda Siquem. Tan ican quihvi yiqui tandihi ra naha tsitsi ñuhu nu jatá ra Abraham iin ñaña tsi sehe ra Hamor tahan tsanaha.

¹⁷ "Maa tyin tsa ndi cumañi ca quita nyivi Egipto, nyivi ra Abraham tsa iyó Egipto can cuaha xaan ñi cuvi. Tan tsa nyanaa yatyin quivi tsa cua cuhva Nyoo ñuhu tsi ñi tumaa tsa cahan catsi ra tsihin ra Abraham. ¹⁸ Tacan tan quitsaha ndaca ñaha iin rey tsa ña nacoto tsi ra José. ¹⁹ Rey can jandavi ñaha ra nyivi yo. Tan janyehé xaan ra tundoho tsi

ñi, tan jañiñi ra tsi ñi na nacoq ñi tsi sehe ñi tsa ndi cacú tyin na cúu tsi. ²⁰ Tan juvin ñi quivi can cacú ra Moisés. Tan tahan xaan iñi Nyoo tsi ra. Tan uñi yoo jacuahnu sihi ra tsi ra nda yuvehe ña. ²¹ Yaha can ña cuvi ca tyihi xeehe sihi ra tsi ra. Tan nacoq ña tsi ra tsitsi iin tyica yuhu yutya. Tacan tan sehe sihi ra rey Egipto can nañihí ña tsi ra. Tan naquihun ña tsi ra. Tan jacuahnu ña tsi ra, tumaa tsa sehe maa ña cuvi tsi ra. ²² Yacan cutuhva ra Moisés tandihi tsa tsitó ñi Egipto. Tan vaha xaan cahan ra tan vaha javaha ra jaha tunyee iñi tsa tsaha Nyoo tsi ra.

²³ "Tan tsa quita uvi xico cuiya ra Moisés cuñi ra cahun ra cunyehe ra nu iyó nyivi Israel, nyivi ra. ²⁴ Tacan tan iin quivi nyehe ra nu cañi iin ra Egipto can tsi iin ra Israel. Tacan tan tsahñi ra Moisés tsi ra Egipto can tyin cañi xaan ra tsi ra Israel, ra ñuu ra. ²⁵ Cuñi maa ra Moisés can tyin nyivi Israel can cutuñi iñi ñi tyin Nyoo jaquitsi tsi ra tyin jacacu ra tsi ñi. Maa tyin ña tují iñi ñi tsa tacan cua cuvi. ²⁶ Tacan tan tsa inga quivi can nyehe ra Moisés tsi uvi taahan ra Israel, cañi tahan ra naha. Tan ra Moisés, cuñi ra tsa ña cañi tahan ca ra naha, tan quitsaha catyi ra: "Ña vaha tsa cañi un tsi ra yañi un" catyi ra tsihin ra naha. ²⁷ Tacan tan ra tsa cañi tsi inga ra can tindahñi ra tsi ra Moisés, tan catyi ra tsihin ra: "¿Yóo tava tyiñu tsi un tyin cundaca ñaha un tan cuvi un juez tsa cuenda ndi? ²⁸ ¿A cuñi un cahñi un tsi yu tumaa tsa tsahñi un tsi ra Egipto icu?" catyi ra tsihin ra Moisés. ²⁹ Cuhva tsa tsiñi ra Moisés tsa cahan ra can, tsinu ra. Tan cuahán ra nda ñuu Madián. Ndacan ñihí ra ñasihí ra. Tan ndacan tsicoq uvi taahan sehe ra.

³⁰ "Yaha uvi xico cuiya. Tacan tan iin quivi tsicá nuu ra Moisés nu tsiqui yatyin yucu tsa nañi Sinaí. Tan nyehe ra cayú iin yutun iñu. Tacan tan quituví iin ángel tsitsi ñuhu tsa cayú can. ³¹ Iyo xaan cuñi ra Moisés tsa nyehé ra yacan. Tan natuhva ra nu cayú iñu can tyin nyehe vaha ra, tan tsiñi ra ndusu Jutu Mañi yo. Tan catyi ndusu can tyehen: ³² "Yuhu cuvi Nyoo cuenda tsi tsaahnu un, Nyoo cuenda ra Abraham, tan ra Isaac, tan ra Jacob" catyi ndusu can tsihin ra. Tacan tan ra Moisés quitsaha ñihí ra tsihin tsa yuuhví ra. Tan ña cana iñi ra nanyehé ra. ³³ Tan quitsaha catyi tucu Jutu Mañi yo tsihin ra: "Tava nditsan tsaha un tyin ñuhu nu tsañi un, ñuhu ii cuvi tsi. ³⁴ Yuhu nyehé yu tandihi tundoho tsa nyehé nyivi cuenda yu ñuhu Egipto can. Tan tsiñi yu ndusu ñi tsa tsacú tsaa ñi. Yacan vatsi nuú yu tyin jacacu yu tsi ñi. Naha, tyin jacuhun yu tsi un nda Egipto" catyi Nyoo tsihin ra Moisés.

³⁵ "Quivi can ña cuñi nyivi Israel tsi ra Moisés tsa cundaca ñaha ra tsi ñi, tan catyi

ñi tsihin ra: “¿Yóo tava tyiñu tsi un tyin cundaca ñaha un tan cuvi un juez tsa cuenda ndi?”, catyi ñi tsihin ra. Vasu ña cuñi ñi tsa cundaca ñaha ra tsi ñi, maa tyin Nyoo tava tyiñu ra tsi ra tyin cuvi ra nuu tsihin ñi, tan jacacu ra tsi ñi. Tyin tacan catyi ángel tsa quituvi nuu ra nu iñu tsa cayú can. ³⁶ Tan ra Moisés can tava tsi nyivi Israel ñuhu Egipto can tsihin tsa javahá ra tsa iyo tan seña ñuu can, tan nu yahá ñi nda nu Nduya Ñuhu Cuaaha, tan nu tsicá nuu ñi nu tsiqui tsitsi tsa uvi xico cuiya.

³⁷ Tan juvin ñi maa ra Moisés can cuvi ra tsa cahan tsihin nyivi Israel tan catyi ra tyehen: “Nyoo cua jaquitsi ra tsi iin ra cuvi ndusu yuhu ra tumaa jaquitsi ra tsi maa yu. Tan cua cuvi ra iin ra Israel tumaa maa yu. Tan taahan tsi tyaa yahvi yo tsi ra” catyi ra Moisés. ³⁸ Tan maa ra Moisés can cuahan ra tsihin nyivi tsii saahnu yo nu tsicá nuu ñi nu tsiqui can. Tan ra ican cuvi ra tsa cahan ángel tsihin nda yucu Sinaí. Tan ra ican naquihñ cuenda ra tuhun Nyoo nácaa coo nyivi, tan tyaa ra tuhun can nu tutu tyin tacan tan coto yo.

³⁹ Maa tyin nyivi tsii saahnu yo ña tyaa yahvi ñi tsi ra. Tava tsiyo ñi tsi ra. Tan cuñi ñi cunuhu ñi nda Egipto. ⁴⁰ Yacan cuenda cuhva tsa nyii ra Moisés yucu Sinaí, tan cahan nyivi tsihin ra Aarón tan catyi ñi: “Javaha taahan nyoo cuhun ityi nuu ndi. Tyin ña tsitó yo náa tahanan ra Moisés, ra tsa tava tsi yo Egipto” catyi ñi. ⁴¹ Tacan tan javahá ñi iin indiqui xuhun cuaan. Tan tsahñi ñi quiti tyin cuhva cuenda ñi tsi tsitoho can. Tan sii xaan cuñi ñi tsicoq ñi vico cuenda tsitoho tsa javahá ñi tsihin ndaha ñi. ⁴² Tacan tan Nyoo jatsiyo ra tsi ñi. Tan jaña ndaha ra tsi ñi tyin cua jacahnu ñi ñicanyii, tan yoo, tan tandihi tiñuu tsa iyó ityi andivi. Tyin tyehen tyaa ra cuvi ndusu yuhu Nyoo nu libru tahanan tsanaha:

Nyooho nyivi Israel, ¿A tsahñi ndo quiti tyin cuhva cuenda ndo tsi maa yu tsitsi tsa uvi xico cuiya tsa tsicá nuu ndo nu tsiqui? Ñavin.

⁴³ Tyin jacahnu ndo tsi nyoo tsa nañi Moloc, tan jacahnu ndihi tucu ndo tsi nyoo tsa nañi Renfán tsa caá tumaa caá iin tiñuu tsa iyó andivi.

Juvin ñi maa ndo javahá tsitoho can, tan jacahnú tucu ndo.

Yacan cuenda yuhu cua tava yu tsi ndo ñuu ndo, tan cua jacuhun yu tsi ndo iin nu cañi ca ityi nuu ñuu Babilonia, catyi Nyoo tsihin ñi.

⁴⁴ Nu tsicá nuu tsii saahnu yo nu tsiqui can, tsicumj ra naha iin vehe ñuhu tsa tsinu tsihin ñi quiti. Tan tsitsi vehe can tsicumj ra naha tabla yuu tsa nyaá ley Nyoo nuu. Tan ra Moisés tava tyiñu ra na javaha ñi vehe

ñuhu can ityi tsata, tumaa cuhva janahá maa Nyoo tsi ra. ⁴⁵ Yaha can tan ra Josué cuvi ra ityi nuu tsihin ñi. Tacan tan quihñ ñi vehe ñuhu can tan vatsi ñi tsihin tsi nu iyó yo ihya vityin. Tyin Nyoo tava ra tsi nyivi tsicoq ñuhu ihya tan nacuhvá cuenda ra ñuhu ihya tsi ñi Israel, nyivi yo. Tan tsatyinñ ñi vehe ñuhu can nda cuanda quivi tsicoq ra rey David. ⁴⁶ Tan ra rey David ñihj ra tumañi iñi nuu Nyoo. Tan cuñi ra javaha ra iin vehe vaha nu coo Nyoo. Juvin ñi Nyoo jacahnu ra Jacob tahanan tsanaha. ⁴⁷ Maa tyin ra Salomón javahá ra vehe Nyoo. ⁴⁸ Vasu ña iyó Nyoo tsitsi vehe ñuhu tsa javahá nyivi. Tumaa cahan ra cuvi ndusu yuhu Nyoo tahanan tsanaha tyehen:

⁴⁹ Andivi cuvi tyayu nu nyaá yu ndacá ñaha yu.

Tan ñuhu ñayivi, yacan cuvi nu tsañi tsaha yu.

Tatun javaha nyooho iin vehe ¿a cuñi maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñi maa ndo?

⁵⁰ ¿A ña tsitó ndo tyin maa yu javahá andivi tan ñuhu ñayivi? catyi ra cuvi ndusu yuhu Nyoo jahá Nyoo.

⁵¹ Maa tyin nyooho —catyi ra Esteban— tacan ñi tuhvá maa ndo jandavá ndo iñi ndo. Tan ña cuñi ndo naquihñ ndo tuhun caahán Nyoo. Tacan ñi ña tyaa yahvi ndo tsi Tatyí Ii Nyoo. Inducu ñi caá ndo tsihin tsii saahnu yo. ⁵² Tsii saahnu yo cuxaag ra naha tan tsahñi ra naha tsi tandihi ra cuvi ndusu yuhu Nyoo tahanan tsanaha. Tan ra ican naha ra catyi tyin cua quitsi iin ra vaha. Tan tsa quitsi ra vityin, nyooho xico ñaha ndo tsi ra tsi ra xaan iñi tsi ra, tan tsahñi ndo tsi ra. ⁵³ Nyooho naquihñ cuenda ndo ley Nyoo tsa tsahá ángel tsi ndo, maa tyin ña cuñi ndo tyaa yahvi ndo tsa caahán ley can —catyi ra Esteban.

Nu tsihi ra Esteban

⁵⁴ Tsa tsiñi ra cumi tyiñu vehe ñuhu cahnu naha ra tuhun ihya, xaan xaan cuñi ra naha, ndacua jacahyu nuhu ra naha nyehé ra naha tsi ra Esteban. ⁵⁵ Maa tyin ra Esteban tsitú ra tsihin Tatyí Ii Nyoo tan nanyehé ra ityi andivi. Tan nyehé ra tsa cahnu cuvi Nyoo. Tan nyehé tucu ra tsi ra Jesús nyaá nyityi ra xiin cuaha Nyoo. ⁵⁶ Tacan tan catyi ra Esteban:

—¡jihna ndo! Nyehé yu andivi tan ticohó tsi. Tan nyehé yu tsi ra Jesús, Rayi tsa quee nda gloria, nyaá nyityi ra xiin cuaha Nyoo —catyi ra Esteban.

⁵⁷ Maa tyin ra can naha ra tyasi ra naha soho ra naha, tsa ña cua tyaa soho ra naha tsa caahán ra Esteban. Tacan tan iin vaa ñi caná tsaa ra naha. Tan tandihi ra naha cuahán ra naha siqui ra Esteban. ⁵⁸ Tacan

tan tavaṛa na naha tsi ra yuhu ñuu. Tan tsaḥñi ra naha tsi ra tsihin yuu. Tan ra tsa javahá tsa ña vaha can naha ra, nacoṛa ra naha jahma tsa nyaá tsata ra naha tyin jaha cuenda iin ra tyuvaa tsa nañi Saulo. ⁵⁹ Tan tsitsi tsa cañi ra naha yuu tsi ra Esteban, quitsahaṛa tsicán tahvi ra Esteban tsi Nyoo, tyin tuvi iñi ra tyin tsa cua cúu ra. Tan catyi ra tyehen:

—Jutu Mañi yu Jesús, naquihin añima yu —catyi ra.

⁶⁰ Yahá can, tan tsicuiñi tsiti ra, tan tsaa canaṛa tsaa ra tan catyi ra:

—Jutu Mañi yu, ña tyin cuenda un cuatyí tsa javahá ra naha —catyi ra.

Tsa yahá caḥan ra tacan, tan tsihi ra.

8

Nu tsinyaq ndaha ra Saulo tsi nyivi yihí cuenda ra Cristo

¹ Tan ra Saulo ña tsinú iñi ra tsi ra Jesús, tan ndooṛa vaha tsa tsaḥñi ra naha tsi ra Esteban.

Tan juven ñi quivi can quitsahaṛa nducú xaan nyivi tsi ñi yihí cuenda ra Cristo ñuu Jerusalén tyin cañi ñi tsi ñi. Tan tandihi ñi yihí cuenda ra Cristo tsinu ñi, cuahán ñi cua coo ñi tandihi ñuu tsa cayucú Samaria, tan tandihi ñuu tsa cayucú Judea. Maa tyin ra tavaṛa tyiñu ra Jesús ña quitaṛa naha. Ndoṛa ra naha Jerusalén. ² Tan juhva ra tsa nyicún vaha tsi Nyoo ñuu Jerusalén can, tsaḥan ra naha tsicutsi ra naha cuñu ñuhu ra Esteban nda nu ndaa cumi santu. Tan tsacu xaan ra naha tsa cuenda tsa tsihi ra. ³ Tan ra Saulo can quitsahaṛa nyaá ndaha ra tsi nyivi yihí cuenda ra Cristo. Tan tsaḥan ra tan iin tan iin vehe ñi. Tan ixtaṛa caa ra tsi ñi, tan tsaḥa cuenda ra tsi ñi tyin cuhun ñi vehe caa, tahan ñi rayi tan ñaha.

Nu caahán ra Felipe tuhun ra Cristo nu cuvi Samaria

⁴ Tan tandihi ñi tsa quitaṛa ñuu Jerusalén can, caahán ñi tuhun Nyoo nácaa jacacú ra Cristo tsi yo, tandihi ñi ityi nu cuahán ñi. ⁵ Iin ra tsa nañi Felipe tsaṛa ra iin ñuu canyií Samaria. Tan quitsahaṛa caahán ra tuhun ra Cristo tsihin nyivi iyó ícan. ⁶ Tan tandihi ñi nñi cuñi ñi tan tyaá soho ñi tsa caahán ra. Tyin nyehé ñi tsa iyo tsa javahá ra. ⁷ Tyin cuaha xaan nyivi tsa yihí tatyí ña vaha tan nduvahá ñi; tatyí ña vaha tsa yihí tsi ñi, quitaṛa nahnu tan canaṛa tsaa nahnu cuahán nahnu. Tan cuaha xaan nyivi coxo tan nyivi tsa ña cuvi canda tan ña cuvi caca, nduvahá ñi. ⁸ Yacan cuenda nyivi ñuu can, sñi xaan cuñi ñi.

⁹ Tan Samaria can iyó iin ra tasi nañi Simón. Tuhvá ra jandaví ñaha tsi nyivi. Catyi ra tyin cahnu xaan cuvi ra. ¹⁰ Tandihí maa

nyivi, ñi cuca tan ñi ndaahvi, tyaá soho ñi tsa caahán ra. Tan catyi ñi:

—Nditsa nditsa, tyin tunyee iñi Nyoo iyó tsihin ra ihya —catyi ñi.

¹¹ Tyaá yahvi xaan ñi tsa caahán ra tyin tsa naha xaan jandaví ñaha ra tsi ñi tsihin tsa tasi. ¹² Tacan tan quitsi ra Felipe. Tan jacotoṛa ra tsi ñi nácaa ndacá ñaha Nyoo, tan nácaa cuhva tsa cahnu cuvi ra Jesucristo. Tacan tan quitsahaṛa tsinu iñi ñi tsi ra Cristo, rayi tan ñaha. Tan tsicoondutya ñi. ¹³ Nda cuanda ra Simón can, tan natsinu iñi ra tsi ra Cristo, tan tsicoondutya ra. Tan quitsahaṛa tsicá nuu ra tsihin ra Felipe. Tan iyo xaan cuñi ra nyehé ra tsa iyo tan seña tsa javahá ra Felipe.

¹⁴ Tacan tan ra tavaṛa tyiñu ra Jesús tsa iyó ñuu Jerusalén can ñiñi tuhun ra naha tyin tsinu iñi nyivi Samaria tuhun Nyoo. Tacan tan jacuhun ra naha tsi ra Pedro tan ra Juan nda Samaria. ¹⁵ Tan tsa tsaṛa ra naha, quitsahaṛa tsicán tahvi ra naha tsi Nyoo tsa cuenda nyivi tsa yihí cuenda ra Cristo nda Samaria can tyin na naquihin ñi Tatyí Ii Nyoo. ¹⁶ Tyin ñi can, ñaha ca nuu Tatyí Ii Nyoo siqui ñi. Maa tsa tsicoondutya ñi ñi tsihin sivi Jutu Mañi yo Jesús. ¹⁷ Tacan tan ra Pedro tan ra Juan tyisoṛa ndaha ra naha jiñi ñi, tan naquihin ñi Tatyí Ii Nyoo. ¹⁸ Tan ra Simón can nyehé ra nu tyisoṛa ndaha ra tavaṛa tyiñu ra Jesús jiñi ñi, tan naquihin ñi Tatyí Ii Nyoo. ¹⁹ Tan quitsahaṛa caahán ra Simón tan catyi ra:

—¿Najava xuhun cuñi ndo tan cuhva ndo tunyee iñi tsi yu, cuvi tyisoṛa ndaha yu jiñi nyivi, tan naquihin ñi Tatyí Ii Nyoo? —catyi ra Simón tsihin ra naha.

²⁰ Tacan tan nacahán ra Pedro tan catyi ra:

—Jaha cuenda coto cunaa un tsihin xuhun cun. ¿Nacuenda tsicá iñi un tyin cuvi jata yo ndatu tsa tsaḥa Nyoo tsi yo? Ña cuvi.

²¹ Yooḥo, ña taahán tsi tyihi un tsi un tsihin tyiñu ihya. Tyin añima un ña vaha nuu Nyoo. ²² Ndu uvi iñi cuhva tsicá iñi un, tyin cahnu xaan tsa caquiñi tsicá iñi un. Tan ndacan tahvi tsi Nyoo na jaha ra tucahnu iñi tsi un tsa cuenda tsa tsicá iñi un tsitsi añima un. ²³ Tyin nyehé yu tyin tsitsi añima un iyó cuaha tsa caquiñi tan nyiyo iñi un. Tan tsa caquiñi can ña tsaḥa coto un tsa vaha —catyi ra Pedro tsihin ra Simón.

²⁴ Tacan tan nacahán ra Simón tan catyi ra:

—Ndacan tahvi maa ndo tsi Jutu Mañi yo tsa cuenda yu, na ña quitsi tandihí tsa caahán un tsihin yu siqui yu —catyi ra Simón tsihin ra Pedro.

²⁵ Tsa yahá can tan ra tavaṛa tyiñu ra Jesús tsaḥa cuenda ra naha tandihí tsa nyehé ra naha tsa javahá ra Cristo nu tsicaṛa ra

nu ñuhu ñayivi. Tan cahān ra naha tuhun Nyoo. Tacan tan cuanuhu ra naha nda ñuu Jerusalén. Tan tandihí ñuu tsa cayucú Samaria nu yahā ra naha jacotō ra naha nácaa javahá yo tan cacu yo.

Nu caahán ra Felipe tuhun Nyoo tsihin iin ra ñuu Etiopía

²⁶ Tsa yahā yacan tan cahān iin ángel Nyoo tsihin ra Felipe, tan catyí ra:

—Nduvita tan cūhun cun ityi sur, ityi queé nda Jerusalén tan cuahán nda Gaza —catyí ángel can tsihin ra.

Yacan cuví ityi tsa yahā nu tsiqui. ²⁷ Tacan tan ra Felipe nduvitā ra tan cuahán ra. Tan ityi cuahán ra ñihí tahan ra tsihin iin ra ñuu Etiopía. Tan tsahan ra can eunuco [tyin ña cuví coo ñasíhi ra]. Tan cuví ra iin ra cumí tyiñu cahnu ñuu Etiopía, tyin yihí ndaha ra xuhun ña Candace, ñaha tsa cuví reina ñuu Etiopía can. Tan tsahan ra Etiopía can tsijacahnu ra tsi Nyoo nda ñuu Jerusalén. ²⁸ Tan ityi cuanuhú ra nda ñuu ra nyaá ra siqui carreta ra. Tan cahví ra nu libru tsa tyaa ra Isaías, ra cuví ndusu yuhu Nyoo tahañ tsanaha. ²⁹ Tacan tan Tatyí li Nyoo cahān tsihin ra Felipe:

—Natuhva nu carreta can.

³⁰ Tan cuhva tsa natuhvā ra Felipe nu carreta can, tsíñi ra tyin cahví ra Etiopía can nu libru tsa tyaa ra Isaías. Tan tsicā tuhun ra Felipe tsi ra tan catyí ra:

—¿A cutuñí iñi un tsa caahán tsi? —catyí ra.

³¹ Tacan tan nacahān ra Etiopía can tan catyí ra:

—¿Nacaa cutuñí iñi yu tan yoñi jacuahá tsi yu? —catyí ra tsihin ra Felipe.

Tan tsicān ra tsi ra Felipe na ndaa ra tan cunyaa ra tsihin ra.

³² Tan nu cuahán cahví ra, catyí tsi tyehen:

Tsahñi ra naha tsi ra tumaa tuhvā ra naha tsahñi mbee ticatyí.

Tyin tumaa ña tsacú mbee tatun cua xatya ra naha ixi ti, tan tumaa tsa ña tsacú ti tun cua cahñi ra naha tsi ti,

tacan cuví ra can tyin nyehe ra tundoho tan nduve náa cahān ra.

³³ Janduluhlú ra tsi ra nuu ra naha tan yoñi cuñí javaha iin tsa vaha tsihin ra.

Tan tsa cuenda nyivi cuví tata ra, yoñi caahán tsa cuenda ñi.

Tyin ña tsicoq sehe ra tan tsihí ra.

Tacan catyí tsi nu tutu tsa cahví ra can.

³⁴ Tacan tan ra Etiopía quitsahā tsicā tsihin ra tsi ra Felipe, tan catyí ra:

—Jaha tumañi iñi tsi yu, tan catyí tuhun un luxu tsihin yu, ¿yóo tuhun caahán ra ndusu yuhu Nyoo ihya? ¿A tuhun maa ra, o yóo tuhun caahán ra? —catyí ra tsihin ra Felipe.

³⁵ Tacan tan ra Felipe quitsahā caahán ra siqui tuhun tsa tsa yahā cahví ra can, tan tsahā cuenda ra tsi ra tyin tuhun ra Jesús caahán ra ndusu yuhu Nyoo can. Tan tsahā cuenda ra tyin ra Jesús cuví ra jacacú tsi yo.

³⁶ Tacan tan tsa cua yaha ra naha nu yihí ndutya. Tan ra Etiopía can quitsahā caahán ra tsihin ra Felipe tan catyí ra:

—Ihya yihí ndutya. ¿A ña cuví coondutya yu ihya? —catyí ra.

³⁷ Tacan tan nacahān ra Felipe tsihin ra Etiopía, tan catyí ra:

—Tatun tsinú iñi un tsihin tsa nii añima un, cuví coondutya un —catyí ra tsihin ra.

Tacan tan nacahān ra can, tan catyí ra:

—Tsinú iñi yu tyin Sehe Nyoo cuví tsi ra Jesucristo —catyí ra.

³⁸ Tacan tan ra can caahán ra tsihin musu ra na jacuiñi ra carreta can. Tan nduvi taahan ra naha nuu ra naha. Tan quihví ra naha tsitsi ndutya. Tacan tan jacoondutya ra Felipe tsi ra Etiopía. ³⁹ Tan cuhva tsa quitā ra naha tsitsi ndutya can, tan Tatyí li Jutu Mañi yo naquihñi ra tsi ra Felipe. Tan ra Etiopía can ña nyehe ra numaa ityi cuahán ra Felipe. Maa tyin sii xaan cuñi ra, cuanuhú ra. ⁴⁰ Tan ra Felipe tsaa ra ñuu Azoto. Tan cuahán ra tan iin tan iin ñuu, tan caahán ra tuhun ra Cristo tsihin nyivi nda cuanda tsa tsaa ra ñuu Cesarea.

9

Nu natsinú iñi ra Saulo tsi ra Cristo (Hechos 22.6-16; 26.12-18)

¹ Tan tsicā ra Felipe caahán ra tuhun ra Cristo tsihin nyivi, tan ra Saulo ña jandihí maa ra tsa nducú cahñi ra tsi nyivi yihí cuenda Jutu Mañi yo. Tan tsahan ra nu nyaá ra jutu tsahnu cuví ityi nuu, ² tsindacān ra iin tutu tsi ra jutu, tyin nacuhva ra ndatu tsa cūhun ra vehe ñuhu ñuu Damasco, tan tiin ra tsi ñi nyicún tsi ra Cristo, tan quitsi ndaca ra tsi ñi vehe caa ñuu Jerusalén, tahan ñi rayi tan ñaha. Ñihí ra Saulo tutu can tan cuahán ra. ³ Tan tsa cua tsaa ra ñuu Damasco, sana iñi ra, tan quitsi ñuhu ityi andivi, jandunditsin tsi taniñi cahnu maa nu cuahán ra. ⁴ Tacan tan ra Saulo nduvā ra nu ñuhu. Tan tsíñi ra iin ndusu tsa catyí tyehen:

—Saulo, Saulo, ¿nacuvi tyin nyaá ndaha un tsi yu? —catyí ndusu can tsihin ra.

⁵ Tacan tan nacahān ra Saulo:

—¿Yóo cuví yoocho, taa? —catyí ra, tsicā tuhun ra.

Tacan tan nacahān ndusu can tsihin ra, tan catyí tsi:

—Yuhu cuví ra Jesús, ra tsa nyaá ndaha un. Juvín ñi tsi maa un jañicuehé un, tumaa jañicuehé indiqui tsi ti tsa tsañi ihñi ti nu tsa tutsi ra naha tsi ti —catyí ra Jesús tsihin ra.

⁶ Tacan tan quitsahā nihí ra Saulo tsihin tsa yuuhví ra. Tan catyí ra:

—Jutu Mañi yu, ¿náa cuñi un tyin javaha yu? —catyí ra.

Tacan tan Jutu Mañi yo nacahan ra tsihin ra tan catyí ra:

—Nduvita tan cahun un tsitsi ñuu Damasco. Tan ican cua cahan iin ra tsa cua cahan tsihin un náa taahan tsi javaha un —catyí ra Jesús tsihin ra Saulo.

⁷ Tan ra tsa cuahan tsihin ra Saulo, nayuhví xaan ra naha. Tan ña ñihí ra naha náa tuhun cahan ra naha tyin tsiñi ra naha ndusu can maa tyin yoñi nyehe ra naha.

⁸ Tacan tan ra Saulo nduvita ra. Tan tsa nuña ra tinuu ra, ña cuví maa nanyehé ra tyin cuaa ra jahā Nyoo. Yacan cuenda, ra tsa cuahan tsihin ra tñin ra naha ndaha ra tan tsindaca ra naha tsi ra ñuu Damasco. ⁹ Ican tsinyi ra uñi quivi. Tan ña cuví maa nanyehé ra. Tan ña tsatsi ra, tan nduve maa náa tsihi ra.

¹⁰ Ñuu Damasco can iyó iin ra tsinú iñi tsi Nyoo, nañi ra Ananías. Tan nyehe ra iin tsa nyehe ra nu cahan Jutu Mañi yo tsihin ra tan catyí ra:

—¡Ananías! —catyí Jutu Mañi yo tsihin ra.

Tacan tan nacahan ra Ananías, tan catyí ra:

—Ihya nyaá yu, Jutu Mañi yu —catyí ra tsihin ra.

¹¹ Tacan tan Jutu Mañi yo catyí ra:

—Nduvita, tan cahun cun ityi cahnu tsa nañi Ndoó ñi. Tan nanducu un vehe ra tsa nañi Judas. Tan ndaca tuhun un nu maa tahan iyó ra tsa nañi Saulo, ra ñuu Tarso. Tyin tsicán tahvi ra tsi yu. ¹² Tan nyehe ra iin tsa nyehe ra, tan nyehe ra tsi yoohe, Ananías, tyin tsaq un nu nyaá ra, tan tyiso ndaha un jiñi ra tyin tacan tan nanyehe ra inga tsaha —catyí Jutu Mañi yo tsihin ra Ananías.

¹³ Tacan tan nacahan ra Ananías tan catyí ra:

—Jutu Mañi yu, cuaha xaan nyivi caahan ñi tsihin yu tyin nyivi yihí cuenda un ñuu Jerusalén cuaha xaan tsa ña vahan javaha ra Saulo can tsihin ñi. ¹⁴ Tan vityin vatsi ra ihya tyin tsaha ra jutu tsahnu tsa cuví ityi nuu ndatu tsi ra tsa tyihí ra tsi nyivi tsicán tahvi tsi un vehe caa —catyí ra Ananías tsihin Jutu Mañi yo.

¹⁵ Maa tyin Jutu Mañi yo catyí ra tsihin ra Ananías:

—Cuaahan tyin yuhu tsa nacatsi vaha yu tsi ra Saulo can, tyin cua cahan ra tuhun yu tsihin nyivi inga ñuu, tan tsihin rey nyivi can, tan juvin ñi cahan ndihi ra tuhun yu tsihin nyivi Israel. ¹⁶ Yuhu cua jacua ha yu tsi ra nácaa tsa cuaha tundoho cua nyehe ra

tsa cuenda yu —catyí Jutu Mañi yo tsihin ra Ananías.

¹⁷ Tacan tan cuahan ra Ananías vehe nu nyii ra Saulo. Tsaq ra yuvehe can tan quihvi ra tsitsi vehe. Tan tyiso ndaha ra jiñi ra Saulo, tan catyí ra tsihin ra:

—Yañi Saulo, Jutu Mañi yo ra Jesús, ra tsa quituvi nuu un ityi vatsi un, ra ican jacutsi tsi yu tyin nanyehe un inga tsaha. Tan cua jacutu ra tsi un tsihin Tatyí li ra —catyí ra Ananías tsihin ra Saulo.

¹⁸ Tan juvin ñi cuhva can tan coyó tsa caá tumaa caa yaa tyaca tsa tyasi tinuu ra Saulo. Tacan tan cuví nanyehe ra. Yahā can tan tsicoondutya ra. ¹⁹ Yahā can tan nacatsi ra, tan ndunyege cuñu ñuhu ra inga tsaha. Tan ndoo ra juhva quivi tsihin nyivi tsa yihí cuenda ra Cristo ñuu Damasco.

Nu quitsahā caahan ra Saulo tuhun ra Cristo tsihin nyivi ñuu Damasco

²⁰ Tacan tan numi ñi quitsahā caahan ra Saulo tuhun ra Cristo tsihin nyivi tandihi vehe ñuhu nyivi Israel ñuu Damasco. Tan catyí ra tyin ra Jesús, Sehe Nyoo cuví tsi ra. ²¹ Tandihí maa nyivi tsa tsiñi tsa caahan ra, iyo xaan cuñi ñi. Tan natuhún tahan ñi tan catyí ñi:

—¿A ñavin ra ihya cuví ra tsa tsinyaa ndaha tsi nyivi tsicán tahvi sivi ra Jesús ityi ñuu Jerusalén? ¿A ñavin juvin ra cuví ra tsa vatsi tñin tsi nyivi iyó ihya tyin cuhva cuenda ra tsi ñi tsi ra jutu tsa cuví ityi nuu naha ra? —catyí ñi.

²² Maa tyin ra Saulo ñihi ca caahan ra tuhun ra Cristo tsihin tsa ñi iñi ra. Tan janahá ra tsi nyivi Israel tsa iyó ñuu Damasco tyin ra Jesús cuví ra Cristo, tan Sehe Nyoo cuví tsi ra. Tan ñi Israel ña ñihí ñi nácaa nacahan ñi tsihin ra.

Nu tsinú xeehe ra Saulo nuu ra Israel naha ra

²³ Tsa yahā juhva quivi, tan ra Israel tsa ña tsinú iñi tsi ra Cristo natuhún tahan ra naha tyin cua cahñi ra naha tsi ra Saulo.

²⁴ Ñihu tan nduvi ndatú ra naha tsi ra yuvehe cahnu ñuu can. Maa tyin ra Saulo tsito ra tuhun can. ²⁵ Tacan tan nyivi tsa tsinú iñi tsi ra Cristo ñuu can tyihí ñi tsi ra tsitsi iin tyica cahnu. Tan tsacuaa januu ñi tsi ra ityi ventana iin vehe tsa nyaá yuhu cora ñuu can. Tacan tan tsinú ra cuahan ra.

Nu nyii ra Saulo ñuu Jerusalén

²⁶ Quivi tsa tsaq ra Saulo ñuu Jerusalén, cuñi ra ndu iin ra tsihin nyivi tsa yihí cuenda ra Cristo. Maa tyin tandihí maa ñi tan yuuhví ñi nyehe ñi tsi ra. Tyin ña tsinú iñi ñi tsa yihí ra cuenda ra Jesús. ²⁷ Maa tyin iin ra tsa nañi Bernabé, quihñ ra tsi ra. Tan tsahā cuenda ra tsi ra tsi ra tava tyiñu ra Jesús. Tan nacatyí tuhun ra tsihin ra naha

nácaa nyehe ra Saulo tsi Jutu Mañi yo ra Cristo ityi ñuu Damasco; tan nacatyí tuhun ra nácaa cahan Jutu Mañi yo tsihin ra. Tan nácaa cahan ra tuhun ra Cristo tsihin tsa ña yuuhví ra nda ñuu Damasco. ²⁸ Tacan tan ndoo ra Saulo ñuu Jerusalén tsihin nyivi tsa yihí cuenda ra Cristo. ²⁹ Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cahñi ra naha tsi ra. ³⁰ Maa tyin tsito ra hermano can naha ra tyin tacan tsicá iñi ra can naha ra. Yacan cuenda tsindacá ra hermano naha ra tsi ra Saulo nda ñuu Cesarea. Tacan tan jacuhun ra naha tsi ra nda Tarso, ñuu ra.

³¹ Tacan tan nyivi yihí cuenda ra Cristo tsa iyó tandihí ñuu tsa cayucú Judea, tan Galilea, tan Samaria, si xaan cuñi ñi tyin ña cuxaán ca nyivi tsi ñi. Tan ndunyeé ca iñi ñi tsihin tunyee iñi tsi Nyoo tyin tyaá yahvi vaha ñi cuhva cahan ra, tyin yuuhví ñi coto ña cua javaha ñi cuhva cuñi ra. Iyó ñi tsihin tsa jatyinyeé Tatyí li Nyoo tsi ñi. Tan nducuahá ca ñi tan iin tan iin quivi.

Nu nduvahá ra Eneas

³² Tacan cuví tan ra Pedro tuhvá ra cuahán cua nyehe nácaa yucú ra hermano naha ra tan iin tan iin ñuu. Tan tsahan tucu ra tsinyehe ra nu iyó nyivi yihí cuenda ra Jesucristo ñuu Lida. ³³ Ican nañihí ra tsi iin ra cuuhví, nañi ra Eneas. Tan tsa una cuiya canyii ra tan ña cuví maa nacandá ra tyin naxí cuñu ñuhu ra. ³⁴ Tan ra Pedro catyí ra tsihin ra:

—Yoohe Eneas, ra Jesucristo janduvahá ra tsi un. Nduvita tan natuvi yuvi un—catyí ra tsihin ra.

Tan juvin ñi cuhva can tan nduvita ra Eneas. ³⁵ Tan nyehe tandihí nyivi ñuu Lida can tyin tsa nduvahá ra. Tan nyehe tucu nyivi ñuu Sarón. Tacan tan ñi can, natsinu iñi ñi tsi Jutu Mañi yo. Tan nadoo ñi tuhun tsahnu tsa tsinu iñi ñi nda ndi cumañi ca coto ñi tuhun ra Cristo.

Nu nandoto ña Dorcas

³⁶ Quivi can tsicoo iin ñaha tsinú iñi tsi ra Cristo ñuu Jope. Tan nañi ña Tabita, tan tsihin yuhu griego, nañi ña Dorcas. Tan tuhvá ña javahá tsa vaha tsihin nyivi, jatyinyeé ña tsi nyivi ndaahvi. ³⁷ Tan quivi can ña Dorcas quihñ cuehe tsi ña tan tsihi ña. Tan tsa yahá jacutyí ñi tsi ña, tsicaquñ ñi tsi ña tsitsi cuarto nu tsinu uvi pisu. ³⁸ Yatyin ñi canyii ñuu Jope tsihin ñuu Lida, nu nyii ra Pedro. Tan nyivi tsa yihí cuenda ra Cristo ñuu Jope can tsito ñi tyin nyii ra Pedro ñuu Lida. Tacan tan jacuhun ñi tsi uvi taahan ra na cucana ra naha tsi ra Pedro tyin na cuhun ra ñuu Jope tsa numi ñi. Tan tsaá ra naha nu nyii ra tan catyí ra naha tsihin ra:

—Janumi ñi tan cuhun un tsihin ndi nda ñuu Jope —catyí ra naha tsihin ra.

³⁹ Tacan tan ra Pedro nduvita ra tan cuahán ra tsihin ra naha. Tan cuhva tsa tsaá ra naha, tsindacá ra naha tsi ra nda cuarto nu canyii ndiyi can. Tan tandihí maa ñiñaha tsa tsihi yii natuhvá ñi tsata ra, tan tsacú tsa ñi. Tan janahá ñi jahma tsa quicu ña Dorcas tsa tsicoo ña. ⁴⁰ Tacan tan ra Pedro tava ra tsi tandihí nyivi cuarto can. Tan tsicuiñi tsiti ra tan quitsahá tsicán tahvi ra tsi Nyoo. Tacan tan nanyehe ra tsi ñaha tsa tsihi can canyii ña. Tan quitsahá catyí ra tsihin ña:

—Hermana Tabita, nduvita —catyí ra tsihin ña.

Tacan tan nanyehe ña. Tan tsa nyehe ña tsi ra Pedro, tsinyaa ña. ⁴¹ Tacan tan ra Pedro tiñ ra ndaha ña tan janduvita ra tsi ña. Tacan tan cana ra tsi ra hermano naha ra, tan tsihin ñiñaha tsa tsihi yii. Tan nacuhva cuenda ra tsi ña tsi ñi tyin tsa nandoto ña. ⁴² Yahá can tan tandihí maa nyivi ñuu Jope tsito ñi tyin nandoto ña can. Tan cuaha xaan ñi natsinu iñi tsi Jutu Mañi yo. ⁴³ Tan ra Pedro ndoo ra juhva quivi ñuu can, nyii ra yuvehe iin ra tsa janduvita ñi quiti, nañi ra Simón.

10

Ra Pedro tsihin ra Cornelio

¹ Ñuu Cesarea iyó iin ra tsa nañi Cornelio. Tan cuví ra ra yihí ndaha iin cientu andaru. Tan tsa tandihí andaru tsa yihí ndaha ra can nañi tsi Italiano. ² Tan ra Cornelio can yuuhví ra tsi Nyoo. Maa ra tan tsihin tandihí nyivi ra vaha xaan jacahnú ñi tsi Nyoo. Tan inga tucu tuhun, cuaha xaan xuhun tsahá ra tsi nyivi ndaahvi ñuu Israel, tan tandihí quivi tsicán tahvi ra tsi Nyoo. ³ Tan iin quivi cuhva caa uñi tsa tseñi, nyehe ra iin tsa nyehe ra. Tan ican cuví nu catsi xaan nyehe ra iin ángel tsa jacuhun Nyoo nu nyii ra, tan catyí tsi tsihin ra:

—¡Yoohe Cornelio! —catyí ángel can tsihin ra.

⁴ Tacan tan nanyehe ra Cornelio tsi ángel can. Tan nayuhví xaan ra. Tan quitsahá tsicá tuhun ra tan catyí ra:

—¿Náa tsa cuví ihya, taa? —catyí ra tsihin ángel can.

Tacan tan ángel can quitsahá caahán ra tsihin ra:

—Nyoo tsiiñ ra tsa caahán un tan tsa tsicán un tsi ra. Tan taahán iñi ra tyin jatyinyeé xaan un tsi nyivi ndaahvi. ⁵ Tan vityin cuñi tsi tsa tava tyiñu un na cuquihñ tyiñu tsi iin ra tsa nañi Simón Pedro nda ñuu Jope. ⁶ Ra ican cua cahan tsihin un náa taahán tsi javaha un. Iyó ra vehe ra tsa nañi tucu Simón, cuví ra ra janduvita ñi quiti. Tan iyó vehe ra yuhu ndutya ñuhu —catyí

ángel can tsihin ra Cornelio, tan cuahán ángel can.

⁷ Tsa yaha cuahán ángel can, ra Cornelio cana ra tsi uvi taahan musu ra, tan tsihin iin andaru tsa jahá cuenda tsi ra. Tan yihí andaru can cuenda Nyoo. ⁸ Tandihí maa tsa cahán ángel can tsihin ra Cornelio tan nacatyí tuhun ra tsihin nduñi taahan ra can naha ra. Tan jacuhun ra tsi ra naha ñuu Jope.

⁹ Tuvj inga quivi tan cuahán ra can naha ra. Tan tsa ndi cumañi ca tsaa ra naha ñuu Jope, tan ra Pedro ndaa ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can. ¹⁰ Tan tsaa soco tsi ra tan tsisocó xaan ra. Maa tyin tsitsi tsa tsinú tsa catsi ra, quitsaha nyehé ra iin tsa janahá Nyoo tsi ra. ¹¹ Tan nyehe ra tyin ticohó andivi. Tan nyehe ra andivi tyin vatsi nuú iin jahma cahnu xaan ityi nu ñuhu. Tan tandihí tsa cumi tutun tsi nuuhñi nuuhñi ñi. ¹² Tan tsitsi jahma can yihí tandihí maa nuu quiti tsa cumi taahan tsaha, tan tandihí nuu coo, tan saa. ¹³ Tacan tan tsiñj ra iin ndusu tsa caahán tsihin ra:

—Pedro, nduvita tan cahñi quiti ihya, tan catyi un —catyi ndusu can tsihin ra.

¹⁴ Maa tyin ra Pedro nacahan ra tan catyi ra:

—Ña cua catsi yu, Jutu Mañi yu. Yuhu ña tuhva yu catsi quiti tsa catyi ley tyin ña vaha catsi ndi —catyi ra Pedro.

¹⁵ Tacan tan quitsaha caahán nyico ndusu can tsihin ra inga tsaha:

—Ña catyi un tyin ña catsi un tsa tsa jan-duvaha yu —catyi ndusu can tsihin ra.

¹⁶ Uñi taahan tsaha nyehe ra yacan jahá Nyoo. Tacan tan jahma cahnu can nandaa nyico can ityi andivi. ¹⁷ Tan tsitsi tsa tsicá ñi ra Pedro náa cuñi tsi catyi tsa nyehe ra can, tsaa musu tsa jacuhun ra Cornelio naha ra. Tan tsicá tuhun ra naha numaa tahan iyó vehe ra nañi Simón. ¹⁸ Tan tsa tsaa ra naha ityi yuvehe tsicá tuhun ra naha tatun ican iyó iin ra tsa nañi Simón Pedro. ¹⁹ Tan ra Pedro tsicá xaan ñi ra náa cuñi tsi catyi tsa nyehe ra. Tacan tan Tatyí Ii Nyoo quitsaha caahán tsihin ra, tan catyi tsi:

—Nyehe Pedro, uñi taahan ra vatsi nanducú tsi un. ²⁰ Nduvita tan cuhun cun tsihin ra naha, tan ña caca ñi un tyin maa yu jaquitsi tsi ra ihya naha ra —catyi Tatyí Ii Nyoo tsihin ra Pedro.

²¹ Tacan tan ra Pedro nuu ra nu yucú ra tsa jacuhun ra Cornelio, tan catyi ra tsihin ra naha:

—Yuhu cuví ra tsa nanducú ndo. ¿Náa tyiñu vatsi ndo?

²² Tacan tan nacahan musu ra Cornelio tan catyi ra naha:

—Ra Cornelio, ra yihí ndaha tsi ndi, ra ican jaquitsi tsi ndi. Vaha xaan nyivi cuví ra. Tan tyaa yahvi xaan ra tsi Nyoo. Tan tandihí maa ra ñuu Israel tsa iyó ityi Judea ihya cuñi ra naha tsi ra tsa cuenda tsa vaha nyivi cuví ra. Tan iin ángel Nyoo cahán tsihin ra tyin na cana ra tsi un, tyin cuhun un yuvehe ra tyin tacan tan tyaa soho ra tuhun tsa cua cahán un tsihin ra —catyi musu ra Cornelio tsihin ra Pedro.

²³ Tacan tan tsaha ra Pedro quihvi ra naha tsitsi vehe. Tan ndoo ra naha tsihin ra tsacuaa can. Tan tsa tuvi inga quivi tan cuahán ra tsihin ra naha. Tan cuahán juhva ra hermano tsa iyó ñuu Jope can tsihin ra naha.

²⁴ Tsa inga quivi tsaa ra naha nda ñuu Cesarea nu ndatú ra Cornelio tsi ra naha tsihin tandihí nyivi ra, tan tsihin tandihí ra vaha ñi tsi ra. ²⁵ Cuhva tsa tsaa ra Pedro yuvehe ra Cornelio, quita ra Cornelio tan caahán ra tsihin ra. Tan tsicuiñj tsiti ra nuu ra Pedro tan quitsaha jacahnú ra tsi ra. ²⁶ Maa tyin ra Pedro cañihí ra tsi ra, tan catyi ra tsihin ra:

—Nduvita tyin tahan ñi cuví yooho cuví tucu yuhu; ñavin Nyoo cuví yu —catyi ra tsihin ra.

²⁷ Tan tsitsi tsa caahán ra Pedro tsihin ra, tan quihvi ra tsitsi vehe tan nanyehe ra tyin cuaha xaan nyivi ndu iin tsitsi vehe can.

²⁸ Tacan tan catyi ra Pedro tsihin ñi:

—Nyooho tsitó ndo tyin ley nyuhu tsa cuví ndi nyivi Israel, catyi tsi tyin ña taahán tsi tsa ndu iin ndi tsihin nyivi tsa ñavin nyivi Israel cuví. Tan ndi tsitsi vehe ñi ña cuví quihvi ndi. Maa tyin Nyoo janahá ra tsi yu, tan catyi ra: “Yooho, ña catyi un tsihin nyivi tyin ndi intuhun ñi tan ña vaha ñi” catyi Nyoo tsihin yu. ²⁹ Yacan cuenda quivi tsa cana ndo tsi yu, numi ñi vatsi yu. Tan vityin cuñi yu coto yu nacuenta cana ndo tsi yu —catyi ra Pedro.

³⁰ Tacan tan nacahan ra Cornelio, tan catyi ra:

—Tsa iyó cumi quivi vityin, tumaa cuhva ihya tsa nyaá yu yuvehe tan ña tsatsi yu tan tsicán tahvi yu tsi Nyoo tsa tseñi. Tan quituvj iin rayi nuu yu. Nditsi ra jahma xiñu. ³¹ Tan catyi ra tsihin yu: “Yooho Cornelio, Nyoo tsiñi ra tsa tsicán tahvi un tsi ra. Tan nducuhun ñi ra tsa javahá un tyin jatyingeé xaan un tsi nyivi ndaahvi. ³² Tava tyiñu tsi musu un na cuhun ra naha nda ñuu Jope cuquihin ra naha tsi ra Simón Pedro na quitsi ra ihya. Nyií ra yuvehe ra tsa nañi Simón, iin ra tsa janduvitá ñi quiti. Tan vehe ra can nyaá tsi yatin ñi yuhu ndutya ñuhu. Tan na quitsi ra Simón Pedro tan cahan ra tsihin un” catyi ángel can tsihin yu. ³³ Tacan tan numi ñi tava tyiñu yu tyin na cuquihin tyiñu tsi un. Tan vaha tyin vatsi

un. Tan vityin tandihí yo ndu iín yo nuu Nyoo. Tan cuñí ndi tyaa soho ndi tandihí tsa catyí Jutu Mañi yo tsihin un tyin cuhva cuenda un tsi ndi —catyí ra Cornelio tsihin ra Pedro.

Nu caahán ra Pedro tuhun ra Cristo yuvehe ra Cornelio

³⁴ Tacan tan quitsahá caahán ra Pedro tan catyí ra:

—Vityin cutuñí iñi yu tyin Nyoo cuñí ra tsi tandihí nyívi, tahañ ñi nyívi Israel, tan nyívi tsa ñavin nyívi Israel cuví. Ña tava tsiyo ra tsi ndi intuhun maa yo. ³⁵ Tyin naquihín ra tsi yo tatun tyaa yahvi yo tsi ra, tan javahá yo tsa vaha. ³⁶ Nyoo cahan ra tsihin nyuhu tsa cuví ndi tata ra Israel, tan jacotó ra tyin cuví coo vaha yo tsihin ra tsa cuenda ra Jesucristo. Tan maa ra ndacá ñaha tsi tandihí maa yo. ³⁷ Nyooho tsitó vaha ndo tandihí tsa cuví ñuu nyívi Israel ñuu yu, nácaa quitsahá tsi nu cuví Galilea tsa yaha tsa cahan ra Juan tuhun Nyoo tsihin nyívi, tan jacoondutya ra tsi ñi. ³⁸ Tsító ndo nácaa tsahá Nyoo tunyee iñi Tatyí Ii ra tsi ra Jesús, ra ñuu Nazaret. Tan tsicá ra javahá ra tsa vaha, janduvahá ra tsi tandihí nyívi tsa nyehé tundoho jahá nu ña vaha. Tyehen javahá ra Jesús tyin Nyoo nyaá ra tsihin ra. ³⁹ Nyuhu cuví ndi tsandaa tsa cuenda tandihí tsa javahá ra Jesús ñuu Jerusalén tsihin tandihí ca ñuu tsa cayucú Judea. Yaha can tan ticaá ra naha tsi ra nu cruu tan tsahñi ra naha tsi ra. ⁴⁰ Maa tyin tsa tsinu uñi quívi janandotó Nyoo tsi ra. Tan quituvj ra nuu ndi. ⁴¹ Ña quituvj ra nuu tandihí nyívi. Maa tyin quituvj ra nuu nyuhu tyin nacatsj ra tsi ndi nda tsanaha tyin cuví ndi tsandaa cuenda ra. Nyuhu tsatsj ndi tan tsihi ndi tsihin ra tsa yaha tsa nandotó ra. ⁴² Tan tava tyiñu ra tsi ndi tyin cahan ndi tuhun ra tsihin nyívi. Tan cuví ndi tsandaa tyin Nyoo tava tyiñu ra tsi ra Jesús tyin cuví ra juez tsi nyívi tsa nyito tan nyívi tsa tsihi. ⁴³ Tan tacan tucu nda tsanaha, cahan tandihí ra cuví ndusu yuhu Nyoo tuhun ra Jesús. Tan catyí ra naha tyin tandihí nyívi tsa tsinú iñi tsi ra Jesús, cua jaha Nyoo tucahnu iñi cuatyí ñi tsa cuenda maa ra.

Nu naquihín nyívi Tatyí Ii Nyoo tan ñavin nyívi Israel cuví ñi

⁴⁴ Ndi caahán ca ra Pedro tan nuu Tatyí Ii Nyoo siqui tandihí ñi tsa tyaa soho tsa caahán ra. ⁴⁵ Tan ra Israel tsa yihí cuenda ra Jesús tsa tsaa tsihin ra Pedro iyo xaan cuñí ra naha tyin tsahá ndihí tucu Nyoo Tatyí Ii ra tsi nyívi tsa ñavin nyívi Israel cuví. ⁴⁶ Tyin tsiñi ra naha caahán ñi inga yuhu tan jacahnú ñi tsi Nyoo. ⁴⁷ Tacan tan quitsahá caahán ra Pedro tsihin ra tsa tsaa tsihin ra:

—Ña cuví casi yo nu coondutya nyívi ihya. Tyin tsa naquihín ñi Tatyí Ii Nyoo tumaa tsa naquihín tucu maa yo —catyí ra tsihin ra naha.

⁴⁸ Tacan tan tava tyiñu ra Pedro tsi ñi tsa ndi ñihí Tatyí Ii Nyoo na coondutya ñi tsihin sivi ra Jesucristo. Tacan tan caahán ndaahvi ñi tsihin ra Pedro na ndoo ra taahan quívi tsihin ñi.

11

Nu nacatyí tuhun ra Pedro tsihin ra yihí ndaha vehe ñuhu ñuu Jerusalén nácaa nducuahá tuhun ra Jesucristo inga ñuu

¹ Ra tava tyiñu ra Jesús tan inga ra yihí cuenda ra Jesús tsa iyó Judea, ñihí tuhun ra naha tyin nda cuenda nyívi tsa ñavin nyívi Israel cuví tan naquihín ñi tuhun Nyoo. ² Tacan tan tsaa nyico ra Pedro ñuu Jerusalén. Tan ra tsa catyí tyin tsiñi ñuu tsa cunyaa tuñi Nyoo tsi tandihí rayi, xaan xaan cuñí ra naha nyehé ra naha tsi ra Pedro. ³ Tan catyí ra naha tsihin ra:

—¿Nacuenda tsahan un yuvehe nyívi tsa ñavin nyívi Israel cuví tan tsatsj un tsihin ñi? —catyí ra naha.

⁴ Tacan tan ra Pedro nacatyí tuhun ra nda nu quitsahá tandihí tsa cuví tsi ra, tan catyí ra:

⁵ —Yuhu nyíi yu ñuu Jope. Tan tsa tsicán tahvi yu tsi Nyoo tan nyehé yu iin tsa janahá Nyoo tsi yu tyin iin jahma cahnú quee ityi andívi. Tan tandihí tsa cumi tutun tsi nuuhñi nuuhñi ñi tan vatsí nuú tsi ityi nu ñuhu nu nyíi yu. ⁶ Tan nyehé vaha yu tsa yihí tsitsi jahma can. Tan nyehé yu quiti tsa cumi tsaha, quiti cuuhu, coo, tan saa. ⁷ Tan tsifñi yu iin ndusu tsa caahán tsihin yu: “Ndúvita Pedro. Cahní quiti ihya tan catsi un” catyí ndusu can tsihin yu. ⁸ Tan nacahan yu tan catyí yu tyehen: “Jutu Mañi yu, ña catsi yu, tyin ña tuhvá yu catsi quiti tsa catyí ley tyin ña vaha catsi ndi.” ⁹ Tacan tan ndusu can nacahan tsi tsihin yu inga tsaha, tan catyí tsi: “Ña vaha tsa cahan un tyin ña catsi un tsa tsa yaha janduvahá yu” catyí ndusu can tsihin yu. ¹⁰ Uñi tsaha cuví yacan. Yaha can tan nandaa nyico tandihí quiti can tsihin jahma can ityi andívi. ¹¹ Tan juven ñi cuhva can tsaa uñi taahan ra naha yuvehe nu nyíi yu, quee ra naha ñuu Cesarea tan nanducú ra naha tsi yu. ¹² Tan Tatyí Ii Nyoo cahan tsihin yu na cahun yu tsihin ra naha. Tan catyí ra tsihin yu tyin ña caca iñi yu tsa ñavin ra ñuu Israel cuví ra naha. Yacan cuahán yu. Tan cuahán ndihí iñu taahan ra yafi yo ihya naha ra tsihin yu. Tan tsa tsaa ndi nda ñuu Cesarea, quihvi ndi tsitsi vehe iin ra tsa nañí Cornelio. ¹³ Tan nacatyí tuhun ra can tsihin ndi nácaa nyehé ra tsi iin ángel tsitsi vehe ra. Nyaá nyityi ángel can tan catyí ra tsihin

ra tyin na jacuhun ra musu ra ñuu Jope na cucana ra naha tsi yu. ¹⁴ Tyin yuhu cua cuhva cuenda yu tsi ra nácaa cuvi cacu ra tsihin tandihi nyivi ra, catyi ángel can tsihin ra, catyi ra tsihin ndi. ¹⁵ Tan javahā ra can tumaa cuhva catyi ángel can tsihin ra. Tan tsa tsaa yu yuvehe ra quitsahā caahán yu tsihin nyivi tsa ndu iin yuvehe ra. Tan quitsi Tatyí li Nyoo siqui ñi tumaa tsa nuu tsi siqui yo tsa jihna ñi. ¹⁶ Tacan tan nducuhun iñi yu tsa catyi Jutu Mañi yo quivi can. Tan catyi ra tyehen: “Nditsa tyin ra Juan jacoondutya ra tsi nyivi tsihin ndutya. Maa tyin nyooho cua coondutya ndo tsihin Tatyí li Nyoo”, catyi ra. ¹⁷ Nyoo tsahā ndihi tucu ra Tatyí li ra tsi ñi can tumaa tsa tsahā ra Tatyí li ra tsi yo quivi tsa natsinu iñi yo tsi Jutu Mañi yo Jesucristo. Tan tsa tacan çyó ra cuvi yuhu tan casi yu tsa javahā Nyoo? —catyi ra Pedro tsihin ra hermano can naha ra.

¹⁸ Tacan tan tsa tsiñi ra ñuu Jerusalén tuhun can, ña cahān ca ra naha. Tan jachahnú ra naha tsi Nyoo, tan catyi ra naha:

—Tun tacan cuvi, cuñi tsi catyi tyin Nyoo tsahā ndihi tucu ra ndatu tsi nyivi tsa ñavin nyivi Israel cuvi tyin na ndu uvi iñi ñi cuatyí ñi, tan coo ñi ñayivi nyito tsa ña cua naa maa —catyi ra naha.

Nyivi yihí cuenda ra Cristo ñuu Antioquía

¹⁹ Quivi tsa tsahñi ra naha tsi ra Esteban, quitsahā nyaá ndaha ra naha tsi inga ca nyivi yihí cuenda ra Cristo. Tan yihí ñi tsinu ñi tan cuahán ñi ityi Fenicia. Tan yihí ñi cuahán ñi iin ñuhu tsa nañi Chipre tsa canyí mahñu ndutya ñuhu. Tan yihí ñi tsaa ñi ñuu Antioquía. Tan tandihi ñi caahán ñi tuhun ra Cristo tsihin nyivi, maa tyin iin ñi maa tsihin nyivi Israel. ²⁰ Tan tsihin ñi tsa cuahán can, yihí nyivi ñihu Chipre, tan yihí tucu juhva nyivi ñuu Cirene. Tan tsa tsaa ñi ñuu Antioquía, tan quitsahā caahán ñi can tuhun ra Cristo tsihin nyivi tsa ñavin nyivi Israel cuvi. Tan jacoto ñi tuhun vaha Jutu Mañi yo ra Jesús. ²¹ Tan tunyee iñi Jutu Mañi yo iyó tsihin ñi. Tan yacan cuenda cuaha nyivi nacoó ñi tuhun tsahnu. Tan quitsahā tsinu iñi ñi tsi Jutu Mañi yo. ²² Tacan tan tsaa tuhun can nda ñuu Jerusalén. Tan nyivi yihí cuenda ra Cristo jacuhun ñi tsi ra Bernabé na cuhun ra nda ñuu Antioquía. ²³ Tan tsa tsaa ra Bernabé Antioquía can, nyehe ra nácaa nasocó Nyoo tsi ñi. Tan si xaan cuñi ra. Tan catyi ra tsihin ñi na cunyicun ñi tsi Jutu Mañi yo tsihin tsa nñi iñi ñi. ²⁴ Tacan javahā ra Bernabé tyin cuvi ra iin ra vaha. Tsiñi ra tsihin Tatyí li Nyoo, tan tsinu xaan iñi ra tsi Nyoo. Yacan cuenda cuaha xaan nyivi quihvi cuenda Jutu Mañi yo. ²⁵ Tsa yahā can tan cuahán ra Bernabé cua nanducu ra tsi ra Saulo nda ñuu Tarso. Tan

tsa nañihí ra tsi ra, tsindacā ra tsi ra nda ñuu Antioquía. ²⁶ Tan tsiyucu ra naha tsihin nyivi yihí cuenda ra Cristo ñuu can iin cuiya tan cuaha xaan nyivi jacuahā ra naha tuhun Nyoo. Tan juvin ñi ñuu Antioquía can cuvi nu quitsahā catyi nyivi tyin nyivi Cristiano cuvi ñi, o ñi yihí cuenda ra Cristo.

²⁷ Tan quivi can tsaa taahan ra cuvi ndusu yuhu Nyoo. Quee ra naha ñuu Jerusalén tan tsaa ra naha ñuu Antioquía. ²⁸ Tan iin ra can nañi ra Agabo tsi cunyaā nyityi ra tyañu nyivi yihí cuenda ra Cristo tan cahān ra tsa tsahā Tatyí li Nyoo tsi ra. Tan catyi ra tyin cua quitsi iin tama nñi cahnu nu ñuhu ñayivi. Tan tacan cuvi quivi tsa cuvi ra Claudio rey cahnu. ²⁹ Tacan tan nyivi yihí cuenda ra Cristo nda ñuu Antioquía natuhun tahan ñi tyin cua cuhva ñi nácaa iyó iñi intuhun intuhun ñi, tyin cua jatinyee ñi tsi nyivi yihí cuenda ra Cristo tsa iyó ñuu tsa cayucú Judea. ³⁰ Tacan javahā ñi tan jacuhun ñi juhva xuhun tsi ra tsa cuvi ityi nuu tsihin nyivi yihí cuenda ra Cristo nda ñuu Jerusalén. Tan ra Bernabé tsihin ra Saulo tsindacā ra naha xuhun can.

12

Nu tsihi ra Jacobo tan nu quihvi ra Pedro vehe caa

¹ Tan quivi can quitsahā nyaá ndaha ra cuvi rey Herodes tsi juhva nyivi yihí cuenda ra Cristo. ² Tan tava tyiñu ra tyin na cahñi ra naha tsi ra Jacobo, yañi ra Juan, tsihin mityi. ³ Tan nyehe ra Herodes tyin tahan xaan iñi nyivi Israel tsa javahā ra tacan, tan tava tyiñu ra tyin tin ndihi ra naha tsi ra Pedro. Tan cuvi tsi quivi vico pascua nu tuhva nyivi tsatsi paan tsa nduve yutsan iya yihí. ⁴ Tsa yahā tsa tñi ra naha tsi ra Pedro, tyihí ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñu hora tan nasamá ra naha, quihvi tucu inga cumi taahan andaru. Tan tyaā ra Herodes cuhva tyin cua cuhva cuenda ra tsi ra Pedro tsi nyivi tsa yaha vico Pascua. ⁵ Tan tacan nyii ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyii ra ican, nyivi yihí cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa nñi iñi ñi.

Nu jacacu Nyoo tsi ra Pedro vehe caa

⁶ Tan tyaā ra Herodes cuhva tyin inga quivi can cua tava ra tsi ra Pedro nuu nyivi. Tan juvin ñi tsacuaa can, tan ra Pedro quixi xaan ra tyañu uvi andaru can. Nuuhñi ra tsihin uvi cadena. Tan yucú uvi taahan ca andaru jahá cuenda nda yuvehe. ⁷ Tan sana iñi ra tan quituvi iin ángel tsa jacuhun Jutu Mañi yo. Tan ndunditsin tsitsi vehe caa can.

Tan ángel can tñin ra xiin ra Pedro, jandoto ra tsi ra. Tan catyí ra tsihin ra:

—Janumi. Nduvita —catyí ángel can tsihin ra.

Tacan tan ndatsi cadena tsa nuuhñi ndaha ra. ⁸ Tan ángel can catyí ra tsihin ra:

—Nacuhñi vaha tsitsi un tan tyihi nditsan un tsaha un —catyí ángel can tsihin ra.

Tacan javahá ra Pedro. Tan catyí ángel tsihin ra:

—Quihin jahma un cunditsi un tan quitsi nyicun un tsi yu —catyí ángel can tsihin ra.

⁹ Tan ra Pedro cuahán ra cuanyicún ra tsi ángel can. Maa tyin ña tsitó ra tatun tsa nditsa o tsa ña nditsa cuví can, tan cuñí maa ra tyin iyó iin tsa janahá Nyoo tsi ra.

¹⁰ Maa tyin cuahán ra tsata ángel can tan yahá ra naha iin nu jahá cuenda ra andaru. Tacan tan yahá tucu ra naha inga nu jahá cuenda ra naha. Yahá can tacan tan tsaá ra naha yuvehe caa cahnu nu quitá nyivi. Tan yuvehe can nuñá maa tsi. Tan quitá ra naha. Tan tsa yahá yahá ra naha iin ityi, tan nacoó ángel can tsi ra. ¹¹ Tacan tan nacoto ra Pedro tyin nditsa, tan quitsahá tsicá ñi ra:

—Vityin tsitó yu tyin tsa nditsa cuví tsi. Maa Jutu Mañi yu jaquitsi iin ángel tyin jacacú ra tsi yu ndaha ra Herodes tan ndaha ra ñuu Israel naha ra —cuñí ra Pedro.

¹² Tsicá ñi ra yacan ityi cuahán ra, tan tsaá ra yuvehe ña María sihi ra Juan Marcos. Tan cuaha xaan nyivi yucú ican tsicán tahvi ñi tsi Nyoo. ¹³ Tan tsa cañí ndaha ra Pedro yuvehe nuquehe, tan quitá iin ñaha tyuvaa tsa nañi Rode, tsinyehé ña yóo cañí ndaha yuvehe can. ¹⁴ Maa tyin cuhva tsa tsiñi ña ndusu ra Pedro, si xaan cuñí ña, tan naá ñi ña nuñá ña yuvehe can, tyin tsinú ña cuahán ña cua cahan ña tsihin nyivi tsa yucú tsitsi vehe can. Tan catyí ña tyin ra Pedro nyaá ra yuvehe. ¹⁵ Tacan tan quitsahá catyí ñi tsihin ña:

—Íñi yoocho ña vaha cuñí —catyí ñi tsihin ña.

Tan catyí ña tyin nditsa tsa caahán ña. Maa tyin ñi can catyí ñi tyin ñavin ra Pedro cuví ra, iin ángel cuenda ra cuví, catyí ñi tsihin ña.

¹⁶ Tan ra Pedro jañihí ca ra cañí ndaha ra yuvehe. Tan cuhva tsa nuñá ñi yuvehe tan nyehe ñi tsi ra, iyo xaan cuñí ñi tan nayuhvi ñi. ¹⁷ Maa tyin javahá ra seña tsihin ndaha ra na cutaxin ñi. Tan nacatyí tuhun ra tsihin ñi nácaa tavá Jutu Mañi yo tsi ra vehe caa. Tan catyí ra tsihin ñi:

—Cahan ndo tuhun ihya tsihin ra Jacobo tan tsihin inga ra yañi yo naha ra —catyí ra Pedro.

Tan quitá ra tan cuahán ra.

¹⁸ Cuhva tsa cunditsin, iyo xaan cuñí ra andaru tsa jahá cuenda tsitsi vehe caa can

naha ra, tyin ña tsitó ra naha nácaa quitá ra Pedro. ¹⁹ Tacan tan tavá tyiñu ra Herodes na cunanducu ra naha tsi ra, tan ña nañihí ra naha tsi ra. Tacan tan tavá tyiñu ra tsi ra naha na cahñi ra naha tsi ra jahá cuenda vehe caa can naha ra. Yahá can tan quitá ra Herodes Judea can tan cuahán ra cua coo ra ñuu Cesarea.

Nu tsihi ra Herodes

²⁰ Tan ra Herodes cuxaán xaan ra tsihin nyivi ñuu Tiro tan nyivi ñuu Sidón. Maa tyin cuñí ñi tsa coo vaha ñi tsihin ra tyin ñuu tsa ndacá ñaha ra, ican queé tsa tsatsí ñi. Tacan tan ndu iin ñi tan cuahán ñi cua cutahan ñi tsihin iin ra tsa nañi Blasto. Ra ican cahnu tyiñu jahá ra, tyin jahá cuenda ra tsi ra Herodes. Tan tsicán ñi tsa na coo vaha ñi tsihin ra Herodes. ²¹ Tacan tan catyí ra Herodes tyin cuhun ñi nu nyaá ra iin quivi. Tan tsaá quivi can tan tsicunditsi ra jahma si caá ra tsa jahá tyiñu ra. Tan tsicunyaá ra nu tyayu ra. Tan cahan ra tsihin ñi. ²² Tacan tan quitsahá caná tsaá ñi, tan catyí ñi:

—Ra tsa caahán ihya ñavin rayi cuví ra, tyin Nyoo cuví ra —catyí ñi.

²³ Tan juvin ñi cuhva can tan tñin cuehe tsi ra Herodes jahá ángel Jutu Mañi yo tyin tsahá ra tsa catyí nyivi tyin Nyoo cuví ra. Tan quihvi tindacu tsi ra, tan tsihi ra.

²⁴ Maa tyin tuhun Nyoo nducuahá ca tsi. Tan jañihí ca nyivi caahán ñi tuhun Nyoo tandihí ñi ityi. ²⁵ Quivi tsa ndihí tyiñu jahá ra Bernabé tsihin ra Saulo nda ñuu Jerusalén, cuanuhu ra naha ñuu Antioquía. Tan cuahán ndihí tucu ra Juan Marcos tsihin ra naha.

13

Nu quitsahá tsicá ra Saulo tan ra Bernabé tyiñu Nyoo

¹ Tsihin nyivi tsa yihí cuenda ra Cristo ñuu Antioquía yihí ra tsa cuví ndusu yuhu Nyoo. Tan yucú tucu ra tsa jacuahá tuhun Nyoo tsi nyivi. Tan ra ican naha ra cuví ra ihya naha ra: Ra Bernabé, ra Simón Tuun, ra Lucio ra ñuu Cirene, ra Manaén tsa tsahnú iin nducu ñi tsihin ra Herodes tsa cuví rey ityi Galilea, tan ra Saulo. ² Tan iin quivi yucú tandihí ra naha tan jacahnú ra naha tsi Jutu Mañi yo. Tan iyó nyitya ra naha. Tacan tan cahan Tatyí Ii Nyoo tsihin ra naha:

—Tava sin ndo tsi ra Bernabé tsihin ra Saulo tsa cuenda tyiñu tsa caná yu tsi ra naha —catyí Tatyí Ii Nyoo can tsihin ra naha.

³ Tacan tan tsa ndihí tsicoo nyitya ra naha, tan tyiso ndaha ra naha jiñi ra Bernabé tsihin ra Saulo, tan tsican tahvi ra naha tsi Nyoo tsa cuenda ra naha. Tan cahan tsihin tahan ra naha, tsahan cuahán ra naha.

Nu caahán ra tavq tyiñu ra Jesús tuhun Nyoo ñuhu Chipre

⁴Yahá can tan jacuhun Tatyí li Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihvi ra naha tsitsi iin yutun ndoo tan cuahán ra naha nda ñuhu Chipre tsa canyií mahñu ndutya ñuhu. ⁵Tacan tan tsaq ra naha ñuu Salamina tsa canyií yuhu ndutya ñuhu. Tan quitsahá caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatyinyee ra tsi ra naha. ⁶Tacan tan cuahán ra naha caahán ra naha tuhun Nyoo tan iin tan ñuu tsa cayucú Chipre can nda cuanda tsa tsaq ra naha ñuu tsa nañi Pafos. Tan ican nañihí ra naha tsi iin ra ñuu Israel tsa nañi Barjesús. Tan tsitó ra tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra. ⁷Tan ra tasi can nyaá ra tsihin ra cumí tyiñu Sergio Paulo. Tan ra Sergio cuví ra iin ra catsi iñi. Tan cana ra tsi ra Bernabé tsihin ra Saulo, tyin cuñí ra tyaa soho ra tuhun Nyoo tsa caahán ra can naha ra. ⁸Tan ra tasi can nañi tucu ra Elimas, tan tyasí xaan ra nu tsinu iñi ra cumí tyiñu can tsi ra Cristo. ⁹Tacan tan ra Saulo tsa nañi tucu Pablo, tsitú ra tsihin Tatyí li Nyoo. Tan ñihi xaan nanyehé ra tsi ra Elimas can. ¹⁰Tan catyí ra tsihin ra:

—Yooho ra jandaví ñaha, ra vatya. Sehe cuihna cuví tsi un. Tan cuñi un jativi un tandihi tsa vaha. Tan tacan ñi tyasí un ityi vaha Jutu Mañi yo. ¹¹Tan vityin Jutu Mañi yo cua tatsi tuñi ra tsi un, tyin cua cuaa un. Tan ña cua cuví nyehe un ñuhu ñicanyii juhva quivi—catyí ra Pablo tsihin ra Elimas.

Tacan tan juvin ñi cuhva can cuaa ra. Tan ndoo ra nu naa. Tan nducu ra iin ra tñin ndaha ra tyin ña nditsin nyehé ra. ¹²Tsa nyehe ra cumí tyiñu can tsa cuví tsi ra Elimas, tan natsinu iñi ra tsi ra Jesucristo. Tyin iyo cuñi ra nyehé ra tsa javahá Jutu Mañi yo.

Nu cuahán ra Pablo tan ra Bernabé nda ñuu Antioquia tsa canyií Pisidia

¹³Ra Pablo tan ra vaha iñi tsi ra quihvi ra naha tsitsi iin yutun ndoo ñuu Pafos. Tan cuahán ra naha nda ñuu Perge tsa canyií Panfilia. Maa tyin ra Juan Marcos nacoq ihñi ra tsi ra naha tan cuanuhu ra nda ñuu Jerusalén. ¹⁴Yahá can tan queq ra naha Perge can, tan cuahán ra naha ñuu Antioquia tsa canyií Pisidia. Ican quihvi ra naha tsitsi vehe ñuhu nyivi Israel tan cuví tsi iin quivi quitatú ñi. Tan tsinyecu ra naha. ¹⁵Tacan tan quitsahá cahví nyivi nu libru ley Nyoo tsa tyaa ra Moisés. Tan cahví tucu ñi libru tsa tyaa ra cuví ndusu yuhu Nyoo tahañ tsanaha. Yahá can tan ra cuví ityi nu vehe ñuhu naha ra catyí ra naha tsihin ra hermano tsa nyecú ican, tyin tatun cuñi ra

naha cahan ra naha tsihin nyivi, cuví cahan ra naha. ¹⁶Tacan tan nduvita ra Pablo tan javahá ra iin seña tsihin ndaha ra tyin na cutaxin ñi. Tan catyí ra:

—Tyaa soho nyoocho, ra ñuu Israel, tan nyoocho nyivi tsa tyaa yahvi tsi Nyoo. ¹⁷Nyoo cuenda yo, tsa cuví yo nyivi Israel, nacatsi vaha ra tsi tsii tsaahnu yo. Tan quivi tsa iyó ca ra naha Egipto, javahá ra iin ñuu cahnu tsi ra naha. Vasu ñavin nyivi ñuu can cuví ra naha, maa tyin janducuahá ra tsi ra naha. Yahá can tan tava ra tsi ra naha ityi can tsihin tunyee iñi tsa iyó tsi ra. ¹⁸Tan cunyeq iñi Nyoo tandihi cuhva tsicoq ra naha nu tsicá nuu ra naha nu tsiqui tsitsi tsa uvi xico cuiya. ¹⁹Tan janaq ra utsa taahan ñuu nahnu tsa cayucú ñi cahnu Canaán, tyin tsaahá ra ñuhu can tsi tsii tsaahnu yo. ²⁰Yahá can tan quitsahá ndacá ñaha juez tsi nyivi can jahá Nyoo. Tumaa cumi cientu sasava cuiya tsindacá ñaha juez tsi ñi, nda cuanda quivi tsindacá ñaha ra Samuel ra cuví ndusu yuhu Nyoo tsi ñi. ²¹Tacan tan maa ñi tsicāñ ñi iin rey tsa cundaca ñaha tsi ñi. Tan Nyoo tsaahá ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín. Tan uvi xico cuiya tsindacá ñaha ra tsi ñi. ²²Yahá can tan Nyoo tava ra tsi ra Saúl tsa cuví ra rey. Tan tsaahá ra tyiñu can tsi ra David. Tan catyí ra: “Nyehe yu tyin ra David, sehe ra Isaí, cuví ra iin rayi tsa taahan iñi yu cuhva iyó. Tan cua javaha ra tandihi tsa cuñi yu” catyí Nyoo tuhun ra David. ²³Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsi tsi ra tyin jacacu ra tsi yo tsa cuví yo nyivi Israel, tumaa catyí ra tsihin tsii tsaahnu yo tahañ tsanaha. ²⁴Tan ndi cumañi ca quitsi ra Jesús, ra Juan, ra jacoondutya tsi nyivi, cahan ra tsihin tandihi nyivi Israel. Tan catyí ra tsihin ñi tyin cuñi tsi tsa ndu uvi iñi ñi cuatyí ñi, tan coondutya ñi. ²⁵Tan tsa cua ndihi tyiñu jahá ra Juan tan catyí ra: “¿A cuñi maa ndo tyin yuhu cuví ra cahnu xaan tsa ndatú ndo? Ñavin yuhu cuví ra cahnu can. Tyin tsata tsa vaha yuhu tan vatsi inga ra. Tan ndi nditsan tsa nyaá tsaha ra, nduve yahvi nyaá yu tan tava yu itsi. Tyin cahnu xaan ra cuví ra”, catyí ra Juan.

²⁶Tan caahán ca ra Pablo tan catyí ra:

—Yañi, nyoocho nyivi tata ra Abraham tan tandihi inga ndo tsa tyaa yahvi tsi Nyoo. Tsa cuenda nyoocho cuví tuhun ihya tyin jacuahá Nyoo tsi yo nácaa cacu yo. ²⁷Nyivi ñuu Jerusalén tan ra cuví ityi nuu tsihin ñi ña tsitó ñi tyin ra Jesús jacacú ra tsi yo. Tan ndi ña cutuñi iñi ñi tuhun tsa tyaa ra cuví ndusu yuhu Nyoo tahañ tsanaha, vasu jacuahá xaan ñi tuhun can tandihi quivi tsa quitatu ñi, maa tyin ña cutuñi iñi ñi. Tan quivi tsaññi ñi tsi ra Jesús cuví tsi tumaa cuhva catyí ra

cuví ndusu yuhu Nyoo. ²⁸ Tyin vasu nduve cuatyí ra Jesús nañihí ñi, maa tyin tsican ñi tsi ra Pilato na tyihí ra tyiñu tyin cahñi ra naha tsi ra Jesús. ²⁹ Tan tsa yaha janyehé ñi tundoho tsi ra tumaa catyí maa tuhun ra nu libru, tan tsihi ra. Tacan tan januu ñi tsi ra nu cruu. Tan tsicutsí ñi tsi ra. ³⁰ Maa tyin Nyoo janandotó ra tsi ra inga tsaha. ³¹ Tan tsitsi tsa cuaha quívi tan quituví ra nuu ra tsa cuahán tsihin ra quívi quitá ra ityi Galilea, tan tsaa ra Jerusalén. Tan ra ican naha ra cuví ra tsa caahán tuhun ra tsihin nyívi vityin. ³² Tan yacan cuenda nyuhu caahán ndi tuhun vaha tsa catyí Nyoo tsihin tsii tsaahnu yo tyin cuhva ra tsi yo. ³³ Tyin tsa cuenda tsa vaha tsi maa yo tsa cuví yo nyívi tata ñi, javahá maa Nyoo tsa catyí ra. Tyin janandotó ra tsi ra Jesús tumaa cuhva nyaá nu tsinu uvi salmo nu catyí ra tyehen: “Sehe yu cuví tsi un, tan yuhu tsahá yu ñayívi coo un vityin” catyí Nyoo tsihin ra. ³⁴ Nyoo tyaa ra cuhva tyin janandoto ra tsi ra, tyin tacan tan ña cua tyahyu cuñu ñuhu ra. Tyin catyí nu tutu Nyoo: “Tsi nyooho cua cuhva yu tsa vaha tsa cahán yu tsihin ra David tyin cua cuhva yu tsi ndo.” ³⁵ Yacan cuenda catyí tucu nu inga salmo tyehen. “Ña cua cuhva un tsa tyahyu cuñu ñuhu Sehe ii un” catyí tsi. ³⁶ Ra David jahá tyiñu ra tsa cuenda nyívi tsa tsicoo quívi tsicoo ra, tandihí tsa catyí Nyoo tsihin ra tyin javaha ra, javahá ra. Yaha can tan tsihi ra tan tsicutsí ñi tsi ra tumaa tsicutsí ñi tsi jutu ra. Tan tyahyu cuñu ñuhu ra. ³⁷ Maa tyin ra tsa janandoto Nyoo, ña tyahyu cuñu ñuhu ra. ³⁸ Yañi, cuñí tsi tsa coto ndo tyin tsa cuenda cuatyí yo tan quitsí ra Jesús tan tsihi ra tyin jahá ra tucahnu iñi cuatyí yo. ³⁹ Tan tsa cuenda ra Jesús jahá Nyoo tucahnu iñi tsi tandihí ñi tsa tsinú iñi tsi ra, tyin ley Nyoo tsa tyaa ra Moisés ña cuví janduvaha tsi tsi yo nuu Nyoo. ⁴⁰ Jaha ndo cuenda coto ndoo tsa tyaa ra cuví ndusu yuhu Nyoo siqui ndo. Tyin catyí ra naha tyehen:

⁴¹ Nyehe nyooho, ra tsa tsacú nducu, taahán tsi tsa nayuhví ndo tan taahán tsi cuna ndo.

Tyin yuhu cuví Nyoo, tan javahá yu iin tsa cahnu quívi tsa iyó ndo vityin.

Maa tyin ña cua tsinu iñi ndo tandihí tsa javahá yuhu vasu nacatyí tuhun nyívi tsihin ndo, catyí Nyoo.

⁴² Ndihi cahán ra Pablo tan quitá ra tsata vehe ñuhu can tsihin ra vaha iñi tsi ra. Tacan tan nyívi tsa ñavin nyívi Israel cuví quitsahá catyí ñi tsihin ra, tyin na cahán nyico ra tuhun can tsihin ñi inga vitya quívi tsa quitatú ñi. ⁴³ Cuhva tsa ndihí ndu iin ñi, cuaha xaan nyívi Israel tan nyívi tsa yihí cuenda ñi Israel, tsinyicun ñi tsi ra Pablo tan tsi ra Bernabé. Tan catyí ra naha tsihin ñi tyin na cuhun ca ñi ityi nuu tsihin Nyoo. Tan na

naquihin vaha ñi tumañi iñi tsa tsahá Nyoo tsi ñi.

⁴⁴ Tsa inga vitya quívi quitatú ñi, ndu iin nyico ñi. Tan tsa yatyin tandihí ña maa nyívi ñuu can ndu iin tsihin ñi tan tyaa soho ñi tuhun Nyoo. ⁴⁵ Maa tyin cuhva tsa nyehe ra Israel naha ra, cuxaán ra naha tyin nyehe ra naha tyin cuaha nyívi nyicún tsi ra hermano can naha ra. Tan quitsahá caahán ra naha tsi ra Pablo, tan cahán ra naha ndavaha ñi siqui ra. ⁴⁶ Maa tyin ra Pablo tan tsihin ra Bernabé ña yuuhví maa ra naha tan quitsahá caahán ñihi ra naha tsihin ra Israel can naha ra. Tan catyí ra naha:

—Cuñí tsi tsa cahán jinha ndi tuhun Nyoo tsihin nyooho tsa cuví ndo nyívi Israel. Maa tyin ña cuñí ndo naquihin ndo tsa caahán ndi. Tan nyooho ña cuñí ndo tsa coo ñayívi nyito tsa ña cua naa maa tsi ndo. Yacan cuenda cua cuhun ndi cucahan ndi tsihin nyívi tsa ñavin nyívi Israel cuví. ⁴⁷ Tyin tacan catyí Jutu Mañi yo tsihin ndi tan catyí ra tyehen:

Tyaa yu tsi un tumaa iin ñuhu tsa jandunditsín nu iyó nyívi naní cahnu nu ñuhu ñayívi.

Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

⁴⁸ Tsa tsiñi ra tsa ñavin ra Israel cuví naha ra, si xaan cuñí ra naha. Tan quitsahá catyí ra naha tyin tuhun Nyoo vaha xaan tsi. Tan natsinú iñi tandihí nyívi tsa nacatsí maa Nyoo, tyin coo ñi ñayívi nyito tsa ña cua naa maa. ⁴⁹ Tacan tan nducuahá ca tuhun Nyoo tandihí ityi ñuu can. ⁵⁰ Maa tyin ra Israel cahán ra naha tsihin juhva ñaha cuca tsa nyicún ley Nyoo tsa tyaa ra Moisés. Catyí ra naha tsihin ñi tyin ña vaha tuhun caahán ra Pablo. Tan caahán tucu ra naha tsihin ra cumí tyiñu ñuu can. Tan ican cuví nu quitsahá nyaá ndaha nyívi tsi ra Pablo tan ra Bernabé, nda cuenda tsa tava ñi tsi ra naha ñuu can. ⁵¹ Tacan tan naquisi ra naha nyaca tsaha ra naha tumaa iin seña tyin ndoo cuatyí nyívi can siqui maa ñi. Tan cuahán ra naha ñuu Iconio. ⁵² Maa tyin ñi yihí cuenda ra Cristo ñuu Antioquía can si xaan cuñí ñi. Tan tsitú ñi tsihin Tatyí Ii Nyoo.

14

Nu nyii ra Pablo tan ra Bernabé ñuu Iconio

¹ Ra Pablo tan ra Bernabé yucú ra naha ñuu Iconio. Tan quihví ra naha tsitsi vehe ñuhu nyívi Israel. Tan vaha xaan cahán ra naha tuhun Nyoo tsihin nyívi can. Tan cuaha xaan ñi natsinú iñi ñi tsi ra Cristo, nyívi Israel tan nyívi tsa ñavin nyívi Israel cuví. ² Maa tyin ra Israel tsa ña tsinú iñi tsi ra Cristo natyuhú ra naha tsi nyívi tsa ñavin

nyivi Israel cuví tyin na caca ña vaha iñi ñi nyehe ñi tsi ra yihí cuenda ra Cristo. ³ Yacan cuenda ra Pablo tan ra Bernabé ndoo ra naha ican cuaha quívi. Tan tsihin tsa ñi iñi ra naha caahán ra naha tuhun ra Cristo, tyin tsinú xaan iñi ra naha tsi Jutu Mañi yo. Tan Jutu Mañi yo jatyinyee ra tsi ra naha tsa caahán ra naha tuhun ra, nácaa tsa cuñí ra tsi yo. Tan tsahá Jutu Mañi yo tunyee iñi tsi ra naha tyin javaha ra naha seña tan tsa iyo na coto nyivi tyin nditsa tsa caahán ra naha. ⁴ Maa tyin nyivi ñuu ña iin tsicá iñi ñi, tyin juhva ñi yihí cuenda ra Israel naha ra, tan juhva ñi nyicún tsi ra tava tyiñu ra Jesús. ⁵ Tacan tan ra Israel tan ra tsa ñavin ra Israel cuví, natuhun tahan ra naha tsihin ra cumi tyiñu, tyin cua cahan ra naha ndavaha ñi siqui ra tava tyiñu ra Jesús, tan cua cañi ra naha yuu tsi ra naha. ⁶ Maa tyin ra Pablo tan ra Bernabé ñihí tuhun ra naha tyin tacan cua javaha ra can naha ra tsi ra naha, tan cuahán ra naha nda ñuu Lистра, tan nda ñuu Derbe ityi Licaonia. Tan tsicá nuu ra naha ityi ñuu can. ⁷ Tan cahan nyico tucu ra naha tuhun Nyoo nácaa jacacú ra tsi yo.

Nu cañi nyivi yuu tsi ra Pablo nda ñuu Lистра

⁸ Nda Lистра iyó iin rayi tsa coxo tyin nda quivi cacú ra tan ña cuví caca ra, tyin pehe nduvi taahan tsaha ra. ⁹ Tan ra pehe tsaha can tyaa soho ra tsa caahán ra Pablo. Tan ra Pablo, tuví iñi ra tyin tsinú iñi ra can tyin cuví nduvaha ra. ¹⁰ Tacan tan ra Pablo caahán ra tsihin tsa ñihí ndusu ra, tan catyí ra:

—Nduvita tan cunyaa nyityi un —catyí ra Pablo tsihin ra.

Tan ra ican, intuhun ñi ndava ra, tan tsinyaa nyityi ra. Tan quitsahá tsicá ra. ¹¹ Tsa nyehé nyivi tyin javahá ra Pablo tacan, quitsahá caná tsaa ñi tsihin yuhu Licaonia, tan catyí ñi:

—Ra tsa tsaa nu yucú yo ihya, nyoo cuví ra naha, maa tyin tumaa caá rayi, caá ra naha —catyí ñi.

¹² Tan catyí ñi tyin ra Bernabé cuví ra nyoo tsa nañi Júpiter, tan ra Pablo cuví nyoo tsa nañi Mercurio, tyin ra ican cuví ra tsa caahán. ¹³ Tan iyó iin ra cuví jutu tsa jahá cuenda vehe ñuhu tsa nyaá yuhu ñuu ñi can nu jacahnú nyivi tsitoho Júpiter. Tan quitsi ndaca ra indiqui tan ita tyin maa ra tan nyivi cuñí ñi jacahnu ñi tsi ra Pablo tsihin ra Bernabé. Tan cua cahñi ñi indiqui can tyin cua cuhva cuenda ñi tsi ra naha, tyin cuñí ñi tyin nyoo cuví ra naha. ¹⁴ Maa tyin cuhva tsa tuví iñi ra naha tsa tsicá iñi ñi, quitsahá tsahnyá ra naha jahma ra naha. Tan javahá ra naha tacan tumaa iin seña tyin ña ndoo ra naha vaha. Tan quihví ra

naha tyañu nu tuvi nyivi, tan caná tsaa ra naha, ¹⁵ Tan catyí ra naha:

—Nyooho tata, ¿nácaa tsa javahá ndo tye-hen? Nyuhu juvin ñi rayi ñuu ñayivi ihya cuví ndi. Tumaa cuví nyooho cuví tucu nyuhu. Tan vatsí cahan ndi tsihin ndo tyin na jaña ndo tsa javahá ndo tye-hen tyin ña tsiñi ñuhu yacan tsi ndo, tan na cunyicun ndo tsi Nyoo nyito. Juvin ra tsa javahá andivi tan ñuhu ñayivi. Tan javahá ra ndutya ñuhu tan tandihí maa tsa iyó tsitsi ndutya ñuhu can. ¹⁶ Tan tahan tsanaha nda cuanda vityin, Nyoo jaña ndaha ra tsi nyivi na javaha maa ñi cuhva cuñí ñi, ¹⁷ vasu tandihí quivi jacahá ra tsi ñi tyin ra vaha cuví ra tan javahá ra tsa vaha. Maa ra jacuún ra savi nu yucú yo. Tsahá ra tsa coo vaha tsa tatsi yo quivi taahán tsi. Tan tsahá ra tsa catsi yo. Tan tsahá ra tsa cusii cuñí yo —catyí ra naha tsihin nyivi can.

¹⁸ Maa tyin vasu catyí ra naha tacan, yíi xaan tan tyasi ra naha tsa cahñi ñi indiqui can, tyin cuñí ñi jacahnu ñi tsi ra naha tsihin can.

¹⁹ Tacan tan tsaa juhva ra Israel, ra tsa ña tsinú iñi tsi ra Cristo, ra ñuu Antioquia, tan ra ñuu Iconio. Tan natyuhú ra naha tsi nyivi, na cañi ñi yuu tsi ra Pablo. Tan tacan javahá ñi, tan cuñi maa ñi tyin tsa tsihi ra. Tacan tan ixtá caa ñi tsi ra tan tsindacá ñi tsi ra nda yuhu ñuu. ²⁰ Maa tyin ndu iin ra yihí cuenda ra Cristo nu canyí ra Pablo. Tan nduviti nyico ra. Tan quihví nyico ra inga tsaha tsitsi ñuu can. Tan tsa inga quivi can cuahán ra ñuu tsa nañi Derbe tan cuahán ra Bernabé tsihin ra.

²¹ Tan cahan tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyivi nacuhvá ñi tsi ñi tsi Nyoo. Yahá can tan cuanuhú ra naha ityi quitsi ra naha. Tan yahá nyico ra naha ñuu Lистра tan ñuu Iconio inga tsaha, tan tsaa nyico ra naha nda ñuu Antioquia. ²² Tan tandihí ñuu can jandu iin ra naha iñi nyivi tsa yihí cuenda ra Cristo. Tan catyí ra naha tsihin ñi na cuhan ñi ityi nuu ca tsihin tsa tsinú iñi ñi tsi Nyoo. Tan catyí tucu ra naha tsihin ñi tyin tatun cuñí yo tsa cundaca ñaha Nyoo tsi yo, cuñí tsi tsa nyehe yo tundoho. ²³ Tan natyiso ra naha tsi ra cua cuvi ityi nuu tsihin nyivi tsa yihí cuenda ra Cristo tan iin tan iin vehe ñuhu. Tan tsicoo nyitya ra naha tan tsican tahvi ra naha tsi Nyoo tsa cuenda ra tsa cua cuvi ityi nuu tsihin nyivi vehe ñuhu can naha ra. Yahá can tan catyí ra Pablo naha ra tsihin ra cuví ityi nuu vehe ñuhu can naha ra:

—Tsinu iñi ndo tsi Jutu Mañi yo. Tyin maa ra cua jaha cuenda tsi ndo —catyí ra Pablo naha ra tsihin ra naha.

Nu cuanuhŷ nyico ra Pablo tan ra Bernabé űuu Antioquía ityi Siria

²⁴ Yahā can tan yahā ra Pablo tsihin ra Bernabé űuu tsa cayucú Pisidia, tan tsaā ra naha nda cuanda Panfilia. ²⁵ Cahān ra naha tuhun Nyoo űuu Perge. Yahā can tan tsahān ra naha űuu Atalia. ²⁶ Ican quihvŷ ra naha tsitsi iin yutun ndoo tan cuanuhŷ ra naha nda űuu Antioquía. Ican cuvŷ űuu nu natyiso űi tsi ra naha tyin cua javaha ra naha tyiűu Nyoo, tan vityin tsa tsaā nuhu ra naha. ²⁷ Tsa tsaā nyico ra naha űuu Antioquía jandu iin ra naha tsi nyivi yihŷ cuenda ra Cristo. Tan nacatyŷ tuhun ra naha tsihin űi tandihŷ tsa javahā Nyoo tsihin ra naha, tan nácaa nuűā Jutu Maűi yo ityi tyin tsinú tucu iűi űi tsa űavin nyivi Israel cuvŷ. ²⁸ Tan naha xaan ndoo ra Pablo tan ra Bernabé tsihin űi yihŷ cuenda ra Cristo űuu can.

15

Nu jandaa ra tava tyiűu ra Jesús tyiűu nda űuu Jerusalén

¹ Ndi nyiŷ ca ra Pablo tan ra Bernabé űuu Antioquía, tan tsaā taahan ra naha quee ra naha nda Judea. Tan quitsahā jacuahā ra naha tsi ra yihŷ cuenda ra Cristo. Tan catyŷ ra naha tyin cuűi tsi tsa cunyaa tuűi Nyoo tsi ra naha, tumaa cuhva catyŷ ra Moisés, tyin tacan tan cua cacu ra naha. ²⁻³ Tan űihi xaan cahān yuhu tahan ra Pablo tan ra Bernabé tsihin ra can naha ra tsa cuenda yacan. Tacan tan natyiso ra hermano Antioquía can naha ra tsi ra Pablo tan ra Bernabé tsihin taahan ca ra naha tyin cahun ra naha űuu Jerusalén, cujandaa ra tyiűu can tsihin ra tava tyiűu ra Jesús tan tsihin ra cuvŷ ityi nuu tsihin nyivi vehe űuhu űuu Jerusalén can naha ra. Tacan tan cuahān ra naha. Tan ityi cuahān ra naha, yahā ra naha ityi Fenicia tan Samaria. Tan nacatyŷ tuhun ra naha tsihin nyivi yihŷ cuenda ra Cristo nácaa jaűā nyivi tsa űavin nyivi Israel cuvŷ tuhun tsahnu tsa tsinú iűi űi, tyin nacuhvá cuenda űi tsi űi tsi Nyoo. Tan tandihŷ ra hermano sii xaan cuűi ra naha tsa tsito ra naha yacan.

⁴ Quivŷ tsaā ra Pablo tan ra Bernabé űuu Jerusalén, cuahān ra naha nu ndu iin nyivi yihŷ cuenda ra Cristo. Tan tandihŷ űi tan ra cuvŷ ityi nuu tsihin űi, tan tsihin ra tava tyiűu ra Jesús, tsahā űi yaha ra naha tyin nacatyŷ tuhun ra naha tsa javahā Nyoo tsihin ra naha. ⁵ Maa tyin juhva ra fariseo tsa tsinú iűi tsi ra Cristo, nduvitā ra naha tan catyŷ ra naha:

—Tandihŷ ra tsa űavin ra Israel cuvŷ tan tsinú iűi ra naha tsi ra Jesús, cuűi tsi tsa cunyaa tuűi Nyoo tsi ra naha. Tan cuűi tucu tsi tsa javaha ra naha cuhva catyŷ ley Nyoo tsa tyaa ra Moisés —catyŷ ra naha.

⁶ Tacan tan ndu iin ra cuvŷ ityi nuu tsihin űi yihŷ cuenda ra Cristo tan ra tava tyiűu ra Jesús tyin natuhun tahan ra naha tuhun can. ⁷ Tsa yahā tsa cahān yuhu xaan ra naha, tan nduvitā ra Pedro, tan catyŷ ra:

—Yaűi, tsitó ndo tyin tsitsi tsa tandihŷ yo, nacatsŷ Nyoo tsi yuhu ra ndaahvi quivŷ can, tyin cahān yu tuhun ra tsa jacacú tsi yo tsihin nyivi tsa űavin nyivi Israel cuvŷ, tan na tsinu iűi űi tsi Jutu Maűi yo. ⁸ Tan Nyoo, ra tsitó aűima tandihŷ nyivi, janahā ra tsi yo tyin cuűi ra tsi űi ican. Yacan cuenda tsahā ra Tatyŷ Ii ra tsi űi, tumaa tsa naquihűn tucu maa yo Tatyŷ Ii ra tahān tsanaha. ⁹ Nyoo inducu űi cuűi ra tsi nyivi. Yacan cuenda űa tyaa tsiyo ra tsi űi ican tan ndi tsi yoo. Janduvahā ra tsi űi tsa cuenda tsa tsinú iűi űi tsi ra tumaa maa yo. ¹⁰ Vityin űnacuenda űa tsinú iűi ndo tsa javahā Nyoo tsihin űi can? Tyin űa vaha tsa tyiso yo ley Nyoo tsa tyaa ra Moisés siqui űi. Tyin ndi maa tsiŷ tsahnu yo tan ndi maa yo tan űa cuvŷ naquihűn vaha yo ley can. ¹¹ űavin tacan cacú yo. Yoo tsitó yo tyin cacú yo tsihin tumañi iűi tsa javahā Jutu Maűi yo ra Jesús tsihin yo. Tan tacan tucu űi can —catyŷ ra Pedro tsihin tandihŷ ra can naha ra.

¹² Tacan tan taxin űi cuvŷ tandihŷ ra naha. Tan tyaa soho ra naha tsa caahān ra Bernabé tan ra Pablo. Tyin nacatyŷ tuhun ra naha seűa tan tsa iyo tsa javahā Nyoo nu cahān ra naha tuhun ra nu yucú nyivi tsa űavin nyivi Israel cuvŷ. ¹³ Tsa ndihŷ cahān ra naha, quitsahā caahān ra Jacobo, tan catyŷ ra:

—Nyooho yaűi, tyaa soho ndo tsa cua cahān yu tsihin ndo. ¹⁴ Tsa catyŷ tuhun ra Simón Pedro tsihin yo nácaa quitsahā tsahā Nyoo tumañi iűi tsi űi tsa űavin nyivi Israel cuvŷ. Tyin nacatsŷ tucu ra tsi juhva űi tyin cuvŷ űi nyivi cuenda ra. ¹⁵ Tan ndu iin tuhun ihya tsihin tuhun tsa cahān ra cuvŷ ndusu yuhu Nyoo tahān tsanaha, tumaa cuhva nyaá maa nu tutu Nyoo nu catyŷ ra:

¹⁶ Yahā tandihŷ tuhun ihya tan cua quitsi nyico yu nu yucú ndo.

Quivŷ tsa tsicoo ra David, vaha xaan jacahnú nyivi tsi yu.

Maa tyin yahā can jandihŷ nyivi tsa jacahnú űi tsi yu.

Maa tyin cua quitsi nyico yu inga tsaha tan cua caűihŷ yu vehe űuhu ra David.

Tyin cua jacahnu nyico nyivi tsi yu.

¹⁷ Tyin tacan tan cuvŷ nanducu tandihŷ inga ca nyivi tsi yu,

tandihŷ űi tsa űavin nyivi Israel cuvŷ tan tsinú iűi tsi yu.

¹⁸ Tacan catyŷ Jutu Maűi yo, tan jacuahā ra tuhun ihya tsi nyivi tsicoo tahān tsanaha tan tsihin nyivi tsa iyó vityin.

¹⁹Yacan cuenda catyí yu tyin ña vaha tsa jatyañu yo tsi nyivi tsa ñavin nyivi Israel cuví, ñi tsa nacoq tuhun tsahnu ñi tan quihví ñi cuenda ra Cristo. Ña vaha catyí yo tyin cuñí tsi tsa tyaa yahví ñi ley tsahnu yo. ²⁰Vaha ñi maa tsihin tsa jacuhun yo carta tsi ñi. Tan catyí yo tsihin ñi tyin ña cua catsi ñi cuñu tsa tsahá cuenda nyivi tsi tsitoho. Tan ña cuví coo rayí tsihin ñaha tun ña tindaha ra. Tan ndi ñiñaha ña cuví coo ñi tsihin rayí tun ña tindaha ñi. Rayí tsa iyó ñasihi ña cuví coo ra tsihin inga ñaha, tacan tucu ñiñaha tsa iyó yí, ña cuví coo ñi tsihin inga rayí. Tan catyí tucu yo tsihin ñi quihví cuenda ra Cristo tan ñavin nyivi Israel cuví ñi tyin ña cua catsi ñi cuñu quiti tsa tsihí tsa cava ñi jucun tatan ña tsatí ñiñi ti. Tan ña cua catsi ñiñi quiti. ²¹Tyin nda tyembutahnu tan nda cuenda vityin iyó maa ra jacuahá ley Nyoo tsa tyaa ra Moisés vehe ñuhu nyivi Israel. Tan jacuahá ra naha tuhun can tan iin tan iin ñuu, tan tahan tahan una quivi, quivi tsa quitatú ñi —catyí ra Jacobo tsihin ra naha.

²²Tacan tan ra tava tyiñu ra Jesús tan ra cuví ityi nuu tsihin ñi vehe ñuhu tsihin tandihí ñi yihí cuenda ra Cristo, nacatsí ñi tsi taahan ra naha. Tan yahá can tan jacuhun ñi tsi ra naha tyin cuhun ra naha ñuu Antioquía tsihin ra Pablo tan ra Bernabé. Tan ra tsa natyiso ñi cuví ra: Judas tsa nañí Barsabás, tan ra Silas. Ra ícan cuví iin ra tsa nyiso tyiñu vehe ñuhu nda ñuu Jerusalén. ²³Tan tsihin ra naha jacuhun ñi iin carta. Tan catyí carta can tyehen:

“Nyuhu ra tava tyiñu ra Jesús, tan tsihin ra cuví ityi nuu tsihin ñi vehe ñuhu tan tsihin ra yañi ndo cuenda ra Cristo, tandihí ndi tsahá ndi nacumí tsi nyoocho tsa ñavin ra Israel cuví ndo. Tyin yañi ndi cuví tsi ndo vasu ñavin nyivi Israel cuví ndo. Tandihí nyoocho tsa iyó ndo ñuu Antioquía, tan nyoocho nyivi Siria, tan tsihin nyoocho nyivi Cilicia, jaquitsí ndi carta ihya tsi tandihí ñi ndo. ²⁴Tsitó ndi tyin quita taahan ra ityi nu yucú ndi ihya. Tan vatsí ra naha nu yucú ndo. Maa tyin ña catyí nyuhu tyin quitsi ra naha jatyañu ra naha tsi ndo. Tan nasamá ra naha cuhva tsicá iñi ndo tyin catyí ra naha tyin cuñí tsi tsa cunyaa tuñi Nyoo tsi ndo, tan naquihin vaha ndo ley Nyoo tsa tyaa ra Moisés. Maa tyin ñavin nyuhu cahán tsihin ra naha tyin quitsí cahán ra naha yacan tsihin ndo. ²⁵Yacan cuenda ndu iin ndi tan ndoo ndi tuhun cuenda tyiñu can tan tsicá iñi ndi tyin vaha tsa jaquitsí ndi tsi ra hermano ihya naha ra tsihin ra Pablo tan ra Bernabé nu yucú ndo. ²⁶Nduvi taahan ra ihya nyehé xaan ra naha tundoho tsa cuenda Jutu Mañi yo. Tan vasu cuñí nyivi cahí ñi tsi ra naha, maa tyin ña jandihí ra

naha tsa jacotó ra naha tuhun Jutu Mañi yo ra Jesucristo. ²⁷Yacan cuenda jaquitsí ndi tsi ra Judas tan ra Silas. Tan maa ra naha cua cahán ra naha tsihin yuhu ra naha tsihin ndo, tyin cua cuhva cuenda ra naha tandihí tsa tyaa ndi nu tutu ihya. ²⁸Tyin ndi Tatyí Ii Nyoo tan ndi nyuhu ña cuñí ndi tyiso ndi tundoho siqui ndo. Maa tyin ñiñi ca cuñí tsi tsa naquihin vaha ndo tuhun ihya: ²⁹Ña cua catsi ndo cuñu tsa tsahá cuenda nyivi tsi tsitoho. Tan ña cua catsi ndo ñiñi quiti, ndi cuñu quiti tsa tsihí tsa cava ñi jucun tan ña tsatí ñiñi ti. Ña caca nuu ndo tsihin ñaha. Tan nyoocho ñiñaha ña caca nuu ndo tsihin rayí. Tatan na quihin vahan ndo tuhun ihya, vaha xaan cua coo ndo. Tan Nyoo na ndoo ra tsihin ndo” catyí ra naha nu carta can.

³⁰Tan cuahán ra tsa jacuhun ra naha, tan tsaa ra naha ñuu Antioquía. Tan jandu iin ra naha tsi tandihí nyivi yihí cuenda ra Cristo tan nacuhva cuenda ra naha carta can. ³¹Tsa cahví ñi carta can, sií xaan cuñí ñi tyin vaha xaan caahán tsi. ³²Tan ra Judas tsihin ra Silas cuví tucu ra naha ndusu yuhu Nyoo. Tan jandu iin ra naha iñi nyivi can tsihin tsa cahán ra naha. ³³Tan tsa yahá tsiyucú ra naha juhva quivi tan cuanuhu nyico ra naha nda nu yucú nyivi tsa jacuhun tsi ra naha. Tan tandihí nyivi yihí cuenda ra Cristo ñuu Antioquía can catyí ñi tyin na cuhun vaha ra naha. ³⁴Maa tyin ra Silas catyí ra tyin cua ndoo ra. ³⁵Tan ra Pablo tsihin ra Bernabé ndoo tucu ra naha ñuu Antioquía can. Tan maa ra naha tsihin inga ca ra jañihí ca ra naha cahán ra naha tuhun Jutu Mañi yo tsihin nyivi can tan jacuahá ra naha tsi ñi.

Nu tsinu uvi tsaha cuahán ra Pablo tuhun Nyoo, tan nu quita tsiyo ra nuu ra Bernabé

³⁶Tan tsa yahá juhva quivi, tan cahán ra Pablo tsihin ra Bernabé:

—Cohon inga tsaha cunyehe yo nu yucú nyivi yihí cuenda Jutu Mañi yo ra Cristo tandihí ñuu nu cahán yo tuhun ra, tyin nyehe yo nácaa yucú ñi —catyí ra Pablo tsihin ra.

³⁷Tan ra Bernabé cuñí ra tsa cuhun nyico ra Juan Marcos tsihin ra naha. ³⁸Maa tyin ra Pablo ña taahán iñi ra tsa cuhun ra Juan tsihin ra naha, tyin nacoq ihí ñi ra tsi ra naha nda Panfilia quivi tsa tsahan ra tsihin ra naha. Tan ña tsahan ca ra tsijahá tyiñu ra tsihin ra naha. ³⁹Tan cahán yuhu tahan ra naha, tan ndusiin ra naha. Ra Bernabé cuahán ra tsihin ra Juan Marcos. Tan quihví ra naha tsitsi iin yutun ndoo tan cuahán ra naha ñuhu Chipre. ⁴⁰Tan ra Pablo nacatsí ra tsi ra Silas. Tan tsa yahá tsicán tahví ra hermano naha ra tsi Nyoo tsa cuenda ra naha tyin na jatinyee Nyoo tsi ra naha, tacan tan cuahán ra naha. ⁴¹Tan yahá ra

naha ñuu tsa cayucú Siria tan Cilicia, tan jandu iin ra naha iñi nyivi tsa yihí cuenda ra Cristo tan iin tan iin ñuu.

16

Nu cuahán ra Timoteo tsihin ra Pablo tan ra Silas

¹ Ra Pablo tsihin ra Silas tsaq ra naha ñuu Derbe, tan ñuu Listra. Tan ican nañihí ra naha tsi iin ra yihí cuenda ra Cristo. Nañi ra Timoteo. Tan sihi ra cuví ña iin ñaha Israel. Tan yihí ndihi ña cuenda ra Cristo. Maa tyin jutu ra, ra Grecia cuví ra. ² Tan ra Timoteo vaha xaan tsicá ra tuhun Nyoo, catyí nyivi yihí cuenda ra Cristo ñuu Listra tan ñuu Iconio. ³ Tan ra Pablo cuñi ra tsa cuhun ra Timoteo tsihin ra. Tan tyaq ra naha tuñi Nyoo tsi ra Timoteo jahá ra Pablo. Tyin coto ndasi cuñi nyivi Israel nyehe ñi tsi ra. Tyin tandihí ñi tsitó ñi tyin jutu ra cuví ra ra Grecia. ⁴ Tacan tan cuahán ra naha tan iin tan iin ñuu. Tan caahán ra naha tsihin nyivi yihí cuenda ra Cristo tsahá cuenda ra naha tuhun tsa tsahá ra tavá tyiñu ra Jesús tan tsihin ra cuví ityi nuu tsihin nyivi vehe ñuhu Jerusalén tsi ra naha. ⁵ Tacan tan ndu iin iñi nyivi yihí cuenda ra Cristo tan ñihi ca tsinú iñi tsi ra Cristo. Tan iin tan iin quivi tan cuahán nducuahá ca ñi.

Nu janahá Nyoo iin tsa janahá ra tsi ra Pablo cuenda iin ra Macedonia

⁶ Ña tsahá Tatyi Ii Nyoo tsa cahan ra naha tuhun Nyoo ñuu tsa cayucú Asia. Yacan cuenda yahá sava ra naha ñuhu cuenda Frigia tan Galacia. ⁷ Tan tsaq ra naha Misia. Tan cuñi ra naha cuhun ra naha Bitinia, maa tyin Tatyi Ii ra Jesucristo ña tsahá cuhun ra naha. ⁸ Tacan tan nda sava ñi yahá ra naha ñuu tsa cayucú Misia tan cuahán ra naha ñuu Troas tsa canyií yuhu ndutya ñuhu. ⁹ Tan yucú ra naha ñuu Troas can, tan iin tsacuaa nyehe ra Pablo iin tsa nyehe ra. Nyehe ra tsi iin rayií tsa iyó iin ñuu tsa canyií Macedonia. Nyaá nyityi ra nuu ra tan caahán ndaahvi ra tsihin ra, tan catyí ra: “Ñaha ihya, tyin jatinyee un tsi ndi” catyí ra. ¹⁰ Tan tsa nyehe ra Pablo can, yuhu ra Lucas tsihin ra Pablo tan inga ra janduvahá ndi tsi ndi tan cuahán ndi nda Macedonia can. Tyin tsitó vaha ndi tyin Nyoo cana ra tsi ndi, tyin cahan ndi tuhun ra nácaa jacacú ra tsi yo tsihin nyivi ityi can.

Nu nyií ra Pablo tsihin ra Silas ñuu Filipos

¹¹ Quihvi ndi iin yutun ndoo ñuu Troas. Tan cuahán ndoo ityi ñi ndi nda Samotracia, iin ñuhu luhlu tsa canyií mahñu ndutya ñuhu. Tan tsa inga quivi tsaq ndi ñuu Neápolis. ¹² Tan ican queq ndi tan cuahán ndi ñuu Filipos tsa cuví iin ñuu cuenda nyivi Roma. Tan cuví tsi iin ñuu cahnu ca tsa

nuu tandihí ñuu tsa cayucú Macedonia. Tan ican tsiyucú ndi taahan quivi. ¹³ Iin quivi tsa quitatú nyivi, tan quitá ndi ityi tsata ñuu, yatyin iin yutya nu tuhvá nyivi tsicán tahvi tsi Nyoo. Tsinyecú ndi, tacan tan cahan ndi tuhun Nyoo tsihin ñiñaha tsa ndu iin ican. ¹⁴ Iin ñaha nañi ña Lidia. Tan ñuu ña cuví Tiatira. Tan tuhvá ña xicó jahma vaha, tsa tunduhva. Yacan cuví tyiñu jahá ña. Tan jacahnú ña tsi Nyoo tumaa jacahnú nyivi Israel. Tan tsiñi ña tsa caahán ra Pablo. Tan Nyoo nuñá ra añima ña na tyaa yahvi ña tsa caahán ra. ¹⁵ Tan tsicoondutya ña tsihin nyivi ña. Tan yahá can tan cahan ndaahvi ña tsihin ndi, tan catyí ña:

—Tatun nyehe ndo tyin nditsa tsa tsinú iñi yu tsi Jutu Mañi yo, cõhon ndo, ndõgo ndo yuvehe yu —catyí ña tsihin ndi.

Tan jañiñi xaan ña tsi ndi na ndoo ndi yuvehe ña.

¹⁶ Tan cuví iin tsaha tsa cuahán ndi nu tsicán tahvi ndi. Tan tsitsi tsa cuahán ndi, tahañ ndi tsi iin ñaha tyuvaa tsa yihí tatyi ña vaha tsi. Yacan cuenda cuví nacoto ña náa ndihi tsa cua cuví ityi nuu. Tan iyó ra cuví tsitoho ña. Tan cuaha xaan xuhun jahá canaa ña tsa cuenda ra naha, tyin cuví nacotó ña. ¹⁷ Tan ñaha tyuvaa can quitsahá nyicún ña tsi ndi, nyuhu tsihin ra Pablo. Tan cana tsaa ña tan catyí ña:

—Rayií ihya ra jahá tyiñu tyiñu Nyoo cahnu, cuví ra naha. Tan caahán ra naha tuhun nácaa cuví cacu yo —catyí ña.

¹⁸ Cuaha quivi javahá ñaha tyuvaa can tacan. Tacan tan ra Pablo ña cunyeq ca iñi ra, tan nanyicõ coo ra tan catyí ra tsihin tatyi ña vaha tsa yihí tsi ña:

—Tsihin siwi ra Jesucristo, catyí yu tsihin un tyin quita un tsi ñaha tyuvaa ihya —catyí ra.

Tan nu tatyi ña vaha can quitá nu tsi ña juvin ñi cuhva can.

¹⁹ Maa tyin tsa nyehe ra cuví tsitoho ña tyin ña cua cuví ca jahá canaa ra naha xuhun tsihin ña, tiñ ra naha tsi ra Pablo tsihin ra Silas tan tsindaq ra naha tsi ra naha nda vehe tyiñu. ²⁰ Tan tsicán ra naha cuatyí tsaha ra naha nuu ra cumí tyiñu naha ra. Tan catyí ra naha:

—Ra Israel ihya cuaha xaan tsa caahán ra naha tsihin nyivi ñuu yo tan jatívi ra naha ñuu yo. ²¹ Tyin jacuahá ra naha iin cuhva tsa ña cuví coo yo, ndi ña cuví javahá yo tyin nyivi cuenda ñuu Roma cuví yo —catyí ra naha.

²² Tacan tan nduxaap nyivi tsi ra Pablo tan ra Silas. Tan ra cumí tyiñu can tsahnyá ra naha jahma ra Pablo naha ra tan tavá tyiñu ra cumí tyiñu na cañi ra vitya tsi ra Pablo naha ra tsihin yutun. ²³ Tsa yahá tsa cañi xaan ra naha tsi ra Pablo tan ra Silas, tan

tsindaca ra vitya can tsi ra naha vehe caa. Tan tava tyiñu ra vitya tsi ra jaha cuenda tsi ra naha. ²⁴ Quihñ ra cua jaha cuenda can tyiñu tan tyihñ ra tsi ra naha nda tsitsi cuii vehe caa. Tan tyihñ vaha ra tsaha ra naha tyañu vitu. ²⁵ Yahā can tan maa ñuu ra Pablo tan ra Silas quitsahā tsicān tahvi ra naha tsi Nyoo. Tan quitsahā tsitā xaan ra naha cantu Nyoo. Tan ra yucú vehe caa can naha ra tyaa soho ra naha. ²⁶ Tan saná iñi ra naha tan quitsi tsa taán ñihi xaan. Tan naquisi tsi tsaha vehe caa can, tan juvin ñi cuhva can tan nuñā tandihñ yuvehe, tan ndatsi cadena tsa yihí tsi tandihñ ra tsa yucú vehe caa can naha ra. ²⁷ Tan tsa ndoto ra tsa jahá cuenda vehe caa can, nyehe ra tyin ticohó tandihñ maa yuvehe can. Tacan tan tava ra mityi ra tyin cua cahñi ra tsi ra. Tyin tsicá iñi maa ra tyin tandihñ ra tsa yucú vehe caa can quita. ²⁸ Maa tyin ra Pablo canā tsaa ra tsi ra, tan catyí ra:

—Ñā cahñi un tsi un, tyin tandihñ ndi tan yucú ndi ihya —catyí ra tsihin ra.

²⁹ Tacan tan ra jahá cuenda vehe caa can tsicān ra ñuhñ. Tan tsinñ ra quihvñ ra nu yucú ra naha. Tan nihí ra tsihin tsa yuuhví ra. Tan tsicuiñi tsiti ra nuu ra Pablo tan ra Silas. ³⁰ Numi xaan tava ra tsi ra naha nu yucú ra naha ican. Tan tsicá tuhun ra tsi ra naha tan catyí ra:

—Nyooho tata, ¿nácaa javaha yu tan cacu yu? —catyí ra tsihin ra naha.

³¹ Tan ra Pablo tsihin ra Silas nacahñ ra naha tan catyí ra naha:

—Tsinu iñi tsi Jutu Mañi yo ra Jesucristo tan cacu un, maa un tan tsihin tandihñ nyivi un —catyí ra naha tsihin ra jahá cuenda vehe caa can.

³² Tan cahñ ra naha tuhun Jutu Mañi yo tsihin ra tan tsihin tandihñ nyivi tsa yucú yuvehe ra. ³³ Tan juvin ñi maa tsacuaa can ra jahá cuenda vehe caa can nacatyā ra nu uhvi nu cañi ra vitya tsi ra naha. Yahā can tan juvin ñi tsacuaa can tsicoondutyā ra tsihin tandihñ nyivi ra. ³⁴ Tacan tan tsindaca ra tsi ra naha nda vehe ra. Tan tsahā ra tsa catsi ra naha. Tan maa ra tsihin nyivi ra sii xaan cuñi ñi tyin tsinú iñi ñi tsi Nyoo. Tacan tan cuanuhñ ra Pablo tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

³⁵ Tsa tuvñ inga quivi tan tava tyiñu ra cumí tyiñu tsi ra vitya na cunyehe ra naha nu nyii ra jahá cuenda vehe caa can, tan catyí ra naha tyin na jaña ra tsi ra Pablo tsihin ra Silas. ³⁶ Tacan tan ra jahá cuenda vehe caa can catyí ra tsihin ra Pablo:

—Tsa tyiñu tsi yu jahā ra cumí tyiñu, tsa jaña yu tsi ndo. Yacan cuenda vityin tsa cuvñ quita ndo —catyí ra tsihin ra naha.

³⁷ Maa tyin ra Pablo catyí ra:

—Nyuhu tsa cuvñ ndi ra cuenda ñuu Roma cañi ra naha tsi ndi nu tuvi nyivi. Tan ndi ña tatsi tuñi ra naha tsi ndi tumaa cuhva taahán tsi. Tan tyihñ ra naha tsi ndi vehe caa. Tan vityin cuñi ra naha tava xeehe ra naha tsi ndi. Maa tyin ña cuñi ndi. Na quitsi tava maa ra naha tsi ndi —catyí ra Pablo tsihin ra jahá cuenda vehe caa can.

³⁸ Tan ra vitya nacatyí tuhun ra tsihin ra cumí tyiñu naha ra. Tan ra ican naha ra nayuhvñ xaan ra naha tsa tsito ra naha tyin ra cuenda ñuu Roma cuvñ ra Pablo. ³⁹ Tan tsahān ra cumí tyiñu naha ra tsindacañ ra naha tucahnu iñi nuu ra Pablo tan ra Silas. Tacan tan ra cumí tyiñu tava ra naha tsi ra Pablo naha ra tan caahán ndaahvi ra naha tsihin ra Pablo naha ra na quita ra naha ñuu can. ⁴⁰ Tan tsa quita ra naha vehe caa can, tsahān ra naha vehe ña Lidia. Tan yahā can tan tsinyehe ra naha tsi ra hermano naha ra tan jandu iñi ra naha iñi ra naha tan cuahán ra naha.

17

Nu quitsahā caahán yuhu tahan nyivi ñuu Tesalónica

¹ Nu cuahán ra Pablo tsihin ra Silas, yahā ra naha ñuu Anfipolis, tan ñuu Apolonia. Yahā can tan tsaa ra naha ñuu Tesalónica nu nyaá iin vehe ñuhu nyivi Israel. ² Tan tsahān ra Pablo vehe ñuhu can, tumaa cuhva tuhvá maa ra tsahán tan iin tan iin ñuu. Tan cahñ ra tuhun Nyoo tsihin nyivi tsicá vehe ñuhu can uñi taahan quivi quitatú ñi. ³ Tan cahvñ ra nu libru Nyoo tan tsahā cuenda ra tuhun ra Cristo tsi ñi nu catyí tsi tyin cua nyehe ra tundoho tan cua cúu ra. Yahā can tan cua nandoto ra. Tan catyí ra tsihin ñi:

—Ra Jesús tsa caahán yu tuhun tsihin ndo juvin ra cuvñ ra Cristo.

⁴ Tan juhva nyivi Israel can tsinñ iñi ñi tsa caahán ra. Tan ndu iñi ñi tsihin ra naha. Tan cuaha xaan nyivi Grecia tsa tuhvá jacahnú tsi Nyoo tan natsinñ ndihñ iñi ñi. Tan cuaha ñiñaha cuca tsa iyó ñuu can natsinñ ndihñ iñi ñi tsa caahán ra tuhun ra Cristo. ⁵ Maa tyin ra ñuu Israel tsa ña tsinú iñi, ndasi cuñi ra naha nyehé ra naha tyin cuaha xaan nyivi nyicun tsi ra Pablo. Tan jandu iñi ra naha tsi taahan ra caquiñi tsa tsicá nuu jutsan ñi maa. Tan quitsahā caahán yuhu tahan nyivi ñuu can jahā ra naha. Tan quihvñ ra caquiñi can vehe ra Jasón, tyin nanducú ra naha tsi ra Pablo tan ra Silas, tyin cuñi ra naha tsa quita ra Pablo naha ra. Tyin ra caquiñi can cuñi ra naha nacuhva cuenda ra naha tsi ra Pablo naha ra tsi nyivi. ⁶ Maa tyin tsa ña nañihñ ra naha tsi ra Pablo tan ra Silas ican, quihñ ra naha tsi ra Jasón. Tan ixta caa ra naha tsi ra. Tan quihñ ndihñ ra naha tsi taahan ca ra hermano tan cuahán ra naha

nuu ra cumí tyiñu ñuu can. Tan cana tsaa ra caquiñi can naha ra tan catyí ra naha:

—Ra ihya naha ra cuví ra tsicá nuu jasaná iñi tandihí nyivi naní cahnu ñuhu ñayivi. Tan vityin tsaa ndihí tucu ra naha ihya. ⁷ Tan ra Jasón can tsahá ra yuvehe ra na cuyucu ra naha. Tan tandihí maa ra naha tan ña tyaa yahvi ra naha tsi ra cuví rey cahnu nda ñuu Roma. Tyin catyí ra naha tyin iyó inga rey tsa nañí Jesús —catyí ra naha.

⁸ Tsa tsiñi nyivi tan ra cumí tyiñu tsa caahán ra caquiñi can naha ra quitsahá caahán yuhu tahan ñi. ⁹ Maa tyin ra Jasón tan inga ra naha tsahá ra naha xuhun tan jañá ra cumí tyiñu tsi ra naha.

Nu cuahán ra Pablo tsihin ra Silas ñuu Berea

¹⁰ Tan juvin ñi tsacuaa can jacuhun ra hermano naha ra tsi ra Pablo tsihin ra Silas ñuu Berea. Tan tsa tsaa ra naha, tsahán ra naha vehe ñuhu nyivi Israel. ¹¹ Tan nyivi Israel tsa iyó ñuu Berea can vaha ca nyivi cuví ñi tan ñavin ca nyivi ñuu Tesalónica tyin tsihin tsa ñi iñi ñi tan naquihín ñi tuhun Nyoo. Tan tandihí quivi nanducú ñi nuu tutu Nyoo, nyehé ñi tatun nditsa tsa caahán ra Pablo. ¹² Yacan cuenda cuaha xaan ñi natsinu iñi ñi tsi ra Cristo tsihin tucu nyivi Grecia tahan ñi ñiñaha cuca tan rayi naha ra. ¹³ Maa tyin tsa tsito ra Israel tsa iyó ñuu Tesalónica tyin ra Pablo nyii ra Berea caahán ra tuhun Nyoo, tan cuahán ra naha tan natyuhu ra naha tsi nyivi Berea can. ¹⁴ Maa tyin ra hermano numi ñi jacuhun ra naha tsi ra Pablo nda ityi yuhu ndutya ñuhu. Maa tyin ra Silas tsihin ra Timoteo ndog ra naha ñuu Berea. ¹⁵ Tan ra tsa cuahán tsihin ra Pablo tsindacá ra naha tsi ra nda ñuu Atenas. Tacan tan cuanuhu ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa cahán ra Pablo tsihin ra naha, tyin na janumi ra naha tan cuhun ra naha nu nyii ra.

Nu nyii ra Pablo ñuu Atenas

¹⁶ Tsitsi tsa ndatú ra Pablo tsi ra Silas tan ra Timoteo ñuu Atenas can, ndasi cuñi añima ra tsa nyehé ra tyin cuaha xaan tsitoho iyó ñuu can. ¹⁷ Yacan cuenda cahán ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandihí quivi caahán ra tsihin nyivi tsa cuahán nuyahvi. ¹⁸ Tan ñihí tahan ra tsihin nyivi tsa cahvi tuhun tsa jacuahá nyivi tsa nañí epicúreo. Tan ñihí tahan tucu ra tsihin nyivi tsa cahvi tuhun tsa jacuahá nyivi tsa nañí estoico. Tan cahán ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahan ra tsihin yo? —catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahán ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyivi tatun cua cúu ñi. ¹⁹ Tacan tan tsindacá ra naha tsi ra Pablo iin nu nañí Areópago, nu tuhvá ra cumí tyiñu naha ra ndu iin. Tan catyí ra naha tsihin ra:

—Cuñí ndi coto ndi tuhun tsaa tsa jacuahá un. ²⁰ Tyin jacotó un tuhun tsa ña tsitó ndi. Tan cuñi tucu ndi coto ndi náa cuñi tsi catyí tandihí tuhun ihya —catyí ra naha tsihin ra.

²¹ Tyin tandihí nyivi Atenas tan nyivi inga ñuu tsa iyó ícan taahán xaan iñi ñi tyaa soho ñi tan nacatyí tuhun ñi náa ndihí tuhun tsaa.

²² Tacan tan ra Pablo nduvitá nyityi ra tyañu nu yucú ra naha nu cuví Areópago, tan catyí ra:

—Nyooho ra ñuu Atenas, yuhu nyehé yu tyin cuaha xaan nyoo jacahnú ndo. ²³ Tyin tsahan yu tsinyehé yu nu tuhvá ndo ndu iin. Tan nyehé yu iin altar nu nyaá letra tsa catyí tyehen: “Tsehe cuví cuenda Nyoo tsa ña nacotó yo” catyí letra can. Nyooho jacahnú ndo tsi Nyoo tsa ña nacotó ndo. Juvin Nyoo can cuví tsa caahán yu tuhun tsihin ndo. ²⁴ Nyoo tsa javahá ñuhu ñayivi tan tandihí tsa iyó nu ñuhu ñayivi ihya, tsii maa ra cuví andivi tan ñuhu ñayivi. Tan ña iyó ra tsitsi vehe ñuhu tsa javahá nyivi.

²⁵ Tan ña nyitá iñi ra tsa jatyinyeé nyivi tsi ra. Tyin maa ra tsahá ñayivi coo tandihí yo. Tan tsahá ra tatyí tsa ixtá tatyí yo. Tan maa ra tsahá tandihí tsa tsiñi ñuhu tsi yo.

²⁶ Javahá Nyoo tsi intuhun rayi. Tan tsa yahá can tsicoo cuaha nyivi tata ra. Tan maa ra naha cuví tsi tsahnú tandihí yo. Yacan cuenda intuhun ñi ñiñi nyisó tandihí yo. Tan tsahá Nyoo tsa coo yo naní cahnu ñuhu ñayivi. Tsa ndi cumañi ca coo yo tan catyí ra náa cuiya coo intuhun intuhun yo nu ñuhu ñayivi ihya. Tan catyí tucu ra maa nda cua coo intuhun intuhun yo. ²⁷ Tacan javahá ra tyin na quitsaha nanducu yo tsi ra. Tumaa iin ra cuaa nanducú tsihin ndaha ra tsa nanducú ra, tacan cua nanducu yo tsi ra tan cua nañihí yo tsi ra tyaa ra cuhva. Vasu ndi maa ña cañi nyaá ra tsihin intuhun intuhun yo. ²⁸ Tyin iyó yo tan candá yo jahá maa ra. Tumaa catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra. ²⁹ Tatun tata Nyoo cuví tsi yo, ña taahán tsi caca iñi yo tyin Nyoo cuví ra iin tsitoho tsa tsinu tsihin xuhun cuaan, a xuhun cuitsin, a tsihin yuu vaha. Tan ndi ñavin Nyoo tsa tsinu tsihin tsa tsiñituñi iñi nyivi cuví ra.

³⁰ Tahan tsanaha Nyoo ña cuxaan ra tsi nyivi tsa tsicá iñi tacan tyin ña tsitó ñi náa tsa javahá ñi. Maa tyin vityin catyí ra tsihin nyivi tandihí ñi ityi tyin na ndu uvi iñi ñi cuatyí ñi tan na nasama ñi cuhva iyó ñi.

³¹ Tyin tsa tyaq ra cuhva tyin cua coo iin quivi tsa cua tatsi tuñi ra tsi nyivi iyó nu ñuhu ñayivi. Tan tsa cua tsa quivi can, ra tsa nacatsi vaha maa ra cua tatsi tuñi tsi ñi jaha ra. Tan tsa janahá ra tsi yo tyin nditsa tsa ra ihya cua tatsi tuñi tsi nyivi, tyin janandoto ra tsi ra can nu tsihi ra —catyí ra Pablo.

³² Tsa tsiñi nyivi tuhun tsa nandotó nyivi tsa tsihi, yihí ñi tsacú nducu ñi, tan yihí tucu nyivi catyí ñi:

—Quitsi un inga tsaha tan cahan un tuhun ihya tsihin ndi —catyí ñi.

³³ Tacan tan cuahán ra Pablo. ³⁴ Maa tyin yihí ñi ndu iin ñi tsihin ra, tan natsinu iñi ñi tsi ra Cristo. Tan iin ra tsa natsinu iñi, nañi ra Dionisio, tan cuví ra iin ra cumí tyiñu tsa tuhvá ndu iin nda Areópago can. Tan iin ñaha tsa nañi Dámaris natsinu ndihi tucu iñi ña, tan tsihin inga ca ñi.

18

Nu nyii ra Pablo ñuu Corinto

¹ Yahá can tan quita ra Pablo ñuu Atenas tan cuahán ra ñuu Corinto. ² Tan ican nañihi ra tsi iin ra Israel tsa nañi Aquila. Tan ñuu Ponto cacu ra. Tan maa ra tsihin ñasihi ra, ña Priscila, quita ñi Italia nu tsicoq ñi, tyin ra Claudio, ra cuví rey cahnu ñuhu can, tava ra tsi tandihi nyivi Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto. ³ Tan iin ñi tyiñu javahá ra tsihin ñi. Javahá ñi vehe jahma. Tan ndoo ra tsihin ñi tyin jahá tyiñu ra iin caa ñi tsihin ñi. ⁴ Tan quivi quitatú nyivi Israel tahan iin vitya, ra Pablo cuahán ra vehe ñuhu ñi. Tan natuhún tahan ra tsihin nyivi Israel tan tsihin nyivi tsa ñavin nyivi Israel cuví. Tyin nducú ra cuhva tsa sinu iñi ñi tsi ra Jesucristo.

⁵ Tan quivi tsaq ra Silas tan ra Timoteo tsa quee ra naha Macedonia, ra Pablo nacoo ra tyiñu jahá ra tan intuhun ña tyiñu tsa caahán ra tuhun Nyoo jahá ra. Tan caahán catsi ra tsihin nyivi Israel tyin ra Cristo, tsa ndatú xaan ñi, juvin ra cuví ra Jesús. ⁶ Maa tyin ñi ican xaan cuñi ñi. Tan quitsaha caahán ñi ndavaha ñi siqui Jutu Mañi yo. Tacan tan ra Pablo naquisi ra jahma ra tumaa iin seña tyin cua ndoo cuatyí ñi siqui ñi. Tan catyí ra tsihin ñi:

—Cuatyí maa ndo cuví tatun cuhun ndo anyaya. Ñavin ca cuatyí yuhu tyin tsa cahan yu tsihin ndo tan maa ndo ña tsiñi iñi. Vityin tan ityi nuu ca cua cuhun yu cahan yu tuhun ihya tsihin nyivi tsa ñavin nyivi Israel cuví —catyí ra tsihin ñi.

⁷ Tan quita ra vehe ñuhu can. Tan cuahán ra vehe ra tsa nañi Justo, iin ra tsa jacahnú tsi Nyoo. Tan yatyin ñi vehe ñuhu can nyaá vehe ra. ⁸ Tan iin ra tsa nañi Crispo, ra cuví ityi nu vehe ñuhu can, natsinu iñi ra tsi Jutu

Mañi yo tan tacan tucu tandihi nyivi ra. Tan cuaha ca nyivi iyó ñuu Corinto can, tsa yaha tsa tsiñi ñi tsa caahán ra Pablo, natsinu iñi ñi tsi ra Jesús, tan tsicoondutya ñi. ⁹ Tacan tan iin tsacuaa nyehé ra Pablo iin tsa janahá Nyoo tsi ra. Tan cahan Jutu Mañi yo tsihin ra, tan catyí ra:

—Ña nayuhvi un. Jañihi ca cahan un tuhun yu tan ña jandhi un tsa cahan un. ¹⁰ Tyin yuhu nyaá yu tsihin un, tan yofi cuví javahá tsa caquiñi tsi un. Tyin cuaha xaan nyivi yu iyó ñuu ihya tan nyaá cua jacacu yu tsi ñi —catyí Jutu Mañi yo tsihin ra Pablo.

¹¹ Yacan cuenda ra Pablo ndoo ra iin cuiya sasava ñuu Corinto can, jacuahá ra tuhun Nyoo tsi nyivi.

¹² Maa tyin quivi tsa ndacá ñaha ra Galión tsi nyivi ñuu tsa cayucú Acaya, ndu iin ra Israel naha ra siqui ra Pablo. Tan tsican ra naha cuatyí tsaha ra nuu ra Galión. ¹³ Tan catyí ra naha tsihin ra Galión can:

—Ra ihya natyuhú ra tsi nyivi na jacahnu ñi tsi Nyoo iin cuhva tsa ñavin cuhva catyí ley —catyí ra naha.

¹⁴ Tacan tan cuhva tsa cua nacahan ra Pablo, tan nacahan ñi ra Galión, tan catyí ra tsihin ra Israel can naha ra:

—Nyoocho ra Israel, cuví jandaa yu cuatyí ra tatun cuatyí cahnu o cuatyí ndiyi cuví. ¹⁵ Maa tyin maa ñi maa tuhun caahán cuví tuhun ihya. Tan yuhu ña cuñi yu jandaa yu tyiñu ihya, tan inga tucu tuhun tyin cuenda ley maa ndo cuví. Nyehe maa ndo. Jandaa maa ndo tyiñu tyin yuhu ña cuñi yu cuví yu juez tsa cuenda tuhun ihya —catyí ra Galión can tsihin ra naha.

¹⁶ Tan tava ra tsi ra Israel naha ra nu cuví vehe tyiñu ra. ¹⁷ Tacan tan tandihi ra Grecia tiin ra naha tsi ra Sôstenes, ra cuví ityi nu vehe ñuhu nyivi Israel. Tan cañi ra naha tsi ra juvin ñi maa nuu ra Galión, ra yihí ndaha tsi nyivi Acaya. Tan ra Galión can ña cahan maa ra.

Nu cuanuhú ra Pablo ñuu Antioquia tan cuahán ra tsa sinu uñi tsaha cua cahan ra tuhun Nyoo

¹⁸ Tan ra Pablo ndoo ra ñuu Corinto can cuaha quivi. Yahá can tan catyí ra tsihin ra hermano naha ra tyin tsa cua cuhun ra. Tan cuahán ra Aquila tan ña Priscila tsihin ra. Tacan tan tsaq ñi ñuu Cencrea. Tan ra Pablo xatyá ndii ra jiñi ra tumaa iin seña tyin tsa yaha javahá ra tsa catyí ra tyin cua javaha ra nuu Nyoo. Tacan tan quihvi ñi tsitsi iin yutun ndoo tsa cuahán nda Siria. ¹⁹ Tan tsa tsaq yutun ndoo can nda ñuu Éfeso, quita ñi. Tan ra Aquila tsihin ña Priscila ndoo ñi ican. Tan ra Pablo cuahán ra vehe ñuhu nyivi Israel, tan cahan ra tsihin nyivi tsa ndu iin ican. ²⁰ Tan cahan ndaahvi ñi tsihin ra tyin na ndoo ra taahan ca quivi tsihin ñi.

Maa tyin ña cuñí ra. ²¹ Tan catyí ra tsihin ñi tyin tsa cuahán ra, tan catyí tucu ra tyehen:

—Cuñí tsi tsa cuhun yu ñuu Jerusalén tyin jacahnu yu vico tsa vatsí tahan. Maa tyin tatun Nyoo cuñí, cua quitsi yu inga tsaha nu yucú ndo —catyí ra tsihin ñi.

Tacan tan cuahán ra, quihví ra tsitsi iin yutun ndoo tsa cuahán nda Siria. ²² Quivi tsa tsaa nyico ra ñuu Cesarea cuenda Siria, tsahan ra ñuu Jerusalén tsicuhva ra nacumi tsi nyivi yihí cuenda ra Cristo tsa iyó ican. Yahā can tan cuahán nyico ra ñuu Antioquía. ²³ Tan tsa yahā tsinyi ra juhva quivi ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iin ra iñi tandihi nyivi yihí cuenda ra Cristo.

Nu caahán ra Apolos tuhun Nyoo ñuu Éfeso

²⁴ Quivi can tsaa iin ra Israel ñuu Éfeso. Nañi ra Apolos, tan ñuu ra cuví Alejandría. Tan vaha xaan caahán ra tuhun Nyoo. Tan tsitó xaan ra tuhun Nyoo tuhun tsahnu tsa nyaá nu libru. ²⁵ Tan vaha xaan cutuhva ra tuhun Jutu Mañi yo. Tan caahán ra tsihin tsa ñi iñi ra. Tan catsi xaan jacuahá ra tuhun ra Jesús. Vasu cuhva tsa jacoondutya ra Juan ñi tsitó ra. ²⁶ Tan quitsahā caahán ra tsitsi vehe ñuhu tsihin tsa ñi iñi ra. Tan cuhva tsa tsiñi ra Aquila tan ña Priscila, tavā siin ñi tsi ra tan tsahā cuenda vaha ca ñi tuhun Nyoo tsi ra. ²⁷ Tacan tan quitsahā cuñi ra Apolos cuhun ra ityi Acaya. Tan ra hermano jatinyee ra naha tsi ra. Tan jacuhun ra naha iin carta tsi nyivi yihí cuenda ra Cristo ityi can, tan catyí ra naha tsihin ñi tyin na vaha cahan ñi tsihin ra Apolos nu cua tsaa ra. Tacan tan cuahán ra. Tan cuhva tsa tsaa ra Acaya can, jatinyee xaan ra tsi nyivi yihí cuenda ra Cristo, ñi tsa natsinū iñi tsa cuenda tumañi iñi tsa javahā Nyoo tsi ñi. ²⁸ Tyin nu tuvi nyivi ñihi xaan cahan yuhu ra Apolos tsihin ra Israel naha ra tyin cuhva tsinū iñi nyivi Israel, ña nditsa. Tan jacuahā ra tsa catyí nu tutu Nyoo tyin ra Cristo, ra tsa ndatú xaan ñi, juven ra cuví ra Jesús.

19

Nu cuahán nyico ra Pablo ñuu Éfeso

¹ Tsitsi tsa nyií ra Apolos ñuu Corinto, ra Pablo yahā ra ityi yucu tan tsaa ra nda ñuu Éfeso. Tan ican nañihí ra tsi taahan ra yihí cuenda ra Cristo. ² Tan tsicā tuhun ra tsi ra naha:

—¿A naquihin ndo Tatyí Ii Nyoo quivi tsa natsinū iñi ndo? —catyí ra Pablo tsihin ra naha.

Tan nacahan ra naha tan catyí ra naha:

—Ndi luxu ña tsitó ndi tsa iyó Tatyí Ii Nyoo.

³ Tacan tan ra Pablo tsicā tuhun ra tsi ra naha:

—¿Nacaa tsicoondutya ndo? —catyí ra.

Tan nacahan ra naha tan catyí ra naha:

—Cuhva tsa jacoondutya ra Juan, tacan tsicoondutya ndi —catyí ra naha.

⁴ Tacan tan catyí ra Pablo tsihin ra naha:

—Ra Juan jacoondutya ra tsi nyivi tsa ndu uví iñi cuatyí. Maa tyin catyí tucu ra tsihin ñi tyin cuñí tsi tsa tsinu iñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

⁵ Tsa tsiñi ra naha tsa cahan ra Pablo tuhun ihya, tacan tan tsicoondutya ra naha inga tsaha tsihin sivi Jutu Mañi yo Jesús.

⁶ Tan tsa tyiso ndaha ra Pablo jiñi ra naha, tacan tan naquihin ra naha Tatyí Ii Nyoo. Tan quitsahā caahán ra naha inga yuhu. Tan tsahā cuenda ra naha tuhun tsa tsahā Tatyí Ii Nyoo tsi ra naha tsi nyivi. ⁷ Tan tsa tandihi ra naha quitā maa utsi uvi taahan ra naha.

⁸ Tan tsitsi tsa uñi yoo tsicā ra Pablo vehe ñuhu nyivi Israel ñuu Éfeso, tan caahán ra tuhun ra Cristo tsihin tsa ñi iñi ra. Tan jacuahā ra tsi ñi na nacuhva ñi tsi ñi tsi Nyoo na cundaca ñaha ra tsi ñi. ⁹ Maa tyin yihí ñi jandava ñi añima ñi, tan ña cuñí ñi tsinu iñi ñi. Tan caahán ñi ndavaha ñi siqui tuhun ra Cristo nuu nyivi, tan catyí ñi tyin ña vaha ityi ra Jesús. Tacan tan ra Pablo catsiyo nyaha ra nu yucú ñi. Tan tsindacā ra tsi ñi tsinū iñi tsi ra Cristo nda iin escuela ra tsa nañi Tiranno. Tan ican caahán ra tuhun ra Cristo tsihin nyivi tandihi quivi. ¹⁰ Tan tacan ñi tsicā ra tsitsi tsa uvi cuiya. Tan tandihi nyivi tsa iyó ñuu tsa cayucú Asia, tsiñi ñi tuhun Jutu Mañi yo ra Jesús, tahan ñi nyivi Israel tan nyivi tsa ñavin nyivi Israel cuví. ¹¹ Tan nahnu tsa iyo javahā ra Pablo jahā Nyoo. ¹² Tyin nda cuanda jahma tsa tñin ra Pablo tan tsindacā ñi tsi nyivi tan quitā cuehe tsi ñi, tan quitā ndihi tucu tatyí ña vaha tsi ñi.

¹³ Tan iyó juhva ra Israel tsa tsicā nuu tan iin tan iin ñuu tavā ra naha tatyí ña vaha tsi nyivi. Tan cuñí ra naha cuatyíñu ra naha sivi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sivi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.

¹⁴ Tacan javahā tsa utsa taahan sehe iin ra Israel tsa nañi Esceva. Tan ra Esceva can cuví ra iin ra cuví ityi nuu tsihin ra jutu. ¹⁵ Tan tsa cahan ra can naha ra tsihin nu tatyí ña vaha, nacahan nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan ¿yóo ra cuví tucu nyoocho?

—catyí nu tatyí ña vaha can tsihin sehe ra Esceva naha ra.

¹⁶ Tacan tan ra tsa yihí tatyí ña vaha can ndava ra siqui ra can naha ra. Tan tsihin tsa cuaha tunyee iñi nu tatyí ña vaha can tan cuví cunye ra tiñi tahan ra tsihin tandihí ra can naha ra. Tan tsahnyá cuatyí ra jahma ra naha. Tan jañicuehe ra tsi ra naha. Tan jacuhun tandihí ra tsi ra naha jahá nu tatyí can. ¹⁷ Tacan tan tandihí nyivi Éfeso, tahan ñi nyivi Israel, tan nyivi tsa ñavin nyivi Israel cuví, tsito ñi tuhun can. Tan yuuhi xaan ñi cuví. Tan jacahnú ñi sivi Jutu Mañi yo Jesús.

¹⁸ Tan cuaha xaan nyivi tsa natsinu iñi tsi ra Jesús cuahán ñi cuanahmá ñi cuatyí ñi nuu ra tan nuu nyivi, tandihí maa tsa ña vaha tsa icá ñi tahan tsanaha. ¹⁹ Tan cuaha ñi tsa cahví tuhun tasi, tsindacá ñi libru ñi. Tan tsahmí ñi libru can nu tandihí nyivi. Tan tava cuenda ñi nácaa yahvi libru can. Tan yahvi tsa tandihí libru can quita tsi uvi xico utsi mil xuhun cuitsin. ²⁰ Tan tacan ñi tan cuahán nducuahá ca nyivi tsa yihí cuenda Jutu Mañi yo. Tan tacan nyehé nyivi tyin cahnu xaan tunyee iñi iyó tsi ra.

²¹ Tan tsa yahá tuhun ihya, ra Pablo tyaa ra cuhva tsa cuhun ra ñuu tsa cayucú Macedonia tan Acaya. Yahá can tan cua cunuhu ra nda ñuu Jerusalén, tyaa ra cuhva. Tan catyí ra tyin yahá can tan cuñi tsi tsa cuhun ra nda ñuu Roma. ²² Tacan tan jacuhun ra tsi uvi taahan ra jatinyee tsi ra nda Macedonia, ra Timoteo tan ra Erasto. Maa tyin tsitsi tsa cuahán ra can naha ra, ndoo maa ra Pablo juhva ca quivi Asia can.

Nu quitsahá cuvaá nyivi Éfeso

²³ Tan juvin ñi quivi can quitsahá cuvaá nyivi ñuu Éfeso tsa cuenda tuhun Nyoo, ²⁴ tyin iin ra tsa nañi Demetrio natyuhu ra tsi ñi. Tyin maa ra tuhvá ra jahá tyiñu tsihin xuhun cuitsin. Javahá ra tsa cuví vehe ñuhu nyihi tsitoho Diana tsihin xuhun cuitsin can. Tan cuaha xuhun jahá canaa ra tan tsihin ra jatinyee tsi ra. ²⁵ Tan cana ra Demetrio can tsi ra tsa jahá tyiñu tsihin ra. Tan cana tucu ra tsi ra tsa jahá tyiñu iin ñi tyiñu can naha ra. Tan catyí ra tsihin ra naha:

—Nyooho tata, tsitó ndo tyin tsihin tyiñu ihya tan iyó vaha xaan yo. ²⁶ Maa tyin nyooho nyehé ndo tan tsiñi ndo nácaa javahá nu Pablo can ñuu yo ihya, tan tandihí ñuu tsa cayucú Asia ihya. Tyin catyí nu tyin tsitoho tsa javahá yo tan tsa javahá inga ca nyivi ñavin Nyoo cuví can. Tan cuaha xaan nyivi tsinú iñi tsa caahán nu. ²⁷ Tan ña vaha tsa javahá nu tyin ña cua cuyahvi ca tsitoho tsa javahá yo. Tan inga tucu tuhun, ña cua jacahnu ca nyivi tsi nyoo Diana tan ña cua jacahnu ñi vehe ñuhu ña, tan ña vaha tacan, tyin ñaha can cahnu xaan cuví ña.

Tan tandihí nyivi ñi cahnu Asia tsihin nyivi nanii cahnu ñuhu ñayivi jacahnú ñi tsi ña. Tan nu cuahán ca tsi quivi ña cua jacahnu ca ñi tsi ña tatun tsinú iñi ñi tsa caahán nu Pablo —catyí ra Demetrio.

²⁸ Tan cuhva tsa tsiñi ra naha tsa cahan ra, xaan xaan cuñi ra naha. Tan quitsahá caná tsaa ra naha tan catyí ra naha:

—Cahnu xaan cuví ña Diana tsa cuví ña nyoo cuenda yo tsa cuví yo nyivi Éfeso ihya —catyí ra naha.

²⁹ Tan cuvaá tandihí nyivi ñuu can. Tan tiñi ñi tsi ra Gayo, tan tsihin ra Aristarco, uvi taahan ra tsa quee Macedonia tan tsicá ra naha tsihin ra Pablo. Tan tandihí ñi can ixtá caa ñi tsi ra naha nda cuenda nu tuhvá ñi ndu iin. ³⁰ Tan ra Pablo cuñi ra quihvi ra nu yucú ñi tyin cahan ra tsihin ñi. Maa tyin ra hermano ña tsahá ra naha tsa cuhun ra. ³¹ Tan tacan tucu taahan ra cumí tyiñu cuenda Asia. Ra vaha iñi tsi ra Pablo cuví ra naha, tan tava tyiñu ra naha tsi ra tyin ña taahán tsi tyihi ra tsi ra iñi. ³² Tan nu ndu iin nyivi iñi, juhva ñi caná tsaa iin tuhun, tan inga ñi caná tsaa inga tuhun, tyin cuvaá ñi. Tan cuaha xaan ñi ndi ña tsitó ñi nacuenda yucú ñi iñi. ³³ Tacan tan nyivi Israel tava tyiñu ñi tsi iin ra tsa nañi Alejandro na yaha ra ityi nuu. Tan juhva ñi tsa yucú iñi, tsahá cuenda ñi tsi ra nácaa cua cahan ra. Tacan tan javahá ra seña tsihin ndaha ra tyin na cutaxin ñi tyin cuñi ra cahan ra tyin nduve cuatyí nyivi Israel. ³⁴ Maa tyin cuhva tsa tsitó nyivi tyin ra Israel cuví ra, tandihí maa ñi caná tsaa ñi. Tan tsitsi tsa uvi hora caná tsaa ñi, tan catyí ñi:

—Cahnu xaan cuví ña Diana, tsa cuví ña nyoo cuenda yo tsa cuví yo nyivi Éfeso —catyí ñi, caná tsaa ñi.

³⁵ Tacan tan ra secretario ñuu can cuví jacutaxin ra nyivi, tan caahán ra tsihin ñi, tan catyí ra:

—Nyooho nyivi ñuu Éfeso ihya, tandihí nyivi tsitó ñi tyin nyaá tsi siqui yo tsa jahá cuenda yo vehe ñuhu ña Diana, tyin cahnu xaan cuví ña. Tan jahá cuenda yo tsitoho ña tsa quee andivi tan nacava nu ñuhu ihya. ³⁶ Tan yoñi cuví catyí tyin ña nditsa. Taxin ñi ndo, tan ña ica ndo tatun ña tsitó ndo náa tsa cua javaha ndo. ³⁷ Tyin ra tsa tsindacá ndo ihya nduve náa tsa suhu ra naha vehe ñuhu yo. Tan ndi ña caahán ra naha ndavaha ñi siqui nyoo yo. ³⁸ Tatun ra Demetrio tan ra tsa jahá tyiñu tsihin ra, tsicán ra naha cuatyí tsaha iin ra, na cuhun ra naha nu nyaá ra juez. Cuví ndacan ra naha cuatyí nuu ra can, tan maa ra cuví jandaa ra cuatyí can. ³⁹ Tan tatun inga tuhun tsicán ndo, cuñi tsi tsa ndaca ndo can tsi ra cumí tyiñu, tumaa cuhva catyí ley. ⁴⁰ Tyin tatun coto ra ndacá ñaha tan cana ra tsi yo tsa cuenda tsa cuví

ihya, tan ña cua ñihi yo tuhun cahan yo tatun ndaca tuhun ra tsi yo nacuenda cuvaá yo—catyí ra cuví secretario can.

⁴¹ Tan tsa yaha cahan ra, tacan tan catyí ra tyin na cunuho ñi nda yuvehe ñi.

20

Nu yaha ra Pablo Macedonia tan cuahan nyico ra nda Grecia

¹ Tsa yaha tsa cuvaá nyivi ñuu Éfeso can, cana ra Pablo tsi tandihi nyivi tsa yihí cuenda ra Cristo, tyin cahan ra juhva tsihin ñi tan cuhva ra tunyee ñi tsi ñi, tyin tsa tsaá quivi tsa cua cuhun ra inga ñuu. Tan cahan ra tsihin ñi. Tacan tan cuahan ra Macedonia. ² Tan tsahan ra tandihi ityi can tan tsihin tuhun caahan ra jandu iin ra ñi tandihi nyivi yihí cuenda ra Cristo tsa iyó ityi can. Tacan tan tsaá ra ityi Grecia. ³ Tan ican ndoo ra uñi yoo. Tan tsa nyaá tsa cua quihin ra yutun ndoo tan cuhun ra Siria, tan tsito ra tyin nducú nyivi Israel tsi ra tyin cua cahñi ñi tsi ra. Yacan cuenda tyaa ñi ra tsa cua cuhun ra tsihin tsaha ra ityi nu ñuhu, tan cua yaha nyico ra inga tsaha ityi Macedonia. ⁴ Tan cuahan ra Sópater, ra ñuu Berea tsihin ra. Tan cuahan ndihi ra Aristarco tan ra Segundo. Tan uvi taahan ra ihya, Tesalónica cuví ñuu ra. Tan cuahan ndihi ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Trófilo. ⁵ Ra hermano ihya yaha ra naha ityi nuu tan ndatú ra naha tsi ndi nda ñuu Troas. ⁶ Tan nyuhu ndatú ndi nda tsa yaha vico pascua nu tuhvá nyivi Israel tsatsi paan tsa nduve yutsan iya yihí. Tacan tan quee ndi ñuu Filipos tsihin yutun ndoo. Tan nu tsinu uhun quivi tan titahan ndi tsihin ra tsa cuahan ityi nuu nda ñuu Troas naha ra. Tan ican ndoo ndi utsa quivi.

Nu caahan ra Pablo tuhun Nyoo ñuu Troas

⁷ Tan tsa cuví tumingu can ndu iin ndi tsihin nyivi yihí cuenda ra Cristo ñuu Troas can. Tan quivi can cua catsi ndi paan tan coho ndi vinu tyin nducuhun ñi ndi tyin tsihi ra Cristo tsa cuenda cuatyí yo. Tan ra Pablo caahan ra tsihin ñi, tan tahañ ñuu, tyin tsa nyaá tsa cuhun ndi inga quivi can. ⁸ Yucú ndi iin cuarto nu tsinu uñi pisu. Tan nditsin xaan nu yucú ndi tsitsi vehe can tyin cuaha xaan ñuhu candili cayú. ⁹ Tan iin ra tyuvaa tsa nañi Eutico nyaá ra ventana tyaa soho ra, maa tyin ña cunye ñi ra ñumaahna, tyin ra Pablo, naha xaan caahan ra. Quixi ra Eutico, tan ña tsito ra canacava ra. Quee ra nda nu tsinu uñi pisu tan canacava ra nda nu ñuhu. Tan cañihí ra hermano naha ra tsi ra, maa tyin tsa tsihi ra. ¹⁰ Tacan tan ra Pablo nuu ra tan tsaá ra nu canyii ra tyuvaa

can. Tan tyihí jucun ndaha ra tsi ra tyuvaa can, tan catyí ra tsihin tandihi ra hermano naha ra:

—Ña nayuhvi ndo, tyin ra ihya nyito ra—catyí ra.

¹¹ Tacan tan ndaa nyico ra Pablo tan tsatsi ndi paan tan tsihi ndi vinu. Tan ra Pablo caahan ca maa ra tuhun Nyoo nda cuanda cunditsin. Tsahan cuahan ra. ¹² Tan ra tyuvaa can nandoto ra tan cuanuho ra nda yuvehe ra. Tan sii xaan cuñi ñi cuví.

Nu quita ra Pablo ñuu Troas tan cuahan ra nda ñuu Mileto

¹³ Nyuhu yaha ndi ityi nuu tan cuahan ndi tsihin yutun ndoo nda ñuu Asón. Tyin ican cua ñihi tahañ ndi tsihin ra Pablo, tyin tacan jandaa maa ndi tyiñu tsihin ra, tyin maa ra cuñi ra cuhun ra ityi nu ñuhu tsihin tsaha ra. ¹⁴ Tan tsa ñihi tahañ nyico ndi tsihin ra nda ñuu Asón, quihvi ra tsitsi yutun ndoo tsihin ndi tan cuahan ndi nda ñuu Mitilene. ¹⁵ Tsa quita ndi ñuu can tacan tan yaha ndi ityi nuu iin ñuhu luhlu tsa nañi Quío, canyii tsi mahñu ndutya ñuhu. Tan tsa inga quivi can tsaá ndi inga ñuhu luhlu tsa nañi Samos. Yaha ndi ican tan tsaá ndi ñuu Trogilio nu quitatu ndi. Tan tsa inga quivi tsaá ndi nda ñuu Mileto. ¹⁶ Tacan cuví tyin ra Pablo ña cuñi ra tsa cunyii naha ra ityi Asia. Tan ña cuñi ra cuhun ra ñuu Éfeso tyin numi ñi cuñi ra tsaá ra ñuu Jerusalén, tyin tatun cuhva tsi cuhva, ican nyii ra tan cua coo vico Pentecostés.

Nu caahan ra Pablo tsihin ra ñuu Éfeso naha ra tyin na cuhun ra tan ña cua quitsi ca ra

¹⁷ Tan tsa yucú ndi ñuu Mileto, cana ra Pablo tsi ra cuví ityi nuu tsihin nyivi yihí cuenda Nyoo ñuu Éfeso. ¹⁸ Tan tsa tsaá ra naha, tan caahan ra Pablo tsihin ra naha tan catyí ra:

—Maa ndo tsitó ndo nácaa cuhva tsicá yu nda quivi jihna ñi tsa tsaá nuu yu Asia ihya. ¹⁹ Tandihí quivi tsa tsinyii yu tsihin ndo tan tyiñu Jutu Mañi yo jahá yu tsihin tsa nducú yu cuhva tsa ña cahnu xaan ñi cuví yu, vasu cuaha tundoho tan tucuiihya ñi nyehe yu. Tan cuaha tundoho quitsi siqui yu jahá nyivi Israel. ²⁰ Maa tyin ña jandihí yu tsa caahan yu tuhun Nyoo tsihin ndo. Tyin yacan cuví tandihi tsa tsiñi ñuhu tsi ndo tan coo vaha ndo tsihin Nyoo. Tan jacuahá yu tuhun Nyoo tsi ndo nu ndu iin ndo tan nda yuvehe ndo. ²¹ Tan jacuahá yu tuhun ihya tsi nyivi Israel tan tsi nyivi tsa ñavin nyivi Israel cuví, na nasama ñi cuhva iyó ñi nuu Nyoo tan na tsinu ñi ñi tsi Jutu Mañi yo, ra Jesucristo. ²² Tan vityin cua cuhun yu nda ñuu Jerusalén tyin maa Tatyi Ii Nyoo catyí. Tan ña tsitó yu náa cua cuví tsi yu

ndacan. ²³ Maa tyin intuhun ñi tsa tsitó yu tyin tandihi ñi nu cuahán yu, Tatyí Ii Nyoo caahán tsihin yu tyin ndatú vehe caa tsi yu, tan cuaha tundoho cua nyehe yu. ²⁴ Maa tyin ndi intuhun yacan tan ña tsicá iñi yu. Tan ndi ñayivi yu nduve yahvi nyaá can tsa cuenda yu, tyin tacan tan tsihin tsa sii cuñi yu tan cuví jañihi ca yu jaha tyiñu yu tsa cuenda Jutu Mañi yo Jesús, tumaa tava tyiñu ra tsi yu. Tan jañihi ca yu jacuaha yu tuhun vaha nácaa cuñi maa Nyoo tsi yo.

²⁵ Tan vityin tsitó vaha yu tyin tandihi nyoocho tsa cahan yu tuhun Nyoo tsihin ndo, ña cua nyehe ca ndo tsi yu. ²⁶ Yacan cuenda cuñi yu cahan yu tsihin ndo vityin tyin nduve ca cuatyí yuhu tsa cuenda ndi intuhun ndo. ²⁷ Tyin ñiñi cuñi yu tan cahan yu tandihi tuhun Nyoo tsihin ndo tan nduve náa tsa tyihí xeehe yu. ²⁸ Yacan cuenda jaha cuenda ndo tsi ndo. Tan jaha cuenda ndihi ndo tsi tandihi nyivi yihí cuenda Nyoo. Tyin maa Tatyí Ii Nyoo tava tyiñu tsi ndo na jaha cuenda ndo tsi nyivi tsicá vehe ñuhu Jutu Mañi yo. Maa ra jata ra tsi ñi tsihin ñiñi ra. ²⁹ Tan tsitó yu tyin quivi cuhun yu, cua quitsi inga ra naha. Tan cua cuñi ra naha jatívi ra naha tsi nyivi yihí cuenda Jutu Mañi yo. Tumaa lobo xaan tsa tsahíi tsi mbee, tacan cua quitsi ra can naha ra. ³⁰ Tan juvin ñi nu yucú ndo, cua nduvita taahan ra. Tan cua jacuaha ra naha tsi ndo tuhun tsa ña nditsa tyin cunyicun ndo tsi ra naha. ³¹ Yacan cuenda jaha vaha ndo cuenda. Ndūcuhun iñi ndo tyin tsitsi tsa uñi cuiya ña jandihi yu tsa caahán yu tuhun Nyoo tsihin ndo. Tyin ñiñu tan nduvi caahán yu tsihin intuhun intuhun ndo, tan tsihin tsa cuihiya cuñi yu, coto nacoo ihñi ndo tuhun Nyoo.

³² Tan vityin nyoocho yañi, tyaa yu tsi ndo ndaha Nyoo. Naquihin vaha ndo tandihi tuhun caahán ra tsihin yo. Tyin jacotó ra tsi yo tyin cuñi xaan ra tsi yo. Tan tuhun ra jandunyeé xaan tsi iñi yo tan tsahá tsi tsa cuví yo nyivi vaha tsihin tandihi inga nyivi tsa nacuhva cuenda tsi ñi tsi ra. ³³ Yuhu ña nyiyó iñi yu tsa iyó tsi ndi intuhun ndo. Ndi xuhun ndo, ndi jahma ndo. ³⁴ Nyoocho tsitó vaha ndo tyin jaha tyiñu xaan yu tsihin ndaha yu tan ñiñi yu tsa tsíñi ñuhu tsi yu tsihin ra tsicá tsihin yu naha ra. ³⁵ Tacan ñi janahá yu tsi ndo tyin cuñi tsi tsa jaha tyiñu ndo tan jatyinyee ndo tsi nyivi iyó náa tsa tsíñi ñuhu tsi ñi. Tan ndūcuhun iñi ndo tsa caahán Jutu Mañi yo Jesús, nu catyí ra tyehen: “Sii ca cuñi nyivi tsa tsahá, tan ñavin ca nyivi tsa ñihí ndaahvi” catyí Jutu Mañi yo.

³⁶ Tsa yaha tsa cahan ra Pablo tuhun ihya, tsicuiñi tsiti ra. Tan tsican tahvi ra tsihin tandihi ra naha. ³⁷ Tan tandihi ra naha nducuihiya xaan iñi ra naha tan tsacu xaan ra naha. Tan tsinumí nyaa ra naha tsi ra.

³⁸ Tyin ra Pablo catyí ra tyin cua cuhun ra inga ñuu tan ña cua cuhun ca ra nu yucú ra naha. Tacan tan tsindacá ra naha tsi ra nda nu quihvi ra tsitsi yutun ndoo.

21

Nu cuahán ra Pablo ñuu Jerusalén

¹ Tacan tan nacoo ndi tsi ra hermano naha ra tan quihvi ndi tsitsi yutun ndoo. Tan cuahán ndi ndoo ityi ñi nda Cos, iin ñuhu luhlu tsa canyii mahñu ndutya ñuhu. Tan tsa inga quivi tsaá ndi nda Rodas tsa cuví inga ñuhu luhlu ñi. Tacan tan cuahán ndi nda ñuu Pátara. ² Tan ñuu Pátara, nyehe ndi inga yutun ndoo tsa cuahán nda Fenicia. Tan quihvi ndi tsitsi can, tacan tan cuahán ndi. ³ Tan ityi nu cuahán ndi, nyehe ndi nu canyii ñuhu Chipre ityi ndaha satyin yo. Tan yaha ñi ndi cuahán ndi ityi nuu ca, nda ityi Siria. Tan tsaá ndi nda ñuu Tiro tyin ican cua tava ra naha ndaha tyiñu tsa yihí tsitsi yutun ndoo can. ⁴ Tan tsa nañihi ndi tsi nyivi yihí cuenda Nyoo ñuu can, ndoo ndi tsihin ñi utsa quivi. Tan catyí ñi tsihin ra Pablo tyin ña taahán tsi tsa cuhun ra ñuu Jerusalén tyin tacan cahan Tatyí Ii Nyoo tsihin ñi. ⁵ Maa tyin tsa quita utsa quivi can, quita ndi ñuu can. Tan nu cua quita ndi tandihi ra hermano naha ra tsihin ñasihi ra naha tan tsihin sehe ra naha tsindacá ñi tsi ndi nda cuenda yuhu ñuu. Tan nu nyiti yuhu ndutya ñuhu can tsicuiñi tsiti ndi, tan tsican tahvi ndi tsi Nyoo. ⁶ Tacan tan tsinumí nyaa tahan ndi tsi ndi. Tsahan quihvi ndi tsitsi yutun ndoo. Tan ra hermano can naha ra cuanuhū ra naha yuvehe ra naha.

⁷ Tan tsa quee ndi ñuu Tiro, cuahán ndi nda ñuu Tolemaida. Tan ican tsaha ndi nacumi tsi nyivi yihí cuenda ra Cristo. Tan ndoo ndi tsihin ñi iin quivi. ⁸ Tan tsa inga quivi quita ndi cuahán ndi nda ñuu Cesarea. Tan ican tsahan ndi vehe ra Felipe, ra tsa jacotó xaan tsi nyivi nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tsa utsa taahan ra naha. Tan ndoo ndi yuvehe ra. ⁹ Ra Felipe, iyó cumi taahan ñi cuatyí sehe ra tsa ñaha ca tandaha. Tan ndusu yuhu Nyoo cuví ñi. ¹⁰ Tan tsa cuaha ñi quivi tsa yucú ndi ican, tan tsaá iin ndusu yuhu nyoo tsa quee nda Judea. Nañi ra Agabo. ¹¹ Quitsi nyehe ra nu yucú ndi. Tan quihñ ra cinturón ra Pablo, tsahñi ra tsaha ra tan ndaha ra, tan catyí ra:

—Tatyí Ii Nyoo catyí tsihin yu tyin tyehen cua cunuhñi tsitoho cinturón ihya nda ñuu Jerusalén. Tan cua cuhva cuenda nyivi Israel tsi ra tsi ra inga ñuu naha ra —catyí ra Agabo.

¹² Tsa tsíñi ndi tsa caahán ra, nyuhu tan ra ñuu Cesarea naha ra caahán ndaahvi ndi

tsihin ra Pablo na ña cuhun ra ñuu Jerusalén.
¹³ Maa tyin ra Pablo catyí ra:

—¿Nacuenda tsacú ndo tan janducuihyá ndo iñi yu? Yuhu nduve cuenda yu. Ndi maa tsa cua cunuhñi yu, ndi maa cahñi ra naha tsi yu, maa tyin cuhun yu tyiñu tsa cuenda Jutu Mañi yo Jesús —catyí ra tsihin ndi.

¹⁴ Tan tsa nyehe ndi tyin ña cuví tsa jahá ndi tsi ra, jaña ndi. Tan catyí ndi:

—Na cuví maa cuhva cuñí Jutu Mañi yo.

¹⁵ Tsa yaha yacan na ica vaha ndi tsi ndi tan cuahán ndi nda ñuu Jerusalén.

¹⁶ Tan cuahán taahan ra ñuu Cesarea ra yihí cuenda ra Cristo, tsihin ndi. Tan cuahán tucu iin ra ñuhu Chipre. Nañí ra Mnasón. Cuaha xaan cuiya tsinú iñi ra tsi ra Cristo. Tan tsindaca ra tsi ndi yuvehe ra tsa iyó ñuu Jerusalén tyin cuyucu ndi.

Nu cua nyehe ra Pablo nu nyíi ra Jacobo

¹⁷ Tsa tsaa ndi ñuu Jerusalén, nyivi yihí cuenda ra Cristo si xaan cuñí ñi caahán ñi tsihin ndi. ¹⁸ Tan inga quívi can cuahán ndi tsihin ra Pablo cua nyehe ndi nu nyíi ra Jacobo. Tan ican yucú tucu tandihí ra cuví ityi nuu tsihin nyivi vehe ñuhu. ¹⁹ Tsahá ra Pablo nacumi tsi ra naha. Yaha can tan nacatyí tuhun ra tandihí nácaa tsatyíñu Nyoo tsi ra nu cahan ra tuhun Nyoo tsihin nyivi tsa ñavin nyivi Israel cuví. ²⁰ Tsa tsiní ra naha tuhun ihya, jacahnu ra naha tsi Nyoo, tan catyí ra naha tsihin ra Pablo:

—Vaha yañi, nyehé un tyin cuaha xaan nyivi Israel tsinú iñi tsi ra Cristo. Tan tandihí ñi catyí ñi tyin taahán tsi tsa javaha yo cuhva catyí ley tsa tyaá ra Moisés. ²¹ Tan ñihí tuhun ñi tyin yooho jacuahá un tsi tandihí nyivi Israel tsa iyó inga ñuu tyin na ña cuita ca iñi ñi ley tsa jacuahá ra Moisés, tan catyí tucu un tsihin ñi tyin ña cuñí ca tsi tsa cunyaa tuñi Nyoo tsi sehe yíi ñi, tan ndi ña cua javaha ca ñi tuhun tsahnu cuhva tsa iyó maa yo taahan tsanaha. ²² ¿Nacaa javaha yo vityin? Tyin nyivi cua ñihí tuhun ñi tyin tsaa un ihya. ²³ Vaha taxin ca tsa javaha un tsa cua cahan ndi tsihin un. Ihya iyó cumi taahan rayíi tsa nyaá javaha tsa catyí ra tsihin Nyoo tyin cua javaha ra naha. ²⁴ Cuaahan tsihin ra naha na nduvaha un nuu Nyoo tsihin ra naha. Tan tyahvi un tsa taahán tsi tyahvi ra naha. Tacan tan maa ra naha cua xatya ndi ra naha jiñi ra naha cuhva catyí ley. Tan tsa javaha un tacan, tan coto tandihí nyivi tyin ña nditsa tsa caahán ñi siqui un, tyin cua nyehe ñi tyin ña nacoq un ley tsa tyaá ra Moisés. ²⁵ Tan tsa cuenda nyivi tsa ñavin nyivi Israel cuví, tan tsinú iñi ñi tsi ra Cristo, tsa jacuhun ndi tutu tsi ñi, tan catyí ndi tsihin ñi tyin ña taahán tsi caca xaan iñi ñi tsa cuenda ley can. Catyí ndi tyin ña cua catsi ñi cuñu tsa jamañi nyivi tsi tsitoho. Ndi

ña cua catsi ñi ñiñi quiti, tan ndi cuñu quiti tsa cava ñi jucun tan ña tsatí ñiñi ti. Tan ndi intuhun ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayíi —catyí ra tsahnu vehe ñuhu can naha ra tsihin ra Pablo.

Nu quitsahá caahán yuhu taahan nyivi Israel siqui ra Pablo

²⁶ Tacan tan tsa tuví inga quívi tan cuahán ra Pablo tsihin tandihí tsa cumi taahan ra can naha ra. Tan janduvahá ra tsi ra nuu Nyoo iin caa ñi tsihin ra can naha ra. Tacan tan quihví ra tsitsi vehe ñuhu cahnu tyin jacoto ra cuví jutu ama cundihi tsa utsa quívi tsa nduvaha tsa cumi taahan ra can naha ra, tan cua jamañi ra tsa jamañi ra nuu Nyoo. ²⁷ Tacan tan tsa cuñí ndihí tsa utsa quívi can, tan taahan ra Israel tsa quee nda Asia nyehe ra naha tsi ra Pablo tsitsi vehe ñuhu. Tan cuvaá xaan tandihí nyivi jahá ra naha, tan tñn ra naha tsi ra Pablo. ²⁸ Tan caná tsaa ra naha tan catyí ra naha:

—Nyooho nyivi Israel, jatyingee ndo tsi ndi. Juvín ra ihya cuví ra tsa tsicá nuu tandihí ñi ityi. Tan jacuahá ra tsi tandihí nyivi. Catyí ra tyin ña vaha cuhva iyó yo. Tan catyí ra tyin ña vaha ley tsa tyaá ra Moisés, tan ña vaha vehe ñuhu ihya. Tan inga tucu tuhun tyin tyihí ra tsi juhva ra Grecia naha ra tsitsi vehe ñuhu yo tan ihya nu ii cuví tsi tan vatsí jatívi ra naha —catyí ra naha caná tsaa ra naha.

²⁹ Tacan catyí ra naha tyin nda nu quitsí tsi nyehe ra naha tsi ra Pablo tsitsi ñuu, tsicá nuu ra tsihin iin ra ñuu Éfeso tsa nañí Trófimo. Tan cuñí maa ra naha tyin ra Pablo tsindaca tsi ra tsitsi vehe ñuhu. ³⁰ Tan tandihí nyivi ñuu quitsahá cuvaá ñi. Tan tsinú xaan ñi tsaa ñi. Tacan tan tñn ñi tsi ra Pablo. Tan ixtá caa ñi tsi ra cua ndaca ñi ityi tsata vehe ñuhu, tan numi ñi nacasi ñi yuvehe ñuhu can. ³¹ Tsa cuñí cahñi ñi tsi ra, tan ñihí tuhun ra comandante cuenda andaru tyin tandihí nyivi ñuu Jerusalén iyo xaan caahán yuhu taahan ñi. ³² Tacan tan ra comandante can jandu iin ra tsi ra capitán naha ra tan tsihin andaru naha ra. Tan tsinú ra naha cuahán ra naha nu yucú nyivi. Cuhva tsa nyehe ñi tsi ra comandante can tsihin andaru can naha ra, jaña ñi tsa cañí ñi tsi ra Pablo. ³³ Tacan tan natuhvá ra comandante can nu nyíi ra Pablo. Tan tava tyiñu ra tsi andaru naha ra tyin na tñn ra naha tsi ra, tan na cuhñi ra naha tsi ra tsihin uvi taahan cadena. Yaha can tan tsicá tuhun ra comandante can tsi ra yóo ra cuví ra, tan náa javahá ra. ³⁴ Maa tyin nyivi siin siin tuhun caná tsaa ñi. Tan ra comandante can ña cutuñi maa iñi ra tsa cuenda tsatyn ñihí xaan cuvaá jahá ñi. Tan tava tyiñu ra tsi andaru tyin cundaca ra naha tsi ra Pablo

nda vehe nu yucú andaru. ³⁵ Cuhva tsa tsaa ra naha nu cuayí vehe can, tan quitsaha nducaña nyívi tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra. ³⁶ Tyin tandihí ñi nyicún ñi tsi ra naha, tan caná tsaa ñi tan catyí ñi:

—¡Na cúu ra! —catyí ñi.

Nu juven ñi maa ra Pablo jacacú tsi ra nuu nyívi

³⁷ Cuhva tsa cua tyihí ra naha tsi ra Pablo tsitsi vehe can, tan quitsaha caahán ra tsihin ra comandante:

—¿A cuhva un tsa cahan yu tsihin un? —catyí ra tsihin ra.

Tan ra comandante can catyí ra tsihin ra:

—¿A cuví caahán un yuhu griego? ³⁸ Tun tacan caa, ñavin yoocho cuví ra ñuu Egipto tsa quitsí quivi can tan jacañi tahan ra tsi nyívi síqui ra ndacá ñaha tan tava ra cumi mil ra tsahñi ndiyí tsindaca ra tsi ra naha ityi ñuhu ityi —catyí ra comandante can tsihin ra Pablo.

³⁹ Tacan tan ra Pablo catyí ra tsihin ra:

—Yuhu ra Israel cuví yu tan cacú yu ñuu Tarso tsa cuví iin ñuu cahnu ityi Cilicia. Maa tyin jaha tumañi iñi cuhva un ndatu cahan yu luxu tsihin nyívi —catyí ra Pablo tsihin ra comandante.

⁴⁰ Tacan tan tsa tsaha ra comandante can ndatu tsi ra, nduvita nyityi ra nu cuayí can tan javahá ra iin seña tyin na cutaxin ñi. Tan tsa cutaxin nyívi quitsaha caahán ra tsihin yuhu hebreo, tan catyí ra:

22

¹ —Nyoocho tata, tan nyoocho yañi, tyaa soho ndo tsa cua cahan yu tsihin ndo tyin cuñi yu tsa coto ndo tyin yuhu nduve cuatyí yu iyó —catyí ra Pablo tsihin nyívi can.

² Tsa tsiñi ñi tsa caahán ra tsihin ñi tsihin yuhu hebreo, taxin cuii ña tsinyacu ñi. Tan ra Pablo catyí ra:

³ —Yuhu ra Israel cuví yu tumaa maa ndo. Tan cacú yu ñuu Tarso tsa canyí Cilicia. Maa tyin Jerusalén ihya tsahnu yu. Tan ra Gamaliel jacuahá ra tsi yu nácaa tyaa yahví yu ley tsií tsaahnu yo. Tan tacan ñi nducú yu cuhva javahá yu tyiñu nuu Nyoo tsihin tsa nii iñi yu, tumaa tsa javahá ndo vityin ihya. ⁴ Yuhu, nu quitsí tsi tsinyaá ndaha yu tsi nyívi yihí cuenda ra Cristo. Tan tsindaca ra tsi ñi tsa cúu ñi. Tan cuaha ñi rayí tan ñaha tiñ yu tsa cuhun ñi tsitsi vehe caa. ⁵ Ra jutu tsaahnu tsa cuví ityi nuu tsihin ra cuví mandoñi naha ra, cuví ra naha tsandaa tyin ra ican naha ra tsahá tutu tsi yu tyin cuví tiñ yu tsi ra yañi yo, ra yihí cuenda ra Cristo ñuu Damasco. Tsahán yu ican tsinanducú yu tsi nyívi tsinú iñi tsi ra Cristo, tyin cua cunuhñi ñi tsihin cadena, tan cua quitsi ndaca yu tsi

ñi nda ñuu Jerusalén ihya tyin tatsi tuñi ra tsahnu naha ra tsi ñi.

Nu nacatyí tuhun ra Pablo nácaa natsinu iñi ra tsi ra Cristo

(Hechos 9.1-19; 26.12-18)

⁶ Maa tyin cuhva tsa cuahán yu ityi tsa cua tsaa yu ñuu Damasco, maa ora cuví tsi. Tan sana iñi yu tan ndunditsín taní cahnu nu cuahán yu jahá iin ñuhu tsa quitsí ityi andivi. ⁷ Tacan tan nduva yu nu ñuhu. Yahá can tan tsiñi yu iin ndusu tsa caahán tsihin yu tan catyí tsi: “Saulo, Saulo, ¿nacuenta nyaá ndaha un tsi yu?” catyí ndusu can tsihin yu. ⁸ Tacan tan tsica tuhun yu tsi ra tan catyí yu: “¿Yóo yoocho cuví un, taa?” Tan catyí ra tsihin yu: “Yuhu cuví ra Jesús, ra ñuu Nazaret, ra tsa nyaá ndaha un” catyí ra. ⁹ Tandihí ra tsa cuahán tsihin yu nyehe ra naha ñuhu can, tan nayuhví xaan ra naha. Maa tyin ña tsiñi ra naha ndusu tsa cahan tsihin yu. ¹⁰ Tacan tan quitsaha caahán yu tsihin ra tan catyí yu: “Jutu Mañi yu, ¿náa taahán tsi javaha yu?” Tan catyí ra tsihin yu: “Nduvita tan cuhun un nda ñuu Damasco. Tan ican cua cahan iin ra tsihin un tandihí tsa taahán tsi javaha un” catyí Jutu Mañi yo tsihin yu. ¹¹ Tan cuaa yu jahá ñuhu can, yacan cuenda ra tsa cuahán tsihin yu tiñ ra naha ndaha yu tan cuahán ndi nda ñuu Damasco.

¹² Tan ican iyó iin ra tsa nañi Ananías. Tan jachnú xaan ra tsi Nyoo cuhva catyí ley tsa tyaa ra Moisés. Tan tandihí nyívi Israel tsa iyó ñuu Damasco catyí ñi tyin vaha xaan iñi ra. ¹³ Tsahán ra can tsinyehe ra tsi yu. Tan cuhva tsa tsaa ra, catyí ra tsihin yu: “Yañi Saulo, nanyehe inga tsaha” catyí ra tsihin yu. Tan juven iñi cuhva can tan nanyehe yu. Tan cuví nyehe yu tsi ra. ¹⁴ Tan catyí ra tsihin yu: “Nyoo cuenda jutu yo nacatsí ra tsi un nda tsanaha, tyin coto un cuhva cuñi ra, tan nyehe un tsi ra Jesucristo tyin ra vaha cuví ra, tan cuñi un ndusu ra. ¹⁵ Tyin yoocho cua cahan un tuhun ra nuu tandihí nyívi. Cua nacatyí tuhun un tsa nyehe un tan tsa tsiñi un. ¹⁶ Tan vityin, ña cuatu ca un. Nduvita tan cõondutya un. Tan ndacan tahvi un tsi Jutu Mañi yo tyin na jaha ra tucahnu iñi cuatyí un” catyí ra Ananías tsihin yu —catyí ra Pablo tsihin ñi.

Nu nacatyí tuhun ra Pablo nácaa tsahá Nyoo tyiñu tsi ra tyin cuhun ra inga ñuu cucahan ra tuhun ra Cristo

¹⁷ Yahá can tan vatsí nuhu yu ñuu Jerusalén ihya tan cuhva tsa tsaa yu, tsahán yu vehe ñuhu cahnu tsindacan tahvi yu tsi Jutu Mañi yo. Tan janahá ra iin tsa nyehe yu. ¹⁸ Nyehe yu tsi ra. Tan catyí ra tsihin yu: “Janumi. Quita ñi ñuu Jerusalén ihya tyin ña cua tsinu iñi nyívi tuhun yu tsa cahan un” catyí ra tsihin yu. ¹⁹ Tacan tan

quitsahā caahán yu tsihin ra tan catyí yu: “Jutu Mañi yu, maa ñi tsitó ñi tyin yuhu tsahan yu tandihi vehe ñuhu. Tan tñin yu tsi ñi tsa tsinú iñi tsi un, tan tyihí yu tsi ñi vehe caa tan cañi yu tsi ñi. ²⁰ Tan quivi tsa tsihi ra Esteban ra tsa cahan cuenda un, yuhu nyíi ndihi yu ican. Tan ndoo yu vaha tsa tsahñi ra naha tsi ra. Tan jahā cuenda yu jahma ra can naha ra” catyí yu tsihin Jutu Mañi yo. ²¹ Tacan tan catyí ra tsihin yu: “Cuaahan, tyin maa yu jacuhún tsi un. Cañi xaan cua cuhun un tyin cua cuhun un nda nu iyó nyívi tsa ñavin nyívi Israel cuví” catyí Jutu Mañi yo tsihin yu.

Nu nyaá ra Pablo ndaha ra comandante cuenda ñuu Roma

²² Tyaá soho ñi yacan ña tan quitsahā caná tsaa ñi tan catyí ñi:

—¡Cahñi ndo tsi ra! Tyin ña taahán ca tsi tsa coo ra ñayívi —catyí ñi.

²³ Tan caná tsaa ca ñi. Tan javicó ñi jahma ñi. Tan javitá ñi nyahyu nu tatyí tsa cuenda tsa xaan xaan cuñi ñi. ²⁴ Yacan cuenda ra comandante can catyí ra tsihin ra andaru can naha ra tyin na cundaca ra naha tsi ra Pablo tsitsi vehe can. Tan catyí ra tyin na cañi ra naha tsi ra, tyin tacan tan cua cahan ra tsa nditsa nacuenda tsa caná tsaa nyívi tsata ra. ²⁵ Maa tyin tsa yahā tsahñi ra naha tsi ra tan cua cañi ra naha tsi ra, tacan tan ra Pablo cahan ra tsihin ra capitán tsa nyaá nyityi ican tan catyí ra:

—¿A iyó ndatu tsi nyoocho tsa cañi ndo tsi yu? Tan yuhu ra cuenda ñuu Roma cuví yu tan inga tucu tuhun, ñaha ca jaqueé yuhu ra juez tsi yu, tan cuñi ndo cañi ndo tsi yu —catyí ra Pablo tsihin ra.

²⁶ Tsa tsiñi ra capitán tsa caahán ra Pablo, tsahan ra tsijacotó ra tsi ra cuví comandante. Tan catyí ra tsihin ra:

—Jaha cuenda tsi un tsihin tsa javahá un. Tyin ra can, ra ñuu Roma cuví ra —catyí ra tsihin ra.

²⁷ Tacan tan ra comandante can cuahán ra nu nyíi ra Pablo. Tan tsicá tuhun ra tsi ra tatun nditsa tyin ra ñuu Roma cuví ra. Tan ra Pablo catyí ra:

—Juvín.

²⁸ Tacan tan catyí ra comandante can tsihin ra:

—Yuhu cuaha xaan xuhun tyahví yu tan cuví cuq yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu tsa cuenda jutu yu —catyí ra.

²⁹ Tacan tan andaru tsa cua cañi tsi ra jatsiyo nyaha ra naha tsi ra naha nu nyíi ra Pablo. Tan nda cuenda ra comandante tan nayuhví ra tsa cuenda tsa tsahñi ra tsi ra tsihin cadena. Tyin tsa javahá ra tsa tacan tsihin iin ra ñuu Roma cuatyí cuví can.

Nu tsahan ra Pablo nu ndu iin ra ñuu Israel naha ra

³⁰ Tan tsa tuví inga quivi can tan ra comandante can cuñi ra coto ra náa cuatyí tyaá nyívi Israel tsi ra Pablo. Tan jahā ra tsi ra Pablo. Tan tava tyiñu ra na ndu iin tandihi ra jutu tsa cuví ityi nuu naha ra, tan tsihin tandihi ra cumi tyiñu cuenda nyívi Israel. Tacan tan tava tyiñu ra na quita ra Pablo vehe caa tan cuhun ra nu iyó junta can.

23

¹ Tan ra Pablo nyehe ra tsi tandihi ra tsa ndu iin can naha ra, tan catyí ra tsihin ra naha:

—Nyoocho yañi, tandihi quivi nda cuenda vityin nducú yu cuhva javaha yu cuhva cuñi Nyoo. Yacan cuenda vaha cuñi yu —catyí ra Pablo.

² Tacan tan ra Ananías, ra jutu tsaahnu tsa yihí ndaha tsi inga ca ra naha, tava tyiñu ra tsi ra nyecú yatyin ñi nu nyaá ra Pablo, na cañi ndaha ra naha yuhu ra. ³ Tan ra Pablo nacahan ra tan catyí ra:

—¡Ijhna ca tsi maa un cua cañi Nyoo, tyin jahá xaan un tyin ra vaha cuví un nyaá un juvin! ¿A cutuñi yu nuu un tumaa cuhva catyí ley? ¿Nacuenda tsa tava tyiñu un na cañi ra naha tsi yu? Tan ñavin tacan catyí ley —catyí ra Pablo.

⁴ Tacan tan ra nyecú ican catyí ra naha tsihin ra:

—Ña vaha tsa caahán un tacan tsihin ra jutu tsaahnu tyin cahnú cuví ra nuu Nyoo —catyí ra naha tsihin ra Pablo.

⁵ Tacan tan ra Pablo catyí ra:

—Yañi, ña tsitó yu tatun ra ihya cuví ra jutu tsaahnu. Tyin catyí tuhun Nyoo tyin ña cahan nyaa yo tsi ra yihí ndaha ñuu yo —catyí ra.

⁶ Tacan tan tuví iñi ra Pablo tyin juhva ra cuenda junta can naha ra, yihí ra cuenda ityi ra cuví saduceo naha ra. Tan juhva ra naha yihí cuenda ra cuví fariseo naha ra. Tacan tan cahan ra tsihin tsa ñihi ndusu ra tan catyí ra:

—Nyoocho yañi, yuhu ra fariseo cuví yu tumaa jutu yu. Tan tatsi tuñi ndo tsi yu tsatyin tsinú iñi yu tyin nyívi tsa tsihi nandoto ñi —catyí ra Pablo.

⁷ Cuhva tsa cahan ra tuhun ihya, ra tsa cuví fariseo naha ra tan ra saduceo naha ra, quitsahā caahán yuhu tahan ra naha tan natahví sava ra naha. ⁸ Tyin ra saduceo catyí ra naha tyin ña cua nandoto nyívi tsa tsihi. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsinú iñi ra naha tandihi tuhun ihya. ⁹ Tandihi ra naha quitsahā caná tsaa ra naha. Tan nduvitá juhva ra cuví

maestro cuenda ley tsa tyaq ra Moisés tsa cutahán tsihin ra fariseo naha ra, tan catyí ra naha:

—Nyehe ndo, nduve tsa ña vaha javahá ra ihya, tyin tatun ángel cahan tsihin ra, jaha yo cuenda tyin ña vaha cahan yo siqui Nyoo —catyí ra naha.

¹⁰ Tsa tsiñi tandihi ra naha yacan, quit-saha nduvaá nyico ra naha. Nda cua nayuhvi ra comandante can coto cahnya cuatyí ra naha tsi ra Pablo. Yacan cuenda tava tyiñu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru. ¹¹ Tan tsacuaa can quituví Jutu Mañi yo nuu ra Pablo tan catyí ra tsihin ra:

—Jandu iin iñi un, Pablo. Tyin tumaa caahán un tuhun yu ñuu Jerusalén ihya, tahan cua cahan tucu un nda ñuu Roma —catyí Jutu Mañi yo tsihin ra Pablo.

Nu ndoo ra Israel naha ra tyiñu tyin cua cahñi ra naha tsi ra Pablo

¹² Tsa inga quivi, juhva ra Israel natuhun tahan ra naha tan ndoo ra naha tyiñu. Tan catyí ra naha tyin ña cua catsi ra naha, tan ndi ña cua coho ra naha ndi cuanda cahñi ra naha tsi ra Pablo. Tan ndáa ra tsa ña cua javaha tacan, na janaa Nyoo tsi ra naha, catyí ra naha. ¹³ Yaha uvi xico ra naha ndoo ra naha tyiñu ihya. ¹⁴ Tsahan ra naha nu yucú ra jutu tsa cuví ityi nuu naha ra tan tsihin ra cuví mandoñi cuenda nyivi Israel naha ra. Tan catyí ra naha tsihin ra naha:

—Nyuhu natuhun tahan ndi tan cahan ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatun ña cua javaha ndi tumaa cuhva catyí ndi. ¹⁵ Tan vityin nyoocho jacoto ndo tsi ra comandante. Catyí ndo tsihin ra na quitsi ndaca ra tsi ra Pablo nuu ndo ityaan. Catyí ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsaa ra ihya, cua cahñi ndi tsi ra —catyí ra naha tsihin ra jutu naha ra.

¹⁶ Maa tyin sehe cuhva ra Pablo tsiñi ra tsa natuhun tahan ra naha. Tan tsahan ra vehe andaru nu nyíi ra Pablo tsicatyí tuhun ra tsihin ra. ¹⁷ Tacan tan ra Pablo cana ra tsi iin ra capitán. Tan catyí ra tsihin ra:

—Cuandaca tsi ra luhlu ihya nuu ra comandante tyin iyó tsa cuñi ra cahan ra tsihin ra —catyí ra Pablo tsihin ra capitán.

¹⁸ Tacan tan tsindaca ra capitán can tsi ra luhlu can nuu ra comandante. Tan catyí ra tsihin ra:

—Ra Pablo tsa nyíi vehe caa cana ra tsi yu tan catyí ra tsihin yu tyin quitsi ndaca yu tsi ra luhlu ihya tyin cuñi ra cahan ra tsihin un.

¹⁹ Tacan tan ra comandante tiñ ra ndaha ra luhlu can tan tava siin ra tsi ra tan catyí ra tsihin ra:

—¿Náa cuñi un cahan un tsihin yu?

²⁰ Tan ra luhlu can catyí ra tsihin ra:

—Ra Israel ndoo ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñi maa un tyin cua jandaa ra naha tyiñu tsa cuenda ra Pablo. ²¹ Maa tyin ña cua tsinu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahan ra naha tsihin Nyoo tyin tsitsi tsa ña cua cahñi ra naha tsi ra Pablo, ña cua catsi ra naha tan ña cua coho ra naha. Tan tatun ña cuvi cahñi ra naha tsi ra, vaha taxín ca na cúu tandihi maa ra naha, catyí ra naha. Tan vityin ndatú ra naha nácaa cua cahan un —catyí ra luhlu can.

²² Tacan tan catyí ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyivi. Yaha can tan jacunhu ra tsi ra luhlu can.

Nu cacu ra Pablo ndaha ra Israel naha ra tan cuahán ra nuu ra ndacá ñaha tsa nañi Félix

²³ Tacan tan ra comandante cana ra tsi uvi taahán capitán, tan catyí ra tsihin ra naha:

—Janduvaha ndo tsi ndo tyin cuhun ndo ñuu Cesarea cuhva caa iin tsa tsacuaa. Cua cuhun uvi cientu andaru tsihin tsaha ra naha, tan uñi xico utsi ra naha tsihin cuayu, tan uvi cientu ra naha cua cuiso lanza. ²⁴ Janduvaha ndo cuayu coso ra Pablo. Tan jaha cuenda vaha ndo tsi ra ityi cuhun ndo na tsaa vaha ra nu nyaá ra Félix, ra ndacá ñaha —catyí ra comandante tsihin ra capitán can naha ra.

²⁵⁻²⁶ Tacan tan javahá ra iin carta cundaha ra naha nacuhva ra naha tsi ra Félix. Tan tuhun tsa tyaq ra nu carta, cuví tuhun ihya:

“Yuhu ra Claudio Lisias jaquitsí yu carta ihya tsi un, tyin vaha xaan nyivi cuví un. Ilya vatsí nacumi tsi un.

²⁷ Ra Pablo ihya, tiñ ra Israel naha ra tsi ra. Tan cuñi ra naha cahñi ra naha tsi ra. Maa tyin cuhva tsa tsito yu tyin ra ñuu Roma cuví ra, tsahan yu tsihin andaru tan jacacu yu tsi ra. ²⁸ Tan cuñi yu coto yu náa cuatyí tyaá nyivi tsi ra, tsindaca yu tsi ra nu iyó junta tandihi ra cuví mandoñi nyivi Israel. ²⁹ Tan nyehe yu tyin xaan xaan cuñi nyivi Israel nyehe ñi tsi ra tyin ña tyaá yahví ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihi yo tsi ra vehe caa. ³⁰ Maa tyin ñihí tuhun yu tyin ra Israel nducú cahñi ra naha tsi ra, yacan cuenda jaquitsí yu tsi ra nuu yoocho. Tan catyí tucu yu tsihin ra tsa xicó ñaha tsi ra, na quitsi ndihi ra naha nu nyaá un na cahan ra naha

cuatyi ra nuu maa un”, catyi ra Claudio tsihin ra Félix nu carta tsa javahā ra.

³¹ Tacan tan quihñ ra naha tsi ra Pablo tumaa cuhva catyi ra Claudio tsihin ra naha, tan juvin ñi tsacuaa can tsindacā ra naha tsi ra nda ñuu Antipatris. ³²⁻³³ Tsa inga quivi, ra tsa cuahán tsihin tsaha, sava ityi ñi tsahan ra naha, tan tsaa nuhu ra nda vehe nu yucú ra naha. Tan ra tsa yosó cuayu can naha ra cuahán ra can naha ra tsihin ra Pablo nda ñuu Cesarea. Tan cuhva tsa tsaa ra naha, nacuhvā ra naha carta can tsi ra Félix, tan tsahā cuenda ndihi ra naha tsi ra Pablo tsi ra. ³⁴ Tsa yahā tsa cahvī ra Félix carta can, quitsahā tsicā tuhun ra tsi ra Pablo nu maa cuvī ñuu ra. Tan tsa tsitō ra tyin ra Cilicia cuvī ra. ³⁵ Tan catyi ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyi un —catyi ra tsihin ra.

Tacan tan tava tyiñu ra na jaha cuenda andaru naha ra tsi ra nda vehe tyiñu tsa javahā ra Herodes tahān tsanaha.

24

Nu cutuñi ra Pablo nuu ra Félix

¹ Yahā uhun quivi tan ra Ananías, ra jutu tsaahnu tsa yihí ndaha inga ca ra jutu, tsaa ra ñuu Cesarea can tsihin taahan ra cuvī mandoñi naha ra, tan tsihin iin ra tsa nañi Tértulo. Ra tsa caahán ndaahvi tsaha nyivi cuvī ra. Tsaa ra can naha ra nuu ra Félix tyin cua ndacan ra naha cuatyi tsaha ra Pablo. ² Tacan tan tava tyiñu ra Félix na quitsi ndaca andaru tsi ra Pablo. Tacan tan quitsahā tsicán ra Tértulo cuatyi tsaha ra. Tan catyi ra tsihin ra Félix:

—Tyahvi nyoo tsi un, tata. Tyin taxin ñi iyó ñuu ndi, tan vaha iyó ndi tyin yihí ndaha vaha un nyivi ñuu ndi. ³ Nacuhvā xaan ndi tyahvi nyoo tsi yoocho tata Félix, tyin vaha xaan iñi un. ⁴ Tan ña cuñi yu jatyañu yu tsi un tsihin tsa cuaha tuhun cua cahan yu, yacan cuenda tsicán yu tumañi iñi tsi un na cuhva un ndatu cahan ndi luxu. ⁵ Tyin tsitó ndi tyin rayiñi ihya ñavin ra vaha cuvī ra. Tandihí ñi ityi jacuvaá ra tsi nyivi Israel. Tan juvin ra cuvī ityi nuu tsihin nyivi tsa nyicún tsi ra Jesús ra ñuu Nazaret. ⁶ Tan cuñi ra javaha ra tsa ndavaha ñi tsitsi vehe ñuhu cahnu. Tan yacan cuenda tiñ ndi tsi ra, tyin tatsi tuñi ndi tsi ra tumaa cuhva catyi ley maa ndi. ⁷ Maa tyin ra Licias, ra cuvī comandante ñihi xaan tyasi ra tan quihñ nyaa ra tsi ra tsi ndi. ⁸ Tan catyi ra tyin tun cuñi ndi ndacan ndi cuatyi tsaha ra, cuñi tsi tsa cahan jihna ndi tsihin un. Yacan nyehē maa un vityin. Janahma un tsi ra tan coto un tyin nditsa tsa caahán ndi —catyi ra Tértulo.

⁹ Tacan tan ra Israel tsa yucú ican, catyi ra naha tyin tandihí maa tsa caahán ra Tértulo tan nditsa. ¹⁰ Tacan tan ra Félix janahā ndaha ra nu nyaá ra Pablo tyin nacahan ra. Tan ra Pablo quitsahā caahán ra tan catyi ra:

—Sii xaan cuñi yu tyin nuu maa un cua cutuñi yu vityin tyin tsitó yu tyin tsa cuaha xaan cuiya ndacá ñaha un tsi nyivi iyó ñuu ihya. ¹¹ Tatun cua nducu tuhun un, cua coto un tyin tsa iyó ñi utsi uvi quivi tsa tsahan yu ñuu Jerusalén tsijacahnu yu tsi Nyoo. ¹² Tan ña cahan yuhu tahan yu tsihin ndi intuhun nyivi. Tan ndi ña jacuvaq yu tsi ñi tsitsi vehe ñuhu cahnu. Nduve maa náa javahā yu tandihí ca vehe ñuhu, tan ndi inga ca ityi tsitsi ñuu. ¹³ Tan cuatyi tsa tyaa ra ihya naha ra siqui yu, ña nditsa. Tyin tandihí maa tsa caahán ra tan ñavin tsa nditsa cuvī tsi. ¹⁴ Maa tyin tsa cua catyi yu tsihin un cuvī tsehe: tyin yuhu jacahnu yu tsi Nyoo. Juvin ra tsa jacahnu tsi tsaahnu yu. Tan jacahnu yu tsi ra tumaa cuhva jacuahā ra Jesucristo. Tan ra ihya naha ra catyi ra naha tyin ña nditsa. Maa tyin yuhu tsitó yu tyin tsa nditsa cuvī tsi. Tyin tandihí tsa nyaá nu libru ley tsa tyaa ra Moisés, tan tsinú iñi yu. Tan tandihí tsa tyaa ra cuvī ndusu yuhu Nyoo tan tsinú iñi yu. ¹⁵ Tan tsinú iñi yu tumaa tsa tsinú iñi ra ihya naha ra tyin nyivi tsa tsihi cua nandoto ñi inga tsaha, tahan ñi nyivi vaha tan nyivi caquiñi. ¹⁶ Tan yacan tacan ñi nducú yu cuhva tsa javaha yu tsa vaha nuu Nyoo, tan nuu nyivi.

¹⁷ Tan tsa yahā juhva cuiya tsa tsicā yu tandihí ñi ityi, tsahan tsaa nuhu yu nda Israel ñuu yu tyin nacuhva cuenda yu xuhun tsa tsahā nyivi tsi yu tsi nyivi ndaahvi tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo. ¹⁸ Yacan javahā yu tsitsi vehe ñuhu cahnu. Tan tsa yahā tsa janduvahā yu tsi yu tumaa catyi ley ndi, tan juhva ra Israel ra tsa queq ityi Asia, nyehē ra naha tsi yu ndacan. Maa tyin nduve nyivi cuaha yucú, tan nduve náa javahā ñi. ¹⁹ Tan ra tsa nyehē tsi yu ndacan naha ra, taahán tsi tsa quitsi maa ra naha cahan ra naha náa cuvī tsa javahā yu o náa cuatyi tyaa ra naha siqui yu. ²⁰ Tatun ña tacan, na catyi tuhun ra tsa nyecú ihya naha ra tatun náa iin cuatyi yu nañihñ ra naha quivi janahmā ra cuvī ityi nuu tsihin nyivi Israel naha ra tsi yu. ²¹ ¿A ñavin cuenda tsatyin cahan yu iin tuhun tsihin ra tsa yucú junta ca? Tan catyi yu: “¿A tatsi tuñi ndo tsi yu tsa cuenda tyin tsinú iñi yu tsa nandoto nyivi tsa tsihi?” —catyi ra Pablo.

²² Tan tsa tsiñi ra Félix tsa cahan ra tacan, tan catyi ra tsihin ra tsa nyecú can:

—Ña cua jandaa naha yu tyiñu ndo vityin. Ndaha ñi nda quitsi ra comandante Lisias tan cua jandaa yu tuhun ihya —catyi ra.

Cahan ra tacan tyin tsitó ra nácaa cuahán tuhun nyivi nyicún tsi ra Cristo.

²³ Tacan tan tava tyiñu ra Félix tsi ra capitán na tinyii nyico ra tsi ra Pablo vehe caa. Maa tyin ña ñihi xaan cua jaha cuenda ra tsi ra. Tan na cuhva ra ndatu na cuhun ra vaha iñi tsi ra nu nyii ra, tan cahan ra naha tsihin ra.

²⁴ Tsa yaha juhva quivi tan tsaá nyico ra Félix inga tsaha tsihin ña Drusila ñasihi ra. Tan ñaha Israel cuvi ña. Tan tava tyiñu ra na quitsi ra Pablo tyin cuñi ñi tyaa soho ñi nácaa tuhun tsa tsinú iñi ra tsi ra Jesucristo.

²⁵ Tan ra Pablo quitsaha caahán ra tuhun nácaa taahán tsi javaha yo tsa vaha cuhva cuñi Nyoo, tan ña cuvi javaha yo tsa ña vaha tsa cuñi cuñu ñuhu yo. Tan coo quivi cua tatsi tuñi Nyoo tsi tandihi nyivi. Tan ra Félix nayuhvi xaan ra, tan catyí ra tsihin ra:

—Cuaahan vityin. Tan na nuña jihna yu, tan cana maa yu tsi un inga tsaha —catyí ra tsihin ra.

²⁶ Tan ra Félix cuñi maa ra tyin ra Pablo cua cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra. ²⁷ Tan tsa yaha uvi cuiya, tacan tan nacoqo tyiñu tsi ra Porcio Festo tyin cundaca ñaha ra. Tyin tsa quita ra Félix. Tan ra Félix ña cuñi ra tsa cahan nyivi Israel tsi ra, yacan cuenda nacoqo ra tsi ra Pablo vehe caa.

25

Nu jandaá ra Festo cuatyí ra Pablo

¹ Tan tsa quihvi ra Festo tsa cua jaha tyiñu ra, tacan tan tsa tsinu uñi quivi quita ra ñuu Cesarea can tan cuahán ra nda ñuu Jerusalén. ² Tan tsa tsaá ra ñuu Jerusalén, tacan tan tsaá ra jutu tsa cuvi ityi nuu, tan ra cumí tyiñu tsa yihí ndaha tsi nyivi Israel. Tan tsican ra naha cuatyí tsaha ra Pablo. ³ Tan tsican ra naha tumañi iñi cahnu tsi ra Festo. Tan catyí ra naha tyin na tava tyiñu ra Festo na quitsi nyico ra Pablo nda ñuu Jerusalén. Tyin ra ican naha ra cua tava tyiñu ra naha na cucañi ra naha tsi ra Pablo ityi cua quitsi ra. ⁴ Maa tyin ra Festo nacahan ra, tan catyí ra:

—Ra Pablo nyii ra vehe caa nda ñuu Cesarea. Tan yuhu tyaa yu cuhva tsa yatyi ñi cua cunuhu nyico yu. ⁵ Yacan cuenda, nyoocho tsa cuvi ndo ra cumí tyiñu ñuu ihya, cuvi cuhun ndo tsihin yu, tan ndacan ndo cuatyí tsaha ra tatun iyó tsa ña vaha javaha ra —catyí ra Festo tsihin ra naha.

⁶ Tacan tan ra Festo ndoo ra ñuu Jerusalén una quivi o utsi quivi ñi tan cuanuhu nyico ra nda ñuu Cesarea. Tan tsa inga quivi tsaá ra tsitsi vehe tyiñu ra tan tsinyaa ra tsa cua tatsi tuñi ra tsi ra iyó cuatyí naha ra. Tacan tan tava tyiñu ra na quitsi ra

Pablo. ⁷ Cuhva tsa quihvi ra Pablo, nu yucú ra naha natuhva ra Israel tsa quee nda ñuu Jerusalén, tan quitsaha tyaa ra naha cuatyí cahnu sigui ra. Maa tyin nduve tsandaa tava ra naha. ⁸ Tacan tan cahan ra Pablo tan catyí ra:

—Yuhu ndi intuhun cuatyí ñaha ca javaha yu, ndi sigui ley nyivi Israel, ndi sigui vehe ñuhu cahnu ñuu Jerusalén, ndi sigui ra cuvi rey cahnu tsa nyaá ñuu Roma —catyí ra.

⁹ Maa tyin ra Festo cuñi ra coo vaha ra tsihin ra Israel naha ra, yacan cuenda tsica tuhun ra tsi ra Pablo:

—¿A cuñi un cuhun un ñuu Jerusalén tyin jandaa yu tyiñu un ndacan? —catyí ra tsihin ra.

¹⁰ Tan ra Pablo nacahan ra tan catyí ra:

—Tsa nyaá yu nu maa un. Tan maa un cuvi ra cumí tyiñu cuenda rey cahnu tsa nyaá ñuu Roma. Ihya cuvi nu taahán tsi tsa cutuñi yu tyin ra ñuu Roma cuvi yu. Tan tsitó vaha un tyin nduve náa javaha yu tsi nyivi Israel. ¹¹ Tun tsatyn javaha yu iin cuatyí cahnu tsa taahán tsi cúu yu, ña cua nducu yu cuhva cacu yu. Maa tyin ña nditsa maa tuhun tsa caahán ra ihya naha ra. Ndi nyoocho tan ndi intuhun nyivi nduve ndatu tsi ndo tsa nacuhva cuenda ndo tsi yu tsi ra ihya naha ra. Tan yacan tsicán yu tsi un tyin na tatsi tuñi ra cuvi rey cahnu tsi yu —catyí ra Pablo tsihin ra Festo.

¹² Tacan tan ra Festo, tsa yaha tsa natuhun tahan ra tsihin ra jatynyeé tsi ra tsihin tyiñu, tan catyí ra tsihin ra Pablo:

—Tsicán un tsa cutuñi un nuu rey cahnu. Vaha. Cua cuhun un nuu maa ra —catyí ra tsihin ra.

Nu nacatyí tuhun ra Festo tuhun ra Pablo tsihin ra Agripa

¹³ Tsa yaha juhva quivi, tan cuahán ra Agripa, ra cuvi rey cuenda nyivi Israel nda ñuu Cesarea. Cuahán ra tsihin ña Berenice nu nyii ra Festo tyin cua cuhva ñi nacumi tsi ra. ¹⁴ Tan ndoo ñi ican juhva quivi, tan ra Festo catyí tuhun ra tsihin ra cuvi rey can tuhun ra Pablo. Tan catyí ra:

—Ra Félix nacoqo ra tsi iin ra vehe caa ihya. ¹⁵ Tan tsa tsahan yu ñuu Jerusalén, ra jutu tsa cuvi ityi nuu, tan ra cuvi mandoñi nyivi Israel, tsican ra naha cuatyí tsaha ra can nuu yu tyin na cuhva yu ndatu tsa cúu ra. ¹⁶ Tan yuhu catyí yu tsihin tandihi ra naha tyin ña tuhva ra cumí tyiñu cuenda ñuu Roma cahñi tsi ndi intuhun nyivi tatun ñaha ca natuhun tahan ñi tsihin ra tsa tsicán cuatyí tsaha ñi, tan nducu ñi cuhva jacacu ñi tsi ñi. ¹⁷ Yacan cuenda, tsa quitsi ra cuvi ityi nuu tsihin nyivi Israel can naha ra ihya, ña ndatu yu. Tan juvin ñi inga quivi can tan tsahan yu vehe tyiñu. Tan tsa yaha tsicunyaq yu tan cana yu tsi ra can.

¹⁸ Maa tyin ra tyaá cuatyi siqui ra, nduve náa tuhun ñiñi cahan ra naha. Tsa cuñi maa yu tyin cahnu cuatyi cua tyaa ra naha siqui ra. ¹⁹ Maa tyin tuhun tsa cahan ra naha cuví tsa cuenda cuhva iyó maa ra naha cuhva tsinú iñi ra naha. Tan cahan ra naha tuhun ra tsa nañi Jesús. Tan catyí ra naha tyin tsa tsihi ra. Maa tyin ra Pablo catyí ra tyin nyito ra. ²⁰ Tan tsa ña ñiñi yu nácaa tatsi tuñi yu tsi ra tsa cuenda tuhun can, tsica tuhun yu tsi ra tan catyí yu tsihin ra tatun cuñi ra cuhun ra cutuñi ra nda ñuu Jerusalén. ²¹ Maa tyin catyí ra tyin vaha ca tatun cutuñi ra nuu ra Augusto nda ñuu Roma. Yacan cuenda tava tyiñu yu na cunyi ra juhva ca quivi tsitsi vehe caa, nda cuenda cuvi jacuhun yu tsi ra nuu ra Augusto —catyí ra Festo tsihin ra Agripa.

²² Tacan tan ra Agripa catyí ra tsihin ra Festo:

—Cuñi tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

²³ Tsa inga quivi can tan tsaá ra Agripa tsihin ña Berenice. Iyo xaan caá ñi quihvi ñi tsitsi vehe, tyin rey cuví ñi. Tan quihvi ndihi tucu ra comandante tan ra cumi tyiñu ñuu can naha ra. Tacan tan ra Festo tava tyiñu ra na cuquihin ra naha tsi ra Pablo. ²⁴ Tacan tan quitsahá catyí ra Festo:

—Yooho Rey Agripa, tan nyoocho tata, tsa yucú ndo ihya. Nyehe ndo tsi ra ihya. Tandihí ra Israel ñuu Jerusalén tan ñuu Cesarea caahán ra naha tyin iyó cuatyi ra. Tan ña jandihí ra naha tsa catyí ra naha tsihin yu tyin taahán tsi cúu ra. ²⁵ Maa tyin tsa cuenda yuhu, nduve cuatyi ra tsa taahán tsi cúu ra. Tan juvin ñi maa ra tsicán tsa cutuñi ra nuu ra Augusto. Yacan cuenda cua jacuhun yu tsi ra ndacan. ²⁶ Maa tyin nduve náa cuatyi ra nañihí yu, yacan cuenda ña ñiñi yu tuhun tyaa yu nu carta tsa cua jacuhun yu tsi ra ndacá ñaha tsi yo. Yacan cuenda tava yu tsi ra nuu ndo, tan nuu yoocho Rey Agripa, tyin tacan tan ndaca tuhun un tsi ra tan coto yu náa taahán tsi jacoto yu tsi ra rey cahnu. ²⁷ Tyin ña vaha tsa jacuhún yu tsi ra tatun nduve náa tuhun caahán yu náa cuatyi javahá ra.

26

Nu quitsahá caahán ra Pablo nuu ra rey Agripa

¹ Tacan tan ra Agripa catyí ra tsihin ra Pablo:

—Cuví cahan un vityin —catyí ra tsihin ra.

Tan ra Pablo jandaá ra ndaha ra tan catyí ra tyehen:

² —Siñ xaan cuñi yu tyin cuví cahan yu nuu yoocho, rey Agripa, tan cuví catyí yu tsihin un nácaa tandihí cuatyi tsa tyaá ra Israel naha ra siqui yu. ³ Tyin yoocho tsitó un tandihí tuhun tsa iyó yu tsa cuví yu nyivi Israel. Tan tsitó un tuhun tuhvá yu caahán yuhu tahan. Yacan cuenda tsicán yu tsi un tyin tyaa soho vaha un tsa cua cahan yu.

Nu catyí tuhun ra Pablo tsihin ra Agripa nácaa ñayivi tsicoo ra tsa ndi cumañi ca quihvi ra cuenda ra Cristo

⁴ Tandihí nyivi Israel tsitó ñi nácaa tsicoo yu nda ñuu yu quivi tsa ndi luhlu yu. Tan tsitó tucu ñi nácaa tsicoo yu nda ñuu Jerusalén. ⁵ Cuaha xaan cuiya nacotó ñi tsi yu. Tatun cua cuhva cuenda ñi cua catyí ñi tyin fariseo cuví yu nda ndi luhlu yu. Tan ra fariseo cuví ra tsa vaha xaan tyaá yahvi ley tsahnu yo tan ñavin ca tandihí nyivi. ⁶ Tan vityin cuñi nyivi Israel tatsi tuñi ñi tsi yu tsa cuenda tyin tsinú iñi yu tsa cua janandoto Nyoo tsi nyivi tsa tsihi, tumaa catyí ra tsihin tsi tsaahnu yo naha ra tahan tsanaha. ⁷ Tandihí nyivi tsa cuví tata tsa utsi uvi taahan sehe ra Israel ndatú tucu ñi nyehe ñi nu cua janandoto Nyoo tsi nyivi tsa tsihi. Tan yacan cuenda ña jandihí ñi tsa javahá ñi tyiñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihya, tyaá ra Israel naha ra cuatyi siqui yu vityin, yoocho rey Agripa. ⁸ ¿A ña tsinú iñi nyoocho tyin Nyoo cua janandoto ra tsi nyivi tsa tsa tsihi?

Nu tsahá cuenda ra Pablo tsi ra Agripa cuhva tsinyaa ndaha ra tsi nyivi yihí cuenda ra Cristo

⁹ Tahan tsanaha juvin ñi maa yu tsicá iñi yu tyin vaha tsa tatsi tuñi yu tsi nyivi tsinú iñi tsi ra Jesús, ra ñuu Nazaret. ¹⁰ Tan tacan javahá yu nda ñuu Jerusalén tsihin ndatu tsa tsahá ra jutu tsa cuví ityi nuu naha ra. Tan cuaha nyivi tsa tsinú iñi tsi ra Cristo tyihí yu vehe caa. Tan tatun tsahñi ra naha tsi ñi, vaha xaan cuñi yu. ¹¹ Tan cuaha xaan tundoho nyehe ñi jahá yu. Tan nducú yu cuhva jañiñi yu tsi ñi na jaña ñi tuhun tsa tsinú iñi ñi tsi ra Jesús. Tacan javahá yu tandihí maa vehe ñuhu nyivi Israel. Javahá yu tacan tsa cuenda tsa xaan cuñi yu nyehe yu tsi ñi. Tan tandihí inga ñuu tsahan yu tsinyaa ndaha yu tsi ñi.

Nu nacatyí tuhun nyico ra Pablo nácaa nanduví ra, ra yihí cuenda ra Cristo (Hechos 9.1-19; 22.6-16)

¹² Tan tsa cuenda yacan cuahán yu nda ñuu Damasco quivi can tyin tsahá ra jutu tsa cuví ityi nuu naha ra ndatu tsi yu. ¹³ Maa tyin ityi cuahán yu cuhva ora cuví tsi, yoocho Rey. Tan quitsj ñuhu ityi siqui. Tan jandunditsjin tsi nu cuahán yu tsihin tandihí ra tsa

cuahán tsihin yu. Maa tyin yaha ca nditsin tsi tan ñavin ca ñuhu ñicanyii. ¹⁴ Tacan tan tandihí ndi nduva ndi nu ñuhu. Tan tsíñi yu iin ndusu tsa caahán tsihin yu, tsihin yuhu yo, tan catyí tsi tsihin yu: “Saulo, Saulo, ¿nacuenda nyaá ndaha un tsi yu? Tumaa iin quití tsañi nyaa ti tsata tsa xaan tsa jaquihín ityi ra tsi ti, tacan javahá un tyin juvin ñi tsi maa un jañicuehé un”, catyí ndusu can tsihin yu. ¹⁵ Tacan tan catyí yu: “¿Yóo yoocho cuví un taa?” Tan Jutu Mañi yo catyí ra tsihin yu: “Yuhu cuví ra Jesús, juvin ra tsa nyaá ndaha un. ¹⁶ Nduvita nyityi. Tyin quituví yu nuu un ihya tyin tacan tan cua jaha tyiñu un nuu yu, tan cua cuví un tsandaa tsa cuenda tsa nyehé un ihya tan tsa cuenda tsa cua nyehé un ityi nuu ca. ¹⁷ Yacan cuenda vityin jacuhún yu tsi un nu iyó nyivi tsa ñavin nyivi Israel cuví tan juvin ñi maa yu cua jacacu yu tsi un ndaha ra Israel naha ra, tan ndaha nyivi tsa ñavin nyivi Israel cuví. ¹⁸ Tan yacan jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu iñi ñi tsi yu tan yuhu cua jaha yu tucahnu iñi cuatyí ñi. Tan cua naquihin ndihí tucu ñi tsa vaha tsa tsahá Nyoo tsi nyivi tsa nacuhvá cuenda tsi ñi tsi yu”, catyí Jutu Mañi yo tsihin yu.

¹⁹ Yacan cuenda yoocho rey Agripa, javahá yu tsa catyí Jutu Mañi yo ra Jesucristo tsihin yu nu janahá ra tsi ra tsi yu. ²⁰ Tacan tan tsa jihna ñi quitsahá caahán yu tuhun ra nda ñuu Damasco. Yaha can tan cahán yu tsihin nyivi ñuu Jerusalén tan tandihí ca ñuu tsa cayucú Judea. Tan caahán ndihí yu tsihin nyivi tsa ñavin nyivi Israel cuví. Tan catyí yu tsihin ñi tyin na ndu uvi iñi ñi cuatyí ñi, tan na tyaa yahvi ñi tsi Nyoo na javaha ñi tsa vaha tumaa javahá nyivi tsa tsinú iñi tsi ra Cristo. ²¹ Tan tsa cuenda tuhun ihya tijn ra Israel naha ra tsi yu tsitsi vehe ñuhu cahnu. Tan cuñi ra naha cahñi ra naha tsi yu. ²² Maa tyin maa Nyoo jatyinyeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandihí nyivi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuví nu cuahán ca tsi, yacan caahán yu. ²³ Tyin catyí ra naha tyin taahán tsi tsa cua nyehé ra Cristo tundoho. Tan tsa yaha tsa cúu ra, cua nandoto ra. Tan jihna ca ra can cua nandoto. Tan cua jandunditsin ra aña nyivi tyin cua jacoto ra nácaa cua cacu ñi, tahan ñi nyivi Israel tan nyivi tsa ñavin nyivi Israel cuví —catyí ra Pablo.

Nu nducú ra Pablo cuhva tsa tsinu iñi ra rey Agripa tsi ra Cristo

²⁴ Cuhva tsa catyí ra Pablo tuhun ihya, ra Festo cana tsa ra, tan catyí ra:

—¡ñiñi yoocho ña vaha cuñi, Pablo!, tsa cuenda tsa cuaha xaan cahví un tan ndusaná iñi un —catyí ra Festo tsihin ra.

²⁵ Maa tyin ra Pablo catyí ra tsihin ra:

—Ñavin iñi yu ña vaha cuñi, yoocho tata Festo. Tyin tsa caahán yu, maa ñi tsa nditsa tan tsa vaha cuví tsi. ²⁶ Ihya nyaá ra rey Agripa. Tan tsitó vaha ra tuhun ihya. Yacan cuenda ña yí caahán yu tuhun yu tsihin ndo. Tyin tsitó yu tyin tsitó tucu maa ra tuhun ihya, tyin ñavin tuhun xeehe cuví tsi. ²⁷ Yoocho rey Agripa, ¿a tsinú iñi un tuhun tsa tyaa ra cuví ndusu yuhu Nyoo tahan tsanaha? Yuhu tsitó yu tyin tsinú iñi un —catyí ra Pablo tsihin ra Agripa.

²⁸ Tacan tan ra Agripa catyí ra tsihin ra:

—¿A cuñi yoocho tsa natsinu iñi yu tsa caahán un tan quihvi yu cuenda ra Jesús? —catyí ra rey Agripa tsihin ra Pablo.

²⁹ Tacan tan ra Pablo catyí ra:

—Na cuhva Nyoo tsa tsinu iñi un, a vityin a ndi cucuee ca. Maa tyin ñavin yoocho ñi, tyin na tsinu ndihí tucu iñi tandihí nyivi tsa yucú tyaa soho tsa caahán yu ihya. Intuhun ñi tsa ña cuñi yu, tsa quihí cadena ndaha ndo tumaa maa yu vityin —catyí ra Pablo.

³⁰ Tsa yaha tsa cahán ra Pablo tuhun ihya, nduvitá rey tan ra ndacá ñaha tan ña Berenice, tan tandihí ra yucú ican naha ra. ³¹ Tan tsa yaha quita ñi, tan quitsaha natuhún tahan ñi:

—Nduve cuatyí ra ihya tsa ñiñi xaan. Ña taahán tsi cúu ra. Tan ndi ña taahán tsi cunyií ca ra vehe caa —catyí ñi.

³² Tan ra Agripa catyí ra tsihin ra Festo:

—Cuví jaña yo tsi ra, tun tsatyin ña tsican ra tsa cutuñi ra nuu ra cuví rey cahnu —catyí ra.

27

Nu jacuhún ra Festo tsi ra Pablo nda ñuu Roma

¹ Quivi tsa tyaa ra Festo tan ra Agripa cuhva tyin jacuhún ra naha tsi ndi nda ñuu Roma tsa canyí Italia, nacuhva cuenda ra naha tsi ra Pablo tan tsi juhva ra tsa iyó cuatyí naha ra tsi iin ra capitán tsa nañi Julio. Yihí ra batallón andaru, tsa nañi Cuenda Ra Augusto. ² Tan cuahán ndihí tucu ra Aristarco tsihin ndi. Ra tsa quee ñuu Tesalónica tsa canyí ityi Macedonia cuví ra. Tacan tan quihvi ndi tsitsi iin yutun ndoo tsa quee ñuu Adramitio tyin tsa yatyin cuíi cuhun nyico tsi ñuu tsa cayucú Asia yatyin ñi yuhu ndutya ñuhu. ³ Tsa inga quivi tsaa ndi puerto Sidón. Tan ra Julio vaha nyivi cuví ra tsihin ra Pablo. Tan tsaha ra tsa cuhun ra Pablo nu iyó ra vaha iñi tsi ra ñuu can tan jatyinyee ra naha tsi ra. ⁴ Yaha can

tan quita⁶ ndi ñuu Sidón tan janda⁷ ra naha jahma tsa nyisó yutun ndoo can tan tsihin tsa tandahá⁸ tatyí jahma can tan cuahán ndi. Tan ñihi⁹ xaan yihí tatyí ityi nu cuahán ndi. Yacan cuenda yaha¹⁰ tsiyo ndi ityi xiin cuaha ñuhu Chipre, tyin ña ñihi xaan yihí tatyí ityi can. ⁵ Tacan tan yaha¹¹ sava ndi nu ndutya ñuhu ityi nuu Cilicia tan Panfilia, tan tsa¹² ndi iin ñuu tsa nañi Mira tsa canyíi Licia. Tan quita¹³ ndi tsitsi yutun ndoo can.

⁶ Tan ican nañihí ra capitán cuenda andaru inga yutun ndoo tsa quee¹⁴ nda ñuu Alejandria tan cua cuhun tsi nda Italia. Tan catyí ra capitán can na quihvi ndi tsitsi yutun ndoo can tyin tsa cua cuhun ndi nda nu cuahán ndi. ⁷ Cuaha quivi tsicá¹⁵ ndi tyin cuee ñi cuahán ndi. Tsihin tundoho tan tsa¹⁶ ndi yatyin ñi ñuu Gnido. Tan tsa cuenda tsa ñihi xaan yihí tatyí tsa vatsí ityi tyisó ñicanyii, ña tsa¹⁷ tsi tsa cuhun ca ndi ityi nuu, tan yaha¹⁸ ndi yatyin ñi ñuu Salmón tsa canyíi ñuhu Creta. Tan navico¹⁹ ndi ityi yuhu ñuhu Creta. ⁸ Nducu²⁰ ndi cuhva tsa cuhun ndi yuhu ndutya ñuhu, maa tyin tsihin tundoho tan tsa²¹ ndi nu nañi Buenos Puertos yatyin ñi ñuu Lasea.

⁹ Tsa cuaha xaan quivi yaha²² tyin cuee xaan tsicá²³ ndi tsa cuenda tatyí tan ica xaan nanduví²⁴ tsa yaha ndi nu ndutya ñuhu. Tyin tsa yaha²⁵ quivi vico nu iyó nyitya nyivi Israel. Tan tsa cua cuyatyn yoo vitsin. Yacan cuenda ra Pablo tsa²⁶ cuenda ra tsi ra jacacá yutun ndoo can naha ra, ¹⁰ tan catyí ra:

—Tandihi nyoo²⁷ho ra yucú²⁸ ihya, tyaa²⁹ soho ndo tuhun tsa cua cahan yu. Nyehé³⁰ yu tyin ica xaan cuhva cuahán³¹ yo. Tan tuvi iñi³² yu tyin cua cunaa yutun ndoo tsihin tandihí³³ tsa nyisó³⁴ tsi, tan nda cuanda maa³⁵ yo cuví³⁶ cunaa yo. Vaha³⁷ ca tatun ndoo yo ihya —catyí³⁸ ra tsihin ra naha.

¹¹ Maa tyin ra capitán cuenda andaru can tyaa³⁹ yahví⁴⁰ ca ra tsi ra jacacá yutun ndoo tan ra cuví⁴¹ tsitoho yutun ndoo tan ñavin⁴² ca tsi ra Pablo. ¹² Ña⁴³ cuví⁴⁴ yaha ndi yoo vitsin ican tyin ñihi xaan tuhvá⁴⁵ tatyí yihí, tan ica xaan cuenda yutun ndoo. Yacan cuenda catyí⁴⁶ tandihí⁴⁷ ra naha:

—Vaha⁴⁸ ca tsa quita⁴⁹ yo ihya tan nducu⁵⁰ yo cuhva cuhun yo nda ñuu Fenice tsa canyíi⁵¹ juvin ñi ñuhu Creta ihya. Yacan cuví⁵² iin nu vaha cunyaa yutun ndoo tyin ña ñihi xaan yihí⁵³ tatyí tyin ñuu can canyíi⁵⁴ tsi tsiyo cana ñicanyii⁵⁵ —catyí⁵⁶ ra naha.

Nu ñihi xaan yihí tatyí nu ndutya ñuhu

¹³ Tacan tan quitsaha⁵⁷ yihí luxu tatyí tsa quitsí⁵⁸ ityi sur. Tan cuñí⁵⁹ maa ra naha tyin vaha xaan tyin ñavin⁶⁰ tatyí ñihi cuví⁶¹ tsi. Tyin tacan tan cuví⁶² cuhun ndi tsihin yutun ndoo yatyin ñi yuhu ñuhu Creta can. ¹⁴ Ña cuaha

ñi tsicá⁶³ ndi tan quitsaha⁶⁴ yihí tatyí xaan tsa quitsí⁶⁵ ityi norte. Tan tandahá⁶⁶ tsi yutun ndoo inga ityi. ¹⁵ Tan ña⁶⁷ cuví⁶⁸ ca cuhun ndi ityi nuu ca tsa cuenda tatyí can. Tan jaña⁶⁹ ndaha ndi na cuhun maa yutun ndoo tsihin tatyí ndaa⁷⁰ ityi cuñí⁷¹ maa tsi. ¹⁶ Tan yaha⁷² ndi ityi tsata iin ñuhu luhlu tsa nañi⁷³ Claudia tyin ña ñihi xaan yihí tatyí ityi can. Tan tsihin tundoho naquihín⁷⁴ ndi yutun ndoo luhlu tsa ixtá⁷⁵ caa yutun ndoo, tan natyihí⁷⁶ ndi tsa luhlu can ityi tsitsi yutun ndoo cahnu coto nyee tsi tsitsi ndutya. ¹⁷ Tan tsa yaha⁷⁷ natyihí⁷⁸ ra naha yutun ndoo luhlu can, tacan tan sutya⁷⁹ ra naha xuu yutun ndoo cahnu tan tsahñi⁸⁰ ra naha yutun ndoo can tsihin taahan yoho tyin coo tunyee iñi⁸¹ itsi. Tan yuuhvi⁸² ra naha coto tahan ra naha nu yaxin ndutya tan vicun yutun ndoo can tsitsi nyiti⁸³ vita iyó yuhu ndutya ñuhu nu nañi⁸⁴ tsi Sirte. Yacan cuenda januu⁸⁵ ra naha jahma yutun ndoo can tan tsaha⁸⁶ ra naha tsa cuhun tsi cuhva tandahá⁸⁷ tatyí. ¹⁸ Tan tsa inga quivi⁸⁸ juvin ñi ñihi xaan yihí tatyí. Yacan cuenda quitsaha⁸⁹ tyihí⁹⁰ ra naha carga tsa yihí tsitsi yutun ndoo can nuu ndutya ñuhu. ¹⁹ Tan tsa tsinu⁹¹ uñi quivi quihín⁹² ndi ndaha tyiñu⁹³ yutun ndoo can tan tyihí⁹⁴ ndi nu ndutya ñuhu. ²⁰ Tan cuaha quivi⁹⁵ ña nyehé⁹⁶ ndi ñicanyii tan ndi tiñuu. Tan ñihi xaan tandahá⁹⁷ tatyí tsi ndi. Yacan cuenda ña tyaa⁹⁸ ca ndi cuhva tsa cua cacu⁹⁹ ndi.

²¹ Cuaha quivi yaha¹⁰⁰ tan ña tsatsí¹⁰¹ ndi. Tacan tan catyí¹⁰² ra Pablo tsihin tandihí¹⁰³ ra naha:

—Nyehé¹⁰⁴ ndo, vaha¹⁰⁵ ca tun tsatyn tyaa¹⁰⁶ yahví¹⁰⁷ ndo tuhun tsa cahan yu quivi¹⁰⁸ can, tan ndoo¹⁰⁹ yo ñuhu Creta. Tan vityin cuaha xaan tundoho nyehé¹¹⁰ yo tan cuaha xaan ndaha tyiñu¹¹¹ jacunaá¹¹² yo. ²² Tan cua cunaa ndihí¹¹³ yutun ndoo ihya, maa tyin ña caca iñi¹¹⁴ ndo tyin ndi intuhun yo tan ña¹¹⁵ cua cúu¹¹⁶ yo. ²³ Tyin Nyoo¹¹⁷ cuví¹¹⁸ ra yihí ndaha tsi yu, tan jahatyíñu¹¹⁹ yu tyiñu¹²⁰ ra, juvin¹²¹ ra janaha¹²² ra iin tsa janaha¹²³ tsi yu cuñi. Tan quituví¹²⁴ iin ángel¹²⁵ nuu yu. ²⁴ Tan catyí¹²⁶ ángel¹²⁷ can tsihin yu: “Ña¹²⁸ nayuhvi¹²⁹ un, Pablo. Tyin cuñí¹³⁰ tsi tsa cahan un tuhun Nyoo¹³¹ nuu ra rey cahnu Augusto¹³² nda ñuu Roma. Tan tsa cuenda un cua jacacu Nyoo¹³³ tandihí¹³⁴ ra yucú¹³⁵ tsihin un tsitsi yutun ndoo”, catyí¹³⁶ ángel¹³⁷ can tsihin yu. ²⁵ Yacan cuenda nyoo¹³⁸ho tsa yucú¹³⁹ tsitsi yutun ndoo ihya¹⁴⁰ jandu iin ndo iñi¹⁴¹ ndo. Tyin yuhu tsinú¹⁴² iñi yu tsi Nyoo. Tan tsitó¹⁴³ vaha yu tyin cua cuví¹⁴⁴ tumaa cuhva catyí¹⁴⁵ ángel¹⁴⁶ can tsihin yu. ²⁶ Vasu¹⁴⁷ cua nyee yutun ndoo ihya, maa tyin cua tsa¹⁴⁸ yo iin ñuhu luhlu —catyí¹⁴⁹ ra Pablo tsihin tandihí¹⁵⁰ ndi.

²⁷ Tan tsa ndihí¹⁵¹ tsahun quivi¹⁵² tsa tsicá¹⁵³ ityi ndi. Iin tsacuaa¹⁵⁴ yucú¹⁵⁵ ndi nu ndutya ñuhu Adria. Tan tsata¹⁵⁶ can tsata ihya tandahá¹⁵⁷ tatyí yutun ndoo ndi nu ndutya ñuhu. Tan

maa ñuu cuví cuhva can tan tuvji iñi ra jacacá yutun ndoo can naha ra tyin cua tsaa ndi iin ñuhu. ²⁸ Tacan tan tyihji cuhva ra naha cuhva cunu yihí ndutya. Tan nyehe ra naha tyin oco tsahun iin taahan metru iyó. Cuahán ndi luxu ca ityi nuu ca. Tan tyihji cuhva ra naha inga tsaha. Tan iyó oco utsa metru. ²⁹ Tan yuuhvi ra naha coto nañi yutun ndoo can tsata yuu. Yacan cuenda januu ra naha cumi taahan caa vee tsa iyó cantu nuu ityi tsata yutun ndoo tyin na ña cuhun ca tsi ityi nuu. Tan tsa cuñi ra naha tsa cunditsin. ³⁰ Tan ra jacacá yutun ndoo can naha ra tyaq ra naha cuhva cunu xeehe ra naha. Tan yacan cuenda quitsahá januu ra naha yutun ndoo luhlu can nu ndutya ityi nuu yutun ndoo can. Tan jahá ñi maa ra naha tyin inga caa cua januu ra naha. ³¹ Maa tyin ra Pablo jacoto ra tsi ra capitán tan tsi andaru tan catyi ra:

—Tatun ña cua ndoo ra can naha ra tsitsi yutun ndoo, nyooho ña cua cuví cacu ndo —catyi ra tsihin ra naha.

³² Tacan tan andaru tsahnyá ra naha yoho yutun ndoo luhlu can. Tan jacanacavá ra naha can nu ndutya. ³³ Tan tsa naa ca ra Pablo catyi ra tsihin tandihi ra naha:

—Tsa iyó utsi cumi quivi tsa ña tsatsí ndo tan ña quixi ndo. ³⁴ Catyi yu tsihin ndo, catsi ndo vityin. Ñiñi xaan cuñi tsi tsa catsi yo tyin tacan tan ndunyee cuñi ñuhu yo. Tyin cua cacu yo tan ndi intuhun ixi jiñi yo tan ña cua cunaa.

³⁵ Tan tsa catyi ra Pablo tuhun ihya, quihñ ra iin paan tan nacuhvá ra tyahvi nyoo tsi Nyoo nuu tandihi ra naha. Tacan tan tahvi ra tan quitsahá tsatsí ra. ³⁶ Tacan tan tandihi ra naha ndu iin ca iñi ra naha tan tsatsi ndihi ra naha. ³⁷ Tan tsa tandihi ndi tsa yucú ndi tsitsi yutun ndoo can, quita uvi cientu uñi xico tsahun iin ndi. ³⁸ Cuhva tsa ndihi tsatsi ra naha cuhva cuñi ra naha tan jacuhun ra naha yitin tsa yihí trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsaa tsi yatyin ñi yuhu ndutya.

Nu nyeeg yutun ndoo

³⁹ Yahá can tan cunditsin. Tan nyehe ra tsa jacacá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaq ra naha cuhva nyehe ra naha tatun cuví jacuhun ra naha yutun ndoo ican. ⁴⁰ Tsahnyá ra naha yoho tsa nuuhñi caa vee can. Tan nacoq ra naha can tsitsi ndutya ñuhu. Tan jandutaya ra naha vitu tsa janavicó yutun ndoo. Tacan tan jandaa ra naha jahma tsa tuhvá ticaá ityi nuu tsi. Tan quitsahá quihñ tatyí jahma can, tan jacuhún tsi yutun ndoo nda nu iyó nyiti can. ⁴¹ Tan tsaa tsi nu tatahán ndutya. Tan nyeeg jiñi tsi tsitsi nyiti. Tan ña cuví ca

tava ra naha itsi. Tan ityi xuu tsi quitsahá tahvi cuatyí can tsa cuenda tsa ñiñi xaan cañi ndutya ñuhu can. ⁴² Tacan tan andaru cuñi ra naha cahñi ra naha tsi ra cuahán cua cutuñi naha ra tyin coto cunu ra naha. ⁴³ Maa tyin capitán andaru cuñi ra jacacu ra tsi ra Pablo. Yacan cuenda ña tsahá ra tsa cahñi ra naha tsi ra can naha ra. Tan catyi ra tyin ndáa ra tsitó sutya, na cuhun cuee ñi ra naha nu ndutya tan quita ra naha nda ñuhu ityi. ⁴⁴ Tan tandihi ca ra tsa ña cuví sutya, na cuhun ra naha nu vitu tsa nyisó yutun ndoo, tan juhva ra naha na cuhun ra naha tsihin vitu tsa tahvi cuatyí jahá ndutya ñuhu. Tan tacan cacu tandihi ndi tan quita ndi ñuhu ityi.

28

Nu nyii ra Pablo ñuhu Malta

¹ Cuhva tsa tsa yahá cacu ndi tan catyi nyivi iyó ñuhu can tyin nu yucú ndi can nañi tsi Malta, o Melita. ² Tan vaha xaan natuhún ñi tsihin ndi. Tan jatahan ñi ñuhu tyin cuñ saví tan vitsin xaan. Tan catyi ñi tsihin tandihi ndi, na natuhva ndi yuhu ñuhu can tyin quita tsa vitsin tsi ndi. ³ Tacan tan ra Pablo naquihñ ra juhva nducu ityi. Tan tsitsi tsa tyihí ra can nu ñuhu, quita iin coo tsitsi nducu can, tsa cuenda tsa ihñi. Tan tsatsi yihí ti ndaha ra, tan ticaá tsico ti ndaha ra. ⁴ Cuhva tsa nyehe nyivi ñuhu can tyin ticaá coo can ndaha ra, quitsahá natuhún tahan ñi tan catyi ñi:

—Ra ihya nyivi tsahñi ra, tun cuví, tyin vasu cacu ra nu ndutya ñuhu, maa tyin Nyoo ña tsahá ca ra tsa coo ra tsa cuenda cuatyí ra —catyi ñi.

⁵ Maa tyin ra Pablo naquisi ra tsi coo can, tan canacavá ti nu ñuhu, tan nduve náa tahan ra. ⁶ Tandihí ñi ndatú ñi náa cuhva ndaa nu tyaq ti, a náa cuhva cua cúu ra. Maa tyin tsa yahá ndatu xaan ñi, tan nyehe ñi tyin nduve maa náa tahan ra. Tacan tan nasamá ñi cuhva tsicá iñi ñi, tan quitsahá catyi ñi:

—Ra ihya cuví iin nyoo —catyi ñi.

⁷ Yatyin ñi can canyií ñuhu ra yihí ndaha ñuhu can. Tan nañi ra Publio. Tan vaha xaan caahán ra tsihin ndi. Tan vaha xaan tyanuu ra tsi ndi, tsa uñi quivi tsa yucú ndi vehe ra. ⁸ Tan jutu ra ñiñi xaan cuuhvi ra tsihin cahñi tan tsa tsiyó ra. Tan tsahan ra Pablo tsinyeha ra nu canyií ra. Tan tsican tahvi ra tsa cuenda ra, tan tyiso ndaha ra jiñi ra. Tacan tan nduvahá ra. ⁹ Yahá can tan quitsahá tsáa cuaha nyivi cuuhvi tsa iyó ñuu can. Tan nduvahá ndihí ñi. ¹⁰ Tan tandihí ñi vaha xaan tyanuu ñi tsi ndi. Tan quivi quihvi ndi tsitsi iin yutun ndoo tsa cua cuhun ndi, tsahá ñi tandihí tsa cua cutyiñu ndi ityi cuhun ndi.

Nu tsaq ra Pablo ñuu Roma

¹¹ Uñi yoo tsiyucú ndi ñuhu Malta can. Tacan tan quihvi ndi tsitsi iin yutun ndoo tsa quee nda ñuu Alejandria tsa canyii nu cuví Egipto. Tan ndoo tsi Malta nda yaha yoo vitsin. Tan jiñi yutun ndoo can nyecú tsa caá tumaa caá nyoo Cástor tan nyoo Pólux. ¹² Tan tsaq ndi ñuu Siracusa. Tan ican ndoo ndi uñi quivi. ¹³ Tacan tan quita ndi tan cuahán ndi ityi yuhu ndutya ñuhu nda cuanda tsaq ndi ñuu Regio. Tan tsa inga quivi can ñihi xaan yihí tatyí tsa quitsi ityi sur tan tsica ndi uvi quivi tan tsaq ndi ñuu Puteoli. ¹⁴ Ican ñihí tahan ndi tsihin juhva ra hermano naha ra. Tan catyí ra naha tsihin ndi tyin ndoo ndi iin vitya tsihin ra naha. Yaha can tan cuahán ndi nda ñuu Roma. ¹⁵ Tan nyivi yihí cuenda ra Cristo ñuu Roma can ñihí tuhun ñi tyin cua tsa ndi. Tan tsahan ñi tsijatahan ñi tsi ndi ityi. Juhva ñi ndatú tsi ndi Nuyahví Apio. Tan inga ñi ñihí tahan ñi tsihin ndi nda nu nañi Tres Tabernas. Tan tsa nyehe ra Pablo tsi ñi, nacuhva ra tyahvi nyoo tsi Nyoo. Tan ndu iin ca iñi ra. ¹⁶ Cuhva tsa tsaq ndi ñuu Roma can, ra capitán can nacuhva cuenda ra tsi ra iyó cuatyí can naha ra tsi ra yihí ndaha vehe caa. Tan tsaha ra can tsa coo siin ra Pablo. Tan jahá cuenda intuhun ñi andaru tsi ra.

Nu caahán ra Pablo tuhun Nyoo ñuu Roma

¹⁷ Tsa yaha uñi quivi tsa tsaq ndi ican, tacan tan tava ra Pablo tyiñu na quitsi ra cuví ityi nuu tsihin nyivi Israel tsa iyó ñuu Roma can naha ra. Tan cuhva tsa ndu iin ra naha, quitsaha catyí ra tsihin ra naha:

—Nyooho yañi, vasu nduve náa javaha yu tsi nyivi Israel tahan yo, tan ndi nduve náa javaha yu siqui tuhun tsahnu cuhva iyó yo, maa tyin tsaha cuenda ra Israel naha ra tsi yu tsi ra ñuu Roma naha ra. Tan tsinyii yu vehe caa ñuu Jerusalén ndaha ra ñuu Roma naha ra. ¹⁸ Tan tsa jaquee yuhu ra naha tsi yu, cuñi ra naha jaña ra naha tsi yu. Tyin ña taahán tsi cúu yu tyin nduve cuatyí javaha yu. ¹⁹ Maa tyin ra Israel tsa iyó nda ñuu Jerusalén naha ra nduxaan xaan ra naha tan yacan cuenda tsican yu tsa cutuñi yu nuu ra cuví rey cahnú. Vasu nduve cuatyí cua tyaa maa yu siqui ra naha. ²⁰ Yacan cuenda caná yu tsi nyooho tyin nacoto yu tsi ndo, tan catyí tuhun yu tsihin ndo tyin nuuhii yu tsihin cadena vityin tsa cuenda tsa tsinú iñi yu tsi ra tsa ndatú xaan yo tsa cuví yo nyivi Israel —catyí ra Pablo.

²¹ Tacan tan catyí ra Israel naha ra tsihin ra Pablo:

—Ña tsitó ndi tuhun yoocho. Tan yofi jacoto tsi ndi, ndi tsihin carta, tan ndi ra ñuu yo tsa quee nda Judea ña cahan ra naha tuhun yoocho, tan nduve náa cahan ra naha

siqui un. ²² Maa tyin cuñi ndi tyaa soho ndi tuhun tsicá iñi un. Tyin tsitó ndi tyin tandihi ñi ityi tan caahán nyivi siqui tuhun tsaahya —catyí ra Israel naha ra tsihin ra Pablo.

²³ Tacan tan natuhun tahan ra naha ndaa quivi cua cuhun ra naha inga tsaha. Tsa tsaq quivi can, tsaq cuaha nyivi nu iyó ra Pablo. Tan quitsaha caahán ra nda tsa tuvi tan nda cuanda tsacuaa nácaa ndacá ñaha Nyoo. Tan tsihin ley Nyoo tsa tyaa ra Moisés tan tuhun tsa tyaa ra cuví ndusu yuhu Nyoo tahan tsanaha, jacuahá ra tsi ñi tyin ra Jesús cuví ra tsa jacacú tsi yo. Tan tacan javaha ra Pablo tyin cuñi ra tsa tsinu iñi ñi tsi ra Jesús.

²⁴ Yihí ñi tsinú iñi ñi tsa caahán ra. Tan inga ñi ña tsinú iñi ñi. ²⁵ Tan ña iin tsicá iñi ñi, siin siin tuhun caahán ñi. Tan quitsaha tsinuhú ñi. Tan ra Pablo catyí ra tsihin ñi:

—Nditsa tsa cahan Tatyí Ii Nyoo tsihin ra Isaías ra cuví ndusu yuhu ra tahan tsanaha, tyin na cahan ra tsihin tsii tsahnu yo. Tan catyí ra:

²⁶ Cuaahan tan cahan un tyehen tsihin nyivi ihya: Nyoocho cua cuñi ndo tuhun Nyoo, maa tyin ña cua cutuñi iñi ndo.

Cua nyehe ndo tsihin tinuu ndo tsa cua javaha Nyoo, maa tyin ña cua nacoto ndo tsa nyehe ndo.

²⁷ Tyin añima ñi tsa ndundava xaan tsi.

Tsiñi ñi, maa tyin ña tyaa yahvi ñi.

Tan ndasí tinuu ñi, tyin tacan tan ña cua cuví nyehe ñi.

Tan ña cua cuñi ñi tsihin soho ñi.

Tan ña cua cutuñi iñi ñi tsihin añima ñi.

Yacan cuenda ña cuñi ñi quihvi ñi tsitsi ndaha yu na janduvaha yu tsi ñi.

Tacan catyí ra Isaías jaha Tatyí Ii Nyoo tahan tsanaha.

²⁸ Coto vaha nyoocho tyin vityin tan ityi nuu ca cuhun yu cua jacoto yu tsi nyivi tsa ñavin nyivi Israel cuví tyin jacacú Nyoo tsi ñi. Tan maa ñi cua tyaa soho ñi —catyí ra Pablo tsihin ñi.

²⁹ Cuhva tsa catyí ra Pablo tyehen, ra Israel cuahán ra naha juvin ñi caahán yuhu tahan ra naha tsa cuenda tuhun tsa cahan ra Pablo tsihin ra naha.

³⁰ Uvi cuiya ndoo ra Pablo vehe nu nyii ra cuenda yoo ñuu Roma can. Tan vaha caahán ra tsihin tandihi nyivi cuahán vehe ra. ³¹ Tan tsihin tsa ñi iñi ra tan caahán ra tuhun nácaa ndacá ñaha Nyoo tsi yo. Tan jacuahá ra tuhun Jutu Mañi yo ra Jesucristo. Tan yofi tyasi nu caahán ra.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Roma

Nu quitsahá tyaá ra Pablo carta

¹ Yuhu ra Pablo cuví yu iin ra jahá tyiñu tyiñu ra Jesucristo. Caná Nyoo tsi yu, tan nacatsí ra tsi yu tyin caca yu jacoto yu tuhun tsa jacacú ra tsi yu tsi nyivi. ² Tan tuhun ihya cuví tsa cahán Nyoo tsihin ra cuví ndusu yuhu ra tahanan tsanaha tyin tyaá ra naha nu tutu ra. ³ Juvín tuhun ihya caahán tyin Jutu Mañi yo Jesucristo, Sehe Nyoo, quítsi ra nu ñuhu ñayivi tan nanduví ra tumaa maa yo. Tan cuví ra tata ra rey David. ⁴ Tan Nyoo jacotó ra tsi yu tsihin Tatyí Ii ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsa iyó tsi ra. ⁵ Tan tsa cuenda ra Jesucristo tsahá Nyoo tumañi iñi tsi ndi tsa caca ndi tyiñu ra, tyin na tsinu iñi nyivi iyó nanií cahnu nu ñuhu ñayivi tsi ra tan na tyaá yahvi ñi tsi ra. ⁶ Tan juhva ñi ican cuví tucu nyoocho tyin tsa nacatsí ra Jesucristo tsi ndo tyin cuví ndo nyivi cuenda ra.

⁷ Jaquitsí yu carta ihya tsi tandihí nyoocho tsa iyó ñuu Roma. Nyoo cuñi xaan ra tsi ndo tan caná ra tsi ndo tyin cuví ndo nyivi ra tan jacahnu ndo tsi ra. Naquihin ndo tsa vaha tan na coo tsa taxin aña ndo jahá Jutu yo Nyoo tan Jutu Mañi yo Jesucristo.

Nu catyí ra Pablo tyin cuñi ra cuhun ra ñuu Roma

⁸ Tsa jihna ñi, tsahá yu tyahvi nyoo tsi Nyoo tsihin sivi ra Jesucristo tsa cuenda tandihí nyoocho tyin tandihí ñi ityi caahán nyivi tyin tsinú xaan iñi ndo tsi ra Jesucristo. ⁹ Jahá tyiñu yu tyiñu Nyoo tsihin tsa ñi iñi aña yu. Tan caahán yu tsihin nyivi nácaa jacacú Sehe ra tsi yu. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo. ¹⁰ Tan tsicán yu tsi ra na cuví cuhva cuñi ra, tan quitsi yu nu yucú ndo, tyin tsanaha xaan cuñi yu quitsi yu. ¹¹ Tyin cuñi yu jatyinyee yu tsi ndo, tan naquihin ndo tsa vaha tsa tsahá ra tsi yu tan cunyicun ñihi ca ndo tsi ra. ¹² Tsa cuñi yu cahan yu tsihin ndo cuví tuhun ihya: tsa jandu iin tahan yo iñi yu tsihin tsa tsinú iñi yu tsi ra.

¹³ Yañi, cuñi yu tsa coto ndo tyin cuaha xaan tsaha cuñi yu quitsi yu quitsi nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñi yu quitsi yu ñuu ndo tyin cuñi yu cahan ca yu tuhun Nyoo tsihin nyivi tyin tacan tan nducuaha ca ñi tsinu iñi tsi ra, tumaa javahá yu tsihin nyivi inga ca ñuu. ¹⁴ Tyin tsa ñiñi

cuñi tsi cahan yu tuhun tsa jacacú ra Cristo tsi yu tsihin nyivi Grecia tan nyivi inga ñuu; tahan ñi nyivi tsa tsitó xaan tan nyivi soho. ¹⁵ Yacan cuenda, cuñi yu cahan yu tuhun ra Cristo tsihin nyoocho tsa iyó ndo Roma ihya.

Tuhun Nyoo iyó xaan tunyee iñi itsi

¹⁶ Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandihí nyivi tsa tsinú iñi tsi ra Cristo. Tsa jihna ñi maa ñi maa tsihin nyivi Israel cahán ndi tuhun ra Cristo, maa tyin vityin caahán ndihí tucu ndi tsihin nyivi tsa ñavin nyivi Israel cuví. ¹⁷ Tyin tuhun Nyoo ihya, janahá tsi tsi yu nácaa janduvahá Nyoo tsi yu. Tan juvín ñi tsahá cuenda tucu tsi tsi yu, tyin janduvahá ra tsi yu tsa cuenda tsa tsinú iñi yu tsi ra tan ñavin náa inga ca cuenda. Catyí nu tutu ra: “Nyivi tsa janduvahá Nyoo aña, iyó ñi ñayivi tsa tsihin tsa tsinú iñi ñi tsi ra.”

Tandihí nyivi tan iyó cuatyí ñi

¹⁸ Nyehe yu tyin Nyoo, ra nyaá gloria, tatsí tuñi ra tsi nyivi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyivi tsa nditsa. ¹⁹ Tsitó ñi tsa iyó Nyoo tyin juvín ñi maa ra janahá can tsi ñi. ²⁰ Ña cuví catyí yu tyin nduve Nyoo iyó tyin vasu ndi maa ña nyehe yu tsi ra, maa tyin cuví coto yu tsa iyó ra tsihin tsa nyehe yu tandihí tsa javahá ra. Tsanaha javahá ra ñuhu ñayivi tan yacan janahá tsi yu tyin iyó Nyoo tan iyó tunyee iñi tsi ra. Nyivi tsa ña cuñi coto tsi Nyoo ña cua coo tucanhnu iñi tsi ñi. ²¹ Vasu ndi maa tsitó ñi tsa iyó Nyoo tsihin tsa nyehe ñi tandihí tsa javahá ra, ña cuñi ñi jacahnu ñi tsi ra tumaa taahán maa tsi jacahnu yu tsi ra. Ña tsahá ñi tyahvi nyoo tsi Nyoo tyin maa ñi maa tsa iyó nu ñuhu ñayivi tyaá jiñi ñi. Tan tsa cuenda yacan ndusohó ñi. ²² Vasu ndi maa catyí ñi tyin tsitó xaan ñi, maa tyin ña nditsa tyin nduve náa tsitó ñi. ²³ Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa cáa tumaa cáa nyivi tuhva tsiihi, tan nda cuanda tsitoho tsa cáa tumaa cáa saa, tan coo, tan quiti iyó cumi tsaha.

²⁴ Yacan cuenda nacoó Nyoo tsi ñi nu tsa caquiñi tsa javahá ñi. Tan javahá ndihí tucu ñi tsa caquiñi tsihin cuñi ñuhu iin ñi tan inga ñi tan cuví can ticanuu. ²⁵ Ña cuñi ñi tsinú iñi ñi tuhun Nyoo tsa nditsa, maa tyin tsinú iñi ñi tsa ña nditsa. Tyaá yahvi ñi tsa javahá Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñi tsi jacahnu yu tacan ñi maa. Na cuví tsi tacan.

²⁶ Yacan cuenda jaña ndaha Nyoo tsi ñi na javahá ñi tsa tsahá ticanuu tsi ñi. Tyin nda cuanda ñiñaha tan tsicoó ñi tsihin ñi nduyii, tan ña vaha tacan. ²⁷ Tan juvín ñi tacan

javahá tucu rayii, nacoó ra naha tsa iyó ra naha tsihin ñasihi ra naha, tan iyó ra naha tsihin ra ndusihi naha ra tan tsahá ra naha ticanuu tsi yañi ra naha. Tan tsa cuenda can tatsi tuñi Nyoo tsi ra naha tan tiví ra naha tsa cuenda tsa caquiñi tsa javahá ra naha.

²⁸ Tan tsa cuenda tsa ña cuñi ca ra can naha ra tan ñi ican naha ñi nacoto ñi tsi Nyoo, nacoó ra tsi ñi naha ñi na caca iñi ñi tsa cuñi maa ñi. ²⁹ Tyin tandihi nuu tsa ña vaha javahá ñi. Ñiñaha tsicoq ñi tsihin rayii tan ña tindahá ñi. Rayii tsicoq ra naha tsihin ñaha tan ña tindahá ra naha. Maa ñi tsa caquiñi javahá ñi. Cuñi ñi coo cuaha ndaha tyiñu ñi. Javahá ñi tsa ndavaha ñi. Nyiyo iñi ñi tsa iyó tsi inga nyivi. Tsahñi ñi nyivi. Cañi tahan ñi tsihin nyivi ñi. Jandaví ñaha ñi. Quiñi iyó ñi tan caahán ñi cuendu. ³⁰ Caahán ñi ndavaha ñi siqui inga nyivi. Ndasí cuñi ñi nyehe ñi tsi Nyoo. Caahán nyaa ñi tsi nyivi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahvi ñi tsi jutu ñi, tan ndi tsi sihi ñi. ³¹ Ña cuñi ñi cutuñi iñi ñi. Ña javahá ñi tsa catyi ñi tyin cua javaha ñi. Ña cuñi maa ñi tsi ndi intuhun nyivi. Ña tsitó ñi jahá ñi tucahnu iñi tan ña cundaahví iñi ñi nyehe ñi tsi nyivi. ³² Tsitó vaha ñi tyin Nyoo ña cuñi ra tsa javahá ñi tacan. Tan tsitó tucu ñi tyin nyivi tsa javahá tsa caquiñi can, taahán tsi cúu ñi. Maa tyin ña jandihi ñi tsa javahá ñi can, tan tatun inga nyivi javahá tacan, si xaan cuñi ñi.

2

Tatsí tuñi Nyoo tsi nyivi maa tyin tsihin tsa nditsa

¹ Nyoocho tsa nyehé cuatyí tsa javahá inga nyivi, iyó cuatyí ndo tyin jacutuñi ndo tsi ñi tsa cuenda cuatyí javahá ñi. Yoñi jaha ndáa nyoocho cuví ndo. Tyin tsa jacutuñi ndo tsi ñi, juvin ñi tsi maa ndo jacunaá ndo. Tyin nda maa ndo tan javahá ndihi ndo cuatyí tsa javahá ñi. ² Tsitó yo tyin Nyoo tatsi tuñi ra tsi nyivi tsa javahá tacan, maa tyin tsihin tsa ndaa tan tsa nditsa cua tatsi tuñi ra. ³ Nyoocho tsa jacutuñi tsi nyivi tan javahá ndo juvin ñi tsa javahá ñi, cua tatsi tuñi Nyoo tsi ndo. ⁴ ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñi ra tsa nasama ndo cuhva iyó ndo. ⁵ Maa tyin nyoocho jandavá xaan ndo añima ndo. Tan ña cuñi ndo nasama ndo cuhva iyó ndo. Tan tsa javaha ndo tacan, Nyoo cuxaán ra tan ñihi ca cua tatsi tuñi ra tsi ndo tsa cuenda can quivi cua tatsi tuñi ra tsi nyivi tsihin tsa ndaa tan tsa nditsa. ⁶ Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa javahá yo. ⁷ Nyoo cua cuhva ra ñayivi tsa ña cua naa maa coo

nyivi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñi ñi coo cuñi ñi tsihin ra. Cua ñihi ñi tandihi yacan tyin nanducú ñi can. ⁸ Maa tyin cuaha ca tsa uhvi cua janyehe ra tsi nyivi tsa javahá tsa cuñi maa ñi, ñi tsa ña tyaá yahvi tuhun nditsa, tan javahá ñi tsa ña vaha. ⁹ Cuaha xaan tundocho tan tsa uhvi cua nyehe tandihi nyivi tsa javahá tsa ña vaha. Tsa jihna ñi cua tatsi tuñi ra tsi nyivi Israel, nyivi cuenda ra. Tan tsa tsinu uvi cua tatsi tuñi ndihi ra tsi nyivi tsa ñavin ñi Israel cuví. ¹⁰ Maa tyin tandihi nyivi tsa javahá tsa vaha, cua cuhva Nyoo tsa cahnu cuví ra tsi ñi. Cua jacahnu ra tsi ñi tan cua cuhva ra tsa taxin coo añima ñi. Jihna ca nyivi Israel cua ñihi tandihi tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihi ndihi ñi tandihi can.

¹¹ Tyin Nyoo inducu ñi cuñi ra nyehé ra tsi iin yo tan tsi inga yo. Ña tavá tsiyo ra ndi intuhun yo. ¹² Tyin nyivi tsa ñavin ñi Israel cuví, ñi tsa ña tsitó ley Nyoo tsa tyaq ra Moisés, tan javahá ñi tsa ña vaha, cua cunaa ñi, maa tyin ñavin tsa cuenda tsa ña tyaá yahvi ñi ley can. Tan nyivi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyi maa ley can. ¹³ Tyin nyivi tsa javahá cuhva catyi ley Nyoo, ñi ican cuví nyivi vaha nuu ra. Maa tyin nyivi tsa tsitó ñi maa ley tan ña javahá ñi tsa catyi ley can, ña cua cacu ñi. ¹⁴ Nyivi tsa ñavin ñi Israel cuví ña tsitó ñi ley, maa tyin tun tacan ñi javaha maa ñi tsa catyi ley, juvin ñi maa ñi cuví ley ñi. ¹⁵ Tyin tsihin cuhva iyó ñi, janahá ñi tyin iyó ley Nyoo tsitsi añima ñi. Tsa tsíni tuñi tsa iyó tsi ñi cuví tsandaa tsa cuenda ñi, tyin tuvi iñi ñi tatun vaha o ña vaha javahá ñi. ¹⁶ Tacan cua cuví quivi cua jacutuñi ra Jesucristo cuatyí tandihi nyivi jaha Nyoo. Cua cutuñi tandihi maa nyivi tsa javahá xeehe cuhva tsicá iñi ñi. Tumaa catyi tuhun Nyoo tsa caahán yu tsihin ndo.

Nyivi Israel nyicún ñi ley Nyoo tsa tyaq ra Moisés

¹⁷ Maa tyin nyoocho nyivi Israel cuví ndo, catyi ndo. Tan nyitá iñi ndo ley Nyoo tsa tyaq ra Moisés. Tan nduyaá ñi maa ndo tyin catyi ndo tyin nyivi Nyoo cuví ndo. ¹⁸ Tan tsitó ndo cuhva cuñi Nyoo tan ley can janahá tsi tsi ndo tsa nacatsi ndo tsa vaha. ¹⁹ Tan cuñi tucu ndo tyin vaha jaquihín ityi ndo tsi nyivi cuaa, ñi tsa ña tsitó ley. Jandunditsin ndo nu yucú nyivi nu naa, cuñi maa ndo. ²⁰ Tan cuñi tucu ndo tyin tsitó ndo tandihi ley Nyoo tan jaquihín ityi ndo tsi nyivi tsa ña tsitó, ñi tsa ñaha ca caca vaha tsihin Nyoo. ²¹ Tatun tsitó ndo jacuahá ndo tsi inga nyivi, ¿nacuenda ña jacuahá ndo tsi maa ndo? Catyi ndo tyin ña vaha suhu

yo, ¿nacuenda tyin suhú ndo? ²² Juvín ñi catyí ndo tyin ña vaha coo inga ñaha tsi iin rayíi, o inga rayíi tsi iin ñaha, ¿nacuenda tyin maa ndo javahá ndo tacan? Ndasi cuñí ndo nyehe ndo tsitoho, ¿nacuenda tyin suhú ndo ndaha tyíñu tsa iyó tsitsi vehe ñuhu can? ²³ Nduyaa ndo tsihin tsa tsitó ndo ley Nyoo, tan tsahá ndo ticanuu tsi ra tyin ña tyaá yahvi ndo ley ra. ²⁴ Yacan cuenda catyí tuhun Nyoo tyehen: “Nyívi tsa ñavin nyívi Israel cuví, caahán ñi ndavaha ñi siqui Nyoo tsacatyí nyooho.”

²⁵ Nditsa tyin circuncición tsa cuví tuñi Nyoo, tsa janahá tyin cuví yo nyívi ra, cuví jatyinyee tsi tsi ndo. Jatyinyee tsi tsi ndo tun tyaá yahvi ndo ley Nyoo tsa tyaá ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can. ²⁶ Maa tyin rayíi tsa nduve tuñi Nyoo nyisó, tan javahá ra cuhva catyí ley can, cua naquihin Nyoo tsi ra tumaa tsatyin nyisó ra tuñi can. ²⁷ Ra tsa ña nyisó tuñi can, tan tyaá yahvi ra ley Nyoo, cua jacutuñi ra tsi nyooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo tuñi Nyoo. ²⁸ Vasu ndi maa cuví ndo nyívi Israel tan nyisó ndo tuñi ra, ña cuví cuví ndo nyívi Nyoo tun nduve ley ra iyó añima ndo. ²⁹ Tyin nyívi iyó ley Nyoo añima, ñi ican cuví nyívi Nyoo. Tyin maa Tatyí li Nyoo tyaá tuñi ra añima ñi, tan ñavin cuñu ñuhu ñi. Tatyí li Nyoo javahá can, ñavin ley tsa tyaá ra Moisés. Nyívi ihya cua cuví nyívi vaha nuu Nyoo, tan ñavin nuu nyívi.

3

¹ ¿Nacaa jatyinyee tsa cuví yo nyívi Israel tsi yo? ¿O nácaa jatyinyee tuñi Nyoo tsi yo? ² Cuaha cuhva jatyinyee tsi tsi yo. Iin cuhva jatyinyee tsi tsi yo tyin Nyoo tsahá ra ley maa ra tsi yo tsa cuví yo nyívi Israel. ³ ¿Náa cua cuví? ¿A cua jandihí Nyoo tsa javaha ra tsa catyí ra tyin javaha ra tun juhva yoo tan ña tsinú iñi yo tsi ra? ⁴ ¿Ña cua jandihí ra! Na cutuñi iñi yo tyin Nyoo ña vatya ra. Vasu ndi maa tandihí nyívi vatya ñi, ra ican javahá ra tandihí tsa caahán ra. Tyin catyí nu tutu ra tyehen: Jutu Mañi yu, cua nyehe nyívi tyin ña vatya un.

Tan cua coto ñi tyin nditsa tsa caahán un.

⁵ Tsa caquiñi tsa javahá tandihí yoo, tsa iyó nu ñuhu ñayívi ihya, janahá tyin Nyoo vaha ra. [Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuví yo tsihin Nyoo.] Tun tacan ¿a cua catyí yo tumaa catyí nyívi tyin ña vaha tsa tatsi tuñi Nyoo tsi yo tyin janahá yo tyin vaha ra? ⁶ Nyívi catyí ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandihí yo.

⁷ Tatum javahá nyívi tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyí ñi tyin ña taahán tsi, maa tyin ña nditsa. ⁸ Tun tsatyin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyívi tyin Nyoo vaha ra. Yihí ñi catyí ñi tyin tacan jacuahá ndi. Tan ñi tsa caahán tyehen cua tatsi tuñi Nyoo tsi ñi tsacatyí tsa caahán ñi cuendu siqui ndi.

Tandihí yo tan iyó cuatyí yo

⁹ Tan nácaa ¿a vaha ca yoo tsa cuví yo nyívi Israel tan ñavin ca inga nyívi? Ña vaha ca yo. Tyin tsa yahá janahá yu tsi ndo tyin tandihí yo tan iyó cuatyí yo. An cuví yo nyívi Israel, o ña cuví yo nyívi Israel, maa tyin ndacá ñaha cuatyí tsi yo. ¹⁰ Tacan catyí nu tutu Nyoo, nu catyí tsi tyehen:

Ndi intuhun nyívi vaha nduve iyó.

¹¹ Nduve nyívi cuñi cutuñi iñi tuhun Nyoo.

Yoñi cuñi nanducu tsi ra.

¹² Tandihí ñi nacoq ñi tsi Nyoo, tan tandihí ñi tan cuanaq ñi.

Ndi intuhun ñi tan ña javahá ñi tsa vaha.

¹³ Jucun ñi cuví tsi tumaa iin ñaña ndiyi tsa ticohó.

Tan tsihin yaa ñi caahán ñi cuendu.

Yihí venenu coo yuhu ñi tyin caahán ñi tsi tahan ñi.

¹⁴ Maa ñi tsa ndvaha ñi caahán ñi.

¹⁵ Yatyí xaan tsahñi ñi tsi tahan ñi.

¹⁶ Janyehé ñi tundoho tan tucuihaya iñi tsi nyívi tsihin cuhva iyó ñi.

¹⁷ Tan ña tsitó ñi nácaa coo taxin ñi tsihin Nyoo, tan ndi tsihin nyívi.

¹⁸ Ndi ña tsicá iñi ñi tatum coo iin quívi cua tatsi tuñi Nyoo tsi ñi, catyí tuhun Nyoo nu tutu ra.

¹⁹ Tsitó yo tyin tandihí tsa caahán ley Nyoo tsa tyaá ra Moisés, cuví tsi tsa cuenda nyívi tsa yihí ndaha ley can, tyin tacan tan ña cuví catyí ñi tyin nduve cuatyí ñi iyó. Maa tyin coto tandihí nyívi iyó nu ñuhu ñayívi tyin cua tatsi tuñi Nyoo tsi ñi tsa cuenda cuatyí ñi. ²⁰ Ley can ña cuví janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyí yo.

Tsa cuenda tsa tsinú iñi yo tsi Nyoo tan nduvaha yo nuu ra

²¹ Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tan cuenda ley tan nduvahá yo. Ley ihya tan ra cuví ndusu yuhu Nyoo janahá nácaa coo vaha yo tsihin Nyoo. ²² Tyin tsa cuenda tsa tsinú iñi yo tsi ra Jesucristo tan naquihin Nyoo tsi yo tumaa tsatyin vaha yo. Tan ña nacatsí ra tsi yo an cuví yo nyívi Israel o ñavin. ²³ Tandihí yo tan iyó cuatyí yo, tan tsa cuenda yacan ña cuví quíhvi yo nu ndacá ñaha Nyoo. ²⁴ Maa

tyin tsahá maa ra tsa vaha ra tsi yo, tan yacan jahá tsa naquihin cuenda ra tsi yo tumaa tsatyin vaha yo, tyin tsa yahá tyahví ra Cristo Jesús tsa cuenda cuatyí yo. Tan yacan cuenda ña tsicán ca ra yahvi tsi yo.²⁵ Nyoo jaquitsí ra tsi ra Cristo tyin cúu ra nu cruu tan cati ra ñiñi ra tsa cuenda cuatyí yo. Tan vityin jaha Nyoo tucahnu iñi tsi yo tatun tsinú iñi yo tsi ra Cristo. Tacan cuví, tyin nyehe nyívi tyin Nyoo javahá ra tsa vaha. Tahān tsanaha, Nyoo ña tiñ cuenda ra cuatyí nyívi tsa cuenda tyin cua quitsi ra Cristo tan janaa ra cuatyí ñi. ²⁶ Tan tacan cuví tyin vityin nyehé nyívi tyin Nyoo tacan ñi maa vaha ra, tan naquihin ra tsi tandihí yo tsa tsinú iñi tsi ra Jesús tumaa tsatyin vaha yo.

²⁷ ¿A cuví nduyaa yo vityin? Ña cuví. ¿Nacuenda? Tsa cuenda tyin ña cuví catyí yo tyin javahá yo tandihí tsa catyí ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú iñi yo tsi ra. ²⁸ Tsa tsitó yo vityin tyin Nyoo naquihin cuenda ra tsi yo tumaa tsatyin vaha yo tsa cuenda tsa tsinú iñi yo tsi ra Cristo, tan ñavin tsa cuenda tsa javahá yo tsa catyí ley o ña javahá yo itsi.

²⁹ ¿A Nyoo cuenda nyívi Israel ñi cuví Nyoo? ¿A ñavin juvin ñi cuví tucu ra Nyoo nyívi tsa ñavin ñi Israel cuví? Juvin ñi cuví tucu ra Nyoo ñi can. ³⁰ Tyin intuhun ñi maa ra iyó. Tan naquihin cuenda ra tsi yo tumaa tsatyin vaha yo tsa cuenda tsa tsinú iñi yo tsi ra, a iyó tuñi ra cuñu ñuhu yo tumaa tsa iyó tsi tsi nyívi Israel, o nduve. ³¹ Tatun tacan, ¿a cuñí tsi catyí tyin nduve ca yahvi nyaá ley tsahnu can? ¿Ñavin tsa nduve yahvi nyaá tsi! Cahnu cuví tsi, tan vityin tsihin tunyee iñi maa ra Cristo janahá yo tyin nditsa tsa cahnu cuví tsi.

4

Cuhva tsicoq ra Abraham janahá tsi tsi yo nácaa nduvahá yo nuu Nyoo

¹ ¿Náa catyí yo tsa cuenda ra Abraham, tsii tsahnu yo? ¿Nacuenda naquihin cuenda Nyoo tsi ra tumaa tsatyin vaha ra? ² Tun tsatyin naquihin cuenda Nyoo tsi ra tsa cuenda tsa javahá ra tsa vaha, cuví nduyaa ra tsihin can, maa tyin ñavin nuu Nyoo. ³ ¿Náa catyí nu tutu Nyoo? Catyí tsi tyin ra Abraham tsinú iñi ra tsi Nyoo, tan tsa cuenda yacan, Nyoo naquihin ra tsi ra tumaa tsatyin vaha ra. ⁴ Vaha, vityin cua cuhva yu iin cuhva tsi ndo: Ra jahá tyiñu, quihín ra yahvi tsa cuenda tyiñu jahá ra tan ña tuhvá nyívi cuhva maa xuhun tsi ra tun ña jahá tyiñu ra. ⁵ Maa tyin iin ra tsa ña jahá tyiñu tan ñiñi ra tsa ñiñi ra, ñiñi ndaahvi ra itsi cuví can. Tacan cuví nyívi iyó cuatyí tsa ña nducú cacu tsihin tsa

javahá ñi cuhva catyí ley, tan tsinú iñi ñi tyin Nyoo naquihin cuenda ra tsi yo tumaa tsatyin vaha yo tun tsinú iñi yo tsi ra. ⁶ Ra David cahān ra siqui tsa sií cuví tsi nyívi tsa naquihin cuenda Nyoo tumaa tsatyin vaha ñi tan ña tiñ cuenda ra cuatyí tsa javahá ñi. ⁷ Tyehen catyí ra David:

Sií xaan cuví tsi nyívi tsa jahá Nyoo tucahnu iñi tsi

tan ña jahá ra cuenda cuatyí ñi.

⁸ Sií xaan cuví tsi ñi tsa ña tiñ cuenda Nyoo cuatyí.

⁹ ¿A cuñí maa ndo tyin tsa cuenda nyívi nyisó tuñi Nyoo ñi cuví tusii iñi ihya, o cuví tucu tsi tsa cuenda nyívi ña nyisó tuñi can? Tsa yahá catyí yo tyin Nyoo jahá ra tyin vaha ra Abraham tsa cuenda tsa tsinú iñi ra tsi ra. ¹⁰ ¿Ama javahá Nyoo yacan tsihin ra Abraham? ¿A tsa ndi cumañi ca cunyaa tuñi can tsi ra, o tsa tsa yahá? Ñavin tsa tsa yahá, tyin tsa ndi cumañi ca. ¹¹ Yahá tsa naquihin Nyoo tsi ra Abraham tumaa tsatyin vaha ra, tacan tan tsinyaa tuñi can tsi ra tumaa iin seña tyin tsa yahá nduvahá ra nuu Nyoo tsa cuenda tsa tsinú iñi ra tsi ra. Tan tsa cuenda yacan cuví ra Abraham tumaa jutu tandihí yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo. ¹² Nditsa tyin ra Abraham cuví tucu ra jutu nyívi Israel, tandihí ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinú iñi maa ra Abraham, tsii tsahnu yo, quívi tsa ñaha ca cunyaa tuñi can tsi ra.

Tsihin tsa tsinú iñi yo ñihí yo tsa tsahá Nyoo tsi yo

¹³ Nyoo catyí ra tsihin ra Abraham tan tsihin tata ra tyin cua cuhva ra tsa cua cundaca ñaha ñi ñuhu ñayívi tsihin ra. Maa tyin tsa cahān Nyoo can tsihin ra, ñavin tsa cuenda tyin javahá ra tsa catyí ley, maa tyin tsa cuenda tyin tsinú iñi ra tsi Nyoo, tan Nyoo naquihin ra tsi ra tumaa tsatyin vaha ra. ¹⁴ Tun tsatyin maa ñi maa nyívi tsa javahá cuhva catyí ley, cua ñiñi tsa cua cuhva Nyoo, nduve náa catyí tsinú iñi yo tsi ra, tan nduve yahvi nyaá tsa catyí ra tyin cuhva ra tsa cua cuhva ra tsi yo tun tsinú iñi yo tsi ra. ¹⁵ Tyin ley can janahá tsi tyin taahān tsi tatsi tuñi Nyoo tsi yo tatun ña javahá yo cuhva catyí tsi. Maa tyin tun tsatyin nduve ley iyó, ña cua coo cuatyí yo.

¹⁶ Yacan cuenda ñihí yo tsa catyí Nyoo tyin cuhva ra tsi yo tsa cuenda tsa tsinú iñi yo tsi ra, tyin tacan tan cuví tsi tumañi iñi tsa tsahá ra tsi tandihí yoo tsa cuví tata ra Abraham. Ñavin maa ñi nyívi tsinú iñi tsi Nyoo tan tyaá yahvi ley tsa tyaá ra Moisés cua ñiñi tsa cua cuhva Nyoo, tyin cua ñiñi ndihí tucu nyívi tsa ña nyitá iñi ley, tatun tsinú iñi ñi tsi ra tumaa tsa tsinú iñi ra

Abraham. Ra ihya cuví jutu tandihí nyívi tsa tsinú íñi tsi Nyoo. ¹⁷ Tyin catyí ra nu tutu ra tyehen: “Yooho cua cuví tumaa jutu nyívi cuaha tsa cua coo nu ñuhu ñayívi”, catyí ra tsihin ra Abraham. Tan tsa catyí ra tacan, cuñí tsi catyí tyin cuví yo tata ra Abraham nuu Nyoo. Tsinú íñi ra tsi Nyoo, tyin Nyoo janandotó ra ndiyi tan caahán ra tuhun tsa ñaha ca coo tumaa tsatyin tsa iyó tsi.

¹⁸ Ra Abraham tsa tsahnu xaan ra quívi tsa catyí Nyoo tyin cua coo sehe ñasihi ra, tan tsitó ra tyin ña cuví ca coo sehe ñi. Maa tyin tsinú íñi ra tan ñihí ra tsa cahán Nyoo tsihin ra. Tan cuví ra jutu nyívi cuaha, tumaa cahán maa Nyoo tsihin ra: “Tyehen cua nducua ha nyívi tata un”. ¹⁹ Vasu ndi maa tsa yatyin ña iin cientu cuiya ra Abraham, ña jandihí ra tsa tsinú íñi ra. Tahan ñi maa ra tan ña Sara ñasihi ra, ña cuví ca coo sehe ñi, tyin tsa cuyatyin cuiú cúu ñi tyin tsahnu xaan ñi. ²⁰ Maa tyin ña ndu uví íñi ra tsa cua ñihí ra tsa catyí Nyoo tyin cuhva ra tsi ra. Tsinú íñi ra tsihin tsa nu íñi añima ra. Tan ña jandihí ra tsa nyitá íñi ra tsi Nyoo. Tan jacahnú ra tsi Nyoo, ²¹ tsa cuenda tyin tsitó vaha ra tyin Nyoo iyó tunyee íñi tsi ra tsa javaha ra tsa catyí ra tsihin ra. ²² Yacan cuenda Nyoo naquihín ra tsi ra tsa cuenda tsa tsinú íñi ra tsi ra.

²³ Tuhun tsa nyaá nu tutu Nyoo tsa catyí tyin naquihín Nyoo tsi ra Abraham tsa cuenda tsa tsinú íñi ra tsi ra, ñavin tsa cuenda ra Abraham ñi cuví tsi, ²⁴ tyin tsinyaa tucu tsi tsa cuenda yoo. Tyin naquihín Nyoo tsi yo tsa cuenda tsa tsinú íñi yo tsi ra, tyin juvin ra janandotó tsi ra Jesús, Jutu Mañi yo. ²⁵ Ra Jesús quítsi ra quítsi cúu ra tsa cuenda cuatyí yo, tan nandotó ra tyin tacan tan cuvi nduvaha yo nuu Nyoo.

5

Tsa cua ñihí yo tsa cuenda tsa nacoq vaha yo tsihin Nyoo

¹ Tsa yahá nduvahá yo nuu Nyoo tsa cuenda tsa tsinú íñi yo tsi ra. Tan vityin iyó vaha yo tsihin ra jahá Jutu Mañi yo Jesucristo. ² Tyin tsa cuenda ra Cristo ñihí yo tsa vaha Nyoo tyin tsinú íñi yo tsi ra. Tan iin cuñí yo tyin tsa naquihín yo can. Tan sií cuñí yo tyin cua cuhva ra tsa cahnu cuvi yo tan javaha yo tsa cuñí maa ra tyin javaha yo. ³ Tan ñavin tsa cuenda yacan ñi taahán tsi cusii íñi yo, tyin taahán tucu tsi cusii íñi yo tun nyehé yo tundoho. Tyin tsitó yo tyin tun cunyeé íñi yo nyehé yo tundoho, tacan cua cunyeé íñi yo cuatu yo nda cuanda ñihí yo tsa cua cuhva Nyoo tsi yo. ⁴ Tatun cunyeé íñi yo yahá yo tandihí tundoho, sií cuñí Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra. ⁵ Tatun tsitó yo tyin cua quita vaha yo nuu ra, ña

taahán tsi nducahan nuu yo nyehé yo tsi ra, tyin Tatyí li ra tsa tsahá ra coo añima yo janahá tsi tsi yo tyin cuñí xaan ra tsi yo.

⁶ Tsanaha yoo ña ñihí yo cuhva jacacú maa yo tsi yo. Tacan tan quívi tahan maa tsi quítsi ra Cristo, quítsi cúu ra tsa cuenda cuatyí yo. ⁷ Tsitó yo tyin ndi intuhun yo tan ña cana íñi yo cúu yo tsa cuenda inga nyívi, vasu ndi maa vaha ñi. Maa tyin tun vaha xaan íñi nyívi can vasiquí cahnya íñi iin yo cúu yo tsa cuenda ñi. ⁸ Maa tyin Nyoo jaquítsi ra tsi ra Cristo, tan yacan janahá tsi yo tyin cuñí xaan ra tsi yo. Quítsi ra quítsi cúu ra tsa cuenda yo vasu ndi maa iyó xaan cuatyí yo. ⁹ Tan tsa cuenda tsa tsihi ra Cristo, nacoq vaha yo tsihin Nyoo. Tan vityin tsitó vaha yo tyin cua cacu yo tan ña cua cuhun yo anyaya quívi cua tatsi tuñi Nyoo tsi nyívi ña tsinú íñi tsi ra. ¹⁰ Tahan tsanaha xaan íñi yo tsi Nyoo, maa tyin vityin iyó vaha yo tsihin ra tsa cuenda tsa tsihi ra Cristo, Sehe ra. Yacan cuenda tsa nyitá vaha íñi yo tyin cua jacacú ra tsi yo tsa cuenda tsa iyó yo ñayívi Sehe ra, tyin tsa iyó vaha yo tsihin ra. ¹¹ Tan ñavin yacan ñi, taahán tucu tsi cusii íñi yo tsihin Nyoo tyin tsa cuenda Jutu Mañi yo Jesucristo tan nduvahá iyó yo tsihin ra.

Ra Adán tan ra Cristo

¹² Tsanaha intuhun ñi rayii tsicoq cuatyí, tan tsa cuenda intuhun ñi ra can tsaa cuatyí nanii ñuhu ñayívi tan tsicoq tuhun tsiihi. Tan tuhun tsiihi can nacuña can tyin tandihí nyívi tan tsicoq cuatyí ñi. ¹³ Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyí nyívi, maa tyin ña tiin cuenda Nyoo cuatyí ñi tsa cuenda tyin nduve ley iyó. ¹⁴ Maa tyin nda cuanda quívi tsicoq ra Adán tan nda cuanda quívi tsicoq ra Moisés, tsindaca ñaha tuhun tsiihi tsi tandihí nyívi tyin iyó cuatyí tandihí ñi, vasu ndi maa ña javahá ñi tumaa javahá ra Adán tsa ña tyaa yahvi ra tsa cahán Nyoo tsihin ra. Ra Adán quítsi ra tsihin cuatyí, maa tyin ra Cristo quítsi ra jacacú ra tsi yo.

¹⁵ Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihi cuaha nyívi. Tacan tucu vityin, Nyoo jacacú ra tsi yo tsa cuenda intuhun rayii, ra Jesucristo. Tan cahnu ca cuví tsa tsahá Nyoo tsi yo, tan tsa vaha tsi tandihí nyívi cuví tsi. ¹⁶ Cuatyí ra Adán ña cuví jandu inducu yo can tsihin tsa jacacú Nyoo tsi yo. Tyin tsa cuenda intuhun ñi cuatyí can, Nyoo tatsi tuñi ra tsi tandihí nyívi. Maa tyin vityin Nyoo ña cuñí ra yahvi tan jacacú ra tsi yo. Naquihín ra tsi yo tumaa tsatyin vaha yo, vasu ndi maa cuaha cuatyí yo tsicoq. ¹⁷ Nditsa tyin quítsahá ndacá ñaha tuhun tsiihi tsi tandihí nyívi jahá cuatyí tsa javahá ra can, maa tyin vityin ña cuví ca quíhi

ndaha can tsi ñi tsa tsa nduvahá nuu Nyoo, ñi tsa iin nyita ñi naquihín tsa vaha ra. Ñi ican iyó ñi ñayivi tsaá tan yihí ndaha ñi tsi ñi tan tsi nu ña vaha jahá intuhun rayii, ra Jesucristo.

¹⁸ Nyoo tatsí tuñi ra tsi tandihí nyivi iyó nu ñuhu ñayivi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra tan coo yo ñayivi nyito tsa cuenda tsa vaha tsa javahá ra Jesucristo. ¹⁹ Cuñí tsi catyí tyehen: Tsa cuenda tsa ña tyaa yahvi iin rayii tsa cahán Nyoo, cuaha xaan nyivi tsicoo cuatyí. Ra ican cuví ra Adán. Tan vityin cuaha xaan nyivi cuu nduvaha nuu Nyoo tsa cuenda tsa tyaa yahvi inga ra tsa cahán Nyoo. Tan ra ican cuví ra Cristo.

²⁰ Nyoo tsahá ra ley tsi ra Moisés tyin tacan tan coto nyivi tyin iyó cuatyí ñi. Tan vasu ndi maa nducuahá ca cuatyí tsa cuenda ley can, tsa vaha Nyoo nducuahá tucu tsi tyin cahnu ca tucahnu iñi iyó tsi ra tsihin yo. ²¹ Tahán tsanaha, cuatyí yo quítsi ndaca tuhun tsihi, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayivi nyito tsa ña cua naa maa coo yo tsa cuenda Jutu Mañi yo Jesucristo.

6

Ña cua javaha ca yo tsa caquiñi tyin cua javaha yo cuhva catyí ra Cristo

¹ ¿Náa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu iñi tsi ra tsihin yo? ² Ña vaha. Tyin yoo tsa tsa ndu uví iñi cuatyí tumaa tsa tsihi cuatyí yo cuví can. Tan yacan cuenda, ña cuví ca javaha yo tsa caquiñi vityin. ³ ¿A ña tsitó ndo tyin tsa tsicoondutyá yo janahá tsi tyin ndu iin yo tsihin ra Cristo Jesús? Yacan cuñí tsi catyí tyin tsa yaha tsihi yo tsihin ra. ⁴ Tsa quihví yo tsitsi ndutya tsa tsicoo ndutya yo cuví tsi tumaa tsa tsihi yo tan quihví ñuhu yo tsihin ra Cristo tsa tsihi ra. Tan tumaa tsa nandoto ra Cristo jahá Nyoo tsihin tunyee iñi ra, tacan nandoto tucu yo tsa quitá yo tsitsi ndutya tsa tsicoondutyá yo. Tan vityin iyó yo ñayivi tsa tsihin ra.

⁵ Tumaa tsa tsihi ra Cristo, tacan tsihi tucu cuatyí yo, tyin tacan tan ña javahá ca yo tsa caquiñi. Tan tumaa tsa tsihi yo tsihin ra, tacan cua nandoto tucu yo tumaa nandoto ra. ⁶ Tan tsitó yo tyin tandihí cuhva tsicoo yo tahán tsanaha, tsa yaha tsihi can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyí yo tsi yo, tan ña javaha ca yo cuatyí. ⁷ Tyin nyivi tsa tsa yaha tsihi, ña cuví ca javaha ñi tsa caquiñi. ⁸ Tan yoo tsa tsa tsihi tsihin ra Cristo, nyitá iñi

yo tyin cua coo yo tsihin ra. ⁹ Tsitó yo tyin ra Cristo nandoto ra tsa yaha tsihi ra, tan vityin ña cuu ca ra tyin nduve ca tunyee iñi iyó tsi tuhun tsihi tsa cahni can tsi ra. ¹⁰ Ra Cristo iin tsaha ñi tsihi ra, tan tsihi ra tsa cuenda cuatyí yo, tan ña cua cuu ca ra. Vityin iyó ra, tan iyó ra tsa cuenda maa Nyoo. ¹¹ Tan tacan tucu nyoocho, ña javaha ca ndo tsa caquiñi. Ña naa iñi ndo tyin tsa yaha tsihi ndo tan tsa tsindihí cuatyí ndo. Tan coo ndo cuhva cuñi Nyoo tsihin tsa iin ñi cuví ndo tsihin ra Cristo Jesús Jutu Mañi yo.

¹² Yacan cuenda ña cuhva ca ndo tsa jaha canaa cuñu ñuhu cuatyí ndo tsi ndo. Ña cuhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñi tsi. ¹³ Ña cuhva ndo ndatu tsi cuñu ñuhu ndo tsa javaha ndo tsa caquiñi. Nacuhva cuenda ndo tsi ndo tsi Nyoo, tyin tsa yaha tsihi yo tan nandoto yo. Cuhva cuenda ndo cuñu ñuhu ndo tsi Nyoo tyin tacan tan javaha ndo tsa vaha. ¹⁴ Tyin nduve ca tunyee iñi iyó tsi cuñu ñuhu cuatyí yo tsa cundaca ñaha can tsi yo. Tyin ñavin ca ley tsa tyaa ra Moisés yihí ndaha tsi yo; tyin vityin tsa vaha tsa tsahá Nyoo tsi yo, yacan yihí ndaha tsi yo.

Musu tsa javahá tsa vaha

¹⁵ ¿Náa cua javaha yo vityin? ¿A cua javaha ca yo cuatyí tsa cuenda tsa iyó yo tsihin tsa vaha Nyoo tan tsa cuenda tyin ña ndacá ñaha ca ley tsi yo? Ñavin. ¹⁶ Nyoocho tsitó vaha ndo tyin iin musu, taahán tsi javaha ra tsa caahán tsitoho ra. Tan tacan cuví yo musu tsa tuhvá yo tyaa yahvi. Tun tyaa yahvi yo tsa caquiñi, musu tsa caquiñi can cuví yo, tan cua cunaa yo jahá tsa caquiñi can tyin tyaa yahvi yo tsi can. Maa tyin tun tyaa yahvi yo tsi Nyoo, cua cuví yo nyivi vaha nuu ra. ¹⁷ Tyahvi nyoo tsi Nyoo, tyin vasu ndi maa nu quítsi tsi cuví ndo musu tsa caquiñi maa tyin vityin tyaa yahvi ndo tuhun Nyoo tsa cutuhvá ndo tsihin tsa ñi iñi añima ndo. ¹⁸ Tsa yaha ndatsí cuatyí ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo. ¹⁹ (Caahán yu tsihin ndo cuhva tsa ña yí ñi cutuñi iñi ndo tyin nyoocho ñaha ca cutuñi vaha iñi ndo tuhun Nyoo.) Tumaa tsa tsahá cuenda ndo cuñu ñuhu ndo tsi tsa caquiñi tahán tsanaha tan javahá ndo tsa ña vaha; tacan tucu vityin cuhva cuenda ndo cuñu ñuhu ndo tsi Nyoo tyin tacan tan coo ndo ñayivi cuñi, tan javaha ndo maa ñi maa tsa vaha nuu ra.

²⁰ Quivi tsiquihí ndaha cuñu ñuhu cuatyí ndo tsi ndo, musu can cuví ndo, tan ña yihí ndaha tsa vaha Nyoo tsi ndo. ²¹ Maa tyin nduve náa ñihí ndo tsihin can, tan vityin cahán nuu ndo tsa cuenda tsa javahá ndo

tsanaha, tyin maa ñi tuhun tsihií tsahá can. ²² Maa tyin vityin ña ndacá ñaha ca cuatyí tsi ndo tyin tsa tsahá cuenda ndo tsi ndo tsi Nyoo. Tan vaha xaan tyin maa ñi tsa cuñi Nyoo javahá ndo. Tan nu cua ndihi tuhun cua coo cuii ndo tsihin Nyoo. ²³ Nyivi tsa javahá tsa caquiñi, cua cúu ñi. Maa tyin Nyoo tsahá maa ra ñayivi tsa ña cua naa maa coo yo tsa cuenda tsa iin ñi cuví yo tsihin ra Cristo Jesús, Jutu Mañi yo.

7

Ley tsahnu ña ndacá ñaha ca tsi tsi nyivi yihí cuenda ra Cristo

¹ Yañi, nyoocho tsa tsitó ley, tsitó ndo tyin tsitsi tsa ndi nyito nyivi yihí ndaha ley tsi ñi. ²⁻³ Tumaa iin ñaha tsa iyó yíi, catyí ley tyin coo ña tsihin yíi ña nda cuenda cúu ra. Maa tyin juvin ñi catyí tucu ley tun cúu yíi ña tan nandoo ndaahvi ña, ña cua quihí ndaha ca ley can tsi ña. Tan cuvi tindaha ña tsihin inga rayíi tan ña cua coo cuatyí ña. Maa tyin tsitsi tsa ndi iyó yíi ña, ña cuvi coo ña tsihin inga rayíi, tyin tun cua javaha ña tacan, cua coo cuatyí ña nuu Nyoo.

⁴ Tan tacan tucu nyoocho yañi. Tسانaha ley Nyoo tsa tyaá ra Moisés yihí ndaha tsi tsi ndo tumaa yihí ndaha iin rayíi tsi ñasihi ra. Maa tyin vityin tsa yahá tsihií ndo tan ña ndacá ñaha ca ley can tsi ndo. Tyin vityin ndacá ñaha inga rayíi tsi ndo tan juvin ra cuví ra Cristo, ra tsa nandotó jahá Nyoo. Tyehen cuví tsehe tyin tacan tan cuatyíñu Nyoo tsi yo. ⁵ Tahan tsanaha tsicoo yo cuhva cuñi cuñu ñuhu yo tan ley tsahnu tsa tyaá ra Moisés catyí tsi tyin ña vaha javaha yo tsa caquiñi. Tan tsa caahán tsi tacan, yoo quitsahá cuñi ca yo javaha yo tsa caquiñi tsa cuñi cuñu ñuhu yo. Tan yacan tsahá tuhun tsihií tsi yo. ⁶ Maa tyin vityin ña ndacá ñaha ca ley tsahnu can tsi yo, tyin tsa yahá tsihií cuñu ñuhu cuatyí yo tsihin ra Cristo. Tan vityin tsa iyó yo ñayivi nyito tsa tsahá Tatyí li Nyoo tsi yo, na jaha tyiñu yo tyiñu Nyoo tan ña javaha ca yo tumaa javahá yo quivi yihí ndaha ley tsahnu tsi yo.

Ley Nyoo janahá tyin iyó cuatyí yo

⁷ ¿Náa cua catyí yo? ¿A catyí yo tyin ña vaha ley can? Ñavin tsa ña vaha tsi. Vaha tsi. Tyin tun tsa ña tsahá Nyoo ley can, ña cua coto yu náa cuví cuatyí. Tan ndi ña cua coto yu tyin ña vaha nyiyo iñi yu tsa tsii inga nyivi, tun tsatyin ña catyí ley can tyin ña vaha nyiyo iñi yo. ⁸ Tun tsatyin nduve ley can iyó, ña cua coto yu náa cuví cuatyí, tan ña cua cuñi yu javaha yu tsa ña vaha. Maa tyin quivi tsa tsitó yu ley Nyoo, quivi can quitsahá tsicá iñi yu javahá yu tsa ña vaha. Nu nduve ley iyó, ña tsitó nyivi náa cuví tsa ña vaha. ⁹ Quivi tsa ña tsitó yu náa

cuñi tsi catyí ley Nyoo tsa tyaá ra Moisés, nyito yu. Maa tyin quivi cutuñi iñi yu tsa caahán ley can, cutuñi iñi yu tyin nuu Nyoo tsa tsihií yu jahá cuatyí yu. ¹⁰ Catyí ley can tyin tatun tyaá yahvi nyivi itsi, cua coo cuii ñi ñayivi nyito. Maa tyin yuhu tsihií yu nuu Nyoo jahá ley can tyin ña tyaá yahvi yu itsi. Tyin catyí tsi tyin nyivi tsa ña tyaá yahvi itsi, taahán tsi cunaa ñi nuu Nyoo. ¹¹ Cuatyí yu tsatyíñu can ley can, tan jandavi ñaha can tsi yu, tyin catyí ley tyin tatun ña tyaá yahvi yo itsi, taahán tsi cunaa yo nuu Nyoo.

¹² Ley can ii xaan tsi tyin tuhun tsahá maa Nyoo cuví tsi, tan tandihi tsa catyí ra tyin javaha yo, vaha tsi, tan cuiti xaan tsi. ¹³ Tan ñavin ley vaha ihya jacunaá tsi yu. Tyin tsa ña vaha tsa javahá yu, yacan jacunaá tsi yu. Yacan cuenda cunaá yu nuu Nyoo tyin ley vaha can janahá tsi yu tyin cuatyí cuví tsa javahá yu tsa ña vaha. Tacan tucu vityin ley can janahá tsi tsi yo tyin yaha xaan ña vaha cuví cuatyí javahá yo.

Nu tsahá cuenda ra Pablo tsi yo cuhva iyó yo tun ña tsahá yo cundaca ñaha ra Jesucristo tsi yo

¹⁴ Tan tsitó yo tyin maa Tatyí li Nyoo tsahá ley can, yacan cuenda vaha tsi. Maa tyin yuhu iyó cuatyí yu tyin ra ñayivi cuví yu. Javahá yu tsa caquiñi tyin maa cuatyí can ndacá ñaha tsi yu. ¹⁵ Ña cutuñi iñi yu náa taahán yu, tyin tsa vaha tsa cuñi yu javaha yu, ña javahá yu can. Maa tyin javahá yu tsa ña vaha tsa ña cuñi yu javaha yu. ¹⁶ Tan tsa javahá yu tsa ña cuñi yu javaha yu, tsihin yacan nacotó yu tyin ley Nyoo vaha tsi. ¹⁷ Yacan cuñi tsi catyí tyin ñavin maa yu javahá tsa ña vaha, tyin cuatyí tsa iyó tsi yu, yacan javahá tsa ña vaha. ¹⁸ Yuhu tsitó yu tyin cuñu ñuhu yu nduve tsa vaha iyó. Vasu ndi maa cuñi yu javaha yu tsa vaha, ña cuví javaha yu can. ¹⁹ Ña javahá yu tsa vaha tsa cuñi yu javaha yu, jañihi ca yu javaha yu tsa ña vaha tsa ña cuñi yu javaha yu. ²⁰ Tan tatun javahá yu tsa ña cuñi yu javaha yu, ñavin ca maa yu javahá can, tyin cuatyí tsa yihí ndaha tsi yu, yacan javahá can.

²¹ Nacotó yu tsa taahán yu: tun cuñi yu javaha yu tsa vaha, yatyi xaan ca javahá yu tsa ña vaha. ²² Tsitsi añima yu taahán xaan iñi yu ley Nyoo. ²³ Maa tyin iyó inga ley tan yacan yihí ndaha cuñu ñuhu yu tsihin añima yu. Ña tsahá can tsa javahá yu tsa taahán iñi añima yu. Tan ñihi yihí ndaha can tsi yu tumaa yihí ndaha ra vitya tsi iin ra nyiií vehe caa. ²⁴ ¡Ndahvi yuhu ra ndaahvi! ¿Yóo cua jacacu tsi yu ndaha tsa ña vahá tsa cuñi cuñu ñuhu yu tan ña cuhun yu anyaya? ²⁵ Tsahá yu tyahvi nyoo tsi Nyoo tsa cuenda ra Jesucristo tyin intuhun ñi maa ra cuví jacacu tsi yu. Vityin cutuñi iñi yu tyin cuñi

tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandihí tsa ña vaha tsa cuñí cuñí ñuhu yu javaha yu, yacan cua quihí ndaha tsi yu.

8

Tatyí li Nyoo jatyinyeé tsi tsi yo tan cuví coo yo ñayivi tsaa

¹ Maa tyin vityin, Nyoo ña tatsi tuñi ca ra tsi nyivi tsa iin ñi cuví tsihin ra Cristo Jesús, ñi tsa ña iyó ca cuhva cuñí cuñí ñuhu ñi tyin iyó ñi cuhva cuñí Tatyí li ra. ² Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí li Nyoo tsi yo. Tan juvin tsi tsahá ñayivi tsaa coo yo tsa cuenda tsa iin ñi cuví yo tsihin ra Cristo Jesús. ³ Nyoo javahá ra tsa ña cuví javaha ley tsa tyaa ra Moisés. Ley tsa tyaa ra Moisés ña cunyeé tsi jandihí tsi cuhva iyó nyivi. Yacan cuenda Nyoo jaquitsí ra tsi Sehe ra. Cuví ra tumaa rayí ñuu ñayivi tan tyahvi ra tsa cuenda cuatyí yo tyin tacan tan cundihi tsa javahá yo cuhva cuñí cuñí ñuhu yo. ⁴ Javahá ra tyehen tyin tacan tan cuví javaha yo cuhva catyí ley tan ñavin cuhva cuñí cuñí ñuhu yo tyin vityin iyó yo cuhva cuñí Tatyí li Nyoo.

⁵ Nyivi tsa iyó cuhva cuñí cuñí ñuhu, maa ñi cuhva cuñí cuñí ñuhu ñi tsicá iñi ñi, maa tyin nyivi tsa iyó cuhva cuñí Tatyí li Nyoo tsicá iñi ñi cuhva cuñí Tatyí li Nyoo. ⁶ Nyivi tsa tsicá iñi maa ñi maa tsa cuñí cuñí ñuhu ñi, cua cunaa ñi. Maa tyin yoo tsa tsicá iñi cuhva cuñí Tatyí li ra, cua coo yo ñayivi tsaa, tan cua coo tsa taxin aña yu. ⁷ Nyivi tsa tsicá iñi cuhva cuñí cuñí ñuhu ñi, ñi xaan iñi tsi Nyoo cuví ñi can, tyin ña cuñí ñi javahá ñi cuhva catyí ley ra tan ndi ña cuví javaha ñi can. ⁸ Yacan cuenda nyivi tsa nducú tsa cuñí cuñí ñuhu ñi, ña cuví javaha ñi cuhva taahán iñi Nyoo.

⁹ Maa tyin nyoocho ña iyó ca ndo cuhva cuñí cuñí ñuhu ndo, tyin iin ñi cuví ndo tsihin Tatyí li Nyoo, tun nditsa tsa iyó Tatyí li Nyoo aña ndo. Nyivi tsa nduve Tatyí li ra Cristo iyó aña, ñavin nyivi cuenda ra Cristo cuví ñi. ¹⁰ Maa tyin tun iyó ra Cristo aña ndo, nyitó aña ndo tyin janduvahá Nyoo tsi ndo nuu ra. Maa tyin cuñí ñuhu ndo tumaa tsa tsihi tsi jahá cuatyí. ¹¹ Nyoo janandotó ra tsi ra Jesús tsa yahá tsihi ra. Tan tacan tucu nyoocho, tatun iyó Tatyí li ra aña ndo, cua janandoto ra cuñí ñuhu ndo tsihin Tatyí li ra tsa iyó aña ndo.

¹² Tan tacan yañi, nyaá javaha yo tsa javaha yo, maa tyin ñavin tsa javaha yo cuhva cuñí cuñí ñuhu yo. ¹³ Tyin tatun maa ñi maa cuhva cuñí cuñí ñuhu ndo iyó ndo, cua cunaa ndo nuu Nyoo. Maa tyin tatun tsihin Tatyí li Nyoo tan cuahán jandihí ndo

tsa javahá ndo tsa caquiñi tsa cuñí cuñí ñuhu ndo, cua coo nyito ndo.

¹⁴ Tyin tandihí yoo tsa javahá cuhva jaquihín ityí Tatyí li Nyoo, sehe Nyoo cuví tsi yo. ¹⁵ Nyoocho ña naquihín cuenda ndo Tatyí li Nyoo tsa cundaca ñaha tsi ndo tan cuví ndo tumaa musu. Tyin naquihín ndo Tatyí li Nyoo tsa tsahá tsa cuví ndo sehe Nyoo. Tan juvin ñi Tatyí li Nyoo tsahá tsa cahan yo tyehen tsihin Nyoo: “Tyatya”. Yacan cuenda ña taahán tsi nayuhvi ndo. ¹⁶ Tan Tatyí li ra tsa naquihín yo ndu iin tsi tsihin tsa nyito yo tan jacotó tsi naha tsi tsi yo tyin cuví yo sehe Nyoo. ¹⁷ Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin cuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehé ra Cristo tundoho, quivi cua tahan tsi, Nyoo cua jacahnu ra tsi yo iin caa ñi tsihin ra Cristo.

¹⁸ Tsitó yu tyin tundoho tsa nyehé yo vityin, luhlu cuí ñi cuví tsi tan ña cuví jandu inducu yo itsi tsihin tsa sii caá tsa cua nyehé yo quivi tahan tsi. ¹⁹ Nyoo cua janaha ra tandihí sehe ra tsi tandihí tsa javahá ra tyin ndatu tsi tan cuñí tsi naha tsi nyehé tsi naha tsi tsi nyivi cuví sehe ra. ²⁰ Tandihí tsa javahá ra, tsa iyó nu ñuhu ñayivi tan andivi, tsa tiví tsi. Vasu ña cuñí tsi tiví tsi, maa tyin Nyoo tsahá ra tsa tiví tsi tsa cuenda cuatyí tsa javahá nyivi. Maa tyin catyí ra tyin coo quivi cua ndutsaa nyico tsi. ²¹ Tandihí tsa javahá Nyoo tan cua ndutsaa tsi inga tsaha, cua quita nuña tsi tan ña cua tsi, tyin cua nasama Nyoo cuhva caá tsi vityin. Tan sii xaan cua cuñí tsi iin caa ñi tsihin tandihí sehe Nyoo tyin ña cua tiví ca tsi. ²² Tsitó yu tyin tandihí tsa javahá Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña. ²³ Tacan tucu yoo tsa naquihín cuenda Tatyí li tsa tsahá jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñí yo tsa tahan ñi tsi quivi tsa nasama Nyoo cuhva iyó cuñí ñuhu yo tan nyehé tandihí tsa javahá ra tyin cuví yo sehe ra. ²⁴ Vasu ndi maa ñaha ca ñihi yo tandihí can maa tyin tsitó yu tyin cua ñihi yo can tyin tsinú iñi yo. Tyin juvin ñi tsihin tsa tsinú iñi yo tan cacú yo. Tatun tsa nyehé yo tsa ndatu yo, nduve yahvi nyaá cuatu ca yo can tyin tsa iyó maa can tsi yo. ²⁵ Maa tyin ndita iñi yo tsa cua ñihi yo tsa ña nyehé yo, cuñí tsi tsa cunyeé iñi yo cuatu yo can.

²⁶ Tan juvin ñi tacan jatyinyeé Tatyí li Nyoo tsi yo tun nduve tunyeé iñi iyó tsi yo tan ña tsitó yo nácaa ndacan tahvi yo tsi Nyoo cuhva taahán maa tsi. Tatyí li tsa iyó aña yu tsicán tahvi tsi tsi Nyoo tsa cuenda yo tsihin tuhun tsa ña cutuñi iñi yo. ²⁷ Tsitó maa Nyoo náa iyó aña yu, tan tsitó ra náa tsicán Tatyí li ra, tsa cuenda yoo tsa cuví yo

nyivi ra tyin tsicán tsi cuhva cuñi maa ra ndacan yo tsi ra.

Tsa cuenda ra Cristo tan cuvi jaha canaa yo siquti tundoho

²⁸ Tsító yo tyin tandihi tundoho tsa nyehé nyivi tsa cuñi tsi Nyoo jatyinyeé can tsi ñi, tyin maa Nyoo cuvi ra nacatsi tsi ñi, tumaa cuhva tyaq maa ra cuhva. ²⁹ Tyin nda quivi jihna ñi, tan tsa tsító Nyoo yóo nyivi cua cunyicun tsi ra. Tan tyaq ra cuhva tyin cuvi ñi sehe ra tan coo ñi cuhva cuñi ra. Maa tyin ra Jesucristo cuvi ra cua cuvi ra tsitsa tsa nuu tandihi ca yañi ra. Tan yañi ra cuvi ñi yihí tuhun Nyoo. ³⁰ Tan ñi tsa tyaq Nyoo cuhva tyin cuvi ñi sehe ra, cana ra tsi ñi. Tan ñi tsa cana ra, naquihin cuenda ra tsi ñi tumaa tsatyin vaha ñi. Tan ñi tsa naquihin cuenda ra tsaha ra tsa cahnu cuvi ñi tsihin ra.

³¹ Yacan cuenda, ¿náa cua catyi yo? Tatan Nyoo tan nyaá ra tumañi ñi tsihin yo, ¿yóo cuvi jaha canaa tsi yo? Yoñi. ³² Nyoo ña catyi ra tsa ña cua cuhva cuenda ra Sehe ra, tyin tsaha cuenda ra tsi ra tyin cúu ra tsa cuenda tandihi yo. Tun tacan tsaha ra Sehe ra tsa cuenda yo, ¿a ña cua cuhva ra tandihi ca tsa tsiñi ñuhu tsi yo? Cuhva ra. ³³ ¿Yóo cuvi xico ñaha tsi yo tsa cuvi yo nyivi nacatsi Nyoo? Yoñi. Tyin Nyoo tsa naquihin cuenda ra tsi yo tumaa tsatyin vaha yo. ³⁴ ¿Yóo cuvi catyi tyin cuhun yo anyaya? Yoñi. Tyin ra Cristo tsa tsihi ra tsa cuenda cuatyí yo, tan nandotó ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo. ³⁵ Nduve náa cuvi quihin nyaa tsa cuñi xaan ra Cristo tsi yo. ¿A cuvi quihin nyaa tundoho itsi, a tsihi, a tsa caahán nyivi tsi yo tsa cuenda tuhun Nyoo, a tama, a tun nduve jahma yo, a tsa yuuhví, a tuhun tsihi? Ndi intuhun tsehe tan ña cuvi quihin nyaa can tsa cuñi ra Cristo tsi yo. ³⁶ Tumaa catyi nu tutu Nyoo tyehen:

Jutu Mañi yu, tandihi ñi quivi tan cuñi nyivi cahñi ñi tsi ndi tsa cuenda un.

Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyi tsi.

³⁷ Vasu ndi maa cuaha tundoho yahá yo, maa tyin tandihi ñi tsaha tsa nyehé yo tundoho tan jahá canaa yo, tyin ra tsa cuñi xaan tsi yo jatyinyeé tsi yo. ³⁸ Yacan cuenda tsító vaha yo tyin nduve maa náa cuvi quihin nyaa tsa cuñi xaan Nyoo tsi yo. Ndi tuhun tsihi, ndi ñayivi iyó yo, ndi ángel, ndi tatyi ña vaha, ndi tsa cuvi vityin, ndi tsa cua cuvi ityi nuu ca, ndi intuhun can tan ña cuvi jandusiin can tsi yo tsihin Nyoo. ³⁹ Ndi tsa iyó nu sucun, ndi tsa iyó nu cunu, ndi inga tsa javahá Nyoo, ña cuvi jandusiin can tsi yo tsihin Nyoo, ra tsa cuñi xaan tsi yo tsa cuenda ra Cristo Jesús Jutu Mañi yo.

9

Nyoo nacatsi ra tsi nyivi Israel

¹ Yuhu tsinú ñi yu tsi ra Cristo tan caahán yu tsa nditsa. Ña jandavi ñaha yu, tyin maa Tatyi Ii Nyoo jaquihín ityi tsa tsicá ñi yu. Yacan cuenda tsító vaha yu tyin tsa nditsa caahán yu tun catyi yu ² cuihya xaan cuñi yu tan uhvi xaan cuñi añima yu ³ tsa cuenda nyivi ñuu yu, ñi Israel. Cuñi xaan yu tsi ñi. Tan nda cuenda cuhva yu tsa cunaa añima yu tan cuhun tsi nu uhvi nu nduve ra Cristo tun tsatyin cuvi cacu ñi tsihin can. ⁴ Tata ra Israel cuvi ñi. Tan Nyoo naquihín cuenda ra tsi ñi tumaa tsa sehe ra tsi ñi. Tan janahá ra tsa cahnu cuvi ra tsi ñi, tyin tsinyaa ra tsihin ñi. Tan ndogó ra tuhun tsihin ñi, tan tsahá ra ley ra tsi ra Moisés na cuhva ra tsi ñi. Tan janahá ra tsi ñi nácaa cuñi ra tsa jacahnu ñi tsi ra. Tan catyi ra tsihin ñi nácaa cua javaha ra tsa vaha tsihin ñi nu cuahán ca tsi. ⁵ Tata tsii tsaahnu yo cuvi tsi ñi, tan tacan tucu ra Cristo cuenda cuñu ñuhu ra. Ra ican cuvi Nyoo. Tan juvin ra ndacá ñaha tandihi tsa iyó. ¡Na jacahnu yo tsi ra tacan ñi maa! ¡Tan na cuvi tsi tacan ñi!

⁶ ¿A catyi yu tyin ña javahá Nyoo tumaa cuhva catyi ra tsihin nyivi Israel tahan tsanaha? Ñavin. Cuñi tsi coto yo tyin ña tandihi nyivi Israel tan cuvi ñi nyivi Israel tsa nditsa. ⁷ Tan tacan tucu ña tandihi tata ra Abraham tan cuvi ñi tata ra tsa nditsa. Tyin tsa cahán Nyoo tsihin ra, cahán tsi tuhun intuhun ñi sehe ra. Tyin catyi Nyoo tsihin ra tyehen: “Tsa cuenda ra Isaac sehe un tan cua coo nyivi tata un.” ⁸ Tsehe janahá tsi yo tyin ñavin tsa cuenda tsa cuvi ñi nyivi tata ra Israel tan cuvi ñi nyivi Nyoo. Tyin nyivi tsa tsinú ñi tsa cahán Nyoo tyin cua javaha ra, ñi ican cuvi sehe ra. Tumaa ra Abraham, tyin ra Abraham tsinú ñi ra tsa cahán Nyoo tsihin ra. ⁹ Tan tyehen cahán Nyoo tsihin ra: “Tyembu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyi Nyoo tsihin ra.

¹⁰ Tan ñavin yacan ñi. Tyin cahán ndihi tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuvi tsii tsaahnu yo, ra Isaac. ¹¹⁻¹² Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyi Nyoo tsihin ña Rebeca tyin ra Esaú, sehe nuu ña, cua cuvi ra musu ra tsa tsinu uvi. Javahá Nyoo tacan tyin nacatsi ra tsi nyivi tsa cuñi maa ra nacatsi ra, tan ñavin tsa cuenda tsa javahá ñi. ¹³ Tumaa catyi ra nu tutu ra tyehen: “Cuñi ca yu tsi ra Jacob, tan ñavin ca ra Esaú.”

¹⁴ ¿Tun tacan náa cua catyi yo? ¿A catyi yo tyin ña vaha tsa javahá Nyoo? ¡Ña cuvi!

¹⁵ Tyin catyí ra tsihin ra Moisés: “Cua cundaahví iñi yu yóo nyívi cuñí maa yu cundaahví iñi yu.” ¹⁶ Tacan javahá ra; cundaahví iñi ra tsi nyívi tsa cuñí maa ra cundaahví iñi ra. Tan ña cundaahví iñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuví ra cundaahví iñi yóo cuñí maa ra. ¹⁷ Tumaa catyí nu tutu ra, nu caahán ra tyeheh tsihin ra rey ñuhu Egipto: “Tsaḥa yu tsa cuví un rey tyin tacan tan coto un tyin iyó tunyee iñi tsi yu. Tan nacoto tucu tandihí nyívi yóo ra cuví yuhu”, catyí Nyoo. ¹⁸ Tan tsihin tsehe tsitó yo tyin Nyoo cundaahví iñi ra tsi nyívi cuñí maa ra. Tan jandundavá tucu ra añima nyívi cuñí maa ra jandundavá ra añima.

¹⁹ Tan vasiqui yoocho cua catyí un: “Yoñi cuví javaha tsa cuñí maa ñi javaha ñi tun ña tsaha Nyoo tyin javaha ñi can.” ¿Nacuenda tyin tyaá Nyoo cuatyí siqui ñi? ²⁰ Maa tyin ña vaha tun tsicá iñi un tacan. Tyin yoñi cuví catyí tyin ña vaha tsa javahá Nyoo. ¿Yóo ra cuví yoocho tan nacahan un nu caahán Nyoo? ¿A cuví catyí iin quisi tsihin ra javahá itsi: “Ña taahán iñi yu cuhva javahá un tsi yu”? Ña cuví. ²¹ Tyin nyívi tsa javahá ndaha tyíñu, iyó ndatu tsi ñi tsa javaha ñi náa cuñí maa ñi tsihin ñuhu quisi can. Tan iin ñi ñuhu quisi can tsatyíñu ñi juvin ñi tsihin can javaha ñi quisi vaha tan quisi peehe.

²² Ña cuví catyí yo tyin ña vaha Nyoo tsa cuenda tsa tsatyíñu ra tsi nyívi tsa cua cuhun anyaya tan cunyeé iñi ra nyehé ra tsi ñi, tyin tsihin ñi can janahá ra tunyee iñi tsa iyó tsi ra tan janahá ra tyin cua tatsi tuñi ra tsi nyívi caquiñi. ²³ Javahá ra tacan tyin tacan tan coto yoo tsa cuví yo nyívi tsa cundaahví iñi ra tyin nda tsanaha tan tsa nacatsí maa ra tsi yo tyin cuhva ra tsa cahnú cuví ra tsi yo. ²⁴ Yacan cuenda nacatsí ra tsi yo. Tan yihí yo cuví yo nyívi Israel, tan nyívi tsa ñavin ñi Israel cuví. ²⁵ Tumaa catyí Nyoo nu tutu tsa tyaá ra Oseas:

Nyívi tsa ñavin nyívi ñuu yu cuví cua catyí yu tyin nyívi yu cuví ñi.

Ñi tsa ña cuñí yu, cua cuñí yu tsi ñi, catyí Nyoo.

²⁶ Tan nu catyí Nyoo: “Nyoocho ñavin nyívi yu cuví ndo.” Juvín ñi ican cua catyí ra tsihin ñi: “Yuhu cuví Nyoo nyito, tan nyoocho cuví sehe yu.” ²⁷ Maa tyin ra Isaías catyí ra tyeheh tsa cuenda nyívi Israel: “Vasu ndi maa cuaha xaan nyívi tata ra Israel cua coo, tumaa tsa cuaha nyiti iyó yuhu ndutya ñuhu, juhva ñi ñi cua cacu. ²⁸ Tan tsa yatyn cuui cua jandaa Jutu Mañi yo tandihí tsa caḥan ra tan cua tatsi tuñi ra tsi tandihí nyívi iyó nu ñuhu ñayivi.” ²⁹ Tumaa catyí tucu ra Isaías taḥan tsanaha:

Tun tsatyin Jutu Mañi yo, ra ndacá ñaha tandihí tsa iyó andivi, tan ña jacacú ra tsi juhva yo, tsa naḥ tandihí yo, Tumaa naḥ nyívi ñuu Sodoma tan ñuu Gommorra taḥan tsanaha.

Nyívi Israel ña ñihí ñi cuhva nduvaha ñi nuu Nyoo,

³⁰ ¿Náa cua catyí yo? Nyívi tsa ñavin ñi Israel cuví, ña nducú ñi cuhva coo vaha ñi tsihin Nyoo, maa tyin Nyoo naquihín cuenda ra tsi ñi tumaa tsatyin vaha ñi tsa cuenda tsa tsinú iñi ñi tsi ra. ³¹ Tan nyívi Israel tsa nducú coo vaha tsihin Nyoo tsihin tsa javahá ñi cuhva catyí ley, ña cuví coo vaha ñi tsihin ra. ³² ¿Nacuenda? Tsa cuenda tyin cuñí ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú iñi ñi tsi ra. Yacan cuenda tumaa tsa catyihí tsaha ñi yuu tan nduva ñi cuví can. ³³ Yuu can caahán Nyoo tuhun nu tutu ra tan catyí ra: Tsaquín nyaa yu iin yuu nda ñuu Sión, tan janduvá tsi tsi nyívi.

Tan yuu can cuví ra Jesucristo.

Tan nyívi tsa tsinú iñi tsi ra tsa cuví yuu can, ña cua nduva ñi, catyí Nyoo nu tutu ra.

10

¹ Yañi, tsihin tsa nñi iñi añima yu tan tsicán tahvi yu tsa cuenda nyívi Israel tyin cuñí yu tsa cacu ñi. ² Tsandaa cuví yu tyin cuñí ñi jacahnú ñi tsi Nyoo, maa tyin ña ñihí ñi cuhva javahá ñi can. ³ Tyin ña tsitó ñi tyin juvin ñi maa Nyoo cuví ra janduvahá tsi nyívi nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi tsi ra na janduvaha maa ra tsi ñi. ⁴ Tyin ra Cristo tsa quitsí ra tan javahá ra tandihí tsa catyí ley, tyin tacan tan tandihí nyívi tsa cua tsinu iñi tsi ra, naquihín cuenda Nyoo tsi ñi tumaa tsatyin vaha ñi.

⁵ Catyí ra Moisés tyin cuví nduvaha nyívi nuu Nyoo, tatun tyaá yahvi ñi tandihí tsa catyí ley, tyin tyaá ra tyeheh: “Nyívi tsa tyaá yahvi tandihí tsa catyí ley, cua coo ñi ñayivi tsa ña cua naa maa.” ⁶ Maa tyin tsa cuenda tsa nduvahá yo nuu Nyoo tsihin tsa tsinú iñi yo tsi ra Cristo, catyí tutu ra tyeheh: “Ña catyí un: ¿Yóo cundaa andivi? tyin tun cahan un tacan cuñí tsi catyí tyin januu un tsi ra Cristo nda nu ñuhu ñayivi tan jacacu ra tsi yo.” Ña cahan un tacan tyin ra Cristo tsa yahá quitsí ra. ⁷ Tan ndi ña catyí un: “Cuñí tsi tsa nuu iin ra nda nu yucú ndiyi tsitsi ñuhú tan janandoto ra tsi ra Cristo”. Ña cahan un tacan, tyin ra Cristo tsa yahá nandoto ra. ⁸ Ña catyí un tacan tyin tyeheh catyí nu tutu Nyoo: “Tuhun Nyoo yatyn iyó tsi tsihin ndo, iyó tsi yuhu ndo tan tsitsi añima ndo.” Tuhun ihya taahán tsi tsinu

iñi ndo tyin juven ñi tsi jacuahá tucu nyuhu.
⁹ Tatun catyi un tsihin yuhu un tyin ra Jesús cuví Jutu Mañi yo, tan tsinu iñi un tsihin añima un tyin Nyoo janandoto tsi ra tsa yaha tsihi ra, cua cacu un. ¹⁰ Tyin tsihin añima yo cuñi tsi tsinu iñi yo tsi ra Cristo tan cuvi nduvaha yo nuu Nyoo, tan tsihin yuhu yo cuñi tsi catyi yo tyin tsinu iñi yo, tyin tacan tan cacu yo. ¹¹ Tuhun Nyoo catyi tsi tyehen: “Ndi intuhun nyivi tsa tsinu iñi tsi ra tan ña cua tahan ñi ticanuu.” ¹² Tyin Nyoo inducu ñi cuñi ra nyehé ra tsi nyivi Israel tan nyivi inga ñuu. Tyin intuhun ñi maa ra ndacá ñaha tsi tandihi yo. Tan nasocó ra tsi tandihi nyivi tsa tsicán tahvi tsi ra. ¹³ Tyin tyehen catyi tuhun Nyoo: “Tandihí nyivi tsa tsicán tahvi tsi Jutu Mañi yo cua cacu ñi.” ¹⁴ Maa tyin ¿nácaa cua ndacan tahvi ñi tsi ra tatun ñaha ca tsinu iñi ñi tsi ra? Tan ¿nácaa cua tsinu iñi ñi tsi ra tatun ñaha ca cuñi ñi tuhun ra? Tan ¿nácaa cua cuñi ñi tuhun ra tatun yofi cahan tuhun ra tsihin ñi? ¹⁵ Tan ¿nácaa cuhun nyivi cahan ñi nácaa coo taxin nyivi, tatun yofi jacuhun tsi ñi? Tumaa catyi nu tutu Nyoo: “Sií xaan cuví nu tsaá ñi caahán tuhun vaha.” ¹⁶ Maa tyin ña tandihi nyivi tan tyaá yahvi ñi tuhun tsa jacacú Nyoo tsi yo. Tumaa catyi ra Isaías: “Jutu Mañi yu, yofi cuñi tsinu iñi tuhun caahán ndi”, catyi ra. ¹⁷ Yacan cuenda cuñi tsi tsa tyaá soho jihna yo tuhun ra Cristo, tacan tan tsinu iñi yo tsi ra.

¹⁸ Maa tyin tsicá tucu iñi yu: ¿A ña tsiñi nyivi Israel tuhun Nyoo? ¡Tsiñi ñi! Tumaa catyi nu tutu Nyoo:

Jutu Mañi yu, nyivi tsa jacotó tuhun un tsa jacotó ñi tuhun un nani cahnú ñuuhú ñayivi,

tan ña nacogó ihñi ñi ndi intuhun ñuu luhlu, catyi tsi nu tutu Nyoo.

¹⁹ Tan tsicá nyico tucu iñi yu: ¿A ña cutuñi iñi nyivi Israel tyin cua cacu nyivi tsa ñavin ñi Israel cuví? ¡Cutuñi iñi ñi! Tyin tsa jihna ñi ra Moisés tyaá ra tuhun cahan Nyoo tsihin ñi Israel nu tutu tyehen:

Nyoooho, ndasi cua cuñi ndo tyin cua cuhva yu tsa vaha tsi nyivi tsa ñavin nyivi ñuu yu cuví.

Tan cua cúv ndo tsihi nyehé ndo tsi ñi, catyi Nyoo.

²⁰ Tan ra Isaías caná iñi ra cahan ra:

“Nyivi tsa ña nducuy tsi Nyoo, nañihí ñi tsi ra.

Tan janahá ra tsi ra tsi ñi tsa ña tsicá tuhun tuhun ra.”

²¹ Tan tyaá tucu ra Isaías tuhun cahan Nyoo tsihin ñi Israel tyehen: “Tandihí ñi quivi caná yu tsi nyivi yu, na nacuhva cuenda ñi tsi ñi tsi yu, maa tyin ña tyaá yahvi ñi. Tan jandavá xaan ñi iñi ñi”, catyi Nyoo.

11

Nyivi Israel tsa ñihí cuhva cacu

¹ ¿A ña cuñi ca Nyoo tsi nyivi Israel? Ñavin tsa ña cuñi ca ra tsi ñi, tyin juven ñi ra Israel cuví tucu yuhu. Tyin tata ra Abraham tan tata ra Benjamín cuví yu. ² Tahan tsanaha nacatsi Nyoo tsi ñi Israel tyin cuvi ñi nyivi ra. Tan vityin ñavin tsa jatsiyó cuvi ra tsi ñi. ¿A ña ñuuhú iñi ndo tyin catyi nu tutu Nyoo tyin ra Elías, ra cuví ndusu yuhu Nyoo, catyi ra tyin ña vaha nyivi Israel tan tsicán tahvi ra tsi Nyoo tyehen? ³ “Jutu Mañi yu, nyivi Israel tsahñi ñi tsi ra cuví ndusu yuhu maa un naha ra, tan tsani ñi nu jacahnú nyivi tsi un. Tan intuhun ña maa yu ndog, tan cuñi ndihí ñi cahní ñi tsi yu”, catyi ra. ⁴ Maa tyin nacahan Nyoo tan catyi ra tsihin ra Elías: “Ñavin maa ñi maa un ndog. Tyin utsa mil ca nyivi naquihín vaha yu, ñi tsa ña jacahnú maa tsitoho Baal”, catyi Nyoo tsihin ra. ⁵ Tan juven ñi tacan vityin, ndog juhva nyivi jacahnú tsi Nyoo. Tan tsa cuenda tsa vaha Nyoo nacatsi ra tsi ñi tyin jaha ra tucahnu iñi tsi ñi. ⁶ Tan ña jahá ra tucahnu iñi tsi yo tsa cuenda tsa javahá yo tsa vaha. Tyin tun tsatyin jahá Nyoo tucahnu iñi tsi yo tsa cuenda tsa javahá yo tsa vaha, cuñi tsi catyi tyin ña jacacú ra tsi yo tsihin tsa vaha ra.

⁷ Tan ¿nácaa? Nyivi Israel nducuy ñi cuhva nduvaha ñi nuu Nyoo, maa tyin ña ñihí ñi cuhva. Juhva ñi ñihí ñi cuhva. Tan ñi tsa ñihí cuhva can cuví ñi tsa nacatsi maa Nyoo. Tan ñi tsa ña ñihí cuhva cacu, ndundavá añima ñi. ⁸ Tumaa catyi nu tutu Nyoo tyehen: “Nyoo tsahá ra tsa ña cutuñi iñi ñi. Tan vasu ndi maa iyó tinuu ñi, ña tsahá ra tsa nyehé ñi. Iyó soho ñi, maa tyin ña cutuñi iñi ñi tsa tsiñi ñi. Tacan iyó ñi nda cuenda vityin.” ⁹ Tan juven ñi catyi tucu ra David tyehen: Javahá ñi vico tan cusii iñi ñi, maa tyin yacan cua jativi tsi ñi.

Tan cua tatsi tuñi Nyoo tsi ñi tyin cuvi can tumaa iin trampa tsa cuenda ñi.

¹⁰ Tan cua cuaa ñi na ña nyehe ca ñi tsa nditsa.

Tan nacosó tsa vee siqui ñi, catyi ra David tuhun nyivi Israel tsa ña tsinu iñi tsi Nyoo.

Nacaa nduvahá nyivi tsa ñavin ñi Israel cuví nuu Nyoo

¹¹ Tan vityin tsicá tuhun yu: ¿A tsa cuenda tsa ña tyaá yahvi nyivi Israel tsa cahan Nyoo, tan ndoó cuvi ñi tsa ña cua cacu ñi? Ñavin tsa ndoo cuvi ñi. Ndog nuu ñi maa ñi, tyin jacacú jihna Nyoo tsi nyivi tsa ñavin ñi Israel cuví. Tyin tacan tan tsa cua nyehe ñi yacan, ndasi cuñi ñi tan natsinu ndihí iñi ñi tsi Nyoo. ¹² Tatun cuaha nyivi tsa ñavin ñi Israel cuvi tan natsinu iñi ñi tsi Nyoo tsa

cuenda cuatyi tsa javahá ñi Israel, cuaha ca ñi cua natsinu iñi quivi tsa cua cuvi nyico tandihi nyivi Israel nyivi Nyoo.

¹³ Cuñi yu cahan yu juhva tsihin nyoooho tsa ñavin ñi Israel cuví. Ra Jesús tava tyiñu ra tsi yu tsa quitsi yu nu iyó ndo. Tan tsitó yu tyin cuñi tsi tsa javaha yu tyiñu ihya tyin cahnu xaan cuví tsi. Cahnu jahá yu itsi ¹⁴ tan caahán yu tuhun Nyoo tsihin ndo tyin na nyehe nyivi ñuu yu, ñi Israel, nácaa tsinú iñi ndo tsi Nyoo, tyin vasiqúi tacan tan natsinu ndihi iñi ñi tan cacu ñi. ¹⁵ Tyin tun tsa cuenda tsa ña natñin cuenda Nyoo tsi nyivi Israel tan nduvahá iyó nyivi inga ñuu tsihin Nyoo, quivi cua naquihin cuenda ra tsi ñi cua cuví tsi tumaa tsa cua nandoto ñi, tyin cuaha ca ñi cua tsinu iñi tan ñavin ca tsa jihna ñi. ¹⁶ Iin cuhva tatun vaha quitá paan tsa javahá yo tsa jihna ñi tsihin yutsan paan, vaha tandihi ca yutsan can. Tan tatun iin yoho yutun tan vaha tun, vaha tandihi ca soco tun. Tacan tucu nyivi Israel nyaá yahvi ñi nuu Nyoo tyin tsi tsaahnu ñi yihí ra naha cuenda ra.

¹⁷ Tan nyivi Israel cuví ñi tumaa soco yutun olivo. Tan nyoooho cuví ndo tumaa soco yutun olivo cuuhu. Tumaa tuhvá nyivi tsaahnya iin soco yutun tan natyaa ñi inga soco yutun, tacan javahá Nyoo tyin jatsiyo ra tsi nyivi Israel tan tyaa ra tsi nyoooho tsa cuví ndo nyivi inga ñuu. Tacan cuví tan tsaá ndo cuví ndo nyivi cuenda Nyoo tan naquihin ndo tandihi tsa vaha tsa iyó tsi ra. ¹⁸ Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá iñi ndo tacan nducuhun iñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

¹⁹ Vasiqúi cua catyí ndo: “Juvin, maa tyin Nyoo tsahnya ra soco yutun can tan natyaa ra tsi nyuhu.” ²⁰ Nditse. Maa tyin jatsiyo nuu ñi ra tsi nyivi Israel tsa cuenda tsa ña tsinu iñi ñi tsi ra. Tan tyacu ra tsi nyoooho tsa cuenda tsa tsinú iñi ndo tsi ra. Yacan jaha ndo cuenda tsa ña nduyaa ndo tsihin can. ²¹ Tyin tatun ña jaha Nyoo tucahnu iñi tsi ñi tsa cuví soco vaha can, ndi nyoooho tan ña cua jaha ra tucahnu iñi tatun ña tsinú vaha iñi ndo tsi ra. ²² Nyehé ndo tyin vaha xaan iñi Nyoo, maa tyin xaan tucu ra tsihin nyivi tsa ña naquihin cuenda tumañi iñi tsa tsahá ra tsi ñi. Vaha iñi ra tsihin nyoooho yacan tyaa yahvi ndo tsa vaha tsa tsahá ra tsi yo. Tyin tatun ña tyaa yahvi ndo itsi, cua jatsiyo nyico ra tsi ndo tsaha yutun olivo ra. ²³ Tyin tatun natsinu nyico iñi nyivi Israel inga tsaha, cua cunyaa nyico ñi tsaha yutun olivo nu coyo ñi. Tyin Nyoo iyó tunyee iñi tsi ra tsa natyaa tahan nyico ra tsi ñi inga tsaha. ²⁴ Nyoooho tsa ñavin Israel cuví, cuví ndo tumaa soco yutun olivo cuuhu, maa

tyin Nyoo naquihin ra tsi ndo tan tyaa tahan ra tsi ndo tsihin yutun olivo vaha tsa cumí ra. Tacan cua javaha ra quivi cua cuñi ra iin yaha ñi cua tyaa tahan nyico ra soco yutun vaha nu tsinyaa jihna maa tsi.

Nyivi Israel cua cacu nda nu ndihi

²⁵ Yañi, cuñi yu tsa coto ndo iin tsa xeehe tsa javahá Nyoo, tyin tacan tan ña cacu iñi ndo tyin tsitó xaan ndo. Cuaha xaan nyivi Israel ndundava añima ñi, nda cuanda cacu tandihi nyivi inga ñuu tsa nyaa tyin cacu. ²⁶ Tsa yaha cua cacu ñi, tacan tan cua cacu tandihi nyivi Israel tyin catyí nu tutu Nyoo tyehen:

Ra tsa jacacú tsi nyivi, nda Sión cua quee ra. Tan cua quihin nyaa ra cuatyi nyivi ra Jacob. ²⁷ Tuhun ihya cuví tsa cua ndoo yu tsihin ñi quivi cua quihin nyaa yu cuatyi ñi, catyí Nyoo nu tutu ra.

²⁸ Cuxaán xaan nyivi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu iñi nyoooho. Tahan tsanaha nacatsi Nyoo tsi ra Abraham, tan ra Isaac, tan ra Jacob tyin tsinu iñi ra naha tsi ra. Tan cuñi ndihi ra tsi nyivi Israel tyin tata ra naha cuví tsi ñi. ²⁹ Tyin tsa tsa tsahá Nyoo, ña quihin nyaa nyico ra can. Tyin yoo tsa cuví nyivi Nyoo, ña tuhvá ra cahan tyin ñavin nyivi ra cuví yo. ³⁰ Tsanaha nyoooho ña tyaa yahvi ndo tsi Nyoo. Maa tyin vityin tyaa yahvi ndo tsi ra tan cundaahví iñi ra nyehé ra tsi ndo tsa cuenda tsa ña tyaa yahvi nyivi Israel tsi ra. ³¹ Nyivi Israel ña tyaa yahvi ñi tsi Nyoo vityin tumaa tsa ña tyaa yahvi nyoooho tsi ra tahan tsanaha. Maa tyin cua cundaahví iñi ra nyehe ra tsi ñi tumaa tsa cundaahví iñi ra nyehé ra tsi nyoooho. ³² Yihí tsaha tandihi nyivi tan nacoó ñi tsa tyaa yahvi ñi tsi Nyoo. Tsahá ra ndatu tsi ñi tsa javahá ñi tacan, tyin tacan tan iin caa ñi cua cuví cundaahví iñi ra tsi tandihi yo.

³³ ¡Cahnu xaan cuví tsa cuca tan tsa tsitó Nyoo tan tsa tsiñi tuñi tsa iyó tsi ra! Yoo ña cuví nacatyi tuhun yo cuhva tsicá iñi ra, tan ndi iin sava quivi ña cua cutuñi iñi yo tandihi cuhva javahá ra. ³⁴ ¿Yóo cutuñi iñi cuhva tsicá iñi Jutu Mañi yo? ¿O yóo jacuahá tsi ra? Yoñi. ³⁵ Tyin yoñi cuví cuhva jihna iin tsa vaha tsi ra, tan tsa cuenda can tan cuita iñi ñi tyin cua naquihin ñi yahvi cuenda can. ³⁶ Tyin tandihi maa tsa iyó, maa Nyoo javahá itsi, tan iyó tsi tsa cuenda ra. ¡Na jacahnu yo tsi Nyoo tacan ñi maa! Tan na cuví tsi tacan.

12

Na javaha yo cuhva cuñi Nyoo tsihin ñayivi iyó yo

¹ Yacan cuenda yañi, tsitó ndo tyin cundaahví xaan iñi Nyoo nyehé ra tsi yo, tan tsa cuenda yacan caahán ndaahvi yu tsihin

ndo. Cuhva cuenda ndo cuñu ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa javahá yo tacan janahá tsi tyin nditsa tsa jacahnú yo tsi ra. Yacan cuví tsa taahán iñi ra. ² Ña cōo ca ndo cuhva iyó nyivi ñuu ñayivi ihya. Cuhva ndo tsa nasama Nyoo cuhva tsicá iñi ndo, tan cuhva iyó ndo, tyin tacan tan coto ndo javaha ndo tsa taahán iñi maa ra: náa ndihi tsa vaha tan tsa cuíti.

³ Nyoo, tsa cuenda tsa vaha iñi ra, tan tava tyiñu ra tsi yu tyin cuví yu iin ra caca tyiñu ra Jesucristo. Yacan cuenda catyi yu tsihin tandihi nyooho tyin ndi intuhun ndo tan ña caca iñi ndo tyin vaha xaan ndo. Maa tyin caca iñi ndo nácaa iyó ndo tan náa cuví tsa vaha tsa tsahá Nyoo tsi ndo iin caa ñi tsihin tsa tsinú iñi ndo tsi ra. ⁴ Tumaa soho yo tan tinuu yo iin ñi cuví tsi tsihin tandihi ca tahan tsi tsa iyó iin cuñu ñuhu. Tan tsa intuhun intuhun tsi siin siin tyiñu javahá tsi. ⁵ Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

⁶ Siin siin ndatu tsahá Nyoo tsi tsa intuhun intuhun yo, tsahá ra tsi yo ndaa tsa cuñi maa ra cuhva ra tsi yo, tan na cuatyíñu yo itsi. Tatun tsahá ra tsa cuví yo ndusu yuhu ra, na tsinu iñi yo tyin tyiñu can tsahá ra tsi yo, tan na javaha yo itsi. ⁷ Tatun tsahá ra ndatu tsi iin yo tsa jatyinyee yo tsi nyivi, na javaha yo tsi tsihin tsa ñi iñi añima yo. Tatun tsi inga yo tsahá ra tsa jacuahá yo tsi nyivi, na jacuahá yo tsi ñi tsihin tsa ñi iñi yo. ⁸ Tatun tsahá ra tsi inga yo tsa cuví jandu iin yo iñi nyivi, na jandu iin yo iñi ñi tsihin tsa ñi iñi añima yo. Tatun inga yo ñihí tsa jatyinyee yo tsi nyivi tsihin xuhun, na jatyinyee yo tsi ñi, maa tyin ña cuita iñi yo tyin natyahvi ñi tsi yo. Tatun inga yo ñihí tsa jaquihín ityi yo tsi nyivi yihí cuenda Nyoo tsihin yo, na jaha yo cuenda cuhva jaquihín ityi yo tsi ñi. Tatun inga yo ñihí tsa jatyinyee yo tsi nyivi tsa iyó tsa tsiñi ñuhu, na jatyinyee yo tsi ñi tsihin tsa sii cuñi yo.

Náa taahán tsi javaha nyivi yihí cuenda ra Cristo

⁹ Cuñi tahan ndo tsi ndo tsihin tsa ñi iñi añima ndo. Ndasi cuñi ndo nyehé ndo tsa ña vaha. Tan cūanyicun ndo tsa vaha. ¹⁰ Cuñi tsi tsa cuñi tahan yo tsi yo tumaa tsa cuñi yo tsi nyivi yo. Tan tyaa yahvi tahan ndo tsi ndo tan jaha tahan ndo tsa ñayivi tsi ndo.

¹¹ Ndūcu ndo tunyee iñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa ñi iñi añima ndo.

¹² Cōo ndo ñayivi ihya tsihin tsa sii, tyin tsitó ndo tyin cua coo ndo tsihin Nyoo nu

cuahán ca tsi. Janyee ndo iñi ndo nyehé ndo tundoho. Tan ndācan tahvi ndo tsi Nyoo iin nyita ñi.

¹³ Cuhva ndo tsa tsiñi ñuhu tsi nyivi yihí cuenda Nyoo tsihin ndo. Vaha tyānuu ndo tsi nyivi tsaa vehe ndo.

¹⁴ Tatun caahán nyivi ndavaha ñi tsi ndo, vaha cahan ndo tsihin ñi, tan ña cahan ndasi ndo tsi ñi. Ndācan tahvi ndo tsi Nyoo tsa cuenda ñi, na nasoco ra tsi ñi.

¹⁵ Sii cuñi ndo tsihin nyivi sii cuñi. Vācu ndo tsihin nyivi tsa tsacú jaha tucuihaya iñi.

¹⁶ Ña cañi tahan ndo. Iin ñi cuví ndo tsihin tahan ndo. Ña cahnu jaha ndo tsi ndo; jandundaahvi ndo tsi ndo tumaa iyó nyivi ndaahvi; ña jaha ndo tsa tsitó xaan ndo.

¹⁷ Ña javaha ndo tsa ña vaha tsihin nyivi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihi nyivi. ¹⁸ Ndūcu ndo cuhva coo taxin ndo tsihin tandihi nyivi. ¹⁹ Yañi, cuñi yu tsi ndo. Tatun javahá nyivi tsa ña vaha tsihin ndo, ña tatsi tuñi ndo tsi ñi; natyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyi tsi tyehen: “Yuhu taahán tsi tatsi tuñi tsi nyivi tan tyahvi tsi ñi”, catyi Jutu Mañi yo. ²⁰ Tan juvin ñi catyi tucu ra: “Tatun nyivi xaan iñi tsi ndo tan tsisocó ñi, cuhva ndo tsa catsi ñi, tan tatun na ityi iñi ñi, cuhva ndo ndutya coho ñi. Tyin tsa javaha ndo tacan, cuaaha tacan ña nuu ñi cua cuví, tyin cua nducahan nuu ñi.” ²¹ Ña cuhva ndo tsa cundaca ñaha tsa ña vaha tsi ndo, maa tyin jandu iin ndo iñi añima ndo. Javaha ndo tsa vaha tan cāsi ndo nu vatsi tsa ña vaha tsihin can.

13

¹ Tandihí nyivi cuñi tsi tsa tyaa yahvi ñi tsi ra cumi tyiñu cuenda ra ndacá ñaha naha ra. Tyin tandihí maa ra cumi tyiñu tan Nyoo tsahá tyiñu can tsi ra naha. Ra cumi tyiñu tsa iyó, maa Nyoo tsahá tsi ra naha tsa cuví ra naha tyiñu. ² Yacan cuenda, nyivi tsa ña tyaa yahvi tsi ra naha, cuñi tsi catyi tyin ña tyaa yahvi ñi tsa caahán Nyoo. Ñi tsa javahá tacan, tsicoo cuatyí ñi tsa cuenda can, tan cua cutuñi ñi. ³ Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyivi tsa javahá tsa vaha. Nyisó tyiñu ra naha tsa tatsi tuñi ra naha tsi nyivi tsa javahá tsa ña vaha. Tun ña cuñi un tsa jayuhvi ra cumi tyiñu naha ra tsi un, cōo vaha, tyin tacan tan cua nyehe ra naha tyin vaha iyó un tan vaha nyivi cuví un. ⁴ Tyin ra cumi tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuví nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyivi

javahá tsa ña vaha, tyin tyiñu can tyaa Nyoo tsi ra naha. ⁵ Yacan cuenda ñiñi cuñí tsi tsa tyaa yahvi ndo tsi ra cumí tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo. ⁶ Tan inga tuhun tsa cuenda can tyahví ndo xuhun tsa tavá ra cumí tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nycú ra naha.

⁷ Cuhva ndo tsa taahán tsi tsi intuhun intuhun nyivi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyivi tsa taahán tsi tyaa yahvi ndo. Jaha ndo tsa ñayivi tsi nyivi tsa taahán tsi jaha ndo tsa ñayivi tsi. ⁸ Ña cunyaa cuenda ndo tsi ndi intuhun nyivi. Maa tyin cuñi tahan ndo tsi ndo, tyin tsa cuñi tahan yo tsi yo, javahá yo tandihí tsa catyí ley Nyoo tsa tyaa ra Moisés tyin javaha yo. ⁹ Catyí ley Nyoo tyehen: “Tun iyó ñasíhi ndo o yí ndo ña cōo inga ñaha o rayii tsi ndo. Ña cahñi ndo. Ña sūhu ndo. Ña cahan ndo cuendu siqui ndi intuhun nyivi. Ña nyiyo iñi ndo tsa tsii inga nyivi.” Tandihí tsehe tan inga ca ley javahá ndo itsi tatun cuñi ndo tsi tahan ndo tumaa tsa cuñi ndo tsi maa ndo. ¹⁰ Tatun cuñi ndo tsi tahan ndo, ña javaha ndo tsa ña vaha tsihin ñi. Tsihin tsa cuñi tahan yo tsi yo, javahá yo tandihí tsa catyí ley Nyoo tsa tyaa ra Moisés.

¹¹ Tsihin tuhun ihya jaha ndo cuenda tsi ndo quivi iyó ndo vityin. Tyin tsa tahan tsi cuhva tsa taahán tsi ndoto yo. Tyin vityin tsa yatyin cuii ca cua cunuhu añima yo nu nyaá Nyoo tan ñavin ca quivi tsa quihvi yo tuhun ra. ¹² Tsa yaha tsa tsacuaa, tan tsa cua tuvi. Yacan cuenda cuñi tsi jandihí ndo tsa javahá ndo tsa javahá nyivi iyó nu naa. Tan jaha tyiñu ndo tsihin tsa vaha tsa tsahá Nyoo tsi ndo; javaha ndo cuhva javahá nyivi iyó nu nditsin. ¹³ Cuñi tsi cuiti cōo yo tyin nu nditsin Nyoo iyó yo. Tan ña cōho ndo nyixi, ña javaha ndo vico tan coho ndo nyixi. Nyooho rayii, ña caca nuu ndo tsihin ñaha. Tan nyooho ñaha ña caca nuu ndo tsihin rayii. Ña cōo viciu tsi ndo. Tan ña ndasi cuñi ndo nyehe ndo tsi nyivi. Tan ña nyiyo iñi ndo tsa iyó tsi ñi. ¹⁴ Maa tyin cōo ndo tsihin Jutu Mañi yo Jesucristo, tumaa tsinditsi yo jahma tacan na cunditsi yo tsi ra. Tan ña caca iñi ndo javaha ndo cuhva cuñi cuñu ñuhu ndo.

14

Na ña cahan nyaa yo tsi nyivi

¹ Tatun iin nyivi yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña cahan ndo

tsa luxu tuhun Nyoo tsa ña cutuñí vaha iñi yo tsihin ñi coto ndu uvi iñi ñi. ² Cua cuhva yu iin cuhva tsi ndo: Tsa cuenda juhva nyivi cuví catsi maa ñi tandihí maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñí ñi. Ñi ihya cuví ñi tsa ña ñihi vaha nyaá tsihin Nyoo. ³ Maa tyin ñi tsa tsatsí tandihí can, taahán tsi naquihin cuenda ñi tsi ñi tsa tsatsí yucu ñi. Tan ñi tsa tsatsí yucu, na ña cahan nyaá ñi tsi inga ñi can. Tyin Nyoo naquihin cuenda ra tsi ñi can. ⁴ Tan zyóo nyivi cuví yooho tan cahan nyaá un tsi musu inga ra? Tyin tun vaha o ña vaha javahá ñi, nyehe maa tsitoho ñi tsihin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

⁵ Inga tucu cuhva: Yihí nyivi jacahnú ñi iin quivi tan ñavin ca inga quivi. Tan tsa cuenda inga nyivi nduve quivi cahnu cuví tan quivi ña cahnu cuví. Inducu ñi quivi cuñi ñi, yacan cuenda intuhun intuhun maa yo tan cuñi tsi tyihí tuñi vaha iñi yo. ⁶ Ñi tsa naquihin vaha quivi, naquihin vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihin vaha can, juvin ñi jacahnú tucu ñi tsi Nyoo tyin ña naquihin vaha ñi can. Tan ñi tsa tsatsí tandihí can, juvin ñi tsatsí tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsahá ra tsa catsi ñi. Tan ñi tsa ña tsatsí tandihí, ña tsatsí ñi tsa cuenda tsa jacahnú ñi tsi Jutu Mañi yo tan juvin ñi nacuhvá tucu ñi can tyahvi nyoo tsi ra.

⁷ Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsiihi yo. ⁸ Tyin tatun iyó yo, iyó yo tsa jaha tyiñu yo tyiñu Nyoo. Tan tatun tsiihi yo, tsiihi yo tsa cuenda Jutu Mañi yo tan naquihin ra añima yo. Yacan cuenda tsii maa Jutu Mañi yo cuví tsi yo vasu ndi maa nyito yo o tsiihi yo. ⁹ Tyin ra Cristo tsihi ra tan nandotó ra tyin cundaca ñaha ra tsi nyivi nyito tan nyivi ña nyito.

¹⁰ Maa tyin yooho, ¿nacuenda nyehé nyaa un tsi ra yañi un? ¿o nacuenda ña naquihin cuenda un tsi ra?, tan tsitó vaha un tyin tandihí yo tan cua tahan tsi quivi cuhva cuenda yo tsi yo nuu ra Cristo tyin tatsi tuñi ra tsi yo. ¹¹ Tumaa tsa catyí Nyoo nu tutu ra tyehen:

Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñi tsi cuiñi tsiti tandihí nyivi nuu yu.

Tandihí ñi tan cua nacoto ñi tsi yu tsa cuví yu Nyoo.

Tan nuu tandihí nyivi cua jacahnú ñi tsi yu, catyí Nyoo.

¹² Yacan cuenda intuhun intuhun yo tan cua nacuhva cuenda yo tyiñu javahá yo tsi Nyoo.

Ña janacava ndo tsi yañi ndo nu cuatyí

¹³ Yacan cuenda, ña taahán tsi cahan nyaa ca ndo tsi nyívi. Maa tyin nducu ndo cuhva tsa ña janacava ndo tsi ñi nu cuatyí coto jandihi ñi tsa tsinú iñi ñi tsi ra Cristo. ¹⁴ Yuhu tsító yu tyin cuví catsi yo tandihi tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsi ñi tandihi, tsa cuenda maa ñi ña cuví catsi ñi can. ¹⁵ Maa tyin tatun tsa cuenda tsa tsatsí ndo tan ndasi cuñi yañi yo, ña nditsa tsa cuñi ndo tsi ra. Ña cuhva ndo tsa tiví yañi yo tsihin tsa tsatsí ndo tyin ra Cristo tsihi ra tsa cuenda ra. ¹⁶ Ña cuhva ndo tsa cahan nyívi ndavaha ñi siqui tsa tsahá Nyoo ndatu tyin catsi yo. ¹⁷ Tatun ndacá ñaha Nyoo tsi yo ña ñiñi xaan náa tsatsí yo o náa tsihi yo. Tsa ñiñi ca cuví tsa vaha iyó yo nuu ra, tan tsihin tsa sií cuñi yo, tan taxin iyó añima yo jahá Tatyí li ra. ¹⁸ Nyívi jahá tyiñu tyiñu ra Cristo tacan, sií cuñi Nyoo nyehé ra tsi ñi, tan tacan tucu nyívi sií cuñi ñi nyehé ñi tsi ñi.

¹⁹ Yacan cuenda cuñi tsi jañiñi yo tsi yo tan coo vaha yo tsihin nyívi. Tyin tacan tan cuví jatinyee tahan yo tsi yo na cuahnu ca yo tsihin tuhun Nyoo. ²⁰ Ndi intuhun ndo tan ña jativí ndo tyiñu jahá Nyoo tsitsi añima inga nyívi tsihin tsa tsatsí ndo. Nditsa tyin tandihi tsa tsatsí yo tan vaha tsi. Maa tyin ña vaha tsa catsi yo iin tsa tsatsí yo tatun tsihin can janacava yo tsi nyívi nu cuatyí. ²¹ Yacan cuenda, vaha tsa ña catsi yo cuñi, ndi ña coho yo vinu tatun ndasi cuñi yañi yo nyehé ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tsa javahá yo. ²² Cuhva tsa tsinú iñi yo tsa cuenda tandihi yacan ña cahan yo tuhun can tsihin inga nyívi. Na coto intuhun ñi maa yo can tsihin Nyoo. Sií xaan cuñi yo tatun ña uvi tsicá iñi yo javahá yo tsa tsahá Nyoo ndatu tyin javahá yo. ²³ Maa tyin nyívi tsa tsatsí náa tsatsí, tan uvi tsicá iñi ñi, tsicoo cuatyí ñi tyin ña tsinú vaha iñi ñi tyin cuví catsi ñi can. Tan tandihi tsa javahá yo tsihin tsa ña tsiñú iñi yo tyin tsahá Nyoo ndatu javaha yo can, cuatyí cuví.

15

Na javaha yo tsa taahán iñi nyívi yihí tuhun Nyoo tsihin yo, tan ñavin tsa taahán iñi ñi maa yo

¹ Yoo tsa vaha cuanyicún tsi Nyoo, cuñi tsi tsa jatinyee yo tsi nyívi tsa ñaha ca tsinú vaha iñi tsi ra. Jatinyee yo tsi ñi na tsinu ca iñi ñi. Tan na ña nducu yo maa ñi maa tsa taahán iñi maa yo. ² Intuhun intuhun yo cuñi tsi tsa javaha yo cuhva taahán iñi inga nyívi tatun cuví tsi tsa vaha cuenda ñi, tyin tacan tan cuví cuahnu ca ñi tsihin

tuhun Nyoo. ³ Tyin ndi ra Cristo tan ña javahá ra cuhva taahán iñi maa ra, maa tyin tahan ra tumaa catyí nu tutu Nyoo tyehen: “Tandihí tsa ndavaha ñi tsa cahan nyívi siqui Nyoo, siqui ra Cristo ndoo can”, catyí tsi. ⁴ Tyin tandihí tsa tsinyaá nu tutu Nyoo tahan tsanaha, tsinyaá tsi tsa cuenda tsa cutuhva yo itsi. Tan juvin tsi jatinyee tsi yo tsa cunyeé iñi yo cuatu yo tsa cua cuhva Nyoo tsi yo. Tyin tun cahvi yo itsi jandu iin tsi iñi yo. ⁵ Tan juvin ñi maa ra tsahá tsa cunyeé iñi yo cuatu yo, tan tsahá ra tsa vaha cuñi añima yo. Na jatinyee ca ra tsi yo coo vaha yo tan iin ñi cuví yo tumaa taahán iñi ra Cristo Jesús. ⁶ Tacan tan tandihí yo iin caa ñi jacahnu yo tsi Nyoo Jutu ra Jesucristo Jutu Mañi yo.

Nyívi tsa ñavin ñi Israel cuví, cua coto ñi tuhun Nyoo

⁷ Yacan cuenda naquihin cuenda tahan ndo tsi ndo, tumaa naquihin cuenda ra Cristo tsi yo, tyin tun javaha yo tacan, jacahnu yo tsi Nyoo. ⁸ Tan catyí yu tsihin ndo: ra Cristo quitsi ra quitsi jatinyee ra tsi nyuhu tsa cuví nyívi Israel, tyin tacan catyí Nyoo tsihin tsi tsahnu ndi tyin cua javaha ra. Tan tacan janahá ra Cristo tyin tandihí tsa catyí Nyoo tyin cua javaha ra, javahá ra itsi. ⁹ Quitsi ra Cristo tyin tacan tan jacahnu tucu nyívi tsa ñavin ñi Israel cuví tsi Nyoo, tsa cuenda tsa cundaahví iñi ra nyehé ra tsi ñi, tumaa catyí nu tutu ra tyehen:

Yacan cuenda cua jacahnu yu tsi un tan cua nyehé tandihí nyívi tsa ñavin ñi Israel cuví.

Cua jacahnu yu tsi un tan cata yu yaa tsa cuenda un, catyí tsi.

¹⁰ Tan inga tucu nu catyí tsi tyehen: Nyooho tsa ñavin ñi Israel cuví, sií cuñi ndo tsihin ñi Israel, nyívi Nyoo.

¹¹ Tan inga tucu nu catyí tsi tyehen: Jacahnu ndo tsi Jutu Mañi yo, nyooho nyívi tsa ñavin ñi Israel cuví.

Cata tandihí ndo yaa tan jacahnu ndo tsi ra. ¹² Ra Isaías tyaa tucu ra nu tutu Nyoo tyehen:

Cua cacu iin ra tsa cuví tata ra Isaí.

Cua quitsi ra cua cundaca ñaha ra tsi nyívi tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.

¹³ Juvin ñi maa Nyoo tsahá tunyee iñi tsi yo tan tsító yo tyin cua cuhva ra tsa cuhva ra tsi yo. Na jacutu ra tsi ndo tsihin tusii iñi ra. Tan na coo taxin añima ndo tsa cuenda tsa tsinú iñi ndo tsi ra, tyin tacan tan tsihin tunyee iñi Tatyí li ra tan cuita vaha iñi ndo tyin cua ñiñi ndo tsa cua cuhva ra tsi ndo.

¹⁴ Yañi, tsító vaha yu tyin nyooho vaha iñi ndo tan cutuñi vaha iñi ndo, tan tsító vaha ndo cuhva cuhva cuenda tahan ndo tsi ndo. ¹⁵ Maa tyin nu carta ihya ñiñi xaan

caahán yu siqui juhva tsa tyaa yu tyin tacan tan ña naa iñi ndo can. Tyehen javahá yu tsa cuenda tyin Nyoo tsahá ra tsa vaha ra tsi yu ¹⁶ tsa jaha tyiñu yu tyiñu ra Jesucristo nu iyó nyivi tsa ñavin ñi Israel cuví. Tan tyiñu tsa javahá yu cuví tsa caahán yu tuhun Nyoo nácaa jacacú ra tsi nyivi. Tyehen javahá yu tyin tacan tan cuví cuhva cuenda yu tsi ñi tsi Nyoo tan cuví ñi iin ofrenda tsa taahán iñi ra, tyin tsa nduvahá ñi nuu ra jahá Tatyí li ra.

¹⁷ Yuhu tsa tsinú iñi yu tsi ra Cristo Jesús, sií cuñí yu jahá tyiñu yu tyiñu Nyoo tyin tsitó yu tyin tyiñu vaha javahá yu. ¹⁸ Yuhu ña caná iñi yu cahan yu tsa ña javahá ra Cristo tsihin yu. Maa tyin tsahá cuenda yu tsi ndo tyin nyivi tsa ñavin ñi Israel cuví, tsinú iñi ñi tsi Nyoo tyin Nyoo tsatyíñu ra tsi yu tan vityin tyaa yahví ñi tsi ra tsa cuenda tsa tsinú iñi ñi tuhun cahan yu tan nyehe ñi tsa javahá yu ¹⁹ tsihin tunyee iñi seña tan tsa iyo tsa javahá yu jahá Tatyí li Nyoo. Tsihin tandihí yacan cunyeé cahan yu tuhun ra Cristo tan nácaa jacacú ra tsi yo tsihin nyivi. Quitsahá yu nda Jerusalén tan inga ca ñuu nda cuanda tsaa yu ñuu tsa cayucú Ilírico. ²⁰ Tacan nducú yu cuhva caahán yu tsa jacacú ra Cristo tsi yo nu ñaha ca coto nyivi tuhun ra, tyin ña cuñí yu jahá tyiñu yu nu tsa yaha cahan inga ra tuhun ra Cristo. ²¹ Tumaa catyí nu tutu Nyoo tyehen:

Nu nduve maa tuhun Nyoo iyó, cua tsaa tuhun Nyoo

tan ca cutuñi iñi nyivi iyó can itsi, catyí tsi.

Nu tyaa ra Pablo cuhva tyin cuhun ra ñuu Roma

²² Yacan cuenda ña cuví quítsi yu quítsi nyehe yu nu yucú ndo, vasu ndi maa cuaha xaan tsaha cuñi yu quítsi yu. ²³ Maa tyin vityin tsa ndihí jahá tyiñu yu ityi ñuu ihya. Tan tsa cuaha xaan cuiya cuñi yu quítsi yu nu yucú ndo tan ndoo yu juhva quívi tsihin ndo. ²⁴ Nyehe jihna yo tatun cuví yaha yu nu yucú ndo quívi cua cuhun yu España. Tsa yaha tsa cunyi yu juhva quívi tsihin ndo, nyehe yo tatun cuví jatinyee ndo tsi yu tan tsaa yu nu cuhun yu. ²⁵ Maa tyin vityin cuahán yu ñuu Jerusalén tan nyisó yu ofrenda tsa cuenda nyivi yihí cuenda ra Cristo tsa iyó ndacan. ²⁶ Tyin nyivi tsicá vehe ñuhu tsa iyó ityi Macedonia tan ityi Acaya natuhun tahan ñi tan tava ñi juhva cuhun jacuhun ñi tsi nyivi ndaahvi tsa iyó Jerusalén, ñi yihí cuenda ra Cristo. ²⁷ Tyehen cuñi ñi javahá ñi. Tan nditsa tyin taahán tsi javaha ñi tacan. Tyin nyivi Israel, ñi tsinú iñi tsi ra Cristo, tsahá ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatinyee ñi tsi ñi Israel tsihin tsa iyó tsi ñi. ²⁸ Yacan cuenda, tatun tsa yaha jandaa yu tyiñu ihya, tan tsa yaha nacuhva

cuenda yu xuhun ihya tsi nyivi Jerusalén, tacan tan cuhun yu nda España tan cua yaha yu nu yucú ndo. ²⁹ Tsitó vaha yu tyin quívi cua quítsi yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

³⁰ Yañi, Tatyí li Nyoo tsahá tsa cuñi ndo tsi yu tan tsi ra Jesucristo, yacan cuenda caahán ndaahvi yu tsihin ndo ndacan tahvi ndo tsi Nyoo tsa cuenda yu tan tsa cuenda tyiñu jahá yu. ³¹ Ndacan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú iñi tsi ra Cristo. Tan ndacan tahvi ndo tsa cuenda nyivi yihí cuenda ra Cristo ñuu Jerusalén, na tiin cuenda vaha ñi ofrenda tsa ndahá yu. ³² Tan ndacan tahvi ndo na cuví cuhva cuñi Nyoo tan cuví quítsi yu quítsi nyehe yu nu yucú ndo tsihin tsa sií cuñi yu tan cuví quitatu vaha yu. ³³ Tan Nyoo, ra tsahá tsa taxin coo aña yu, na cunyaa ra tsihin tandihí ndo. Tan na cuví tsi tacan.

16

Nu tsahá ra Pablo nacumi tsi nyivi vaha iñi tsi ra

¹ Jacotó yu tsi ndo tyin ña hermana Febe jatinyee xaan ña tsi nyivi yihí cuenda Nyoo ñuu Cencrea. ² Naquihin vaha ndo tsi ña tumaa naquihín Jutu Mañi yo tsi yo, tumaa taahán tsi javaha ñi yihí cuenda Nyoo. Jatinyee ndo tsi ña tsihin tandihí tsa tsiniñi ñuhu tsi ña, tyin maa ña cuaha xaan nyivi jatinyee ña, tan nda cuanda maa yu.

³ Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tyiñu yu cuenda ra Cristo Jesús. ⁴ Tsañya iñi ñi ñayivi ñi quívi jacacú ñi tsi yu. Yacan cuenda tsahá yu tyahvi nyoo tsi ñi. Tan ñavin yuhu ñi, tyin tandihí tucu nyivi tsa ñavin ñi Israel cuví, ñi tsa yihí cuenda Nyoo, tsahá ñi tyahvi nyoo tsi ñi. ⁵ Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsi tucu nacumi tsi ra Epeneto, yañi yu. Juvín ra cuví ra tsa tsiniñi jihna iñi tsi ra Cristo ityi Acaya. ⁶ Cuhva ndo nacumi tsi ña María. Jahá tyiñu xaan ña nu yucú ndo. ⁷ Cuhva ndo nacumi tsi nyivi ñuu yu, ra Andrónico tan ra Junias, ra yañi yu tsa tsiyucú tsihin yu vehe caa. Cahnu tyiñu jahá tyiñu ra naha cuenda Jutu Mañi yo tsihin tandihí ca ra jahá tyiñu cuenda Nyoo. Tan jihna ca ra naha natsiniñi iñi tsi ra Cristo tan ñavin ca yuhu.

⁸ Cuhva ndo nacumi tsi ra Amplias ra vaha iñi tsi yu cuenda Jutu Mañi yo. ⁹ Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu. ¹⁰ Cuhva ndo nacumi tsi ra Apeles. Nyehe yu tyin nditsa tsa tsinú iñi

ra tsi ra Cristo. Tan tsahá tucu yu nacumi tsi nyivi ra Aristóbulo. ¹¹ Cuhva ndo nacumi tsi ra Herodión ñuu yu tan tsi nyivi ra Narciso, ñi tsa tsinú iñi tsi Jutu Mañi yo. ¹² Vatsi nacumi tsi ña Trifena tan tsi ña Trifosa, ñi tsa jahá tyiñu tyiñu Jutu Mañi yo. Tan ña hermana Pérsida, ñaha tsa jahá tyiñu xaan tyiñu Jutu Mañi yo. ¹³ Cuhva ndo nacumi tsi ra Rufo, iin ra cahnu cuví nuu Nyoo. Tsinú vaha iñi ra tsi Jutu Mañi yo. Tan vatsi tucu nacumi tsi sihi ra, ña tsa cuví tumaa sihi yu. ¹⁴ Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha. ¹⁵ Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin cuhva ra, tan tsi ra Olimpas tan tsi tandihi ñi yihí cuenda Nyoo tsa yucú tsihin ñi.

¹⁶ Cuhva tahan ndo nacumi tsi ndo. Tandihi nyivi yihí cuenda ra Cristo tsa iyó ityi ihya jaquitsi ñi nacumi tsi ndo.

¹⁷ Yañi, caahán ndaahvi yu tsihin ndo, jaha ndo cuenda tsi ndo tsihin ñi cuñi jasiin tsi ndo, tan nducú ñi cuhva tsa nduva ndo tsihin tuhun Nyoo, tyin ñavin tacan cutuhva ndo tuhun ra Cristo. Ña cutahan ndo tsihin ñi can. ¹⁸ Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñi maa ñi javahá ñi. Tan jandahvi ñaha ñi añima nyivi ndaahvi tsihin tsa vita caahán ñi. ¹⁹ Tandihi nyivi tsitó ñi tyin tyaá yahvi ndo tsi Nyoo. Yacan cuenda si xaan cuñi yu tsihin ndo, tan cuñi yu tsa yatyi javaha ndo tsa vaha. Maa tyin ña yatyi javaha ndo tsa ña vaha. ²⁰ Nyoo ra iyó tandihi tsa taxin añima, na cuhva ra tsa jaha canaa ndo tsi nu ña vaha tsa yatyi, tan na cuhva ra tsa cuañi ndo sigui nu. Na nasoco Jutu Mañi yo Jesucristo tsi ndo.

²¹ Ra Timoteo ra cutahán tsihin yu nu jahá tyiñu ndi tyiñu Nyoo, jaquitsi ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihi ra ñuu yu can jaquitsi ra naha nacumi tsi ndo.

²² Yuhu ra Tercio javahá yu tutu ihya tsa cuenda ra Pablo, juvin ñi jaquitsi tucu yu nacumi tsi ndo tyin iin caa ñi yihí yo cuenda Jutu Mañi yo.

²³ Jaquitsi tucu ra Gayo nacumi tsi ndo. Vehe ra iyó yu. Juvin ñi ihya ndú iin tandihi ñi yihí cuenda Nyoo. Ra Erasto ra cuví tesorero ñuu ihya, jaquitsi ra nacumi tsi ndo, tan yañi yo ra Cuarto tucu.

²⁴ Na ndoo Jutu Mañi yo Jesucristo tsihin tandihi ndo. Tan na cuvi tsi tacan ñi.

Nu ndihí caahán ra Pablo tan jacahnú ra tsi Nyoo

²⁵ Tan vityin na jacahnu yo tsi Nyoo, tyin maa ra cuví ra cua cuhva tsa ndu iin iñi añima ndo, tyin tacan tan ña jandihí ndo

tsa tsinú iñi ndo tuhun ra tsa jacacú tsi yo. Tsehe cuvi tuhun caahán yu tan tuhun tsa jacuahá yu tsa cuenda ra Jesucristo. Iin ñi cuví tsi tsihin tuhun tsa ñuhu xeehe tahan tsanaha nda ndi cumañi ca tsinú ñuhu ñayivi. ²⁶ Maa tyin vityin jacuahá Nyoo tsi yo tsa cuenda tutu tsa nacoq ra cuví ndusu yuhu ra, ra tsahá cuenda tuhun ra tahan tsanaha. Catyí Nyoo, ra tsa ña cua cundihí maa, tyin vityin taahán tsi coto tandihí nyivi tyin tacan tan tsinu iñi ñi tsi ra tan tyaa yahvi ñi tsa caahán ra. ²⁷ Intuhun ñi maa Nyoo iyó, tan iyó xaan tsa tsiñi tuñi tsi ra. Tan na ña jandihí yo tsa jacahnú yo tsi ra tsa cuenda ra Jesucristo.

Tan na cuvi tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Corinto

Nu tyaá ra Pablo iin carta tsa cuenda nyivi yihí cuenda Nyoo ñuu Corinto

¹ Yuhu ra Pablo, cana Nyoo tsi yu tyin caca yu tyiñu ra Jesucristo. Yuhu tsihin ra Sóstenes, ra yañi yo, ² jaquitsi ndi carta ihya tsi ndo tsa yucú ndo vehe ñuhu cuenda Nyoo ñuu Corinto. Nyivi Nyoo cuví ndo vityin, tyin tsa ndu iin ndo tsihin ra Cristo Jesús. Nyoo cana ra tsi ndo tyin nanduví ndo nyivi vaha cuenda ra, tsihin tandihí nyivi tsa jacahnú tsi Jutu Mañi yo Jesucristo tandihí ñi ityi. Tyin cuví ra Nyoo cuenda ñi tan cuenda tucu maa yo. ³ Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo aña ndo.

Nacaa nasocó Nyoo tsi nyivi yihí cuenda ra

⁴ Tandihí ñi quivi tsahá yu tyahvi nyoo tsi Nyoo tsa cuenda ndo, tyin ñihí ndo tsa vaha Nyoo tsa cuenda tsa ndu iin ndo tsihin ra Cristo Jesús. ⁵ Tan tsa iin ñi cuví ndo tsihin ra Cristo, Nyoo tsahá ra tunyee iñi tsi ndo tsa cahan ndo tuhun ra. Tan tsahá ndihí tucu ra tsa coto xaan ndo. ⁶ Tan tandihí tuhun ra Cristo tsa cahan ndi tsihin ndo tsa ndunditsin tsi tyin tsa nasama ndo cuhva iyó ndo. ⁷ Tan yacan cuenda nduve tsa cumañi tsi ndo tyin iyó tandihí tsa vaha Nyoo tsi ndo jahá ra tsitsi tsa ndatú ndo quiví quitsi Jutu Mañi yo Jesucristo. ⁸ Nyoo cua jaha cuenda ra tsi ndo nda cuanda naa ñuhu ñayivi tyin tacan tan yofi cuví tyaa catyi tsi ndo quiví cua quitsi Jutu Mañi yo Jesucristo. ⁹ Nyoo tacan ñi maa javahá ra cuhva catyi ra. Tan maa ra cuví ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

Nyivi yihí cuenda Jutu Mañi yo, ña vaha quita siñ ñi

¹⁰ Yañi, tsicán yu tsi ndo tsihin sivi Jutu Mañi yo Jesucristo, na iin ñi cuví ndo tan ña cusin ndo. Tan iin ñi cuhva caca iñi ndo, tan iin ñi tuhun quihí iñi ndo. ¹¹ Caahán yu tacan tsihin ndo, yañi, tyin catyi nyivi ra Cloé tsihin yu tyin iyó tsihi nu yucú ndo. ¹² Tyin nyoo ho siñ siñ cuhva caahán ndo. Yihí ndo catyi ndo: “Cuenda ra Pablo yihí yu”; inga ndo: “Cuenda ra Apolos”; inga tucu ndo: “Cuenda ra Pedro”; tan inga tucu ndo catyi ndo: “Cuenda ra Cristo yihí yu.” ¹³ ¿A cuñi ra Cristo tsa quita siñ yo? ¿A maa yu tsihi nu cruu tsa cuenda ndo? ¿A tsicoondutya ndo tsihin sivi yu? Ñavin. ¹⁴ Tyahvi

nyoo tsi Nyoo tyin ra Crispo tan ra Gayo ñi jacoondutya yu tan ña jacoondutya yu tsi ndi intuhun ca nyoo ho, ¹⁵ yacan ña cuvi cahan ndo tyin tsicoondutya ndo tsihin sivi yu. ¹⁶ Aan, jacoondutya tucu yu tsi nyivi ra Estéfanos, maa tyin ña nducuhún iñi yu tun jacoondutya yu tsi inga ndo. ¹⁷ Tyin ra Cristo ña tava tyiñu ra tsi yu tsa jacoondutya yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsiñi tuñi tsa iyó nu ñuhu ñayivi ihya caahán yu, tyin coto catyi nyivi tyin nduve yahvi nyaá tsa tsihi ra Cristo cuenda cuatyí yo.

Vaha ca tsa tsiñi tuñi Nyoo tan ñavin ca tsa tsiñi tuñi nyivi iyó nu ñuhu ñayivi

¹⁸ Nyivi tsa cua cuhun anyaa tsiñi ñi tuhun tsa tsihi ra Cristo nu cruu, tan ña tsinú iñi ñi tsi ra, yacan cuenda cuñi maa ñi tyin nduve yahvi nyaá tsa tsihi ra. Tan tsa cuenda yoo tsa cua cacu, tunyee iñi Nyoo cuví tsa tsihi ra. ¹⁹ Tyin tacan catyi maa tuhun Nyoo:

Cua janaa yu tsa nyityi jiñi ra tsitó xaan.

Tan ña cua cahan yu tsa caahán ra, catyi Nyoo.

²⁰ Nduve yahvi nyaá ra tsa tsitó xaan, tan ra maestro, tan ra caahán náa ndihí tuhun tsa iyó nu ñuhu ñayivi ihya. Tyin tsa tsiñi tuñi tsa iyó nu ñuhu ñayivi ihya, tuhun nduve yahvi nyaá nanduví can jahá Nyoo. ²¹ Nyoo tsihin tsa tsiñi tuñi tsa iyó tsi ra tyaa ra cuhva tyin ña cuvi nacoto nyivi tsi ra tsihin tsa tsiñi tuñi tsa iyó nu ñuhu ñayivi ihya. Maa tyin tyaa tucu ra cuhva tsa jacacu ra tsi nyivi tsa tsinú iñi tuhun ra vasu ndi maa inga ca nyivi cuñi ñi tyin nduve yahvi nyaá tsi.

²² Nyivi Israel cuñi ñi nyehe ñi tsa iyo. Tan nyivi Grecia maa ñi maa tsa tsiñi tuñi tsa iyó nu ñuhu ñayivi ihya nanducú ñi. ²³ Maa tyin nyuhu jacotó ndi tuhun ra Cristo, ra tsa tsihi nu cruu. Tan tsa tsiñi nyivi Israel tuhun ra ndasi xaan cuñi ñi. Tan ñi tsa ñavin ñi Israel cuví, cuñi ñi tyin nduve yahvi nyaá tsi. ²⁴ Maa tyin tsa cuenda nyivi tsa nacatsi Nyoo, cuví ñi nyivi Israel, a nyivi Grecia, ñi ican cutuñi iñi tyin ra Cristo iyó tandihí tunyee iñi Nyoo tsi ra, tan tsahá ra tsa cutuñi iñi ñi tsa tsiñi tuñi Nyoo. ²⁵ Vasu ndi maa inga nyivi cuñi tyin nduve yahvi nyaá tsa tsiñi tuñi Nyoo, maa tyin nyaá yahvi ca tsi tan ñavin ca tsa tsiñi tuñi tsa iyó nu ñuhu ñayivi ihya. Tan cuñi tucu ñi tyin ña ñihí tunyee iñi Nyoo. Maa tyin ñihí ca tsi tan ñavin ca tunyee iñi tsa iyó nu ñuhu ñayivi ihya. ²⁶ Yañi, cuñi tsi tsa cutuñi iñi ndo tyin Nyoo nacatsi ra tsi ndo vasu ndi maa ña cuaha ndo cuví nyivi tsitó, tan nyivi cahnú cuví o nyivi ndacá ñaha nu ñuhu ñayivi ihya. ²⁷ Nacatsi ra tsi nyivi tsa catyi nyivi tyin soho xaan ñi, tyin cuhva ra ticanuu tsi nyivi tsitó xaan. Tan nacatsi ra tsi nyivi nduve

tunyeey iñi iyó tsi tyin cuhva ra ticanuu tsi nyivi cuñi tyin iyó xaan tunyee iñi tsi ñi. ²⁸ Tan nacatsi ra tsi nyivi ndaahvi tsa cuñi nyivi tyin ña tsiñi ñuhu ñi, tan nyivi tsa ña cuñi nyivi nyehe ñi, tan janduluhlu ra tsi nyivi jahá tyin cahnu cuví ñi. ²⁹ Javahá ra tacan tyin tacan tan yoñi cuvi nduyaa nuu ra. ³⁰ Tan juvin ñi maa ra jandu iin tsi yo tsihin ra Cristo Jesús. Tan tsahá ra Cristo tsa tsiñi tuñi tsi yo, tan tsa cuenda tsa jata ra tsi yo tsihin ñiñi ra, quihñ nyaa ra tsi yo ndaha nu ña vaha tan cacu yo tan nduvahá yo jahá ra tan jacu ií ra tsi yo. ³¹ Yacan cuenda na javaha yo cuhva catyi tuhun Nyoo nu catyi tsi tyehen: “Ña cuvi nduyaa yo tsihin tsa javahá maa yo, maa tyin tatun cua nduyaa yo, na nduyaa yo tsihin tsa javahá Nyoo tsihin yo.”

2

Tuhun ra Cristo, ra tsihi nu cruu

¹ Maa tyin yañi, quivi tsa quitsi yu cahān yu tuhun Nyoo tsihin ndo, ña cahān yu tuhun tsa tsiñi tuñi tsa iyó nu ñuhu ñayivi ihya tumaa caahān ra tsitó xaan naha ra. ² Tyin maa ñi maa tuhun ra Jesucristo, nácaa tsihi ra nu cruu tsa cuenda cuatyí yo tyaaq iñi yu tan cahān yu tsihin ndo. ³ Tan tsa tsaaq yu nu yucú ndo ñihi níhi yu jahá tsa yuuhví yu. ⁴ Tan tsa cahān yu tsihin ndo, ña cahān yu tsihin tuhun si caa tumaa caahān ra tsitó xaan naha ra. Maa tyin tsihin tunyee iñi Tatyí Ii Nyoo cahān yu tsihin ndo. ⁵ Tyin tacan tan tsinu iñi ndo tsi Nyoo tsa cuenda tunyee iñi maa ra, tan ñavin tsa cuenda tsa tsiñi tuñi tsa iyó nu ñuhu ñayivi ihya.

Juvin ñi maa Tatyí Ii Nyoo tsahá tsa nacoto yo tsi Nyoo

⁶ Maa tyin nditsa caahān ndi tuhun tsa tsiñi tuñi tsihin nyivi tsa ñihi nyaá tsihin tuhun Nyoo. Maa tyin ñavin tsa tsiñi tuñi tsa iyó nu ñuhu ñayivi ihya, tan ndi ñavin tsa tsiñi tuñi ra ndacá ñaha naha ra tsa cua cundihi ñi maa, tyin caahān ndi tsa tsiñi tuñi Nyoo ⁷ tsa tsicumí xeehe ra tsa ndi cumañi ca javaha ra ñuhu ñayivi ihya. Tyaaq ra cuhva tsa jacacu ra tsi yo tan cunyecu cuí yo tsihin ra nda gloria. ⁸ Tan ndi intuhun ra ndacá ñaha nu ñuhu ñayivi ihya tan ña cutuñi iñi ra naha can. Tun tsatyin cutuñi iñi ra naha can, ña cua tyaa ra naha tsi Jutu Mañi yo, ra ndacá ñaha gloria, nu cruu. ⁹ Maa tyin cuví tsi tumaa catyi maa tuhun Nyoo: Yoñi nyehe tan yoñi tsiñi tan tsicá iñi tuhun vaha tsa javahá Nyoo tsa cuenda nyivi cuñi tsi ra, catyi tsi.

¹⁰ Maa tyin Nyoo tsahá ra Tatyí Ii ra tsi yo tan jacotó Tatyí Ii ra tuhun ihya tsi yo, tan juvin ra jacotó tandihi ca tuhun xeehe tsa tsicá iñi Nyoo tsi yo.

¹¹ Intuhun intuhun yo tsitó yo nácaa tsicá iñi yo, maa tyin inga nyivi ña tsitó ñi tsa tsicá iñi yo. Tan tacan tucu intuhun ñi Tatyí Ii Nyoo tsitó ra tsa tsicá iñi maa Nyoo. ¹² Yoo ñavin tsa tsiñi tuñi tsa iyó nu ñuhu ñayivi naquihñ yo, tyin naquihñ yo Tatyí Ii Nyoo, tan juvin ra jacotó tandihi tsa ñihí yo jahá Nyoo. ¹³ Tan tsa caahān ndi tsihin ndo ihya, tuhun tsa jacuahá maa Tatyí Ii Nyoo tsi ndi cuví. Ñavin tsa cutuhva maa ndi tsihin tsa tsiñi tuñi iñi ndi. Nacatyí tuhun ndi tsa jacuahá Tatyí Ii Nyoo tsi ndi tsi nyivi tsa yihí Tatyí Ii Nyoo.

¹⁴ Maa tyin nyivi tsa nduve Tatyí Ii Nyoo iyó tsihin, ña naquihñ vaha ñi tan ndi ña cutuñi iñi ñi tsa jacuahá Tatyí Ii Nyoo tsi ñi. Tan cuñi maa ñi tyin nduve yahvi nyaá tsi, tyin nduve Tatyí Ii Nyoo iyó tsihin ñi. ¹⁵ Maa tyin nyivi yihí Tatyí Ii Nyoo cuví cutuñi iñi ñi. Tan tsitó ñi tatun vaha a ña vaha náa iin tuhun. Maa tyin ña cuvi catyi inga nyivi tatun vaha a ña vaha tsa iyó añima ñi. ¹⁶ Tyin tuhun Nyoo catyi tsi: “Yoñi tsitó tsa tsicá iñi Jutu Mañi yo Nyoo. Yoñi cuví jacuahá tsi ra”, catyi tuhun Nyoo. Maa tyin yoó tsitó yo tsa tsicá iñi ra tyin iyó tsa tsiñi tuñi ra Cristo tsi yo.

3

Ña taahān tsi cunyicun yo tsi iin ra yihí tuhun Nyoo tsihin yo, na cunyicun yo tsi Nyoo

¹ Yañi, quivi tsa quitsi yu nu yucú ndo ña cuví cahān yu tsihin ndo tumaa caahān yu tsihin nyivi jaquihñ ityi Tatyí Ii Nyoo. Cahān yu tsihin ndo tumaa caahān yu tsihin nyivi ña tsitó tsi Nyoo, tyin ndi lee xaan ndo tsihin ra Cristo. ² Cahān yu tsihin ndo tsihin tuhun tsa ña yñi ñi cutuñi iñi ndo. Tumaa tsahá yo letsí coho lee tsa ñaha ca cuvi catsi nyayu, tacan javahá yu tsihin ndo, tyin nyoo ñaha ca cuvi cutuñi vaha iñi ndo. ¡Tan ndi vityin tan ña cutuñi iñi ndo! ³ Tyin ndi tsicá ca iñi ndo tsa cuñi cuñu ñuhu ndo. Nyiyó iñi ndo, tan iyó tsihi nu yucú ndo, tan ndusiñ ndo. Ndi tsicá iñi ndo tuhun tsicá iñi nyivi cuenda nu ñuhu ñayivi ihya, tan javahá ndo tumaa cuñi cuñu ñuhu ndo. ⁴ Tyin yihí ndo catyi ndo: “Cuenda ra Pablo yihí yu.” Tan inga ndo catyi ndo: “Cuenda ra Apolos yihí yu.” Yacan cuñi tsi catyi tyin javahá ndo tumaa javahá nyivi iyó ityi tsata.

⁵ Tyin zyóo ra cuví yuhu, ra Pablo? Tan zyóo ra cuví ra Apolos? tyin cañi tahan ndo tsaha ndi. ¿A ñavin musu Nyoo ñi cuví ndi? Juvin. Tan cahān ndi tuhun Nyoo tsihin ndo tan natsinu iñi ndo tsi Jutu Mañi yo. Tyin tan iin tan iin ndi javahá ndi tyiñu tsa catyi maa Nyoo tyin javaha ndi. ⁶ Yuhu tatsi tuhun Nyoo añima ndo, tan ra Apolos tyosó. Maa

tyin Nyoo jacuahnu ra tuhun ra aña ndo. ⁷Tan yacan cuenda ndi ra tsa tatsi tan ndi ra tsa tyosó, nduve ra cuví ra. Maa tyin Nyoo cuví ra tandihí tyin maa ra jacuahnú tuhun ra aña ndo. ⁸Ra tsa tatsi tan ra tsa tyosó, iin ñi ra cuví ra naha. Tan Nyoo cua tyahvi tsi intuhun intuhun ra naha cuhva tyiñu jahá ra naha. ⁹Tan nyuhu, cuví ndi musu tan jahá tyiñu ndi tyiñu Nyoo. Tan nyoocho cuví ndo tumaa ñuhu nu jahá tyiñu Nyoo.

Cuví tucu ndo tumaa iin vehe tsa javahá Nyoo. ¹⁰Tsahá Nyoo tsa vaha tsi yu tyin yuhu cuví yu tumaa iin ra cuví ityi nuu tsa samá vehe. Tyin tsaqin yu cuhva vehe can tan tyihí yu tsaha tsi tsitsi ñuhu. Tan inga ra tsa cua sama ityi siqui cuví ra jacuahá, tan cuñi tsi jahá ra cuenda nácaa jacuahá ra tuhun Nyoo. ¹¹Tan yofi cuví caquin inga cuhva tyin tsa canyí cuhva can. Tan yacan cuví ra Jesucristo. ¹²Tan siqui cuhva can cuví sama ra jacuahá tsihin xuhun caaan, tsihin xuhun cuitsin, tsihin yuu vaha. Tan cuví tucu javaha ra vehe tsihin yutun, tsihin vitsin, a tsihin tiyama. ¹³Maa tyin quivi nacuhva cuenda ra jacuahá tsa cuví tumaa ra samá can tyiñu can tsi ra Cristo, cua yaha tyiñu can nu ñuhu. Tan ñuhu can cua nducu cuhva tsi tyiñu javahá ra naha. ¹⁴Tan vehe tsa ña cua cayu, cua ndoo tsi. Tan ra tsa javahá vehe can cua naquihin ra yahvi tsa taahán tsi tsi ra. ¹⁵Maa tyin tun ndihí tyiñu javahá ra naha cayu, nduve náa cua ñihi ra naha. Vasu cua cacu maa ra naha tumaa cacú iin ra tsa cuñi cayu tan tsinú ra nu cayú ñuhu.

¹⁶¿A ña tsitó ndo tyin vehe ñuhu Nyoo cuví ndo, tan iyó Tatyí li Nyoo tsitsi aña ndo? ¹⁷Tatun iin nyivi jativi vehe ñuhu ra, cua janaa ra tsi ñi, tyin vehe ñuhu ra, ii tsi. Tan vehe ñuhu can, cuví maa yo.

¹⁸Ndi intuhun ndo tan ña jandavi ñaha ndo tsi ndo. Tyin tatun cuñi ndo tyin tsitó xaan ndo tsihin tsa tsiñi tuñi tsa iyó nu ñuhu ñayivi ihya, cuñi tsi tsa jandusoho ndo tsi ndo tumaa ra tsa ña tsitó maa. Tacan tan Nyoo cua cuhva ca ra tsa tsiñi tuñi vaha tsi ndo. ¹⁹Tyin tsa tsiñi tuñi tsa iyó nu ñuhu ñayivi ihya nduve yahvi nyaá can nu Nyoo. Tyin catyí tuhun Nyoo: “Janacavá ra tsi ra tsitó, juvin ñi maa nu tsa nyityi javahá ra.” ²⁰Tan catyí tucu tsi: “Jutu Mañi yo tsitó ra tyin tsa tsicá iñi ra tsitó, nduve yahvi nyaá can.” ²¹Yacan cuenda ndi intuhun ndo tan ña taahán tsi cu iyo iñi ndo nyehé ndo tsi iin ra jacuahá tsi ndo tyin maa Nyoo tsahá tsi ra naha tsa jacuahá ra naha tuhun vaha tsi ndo tan tsahá ndihí ra tandihí tsa iyó tsi ndo. ²²Yuhu ra Pablo, ra Apolos, ra Pedro, maa Nyoo tsahá tsi ndi tsa cahan ndi tuhun ra tsihin ndo. Tan ñuhu ñayivi ihya, tan ñayivi iyó yo, tan tuhun tsihi, tan tsa cuví vityin, tan tsa cua cuví nu cuahán ca tsi, tandihí

maa tuhun ihya tsahá Nyoo tsi ndo. ²³Tan inga tucu tuhun tyin cuví ndo tsa tsi ra Cristo, tan ra Cristo, tsi Nyoo cuví ra.

4

Ña jacahnu yo tsi yo tan ndi tsi yañi yo

¹Yacan cuenda ña taahán tsi nyehé ndo tsi ndi tumaa nyehé ndo tsi ra Cristo, tyin musu ñi ra cuví ndi. Tyin tava tyiñu Nyoo tsi ndi tsa jacuahá ndi tuhun xeehe ra. ²Tan ra tsa tava tyiñu Nyoo cuñi tsi tsa tyaá yahvi ra tandihí tsa caahán ra tsihin ra. ³Yacan ña ndihí iñi yu tsa caahán ndo tsi yu, o tatun cutuñi yu nuu ra cumí tyiñu. Tyin ndi maa yu tan ña caná iñi yu cahan yu tun vaha yu o ña vaha yu. ⁴Vasu ndi maa tuvi iñi yu tyin nduve cuatyí yu, maa tyin ña cuñi tsi catyí tyin nduve cuatyí yu nuu Nyoo. Tyin maa Jutu Mañi yo cua catyí tun iyó cuatyí yu o nduve. ⁵Yacan cuenda, ña cahan ndo tsi yu. Cuatu ndo nda tahan maa tsi quitsi ra Cristo, tyin maa ra cua tava tsa yihí xeehe nu naa nu nditsin, tan cua jaquituvi ra tsa iyó aña intuhun intuhun yo. Tacan tan cua jacahnu Nyoo tsi intuhun intuhun yo cuhva tsa taahán tsi.

⁶Yañi, caahán yu tuhun ihya tsihin ndo tsa cuenda tsa vaha tsi maa ndo. Nyehé ndo cuhva iyó yu, tan cuhva iyó ra Apolos tyin ña cahnu jahá ndi tsi ndi. Tan tacan tucu maa ndo, nducu ndo cuhva javaha ndo tumaa catyí tuhun Nyoo, tan ña cuñi ndo tsi intuhun ñi nyivi. Inducu ñi cuñi ndo tsi tandihí nyivi. ⁷Ndi intuhun ndo tan ña cahnu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Yacan cuenda ña taahán tsi tsa jacahnú ndo tsi ndo, tyin maa Nyoo tsahá can tsi ndo.

⁸Tan cuñi ndo tyin tsa tsitó maa ndo tandihí tuhun Nyoo, yacan nduve ca tsa cumañi tsi ndo. Tan cuñi tucu ndo tyin cuví ndo rey, tan ña tsiñi ñuhu ca nyuhu tsi ndo. Vaha xaan tun tsatyin nditsa tsa cuví ndo rey, tyin tacan tan rey cuví tucu nyuhu. ⁹Nyuhu tsa cuví ndi ra tsicá tyiñu ra Cristo, tumaa tsa nacoq Nyoo tsi ndi nda tsata ca, tan cuví ndi tumaa nyivi tsa taahán tsi cúu. Tan cuaha xaan nyivi tan ángel nyehé tsa taahán ndi. ¹⁰Nyivi tsicá iñi maa ñi tyin tsa cuenda ra Cristo tan ndusoho ndi. Tan nyoocho iyo xaan cuñi ndo tsa caahán ñi tyin tsitó xaan ndo tuhun ra Cristo. Nyuhu nduve maa tunyee iñi iyó tsi ndi tan nyoocho iyo xaan cuñi ndo tyin iyó tunyee iñi tsi ndo. Tun ndasi cuñi nyivi nyehé ñi tsi nyuhu, jaha xaan ca ñi tsa ñayivi tsi nyoocho. ¹¹Nda cuenda vityin nyehé ndi tundoho; tsiisocó ndi, tan na ityi iñi ndi, cumañi jahma ndi, nduve vehe ndi iyó, tan nyivi jacuu ñi tsa uhvi tsi ndi. ¹²Tan tsitatú ndi tsa jahá tyiñu

ndi tsihin ndaha ndi. Caahán nyivi tsi ndi, maa tyin nacahán ndi tsihin tsa vaha nu caahán ñi tsi ndi. Nyaá ndaha ñi tsi ndi, maa tyin cunyeé ñi ndi. ¹³ Caahán ñi ndavaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsiñi ñuhu ca jahá ñi nda cuenda vityin ihya.

¹⁴ Tyaá yu tuhun ihya tsa cuenda ndo, maa tyin ñavin tsa cuñi yu cuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu. ¹⁵ Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juvin yu cahan tuhun ra Cristo Jesús tsihin ndo nda jihna ñi tan natsinü ñi ndo tsi ra. ¹⁶ Tan tsa cuenda tsehe tsicán yu tsi ndo tsa javaha ndo tumaa javahá maa yu.

¹⁷ Yacan cuenda jaquitsí yu tsi ra Timoteo, sehe yu cuenda Jutu Mañi yo, nu yucú ndo. Nii xaan ñi ra nyicún ra tsi Nyoo, tan cuñi xaan yu tsi ra. Maa ra cua janducuhun ñi tsi ndo cuhva iyó yu tsihin ra Cristo tan cuhva jacuahá yu tandihi ñi vehe ñuhu nu cuahán yu. ¹⁸ Yihí ndo cahnú jahá ndo tsi ndo tyin cuñi maa ndo tyin ña cua quitsi ca yu nu yucú ndo. ¹⁹ Maa tyin tun Jutu Mañi yo tan cuñi ra, yatyi cua quitsi nyehe yu nu yucú ndo. Tacan tan cua nyehe yu tatun nditsa tsa iyó tunyee ñi Nyoo tsi ra tsa cahnú xaan jahá tsi naha ra, o tatun caahán ñi maa ra naha. ²⁰ Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahan ñi ra naha. Maa tyin cua tuvi ñi yu tyin nditsa iyó tunyee ñi Nyoo tsi ra naha. ²¹ ¿Náa cuñi ndo javaha yu tsa quitsi yu? ¿A cuñi ndo tsa cuxaan yu tsi ndo, o cuñi ndo tsa cahan vii yu tsihin ndo?

5

Nu tavá tyiñu ra Pablo tyin cutuñi iin ra tsicoq tsihin sihi quiin

¹ Nihí tuhun yu tyin iin ra nyii tsihin ndo iyó ra tsihin sihi quiin ra. Tan yacan cuví cuatyí cahnú xaan, tyin ndi nyivi iyó ityi tsata tan ña javahá ñi tacan tyin tsitó ñi tyin ña vaha. ² Taahán tsi cuihyá cuñi ndo tsa cuenda cuatyí can tan ña nduyaa ndo. Táva ndo tsi ra tsa javahá tacan nu yucú ndo. Tan ña cutahan ca ra tsihin ndo. ³⁻⁴ Vasu nduve yu nyii tsihin ndo, maa tyin tumaa tsa nyii ñi yu tsihin ndo tyin ñuhú ñi yu tsi ndo, tan tsihin sivi Jutu Mañi yo Jesucristo jandaa yu tyiñu ra tsa javahá cuatyí can. Yacan cuñi tsi tsa ndu iin ndo. Tan jaha ndo tuhun tyin nyii yu tsihin ndo. Tan cunyaa tunyee ñi Jutu Mañi yo Jesús tsihin ndo. ⁵ Tacan tan cuhva ndo tsa javaha nu ña vaha tsa cuñi maa nu tsihin cuñu ñuhu ra tsa javahá

tsa caquiñi ihya, tyin vasiqui tacan tan cua jandihí ra tsa javahá ra can. Tacan tan quivi quitsi Jutu Mañi yo Jesucristo cacu añima ra.

⁶ Ña vaha tsa jacahnú xaan ndo tsi ndo tyin ña jahá ndo cuenda tsa javahá ra yucú vehe ñuhu ndo. ¿A ña tsitó ndo tyin vasu luxu ñi yutsan iya, jandaa tsi tandihi yut-san paan? Tan tacan ñi cuñi yo cuví tucu yacan. ⁷ Táva ndo yutsan iya tsahnú tsa jativi tsi ndo. Tacan tan cuví ndo tumaa paan tsa tuhvá nyivi javahá vico pascua, tyin paan can nduve yutsan iya yihí tsihin tsi. Tsa nditsa tyin tacan taahán tsi cuví tucu nyoocho tyin maa ra Cristo cuví mbee ticatyí luhlu tsa tsihi tsa cuenda cuatyí yo. ⁸ Yacan cuenda taahán tsi catsi coo yo tyin tsihi ra Cristo tsa cuenda yo. Tan jandoo yo tsa caquiñi tsa javahá yo ityi tsata tsa cuví tumaa yutsan iya tsahnú. Tan cahan yo maa ñi maa tsa nditsa tsihin tsa nii ñi yu tyin cuví tsi tumaa paan tsa nduve yutsan iya yihí.

⁹ Nu inga carta tsa jaquitsi yu tsi ndo, catyi yu tyin ña taahán tsi cunyanaa ndo tsi ra tsicá nuu tsihin ñaha. ¹⁰ Tan tsa caahán yu tyehen tsihin ndo, ñavin tsa cunu ndo nu nyivi tsa iyó ityi tsata, ñi tsa iyó tsihin rayii a ñaha, ñi tsa nyiyó ñi, ñi suhú, tan ñi jacahnú tsitoho, tyin tun cunu ndo nu iyó ñi ihya, cuñi tsi tsa quita ndihi ndo nu ñuhu ñayivi ihya. ¹¹ Maa tyin tsa cuñi yu catyi yu tsihin ndo ña cunyaa naa ndo tsi nyivi tsa catyi: “Hermano cuví yu”, tan tsicá nuu ra tsihin ñaha, o ñaha tsicá nuu ña tsihin rayii, o nyiyó ñi ñi, o jacahnú ñi tsitoho, o caahán ñi cuendu, o tsihi ñi nyixi, o suhú ñi. Ñi tsa javahá iin tsa ña vaha ihya, ndi ña cunyecu ndo catsi ndo tsihin ñi. ¹²⁻¹³ Tyin yoo ña taahán tsi tatsi tuñi yu tsi nyivi ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyoocho cuñi tsi tatsi tuñi ndo tsi nyivi yihí cuenda Nyoo. Yacan cuenda tavá ndo tsi ra iyó cuatyí nu yucú ndo.

6

Ña cua ndacan yo cuatyí tsaha iin yañi yo cuenda Nyoo nuu ra cumí tyiñu

¹ ¿Nacuenda tyin tsicán ndo cuatyí tsaha yañi ndo nuu ra cumí tyiñu tsa ña yihí cuenda Nyoo tsihin ndo, tan ña jacoto ndo tsi ra yihí cuenda Nyoo, tan nyehe maa ra naha ndaa ra iyó cuatyí? ² ¿A ña tsitó ndo tyin juvin ñi maa yo cua jandaa cuatyí tandihi nyivi iyó nu ñuhu ñayivi ihya nu cuahán ca tsi? Tan tatun maa yo cua jandaa cuatyí can, ¿nacuvi tyin ña cuví jandaa ndo cuatyí nyihi ihya? ³ ¿A ña tsitó ndo tyin cua jandaa yo cuatyí nda cuenda ángel? Tun tacan, ¿a yii jandaa yo cuatyí nyihi tsa iyó nu ñuhu ñayivi? ¿Ña yii jandaa

yo can! ⁴ Yacan cuenda tatun iyó tsihi nu yucú ndo, ¿nacuenta tyin cuahán ndo nuu ra cumí tyiñu tsa ña yihí tuhun Nyoo? ⁵ Caahán yu tyehen tsihin ndo na nducahan nuu ndo. ¿A nduve cui vasu intuhun ra jandaa cuatyí yañi ndo nu yucú ndo? ⁶ Tyin cuahán ndo cua ndacan ndo cuatyí tsaha yañi ndo cuenda Nyoo nuu iin ra cumí tyiñu tsa ña tsinú iñi tsi Nyoo.

⁷ Ña vaha tsa iyó tsihi nu yucú ndo. Vaha taxin ca cunyeet iñi ndo tatun javaha nyivi tsa ña vaha tsi ndo. Tan jaña ndo na suhu maa ñi tsa tsii ndo. ⁸ ¡Maa tyin nyoocho javahá ndo tsa ña vaha tan suhú ndo nda cuanda tsa tsii yañi ndo!

⁹⁻¹⁰ ¿A ña tsitó ndo tyin nyivi quiñi iyó ña cua quihvi ñi nu ndacá ñaha Nyoo? Ña jandavi ñaha ndo tsi ndo. Ña cua quihvi ra tsa tsicá nuu tsihin ñaha o ñaha tsa tsicá nuu tsihin rayii, ndi ñi jacahnú tsitoho, ndi ra iyó ñasihi tan iyó inga ñaha tsi ra, tacan tucu ñiñaha tsa iyó yí tan iyó inga rayii tsi ñi, ndi ra ndusihi, ndi ñi nduyii, ndi ñi suhú, ndi ñi nyiyó iñi, ndi ñi caahán cuendu, ndi ñi tuhva tsihi nyixi, tan ndi ñi tsit; o jandavi ñaha. Tandihí maa nyivi ihya ña cua ñihi ñi nu ndacá ñaha Nyoo cuhun ñi. ¹¹ Tyin tacan javahá juhva nyoocho. Maa tyin tsa ndatsi cuatyí ndo tan ndu iñi ndo tan nduvahá ndo nuu Nyoo jahá Jutu Mañi yo Jesucristo tan Tatyí li Nyoo.

Cuñu ñuhu yo cuví vehe ñuhu Nyoo

¹² Catyí tsi tyin nuña maa javaha yo tandihí náa cuñi maa yo. Tan nditsa tucu maa, maa tyin ña tandihí tan vaha. Cuví javaha yo náa cuñi maa yo, maa tyin cuñi tsi jaha yo cuenda tun vaha a ña vaha, tan ña cuhva yo tsa cundaca ñaha can tsi yo. ¹³ Catyí nyivi tyin Nyoo javahá ra tsa tsatsi yo tsa cuenda tsitsi yo. Tan javahá ra tsitsi yo tsa cuenda tsa tsatsi yo. Tan nditsa. Maa tyin Nyoo cua janaa ra nduvi tsehe quivi cua naa ñayivi. Tan tsa cuenda cuñu ñuhu yo ña nditsa tsa javahá ra itsi tyin coo yo tsihin ñaha a tsihin rayii, tyin cuenda Jutu Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo. ¹⁴ Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

¹⁵ ¿A ña tsitó ndo tyin tandihí yoo tsa yihí cuenda ra Cristo cuví yo intuhun ña cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuví quihin yu luxu cuñu ñuhu ra Cristo tan jatívi yu tsihin iin ñaha tsicá nuu? Ña taahan tsi javaha yu tacan. ¹⁶ ¿A ña tsitó ndo tyin tun iin rayii tan iyó ra tsihin iin ñaha tsicá nuu intuhun ña cuñu ñuhu nanduvi ra tsihin ña? Tyin nu tutu Nyoo catyí tsi tyehen: “Tsa nduvi ñi, iin ña nyivi cuví ñi.” ¹⁷ Maa tyin

tatun iin nyivi tan nacuhva ñi añima ñi tsi Jutu Mañi yo, iin ñi cuví ñi tsihin ra tyin quihvi Tatyí li ra añima ñi.

¹⁸ Jandihí ndo tsa iyó ndo tsihin ñaha a tsihin rayii tun ñavin ñasihi ndo a ñavin yí ndo cuví. Tyin tandihí inga nu cuatyí tsa javahá nyivi ña jatívi can cuñu ñuhu ñi. Maa tyin tsa tsicá nuu ñi tsihin ñaha a tsihin rayii, jatívi can cuñu ñuhu ñi. ¹⁹ ¿A ña tsitó ndo tyin cuñu ñuhu yo cuví vehe ñuhu Tatyí li tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra ndacá ñaha tsi yo. ²⁰ Tyin Nyoo yahvi xaan jatá ra tsi yo. Yacan cuenda taahán tsi jacahnú yo tsi ra tsihin cuñu ñuhu yo, tan tacan tucu ñi tsihin tsa tsiiñi tuñi iñi yo tyin nduvi taahan tuhun ihya tsi maa Nyoo cuví.

7

Nu tsahá cuenda ra Pablo nácaa taahán tsi coo nyivi tindahá

¹ Tan vityin cua cahan yu tsa tsicá tuhun ndo tsi yu nu carta tsa jaquitsi ndo tsi yu. Nditsa tyin vaha tsa ña tindaha tsi. ² Maa tyin cuaha xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayii. Yacan cuenda cuñi tsi tsa coo ñasihi tsa intuhun intuhun ra naha, tacan tucu ñiñaha taahán tsi coo yí tsa intuhun intuhun ñi. ³ Na javaha rayii cuhva taahán tsi tsihin ñasihi ra. Tan tacan tucu maa ñaha, na javaha ña cuhva taahán tsi tsihin yí ña. ⁴ Ñiñaha ña cuví cundaca ñaha ñi maa ña cuñu ñuhu ña, tyin tsii yí ña cuví cuñu ñuhu ña. Tacan tucu maa yí ña, ña cuví cundaca ñaha ñi maa ra cuñu ñuhu ra tyin tsii ñasihi ra cuví cuñu ñuhu ra. ⁵ Ña vaha tun ña cuhva iin ndo tsi ndo tsi inga ndo. Tatun cuñi ndo coo ndo oración, vaha ca natuhun tahan jihna ndo tyin ña cua coo tsihin tahan ndo quivi tsa cua nanducu ndo tsi Nyoo. Yaha can tan coo tsihin tahan nyico ndo tyin coto nducu rayii inga ñaha o ñaha nducu ña inga rayii tan javaha ndo tsa ña vaha jaha nu ña vaha.

⁶ Tsa caahán yu tyehen tsihin ndo ñavin tsa caahán yu tyin tindaha ndo. Ña jañiñi yu tsi ndo tsa tindaha ndo. Maa tyin cuví tindaha ndo tatun cuñi ndo. ⁷ Tsa cuenda yuhu, vaha ca coo ndo tumaa iyó maa yu. Maa tyin siin siin tunyee iñi tsahá Nyoo tsi tsa intuhun intuhun yo. Yihí yo tsahá ra tunyee iñi tsa ña coo ñasihi yo. Tan yihí yo tsahá ra tunyee iñi tsa coo ñasihi yo.

⁸ Tsahá cuenda yu tuhun ihya tsi tandihí nyoocho tsa ñaha ca tindaha tan nyoocho ñi tsihi yí tyin vaha ca cuví tsi ndo tun ña tindaha ndo tumaa maa yu. ⁹ Maa tyin tatun ña cunyeet iñi ndo coo tacan ñi ndo, vaha ca

tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

¹⁰ Maa tyin caahán yu tsehe tsihin nyooho ññaha tsa tsa tindaha: ña nacoo ndo yíi ndo tyin tuhun caahán yu ihya, ñavin tsa cuñi maa yu cuví, tyin maa Jutu Mañi yo tsahá itsi tyin cuhva cuenda yu tsi ndo. ¹¹ Maa tyin tatun iin ñaha tan nacoo ña yíi ña, cuñi tsi tsa ndoo ña cunyaa ña tsa ña cua tindaha ca ña, o cunuhu nyico ña tsihin yíi ña. Tan tacan tucu rayíi, ña taahán tsi nacoo ra ñasihi ra.

¹² Tan cuñi yu cahan yu inga tuhun ihya tsihin inga ndo, maa tyin ñavin Nyoo tsahá itsi. Tatun iin ra hermano tan ña tsinú iñi ñasihi ra tsi Nyoo, maa tyin ndoo ña vaha tsa cunyaa ña tsihin ra, nduve ndatu tsa nacoo ra tsi ña. ¹³ Tan tatun iin ña hermana, tan ña tsinú iñi yíi ña tsi Nyoo, ndoo ra vaha tsa cunyaa ra tsihin ña, nduve ndatu tsa nacoo ña tsi ra. ¹⁴ Tyin tsa yahá nasoco Nyoo tsi rayíi tsa ña tsinú iñi can tsa cuenda tsa iin ñi cuví ra tsihin ñaha tsa tsinú iñi. Tan tsa yahá nasoco tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuví ña tsihin ra tsinú iñi. Yacan cuenda sehe ñi ña cuví tsi naha tsi tumaa cuví sehe nyivi tsa ña tsinú iñi tsi Nyoo, tyin tsa nasoco ndihi Nyoo itsi naha tsi. ¹⁵ Maa tyin tatun rayíi an ñaha tsa ña tsinú iñi tsi Nyoo, tan cuñi ñi nacoo ñi tsi tahan ñi tsa tsinú iñi tsi Nyoo, na nacoo maa ñi. Tacan tan ra hermano a ña hermana ndoo nuña ñi. Tyin maa Nyoo cuñi tsa coo vaha yo tsihin tsa nduve tsihi.

¹⁶ Tyin ña tsitó iin ñaha tatun cacu yíi ña. Tan ndi rayíi ña tsitó ra tatun cacu ñasihi ra.

¹⁷ Tan catyí yu tsihin ndo coo ndo tsihin ndatu tsa tsahá Jutu Mañi yo tsi ndo tan cuhva iyó ndo quívi cana ra tsi ndo. Tan tsehe cuví tsa jacuahá yu tandíhi vehe ñuhu tan iin tan iin ñuu. ¹⁸ Tatun tsa yaha tsinyaa tuñi Nyoo cuñu ñuhu ndo tan cana Nyoo tsi ndo ña caca iñi ndo tsa cuenda yacan. Maa tyin tun ña tyaa ñi tuñi can tsi ndo, tan cana Nyoo tsi ndo, nduve cuenda; ña javaha ca ndo can. ¹⁹ Ña ñiñi xaan tsa coo tuñi can tsi yo, o tsa ña coo tsi. Tyin tsa ñiñi ca, cuví tsa tyaa yahvi yo tuhun caahán Nyoo. ²⁰ Tan intuhun intuhun ndo taahán tsi jahá tyiñu ndo juvin ñi tyiñu tsa tuhvá ndo javahá quívi tsa cana Nyoo tsi ndo. ²¹ Tyin tatun musu cuví ndo quívi tsa cana Nyoo tsi ndo, ña caca iñi ndo. Maa tyin tatun tsahá tsi cuhva tsa ndoo nuña ndo, nducu ndo cuhva. ²² Iin ra tsa cuví musu tan quíhví ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quíhví ra cuenda Jutu Mañi yo, vityin cuví ra musu tsa cuenda ra. ²³ Nyoo yahvi xaan jatá ra tsi yo, yacan cuenda ña taahán tsi cuhva yo tsa cundaca ñaha ra ñuu ñayivi naha ra tsi yo. ²⁴ Tan catyí yu tsihin ndo, yañi, jahá tyiñu ndo tyiñu tsa tuhvá ndo javahá quívi cana Nyoo tsi ndo.

²⁵ Tan tsa cuenda nyivi tsa ñaha ca tindaha, nduve tuhun tsahá Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsahá ra tucahnu iñi tsi yu tan maa ra yíhi ndaha tsi yu. ²⁶ Tsa cuenda yuhu, vaha ca ña tindaha ñi can, tyin vityin cuaha xaan tundoho ñayivi iyó. ²⁷ Maa tyin tatun tsa iyó ñasihi ndo, ña nducu ndo cuhva tsa nacoo ndo tsi ñi. O tatun nduve ñasihi ndo iyó, vaha ca ña tindaha ndo. ²⁸ Maa tyin tatun tindaha ndo, ñavin cuatyí cuví. Tan tacan tucu tun tindaha iin ñaha yoco juvin ñi ñavin cuatyí cuví. Maa tyin nyivi tsa tindaha cuaha xaan tundoho cua nyehe ñi ñayivi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñi yu tsa nyehe ndo tundoho.

²⁹ Yañi, cuñi yu cahan yu tuhun ihya tsihin ndo: Juhva cuíi ña quívi iyó yo. Yacan vityin tan ityi nuu tandíhi ra tsa iyó ñasihi cuñi tsi tsa jaha tyiñu ra naha tyiñu Nyoo tumaa tsa nduve ñi ñasihi ra naha iyó. ³⁰ Tan nyooho tsa iyó tucuihya iñi, ña tyaa yahvi ndo tucuihya iñi can. Tan nyooho tsa si cuñi, ña tyaa yahvi ndo tusíi iñi can. Tan nyooho tsa jatá ndaha tyiñu taahán tsi coo ndo tumaa tsa nduve ndaha tyiñu ndo. ³¹ Tan nyooho tsa iyó vaha nu ñuhu ñayivi ihya, coo ndo tumaa tsa nduve ñi tsa iyó tsi ndo, tyin tsa cua ndihi ñuhu ñayivi ihya.

³² Cuñi yu tyin nyooho ña caca xaan iñi ndo tuhun tsa iyó nu ñuhu ñayivi ihya; iin ñi maa tuhun Nyoo caca iñi ndo. Iin ra yoco tsa ñaha ca tindaha tsicá iñi ra nácaa javaha ra cuhva cuñi maa Jutu Mañi yo. ³³ Maa tyin tatun tsa tindaha ra, tsicá iñi ra nácaa coo vaha ra nu ñuhu ñayivi ihya cuhva taahán iñi ñasihi ra. ³⁴ Tan tacan tucu ñiñaha, siñ siñ cuhva iyó ñi, tyin ñaha tsa ñaha ca tindaha, maa ñi tuhun Jutu Mañi yo tsicá iñi ña. Tan nducú ña cuhva jacahnu ña tsi Nyoo tsihin cuñu ñuhu ña, tan tsihin tsa nñi iñi añima ña. Maa tyin ñaha tsa iyó yíi, maa ñi cuhva coo vaha ña tsihin yíi ña nducú ña.

³⁵ Caahán yu tuhun ihya tsihin ndo tsa cuenda tsa vaha tsi maa ndo, ñavin tsa jañiñi yu tsi ndo. Maa tyin coo ndo iin ñayivi cuíi tsihin tsa nduve tsa jatyañú tsi ndo. Tan javaha ndo iin ñi tyiñu Nyoo.

³⁶ Maa tyin ndaa nyooho tsicá iñi tyin vaha tsa tindaha sehe ndo tyin tsa cua yaha cuiya tsi; vaha maa, na tindaha maa tsi tun cuñi tsi; ñavin cuatyí cuví can. ³⁷ Maa tyin ndaa nyooho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa. ³⁸ Ñi tsa cuñi tindaha sehe ñi, vaha javahá ñi. Tan ñi tsa ña cuñi tindaha sehe ñi, vaha ca javahá ñi.

³⁹ Maa tyin ley Nyoo catyí tsi na cundacá ñaha rayí tsi ñasihi ra tsitsi tsa ndi iyó ra. Tatun tsa tsihi ra, tacan tan cuví ndoo nuña ña tan tindaha ña yóo tsihin cuñi maa ña. Maa tyin tun cua tindaha ña, na tindaha ña tsihin ra yihí tuhun Nyoo. ⁴⁰ Maa tyin sii xaan ca cua cuví tsi ña tun ña tindaha ña inga tsaha. Tsehe cuví tsa tsicá iñi maa yu. Tan cuñi yu tyin maa Tatyí li Nyoo, tsaha tuhun ihya tsi yu, tan tsahá cuenda yu tsi ndo.

8

Nu jacuahá ra Pablo tyin ña vaha janacava yo tsi nyivi nu cuatyí

¹ Tan vityin cua cahan yu tsihin ndo cuenda nyayu tsa jamañi nyivi nu tsitoho. Tandihí yo tan cuñi yo tyin tsitó yo tun vaha o ña vaha catsi yo nyayu can. Tan tsa cuenda tsa tsitó xaan yo, iyo xaan cuñi yo tan nduyaá yo tsihin can. Tan ndi nduve nu jatinyee can tsi yo. Maa tyin tsa cuñi tahan yo tsi yo jacuahnú tsi tsi yo tsihin Nyoo. ² Ra tsa cuñi tyin tsitó xaan ra, nduve náa tsitó ra. ³ Maa tyin Nyoo tsitó ra ndáa nyivi cuñi tsi ra tsihin tsa nui iñi añima ñi.

⁴ Tan vityin tsa cuenda tsa catsi yo nyayu tsa iyó vico tsitoho: tsa tsitó vaha yo tyin tsitoho nduve maa yahvi nyaá can, tyin intuhun ñi maa Nyoo iyó. ⁵ Vasu ndi maa juhva nyivi catyí ñi tyin iyó cuaaha nyoo tsa ndacá ñaha nu ñuhu ñayivi ihya tan andivi, ⁶ maa tyin tsa cuenda yoo, intuhun ñi Nyoo Jutu yo iyó. Tan juvin ra javahá tandihí cuñi maa tsa iyó. Tan yoo iyó yo tsa cuenda ra. Tan iyó tucu intuhun ñi Jutu Mañi yo Jesucristo. Tan maa ra javahá tandihí maa tsa iyó, nda cuanda tsi maa yo.

⁷ Maa tyin yihí juhva ñi yihí cuenda Nyoo ña tsitó ñi tyin intuhun ñi Nyoo iyó. Tyin ndi tsicá iñi ñi tyin nyito tsitoho can. Tan cuñi ñi tyin nyayu, tsa jamañi nyivi tsi tsitoho can, ica tsi. Tan cuñi ñi tyin tun catsi ñi nyayu can cua coo cuatyí ñi nu Nyoo. ⁸ Maa tyin Nyoo nduve cuenda ra tatun catsi yo, a ña catsi yo. Ñavin tsa tsatsí yo can tan ña vaha ca yo nuu ra, tan ñavin tsa cuenda tsa ña tsatsí yo tan vaha ca yo. ⁹ Maa tyin nyooho tsa tsitó tyin nduve cuatyí tsa catsi yo nyayu tsa jamañi nyivi nuu tsitoho, jaha ndo cuenda coto janacava ndo tsi ñi tsa ndi quihvi tuhun Nyoo nu cuatyí, tyin ñi ican tsicá iñi ñi tyin tun catsi ñi tsa jamañi nyivi nu tsitoho, cua coo cuatyí ñi nuu Nyoo. ¹⁰ Tyin tatun yoocho tsa tsitó un tuhun ihya, tan cunyya un catsi un tsa iyó vehe tsitoho, tan iin ra yañi yo tsa ndi quihvi cuenda Nyoo tan nyehe ra tyin tsatsí un tsa jamañi nyivi nu tsitoho, cua cuñi ndihí ra catsi ra. ¹¹ Tan cua tiví añima ra tyin cuñi maa ra tyin tsicoo cuatyí ra. Tan ra ican tsihi ra Cristo tsa

cuenda ra. Tan yoocho tsa tsitó un, siqui un cua cuhun cuatyí can. ¹² Tyin tun janacava yo tsi yañi yo tsa ndi quihvi cuenda Nyoo, tsicoo cuatyí yo nuu ra Cristo. ¹³ Yacan cuenda tatun janacava yu tsi iin yañi yo nuu cuatyí tsihin tsa tsatsí yu nyayu, vaha ca tsa ña cua catsi ca yu nyayu ndi sava ca quivi, tyin ña cuñi yu tsa janacava yu tsi yañi yo nuu cuatyí.

9

Tsa taahán tsi javahá iin ra tava tyiñu ra Jesucristo

¹ Nditsa tsa cuví yu iin ra tava tyiñu ra Jesucristo. Tan yofni nyivi ndacá ñaha tsi yu tyin nyehe yu tsi ra Jesús Jutu Mañi yo. Tan juvin ñi maa ndo cuví tsandaa tsa cuenda tyiñu javahá yu, tyin tsinú iñi ndo tuhun ra tsa jacoto yu tsi ndo. ² Vasu yihí nyivi ña tsinú iñi ñi tyin ra Jesucristo tava tyiñu tsi yu, maa tyin nyoocho taahán tsi tsinu iñi ndo, tyin juvin yu cahan tuhun ra tsihin ndo tan natsinu iñi ndo tsi ra. Yacan cuenda juvin ndo cuví tsandaa.

³ Tyehen cuví tsa cua cahan yu tsihin nyivi tsa caahán nyaa tsi yu. ⁴ Iyó ndatu tsa quihin yu tandihí tsa tsahá ñi catsi yu tan tsa tsahá ñi coho yu. ⁵ Tan iyó tucu ndatu tsa tindaha yu tsihin iin ñaha yihí cuenda ra Cristo tumaa javahá yañi ra Jesús, tan ra Pedro, tan tandihí ca ra tava tyiñu ra Jesucristo. ⁶ ¿O tsicá iñi ndo tyin yuhu ñi tan ra Bernabé ñi taahán tsi jaha tyiñu ndi tsihin ndaha ndi tan jata ndi tsa tsiní ñuhu tsi ndi? ¿A ña taahán tsi nacoo ndi tyiñu can tan cahan ndi maa ñi tuhun Nyoo? ⁷ Ra tsa cuví andaru iyó yahví ra naha. Tan ra tsa tatsí yava nducuaa tsatsí ra tucuaa tsa quee nu nducuaa ra. Tan ra tsa jahá cuenda indiqui tsihi ra letsí ti. ⁸ Tan ña cuñi ndo tyin tuhun ihya tsa tsiní tuñi jiñi maa yu cuví, tyin nu ley Nyoo tsa tyaa ra Moisés catyí tsi tyehen: ⁹ “Ra tsa tatsí trigu ña taahán tsi tyihí ra yoho yuhu indiqui tsa janduvahá trigu can, tyin taahán maa tsi catsi ti juhva trigu nu jahá tyiñu ti.” Nditsa tyin Nyoo ña cahan ra tyehen tsa cuenda indiqui ñi. ¹⁰ Maa tyin na cutuñi iñi yo tyin tumaa ra tahví ñuhu tan ra tatsí, nyita iñi ra naha tyin cua naquihin ra naha tsa cua quee nuu tsa tatsí ra naha. ¹¹ Tan tacan cuví tucu nyuhu, quitsí cahan ndi tuhun Nyoo tsihin ndo, tumaa tsa quitsí tatsí ndi tsiti tsitsi añima ndo cuví can. Tan taahán tsi tsa jatinyee ndo tsi ndi tsa cuenda tsa jacotó ndi tuhun Nyoo tsi ndo. ¹² Tatun jatinyee ndo tsi inga ra tsa ña quitsí tyihí tuhun Nyoo nu yucú ndo, taahán tsi tsa cuaaha ca jatinyee ndo tsi nyuhu, tyin nyuhu tyihí tuhun Nyoo nu yucú ndo.

Maa tyin ña caahán ndi, tan cunyeé iñi ndi tandihi. Ña tsicán ndi tsa tsíñi ñuhu tsi ndi tsi ndo tyin coto jandihi ndo tsa tyaa yahvi ndo tuhun ra Cristo tsa jacuahá ndi. ¹³ Tsitó ndo tyin ra jahá tyiñu vehe ñuhu nyivi Israel, iyó ra naha tsihin tsa iyó vehe ñuhu can. Tyin taahán tsi tavá siin ra naha juhva cuñu quiti tyin catsi ra naha. Tan tandihi ca cuñu can cua cahmi ra naha tumaa catyí maa Nyoo tsihin ra naha. ¹⁴ Tan juvin ñi tacan caahán Jutu Mañi yo, tyin taahán tsi jatyinyee ñi yihí cuenda Nyoo tsi ra caahán tuhun Nyoo tsihin ñi. ¹⁵ Maa tyin yuhu, ndi iin tsaha tan ñaha ca ndacan yu tsa taahán tsi tsi yu. Tan ndi ña tyaa yu tuhun ihya tyin cuñi yu tsa cuhva ndo tsa cuhva ndo tsi yu. Vaha taxin ca nacúu maa yu jaha soco tan ñavin ca tsa ndihi tsa sií cuñi yu caahán yu tuhun ra Cristo tsihin ndo vasu ndi maa nduve náa jatyinyee ndo tsi yu.

¹⁶ Ña cuví nduyaa yu tsihin tsa caahán yu tuhun Nyoo tyin maa ra Cristo tavá tyiñu tsi yu tsa cahan yu tuhun ra. Maa tyin ndahvi yu tun ña cahan yu tuhun Nyoo ihya. ¹⁷ Yacan cuenda tatun cahan yu tsihin tsa ñi iñi yu, cua ñihi yu yahvi yu. Vasu ña cuñi yu cahan yu, tsa ñiñi cuñi tsi cahan yu, tyin tyiñu tsahá maa Nyoo tsi yu cuví tsi. ¹⁸ Tan tsa sií cuñi yu caahán yu tuhun ra Cristo yacan cuví yahvi yu. Tan ña tsicán yu tsa taahán tsi tsi yu tsa cuenda tsa caahán yu tuhun ra.

¹⁹ Vasu ñavin musu cuví yu, maa tyin nanduví yu musu tandihi nyivi tyin tacan tan cuví jaha canaa yu cuaha ca nyivi cuenda ra Cristo. ²⁰ Tatun nyii yu nu yucú ra Israel naha ra, nanduví yu tumaa maa ra naha tyin ra can naha ra iyó ra naha cuhva catyí ley Nyoo tsa tyaa ra Moisés. Tan tsa cuñi yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu. ²¹ Maa tyin tatun cuñi yu jaha canaa yu tsi nyivi tsa ña nyitá iñi ley ra Moisés, javahá yu tumaa javahá ñi, tyin tacan tan cuví jaha canaa yu tsi ñi. Tan tsa javahá yu cuhva javahá ñi, ña cuñi tsi catyí tyin ña tyaa yahvi yu ley Nyoo tyin tyaa yahvi yu ley ra Cristo. ²² Tatun nyii yu tsihin ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyin tacan tan cuví cahan yu tuhun Nyoo tsihin ra naha, tan ndunyeé ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyivi, tyin tacan tan tyaa soho ñi tuhun Nyoo tsa caahán yu tsihin ñi tan cacu ñi. ²³ Javahá yu tacan tyin tacan tan cacu nyivi tan nasoco ndihi tucu maa Nyoo tsi yu.

²⁴ Tsitó ndo tyin tatun cua cunu suuhva nyivi, tandihi ñi tsinú, maa tyin intuhun ñi ñi jaha canaa. Tacan tucu maa yo, cuñi tsi tsa

ñihi cunyicun yo tsi Nyoo tyin tacan tan cuví jaha canaa yo tsa vaha ca tsa tsahá ra tsi yo. ²⁵ Tandihi nyivi tsa tsinú suuhva, nacoó ñi tandihi tsa jatyañú tsi ñi tyin cuñi ñi jahá canaa ñi. Tan nyivi can cua jaha canaa ñi intuhun corona ndaha yutun tsa iin yaha ñi na ityi. Maa tyin yoo nducú yo cuhva jaha canaa yo tsa ña cua tvi maa. ²⁶ Tsa cuenda yuhu ña tsinú soho ñi yu, tan ndi ña cañi tahan soho ñi yu. ²⁷ Maa tyin ñihi ndacá ñaha yu tsi cuñu ñuhu yu. Tan jañiñi yu tyaa yahvi yu tsi Nyoo, coto juvin ñi maa yu tsa yaha jacuahá yu tsi inga nyivi, tan ndoo yu.

10

Nu jacuahá ra Pablo tyin ña vaha jacahnú yo tsitohó

¹⁻² Yañi, ña cuñi yu tsa naa iñi ndo tsa cuví tsi tsii tsaahnu yo tahán tsanaha. Nyoo jacuhun ra iin vico ityi nuu ñi. Tan yaha sava ñi nu ndutya ñuhu iin caa ñi tsihin ra Moisés, ra cuví ityi nuu tsihin ñi. Tan tsa tacan, tumaa tsa tsicoondutyá ñi tsihin vico tan tsihin ndutya ñuhu tan ndu iin ñi tsihin ra Moisés. ³ Tan Nyoo tsahá ra iin ñi tsa tsatsi tandihi ñi. ⁴ Tan tsihi ñi ndutya tsa quita tsata cava tsa cuahán tsihin ñi tan cava can cuví ra Cristo, tan tandihi ñi iin ñi ndutya can tsihi ñi. ⁵ Maa tyin vasu cuaha tsa iyo javahá Nyoo nyehe ñi, cuaha ñi ña tyaa yahvi ñi tuhun cahan ra tsihin ñi. Tan tsihi ñi nu tsiqui can.

⁶ Tandihi tuhun ihya tsahá tsi iin cuhva tsi yo tyin tacan tan ña cuñi yo javaha yo tsa caquiñi tumaa tsa javahá ñi can. ⁷ Yacan cuenda ña jacahnu ndo tsitohó, tumaa javahá juhva ñi can, tyin catyí nu tutu Nyoo tyehen: “Tsinyecu ñi, tsatsi ñi, tan tsihi ñi. Yaha can tan nduvita ñi, tsahan quitsaha tsañi ñi [jacahnú ñi indiqui huhun cuaan tsa javahá ñi].” ⁸ Ña coo ndo tsihin iin ñaha tun ñavin ñasihi ndo cuví. Tacan tucu ñiñaha ña taahán tsi coo ñi tsihin rayi tumaa javahá nyivi can. Tan tsihi oco uñi mil ñi tsa iin quivi. ⁹ Jutu Mañi yo vita xaan iñi ra, maa tyin ña taahán tsi nducú cuhva yo tsi ra tumaa javahá juhva ñi can. Tan tsihi ñi tsa caan coo tsi ñi. ¹⁰ Tan ña cahan ndo ndavaha ñi siqui Nyoo, tumaa tsa cahan juhva ñi can. Tan jaquitsi ra ángel ra tsahñi tsi ñi.

¹¹ Tandihi yacan tahán tsii tsaahnu yo tsa tsicoq tahán tsanaha. Tan tsinyaa tsi nu libru Nyoo tyin tacan tan yoo tsa iyó yo nu cua ndihi ñuu ñayivi ihya vityin coto yo tyin ña taahán tsi javaha yo tandihi tsa javahá ñi can. ¹² Tan nyooho tsa cuñi tyin vaha cuahán ndo tsihin Nyoo, jaha ndo cuenda coto nduva ndo [jaha nu ña vaha]. ¹³ Tundoho tsa nyehe ndo, cuñi maa ndo tyin intuhun ñi maa ndo nyehe can. Maa tyin inducu ñi nyehe tandihi ca nyivi. Cuíta

iñi ndo tsi Nyoo, tyin ña tuhvá ra cuhva tsa nyehé ndo tundoho tsa ña cuví cunyeé iñi ndo. Tyin tun nyehé ndo tundoho, nducú ra cuhva tsa quita ndo tsitsi tundoho can tan cunyeé iñi ndo.

¹⁴ Yacan cuenda yañi, ña jacahnu ndo tsi-toho. ¹⁵ Caahán yu tsihin ndo tumaa caahán yu tsihin ra tsa cutuñi iñi. Yacan cuenda jaha ndo cuenda tsa caahán yu tsihin ndo tan nyehe ndo tun nditsa a ña nditsa tsa caahán yu. ¹⁶ Quivi tsa nducuhún iñi yo tyin tsihi ra Cristo nu cruu, tsihi yo vinu tan tsatsi yo paan. Tan vinu can cuñi tsi catyi tyin iin ñi cuví yo tsihin ra Cristo tsa cuenda niñi ra. Tan paan can cuñi tsi catyi tyin iin ñi cuví yo tsihin ra tsa cuenda cuñu ñuhu ra. ¹⁷ Tyin vasu cuaha yo, maa tyin tandihi yo tan tsatsi yo intuhun ñi paan. Tan yacan cuenda cuví yo intuhun ñi cuñu ñuhu tsa cuenda ra.

¹⁸ Tyihi tuñi iñi ndo cuhva iyó nyivi Israel. Tsatsi ñi quiti tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra. ¹⁹ Ñavin caahán yu tyin iyó yahvi nyaá tsitoho tsa jacahnú nyivi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can. ²⁰ Tsa caahán yu cuví: Tun jamañi nyivi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha. ²¹ Tyin ña cuví coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuví catsi yo nu mesa Nyoo tan juvin ñi cuhva can catsi yo nu mesa nu ña vaha. ²² Ña cuhva yo tsihi tsi Jutu Mañi yo tyin maa ra iyó ca tunyee iñi tsi ra tan ñavin ca maa yo.

Tun cua javaha yo náa javaha yo, na javahayo tsa cuenda tsa vaha tsi inga ca nyivi

²³ Nditza tsa caahán nyivi: “Cuví javaha yo náa cuñi maa yo.” maa tyin ña tandihi can tan jacuhnú can tsi yo tsihin Nyoo tan ndi ña cuví can tsa vaha tsi yo. ²⁴ Ña cuví caca iñi yo tsa cuenda maa ñi maa yo, tyin cuñi tucu tsi tsa caca iñi yo tsa cuenda inga ca nyivi tan nducu yo tsa vaha tsi ñi.

²⁵ Catsi nyoocho tandihi cuñu tsa cuyahvi nu nuyahvi. Tan ña nducu tuhun ndo náa cuñu cuví can tyin tacan tan ña cua jatyañu tsa tsicá iñi ndo tsi ndo. ²⁶ Tyin ñuhu ñayivi tan tandihi tsa iyó nuu tsi, tsii maa Nyoo cuví.

²⁷ Tan tatun iin nyivi tsa ña tsinú iñi tsi Nyoo, tan cana ñi tsi ndo tsa cucatsi ndo yuvehe ñi, tun cuñi ndo cuhun ndo, vaha maa cuhun ndo, catsi nyoocho tandihi tsa cua cuhva ñi catsi ndo. Tan ña nducu tuhun ndo tun jamañi ñi cuñu can nuu tsitoho.

²⁸⁻²⁹ Maa tyin tatun ndáa nyivi caahán tye-hen tsihin ndo: “Nyayu ihya, nyayu tsa jamañi nyivi nuu tsitoho cuví tsi”; ña catsi ndo tyin coto nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yihí ndo cua catyi ndo: “¿Nacuenda cuñi tsi tsa jahá yu cuenda tsi yu tsa catyi tsa tsicá iñi inga ca nyivi? ³⁰ ¿Tan nacuenda ña cuví catsi yu can?, tan maa ñi tsahá yu tyahvi nyoo tsi Nyoo tan tsatsi yu”, catyi ndo. ³¹ Vaha maa, tun tsatsi ndo, tan tsihi ndo, o javahá ndo inga ca tsa javahá ndo; javaha nyoocho maa tyin cuhva taahán iñi Nyoo. ³² Tan ña javaha ndo tsa cuví janduva tsi inga ca nyivi, ndi ñi Israel, tan ndi ñi tsa ñavin ñi Israel cuví, tan ndi ñi yihí cuenda Nyoo. ³³ Tumaa yuhu, ña nducú yu tsa vaha tsi maa yu. Maa tyin nducú yu tsa vaha tsi inga nyivi tan nácaa cuví cacu aña maa ñi.

11

¹ Nyehe ndo tumaa javahá yu cuhva javahá ra Cristo, tacan taahán tucu tsi javaha nyoocho cuhva javahá yuhu.

Nacaa taahán tsi javaha ñiñaha nu iyó culto

² Yañi, sii xaan cuñi yu tyin tacan ñi nducuhún iñi ndo tsi yu. Tan tyaá yahvi ndo tsa jacuahá yu tsi ndo. ³ Maa tyin cuñi yu tsa coto ndo tyin ra Cristo cuví jiñi tsihin intuhun intuhun rayii tyin juvin ra cuví ityi nuu tsihin ra, tan rayii cuví jiñi tsihin ñasihi ra, tumaa cuví Nyoo jiñi tsihin ra Cristo.

⁴ Tatun iin rayii tyasí ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra. ⁵ Maa tyin tun iin ñaha tan ña tyasí ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatya ndii jiñi ña cuví can. Tan tsahá ña ticanuu tsi yii ña tyin juvin ra cuví jiñi tsihin ña. ⁶ Tatun iin ñaha tan ña tyasí ña jiñi ña, vaha taxin ca xatya ña tandihi ixi jiñi ña. Maa tyin tun cahán nuu ña tsa xatya jiñi ña, nacasi ña jiñi ña. ⁷ Ña taahán tsi tsa casi rayii jiñi ra. Tyin cuhva caá Nyoo caá ra, tyin ndacá ñaha ra tsi ñasihi ra, tumaa tsa ndacá ñaha maa Nyoo tsi ra. Maa tyin iin ñaha jacahnu ña tsi yii ña tsihin tsa tsahá ña tsa cundaca ñaha ra tsi ña. ⁸ Tyin quivi javahá Nyoo tsi rayii, ña javahá ra tsi ra tsihin yiqui naha ñaha. Tyin tsihin yiqui naha rayii javahá ra tsi ña. ⁹ Tan tsacatyí rayii, tan tsinu ñaha, tan ñavin tsacatyí ñaha tan tsinu rayii. ¹⁰ Yacan cuenda ñiñaha cuñi tsi tsa cundasi jiñi ñi. Tyin cuñi tsi catyi tyin ndacá ñaha yii ñi tsi ñi. Tan cuví tsi tsa vaha tsi ra ángel naha ra. ¹¹ Maa tyin tyaá Nyoo cuhva tyin tsiñi ñuhu rayii tsi ñaha. Tan tsifí ñuhu ñaha tsi rayii. ¹² Nditza tyin ñaha

tsinü ña tsihin yiqui naha rayi jahä Nyoo. Maa tyin nda cuanda quivi can tan quitsaha tsahä Nyoo tsa coo sehe yi ña. Tan nda cuanda vityin juvin ñi maa Nyoo tsahä tsa coo nduvi taahan ñi, rayi tan ñaha.

¹³ Tyihi tuñi jihna iñi ndo tsa cuenda tuhun ihya. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñuhu? ¹⁴ Tsitó yo tyin ticanuu cuví tsi tsa cuenda rayi tatun nañi jiñi ra. ¹⁵ Maa tyin ñiñaha, vaha tsa nañi jiñi ñi tyin Nyoo tsahä ra tsa ndunañi tsi tan casi tsi jiñi ñi. ¹⁶ Maa tyin tatun yóo cuñi cañi tahan tsa catyi tuhun ihya, cuñi tsi coto ndo tyin ndi nyuhu tan ndi vehe ñuhu Nyoo, nduve inga ca tuhun iyó.

Nu caahán ra Pablo tsihin nyivi Corinto tyin ña vaha cuhva tsatsi ñi Santa Cena

¹⁷ Yañi, inga tuhun cua cahan yu tsihin ndo tyin ña sii cuñi yu tsihin ndo; tyin tsa javahá ndo nu ndu iin ndo, ña tsahä tsi tsa vaha tsi ndo, tan jativí tsi tsi ndo. ¹⁸ Tyin catyi nyivi tsihin yu tyin cuhva tsa ndu iin ndo tsa cua coo ndo culto, tan natahvi sava ndo. Tan tsicá tucu iñi yu tyin vasiqiu nditsa tsa caahán ñi. ¹⁹ Vasiqiu cuñi maa ndo tyin tsihin tsa natahvi sava ndo tan quituvi ndaa nyooho tsinü vaha iñi tsi Nyoo! ²⁰ Maa tyin tatun tacan ñi iyó tsihi nu yucú ndo, ñavin Santa Cena cuví can. ²¹ Tyin cuhva tsa cua catsi ndo, tsatsi ñi ndo tsa ndahá ndo. Tan ña ndatú ndo nda cuanda ndu iin tandihi nyivi. Tan yihí ndo cuaha tsatsi ndo, tan nda cuanda tsiñi ndo tsihin vinu. Tan yihí nyivi ña ñihí ñi tsa catsi ñi jahá ndo. ²² ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñi ndo nyehé ndo vehe ñuhu Nyoo cuví can. Tan tsahá ndo ticanuu tsi nyivi nduve tsa iyó tsi. ¿A taahán tsi catyi yu tsihin ndo tyin vaha cuhva javahá ndo, cuñi maa ndo? Ña taahán tsi, tyin ña vaha tsa javahá ndo.

Ra Pablo tsahá cuenda ra tsi ñi, nácaa taahán tsi coo ñi Santa Cena

(Mt. 26.26-29; Mr. 14.22-25; Lc. 22.14-20)

²³ Tyin Jutu Mañi yo jacuahä tuhun ihya tsi yu. Tan juvin yacan tsa yaha jacuahä yu tsi ndo. Tyin tsacuaa tsa ndi cumañi ca nacuhva cuenda ra Judas tsi Jutu Mañi yo tsi nu xaan iñi tsi ra, quihñ ra iin paan. ²⁴ Tan tsa yaha nacuhvā ra tyahvi nyoo tsi Nyoo tan tsahnü ra paan can. Tan catyi ra: “Catsi ndo paan ihya tyin cuví tsi tumaa cuñu ñuhu yu tyin tsa cuenda ndo tan cua cúu yu. Javaha ndo tyehen tan nducuhun iñi ndo tsi yu”, catyi ra Jesús. ²⁵ Tan tsa yaha tsa cuxiñi ra naha tan quihñ ra Jesús vasu vinu tan catyi ra: “Tsihin vinu ihya ndoó Nyoo tyiñu tsihin ndo vityin, tyin vinu tsa

yihí tsitsi vasu ihya, niñi yu cuví. Tahan ñi tsaha tsa cua coho ndo, coho ndo tsa cuenda tsa nducuhun iñi ndo tsi yu”, catyi ra Jesús tsacuaa can. ²⁶ Tan tahan ñi tsa ndu iin yo tan tsatsi yo paan tan tsihi yo vinu jacotó yo tsi nyivi tyin tsacaty cuaty yo tsihi Jutu Mañi yo. Tan tacan jacotó yo tsi nyivi nda cuanda quivi quitsi nyico ra.

Ra Pablo tsahá cuenda ra tsi yo nácaa taahán tsi coo yo Santa Cena

²⁷ Tatun tsatsi yo paan tan tsihi yo vinu cuhva tsa ña taahán iñi Nyoo, tsicoó cuaty yu. Tyin ña tyaá yahvi yo tsa tsihi ra Cristo nu cruu tan tsa tsatj niñi ra. ²⁸ Yacan cuenda cuñi tsi jaha yo cuenda tatun vaha cuahán yo tsihin Nyoo tsa ndi cumañi ca catsi yo paan tan coho yo vinu. ²⁹ Tyin Nyoo tatsi tuñi ra tsi yo tun tsatsi yo tan tsihi yo tan ña tsicá iñi yo tsa cuenda tsa tsihi ra Cristo. ³⁰ Tan tsa cuenda yacan cuaha xaan ndo cuuhvi ndo tan nduve tunyee iñi iyó tsi ndo, tan juhva nyivi tahan ndo tsa yaha tsihi ñi. ³¹ Maa tyin tatun jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo. ³² Maa tyin tatun tatsi tuñi Jutu Mañi yo tsi yo tacan, javahá ra tacan tyin tacan tan ña cunaa yo tsihin nyivi iyó cuenda nu ñuhu ñayivi ihya.

³³ Tan tacan nyooho yañi, tatun cua ndu iin ndo tsa cua catsi ndo Santa Cena, cuatu tahan ndo tsi ndo tan catsi ndo tan coho ndo iin caa ñi. ³⁴ Maa tyin tatun ndaa nyooho tsisocó ndo, catsi jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quivi tsa quitsi nyehe yu nu yucú ndo tan jandaa yu inga ca tuhun.

12

Ndatu tsa tsahá Tatyí Ii Nyoo tsi yo

¹ Yañi, cuñi yu tsa coto ndo náa ndihi ndatu tsahá Tatyí Ii Nyoo tsi tsa intuhun intuhun yo.

² Tsitó ndo tyin quivi tsa ñaha ca nacoto ndo tsi Nyoo, tsahä ndo tsa cundaca ñaha tsitoho tsa ña cuví cahan tsi ndo. ³ Yacan cuenda cuñi yu tsa coto ndo tyin ra tsa caahán tyin ña vaha ra Jesús, ñavin Tatyí Ii Nyoo jacahán tsi ra. Maa tyin ra tsa jacahán Tatyí Ii Nyoo catyi ra tyin ra Cristo cuví Jutu Mañi yo.

⁴ Siin siin ndatu naquihín intuhun intuhun yo, maa tyin iin ñi Tatyí Ii Nyoo tsahá tsi yo. ⁵ Siin siin cuhva jahá tyiñu yo maa tyin tyiñu intuhun ñi maa Jutu Mañi yo javahá yo. ⁶ Siin siin tyiñu javahá tsa intuhun intuhun yo. Maa tyin intuhun ñi maa Nyoo cuví ra jatinyee tsi tandihi yo tan javahá yo can. ⁷ Tan tsahá ra tunyee iñi Tatyí Ii ra tsi intuhun intuhun yo tyin tacan tan jatinyee yo tsi tandihi ca nyivi yihí cuenda ra. ⁸ Tsi juhva yo tsahá Tatyí Ii

Nyoo tsa cahan yo tsihin tsa tsiñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo. ⁹ Tan tsi inga yo tsahá ra tsa tsinú xaan iñi yo tsi ra. Tan juvin ñi maa Tatyí li ra tsahá tunyee iñi tsi inga yo tsa janduvaha yo tsi nyivi cuuhví. ¹⁰ Tan tsi inga yo tsahá ra tunyee iñi tsa cuví javaha yo tsa iyo. Tan inga yo tsahá ra tsa cahan yo tuhun tsa tsahá ra tsi yo tyin jacoto yo tsi inga ca nyivi. Tan tsi inga yo tsahá ra tsa cuví nacoto yo tun Tatyí li Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyivi. ¹¹ Tan tandihi yacan tsahá intuhun ñi maa Tatyí li Nyoo. Maa tyin siin siin tsa tsahá ra tsi tsa intuhun intuhun yo, nácaa cuñi maa ra.

Tandihi yo tan cuví yo intuhun ñi cuñu ñuhu tsihin ra Cristo

¹² Tumaa cuñu ñuhu yo iyó jiñi tsi, iyó ndaha tsi, iyó tsaha tsi, maa tyin tandihi tsi tan cuví tsi intuhun ñi cuñu ñuhu. Tan tacan cuví tucu maa yo tsihin ra Jesucristo; vasu cuaha xaan yo, maa tyin intuhun ña cuñu ñuhu ra cuví yo. ¹³ Tan tacan tucu tandihi yo, a cuví yo nyivi Israel, a ñi Grecia, a ñi iyó tsitoho, a ñi nduve tsitoho, maa tyin tsa tsicoondutya yo tan nanduví yo intuhun ña cuñu ñuhu ra Cristo tyin tsahá ra intuhun ñi maa Tatyí li ra coo tsihin tandihi yo.

¹⁴ Tyin cuñu ñuhu yo ña cuví cuví tsi intuhun ñi maa tinuu tyin cuñi tsi tsa cunyecu tandihi ca tsa cutahan tsihin tsi tan cuví tsi cuñu ñuhu nñi. ¹⁵ Tun tsatyin cuví cahan tsaha yo tan catyí tsi: “Yuhu nduve yahvi nyaá yu tyin ñavin ndaha cuví yu.” Ñavin tsa cua cahan tsi tacan tan ña cua cutahan ca tsi tsihin cuñu ñuhu can. ¹⁶ O tun tsatyin cuví cahan soho yo tan catyí tsi: “Yuhu nduve yahvi nyaá yu tyin ñavin tinuu cuví yu.” Ñavin tsa cua cahan tsi tacan tan ña cutahan ca tsi tsihin cuñu ñuhu can. ¹⁷ Tun tsatyin nanii cuñu ñuhu yo cuví tsi tinuu tan nduve soho yo, ¿nácaa cua cuñi yo? O tun tsatyin nanii cuñu ñuhu yo cuví tsi soho, ¿nácaa cua tahñi yo? ¹⁸ Maa tyin Nyoo tyaá ra tan iin tan iin can nu cuñi maa ra. ¹⁹ Tatun nduve tsa intuhun intuhun tsa cutahán tsihin cuñu ñuhu can, ñavin cuñu ñuhu cuví can. ²⁰ Maa tyin tsa ndu iin soho, tinuu, jiñi, ndaha, tan tandihi ca maa, tacan tan cuví tsi intuhun cuñu ñuhu.

²¹ Tinuu yo ña cuví catyí tsi tsihin ndaha yo: “Ña tsiñi ñuhu yoocho tsi yu.” Tan ndi jiñi yo tan ña cuví catyí tsi tsihin tsaha yo: “Ña tsiñi ñuhu yoocho tsi yu.” ²² Ña vaha tsa cahan tsi tacan tyin vasu iin tsa lihli tsa cuñi maa yo tyin ña tsiñi ñuhu tsi yo, yacan cuví tsa tsiñi ñuhu ca. ²³ Tan nu cuñi yo tyin

ñi sii caá, tyasí yo. Tan nu ña taahán tsi nyehé nyivi, yacan tyasí vaha ca yo. ²⁴ Tan nu sii caá, ña tyasí yo. Tacan javahá Nyoo cuñu ñuhu yo, tyin tacan tan jacahnú ca yo nu cuñi maa yo tyin ña sii caa. ²⁵ Tan tsa intuhun intuhun tsa iyó cuñu ñuhu yo, jahá cuenda tahan maa tsi itsi, yacan cuenda ña cuví cusiin tsi. ²⁶ Tatun luxu cuñu ñuhu yo nyehé tundoho, nyehé ndihi tani ca cuñu ñuhu yo tundoho. Tan tatun sii cuñi luxu tsi, sii cuñi tani tsi.

²⁷ Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo. ²⁸ Tan Nyoo natyísó ra tsi intuhun intuhun yo vehe ñuhu tyin tacan tan jatyinyee tahan yo tsi yo. Tsa jihna ñi natyísó ra tsi ra caca tyiñu ra. Tsa tsinu uvi, natyísó ra tsi ra cuví ndusu yuhu ra. Tan tsa tsinu uñi, natyísó ra tsi ra jacuahá. Yaha can, tan natyísó ra tsi ra tsa javaha tsa iyo, tan natyísó tucu ra tsi ra tsa janduvaha nyivi cuuhví, tan ra tsa jatyinyee tsi nyivi, tan ra jaha cuenda vehe ñuhu, tan ra caahán inga yuhu tsa ña tsitó ra. ²⁹ Ña tandihi yo tan tsicá yo tyiñu ra Cristo. Ña tandihi yo tan cuví yo ndusu yuhu ra. Ña tandihi yo tan cuví yo ra jacuahá. Ña tandihi yo tan javahá yo tsa iyo. ³⁰ Ña tandihi yo tan tsahá Nyoo tunyee iñi tsa janduvahá yo tsi nyivi cuuhví. Ña tandihi yo tan caahán yo inga yuhu tsa ña tsitó yo. Ña tandihi yo tan cuví nacotó yo tan nacatyí tuhun yo náa cuñi tsi catyí tsa caahán inga nyivi. ³¹ Ndúc ndo cuhva naquihin ndo tsa vaha ca tsa tsahá Nyoo. Maa tyin cua janaha yu iin cuhva vaha ca tsi ndo.

13

Nu janahá ra Pablo nácaa taahán tsi cuñi yo tsi nyivi

¹ Tatun yuhu tan cuví cahan yu cuaha ñi yuhu tsa caahán nyivi iyó nu ñuhu ñayivi ihya, tan cuví cahan tucu yu yuhu tsa caahán ángel, maa tyin tatun ña cuñi yu tsi Nyoo tan ndi tsi nyivi, cuví yu tumaa tyombo tsa nañi ñi maa o iin caa tsa tsacú ndaxin ñi maa. ² Tatun cuví cuhva cuenda yu tuhun caahán Nyoo, tan cuví coto yu tandihi tuhun xeehe, tan tsitó yu tandihi tuhun, maa tyin tatun ña cuñi tucu yu tsi Nyoo tan ndi tsi nyivi, nduve náa catyí javaha yu tandihi yacan. Tatun tsinú xaan iñi yu tsi Nyoo nda cuanda cuví cahan yu tsihin yucu na cuhun tsi inga ityi, tan cua cuhun tsi, maa tyin tatun ña cuñi yu tsi Nyoo tan ndi tsi nyivi, nduve náa ra cuví yu. ³ O tatun cuhva yu tandihi tsa iyó tsi yu tsi nyivi ndaahvi, tan cuhva yu nda cuanda ñayivi yu tyin cucayu cuñu ñuhu yu, maa tyin tatun ña cuñi yu tsi Nyoo tan ndi tsi nyivi, nduve náa cua jatyinyee can tsi yu.

⁴ Tatum nditsa tsa cuñi yo tsi Nyoo tan tsi nyivi, ña tyixin yo, vaha iñi yo; ña nyiyó iñi yo tsa tsahá ra tsi inga ñi, ña cahnu jahá yo tsi yo, tan ña yaa yo. ⁵ Tatum nditsa tsa cuñi yo tsi Nyoo tan tsi nyivi, ña siqui iñi yo, tan ña nducú yo maa ñi tsa vaha tsi maa yo, ña cuxaán yo, tan ña ndoó tsihi tsitsi añima yo. ⁶ Tatum nditsa tsa cuñi yo tsi Nyoo tan tsi nyivi, ña sii cuñi yo náa ndihi tsa ña vaha javahá ñi, maa tyin cusii iñi yo tsihin tsa vaha tan tsa nditsa. ⁷ Tatum nditsa tsa cuñi yo tsi Nyoo tan tsi nyivi, cunyeé iñi yo nyehe yo tundoho jahá ñi, tan tsinú iñi yo tyin cua javahá ñi tsa vaha tan ndatú yo tsa nasama ñi cuhva iyó ñi, tan ña cundihi iñi yo.

⁸ Tsa cuñi yo tsi Nyoo tan tsi nyivi ña cua cundihi maa tsi, maa tyin coo quivi tsa ña cua cuhva cuenda ca yo tsa caahán Nyoo, tan ña cua cahan ca yo inga yuhu, tan tsa tsitó yo vityin ña tsiniñi ñuhu ca can tsi yo. ⁹ Nyoo tsahá ra tsa coto yo luxu ñi vityin tan tsahá tucu ra luxu ñi tsa cuhva cuenda yo tsi nyivi, ¹⁰ maa tyin quivi quitsi nyico ra Cristo, cua cundihi tsa tsitó yo luxu ñi tyin cua coto yo tandihi maa.

¹¹ Quivi tsa luhlu yu caahán yu tumaa caahán ra nyihi tan tsicá iñi yu tumaa tsicá iñi ra nyihi, maa tyin quivi tsahnú yu nacoq yu tsa yu cuhva javahá ra nyihi. ¹² Tan tacan tucu vityin tsitó yo tuhun Nyoo tumaa tsa nyehé yo nu inu tun tsa ndihi tsi yaa. Maa tyin quivi cua quitsi ra Cristo, cua coto yo tandihi maa. Luxu ñi tsitó yu vityin, maa tyin quivi quitsi nyico ra, tandihi cuñi maa tan cua coto yu, tumaa nacotó maa ra tsi yu vityin. ¹³ Iyó uñi taahan tsa ña cua ndihi maa: tsa tsinú iñi yo tsi Nyoo, tsa tsitó yo tyin nditsa tsa cua ñihi yo tandihi tsa cahan Nyoo tyin cuhva ra tsi yo, tan tsa cuñi yo tsi Nyoo tan tsi nyivi. Tan tsitsi tsa nduñi taahan tsehe, tsa tsiniñi ñuhu ca cuvi tsa cuñi yo tsi Nyoo tan tsi nyivi.

14

Nu jacuahá ra Pablo nácaa cahan yo inga yuhu tsa ña tsitó yo

¹ Jañihi ca ndo cuñi ndo tsi Nyoo tan tsi nyivi. Tan nducu ndo cuhva naquihin ndo ndatu tsa tsahá Tatyí Ii Nyoo tsi yo. Nducu jihna ndo tsa cuhva cuenda ndo tuhun Nyoo tsi nyivi. ² Tyin tun caahán yo inga yuhu tsa ña tsitó yo, tsihin Nyoo caahán yo, tan ñavin tsihin nyivi. Tyin ndi intuhun ñi tan ña cutuñi iñi ñi, tyin tuhun xeehe caahán yo jahá Tatyí Ii Nyoo. ³ Maa tyin tun tsahá cuenda yo tuhun Nyoo tsi nyivi, cutuñi iñi ñi tan ñihi ca tsahnú ñi tsihin tuhun Nyoo. Tan ndu iin ca iñi ñi jahá yo tan ndunyeé ca iñi ñi. ⁴ Tatum caahán yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun

caahán Nyoo tsihin yo tsihin nyivi, tandihi ñi tsahnú.

⁵ Yuhu cuñi yu tsa cahan tandihi ndo inga yuhu tsa ña tsitó ndo. Maa tyin vaha xaan ca tun cuvi cuhva cuenda ndo tsa caahán Nyoo, tyin jatyinyee ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatum iin ndo cuvi nacoto ndo nácaa caahán inga ndo tsihin inga yuhu, nacatyí tuhun ndo tsihin ñi. Tacan tan cuvi jatyinyee tsi tsi tandihi ñi. ⁶ Yacan cuenda yañi, tatum yuhu tan tsaa yu nu yucú ndo, tan cahan yu inga yuhu, ña cua jatyinyee tsi tsi ndo. Maa tyin tun cahan yu tsa janahá Nyoo tsi yu, o tsa jacotó ra tsi yu, o tsa tsahá ra tyin cuhva cuenda yu tsi ndo, o tsa jacuaha yu tsi ndo, cua jatyinyee tsi tsi tandihi ndo.

⁷ Tatum tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo. ⁸ Tan tatum nu iyó cuatyí tan ña vaha tiví ra cutu, yofi cua coto náa cuhva cua cañi tahan ra naha. ⁹ Tan tacan tucu yoo, tatum caahán yo inga yuhu tsa ña cutuñi iñi nyivi, ña cua coto ñi náa caahán yo. Tan cua catyí ñi tyin jiñi yo ña vaha cuñi, yacan caahán maa yo. ¹⁰ Cuaha xaan yuhu caahán nyivi nu ñuhu ñayivi ihyá. Tan intuhun intuhun nuu yuhu tan iyó iyó ñi tsa cuñi tsi catyí. ¹¹ Maa tyin tun ña cutuñi iñi yu yuhu tsa caahán inga nyivi tsihin yu, ña cuvi natuhun yu tsihin ñi. Tan ndi maa ñi ña cuvi natuhun ñi tsihin yu. Cuví ñi tumaa nyivi inga ñuu tsa cuenda yu. ¹² Yacan cuenda nyoocho tsa cuñi xaan naquihin ndatu tsa tsahá Tatyí Ii Nyoo, nducu ndo cuhva naquihin ndo tunyee iñi tsa cuvi jatyinyee vaha ca tsi nyivi yucú vehe ñuhu.

¹³ Tacan tucu nyoocho tsa caahán inga yuhu, ndacan ndo tsi Nyoo na cuhva ra ndatu tsa nacatyí tuhun ndo tsihin nyivi náa cuñi tsi catyí. ¹⁴ Tyin tatum tsicán tahvi yu tsi Nyoo tsihin iin yuhu tsa ña cutuñi iñi yu, añima yu tsicán tahvi tsi Nyoo, maa tyin tsa tsiniñi tuñi jiñi yu ña cutuñi iñi tsi. ¹⁵ Yacan cuenda cuñi tsi tsa ndacan tahvi yu tsi Nyoo tsihin inga yuhu. Tan ndacan tahvi tucu yu tsi ra tsihin yuhu tsa cutuñi iñi yu. Tan cuñi tsi tsa cata yu yaa tsihin yuhu tsa ña cutuñi iñi yu. Tan cata ndihi tucu yu yaa tsihin yuhu tsa cutuñi iñi yu. ¹⁶ Tyin tatum jacahnú un tsi Nyoo tsihin maa ñi maa yuhu tsa tsahá Tatyí Ii Nyoo tsi un, ña cua cutuñi iñi nyivi tsa ña tsitó náa cuvi yacan. Tan ña cua cuvi jacahnú ñi tsi Nyoo tsihin un. ¹⁷ Vasu ndi maa vaha tsa caahán un, cuhva tsa nacuhvá un tyahvi nyoo tsi Nyoo, maa tyin ña jatyinyee tsi tsi inga nyivi tyin ña cutuñi iñi ñi tsa caahán un. ¹⁸ Tan yuhu nacuhvá yu tyahvi nyoo tsi Nyoo tyin cuaha ca tsaha caahán yu inga yuhu tan ñavin ca

tandihî nyooho. ¹⁹ Maa tyin vaha ca cuñi yu cahan yu vasu uhun taahan ñi tuhun tsitsi vehe ñuhu tan ñavin ca tsa cahan yu utsi mil tuhun tsihin inga yuhu, tyin vasu cuaha tuhun cua cahan yu tsihin ndo ña cua jatinyee can tsi ndo tyin ña cutuñi iñi ndo.

²⁰ Tsañu çaça iñi ndo, yañi. Tan ña lee xaan çaça iñi ndo. Maa tyin tatun javaha ndo náa javaha ndo, javaha ndo tumaa javahá lee tyin lee ña javahá tsi tsa caquiñi.

²¹ Catyí Nyoo nu libru ley ra tyehen: “Cua cahan yu tsihin nyivi ihya tsihin yuhu nyivi inga ñuu tan tsihin inga yuhu tsa ña tsitó ñi. Maa tyin vasu ndi maa tsa cua javaha yu tacan, ña cua tyaa yahvi maa ñi tsi yu”, catyí Jutu Mañi yo. ²² Yacan cuenda tsa caahán yo inga yuhu cuví tsi tumaa iin seña tsa cuenda nyivi tsa ña tsinú iñi tsi ra Cristo. Maa tyin tsa tsahá cuenda yo tsa caahán Nyoo, cuví tsi cuenda nyivi tsa tsinú iñi tsi ra. ²³ Tyin tatun tandihî ndo caahán ndo inga yuhu nu ndu iin ndo, tan quihví iin nyivi tsa ña yihí cuenda Nyoo, o ñi tsa ña cutuñi iñi tuhun Nyoo, cua catyí ñi tyin jiñi ndo ña vaha cuñi.

²⁴ Maa tyin tatun tandihî ndo tsahá cuenda ndo tsa caahán Nyoo tan quihví iin nyivi tsa ña yihí cuenda Nyoo, a ñi tsa ña cutuñi iñi tuhun Nyoo, cua coto ñi tyin iyo cuatyí ñi tsa cuenda tsa cutuñi iñi ñi tsa caahán ndo. ²⁵ Tan tandihî tsa iyó tsitsi añaima ñi cua nacoto ñi, tan cua cuñi tsiti ñi jacahnu ñi tsi Nyoo. Tan cua catyí ñi tyin nditsa nditsa cuui tsa nyaá Nyoo tsihin ndo.

Nacaa javahá yo culto iin cuhva vaha

²⁶ Yacan cuenda yañi, tatun cua ndu iin ndo, tan tsahá Nyoo tsa tsahá ra tsi tsa intuhun intuhun ndo, cuhva cuenda ndo itsi; a tsahá ra tsa cata ndo yaa, o tsa jacuahá ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, o nacatyí tuhun ndo naa cuñi tsi catyí inga yuhu can. Maa tyin tandihî yacan taahán tsi cuví tsi iin tsa tsahá tunyee iñi maa Nyoo tsi tandihî ndo tsa yihí ndo cuenda ra. ²⁷ Tatun cua cahan ndo inga yuhu nu ndu iin ndo, cuñi tsi tsa cahan uvi ndo a uñi ñi ndo, maa tyin intuhun intuhun ñi ndo cahan; ña cahan tandihî ndo juven ñi cuhva tsa caahán inga ndo. Tan inga tucu tuhun cuví tsi tsa nacatyí tuhun inga ndo tsa caahán ndo. ²⁸ Maa tyin tun yoñi cuví nacatyí tuhun tsa caahán ndo, vaha taxin ca, ña cahan ndo tsihin inga yuhu nu ndu iin ndo. Cahan ndo tsihin Nyoo tsihin inga yuhu tun cuñi ndo, maa tyin ndihí cuhva tsíñi ñi maa ndo. ²⁹ Tacan tucu tatun tsahá cuenda yo tsa caahán Nyoo. Cahan uvi ndo, a uñi ñi ndo. Tan tandihî ca ndo jaha ndo cuenda tun vaha tsa caahán yañi ndo. ³⁰ Maa tyin tatun jacoto Nyoo náa inga ca tuhun tsi inga nyivi tsa yucú tsíñi tuhun caahán ndo, tacan tan

ra tsa nyaá caahán can, cuñi tsi tandihî ra tsa caahán ra tan cahan inga ñi. ³¹ Tan tacan tandihî nyooho tsa naquihín tuhun tsa tsahá Nyoo cuví nacatyí tuhun intuhun intuhun ndo, tyin tacan tan cutuhva tandihî nyooho tsa ndu iin vehe ñuhu tan ndu iin ca iñi ndo. ³² Nyooho tsa tsahá cuenda tsa caahán Nyoo, cuví cuatu nuu ndo nda cuanda ndihí cahan inga nyivi, ³³ tyin Nyoo ña cuñi ra tsa tavi tahan ña cahan ndo, tyin maa ra catsi iyó ra.

Quihín ndo cuhva iyó inga ca vehe ñuhu nu ndu iin nyivi yihí cuenda ra Cristo, ³⁴ tyin ñiñaha taxin ñi nyecú ñi tsitsi vehe ñuhu tyin tyaa yahvi ñi tsi yí ñi tumaa catyí ley Nyoo. Tan tacan taahán tucu tsi javaha nyooho. ³⁵ Tatun náa cuñi ñi coto ñi, na ndaca tuhun ñi tsi yí ñi nda yuvehe ñi, tyin ña vaha tsa cahan ñiñaha nu ndu iin ndo.

³⁶ Tatun siin cuhva tsicá iñi ndo, cuñi tsi nducuhún iñi ndo tyin ñavin nu yucú ndo quitsahá tuhun Nyoo. Tan ñavin nyooho ñi naquihín tuhun Nyoo. ³⁷ Tatun ndáa nyooho cuñi tyin ndusu yuhu Nyoo cuví ndo, o cuñi ndo tyin Tatyí li Nyoo jaquihín ityí tsi ndo, tun nditsa tsa cuví ndo yacan, cua nacoto ndo tyin tsa caahán yu tsihin ndo ihya, tsa tsahá maa Jutu Mañi yo tyin cuhva cuenda yu tsi ndo cuví. ³⁸ Maa tyin tatun ña cuñi ndo naquihín ndo tuhun ihya, ndi nyuhu tan ña cua naquihín ndi tuhun caahán nyooho.

³⁹ Tan tacan, yañi, nducu ndo cuhva cuhva cuenda ndo tuhun Nyoo tsi nyivi. Tan ña cási ndo nu cahan nyivi inga yuhu. ⁴⁰ Maa tyin javaha ndo tandihî tsihin tsa víi tan tsa catsi.

15

Nacaa nandotó ra Cristo

¹ Vityin yañi, cuñi yu tsa nducuhun iñi ndo tuhun ra Cristo, tsa jacacú tsi yo, tsa cahan yu tsihin ndo quivi can. Tan naquihín ndo itsi tan nñi iñi añaima ndo tsinú iñi ndo.

² Tan juven tsa cuenda tuhun ra Cristo cacú añaima ndo tun ndi tsinú iñi ndo cuhva jacuahá yu tsi ndo. Maa tyin tun ña tsinú ca iñi ndo cuhva jacuahá yu tsi ndo, nduve yahvi nyaá tsa natsinú iñi ndo tsi ra Cristo.

³ Tsa jihna ñi jacoto yu tuhun tsa jacuahá ra Cristo tsi yu tsi ndo. Tan catyí yu tyin tsihi ra tsacatyí cuatyí yo, tumaa catyí nu libru Nyoo tyin cua cuví. ⁴ Tan quihví cuñu ñuhu ra tsitsi ñuhu. Maa tyin tsinu uñi quivi nandotó ra tumaa catyí nu libru Nyoo. ⁵ Tan tsa yahá tan quituví ra nuu ra Pedro tan quituví ndihí ra nuu tandihî ra tsicá tyiñu ra.

⁶ Yahá can tan quituví ra nuu yaha ca uhun cientu nyivi yihí cuenda ra. Tan juhva ñi can tsa tsihi ñi, maa tyin ndi iyó cuaha ca ñi nda cuanda vityin. ⁷ Yahá can tan quituví ra nuu

ra Jacobo. Tacan tan quituvj ndihi ra nuu tandihi ra tsicá tyiñu ra.

⁸ Tan nu ndihi ña quituvj ndihi ra nuu yuhu, tsa cuví yu tumaa iin lee tsa cacu yutya. ⁹ Tyin tsa nuu tandihi ca ra tsicá tyiñu ra Cristo nduve yahvi nyaá yuhu. Tan ndi ña taahán tsi tsa cuví yu ra tsicá tyiñu ra tyin tsinyaa ndaha xaan yu tsi nyivi yihí cuenda ra. ¹⁰ Maa tyin Nyoo vaha iñi ra tsihin yu. Yacan cuenda tsahá ra ndatu tsa cuví yu ra tsicá tyiñu ra tan ña cuatu tsahá ra tyiñu tsi yu, tyin cuaha ca tyiñu javahá yu tsihin tsi tan ñavin ca tandihi ra naha. Maa tyin ñavin tsihin tunyee iñi maa yu javahá yu can tyin maa tunyee iñi Nyoo tsa iyó tsihin yu javahá can. ¹¹ Maa tyin nduve cuenda tun yuhu, a inga ra caahán tsihin ndo, tyin tuhun caahán ndi tsihin ndo, yacan cuví tuhun tsa tsinú iñi ndo.

Nu jacuahá ra Pablo tyin nditsa tsa cua nandoto ndiyi

¹² Tsa caahán ndi tsihin ndo yacan cuví tsa nandoto ra Cristo tsa yahá tsihi ra tan ¿Nacuenda yihí ndo catyí ndo tyin ña nandoto ndiyi? ¹³ Tyin tatun ña cua nandoto ndiyi, ndi ra Cristo tan ña nandoto ra quivi can. ¹⁴ Tun tsatyin ña nandoto ra Cristo, nduve yahvi nyaá tsa caahán ndi tsihin ndo. Tan ndi nduve yahvi nyaá tsa tsinú iñi ndo tsi ra. ¹⁵ Tan tun tsatyin ña nditsa tsa janandoto Nyoo tsi ra Cristo, cuví ndi iin ra vatya tyin catyí ndi tyin janandoto Nyoo tsi ra. Tan tatun ña nditsa tsa nandoto ndiyi, ña nditsa tsa janandoto Nyoo tsi ra Cristo. ¹⁶ Tyin tun ña cua nandoto ndiyi, ndi ra Cristo tan ña nandoto ra. ¹⁷ Tan tatun ña nandoto ra Cristo, ndi iyó cuatyí ndo, tan nduve yahvi nyaá tsinú iñi ndo tsa jahá ra tucahnu iñi cuatyí ndo. ¹⁸ Tan ndi nyivi tsa tsihi tsa yihí cuenda ra ña cacu ñi tun ña nditsa tsa nandoto ra. ¹⁹ O tun nu ñuhu ñayivi ihyá ñi jatyinyee ra tsi yo, tan ña cua quitsi ra inga tsaha, nduve yahvi nyaá tsinú iñi yo tan cuví yo nyivi soho ca tsa nuu tandihi ca nyivi.

²⁰ Maa tyin tsitó vaha yo tyin nditsa tsa nandoto ra Cristo. Tan juvin ra cuví ra tsa nandoto jihna ca tsitsi tsa tandihi ca ndiyi tsa cua nandoto. ²¹ Tyin tsacatyí cuatyí ra Adán tan tsicoq tuhun tsihi. Tan yacan tsihi nyivi nda cuenda vityin. Maa tyin tsa cuenda tsa nandoto ra Cristo cua nandoto tandihi nyivi yihí cuenda ra. ²² Tyin tumaa tsa tandihi yo tsihi tyin cuví yo tata ra Adán, tacan tucu cua nandoto tandihi yo tan coo yo ñayivi nyito tyin cuví yo nyivi ra Cristo. ²³ Maa tyin cua nandoto yo quivi taahán tsi tsi yo. Jihna ca ra Cristo nandoto. Tan quivi quitsi ra inga tsaha cua nandoto ñi yihí cuenda ra. ²⁴ Yaha can tan cua naa ñuhu ñayivi ihyá tan ña cua cundaca ñaha ca

ra cumí tyiñu naha ra, tan ndi nu tatyí ña vaha nahnu ña cua cundaca ñaha ca nahnu. Tyin ra Cristo cua quihin nyaa ra tunyee iñi tsa iyó tsi tandihi nahnu, tan cua nacuhva cuenda ra can tsi Nyoo Jutu ra. ²⁵ Tyin ra Cristo cua cundaca ñaha ra nda cuanda quivi cuhva Nyoo tsa cuví jaha canaa ra tsi tandihi nu xaan iñi tsi ra nahnu. ²⁶ Tan nu tsa cua janaa ra nu ndihi ña, nu ican cuví tuhun tsihi. ²⁷ Tyin tsa tsahá Nyoo tsa quihí ndaha ra tandihi maa tsa iyó. Maa tyin nu catyí tyin tandihi nacuhva cuenda Nyoo tsi ra Cristo, ña cuñí tsi catyí tyin quihí ndaha ndihi ra tsi maa Nyoo tyin maa Nyoo cuví ra tsahá tsa quihí ndaha ra tandihi maa tsa iyó. ²⁸ Maa tyin quivi jaha canaa ra Cristo tandihi can, tacan tan maa ra, tsa cuví ra Sehe Nyoo, cua nacuhva cuenda nyico ra tandihi tsa tsahá Nyoo tsi ra. Tyin tacan tan cundaca ñaha Nyoo tandihi maa tsa iyó.

²⁹ Tun tsatyin ña nandoto ndiyi, ¿nacuenta tyin juhva nyivi tsicoondutyá ñi tsa cuenda ndiyi? ¿Tan nacuenta javahá ñi tyehen tun ña tsinú iñi ñi tyin coo quivi cua nandoto ndiyi?

³⁰ Tan tacan tucu maa ndi, tun ña cua nandoto ndi, ¿nacuenta tyin ndoó ndi vaha tsa nyehé ndi tundoho ndihi quivi ñi? ³¹ Tandihí ñi quivi nducú nyivi tsi yu cahñi ñi, tan tsa nditsa cuví tsi, yañi, tumaa tsa nditsa tsa sií cuñí yu tsihin ndo, tsa cuenda tsa tsinú iñi ndo tsi Jutu Mañi yo Jesucristo. ³² Nduve náa catyí tsa nyehé yu tundoho tsa cuñi cahñi nyivi tsi yu ñuu Efeso tun ña cua nandoto yo. Tatun tacan, nditsa maa tsa caahán nyivi: “Catsi yo, coho yo tyin tyaan isa cua cúu yo”, catyí ñi tsa ña tsitó.

³³ Tan catyí tucu ñi tyin: “Tun cutahán yo tsihin nyivi caquiñi jatví ñi cuhva vaha iyó yo.” Tan tsehe cuví tsa nditsa. Yacan jaha ndo cuenda tsi ndo tan ña cuhva ndo tsa jandavi ñaha nyivi tsi ndo. ³⁴ Jaha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsitó ndo tsi Nyoo. Caahán yu tyehen tsihin ndo na nducahan nuu ndo.

Nu jacuahá ra Pablo nácaa cua janandoto Nyoo tsi yo quivi quitsi nyico ra Cristo

³⁵ Maa tyin yihí ndo cua ndaca tuhun ndo: “¿Nacaa cua nandoto ndiyi? ¿Nacaa cuñu ñuhu ñi cua cuví?” ³⁶ ¿Nacaa tsa soho xaan ndo? ¿A ña tsitó ndo tyin tatun tatsi yo iin tsiti, cuñi tsi tsa tyahyu jihna tsi? Tacan tan cana nuu tsi. ³⁷ Tyin tsa tatsi yo nuñi, ñavin tsa cuví maa tsi itu tan tatsi yo. Tyin nuñi cuví tsi tatsi yo tan tacan ñi cuñi tucu yo tsihin náa inga ca tsiti. ³⁸ Nyoo javahá ra nácaa cuñi maa ra tsihin tsa intuhun intuhun tsiti can, yacan cuenda tsa cana tsi cuví tsi tsa taahán maa tsi cuví tsi. Tan ña cuví nanduví tsi inga ca tsiti. ³⁹ Tan tacan

tandihí cuñu ñuhu, ña inducu caá tsi, tyin cuñu ñuhu nyivi, siin caá tsi, tan cuñu ñuhu quiti nahnu, siin caá tucu can, tan cuñu ñuhu saa, siin caá tucu yacan, tan tyaca siin caá tucu can. ⁴⁰ Tan tacan tucu tsa iyó andívi, siin caá tsi. Tan siin caá tucu tsa iyó nu ñuhu ñayivi ihya. Sií xaan caá tsa iyó nda andívi, tan siin tyaqui tucu tsa iyó nu ñuhu ñayivi ihya. ⁴¹ Tsa nditsin ñicanyii, tan tsa nditsin yoo ña inducu tsi. Tan ña inducu tsi tsihin tsa nditsin tiñuu. Tan tsa nditsin tiñuu ña inducu tsi tsihin inga nyico tiñuu. ⁴² Tan tacan tucu tuhun tsa cua nandoto ndívi. Tuhvá yo tsicutsí cuñu ñuhu tan tyaahyú tsi. Maa tyin tsa cua nandoto yo ña cua cúu ca yo. ⁴³ Cuñu ñuhu tsa iyó tsi yo vityin nduve tunyee iñi iyó tsi can, nacuhví can, tan tsihi can. Maa tyin cua nandoto iin tsa sií caá tan iyó ca tunyee iñi tan ña cua cúu ca can. ⁴⁴ Tsa tsihi yo tsicutsí yo cuñu ñuhu tsa naquihin yo nu ñuhu ñayivi ihya. Maa tyin tsa cua nandoto yo cua cuhva Nyoo inga cuñu ñuhu tsi yo. Iyó cuñu ñuhu cuenda nu ñuhu ñayivi. Tan iyó tucu cuñu ñuhu cuenda gloria.

⁴⁵ Catyí tutu Nyoo tyin ra Adán ra tsa tsicoq tsa jihna ñi, tsahá Nyoo ñayivi coo ra. Tan ra Cristo cuví ra tumaa ra Adán maa tyin ñavin cuñu ñuhu tsahá ra tsi yo tyin tsahá ra ñayivi nyito coo yo, tyin juven ra cuví Tatyí Ií. ⁴⁶ Tsa jihna ñi taahán tsi coo yo tsihin cuñu ñuhu cuatyí yo, yaha can tan coo yo cuenda Tatyí Ií Nyoo. ⁴⁷ Rayii tsa tsinu tsa jihna ñi, tsihin nyaca ñuhu tsinu ra. Tan cuví ra cuenda ñuhu ñayivi. Maa tyin ra Cristo cuví ra tumaa rayii tsa tsinu uví tan cuví ra cuenda gloria. ⁴⁸ Tandihí yo iyó cuñu ñuhu yo tumaa tsicoq cuñu ñuhu ra Adán tsa tsinu tsihin nyaca ñuhu. Maa tyin tsa cua nandoto yo cuñu ñuhu yo cua nanduvi tsi tumaa cuñu ñuhu ra Cristo ra iyó nda andívi. ⁴⁹ Tumaa ndacu yo tsi rayii, ra tsa tsinu tsihin nyaca ñuhu, tacan tucu cua ndacu yo tsi ra Cristo ra iyó nda gloria.

⁵⁰ Tan cuñí yu cahan yu tsihin ndo, yañi, tyin cuñu ñuhu yo ña cuví quihvi tsi nu ndacá ñaha Nyoo, tyin iin tsa yatyi tiví ña cuví quihvi can nu yihí tsa ña tuhvá tiví. ⁵¹ Tan cuñí tucu yu tsa coto ndo iin tsa xeehe tsa yofi maa tsitó. Ña tandihí yo cua cúu, maa tyin tandihí yo tan cua nasama cuhva caá yo. ⁵² Tan nu cua ndihí tiví ángel trompeta, cua nandoto ndívi iin yaha cuíi ñi tumaa tsa ndaahvá tinuu yo. Tyin cua tiví ra trompeta tan cua nandoto nyivi tsihi tsa ña cua cúu ca maa. Tan Nyoo cua nasama ra cuhva caá yo tun ndi iyó ca yo. ⁵³ Tyin cuñí tsi tsa nasama Nyoo cuñu ñuhu yo tsihin iin tsa ña cua naa maa. ⁵⁴ Tan quívi cua nasama cuñu ñuhu yo tan cua ñihí yo iin tsa ña cua tiví maa, cua cundaa tsa caahán tuhun Nyoo nu catyí tsi tyehen:

“Nyoo jahá canaa ra tsi tuhun tsihi.”

⁵⁵ Yooho, Tuhun Tsihi, ¿náa tunyee iñi tsa tsicoq tsi un tyin cahíi un tsi ndi?

¿Náa jahá canaa un, yooho Tuhun Tsihi?

⁵⁶ Tyin cuatyí yo tsahá can tsa cahíi tuhun tsihi tsi yo, tyin ley tsahnu tsahá tunyee iñi tsi can. ⁵⁷ Maa tyin tyahví nyoo tsi Nyoo, yañi, tyin jaquitsí ra tsi Jutu Mañi yo Jesucristo tan tsahá ra tunyee iñi tsi yo tsa jahá canaa yo tsi nu tuhun tsihi can.

⁵⁸ Yacan cuenda yañi, cunyaa naa vaha ndo tsi Nyoo tsihin tsa ñi iñi añima ndo. Tan jañihí ca ndo jahá tyiñu ndo tyiñu Jutu Mañi yo. Tyin tun jahá tyiñu yo tyiñu Jutu Mañi yo, ña jahá tyiñu cuatu yo.

16

Nu tsahá cuenda ra Pablo tsi nyivi nácaa taahán tsi jatinyee ñi tsi inga ñi yihí cuenda Nyoo

¹ Tan tuhun tsa jatinyeeé ndo xuhun tsi nyivi ndaahvi, ñi yihí cuenda Nyoo, javaha ndo tumaa tsahá cuenda yu tsi nyivi tsicá vehe ñuhu ñuu tsa cayucú Galacia. ² Jandu iin ndo xuhun tsa taahán tsi cuhva ndo tsi ñi tahan tahan una quívi nácaa tsahá maa Nyoo tsi ndo. Tan ña cuatu ndo nda tsaa yu. ³ Tan nacatsi ndo ndáa ra cuñí maa ndo tyin cundaca xuhun can. Tan tsa tsaa yu, cua javaha yu iin carta tyin cundaha ndihí ra naha tan jacuhun yu tsi ra naha tyin cundaca ra naha can tsi ñi tsicá vehe ñuhu Jerusalén. ⁴ Tan tatun tahan tucu tsi tsa cuhun yu, cuhun ra naha tsihin yu.

Nu caahán ra Pablo ndáa ndihí nu cua cahan ra tuhun ra Cristo

⁵ Tsa cua quitsi yu nu yucú ndo ñuu Corinto, cua yaha yu ityi Macedonia. ⁶ Tatun cuhva tsi cuhva cua ndoo yu tsihin ndo nda cuanda yaha yoo vitsin, tacan tan cuví jatinyeeé ndo luxu tsi yu tan cuhun yu inga ñuu. ⁷ Ña iin yaha ñi cua yaha yu nu yucú ndo tyin cuñí yu ndoo yu juhva quívi tsihin ndo tatun Jutu Mañi yo tan cuñí ra. ⁸ Maa tyin cua cunyí yu ñuu Éfeso ihya nda cuanda yaha quívi vico Pentecostés tsa jacahnú nyivi Israel. Tacan tan cua quitsi yu nu yucú ndo. ⁹ Cua ndoo yu juhva quívi ihya tyin tsahá xaan tsi cuhva caahán yu tuhun Nyoo tsihin nyivi vasu ndi maa cuaha ñi ña taahán iñi ñi tuhun ra.

¹⁰ Tatun tsaa ra Timoteo nu yucú ndo, na cunyí ra tsihin ndo. Tan vaha tyanuu ndo tsi ra tyin juven ñi tyiñu Jutu Mañi yo jahá tyiñu ra tumaa maa yu. ¹¹ Tan vaha cuñi ndo nyehé ndo tsi ra. Tan jatinyeeé ndo tsi ra na quitsi ra nu nyíi yu tyin ndatú yu tsi ra tsihin inga ca ra yañi yo naha ra.

¹² Tan ra Apolos yañi yo, cahan ndaahvi xaan yu tsihin ra na quitsi ra nu yucú ndo

tsihin inga ca ra yañi yo naha ra. Maa tyin ña cuñi ra quitsi ra. Catyí ra tyin quitsi maa ra nda cuhva tsi cuhva tsi ra.

Nu tsahá ra Pablo nacumi tsi tandihi nyivi yihí cuenda Nyoo ñuu Corinto

¹³ Jañihi ca ndo tsinú iñi ndo tsi Nyoo. Tan jandu iin ca ndo iñi ndo, tan na coo ca tunyee iñi Nyoo tsi ndo. ¹⁴ Tandihí tsa javahá ndo, javaha ndo tsa cuenda tsa cuñi ndo tsi Nyoo tan tsi nyivi yihí cuenda ra.

¹⁵ Yañi, tsitó ndo tyin jihna ca nyivi ra Estéfanos natsinú iñi tsi ra Cristo ityi Acaya nu yucú ndo. Tan vityin javahá ñi tyiñu nuu ra hermano. ¹⁶ Tan cuñi yu tsa jaha ndo tsa ñayivi tsi nyivi tsa iyó tumaa iyó nyivi ra Estéfanos, tan tsi tandihí ca ñi tsa jatyinyeé tan jahá tyiñu cuenda Nyoo. ¹⁷ Tan sii xaan cuñi yu tyin quitsi ra Estéfanos, ra Fortunato, tan ra Acaico. Tan jatyinyeé ra naha tsi yu tyin nyooho ña cuví quitsi ndo tyin cañi xaan ñuu ndo. ¹⁸ Maa tyin maa ra naha quitsi ra naha. Tan jandunyeé ca ra naha iñi yu tsihin tuhun Nyoo, tumaa tsa jandunyeé tucu ra naha iñi nyooho. Tan vaha cuñi ndo nyehé ndo tyiñu jahá ra naha tyin iin ñi tsi maa Nyoo nyicún ra naha.

¹⁹ Tan vatsí nacumi tsi ndo jahá tandihí nyivi yihí cuenda Nyoo ñuu tsa cayucú Asia ihya. Tan vatsí tucu nacumi tsi ndo jahá ra Aquila tan ña Priscila, tan ñi yihí cuenda Nyoo tsa ndu iin yuvehe ñi. ²⁰ Vatsí nacumi tsi ndo jahá tandihí ra yañi yo, tan cuhva ndo nacumi tsi tsa intuhun intuhun ndo nu yucú ndo juven.

²¹ Tan yuhu ra Pablo tsahá yu nacumi tsi ndo tan tyaa yu itsi tsihin ndaha yu.

²² Tatun ndáa nyivi ña cuñi tsi Jutu Mañi yo Jesucristo, na cuhun ñi anyaya. Maa tyin yuhu catyí yu: ¡Jutu Mañi yu, naha!

²³ Tan na nasoco Jutu Mañi yo Jesucristo tsi tandihí ndo. ²⁴ Tan catyí yu tsihin ndo tyin yuhu cuñi yu tsi tandihí ndo tsa cuenda ra Cristo Jesús.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Corinto

*Nu tyaá ra Pablo iin carta cuenda nyivi
yihí cuenda Nyoo ñuu Corinto*

¹ Yuhu ra Pablo, cuví yu iin ra tava tyiñu ra Cristo Jesús tyin maa Nyoo nacatsi tsi yu. Yuhu tan ra Timoteo, yañi yo, jaquitsi ndi carta ihya tsi ndo tsa cuví ndo nyivi yihí cuenda Nyoo tsa iyó ñuu Corinto tsa canyii Acaya, tan tsi tandihi ca nyivi yihí cuenda Nyoo tsa iyó inga ñuu tsa cayucú nanii cahnú Acaya. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo aña ndo.

*Nu nyehé xaan ra Pablo tundoho nu tsicá
ra caahán ra tuhun ra Cristo*

³ Na jacahnú yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahví xaan iñi ra nyehé ra tsi yo. Tan jandusií ra iñi yo tandihi ñi tsaha. ⁴ Nyuhu nyehé xaan ndi tundoho maa tyin maa ra jandusií iñi ndi. Tyin tacan tan cuví jandusií ndi iñi nyivi nyehé tundoho tumaa jandusií maa ra iñi ndi. ⁵ Tyin nyehé ndi tundoho tsa cuenda ra Cristo, tan juvin ñi tsa cuenda ra jandusií Nyoo iñi ndi. ⁶ Yacan cuenda tatun nyehé ndi tundoho tsa cuenda tsa jacotó ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusií Nyoo iñi ndo, tan jacacu ra tsi ndo. Tatun jandunyeé Nyoo iñi ndi, javahá ra tacan tyin tacan tan ndunyeé tucu iñi nyooho tan jacacú ra tsi ndo tan cuví cunyeé iñi ndo nyehé ndo tahan tundoho nyehé ndi. ⁷ Tyin tsitó vaha ndi tyin jandusií ra iñi ndo tyin nyehé ndo tundoho tsa cuenda ra Cristo tumaa tsa nyehé tucu nyuhu tundoho.

⁸ Yañi, cuñí ndi tsa coto ndo tyin cuaha xaan tundoho nyehé ndi tsa tsiyucú ndi ñuhu Asia. Nihí xaan nducú cuhva nu ña vaha tsi ndi tan tsicá iñi ndi tyin ña cua cunyeé maa iñi ndi cuyucu ndi ican. Tan cuñi maa ndi tyin cua cúu ndi tsa ndi cumañi ca quita ndi ican. ⁹ Tsa nyehé ndi tyin tsa cuñi cúu ndi tan ña cuví jacacu ndi tsi ndi tsihin tunyee iñi maa ndi. Tacan tan cutuñi iñi ndi tyin cuñi tsi tsa cuita ca iñi ndi tsi Nyoo, ra janandotó ndiyi, tan ña cuita iñi ndi tsi maa ndi. ¹⁰ Nyoo jacacú tsi ndi quívi can, tan juvin ra jacacú tsi ndi nda cuenda vityin. Tan tsitó ndi tyin tacan ñi maa cua jacacu ra tsi ndi, ¹¹ tun nyooho tan ña jandihí ndo tsa

jatyinyee ndo tsi ndi tsihin tsa tsicán tahvi ndo tsi ra tsa cuenda ndi. Tyin tatun cuaha nyivi tsicán tahvi tsa cuenda ndi, tsa cua ñihi tuhun ñi tyin tsahá xaan Nyoo tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

*Nu caahán ra Pablo nacuenda ña tsahán
ra ñuu Corinto*

¹² Iyó iin tuhun tsa tsahá tsa sii xaan cuñí ndi tan tuhun ihya cuví tsa cuiti iyó ndi, tan ndaa iyó ndi tsihin tandihí nyooho, tan tsihin tucu inga ca nyivi. Maa tyin ñavin tsihin tsa tsiñi tuñi maa ndi iyó ndi tacan, iyó ndi tacan tsa cuenda tyin maa Nyoo tsahá tsa vaha tsa iyó tsi ra tsi ndi. ¹³⁻¹⁴ Nu tutu tsa tsa yaha jaquitsi ndi tsi ndo, tyaa ndi maa ñi maa tuhun tsa cuví cahvi ndo tan cuví cutuñi iñi ndo. Vityin tsa tsa cutuñi iñi ndo juhva. Tan cuñí ndi tsa cutuñi vaha ca iñi ndo tandihí tuhun can tyin tacan tan sii cua cuñi ndo tsihin ndi quívi quitsi Jutu Mañi yo Jesucristo. Tan sii cua cuñi tucu nyuhu tsihin nyooho.

¹⁵⁻¹⁶ Tsa cuenda tsa tsitó vaha yu tyin tacan cua cuví: tyaa yu cuhva tyin tsa cua cuhun yu Macedonia tan cua yaha jihna yu nu yucú ndo. Tan quitsi nyico yu nu yucú ndo tsa yaha cuhun yu Macedonia tyin tacan tan cuví cusii iñi ndo. Tan tsicá tucu iñi yu tyin yaha can tan cuví jatyinyee ca ndo tsi yu tan cuhun yu Judea. Tyehen tyaa yu cuhva javaha yu, maa tyin ña cuví. ¹⁷ ¿A cuñí maa ndo tyin ña tyaa yu cuhva quitsi yu nu yucú ndo? Ñavin. Tyin yuhu ña javahá yu tumaa javahá nyivi tuhvá jandaví ñaha. Catyi ñi tyin vaha, maa tyin tsitsi aña ñi catyi ñi tyin ña vaha. Caahán ñi nduvi tuhun can tsa iin ñi cuhva. ¹⁸ Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandaví ñaha yu. ¹⁹ Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyivi can caahán; maa ñi maa tsa nditsa caahán ra. ²⁰ Tan tsa cuenda ra ñihi yo tandihí tsa vaha tsa catyi Nyoo tyin cuhva ra tsi yo. Yacan cuenda tsa jacahnú yo tsi Nyoo, catyi yo tyehen: “Na cuví tsi tacan”. Tyin tsitó yo tyin tsahá ra tsa vaha tsi yo tsa cuenda ra Cristo. ²¹ Nyoo cuví ra tsahá tunyee iñi tsi nyuhu tsa cuenda ra Cristo, tan tsahá ndihí tucu ra tunyee iñi tsi nyooho. Nacatsi ra tsi yo, ²² tan tsahá ra Tatyí li ra coo aña yo, tan cuví tsi tumaa iin tuñi tsa tyaa ra tsi yo tan janahá tsi tsi yo tyin cua ñihi yo tsa cua cuhva ra tsi yo.

²³ Ñaha ca maa quitsi nyico yu nu yucú ndo, tyin ña cuñí yu janducuihaya yu iñi ndo. Tsitó maa Nyoo tyin nditsa tsa caahán yu. Tan tatun ña nditsa yu, na nyehe maa Nyoo náa cuñi ra tsihin yu. ²⁴ Caahán ndi

tandihi tuhun ihya tsihin ndo tsa cuenda tsa cuñi ndi jatinyee tahan yo tsi yo tan coo ca tusi iñi Nyoo tsi ndo. Na cuñi ndi quihi ndaha ndi tsi ndo tyin nyoocho tsa tsinu vaha maa iñi ndo tsi Nyoo.

2

¹ Yacan cuenda ña cuñi yu quitsi yu tyin tacan tan ña cuhva ca yu tucuihya iñi tsi ndo. ² Tyin tatun yuhu tan janducuihyá yu iñi ndo, yofi cua jandusi iñi tsi maa yu. Tyin nyoocho ña cuvi ca jandusi ndo iñi yu tun tsa yaha janducuihyá yu iñi ndo. ³ Yacan cuenda carta ñi jaquitsi yu tsi ndo. Na cuñi yu quitsi yu tyin ña cuñi yu janducuihya ndo iñi yu tsihin cuhva iyó ndo. Tyin taahan tsi jandusi ndo iñi yu. Tyin tatun si cuñi yuhu, tsitó yu tyin tandihi yo tan si cuñi yo. ⁴ Quivi tsa tyaa yu carta can tsa cuenda ndo, tsicá xaan iñi yu. Cuihya xaan cuñi yu tan nda cuanda tsacu yu. Jaquitsi yu carta can tsi ndo maa tyin ñavin tsa cuenda tsa janducuihya yu iñi ndo. Jaquitsi yu can tsa cuenda tsa cuñi yu tsa coto ndo tyin cuñi xaan yu tsi ndo.

Nu tsahá cuenda ra Pablo tsi nyivi nácaa taahan tsi jaha ñi tucahnu iñi

⁵ Ra tsa tsahá tucuihya iñi, ñavin yuhu ñi janducuihyá ra iñi. Tyin janducuihyá tucu ra luxu iñi nyoocho. Caahan yu tyehen tyin tacan tan ña cuñi ndo tyin ña cuvi coo tucahnu iñi tsi ra javahá tacan. ⁶ Tsa iyó vaha ñi. Na cahan ca ndo tsi ra can. Na tatsi tuñi ca ndo tsi ra. ⁷ Vityin taahan tsi jaha ndo tucahnu iñi tsi ra tan naquihin ndaahvi ndo tsi ra, tyin tacan tan ña cuihya xaan ca cuñi ra. ⁸ Yacan cuenda cuñi yu tsa cahan ndo tsihin ra tan janaha ndo tsi ra tyin ndi cuñi ndo tsi ra. ⁹ Jaquitsi yu carta can tsi ndo quivi can tyin cuñi yu coto yu tatun cua tyaa yahvi ndo tsa tsahá cuenda yu tsi ndo. ¹⁰ Tan vityin nyivi tsa jahá nyoocho tucahnu iñi, jahá tucu yuhu tucahnu iñi tsi ñi. Tatun iyó ñi tsa taahan tsi jaha yo tucahnu iñi, jahá yu tucahnu iñi tsi ñi tsa cuenda tsa vaha tsi maa ndo. Tacan javahá yu nuu ra Cristo. ¹¹ Tyin tacan tan ña cuvi jaha canaa nu ña vaha tsi yo. Tyin tsitó vaha yo nácaa cuñi nu jandavi ñaha nu tsi yo.

Ra Pablo ña ndoo ra ñuu Troas tyin ña nañihí ra tsi ra Tito

¹² Quivi tsaa yu ñuu Troas tsa cua cahan yu tuhun tsa jacacú ra Cristo tsi yo, tsahá xaan tsi cuhva tsi yu tsa jahá tyiñu yu tyiñu Jutu Mañi yo. ¹³ Maa tyin tuñu xaan cuñi yu, tyin ña nañihí yu tsi ra Tito, yañi yo. Yacan cuenda vatsi yu ityi Macedonia ihya tan ña ndoo yu ndacan cahan yu tsihin nyivi.

Nu caahan ra Pablo tuhun ra Cristo tsihin tsa ñi iñi añima ra

¹⁴ Maa tyin tyahvi nyoo tsi Nyoo tyin tacan ñi jahá canaa yo tsihin tunyee iñi ra Cristo Jesús tan tsahá ra tsa caahan ndi tuhun ra tsihin nyivi. Tan tuhun ra tsa caahan ndi, cuvi tsi tumaa iin xico tami tsa caná tandihi ñi ityi nu cuahan ndi. ¹⁵ Tyin nyuhu cuvi ndi tumaa xico tami ra Cristo tsa cuenda Nyoo. Tan tandihi ñi ityi cuahan ndi tan ñihí nyivi xico tami can, tahan ñi nyivi tsa cua cacu tan ñi tsa ña cua cacu. ¹⁶ Maa tyin tsa cuenda nyivi tsa ña cua cacu, ndasi caná tsi, tan cuñi maa ñi tyin tuhun tsa jacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinu iñi ñi tsi ra Cristo. Maa tyin tsa cuenda nyivi tsa cua cacú, tami xaan tsi, tyin jacotó ndi nácaa cua coo ñi ñayivi tsa ña cua naa maa. Maa tyin *zyó* cuvi jaha tyiñu tyiñu ihya? ¹⁷ Nyuhu ña javahá ndi tumaa javahá ra tsicá nuu cuaha naha ra. Ra ican naha ra cuñi ra naha xuhun. Maa tyin ña taahan tsi xico yo tuhun ra Cristo. Nyuhu caahan ndi tuhun ra tsihin tsa ñi iñi añima ndi tyin iin ñi cuvi ndi tsihin ra tan maa Nyoo tava tyiñu tsi ndi tsa cahan ndi tyin cuenda ra Cristo yihí ndi.

3

Tuhun tsaa tsa ndoo ra Cristo tsihin yo

¹ Tsa caahan ndi tuhun ihya, ¿a cuñi maa ndo tyin caahan ndi tacan tsa cuñi ndi nduyaa ndi? Ñavin, ¿a cuñi tsi cuhva ndi iin carta tsa catyi tyin vaha nyivi cuvi ndi? ¿o cuñi tsi ndacan ndi carta tsi ndo tumaa javahá juhva nyivi? ² Na cuñi tsi. Tyin tsa tyaa Nyoo tsi ndo añima ndi, tan maa ndo cuvi carta tsa cuenda ndi. Yacan cuenda ña tsiñi ñuhu ca carta tsi ndi. Tyin tsihin tsa nyehé nyivi nácaa nasama Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo. ³ Tan catsi nyehé ñi tyin cuvi ndo carta tsa tyaa ra Cristo tsa cuenda ñi, tan nyuhu nacuhva cuenda ndi carta can tsi ñi. Tan ña tyaa ra Cristo itsi tsihin tyinta maa tyin tyaa ra itsi tsitsi añima ndo tsihin Tatyí Ii Nyoo nyito. Tan ñavin nu yuu tsinyaa tsi.

⁴ Caahan ndi tyehen tyin tsitó vaha ndi tyin Nyoo cua cuhva ra tsa quita vaha tyiñu javahá ndi, tyin jatinyee ra Cristo tsi ndi.

⁵ Na cana iñi ndi caca iñi ndi tyin javahá ndi náa javahá ndi tsihin tunyee iñi maa ndi. Tyin tsitó ndi tyin tandihi tsa javahá ndi tan maa Nyoo javahá can. ⁶ Tan tsahá ra tunyee iñi tsi ndi tsa cahan ndi tuhun ra Cristo, tan tuhun ihya cuvi tuhun tsaa tsa tsahá ñayivi tsaa coo yo tyin iyó Tatyí Ii ra añima yo. Ley tsa tsahá Nyoo tsi ra Moisés ña tsahá tsi ñayivi tsaa coo yo tyin janahá ñi tsi tsi yo tyin iyó cuatyí yo tan taahan tsi cúu yo.

⁷ Ley tsahnu can tsinyaa nu yuu tsihin letra, tan cahnu xaan cuví tsi. Yacan cuenda tsa tsaa ra Moisés tsihin tsi nu yucú nyívi Israel, nayuhví xaan ní nyehe ní nuu ra tyin xiñu xaan nuu ra cuví. Maa tyin tsindihí tsa xiñu can. Tatun tacan cuví quítsi ley tsa tsahá tuhun tsihi, ⁸ iyaha ca cahnu cuví tuhun tsa ndoó Nyoo tsihin yo tsa tsahá Tatyí lí ra tsi yo! ⁹ Tatun cahnu cuví ley tsahnu tsa jacuhún tsi yo anyaya, yaha ca cahnu cuví tuhun tsaa tsa ndoó Nyoo tsihin yo tyin janduvahá tsi tsi yo nuu ra. ¹⁰ Ndisa tyin cahnu cuví ley tsahnu can. Maa tyin vityin tsító yo tyin yaha ca cahnu cuví tuhun ra Cristo tsa jacacú tsi yo nuu Nyoo. ¹¹ Tyin tatun cahnu cuví tsa tsicog juhva ní tyembu, yaha ca cahnu cuví tsa ní cua cundihi maa.

¹² Tsító vaha ndi tyin ní cua cundihi tsi. Yacan cuenda caahán ndi tsihin tsa ní iñi añima ndi. Na cahan nuu ndi tan ní yuuhví ndi caahán ndi. ¹³ Tan ní javahá ndi tumaa javahá ra Moisés. Tyin ra Moisés tyasi ra nuu ra tsihin jahma, tyin tacan tan ní nyehe nyívi Israel nu cua naa tsa xiñu nuu ra. ¹⁴ Quívi can ní cutuñi iñi ní. Nda cuenda vityin tan ní cutuñi iñi ní. Tyin tacan cahví ní ley tsahnu ní cutuñi iñi ní itsi tyin ndasí tsa tsiñi tuñi jñi ní tumaa tsindasi nuu ra Moisés quívi can. Yoñi maa cuví jatsiyo yacan tyin intuhun ní maa ra Cristo cuví jatsiyo can. ¹⁵ Nda cuenda vityin tan ní cutuñi iñi ní ley tsa tyaa ra Moisés tun cahví ní itsi. Tyin ndasí tsa tsiñi tuñi iñi ní. ¹⁶ Maa tyin tatun nacuhva cuenda ní tsi ní tsi Jutu Mañi yo, maa ra cua nuña tsa tsiñi tuñi iñi ní. ¹⁷ Tyin Jutu Mañi yo, Tatyí lí cuví ra. Tan tatun iyó Tatyí lí Jutu Mañi yo añima yo, tsító yo tyin ní yihí ndaha ca ley tsahnu tsi yo. ¹⁸ Yacan cuenda tandihí yo tan ní ndasí ca nuu yo. Tan vityin cuví yo tumaa inu, tyin cuví nyehe nyívi tsa cahnu cuví Jutu Mañi yo jahá yo. Tan cuahán nduvahá ca yo jahá Tatyí lí ra.

4

¹ Nyoo nyehe ndaahvi ra tsi ndi, tan tava tyiñu ra tsi ndi tsa cahan ndi tuhun ra tsihin nyívi yacan cuenda ní ndu uví iñi ndi. ² Tandihí tsa javahá ndi, ní tuhvá ndi javahá xeehe itsi, tan ndi ní javaha ndi tsa tsahá ticanuu. Ní tsicá nuu ndi jandaví ñaha ndi tsi nyívi. Maa ní maa tuhun Nyoo jacuahá ndi. Ní sacá nuu ndi tuhun Nyoo tsihin inga ca tuhun. Tan caahán ndaahvi ndi tsihin tandihí ní nyívi, na jaha vaha ní cuenda tyin tandihí tsa caahán ndi, tan nda maa nuu Nyoo javahá ndi, tan maa ní maa tsa nditsa cuví tsi. ³ Nyuhu ní tyihí xeehe ndi tuhun Nyoo. Maa tyin yihí xeehe tsi tsa cuenda nyívi ndasí tsa tsiñi tuñi iñi, ní tsa cua cunaa. ⁴ Nu ní vaha, nu ndacá ñaha tsi nyívi iyó nu

ñuhu ñayívi ihya, juvin nu tyasí tsa tsiñi tuñi iñi ní, tyin tacan tan ní tsinu iñi ní tsi Nyoo, tan ní nyehe ní tsa nditsin ra, tan ní cutuñi iñi ní nácaa jacacú ra Cristo tsi yo, ra iin ní cuví tsihin Nyoo. ⁵ Ñavin tuhun maa ndi caahán ndi. Tyin tuhun ra Jesucristo caahán ndi tsihin nyívi tyin juvin ra cuví Jutu Mañi yo. Tan nyuhu musu ní ndo cuví ndi tyin cuñi ndi tsi ra. ⁶ Nyoo catyí tyin ndunditsin nu naa quívi tsinu ñuhu ñayívi. Tan juvin ní ra jandunditsin tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnu cuví ra tsa nduxiñú nuu ra Cristo.

Iyó yo ñayívi tsaa tsihin tsa tsinú iñi yo tsi Nyoo

⁷ Tsa cuca Nyoo, tsa cuví tunyee iñi cahnu ra, yihí tsi tsitsi cuñu ñuhu yo tan nasamá tsi cuhva iyó yo tyin cuví yo tumaa quívi ñuhu tan naquihín yo itsi. Juvin tsi janahá tsi nyívi tyin maa Nyoo tsahá tunyee iñi ra tsi yo tan ñavin tunyee iñi maa yo cuví tsi. ⁸ Yacan cuenda vasu ndi maa nyehe xaan ndi tundoho tandihí ní nu cuahán ndi, ní ndu uví iñi ndi. Yihí tsaha ní tsító ndi nácaa quita ndi nu tundoho nyehe ndi, maa tyin nyitá iñi ndi tyin cua quita vaha ndi. ⁹ Vasu ndi maa nyaá ndaha nyívi tsi ndi, maa tyin ní nacoo iñi Nyoo tsi ndi, tacan ní iyó maa ra tsihin ndi. Nduvá iñi ndi jahá nyívi, maa tyin ní tsihi ndi. ¹⁰ Tandihí ní nu cuahán ndi tan nyicún tuhun tsihi tsi ndi tsa cuenda tsa caahán ndi tuhun ra Jesús. Tyin tacan tan nyehe nyívi tyin iyó ndi ñayívi ra. ¹¹ Tsitsi tsa ndi iyó ndi nu ñuhu ñayívi ihya tandihí ní quívi tan ndatú ndi tuhun tsihi tyin tandihí ní quívi tan nducú nyívi cahví ní tsi ndi tsa cuenda ra Cristo. Tan tsihin tsa taahán ndi janahá tyin iyó ñayívi ra añima ndi. ¹² Yacan cuenda nyuhu tandihí ní tsaha nyicún tuhun tsihi tsi ndi tyin caahán ndi tuhun ra Cristo tsihin nyívi. Maa tyin nyoocho, iyó ndo ñayívi ra Cristo tsa cuenda tuhun ra tsa cahan ndi tsihin ndo.

¹³ Tsinú iñi ndi tsi Nyoo tumaa tsinu iñi ra David tsi ra. Tumaa catyí ra nu libru Salmos: “Tsinú iñi yu tsi Nyoo, yacan cuenda caahán yu tuhun ra”. Tacan tucu nyuhu; tsinú iñi ndi tsi Nyoo, yacan cuenda caahán ndi tuhun ra. ¹⁴ Tyin tsító ndi tyin Nyoo, ra janandotó tsi Jutu Mañi yo Jesucristo, cua janandoto ndihí ra tsi ndi. Tan cua ndu iin ndo tsihin ndi, tsahan cua cundaca ra tsi yo iin caa ní nda gloria. ¹⁵ Tandihí tuhun ihya cuví tsa cuenda tsa vaha tsi nyoocho tan tsa vaha tsi cuaha ca nyívi. Tyin tun cuaha ndo naquihín tsa vaha Nyoo, cuaha xaan ndo cua nacuhva tyahví nyoo tsi ra, tan cua jacahnu ndo tsi ra.

¹⁶ Yacan cuenda ní ndu uví maa iñi ndi, vasu ndi maa cuahán ndutsahnú cuñu ñuhu

ndi, tyin ñayivi tsaa tsa iyó ndi ndutsaa tsi tan iin tan iin quivi. ¹⁷ Tundoho tsa nyehé ndi nu ñuhu ñayivi ihya, tsa yahá ñi maa cuví tsi. Tan tsahá tsi tsa coo cuii ndi tsihin Nyoo nda gloria. ¹⁸ Yacan cuenda ña tyaá iñi ndi tsa cuví nyehé yo. Tyin nyitá iñi ndi tsa ña cuví nyehé yo. Tyin tsa cuví nyehé yo juhva cuii ñi tyembu tsicoó can. Maa tyin tsa ña cuví nyehé yo, ña cua cundihi maa tsa iyó tsi.

5

¹ Tsitó yo tyin quivi cúu yo, cua tyahyu cuñu ñuhu yo. Tyin cuví tsi tumaa iin vehe tsa tañi ñi tsicoó. Maa tyin Nyoo cumí vaha ra inga cuñu ñuhu tsa ña cua cundihi maa tsa cuenda intuhun intuhun yo. Tan ican cua cuyucu añaima yo. Iyó can nda gloria tan ñavin ra ñuhu ñayivi ihya javahá can. ² Nditsa tyin tsitsi tsa ndi iyó yo tsitsi cuñu ñuhu yo, caahán yuhu yo tyin tsa cuñi yo cuhun yo coo yo tsitsi cuñu ñuhu vaha tsa cua cuhva Nyoo tsi yo. ³ Cuhun añaima yo tsitsi tsa tsahá Nyoo. Tan cua cunditsi yo itsi tumaa nditsi yo jahma tyin tacan tan ña cua cutandii añaima yo. ⁴ Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñi yo. Maa tyin ña ndaahvi cuñi yo tsa cuenda tsa cuñi yo quita añaima yo tsitsi cuñu ñuhu yo tan cutandii tsi. Ndaahvi cuñi yo tsa cuenda tsa cuñi yo coo añaima yo tsitsi tsa ña cua cundihi maa, tyin tacan tan coo cuii yo. Tan cua cundihi tsa tañi ñi tsicog jaha tsa ña cua cundihi maa. ⁵ Tan Nyoo tyaq ra cuhva tyin tacan cua javaha ra tsihin yo. Tan tsahá jhna ñi ra Tatyí lí ra tsi yo tyin tacan tan cuita iñi yo tyin cua cuhva ra tandihi ca tsa cua cuhva ra tsi yo.

⁶ Yacan cuenda nyitá iñi ndi tsi Nyoo tsihin tsa ñi iñi añaima ndi tsa nducuhún iñi ndi tyin tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria. ⁷ Vasu ndi maa ña cuví nyehé yo tsi ra, maa tyin iyó yo nu ñuhu ñayivi ihya tsihin tsa tsinú iñi yo tsi ra. ⁸ Nyitá iñi ndi tsi ra tan cuñi ndi quita ndi tsitsi cuñu ñuhu ihya tan cuhun ndi coo ndi tsihin Jutu Mañi yo. ⁹ Yacan cuenda tsitsi tsa ndi iyó ndi tsihin cuñu ñuhu ihya, jañihí ca ndi nducú ndi cuhva javahá ndi tsa taahán iñi Jutu Mañi yo tan tacan ñi maa vasu nduve ca ndi tyin tsa cuahán ndi tsihin Jutu Mañi yo nda gloria. ¹⁰ Tyin tandihi yo tan cua cuhun yo nu nyaá ra Cristo nu cua jacutuñi ra tsi yo. Tan cua nacuhva cuenda intuhun intuhun yo nácaa tsa vaha a tsa ña vaha tsa javahá yo quivi tsicog yo tsitsi cuñu ñuhu yo cuenda nu ñuhu ñayivi ihya.

Nu tsahá cuenda ra Pablo nácaa cuví coo vaha yo tsihin Nyoo

¹¹ Tsitó ndi tyin Jutu Mañi yo cua tatsi tuñi ra tsi ndi tatun ña cua javaha ndi tsa

caahán ra. Yacan cuenda nducú ndi cuhva cahan ndi tsihin nyivi na nacuhva cuenda ñi tsi ñi tsi Nyoo. Tan Nyoo tsitó vaha ra tyin tacan javahá ndi, tan cuñi ndi tsa coto tucu nyoocho. ¹² Caahán ndi tyehen, maa tyin ñavin tsa cuñi ndi nduyaa ndi tyin caahán ndi tsa cuenda tsa cuñi ndi tsa nducuhun iñi ndo tyin caahán ndi tsa nditsa, tan cusii ca iñi ndo tan ñihi ndo cuhva cahan ndo tsihin inga ca ra tsa nduyaa naha ra. Catyi ra naha tyin vaha iyó ra naha tsihin Nyoo, maa tyin tsitsi añaima ra naha maa ñi tsa ña nditsa iyó. ¹³ Tatun caahán ndi tuhun Nyoo, catyi juhva nyivi tyin jñi ndi sana. Nditsa, sana iñi ndi maa tyin tsa cuenda Nyoo, tyin tuhun maa ra caahán ndi. Tan tatun vaha cuñi ndi, tsa cuenda nyoocho vaha cuñi ndi. ¹⁴ Tan tsitó ndi tyin intuhun ñi ra Cristo tsihi tsa cuenda tandihi nyivi ñuu ñayivi. Tacan tan tsihi tandihi yo. [Tsa tsihi yo cuñi tsi catyi tyin nacoó yo tsa javahá yo cuhva cuñi maa yo.] Tan tsa tyehen tsitó yo tsa tsihi ra Cristo tsa cuenda tsa cuñi xaan ra tsi yo, jañiñi tsi tsi yo tsa cahan yo tuhun ra tsihin nyivi. ¹⁵ Ra Cristo tsihi ra tsa cuenda tandihi yo tyin tacan tan coo yo cuhva cuñi maa ra tan ñavin cuhva cuñi maa yo tyin tsihi ra tan nandotq ra tsa cuenda tandihi yo. ¹⁶ Vityin tan ityi nuu, ña caca ca iñi yo nyehé yo cuhva iyó nyivi tumaa tsicá iñi nyivi ña tsitó tsi Nyoo. Tsicog quivi tacan tsicá iñi yo nyehé yo tsi ra Cristo cuñi yo tyin ra ñuhu ñayivi ñi cuví ra. Maa tyin vityin ña tsicá ca iñi yo tacan. ¹⁷ Tyin quivi nacuhva cuenda yo tsi yo tsi ra Cristo, jandutsaa ra añaima yo. Tan nanduvj yo nyivi tsaa jahá ra. Tan tandihi tuhun tsa tsicá iñi yo nu quitsj ca tsi, ña tsicá ca iñi yo can vityin ihya tyin tsahá ra tsa tsiñi tuñi tsaa tsi yo.

¹⁸ Maa Nyoo javahá tandihi yacan tyin vityin iyó vaha yo tsihin ra jahá ra tsa cuenda ra Cristo Jesús. Tsahá cuenda ra tsi yo tyin cuñi tsi jacoto yo tsi nyivi nácaa javaha ñi tan cuví coo vaha ñi tsihin ra. ¹⁹ Tyin maa ra tsa yaha nduvahá iyó ra tsihin ñi tsa cuenda tsa tsihi ra Cristo tsa cuenda cuatyí ñi. Nyoo jahá ra tyin nduve ca cuatyí ñi nuu ra. Tan tava tyiñu ra tsi yo tsa jacoto yo tuhun ihya tsi ñi. ²⁰ Yacan cuenda cuví ndi ra tava tyiñu ra Cristo. Tan caahán ndaahvi Nyoo tsihin ndo tsihin yuhu ndi. Yacan cuenda caahán ndahvi ndi tsihin ndo tsihin sivi ra Cristo, na nduvaha coo ndo tsihin Nyoo. ²¹ Ra Cristo ña javahá ra ndi intuhun cuatyí. Maa tyin Nyoo jaquitsj ra tsi ra nu ñuhu ñayivi ihya; quitsj cúu ra tsa cuenda tandihi cuatyí yo. Tyin tacan tan cuví jacacu ra tsi yo, tan tsa cuenda ra Cristo, nduvahá yo jahá tsa vaha Nyoo.

6

¹ Yañi, iin caa ñi jahá tyiñu yo tyiñu Nyoo.

Yacan cuenda caahán ndaahvi xaan ndi tsihin ndo tyin cuatyifnu ndo tandihi tsa vaha tsa tsahá ra tsi intuhun intuhun ndo. ² Tyin catyí Nyoo nu tutu ra tyehen:

Quivi tahañ tsi tsa jacacu yu tsi un, tsiñi yu tsa cahan un

tan jatyinyee yu tsi un, catyí Nyoo.

Jaha ndo cuenda tyin vityin cuví quivi taahán tsi. Tan vityin cuví quivi jacacú Nyoo tsi yo.

³ Nducú xaan ndi cuhva tsa ña javaha ndi náa javaha ndi tyin tacan tan ña cahan nyaa nyivi tyifnu Nyoo tsa javahá ndi. ⁴ Tan cuñi ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé ifni ndi náa ndihi tsa taahán ndi, náa tundoho, tan náa tsihi. ⁵ Vasu ndi maa cañi nyivi tsi ndi, tyihí ñi tsi ndi vehe caa, tsacú nducu ñi tsi ndi, maa tyin cunyeé xaan ifni ndi. Tan ñihi xaan jahá tyifnu ndi nda cuanda tsicoó nyito ndi, tan tsisocó ndi. ⁶ Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin tsa tsitó ndi tsa nditsa tan tsihin tsa cunyeé xaan ifni ndi nyehé ndi tandihi maa nuu tundoho tan ña tsihi ndi tsihi. Vaha ifni ndi, tan cuñi xaan ndi tsi nyivi tyin iyó Tatyí Ii Nyoo añima ndi. ⁷ Caahán ndi maa ñi maa tuhun Nyoo tsa nditsa. Iyó tunyee ifni ra tsihin ndi. Tan tsatyifnu ndi tandihi tsa vaha tsa tsahá ra tsi ndi, tyin tacan tan cuví jaha canaa ndi tsi nu ña vaha. ⁸ Yihí quivi vaha cuñi nyivi nyehé ñi tsi ndi, tan iyó tucu quivi ndasi cuñi ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siqui ndi. Yihí tsaha catyí ñi tyin cuendu caahán ndi tan inga tucu tsaha catyí ñi tyin tsa nditsa caahán ndi. ⁹ Iyó tsaha jahá ñi tyin ña nacotó ñi tsi ndi, tan yihí tsaha jacahnú tucu ñi tsi ndi. Iyó quivi tsa yatyin ña cúu ndi, maa tyin ña tsihi ndi tan ndi iyó ca ndi. Iyó quivi tatsi tuñi nyivi tsi ndi, maa tyin ña tsahí tucu ñi tsi ndi. ¹⁰ Vasu ndi maa cuihíya cuñi ndi iyó tsaha, maa tyin ña tsindihí tsa si cuñi ndi. Iyó tsaha ndaahvi ndi, maa tyin cuaha nyivi janducucá ndi tsihin tuhun Nyoo. Vasu nduve náa iyó tsi ndi, maa tyin tandihi maa tsa iyó tan tsii maa ndi cuví.

¹¹ Nyooho nyivi ñuu Corinto; caahán catsi ndi tsihin ndo tsihin tsa ñi ifni añima ndi tyin nditsa tsa cuñi xaan ndi tsi ndi. ¹² Nyuhu, ña ndasi cuñi ndi nyehe ndi tsi ndo. Maa ndo cuví ndo ndasi cuñi nyehe tsi ndi. ¹³ Caahán ndaahvi yu tsihin ndo tumaa caahán ndaahvi iin ra tsihin sehe ra; nuña ndo añima ndo, tumaa tsa javahá maa yu tsihin ndo. Tan ña ndasi ca cuñi ndo nyehe ndo tsi ndi, tyin maa ndi ña ndasi cuñi ndi nyehé ndi tsi ndo.

Vehe Nyoo nyito cuví yo tyin iyó ra añima yo

¹⁴ Ña ndu iin ndo tsihin nyivi ña tsinú ifni tsi Nyoo tyin ña nacatsí tahan añima ndo tsihin añima ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsin tan ña cuví ndu iin tsi tsihin tsa naa. ¹⁵ Tyin ra Cristo ña ndu iin ra tsihin nu ña vaha. Tan tacan tucu yoo tsa tsinú ifni tsi ra, ña cuví ndu iin yo tsihin nyivi ña tsinú ifni tsi ra. Tyin tun ndu iin yo tsihin ñi ña cua nacatsi tahan coo yo tsihin ñi. ¹⁶ Tyin ndi vehe Nyoo tan ña cuví nacatsi tahan tsi tsihin tsitoho. Yacan ndi ña jacahnu ndo tsitoho tyin vehe Nyoo nyito cuví yo, tumaa catyí maa ra tuhun yo tahañ tsanaha:

Cua coo yu añima ñi, tan cua cuhun yu tsihin ñi nu cuhun ñi.

Maa yu cua cuví Nyoo ñi, tan maa ñi cua cuví nyivi yu, catyí ra.

¹⁷ Yacan cuenda catyí ra:

Quita ndo mahñu nyivi ña tsinú ifni tsi yu.

Ña cutahan ndo tsihin ñi.

Ña javaha ndo tsa ña vaha.

Tacan tan naquihin yu tsi ndo.

¹⁸ Tan cuví yu jutu ndo.

Tan cuví ndo sehe yu,

catyí Jutu Mañi yo, ra iyó tandihi tunyee ifni tsi.

7

¹ Yañi, yacan cuví tsa tsahá Nyoo tsi yo, yacan cuenda cuñi tsi nducu yo cuhva nduvaha vaha ca yo. Tan ña javaha ca yo tsa caquiñi tan ña caca ca ifni yo tsa ña vaha. Cuiti coo yo tyin tyaa yahvi yo tsi Nyoo.

Nu nacatyí tuhun ra Pablo nácaa nasamga cuhva iyó nyivi yihí cuenda Nyoo ñuu Corinto

² Yañi, caahán ndaahvi yu tsihin ndo, vaha cuñi ndo nyehe ndo tsi ndi tyin nduve maa náa javahá ndi tsi ndi intuhun ndo. Tan ndi ña jativi ndi tsi ndi intuhun ndo. Tan ña jandavi ñaha ndi tsi ndi intuhun ndo.

³ Tsa caahán yu tyehen tsihin ndo ñavin tsa caahán yu tsi ndo cuví. Tyin tsa yaha catyí yu tsihin ndo nda nu quitsj ca tsi, tyin nditsa tsa cuñi yu tsi ndo. Tyin iin caa ñi iyó yo tsihin Nyoo. Tatun iyó yo, iin ñi cuví yo tsihin ra; o tatun cúu yo, iin ñi cua cuví tucu yo tsihin ra. ⁴ Tsitó vaha yu tyin cua javaha ndo tsa vaha, yacan cuenda si xaan cuñi yu nyehé yu tsi ndo. Vasu ndi maa nyehé xaan ndi tundoho, maa tyin ndu iin ca ifni añima ndi. Tan si xaan ca cuñi ndi.

⁵ Nda quivi tsaa ndi Macedonia ihya, tan ñaha ca maa quitatú ndi. Tyin cuaha xaan tsihi tan tundoho nyehé ndi tandihi ñi ityi cuahán ndi. Cañi tahan nyivi tsihin ndi. Tan tsicá xaan ifni ndi tyin ña tsitó ndi tun cua quita vaha tyifnu jahá ndi. ⁶ Maa tyin Nyoo, tacan ñi maa jandu iin ra ifni yo tun cuihíya

cuñi yo. Tan jandu ijin xaan ra iñi ndi quivi tsaa ra Tito nu yucú ndi ihya. ⁷ Tan ñavin tsa cuenda tsa tsaa ñi ra, maa tyin sii cuñi tucu ndi tsa cuenda tsa jandu ijin xaan ndo iñi ra. Nacatyí tuhun ra tsihin ndi tyin cuñi xaan ndo nyehe ndo tsi ndi. Tan catyí tucu ra tyin tsacú xaan ndo tsa cuenda tsa cuiihya cuñi ndo. Tan ñuhú xaan iñi ndo tsi yu. Tsa tsito yu yacan, sii xaan ca cuñi yu cuví.

⁸ Quivi can tsicá xaan iñi yu tyin tsahá yu tucuiihya iñi tsi ndo tsihin carta tsa jaquitsí yu tsi ndo. Tan ndu uví iñi yu tsa jaquitsí yu carta can tsi ndo. Maa tyin juhva ñi quivi nducuiihya iñi ndo. Tan vityin ña tsicá ca iñi yu tsa cuenda tucuiihya iñi tsa tsahá yu tsi ndo. ⁹ Tan vityin sii xaan cuñi yu. Ñavin tsa cuenda tsa tsicoq ndo tucuiihya iñi, tsa cuenda tsa ndu uví iñi ndo cuatyí ndo jahá tucuiihya iñi can. Tan cunyeé xaan iñi ndo nyehe ndo tucuiihya iñi cuhva taahán maa iñi Nyoo. Yacan cuenda vaha javahá ndi tsa tsahá ndi tucuiihya iñi tsi ndo. ¹⁰ Tyin tun cunyeé iñi yo nyehe yo tucuiihya iñi cuhva cuñi maa Nyoo, cua nasama cuhva iyó yo tacan tan cua cacu yo. Yacan cuenda na sii cuñi yo tun nyehe yo tucuiihya iñi cuhva cuñi maa Nyoo. Tyin tucuiihya iñi tsa iyó tsi nyivi tsa ña tsitó tsi Nyoo maa ñi anyaya ñihí ñi tsihin can. ¹¹ Nyoocho cunyeé iñi ndo nyehe ndo tucuiihya iñi tumaa cuhva taahán iñi maa Nyoo. Tan vityin, nyehe ndo tyin cuaha xaan tsa vaha ñihí ndo tsa cuenda tucuiihya iñi can. Jandaa vaha ndo cuatyí ra can. Cuxaan ndo tsi ra. Tan nayuhví tucu ndo tsi Nyoo. Tsahá cuenda vaha ndo nácaa cuahán tyiñu can. Yaha can tan nda cuanda cuñi ndo nyehe ndo tsi yu. Tan tatsí tuñi ndo tsi ra can. Tan tsa cuenda tsa javahá ndo tumaa cuñi maa Nyoo, cuñi tsi catyí tyin nduve cuatyí ndo tsa cuenda yacan. ¹² Yacan cuenda quivi jaquitsí yu carta can tsi ndo ña jaquitsí yu itsi tsa cuenda tsa tsicá xaan iñi yu cuenda ra tsa javahá cuatyí can. Tan ndi ñavin tsa cuenda ra tsa tahán ticanuu can. Maa tyin tsa cuenda maa ndo, tyin cuñi yu tsa coto ndo nácaa ñuhú iñi ndo tsi ndi nuu Nyoo tan nácaa cuñi ndo jatyinyeé ndo tsi ndi. ¹³ Yacan cuenda nduvahá cuñi añima ndi. Tan sii xaan cuñi ndi tyin tsitó ndi tyin cuñi ndo tsi ndi.

Tsa nyehe ndi tyin sii xaan cuñi ra Tito, ndusií ca iñi ndi tyin tsahá xaan ndo tunyee iñi tsi ra. Tan vaha xaan naquihín cuenda ndo tsi ra. ¹⁴ Catyí yu tsihin ra Tito tsa ndi cumañi ca quitsi ra nu yucú ndo tyin cua tyaa soho vaha ndo tuhun tsa jaquitsí yu tsihin ra. Tan vityin sii cuñi yu tyin cundaa tsa cahan yu tsihin ra. Tyin maa ñi maa tsa nditsa tuhvá yu caahán. Tan tacan tucu ndunditsá tsa cahan yu tsihin ra. ¹⁵ Cuñi xaan ra tsi ndo tsa nducuhún iñi ra tyin

javahá ndo tandihí cuíi maa tsa cahan ra tsihin ndo. Tan tsa tsaa ra nu yucú ndo, ndaahvi jahá ndo tsi ndo nuu ra. Tan vaha xaan cahan ndo tsihin ra. Tan vaha xaan tyaa yahvi ndo tsi ra. ¹⁶ Tan sii xaan cuñi yu tyin tsitó yu tyin tacan ñi javahá ndo tsa vaha.

8

Na jatyinyeé yo tsi nyivi yihí cuenda Nyoo tsihin tsa ñi iñi añima yo

¹ Vityin yañi, cuñi ndi nacatyí tuhun ndi tsihin ndo nácaa jatyinyeé xaan Nyoo tsi nyivi yihí cuenda ra, ñi iyó ñuu tsa cayucú Macedonia ihya. ² Vasu ndi maa cuaha xaan tundoho nyehe ñi, maa tyin sii cuñi ñi tsihin Nyoo. Ndaahvi xaan ñi, maa tyin cuaha tsa iyó tsi ñi tsahá ñi, tumaa tsatyin cuca ñi. ³ Tan cuví yu tsandaa tyin nyehe yu tyin tsahá ñi cuaha tsa iyó tsi ñi tsihin tsa ñi iñi ñi tan nda cuanda yaha ca tsahá ñi. ⁴ Caahán ndaahvi xaan ñi tsihin ndi na cuhva ndi ndatu tsa jatyinyeé ndihí ñi tsi nyivi yihí cuenda Nyoo tsa iyó ñuu Jerusalén. ⁵ Cuaha ca javahá ñi tan ñavin ca tsa tsicá iñi maa ndi. Tyin tsa jihna ñi, nacuhvá cuenda ñi tsi ñi tsi Nyoo tsihin tsa ñi iñi añima ñi. Tacan tan nacuhvá cuenda tucu ñi tsi ñi tsi nyuhu tsa quihí ndaha ndi tsi ñi tumaa cuñi maa Nyoo. ⁶ Tsa nyehe yu tyin tacan javahá nyivi Macedonia, tacan tan catyí yu tsihin ra Tito tyin na quitsi ra nu yucú ndo tan janumi ra tsi ndo jacatsi tahan ndo xuhun tsa quitsahá tavá ndo jahá ra. ⁷ Tyin nyoocho vaha xaan javahá ndo tandihí tyiñu. Tsinú xaan iñi ndo tsi Nyoo. Vaha xaan caahán ndo tuhun ra. Vaha cutuñi iñi ndo. Tan tsihin tsa ñi iñi añima ndo javahá ndo tyiñu ra. Tan cuñi xaan ndo tsi ndi. Tan juvin ñi tacan taahán tucu tsi jatyinyeé ndo tsi nyivi ndaahvi, tsa yihí cuenda Nyoo.

⁸ Ña ñaíñi yu tsi ndo tsa javahá ndo tsa caahán yu. Caahán yu tyehen tsihin ndo tsa cuenda tsa cuñi yu tsa nyehe ndo tsa vaha javahá nyivi yihí cuenda Nyoo Macedonia. Tyin tacan tan javahá ndihí ndo tsa vaha tumaa javahá maa ñi. Tan tsihin yacan cua janaha ndo tyin nditsa tsa vaha xaan iñi ndo. ⁹ Tyin tsa tsitó maa ndo nácaa tsa vaha iñi Jutu Mañi yo Jesucristo tsihin yo. Maa ra cuca xaan ra, maa tyin quitsí yu nu ñuhu ñayivi ihya tan jandundaahvi ra tsi ra tsa cuenda tsa cuñi ra tsi yo tyin tacan tan cuví janducuca ra tsi yo.

¹⁰ Yuhu cuñi yu tsa vaha tsa cuenda ndo, yacan cuenda cua cahan yu tsihin ndo tsa tsicá iñi yu tsa cuenda tuhun ihya. Nyoocho cuví nyivi tsa quitsahá jandu iñi jihna xuhun cuyava. Ñavin nyivi tavá tyiñu tsi ndo javahá ndo tacan. Javahá ndo tacan

tyin tacan tsicá iñi maa ndo. ¹¹ Yacan vityin cuñi yu tsa jañihi ca ndo javaha ndo tumaa javahá maa ndo nda nu quitsahá nda cuanda nacatsi tahan xuhun can jaha ndo. Cuhva nyooho nácaa iyó maa tsi ndo. ¹² Tyin tatun iin nyivi tan cuñi ñi cuhva ñi tandihi cuhva iyó tsi ñi tan cuhva ñi can tsihin tsa ñi iñi añima ñi, Nyoo cua naquihín cuenda ra tsa cua cuhva ñi tyin Nyoo ña jañiñi ra tsi yo cuhva yo tun nduve náa iyó tsi yo.

¹³ Caahán yu tyehen tsihin ndo, maa tyin ñavin tsa cuenda tsa cuñi yu tsa jatyinyee ndo tsi nyivi tan ndoo ndaahvi ndo tan ñi ican coo tsa coo tsi ñi. ¹⁴ Tyin vityin tsa iyó luxu tsi ndo, taahán tsi jatyinyee ndo tsi nyivi ndaahvi tsihin can. Tyin tacan tan inducu ñi coo tandihi yo. Tan inga tsaha, maa ñi cua jatyinyee tucu tsi maa ndo tun cumañi tsa cumañi tsi ndo. Tyehen taahán tsi jatyinyee tahan yo tsi yo tsihin tsa iyó tsi yo tyin tacan tan ña nyehe ndi intuhun yo tundo. ¹⁵ Tumaa catyi nu tutu Nyoo tyehen: “Ra tsa cuaha xaan tsa iyó tsi, ña jativi ra itsi. Tan ra tsa iyó luxu ñi tsa iyó tsi, ña cumañi tsa cumañi tsi ra”, catyi tsi nu tutu Nyoo.

Nu tyaa ra Tito naha ra cuhva cuhun ra naha ñuu Corinto

¹⁶ Tyahvi nyoo tsi Nyoo tyin tsahá ra tsa vaha iyó añima ra Tito tan tsicá iñi ra tuhun ndo tumaa tsicá iñi maa yu tuhun ndo. ¹⁷ Tsa cahán yu tsihin ra tyin quitsi ra nu yucú ndo, ndoo ra tyiñu tsa quitsi ra, tyin tuñu cuñi tucu maa ra ñuhú iñi ra tsi ndo. Yacan cuenda vityin vatsi ra nu yucú ndo tsihin tsa iyó iñi maa ra.

¹⁸ Jaquitsi ndi tsi iin ra yañi yo iin caa ñi tsihin ra Tito. Vaha xaan tsinú iñi ra tsi Nyoo, tan tacan caahán tucu tandihi nyivi yihí cuenda Nyoo. ¹⁹ Tan inga tucu tuhun tyin nacatsi vaha nyivi yihí cuenda Nyoo tsi ra yañi yo ihya tyin cuhun ndihi ra tsihin ndi cundaca ndi xuhun tsi nyivi ndaahvi iyó ñuu Jerusalén. Cuñi xaan ndi jacahnú ndi tsi Jutu Mañi yo tsihin tsa javahá ndi tyiñu ihya. Tan tacan tucu cuñi xaan ndi jatyinyee ndi tsi tandihi nyivi yihí cuenda Nyoo. ²⁰ Tsihin cuenda xaan javahá ndi tyiñu ihya, tyin tacan tan ña cahán nyivi tsi ndi tsa cuenda tsa tavá ndi xuhun cuenda nyivi ndaahvi. ²¹ Tacan ñi nducú xaan ndi cuhva javahá ndi tyiñu. Tatun cua javaha ndi náa iin tsa cua javaha ndi, javahá ndi can tsihin tsa catsi iyó ndi ityi nuu Jutu Mañi yo tan ñavin ityi nuu Jutu Mañi yo ñi tyin ityi nuu tucu nyivi.

²² Tan juven ñi jaquitsi tucu ndi inga ra yañi yo tsihin ra Tito naha ra tyin nyehé ndi tyin ñi xaan iñi ra. Tan cuaha ñi tsaha janahá ra tyin cuñi xaan ra tsi Jutu Mañi yo. Tan vityin tsa tsa tsitó ra tuhun ndo, sií cuñi

ra tyin tsitó ra tyin cua javaha ndo tsa vaha nuu Nyoo. ²³ Tatun yóo tsicá tuhun tuhun ra Tito, catyi ndo tsihin ñi tyin ra vaha iñi tsi yu cuví ra, tan jahá tyiñu ra tsihin yu, tan jatyinyee ra tsi ndo tsihin tuhun Nyoo. Tatun tsicá tuhun tucu ñi tuhun inga uvi ca ra yañi yo ihya naha ra, catyi ndo tyehen tsihin ñi:

—Maa nyivi yihí cuenda Nyoo jaquitsi tsi ra naha. Tan vaha xaan jahá tyiñu ra naha tyiñu ra Cristo —catyi ndo.

²⁴ Yacan cuenda janaha ndo tsi ra ihya naha ra nu tuvi tyin nditsa tsa cuñi ndo tsi ra naha. Tyin tacan tan coto tandihi nyivi yihí cuenda Nyoo tyin nditsa tsa caahán yu tyin vaha javahá ndo.

9

Nu tsahá cuenda ra Pablo nácaa taahán tsi jatyinyee yo tsi nyivi ndaahvi yihí cuenda Nyoo

¹ Tan cuenda xuhun tsa jandu iin ndo tsa cuenda nyivi ndaahvi yihí cuenda Nyoo, ña ñiñi xaan cuñi tsi cahán yu tuhun can tsihin ndo. ² Tyin tsitó yu tyin cuñi xaan ndo javaha ndo tsa vaha. Yacan cuenda sií cuñi yu nacatyí tuhun yu tuhun ndo tsihin nyivi iyó Macedonia, tyin nyoocho tsa iyó ñuu Corinto tsa canyí Acaya, nda cuyava tan quitsahá cuñi ndo jatyinyee ndo tsi nyivi ndaahvi. Tan tsa cuenda yacan cuaha xaan nyivi yihí cuenda Nyoo Macedonia ndu iin ca iñi ñi tan cuñi ndihi tucu maa ñi jatyinyee ñi tsi nyivi ndaahvi. ³ Vasu ndi maa tsitó yu tyin vaha tsicá iñi ndo, maa tyin jaquitsi yu tsi ra yañi yo ihya naha ra nu yucú ndo, tyin jatyinyee ra naha tsi ndo tan janumi ndo jandu iin ndo xuhun, tumaa tsa caahán yu tuhun ndo tyin cuñi ndo javaha ndo tsa vaha. Tyin tacan tan ña cua catyi nyivi Macedonia tyin ña nditsa yu tsa caahán yu. ⁴ Tyin coto cusana quitsi iin ra Macedonia tsihin yu, tan nyehe ra tyin nduve xuhun jandu iin ndo. Tan tahan yu ticanuu tsa cuenda tsa nduve náa javahá ndo. Tan vihi ca maa ndo. Tyin tsa yahá catyi yu tyin cuñi xaan ndo jatyinyee ndo tsi nyivi ndaahvi. ⁵ Yacan cuenda tsicá iñi yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatyinyee ra naha tsi ndo tsa jandu iin ndo xuhun tsa tyihí ndo cuhva tyin cuhva ndo. Tyin tacan tan quivi quitsi yu tandihi tsi tan tsa iyó vaha tsi. Tyin tsa cacú iñi maa ndo tan javahá ndo cuhva can, tan ñavin nyuhu jañiñi tsi ndo.

⁶ Ndúcuhun iñi ndo tuhun tsa catyi tyehen: Ra tsa tatsí luxu ñi, luxu ñi tsiti naquihín ra. Maa tyin ra tsa tatsí cuaha, cuaha tsiti naquihín ra. ⁷ Tan intuhun intuhun yo cuñi tsi cuhva yo cuhva iyó iñi maa yo. Ñavin uvi caca iñi yo tan cuhva yo o

cuhva yo tsa cuenda tyin jañiñi nyivi tsi yo. Tyin Nyoo cuñi ra tsi nyivi tsahá tsihin tsa sii cuñi ñi. ⁸ Nyoo cuvi cuhva ra tandihi nuu tsa vaha tsi ndo, tyin tacan tan ña cumañi náa cumañi tsi ndo. Tan cuvi jatyinyee tucu maa ndo tsi inga ca nyivi. ⁹ Tumaa catyí tuhun Nyoo tyehen:

Iin ra vaha tsahá ra, tsihin tsa nü iñi ra, tsa iyó tsi ra tsi nyivi ndaahvi.

Tan tumañi iñi tsa javahá ra, ña tsinaá tsi nuu Nyoo, catyí tsi.

¹⁰ Nyoo, ra tsahá tsiti tatsí yo, tsahá tucu ra tandihi tsa tsatsí yo. Tan cua cuhva tucu ra cuaha ca tsiti tsa tatsi ndo tan vaha cua cuvaha tsi jaha ra. Tan tsa tacan tsahá ndo cua jatyinyee ca ra tsi ndo javaha ndo tsa vaha tsihin nyivi. ¹¹ Tan coo ca tandihi nuu tsa cuca tsi ndo, tyin tacan tan cuvi jatyinyee ca ndo tsi nyivi yihí cuenda Nyoo tsihin yo. Tan maa ñi, cua nacuhva ñi tyahvi nyoo tsi Nyoo tsa cuenda xuhun tsa jacuhun ndo tsi ñi.

¹² Tyin tsa jatyinyee yo tsi nyivi yihí cuenda Nyoo tsihin tsa tsahá yo tsa tsíñi ñuhu tsi ñi, tsahá tucu yo tsa nacuhva ñi tyahvi nyoo tsi Nyoo. ¹³ Tan cua jacahnu ñi tsi Nyoo. Tyin tsihin tsa jatyinyee ndo tsi ñi, nyehé ñi tyin nditsa tsa tyaa yahvi ndo tuhun ra Cristo. Tan juvin ñi cua jacahnu ñi tsi Nyoo tsa cuenda tsa jatyinyee xaan ndo tsi maa ñi tan tsi tandihi ca nyivi. ¹⁴ Cua ndacan tahvi ñi tsi Nyoo tsa cuenda ndo. Tan cua cuñi xaan ñi tsi ndo tsa cuenda tsa vaha tsa tsahá ndo tsi ñi jahá Nyoo. ¹⁵ Tyahvi nyoo tsi Nyoo tyin tsahá ra tsa vaha xaan tsi yo, tan nda cuanda ña ñihí yo cuhva nacatyí tuhun yo itsi.

10

Ra Pablo iyó ndatu tsi ra tsa jaha cuenda ra tsi nyivi tsa jacoto ra tuhun Nyoo

¹ Yuhu ra Pablo tsihin tsa vaha iñi ra Cristo caahán ndaahvi yu tsihin ndo, tyin yihí ndo catyí ndo tyin tun tsahá cuenda yu tsi ndo tsihin carta, ñihi xaan caahán yu tsihin ndo, maa tyin tun nyí yu tsihin ndo, ndaahvi xaan jahá yu tsi yu, catyí ndo.

² Vaha. Maa tyin jaha ndo cuenda tan ña jañiñi ndo tsi yu tsa cuxaan yu tsi ndo quivi quitsi yu nu yucú ndo tyin tsitó yu tyin cuñi tsi tsa cuxaan ñihi yu tsi juhva ndo. Tyin yihí ndo catyí ndo tyin javahá yu tumaa javahá ra ña yihí cuenda ra Jesucristo. ³ Nditsa tyin ra ñuu ñayivi cuví ndi. Maa tyin ña cañi tahan ndi tumaa cañi tahan nyivi iyó nu ñuhu ñayivi ihyá. ⁴ Tyin tsa xaan tsa tsatyíñi ndi tsa cañi tahan ndi, ñavin tsa xaan tsa iyó nu ñuhu ñayivi ihyá cuví tsi. Tyin maa tunyee iñi maa Nyoo cuví tsi, tyin cuví jaha canaa ndi siqui tandihi ca tunyee iñi tsihin tsi tan nda cuanda tunyee iñi tsa iyó tsi tatyí ña vaha. ⁵ Tan tacan cuví jaha canaa ndi tsi

tandihi tsa caahán ndasi nyivi siqui tuhun Nyoo, tan tandihi tsa ña vaha tsa tyasí nu tyaa yahvi nyivi tuhun Nyoo. Tan tsahá ndi tsa cundaca ñaha ra Cristo tandihi cuhva tsicá iñi ndi tyin tacan tan tyaa yahvi ca ndi tsi ra. ⁶ Quivi cutuhva tandihi nyooho tsa iyó Corinto tyaa yahvi vaha ndo tsi ra Cristo, tatun ndoo inga ndo tsa ña cuñi tyaa yahvi tsi ra, tyaa ndi cuhva tsa tatsi tuñi ndi tsi ndo.

⁷ Nyooho jahá ndo cuenda cuhva iyó nyivi. Tan ña jahá ndo cuenda nácaa iyó añaña ñi. Tatun tsitó vaha ndo tyin cuenda ra Cristo yihí ndo, taahán tsi coto ndihi tucu ndo tyin cuenda ra yihí tucu nyuhu. ⁸ Ña caahán nuu yu caahán yu tsa tsahá Nyoo ndatu tsi yu tsa quihí ndaha yu tsi ndo, vasu ndi maa yahá caahán yu juhva tyin tsitó yu tyin tsa vaha tsi maa ndo cuví, tan ña javahá yu can tsa cuenda tsa cuñi yu jativi yu tsi ndo. ⁹ Ña cuñi yu tsa catyí ndo tyin jayuhvi yu tsi ndo tsihin tsa caahán yu nu carta tsa jaquitsí yu tsi ndo. ¹⁰ Tyin yihí ndo catyí ndo tyin nu carta tsa jaquitsí yu tsi ndo ñihi xaan caahán yu tsihin ndo. Maa tyin tatun maa yu tsaa nu yucú ndo, nduve yahvi nyaá yu, catyí ndo. Tan catyí tucu ndo tyin nduve yahvi nyaá tuhun caahán yu. ¹¹ Maa tyin nyooho tsa caahán tacan cuñi tsi coto ndo tyin tumaa caahán yu nu carta, tacan cua javaha tucu yu tsa tsaa yu nu yucú ndo.

¹² Nditsa ña caná iñi ndi jandu inducu ndi tsi ndi tsihin ra nduyaá naha ra. Tyin ra can naha ra juvin ñi maa ra naha catyí tyin vaha ra naha. Tan tsa caahán ra naha tacan, nduve yahvi nyaá caahán ra naha can tyin javahá ra naha cuhva javahá inga nyivi tan ñavin cuhva cuñi Nyoo. Tan cuñi ra naha tyin vaha tsa jandu inducú ra naha tsi ra naha tsihin inga nyivi. ¹³ Nyuhu ña cua nduyaa ndi tsihin tsa ña taahán tsi tsi ndi. Nyoo cuví ra janahá náa tyiñu taahán tsi javahá yo. Tan maa ra jaquitsí tsi ndi ñuu Corinto nu yucú ndo. ¹⁴ Tun tsatyin ña jihna ca maa ndi cahan tuhun Nyoo tsihin ndo, ña taahán tsi jahá cuenda ndi tsi ndo. Maa tyin taahán tsi jahá cuenda ndi tsi ndo tyin jihna ca maa ndi tsindacá tuhun ra Cristo nu yucú ndo. ¹⁵ Nyuhu ña nduyaá ndi tsihin tyiñu javahá inga ca ra naha. Ña catyí ndi tyin tyiñu maa ndi cuví tsi. Maa tyin nyitá iñi ndi tyin cua natsinu vaha ca iñi ndo tsi Nyoo. Tan tatun tsa tsinú vaha ca iñi ndo, tacan tan cua cuvi jacuaha cuaha ca ndi tuhun ra Cristo tsi ndo, maa tyin tandihi ñi tsaha tsa cua jacuaha ndi tsi ndo maa ñi tsa caahán Nyoo cua cahan ndi. ¹⁶ Tan tsicá iñi ndi cuhun ndi cucahan ndi tuhun ra Cristo nu ña tsitó nyivi tuhun ra. Tyin tacan tan ña cua catyí nyivi tyin nduyaá ndi tsihin tyiñu javahá inga ra naha.

¹⁷ Nyooho tsa cuñi nduyaa, nduyaa ndo tsihin tsa javahá Jutu Mañi yo tan ñavin tsihin tsa javahá maa ndo. ¹⁸ Tyin ra tsa catyi tyin vaha ra, ña quitá vaha ra nuu Nyoo. Maa tyin ra tsa catyi Nyoo tyin vaha, ra ican cua quita vaha nuu Nyoo.

11

Nu tsahá cuenda ra Pablo tsi nyivi ñuu Corinto na jaha cuenda ñi tsi ñi na ña jandavi ñaha ra vatya naha ra tsi ñi

¹ Vaha xaan tun ña cundihi iñi ndo tyaa soho ndo tsa cua cahan yu tsa tsicá iñi maa yu tsihin ndo. Ña cundihi iñi ndo tsihin yu vasu ndi maa tuhun maa yu cuvi tsi. ² Yuhu cuñi xaan yu tsi ndo. Tan maa Nyoo tsahá tsa cuñi yu tsi ndo, tyin juvin yu cahan tuhun ra Cristo tsihin ndo nda jihna. Tan cuñi yu tsa cuñi ndo tsi intuhun ñi maa ra tumaa cuñi iñi ñaha yoco tsi ra tsa cua cuvi yi ña. Tyin iñi ñaha yoco cuñi ña tsi intuhun ñi maa ra tsa cua cuvi yi ña. ³ Maa tyin tsicá xaan iñi yu tsa cuenda ndo, coto tahan ndo tumaa tahan ña Eva. Tyin ña Eva jandavi ñaha nu coo tsi ña tsihin maña nu. Tan yuhu ña cuñi yu tsa jandavi ñaha nyivi tsi ndo tan nasama ndo cuhva tsicá iñi ndo tuhun ra Cristo, tan jandihi ndo tsa jacahnú ndo tsi intuhun ñi maa ra. ⁴ Tyin nyooho yatyi xaan nasamá ndo cuhva tsinú iñi ndo tuhun ra Jesús tun sin cuhva caahán nyivi tuhun ra. Tyin ñavin tuhun ra Jesús tsa jacotó ndi tsi ndo cuvi can. Tan taahán xaan iñi ndo caca iñi ndo tuhun tsa ña nacatsi tahan tsihin tuhun Tatyí li Nyoo tsa naquihin ndo nda jihna. Yatyi xaan natsinú iñi ndo tuhun caahán nyivi tan ñavin tuhun, tsa jacacú ra Cristo tsi yo, tsa cahan ndi tsihin ndo. ⁵ Ra tsa catyi, “Nyuhu cuvi ndi ra vaha caahán tuhun ra Cristo”, tsicá iñi yu tyin ña cahnua cuvi ra can naha ra tan ñavin ca maa yu. Tan nyooho nyicún ndo tsi ra naha. ⁶ Vasu ndi maa ña ñihí vaha yu cuhva caahán yu, maa tyin cutuñi vaha iñi yu tuhun Nyoo. Tan yacan cuvi tsa jacuahá ndi tsi ndo tsihin tandihi cuhva javahá ndi.

⁷ ¿O cuñi maa ndo tyin ña vaha javaha yu tsa ña quihun yu yahvi quivi cahan yu tuhun tsa jacacú Nyoo tsi yo tsihin ndo? Tacan javahá yu tyin tacan tan ña cahnua xaan jaha ndo tsi yu tan nducahnu maa ndo nuu Nyoo. ⁸ Nyivi tsa tsicá tuhun Nyoo vehe ñuhu inga ñuu jatyinyee tsi yu tsihin xuhun. Tan xuhun tsa tsahá ñi tsi yu tsatyinú yu can quivi quitsi yu quitsi cahan yu tuhun ra Cristo tsihin ndo. ⁹ Vasu ndi maa yihí tsaha cumañi tsa cumañi tsi yu tsa tsinyi yu tsihin ndo, maa tyin ña tsahá yu tundoho tsi ndi intuhun maa ndo. Tyin ra yañi yo tsa quee nda Macedonia, juvin ra naha tsahá tandihi tsa cumañi tsi yu. Tacan jahá cuenda yu tsi

yu tyin ña cuñi yu cuhva yu tundoho tsi ndo. Tan tumaa tsa javahá yu nda vityin tacan ñi maa cua javaha yu. ¹⁰ Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyooho tan ndi tsi inga nyivi iyó nanii Acaya. ¹¹ ¿Nacuenda caahán yu tyehen cuñi maa ndo? ¿A tsa cuenda tsa ña cuñi yu tsi ndo? Ñavin. Tyin nda maa Nyoo tan tsitó ra tyin cuñi xaan yu tsi ndo.

¹² Ña cua jandihi yu javahá yu tsa tuhva yu javahá. Tyin tacan tan ña coo ndatu cahan ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha. ¹³ Catyi ra naha tyin ra tsicá tyiñu ra Cristo cuvi ra naha, maa tyin ña nditsa ra naha. Tyin jandavi ñaha ra naha tan jahá ra naha tyin ra tsicá tyiñu ra Cristo cuvi ra naha. ¹⁴ Tan tsa javahá ra ican naha ra ñavin tsa iyo cuñi yo cuvi can. Tyin nda maa nu ña vaha tan jahá nu tyin ángel Nyoo tsa xiñu xaan cuvi nu. ¹⁵ Yacan cuenda ña iyo cuñi yo tun ra nyicún tsi nu tan jahá ra naha tyin javahá ra naha tsa vaha. Coo quivi cua tatsi tuñi Nyoo tsi ra naha tsa cuenda tsa ña vaha tsa javahá ra naha.

Tundoho tsa nyehé ra Pablo nu tsicá ra caahán ra tuhun Nyoo

¹⁶ Inga tsaha caahán yu tsihin ndo: Ndi intuhun ndo tan ña caca iñi ndo tyin sana iñi yu tsa caahán yu tyehen. Maa tyin tun tacan tsicá iñi ndo, cuhva ndo cahan yu tsihin ndo tumaa caahán ra sana iñi. Tyin tacan tan cuvi nduyaa ndihi tucu yuhu luxu. ¹⁷ Caahán yu tumaa caahán ra sana iñi tyin tacan tan cuvi nduyaa yu. Ñavin maa Jutu Mañi yo catyi tsihin yu tsa javahá yu tyehen. ¹⁸ Cuaha xaan ra naha catyi ra naha tyin cahnua cuvi ra naha tan nduyaa ra naha tsihin tsa iyó nu ñuhu ñayivi iñya. Yacan cuenda cua jacahnua ndihi tucu yuhu tsi yu. ¹⁹ Nyooho catyi ndo tyin tsitó xaan ndo. Tun nditsa ndo, ¿nacuenta tyin yatyi xaan tyaa soho ndo tsa caahán ra sana iñi can naha ra? ²⁰ Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñi ra naha tsi ndo tsa cuvi ndo musu ra naha. Suhú ra naha tsa tsi ndo. Ndacá ñaha ra naha tsi ndo. Ndasi cuñi ra naha nyehé ra naha tsi ndo. Tan nda cuanda cañi ndaha ra naha nuu ndo. ²¹ ¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña cahnua nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahan yu tuhun maa yu tsihin ndo vasu ndi maa cahan ndo tyin sana iñi yu. ²² Catyi ra can naha ra tyin nyivi Hebreo cuvi ra naha; tacan tucu yuhu, ra Hebreo cuvi yu. Ra ican naha cuvi ra

naha nyivi Israel; juven ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu. ²³ Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyehe caahán yu tumaa caahán ra sana iñi, maa tyin nditsa tsa ñihi ca jahá tyiñu yu tan ñavin ca ra can naha ra. Tan cuaha ca tsaha cañi nyivi tsi yu tsihin yoho tan ñavin ca ra can naha ra. Cuaha ca tsaha tsinyij yu vehe caa. Tan cuaha tsaha cuñi cúu yu, maa tyin ña tsihi yu. ²⁴ Uhun tsaha cañi ra Israel naha ra tsi yu tsihin yoho. Tan tsa iin tsaha cañi ra naha tsi yu, cañi ra naha oco tsahun cumi tsaha tsata yu. ²⁵ Uñi tsaha cañi ra naha tsi yu tsihin yutun. Iin tsaha cañi ra naha tsi yu tsihin yuu. Tan uñi tsaha nyee yutun ndoo tsa cuahán yu tsihin. Tan tsa uñi tsaha tsa nyee yutun ndoo tsitsi ndutya, iin tsaha ndoo yu nu ndutya ñuhu iin quivi tan iin tsa cuaa. ²⁶ Tandihí ñi tsaha tsa cuahán yu tyiñu ra Cristo tan yahá yu tundoho. Cuaha ñi tsaha cuñi tañi yu. Cuaha tsa tahanan yu. Quitá ñasuhu nuu yu ityi cuahán yu. Nda cuanda ra ñuu yu, ra Israel naha ra, tan jayuhvi ra naha tsi yu. Tan juven ñi tacan javahá nyivi inga ñuu tsihin yu. Cuaha tsa tahanan yu tsitsi ñuu, nu tsiqui, nu ndutya ñuhu. Cuaha tsa tahanan yu jahá ra catyi tyin yañi yo cuví tsi ra naha tan ña nditsa ra naha. ²⁷ Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihi yu ndutya coho yu. Cuaha tsaha tsicoo nyitya yu. Cuaha tsaha yahá yu tsa vitsin tan cumañi jahma tsi yu.

²⁸ Ñavin tuhun ihya ñi tyin cuaha inga ca tuhun. Tsiac tucu iñi yu tuhun tandihí nyivi yihí cuenda Nyoo, nyoocho tan nyivi inga ñuu tucu. ²⁹ Tyin tun iin ndo tan vita cuñi ndo, tacan vita cuñi tucu yuhu. Tatun javahá iin ndo tsa ña vaha jahá nyivi, cahán nuu yu tan xaan cuñi yu. ³⁰ Tatun cuñi tsi nduyaa yu tan coto ndo tyin nditsa tsa cuví yu musu Nyoo, cua nduyaa yu tsihin tuhun yu tsa janahá tyin ña cuví javahá yu náa javaha yu tsihin tunyee iñi maa yu. ³¹ Nyoo, Jutu ra Jesucristo Jutu Mañi yo, ra taahán tsi jacahnú yo tacan ñi maa, tsitó ra tyin tsa nditsa caahán yu tan ñavin jandaví ñaha yu. ³² Quivi tsinyij yu ñuu Damasco ra cumi tyiñu tsa jahá tyiñu tyiñu ra rey Aretas, tyacu ra andaru yuhu cora ñuu can, tyin jaha cuenda ra naha coto quita yu tan tiin ra naha tsi yu tan cundaca ra naha tsi yu vehe caa. ³³ Maa tyin nyivi iyó vehe tsa cacu tsihin cora can januu ñi tsi yu ityi ventana tsihin iin tyica cahnu. Tacan jacacu Nyoo tsi yu ndaha ra cumi tyiñu ñuu can.

Tsa nyehé ra Pablo nda nu tsinu uñi gloria jahá Nyoo

¹ Nduve náa ñihí yo tsihin tsa cahan yo tuhun maa yo, maa tyin cua nacatyí tuhun yu tsihin ndo tsa janahá Jutu Mañi yo tsi yu tan tsa nyehé yu jahá ra. ² Nacotó yu iin ra yihí cuenda ra Cristo tsa tsahan andivi. Tsa iyó utsi cumi cuiya tsa quihín Nyoo tsi ra tsahan ra nda nu tsinu uñi andivi. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó. ³⁻⁴ Tsitó yu tyin tsindaca Nyoo tsi ra nda paraíso nu iyó nyivi tsihi tsa tsinu iñi tsi Nyoo. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó. Nu tsahan ra can tsiñi ra tuhun tsa ña cuví nacatyí tuhun yo, tan ndi ña ñihí ndatu nyivi tsa nacatyí tuhun ñi tuhun can. ⁵ Cuví nduyaa yu tsihin tsa janahá Nyoo tsi yu quivi can. Maa tyin ña nduyaa yu tsihin tsa javahá yu tyin nduyaa yu maa ñi maa tsihin tsa nduve tunyee iñi maa yu iyó tsi yu. ⁶ Tatun cua cahan yu tuhun maa yu, ñavin tsa soho cua cuví can. Tyin tun cua cahan yu can maa ñi maa tsa nditsa cua cahan yu. Maa tyin ña cuñi yu cahan yu can coto cahnu xaan jaha nyivi tsi yu. Vaha ca nanyehe maa ñi cuhva iyó yu tan cuhva jacuahá yu, tacan tan coto ñi tatun vaha yu o ña vaha yu.

⁷ Nyoo ña cuñi ra tsa nduyaa yu tsihin tsa janahá ra tsi yu. Yacan cuenda tsahá ra tsa nyehé xaan yu tundoho jahá nu ña vaha. Tan uhvi xaan yu tumaa uhvi nu tyisó iñu cuñu ñuhu yo. Tyin tacan tan ña cuví nduyaa yu tsihin tsa janahá Nyoo tsi yu. ⁸ Tan tsican yu uñi tsaha tsi Jutu Mañi yo na quihin nyaa ra tundoho can siqui yu. ⁹ Maa tyin catyi Jutu Mañi yo tyehe tsihin yu: “Yuhu cuñi xaan yu tsi un, tan yacan ñi cuví tsa tsiñi ñuhu tsi un. Tyin nyivi tsa nduve tunyee iñi maa ñi iyó tsihin ñi, nyaá tunyee iñi maa yu tsihin ñi”, catyi ra. Yacan cuenda si xaan cuñi yu tyin nyaá tunyee iñi ra Cristo tsihin yu tyin nduve tunyee iñi maa yu iyó tsihin yu. ¹⁰ Yacan cuenda si xaan cuñi yu tsa nduve tunyee iñi maa yu iyó tsi yu. Vasu ndi maa caahán nyivi tsi yu, tan nyaá ndaha ñi tsi yu, vasu ndi maa nduve tsa iyó tsi yu, vasu ndi maa cuaha tsa cuví tsi yu, maa tyin si xaan cuñi yu tsa nyehé yu tundoho tsa cuenda ra Cristo. Tyin tsa nduve tunyee iñi maa yu iyó tsi yu, nyaá tunyee iñi Nyoo tsihin yu.

Tsiac iñi ra Pablo tuhun nyivi yihí cuenda Nyoo ñuu Corinto

¹¹ Tsa caahán yu tuhun maa yu nanduví yu tumaa ra sana iñi. Maa tyin maa ndo cuñi tsa cahan yu tacan tyin ña jahá ca ndo tsa ñayivi tsi yu. Maa ndo taahán tsi vaha cahan tuhun yu, vasu ndi maa ña cahnu xaan

cuví yu. Tatin yuhu tan ña cahnu cuví yu, vihi ca ra tsa catyí tyin tyiñu ra Cristo tsicá ra naha, tan ña nditsa ra naha. Cuñí maa ra naha tyin vaha xaan ca ra naha tan ñavin ca inga ra tsicá tyiñu Nyoo. ¹² Yuhu cunyeë xaan iñi yu nyehe yu tandihi tundoho quivi tsinyi yu jahá tyiñu yu tyiñu Nyoo nu yucú ndo. Cuaha xaan tsa iyo javahá yu jahá Nyoo tyin tacan tan coto ndo tyin nditsa tsa cuví yu ra tavá tyiñu ra. ¹³ ¿A vaha ca tyaá nuu yu tsi inga nyívi tsa iyó inga ñuu tan ñavin ca nyoocho? Ñavin. Inducu ñi tyaá nuu yu tsi tandihi ndo. Intuhun ñi tsa ña javahá yu tsihin ndo tsa tsinyi yu tsihin ndo cuví tsa ña tsicán yu xuhun cuita catsi yu tsi ndo. Ña taahán tsi ndacan yu tucahnu iñi tsi ndo tyin tsitó ndo tyin vaha javahá yu.

¹⁴ Vityin tsa iyó vaha tandihi tsa tsii yu, tsa quitsi yu nu yucú ndo tsa tsinu uñi tsaha. Ña cua cuhva yu tundoho tsi ndo tyin ñi cua quitsi yu quitsi nducu yu tsa iyó tsi ndo tyin maa yu cua jatinyee tsi ndo. Tyin iin ra iyó sehe, ñavin sehe ra tsahá tsa tsiiñi ñuhu tsi ra. Tyin maa ra taahán tsi cuhva tsa tsiiñi ñuhu tsi sehe ra. Tan tacan yuhu. ¹⁵ Si xaan cuñí yu cua janaa yu tsa iyó tsi yu tsa cuenda tsa vaha tsi ndo. Tan nda cuanda cuhva yu ñayívi yu tsa cuenda ndo. Tan tsicá tucu iñi yu tyin tun jañihí ca yu cuñí yu tsi ndo, nyoocho ña cuñí vaha ndo tsi yu.

¹⁶ Tandihí ndo tan tsitó ndo tyin ña tsahá yu tundoho tsi ndo. Tan vasu ndi maa tsitó ndo yacan, vatu ñi tyin catyí juhva ndo tyin jandaví ñaha yu tsi ndo tan ña jahá ndo cuenda. ¹⁷ ¿O cuñí maa ndo tyin cahan yu cuendu tsihin ra jaquitsi yu nu yucú ndo tan jandaví ñaha ra naha tsi ndo jahá yu? ¹⁸ ¿A jandaví ñaha ra Tito tan inga ra naha tsi ndo quívi quitsi ra naha nu yucú ndo jahá yu? Ña jandaví ñaha ra naha tsi ndo tyin nyuhu ra tuhúv ndi jandaví ñaha. ¿A ña tsitó ndo tyin ra Tito tan yuhu inducu ñi javahá ndi, tan iin ñi Tatyí li Nyoo iyó tsi nduvi ndi?.

¹⁹ Vasiqui tsicá iñi maa ndo tyin tandihi tsa caahán ndi, tan caahán ndi can tsa cuñí ndi tsa vaha cahan ndo tuhun ndi, maa tyin ñavin tacan tsicá iñi ndi. Tyin tandihi tsa caahán ndi tan tsa vaha tsi maa ndo cuví can tyin tacan tan cunyicun vaha ca ndo tsi Nyoo. Nda nuu Nyoo tan tsihin tunyee iñi ra Cristo caahán ndi tyin nditsa tsa cuñí xaan ndi tsi ndo. ²⁰ Tsicá iñi yu coto ña cua tahan iñi yu cuhva yucú ndo quivi tsaa yu. Tan ndi maa ndo tan ña cua tahan iñi ndo cuhva cua cahan yu tsihin ndo. Yuuhví yu coto coo tsihi, tan nyiyo iñi ndo tsa iyó tsi inga ndo, tan cuxaan tahan ndo tsi ndo, tan nducu ndo maa ñi maa tsa vaha tsi maa ndo, tan cahan ndo cuendu, tan cahan nyaa tahan ndo tsi ndo, tan nduyaa ndo. Tan yuuhví tucu yu coto tsaa yu nu yucú ndo tan ña cuiti

ñi ndaa yucú ndo. ²¹ Tan yuuhví yu quitsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo. Tan tsicá tucu iñi yu tyin coto vacu yu jaha ndo. Tyin yihi ndo ña jandihi ndo tsa javahá ndo tsa ña vaha tsa quitsahá javahá ndo nu quitsi ca tsi tyin rayíi ndi tsicá nuu ra tsihin ñaha tan ñaha ndi tsicá nuu ña tsihin rayíi tan náa ndihi ca maa tsa ña vaha.

13

Nu tsahá cuenda ra Pablo tsi nyívi Corinto, na jaha vaha ñi cuenda tsi ñi tatin vaha cuahán ñi tsihin Nyoo

¹ Tsinu uñi tsaha cuví tsi tsa cua quitsi yu ihya. Nda tacan tan cuví cundaa tyiñu ñi tsa javahá tsa ña vaha. Maa tyin cuñí tsi uvi o uñi taahan ra cua cuví tsandaa. ² Tyin quívi quitsi yu nu yucú ndo, catyí yu tsihin nyívi javahá tsa ña vaha, tyin jandihi ñi tsa javahá ñi tsa ña vaha. Tan vityin catyí tucu yu inga tsaha tsihin ñi, tan tsihin tandihi ndo, tyin tun cua quitsi yu inga tsaha nu yucú ndo, tan ndi javahá ca ndo tsa ña vaha, ña cua cundaahvi iñi yu nyehe yu tsi ndo. ³ Tacan tan cua coto ndo tsa cuñí xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví ra iin ra iyó tunyee iñi tsi tan iyó ra añima ndo. Tyin iyó xaan tunyee iñi ra tsi ndo. ⁴ Nditsa tyin tsihi ra nu cruu tumaa iin ra nduve tunyee iñi iyó tsi. Maa tyin nandoto ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iin ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuví jatinyee ndi tsi nyoocho.

⁵ Nducu cuhva ndo tsi ndo tun iin iñi ndo tsinú iñi ndo tsi ra Cristo. ¿A ña tsitó ndo tyin iyó ra Cristo añima ndo tun nditsa tsa tsinú iñi ndo tsi ra? ⁶ Maa tyin cuñí yu tsa coto ndo tyin nyuhu ña vatya ndi. ⁷ Tan tsicán tahvi xaan ndi tsi Nyoo tsa cuenda ndo, tyin tacan tan ña javaha ndo tsa ña vaha. Ña caahán ndi tyehen tyin cuñí ndi catyí nyívi tyin vaha ndi. Caahán ndi tyehen tyin cuñí ndi tsa javaha ndo maa ñi maa tsa vaha. Nduve cuenda ndi tun catyí nyívi tyin vaha ndi o ña vaha ndi. ⁸ Tyin nyaá tsi siquí ndi tsa javaha ndi tsa vaha. Ña cuví tyihi xeehe ndi tsa nditsa. Intuhun ñi tsa cuví javaha ndi, yacan cuví tsa jacuaha ndi tsa nditsa. ⁹ Yacan cuenda sii cuñí ndi tsa nduve tunyee iñi iyó tsi ndi, tan nyee cuñí nyoocho tsihin tunyee iñi Nyoo. Tan tacan ñi tsicán tahvi ndi tsi Nyoo tsa cuenda ndo na cunyicun vaha ca ndo tsi ra nda cuanda ña cumañi ca tsa cumañi tsi ndo. ¹⁰ Jaquitsi yu carta ihya tsi ndo tsa ndi cumañi ca quitsi yu nu yucú ndo tyin janduvaha ndo tsi ndo. Tyin

tacan tan ña cua cuñi tsi cuxaan yu tsi ndo quivi tsaa yu nu yucú ndo. Tyin nditsa tsa tsahá Nyoo ndatu tsi yu tsa quihí ndaha yu tsi ndo. Maa tyin ña tsahá ra ndatu can tsi yu tsa janducuiya ndihí ca yu iñi ndo. Ñihí yu ndatu can tsa cuenda tsa jatyinyee yu tsi ndo.

¹¹ Yañi, nu ndihí caahán yu ihya, catyí yu tsihin ndo, nducu ndo cuhva ña cumañi tsa cumañi tsi ndo nuu Nyoo. Sii cuñi ndo. Jandu iin ndo iñi ndo. Cgo mañi tahan ndo. Tan Nyoo, ra cuñi xaan tsi ndo tan tsahá tsa taxin coo añima yo, na cunyaa ra tsihin ndo.

¹² Cuhva tahan ndo nacumi tsi ndo tsihin tsa sii cuñi ndo nyehé ndo tsi ndo. ¹³ Tan jaquitsí tandihí nyivi yihí cuenda Nyoo ñuu ihya nacumi tsi ndo.

¹⁴ Naquihin ndo tsa vaha coo añima ndo jaha Jutu Mañi yo Jesucristo. Tan na coto ndo tyin Nyoo cuñi xaan ra tsi ndo. Tan nacoto tucu ndo tyin iyó Tatyí Ii ra tsihin ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ŋuu Cayucú Galacia

*Nu tyaá ra Pablo iin carta tsa cuenda
nyivi yihí cuenda Nyoo Ŋuu cayucú Galacia*

¹ Yuhu ra Pablo cuví yu iin ra tsa tava tyiŋu ra Jesucristo. Ŋavin nyivi jaquitsí tsi yu tyin maa ra Jesucristo tan maa Nyoo Jutu yo jaquitsí tsi yu tan tsahá ra tyiŋu ihya tsi yu. Tan juvin ra cuví ra tsa janandoto tsi ra Cristo tsa yahá tsihi ra. ² Yuhu tan tsihin tandihi ra yaŋi yo tsa yucú tsihin yu, tyaá ndi carta ihya tsa cuenda nyooho nyivi yihí cuenda Nyoo tandihi vehe ŋuhu iyó ŋuu cayucú Galacia. ³ Naquihin ndo tsa vaha tan tsa taxin tsa tsahá Nyoo Jutu yo tan Jutu Maŋi yo Jesucristo tsi yo coo aŋima ndo. ⁴ Maa ra Jesucristo nacuhva cuenda ra tsi ra nu cruu tsacatyí cuatyí yo Tan javahá ra tacan tyin maa Nyoo Jutu yo tsa cahan tsihin ra. Tyin tacan tan jacacú ra tsi yo nu yucú yo tsihin nyivi caquiŋi iyó nu ŋuhu ŋayivi ihya. ⁵ Yacan cuenda na jacahnu yo tsi maa Nyoo tacan ŋi maa. Tan na cuví tsi tacan.

Nduve ca inga kuhva cuví cacu yo

⁶ Iyo xaan cuŋí yu tyin nyooho numi xaan nacoŋ ndo tsi Nyoo. Juvín ra nacaná tsi ndo tyin coo vaha ndo tsihin ra tsa cuenda tsa javahá ra Cristo tsa cuenda yo. Tan vityin siin tuhun tsinú iŋi ndo. Cuŋí maa ndo tyin cua jacacu yacan tsi ndo. ⁷ Maa tyin nduve ca inga kuhva cuví cacu yo. Vasu ndi maa yihí ra naha jatyaŋu ra naha tsi ndo. Tan cuŋí ra naha jatívi ra naha tuhun Nyoo tsa jacacú ra Cristo tsi yo. ⁸ Tun iyó yóo caahán tuhun ra Cristo tsihin ndo tan ŋa nacatsí tahan can tsihin tuhun tsa cahan ndi tsihin ndo, na cahun ŋi anyaya. Yoŋi jaha, vasu maa ndi cuví, o iin áŋel quee andívi cuví. ⁹ Tsa yahá cahan yu tuhun ihya tsihin ndo, maa tyin cuŋí yu cahan nyico yu itsi tsihin ndo inga tsaha. Tatun yóo nyivi caahán tuhun Nyoo tsihin ndo tan siin kuhva caahán ŋi, na jacuhun Nyoo tsi ŋi anyaya.

¹⁰ Ŋa caahán yu tacan tsihin ndo tsa cuenda tsa cuŋí yu tsa vaha cahan nyivi tuhun yu. Tyin yuhu nducú yu tsa coo vaha yu nuu Nyoo. Tyin tun cuŋí yu cuví yu nyivi vaha nuu nyivi, ŋavin ra jahá tyiŋu tyiŋu ra Cristo cuví yu.

*Nacaa quitsahá tsicá ra Pablo tyiŋu
Nyoo*

¹¹ Cuŋí yu tsa coto ndo yaŋi, tyin tuhun ra Cristo tsa caahán yu tsihin ndo, ŋavin tuhun nyivi cuví tsi. ¹² Ŋavin nyivi tsaha tuhun ihya tsi yu. Tyin juvin ŋi maa ra Cristo jacotó itsi tsi yu.

¹³ Nyooho tsiŋi ndo nácaa javahá yu quívi can. Tan tsitó ndo tyin tsinyaa ndaha xaan yu tsi nyivi yihí cuenda Nyoo quívi tsa tsinyi yu cuenda ŋi Israel ŋuu yu. Tan nducú yu kuhva jandu uvi yu iŋi ŋi tsinú iŋi tsi ra Cristo. ¹⁴ Tan tsicoŋ yu kuhva iyó ŋi Israel, tan yuhu cuví ra cuahán ityi nuu ca tan ŋavin ca juhva ra yihí tahan tsihin yu tsa iin ŋi cuiya ndi. Tyin yuhu cuŋí xaan ca yu javahá yu kuhva javahá tsi tsaaŋnu ndi. ¹⁵ Maa tyin tsa ndi cumaŋi ca cacu yu tan Nyoo tsa nacatsí maa ra tsi yu tyin cuŋí xaan ra tsi yu. Tan nda tsa tsaa maa quívi tsa tyaá ra kuhva, tan nacaná ra tsi yu. ¹⁶ Tacan tan janahá ra tsi Sehe ra tsi yu tan nacoŋ yu tsi ra, tyin tacan tan cuví cahan yu tuhun ra nácaa jacacú ra tsi yo tsihin nyivi tsa ŋavin nyivi Israel cuví. Tan quívi can ŋa nducú yu nyivi jacuaha tsi yu nácaa taahán tsi javahá yu. ¹⁷ Tan ndi ŋa tsahan yu ŋuu Jerusalén nu yucú ra tsa tava tyiŋu jihna ra Cristo tsa ŋaha ca tava tyiŋu ra tsi yu. Maa tyin numi ŋi tsahan yu nda Arabia. Tacan tan cuanuhu nyico yu inga tsaha nda ŋuu Damasco.

¹⁸ Tsa yahá uŋi cuiya tan tsahan yu nda Jerusalén, tan nacoŋ yu tsi ra Pedro. Tan ndoŋ yu tsihin ra tsahun quívi. ¹⁹ Maa tyin ŋa nyehe yu tsi inga ra tsa tava tyiŋu ra Cristo. Intuhun ŋi ra Jacobo yaŋi Jutu Maŋi yo, nyehe yu. ²⁰ Tan nda nuu Nyoo tan caahán yu tsihin ndo tyin tuhun tsa tyaá yu nu tutu ihya, tsa nditsa cuví tsi.

²¹ Tsa yahá tsa tsahan yu ŋuu Jerusalén tan tsahan yu nda Siria tan nda Cilicia. ²² Tan ra yaŋi yo tsa yucú vehe ŋuhu ra Cristo tsa iyó ŋuu tsa cayucú Judea, ŋa nacotó ra naha tsi yu. ²³ Maa tyin ŋiŋi tuhun ra naha tsa caahán nyivi tuhun yu, tyin catyí ŋi: “Ra tsa tsinyaa ndaha tsi yo quívi can, vityin caahán ndihi ra tsihin nyivi na tsinu iŋi ŋi tsi ra Cristo. Tan quívi can cuŋí ra jatívi ra tuhun ra Cristo”, catyí ŋi, ŋiŋi tuhun ra naha. ²⁴ Tan jacahnu ra naha tsi Nyoo tsa cuenda tsa javahá Nyoo tsihin yu.

2

*Ra cuví ityi nuu tsihin nyivi vehe ŋuhu
ŋuu Jerusalén, ndoŋ ra naha vaha kuhva jahá
tyiŋu ra Pablo*

¹ Tsa yahá utsi cumi cuiya, tan tsahan yu ŋuu Jerusalén inga tsaha tsihin ra Bernabé. Tan tsahan ndihi tucu ra Tito tsihin ndi. ² Tsahan yu ndacan tyin maa Nyoo janahá tsi yu tyin taahán tsi tsa cahun yu. Tan ndacan quita siin yu tsihin ra cuví ityi nuu tsihin nyivi vehe ŋuhu naha ra. Tan tsahá

cuenda yu tsi ra naha nácaa tuhvá yu caahán tuhun ra Cristo tsihin nyívi tsa ñavin ñi Israel cuví. Tyin tacan tan coto yu tun ndoo ra naha vaha tsihin cuhva jacuahá yu. Tyin tun ña ndoo ra naha vaha, cuatu xaan jahá tyiñu yu. ³ Maa tyin ndoo ra naha vaha. Tan ña jañiñi ra naha tsa cunyaa tuñi Nyoo tsi ra Tito, tan ñavin ra Israel cuví ra. ⁴ Nditsa tyin juhva ra naha cuñi ra naha tsa cunyaa tuñi can tsi ra Tito. Tan ra ican naha ra quihvi xeehe ra naha nu yucú ndi, tan jahá ra naha tyin yihí ra naha cuenda ra Cristo, maa tyin ña nditsa tyin ra tsacú nducu cuhva iyó nuña yo jahá ra Cristo cuví ra naha. Tan cuñi ra naha tyin taahán tsi tsa cundaca ñaha ley tsahnu tsi yo. ⁵ Maa tyin ndi luxu tan ña tsahá ndi tsa cundaca ñaha ra can naha ra tsi ndi. Tyin ña cuñi ndi tsa jaña ndo tuhun nditsa tsa jacacú ra Cristo tsi yo.

⁶ Maa tyin ra cuví ityi nuu tsihin nyívi vehe ñuhu, nduve tuhun tsaa tsahá ra naha tsi yu. Tan vasu cahnu tyiñu nyisó ra can naha ra, maa tyin tsa cuenda yuhu, yofi jahá. Tyin ña cahnu cuví yo nuu Nyoo vasu ndi maa tsa cahnu tyiñu nyisó yo. ⁷ Ra cuví ityi nuu vehe ñuhu naha ra, nduve inga tuhun tsahá cuenda ra naha tsi yu tyin nacoto ra naha tyin maa Nyoo jaquitsi tsi yu tyin cahan yu tuhun ra Cristo tsihin nyívi tsa ñavin nyívi Israel cuví. Tumaa tsa jaquitsi ra tsi ra Pedro tyin cahan ra tsihin nyívi Israel. ⁸ Tyin juvin ñi maa Nyoo tavá tyiñu tsi ra Pedro tyin cahan ra tuhun ra Cristo tsihin nyívi Israel. Tan tavá tyiñu tucu ra tsi yuhu tyin cahan yu tuhun ra tsihin nyívi tsa ñavin nyívi Israel cuví.

⁹ Yacan cuenda ra cuví ityi nuu naha ra, ra Jacobo, ra Pedro tan ra Juan, nacoto ra naha tyin Nyoo tsahá ra tunyee ñi tsi yu tsa cahan yu tuhun ra Cristo tsihin nyívi. Tan tsahá ra naha ndaha ra naha tiñi ndi, tsihin ra Bernabé tyin ndoo ra naha vaha tsa cahan ndi tuhun ra Cristo tsihin nyívi tsa ñavin nyívi Israel cuví, tan maa ra naha cahan tucu ra naha tsihin nyívi Israel. ¹⁰ Tan cahan ra naha iin tuhun tsihin ndi, na nducuhun ñi ndi tsi nyívi ndaahvi tan na jatinyee ndi tsi ñi. Tan yacan cuví tsa nducú xaan yu cuhva javahá yu tandihi ñi quivi.

Nu nduxaŋn ra Pablo tsi ra Pedro tyin ña vaha tsa javahá ra

¹¹ Maa tyin quivi tsahan ra Pedro ñuu Antioguá, nuu nuu ra tan cuxaan yu tsi ra tyin ña vaha tsa javahá ra. ¹² Tyin tsa jihna ñi vaha javahá ra tyin tsatsi ra tsihin ñi tsa ñavin nyívi Israel cuví. Maa tyin tsa tsaa juhva ra Israel naha ra tsa jaquitsi ra Jacobo, tacan tan quitsahá jatsiyó ra tsi ra tan ña cuñi ca ra catsi ra tsihin ñi ican. Javahá ra tacan tyin yuuhvi ra coto cuxaan ra tsa tsaa can naha ra tsi ra tyin ndi nyitá

íñi ra can naha ra tuñi Nyoo. ¹³ Tacan tan inga ra Israel tsa yihí cuenda ra Cristo, ndu iin ra naha tsihin ra Pedro. Tan javahá ndihi ra naha tsa ña vaha can. Tyin javahá ra naha tumaa javahá ra Pedro vasu tsitó ra naha tyin ña vaha can. Tan nda cuenda ra Bernabé tan ndu iin ra tsihin ra naha. ¹⁴ Tan nyehe yu tyin ña vaha javahá ra naha. Ñavin tumaa cuhva catyi tuhun ra Cristo. Yacan cuenda cahan yu tsihin ra Pedro nuu tandihi ra yucú ican: “Yooho cuví un iin ra Israel. Tan iyó un tumaa iyó nyívi tsa ñavin nyívi Israel cuví. ¿Nacaa tsa cuñi un jañiñi un tsi nyívi tsa ñavin nyívi Israel cuví na coo ñi cuhva iyó ñi Israel? [Tan ndi maa un tan ña javahá un tacan]”, catyi yu tsihin ra.

¹⁵ Maa yo nda ndi cacú yo tan cuví yo ra ñuu Israel ña javahá xaan yo cuatyí tumaa javahá ñi tsa ñavin nyívi Israel cuví. ¹⁶ Maa tyin tsitó yo tyin ña cuví janduvaha yo tsi yo nuu Nyoo tsihin tsa nducú yo cuhva tyaa yahvi yo ley tsahnu tsa tyaa ra Moisés. Tan nduvahá yo nuu Nyoo tsa cuenda tsa tsinú ñi ñi yo tsi ra Jesucristo. Yacan cuenda tsinú ñi yo tsi ra, tyin tacan tan coo vaha yo tsihin ra, tan ñavin tsa cuenda tsa nducú yo cuhva tyaa yahvi yo tsa catyi ley can. Tyin ndi intuhun yo tan ña nduvahá yo nuu Nyoo tsihin tsa nducú yo cuhva javahá yo cuhva catyi ley tsahnu can.

¹⁷ Maa tyin vityin tatun nducú yo cuhva nduvaha yo nuu Nyoo tsa cuenda ra Cristo, cuñi tsi catyi tyin nacoto yo tyin iyó tucu cuatyí yo tumaa iyó cuatyí ñi tsa ñavin nyívi Israel cuví. Tatun tacan, ¿a cuñi tsi catyi tyin iyó cuatyí yo jahá maa ra Cristo tyin nacoto yo tyin iyó cuatyí yo? Ñavin tacan. ¹⁸ Maa tyin tun cua cuita nyico ñi yo ley tsa tsa yahá nacoo yo, yacan nditsa cua coo cuatyí yo. ¹⁹ Tyin ley can janahá tsi tsi yu tyin taahán tsi cúu yu tsa catyi cuatyí yu, tan yacan cuenda ña nducu ca yu cuhva cacú yu tsihin ley can, tyin tacan tan cuví coo yu tsa cuenda Nyoo. ²⁰ Yuhu, tumaa tsa iin caa ñi tsihi yu nuu cruu tsihin ra Cristo. Tan ñavin ca maa yu iyó, tyin ra Cristo iyó añima yu vityin. Tan cuhva iyó yu vityin, iyó yu tsihin tsa tsinú ñi yu tsi ra tsa cuví ra Sehe Nyoo. Tyin maa ra cuñi ra tsi yu, tan tsihi ra tsacatyí cuatyí yu. ²¹ Ña cuñi yuhu tyaa tsiyo yu tunyee ñi tsa tsahá Nyoo tsi yo. Tyin tun tsatyin cuví cacú yo jahá ley tsahnu, nduve nacatyí tsihi ra Cristo.

3

Naquihín yo Tatyí ñi Nyoo tsa cuenda tsa tsinú ñi yo tsi ra Cristo

¹ Naa tsa soho iyó nyoooho, nyívi Galacia! ¿Yóo tsa jatívi tsi ndo tan ña tyaa yahvi ca ndo tsa nditsa? Catsi xaan tsahá cuenda ndi tuhun ra Jesucristo tsi ndo. Tan cutuñi vaha

iñi ndo nacuenda tsihi ra nu cruu. ²Intuhun ñi tsa cuñi yu nducu tuhun yu tsi ndo. ¿A naquihin ndo Tatyí li Nyoo tsa cuenda tsa javahá ndo tsa catyí ley ra Moisés, a tsa cuenda tsa tsiñi ndo tuhun ra Cristo tan tsinú ñi ndo tsi ra? ³¿Nacaa tsa soho xaan iyó ndo vityin? Tan quivi jihna ñi vaha xaan tyaa yahvi ndo tsi Nyoo tsihin tunyee ñi Tatyí li ra. Tan vityin, ¿nacaa cuñi ndo coo ndo tsihin tunyee ñi maa ndo? ⁴¿A tsa cuatu ñi nyehe ndo nacaa jatinyee Tatyí li Nyoo tsi ndo nu nyehe ndo tundoho? Ñavin tsa cuatu ñi cuví yacan, cuñi yuhu. ⁵¿Nacaa tsahá Nyoo Tatyí li ra tsi ndo, tan javahá ra tsa iyo nyehe ndo? Ñavin tsa cuenda tsa nducú ndo cuhva javaha ndo tsa catyí ley tan javahá ra yacan tsihin ndo; javahá ra yacan tyin tsiñi ndo tuhun ra Cristo tan tsinú ñi ndo tsa caahán ra.

⁶Ra Abraham, tsinu ñi ra tsa cahan Nyoo tsihin ra, yacan cuenda Nyoo naquihin tsi ra tumaa tsatyin vaha ra. ⁷Yacan cuenda taahán tsi coto ndo tyin nyivi tsa nditsa cuví tata ra Abraham, juven ñi cuví ñi tsa tsinú ñi tsi Nyoo. ⁸Tan tsanaha ndog tuhun Nyoo nu tutu. Tan catyí tsi tyin nu cuahán ca tsi quivi, cua janduvaha Nyoo tsi nyivi tsa ñavin nyivi Israel cuví tsa cuenda tsa tsinú ñi ñi tsi ra. Yacan cuenda catyí Nyoo tsihin ra Abraham tsanaha: “Tandihi maa nyivi cua nasoco yu tsi ñi tsa cuenda un”, catyí Nyoo tsihin ra. ⁹Yacan cuenda ñi tsa tsinú ñi tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsinu ñi tucu maa ra.

¹⁰Nyivi tsa nyitá ñi ley tsa tyaa ra Moisés, cua tatsi tuñi Nyoo tsi ñi. Tyin tuhun Nyoo catyí tsi. “Tandihi nyivi tsa ña tyaa yahvi tandihi ley tsa nyaá nu libru ley Nyoo, cua tatsi tuñi Nyoo tsi ñi.” ¹¹Tan nditsa tyin yofi nduvahá jaha Nyoo tsa cuenda tsa nyitá ñi ñi ley can. Tyin tuhun Nyoo catyí tsi: “Ra tsa nduvahá nuu Nyoo tsa cuenda tsa tsinú ñi ra, juven ra cua coo ñayivi tsa ña cua naa maa”, catyí tuhun Nyoo. ¹²Tan ley ra Moisés ña catyí tsi tun taahán tsi tsinu ñi yu. Tyin catyí ley can: “Nyivi javahá tsa catyí ley ihya, coo ñi ñayivi nyito tsa cuenda can”, catyí tsi.

¹³Ley can catyí tyin taahán tsi cúu yo tsa cuenda cuatyí yo, tan ña ndacá ñaha ca tsi tsi yo tyin ra Cristo tsa tavá nuña ra tsi yo. Tan maa ra naquihin tandihi cuatyí yo. Tyin catyí tuhun Nyoo: “Tandihi maa ra tsa ticaá nu yutun, tatsi tuñi Nyoo tsi ra.” ¹⁴Tacan cuví tyin tsa cuenda ra Cristo Jesús tan nasocó Nyoo tsi nyivi tsa ñavin nyivi Israel cuví, tumaa catyí ra tsihin ra Abraham tyin cua nasoco ra tsi ra. Tan tsa cuenda tsa tsinú ñi yo tsi Nyoo, naquihin yo Tatyí li tsa catyí Nyoo tyin cuhva ra tsi yo.

Ley tsahnu janahá tsi tsi yo tyin iyó cuatyí yo, maa tyin ña jacacú tsi tsi yo

¹⁵Yañi, cua cahan yu iin cuhva tsihin ndo, cuhva iyó yo nu ñuhu ñayivi ihya. Tatun iin ra tan catyí ra tyin cua cuhva ra tsa cuhva ra tsi inga ra, tan tatun tsa yahá tyihí ra firma ra, yofi ca cuví quihin nyaa can. Tan yofi ca cuví natyiso juhva ca siqui can. ¹⁶Tan Nyoo catyí ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyí tsi nu tutu Nyoo tun cuhva ra tsi tandihi ra cuví tata ra, tyin intuhun ñi ra cua cuhva ra. Tan juven ra can cuví ra Cristo. ¹⁷Tsa caahán yu, cuví tsehe: Nyoo natuhun tahan ra tsihin ra Abraham. Tan ndog vaha ra tuhun tsihin ra. Tacan tan yahá cumi cientu oco utsi cuiya tan tsaa ley tsa tyaa ra Moisés. Maa tyin ña cuví caní ley can tuhun tsa ndog Nyoo tsihin ra Abraham. Tan ña cuví casí tsi nu naquihin yo tsa catyí Nyoo tyin cuhva ra tsi yo. ¹⁸Tun tsatyin tsa cuenda ley ra Moisés tan naquihin yo tsa taahán tsi tsi yo, cuatu xaan ndog Nyoo tuhun tsihin yo. Maa tyin tsitó yo tyin ñihí ra Abraham tsa ñihí ra tyin tsahá Nyoo tsa catyí ra tyin cuhva ra tsi ra.

¹⁹Tatun tacan, ¿nacuenda vaha ley ra Moisés? Tsa jihna ñi Nyoo catyí ra tyin cuhva ra tsa vaha tsi ra Abraham. Yahá can tan tsahá ra ley can tsi ra Moisés tan janahá tsi tyin iyó cuatyí yo. Tan ángel Nyoo tsahá cuenda ley can tsi ra Moisés. Tan ra Moisés tsahá cuenda can tsi nyivi. Tan ndog tsi nda cuenda quivi tsa quitsí ra Cristo, ra cuví tata ra Abraham. Juvin ra cuví ra tsa catyí Nyoo tyin cua cuhva tsa vaha tsi yo. ²⁰Tan juven ñi maa Nyoo cahan tsihin ra Abraham quivi can. Tan ña tsiñi ñuhu tsa nducu siin ra iin ra nacatyí tuhun tsihin ra Abraham.

²¹¿A cuñi tsi catyí tyin ley tsa tyaa ra Moisés ña nacatsí tahan tsi tsihin tsa catyí Nyoo tyin cuhva ra tsi yo? Ñavin. Tun tsatyin cuví coo yo ñayivi nyito jaha ley can, cuví nduvaha yo nuu Nyoo tsa cuenda tsi. Maa tyin ña cuví. ²²Tyin catyí nu tutu Nyoo tyin iyó cuatyí tandihi nyivi. Tyin tacan tan nyivi tsa tsinú ñi tsi ra Jesucristo cuví ñihí ñi ñayivi nyito tsa catyí Nyoo tyin cuhva ra tsi yo.

²³Tsa ndi cumañi ca tsinú ñi yo tsi ra Cristo, ley can yihí ndaha tsi yo tumaa tsa tsinyi yo vehe caa. Tacan cuví nda cuenda janahá Nyoo tsi yo nacaa tan tsinu ñi yo tsi ra. ²⁴Tan ley can cuví tsi tumaa iin nyivi jahá cuenda tsa nyihi. Tyin jahá cuenda tsi tsi yo nda cuenda quivi quitsí ra Cristo. Tan cuví tsinu ñi yo tsi ra tan nduvahá yo nuu Nyoo. ²⁵Tan vityin tsa tsaa quivi tsa tsinú ñi yo tsi ra Cristo, yacan cuenda ña jahá cuenda ca ley can tsi yo.

²⁶ Tyin tandihi yo cuví yo sehe Nyoo tyin tsínú iñi yo tsi ra Cristo Jesús. ²⁷ Tan tandihi yo tsicoondutyá yo tan ndu iin yo tsihin ra Cristo, tan nanduví yo tumaa maa ra. ²⁸ Ña ñiñi xaan ca tsa cuví yo nyívi Israel, a cuví yo nyívi Grecia; a cuví yo musu, a ñavin musu cuví yo; a cuví yo rayíi, a ñaha. Yofí ca caahán tuhun yacan, tyin tsa iin ñi cuví yo tsihin ra Cristo, intuhun ña nyívi cuví yo tsihin ra. ²⁹ Tan tatun cuenda ra Cristo yihí ndo, nditsa tsa tata ra Abraham cuví ndo. Tan ñihí ndo tsa catyí Nyoo tsihin ra Abraham tyin cuhva ra tsi ra.

4

¹ Cua cahan yu iin cuhva tsihin ndo. Tatun iin ra luhlu tan tsihi jutu ra, tan nacoq jutu ra tandihi tsa cuca ra tsi ra, ra luhlu can cua cutyíñu ra can nda cuahnu ra. Tan tsitsi tsa ndi cumañi ca cuahnu ra, cuví ra tumaa iin musu ñi. Vasu tsii maa ra cuví tandihi tsa cuca jutu ra. ² Iyó ra jahá cuenda tsi ra nda cuanda tsaa cuiya ra tsa catyí jutu ra tyin cua naquihin ra ndaha tyiñu tsa nacoq ra tsi ra. ³ Tan tacan cuví maa yo. Tsa ndi cumañi ca quítsi ra Cristo, cuví yo musu cuhva iyó nyívi iyó nu ñuhu ñayívi ihyá. ⁴ Maa tyin quívi tahañ tsi, Nyoo jaquítsi ra tsi Sehe ra. Tan jacacú iin ñaha tsi ra. Tan tsindaca ñaha ley tsahnu Nyoo tsi ra. ⁵ Jaquítsi Nyoo tsi ra tyin jacacu ra tsi yo tsa ña quíhi ndaha ca ley tsi yo. Tyin tacan tan naquihin cuenda Nyoo tsi yo tumaa sehe ra.

⁶ Tan tsa cuenda tsa nanduví yo sehe ra, Nyoo jaquítsi ra Tatyí Ii ra Cristo cunyaa aña yoo. Tan tsa cuenda Tatyí Ii ra caná tsaa yo tsi Nyoo tan catyí yo: “Tyatya”. ⁷ Yacan cuenda sehe Nyoo cuví yo tan ña cuví ca yo tumaa iin musu. Tan tsa cuenda tsa cuví yo sehe Nyoo, tsahá ra tsa cuca ra tsi yo tsa cuenda ra Cristo.

Tsicá iñi ra Pablo tsa cuenda nyívi yihí cuenda Nyoo

⁸ Tan quívi tsa ñaha ca nacoto ndo tsi Nyoo, cuví ndo musu tsitoho tsa ñavin Nyoo cuví. ⁹ Maa tyin vityin tsa nacotó ndo tsi Nyoo. Vaha ca catyí yu, maa Nyoo nacotó ra tsi ndo. ¿Nacaa tsa cuñi ndo quihin nyico ndo tuhun ndaahvi tsa nduve tunyee iñi iyó tsi, tan cuví nyico ndo musu? ¹⁰ Nyoocho ndi jacahnú ca ndo quívi víco, quívi nduyutyá yoo, tan víco tandihi ñi cuiya. ¹¹ Yuuhví xaan yu coto iin tsa cuatu ñi cuví tyiñu jahá yu tsihin ndo.

¹² Yañi, caahán ndaahvi yu tsihin ndo coq ndo tumaa iyó maa yu. Tyin yuhu ña yihí ndaha ca ley tsahnu tsi yu. Tumaa tsa ña yihí ndaha ley tsahnu tsi maa ndo. Tan tsa tacan iyó yu, ña cuñi yu tsa caca iñi ndo tyin jatívi ndo tsi yu. ¹³ Tan tsa tsitó ndo tyin quívi quítsi jihna yu ñuu ndo iyó iin cuehe tsi

yu, yacan cuenda ndoq yu juhva quívi tsihin ndo, tan cahan yu tuhun ra Cristo tsihin ndo. ¹⁴ Tan vasu ndi maa tsa cuuhví yu tsihin cuehe can vaha naquihin cuenda ndo tsi yu tan ña tyaa tsiyo ndo tsi yu. Naquihin cuenda ndo tsi yu tumaa tun cuví yu iin ángel tan tumaa tun ra Cristo cuví yu. ¹⁵ Tan vityin ¿numaa cuahán tsa si xaan cuñi ndo tsihin yu quívi can? Tyin yuhu cuví yu tsandaa tyin quívi can, nda cuanda cuñi ndo tava ndo tinuu ndo tan cuhva ndo tsi yu, tun tsatyin cuví nduvaha yu tsihin yacan. ¹⁶ Tan vityin, ¿a nanduví yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

¹⁷ Nyívi can, cuñi xaan ñi tsi ndo catyí ñi. Maa tyin ña nditsa ñi. Caahán ñi tacan tyin cuñi ñi tsa cunyicun ndo tsi ñi tan ña tsinu ca iñi ndo tuhun caahán yu. ¹⁸ Vaha tsa cuñi yo tsi nyívi, maa tyin cuñi yo tsi ñi tsihin tsa vaha, tan ña cuñi yo tsi ñi tañi ñi cuhva tsa tyin nyíi ñi yu tsihin ndo. ¹⁹ Nyoocho ra cuatyí sehe yu, nyehé nyico yu tundoho tan tsa uhvi tsa catyí ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi nyaá ca cua nyehé yu tundoho nda cuanda cuahnu ndo tsihin tunyee iñi maa ra Cristo. ²⁰ Vaha xaan tun tsatyin cuví cunyíi yu tsihin ndo vityin ihyá. Tyin tacan tan cuví nasama yu cuhva cahan yu tsihin ndo. Tyin vityin ña tsitó yu náa caca iñi yu tsa cuenda ndo.

Na coo yo tsa cuenda Nyoo tan ñavin tsa cuenda ley tsahnu

²¹ ¿A ñaha ca cahvi ndo tsa caahán ley tsa tsahá Nyoo tsi ra Moisés? tyin cuñi ndo cundaca ñaha can tsi ndo, catyí tuhun ndo tsihin yu tun ñaha ca cahvi ndo can. ²² Catyí tsi tyin ra Abraham tsicoq uvi taahan sehe ra. Tsicoq iñi sehe ra tsihin ña Agar tsa cuví musu ñasihi ra. Tan tsicoq inga sehe ra tsihin ña Sara ñasihi vaha maa ra. ²³ Cacú sehe ñaha tsa cuví musu can tumaa cacú tandihi ca maa lee. Maa tyin sehe ñasihi ra Abraham cacú ra tumaa catyí maa Nyoo tsihin ra tyin cua cuví. ²⁴ Tan tuhun can iyó tsa cuñi tsi catyí tsi tsihin yu. Nduvi taahan ñi ñaha can cuví ñi tumaa nduvi taahan tuhun tsa ndoq Nyoo tuhun tsihin yu. Intuhun tuhun can cuví cuenda yucu Sinaí. Tan nyívi yihí cuenda ley can cuví ñi tumaa ña Agar, tyin iin musu ñi cuví ña tsihin sehe ña. ²⁵ Tumaa ña Agar, tan tumaa yucu Sinaí tsa canyíi Arabia, tacan cuví ñuu Jerusalén nda quívi vityin. Tyin nyívi ñuu can yihí ndaha ley tsahnu tsi ñi. Tan cuví ñi tumaa musu ley can. ²⁶ Maa tyin nda gloria iyó inga Jerusalén, tsa cuví ñuu yoo. Tan ñuu can iyó nuña tsi. Yacan cuenda yoo iyó nuña yu tyin ñuu can cuví tumaa sihi yo. ²⁷ Tan catyí tuhun Nyoo tyehen:

Cusii iñi yoocho, ñaha tsa ña cuví coo sehe. Yoocho tsa nduve sehe iyó.

Caná tsaa tsihin tsa sii cuñí un, tyin ña tsito un tsa uhvi cacú sehe un.

Cusii iñi tyin cua cuhva cuaha ca yu sehe un tan ñavin ca ñaha iyó yí, catyí tuhun Nyoo.

²⁸ Yañi, yoo cuví yo tumaa ra Isaac, sehe ra Abraham tyin cacú ra cuhva catyí maa Nyoo tsihin jutu ra. ²⁹ Ra sehe ñaha tsa cuví musu can, xaan iñi ra tsi ra Isaac sehe ñasiihi ra Abraham. Tacan cuví tucu vityin ihya. Ra tsa cuñí tyin javaha yo tsa catyí ley, xaan iñi ra naha tsi yo tsa cuví yo nyívi cacú tsaa tsihin Tatyí Ii Nyoo. ³⁰ Tan ¿náa catyí tuhun Nyoo? Catyí tsi: “Tava tsiñá tsi ñaha tsa cuví musu can tsihin sehe ña, tyin ña cuví naquihin sehe ña tsa taahán tsi tsi sehe ñaha tsa ñavin musu cuví”, catyí tuhun Nyoo. ³¹ Yacan cuenda, yañi, ña cuví yo tumaa cuví sehe ñaha tsa cuví musu can. Tyin cuví yo tumaa cuví sehe ñasiihi ra Abraham, tyin ñavin musu cuví yo. [Tan Nyoo naquihin cuenda ra tsi yo tyin tsiñú iñi yo tsi ra tan ñavin tsa cuenda tsa tyaa yahvi yo ley tsahnu.]

5

Na tyaa yahvi yo tuhun ra Cristo tan ña cuhva yo cundaca ñaha ley tsahnu tsi yo

¹ Ra Cristo tsa yaha jacacú ra tsi yo ndaha ley tsahnu can. Yacan cuenda jaha ndo cuenda tsi ndo, coto nanduvi ndo musu inga tsaha.

² Tyaa soho ndo, yuhu ra Pablo caahán tsihin ndo. Tatun cuhva ndo tsa cunyaa tuñi Nyoo tsi ndo tan cuñi ndo tyin cua jacacu yacan tsi ndo, ña cua cuví jatinyee ra Cristo tsi ndo. ³ Cuñí yu cahan yu tsihin ndo inga tsaha tuhun ihya: Tandihi ra tsa cuñí cacú tsihin tsa cunyaa tuñi Nyoo tsi ra naha, cuñí tsi javaha ra naha tandihi maa tsa catyí ley ra Moisés. ⁴ Tandihi nyoocho tsa nducú nduvaha nuu Nyoo tsihin tsa javaha ndo cuhva catyí ley can, tsa quita tsiyo ndo nuu ra Cristo. Tan jaña ndaha ndo tsa vaha tsa tsahá Nyoo tsi ndo. ⁵ Maa tyin yoo tsihin tsa jatinyee Tatyí Ii Nyoo tsi yo tan tsiñú iñi yo tsi ra Cristo, tan nyíta iñi yo nduvahá yo nuu Nyoo. ⁶ Tyin tatun iin ñi cuví yo tsihin ra Cristo Jesús, yofi jaha tun nyaá tuñi Nyoo tsi yo, o nduve. Tyin cahnu ca cuví tsa tsiñú iñi yo tsi ra Cristo. Tan tsihin tsa tsiñú iñi yo cuví coo yo, tan cuñí tahan ca yo tsi yo.

⁷ Nyoocho vaha xaan cuahán ndo quivi can. ¿Tan vityin yoo jandu uvi iñi ndo? Tan ña tyaa yahvi ca ndo tsa nditsa. ⁸ Tuhun tsa janahá ñi can, ñavin tuhun Nyoo, ra tsa cana tsi yo, cuví can. ⁹ Tyin tumaa ndaa yutsan paan jahá luxu ñi yutsan iya, tacan cuví iin nyívi caquiñi, cuaha ca nyívi cuví jativi ñi. ¹⁰ Nyoo cua tatsi tuñi ra tsi nyívi jandu uvi

iñi ndo. Nduve cuenda ra yóo ñi cuví ñi. Maa tyin yuhu tsiñó vaha yu tyin Jutu Mañi yo cua jatinyee ra tsi ndo tan ña cua tyaa iñi ndo inga cuhva tsa ña janahá yu tsi ndo.

¹¹ Tan tsa cuenda yuhu, yañi, tun tsatyn catyí yu tyin ra tsiñú iñi tsi ra Cristo cuñí tsi tsa cunyaa tuñi Nyoo tsi ra, ra Israel can naha ra ña cua cunyaa ndaha ra naha tsi yu. Tan ña ndasi cua cuñi ra naha tsa caahán yu tuhun ra Cristo, ra tsa tsihi nu cruu tsacatyí cuatyí yo. ¹² Maa tyin ra tsa cuñí jandu uvi iñi tsi ndo, vaha taxin ca na quita tsiyo ra naha nu yucu ndo, tyin tacan tan ña cua cuví ca jandu uvi iñi ra naha tsi ndo.

¹³ Nyoocho, yañi, cana Nyoo tsi ndo tsa ña cundaca ñaha ca ley tsi ndo. Tan ñavin tsa cuenda tsa iyó nuña ndo tan cuví javaha ndo náa ndihi tsa cuñí cuñu ñuhu ndo. Maa tyin taahán tsi tsa jatinyee tahan ndo tsi ndo tsa cuenda tsa cuñí tahan ndo tsi ndo. ¹⁴ Tyin iyó iin ley Nyoo, tan catyí tsi: “Cuñi tahan ndo tsi ndo tumaa cuñí ndo tsi maa ndo”, catyí tsi. Tan tatun nditsa tsa cuñí tahan yo tsi yo, tsa javahá ndihi yo tandihi ca tsa caahán ley tsahnu. ¹⁵ Jaha ndo cuenda tyin tatun caahán nyaa tahan ndo tsi ndo tan ndasi cuñí ndo nyehé tahan ndo tsi ndo, cua tivi nu yucu ndo.

Cuhva cuñí cuñu ñuhu yo tan cuhva iyó yo tsihin Tatyí Ii Nyoo

¹⁶ Tsa cuñí yu cahan yu tsihin ndo cuví tuhun ihya: Cqo ndo tsihin tunyee iñi Tatyí Ii Nyoo. Tacan tan ña cua javaha ca ndo tsa ña vaha tsa cuñí cuñu ñuhu ndo. ¹⁷ Tyin tsa javahá yo tsa ña vaha tsa cuñí cuñu ñuhu yo, ñavin cuhva cuñí Tatyí Ii Nyoo javahá yo. Tyin Tatyí Ii Nyoo cuñí tsi tsa javahá yo tsa vaha. Tan cuñu ñuhu yo ña cuñí tsi javahá tsi cuhva cuñí Tatyí Ii Nyoo. Tsa cuñí Tatyí Ii Nyoo cañi tahan can tsihin tsa cuñí cuñu ñuhu yo. Yacan cuenda yíi javaha yo tsa cuñí yo javaha yo. ¹⁸ Maa tyin tatun tsahá yo tsi yo tsa jaquihin ityí Tatyí Ii Nyoo tsi yo, ña cua cundaca ñaha ca ley tsahnu tsi yo.

¹⁹ Ña yíi nacoto yo tsi nyívi javahá cuhva cuñí cuñu ñuhu ñi. Yíhi rayíi, iyó ñasiihi ra naha tan iyó inga ñaha tsi ra naha. Tan yíhi ñiñaha iyó yíi ñi tan iyó inga rayíi tsi ñi. Tan yíhi rayíi quixí ra tsihin ñaha tan ña cuñí ra tindaha ra tsihin ña, tan juvin ñi tacan javaha juhva ñiñaha. ²⁰ Yíhi ñi jacahnú ñi tsitoho. Yíhi ñi tasi ñi. Yíhi ñi ndasi cuñí ñi nyehé ñi nyívi. Yíhi ñi cañi tahan ñi. Yíhi ñi cuiñu ñi. Tan yíhi ñi iin yaha ñi cuxaan ñi. Yíhi ñi tsicá iñi ñi maa ñi tsa vaha tsi maa ñi. Tan yíhi ñi natahvi sava ñi nu yucú ñi tyin cañi tahan ñi. Tan tacan tan quita siin ñi. ²¹ Tan yíhi ñi nyíyo iñi ñi tsa iyó tsi inga nyívi. Tan yíhi ñi tsahñi tahan ñi. Tan yíhi ñi tuhva

ñi tsiñi. Tan yihí ñi cuaha xaan tsatsi ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahán yu tsihin ndo quivi can. Tyin tandihí ñi tsa javahá yacan, ña cua cuví naquihin cuenda ñi nu ndacá ñaha Nyoo.

²² Maa tyin tsa tsahá Tatyí Ii Nyoo tsi yo, cuví tsa cuñí yo tsi Nyoo tan tsi nyivi, tsa sií cuñí yo, tsa taxin cuñí añima yo, tsa nyee xaan iñi yo, tsa vaha iñi yo, tsa vaha nyivi cuví yo, tsa ña cundihi iñi yo javahá yo tsa vaha tsihin nyivi, tsa tsinú iñi yo tsi ra Cristo. ²³ Tan inga tsa tsahá Tatyí Ii Nyoo tsi yo, yacan cuví tsa ndaahvi jahá yo tsi yo, tsa ña javahá yo cuhva cuñí cuñu ñuhu yo. Tatun javahá yo tandihí tsa vaha ihyá, ndi intuhun ley tan ña cua cuví catyi tsi tyin iyó cuatyí yo. ²⁴ Tan yoo tsa yihí cuenda ra Cristo Jesús, tsa yaha jandihí yo tuhun tsa javahá yo tsa ña vaha tsa cuñí cuñu ñuhu yo. ²⁵ Tan tumaa tsa iyó yo ñayivi nyito tsa cuenda Tatyí Ii Nyoo, tacan cuñí ndihí tucu tsi tsa tyaá yahvi yo tsa janahá ra tsi yo.

²⁶ Na ña cahnu jaha yo tsi yo. Tan ña jacañi tahan yo tsi nyivi. Tan na ña nyiyo iñi yo tsa tsii inga nyivi.

6

Taahán tsi jatinyee tahan yo tsi yo

¹ Yañi, tatun nyehé ndo javahá iin ra yañi yo cuatyí, nyoocho tsa ñihí nyaá Tatyí Ii Nyoo tsihin, jatinyee ndo tsi ra na nduvaha ra inga tsaha. Maa tyin cuñí tsi cahan vii ndo tsihin ra tsihin tsa vita iñi ndo. Tan cuñí tsi jahá xaan ndo cuenda tsi ndo coto nducu cuhva ndihí nu ña vaha tsi ndo. ² Na jatinyee tahan yo tsi yo náa tundoho taahán yo. Tyin tatun javahá yo tacan, cuñí tsi catyi tyin tyaá yahvi yo tsi ra Cristo.

³ Tatun ndáa yo cuñí maa yo tyin cahnu nyivi cuví yo, tan nduve náa cuví yo, juvin ñi tsi maa yo jandavi ñaha yo. ⁴ Na jaha jihna yo cuenda tatun vaha tsa javahá yo. Tacan tan coto yo tatun vaha javahá yo tan cusii iñi yo. Tan ña taahán tsi nyehe yo náa javahá inga nyivi. ⁵ Tyin intuhun intuhun maa yo tan taahán tsi cunyeé iñi yo cuiso yo tsa taahán tsi tsi yo.

⁶ Tan cuñí tsi tsa jatinyeeé ndo tsi ra jacuahá tuhun Nyoo tsi ndo. Cuhva ndo náa tsiñi ñuhu tsi ra.

⁷ Tan ña jandavi ñaha ndo tsi juvin ñi maa ndo. Tyin Nyoo yoñi cuví vacu nducu tsi ra. Tyin tandihí tsa tatsí nyivi, yacan cua naquihin ñi. Tyin tatun javahá ñi tsa vaha, tsa vaha cua naquihin ñi. ⁸ Tacan tucu tatun iin nyivi tan javahá ñi tsa ña vaha tsa cuñí cuñu ñuhu ñi, juvin ñi maa tsa javahá ñi cua jativi tsi ñi. Maa tyin tatun javahá ñi cuhva cuñí Tatyí Ii Nyoo, Tatyí Ii Nyoo cua cuhva ñayivi nyito tsa ña cua naa maa coo ñi.

⁹ Yacan cuenda janyee ndo iñi ndo javaha ndo tsa vaha. Tyin tatun ña jandihí yo tsa javahá yo tacan, cua naquihin yo tsa vaha na tahan tsi quivi. ¹⁰ Yacan cuenda tandihí ñi tsaha tsa cuví javaha yo tsa vaha, na javaha yo itsi tsihin tandihí ñi nyivi. Tan tsa jihna ñi taahán tsi javaha yo tsa vaha tsihin nyivi yihí cuenda Nyoo.

Sii xaan cuñí ra Pablo tyin nyehé ra tundoho tsa cuenda ra Cristo

¹¹ Nyehe ndo tsa nahnu letra tyaá yu tsihin ndaha yu nu tutu ihyá vityin. ¹² Ra tsa jañiñi tsi ndo tsa cunyaa tuñi Nyoo tsi ndo, tacan javahá ra naha tyin cuñí ra naha na catyi nyivi tyin vaha xaan ra naha. Tan ña cuñí ra naha nyehe ra naha tundoho tsa cuenda ra Cristo, ra tsa tsihi nu cruu tsa cuenda yo. ¹³ Tyin ndi maa ra tsa nyisó tuñi Nyoo tan ña tyaá yahvi ra naha tandihí tsa caahán ley. Cuñí ra naha tsa cunyaa tuñi Nyoo tsi nyoocho. Tyin tacan tan cuví jacahnu ra naha tsi maa ra naha tyin javahá ndo cuhva caahán ra naha. ¹⁴ Maa tyin yuhu ña cuñí yu cu iyó iñi yu tsi yo tsa cuenda náa ndihí tuhun. Maa tyin cu iyó iñi yu tyin tsihi Jutu Mañi yo Jesucristo nu cruu tsa cuenda yu. Tan maa ra ndacá ñaha tsi yu, tan ña cuñí ca yu tsa iyó ñuu ñayivi ihyá tyin ña ndaca ñaha ca yacan tsi yu. ¹⁵ Tyin tatun nyicún yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuví, tsa nanduví yo iin nyivi tsa tsa cuenda ra. ¹⁶ Tandihí nyoocho tsa iyó tacan, naquihin ndo tsa taxin coo añima ndo. Tan na cundaahvi iñi Nyoo nyehe ra tsi tandihí ndo, tyin nditsa tsa cuví ndo nyivi cuenda ra.

¹⁷ Vityin tan nu cuahán tsi ityi nuu, ndi intuhun ndo tan ña cua cuhva ca ndo tsihi tsi yu. Tyin tandihí paa tsa nyecú cuñu ñuhu yu, cuñí tsi catyi tsi tyin nditsa tsa cuví yu iin ra tsicá tyiñu Jutu Mañi yo Jesús.

¹⁸ Yañi, na nasoco Jutu Mañi yo Jesucristo tsi tandihí ndo.

Tan na cuví tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Éfeso

Nu quitsahá javahá ra Pablo carta

¹ Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyooho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsi yu carta ihya tsi ndo. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Tsa iin ñi cuví yo tsihin ra Cristo, Nyoo nasocó xaan ra tsi yo

³ Na jacahnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tsihin tandihí nuu tsa vaha tsa iyó gloria tsa cuenda tsa iin ñi cuví yo tsihin ra Cristo. ⁴ Tsa ndi cumañi ca javaha ra ñuhu ñayivi tan nacatsj ra tsi yo tyin ndu iin yo tsihin ra Cristo. Tyin tacan tan cuiti coo yo nuu ra tan ña coo ca cuatyí yo. ⁵ Tsa cuenda tsa cuñí ra tsi yo, tyaá ra cuhva tahanan tsanaha tyin nanduvi yo sehe ra tsa cuenda ra Jesucristo. Tacan javahá ra tyin tacan cacú iñi maa ra. ⁶ Yacan cuenda taahán tsi jacahnu xaan yo tsi ra, tyin tsahá ra tsa vaha tsa iyó tsi ra tsi yo nu jandu iin ra tsi yo tsihin Sehe ra, ra tsa cuñí xaan ra. ⁷ Nyoo cuñí xaan ra tsi yo. Tan yacan cuenda tyahvi ra tsihin niñi Sehe ra tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo. ⁸ Tan tsa janahá ra tsi yo tyin cuñí xaan ra tsi yo, tsahá ra tsa nyityi ra tan tsa tsinú tuñi ra coo tsi yo. ⁹ Tan tsahá ra tsa nacotó yo tuhun tsa tyihí ra cuhva tahanan tsanaha tyin javaha ra tsihin ra Cristo. Tan tandihí tuhun can tsicumj xeehe ra tan ña jacotó ra can tsi nyivi tahanan tsanaha. ¹⁰ Maa tyin tsa cua tahanan tsi quivi cundaa tuhun tsa tyihí ra cuhva, cua jandu iin ra tandihí tsa iyó nu ñuhu ñayivi ihya tan andivi, tan cua nacuhva cuenda ra tandihí can tsi ra Cristo tyin quihí ndaha ra.

¹¹ Tan tsa cuenda tsa iin ñi cuví yo tsihin ra Cristo, ñihí ndihí yo tsa ñihí ra, tyin maa Nyoo cuñí tacan. Yacan cuenda nacatsj ra tsi yo, tyin tacan tyihí ra cuhva tyin javaha ra tyin maa ra javahá tandihí cuhva nyehé ra tyin vaha. ¹² Javahá ra tyehen tyin nyuhu tsa natsinú jihna iñi tsi ra Cristo jacahnu ndi tsi Nyoo tsa cuenda tsa cahnu cuví ra. ¹³ Tan tacan tucu nyooho natsinú iñi ndo tsi ra Cristo, tan ndu iin ndo tsihin ra quivi tsa tsinú ndo tuhun Nyoo tsa cuví tsa nditsa, tan nácaa jacacú ra tsi yo. Tan tsahá ra Tatyí li ra coo añima ndo, tumaa catyí ra tyin cua javaha ra tan yacan cuñí tsi catyí tyin cuví

ndo nyivi yihí cuenda ra. ¹⁴ Nyoo jihna ca Tatyí li ra tsahá ra tsi yo tyin tacan tan cuita iñi yo tandihí ca tsa cua cuhva ra tsi yo quivi jandu iin ra tandihí nyivi tsa cua cacú. Tyin tacan tan jacahnu yo tsi ra, tyin cahnu xaan cuví ra.

Nu tsicán ra Pablo tsi Nyoo na cuhva ra tsa tsinú tuñi tsi nyivi tsa tsinú iñi

¹⁵⁻¹⁶ Yacan cuenda, tsa ñihí tuhun yu tyin tsinú vaha iñi ndo tsi Jutu Mañi yo ra Jesucristo, tandihí ñi tsaha tsa tsicán tahvi yu tsi ra tan tsahá yu tyahvi nyoo tsi ra tsa cuenda ndo tan tsa cuenda tyin cuñí tahanan ndo tsi ndo tsa yihí ndo tuhun Nyoo. ¹⁷ Tsicán yu tsi Nyoo Jutu ra Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi iñi ndo tsa janahá ra tsi yo tsihin Tatyí li ra, tacan tan nacoto vaha ca ndo tsi ra. ¹⁸ Tan tsicán yu tsi ra, na cuhva ra tsa cutuñi vaha iñi ndo, tyin tacan tan coto ndo nacuenda caná ra tsi ndo, tan náa cuví tsa cua cuhva ra tsi ndo ityí nuu ca tyin tsa cua cuhva ra tsi nyivi cuenda ra, sii xaan caá can tan cuca xaan can. ¹⁹ Tan cahnu xaan cuví tunyee iñi tsa iyó tsi ra, tan ña cuví cutuñi iñi yo nácaa tsa cahnu cuví can. Tan yacan cuví tsa jahá tyiñu tsihin yoo tsa tsinú iñi tsi ra. Tan juven ñi maa tsihin tunyee iñi cahnu can ²⁰ Janandotó Nyoo tsi ra Cristo. Tan tyaá ra tsi ra xiin cuaha ra nda gloria. ²¹ Tan yacan cuví nu jacahnu xaan ca Nyoo tsi ra Cristo tan ñavian ca tandihí ca ra ndacá ñaha nu ñuhu ñayivi ihya tan nda andivi. Tyin yofi yoo ra cahnu ca cuví ñuu ñayivi ihya tan ndi ñayivi tsa cua coo, tyin intuhun ñi maa ra Cristo cuví ra cahnu ca cuví. ²² Tan tandihí cuí maa tsa iyó tsahá Nyoo tyin cundaca ñaha ra Cristo. Tan tsahá Nyoo tsa cuvi ra jiñi tsihin nyivi tsa yihí cuenda ra. ²³ Tyin yoo, tsa yihí yo cuenda ra, cuví yo cuñu ñuhu ra. Tan maa ra tsihin yo cuví tsi intuhun ña cuñu ñuhu. Tan juven maa ra janduní ra tandihí tsa iyó.

2

Jacacú Nyoo tsi yo tsa cuenda tsa cuñí ra tsi yo

¹ Nyoo tsahá ra ñayivi nyito coo ndo quivi ndu iin ndo tsihin ra Cristo. Maa tyin tsa ndi cumañi ca tsinu iñi ndo tsi ra Cristo ña nyito añima ndo tyin ndi iyó cuaha cuatyí ndo. ² Tan quivi can ndi javahá ndo cuhva javahá nyivi ña tsitó tsi Nyoo. Ndi tyaá yahvi ndo tsi nu ña vaha tsa ndacá ñaha tsi nu tatyí ña vaha tsa natyuhú tsi nyivi tsa ña tyaá yahvi tsi Nyoo. ³ Tan juven ñi tacan tsicoo tucu yo quivi can, tyin javahá yo tsa ña vaha tsa cuñí cuñu ñuhu yo tan cuhva tsicá iñi yo. Tan tsa cuenda tsa javahá yo tacan, taahán tsi tatsi tuñi Nyoo tsi yo iin caa ñi tsihin tandihí

ca nyivi tsa javahá tsa ña vaha. ⁴ Maa tyin Nyoo cundaahvi xaan iñi ra nyehe ra tsi yo tsa cuenda tsa cuñi xaan ra tsi yo. ⁵ Tan vasu tsa tsihi añaima yo jahá cuatyí yo, Nyoo janandoto ra añaima yo tan tsahá ra ñayivi nyito coo yo nu jandu iin ra tsi yo tsihin ra Cristo. Tan cacú yo jahá tsa cuñi xaan Nyoo tsi yo. ⁶ Tan tsa janandoto ra tsi yo iin caa ñi tsihin ra Cristo Jesús tyaa ra tsi yo tsihin ra nda gloria. ⁷ Tan javahá Nyoo tyehen tyin tacan tan nu cuahán ca tsi ityi nuu cua coto tandihi ca tsa cua coo tyin vaha xaan iñi ra tsihin yo tan cahnu xaan tumañi iñi tsahá ra tsi yo tsa cuenda ra Cristo Jesús. ⁸ Tyin tsa cuenda tsa vaha tsa tsahá Nyoo tsi yo tan cacú yo. Tan ñihi yo tumañi iñi ihya jahá tsa tsinú iñi yo tsi ra Cristo. Tan ñavin tsihin tsa javahá yo tan ñihi yo can, tyin maa Nyoo tsahá can tsi yo. ⁹ Ñavin tsihin tsa javahá yo tsa vaha tan cuví cacú yo. Yacan cuenda ndi intuhun yo tan ña taahán tsi cu iyo iñi yo tyin cacú yo tsihin tsa javahá yo tsa vaha. ¹⁰ Nyoo janduvahá ra añaima yo tsihin tsa ndu iin yo tsihin ra Cristo Jesús. Tacan javahá ra tyin tacan tan javahá yo tsa vaha, tyin nda tsanaha tan tyaa ra cuhva tyin coo yo tacan.

Cuví yo nyivi Israel, a cuví yo nyivi inga ñuu, maa tyin tsa cuenda ra Cristo iin ñi nyivi cuví tandihi yo

¹¹ Catyí ra Israel naha ra tyin ña vaha nyooho tsa ñavin nyivi Israel cuví, tyin ña tsinyaa tuñi Nyoo cuñu ñuhu ndo tumaa maa ra naha. Cuñi maa ra naha tyin vaha ra naha nuu Nyoo tan nyooho ña vaha ndo. ¹² Tan nducuhun tucu iñi ndo tyin nu quitsi tsi tahañ tsanaha, nduve ra Cristo iyó añaima ndo. Tan ndi ña iin ñi cuví ndo tsihin nyivi Israel. Tan ña tsitó ndo tuhun tsa ndoo Nyoo tsihin ra Abraham tan tsihin nyivi tata ra. Tyin iyó soho ñi maa ndo quivi can, tan nduve Nyoo nyaá tsihin ndo. Yacan cuenda nduve náa cua ñihi ndo. ¹³ Tyin ndi luxu tuhun Nyoo tan ña tsitó ndo tahañ tsanaha, maa tyin vityin ndu iin ndo tsihin ra Cristo Jesús tyin quitsi ra tsatí ra ñiñi ra tsa cuenda ndo. ¹⁴ Tyin juvin ra Cristo tsahá tsa taxin coo yo tan jandu iin ra tsi nyooho tsa ñavin nyivi Israel cuví tsihin nyuhu tsa cuví nyivi Israel. Vityin iin ña nyivi cuví yo, tyin jandihi ra tsa xaan cuñi yo nyehé tahañ yo tsi yo. ¹⁵ Tan tsa quitsi ra Cristo tsihi ra nu cruu, tsindihi tuhun tsahnu tsa iyó ndi tsa tyasi nu ndu iin ndi tsihin ndo, tan jandu iin ra tsi ndo tsihin ndi. Tan vityin iin ña nyivi cuví yo nuu ra, tan iyó yo tsihin tsa taxin. ¹⁶ Tan tsihin tsa tsihi ra nu cruu tsindihi tsa ña caahán tsihin tahañ yo, tan nacoq vaha yo tsihin Nyoo jahá ra, iin ña nyivi cuví yo vityin.

¹⁷ Ra Cristo quitsi ra cahan ra tyin cuví coo vaha yo tsihin Nyoo tan tsihin tahañ yo: Cahan ra tsihin ndi tsa cuví ndi nyivi Israel tsa tsa tsitó maa tuhun Nyoo tan tsihin nyooho tsa ña tsitó ndi luxu maa tuhun Nyoo tahañ tsanaha. ¹⁸ Tan tsa cuenda tsa quitsi ra Cristo tsihi ra nu cruu, nduyatyin nyecú yo tsihin Nyoo Jutu yo. Tyin iin ñi Tatyí li ra iyó añaima yo: a cuví yo nyivi Israel, o ñavin nyivi Israel cuví yo. ¹⁹ Yacan cuenda nyooho ñavin ca nyivi inga ñuu cuví ndo, tyin iin ña nyivi cuví ndo tsihin nyivi yihí cuenda Nyoo. Tan cuví ndo nyivi maa ra. ²⁰ Tan cuví ndo tumaa iin vehe. Tan nyecú ndo nu samá ra tava tyiñu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuví ra Cristo Jesús. ²¹ Tan tsata yuu tsa cuví ra Cristo, si xaan cua quita vehe tsa ndi cuahán tsinú, tyin tandihi maa yo cuví nama vehe tsa ndi tsinú can. Tan tsa cua quita tsi, cua cuví tsi iin vehe ñuhu ii tan cua ndu iin tsi tsihin Jutu yo Nyoo. ²² Tan taca tucu nyooho ndu iin ndo tsihin tandihi nyivi yihí cuenda ra Cristo jahá Tatyí li ra, tyin tacan tan cua cuví ndo vehe nu coo Nyoo.

3

Nyoo tava tyiñu tsi ra Pablo tyin cahan ra tuhun ra Cristo tsihin nyivi tsa ñavin nyivi Israel cuví

¹ Yacan cuenda yuhu ra Pablo nyii yu vehe caa ihya tyin jacotó yu tuhun ra Cristo Jesús tsi nyooho tsa ñavin nyivi Israel cuví. ² Taahán tsi coto ndo tyin cahnu xaan tunyee iñi tsahá ra tsi yu tsa cuenda tsa vaha tsi ndo, tyin jacotó yu tuhun ra tsi ndo. ³ Tan Nyoo janahá ra tuhun xeehe tsa tsicumj ra tsi yu, tan tyaa yu juhva tuhun can nu carta ihya tyin coto ndo. ⁴ Tan tsa cua cahvi ndo tuhun tsa tyaa yu ihya cua coto ndo nácaa tsahá Nyoo tyin cutufi iñi yu tuhun ra Cristo tsa tsicumj xeehe ra. ⁵ Tyin nu quitsi tsi tahañ tsanaha, ña janahá Nyoo tuhun xeehe can tsi nyivi, tumaa tsa janahá Tatyí li ra tuhun can tsi ra tava tyiñu ra Jesucristo tan ra cuví ndusu yuhu Nyoo. ⁶ Tan tuhun xeehe can, cuñi tsi catyí tyehen: Nyivi tsa ñavin nyivi Israel cuví cua ñihi ndihi ñi tsa cua ñihi nyivi Israel tyin iin ña cuñu ñuhu cuví yo vityin tsa cuenda tsa jacacú ra Cristo tsi yo. Tan cua ñihi yo tsa catyí Nyoo tyin cuhva ra tsi yo tyin natsinú iñi yo tsi maa ra Cristo Jesús.

⁷ Nyoo tsahá ra tsa vaha tsi yu tan jatinyeé ra tsi yu tyin tacan tan jacoto yu tuhun vaha ihya tsi nyivi. ⁸ Yuhu luhlu xaan ra cuví yu tan ñavin ca tandihi nyivi tsa yihí cuenda Nyoo. Maa tyin Nyoo tsahá ra tumañi iñi cahnu ihya tsi yu tyin cahan yu tuhun ra Cristo tsihin nyivi tsa ñavin ñi Israel cuví. Tyin na coto ñi tsa cuca tsa cua

cuhva ra Cristo tsi ñi. ⁹ Tava tyiñu Nyoo tsi yu na jacoto yu tsi tandihi nyivi nácaa tyaa ra cuhva tsa cua javaha ra tsa ndi cumañi ca javaha ra tandihi tsa iyó, tyin tsanaha ña jacotó ra tuhun tsa tsicumí xeehe ra tsi nyivi. ¹⁰ Tacan cuví tan vityin tandihi ra ndacá ñaha nda andivi cua nyehe tsa vaha tsa javahá Nyoo tsihin yo tsa cuví yo nyivi yihí cuenda ra. Tan cua coto ra naha tyin iyó xaan tsa tsiñi tuñi tsi Nyoo. ¹¹ Tandihí tuhun ihya nacatsi tahan tsi tsihin tsa tyaa Nyoo cuhva tyin javaha ra tsihin Jutu Mañi yo Jesucristo tsa cuenda tsa vaha tsi yo. ¹² Tan tsa cuenda tsa tsinú iñi yo tsi ra Cristo, tsahá Nyoo ndatu tsi yo tsa cunyanaa ca yo tsi ra. Yacan cuenda ña yuuhví yo natuhvá yo nu nyaá ra. ¹³ Tan tsa cuenda tsa tsahá ra ndatu can tsi yo caahán ndaahvi yu tsihin ndo na ña ndu uvi iñi ndo tsa nyehé yu tundoho tsa cuenda ndo. Tyin tsa tyehen nyehé yu tundoho tsa cuenda ndo, tsa vaha tsi maa ndo cuví can.

Tsicán tahvi ra Pablo tyin na nacoto vaha ca nyivi tsi ra Cristo

¹⁴ Tan tsa cuenda tsa nducuhun iñi yu tumañi iñi tsa javahá Nyoo, Jutu ra Jesucristo Jutu Mañi yo tsihin yo, tsicuiñi tsi yu nuu ra. ¹⁵ Tyin juvin ra cuví Jutu tandihi nyivi: ñi tsa cuahán andivi, tan ñi tsa yucú nu ñuhu ñayivi ihya. ¹⁶ Tan tsicán yu tsi ra na jandun- yee xaan ra iñi ndo tsihin Tatyí li ra tsa iyó añima ndo. ¹⁷ Tan na coo ra Cristo añima ndo tsihin tsa tsinú iñi ndo tsi ra. Tacan tan cua cuñi xaan ndo tsi tandihi nyivi, tyin nyanaá vaha ndo tsi Nyoo. ¹⁸ Tacan tan cua cutuñi vaha iñi ndo tsihin tandihi ñi yihí cuenda ra nácaa tsa cahnu xaan tsa cuñi ra Cristo tsi yo. Tan ndi ña cua ñihi ndo cuhva nacatyí tuhun ndo tsihin nyivi nácaa tsa cuñi ra tsi ndo. ¹⁹ Tsicán yu tsi Nyoo na coto ndo nácaa tsa cahnu xaan tsa cuñi ra tsi ndo. Nyoo nyaá maa ra tsihin ndo.

²⁰ Tan vityin na jacahnu yo tsi Nyoo, ra tsa iyó xaan tunyee iñi tsi. Tan cuaha xaan ca tsa cuví javaha ra tan ñavin ca cuhva tsa tsicán yo tsi ra, a cuhva tsa tsicá iñi yo. Tyin juvin ñi tsihin tunyee iñi maa ra tsa tsahá ra tsi yo, javahá ra tandihi. ²¹ Yoo tsa cuví yo nyivi tsinú iñi tsi Nyoo, na jacahnu yo tsi ra tacan ñi maa, tsa cuenda tsa javahá ra Cristo Jesús. Tan na cuví tsi tacan.

4

Iin ñi cuví tandihi yo tsa yihí yo cuenda ra Cristo jahá Tatyí li Nyoo

¹ Yacan cuenda yuhu, tsa nyii yu vehe caa tsa cuenda Jutu Mañi yo, caahán ndaahvi yu tsihin ndo na catsi coo ndo tumaa cuhva taahán tsi coo nyivi tsa nacana Nyoo. Tyin nacana ra tsi ndo na cuví ndo nyivi ra.

² Yacan cuenda jandundaahvi ndo tsi ndo nuu nyivi, tan vita cuhun iñi ndo. Tan ña cutyixin ndo tsihin ñi, tan ña cundihi iñi ndo nyehé ndo tsi ñi tyin tacan tan coto ñi tyin cuñi ndo tsi ñi. ³ Tyin tsa taxin tsa tsahá Nyoo coo añima yo jandu iin tsi tsi yo tan yacan cuenda nducu vaha ndo cuhva tan iin ñi cuví ndo tsihin tsa jatinyee Tatyí li Nyoo tsi ndo. ⁴ Tandihí yoo tsa tsinú iñi tsi ra Cristo Jesús cuví yo intuhun ña cuñi ñuhu tsa cuenda ra. Tan tandihí yo intuhun ñi Tatyí li Nyoo iyó tsihin yo, tan catyí Nyoo tsihin tandihí yo tyin nditsa tsa cua ñihi yo ñayivi nyito coo yo. ⁵ Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoondutya yo. ⁶ Iyó intuhun ñi Nyoo tan maa ra cuví ra Jutu tandihí yo. Tan ndacá ñaha ra tsi tandihí yo, tan iyó ra añima tandihí yo, tan tsatyíñu ra tsi tandihí yo, tan jahá tyiñu yo tyiñu ra.

⁷ Tan tsahá ra Cristo ndatu tsi tsa intuhun intuhun yo cuhva cuñi maa ra. ⁸ Yacan cuenda catyí tsi nu tutu Nyoo tuhun ra Cristo tyehen:

Cunyeé ra jahá canaa ra tsi nu xaan iñi tsi ra, tan quihñ nyaa ra tsi nyivi tsa yihí ndaha nu tan nandaq ra andivi tsihin ñi.

Tan tsahá ra ndatu tsi yo tsa jaha tyiñu yo tyiñu ra, catyí tsi.

⁹ ¿Tan náa cuñi tsi catyí tsa “nandaq ra”? Cuñi tsi catyí tyin nuu jihna ra nu ñuhu ñayivi. ¹⁰ Ra tsa nuu can, juvin ñi ra cuví ra tsa nandaq nda gloria. Tyin tacan tan janduní ra tandihí maa tan cunyaa ra tsihin yo tandihí ñi ityi. ¹¹ Tan juvin ñi maa ra Cristo tsahá ndatu tsi yo. Tsi juhva yo tava tyiñu ra tsi yo tsa caca yo tyiñu ra. Tan tsi inga yo tsahá ra tsa cuví yo ndusu yuhu ra. Tan tsi inga yo tsahá ra tyin jacoto yo tsi nyivi nácaa jacacú ra tsi yo. Tan tsi inga yo tsahá ra tsa jaha cuenda yo tsi ñi yihí cuenda ra, tan tsi inga yo tsahá ra tsa cuví jacuaaha yo tuhun ra tsi ñi. ¹² Tacan tsahá Nyoo ndatu can tsi yo tyin jatinyee tahan yo tsi yo tan tsi inga ca nyivi tyin tacan tan cuahnu ca yo tsihin ra Cristo. ¹³ Nda cuenda ndu iin tandihí yo jaha tsa tsinú iñi yo tsi Sehe Nyoo. Tan nacoto vaha yo tsi ra. Tan cutsa vaha yo nda cuenda tsaa yo cuví yo tumaa cuví maa ra Cristo. ¹⁴ Tacan tan ña cua cuví ca yo tumaa tsa nyihi. Tyin tsa nyihi tatyí xaan tsinú iñi tsi náa luxu tsa ñihi tuhun tsi. Tan na ña cuví yoo tacan tyin coto jandavi ñaha nyivi tsi yo. ¹⁵ Maa tyin tyehen cua javaha yo: cua cuñi yo tsi nyivi tan cua cahan yo tsa nditsa tsihin ñi. Tan ndunyeé ca añima yo tsihin tandihí tsa vaha tsa iyó tsi Nyoo. Tan cuahnu yo tan cuví yo tumaa maa ra Cristo, ra cuví ityi nuu tsihin yo. ¹⁶ Tan tsa

cuenda ra Cristo tandihí yo tsa cuví yo cuñu ñuhu ra, iin ñi cuví yo. Tumaa yihí tahan iin cuñu ñuhu, tan tsa iin tsa iin nu yihí tahan tsi vaha jahá tyiñu tsi. Tan tacan jatinyeé tsi tsi naní cuñu ñuhu can, na coo vaha tsi tan cuahnu tsi. Tan tacan tucu yoo, tsahnú yo tsihin tsa cuñi tahan yo tsi yo tan jatinyeé tahan yo tsi yo.

Tsahá ra Cristo ñayivi nyito coo yo

¹⁷ Tuhun ihya cuví tsa tsahá cuenda yu tsi ndo, catyí Jutu Mañi yo. Ña cgo ca ndo tumaa iyó nyivi ña nacotó tsi Nyoo. Tyin maa ñi maa tsa ña jatinyeé tsi ñi tsicá iñi ñi. ¹⁸ Tan ña cutuñi iñi ñi, tyin ñavin ñayivi Nyoo iyó ñi. Tyin ña tsitó ñi, tsa cuenda tsa ndava añima ñi. ¹⁹ Ña cahan ca nuu ñi javahá ñi tsa ña vaha. Tan nacuhva cuenda ñi tsi ñi tsi tsa caquiñi. Maa ñi tsa ña vaha cuñi ñi javaha ñi. ²⁰⁻²¹ Maa tyin tatun nditsa tsa tsiñi ndo tuhun ra Cristo, cua nducuhun iñi ndo tyin ñavin tacan taahán tsi coo ndo. Tyin tsiñi ndo tan cutuhva ndo tsa nditsa cuví tuhun maa ra Cristo. ²² Yacan cuenda ña cgo ca ndo cuhva tsicog ndo quivi can, tan ña javaha ca ndo tsa caquiñi tsa cuñi cuñu ñuhu ndo, tyin tsanaha, jandavi ñaha xaan can tsi ndo. ²³ Nacuhva cuenda ndo tsi Nyoo na nasama ra cuhva tsicá iñi ndo. ²⁴ Tan cgo ndo ñayivi nyito tyin vityin nyivi tsaá cuví ndo jahá Nyoo. Tan javaha ndo maa ñi tsa vaha na nyehe nyivi tyin iyó ndo ñayivi nyito tyin catsi tan cuñi iyó ndo.

²⁵ Yacan cuenda ña cahan ca ndo cuendu. Cahan ndo maa ñi tsa nditsa tsihin nyivi tyin iin ña cuñu ñuhu cuví tsa tandihí yo.

²⁶ Tatun cuxaan ndo, jaha ndo cuenda coto javaha ndo tsa ña vaha. Juhva ñi cuhva cuxaan ndo. Tan ña quihí tsihi tsi ndo nduvi. ²⁷ Tan ña cuhva ndo ndatu tsi nu ña vaha tsa nducu cuhva nu tsi ndo.

²⁸ Ra tsa tuhva suhu quivi can, na ña suhu ca ra vityin. Na jaha tyiñu ra tsihin ndaha ra. Tacan tan coo tsa tsii ra, tan cuví jatinyeé ra tsi nyivi tsa iyó tsa tsiñi ñuhu tsi ñi.

²⁹ Ña cahan ndo tsa ndavaha ñi. Cahan ndo, maa ñi tsa vaha tsa cua jatinyeé tsi nyivi tsa tsiñi tsa caahán ndo. ³⁰ Tan ña cuhva ndo tucuihya iñi tsi Tatyí li Nyoo tyin Tatyí li ra cuví tuñi tsa tyag ra añima yo nda cuanda ndihí jacacu ra tsi yo quivi cua quitsi ra.

³¹ Ña cahun iñi ndo tsihi. Tan ña cuxaan ndo. Tan ña cuví ndo nyivi tyixin. Tan ña cahan nyaa ndo tsi nyivi, tan ndi ña cahan ndo tsa ndavaha ñi. ³² Maa tyin cuví ndo nyivi vaha, tan cundaahvi iñi ndo tsi nyivi. Tan jaha ndo tucahnu iñi tsi ñi, tumaa jahá Nyoo tucahnu iñi tsi maa ndo tsa cuenda ra Cristo.

5

Nacaa taahán tsi coo nyivi yihí cuenda Nyoo

¹ Ndúcu ndo cuhva coo ndo tumaa iyó maa Nyoo, tyin sehe ra cuví tsi yo, tan cuñi xaan ra tsi yo. ² Cuñi yo tsi nyivi tumaa tsa cuñi maa ra Cristo tsi yo tan quitsi ra tsihi ra nu cruu tsa cuenda yo. Tumaa jamañi ra cuví jutu mbee ticatyí luhlu nuu Nyoo, tacan jamañi ra Cristo tsi ra tsa cuenda yo. Tan sii xaan cuñi Nyoo tsihin ra tsa cuenda tsa javahá ra tacan.

³ Vityin tsa cuví yo nyivi yihí cuenda Nyoo, ña taahán tsi javahá ndo tsa caquiñi tsihin cuñu ñuhu ndo, tan ndi ña cuñi ndo coo cuaha ndaha tyiñi ndo. Tan ña taahán tsi caca iñi ndo ndi intuhun tuhun ihya. ⁴ Ña cahan ndo tuhun tsa tsahá ticanu tsi yo. Tan ndi ña cahan ndo tsa nduve yahvi nyaá. Tyin ña taahán tsi cahan yo tacan. Vaha ca cuhva ndo tyahvi nyoo tsi Nyoo. ⁵ Tyin tsa tsitó ndo tyin tandihí nyivi tsa javahá tsa caquiñi, ña cua quihvi ñi nu ndacá ñaha ra Cristo tsihin Nyoo. Ra tsa iyó tsihin ñaha tan ñavin ñasihi ra cuví ña, a ñaha iyó tsihin rayiñ tan ñavin yí ña cuví ra, tan nyivi tsa cuñi xaan coo cuaha ndaha tyiñu, ña cua quihvi ñi nu ndacá ñaha Nyoo tyin tumaa tsa jacahnú ñi tsitoho cuví can, tyin maa ñi yacan tsicá iñi ñi tan ña jacahnú ñi tsi maa Nyoo. ⁶ Ña cuhva ndo tsa jandavi ñaha nyivi tsi ndo tsihin tuhun tsa nduve yahvi nyaá tsa caahán ñi tyin tsa cuenda tandihí tsa ña vaha can tsa tatsi tuñi Nyoo tsi nyivi tsa ña tyaá yahvi tsi ra. ⁷ Yacan cuenda ña cütahan ndo tsihin ñi.

⁸ Nyoocho tsicog ndo nu naa quivi can. Tan vityin ña taahán ca tsi coo ndo nu naa tyin Jutu Mañi yo tsa tava ra tsi ndo nu nditsin. Yacan cuenda taahán tsi javaha ndo tumaa cuñi maa Nyoo. ⁹ Tyin Nyoo jandunditsin ra añima yo tan janduvahá ra añima yo, yacan cuenda javaha ndo tsa vaha tan cahan ndo maa ñi maa tsa nditsa. ¹⁰ Jañiñi ndo cutuhva ndo cuhva taahán iñi Jutu Mañi yo. ¹¹ Ña javaha ndo cuhva javahá nyivi iyó nu naa. Tyin nduve náa tsa vaha ñihí ñi tsihin can. Vaha ca jacoto ndo tsi ñi tyin ña vaha tsa javahá ñi. ¹² Tyin cahan nuu yo cahan yo tsa javahá xeehe ñi. ¹³ Maa tyin quivi quita tsa yihí xeehe nu nditsin, tacan tan catsi xaan cua nyehe yo. Tyin tsa nditsin Nyoo cua tava tsi tandihí tsa yihí xeehe. ¹⁴ Yacan cuenda iyó nu catyí tsi:

Ndoto yoocho tsa quixí un, nduvita mahñu nu yucú ndiyi.

Tan ra Cristo cua jandunditsin ra ñuhu nu cuahán un, catyí tsi.

¹⁵ Yacan cuenda jaha ndo cuenda cuhva iyó ndo. Tan ña cgo ndo tumaa iyó ra soho.

Coo ndo tumaa iyó ra tsító. ¹⁶Tan ndücu ndo cuhva cahan ndo tuhun Nyoo tsihin nyivi tandihi ñi cuhva tsa nuña ndo, cahan ndo tyin vityin maa ñi maa tsa caquiñi javahá ñi. ¹⁷Yacan cuenda ña soho coo ndo. Ndücu ndo cuhva cutuñi iñi ndo cuhva cuñi maa Jutu Mañi yo. ¹⁸Ña cõho ndo nyixi tan cuvi ndo ra tsiñi tyin cuvi jativi yacan tsi ndo. Maa tyin cuhva ndo tsi ndo cundaca ñaha Tatyí li Nyoo. ¹⁹Cahan ndo tsihin tahan ndo maa ñi tsa vaha, tan jacahnu ndo tsi Nyoo. Cata ndo salmo cuenda ra; cata ndo yaa Nyoo; cata ndo tsa tsahá Tatyí li tsi ndo; jacahnu ndo tsi Jutu Mañi yo tsihin tandihi añima ndo. ²⁰Tacan ñi nacuhva ndo tyahvi nyoo tsi Nyoo Jutu yo tsa cuenda tandihi maa, a sií cuñi ndo, o nyehé ndo tundoho. Nacuhva ndo tyahvi nyoo tsi ra tsihin ndatu tsa tsahá Jutu Mañi yo Jesucristo tsi yo.

Nacaa taahán tsi coo yo tsihin nyivi yo

²¹Tyaa yahvi tahan ndo tsi ndo, tyin tun javahá ndo tacan, tsihin yacan janahá ndo tyin tyaa yahvi ndo tsi Nyoo

²²Nyoocho tsa iyó yí, tyaa yahvi ndo tsa caahán yí ndo tumaa tsa tyaa yahvi ndo tsa caahán Jutu Mañi yo. ²³Tyin rayíi cuvi ityi nuu tsihin ñasihi ra, tumaa cuvi ra Cristo ityi nuu tsihin nyivi yíi cuenda ra. Juvín ñi maa ra jacacú tsi yo tsa cuvi yo cuñu ñuhu ra. ²⁴Yacan cuenda tumaa tsa cuvi ra Cristo ityi nuu tsihin nyivi yíi cuenda ra, tacan taahán tsi tyaa yahvi ñaha tsi yíi ña.

²⁵Tan nyoocho rayíi, cuñi tsi tsa cuñi ndo tsi ñasihi ndo tumaa cuñi ra Cristo tsi yo tsa yíi yo cuenda ra, tan tsahá ra ñayivi ra tsa cuenda yo. ²⁶Tacan javahá ra tan jandundií ra añima yo tsihin tuhun caahán ra tsa cuvi tumaa ndutya, tan nacatyá ra tsi yo quivi tsa natsinú iñi yo tsi ra. ²⁷Ndoó añima yo tumaa ndoó iin jahma, ña nyayu ca tsi, ña tiyi ca tsi. Tyin ra Cristo jandundií ra tsi yo tsa cuvi yo nyivi yíi cuenda ra. Tyin tacan tan cuvi nacuhva cuenda ra tsi yo tsi Nyoo, tyin vaha yo, tan nduve ca cuatyí yo. ²⁸Tacan taahán tsi cuñi rayíi tsi ñasihi ra, tumaa tsa cuñi ra cuñu ñuhu maa ra. Tyin tatun cuñi ra tsi ñasihi ra, cuñi ra tsi maa ra. ²⁹Tyin ndi intuhun yo tan ña cuvi tsa ña cuñi yo cuñu ñuhu yo, tyin jacatsi yo tan jacunditsi yo cuñu ñuhu yo. Tan ra Cristo juvín ñi tacan javahá ra tsihin nyivi yíi cuenda ra. ³⁰Tyin cuñi ñuhu ra cuvi yo. Tan intuhun intuhun yo cuvi yo juhva cuñu ñuhu ra tan yiqui ra. ³¹Catyí tuhun Nyoo: “Rayíi taahán tsi nacao ra tsi jutu ra tan tsi sihi ra, tan ndu iin ra tsihin ñasihi ra. Tan intuhun ña cuñu ñuhu cua cuvi tsa nduvi ñi.” ³²Xeehe xaan tan cahnu xaan tuhun ihya, tan catyí yu tyin cuñi tsi catyí tyin ra Cristo ndu iin ra tsihin nyivi yíi cuenda ra tumaa ndu iin iin rayíi

tsihin ñasihi ra. ³³Tan inga tucu tuhun, cuñi tsi catyí tyin intuhun intuhun ndo taahán tsi tsa cuñi ndo ñasihi ndo, tumaa cuñi ndo tsi maa ndo. Tan nyoocho ñiñaha, tyaa yahvi ndo tsi yíi ndo.

6

¹Nyoocho tsa nyihi, tyaa soho ndo tsa caahán jutu ndo tan sihi ndo. Tyin tacan taahán tsi javaha ndo. ²⁻³Tyin nu tutu Nyoo catyí tsi tyehen: “Jaha tsa ñayivi tsi jutu un tan sihi un”, tan tuhun ihya cuvi tsa jihna ñi catyí Nyoo tyin javaha yo tan cua ñiñi yo tsa cua cuhva ra tsi yo. Tyin tyaa ra cuhva tyin tun javaha yo tacan, sií xaan cua coo yo tan cuaha xaan quivi cua coo yo nu ñuhu ñayivi ihya.

⁴Tan nyoocho tsa iyó sehe, ña javaha ndo tsa ña vaha tsi sehe ndo tan cuxaan iñi tsi tsi ndo. Maa tyin jacuahá ndo tuhun Nyoo itsi naha tsi, tan na cutuhva tsi tyaa yahvi tsi tsi ndo tan tsi Nyoo.

⁵Tan nyoocho tsa cuvi musu, tyaa yahvi ndo tsi ra yíi ndaha tsi ndo nu ñuhu ñayivi ihya. Jaha ndo tsa ñayivi tsi ra naha tsihin tsa ñi iñi añima ndo. Tan ndücu ndo cuhva tyaa yahvi ndo tsi ra naha tumaa tyaa yahvi ndo tsi ra Cristo.

⁶Jaha tyiñu vaha ndo. Ñavin tsa nyehé ñi tsitoho ndo tan vaha jaha tyiñu ndo tan catyí tsitoho ndo tyin vaha xaan ndo. Jaha tyiñu vaha nyoocho tumaa tsatyin tyiñu ra Cristo javahá ndo. Tacan tan cua javaha ndo cuhva cuñi Nyoo tsihin tsa ñi iñi añima ndo. ⁷Jaha tyiñu ndo tsihin tsa sií cuñi ndo tumaa tun jahá tyiñu ndo cuenda Jutu Mañi yo tan ñavin tsa cuenda nyivi. ⁸Tyin tsító ndo tyin Jutu Mañi yo cua tyahvi ra tsi intuhun intuhun ndo tun javahá ndo tsa vaha, vasu ndi maa musu cuvi ndo o ñavin musu cuvi ndo.

⁹Tan nyoocho tsa iyó musu, javaha ndo tsa vaha tsihin musu ndo. Tan ña jayuhvi ndo tsi ñi. Tyin tsító ndo tyin nuu Jutu Mañi yo iin ñi cuvi ndo tsihin musu ndo, tyin ña siin caá iin nyivi tan inga ñi nuu ra.

Tunyee iñi tsa tsahá Nyoo tsi yo tsa yíi yo cuenda ra

¹⁰Tan vityin coo ndo tsihin tunyee iñi tsa tsahá Jutu Mañi yo tsi ndo tyin iin ñi cuvi ndo tsihin ra. Tyin cahnu xaan tunyee iñi iyó tsi ra. ¹¹Jaha cuenda vaha ndo tsi ndo tsihin tunyee iñi tsa tsahá Nyoo tsi ndo tumaa jahá cuenda iin andaru tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu. ¹²Yacan jaha vaha ndo cuenda tsi ndo tsihin tunyee iñi Nyoo tyin cañi tahan yo, maa tyin ñavin tsihin ra ñuu ñayivi, tyin cañi tahan yo tsihin nu ña vaha tsa ña cuvi nyehé yo. Tan nu

ican yihí ndaha tsi nyivi caquiñi. ¹³ Yacan cuenda jaha cuenda vaha ndo tsi ndo tsihin tandihí tsa jatyinyee Nyoo tsi yo. Tyin tacan tan cunyeetse iñi ndo quivi nducu cuhva nu ña vaha tsi ndo. Tan ña cua nduva ndo jaha nu. ¹⁴ Ñihi cunyaa ndo tsihin tuhun Nyoo tumaa nyaá listu vaha iin andaru tun tsa yihí cinturón tsitsi ra. Tan caca vaha ndo ityi tsa nditsa cuvi ityi Nyoo tyin yacan cuvi tsa tyasí yiqui nyica ndo tumaa iin andaru iyó tsa tyasí yiqui nyica ra tan nduve náa taahán ra. ¹⁵ Tacan tucu nyoocho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cuhun ra cuatyí. Tacan taahán tsi janduvaha ndo tsi ndo tsa cua cahan ndo tuhun Nyoo tsihin nyivi. ¹⁶ Tan caci vaha ndo tsi ndo tumaa tyasí ra andaru tsi ra tsihin iin caa tan ña nañi ndaha nduva tsa cayú tsi ra. Tacan taahán tsi cunyecu ñihi ndo tsihin tsa tsinú iñi ndo, tan ña cuhva ndo tsa jaha canaa nu ña vaha tsi ndo. ¹⁷ Ra andaru iyó iin caa ndasí jiñi ra tan jacacú can tsi ra, tacan cuvi tsa jacacú Nyoo tsi yo. Cuatyíñu vaha ndo tuhun Nyoo tyin yacan cuvi tumaa mityi tsahá Tatyí li Nyoo tsi ndo. ¹⁸ Tan ña jandihí ndo tsa tsicán tahvi ndo tsi Nyoo tan tsa caahán ndaahvi ndo tsihin ra tumaa jaquihín ityi maa Tatyí li ra tsi ndo. Yacan cuenda ña ndu uvi iñi ndo tan coo nyito vaha ndo, ndacan tahvi ndihí ndo tsi Nyoo tsa cuenda tandihí nyivi yihí cuenda ra. ¹⁹ Tan ndacan tahvi ndo tsi ra tsa cuenda yu, na ñihi ca yu tuhun cahan yu, tan na ña nayuhvi yu jacoto yu tuhun ra Cristo tsi nyivi. Tyin tsanaha yihí xeehe tuhun ihya tan vityin cua nacoto ñi itsi. ²⁰ Tan tsa cuenda tsa jacotó yu tuhun ra Cristo, nyíi yu vehe caa ihya vityin. Ndacan tahvi ndo tsa cuenda yu, na ña nayuhví yu, tan cahan yu cuhva taahán maa tsi cahan yu.

Nu jacuhún ra Pablo tsi ra Tíquico nu yucú nyivi yihí cuenda ra Cristo

²¹ Tan ra Tíquico, ra yañi yo, cua nacatyí tuhun ra tandihí tuhun yu tsihin ndo. Nñi xaan iñi ra jahá tyiñu ra cuenda Jutu Mañi yo, tan cuñi xaan yo tsi ra. ²² Jaquitsí yu tsi ra nu yucú ndo tyin jacoto ra tsi ndo nácaa iyó ndi ihya, tyin tacan tan ndu iin iñi ndo.

²³ Na cuhva Nyoo Jutu yo tan Jutu Mañi yo Jesucristo tsa taxin coo añaima tandihí ra yañi yo naha ra tan na tsinu ca iñi ra naha tsi ra tan na cuñi ra naha tsi nyivi. ²⁴ Tan na nasoco xaan Nyoo tsi tandihí nyoocho tsa cuñi tsi Jutu Mañi yo Jesucristo. Ña jandihí ndo tsa cuñi ndo tsi ra.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Nuu Filipos,

Nyíí ra Pablo vehe caa, tan javahá ra iin carta tan jacuhun ra tsi nyivi yihí cuenda Nyoo nuu Filipos

¹ Yuhu ra Pablo tan ra Timoteo, cuví ndi musu ra Jesucristo. Tan javahá ndi carta ihya tsa cuenda tandihí ndo tsa yucú ndo nuu Filipos tan cuví ndo nyivi cuenda Nyoo tan iin ní cuví ndo tsihin ra Cristo. Tan yacan jaquitsí ndi carta ihya tsi tandihí ndo tsihin ra cuví ityi nuu tsihin nyivi vehe nuu naha ra, tan tsihin ra jahá tyíñu vehe nuu naha ra. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añaíma.

Nu tsicán tahvi ra Pablo tsa cuenda ní yihí cuenda Nyoo nuu Filipos

³ Tandihí ní tsaha tsa nducuhún iñi yu tsi ndo, nacuhvá xaan yu tyahví nyoo tsi Nyoo tsa cuenda ndo. ⁴ Tan tandihí tsa tsicán tahvi yu tsi Nyoo tan tsicán tahvi yu tsa cuenda tandihí ndo tsihin tsa sii cuñí añaíma yu. ⁵ Tyin nda quívi jhna tsa tsíñi ndo tuhun ra Cristo tan nda vityin tan ña jandihí ndo tsa jatinyeé ndo tsi yu. Tyin iin caa ní jacotó yo tuhun ra Jesucristo tsi nyívi. ⁶ Tsitó vaha yu tyin tumaa tsa quítsahá javahá Nyoo tsa vaha tsitsi añaíma ndo, tacan cua javaha ca ra nda cuenda quívi quítsi ra Jesucristo inga tsaha. ⁷ Taahán tsi tsa caca iñi yu tacan tsa cuenda ndo, tyin cuñí xaan yu tsi ndo. Tyin iin caa ní nasocó Nyoo tsi yo. Vasu ndi maa tsa nyíi yu vehe caa ihya, tan vasu ndi maa cuhun yu nuu ra cumí tyíñu naha ra, maa tyin jacotó yu tuhun Nyoo tsi ra yucú vehe caa ihya naha ra, tan tsihin ra cumí tyíñu naha ra, na coto ra naha tyin nditsa tuhun ra Cristo. ⁸ Nyoo tsitó ra tyin cuñí xaan yu tsi tandihí nyoocho tumaa tsa cuñí maa ra Jesucristo tsi ndo. ⁹ Tan tsicán tahvi xaan yu tsi Nyoo na cuñí ca ndo tsi ra tan na cundahvi ca iñi ndo tsi nyívi. Tan nacoo ca tsa nyityi Nyoo tsi ndo, tan cutuñi ca iñi ndo, ¹⁰ tyin tacan tan cuví ñihi ndo tsa vaha tsi Nyoo. Tan ña cua coo ca cuatyí ndo tan cuví coo vaha ndo tsihin tuhun Nyoo nda cuenda quívi quítsi ra Cristo. ¹¹ Maa ra cua jatinyeé tsi ndo. Tan tacan ní cua javaha ndo maa ní maa tsa vaha, tan tsa ndaa. Tacan tan cua jacahnu nyívi tsi Nyoo tyin cahnu xaan ra cuví ra.

Maa ní maa tyíñu Nyoo javahá ra Pablo tyin iyó ra Cristo añaíma ra

¹² Yañi, cuñí yu tsa coto ndo tyin tandihí tundoho taahán yu, jatinyeé xaan tsi tyin nducua ca nyívi tsínú iñi tuhun Nyoo. ¹³ Tan tandihí andaru tsa iyó vehe ra cuví rey tan tandihí nyívi iyó ihya tsitó ní tyin nyíi yu vehe caa tsa cuenda tsa nyicún yu tsi ra Cristo. ¹⁴ Tan cuaha xaan ra yañi yo cuenda Jutu Mañi yo naá tsa yuuhví ra naha tsa nyehé ra naha tyin jatinyeé Nyoo tsi yu nu nyíi yu vehe caa. Yacan cuenda jañihí ca ra naha caahán ra naha tuhun Nyoo tsihin nyívi.

¹⁵ Tan nditsa tyin yihí ra naha, caahán ra naha tuhun ra Cristo tsa cuenda tyin cuñí ra cunycun nyívi tsi maa ra naha. Tan yihí tucu ra naha caahán ra naha tuhun ra Cristo tsihin nyívi maa tyin tsihin tsa ní iñi ra naha. ¹⁶⁻¹⁷ Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsí tsi yu ihya. Tyin cahan yu tuhun ra tan jacotó yu tsi nyívi tyin nditsa tsa jacacú ra tsi yo. Tan tsa cuenda tsa cuñí ra naha tsi ra Cristo, yacan caahán ra naha tuhun ra. Maa tyin inga ra can naha ra ñavin tsa ní iñi ra naha tan caahán ra naha tuhun ra Cristo, tyin cuñí ra naha na cunycun cuaha nyívi tsi ra naha tan cuñí ra naha vacu nducu ra naha tsi yu nu nyíi yu vehe caa ihya. ¹⁸ Tan ña ndihí iñi yuhu tatun juhva ra naha caahán ra naha tuhun ra Cristo tsihin tsa ña ní iñi ra naha. Maa tyin yuhu sii xaan cuñí yu tyin tuhun ra Cristo caahán tandihí ra naha, cuví ní tsa ní iñi ra naha caahán ra naha o ñavin.

Tan ndusi ca cuñí yu ¹⁹ tyin tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatinyeé xaan Tatyí Ii ra Cristo tsi yu. ²⁰ Tsitó vaha yu tyin Nyoo cua jatinyeé ra tsi yu tan ña cua nducan nuu yu, tan ña cua nayuhvi yu cahan yu tuhun ra Cristo tsihin tsa ní iñi yu. Tan ña ndihí iñi yu, an coo ca yu ñayívi, o cúu yu, maa tyin cuñí yu cahan yu tuhun ra, tahan ní cuhva tsa tuhvá yu caahán, na nyehe nyívi cuhva iyó yu tan coto ní tyin ra Cristo cahnu xaan ra cuví ra. ²¹ Tyin tsa cuenda yuhu ñayívi tsa iyó yu vityin, ñayívi ra Cristo cuví. Maa tyin tatun cúu yu, cua ñihi yu tsa sii caa tsa iyó gloria. ²² Tan tatun coo ca yu, vaha xaan. Tyin tacan tan cuví jañihí ca yu jahá tyíñu yu tyíñu Jutu Mañi yo. Tan cua cuví tsi ra vaha tsa cuenda ra. Yacan cuenda ña tsitó yu nda ityi cuhun yu, a cúu yu, a cuhun yu cucahan ca yu tuhun Nyoo tsihin nyívi, ña tsitó yu. ²³ Yíi xaan cuñí yu tan quihin yu ndaa ityi cuhun yu tyin tsa cuñí yu cuhun yu cunyaa yu tsihin ra Cristo. Tyin vaha ca yacan. ²⁴ Maa tyin tsa cuenda nyoocho, vaha ca tsa ña cúu naha yu tyin tacan tan cuví cunyaa yu tsihin ndo tan coto ca ndo

tuhun Nyoo. ²⁵ Yacan cuenda tsitó yu tyin cua ndoo yu juhva ca quivi ihya. Tyin cuñi tsi tsa jatyinyeé ca yu tsi ndo tan cuvi cuhun ndo ityi nuu ca tan cusii ca iñi ndo tsihin tsa tsinú iñi ndo tsi Nyoo. ²⁶ Tacan tan cua nyehe ndo tsi yu inga tsaha, tan sii xaan ca cua cuñi ndo tsa cuenda yu tyin iin caa ñi iyó yu tsihin ra Cristo.

²⁷ Cuñi tsi tsa coo yo cuhva taahán tsi coo nyivi yihí cuenda ra Cristo. Vasu nyaá yu tsihin ndo, a cañi nyii yu, maa tyin cuñi yu coto yu tuhun ndo tyin nyoocho vaha cuahán ndo tsihin Nyoo. Tan iin caa ñi jahá tyiñu tandihi ndo tyin tacan tan cua tsinu iñi nyivi tuhun ra Cristo. ²⁸ Maa tyin nyivi xaan iñi tsi ndo, cuaha xaan tsa cua jacuu ñi tsi ndo maa tyin ña nayuhvi ndo. Tyin tsa tacan, catsi xaan janahá tsi tyin cunaa ñi can. Tan janaha tucu tsi tyin tsa cacú nyoocho jahá Nyoo. ²⁹ Tyin tsahá ra ndatu tsa tsinú iñi tandihi yo tsi ra Cristo, tan tacan tucu tsahá Nyoo ndatu tsa nyeheé yu tundoho tsa cuenda maa ra Cristo. ³⁰ Iin caa ñi nyeheé yu tundoho tan jacotó yo tuhun ra Cristo. Tan tsa tsitó ndo nácaa nyehe yu tundoho, tan vityin tsitó tucu ndo tyin ña jandihi yu tsa caahán yu tuhun Nyoo.

2

Cuca xaan ra Cristo, maa tyin quitsi cúu ra tumaa iin ra ndaahvi

¹ Nditsa tyin ra Cristo jandu iin xaan ra iñi yo tsa iin ñi cuvi yo tsihin ra. Tan vaha cuñi yo tsa cuenda tsa cuñi ra tsi yo. Tan nditsa tucu tyin iyó Tatyí Ii Nyoo tsihin yo. Tan nditsa tucu tsa ndaahvi cuñi yo nyeheé yu tsi nyivi tahan yo. Tatun nditsa tandihi yacan, ² cuhva ndo tsa cusii ca iñi yu tsihin tsa vaha iyó ndo. Tan cuñi tahan ndo tsi ndo tumaa tsa cuñi ra Cristo tsi yo. Tan iin ñi cuhva caca iñi ndo. Tan iin ñi tsa vaha javaha ndo. ³ Ña javaha ndo maa ñi tsa jatyinyee tsi maa ndo, javaha ndo tsa vaha tsi inga nyivi. Tan náa javaha ndo, ña cahnu jaha ndo tsi ndo. Ndaahvi jaha yo tsi yo. Tan intuhun intuhun yo na jaha yo tyin vaha ca inga nyivi tan ñavin ca maa yo. ⁴ Tan intuhun intuhun yo caca iñi yo tsa cuenda tsa vaha tsi inga nyivi, tan ñavin tsa cua jatyinyee tsi maa ñi maa yo.

⁵ Caca iñi yo tumaa tsicá iñi maa ra Cristo Jesús. ⁶ Tyin nu quitsi tsi tsanaha tsa ndi cumañi ca quitsi ra nu ñuhu ñayivi, cuvi ra tahan ñi maa cuvi Nyoo. Maa tyin ña tsicá iñi ra tsa nacao ra yacan. ⁷ Tan tyaq tsiyo ra tandihi tunyee iñi ra tan tandihi tsa cuca ra. Tan quitsi ra nanduví ra iin nyivi ndaahvi nu ñuhu ñayivi ihya quivi tsa cacú ra. ⁸ Tan tsa nanduví ra iin rayi, tan ndaahvi jahá ra tsi ra tan tyaq yahvi vaha ra tsi Nyoo nda cuanda tsahá ra tsa cahñi nyivi tsi ra nu

cruu. Tumaa iin ra caquiñi, tacan jahá ñi tsi ra, tan tahan ra ticanuu tyin tsahñi ñi tsi ra nu cruu. ⁹ Yacan cuenda Nyoo jacahnú xaan ra tsi ra. Tan tsahá Nyoo iin sivi tsi ra, iin sivi tsa cahnu xaan ca cuvi tan ñavin ca tandihi sivi. ¹⁰ Tyin tatun tsiñi yo sivi ra Jesucristo, tandihi yo tan cua cuñi tsiti yo. Tan tandihi tucu tsa iyó andivi, tan tsa iyó nu ñuhu ñayivi, tan tsitsi ñuhú, tandihi yacan cua jacahnu tsi ra. ¹¹ Tyin tandihi tsa iyó, cua nacoto tan cua cahan tyin ra Jesucristo cuvi ra ndacá ñaha tsi tandihi maa tsa iyó. Tacan tan cua nyehe tsi tyin cahnu xaan ca cuvi maa Nyoo Jutu yo.

Nyivi yihí cuenda Nyoo cuvi ñi tumaa iin ñuhu tsa jandunditsin nu ñuhu ñayivi ihya

¹² Yacan cuenda, yañi tsa cuñi xaan yu, tumaa tsa tyaq yahvi ndo tsi yu quivi tsa tsinyii yu tsihin ndo, tacan ñi taahán tsi tyaq yahvi ndo tsi yu vasu ndi maa tsa cañi nyii yu vityin. Ndúcu ndo cuhva na nyehe nyivi tyin nditsa tsa jacacú Nyoo tsi yo. Tan jaha vaha ndo cuenda cuhva coo ndo tsihin ra. ¹³ Tyin maa Nyoo tyihí tsa vaha añima ndo. Tan jatyinyeé ra tsi ndo tyin tacan tan cuvi tyaq yahvi ca ndo tsa caahán ra tan javahá ndo cuhva cuñi ra.

¹⁴ Tatun cua javaha ndo náa tsa cua javaha ndo, ndúcu jihna ndo cuhva tsa ña cahan yuhu tahan ndo. Tan ña cañi tahan ndo. ¹⁵ Tacan tan ña cua coo cuatyí ndo. Taahán tsi cuvi ndo nyivi nduve cuatyí, tumaa tsa taahán tsi coo nyivi cuenda Nyoo tyañu nyivi caquiñi ihya. Cuñi tsi tsa cuvi ndo tumaa iin ñuhu tsa jandunditsin nu naa nu ñuhu ñayivi ihya. ¹⁶ Cahan yo tuhun Nyoo tsihin nyivi tyin yacan tsahá ñayivi nyito tsa iyó yo. Javaha ndo tacan, tan quivi tsa quitsi ra Cristo, yuhu ñi vaha cua cuñi yu tsa cuenda ndo, tyin ña jacotó cuatu yu tuhun Nyoo tsi ndo. ¹⁷ Tan vasu cahñi nyivi tsi yu tsa catyi tuhun Nyoo, maa tyin cua cuvi tsi iin tsa cua jamañi yu tsi Nyoo tan tsihin tsa tsinú iñi ndo tsi ra. Tan iin caa ñi cusii iñi yo tsihin ra. ¹⁸ Tan yacan cuenda taahán tsi tsa cusii iñi ndo tsihin yu.

Nu jacuhun ra Pablo tsi ra Timoteo tan ra Epafrodito ñuu Filipos

¹⁹ Tatun Jutu Mañi yo tan cuñi ra, cua jaquitsi yu tsi ra Timoteo naquitsi nyehe ra nu yucú ndo. Tan quivi tsaa ra inga tsaha nu nyii yu sii xaan cua cuñi yu. Tyin cua nacatyí tuhun ra tsihin yu nácaa yucú ndo. ²⁰ Tyin intuhun ñi ra tsicá iñi tumaa tsa tsicá iñi yu tsa cuenda ndo. Tan yoiñi inga ra tsa tsicá iñi tacan. ²¹ Tyin tandihi ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñi ra Cristo Jesús. ²² Maa tyin tsitó ndo tyin ra Timoteo, vaha cuahán ra

tsihin Nyoo, tan tsa cuenda yuhu, cuví ra tumaa sehe yu. Tan jatinyeé xaan ra tsi yu tsa caahán ndi tuhun ra Cristo tsihin nyívi. ²³ Tan nyaá tsa cua jaquitsi yu tsi ra nu yucú ndo. Maa tyin nda coto jihna yu nácaa cua cahan ra cumí tyíñu, tatun ña naha ca cunyi yu ihya. ²⁴ Tyin tsitó vaha yu tyin Jutu Mañi yo numi ñi cua cuhva ra tsa quitsi nyehe yu nu yucú ndo.

²⁵ Tan ra Epafrodito, yañi yo tsa jaquitsi ndo tsa jatinyeé tsi yu tsihin tyíñu tsa javahá yu, iin caa ñi cuví ndi andaru ra Cristo tsihin ra. Tan vityin cua jaquitsi nuhu yu tsi ra inga tsaha nu yucú ndo. ²⁶ Cuñi xaan ra quitsi nuhu ra nu yucú ndo, tyin tsicá xaan iñi ra tsa tsitó ndo tyin nacuhví ra. ²⁷ Nditsa ñihi xaan nacuhví ra tan tsa cua cúu maa ra cuví. Maa tyin Nyoo cundahví iñi tsi ra, tan tsii tucu yuhu tyin na ña nducuihya xaan ca iñi yu. ²⁸ Yacan cuenda, yuhu cuñi xaan yu tsa quitsi nuhu ra nu yucú ndo. Tyin tacan tan sii xaan cua cuñi ndo tsa cua nyehe ndo tsi ra inga tsaha. Tan yuhu ña cua coo ca yu tucuihya iñi, tyin cua nyehe ndo tyin ra Epafrodito iyó vaha ra. ²⁹ Yacan cuenda, naquihin ndo tsi ra tsihin tsa sii cuñi ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayívi tsi ra yañi yo naha ra tsa iyó tumaa cuhva iyó ra. ³⁰ Tyin tsa yatyin maa cúu ra tsa cuenda tsa javahá ra tyíñu ra Cristo. Tyin vasu ndi maa cuuhví xaan ra, maa tyin ña cuñi ra jandihí ra tsa jatinyeé ra tsi yu. Tyin maa ndo ña cuví quitsi ndo tan jatinyeé ndo tsi yu tyin cañi xaan yucú ndo.

3

Nu janahá ra Pablo nácaa nduvaha yo nuu Nyoo

¹ Tan vityin yañi, cusi iñi ndo tsihin Jutu Mañi yo. Tsa cuenda yuhu nduve tsihi cuví tsi tsa cua tyaa yu inga tsaha tuhun ihya tsi ndo. Tyin tsa vaha tsi maa ndo cuví tsi. ² Jaha ndo cuenda tsi ndo tsihin ra icá tumaa icá ina, ra caquiñi naha ra. Javahá ra naha tsa ña vaha. Tyin catyí ra naha tyin cuñi tsi cunyaa tuñi Nyoo tsi yo, tacan tan cacu yo. ³ Maa tyin yoo nyisó yo tuñi tsa nditsa tyin maa Nyoo tyaa tuñi ra tsitsi aña yu quívi nacuhvá cuenda yo tsi yo tsi ra. Tan jacahnú yo tsi ra tsihin Tatyí li ra tsa iyó aña yu. Tan cusii iñi yo tyin cuenda maa ra Cristo Jesús yíhi yo. Tan ña nyitá iñi yo tyin cacu yo tsihin náa cunyaa cuñu ñuhu yo. ⁴ Tun tsatyin nditsa tsa cuví cacu yo tsihin tsa javahá yo yacan, jihna ca yuhu tsa yaha cacu tan ñavin ca tandihí ra tsa javahá yacan vityin. ⁵ Tyin una quívi yu tan tsinyaa tuñi Nyoo tsi yu. Tyin tata ra Israel cuví yu. Tan tata ra Benjamín sehe ra Israel cuví ndihí yu.

Juvin ñi tata nyívi caahán yuhu hebreo cuví yu. Yacan cuenda nditsa tyin hebreo cuví yu. Tan inga tucu tuhun, tyaa yahvi xaan yu ley tsahnu quívi can, tyin ra fariseo cuví yu. ⁶ Tan tsa cuenda tsa cuñi yu tyaa yahvi yu ley, tan tsinyaa ndaha xaan yu tsi ñi yíhi cuenda ra Cristo. Tan tyaa yahvi yu tandihí maa ley tsahnu, tyin nducu xaan yu cuhva tyaa yahvi yu tsa caahán ley can. ⁷ Maa tyin tandihí tsa cuñi maa yu tyin cahnu xaan cuví quívi can, vityin nduve ca yahvi nyaá yacan tsa cuenda yu. Tyin vityin maa ra Cristo cuví ra tsa nyitá iñi yu. ⁸ Tan inga tucu tuhun, tandihí tsa javahá yu, tsitó maa yu tyin nduve ca yahvi nyaá yacan tyin tsa nacoto yu tsi ra Cristo Jesús, Jutu Mañi yu. Tyin yacan cuví tsa cuca xaan ca. Tan tsa cuenda ra Cristo tandihí tsa javahá yu quívi quitsi tsi ityi tsata, cuví tsi iin tsa cuatu ña vityin. Yacan cuenda tyaa tsiyo yu tandihí can. Tyin cuñi yu coto vaha ca yu tsi ra Cristo. ⁹ Tan cuñi yu ndu iin ca yu tsihin ra. Tsinú iñi yu tyin jacacú ra tsi yu, yacan cuenda nduvahá iyó yu nuu Nyoo. Ñavin tsa cuenda tsa tyaa yahvi yu ley Nyoo tan vaha iyó yu, maa tyin tsa cuenda tyin tsinú iñi yu tsa caahán ra, tyin jacacú ra tsi yo tan vaha iyó yu nuu ra. Tan tsa cuenda tsa tsinú iñi yo, ra Cristo naquihin cuenda ra tsi yo. ¹⁰ Tsa coto vaha ca yu tsi ra Cristo, yacan cuví tsa cuñi yu. Tyin Nyoo janandoto ra tsi ra Cristo tsihin tunyee iñi ra. Tan cuñi yu tyin coo ca tunyee iñi can tsi yu. Tan cuñi yu cunyeé iñi yu tundoho tsa taahán tsi nyehé yu tsa cuenda ra. Tan cuñi yu nacuhva cuenda yu tsi yu tumaa maa ra Cristo nacuhvá cuenda ra tsi ra tan tsihi ra. ¹¹ Tyin nducu xaan yu cuhva nandoto yu tsa yaha cúu yu.

Nacaa cunyicun ñihi ca yo tsi Nyoo

¹² Ña catyí yu tyin nduve ca tsa cumañi tsi yu, tan vaha xaan yu. Maa tyin cuahán yu ityi nuu ca. Tyin cuñi yu naquihin yu tsa cahan ra Cristo tyin cuhva ra tsi yu. Tyin jihna ca maa ra cahan tsihin yu. ¹³ Yañi, ña catyí yu tsihin ndo tyin tsa ñihí yu tandihí tsa vaha can. Maa tyin iyó intuhun ñi tsa javahá yu; nacoó yu ityi tsata tandihí tsa javahá yu, tan jañiñi yu cuhun yu ityi nuu ca. ¹⁴ Tyin tacan tan tsaá yu nu nyaá tsa taahán tsi tsi yu. Tyin caná Nyoo tsi yo nda gloria. Tyin naquihin yu tsa catyí ra tsihin yu tyin cuhva ra tsi yo tsa cuenda tsa iin caa ñi iyó yu tsihin ra Cristo Jesús.

¹⁵ Tacan taahán tsi caca iñi tandihí nyívi tsa ñihi nyaá tsihin Nyoo. Maa tyin tatun ñavin tacan tsicá iñi ndáa nyoocho, Nyoo cua cuhva ra tsa cutuñi iñi ndo. ¹⁶ Maa tyin iyó iin tsa cuñi tsi tsa tyaa yahvi vaha yu, tuhun tsa tsa yaha jacoto Nyoo tsi yu.

¹⁷ Yañi, javaha ndo cuhva iyó yu tan cuhva caahán yu. Tan nyehe vaha ndo cuhva iyó nyivi iyó cuhva janahá ndi tsi tandihi nyivi. ¹⁸ Tyin cuaha xaan tsaha caahán yu tsihin ndo, tan vityin cua cahan yu inga tsaha tsihin tsa cuihiya cuñi yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuvi ra naha tyin tumaa tsa ña cahnú cuvi tsa tsihi ra Cristo nu cruu jahá ra naha. ¹⁹ Maa tyin quivi quitsi ra Cristo inga tsaha, ra ican naha ra cua cuhun anyaya. Tyin javahá ra naha cuhva cuñi cuñu ñuhu ra naha. Tan cahnú jahá ra naha tsi ra naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayivi ihyá. ²⁰ Maa tyin yoo nda gloria cuvi nu iyó ñuu yu. Tan ndatú yu quivi quitsi nyico Jutu Mañi yo Jesucristo, ra jacacú tsi yo. ²¹ Tan cua quihin ra cuñu ñuhu ndaahvi yo, tan cua jananduvi ra tsi yo tumaa cuñu ñuhu maa ra. Tan cua javaha ra tacan tsihin tunyee iñi tsa iyó tsi ra. Tan juvin ñi tsihin tunyee iñi can ndacá ñaha ra tandihi tsa iyó.

4

Tacan ñi maa na cusii iñi yo tsihin Jutu Mañi yo

¹ Yañi, cuñi yu tsi ndo. Tan cuñi xaan yu nyehe yu tsi ndo. Sii xaan cuñi yu tsihin ndo. Tan tsitó yu tyin ña cahan cuatu yu tuhun Nyoo tsihin ndo. Tyin ní xaan iñi ndo nyicún ndo tsi ra. Tan jañihi ca ndo cunyicun ndo tsi ra.

² Tan vityin tsicán yu tsi ña Evodia, tan ña Síntique, na ña cahan yuhu tahan ñi, tan coo vaha ñi cuhva cuñi Jutu Mañi yo. ³ Tan yooho, yañi, tsa iin caa ñi jahá tyiñu tsihin yu, cuñi yu tyin jatyinyee un tsi ñi cuhva yo ihyá. Tyin juvin ñi jatyinyee xaan tsi yu nu cahan yu tuhun Nyoo, maa tyin ñavin intuhun ñi yu jatyinyee ñi, tyin jatyinyee ndihi ñi tsi ra Clemente tan tsi tandihi ca ra tsa cutahán tsihin ndi. Tan sivi tandihi ñi tsa nyaá nuu tutu Nyoo nda gloria.

⁴ Cusii iñi ndo tsihin Jutu Mañi yo tandihi ñi quivi. Tan caahán yu tsihin ndo inga tsaha, cusii iñi ndo tsihin ra. ⁵ Coo vaha ndo tyin tacan tan nyehe tandihi nyivi tyin nditsa tyin nyivi vaha cuvi ndo. Tan nducuhun iñi ndo tyin tsa yatyin cua quitsi Jutu Mañi yo.

⁶ Tan ña caca iñi ndo náa taahán ndo. Iin nyita ñi ndacan tahvi ndo tsi Nyoo náa ndihi tundoho tsa iyó ndo. Tan ndacan ndo tsi ra nacuhva ra tandihi tsa tsiñi ñuhu tsi ndo. Tacan tan ña nacoo ndo tsa tsahá ndo tyahvi nyoo tsi ra. ⁷ Tan Nyoo cua cuhva ra tsa taxin coo añima ndo. Tan cahnú xaan tsa vaha cuvi yacan. Tan yoñi cuvi cutuñi iñi nácaa tsa cahnú tsi. Tan tsa taxin iyó tsi

Nyoo cua jaha cuenda añima ndo tan tsihin tsa tsiñi tuñi jiñi ndo, tyin iin caa ñi iyó ndo tsihin ra Cristo Jesús.

Na caca iñi yo maa ñi maa tsa vaha

⁸ Nu cua ndihi tuhun, yañi, caca iñi ndo maa ñi tsa nditsa, maa ñi tsa ndaa, tsa cuiti iyó, tan tsa ndoo iyó. Ña caca iñi ndo tsa caquiñi. Caca iñi ndo tsa sii caa, maa ñi tsa vaha, tan maa ñi cuhva cuvi jacahnú ndo tsi Nyoo.

⁹ Javaha ndo tsa jacuahá yu tsi ndo. Tuhun tsa cahan yu tsiñi ndo, tan tsa javahá yu nyehe ndo, yacan taahán tsi javaha ndo. Tan Nyoo ra tsahá tsa taxin coo añima yo, cua cunyaa ra tsihin ndo.

Nu jatyinyee nyivi ñuu Filipos tsi ra Pablo tsihin tsa iyó tsi ñi

¹⁰ Sii xaan cuñi yu. Tan jacahnú yu tsi Jutu Mañi yo tsa cuenda tsa jatyinyee xaan ndo tsi yu inga tsaha. Tan tsitó yu tyin ndihi ñi tsaha tan cuñi ndo jatyinyee ndo tsi yu. Maa tyin tsicoo juhva quivi ña tsahá tsi cuhva tsa jatyinyee ndo tsi yu. ¹¹ Ñavin tyin iyó tsa tsiñi ñuhu tsi yu tan caahán yu tsihin ndo, tyin yuhu tsa cutuhvá maa yu tsa cusii iñi yu tsihin náa tsa iyó tsi yu. ¹² Tyin yuhu tsa tsitó maa yu nácaa coo ndaahvi yu tan nácaa coo cuca yu. Tyin tsa caan maa yu tun iyó tsa catsi yu a nduve, tyin tun ndoo ca tsa catsi yu, quivi tsa iyó, o nduve tsa catsi yu, ndoo maa yu vaha. ¹³ Tandihí tan cuvi jaha yu tsihin tunyee iñi tsa tsahá ra Cristo tsi yu. ¹⁴ Tan nyoooho yañi, vaha xaan tsa javahá ndo tyin jatyinyee ndo tsi yu quivi tsa tsicoo yu tundoho.

¹⁵ Tsa tsitó nyoooho nyivi Filipos nácaa cuvi quivi quitsahá caahán yu tuhun Nyoo tsihin ndo. Tacan tan quee yu Macedonia nu iyó ndo tan cuahán yu cua jacoto yu tuhun Nyoo inga ñuu. Tan nyoooho cuvi nyivi tsa jatyinyee tsi yu tsihin xuhun, tyin vaha xaan cuñi ndo tsa cahan yu tuhun Nyoo tsihin ndo. ¹⁶ Tan tsitsi tsa nyii yu ñuu Tesalónica, ñavin intuhun ñi tsaha jatyinyee ndo tsi yu. ¹⁷ Ñavin tsa tsicá iñi yu tsa jatyinyee ndo tsi yu, tyin tsa cuñi yu tsa jatyinyee ndo tsihin tyiñu Nyoo, tacan tan cuaha ca cua nasoco Nyoo tsi ndo. ¹⁸ Tan vityin, nduve tsa cumaní tsi yu. Nda cua ndoo ca tsa jaquitsi ndo tsi yu tsihin ra Epafrodito. Tan tsa tsahá ndo can cuvi tsi tumaa xico tamí, xico vaha tsa tsaa nuu Nyoo. Yacan cuvi tsa taahán iñi ra. ¹⁹ Tan Nyoo cua cuhva ra tandihi tsa tsiñi ñuhu tsi ndo. Tan tandihi tsa cuca tsa iyó tsi ra Cristo nda gloria tandihi yacan tan cua cuhva ra tsi ndo. ²⁰ Na jacahnú yu tsi Nyoo Jutu yo tacan ñi maa. Tan na cuvi tsi tacan ñi.

Nu jacuhún ra Pablo nacumi tsi nyivi ñuu Filipos

²¹ Tsahá yu nacumi tsi tandihí ndo tsa yihí ndo cuenda ra Cristo ñuu Filipino. Tan jaquitsí tucu ra yañi yo tsa yucú tsihin yu ihya nacumi tsi ndo. ²² Tan nyívi cuenda Nyoo tsa yucú vehe ra ndacá ñaha ñuu Roma ihya, tan tandihí ca nyívi yihí cuenda Nyoo ñuu ihya jaquitsí ñi nacumi tsi ndo.

²³ Na nasoco maa Jutu Mañi yo Jesucristo tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Nuu Colosas

Nu quitsaha javahá ra Pablo carta

¹⁻² Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihya tsi nyooho nyivi ñuu Colosas tsa iin iñi yihí cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo aña ndo.

Nu tsicán tahvi ra Pablo tsa cuenda nyivi yihí cuenda ra Cristo

³ Tandihí ñi tsaha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo. ⁴ Tyin ñihí tuhun ndi tyin tsinú xaan iñi ndo tsi ra Cristo Jesús, tan cuñí xaan ndo tsi tandihí nyivi tsa yihí cuenda Nyoo. ⁵ Tacan javahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiñi ndo tuhun Nyoo tsa nditsa tyin jacacú ra Cristo tsi ndo tan quitsaha nyitá iñi ndo tsi Nyoo. ⁶ Tan juvin ñi maa tuhun ra Cristo tsa cahan ra Epafra tsihin ndo, yacan nacutý tandihí ñi ityi, tumaa tsa tsityá tucu tsi nu iyó ndo ihya. Tan cuaha nyivi nacuhvá cuenda ñi tsi ñi tsi Nyoo, tumaa nacuhvá cuenda maa ndo tsi ndo. Tyin quivi tsa tsiñi ndo tuhun ra Cristo tsitó ndo tyin nditsa tsa cuñí Nyoo tsi ndo. ⁷ Yacan janahá ra Epafra tsi ndo, tyin iin ñi tyiñu Nyoo jahá tyiñu ndi tsihin ra. Tan juvin ra cuví musu vaha ra Cristo tsa cuenda ndo. ⁸ Tan juvin ra catý tuhun tsihin ndi tyin cuñí xaan ndo tsi nyivi tahan ndo, tyin maa Tatyí li Nyoo tsahá tsa vaha can coo aña ndo.

⁹ Yacan cuenda nda quivi tsa ñihí tuhun ndi tyin tacan javahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiñi tuñi tsa iyó tsi ra tsi ndo, tan na cutuñi iñi ndo jahá Tatyí li ra tan coto vaha ndo náa ndihí tsa cuñí ra tyin javahá ndo. ¹⁰ Tacan tan cuví coo ndo tumaa taahán maa tsi coo nyivi yihí cuenda Jutu Mañi yo. Tan javaha ndo tumaa cuñí maa ra, tan javaha ndo tandihí nuu tsa vaha tan nacoto vaha ca ndo tsi ra. ¹¹ Tan tsicán tucu ndi tsi ra na jatinyee ca ra tsi ndo tsihin tunyee iñi cahnu tsa iyó tsi ra tan ña cundihí iñi ndo tsa yaha ndo tandihí tundoho, tan na cusii iñi ndo. ¹² Tan na cuhva ndo tyahvi nyoo tsi Nyoo Jutu yo, tyin maa ra tsa janduvahá ra

tsi yo tyin tacan tan cuví ñihí yo tsa cua ñihí nyivi tsicá nu nditsin, tan cuñí tsi catý nyivi tsa cuiti iyó nuu ra. ¹³ Tyin Nyoo tava ra tsi yo nu naa tan nacuhvá cuenda ra tsi yo tsi Sehe ra tsa cuñí xaan ra tyin cundaca ñaha ra tsi yo. ¹⁴ Tan jatá ra tsi yo tsihin ñihí Sehe ra tan jahá ra tucahnu iñi tsi yo.

Tsa cuenda tsa tsihi ra Cristo nu cruu tsacatyí cuatyí yo tan nduvahá iyó yo tsihin Nyoo

¹⁵ Nyoo ña nyehé yo tsi ra. Maa tyin nanduví ra nyivi tan cuví nacoto yo tsi ra. Tan juvin ra cuví ra Cristo Sehe Nyoo. Nda ndi cumañi ca tsinú ñuhu ñayivi tan tsa iyó maa ra Cristo. ¹⁶ Tan maa ra javahá tandihí tsa iyó andivi tan nu ñuhu ñayivi jahá Nyoo. Javahá ra tsa cuví nyehe yo tan tsa ña cuví nyehe yo. Javahá ra tandihí tatyí vaha tan tatyí ña vaha tsa ndacá ñaha andivi tan nu ñuhu ñayivi ihya. Tan tandihí yacan javahá ra tyin cuatyíñu ra cuhva cuñí ra. ¹⁷ Tan tsa iyó maa ra tsa ndi cumañi ca coo tandihí maa tsa iyó. Tan tandihí tsi jahá tyiñu vaha tsi jahá ra. ¹⁸ Tan yoo tsa yihí cuenda ra Cristo cuví yo cuñu ñuhu ra, tan maa ra cuví jiñi tsihin yo, tan tsahá ra tsa coo nyito yo. Tan juvin ra cuví tsa nandotó tsa jihna ca, tyin tacan tan quihí ndaha ra tandihí tsa iyó. ¹⁹ Tyin Nyoo cuñí ra tsa cuví ra Cristo tumaa cuví maa ra. ²⁰ Tan tsahá ra tsi ra Cristo tsa cúu ra nu cruu tyin tacan tan cuví coo vaha tandihí tsa iyó tsihin ra, tahan ñi tsa iyó nu ñuhu ñayivi tan andivi.

²¹⁻²² Tahan tsanaha javahá ndo tsa ña vaha tan xaan cuñí ndo nyehé ndo tsi Nyoo. Maa tyin Nyoo jaquitsí ra tsi ra Cristo, Sehe ra tan tsahá cuenda ra cuñu ñuhu ra tan tsihi ra nu cruu. Tan janacoq vaha ra tsi ndo tsihin Nyoo, tan cua nacuhva cuenda ra tsi ndo tsi ra tsihin tsa nduve ca cuatyí ndo tan cuiti vaha cua coo ndo nuu ra. ²³ Yacan cuenda jañihí ca ndo tsinú iñi ndo. Tan cuita iñi ndo tyin cua tsaa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiñi ndo tyin cua jacacu ra tsi ndo. Tuhun ihya cuví tsa caahán ra naha tanií cahnu ñuhu ñayivi. Tan yuhu ra Pablo jatinyee yu caahán yu tuhun ihya tsihin nyivi.

Nu catý ra Pablo tyin nyaá siqui ra tsa janahá ra tuhun ra Cristo tsi tandihí nyivi tsicá vehe ñuhu

²⁴ Vityin sii cuñí yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyivi yihí cuenda ra Cristo tyin maa ra cuaha xaan tundoho nyehé tsa cuenda yo tsa cuví yo cuñu ñuhu ra. Tacan tan cua jaquita ndihí yu tundoho tsa nyehé ra. ²⁵ Yuhu cuví iin ra caahán tuhun ra Cristo tyin tacan jatinyee yu tsi tandihí

nyivi yihí cuenda ra. Tyin maa ra Nyoo catyí tsa cahan yu tandihí tuhun ra tsa cuenda tsa vaha tsi ndo. ²⁶ Jacuahá yu tuhun tsa tsicumj xeehe Nyoo tahañ tsanaha, tsa ndi cumañi ca javahá ra ñuhu ñayivi. Tan vityin tsahá ra tsa nacoto nyivi yihí cuenda ra itsi. ²⁷ Tan nyooho tsa ñavin nyivi Israel cuví cuñi ndihí ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añima nyooho ñi yihí cuenda ra. Tan tsa cuenda maa ra cua ñihí ndo gloria nu cua coo ndo tsihin Nyoo.

²⁸ Tuhun maa ra Cristo caahán ndi. Tan tsahá cuenda ndi tuhun ihya tsi tandihí nyivi. Tan jacuahá ndi tsi tandihí ñi na cutuñi iñi ñi, tan cutsa vaha ñi tyin iin ñi cuví ñi tsihin ra Cristo. ²⁹ Tan tsa cuenda tsa cuñi yu tsa cuahnu vaha ñi ñihí xaan jahá tyiñu yu tsihin tunyee iñi ra Cristo tsa tsahá ra tsi yu.

2

¹ Tan cuñi yu tsa coto ndo tyin tsicá iñi yu tsa cuenda ndo. Tan tsicán tahvi xaan yu tsi Nyoo tsa cuenda tandihí ndo tan tsa cuenda nyivi ñuu Laodicea, tan tsa cuenda tandihí nyivi tsa ñaha ca nyehe tsi yu. ² Tsicán yu tsi ra na jandu iin ra iñi añima ndo, tan jandu iin ra tsi ndo tsihin tsa cuñi tahan ndo tsi ndo. Tan na cuhva ra tsa cutuñi vaha iñi ndo nacuenda jaquitsi ra tsi ra Cristo, tyin tacan tan cua nacoto vaha ca ndo tsi ra. Tyin juvin tuhun ra Cristo cuví tsa tsicumj xeehe Nyoo tahañ tsanaha, tan vityin jacotó ra itsi tsi yo. ³ Tyin tsi intuhun ñi maa ra Cristo iyó tsa tsiñi tuñi tan tsahá ra itsi tsi yo na cutuñi iñi yo tsi Nyoo. ⁴ Caahán yu tyehen tsihin ndo tyin tacan tan ña jandavi ñaha nyivi tsi ndo tsihin tuhun tsa sii natuhún ñi. ⁵ Vasu nduve yu nyíi tsihin ndo, maa tyin ñuhú xaan iñi yu tsi ndo. Tan sii xaan cuñi yu tsa nducuhún iñi yu cuhva iyó nu yucú ndo tyin vaha xaan icá ndo. Tan tsinú vaha xaan iñi ndo tsi ra Cristo.

⁶ Yacan cuenda tumaa natsinú iñi ndo tsi ra Cristo quivi nañihj ndo tsi ra, tacan cuñi tsi coo ndo tsihin ra. ⁷ Tan cunyaa naa vaha ndo tsi ra, na cuhva ra tunyee iñi ra tsi ndo. Tan ndu iin ca iñi ndo jahá tsa tsinú iñi ndo tsi ra, tumaa cutuhvá ndo. Tan iin nyita ñi nacuhvá ndo tyahvi nyoo tsi Nyoo.

Ñayivi nyito tsa tsahá ra Cristo tsi yo

⁸ Jaha ndo cuenda tsi ndo coto jandavi ñaha nyivi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyivi tsitó ñi tan tsiñú iñi ñi cuhva tsicá iñi nyivi.

⁹ Yacan ña tsjnu iñi ndo tsa caahán ñi tyin ra Cristo juvin ra cuví Nyoo tan cuví tucu ra nyivi. ¹⁰ Tan tsitú ndo tsihin Nyoo tyin iin ñi cuví ndo tsihin ra Cristo. Tan maa

ra ndacá ñaha tandihí tsa ndacá ñaha nu ñuhu ñayivi tan tandihí tatyí tsa ña nyehé yo. ¹¹ Tan tsa iin ñi cuví ndo tsihin ra Cristo, nda quivi natsinú iñi ndo tsi ra, tan nanduvj ndo nyivi ra. Maa tyin ña nanduvj ndo nyivi ra tsa cuenda tsa tsinyaq tuñi ra cuñu ñuhu ndo, tyin jacacú ra tsi ndo ndaha tsa caquiñi tsa javahá ndo jahá cuñu ñuhu ndo. Tsehe cuví tuñi tsa tyaa ra Cristo tsi ndo: ¹² Quivi tsicoondutya ndo tsitsi ndutya, tumaa tsa tsihí ndo tsihin ra Cristo tan quihvi ndo tsitsi ñuhu cuví can. Tacan tan nandotó tucu ndo tsihin ra tyin tsinú iñi ndo tyin Nyoo janandotó tsi ra tsihin tunyee iñi ra. ¹³ Tahañ tsanaha cuví ndo tumaa nyivi tsihí jahá cuatyí ndo, tyin nduve Nyoo nyaá añima ndo tan ña tsinyaq tuñi Nyoo cuñu ñuhu ndo. Maa tyin vityin Nyoo jahá ra tucahnu iñi tandihí cuatyí ndo. Tan tsahá ra tsa coo ndo ñayivi nyito tsihin ra Cristo. ¹⁴ Tyin ley tsahnu jaquituvj tsi cuatyí yo. Tan catyí tsi tyin taahán tsi cuhun yo anyaya tyin ña tyaa yahvi yo itsi. Maa tyin ra Cristo tsihí ra nu cruu jahá Nyoo tan tsindihí tsa cuhun yo anyaya. ¹⁵ Tan tsa tsihí ra nu cruu jahá canaa ra tsi nu ña vaha tan tandihí ca tatyí ña vaha tsa ndacá ñaha. Tacan tan tsindacá ra tsi nu nuu tandihí nyivi tan nuu ángel tyin na nyehe ñi tyin cahnú ca cuví maa ra, yacan cuenda jahá canaa ra.

Na nanducú yo tsa vaha tsa tsahá Nyoo

¹⁶ Yacan cuenda ña taahán tsi tyaa nyivi cuatyí tsi ndo tsa cuenda tsa tsatsí ndo a tsa cuenda tsa tsihí ndo, o tsa cuenda tsa ña naquihín vaha ndo iin quivi vico tsa jacahnú nyivi Israel; cuví ñi quivi tsa nduyutá yoo, o quivi quitatú ñi. ¹⁷ Tandihí tsehe ña jacacú can tsi yo tyin cuví can tumaa tixahñu tsa cua quitsi ra Cristo. Tan vityin tsa yahá quitsi ra, tan juvin ra jacacú tsi yo. ¹⁸ Ña cühva ndo tsa casi nyivi nu naquihín ndo tsa tsahá Nyoo tsi ndo. Tyin ndaahvi jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaa ñi tsihin can. ¹⁹ Ñi ican ñavin ra Cristo nyicún ñi. Maa tyin yoo tsa nyicún tsi ra cuví yo cuñu ñuhu ra, tan maa ra cuví jiñi tsihin yo. Tan jandu iin ra tsi tandihí yo. Tan jacuahnú ra tsi yo tsihin tunyee iñi ra tumaa cuhva cuñi maa Nyoo.

²⁰ Tumaa tsa tsihí cuñu ñuhu cuatyí ndo tsihin ra Cristo cuví can. Tan ña ndacá ñaha ca tuhun ñuhu ñayivi ihya tsi ndo. ¿Nacuenda tyin iyó ca ndo tumaa iyó nyivi tsa ña nacotó tsi Nyoo? Tan tyaa yahvi ndo tsa caahán ñi tsa javahá tuhun tsahnu. ²¹ Tyin catyí ñi tsihin ndo tyehen: “Ña tiin un tsehe tsihin ndaha un, ña catsi un tsehe, coto ña cacu un”, catyí ñi tsihin ndo. ²² Maa tyin ña taahán tsi casi ñi nu javahá ndo yacan tyin

tsa jacuahá ñi, maa ñi tsa tsicá iñi nyivi cuví can. Tyin tsa tsatsí yo tsa iin yaha ñi cuví can, tan ña cuví jatívi can tsi ndo nuu Nyoo. ²³ Ñi tsa javahá tandihí can tsicá iñi ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundoho cuñu ñuhu ñi. Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá iñi ñi.

3

¹ Tsañ Nyoo ñayivi nyito coo yo tyin nandotó ra Cristo, tan vityin nyaá ra xiin cuaha Nyoo nda gloria. Yacan cuenda nanducu ndo tsa vaha tsa tsahá ra tsi yo. ² Caca iñi ndo yacan, tan ña caca xaan iñi ndo tuhun tsa iyó nu ñuhu ñayivi ihya. ³ Tyin vityin ña javahá ca ndo tsa javahá ndo tahan tsanaha, tyin tsa tsihi ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo. ⁴ Tan quívi cua quitsi nyico ra Cristo, ra tsa tsahá ñayivi nyito tsa iyó yo, tacan tan cua nyehe nyivi tyin maa ra cahnu ca cuví ra. Tan cua nyehe tucu ñi tsi nyooho iin caa ñi tsihin ra.

Nacaa tsicoo yo nu quitsi tsi ityi tsata tan nácaa cuñi tsi coo yo tsihin Nyoo vityin

⁵ Yacan cuenda jandihí ndo tandihí tsa ña vaha tan tsa caquiñi tsa cuñi cuñu ñuhu ndo. Tan ña cusu ndo tsihin iin ñaha tun ñaha ca tindaha ndo, tahan ñi rayii tan ñaha. Tan ña cuñi ndo coo cuaha ndaha tyiñu ndo tyin tun tsicá iñi ndo yacan, tsitoho jacahnú ndo tan tyaá tsiyo ndo tsi Nyoo cuví can. Tyin tacan javahá nyivi tsa ña yihí tuhun Nyoo, maa tyin nyooho ña taahán tsi javaha ndo tacan. ⁶ Tsa cuenda tandihí tsa caquiñi ihya cuxaán xaan Nyoo tsi nyivi tsa ña tyaá yahvi tsa caahán ra. Tan cua tatsi tuñi ra tsi ñi. ⁷ Tan juvin ñi tacan javahá tucu maa yo quívi tsa ña nacotó yo tsi Nyoo. ⁸ Maa tyin vityin ña javaha ca ndo tandihí tsa ña vaha can: ña cuxaan ca ndo. Ña xaan cuñi ndo nyehe ndo tsi nyivi tahan ndo, tan ña jacuñi nya ndo tsi ñi, tan ña cahan ndo cuendu siqui ñi. Tan ña cahan ca ndo tsa ndavaha ñi. ⁹ Ña cahan tahan ca ndo cuendu siqui iin ndo tan inga ndo. Tyin tsa nacoq ndo tandihí tsa ña vaha tsa javahá ndo tahan tsanaha. ¹⁰ Tyin vityin tsa nanduví yo nyivi tsa tan iyó yo ñayivi nyito. Tan ndutsaá ca yo tumaa caá Nyoo, ra javahá tsi yo, nda cuanda coto vaha ca yo tsi ra. ¹¹ Ña ñiñi tsa cuví yo nyivi Israel, o nyivi Grecia, o nyivi inga ñuu. Tan ña ñiñi tatun tyaá ñi tuñi Nyoo tsi yo, o ña tyaá ñi; a cuví yo iin nyivi catsi iñi, o cuví yo iin ñi soho; a iyó tsitoho yo, o yofi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandihí yo tsihin

ra Cristo, tyin maa ra cuví tandihí tan iyó ra tsihin tandihí yo.

¹² Nyoo cuñi ra tsi yo tan nacatsí vaha ra tsi yo tyin cuví yo nyivi ra. Yacan cuenda coo ndo ñayivi nyito tumaa taahán tsi coo nyivi yihí cuenda ra; cundaahvi iñi ndo nyehe ndo tsi nyivi tahan ndo; cuví ndo nyivi vaha tan ndaahvi jaha ndo tsi ndo nuu Nyoo; ndumasu ndo; cunyee iñi ndo nyehe ndo tandihí tsihi tan tundoho tsihin tsa sii cuñi ndo. ¹³ Ña cundihi iñi ndo tsihin nyivi tahan ndo. Jaha ndo tucahnu iñi tsi ñi tatun náa javahá ñi tsi ndo. Tumaa ra Cristo jaha ra tucahnu iñi tsi maa ndo, tacan cuñi tsi javahá tucu maa ndo tsihin nyivi. ¹⁴ Tyin tsa cuñi tahan yo tsi yo, yacan cuví tsa ñiñi ca cuñi tsi. Tyin yacan cuví tsa jandu iin tsi yo. ¹⁵ Tan cuhva ndo tsa cundaca ñaha tsa taxin Nyoo añima ndo, tan na jaquihin ityi tsi tsi ndo. Tyin tsa cuenda yacan, cana Nyoo tsi ndo tan jandu iin ra tsi ndo tsihin ra Cristo. Tan cuhva ndo tyahvi nyoo tsi Nyoo.

¹⁶ Tan na cutu añima ndo tsihin tuhun ra Cristo, tan jacuaaha tahan ndo tuhun ra tsi ndo. Tan jandu iin tahan ndo iñi ndo tsihin tandihí tsa tsiñi tuñi tsa tsahá Nyoo tsi ndo. Cata ndo yaa tan salmo. Tan cata ndo yaa tsa tsahá Tatyí Ii Nyoo tsi ndo tsihin tsa nii iñi añima ndo. Tan tacan ñi nacuhva ndo tyahvi nyoo tsi Nyoo. ¹⁷ Tatun náa tyiñu cua javaha ndo, o náa cua cahan ndo, javaha ndo can tsihin sivi Jutu Mañi yo Jesús. Tan juvin ñi cuhva can nacuhva ndo tyahvi nyoo tsi Nyoo tsa cuenda maa ra Cristo.

Nu tsahá cuendar a Pablo nácaa nducú yo cuhva coo vaha yo tsihin nyivi

¹⁸ Nyooho tsa iyó yí cuhva ndo tsa cundaca ñaha yí ndo tsi ndo. Tacan taahán tsi coo ndo, tyin yihí ndo cuenda Jutu Mañi yo. ¹⁹ Tan nyooho rayii, cuñi ndo tsi ñasihi ndo. Tan ña cundihi iñi ndo nyehe ndo tsi ñi. ²⁰ Nyooho tsa nyihi tyaa yahvi ndo tsi jutu ndo tan tsi sihi ndo, tyin sii xaan cuñi Jutu Mañi yo tun javahá ndo tacan. ²¹ Nyooho tsa cuví ndo jutu tan sihi, ña yaha xaan jacuxaan ndo tsi sehe ndo, tyin coto nducuihaya xaan iñi tsi. ²² Tan nyooho tsa cuví musu, tyaa yahvi ndo tsi ra yihí ndaha tsi ndo. Ñavin tsa nyehe ñi ra tsi ndo tan tyaa yahvi ndo tsi ra naha, tan catyí ra naha tyin vaha xaan ndo. Tyaa yahvi nyooho tsi ra naha tsihin tsa nii iñi añima ndo vasu ña nyehe ra naha, tyin Nyoo nyehe ra. ²³ Tandihí ñi tyiñu javahá ndo, javaha ndo can tsihin tsa sii cuñi ndo tumaa tsa jahá tyiñu ndo cuenda Jutu Mañi yo tan ñavin cuenda nyivi. ²⁴ Tyin tsitó ndo tyin maa Jutu Mañi yo ra Cristo cua cuhva ra tsa taahán tsi tsi ndo tyin maa ra cuví ra yihí ndaha tsi ndo tsa nditsa. ²⁵ Tan

tatun javahá ndo tsa ña vaha, Nyoo cua tatsi tuñi ra tsi ndo tsa cuenda tsa ña vaha tsa javahá ndo, tyin ña siin caá iin yo tan inga yo nuu Nyoo, tyin tandihi yo tan inducu ñi caá yo.

4

¹ Nyoocho tsa iyó musu, cuñi tsi cuví ndo nyivi vaha tsihin musu ndo. Ndúchun iñi ndo tyin iyó ra yihí ndaha tucu tsi maa ndo nda gloria. Tan maa ra nyehé ra tsi ndo.

² Ndácan tahvi ndo tsihin tsa níi iñi ndo. Coo nyito ndo tan nacuhva ndo tyahvi nyoo tsi Nyoo tsa cuenda tandihi maa. ³ Ndácan tahvi ndo tsa cuenda ndi, tyin na nuña Jutu Mañi yo añima nyivi tan tyaa soho ñi tuhun xeehe ra Cristo tsa caahán ndi tsihin ñi. Tsacatyí tuhun ihya nyii yu vehe caa. ⁴ Ndácan tahvi ndo tsa cuenda yu na cuvi jacuahá yu tsi nyivi cuhva cuvi cutuñi vaha iñi ñi tuhun ra Cristo, tumaa taahán maa tsi javahá yu.

⁵ Cuiti cgo ndo tsihin nyivi tsa ña yihí tuhun Nyoo, tyin tacan tan cuvi cahan ndo tuhun Nyoo tsihin ñi. ⁶ Tan maa ñi tuhun vaha cahan ndo tsihin ñi. Tan taahán tsi coto ndo nácaa cua nacahan ndo tatun nducu tuhun ñi náa nducu tuhun ñi tsi ndo.

Nu tsahá ra Pablo nacumi tsi nyivi yihí cuenda Nyoo ñuu Colosas

⁷ Ra Tiquico, ra yañi yo, ra jahá tyiñu tyiñu Jutu Mañi yo tsihin yu, cua nacatyí tuhun ra tsihin ndo nácaa iyó yu. ⁸ Yacan cuenda jaquitsí yu tsi ra nu yucú ndo na jandu iin ra iñi ndo tan catyí tuhun ra tsihin ndo nácaa yucú ndi. ⁹ Tan vatsí ndihi ra Onésimo, ra ñuu ndo, tsihin ra. Vaha xaan tsinú iñi ra tsi ra Cristo, tan cuñi xaan yo tsi ra. Cua catyí tuhun maa ra naha tsihin ndo tandihi tsa cuví nu nyii yu ihya.

¹⁰ Ra Aristarco, ra nyii tsihin yu vehe caa ihya, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacoto yu tsi ndo tyin tun taa ra Marcos nu yucú ndo, vaha cahan ndo tsihin ra. ¹¹ Vatsí tucu nacumi tsi ndo jahá ra Jesús, ra tsa nañi tucu Justo. Tan tsitsi tsa tandihi ra Israel tsa yihí cuenda Nyoo, uñi taahan ñi ra ihya naha ra jahá tyiñu tyiñu Nyoo tsihin yu. Tan jandu iin xaan ra naha iñi yu. ¹² Vatsí tucu nacumi tsi ndo jahá ra Epafra, ra ñuu ndo. Musu ra Cristo cuví ra. Ña jandihí ra tsa tsicán tahvi ra tsi Nyoo tsa cuenda ndo na caca vaha ndo tsihin Nyoo. Tan coto vaha ca ndo nácaa taahán tsi javaha ndo tandihi cuhva cuñi ra. ¹³ Yuhu cuví tsandaa tyin ra Epafra tsicán tahvi xaan ra tsa cuenda ndo, tan tsa cuenda nyivi tsa yucú ñuu Laodicea tan ñuu Hierápolis. ¹⁴ Vatsí tucu nacumi tsi ndo jahá

ra Lucas, ra tsa cuví doctor tsa cuñi xaan yo, tan ra Demas tucu.

¹⁵ Cuhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan cuhva ndihi ndo nacumi tsi ña Ninfas tan tsi tandihi nyivi yihí cuenda Nyoo tsa ndu iin yuvehe ña. ¹⁶ Tatun ndihi cahvi ndo carta ihya, tan jacuhun ndo itsi tsi nyivi yihí cuenda Nyoo nda ñuu Laodicea na cahvi ndihi ñi itsi. Tan na cuhva ñi carta tsa jacuhun yu tsi ñi, cahvi ndo. ¹⁷ Cahan ndo tsihin ra Arquipo tan catyí ndo: “Javaha vaha tyiñu tsa tsahá Jutu Mañi yo tsi un tyin javaha un.”

¹⁸ Yuhu ra Pablo tyaa yu nacumi ihya tsi ndo. Na ña naa iñi ndo tyin nyii yu vehe caa tsa cuenda ra Cristo. Tan na nasoco Nyoo tsi ndo.

Tan na cuvi tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Tesalónica

Nu tyaq ra Pablo tan ra cutahán tsihin ra iin carta cuenda nyivi yihí tuhun Nyoo

¹Yuhu ra Pablo ra Silvano tan ra Timoteo, jaquitsi ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo aña ndo.

Vaha xaan tsinú iñi nyivi Tesalónica tsi Nyoo

²Tandihí ñi quivi tsahá ndi tyahvi nyoo tsi Nyoo tsa cuenda tandihí ndo. Tan iin nyita ñi tsicán tahvi ndi tsi ra tsa cuenda ndo. ³Tan nducuhún iñi ndi tuhun ndo nuu Nyoo Jutu yo tyin ñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñi ndo tsi ra. Tan tsihin tsa ñi iñi ndo ndatú ndo tsa ñihi ndo tsa cua cuhva Jutu Mañi yo Jesucristo tsi ndo. ⁴Tyin tsitó ndi tyin Nyoo cuñi xaan ra tsi ndo, nyooho yañi, tan maa ra nacatsi vaha tsi ndo. ⁵Tyin quivi cahan ndi tuhun Nyoo, nácaa jacacú ra tsi yo, tsihin ndo, cahan ndi tuhun tsihin tunyee iñi Tatyí li Nyoo, tan tsitó vaha ndi tyin tuhun nditsa cuví tsi. Tan ñavin tuhun caahán ñi cuví tsi. Tan nyehe ndo nácaa tsicoq ndi quivi tsiyucu ndi tsihin ndo. Tsicoq ndi tacan tsa cuenda tsa vaha tsi maa ndo.

⁶Tan quitsahá iyó ndo cuhva iyó ndi, tan cuhva iyó Jutu Mañi yo. Tyin naquihin cuenda ndo tuhun Nyoo, vasu cuaha tundoho nyehe ndo tsa cuenda tsi. Maa tyin si xaan cuñi ndo tyin maa Tatyí li tsahá can tsi ndo. ⁷Tan tsa tacan iyó ndo, jatyingee xaan ndo tsi tandihí nyivi yihí cuenda Nyoo tanii cahnú Macedonia tan tanii cahnú Acaya ihya, tyin nyehe ñi cuhva iyó ndo tsihin Nyoo. ⁸Ñavin Macedonia tan Acaya ñi, maa tyin tandihí ñi ityi nu tsinú nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuanda ña ñiñi ca cuñi tsi cahan ndi tuhun Nyoo tsihin ñi. ⁹Tyin juven ñi maa ñi nacatyí tuhun tsihin ndi nácaa tsa vaha xaan naquihin cuenda ndo tsi ndi. Nacatyí tuhun ndihí tucu ñi tsihin ndi nácaa jandihí ndo tsa jacahnú ndo tsitoho tan quitsahá jahá tyiñu ndo tyiñu Nyoo nyito. ¹⁰Tan nacatyí tuhun tucu ñi nácaa ndatú ndo quivi quitsi ra Jesús Sehe Nyoo inga tsaha tsa cua

quee ra andivi. Ra ican cuví ra tsa janandoto Nyoo. Tan maa ra cuví ra jacacú tsi yo tsa ña tatsi tuñi ca Nyoo tsi yo quivi cua tatsi tuñi ra tsi nyivi.

2

Tyiñu jahá ra Pablo ñuu Tesalónica

¹Nyooho yañi, tsitó ndo tyin ñavin tsa cuatu quitsi ndi cahan ndi tuhun Nyoo ñuu ndo. ²Tyin tsitó ndo nácaa nyehe ndi tundoho jahá nyivi ñuu Filipo tsa ndi cumañi ca tsaq ndi ñuu ndo. Tan vasu nyehe xaan ndi tundoho ñuu can, maa tyin quivi tsaq ndi ñuu ndo cahan ndi tuhun Nyoo tsihin ndo tsihin tsa ña yuuhvi ndi. Tan vasu xaan xaan cuñi nyivi ñuu ndo, maa tyin jatyingee xaan Nyoo tsi ndi tan ñi iñi ndi jacoto ndi tsi ndo cuhva jacacú ra tsi yo. ³Tyin tuhun tsa tsahá cuenda ndi tsi ndo maa ñi maa tsa nditsa cuví tsi. Tan nduve tsa caquiñi tsica iñi ndi. Tan ndi ñavin tsa cuñi ndi jandavi ñaha ndi tsi ndo. ⁴Nduve tsa ña vaha cahan ndi, tyin Nyoo nyehe ra tsi ndi, tan maa ra tava tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahán ndi tumaa tava tyiñu maa ra tsi ndi. Tyin ña cuñi ndi tsa vaha cahan nyivi tuhun ndi, maa tyin cuñi ndi tsa vaha cahan Nyoo tuhun ndi, tyin maa ra nyehe ra cuhva iyó yo. ⁵Tan tsitó ndo tyin ndi iin tsaha tan ña cahan ndi tsihin tuhun tsa tyaqui xaan tsa cuñi ndi jandavi ñaha ndi tsi ndo. Tan ndi ñavin tsa cuñi ndi jaha canaa ndi xuhun tan cahan ndi tuhun Nyoo tsihin ndo. Maa Nyoo cuví tsandaa tyin nditsa tsa caahán ndi ihya. ⁶Tan ndi iin tsaha ña nducu ndi cuhva jacahnú nyivi tsi ndi, ndi nyooho, ndi inga ñi. Nditsa, iyó ndatu tsi ndi tsa jacahnú ndo tsi ndi tyin maa ra Cristo tava tyiñu tsi ndi, maa tyin ña cuñi ndi tsa javaha ndo tacan tsihin ndi. ⁷Tan vita cahan ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñi ndi jatyingee ndi tsi ndo. ⁸Cuñi xaan ndi tsi ndo, tan yacan cuenda ñavin tuhun Nyoo ñi cuñi ndi cuhva ndi tsi ndo, tyin cuñi ndi cuhva tucu ndi nda cuanda ñayivi iyó ndi tsa cuenda tsa cuñi ndi tsi ndo. ⁹Nyooho yañi, nducuhún iñi ndo nácaa jahá tyiñu ndi tan tsatsi ndi quivi tsiyucu ndi tsihin ndo. Jahá tyiñu ndi tsinu cahfi tan tsacuaa tyin ña cuñi ndi jatyañu ndi tsi ndo tsitsi tsa caahán ndi tuhun Nyoo tsihin ndo.

¹⁰Tan nyooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javahá ndi quivi tsiyucu ndi tsihin ndo tsa cuví ndo nyivi tsinú iñi tsi ra Cristo. Maa tyin maa ñi maa cuhva cuñi Nyoo javahá ndi, tan yacan cuenda ña cuví cahan ndo tsi ndi. ¹¹Tan tsitó tucu ndo nácaa jandu iin ndi iñi intuhun intuhun ndo tsihin tuhun tsa

tsahá cuenda ndi tsi ndo. Tsaḥá ndi tunyee iñi tsi ndo tumaa iin rayii tsa iyó sehe tsahá ra tunyee iñi tsi sehe ra. ¹² Tan catyi ndi tsihin ndo, catsi coo ndo tumaa taahán tsi coo nyivi yihí cuenda Nyoo. Tyin maa Nyoo caná tsi ndo tyin coo ndo nu ndacá ñaha ra, tan nyehe ndo tsa cahnu cuví ra.

¹³ Yacan cuenda iin nyita ñi tsahá ndi tyahvi nyoo tsi Nyoo, tyin quivi tsiñi ndo tuhun ra tsa cahán ndi tsihin ndo, naquihín cuenda ndo tuhun can tyin nacotoḡ ndo tyin tuhun Nyoo cuví tsi tan ñavin tuhun ra ñayivi cuví tsi. Tan nditsa tsa tuhun Nyoo cuví tsi, tyin quitsahá tsinú iñi ndo tsi Nyoo tan nasamá cuhva iyó ndo. ¹⁴ Yahá can tan nyehe tucu maa ndo tundoho jahá nyivi ñuu ndo. Tumaa tsa nyehe nyivi yihí cuenda ra Cristo Jesús ñuu tsa cayucú Judea. Tacan nyehe ñi can tundoho jahá nyivi Israel. ¹⁵ Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusu yuhu Nyoo tahán tsanaha. Ñi Israel can tsinyaa ndaha ñi tsi ndi. Ñavin cuhva cuñi Nyoo iyó ñi. Tan xaan iñi ñi tsi tandihí maa nyivi. ¹⁶ Tatun cuñi ndi cahan ndi tuhun Nyoo tsihin nyivi tsa ñavin ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasí ñi nu caahán ndi, nducuaha ca cuatyí ñi. Tan vityin nu ndihí tuhun tatsí tuñi xaan Nyoo tsi ñi.

Nu cahan ra Pablo tyin cuñi ra cunyehe ra nu yucú nyivi Tesalónica inga tsaha

¹⁷ Nyooḡo yañi, tsa yahá tsa quitá ndi ñuu ndo juhva quivi, vasu ndi maa ña nyehé ndi tsi ndo, maa tyin ñuhú xaan iñi ndi tsi ndo. Tan tsihin tsa ñi iñi ndi cuñi ndi cunyehe ndi nu yucú ndo inga tsaha. ¹⁸ Tan nducu ndi cuhva quitsi ndi, maa tyin ña cuví. Yuhu ra Pablo, cuaha xaan tsaha nducu yu cuhva quitsi ndi, maa tyin tandihí ñi tsaha tsa cuñi ndi quitsi ndi, ña tsahá nu ña vaha. ¹⁹ Maa tyin ¿náa ndatú ndi? Tan ¿yóo cuenda cusii iñi ndi, tan vaha cuñi ndi? ¿A ñavin tsa cuenda maa ndo cua cusii xaan iñi ndi nuu Jutu Mañi yo Jesucristo quivi quitsi ra inga tsaha? ²⁰ Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahá tyiñu ndi. Tan sii xaan cuñi ndi tsa cuenda yacan.

3

¹ Tan ña cunyege ca iñi ndi tsa cuñi ndi coto ndi nácaa cuahán tsinú iñi ndo tsi Nyoo. Tan tyaa ndi cuhva tsa ndoo intuhun ñi maa yu ñuu Atenas. ² Tan jaquitsi yu tsi ra Timoteo yañi yo, na quitsi nyehe ra nu yucú ndo. Ra ican cuví musu Nyoo tyin inducu ñi jahá tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsi ndi tsi ra nu yucú ndo na jandu iin ca ra iñi ndo tan cuhva ca ra tunyee iñi tsi ndo na tsinú ca iñi

ndo tsi Nyoo. ³ Tyin tacan tan ndi intuhun ndo tan ña ndu uvi iñi ndo tsihin tsa nyehé ndo tundoho. Tyin nyooḡo tsitó ndo tyin nyaá tsa nyehe yo tundoho. ⁴ Tyin nda ndi yucú ca maa ndi tsihin ndo, tan cahán ndi tsihin ndo tyin nyaá cua nyehe yo tundoho. Tan tsitó vaha maa ndo tyin tacan cuví. ⁵ Ña cunyege ca iñi yu tsa cuñi yu coto yu nácaa yucú ndo. Yacan cuenda jaquitsi yu tsi ra Timoteo na nyehe ra tun vaha tsinú iñi ndo tsi Nyoo. Tyin yuuhvi yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuví, tsa cuatu ñi jahá tyiñu ndi nu yucú ndo.

⁶ Maa tyin vityin tsa tsag nuhu ra Timoteo tsa quitsi ra nu yucú ndo. Tan nacatyí tuhun ra tsihin ndi tyin ñi xaan iñi ndo tsinú iñi ndo tsi Nyoo. Tan cuñi tahan xaan ndo tsi ndo. Tan catyi ra tyin ñuhú xaan iñi ndo tsi ndi tan cuñi xaan ndo nyehe ndo tsi ndi; tumaa tsa cuñi tucu maa ndi nyehe ndi tsi ndo. ⁷ Yacan cuenda, nyooḡo yañi, vasu ndi maa cuaha tsa taahán ndi tan cuaha tundoho nyehé ndi, maa tyin vaha xaan cuñi ndi tsa tsitḡ ndi tyin nyooḡo vaha tsinú iñi ndo tsi Nyoo tan ña nacoó ndo tsi ra. ⁸ Tyin tumaa tsa ndutsag ñayivi iyó ndi cuñi ndi tsa tsitḡ ndi tyin nyooḡo vaha tsinú iñi ndo tsi Nyoo. ⁹ Ndi ña ñihí ca ndi cuhva cuhva ndi tyahvi nyoo tsi Nyoo tsa cuenda ndo. Tyin sii xaan cuñi ndi nuu Nyoo tsa cuenda tyin vaha cuahán ndo tsihin ra. ¹⁰ Tsicán tahvi xaan ndi tsi Nyoo tsinu cahñi tan tsacuaa, tyin cuñi xaan ndi quitsi nyehe ndi tsi ndo. Tacan tan cuví jandu iin vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin cuhva tsinú iñi ndo tsi ra.

¹¹ Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyingee tan cuví quitsi ndi nu yucú ndo. ¹² Tan na jatyingee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihí ca nyivi tumaa tsa cuñi maa ndi tsi ndo. ¹³ Tyin tacan tan cuñi coo ndo tsihin ra tyin tsa yahá janduvahá ra añima ndo. Tan ña cua coo ca cuatyí ndo nuu Nyoo Jutu yo quivi quitsi Jutu Mañi yo Jesucristo tsihin tandihí nyivi yihí cuenda ra.

4

Nacaa taahán iñi Nyoo coo yo

¹ Vityin nyooḡo yañi, tsihin sivi ra Jesús caahán ndaahvi xaan ndi tsihin ndo tan tsicán ndi tsi ndo tsa ña jandihí ndo tsa iyó ndo tumaa tsa janahá ndi tsi ndo. Jañihí ca ndo nducu ndo cuhva coo vaha ndo nuu Nyoo tumaa taahán iñi maa ra.

²Tyin nyoooho tsa tsitó maa ndo nácaa tava tyiñu ndi tsi ndo tumaa tava tyiñu maa Jutu Mañi yo Jesús tsi ndi. ³Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo cuhva nduvaha añima yo nuu ra. Tan nyoooho, rayii, ña coo ndo tsihin ñaha tun ñavin ñasihi ndo cuví ña, tan ñiñaha na ña coo ñi tsihin rayii tun ñavin yii ñi cuví ra. ⁴Tan nyoooho yañi, intuhun intuhun ndo cuñi tsi coto ndo nácaa coo vaha ndo tsihin ñasihi ndo. Iin ñi maa ña cuñi ndo tan jaha ndo tsa ñayivi tsi ña tan ña nducu ndo inga ñaha. ⁵Ña caca caquiñi iñi ndo nyehe ndo tsi ñasihi ndo, ña javaha ndo tumaa javahá nyivi ña yihí tuhun Nyoo. ⁶Ndi intuhun ndo tan ña jandavi ñaha ndo tsi inga ca rayii tan coo ndo tsihin ñasihi ra naha. Tyin tun javaha ndo tacan, ñihi xaan ca tatsi tuñi Jutu Mañi yo tsi ndo, tumaa tsa cahan ndi tsihin ndo. ⁷Tyin Nyoo cana ra tsi yo tsa coo yo cuhva cuñi maa ra, tan ña javaha yo tsa caquiñi. ⁸Yacan cuenda nyivi ña cuñi tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí li ra tsi yo. ⁹Maa tyin tuhun tsa cuñi tahan yo tsi yo ña tsiñi ñuhu tsa tyaa yu itsi nu carta ihya. Tyin tsa janahá maa Nyoo tsi yo nácaa taahán tsi cuñi tahan yo tsi yo. ¹⁰Tan nyoooho tsa tsitó maa ndo tuhun can tyin cuñi ndo tsi tandihi nyivi yihí tuhun Nyoo tsa iyó Macedonia nu iyó ndo. Maa tyin caahán ndaahvi yu tsihin ndo, yañi, tyin na jañihi ca ndo cuñi tahan ndo tsi ndo tsa intuhun intuhun quivi. ¹¹Nducu ndo cuhva coo taxin ndo. Tan ña tyihí ndo tsi ndo nu ña taahán tsi quihvi ndo. Jaha tyiñu ndo iin ñi tyiñu maa ndo. Tan jaha tyiñu ndo tsihin ndaha ndo tumaa cahan ndi tsihin ndo quivi can. ¹²Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

Nacaa cua cuvi quivi quitsi Jutu Mañi yo Jesús inga tsaha

¹³Nyoooho yañi, cuñi ndi tsa coto ndo nácaa taahán nyivi tsa tsa tsihi, tyin tacan tan ña nducuihaya iñi ndo tumaa cuihaya cuñi nyivi ña cua nandoto tsa ña cua coo tsihin Nyoo. ¹⁴Tumaa tsa tsinú iñi yo tyin tsihi ra Jesús tan nandoto ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

¹⁵Yacan cuenda catyí ndi tsihin ndo tumaa jacuahá Jutu Mañi yo tsi ndi, tyin yoo tsa nyito nda quivi quitsi ra, ña jihna ca yo cua cuhon tan nacao yo tsi nyivi tsa tsihi. ¹⁶Tyin juven ñi maa Jutu Mañi yo cua nuu, tan cua cana tsaa ra tyin maa ra ndacá ñaha. Tan cua cana tsaa ra cuví ityi nuu tsihin ángel. Tan cua navacu trompeta

Nyoo. Tacan tan nyivi tsa tsinú iñi tsi ra Cristo tan tsihi ñi, jihna ca ñi cua nandoto. ¹⁷Yahá can tan yoo tsa ndi nyito cua ndaa yo iin caa ñi tsihin ñi nu vico, nu cua ñihi tahan yo tsihin Jutu Mañi yo. Tacan tan cua coo cuvi yo tsihin ra. ¹⁸Yacan cuenda jandu iin tahan ndo iñi ndo tsihin tuhun ihya.

5

¹Nyoooho yañi, ña ñiñi cuñi tsi jacoto yu tsi ndo ama cua cuvi tandihi tsa tsa yahá cahan yu tuhun tsihin ndo. ²Tyin tsa tsitó maa ndo tyin ña cua coto yo náa cuhva, náa quivi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihvi ñasuhu yuvehe yo tsa tsacuaa tacan cua cuvi. ³Tyin quivi tsa catyí nyivi tyin taxin ñi caa, tan nduve maa tsa yuuhvi ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe, sana iñi ña tan quitsahá cuuhvi tsitsi ña. Tan tacan cua tahan nyivi quivi quitsi Jutu Mañi yo, tyin ña cua cuvi ca cunu xeehe ñi. ⁴Maa tyin nyoooho yañi, quivi quitsi Jutu Mañi yo ña cua tahan ndo tumaa taahán nyivi, tun sana iñi ñi tan quihvi ñasuhu yuvehe ñi tyin nyoooho ñavin ca nu naa iyó ndo. ⁵Tyin tandihi yo tsító yo nácaa taahán tsi coo yo tyin jandunditsín Nyoo añima yo, tan ña iyó ca yo nu naa tumaa iyó nyivi ña nacotó tsi Nyoo. ⁶Yacan cuenda catsi coo ndo cconyito ndo tan ña cusu ndo tumaa iyó nyivi ña nacotó tsi Nyoo, tyin ñi ican ña tyaa yahvi ñi tsa cua quitsi Jutu Mañi yo inga tsaha. ⁷Tyin nyivi quixi, quixi ñi tsacuaa, tan nyivi tuhva tsihi nyixi, tsiñi ñi tsacuaa. ⁸Maa tyin yoo tsa cuvi yo nyivi iyó tsinu cahní, na catsi coo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yhi yiqui nyica ra, tacan taahán tsi jaha yo cuenda tsi yo tsihin tsa tsinú iñi yo tsi Nyoo, tan tsihin tsa cuñi yo tsi tandihi nyivi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahán tsi cuita iñi yo tyin cua cacu yo. ⁹Tyin Nyoo ña nacatsi ra tsi yo tsa tatsi tuñi ra tsi yo, nacatsi ra tsi yo tyin jacacu Jutu Mañi yo Jesucristo tsi yo jaha ra. ¹⁰Tyin ra Jesucristo tsihi ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihi yo, a nyito yo, maa tyin tandihi yo cua coo yo iin caa ñi tsihin ra. ¹¹Yacan cuenda jandu iin ndo iñi nyivi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vitin.

Nu tsahá cuenda ra Pablo tsi nyivi yihí cuenda Nyoo

¹²Nyoooho yañi, caahán ndaahvi xaan ndi tsihin ndo, jaha ndo tsa ñayivi tsi ra jahá tyiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin

tyiñu Jutu Mañi yo javahá ra naha. ¹³ Cuñí tsi tsa jaha xaan ndo tsa ñayivi tsi ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

¹⁴ Tavá tucu ndi tyiñu tsi ndo yañi, jacahan ndo tsi nyivi ña cuñí jaha tyiñu. Tan jandu iin ndo iñi nyivi tsa ndu uvi xaan iñi. Tan jatyinyee ndo tsi nyivi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihi iñi ndo tsihin nyivi.

¹⁵ Jaha ndo cuenda coto javaha ndo tsa ndavaha ñi tsihin nyivi javahá tsa ña vaha tsihin ndo. Ndūcu ndo cuhva javaha ndo tsa vaha tsihin nyivi yihí tuhun Nyoo tsihin ndo tan tsihin tandihi ca nyivi.

¹⁶ Cusiñi iñi ndo tandihi ñi quivi. ¹⁷ Tan ña jandihi ndo tsa tsicán tahvi ndo tsi Nyoo. ¹⁸ Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñí maa Nyoo javaha yo tsa cuvi yo nyivi tsinú iñi tsi ra Cristo Jesús.

¹⁹ Ña ndahva ndo ñuhū Tatyí Ii Nyoo tsa iyó añima ndo. ²⁰ Ña vacu nducu ndo tsa caahán ra cuví ndusu yuhu Nyoo. ²¹ Nyehe jihna ndo tun tandihi tsa caahán ra tan vaha tsi tumaa tsa taahán tsi nyehe ndo tandihi inga ca tuhun. Tan naquihin ndo tsa vaha. ²² Ña tyihi ndo tsi ndo nu iyó tsa ña vaha.

²³ Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsiñi tuñi iñi ndo tan tsihin tsa tsicá iñi ndo tan tsihin cuñu ñuhū ndo tyin tacan tan ña coo ca cuatyí ndo quivi quitsi Jutu Mañi yo Jesucristo inga tsaha. ²⁴ Ra tsa cana tsi yo, cuví cuita iñi yo tsi ra, tyin maa ra cua javaha tandihi maa tsa caahán yu ihyá.

Nu ndihi cahqn ra Pablo tan tsahq ra nacumi tsi nyivi

²⁵ Yañi, ndacan tahvi ndo tsa cuenda ndi.

²⁶ Tan cuhva ndo nacumi tsi tandihi nyivi yihí cuenda Nyoo.

²⁷ Tavá tyiñu yu tsi ndo tsihin sivi Jutu Mañi yo na cahvi ndo carta ihyá nuu tandihi nyivi tsa yihí cuenda Nyoo.

²⁸ Tan maa Jutu Mañi yo Jesucristo nasoco tsi ndo.

Tan na cuvi tsi tacan ñi.

Carta Tsinú Uvi Tsa Jacuhun Ra Pablo Tsi Nyivi Yihí Cuenda Nyoo ñuu Tesalónica

Nu tyaq ra Pablo, tan ra cutahán tsihin ra, tsa tsinu uvi carta tsa cuenda nyivi yihí tuhun Nyoo ñuu Tesalónica

¹ Yuhu ra Pablo, ra Silvano tan ra Timoteo jaquitsi ndi carta ihya tsi ndo tsa cuvi ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan Jutu Mañi yo Jesucristo. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu cahan ra Pablo nácaa cua tatsi tuñi Nyoo tsi nyivi iyó cuatyí quivi quitsi ra Cristo

³ Nyooho yañi, cuñi tsi tsa nacuhva ndi tyahvi nyoo tsi Nyoo tsa cuenda ndo tandihi ñi quivi, tyin tacan taahán maa tsi javahá ndi tyin ñihi xaan cuahán tsinú ñi ndo tsi Nyoo tsa iin iin quivi, tan cuñi xaan ndo tsi nyivi yihí tuhun Nyoo tsihin ndo. ⁴ Yacan cuenda sii xaan cuñi ndi caahán ndi tuhun ndo tsihin nyivi yihí cuenda Nyoo inga ca vehe ñuhu. Tyin nyooho cunye xaan ñi ndo nyicún ndo tsi Nyoo tan vaha xaan tsinú ñi ndo tsi ra vasu ndi maa nyehé xaan ndo tundoho jahá nyivi. ⁵ Tandihí yacan janahá tyin Nyoo cuiti xaan jacutuñi ra tyin cua catyi ra tyin taahán maa tsi huhun nyooho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

⁶ Tan tsa cuenda maa Nyoo, taahán tsi janyehé ra tundoho tsi nyivi tsa janyehé xaan tundoho tsi ndo. ⁷ Tan nyooho tsa nyehé xaan tundoho jahá nyivi, cua cuhva ra quitatu ndo iin caa ñi tsihin ndi quivi cua quitsi nyico Jutu Mañi yo Jesucristo tsa quee ra andivi tsihin ñuhu tan tsihin ángel tsa iyó tunyee ñi maa ra. ⁸ Tyin tatsi tuñi ra tsi nyivi tsa ña nacotó tsi Nyoo, ñi tsa ña tyaá yahvi tuhun tsa jacacú ra tsi yo. ⁹ Ñi ican cua janyehé Nyoo tundoho tan ña cua cundihi maa tsa nyehé ñi tundoho, ña cua nyehé ñi tsi Jutu Mañi yo Jesucristo tan ña cua nyehé ñi tsa cahnú cuvi ra tsihin tunyee ñi tsa iyó tsi ra ¹⁰ quivi cua quitsi ra. Tyin quivi can nyivi yihí cuenda ra, ñi tsinú ñi tsi ra, cua jacahnu ñi tsi ra. Tan iyo xaan cua cuñi ñi nyehé ñi tsi ra. Tan tyañu nyivi can, cua cuyucu tucu nyooho tyin tsinú ñi ndo tuhun tsa cahan ndi tsihin ndo.

¹¹ Yacan cuenda tsicán tahvi ndi tsi Nyoo tsa cuenda ndo tandihi ñi quivi, na jatyinyee ra tsi ndo. Tacan tan catyi ra tyin taahán tsi tsi ndo tsa cuvi ndo nyivi cana maa ra.

Tan tsicán tahvi tucu ndi tsi ra na jatyinyee ra tsi ndo tan cuvi javaha ndo tsa vaha tsa cuñi ndo javaha ndo. Tan na quita vaha tandihi tyiñu ra tsa javahá ndo tsihin tunyee ñi tsahá ra tsi ndo tyin tsinú ñi ndo tsi ra. ¹² Tacan tan cua jacahnu nyivi sivi Jutu Mañi yo Jesucristo, tyin nyehé ñi cuhva iyó ndo. Tan cua jacahnu tucu maa ra tsi ndo nuu nyivi tsa cuenda tumañi ñi tsa tsahá ra tsi yo jahá Nyoo.

2

Ra tsa nduve ley Nyoo iyó añima

¹ Nyooho yañi, vityin cuñi yu cahan yu tsihin ndo tsa cuenda quivi quitsi nyico Jutu Mañi yo Jesucristo tan ndu iin yo tsihin ra. Caahán ndaahvi xaan ndi tsihin ndo, ² ña numi xaan sama ndo cuhva tsicá ñi ndo. Tan ña nayuhvi ndo tatun quita tuhun jaha tatyí ña vaha tyin tsa tahán tsi quivi quitsi Jutu Mañi yo; vasu ndi maa nyivi caahán can, a jaquitsi ñi carta tsi ndo tan catyi ñi tyin yuhu jaquitsi carta can tsi ndo. Ña tsinu ñi ndo tandihi yacan. ³ Ndi iin tsaha tan ña cuhva ndo jandavi ñaha nyivi tsi ndo. Tyin tsa ndi cumañi ca tahan tsi quivi quitsi Jutu Mañi yo, cuaha xaan nyivi, xaan cua cuñi ñi nyehé ñi tuhun Nyoo, tan cua quituvi rayii tsa nduve ley Nyoo iyó añima, ra tsa nyaá maa huhun anyaya. ⁴ Ra ican cuvi ra xaan ñi tsi Nyoo. Cua cañi tahan ra tsihin tandihi tsa nyisó sivi Nyoo; tan cua cañi tahan ra tsihin tandihi tsa jacahnú tsi Nyoo. Tan nda cuanda tsitsi vehe ñuhu cahnu Nyoo tan cua cunyaa ra tan cua cundaca ñaha ra, cua jaha ra tyin Nyoo cuvi ra.

⁵ ¿A ña nducuhún ñi ndo tyin nda ndi nyii ca yu tsihin ndo tan cahan yu tuhun ihya tsihin ndo? ⁶ Maa tyin nyooho tsitó ndo náa tsa tyasi tan ñaha ca quituvi ra. Nda tahan maa tsi quituvi ra tan cua quituvi ra. ⁷ Vityin tsa iyó tatyí tsa ña tsahá tyaá yahvi nyivi tsi Nyoo, maa tyin ndi nyii xeehe nu, tyin iyó iin ra tsa ña tsahá quituvi nu. Maa tyin quivi cua quita ra tan cundihi tsa tyasi ra, tacan tan cua quituvi nu. ⁸ Tacan tan cua quituvi ra tsa nduve ley Nyoo iyó añima, maa tyin Jutu Mañi yo Jesús cua cañi ra tsi ra tsihin tuhun quitá yuhu ra tan cua janaa ra tsi ra tsihin tsa xiñu tsa cahnú cuvi ra quivi quitsi ra inga tsaha. ⁹ Ra ña vaha can, nu ña vaha cua jaquitsi tsi ra. Tan cua cuhva nu tandihi tsa nyiyi nu, coo tsi ra, tan tsihin seña tan tsa iyo cua javaha ra cua jandavi ñaha ra tsi nyivi. ¹⁰ Cua cuatyíñu ra tandihi nuu tsa ña vaha tan tsihin yacan cua jandavi ñaha ra tsi nyivi tsa ña cua cacu. Tyin ñi can ña cuñi ñi naquihin cuenda ñi tuhun Nyoo tsa nditsa tan cacu ñi. ¹¹ Tan yacan cuenda cua cuhva Nyoo ndatu tsa jandavi ñaha tatyí ña vaha can tsi ñi. Tan cua tsinu ñi ñi tsa

ña nditsa. ¹² Tacan tan cua tatsi tuñi ra tsi tandihi ñi tyin ña cuñi ñi tsinu iñi ñi tuhun nditsa. Tyin taahán ca iñi ñi javahá ñi tsa ña vaha.

Nu cahán ra Pablo tuhun nyivi tsa nacatsi Nyoo tyin cacu ñi

¹³ Maa tyin tandihi quivi cuñi tsi cuhva ndi tyahvi nyoo tsi Nyoo tsa cuenda nyoocho yañi. Tyin cuñi xaan Jutu Mañi yo tsi ndo. Tan nacatsi ra tsi ndo nda jihna, [nda ndi cumañi ca tsinu ñuhu ñayivi], tyin tsihin tsa janduvahá Tatyí li ra añima ndo tan tsihin tsa tsinú iñi ndo tuhun nditsa cuvi cacu ndo. ¹⁴ Yacan cuenda cana Nyoo tsi ndo quivi tsa cahán ndi tuhun ra tsihin ndo tyin tacan tan ñihi ndo tsa cahnu cuvi Jutu Mañi yo Jesucristo coo tsi ndo.

¹⁵ Yacan cuenda nyoocho yañi, jandu iin ndo iñi ndo. Tan ña naa iñi ndo tandihi tsa tsahá cuenda ndi tsi ndo tan jacuahá ndi tsi ndo nda ndi yucú ca maa ndi tsihin ndo. Tan ña naa iñi ndo tandihi tuhun tsa tyaa ndi nu carta tsa jaquitsj ndi tsi ndo. ¹⁶ Jutu Mañi yo Jesucristo tan Nyoo Jutu yo, juvin ra cuñi tsi yo; tan tsahá ra tunyee iñi tsi yo tandihi tyembu, tan tsahá ra naha tsa cuita iñi yo coo yo tsihin ra. Tandihi yacan tsahá ra tsi yo quivi tsahá ra tsa vaha tsa iyó tsi ra tsi yo. ¹⁷ Na cuhva ra tsa sii cuñi añima ndo. Tan jandu iin ra iñi ndo, tacan tan cua cahán ndo tan javaha ndo tandihi tsa vaha.

3

Nu tsicán ra Pablo na ndacan tahvi nyivi tsi Nyoo tsa cuenda ra naha

¹ Tan inga tuhun, nyoocho yañi, ndacan tahvi ndo tsa cuenda ndi tyin tacan tan numi ñi cua tsaa tuhun Jutu Mañi yo tandihi ñi ityi. Tan na tyaa yahvi nyivi tuhun ra tan naquihin cuenda ñi itsi tumaa tsa naquihin cuenda maa ndo itsi. ² Ndacan tahvi tucu ndo na jacacu Nyoo tsi ndi ndaha nyivi ña vaha. Tyin ña tandihi ñi tan tsinú iñi ñi tsi Jutu Mañi yo. ³ Maa tyin Jutu Mañi yo javahá ra tsa catyi ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tiin nu ña vaha tsi ndo. ⁴ Tan nditá xaan iñi ndi tsi Jutu Mañi yo tyin tsitó ndi tyin jatyinyee ra tsi ndo tan javahá ndo tsa catyi ndi tyin javaha ndo. Tan tsitó tucu ndi tyin ña cua jandihí ndo tsa javaha ndo tacan. ⁵ Tan na jatyinyee ca Jutu Mañi yo tsi ndo tan cuñi ca ndo tsi nyivi tumaa tsa cuñi maa Nyoo tsi yo tsihin ñi, tan cunyeec ca iñi ndo nyehé ndo tundoho, tumaa tsa cunyeec iñi maa ra Cristo nyehé ra tundoho.

Taahán tsi tsa jaha tyiñu yo

⁶ Tan vityin nyoocho yañi caahán ndi tsihin ndo tsihin sivi Jutu Mañi yo Jesucristo, ña cunyaa naa ndo tsi ra yañi yo tsa ña cuñi jaha tyiñu, tan ña cuñi ra coo ra tumaa

jacuahá ndi tsi ndo. ⁷ Tyin tsitó maa ndo nácaa taahán tsi coo ndo tumaa tsicoo maa ndi tsa tsiyucú ndi tsihin ndo. Tyin nyuhu ña tsicá nuu utsan ndi tyin jaha tyiñu ndi. ⁸ Tan tandihi tsa tsatsj ndi, maa ñi maa tyahvi ndi tsi ndo. Tyin jaha tyiñu ndi tsinu cahñi tan tsacuaa tyin ña cuñi ndi tsa coso tundoho can siqui ndi intuhun ndo. ⁹ Vasu ndi maa iyó ndatu tsi ndi tsa ndacan ndi tsa jatyinyee ndo tsi ndi, maa tyin nyuhu jaha tyiñu ndi tyin cuñi ndi janaha ndi nácaa taahán tsi coo ndo. ¹⁰ Tyin quivi tsiyucú ndi tsihin ndo, cahán ndi tsihin ndo tyin nyivi ña cuñi jaha tyiñu, na ña catsi ñi. ¹¹ Caahán ndi yacan tyin ñihí tuhun ndi tyin yihi ndo tsicá nuu ñi maa ndo tan tyihí ndo tsi ndo nu ña taahán tsi quihvi ndo tan ña jahá tyiñu ndo. ¹² Nyoocho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jaha tyiñu ndo, tan coo tsa catsi ndo.

¹³ Nyoocho yañi, ña cundihí iñi ndo javaha ndo tsa vaha. ¹⁴ Tatun iyó iin ra ña cuñi tyaa yahvi tuhun caahán ndi nu carta ihya, jaha ndo cuenda ndáa ra cuvi ra, tan ña cunyanaa ndo tsi ra na nducahan nuu ra. ¹⁵ Maa tyin ña cuxaan iñi ndo tsi ra. Cuhva cuenda ndo tsi ra tyin yañi yo tsi ra.

Nu ndihí cahán ra Pablo

¹⁶ Jutu Mañi yo ra iyó tsa vaha tsi, juvin ñi maa ra cuhva tsa vaha coo añima ndo tandihi ñi quivi tan tandihi ñi tsaha vasu ndi maa nyehé ndo tundoho. Tan Nyoo ndoo tsihin tandihi ndo. ¹⁷ Yuhu ra Pablo tyaa yu nacumi tsi ndo nu tutu ihya tsihin ndaha yu, tan tsihin letra yu. Tyehen tyihí yu firma yu tandihi carta yu. Tan tyehen tyaa yu. ¹⁸ Tan na nasoco Jutu Mañi yo Jesucristo tsi tandihi ndo.

Tan na cuvi tsi tacan ñi.

Carta Tsa Jihna Ñi Tsa Jacuhun Ra Pablo Tsi Ra Timoteo

Nu tyaa ra Pablo iin carta tsa cuenda ra Timoteo

¹ Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá iñi yo. ² Tyaa yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsinu iñi un tuhun ra Cristo tsa jacotó yu tsi un. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na nyehe ndaahvi ra tsi un.

Nu tsahá cuenda ra Pablo tyin jaha cuenda yo tsi yo tan ña cunyicun yo tsa ña nditsa

³ Quivi quita yu ñuu Éfeso tan vatsi yu Macedonia nu nyii yu ihya, tava tyiñu yu tsi un tsa ndoo un ñuu Éfeso tyin cahan un tsihin nyivi jacuahá inga ca tuhun. Catyí yu tsihin un tyin catyí un tsihin ñi na ña jacuahá ñi tsa ña nditsa. Tan vityin juven ñi tacan caahán nyico yu tsihin un. ⁴ Cahan tsihin ñi na ña tyaa iñi ñi cuendu, na ña tyaa iñi ñi tuhun nyivi tsicoq tahañ tsanaha. Tyin tun, maa ñi yacan tyaa iñi ñi maa cua cahan yuhu tahañ ñi ñi. Tan ña cua jatyinyeé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tsihin tsa tsinu iñi yo tan cuví quita vaha tsi.

⁵ Tatun javahá yo tsa tava tyiñu Nyoo tsi yo tyin javaha yo, cua cuñi tahañ yo tsi yo, tsihin tsa ñi iñi añima yo tsa janduvahá Nyoo. Cua cuñi yo tsi ñi tsihin tsa vaha caca iñi yo tan tsihin tsa nditsa tsinu iñi yo tsi Nyoo. ⁶ Maa tyin yihí nyivi nacoq ihñi ñi yacan, tan tsinaa ñi jahá tsa caahán yuhu tahañ ñi. ⁷ Cuñi ñi cuví ñi maestro cuenda ley tsahnu, maa tyin ndi maa ñi tan ña cutuñi iñi ñi tuhun caahán ñi tan ñi xaan iñi ñi jacuahá ñi tuhun can.

⁸ Tsitó yo tyin ley can, vaha tsi, maa tyin cuñi tsi cuatyíñu vaha yo itsi tumaa taahán maa tsi. ⁹ Cuñi tsi coto yo tyin ndi intuhun ley tan ña iyó tsi tsa cuenda nyivi vaha. Tyin ley can iyó tsi tsa cuenda nyivi javahá tsa ña vaha, ñi ña tyaa soho tsa caahán Nyoo, nyivi iyó cuatyí, nyivi caquiñi, nyivi ña tyaa yahvi tsi Nyoo. Iyó tucu tsi tsa cuenda nyivi tsahñi tsi jutu ñi, tsi sihi ñi, tan tsa cuenda tandihi nyivi tsahñi nyivi. ¹⁰ Iyó ley can tsa cuenda nyivi iyó tsihin rayi a ñaha tan ñavin yi ña a ñasihi ra cuví. Iyó tsi tsa cuenda ra ndusihi, tan tsa cuenda nyivi tyihí xeehe nyivi tan xicó ñi, tan iyó tsi tsa cuenda nyivi vatya,

tan iyó tsi tsa cuenda nyivi tsa catyí: “Naha Nyoo”, tan ña nditsa tsa caahán ñi. Tan juven ñi iyó tucu ley can tsa cuenda nyivi caahán ndavaha ñi siqui tuhun Nyoo tsa cutuhva yo. ¹¹ Tuhun Nyoo ihya, iin ñi cuví tsi tsihin tuhun cahnun xaan tsa jacacú ra Jesús tsi yo. Nyoo tava tyiñu ra tsi yu tsa jacuahá yu tuhun ihya tsi nyivi. Tan intuhun ñi maa ra taahán tsi jacahnú yo.

Tsahá ra Pablo tyahvi nyoo tsi Nyoo tyin nyehe ndaahvi ra tsi ra

¹² Tsahá xaan yu tyahvi nyoo tsi Jutu Mañi yo Jesucristo tyin tsahá ra tunyee iñi tsi yu, tan nyehe ra tsi yu tan tsitó ra tyin tsinu vaha iñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra. ¹³ Tacan javahá ra tsihin yu, vasu ndi maa nu quitsi tsi quivi, yuhu cahan nyaa xaan yu tsi ra. Tan tsinyaa ndaha yu tsi nyivi yihí cuenda ra, tan tsacú nducu yu tsi ra. Maa tyin Nyoo cundaahvi xaan iñi ra nyehe ra tsi yu, tyin quivi can ñaha ca tsinu iñi yu tsi ra, tan ña tsitó yu náa javahá yu. ¹⁴ Tacan tsahá Jutu Mañi yo Jesucristo tsa vaha ra tsi yu. Tan tsinu xaan iñi yu tsi ra jahá ra. Tan cuñi xaan yo tsi nyivi tyin iin ñi cuví yo tsihin ra Cristo Jesús.

¹⁵ Tan tuhun cua cahan yu ihya tsa nditsa vaha cuví tsi. Taahán tsi tsinu iñi yo itsi tan catyí tsi tyehen: Ra Cristo Jesús quitsi ra nu ñuhu ñayivi ihya tyin jacacú ra tsi nyivi iyó cuatyí. Tan yuhu cuví iin ra caquiñi ca tan ñavin ca tandihi nyivi. ¹⁶ Yacan cuenda, tava Nyoo tsi yu nu caquiñi tan cundahvi iñi ra tsi yu tyin tacan tan janaha ra Jesucristo tsi nyivi tyin cuñi xaan ra tsi ñi tan cunyeé iñi ra ndatú ra nda cuenda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayivi nyito tsa ña cua naa maa. ¹⁷ Yacan cuenda na jacahnun yo tsi ra yihí ndaha tsi yo tandihi ñi quivi, ra nduve tuhun tsihi iyó tsi, ra ña cuví nyehe yo, ra tsa intuhun ñi maa cuví Nyoo tan tsitó ra tandihi. Na cuví tsi tacan.

¹⁸ Yooho Timoteo sehe yu, tava tyiñu yu tsi un, cañi tahañ vaha tsihin nu tatyi ña vaha. Cuatyíñu tsa tsinu iñu un tsi Nyoo tan tsihin tsa tsitó un tyin vaha cuahán un tsihin Nyoo; tumaa tsahá cuenda ra yañi yo naha ra tsi un quivi cahan ra naha tuhun un jahá Nyoo. ¹⁹ Ña jandihi un tsa tsinu iñi un tsi Nyoo tan ña jandihi un tsa javahá un tumaa catyí maa Nyoo tyin javaha un, nacoto vaha tsitsi añima un tyin vaha cuahán un tsihin Nyoo. Tyin juhva ra naha nacoq ra naha tandihi yacan, yacan cuenda ña tsinu ca iñi ra naha tumaa taahán maa tsi. ²⁰ Tacan javahá ra Himeneo tan ra Alejandro. Yacan cuenda tsahá cuenda yu tsi ra naha tsi nu ña vaha, tyin tacan tan coto ra naha tyin ña vaha cahan yo ndavaha ñi siqui tuhun Nyoo.

2

Nu jacuahq̄ ra Pablo nácaa taahán tsi ndacan tahviyo tsi Nyoo

¹ Tsháh cuenda yu tsi tandihí nyívi yihí cuenda Nyoo tyin ñiñi xaan cuñí tsi ndacan tahvi yo tsi Nyoo tsa cuenda tandihí nyívi. Tan nacuhva yo tyahvi nyoo tsi Nyoo tsa cuenda ñi. ² Na ndacan tahvi yo cuenda ra ndacá ñaha naha ra tan cuenda tandihí ra cumí tyiñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayívi vaha nuu Nyoo tan nuu nyívi. Tacan tan cua jaha ñi tsa ñayívi tsi yo. ³ Tyin tacan taahán iñi Nyoo, ra tsa jacacú tsi yo. ⁴ Tyin cuñí ra tsa cacu tandihí nyívi. Tan cuñí ra tsa coto ñi tuhun nditsa. ⁵ Tyin intuhun ñi maa Nyoo iyó. Tan iyó intuhun ñi ra cuví cahan ndaahvi tsa cuenda yo nuu Nyoo. Ra ican cuví ra Cristo Jesús. Tan cuví ra iin nyívi tumaa maa yo. ⁶ Juvín ra Jesucristo tsihi tsa cuenda tandihí nyívi. Tyahví ra tsa cuenda cuatyí tandihí yo tyin tacan tan cuví cacu yo. Tan cundag can quívi tyaa maa Nyoo cuhva. ⁷ Tsa cuenda yacan, tavá tyiñu Nyoo tsi yu, tyin cahan yu tuhun ra, tan cacu yo tyiñu ra, tan jacuahá yu tsi nyívi tsa ñavin nyívi Israel cuví nácaa tsinu iñi ñi tsa nditsa. Tan nyooho tsitó ndo tyin tsa nditsa caahán yu tyin ña tuhvá yu jandavi ñaha tyin cuenda ra Cristo yihí yu.

⁸ Yacan cuenda cuñí yu tsa ndacan tahvi rayi naha ra tsi Nyoo tandihí ñi ityi. Tan coo vaha ra naha nuu ra. Tan cañihi ra naha ndaha ra tan jacahnu ra naha tsi Nyoo tsihin tsa vaha cacu iñi ra naha. Tan tsihin tsa ña ñuhú tsihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo. ⁹ Tacan tucu ñiñaha. Catsi vaha cunditsi ñi jahma ñi, tumaa taahán maa tsi cunditsi nyívi yihí cuenda Nyoo. Na ña cunditsi ñi jahma iyo xaan caa. Ña iyo xaan janduvaha ñi jiñi ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan. ¹⁰ Maa tyin na janduvaha ñi tsi ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyívi nacuhva cuenda tsi ñi tsi Nyoo. ¹¹ Tan cunyecu taxin ñi tyaa soho ñi tuhun Nyoo. Tan jaha ñi tsa ñayívi tsi ra tsháh cuenda tuhun Nyoo tsi ñi. ¹² Tyin ña tsahá yu jacuahá ñiñaha nuu nyívi cuaha. Ndi ña tsahá yu tsa cundaca ñaha ñi tsi rayi. Taxin ñi na cunyecu ñi. ¹³ Tyin jihna ca ra Adán javahá Nyoo, yahá can tan javahá ra tsi ña Eva. ¹⁴ Tan ñavin tsi maa ra Adán jandavi ñaha nu ña vaha, tyin tsi ña Eva ñasihi ra jandavi ñaha nu tan tsicoq cuatyí ña. ¹⁵ Maa tyin ñiñaha nduve tsa cua tahan ñi tsa cua cacu sehe ñi, tatun jacuahnu vaha ñi tsi sehe

ñi, tan tsinú vaha iñi ñi tsi Nyoo tan cuñí ñi tsi ra tan tsi nyívi, tan catsi coo ñi nuu Nyoo tan nuu nyívi.

3

Nacaa taahán tsi coo ra cuví ityi nuu tsihin nyívi vehe ñuhu

¹ Tuhun ihya tuhun nditsa cuví tsi: Tatun iin ndo cuñí ndo cuví ndo ityi nuu tsihin nyívi vehe ñuhu, vaha xaan tyiñu cuñí ndo javaha ndo. ² Maa tyin ñiñi cuñí tsi tyin ra cuví ityi nuu tsihin nyívi vehe ñuhu cuñí tsi cuví ra iin ra catsi iyó tyin tacan tan ña cuví tyaa nyívi cuatyí tsata ra. Tan cuñí tsi tsa coo intuhun ñi ñasihi ra. Tan cuñí tsi tsa cuví ra iin ra tsitó vaha cuhva coo, iin ra vaha nuu nyívi. Tan cuñí tsi vaha cahan ra tsihin nyívi tsaa yuvehe ra, tan cuví ra iin ra tsitó vaha jacuahá tsi nyívi. ³ Iin ra cuví ityi nuu tsihin nyívi vehe ñuhu ña taahán tsi coho ra nyixi, tan ña taahán tsi cuví ra iin ra nanducú tsihi. Tan ña taahán tsi cuví ra iin ra nducú xuhun tsihin tsa ña taahán tsi. Cuñí tsi tsa cuví ra iin ra vaha iñi, iin ra ña tuhvá cañi tahan. Tan cuví ra iin ra ña nyiyo iñi xuhun. ⁴ Cuñí tsi tsa cuví ra iin ra yihí ndaha vaha tsi ñasihi ra tan tsi sehe ra, iin ra ndacá ñaha tsi sehe ra tan tyaa yahvi vaha sehe ra tsi ra, tan jahá ñi tsa ñayívi tsi ra. ⁵ Tyin tatun ña tsitó ra cundaca ñaha ra nyívi vehe ra, ¿nácaa cua quíhi ndaha ra nyívi tsicá vehe ñuhu Nyoo? ⁶ Tan iin ra ndi tsaa xaan tsihin tuhun Nyoo ña taahán tsi cuví ra ityi nuu tsihin nyívi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsi tuñi Nyoo tsi nu ña vaha tsa cuenda tsa cahnú xaan jahá nu tsi nu. ⁷ Tan cuñí tucu tsi tsa cuví ra iin nyívi vaha nuu nyívi tsa ña yihí tuhun Nyoo, tyin tacan tan ña ñiñi ñi náa cuatyí tyaa ñi tsata ra tan ña cuví jaha canaa nu ña vaha tsi ra.

Nacaa taahán tsi coo ra jahá tyiñu vehe ñuhu

⁸ Tan tacan tucu ra jahá tyiñu vehe ñuhu naha ra. Na catsi coo ra naha. Na ña cumañi ra naha tsihin tuhun caahán ra naha, tan ña cuví ra naha ra tuhvá tsihi nyixi. Tan ndi ña nyiyo iñi ra naha jaha canaa ra naha xuhun tsihin tsa ña taahán tsi. ⁹ Cuñí tsi tsa cuatyí vaha iñi ra naha nácaa taahán tsi tsinu iñi yo tsi Nyoo tan coto vaha ra naha tyin vaha cuahán ra naha tsihin Nyoo. ¹⁰ Tan cuñí tucu tsi tsa nyehe jihna yo tatun vaha cuahán ra naha tsihin Nyoo, tacan tan cuví jaha tyiñi ra naha vehe ñuhu. ¹¹ Tan tacan tucu ñiñaha, cuñí tsi cuví ñi nyívi vaha nuu nyívi. Ña cahan ñi cuendu. Catsi coo ñi. Tan tyaa nuu vaha ñi tandihí tyiñu. ¹² Ra jahá tyiñu vehe ñuhu na coo intuhun ñi ñasihi ra. Tan cuñí tsi tsa coto vaha ra cundaca

ñaha ra tsi sehe ra tan nyivi vehe ra. ¹³ Tyin ra jahá tyiñu vehe ñuhu, tan vaha tyanuú ra tyiñu tsa nyisó ra, cuahán ca ra ityi nuu tsihin Nyoo. Tan tsihin tsa nñi ñi ra caahán ra tuhun Nyoo tyin tsinú vaha ñi ra tsi ra Cristo Jesús.

Nu caahán ra Pablo siqui tuhun xeehe cuhva tsinú ñiyo

¹⁴⁻¹⁵ Vasiqui numi ñi cua quitsi nyehe yu nu nyii un. Maa tyin tun ña cuvi quitsi yu tsa numi ñi, yofiñi jaha, vaha tyin tsa tyaa yu tuhun ihya tyin coto un nácaa taahán tsi coo yo tsa cuvi yo nyivi cuenda Nyoo. Tyin maa yo cuvi vehe ñuhu Nyoo nyito. Tan cuñi tsi tsa jañiñi ca yo janaha yo tuhun Nyoo tsi nyivi. Tan naquihin vaha yo tyin tuhun nditsa cuvi tsi. ¹⁶ Tsa nditsa tyin yaha xaan cahnu cuvi tuhun xeehe tsa jaquituvj Nyoo, tyin coo yo tumaa iyó maa ra:

Nyoo nanduvj ra rayiñ tan tsicoo ra, tsicoo cuñu ñuhu ra tumaa tsa iyó cuñu ñuhu maa yo.

Tan catyi Tatyí li Nyoo tyin ra nduve cuatyí cuvi ra.

Tan nyehe ra cuvi ángel naha ra tsi ra.

Taniñ cahnu nu ñuhu ñayivi caahán nyivi tuhun ra.

Tan tsinú ñi nyivi tsi ra taniñ cahnu nu ñuhu ñayivi.

Tan cuanuhú ra nda gloria.

4

Nu catyi ra Pablo tyin nu cuahán ca tsi quivi yihí nyivi ña cua tsinu ca ñiñi ñi tsi ra Cristo

¹ Maa tyin caahán catsi Tatyí li tan catyi ra tyin nu cua ndihi tyembu yihí nyivi ña cua tsinu ca ñiñi ñi tsi ra Cristo, tyin cua tyaa soho ñi tuhun caahán tatyí ña vaha tsa jandavi ñaha. Tan cua cunycun ñi ndusu yuhu nu ña vaha. ² Cua tyaa soho ñi tuhun caahán nyivi jandavi ñaha. Tan ñi can ña tuví ñiñi ñi náa javahá ñi tyin tsa ndundava xaan añima ñi. Tumaa tsa cayu añima ñi jahá iin caa ihñi tan ndundava tsi. ³ Cua casi ñi nu tindaha nyivi. Tan cua catyi ñi tyin ña vaha catsi yo juhva nuu nyayu. Vasu tsitó yo tyin tandihi nuu tsa tsatsí yo, Nyoo javahá itsi. Tan tandihi yoo tsa tsinú ñi tsi ra tan tsitó yo tsa nditsa, tsatsí yo can tan tsahá yo tyahvi nyoo tsi ra. ⁴ Tyin tandihi tsa javahá Nyoo tan vaha tsi. Tan ña taahán tsi catyi yo tyin ña vaha tsi. Tan cuvi catsi yo tandihi tsi tun tsahá yo tyahvi nyoo tsi Nyoo tsa cuenda tsi. ⁵ Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahvi nyoo tsi ra.

Nacaa iyó ra vaha jahá tyiñu tyiñu ra Jesucristo

⁶ Tatan jacuahá un tandihi tsa caahán yu ihya tsi tandihi nyivi yihí tuhun Nyoo tsihin yo, cua cuvi un iin musu vaha ra Cristo Jesús. Tan tuhun tsa tsinú ñi yo, tsihin tandihi tuhun ra Cristo tsa nyicún yo, cua jatinyee tsi tsi un tan cuahnu ca un tsihin tuhun Nyoo. ⁷ Maa tyin ña tyaa yahvi un tsa cuvi xembulu, tuhun sana, tan tuhun tsahnu cuhva iyó nyivi. Vaha ca jañiñi un tsi un tan javaha un maa ñi maa cuhva cuñi maa Nyoo. ⁸ Tsa jañiñi yo coo tunyee ñiñi cuñu ñuhu yo, juhva ñi jatinyee tsi tsi yo. Maa tyin tsa jañiñi yo javahá yo tandihi cuhva cuñi Nyoo, jatinyee tsi tsi yo iin cahnu ñi, tyin jatinyee tsi tsi yo nu ñuhu ñayivi ihya. Tan jatinyee tsi tsi yo tsa coo vaha yo nu cua tsaa yo nda gloria. ⁹ Tan nditsa, tyin tsa nditsa cuvi tsi tan tandihi yo taahán tsi tsa tsinú ñi yo itsi. ¹⁰ Tan juvin ñi tsa cuenda yacan jahá tyiñu yo tan nyehé yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuvi ra jacacú tsi tandihi nyivi, tan jihna ca yoo tsa tsinú ñi yo tsi ra jacacú ra.

¹¹ Tuhun ihya jacuahá un tsi nyivi yihí cuenda Nyoo, tan jañiñi un tsi ñi na cutuhva ñi itsi. ¹² Catsi jaha un tsi un coto ña cua jaha nyivi tsa ñayivi tsi un tsa cuenda tsa ndi tyuvaa xaan un. Jacuahá tsi ñi tsihin cuhva iyó un, tan tsihin cuhva caahán un. Jacuahá tsi ñi tsihin tsa cuñi un tsi Nyoo tan tsi nyivi, tsihin cuhva tsicá ñiñi un, tsihin cuhva tsinú ñiñi un, tan tsihin cuhva javahá un maa ñi maa tsa vaha. ¹³ Tan tsitsi tsa ndi cumañi ca tsaa yu nu nyii un, cahvi tuhun Nyoo tsihin ñi yihí tuhun Nyoo. Cuhva cuenda ñiñi tsi ñi, tan jacuahá tsi ñi nácaa cunycun vaha ñi tsi Nyoo. ¹⁴ Jaha cuenda vaha tunyee ñiñi tsa tsahá Nyoo tsi un quivi tyiso ndaha ra nyisó tyiñu vehe ñuhu naha ra jiñi un tan cahán ra naha tsa tsahá cuenda Nyoo tsi ra naha. ¹⁵ Tyaa vaha ñiñi tuhun can tan javaha cuhva catyi tsi. Tacan tan cua nyehe tandihi nyivi nácaa cuahán un ityi nuu ca tsihin Nyoo. ¹⁶ Jaha cuenda tsi un tsihin cuhva iyó un. Tan jaha cuenda cuhva jacuahá un tsi nyivi. Tan ña nacoo ihñi un tsa vaha. Tatan javahá un tacan, cua cacu un, tan cua cacu tucu nyivi tyaa soho tuhun jacuahá un.

5

Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo

¹ Ña cuxaan un tsi iin ra tsahnu, maa tyin cuhva cuenda tsi ra tan jaha tsa ñayivi tsi ra tyin tumaa cuvi jutu un cuvi tsi ra. Tan ra cuatyí naha ra, cuhva cuenda tsi ra naha tumaa tsa yañi un cuvi tsi ra naha. ² Tan ñi tsahnu cuhva cuenda tsi ñi tumaa tsa sihi un cuvi tsi ñi. Tan ñi cuatyí, cuhva cuenda tsi

ñi tumaa tsa cuhva un cuví tsi ñi. Javaha tandihí tsa caahán yu ihya tsihin tsa vaha tsicá iñi un.

³ Jatyinyee tsi ñiñaha ndaahvi tsa tsihi yíi tatun nduve nyivi ñi cuví jatyinyee tsi ñi.

⁴ Maa tyin tatun iyó iin ñaha tsihi yíi tan iyó sehe ña, a sehe yañi ña, cuñi tsi cutuhva jihna maa ñi can jatyinyee ñi tsi ña. Na nducuhun iñi ñi nácaa jahá cuenda sihi ñi tsi ñi tsa ndi nyihi ñi. Tan tacan taahán tsi tsa jaha cuenda tucu ñi tsi ña vityin. Tun tacan javaha ñi, vaha xaan, tyin tacan taahán iñi maa Nyoo. ⁵ Tan ñaha tsa tsihi yíi tan ndoo ndaahvi intuhun ña maa ña, iin ña Nyoo tyaa iñi ña tan tsicán tahvi ña tsi ra tsinu cahñi tan tsacuaa. ⁶ Maa tyin ñaha tsihi yíi tsa cusii iñi tsihin tsa iyó nu ñuhu ñayivi ihya, vasu nyito ña maa tyin tsihi ña cuenda Nyoo. ⁷ Jacoto tucu tuhun ihya tsi ñi cuhva yo tyin tacan tan ña ñihi nyivi cuhva cahan ñi ndavaha ñi tsi ñi. ⁸ Maa tyin tatun yihí yo iyó nyivi yo tan ña tsicá iñi yo jatyinyee yo tsi ñi, ña vaha tacan. Tyin tatun ña jatyinyee yo tsi nyivi vehe yo, tumaa tsa ña tsinú iñi yo tsi Nyoo cuví can. Tan cahnu ca cuatyí yo iyó tan ñavin ca nyivi tsa ña tsinú iñi tsi Nyoo.

⁹ Nu tutu tsa nyaá sivi ñi tsihi yíi, na cun-yaa sivi ñi tsahnu tsa iyó ndaahvi, tatun tsa yaha uñi xico cuiya ñi, tan intuhun ñi yíi ñi tsicog. ¹⁰ Tan tatun tsitó vaha nyivi tsi ñi tsa cuenda tsa vaha tsa javahá ñi; tan jacuahnu vaha ñi sehe ñi, tan tsahá ñi tsa catsi nyivi tsaa yuvehe ñi, tan jahá tyiñu ñi tyiñu nyivi yihí cuenda Nyoo tsihin tsa ñi iñi añima ñi, tan jatyinyee ñi tsi nyivi nyehé tundoho. Tun tacan javahá ñi tandihí tsa vaha, cuví cunyaa sivi ñi.

¹¹ Maa tyin ña tyaa ndo sivi ñiñaha tsa ñaha ca quita uñi xico cuiya, coto coo quivi tan cuñi ñi coo nyico yíi ñi tan cuñi ñi tindaha ñi inga tsaha tan tandihí ñi tsa jahá tyiñu ñi tyiñu ra Cristo. ¹² Tan coo cuatyí ñi tyin ña javahá ñi cuhva cahan ñi tsa cua javaha ñi. ¹³ Tan inga tucu tyiñu tatun tsicá nuu jutsan ñi maa ñi tan iin tan iin vehe nyivi quihvi ñi. Tan ñavin yacan ñi maa tyin tsicá nuu tucu ñi caahán ñi cuendu. Tan tyihí ñi tsi ñi nu ña taahán tsi quihvi ñi, tan caahán ñi tsa ña taahán tsi cahan ñi. ¹⁴ Vaha taxin ca na tindaha ñi inga tsaha. Na coo sehe ñi. Na jaha cuenda vaha ñi vehe ñi. Tan ña cuhva ñi cahan nyaa nyivi xaan iñi tsi yo tsi yo. ¹⁵ Caahán yu tandihí tuhun ihya tsihin un tyin yihí ñi tsa nacoq ñi tsi Nyoo tan nyicún ñi tsi nu ña vaha. ¹⁶ Tatun ñi yihí cuenda Nyoo tan iyó iin nyivi ñi tsa tsihi yíi, cuñi tsi tsa jatyinyee maa ñi tsi ñi can, tan ña tyiso ñi itsi siqui vehe ñuhu. Tyin tacan tan cuví jatyinyee vehe ñuhu tsi inga ñi tsihi yíi tsa nduve ca maa nyivi iyó.

¹⁷ Ra tsahnu ra nyisó tyiñu vehe ñuhu, cuñi tsi tsa jaha xaan nyivi vehe ñuhu tsa ñayivi tsi ra, tan tsa jihna ñi na jaha ñi tsa ñayivi tsi ra caahán tuhun Nyoo tan jacuahá ra naha tsi ñi. ¹⁸ Tyin tuhun Nyoo catyí tsi tyehen: “Ña tyihí un yoho yuhu indiqui nu jahá tyiñu ti, tacan tan cuví catsi ti luxu.” Tan catyí tucu tuhun Nyoo tyehen: “Iyó ndatu tsa ñihi ra jahá tyiñu yahvi ra.”

¹⁹ Tatun tyaa nyivi cuatyí tsi iin ra tsahnu tan ña quita uvi a uñi taahan tsandaa, ña tyaa yahvi un tsa caahán ñi. ²⁰ Maa tyin nyivi tsa jahihí ca javahá tsa ña vaha, cuñi tsi tsa cahan ndo tsihin ñi nuu tandihí nyivi yucú vehe ñuhu. Tacan tan nayuhvi tandihí ca ñi tan ña javaha ñi tsa ña vaha. ²¹ Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsí ra. Tan caahán yu tsihin un tyaa yahvi tsa caahán yu ihya, inducu ñi cuñi un nyehe un tsi tandihí nyivi. ²² Ña numi xaan cuhva un tyiñu tsi iin ra cuví ra ityi nuu tsihin nyivi vehe ñuhu. Coto cuhnu cuatyí javaha ra siqui un. Jaha cuenda vaha tsi un tsihin tandihí tsa javahá un tan ña cuhva un ndatu tsi nu ña vaha tsa nducu cuhva nu tsi un.

²³ Tan tsa cuenda tsa uhvi tsitsi un, ña coho ca un maa ñi maa ndutya, coho luxu vinu na nduvaha tsitsi un.

²⁴ Yihí nyivi quituví cuatyí ñi tsa ndi cumañi cutuñi ñi. Tan yihí ñi quituvi cuatyí ñi tsa yaha cutuñi ñi. ²⁵ Tan tacan tucu tatun javahá yo tsa vaha, ña cuxeehe tsi. Vasu ña quituví tsi tsa numi ñi, maa tyin ña cuví ndoo xeehe tsi.

6

¹ Nyivi yihí cuenda Nyoo tsa cuví musu, cuñi tsi tyaa yahvi vaha ñi tsi tsitoho ñi. Tyin tacan tan ña ñihi nyivi cuhva cahan ñi ndavaha ñi siqui Nyoo, tan siqui tuhun ra tsa jacuahá yo. ² Tan tatun iin musu tan yihí tsitoho ra cuenda Nyoo, taahán tsi tsa jaha ra tsa ñayivi tsi ra ican tyin yañi ra cuenda Nyoo cuví tsi ra. Cuñi tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñi ra tsi ra ican. Jacuahá yacan tsi nyivi yihí cuenda Nyoo tan cuhva cuenda tsi ñi na javaha ñi cuhva catyí tsi.

Cuhva iyó yo tsihin Nyoo tan na cusii iñi yo tsihin tsa tsahá ra tsi yo

³ Tatun iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo, ⁴ cuví ra iin ra nduyaá ñi maa, iin ra ña tsitó. Tan tsa caahán yuhu ra siqui iin tsa ñavin ñi tsa cahan yo tuhun, cuví can tumaa cuehe tsi ra. Tan tsa cuenda yacan cacú tsihi tan nyiyo iñi nyivi tsa iyó tsi inga

ñi, tan tsa caahán nyaa tahan ñi tsi ñi, tacan tan ndasi cuñi nyivi nyehe tahan ñi tsi ñi. ⁵ Tan maa ñi cañi tahan nyivi jahá can tyin quiñi tsicá iñi ñi, tyin ña tsitó ñi tsa vaha. Cuñi maa ñi tyin cua jaha canaa ñi xuhun tsihin tuhun Nyoo. Ña cutahan un tsihin ñi can. ⁶ Nditsa tyin tsa javahá yo cuhva catyi Nyoo tan sii cuñi yo tsihin tsa tsaha ra tsi yo, cuvi tsi tumaa iin tsa cuca iyó tsi yo. ⁷ Tyin nduve náa tsaa tsihin yo quivi cacu yo nu ñuhu ñayivi ihya. Tan nduve náa cuhun tsihin yo quivi cuu yo. ⁸ Maa tyin tatun iyó tsa catsi yo tan iyó jahma cunditsi yo, na cusii iñi yo, tan na ndoo yo vaha tsihin yacan. ⁹ Maa tyin nyivi cuñi nducuca, nducu cuhva nu ña vaha tsi ñi. Tan nacava ñi tsitsi xayí nu. Jandusohó nu tsi ñi tsihin tsa cuñi ñi coo cuaha tsa coo tsi ñi. Tan jativí can tsi ñi. Tan nu ndihi tuhun cua tsi ndihi ñi tan cua cuhun ñi anyaya. ¹⁰ Tyin tsa cuñi xaan yo xuhun, yacan cuvi yoho tandihi ca nuu tsa ña vaha. Tan yihí nyivi tsa cuenda tsa cuñi xaan ñi xuhun, tan jandihí ñi tsa tsinú iñi ñi tuhun Nyoo. Tan janyehé ñi tundoho tsi juvin ñi maa ñi tsihin yacan.

Nacaa cañi tahan yo tsihin nu ña vaha tsihin tsa tsinú iñi yo tsi Nyoo

¹¹ Maa tyin yoocho cuvi un iin rayii cuenda Nyoo. Quita tsiyo nuu tandihi tsa caquiñi. Coo cuñi vaha nuu Nyoo. Cuanycun tsi Nyoo tsihin tsa nii iñi un. Cuñi tsi nyivi. Cunyaee iñi tsihin tsa vita iñi un nyehe un tandihi tsa cua tahan un. Tan ña cahnu jaha un tsi un. ¹² Cañi tahan vaha tsihin nu ña vaha tsihin tsa tsinú iñi un tsi Nyoo. Ña jaña ndaha un ñayivi nyito tsa ña cua naa maa tsa tsaha Nyoo tsi yo. Tyin tsa cuenda can, cana Nyoo tsi un, tan tacan catyi un quivi cahan catsi un nuu tandihi ra cuvi tsandaa naha ra, catyi un tyin tsinú iñi un tsi Nyoo. ¹³ Tan vityin nuu Nyoo, ra tsa tsahá ñayivi coo tandihi tsa iyó, tan nuu ra Cristo Jesús ra tsa tsaha cuenda vaha tuhun nditsa nuu ra Poncio Pilato, caahán yu tsihin un, ¹⁴ javaha tandihi tsa catyi yu tsihin un tyin javaha un tyin tacan tan ña cuvi cahan nyaa nyivi tsi un nda tahan tsi quivi quitsi Jutu Mañi yo Jesucristo. ¹⁵ Nda tsaa maa quivi, tan cua jaquitsi Nyoo tsi ra Cristo inga tsaha. Ra ícan cuvi ra jacahnú yo, tan intuhun ñi maa ra cuvi Nyoo, ra iyó xaan tunyee iñi. Rey cahnu cuvi ra nuu tandihi ca ra cuvi rey. Tan ra ndacá ñaha cahnu cuvi ra nuu tandihi ca ra ndacá ñaha. ¹⁶ Intuhun ñi maa ra cuvi ra tsa nduve tuhun tsihi iyó tsi. Tan iyó ra nu nditsin nu ña cuvi cutuhva nyivi. Tan ndi intuhun nyivi ñaha ca nyehe tsi ra. Tan ndi ña cuvi nyehe ñi tsi ra. Na jacahnu yo tsi maa ra. Tan na cundaca ñaha ra tsi yo tandihi tyembu. Tan na ña cundihí maa tsa ndacá ñaha ra tsi yo. Na cuvi tsi tacan. ¹⁷ Tan

cahan tsihin nyivi tsa iyó tsa cuca nuu ñayivi ihya, na ña cahnu xaan jaha ñi tsi ñi. Tan ña cuita iñi ñi tsa cuca tsa iyó tsi ñi. Tyin tsa cuca can cua ndihi can. Na cuita iñi ñi tsi Nyoo nyito, tyin maa ra cuvi ra tsahá tandihi tsi yo. Tan cuvi cusii iñi yo tsihin tsi. ¹⁸ Cahan tsihin ñi cuca na javaha ñi tsa vaha tan nducuca ñi nuu Nyoo tsihin tsa javahá ñi tsa vaha. Tan na cuhva ñi tsa iyó tsi ñi tsihin tsa nii iñi ñi tan ñavin tsihin tsa cuihaya cuñi ñi. ¹⁹ Tacan tan coo tsa cuca tsa ña cuanaa maa tsi ñi, tan jatinyee tsi tsi ñi nu cuahán quivi ityi nuu. Tan coo ñi ñayivi nyito tsa ña cua naa maa.

Nu ndihí tsahá cuenda ra Pablo tsi ra Timoteo

²⁰ Yoocho Timoteo, jaha cuenda vaha tyiñu tsa tsaha Nyoo tsi un. Ña tyaa soho un tuhun nu ñuhu ñayivi ihya, tuhun nduve yahvi nyaá. Ña tyaa yahvi un tuhun tsa catyi nyivi tyin tsitó xaan ñi tan ña nditsa. ²¹ Tyin tsa cuenda yacan, yihí nyivi tsa nacoo ihñi ñi tuhun Nyoo. Tan ña tsinú vaha ca iñi ñi tsi ra vityin.

Coo tsihin tsa vaha tsa iyó tsi Nyoo tsa tsahá ra tsi un.

Tan na cuvi tsi tacan ñi.

Carta Tsinu Uvi Tsa Jacuhun Ra Pablo Tsi Ra Timoteo

Nu tyaq ra Pablo inga carta tsa cuenda ra Timoteo

¹Yuhu ra Pablo cuví yu iin ra tava tyiñu ra Jesucristo, tyin tacan cuñi maa Nyoo. Tyin cuñi ra tsa jacoto yu tsi nyivi tyin tsahá ra ñayivi nyito coo tandihi ñi tsa iin ñi cuví tsihin ra Cristo Jesús. ²Jaquitsí yu carta ihya tsi yooho Timoteo. Tan cuñi xaan yu tsi un tyin tumaa cuví sehe yu cuví tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na cundaahvi iñi ra tsi un.

Nu caahán ra Pablo tsihin ra Timoteo na catyi tuhun ra tsihin nyivi tyin cuenda ra Cristoyihi ra

³Tandihí ñi quivi nducuhún iñi yu tsi un tan tsicán tahvi yu tsi Nyoo tsinu cahñi tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsi tsaahnu yu tyiñu Nyoo tsanaha. Tan vaha cuñi añima yu tyin vaha iyó yu nuu ra. ⁴Nducuhún xaan iñi yu nácaa tsacu un quivi quita yu nu nyii un. Tan vityin cuñi xaan yu nyehe yu tsi un inga tsaha tan cusii iñi yu. ⁵Tan nducuhún xaan iñi yu tyin tsinú nñi vaha iñi un tsi Nyoo. Tumaa tsa tsinú iñi ña Loida tsitan un tan ña Eunice sihi un. Ñi ican vaha xaan tsinú iñi ñi tsi Nyoo, tan tsitó yu tyin tacan tsinú iñi maa un tsi Nyoo vityin.

⁶Yacan cuenda tsahá cuenda yu tsi un jandu iin ca iñi un tan cūatyíñu ndatu tsa tsahá Nyoo tsi un tsa cahan un tuhun ra. Yacan cuví ndatu tsa tsahá ra tsi un quivi tyiso ndaha yu jiñi un. ⁷Nyoo ña tsahá ra tatyí ña vaha tsa jayuhvi tsi yo. Tsahá ra Tatyí li ra tsi yo tyin coo tunyee iñi cahnu tsi yo, tan cuñi tahan yo tsi yo. Tan tsahá ra tunyee iñi tsi yo tyin tacan tan cundaca ñaha vaha yo tsi yo. ⁸Yacan cuenda ña nducahan nuu un cahan un tuhun Jutu Mañi yo. Tan ndi ña nducahan nuu un tsa nyii yu vehe caa tsa cuenda ra. Cūatyíñu tunyee iñi tsa tsahá Nyoo tsi un tan ndoo un vaha tsa nyehe un tundoho tsa vatsí síqui yo tsa cuenda tuhun Nyoo. ⁹Tyin juven ra jacacú tsi yo. Tan cana ra tsi yo tyin coo yo ñayivi ii. Ñavin tsa cuenda tsa vaha tsa javahá yo tan cana ra tsi yo. Cana ra tsi yo tyin tacan tyaq maa ra cuhva javaha ra nda ndi cumañi ca tsinú ñuhu ñayivi. Tyin nda quivi can tyaq ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús. ¹⁰Tan vityin tsitó yo tsa vaha can tyin tsa quitsi ra

Jesucristo jacacú ra tsi yo. Tan quihin nyaa ra tandihí tunyee iñi tuhun tsihi. Cahán ra tuhun vaha, tan tava nditsin ra tuhun tsa coo yo ñayivi nyito tsa ña cua naa maa.

¹¹Nyoo tava tyiñu ra tsi yu tsa cahan yu tuhun can tsihin nyivi. Tava tyiñu ra tsi yu tsa caca yu tyiñu ra, tan jacuaaha yu tuhun can tsi nyivi tsa ñavin nyivi Israel cuví. ¹²Yacan cuenda nyehé yu tandihí tundoho. Maa tyin ña nducahan nuu yu tsa tacan nyehé yu tundoho, tyin tsitó yu yóo tsinú iñi yu. Tyin nacuhva cuenda yu tsi yu tsi ra, tan tsitó vaha yu tyin cuví jaha cuenda ra tsi yu nda cuanda quivi quitsi ra inga tsaha.

¹³Cūanyicun tuhun vaha tsa tsahá cuenda yu tsi un. Tan coo tsihin tsa tsinú vaha iñi un tsi Nyoo. Cūñi tsi ra, tan tsi nyivi. Tyin tacan taahán tsi coo yoo tsa iyó iin caa ñi tsihin ra Cristo Jesús. ¹⁴Tan na jatinyee maa Tatyí li tsa iyó añima yo tsi un tan jaha cuenda vaha un tsa vaha tsa tsahá Nyoo tsi un.

¹⁵Tsa tsitó un tyin nacoq ihñi ra Figelo tan ra Hermogenes tsi yu tan tandihí ca maa ra iyó ityi Asia. ¹⁶Maa tyin ra Onesíforo na cundaahvi iñi Jutu Mañi yo tsi ra tan tsi nyivi ra tyin cuaha xaan tsaha quitsi ra jatinyee ra tsi yu. Tan ña cahán nuu ra tsa tyehen nyii yu vehe caa. ¹⁷Tan quivi tsinyii ra ñuu Roma ihya, ña jandihí maa ra tsa nanducú ra tsi yu nda cuanda tsa nañihí ra tsi yu. ¹⁸Maa Jutu Mañi yo na cundaahvi iñi ra nyehe ra tsi ra quivi cua jacutuñi ra tsi yo. Tsitó maa un nácaa jatinyee xaan ra Onesíforo tsi yo quivi tsiyucú yu ñuu Éfeso.

2

Iin andaru vaha ra Jesucristo

¹Tan yoocho sehe yu, janyee iñi tsihin tunyee iñi Nyoo tsa tsahá ra Cristo Jesús tsi un tsa cuenda tsa iin ñi cuví yo tsihin ra. ²Tuhun tsa tsiñi un cahán yu nuu nyivi cuaha, jacuaaha yacan tsi nyivi tsa ñi iñi tsinú iñi tsi Nyoo, ñi tsa cuví jacuaaha tsi inga nyivi.

³Tan cūnyee iñi nyehe tundoho tumaa iin andaru vaha ra Jesucristo. ⁴Ndi intuhun ra cuví andaru tan ña cuví jatyañu xaan ra tsi ra tsihin inga ca tyiñu. Tyin cuñi tsi tsa javaha ra maa ñi maa tsa caahán ra cuví ityi nuu tsihin ra. ⁵Tan tacan tucu ra jasiquí tsihin balón, ña cuví jaha canaa ra tatun ña cūnyee iñi ra jasiquí ra tumaa taahán maa tsi. ⁶Iin ra jahá tyiñu tsitsi cuhu, taahán tsi tsa jaha tyiñu jihna ra, tacan tan cuví catsi jihna ca maa ra tsa quita nu jahá tyiñu ra. ⁷Tyihí tuñi vaha iñi tsa caahán yu tsihin un ihya, tan maa Jutu Mañi yo cua cuhva tsa cutuñi iñi un tandihí tsi.

⁸Nducuhun iñi tsi ra Jesucristo, ra tsa nandotó tsa yaha nyehe ra tundoho tan tsihi

ra. Cuví ra tata ra rey David. Tan tuhun ra cuví tuhun tsa jacacú Nyoo tsi yo tsa tsahá cuenda ra tsi yu tyin cahan yu tsihin nyívi.⁹ Tan tsa cuenda tuhun can cunyeé iñi yu nyehé yu tandihí tundoho nda cuenda nuuhí yu tsihin cadena vityin tumaa tsatyin cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhí tsi.¹⁰ Yacan cuenda cunyeé iñi yu nyehé yu tandihí tundoho tsa cuenda tsa vaha tsi tandihí ca nyívi tsa nacatsj maa Nyoo, tyin tacan tan cua cacu ñi iin caa ñi tsihin yu tsa cuenda ra Cristo tan cua ñihi yu nu sii caá tsa ña cua ndihí maa coo yo.¹¹ Tuhun ihya tuhun nditsa cuví tsi tan cua cundaa tsi:

Tatun tsihi yu cuenda cuñu ñuhu yo, coo nyito tucu yo tsihin ra.

¹² Tatun nyehé yu tundoho tsa cuenda ra, cua cundaca ñaha ndihí yo tsihin ra.

Tatun catyí yu tyin ñavin cuenda ra yihí yo, cua catyí tucu maa ra tyin ñavin nyívi yihí cuenda ra cuví yo.

¹³ Tatun jandihí yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

Tatun jahá tyiñu vaha yo, cua quita vaha yo

¹⁴ Janducuhun iñi tuhun ihya tsi ra jacuahá tuhun Nyoo, tan catyí tsihin ra naha nuu Jutu Mañi yo, na jandihí ra naha tsa caahán yuhu tahan xaan ra naha tsihin tsa nduve yahvi nyaá. Tyin tsa caahán yuhu tahan ra naha tacan, nduve maa ndáa tsiñi ñuhu can. Tyin tsihin yacan jatívi ra naha tsi nyívi tyaá soho tsa caahán ra naha.¹⁵ Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatun tsatyíñu vaha un tuhun nditsa cuhva taahán maa tsi, ña cua nducahan nuu un.¹⁶⁻¹⁷ Ña tyaa soho un tsa ña vaha tan tsa ñavin ñi tsa cahan yu tuhun tsa caahán nyívi. Tyin cuví can tumaa cuehe xaan tsi ñi. Tan yaha ca cuhva cua tiví ñi jahá can. Yacan cuví tsa tahan ra Himeneo tan ra Fileto.¹⁸ Tyin quita tsiyo ra naha ityi vaha tan catyí ra naha tyin tsa yahá nandoto yu tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyívi tsa tsinu iñi tsi Nyoo.¹⁹ Vasu yihí juhva ñi tacan quita tsiyo ñi, maa tyin Nyoo tsaquin ra tsa nditsa, tan yacan cuví tsa ña cua nasama maa. Tan nyaá iin seña tsa catyí: “Jutu Mañi yo nacotó ra tsi nyívi yihí cuenda ra tsa nditsa.” Tan catyí tucu tsi: “Tandihí ñi nyisó sivi ra Cristo na quita ñi nu iyó tsa ña vaha.”

²⁰ Tsitsi iin vehe cahnu, ñavin maa ñi maa ndaha tyiñu tsinu tsihin xuhun cuaan tan xuhun cuitsin iyó tsatyíñu nyívi. Tyin tsatyíñu tucu ñi tsa tsinu tsihin vitu tan tsihin ñuhu quisi. Yihí can tsatyíñu ñi can cuenda tyiñu nahnu, tan yihí can ndáa tahan ñi maa tsi tsatyíñu ñi can.²¹ Tacan tucu maa yo tatun jahá vaha yo cuenda tsi yo, cuví yo iin nyívi tsa tsatyíñu Nyoo. Tan cuví yo tumaa iin vasu xuhun cuaan tsa ndog vaha, tacan tan cuví cuatyíñu ra tsi yo tsa cuenda tandihí tyiñu vaha.

²² Ña caca iñi un tumaa tsicá iñi ra cuatyí iyó nu ñuhu ñayivi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yooho coo iin ñayivi cuiti. Tsinu vaha iñi tsi Nyoo. Cuñi tsi Nyoo tan tsi nyívi. Coo vaha tsihin tandihí nyívi yihí cuenda Nyoo, tandihí ñi tsa tsicán tahvi tsi Jutu Mañi yo, ñi iyó aña vaha.²³ Tan ña tyaa soho un tsa nduve yahvi nyaá tsa caahán yuhu tahan nyívi. Tyin tsitó un tyin tsihin yacan nducua ha ca tsihi.²⁴ Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyívi cuví ra tsihin tandihí nyívi. Tan cuñi tsi tsa ñihi vaha ra cuhva jacuaha ra tuhun Nyoo tsi nyívi. Tan cuñi tucu tsi tsa cunyeé iñi ra tsihi tsahá nyívi.²⁵ Tan tsihin tsa víta iñi ra cuñi tsi janaha vaha ra cuhva coo nyívi ndava iñi. Tan cuatu ra tatun ndu uvi iñi ñi tan coto ñi tsa nditsa.²⁶ Tacan tan cua cutuñi iñi ñi tan quita ñi tsitsi xayí nu ña vaha tyin tsa vityin javahá maa nu cuhva cuñi nu tsihin ñi.

3

Nacaa cua coo nyívi nu cua ndihí quívi

¹ Tan cuñi tucu tsi coto un tyin nu cua ndihí tyembu cua coo quívi tsa yí xaan cua coo yo.² Tyin cua coo nyívi nyíyo iñi, maa ñi tsa tsii maa ñi cua cuñi ñi coo. Tan cua cuñi xaan ñi xuhun. Tan yaa xaan cua jaha ñi tsi ñi, cahnu cua jaha ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sihi ñi. Ña cua nacuhva ñi tyahvi nyoo tsi Nyoo, tan ndi tsi nyívi ñi. Ña cua tyaa yahvi ñi tsi Nyoo.³ Ña cua cuñi ñi tsi nyívi ñi. Ña cua cuhva maa ñi coo taxin nyívi. Cua cahan ñi cuendu. Ña cua cuví cundaca ñaha ñi cuñu ñuhu ñi. Xaan xaan ñi cua cuví. Tan ña cua cuñi ñi nyehé ñi tsa vaha.⁴ Cua xico ñi tsi nyívi ñi. Tan cua cana iñi ñi javaha ñi náa ndihí tsa cuñi maa ñi. Tan cahnu cua jaha ñi tsi ñi. Tan maa ñi maa tsa cuñi maa ñi cua nanducu ñi, tan ña cua nanducu ñi tsi Nyoo.⁵ Cua cunycun ñi tsi Nyoo tumaa tsa tsinu iñi ñi cua jaha ñi tsi ñi, maa tyin ña nditsa. Tyin tyasi ñi nu janahá Nyoo tunyee iñi ra tyin ña tsinu iñi ñi tsi ra.

Ña cutahan un tsihin nyivi javahá tacan. ⁶ Tyin tyañu ñi ican iyó ra tsa quihví tsitsi vehe, tan jandavi ñaha ra tsi ñiñaha tsa nduve maa tsa tsiñi tuñi jiñi ñi. Tan cuaha cuatyí ñi can iyó, tan cuaha tsa ña vaha cuñi ñi. ⁷ Cuahán ñi cua tyaa soho ñi tuhun tsa, maa tyin ña cuví maa cutuñi ñi ñi tsa cuví tsa nditsa. ⁸ Tan nyivi cua coo, cua cuví ñi tumaa ra Janes tan ra Jambres, ra tasi tsa tsicoq tsanaha naha ra. Tyin cuñi ra naha jaha canaa ra naha tsi ra Moisés. Tan tacan tucu nyivi cua coo nu cuahán ca tsi ityi nuu. Cua cahan ñi ndavaha ñi siqui tuhun Nyoo. Quiñi xaan cua caca ñi ñi. Tan ña cua quita vaha ñi tsihin cuhva tsinu ñi ñi. ⁹ Maa tyin tsa cua janaha ñi, ña cua cuví nducuaha can tyin ña xeehe caa tyin iin tsa nduve yahvi nyaá cua cuví can, tumaa tsa javahá tucu ra Janes tan ra Jambres.

Nu ndihí tavq tyiñu ra Pablo tsi ra Timoteo

¹⁰ Maa tyin yooho tsitó vaha un tyin yuhu ñavin tacan iyó yu. Tan nyicún un tuhun tsa jacuahá yu, tan cuhva iyó yu. Tan tsitó un nacuenta iyó yu tacan, tan nácaa tsinú ñi yu tsi Nyoo. Tan tsitó tucu un nácaa cunyeé ñi yu tsa cuxaán nyivi tsi yu, tan nácaa cuñi yu tsi ñi. ¹¹ Tan tsitó un nácaa cunyeé ñi yu nyehé yu tundoho tsa tsinyaá ndaha nyivi tsi yu. Tsitó un tsa tahanan yu, tandihí tundoho tsa nyehe yu tsacatyí tuhun Nyoo nda ñuu Antioquia, tan ñuu Iconio, tan ñuu Listra. Maa tyin Jutu Mañi yo jacacú ra tsi yu tsitsi tandihí tundoho can. ¹² Tsa nditsa tyin tandihí yoo tsa cuñi coo cuhva cuñi ra Cristo Jesús cua janyehe nyivi tundoho tsi yo. ¹³ Maa tyin nyivi caquiñi tan nyivi jandavi ñaha, quiñi xaan ca cua coo ñi. Tyin cua jandavi ñaha ñi tsi nyivi tan cua jandavi ñaha tucu maa nyivi tsi ñi.

¹⁴ Maa tyin yooho jañiñi tsi un tan coo un tsihin tsa cutuhvá un. Tyin tsitó un yóo jacuahá tsi un tan tsitó un tyin tsa nditsa cuví tsa cutuhvá un. ¹⁵ Nda ndi luhlu un tan tsitó un tuhun nyaá nu tutu Nyoo. Tan yacan cuví tsa tsahá tsa cutuñi ñi un tan cacu un tsa cuenda tsa tsinú ñi un tsi ra Cristo Jesús. ¹⁶ Tandihí tuhun tsa nyaá nuu tutu Nyoo, maa Nyoo tsahá tsi. Tan jatinyeé xaan tsi tsi yo tsa nacoto yo nácaa taahán tsi tsinú ñi yo. Janahá tsi tsi yo tyin iyó cuatyí yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo. ¹⁷ Tacan jatinyeé tuhun Nyoo tsi yo tyin tacan tan ña cumañi tsa cumañi tsi yo tan cuví yo iin ra cuiti yihí cuenda Nyoo tan javaha yo tandihí tsa vaha.

4

¹ Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua

jandaa cuatyí nyivi nyito tan nyivi tsihi quivi cua quitsi ra cundaca ñaha ra tsihin tunyee ñi tsa iyó tsi ra. ² Cahan tuhun Nyoo tsihin nyivi. Tan ña jandihí un tsa jañiñi un javaha un tacan. Cahan tuhun Nyoo tsihin ñi tatun tsahá tsi cuhva tan vasu ña tsahá tsi cuhva. Cuhva cuenda tsi ñi, cahan tsihin ñi tatun ña vaha javahá ñi, tyin tacan tan cunyicun vaha ñi tsi ra Cristo. Tan cunyeé ñi cuatu nda nasama ñi cuhva iyó ñi. Tan jacuahá tsi ñi nácaa taahán tsi coo ñi. ³ Tyin coo quivi ña cua cunyeé ca ñi nyivi tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán ñi maa ñi tyaa soho ñi. ⁴ Tan cua tyaa tsiyo ñi tsa nditsa. Tan cua tyaa soho ñi tsa ña nditsa. ⁵ Maa tyin yooho jaha cuenda tsi un tsihin tsa vaha tsicá ñi un. Cunyeé ñi nyehé tundoho. Cahan tuhun Nyoo tsihin nyivi. Vaha javaha un tyiñu tsa tsahá Nyoo tsi un.

⁶ Yuhu tsa yatyin cua nacuhva cuenda yu ñayivi iyó yu tsa cuenda tuhun Nyoo, tyin tsa cuyatyin cúu yu. ⁷ Tsa yahá cañi tahan yu tumaa taahán maa tsi, tan tsa ndihí javahá yu tyiñu tsa tsahá Nyoo tsi yu tumaa iin ra tsinú suuhva, tun tsa tsá ra nu taahán tsi cucuiñi ra. Tan tacan ñi maa tsinú ñi yu tsi Nyoo. ⁸ Tan vityin nu cuahán ca quivi, ndatú vaha yu tsa taahán tsi tsi yu tsa cua cuhva Jutu Mañi yo tsi yu tsa cuenda tsa vaha tsicoq yu nuu ra. Tan ñavin maa ñi maa yu cua cuhva ra itsi, cua cuhva tucu ra itsi tsi tandihí ca nyivi tsa ndatú tsi ra quivi cua quitsi ra. Tyin intuhun ñi maa ra cuví ra tatsí tuñi vaha.

Inga tyiñu tavq ra Pablo tsi ra Timoteo

⁹ Janumi tan quitsi ñi un, quitsi nyehe un nu nyii yu. ¹⁰ Tyin ra Demas nacoq ihñi ra tsi yu tyin cuñi ca ra tsa iyó ñuu ñayivi ihyá. Tan cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Damacia. ¹¹ Intuhun ña ra Lucas nyii tsihin yu. Nanducu tsi ra Marcos tan quihin tsi ra quitsi tsihin un quivi quitsi un. Tyin cuví jatinyeé ra tsi yu tsihin tyiñu Nyoo. ¹² Jacuhun yu tsi ra Tíquico ñuu éfeso. ¹³ Quivi quitsi un yaha un naquihin un jahma vixin yu tsa nacoq yu ñuu Troas vehe ra Carpo. Tan naquihin un tandihí libru yu, cundaha un quitsi tsihin un. Tsa ñiñi ca cuñi tsi cundaha un, yacan cuví tandihí tutu yu.

¹⁴ Ra Alejandro, ra cañi caa, cuaha xaan tsa ña vaha javahá ra tsi yu. Maa Jutu Mañi yo cua natyahvi tsi ra tsa cuenda tandihí tsa javahá ra. ¹⁵ Jaha cuenda vaha tsi un coto náa javaha ra tsi un. Tyin xaan xaan cuñi ra cuenda tuhun Nyoo tsa caahán yo.

¹⁶ Tsa jihna ñi jacacú yu tsi yu nuu ra cumí tyiñu naha ra, yoñi maa jatinyeé tsi yu. Tandihí ra naha nacoq ihñi ra naha tsi yu. Na jaha Nyoo tucahnu ñi tsi ra naha

tsa cuenda yacan. ¹⁷ Vasu ndi maa tandihi ra naha nacoꝝ ihñi tsi yu, maa tyin Jutu Mañi yo jatyinyee xaan ra tsi yu. Tan tsaha ra tunyee iñi tsi yu tan cuvi cahan catsi yu tuhun ra nuu nyivi. Tan tsiñi tandihi nyivi tsa ñavin ñi Israel cuvi tsa cahan yu. Tan jacacu Nyoo tsi yu tan ña tsatsj ndicaha can tsi yu. ¹⁸ Tan maa Nyoo cua jacacu tsi yu ndaha tandihi tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndacá ñaha ra nda gloria. Tan taahán tsi jacahnu yo tsi ra tandihi ñi tyembu. Tan na cuvi tsi tacan.

Nu ndihi cahan ra Pablo tan tsaha ra nacumi tsi nyivi

¹⁹ Cuhva nacumi tsi ña Prisca tan tsi ra Aquila tan tsi nyivi ra Onesíforo. ²⁰ Tan jacotó ndihi yu tsi un tyin ndoo ra Erasto ñuu Corinto. Tan ndoo ra Trófilmo ñuu Mileto tyin cuuhví ra. ²¹ Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyí ra Eubulo tan ra Pudente tsihin ra Lino tsihin ña Claudia tan tandihi ca nyivi yihí cuenda Nyoo tsihin yo.

²² Na quihi ndaha Jutu Mañi yo Jesucristo tsi un. Tan Nyoo nasoco tsi tandihi ndo.

Tan na cuvi tsi tacan ñi.

Carta Tsa Jacuhun Ra Pablo Tsi Ra Tito

Nu tyaaq ra Pablo carta tsa cuenda ra Tito

¹Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatinyee yu tsi nyivi nacatsi Nyoo, na tsinu iñi ñi tsi ra, tan n-coto ñi tsa nditsa, tan coto ñi nácaa taahán tsi coo yo cuhva cuñi Nyoo. ²Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyi Nyoo tyin cuhva ra ñayivi nyito coo yo. Tan ña jandavi ñaha ra. ³Tan vityin tsa tahañ tsi quivi tsa tyaa Nyoo cuhva tyin coto yo tuhun ra. Maa ra cuvi ra jacacú tsi yo, tan tava ra tyiñu tsi yu tsa cahan yu tuhun ra tsihin nyivi. ⁴Jauitsi yu carta ihya tsi un, Tito, tyin nditsa tyin cuvi un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo añima un. Tan na cundaahvi iñi ra nyehe ra tsi un.

Tyiñu tsahq ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta

⁵Nacoo yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuvi ityi nuu tsihin nyivi vehe ñuhu intuhun intuhun ñuu, tumaa tsa catyi maa yu tsihin un. ⁶Tyin ra tsahnu cuvi ityi nuu tsihin nyivi vehe ñuhu, cuñi tsi cuvi ra iin ra iyó intuhun ñi ñasihi, tan tsinú iñi tandihi sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña tuhvá nyivi tyaa cuatyí siqui sehe ra. Tun tacan iyó ra, cuvi cuvi ra ityi nuu tsihin nyivi vehe ñuhu. ⁷Tyin ra cuvi ityi nuu tsihin ñi yihí cuenda Nyoo, maa Nyoo tsahq tyiñu can tsi ra. Yacan cuenda ñiñi cuñi tsi tsa cuvi ra iin ra cuiti iyó nuu Nyoo. Iin ra cahnu jahá tsi ña cuvi cuvi ra ityi nuu tsihin nyivi vehe ñuhu, ndi iin ra ndihi iñi, ndi iin ra tuhvá tsihi, ndi iin ra nducú tsihi, ndi iin ra jaha canaa xuhun tsihin iin cuhva ña vaha. ⁸Maa tyin cuñi tsi cuvi ra iin ra sii cuñi tatun tsaa nyivi yuvehe ra. Tan taahán tsi cuhva ra nu ndoo ñi cusu ñi. Cuñi tsi cuvi ra iin ra javahá tsa vaha, iin ra tsicá iñi tsa vaha, iin ra tsa nacuhva cuenda vaha tsi ra tsi Nyoo, iin ra tsitó cundaca ñaha tsi maa ra. ⁹Cuñi tsi cunycun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tsihin tuhun vaha ihya, tan ñihi ra cuhva jacuahá ra tsi nyivi caahán tyin ña nditsa tuhun caahán yo. ¹⁰Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandavi ñaha.

Tan vihi ca ra nyicún costumbre tsahnu nyivi Israel, yaha ca cuhva caahán ra can naha ra. ¹¹Cuñi tsi tsa casi yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñi ra naha xuhun.

¹²Tan juvin ñi maa iin ra Creta, iin ra tsitó xaan, cahan ra tuhun nyivi ñuu maa ra catyi ra tyehen: “Nyivi Creta, vatya xaan ñi. Cuví ñi tumaa cuvi quiti. Cuaha xaan tsatsi ñi tan jutsan xaan ñi”, catyi ra. ¹³Tan nditsa tsa cahan ra. Yacan cuenda cuñi tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo. ¹⁴Tan ña tyaa soho ca ñi cuendu tsa caahán nyivi Israel. Tan ndi ña tyaa soho ca ñi tsa caahán nyivi tsa ña cuñi coto tsa nditsa.

¹⁵Tsa cuenda nyivi tsa vaha tsicá iñi ñi, tandihi maa náa tsa iyó tan vaha tsi cuñi ñi. Maa tyin tsa cuenda nyivi tsa ña tsinú iñi tan ña vaha tsicá iñi, nduve maa iin tsa vaha cuñi ñi, tyin nda cuenda cuhva tsicá iñi ñi tan tsa tsinú iñi ñi tan ña vaha. ¹⁶Catyí ñi tyin tsitó ñi tsi Nyoo, maa tyin tsihin tsa ña vaha javahá ñi, nyehé yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuvi javaha ñi tsa vaha.

2

Tuhun vaha tsa tsahq Nyoo tyin jacuahá yo

¹Maa tyin yoocho, jacuahá tsa vaha tsa nacatsi tahan tsihin tsa jacuahá Nyoo tsi yo. ²Jacuahá tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinú iñi ra. Cuñi tsi tsa cuñi ra naha tsi Nyoo tan tsi nyivi. Tan cunyeé iñi ra naha tandihi náa tundoho nyehé ra naha. ³Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyivi tsihin cuhva iyó ñi. ⁴Tyin tacan, jacuahá vaha ñi tsi ñiñaha cuatyí tsa ndi tindaha, na cuñi ñi tsi yí ñi tan tsi sehe ñi. ⁵Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuvi ñi nyivi vaha. Na cuhva ñi tsa cundaca ñaha yí ñi tsi ñi, tyin tacan tan ña cuvi cahan nyivi ndavaha ñi siqui tuhun Nyoo tsa cuenda cuhva iyó ñi.

⁶Tacan tucu ra cuatyí naha ra. Cuhva cuenda tsi ra naha na catsi coo ra naha. ⁷Tan maa un cuñi tsi tsa janaha un maa ñi maa tsa vaha tsi ra naha tsihin cuhva iyó un. Jacuahá tsi ra naha tsihin tsa vii tan tsihin tsa vaha. ⁸Maa ñi tuhun vaha cahan un tyin tacan tan yoñi cuvi tyaa cuatyí siqui un. Tan ra xaan iñi tsi ndo naha ra ña cua ñihi ra

naha cuhva cahan ra naha ndavaha ñi siqui ndo tan cua nducahan nuu ra naha.

⁹ Cuhva cuenda tsi ra yañi yo, ra cuvi musu naha ra, na tyaa yahvi ra naha tsi tsi-toho ra naha. Na javaha ra naha tandihi tsa caahán tsitoho ra naha. Tan na ña nacahan ra naha nu caahán tsitoho ra naha. ¹⁰ Tan na ña suhu ra naha tsa tsii tsitoho ra naha. Na jaha vaha ra naha cuenda tandihi ndaha tyiñu tsitoho ra naha, tyin tacan tan nyehe nyivi tyin vaha xaan tuhun Nyoo, ra jacacú tsi yo.

¹¹ Tyin Nyoo janahá ra tsa vaha tsa iyó tsi ra tsi nyivi tan cuñi ra jacacu ra tsi tandihi ñi. ¹² Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyivi tsa ña tsitó tsi ra, tan nacoo tucu yo tsa cuñi ñi can. Tan cuiti coo yo nu ñuhu ñayivi ihya, na cundaca ñaha vaha yo tsi yo tumaa cuñi maa Nyoo. ¹³ Tan janahá tucu ra tsi yo nácaa cuatu yo tsa vaha tsa cua ñiñi yo quivi quitsi ra Jesucristo inga tsaha. Tyin sii xaan cua cuñi yo nyehe yo tsa sii caá quivi quitsi ra cuvi Nyoo yo, ra cahnú cuvi, ra jacacú tsi yo. ¹⁴ Tsahá ra ñayivi ra tsa cuenda yo tyin tacan tan jacacu ra tsi yo ndaha tandihi tsa caquiñi. Tan nacatyá ra tsi yo na cuvi yo nyivi vaha, tan cuvi yo tsii maa ra, tan javaha yo maa ñi maa tsa vaha. ¹⁵ Yacan cuñi tsi jacuahá un tsi nyivi. Jandu iin ñiñi ñi. Tan cahan tsihin ñi tsihin sivi Nyoo. Tan ña javaha un tsa ña vaha tyin tacan tan ña ñiñi nyivi nácaa cahan nyaa ñi tsi un.

3

Cuhva taahán tsi javaha nyivi yihí cuenda Nyoo

¹ Janducuhun iñi tsi nyivi yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyí ra cumí tyiñu tyin javaha ñi tsihin tsa nui iñi ñi. ² Tan ña cahan ñi ndavaha ñi siqui nyivi. Ña cañi tahan ñi tsihin nyivi. Na cuvi ñi nyivi vaha. Na masu jaha ñi añima ñi tsihin tandihi nyivi.

³ Tyin nda cuanda maa yo tan ña vaha javahá yo nu quitsi tsi. Soho xaan tsicoo yo. Ndava xaan iñi yo. Ña tsicá yo ityi vaha tyin jandaví ñaha xaan nu ña vaha tsi yo. Tan tsindacá ñaha tandihi tsa ña vaha tsa cuñi cuñu ñuhu yo tsi yo. Tan javahá yo tandihi cuhva cuñi maa yo. Tan cuñi yo coo tandihi tsa iyó tsi inga nyivi tsi yo. Ndasi tsicá iñi yo nyehe yo tsi nyivi yo. Tan tacan tucu maa nyivi ndasi cuñi ñi nyehe ñi tsi yo. ⁴ Maa tyin Nyoo vaha xaan iñi ra tan jacacú ra tsi yo. Tsihin yacan janahá ra tsi yo tyin cuñi ra tsi tandihi nyivi. ⁵ Ñavin tsa cuenda tsa vaha javahá yo tan jacacú ra tsi yo, tyin jacacú ra tsi yo tsa cuenda tsa cundaahví iñi ra nyehe ra tsi yo. Tan tsihin ñiñi ra Jesús nacatyá ra

cuatyí yo, tan nacacú tsaa yo jahá Tatyí Ii ra, tan tsahá ra ñayivi nyito coo yo. ⁶ Tan tsa cuenda ra Jesucristo, ra jacacú tsi yo, tsahá xaan Nyoo tsa coo Tatyí Ii ra añima yo. ⁷ Tsihin tsa vaha maa ra tan janduvahá ra tsi yo nuu ra. tyin tacan tan naquihin cuenda yo ñayivi nyito tsa ña cua naa maa tsa ndatú yo. ⁸ Tandihí tuhun ihya tuhun nditsa cuvi tsi. Tan cuñi yu tsa jañiñi xaan un cuhva cuenda un tuhun ihya tsi nyivi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatyinyee tsi tsi tandihí nyivi tatun tyaá yahvi ñi tsi. ⁹ Maa tyin ña tyaa soho un nu caahán yuhu tahan nyivi siqui tsa nduve yahvi nyaá. Ña tyaa soho un tsa caahán ñi tyin ñi ican cuñi ñi coto ñi nácaa vatsí tata nyivi. Ña tyihí un tsi un tsihin nyivi cañi tahan tsa cuenda ley tsa tyaa ra Moisés tsanaha. Tyin nduve náa jatyinyee yacan. Tan nduve tsa tsiiñi tuñi tsahá can.

¹⁰ Tatun iyó nyivi cuñi natahvi sava tsi nyivi tsicá vehe ñuhu, cãna tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña tyaá yahvi ñi tsa caahán un, cãsi nu caca ñi vehe ñuhu. ¹¹ Tyin tsihin tsa javahá ñi tacan, tsa tsitó un tyin ña vaha añima ñi tyin tsicoo cuatyí ñi. Tan juvin ñi maa ñi jacunaá tsi ñi tsa tacan javahá ñi.

Tyiñu tavá ra Pablo tsi ra Tito

¹² Cua jaquitsi yu tsi ra Artemas, a ra Tíquico nu nyii un. Tan quivi tsaa ra, nducu cuhva tan cahun un nda ñuu Nicópolis tyin ndacan cua ñiñi tahan yo. Tyin tyaá yu cuhva tsa ndoo yu ndacan yoo vitsin. ¹³ Nducu cuhva jatyinyee un tsi ra Zenas ra tuhvá caahán ndaahvi tsaha nyivi, tan tsi ra Apolos. Tan cuhva tsa tsiiñi ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha. ¹⁴ Na cutuhva nyivi yihí cuenda Nyoo javaha ñi tsa vaha tan jatyinyee ñi tsi inga nyivi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

Nu ndihí cahan ra Pablo

¹⁵ Tandihí ra yucú tsihin yu, tsahá ra naha nacumi tsi un. Tan cuhva nacumi tsi tandihí nyivi cuñi tsi yo tsa cuenda tsa iin ñi cuvi yo cuenda Nyoo. Tan Nyoo nasoco tsi tandihí ndo.

Tan na cuvi tsi tacan ñi.

Carta Tsa Jacuhún Ra Pablo Tsi Ra Filemón

Nu quitsahā tyaá ra Pablo carta cuenda ra Filemón

¹ Yuhu ra Pablo, nyíi yu vehe caa tsa cuenda tsa caahán yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyí tucu ra Timoteo tyin jaquitsí ndihi ra nacumi tsi un. Cuñí xaan ndí tsi un tsa cuenda tsa iin ñi tyiñu ra Cristo jahá tyiñu yo.

Nu quitsahā tyaá ra Pablo carta cuenda ra Filemón

² Tan tyaá yu carta ihya tsa cuenda ña Apia tan ra Arquipo tyin jatyinyeé xaan ñi tsi yo tsihin tyiñu jahá yo, tan tyaá tucu yu itsi tsa cuenda tandihi nyivi ndu iin yuvehe un. ³ Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo aña ndo.

Ra Filemón tsinú xaan iñi ra tsi ra Jesús tan cuñí xaan ra tsi nyivi

⁴ Tandihí ñi tsaha tsa tsicán tahvi yu tsi Nyoo tan nducuhún iñi yu tsi un, ⁵ tyin ñihí tuhun yu tyin tsinú xaan iñi un tsi ra Jesús tan cuñí xaan un tsi tandihí nyivi yihí cuenda ra. ⁶ Tan tsicán yu tsi Nyoo tsa cuenda tandihí nyivi tsa natsinú iñi tsi ra Jesús jahá un tsihin tsa tsinú iñi un, tyin na cutuñi iñi ñi tandihí tsa vaha tsa iyó tsi yo tsa cuenda ra Jesucristo. ⁷ Tan si xaan cuñí yu tan iin xaan cuñí yu tsa cuenda tsa cuñí xaan un tsi nyivi tsa yihí cuenda ra Cristo tan jandu iin xaan un iñi ñi.

Nu tsicán ra Pablo tumañi iñi tsi ra Filemón tsa cuenda ra Onésimo

⁸ Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu. ⁹ Maa tyin yuhu cuñí xaan yu tsi un, yacan cuenda ña cua tava tyiñu yu tsi un tyin cuñí yu ndacan yu iin tumañi iñi tsi un. Tan tsa tsitó maa un tyin yuhu tsa tsahnu xaan yu tan nyíi yu vehe caa ihya tsa cuenda ra Cristo. ¹⁰ Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahan yu tuhun ra Cristo tsihin ra nu nyíi yu vehe caa ihya.

¹¹ Tahán tsanaha cuví ra musu un tan ña jahá tyiñu vaha ra. Maa tyin vityin vaha xaan cua jatyinyee ra tsi yo, tahan ñi tsi yooho tan yuhu. ¹² Yacan jaquitsí nyico yu tsi ra yuvehe un tan cuñí yu tsa naquihin cuenda un tsi ra tumaa tsa maa yu cuví ra. ¹³ Tsicá tucu iñi yu tsa ndoo ra nu nyíi yu

vehe caa ihya tan jatyinyee ra tsi yu cahan yu tuhun Nyoo tsitsi tsa nduve un. ¹⁴ Maa tyin ña cuñí yu jandoo yu tsi ra tyin ña tsitó yu nácaa cua cahan un. Tan ña cuñí yu jañiñi yu tsi un tun ña cuhva un tsa cunyii ra. Vaha ca jaquitsí nyico maa un tsi ra tun cacu iñi un tsa cuhva un tsi ra tsa jaha tyiñu ra tsihin yu. ¹⁵ Vasiqui maa Nyoo cuñí tsa cunu ra nuu un juhva quivi tan vityin cua tsa nyico ra yuvehe un tan coo cuí ra tsihin un. ¹⁶ Tan vityin naquihin cuenda tsi ra tumaa yañi un tsa cuenda ra Cristo; tan ñavin tumaa musu. Yuhu cuñí xaan yu tsi ra, yacan yooho taahán tsi tsa cuñí ca un tsi ra tan ñavin ca yuhu, tyin vityin ñavin musu ñi un cua cuví tsi ra tyin cuví tucu ra yañi un tsa cuenda ra Cristo.

¹⁷ Tun nditsa un tsa cuñí un tsi yu tsa cuenda tsa yihí yo cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatun tsa yu yuvehe un. ¹⁸ Tatun javahá ra iin tsa ña vaha tsi un o nyaá cuenda ra tsi un, tyahvi maa yu can. ¹⁹ Yuhu ra Pablo tyaá yu letra ihya tsihin ndaha yu tyin cua tyahvi maa yu tsi un, tan ña cua cahan yu tsihin un tyin nyaá tucu cuenda maa un nda cuanda ñayivi iyó un tsi yu. ²⁰ Yañi, javaha tumañi iñi ihya tsi yu, tumaa ra yihí cuenda ra Cristo; na cusii iñi yu tan na ndu iin iñi aña yu tsihin tsa cua javaha un.

²¹ Jaquitsí yu carta ihya tsi un tyin tsitó yu tyin cua tyaa yahvi un tsa caahán yu tan cua javaha un tsa tsicán yu, tan cuaha ca tsa cua javaha un. ²² Tan cuñí tucu yu tyin janduvaha un nu cusu yu yuvehe un tyin nyitá iñi yu tyin Nyoo cua cuhva ra tsa quitsi nyehe yu tsi ndo, tyin tsicán tahvi ndo tsi ra.

Nu ndihí tyaa ra Pablo carta tsa cuenda ra Filemón tan tsahá ra nacumi tsi ra tan jacuhún tucu inga ra naha nacumi tsi ra

²³ Ra Epafra tsa nyíi ndihí vehe caa ihya tyin caahán ra tuhun ra Cristo Jesús jaquitsí ra nacumi tsi un. ²⁴ Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihya naha ra jatyinyeé xaan tsi yu tsihin tyiñu. ²⁵ Na nasoco xaan Jutu Mañi yo Jesucristo tsi ndo.

Tan na cuví tsi tacan ñi.

Carta Tsa Tsinyaa Tsa Cuenda Nyivi Israel, Ñi Caahán Yuhu Hebreo

Caahán Nyoo tsihin yo tsihin yuhu Sehe ra

¹ Tahan tsanaha cuaha xaan tsaha, tan cuaha xaan cuhva cahan Nyoo tsihin tsii tsaahnu yo. Tsa jihna ñi tsatyíñu ra tsi ra cuví ndusu yuhu ra. Juvín ra can naha ra tsahá cuenda tsi nyívi tuhun caahán Nyoo. ² Tan vityín, nu cua ndihi tyembu ihya tsatyíñu ra tsi Sehe ra tsa caahán ra tsihin yo. Iín ñi cuví ra tsihin Sehe ra tan javahá ra tandihí tsa iyó. Tan nacuhvá cuenda ra tandihí can tsi Sehe ra. ³ Tan maa Sehe ra janahá ra tsa sîi caá ra, tyín juvín ra Sehe ra cuví tixahúu ra tyín juvín ñi cuhva caá maa ra caá ra Sehe ra. Tan tsihin tunyee iíni tuhun caahán ra, yihí ndaha ra tandihí tsa iyó. Tsa yahá tsa nacatyá ra cuatyí yo, tan tsinyaa ra xiín cuaha Nyoo nda gloria.

Cahnu ca cuví Sehe Nyoo tan ñavin ca ángel

⁴ Sehe Nyoo cahnu xaan ca cuví ra tan ñavin ca ángel. Tan cahnu ca tyíñu ñihí ra jahá tyíñu ra tan ñavin ca ángel. ⁵ Tyín Nyoo ña catyí ra ndi iín tsaha tsihin ndi intuhun ángel tyehen:

Yoocho cuví Sehe yu.

Tan tsahá yu ñayívi coo un vityín.

Tan ndi ña cahan ra tuhun ndi intuhun ángel tyehen:

Yuhu cua cuví Jutu ra.

Tan maa ra cua cuví Sehe yu.

⁶ Maa tyín quívi jaquitsí Nyoo tsi Sehe mañi ra nu ñuhu ñayívi, catyí ra:

Tyín tandihí ángel ra taahán tsi jacahnu ra naha tsi Sehe ra.

⁷ Tan cahan tucu ra tuhun ángel tan catyí ra: Ángel yu cuví ra naha tumaa iín tatyí jahá yu,

jahá tyíñu ra naha tyíñu yu, tan cuví tucu ra naha tumaa ñuhu, catyí Nyoo.

⁸ Maa tyín tuhun Sehe ra catyí ra tyehen:

Nyoo cuví un, tan ña cua cundihi maa tsa ndacá ñaha un. Tan tsa ndacá ñaha un ndaa tsi tan nditsa tsi.

⁹ Tyín cuñí un tsa vaha tan ndasi cuñí un nyehé un tsa ña vaha.

Yacan cuenda yuhu, tsa cuví yu Nyoo un, tsahá yu cuaha ca tsa sîi cuñí un, tan ñavin ca tsi ra cutahán tsihin un naha ra.

¹⁰ Tan catyí tucu Nyoo tsihin Sehe ra tyehen: Yoocho cuví Jutu Mañi tandihí nyívi. Quívi jihna ñi juvín un javahá ñuhu ñayívi, tan tsihin ndaha un javahá un andiví.

¹¹ Ñuhu ñayívi tan andiví tan tandihí maa tsa iyó cua cundihi tsi, maa tyín yoocho, ña cua cundihi un, tyín tacan ñi iyó maa un.

Tandihí maa can cua ndutsahnu can tumaa ndutsahnú jahma.

¹² Tan cua quíhi tahnú can tumaa tyihí tahnú yo iín jahma.

Tan cua nasama can tumaa nasamá nyívi jahma ñi.

Maa tyín yoocho iín ñi maa ra cuví un tan ña cua nasama un.

Tan ña cua cundihi maa ñayívi un tyín tacan ñi iyó maa un, catyí Nyoo tsihin Sehe ra.

¹³ Nyoo ndi iín tsaha ña cahan ra tsihin ndi intuhun ángel tumaa cahan ra tsihin Sehe ra tyehen:

Cunyaa xiín cuaha yu ihya

tsitsi tsa nacuhva cuenda yu tsi nu xaan iíni tsi un nahnu tsi un.

¹⁴ Tandihí ángel, tatyí cuví ra naha. Tava tyíñu Nyoo tsi ra naha tsa caca ra naha tyíñu ra tan jatyinyee ra naha tsi nyívi tsa cua cacu.

2

Cahnu xaan cuví tsa jacacú Nyoo tsi yo

¹ Yacan cuenda cuñí tsi tyaa yahvi xaan ca yo tuhun nditsa tsa tsiñí yo, coto nacoo ihñi yo itsi. ² Tahan tsanaha tsahá cuenda ángel ley Nyoo tsi ra Moisés. Tan janahá Nyoo tyín nditsa tan taahán tsi tyaa yahvi nyívi itsi.

Tan nyívi tsa tsicoo cuatyí tan ña tyaa yahvi ley can, tatsí tuñi ra tsi ñi tumaa catyí maa ley can. ³ Tun tacan tahan ñi can quívi can ñácaa cua javaha yoo vityín, tan cuví cacu yo tatun ña tyaa yahvi yo tsa jacacú Nyoo tsi yo?, tan cahnu xaan ca cuví tuhun ihya.

Juvín ñi maa Jutu Mañi yo Jesucristo cuví ra tsa cahan jihna tyín cuví cacu yo. Yahá can tan cahan nyívi tsa tsiñí tsa cahan ra. Nyehe ñi tyín nditsa tan nacatyí tuhun ñi itsi tsihin yo.

⁴ Tan sîin tyín Nyoo janahá catsi ra tsi yo tyín nditsa tsa jacacú ra tsi yo. Janahá ra can tsi yo tsihin tsa javahá ra cuaha tsa iyo. Tan tsahá tucu ra Tatyí lí ra tsi yo tyín jatyinyee tsi tsi yo tsa javaha yo tyíñu tsa cuñí ra javaha yo. Tan tsihin tandihí yacan janahá ra tsi yo tyín nditsa tsa jacacú ra tsi yo.

Ra Jesucristo quítsi ra cuví ra rayíi nu ñuhu ñayívi ihya

⁵ Nyoo ña tsahá ra tsa cundaca ñaha ángel ñuhu ñayívi tsaa tsa cua coo tsa caahán yo tuhun vityín. ⁶ Tyín iyó iín nu tyaa iín ra nu tutu Nyoo tyehen:

Nyoo Jutu yu ¿yóo ra cuví rayíi nu ñuhu ñayívi ihya tyín ñuhú iíni un tsi ra?

¿Tan yóo ra cuví ra tyín cutuñu iíni un tsa cuenda ra?

⁷ Tyin ndaahvi ca jahá un tsi ra juhva tyambu, tan ñavin ca ra ángel naha ra. Maa tyin jacahnú un tsi ra. Tan jahá un tsa ñayivi tsi ra.

Tan tsaá un tsa quihí ndaha ra tandihí tsa javahá un.

⁸ Tandihí can tyaa cuenda un ndaha ra.

Tan nduve maa náa ña tsaá cuenda Nyoo quihí ndaha ra. Tan ñaha ca nyehé yo tyaa yahvi tandihí yacan tsi ra. ⁹ Maa tyin nyehé yo tsi ra Jesús tyin nduluhlú ra jahá Nyoo juhva tyambu tan ñavin ca ra ángel naha ra. Tan janduluhlú Nyoo tsi ra tsa cuenda tsa cuñí xaan ra tsi yo. Tan tsaá ra tsi ra Jesús quítsi ra quítsi cúu ra tsa cuenda tandihí yo. Tan vityin jahá xaan Nyoo tsa cahnú tsi ra tan jacahnú xaan ra tsi ra tsa cuenda tundoho tsa nyehé ra quivi can.

¹⁰ Tandihí maa tsa iyó, tsa cuenda maa Nyoo cuví tsi. Maa ra javahá itsi. Tan cuñí ra cuhva ra tandihí tsa sii caá tsa iyó andívi tsi tandihí sehe ra. Yacan cuenda janyehé ra tundoho tsi ra Jesucristo, ra tsa jacacú tsi yo, tan tsihin yacan janduvahá ra tsi ra. ¹¹ Ra Cristo tsa jacacú tsi yo, Sehe Nyoo tsi ra. Tan juvin ñi sehe Nyoo nanduví yoo tsa tsinú ñi tsi ra. Yacan cuenda ña cahán nuu ra Cristo tsa caahán ra tyin yañi ra tan cuhva ra cuví tsi yo, tyin iin ñi Jutu yo tsihin ra. ¹² Tyin catyí ra Cristo nu tutu Nyoo tyehen: Cua cahan yu tuhun un tsihin yañi yu. Tan cua jacahnú yu tsi un tsihin yaa nu ndu iin yo.

¹³ Catyí tucu ra tyehen:

Yuhu nyitá ñi yu tsi Nyoo.

Tan catyí tucu ra:

Ihya nyaá yu tsihin sehe Nyoo, tsa tsaá ra tsi yu, catyí ra.

¹⁴ Yoo tsa cuví yo nyivi ñuhu ñayivi, iyó cuñi ñuhu yo tan ñiñi yo. Tacan cuví ra Cristo, tyin tun tsa ña tsicoq cuñi ñuhu ra tan ñiñi ra, ña cua cuví cúu ra tan janaa ra tsi nu ña vaha, nu tsa tsañí tsi nyivi.

¹⁵ Tacan javahá ra tan jacacú ra tsi nyivi tsa tsicoq yuuhví jahá tuhun tsihi. Cuví ñi tumaa musu nu ña vaha tyin tandihí ñi quivi tsicoq yuuhví ñi.

¹⁶ Tan tsa nditsa vaha tyin ña quítsi ra quítsi jatinyee ra tsi ángel. Tyin quítsi ra quítsi jatinyee ra tsi nyivi tata ra Abraham. ¹⁷ Yacan cuenda ñiñi cuñí tsi tsa cuví ra tumaa yoo tsa cuví yo yañi ra tan cuhva ra tyin tacan tan cuví ra iin ra cundaahvi ñi tsi yo, tan cuví ra jutu tsaahnú cuví ityi nuu tsa cuenda yo nuu Nyoo tyin jandaá ra tandihí maa tan quihí nyaá ra cuatyí yo tsihin tundoho tsa nyehé ra. ¹⁸ Tan tsa cuenda tsa nyehé ra tundoho quivi nducú cuhva nu ña vaha tsi ra, tsitó ra nácaa cuñí yo tun nyehé yo tundoho. Yacan vityin nyaá ra tsa jatinyee ra tsi yo tun nyehé yo tundoho tsa nducú cuhva nu ña vaha tsi yo.

3

Cahnú ca cuví ra Jesús tan ñavin ca ra Moisés

¹ Nyoooho, yañi, tsa jandu íi Nyoo, tan tsa nacatsí ra tyin coo ndo tsihin ra nda gloria, nyehé vaha ndo cuhva iyó ra Cristo Jesús, juvin ra jaquitsí Nyoo tyin caca ra tyiñu ra tan cuví ra jutu tsaahnú cuví ityi nuu tsa cuenda yoo tsa tsinú ñi tuhun ra.

² Ra Cristo javahá ra tandihí tsa cahan Nyoo tyin javaha ra, tumaa javahá tucu ra Moisés tyiñu tsa tsaá Nyoo tsi ra tsa jaha cuenda ra vehe Nyoo tsa cuví nyivi Israel. ³ Ra Jesucristo cahnú ca ra cuví ra, tan ñavin ca ra Moisés, tyin cuví ra tumaa iin ra javahá vehe. Tyin ra tsa javahá vehe cahnú ca ra cuví ra tan ñavin ca maa vehe tsa javahá ra. ⁴ Tyin maa ñi iyó ra javahá intuhun intuhun vehe, maa tyin Nyoo cuví ra tsa javahá tandihí maa tsa iyó. ⁵ Ra Moisés tyaa yahvi ra tsi Nyoo tan javahá ra tyiñu tsa tsaá Nyoo tsi ra tyin jahá cuenda vaha ra vehe Nyoo tsa cuví nyivi Israel, tan juvin ñi jacotó tucu ra tsi nyivi tsa cua javaha Nyoo nu cuahán ca tsi. ⁶ Maa tyin ra Cristo, Sehe Nyoo, tyaa yahvi tucu maa ra tsi Nyoo tan juvin ra cuví ra ndacá ñaha vehe Nyoo vityin. Vehe can cuví yoo tun iin ñi cuñí yo nyicún yo tsi Nyoo tan nyitá vaha ñi yo tsi ra nda cuenda nu ndihí, tan tacan ñi sii cuñí yo ndatú yo tsa cua ñiñi yo.

Nyivi tsinú ñi tsi Nyoo, quitatú ñi tsihin ra

⁷ Yacan cuenda cuñí tsi jaha cuenda vaha yo tsi yo tumaa catyí Tatyí íi Nyoo tyehen: Tatun tsinú ndo tsa caahán Nyoo tsihin ndo vityin,

⁸ ña jandava ndo añima ndo, tumaa javahá nyivi tsa ña tyaa yahvi tsi Nyoo quivi nducú cuhva ñi tsi ra nu tsicá ñi nuu tsiqui.

⁹ Tyehen catyí Nyoo:

Tsii tsaahnú ndo nducú cuhva ñi tsi yu, vasu ndi maa nyehé ñi tsa javahá yu tsitsi tsa uvi xico cuíya.

¹⁰ Yacan cuenda cuxaan yu tsihin nyivi can, tan catyí yu tyehen: “Na iin maa cuñí nyivi ihya

tan ña cuñí ñi cunyicun ñi ityi janahá yu tsi ñi.”

¹¹ Yacan cuenda cuxaan yu tsihin ñi, tan cahan catsi yu tsihin ñi,

tyin ña cua quitatú ñi tsihin yu, catyí Nyoo.

¹² Yacan cuenda yañi, jaha ndo cuenda tsi ndo tan ña caca uvi ñi ndo tsitsi añima ndo coto jandihí ndo tsa tsinú ñi ndo tsi Nyoo nyito tan coto nacao ndo tsi ra. ¹³ Maa tyin jandu iin tahan ndo ñi ndo tandihí ñi quivi, tsitsi tsa tsaá tsi cuhva tsi ndo vityin. Tyin tacan tan ña cua ndundava añima ndo, tan ndi intuhun ndo tan ña cua jandavi ñaha tsa

caquiñi tsi ndo. ¹⁴ Tyin tun ña jandihí yo tsa nyitá iñi yo tsi Nyoo nda cuanda naa ñuhu ñayivi tumaa javahá yo nda quivi quitsahá yo, cua ñihi yo tsa vaha iin caa ñi tsihin ra Cristo tyin cunyeé iñi yo ndatu yo tsi ra.

¹⁵ Yacan tacan cuñi tsi jaha yo cuenda tsi yo tumaa catyí tutu Nyoo:

Tatun tsiñi ndo tsa caahán Nyoo tsihin ndo vityin

Ña jandava ndo añima ndo, tumaa javahá nyivi tsa ña tyaa yahvi tsi Nyoo —catyí tutu Nyoo.

¹⁶ ¿Yoo nyivi cuví ñi tsiñi tsa cahan Nyoo tan ña tyaa soho ñi? Nyivi ihya cuví nyivi Israel tsa tava ra Moisés Egipto tahan tsanaha. Juvín ñi can ña tyaa soho. ¹⁷ Tan ¿yoo nyivi cuxaan Nyoo tsitsi tsa uvi xico cuiya? Juvín ñi maa ñi tyin tsicoo cuatyí ñi. Tan tsihi ñi nu tsiqui, juvín ñi maa nu tsicá ñi. ¹⁸ ¿Tan yoo tsihin cahan catsi Nyoo tyehen?:

—Ña cua quitatu ndo tsihin yu.

Juvín ñi tsihin ñi tsa ña tyaa soho can. ¹⁹ Ihya nyehé yo tyin ña cuví ñihí ñi quitatu ñi tsihin Nyoo tyin ña tsinu iñi ñi tsi ra.

4

¹ Yacan cuenda, tsitsi tsa ndi iyó ndatu tsa quitatu yo tsihin Nyoo, jaha ndo cuenda tsi ndo tyin tacan tan ndi intuhun ndo tan ña cua ndoo ihíi ndo. ² Vityin yoo tsiñi tucu yo tuhun Nyoo tsa jacacú ra tsi yo, tumaa tsa tsiñi tucu maa nyivi Israel can. Tsiñi ñi itsi, maa tyin nduve nacatyí tsa tsiñi ñi itsi tyin ña tsinu iñi ñi itsi. ³ Yoo tsa tsinu iñi tsi Nyoo, quitatu yo tsihin ra. [Maa tyin ña quitatu nyivi tsa ña tsinu iñi tsi ra] tyin catyí ra:

Yuhu cuxaan yu tsihin ñi tan cahan catsi yu tsihin ñi tyin ña cua quitatu ñi tsihin yu, catyí ra.

Vasu ndi maa [tacan cahan Nyoo tsihin ñi ican], maa tyin [tsa iyó tuhun tsa cuví quitatu yo tsihin Nyoo nda quivi] ndihí jahá tyiñu ra javahá ra ñuhu ñayivi. ⁴ Tyin yihí nu tutu Nyoo caahán tsi tyehen tuhun tsa tsinu utsa quivi nu ndihí vitya:

Tsa ndihí jahá tyiñu Nyoo, quitatu ra tsa tsinu utsa quivi.

⁵ Tan catyí tucu tsi tyehen:

Ña cua quitatu ñi tsihin yu, catyí Nyoo.

⁶ Nyivi tsa tsiñi jihna tuhun tsa jacacú Nyoo tsi yo ña cuví quitatu ñi tsihin ra, tsa cuenda tsa ña tyaa yahvi ñi tsa cahan ra tsihin ñi. Maa tyin vityin ndi iyó ndatu tsa quitatu inga nyivi tsihin ra. ⁷ Tsa yaha tsa ña tyaa yahvi nyivi Israel tsa cahan Nyoo, tan tyaa ra inga quivi cuví quitatu yo tsihin ra, tan quivi can cuví tyembu vityin. Tacan caahán Nyoo nu tutu ra nu tyaa ra David tyehen: Vityin tatun nyoocho tan tsiñi ndo tsa caahán yu,

Ña jandava xaan ndo añima ndo, catyí Nyoo.

⁸ Tun tsatyin tsahá ra Josué nu quitatu nyivi Israel, ña cua cahan Nyoo tsa cuenda inga quivi. ⁹ Yacan cuenda cuví quitatu nyivi yihí cuenda ra tsihin ra. ¹⁰ Tyin nyivi quitatu tsihin Nyoo, ña tsicá iñi ñi tsa cuenda tyiñu jahá ñi tyin quitatu añima ñi tumaa quitatu Nyoo quivi ndihí jahá tyiñu ra. ¹¹ Cuñi tsi jañiñi yo nducu yo cuhva quitatu yo tsihin Nyoo, tyin tacan tan ndi intuhun yo tan ña javahá yo tumaa javahá nyivi tsicoo tsanaha tsa ña cuñi tsinu iñi tsi ra.

¹² Tyin tuhun Nyoo, nyito tsi, tan iyó tunyee iñi itsi. Tan xaan ca tsi tan ñavin ca mityi tsa xaan nduvi tsiyo yuhu. Tan jasiñ tsi tsa tsiñi tuñi jiñi yo tan tsa nyito yo, tan nu yihí tahan yiqui yo tan susun yihí tsitsi yiqui yo. Tan janahá tsi tun vaha o ña vaha tuhun xeehe tsa iyó añima yo tan tsa tsicá iñi yo. ¹³ Nduve maa tsa javahá Nyoo tan cuví cunu xeehe can nuu ra, tyin tandihí maa tan nyehé ra. Tan juvín tsi ra cua cuhva cuenda yo tsa javahá yo.

Ra Jesús cuví jutu tsaahnu cuví ityi nuu tsa caahán ndaahvi tsihin Nyoo tsa cuenda yo

¹⁴ Ra Jesús Sehe Nyoo, juvín ra cuví jutu tsaahnu cuví ityi nuu tsa cuenda yo, tyin quihvi ra nu nyaá Nyoo nda gloria tan caahán ndaahvi ra tsaha yo. Yacan cuenda na ña jandihí yo tsa tsinu iñi yo tsi ra. ¹⁵ Tyin ra tsa cuví jutu tsa cuenda yo cuví naquihin ndaahvi ra tsi yo tatun cuihya cuñi yo, tyin tsitó ra nácaa cuñi yo tun nyehe yo tundoho tyin maa ra nyehé tucu maa ra tandihí nuu tundoho quivi nducu cuhva nu ña vaha tsi ra, maa tyin ña tsicoo cuatyí ra. ¹⁶ Yacan cuenda cuñi tsi nanducu yo tsi Nyoo tan ndacan yo tsi ra tsihin tsa ña yuuhvi yo na cundaahvi iñi ra nyehé ra tsi yo tan cuhva ra tunyee iñi tsa iyó tsi ra tsi yo, tan jatinyee ra tsi yo quivi nyehé yo tundoho.

5

¹ Tandihí ñi jutu tsaahnu tsa cuví ityi nuu tsa nacatsi Nyoo tsitsi tsa tandihí nyivi Israel, nacatsi ra tsi ra naha tyin cahan ndaahvi ra naha tsaha ñi, tan cuhva cuenda ra naha tsa jamañi ñi tsi Nyoo, tan cahñi ra quiti tsa cuenda cuatyí ñi. ² Tan vatsi tsaha juvín ñi ndaahvi cuñi ra cuví jutu quivi nducu cuhva nu ña vaha tsi ra, yacan cuenda cuví cundaahvi iñi ra nyehé ra tsi nyivi ña cutuñi vaha iñi tuhun Nyoo tan nyivi ña nyicún vaha tsi Nyoo. ³ Tan yacan cuenda tsahñi ra quiti tan jamañi ra can nuu Nyoo tsa cuenda cuatyí maa ra tan tsa cuenda cuatyí nyivi.

⁴ Ndi intuhun maa nyivi tan ña cuví cuví ñi jutu tun ñavin maa Nyoo nacatsi tsi ñi. Tyin maa Nyoo cuví ra nacatsi tsi ra cua cuví

jutu, tan tsahá ra ndatu tsi ra tsa cuvi ra jutu, tumaa javahá ra tsihin ra Aarón tahan tsanaha. ⁵ Tan tacan tucu ra Cristo, ñavin maa ra tyaa tyiñu can tsi ra, tyin maa Nyoo tsahá tsa cuvi ra jutu tsaahnu tsa cuví ityi nuu, tumaa catyi ra: Yoocho cuví Sehe yu.

Yuhu tsahá yu ñayivi coo un vityin, catyi Nyoo tsihin ra Cristo.

⁶ Tumaa catyi tucu ra tsihin ra nu inga nu caahán tsi tyehen:

Ña cua cundihi maa tsa cuví yoocho jutu, tumaa cuví ra Melquisedec.

⁷ Quivi tsicog ra Cristo nu ñuhu ñayivi ihya, tsicán tahvi ra tsi Nyoo, tsacú xaan ra cahan ra tsihin Nyoo tyin juvin ra cua jacacu tsi ra ndaha tuhun tsihi tsihin tunyee iñi tsa iyó tsi ra. Tsiñi Nyoo tuhun caahán ra tsa cuenda tyin javahá ra tandihi tsa catyi Nyoo tyin javahá ra. ⁸ Yacan cuenda vasu ndi maa Sehe Nyoo tsi ra Cristo, cutuhva ra tyaa yahvi ra tsi Nyoo tsihin tsa nyehé ra tundoho. ⁹ Tsa yaha tsa javahá ra tandihi cuhva cuñi Nyoo tyin javahá ra, tacan tan tsahá Nyoo tsi ra tsa jacacú ra tsi tandihi nyivi tsa tyaa yahvi tsa caahán ra tyin tacan tan coo cuíi ñi tsihin Nyoo. ¹⁰ Tyin maa Nyoo tava tyiñu tsi ra tsa cuví ra jutu tsaahnu cuví ityi nuu, tumaa cuví ra Melquisedec.

Na ña jandihi yo tsa tsinú iñi yo tsi Nyoo

¹¹ Cuví cahan cuaha yo siqui tuhun ihya, maa tyin yi xaan nacatyí tuhun yu nácaa cuahán tsi, tyin nyoocho ña cuñi ndo cutuñi iñi ndo. ¹² Tsa naha xaan yihí ndo cuenda ra Cristo, yacan tsa taahán tsi jacuaha ndo tsi inga nyivi. Maa tyin nyoocho cuví ndo tumaa cuví lee tsa tyaxín tsa ñaha ca cuví catsi tyin cuñi tsi tsa tyaa soho nyico ndo tuhun tsa tsiñi ndo tsa jihna ñi. ¹³ Tyin nyivi cuñi tyaa soho tuhun tsa ña yi cuví ñi tumaa lee tsa tyaxín tyin ñaha ca cutuñi vaha iñi ñi nácaa coo vaha ñi tsihin Nyoo. ¹⁴ Maa tyin nyivi tsa cutuñi vaha iñi tan tsahnú ñi tsihin tuhun Nyoo, juvin ñi cuví tumaa iin nyivi tsa tsatsí nyayu tyin nacotó ñi ndáa tsa vaha tan ndáa tsa ña vaha.

6

¹ Yacan cuenda ña ndoo yo vaha maa ñi maa tsihin tuhun ra Cristo tsa cutuhva yo tsa jihna ñi; na cuhun yo ityi nuu ca tyin tacan tan cuahnu ca yo tsihin tuhun Nyoo. Na ña ndoo yo vaha tsihin tsa tsa yaha cutuhva yo: tsa ña nducu yo cuhva nduvaha yo nuu Nyoo tsihin tsa javahá yo, tan tsa jacacú Nyoo tsi yo tsihin tsa tsinú iñi yo tsi ra. ² Tan na ña ndoo yo vaha tsihin tuhun tsa cutuhva yo cuenda tsa tsicoondutya yo, tan tsa tyisó ndaha yo siqui nyivi tsinú iñi tsi Nyoo na nasoco ra tsi ñi, tan tsa cuenda tsa cua nandoto tandihi nyivi tsa yaha cúu

ñi, tan tsa cuenda tucu tsa cua cutuñi tandihi nyivi nuu Nyoo tan yihí ñi cua cuhun cuíi ñi anyaya. Na ña ndoo yo vaha tsihin yacan ñi. ³ Nacuhun ca yo ityi nuu tatun Nyoo tsaha ra ndatu.

⁴ Tyin nyivi tsa tsa yaha naquihín cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyí Ii Nyoo añima ñi. ⁵ Tan tsitó ñi tyin vaha tuhun Nyoo. Tan tsa nyehé ñi juhva nácaa cua cuví tsa cua coo yo nu ñuhu ñayivi tsa, tyin ñihí ñi tunyee iñi tsa iyó tsi Nyoo. ⁶ Tatun tsa naquihín cuenda ñi tandihi yacan, yaha can tan jandihi ñi tsa tsinú iñi ñi tsi Nyoo, ña cua cuví ca ndu uvi iñi ñi inga tsaha. Tyin tumaa tsa tyaa ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyivi. ⁷ Añima nyivi cuví tsi tumaa ñuhu nu jahá tyiñu nyivi, tyin tandihi ñi tsaha tsa cuñi savi, nacohó ñuhu can ndutya savi can. Tatun vaha ñuhu can, vaha tsicoo tsa tatsí nyivi, tan nasocó Nyoo ñuhu can. ⁸ Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmí ra itsi. Tacan cua tahan nyivi tsa jandihi tsa tsinú iñi tsi Nyoo.

⁹ Yañi, vasu ndi maa caahán ndi tacan, maa tyin tsitó vaha ndi tyin nyoocho nasocó Nyoo tsi ndo tyin jacacú ra Cristo tsi ndo. ¹⁰ Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuñi xaan ndo tsi nyivi yihí cuenda ra, tan nyehé tucu ra tyin tsa yaha xaan jatinyee ndo tsi ñi, tan ndi jatinyee ca ndo tsi ñi vityin. ¹¹ Cuñi ndi tsa jañihi ca ndo ndu iin iñi ndo nda cuanda quitsi Jutu Mañi yo, tyin tacan tan ñihí ndo tandihi tsa ndatú ndo. ¹² Ña cuñi ndi tsa jutsan xaan jaha ndo tsi ndo, maa tyin cuñi ndi tsa coo ndo tumaa iyó nyivi tsa tsinú vaha iñi tsi Nyoo tan javaha ndo tumaa javahá ñi. Tyin ñi ican cunyeé xaan iñi ñi ndatú ñi, tan ñihí ñi tsa catyi Nyoo tyin cuhva ra tsi yo.

¹³ Tyin quivi tyihí Nyoo cuhva tyin cuhva ra tsa cua cuhva ra tsi ra Abraham, tsatyíñu ra juvin ñi sivi maa ra, tyin ña cuví cuatyíñu ra náa inga ca sivi tyin nduve nyivi cahnu ca cuví tan ñavin ca maa ra. ¹⁴ Tan catyi ra tsihin ra Abraham tyehen: “Tsa nditsa tyin cua nasoco xaan yu tsi un tan cuaha xaan tata un cua cuví jaha yu”, catyi ra tsihin ra. ¹⁵ Ra Abraham ñihí ra tsa catyi Nyoo tsihin ra tyin cuhva ra tsi ra tsa cuenda tsa tsinú iñi ra tan cunyeé iñi ra ndatú ra can. ¹⁶ Iin nyivi tun tyihí ñi cuhva tsa cuhva ñi tsa cua cuhva ñi tsi yo, tsatyíñu ñi sivi iin nyivi cahnu ca cuví tan ñavin ca maa ñi. Tsihin yacan ndoo ñi tuhun tsihin yo. ¹⁷ Nyoo tsatyíñu ra juvin ñi sivi maa ra quivi catyi ra tyin cuhva ra tsa cuhva ra tsi nyivi ra. Javahá ra tacan tyin cuñi ra tsa coto ñi tyin cua jandaa ra

tsa cahān ra tsihin ñi tan ña cua nasamá tuhun cahān ra. ¹⁸ Tan iyó uvi taahan tsa ña cuvi nasama. Iin tsi cuvi tsa cuhva Nyoo tsa catyí ra tyin cuhva ra tsi yo, tan inga tsi cuvi tsa tsatyíñu ra juvin ñi sivi maa ra. Nyoo ña vatya ra. Yacan cuenda tandihí yoo tsa nyanaá tsi ra, ñi cuñi yo nyitá iñi yo tsi ra, tan ndatú yo tsa ñihí yo tsa catyí ra tyin cuhva ra tsi yo. ¹⁹ Tumaa iin yutun ndoo tsa tsicá nuu ndutya ñuhu nuuhñi tsi tsihin iin caa vee coto cuhun tsi tsihin tatyí, tacan nyitá iñi yo tsa jacacú ra Cristo tsi yo. Tan tsa nyitá iñi yo tsi ra, cuvi tsi tumaa tsa nuuhñi yo tsihin Nyoo ra nyaá Nu Ii Xaan inga tsiyo nu natahví sava jahá jahma. ²⁰ Ican quihví ra Jesús tyin tacan tan nuñá ra ityi cuhun yo nu nyaá Nyoo. Tan ña cua cundihi maa tsa cuvi ra Jesús jutu tsahnu cuvi ityi nuu, tumaa cuvi ra Melquisedec.

7

Ra Jesús cuvi ra jutu tumaa cuvi ra Melquisedec

¹ Ra Melquisedec tsa caahán yu tuhun ihya, juvin ra cuvi rey ñuu Salem, tan cuvi tucu ra jutu cuenda Nyoo, ra cahnu ca cuvi tan ñavin ca tandihí tsa iyó. Quivi tsa vatsí nuhu ra Abraham naha ra tsa yahá tsahan ra naha tsicañi tahan ra naha tsihin ra cuvi rey naha ra, tan jahá canaa ra naha, ra Melquisedec jatahan ra tsi ra naha tan nasocó ra tsi ra Abraham. ² Tan cuaha tsa ñihí ra Abraham nu tsahan ra tsicañi tahan ra. Tsitsi tsa utsi utsi nuu tsa ñihí ra, tsahá ra intuhun intuhun can tsi ra Melquisedec. Melquisedec cuñi tsi catyi: “Rey tsa javahá tsa vaha.” Tan juvin ñi cuvi tucu ra rey ñuu Salem, tan Salem cuñi tsi catyi “tsa taxin”. Yacan cuenda cuvi ra: “Rey tsahá tsa taxin.” ³ Ra Melquisedec nduve jutu ra tan sihi ra. Ña caahán tsi tun iyó nyívi ra, tan ndi ña caahán tsi ama cacú ra, tan ama tsihi ra. Yacan cuenda cuvi jandu inducu yo tsi ra tsihin Sehe Nyoo, tyin ña tsindihí maa tsa cuvi ra jutu.

⁴ Nyehé yo ihya vityin tyin cahnu xaan cuvi ra Melquisedec, tyin tsahá ra Abraham juhva tsa ñihí ra nu tsicañi tahan ra tsi ra. ⁵ Tun tsatyin tata ra Abraham cuvi ra Melquisedec, tan cuvi ra jutu, ña iyo cua cuñi yo tsa tsahá ra Abraham juhva tsa ñihí ra tsi ra, tyin tsa yahá cuaha cuiya tan tsahá Nyoo ley tsi nyívi tata ra Abraham. Tan catyi ley can tyin taahán tsi cuhva juhva tsa ñihí ñi tsi ra jutu tsa cuvi tata ra Leví naha ra, vasu ndi maa iin ñi nyívi cuvi ñi tsihin ra naha tyin juvin ñi tata ra Abraham cuvi ra naha. ⁶ Ra Melquisedec, vasu ndi maa ñavin tata ra Leví, tan tata ra Abraham cuvi ra, maa tyin naquihñ cuenda ra juhva tsa ñihí ra Abraham. Tan nasocó ra Melquisedec tsi

ra Abraham, ra tsa catyi Nyoo tsihin tyin cua cuhva ra tsa cuhva ra. ⁷ Tan tsitó catyi yo tyin cahnu ca cuvi ra tsa nasocó, tan ñavin ca ra tsa nasocó ra. ⁸ Nyehé yo tyin cahnu ca cuvi ra Melquisedec tan ñavin ca tandihí ra tsa quihñ cuenda intuhun intuhun tsitsi tsa utsi utsi tsa ñihí nyívi, tyin rayí ñuhu ñayívi ihya ñi cuvi ra naha, tan tuhvá ra naha tsihi. Maa tyin caahán tsi nu tutu Nyoo tan catyi tsi tyin ra Melquisedec nyito ra. ⁹ Ra Leví tsihin sehe ra, tata ra Abraham cuvi ra naha. Juvin ra naha cuvi jutu tsa naquihñ tsa intuhun intuhun tsitsi tsa utsi utsi tsa ñihí nyívi. Cuvi catyi yo tyin tandihí ra can naha ra tyahví ndihí ra naha tsi ra Melquisedec quívi tyahví ra Abraham tsi ra. ¹⁰ Cuvi catyi yo tyin tyahví ndihí tata ra Leví tsi ra Melquisedec quívi ñihí tahan ra tsihin ra Abraham tyin tata ra Abraham tsi ra naha vasu ndi maa ñaha ca coo ra naha quívi can.

¹¹ Ra jutu tata ra Leví tsa cuvi tucu tata ra Aarón, juvin ra naha jacuahá ley tsahnu Nyoo tsi yo. Vaha vityin; tun tsatyin cuvi janduvahá ra jutu can naha ra tsi nyívi nyicún ley can, ña ñihí cuñi tsi quitsi inga jutu, ñavin jutu tumaa ra Aarón maa tyin jutu tumaa ra Melquisedec. ¹² Tyin tun nasamá Nyoo tsi ra cuvi jutu, nasamá tucu ra ley ra. ¹³ Jutu Mañi yo tsa caahán tutu Nyoo tuhun, tata inga ra sehe ra Israel cuvi ra. Tan ndi intuhun tata ra can tan ña cuvi ra naha jutu. ¹⁴ Tsitó vaha yo tyin Jutu Mañi yo tata ra Judá tsi ra, tan ra Moisés ña cahān ra tuhun tata ra Judá quívi cahān ra tuhun ra cuvi jutu naha ra.

¹⁵ Nditza tsa nasamá Nyoo tsi ra jutu tyin jaquitsi ra iin jutu tumaa ra Melquisedec. ¹⁶ Ra jutu ihya ña quitsi ra tumaa catyi ley tsahnu, tyin ley can catyi tsi tyin maa ñi tata ra Leví taahán tsi cuvi jutu, tan ra can ñavin tata ra Leví cuvi ra. Maa tyin iyó tunyee iñi tsi ra tsa coo cuii ra, yacan cuenda juvin ra jaquitsi Nyoo. ¹⁷ Tyin tyehen caahán Nyoo tuhun ra:

Yooho ña cua ndihí maa tsa cuvi un jutu, tyin cuvi un jutu tumaa ra Melquisedec.

¹⁸ Yacan cuenda nacóo Nyoo ley tsahnu can tyin ña cuvi jatinyee tsi tsi nyívi, tan ña cuvi cacu nyívi jahá tsi. ¹⁹ Ley can ña cuvi janduvahá tsi tsi nyívi nu Nyoo. Yacan cuenda tsahá ra inga tsa vaha ca tsi yo. Tan tsa vaha ihya jatinyee tsi tsi yo tsa cuvi natuhún yo tsihin Nyoo. Yacan cuenda nyitá iñi yo tuhun can, tan tuhun can cuvi ra Cristo.

²⁰ Nyoo cahān catsi ra tyin tacan cua cuvi, tan tacan cuvi. ²¹ Tandihí ca maa ra jutu tsa iyó vityin naha ra nduve náa cahān Nyoo tuhun ra naha. Maa tyin quívi tsahá Nyoo tsi ra Cristo tsa cuvi ra jutu, cahān catsi ra tsihin ra tumaa caahán nu tutu ra tyehen:

Cahan catsi Jutu Mañi yo, tan ña nasama ra tsa cahan ra nu catyi ra tyehen:

“Yooho ña cua ndihi maa tsa cuvi un jutu, tyin cuvi un jutu tumaa ra Melquisedec”, catyi Nyoo.

²² Tsa cuenda tsa javahā ra Cristo, tan tsitó yo tyin vaha ca tyiñu ndoo Nyoo tsihin yo tan ñavin ca tsa jihna ñi can. ²³ Jutu tsa cuvi tata ra Levi cuaha xaan ra naha tsa cuenda tyin tun tsiihi iin ra, nacosó inga ra. ²⁴ Maa tyin ra Jesús nduve tuhun tsiihi iyó tsi ra, yacan cuenda ña tsindihí tsa cuvi ra jutu. ²⁵ Tan tsa cuenda yacan cuvi jacacu ra tsi nyivi tsa nanducú tsi Nyoo. Tan tsahá ra tsa coo cuii ñi tsihin Nyoo tyin tacan ñi iyó maa ra tan tsicán tahvi ra tsi Nyoo tsa cuenda ñi.

²⁶ Ra Jesús cuvi jutu tsaahnu cuvi ityi nuu tsa tsiiñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan quita tsiyo ra nu iyó nyivi iyó cuatyí tan nandaā ra ityi siqui andivi. ²⁷ Ra Jesús ñavin tumaa inga ra jutu tsaahnu can naha ra cuvi ra, tyin ra ican naha ra cuñi tsi cahñi ra naha quiti tan jamañi ra naha nuu Nyoo tandihí ñi quivi. Jihna ca jamañi ra naha quiti tsa cuenda cuatyí maa ra naha, yaha tan jamañi ra naha tsa cuenda cuatyí tandihí nyivi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandihí yo. ²⁸ Ley Nyoo tsa naquihñ cuenda ra Moisés, tsahá tsi ndatu tsa cuvi ra naha jutu tsaahnu vasu ndi maa iyó cuatyí ra naha. Maa tyin tsa yaha quitsi ley can, cahan catsi Nyoo tan ndoo ra iin tuhun tsaa tsihin yo. Tan tsahā ra tsi Sehe ra tsa cuvi ra jutu tsaahnu cuvi ityi nuu ca. juvin ra cuvi ra vaha tan ña cua cundihí maa tsa vaha ra.

8

Quivi tsihi ra Jesús tsa cuenda yo tan ndoo Nyoo tuhun tsaa tsihin yo

¹ Yacan tuhun ihya cuvi tsa ñiñi ca caahán yu: Ra jutu tsaahnu tsa iyó tsi yo ndi in-tuhun cuatyí ra nduve iyó, tan juvin ra tsinyaa nu tyayu tsa nyaá xiin cuaha Nyoo nda gloria. ² Tan ra jutu ihya jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javahā tan ñavin vehe ñuhu tsa javahā nyivi. Tyin vehe ñuhu tsa javahā nyivi cuvi tsi tixahñu tsa vaha tsa iyó nda gloria. ³ Tandihí ra jutu naha ra, cuñi tsi cahñi ra naha quiti tan jamañi ra naha nu Nyoo tyin jaha Nyoo tucahnu iñi tsi ra naha tan tsi nyivi. Yacan cuenda cuñi tsi jamañi ra Jesucristo tsa jamañi ra nuu Nyoo. ⁴ Tun tsatyn nyii ra nu ñuhu ñayivi ihya, ndi ña cuvi cuvi ra jutu. Tyin nu ñuhu ñayivi ihya, iyó ra jutu tsa jamañi nuu Nyoo tsa catyi ley tsa tyaa ra Moisés tyin jamañi ra naha. ⁵ Ra jutu tsa iyó nu

ñuhu ñayivi ihya naha ra, jahá tyiñu ra naha tsitsi vehe ñuhu tsa cuvi tixahñu tsa iyó nda gloria. Tan tsitó yo tyin tixahñu ñi cuvi tsi, tyin tahañ tsanaha quivi tsa cua javaha ra Moisés vehe ñuhu jahma, catyi Nyoo tsihin ra tyehen: “Jaha cuenda vaha, tan javaha tandihí tumaa janahā yu tsi un quivi tsahan un yucu Sinai”, catyi Nyoo tsihin ra. ⁶ Maa tyin ra Cristo ra cuvi jutu tsaahnu cuvi ityi nuu tsa cuenda yo, vaha ca tyiñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoo Nyoo tuhun vaha xaan ca tsihin yo, tan vaha ca tsa tsahá ra tsi yo.

⁷ Tun tsatyn cuvi cacu yo jahá tuhun tsa ndoo jihna Nyoo tsihin yo, ña cuñi tsi tsa ndoo ra inga tuhun tsaa tsihin yo. ⁸ Maa tyin Nyoo nyehē ra tyin ña vaha javahá nyivi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyi ra tyehen:

Cua tsaa quivi
cua ndoo yu tuhun tsaa tsihin nyivi Israel
tan nyivi Judá.

⁹ Maa tyin ñavin tumaa tuhun tsa ndoo yu tsihin tsii tsaahnu ñi, quivi tñ yu ndaha ñi tan tava yu tsi ñi ñuhu Egipto.

Ña javahā ñi tuhun ndoo yu tsihin ñi, yacan nacoó ihñi yu tsi ñi, catyi Nyoo Jutu yo.

¹⁰ Tuhun tsaa tsa cua ndoo yu tsihin nyivi Israel nu cuahán ca tsi ityi nuu, cuvi tsehe, catyi Nyoo Jutu yo:

Cua tyihi yu ley yu tsitsi tsa tsiiñi tuñi jiñi ñi, tan cua tyaa tucu yu itsi añima ñi. Tacan tan cua cuvi yu Nyoo ñi, tan maa ñi cua cuvi nyivi yu.

¹¹ Tacan tan ña ñiñi ca tsa jacuahá ñi tsi inga ñi, na nacoto ñi tsi yuhu tsa cuvi yu Nyoo ñi.

Tyin tandihí ñi tan cua nacoto ñi tsi yu, ñi nyihi tan nda cuenda ñi tsahnu.

¹² Cua jaha yu tucahnu iñi tsi ñi vasu ndi maa cuaha tsa caquiñi javahá ñi.

Tan ña cua nducuhun ca maa iñi yu cuatyí ñi, catyi Nyoo Jutu yo.

¹³ Quivi tsa cahan Nyoo tyin cua ndoo ra tuhun tsaa tsihin yo, tsa jandutsahnu ra tuhun tsa jihna ñi can. Tan tuhun tsa ndut-sahnú tsa cua cundihí tsi.

9

Nu janahá tsi nácaa iyó vehe ñuhu tsa iyó nu ñuhu ñayivi tan vehe ñuhu nu cuvi nda gloria

¹ Quivi ndoo Nyoo tuhun tsa jihna ñi tsihin nyivi, tsahā ra cuhva nácaa jacahnu ñi tsi ra, tsitsi vehe ñuhu tsa tsicoo nu ñuhu ñayivi ihya tahañ tsanaha. ² Tyehen tsicoo vehe ñuhu can: Tsitsi vehe tsa jihna ñi nyaa

candileru, tan nyaá mesa nu yucu paan ii. Tan yacan tsinañi Vehe li. ³ Tan vehe tsa tsinu uvi tsinañi Vehe li Xaan. ⁴ Tsitsi vehe can tsinyaá altar xuhun cuaan nu tsahmí ra jutu cutu. Tan tsinyij tucu tsatun cuenda tsa ndoo Nyoo tuhun tsihin yo, tsa ndasi tsihin xuhun cuaan. Tsitsi tsatun can tsinyij yatsin xuhun cuaan nu yihí maná. Tan tsinyij yutun tsa tsindahá ra Aarón tsa quita ita nuu. Tan tsiyucu tucu yuu nu nyaá tsa utsi ley Nyoo. ⁵ Tan siqui tsatun can tsinyaá tsa caá tumaa caá ángel, tan cuñi tsi catyi tyin nyaá Nyoo ican. Ndisin ángel can tyasi nu tuhvá Nyoo jahá tucahnu iñi tsi nyivi. Tsa vityin ña cuví nacatyí tuhun ca ndi siqui tuhun ihya.

⁶ Tacan tsicoq vehe ñuhu can. Tandihí ñi quivi quihví ra jutu naha ra tsitsi Vehe li, tan jacahnú ra naha tsi Nyoo. ⁷ Maa tyin Vehe nu li Xaan, intuhun ñi maa ra jutu tsaahnu cuví ityi nuu cuví quihví ican, tan iin tsaha ñi taahán tsi quihví ra tsa iin cuiya. Tsa cua quihví ra, cuñi tsi cundaha ra niñi quiti tyin jamañi ra itsi tsi Nyoo tsa cuenda cuatyí maa ra tan cuenda cuatyí nyivi, ñi tsa javahá soho ñi maa cuatyí. ⁸ Tan tsa tacan tsicoq yacan Tatyí li Nyoo janahá ra tsi yo tyin tsitsi tsa ndi jacahnú ra jutu naha ra tsi Nyoo tsitsi Vehe li cuñi tsi catyi tyin ñaha ca nuña ityi quihví ndáa nyivi tahan ñi maa tsi tsitsi Vehe nu li Xaan. ⁹ Tandihí yacan cuví can tumaa tixahñu tuhun tsaá tsa ndoo Nyoo tsihin yo vityin. Tahan tsanaha jamañi nyivi tsa jamañi ñi nu Nyoo maa tyin ña jatyinyee can tsi nyivi tsa jacahnú tsi Nyoo tsihin can, tsa caca vaha iñi ñi. ¹⁰ Tyin tandihí tsa javahá nyivi can caahán tsi maa ñi tsa cuenda tsa tsahá Nyoo ndatu catsi ñi, tan coho ñi, tan nácaa nduvaha cuñu ñuhu ñi nuu ra. Tsahá ra tsa javahá ñi tacan tsa nuni ñi, nda tahan maa tsi quivi cuhva ra tsa vaha ca.

¹¹ Vityin tsa yahá quitsj ra Cristo tsa cuví jutu tsaahnu cuví ityi nuu tsa cuenda tuhun vaha ca tsa ndoo Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa javahá nyivi. Yacan cuñi tsi catyi tyin ñavin vehe ñuhu iyó nu ñuhu ñayivi ihya cuví nu quihví ra. ¹² Ra Cristo quihví ra tsitsi Vehe li Xaan. Maa tyin ña quihví ra tsihin tsa jamañi ra niñi mbee lee, o niñi indiqui lee. Quihví ra tsihin niñi maa ra, tan iin tsaha ñi quihví ra tan ña cuñi ca tsi tsa cuenda quihví ñi ra tyin jamañi ra niñi maa ra. Tsihin yacan jacacú cuñi ra tsi yo. ¹³ Ra jutu naha ra tuhvá ra naha quiti niñi toro, niñi mbee, tan nyaá nu cayú indiqui lee tsi nyivi. Tsihin yacan nduvahá ñi nuu Nyoo, maa tyin maa ñi cuñu ñuhu ñi nduvaha, tan ña nduvahá añima ñi. ¹⁴ Tun tacan jatyinyee niñi quiti can tsi nyivi, cuñi tsi catyi tyin jamañi ra Cristo cahnú ca

tunyee iñi iyó itsi! Tyin nduve cuatyí ra tsicoq tan jamañi ra juvin ñi tsi maa ra nuu Nyoo jahá Tatyí li tsa ña cua cúu maa. Tan niñi ra quihín nyaá tsa ña vaha tsa iyó añima yo tyin tacan tan ña cuita ca iñi yo ley tsa tsahá tuhun tsihi tsi yo, tan cuví jaha tyiñu yo tyiñu Nyoo nyito.

¹⁵ Yacan cuenda ra Jesucristo cuví ra caahán ndaahvi tsaha yo tsa cuenda tuhun tsaá tsa ndoo Nyoo tsihin yo. Tan tsa cuenda tsa tsihi ra, jahá Nyoo tucahnu iñi tsi yo tsa cuenda cuatyí tsa javahá yo quivi yihí ndaha tuhun jihna ñi can tsi yo. Tyin tacan tan yoo, tsa caná Nyoo cuví naquihin cuenda yo ñayivi tsa ña cua naa maa coo yo, tsa catyi ra tyin cuhva ra tsi yo. ¹⁶ Tun iin nyivi tsihi tan nacoq ñi iin tutu nu tsahá cuenda ñi yóo nyivi cua naquihin tsa iyó tsi ñi, nyivi tsa cua naquihin ndaha tyiñu can cuví naquihin ñi can, maa tyin cuñi tsi janaha ñi iin tutu cuví tsandaa tyin nditsa tsa tsa tsihi ra tsa javahá tutu can. ¹⁷ Maa tyin tun ndi nyito ra jatsii ndaha tyiñu can, ña cuví naha naquihin ñi ndaha tyiñu ra. ¹⁸ Yacan cuenda quivi ndoo Nyoo tuhun tsahnu can tsihin nyivi Israel, tsahñi ra jutu naha ra quiti tan tsati niñi ti naha ti. ¹⁹ Tsa ndihí tsahá cuenda ra Moisés ley Nyoo tsi tandihí nyivi, tan quihin ra jahma cuaaha tsa tsinu tsihin ixi mbee ticatyí tan iin soco yutun luhlu tsa nañi hisopo, jatyi ra can tsitsi nu yihí niñi indiqui lee tan niñi mbee luhlu tsa sacá nuu tsihin ndutya. Tacan tan quiti ra niñi can nu libru nu nyaá ley Nyoo tan quiti ndihí tucu ra can tsi nyivi. ²⁰ Tacan tan catyi ra tsihin ñi tyehen: “Niñi ihya cuví tsandaa tsa cuenda tsa ndoo Nyoo tuhun tsihin yo”, catyi ra. ²¹ Tan juvin ñi quiti tucu ra Moisés niñi can vehe ñuhu jahma can tan tandihí ndaha tyiñu tsa tsatyíñu ra jutu naha ra tsa jacahnú ra naha tsi Nyoo. ²² Tacan javahá ra naha tyin catyi ley Nyoo tyin tsa yatyin tandihí tsa iyó tan cuñi tsi nduvaha can nuu Nyoo tsihin niñi. Juvin ñi catyi tucu tsi tyin tun ña cati niñi ña cua jaha Nyoo tucahnu iñi tsi nyivi.

Niñi ra Cristo nacatyá cuatyí yo

²³ Javahá ra jutu naha ra tacan tyin cuñi tsi tsa nduvaha tandihí ndaha tyiñu tsa cuví tixahñu tsa iyó nda gloria tsihin niñi quiti. Maa tyin tandihí tsa iyó nda gloria, cuñi tsi nduvaha can tsihin niñi vaha ca, ñavin tsihin niñi quiti ñi. ²⁴ Ra Cristo ña quihví ra tsitsi vehe ñuhu tsa javahá nyivi tsa cuví tixahñu vehe ñuhu tsa nditsa. Tyin quihví ra tsitsi vehe ñuhu tsa nditsa tsa cuví gloria. Tan vityin nyaá ra caahán ndaahvi ra tsihin Nyoo tsa cuenda yo. ²⁵ Ra jutu tsaahnu cuví ityi nuu cuenda nyivi Israel quihví ra naha tsitsi Vehe li Xaan iin tsaha ñi tsa iin iin cuiya tyin jamañi ra naha niñi tsa ñavin niñi maa ra

naha cuví. Maa tyin ra Cristo, ña cuñí tsi tsa jamañi ra tsi ra tañi tañi ñi nuu Nyoo. ²⁶ Tun tsatyin tacan, cuñí tsi tsa cuenda quitsi ñi ra nyehe ra tundoho tan cúu ra nda tsa tsinu ñuhu ñayivi tan nda cuenda vityin. Maa tyin vityin tsa tsa cuyatyn cundihi ñuhu ñayivi ihyá, iin tsaha ñi quitsi ra Cristo, tan jamañi ra tsi ra tyin tacan tan cuví quihin nyaa ra cuatyí yo. ²⁷ Tumaa cua tahan yo: iin tsaha ñi cua cúu yo. Yaha can tan cua cutuñi yo. ²⁸ Tacan iin tsaha ñi tsihi ra Cristo, tan quihin nyaa ra cuatyí cuaha xaan nyívi. Yaha can tan cua quitsi ra tsinu uvi tsaha, ñavin ca tsa quitsi jamañi ra tsi ra tsa cuenda cuatyí, tyin cua quitsi ra quitsi jacacu ra tsi nyívi ndatú tsi ra.

10

¹ Ley Nyoo tsa tyaa ra Moisés cuví tsi tumaa iin tixahñu tsa vaha ca tsa cua quitsi. Tsa catyí ley can, ña cuví janduvaha tsi tsi nyívi nanducú tsi Nyoo tyin maa ñi maa ñiñi quiti jamañi ra jutu tsaahnu cuví ityi nuu naha ra tan iin tan iin cuiya. Tan ña cuví cacu yo tsihin yacan. ² Tun tsatyin cuví janduvaha ley can tsi nyívi, can cundihi tsa jamañi ra jutu naha ra ñiñi quiti tandihi ñi cuiya. Tyin tun tsa nduvahá nyívi tsa tsahá quiti can iin tsaha tsa cuenda tandihi maa, ña cua caca ca iñi ñi tun iyó cuatyí ñi tan ña cuñí ca tsi tsa jamañi ra jutu ñiñi quiti tsa cuenda ñi inga tsaha. ³ Maa tyin tsa jamañi ra jutu naha ra ñiñi quiti tan iin tan iin cuiya, janducuhñi iñi tsi tsi nyívi tyin iyó cuatyí ñi. ⁴ Tyin ñiñi indiqui tan ñiñi mbee lee, ña cuví nacatya can cuatyí nyívi.

⁵ Yacan cuenda catyí tutu Nyoo tyin ra Cristo cahan ra tyehen tsihin Nyoo: Ña cuñí un tsa jamañi nyívi quiti nuu un, yacan cuenda tsahá un tsa coo cuñu ñuhu yu.

⁶ Tyin ña taahán iñi un tsa cahmi ñi quiti tan jamañi ñi nuu cun tan quihin nyaa un cuatyí ñi.

⁷ Tacan tan catyí yu: “Nyoo Jutu yu, va yu ihyá, vatsí yu vatsí javahá yu cuhva cuñí maa un

tumaa nyaá tuhun yu nu libro ley maa un”, catyí ra Jesucristo.

⁸ Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyívi quiti nuu ra. Ndi tsa cahmi ñi quiti tan quihin nyaa ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñí tsi jamañi nyívi quiti nuu ra, catyí ra.

⁹ Yahá can tan catyí tucu ra: “Nyoo Jutu yu, va yu ihyá, vatsí yu vatsí javaha yu cuhva cuñí maa un.” Tuhun ihyá cuñí tsi catyí tyin quitsi ra jatsiyo cuii ra tsa jamañi nyívi tan jamañi ra tsa vaha ca. ¹⁰ Tsa cuenda tsa javahá ra Jesucristo cuhva cuñí jutu ra tan janduvahá jutu ra tsi yo. Tsa javahá ra cuví

tsa jamañi ra juvin ñi tsi maa ra. Javahá ra tacan iin tsaha ñi tsa cuenda cuatyí nyívi.

¹¹ Tandihí ñi quívi tan jamañi ra jutu cuenda nyívi Israel naha ra quiti nuu Nyoo, tan cuaha xaan tsaha jamañi ra naha iin ñi maa nuu quiti maa tyin ña cuví quihin nyaa can cuatyí nyívi. ¹² Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí yo. Tacan tan tsinyaa ra nu tyayu nyaá xiin cuaha Nyoo. ¹³ Tan ndatú ra nda cuenda caquin Nyoo tsi nu xaan iñi tsi ra nahnu tsaha ra tyin cuañi ra síqui nahnu. ¹⁴ Tyin tsihin tsa jamañi ra tsi ra iin tsaha ñi tan janduvahá ra tsi nyívi yihí cuenda ra yoso cuahán quívi. ¹⁵ Tatyí Ii Nyoo juvin ñi janahá tucu ra yacan tsi yo. Tsa jihna ñi catyí ra tsihin yo tyehen:

¹⁶ Tuhun tsaa tsa cua ndoo yu tsihin nyívi quívi can, tyehen cua cuví tsi, catyí Jutu Mañi yo:

Cua tyihi yu ley yu tsitsi añima ñi, tan cua tyaa yu itsi tsitsi tsa tsíñi tuñi iñi ñi, catyí ra.

¹⁷ Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquiñi javahá ñi, catyí Jutu Mañi yo.

¹⁸ Yacan cuñí tsi catyí tyin tsa yahá jaha Nyoo tucahnu iñi tsi yo. Yacan cuenda ña cuñí ca tsi cahñi yo quiti, tan jamañi yo nuu Nyoo tsa cuenda cuatyí yo.

Cuñí tsi nanducu yo tsi Nyoo

¹⁹ Yacan cuenda yañi, vityin cuví quihvi yo tsitsi Vehe Ii Xaan nu nyaá Nyoo, tsa cuenda ñiñi ra Jesucristo tsa tsatí. Tsihin ñiñi can nacatya ra cuatyí yo. ²⁰ Tan nuñá ra ityi tsa, tan iin ityi cuhun yo nu coo nyito yo. Tyin cuhva tsa tsihi ra tan ndatá jahma tsa tyasi tsa ña cuví quihvi yo nu nyaá Nyoo. Tsa ndatá jahma can, cuví tsa tsihi ra Cristo, tyin tacan tan cuví cuhun yo nu nyaá Nyoo. ²¹ Ra Jesús cuví jutu tsaahnu cuví ityi nuu tsa ndacá ñaha tsi nyívi yihí cuenda Nyoo. ²² Yacan cuenda cuñi tsi nanducu yo tsi Nyoo tsihin tsa nditsa tan tsihin tsa ñi iñi añima yo tsinú iñi yo tsi ra. Tyin maa ra janduvahá añima yo, yacan cuenda tsitó yo tyin nduve ca cuenda yo nyaá tsi ra tsa cuenda cuatyí yo, tan tumaa tsa nacatya ra cuñu ñuhu yo tsihin ndutya cuii, tan nduvahá yo nuu Nyoo. ²³ Na ndu iin ca iñi yo tsinú iñi yo tsi Nyoo tan na ña ndu uvi iñi yo, tyin Nyoo cua cuhva ra tsa catyí ra tyin cuhva ra tsi yo. ²⁴ Tan cuñi tsi nanducu yo cuhva jatinyee tahan yo tsi yo, na cuñi tahan ca yo tsi yo tan javaha yo tsa vaha. ²⁵ Na taahán tsi jandihi ndo tsa tsicá ndo tuhun Nyoo tumaa javahá inga nyívi tsa ña tsicá vaha. Tyin cuñi tsi jandu iin tahan yo iñi yo. Vityin tsa tsa nyehé yo tyin tsa cuyatyn quitsi nyico Jutu

Mañi yo tan cua jacutuñi ra tandiñi nyivi, cuñi tsi tsa jatinyee tahan ca yo tsi yo.

²⁶ Tyin tun tsa tsitó yo tsa nditsa tan javaha ca maa yo tsa ña vaha, nduve ca nácaa javaha yo tan cuvi jaha Nyoo tucahnu iñi tsi yo. ²⁷ Cua tatsi tuñi Nyoo tsi yo. Tan cua tyiñi ra tsi yo nu yucú nyivi xaan iñi tsi ra. Tan ican cua cayu yo iin caa ñi tsihin ñi. ²⁸ Tatum iin nyivi tsa nyitá iñi ley Nyoo tsa tyaa ra Moisés tan ña tyaa yahvi ñi tsa catyi ley can, tan tatum iyó uvi o uñi ra cuvi tsandaa tsa cuenda tsa javahá ñi, cua cúu ñi tsa cuenda cuatyí ñi, tan yofi maa cua cundaahvi iñi tsi ñi. ²⁹ Tan yaha ca cua tatsi tuñi Nyoo tsi nyivi caahán ndavaha ñi siqui Tatyí li ra tsa tsahá tsa vaha ra tsi yo, tan jandiñi ñi tsa tsinú iñi ñi tsi Sehe ra tan jahá ñi tyin nduve yahvi nyaá niñi Sehe ra tsa janduvahá añima ñi. Tan tsihin niñi can ndoo Nyoo tuhun tsihin yo. ³⁰ Tsitó yo tyin catyi Jutu Mañi yo tyehen: “Maa yu taahán tsa tatsi tuñi tsi nyivi; tan juvin yu cua cahan náa taahán tsi tahan ñi.” Juvin ñi catyi tucu ra tyin maa ra taahán tsi jacutuñi tsi nyivi ra. ³¹ ¡Cahnu xaan tundoho cua nyehe nyivi yosó ica tsi Nyoo nyito tsa cuenda cuatyí ñi!

³² Maa tyin nyooho nducuhun iñi ndo nácaa cunyeé xaan iñi ndo nyehe ndo tundoho tsa yahá naquihín cuenda ndo tsa nditsin Nyoo tsitsi añima ndo. ³³ Yihí nyooho cahan nyivi tsi ndo, tan janyehé ñi tundoho tsi ndo nu tuvi nyivi. Tan yihí ndo cundaahvi iñi ndo nyehe ndo tsi nyivi vaha iñi tsi ndo tsa tahan juvin ñi tacan. ³⁴ Tan cundaahvi iñi ndo nyehe ndo tsi nyivi tsiyucú vehe caa. Cunyeé iñi ndo nyehe ndo tundoho tsihin tsa si cuñi ndo quívi quihín nyaá nyivi ndaha tyiñu ndo, tyin tsitó ndo tyin gloria iyó tsa vaha ca tsa cuenda ndo, tan yacan ña cua cundiñi maa can. ³⁵ Yacan cuenda ña jandiñi ndo tsa nyitá iñi ndo tsi ra Cristo, tyin nu cuahán ca tsi tan cua ñiñi ndo tsa vaha ca tyin tsinú iñi ndo tsi ra. ³⁶ Cuñi tsi coo tsa taxin añima ndo tsitsi tsa cunyeé iñi ndo tyin tacan tan cuvi javaha ndo cuhva cuñi Nyoo, tan naquihín ndo tsa catyi ra tyin cuhva ra tsi yo. ³⁷ Tyin nu tutu Nyoo catyi tsi tyehen:

Ña naha ca

tan quitsi ra tsa nyaá quitsi, tan ña cua cucuee ca ra.

³⁸ Tan catyi Jutu Mañi yo tyehen: “Nyivi naquihín cuenda yu tumaa tsatyin vaha ñi, tsihin tsa tsinú iñi ñi tsi yu tan cua coo nyito ñi.

Maa tyin tatum jandiñi ñi tsa tsinú iñi ñi, ña si cua cuñi yu tsihin ñi”, catyi Nyoo.

³⁹ Maa tyin yoo ña javahá yo tumaa javahá nyivi jandiñi tsa tsinú iñi tsi Nyoo, tyin yoo tacan ñi maa tsinú iñi yo tsi ra tan tsa cuenda tsa tsinú iñi yo cua cacu añima yo.

11

Cuhva cuñi tsi tsa tsinu iñi yo tsi Nyoo

¹ Tsa tsinú iñi yo tsi Nyoo cuvi tsa tsitó vaha yo tyin cua ñiñi yo tsa ndatú yo; tan tsitó vaha yo tyin cua ñiñi yo iin tsa nditsa tsa ñaha ca nyehe yo, tyin tsinú iñi yo tsi Nyoo. ² Juhva nyivi yo tsa tsicoq tahan tsanaha quita vaha ñi nuu Nyoo tyin tsinú iñi ñi tsi ra.

³ Tsa cuenda tsa tsinú iñi yo tsi Nyoo, tan tsitó yo tyin javahá ra ñuhu ñayivi tsihin tuhun caahán ra. Tan tsitó yo tyin tahan tsanaha tsinú tandiñi tsa nyehe yo vityin tsihin tsa ña nyehe yo.

⁴ Tsa cuenda tsa tsinú iñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Caín, yafi ra. Tsa cuenda yacan naquihín cuenda Nyoo tsi ra tumaa tsatyin vaha ra, tan naquihín cuenda tucu ra tsa jamañi ra. Vasu ndi maa ña nyito ca ra Abel, maa tyin tsinú yo nácaa tsinú iñi ra.

⁵ Tsa cuenda tsa tsinú xaan iñi ra Enoc tsi Nyoo, tan naquihín Nyoo tsi ra tyin tacan tan ña nyehe ra tuhun tsihi. Tan ña nañihí ca nyivi tsi ra, tyin cuanuhú ra tsihin Nyoo. Catyi tsi nu tutu Nyoo tyin tsa ndi cumañi ca naquihín Nyoo tsi ra, maa ñi maa cuhva taahán iñi Nyoo javahá ra. ⁶ Maa tyin ña cuvi javaha yo tsa taahán iñi Nyoo tatum ña tsinú iñi yo tsi ra. Tyin tatum cuñi yo nanducu yo tsi ra, cuñi tsi tsinu jihna iñi yo tyin iyó ra, tan tsahá ra tsa vaha tsi nyivi nanducú tsi ra.

⁷ Tahan tsanaha jacotó Nyoo tsi ra Noé náa cua cuvi ityi nuu. Vasu ndi maa ñaha ca coo can nyehe ra Noé, tsinú iñi ra tan javahá ra yutun ndoo tan ican cacú ra tsihin nyivi vehe ra. Nyivi tsa ña tyaa yahvi tsa cahan Nyoo, tatsi tuñi ra tsi ñi. Maa tyin jacacú ra tsi ra Noé tan nduvahá ra nuu ra tsa cuenda tsa tsinú iñi ra tsi ra.

⁸ Ra Abraham tsinú iñi ra tan tyaa yahvi ra tsi Nyoo quívi cana Nyoo tsi ra. Quita ra nu ñuhu ra tan cuahán ra nu ñuhu tsa cua cuhva cuii Nyoo tsi ra. Vasu ndi maa ña tsitó ra nu maa cuahán ra, maa tyin quita ra nu ñuhu ra tan cuahán ra. ⁹ Tsa cuenda tsa tsinú iñi ra Abraham tsi Nyoo, tsicoq ra nu ñuhu tsa ñaha ca nacuhva cuenda Nyoo tsi ra. Tsicoq ra tsitsi vehe jahma ñi. Juvin ñi tacan tsicoq tucu ra Isaac, sehe ra, tan ra Jacob, sehe ra Isaac. Tyin juvin ñi catyi tucu Nyoo tsihin nduvi taahan ra can naha ra tyin cua cuhva ra ñuhu can tsi ra naha.

¹⁰ Ra Abraham ndatú ra coo ra iin ñuu tsa ña cua naa maa; iin ñuu tsa vaha ca tsa cua cuhva Nyoo tsi ra. Tan ñuu tsa ndatú ra maa Nyoo tsaquin cuhva tsaha tsi tan sama itsi.

¹¹ Tan juvin ñi tsa cuenda tsa tsinú iñi ña Sara tsa cahan Nyoo tsihin ña, tsicoq iin sehe ña. Vasu ndi maa tsa tsahnu xaan ña, cuvi tsicoq sehe ña tyin maa Nyoo tsahá

tunye'e iñi ra tsi ña. Tacan cuvɪ tyin tsinu iñi ña tyin cua cundaa tsa cahan Nyoo tsihin ña. ¹² Yacan cuenda vasu ndi maa tsa cuñi cūu cuii ña ra Abraham, maa tyin tsicoo sehe ñasiihi ra. Yahā can tan tsicoo cuaha nyivi tata ra. Tan yohi maa cuvɪ nacahvi tsi ñi tyin cuaha xaan ñi, tumaa cuaha tiñuu iyó andivi tan tumaa cuaha nyiti iyó yuhu ndutya ñuhu.

¹³ Tandihɪ nyivi can tan nyivi tata ñi tsihi ñi tsa ndi cumañi ca naquihɪn cuenda ñi tsa catyi Nyoo tsihin ñi tyin cuhva ra tsi ñi. Vasu ndi maa ña ñihɪ ñi can, tsinu iñi ñi tyin cua cuha Nyoo can. Yacan cuenda sɪi cuñi ñi tyin tsitó ñi tyin coo quivi cua nyehe ñi can. Tan sɪi tucu cuñi ñi caahán ñi tyin yahá ñi maa ñi nu ñuhu ñayivi ihya. ¹⁴ Tan tsa caahán ñi tacan, cuñi tsi catyi tyin ndi tsicá ñi nanducú ñi iin nu vaha ca coo ñi. ¹⁵ Tun tsatyin ñuhú iñi ñi ñuu ñi nu quita ñi, cuvɪ cunuhu nyico ñi iin yaha ñi. ¹⁶ Maa tyin ña tsinuhú ñi ñuu ñi tyin cuñi ñi coo ñi ñuu vaha ca, tuhun ihya cuñi tsi catyi tyin cuñi ñi coo ñi nda andivi. Tan tsa tacan nducú ñi coo ñi nda gloria, ña cahán nuu Nyoo tsa cuvɪ ra Nyoo ñi tyin tsa janduvahā ra iin ñuu nu coo ñi.

¹⁷ Tsa cuenda tsa tsinu iñi ra Abraham tsi Nyoo, tyaa yahvi ra tsa cahan Nyoo tsihin ra tan jamañi ra tsi ra Isaac, sehe mañi ra, quivi nducú cuhva Nyoo tsi ra tun nditsa tsa tsinu iñi ra tsi ra. Javahā ra tacan vasu ndi maa catyi Nyoo tyehen tsihin ra: ¹⁸ "Tsa cuenda ra Isaac tan cua coo nyivi tata un." ¹⁹ Vasu ndi maa cahan ra tacan tsihin ra Abraham, ra Abraham ña nayuhvi ra tsa cuhva cuenda ra sehe ra tsi Nyoo, tyin tsitó ra tyin iyó tunyee iñi tsi Nyoo tsa janandoto ra ndiyi. Quivi can tsa nyaá ra Abraham tsa cañi ra tsi ra Isaac, sehe ra. Maa tyin Nyoo nacuhva cuenda nyico ra tsi ra Isaac tsi ra. Tan cuvɪ can tumaa tsa janandoto Nyoo tsi ra.

²⁰ Juvín ñi tsa cuenda tsa tsinu tucu iñi ra Isaac tsi Nyoo, tan catyi ra tyin ra Jacob tan ra Esaú, sehe ra, cua ñihɪ ra naha tsa vaha nu cuahán ca tsi. ²¹ Tsa cuenda tsa tsinu iñi ra Jacob tsi Nyoo, tan catyi ra tyin nduvi taahan sehe ra José cua ñihɪ ra naha tsa vaha jaha Nyoo. Tan nyaá naa ñi ra yutun tsa tsindahā ra tan jacahnú ra tsi Nyoo tyin tsa tsahnu xaan ra. ²² Juvín ñi tsa cuenda tsa tsinu iñi ra José tsi Nyoo, catyi ra tsa tsa cuñi cūu ra tyin cua quita nyivi ra, ñi Israel, ñuhu Egipto. Tan tsahā cuenda tucu ra tsi nyivi tyin quivi quita ñi na quihin ñi yiqui ra cuhun tsihin ñi.

²³ Tsa cuenda tsa tsinu iñi jutu ra Moisés tan sihi ra tsi Nyoo, tyihɪ xeehe ñi tsi ra uñi yoo tyin nyehe ñi tyin sɪi xaan caá ra. Ña nayuhvi ñi tsa cahan ra rey tyin cuñi tsi cūu tandihɪ sehe yɪ nyivi [tsa cuenda tyin tsitó ñi tyin cua jacacu Nyoo tsi ra]. ²⁴ Tsinu

tucu iñi ra Moisés tsi Nyoo. Yacan cuenda quivi tsahnú ra, ña cuñi ca ra cuvɪ ra sehe ñaha cuvɪ sehe ra rey ñuhu Egipto. ²⁵ Tan nacoq ra ñuhu Egipto can tyin ña cuñi ra cusɪ iñi ra tsihin tsa javaha ra tsa caquini. Tan nacatsɪ ra tsa cua nyehe ra tundoho tsihin nyivi Nyoo tan ñavin ca tsa cusɪ iñi ra tsihin tsa tsindihɪ ñi maa. ²⁶ Tsa cuenda ra Moisés, vaha ca tsa cuca ra Cristo tan ñavin ca tandihɪ tsa cuca tsa iyó Egipto. Yacan cuenda sɪi cuñi ra nyehe ra ticanuu tsa cuenda ra Cristo tyin tsitó ra tyin cua ñihɪ ra tsa cua cuhva Nyoo tsi ra. ²⁷ Juvín ñi tsa cuenda tsa tsinu iñi ra Moisés tsi Nyoo, ña nayuhvi ra quita ra ñuhu Egipto, vasu ndi maa cuxaan ra rey tsi ra. Tan cunye'e xaan iñi ra tyin tumaa tsatyin nyehe ra tsi Nyoo tsa ña nyehe yoo.

²⁸ Juvín ñi tsa cuenda tsa tsinu iñi ra tava tyiñu ra na jacahnú tandihɪ nyivi Israel vico tan cañi ñi iin mbee ticatyɪ luhlu. Tan tava tyiñu tucu ra na cahyi ñi ñihɪ mbee can quisiyu yuvehe ñi, tyin tacan tsa cua yaha ángel Nyoo cañi ra sehe nuu nyivi Egipto, ña cañi ra ndi intuhun sehe nuu maa ñi. ²⁹ Tsa cuenda tsa tsinu iñi ñi Israel tsi Nyoo tan yahā sava ñi nu Nduya Ñuhu Cuaaha tumaa nu ñuhu ityi. Ra Egipto naha ra cuñi ndihɪ tucu ra naha yaha ra naha, maa tyin ña cuvɪ yaha ra naha tyin nacasɪ Nyoo ndutya ñuhu can siqui ra naha tan tsihi ra naha jahā ndutya can.

³⁰ Juvín ñi tsa cuenda tsa tsinu iñi ñi tsico nduvi ñi utsa tsaha tsata ñuu Jericó, tan tandihɪ cuii maa nu sama tsaha ñuu can tanɪ. ³¹ Juvín ñi tsa cuenda tsa tsinu iñi ña Rahab, ñaha sɪi iñi tsicá nuu tsa tsicoq Jericó, tan ña tsihi ña quivi tsihi tandihɪ nyivi ñuu ña. Ña tsihi ña tyin jatinyee ña tsi ra Israel ra tsa tsahan naha ra tsinyehe ñuu ña. Tandihɪ ca ñi tsihi ñi tsa cuenda tsa ña tyaa yahvi ñi tsi Nyoo.

³² ¿Náa ca cua cahan yu vityin? Tyin ña cuyatyɪ yu cahan yu tuhun tandihɪ ra naha, tumaa ra Gedeón, ra Barac, ra Sansón, ra Jefté, ra David, tan ra Samuel, tan ra cuvɪ ndusu yuhu Nyoo naha ra tahan tsanaha. ³³ Tsa cuenda tsa tsinu iñi ra naha tsi Nyoo, tan yihɪ ra naha jahā canaa ra naha tsi inga ñuu nahnu. Tan yihɪ ra naha vaha xaan tsindacá ñaha ra naha nyivi cuenda Nyoo. Yihɪ ra naha ñihɪ ra naha tsa catyi Nyoo tyin cuhva ra tsi ra naha. Yihɪ ra naha jatinyee Nyoo tsi ra naha quivi nducú cañi ndicaha tsi ra naha. ³⁴ Yihɪ ra naha ña cayu ra naha jahā ñuhu tsitsi ono nu tyihɪ nyivi tsi ra naha. Yihɪ ra naha cacú ra naha tan ña tsahñi nyivi tsi ra naha tsihin mityi. Yihɪ ra naha tsahā Nyoo tunyee iñi tsi ra naha quivi nduve tunyee iñi tsicoq tsi ra naha, tan cuvɪ cañi

tahan ra naha tsihin nyivi xaan iñi tsi ra naha tan jahā canaa ra naha tsi ñi. ³⁵ Tsicoq juhva ñiñaha, tsa nandotoq nyivi.

Juhva nyivi tsinuhñi ñi tan ndoho ñi jahā nyivi, maa tyin vasu ndi maa tacan tahañ ñi, cunyeē xaan iñi ñi tan ña cuñi ñi ndoq nuña ñi. Nyivi can catyi ñi tyin tun nacoq ñi tsi Nyoo ña cua nyehe ca ñi tundoho, maa tyin ñi ican ña cuñi ñi tyin tsitó ñi tyin vasu ndi maa cúu ñi, cua nandoto ñi inga tsaha tan cua coo ñi iin ñayivi vaha ca. ³⁶ Inga ñi nyehe ñi tundoho jahā nyivi tyin caahán nyaa nyivi can tsi ñi tan cañi ñi tsi ñi. Inga tucu ñi tsinuhñi ñi tsihin cadena tan tsiyucu ñi vehe caa. ³⁷ Yihí ñi tsahñi nyivi tsi ñi tsihin yuu. Yihí ñi tsahña sava nyivi tsi ñi tsihin cierra. Yihí ñi nducu cuhva nyivi tsi ñi. Yihí ñi tsahñi nyivi tsi ñi tsihin mityi. Yihí ñi tsinditsi ñi ñi mbee ticatyí tan ñi mbee; nduve jahma vaha ñi tsicoq tan ndi nduve vehe ñi. Ndaahvi xaan tsicoq ñi, tan tsicoq xaan ñi tucuihya iñi, tan nyehe ñi tundoho jahā nyivi tsa ña tsitó tsi Nyoo. ³⁸ Tan nyivi ndaahvi can vaha ca ñi nuu Nyoo tan ñavin ca inga ca nyivi. Tsica nuu ndaahvi ñi nu tsiqui tan nu iyó yucu. Tsicoq ñi tsitsi cava tan tsitsi ñuhu. ³⁹ Tandihí maa nyivi ndaahvi can vasu ndi maa vaha caahán Nyoo tuhun ñi tsa cuenda tsa tsinu iñi ñi tsi ra, maa tyin ña ñihj ñi tsa catyi ra tyin cuhva ra. ⁴⁰ Tyin cuñi ra tsa ñihi ndihí ñi tsa vaha ca tsa tyaa ra cuhva tyin cuhva ra tsi yoo tyin tacan tan nduvaha ñi nuu ra iin caa ñi tsihin yo.

12

Na cuita iñi yo tsi intuhun ñi maa ra Jesús

¹ Tandihí nyivi can quita vaha ñi nuu Nyoo tyin tsinu iñi ñi tsi ra. Tan vityin jandu iin ñi iñi yo tsihin can, tan ndatú ñi nyehe ñi tatun quita vaha yo. Yacan cuenda cuñi tsi nacoq yo tandihí tsa jatyañi tsi yo, tan tandihí cuatyí tsa tuhva jandavi ñaha tsi yo. Tan na cunyeē iñi yo cuhun yo ityi nuu ca tsihin Nyoo tsihin tsa taxin iyó añaime yo. ² Na nyehe yo tsi intuhun ñi maa ra Jesús tyin juvin ra jatyingeé tsi yo tsa tsinu iñi yo tsi ra, tan tsahá tucu ra tandihí cuhva taahán tsi tsinu iñi yo. Ra Jesús cunyeē xaan iñi ra nyehe ra tundoho tan ña tyaa yahvi ra ticanuu tsa cua tahan ra tsa cúu ra nu cruu tumaa tsihí iin nyivi iyó cuatyí. Yacan cuenda, vityin nyaá ra xiin cuaha Nyoo nda gloria. Tyin tsa ndi cumafi ca cúu ra, tan tsa tsitó maa ra tyin sii xaan cua cuñi ra tsa yaha cúu ra.

³ Jaha ndo cuenda cuhva tsicoq ra Jesús, tyin ra Jesús nyehe xaan ra tundoho jahā nyivi iyó cuatyí, maa tyin cunyeē iñi ra. Tacan tucu nyoocho, ña cundihi iñi ndo tan ña ndu uvi iñi ndo tsa nyicún ndo tsi ra. ⁴ Tyin nyoocho ñaha ca nyehe ndo tundoho

tumaa nyehe ra Cristo tundoho tsa cañi tahan ra tsihin tsa caquiñi tan tsihi ra. Tyin ñaha ca cúu ndo jaha tsa cañi tahan ndo tsihin tsa caquiñi. ⁵ ¿A tsa naq iñi ndo nácaa jaquihín ityi Nyoo tsi yo tsa cuví yo sehe ra? Catyi ra nu tutu ra tyehen:

Sehe luhlu yo, ña cuxaan un tatun tsahá cuenda yu tsi un nácaa taahán tsi javaha un.

Tan ña nducuihya iñi un tatun cuxaán yu tsi un.

⁶ Tyin yuhu jaquihín ityi yu tsi nyivi cuñi yu, tan tatsi tuñi yu tsi nyivi cuví sehe yu, catyi Nyoo.

⁷ Janyee ndo iñi ndo tan nducu ndo cuhva cutuhva ndo tun jaquihin ityi Nyoo tsi ndo. Tyin Nyoo, jaquihín ityi ra tsi sehe vaha ra tumaa javaha tandihí nyivi iyó sehe, jaquihín ityi ñi tsi sehe ñi. ⁸ Tyin tatun ña jaquihín ityi Nyoo tsi yo, ñavin sehe vaha ra cuví yo. Maa tyin tatun jaquihín ityi ra tsi yo, juvin sehe vaha ra cuví yo. ⁹ Tan inga tucu tuhun, tsa ndi nyihi yo, jutu yo nu ñuhu ñayivi ihya jaquihín ityi ra naha tsi yo, tan jahā yo tsa ñayivi tsi ra naha. Tan vihi ca cuñi tsi tyaa yahvi yo tsi Jutu yo Nyoo, tyin tacan tan cuví coo cuí yo. ¹⁰ Jutu yo tsa iyó nu ñuhu ñayivi ihya, jaquihín ityi ra naha tsi yo tsa cuenda juhva ñi quivi, tan javahá ra naha can cuhva cuñi maa ra naha tyin vaha tsa cuenda yo. Maa tyin Nyoo jaquihín ityi vaha ca ra tsi yo, tan tsahá ra tsa ndu ii yo tumaa ii maa ra. ¹¹ Nditsa tyin tsa ndi cuxaán Nyoo tsi yo nyehe yo tundoho. Maa tyin tun cutuhva yo javaha yo tsa vaha tsihin tsa nyehe yo tundoho can, cua quita vaha yo.

Ica xaan tun ña tyaa yahvi yo tsa caahán Nyoo tsihin yo

¹² Yacan cuenda ña ndu uvi iñi ndo tsa javaha ndo tsa cuñi Nyoo javaha ndo, tan ña nducuihya iñi ndo. ¹³ Nducu ndo cuhva coo vaha ndo tsihin Nyoo, tan cuhva caca vaha ndo tsihin ra. Tyin tacan tan cuhva ra tunyee iñi tsi ndo tan nduvaha ndo nuu ra tan ña cuíhya ca cua cuñi ndo.

¹⁴ Jañiñi ndo tsi ndo tan coo vaha ndo tsihin tandihí nyivi. Nacoq ndo tandihí tsa ña vaha. Tyin nyivi tsa ña nacoq tsa ña vaha ña cuví nyehe ñi tsi Nyoo Jutu yo. ¹⁵ Jaha cuenda vaha ndo tsi ndo tyin tacan tan ña ndoo ihñi ndi intuhun ndo tyin tandihí ndo tan cua ñihi ndo tunyee iñi tsa tsahá Nyoo, tan ña cua ndoo tsa xaan tsitsi añaime ndo tan ña cua tiví ndo nuu Nyoo, tyin jahá cuenda vaha ndo tsi ndo. ¹⁶ Nyoocho rayiñi ndi intuhun ndo tan ña caca nuu ndo tsihin ñaha. Tacan tucu nyoocho ñaha, ña caca nuu ndo tsihin rayiñi. Tan ña caca iñi ndo tyin nduve yahvi nyaá tuhun Nyoo, tumaa tsica iñi ra Esaú, tyin ra Esaú xicoq ra tsa cuví ra ra

tsitsa tsacatyí tsa catsi ra. ¹⁷ Tsító ndo tyin tsa yaha yacan tan cuñi ra Esaú tsa nasoco jutu ra tsi ra, maa tyin ña cuví. Tsacu xaan ra, maa tyin ña ñihu ca ra cuhva nasama ra tsa tsa yaha javaha ra.

¹⁸ Nyooho ña taahán tsi javaha ndo tacan tyin tsa ndo nuu Nyoo, maa tyin ñavin tumaa tsa nyivi Israel nuu Nyoo quivi tsahan ñi yucu Sinaí tsa cuví nyehe yo. Nyehe ñi cayu ñuhu, tan ñihi xaan yihí tatyí xaan, tan naa xaan cuví. ¹⁹ Tan tsiñi ñi ndusu trompeta tan cahan Nyoo tsihin ñi. Tan cahan ndaahvi ñi tsihin ra na ña cahan ca ra tsihin ñi, tyin yuuhví xaan ñi ²⁰ tsa cuenda tyin ña cunyeé ñi ñi tsa tsaha cuenda ra tsi ñi Tyin catyí ra tyehen: “Nyivi natuhva tan cuañi tsaha yucu ihya cahñi ndo tsi ñi tsihin yuu o tsihin lanza, tahan ñi nyivi tan quití”, catyí Nyoo tsihin ñi. ²¹ Nayuhví xaan ñi tsa nyehe ñi yacan, nda cuenda ra Moisés tan catyí ra: “Ñihi xaan ñihi yu jahá tsa yuuhví yu”, catyí ra.

²² Maa tyin nyooho ña nyehe ndo tsa yuhví can tyin tsa ndo yucu nañi Sión tsa cuví ñuu Nyoo nyito. Tuhun ihya cuñi tsi catyí ñuu Jerusalén tsa canyí nda gloria, nu iyó cuenda mil ángel. ²³ Ndu iin ndo ican tsihin tandihi sehe Nyoo tsa iyó sivi nu libru nda gloria tan jacahnu ndo tsi ra. Natuhva ndo nuu Nyoo, ra cuví juee [tsa jandaa cuatyí] tandihi nyivi, tan natuhva ndo nuu tandihi añima nyivi vaha tsa janduvaha Nyoo. ²⁴ Natuhva tucu ndo nuu ra Jesús, ra caahán ndaahvi tsihin Nyoo tsa cuenda yo vityin tsa ndog Nyoo tuhun tsa tsihin yo. Tan ñiñi ra Jesús tsa tsatí tsahá tsa vaha ca tsi yo tan ñavin ca ñiñi ra Abel. [Tyin ñiñi ra Abel tsican tsi cuatyí tsaha ra yañi ra. Maa tyin ñiñi ra Jesús, jahá tucahnu iñi cuatyí yo.]

²⁵ Yacan cuenda cuñi tsi jaha yo cuenda tsi yo tan tyaa yahvi yo tsi ra caahán tsihin yo. Tyin tacan tan ña tahan yo tumaa tahan juhva nyivi Israel tsa ña tyaa yahvi tsa cahan Nyoo quivi cahan ra yucu Sinaí nu ñuhu ñayivi ihya. Tan vihi ca yoo, tun ña tyaa yahvi yo tsi ra nyaá nda gloria tsa caahán tsihin yo vityin, ña cua cuví maa cacu yo. ²⁶ Tahan tsanaha jacanda Nyoo ñuhu ñayivi tsihin ndusu ra. Tan catyí ra tyehen vityin: “Cua jacanda yu iin tsaha ca ñuhu ñayivi, maa tyin ñavin ñuhu ñayivi ñi, tyin cua jacanda ndihi yu nda cuenda andivi.” ²⁷ Tsa caahán ra tyin cua jacanda ra inga tsaha, cuví cutuñi iñi yo tyin cua catsiyo tandihi tsa javaha ra tsa cuví nacanda. Tan cua ndoo tsa ña cuví nacanda. ²⁸ Nu ndacá ñaha Nyoo nu tsahá ra cunyece yo tsihin ra, ña cuví nacanda can. Na cuhva yo tyahvi nyoo tsi ra tsa cuenda yacan tan na jacahnu yo tsi ra tsihin tsa ñi iñi añima yo, tan tyaa

yahvi yo tsi ra, tyin yacan cuví tsa taahán iñi ra. ²⁹ Tyin Nyoo yo cuví ra tumaa ñuhu tsa tsahmí, tan cua janaa ra tandihi maa tsa ña vaha.

13

Na coo yo cuhva taahán iñi Nyoo

¹ Ña jandihí ndo tsa cuñi ndo tsi tandihí nyivi yihí cuenda Nyoo tyin cuví ñi tumaa nyivi ndo. ² Ña nga iñi ndo tyaa nuu vaha ndo tsi nyivi tsaá vehe ndo, tyin tun javaha yo tacan nda cuenda cua cuhva yo nu coo ángel Nyoo, vasu ndi maa ña tsító yo tun ángel cuví ra naha tumaa javaha juhva nyivi.

³ Ña nga iñi ndo tsi nyivi yucú vehe caa tumaa tsatyin yucú ndihí ndo tsihin ñi. Ndúcuhun iñi ndo tsi nyivi nyehé tundoho jahá nyivi. Cundaahvi iñi ndo tsi ñi tan jatinyee ndo tsi ñi. Tyin tsító ndo nácaa cuñi yo tun nyehe yo tundoho.

⁴ Nyooho nyivi tsa tsa tindaha, jaha tahan ndo tsa ñayivi tsi iin ndo tan tsi inga ndo. Tan coo vaha ndo tyin Nyoo cua tatsi tuñi ra tsi rayi tsicá nuu tsihin naha tan rayi iyó ñasihi tun coo ra tsihin inga ñaha. Tan juvin ñi cua tatsi tuñi tucu ra tsi ñaha tsicá nuu tsihin rayi tan ñaha tsa iyó yí tun coo ña tsihin inga rayi.

⁵ Ña caca iñi ndo nácaa javaha ndo tan cuví coo cuaha ca xuhun tsi ndo. Ndgo ndo vaha tsihin tsa iyó tsi ndo, tyin catyí Nyoo tyehen: “Tandihí ñi tsaha nyaá yu tsihin un, tan ña cua nacoo ihñi maa yu tsi un”, catyí ra. ⁶ Tsa cuenda yacan cuví caahán yo tyehen tsihin tsa ñi iñi añima yo:

Jutu Mañi yu juvin un jatinyee tsi yu, Yacan cuenda ña yuuhví yu tun javahá nyivi náa javahá ñi tsi yu.

⁷ Ndúcuhun iñi ndo tsi ra cuví ityi nuu vehe ñuhu, ra tsa caahán tuhun Nyoo tsihin ndo. Nyehe ndo tyin vaha iyó ra naha nuu Nyoo, tan cuanyicun ndo cuhva vaha tsinú iñi ra naha tsi Nyoo.

⁸ Ra Jesucristo ña nasamá ra. Juvin ra iyó nda tsanaha, tan juvin ra iyó vityin. Tan juvin ra cua coo yoso cuahán quivi. ⁹ Ña cuhva ndo jandavi ñaha nyivi tsi ndo tsihin tsa siin siin tsa jacuahá ñi. Vaha ca jandu iin ndo iñi ndo tsihin tsa vaha tsa tsahá Nyoo coo añima yo, tyin vaha ca yacan tan ñavin ca tsa jacuahá ñi ican. Tyin ñi ican jacuahá ñi maa ñi maa tsa cuenda náa tsatsí yo. Tan ña jatinyee can ndi tsi maa ñi.

¹⁰ Tsatí ñiñi ra Cristo nu cruu tsa cuenda yo. Tan ra jutu tsa nyitá iñi ley tsahnu naha ra ña cuví jatinyee ra Cristo tsi ra naha. ¹¹ Ra jutu tsahnu cuví ityi nuu cuenda nyivi Israel tsindacá ra naha ñiñi quití tsitsi Vehe li Xaan tsa cuenda cuatyí nyivi, maa tyin cuñu ti tuhvá can cayú ityi tsata ñuu.

¹² Tacan tucu ra Jesús, tava tyiñu Nyoo tsi ra tsa nyehe ra tundoho tan cúu ra ityi tsata ñuu Jerusalén, tyin tacan tan janduvaha ra tsi yo tsihin ñiñi ra. ¹³ Na cunyicun yo tsi ra Cristo tan ña nducahan nuu yo vasu ndi maa vacu nducu nyivi tsi yo. ¹⁴ Tyin tsa cuenda yoo nduve ñuu tsa ña cua cundihi maa nu ñuhu ñayivi ihya. Yacan cuenda nanducú yo iin ñuu tsa cua quitsi, tsa yaha naa ñuhu ñayivi ihya. ¹⁵ Yacan cuenda vityin tsa iyó ra Cristo aña yó, taahán tsi jañiñi yo tsi yo tan jacahnu yo tsi Nyoo tsihin tsa cata yo yaa ra, tan tsihin tsa caahán yo. ¹⁶ Ña naa iñi ndo javaha ndo tsa vaha. Tan jatyinyee tahan ndo tsi ndo tsihin tsa iyó tsi ndo, tyin yacan cuví tsa taahán iñi Nyoo.

¹⁷ Tyaa yahvi ndo tsi ra jaquihín ityi tsi ndo naha ra; cuhva ndo tsi ndo cundaca ñaha ra naha tyin juvin ra naha jahá cuenda aña ndo. Tan coo quivi cua cuhva cuenda ra naha tyiñu jahá ra naha tsi Nyoo. Nducu ndo cuhva javaha ndo tsa vaha, tyin tacan tan sii cua cuñi ra naha cuhva cuenda ra naha tsi ndo tsi Nyoo. Maa tyin tun ña javahá ndo tsa vaha, cua cuhva cuenda ra naha tsi ndo tsi Nyoo tsihin tucuihya iñi, tan ña cua quita vaha ndo nuu ra.

¹⁸ Ndacan tahvi ndo tsi Nyoo tsa cuenda ndi tyin tsitó ndi tyin vaha cuahán ndi tsihin ra, tyin maa ñi maa tsa vaha cuñi ndi javaha ndi. ¹⁹ Tan tsicán yu tsa ndacan tahvi tucu ndo tsa cuenda yu na cuhva Nyoo quitsi yu inga tsaha tsa numi ñi nu yucú ndo tan cunyi yu tsihin ndo.

Nu ndihí cahán ra tan tsahá ra nacumi tsi ñi

²⁰ Jutu Mañi yo Jesucristo tsa janandoto Nyoo, ra tsahá tsa taxin coo aña yó, juvin ra jahá cuenda tsi yo tsa cuví yo tumaa mbee jana ra. Tsihin ñiñi ra Cristo tsa tsatí, ndoq Nyoo tuhun tsaa tsa ña cua cundihi maa tsihin yo. ²¹ Tandihí tsa cuñi Nyoo javahá ra tsihin tandihí yo, maa ra Jesucristo javahá can jahá ra. Tan na javaha ra tsihin yo tsa cuñi ra javaha ra. ¡Na jacahnu yo tsi ra Cristo yoso cuahán quiví! ¡Na cuvi tsi tacan ñi!

²² Yañi, caahán ndaahvi yu tsihin ndo; janyee ndo iñi ndo tan javaha ndo tsa tsahá cuenda yu tsi ndo tsihin tsa taxin iyó aña ndo, tyin ña cuaha xaan tuhun tyaa yu tsa cuenda ndo. ²³ Cuñi yu tsa coto ndo tyin ra Timoteo, yañi yo, tsa quita ra vehe caa. Tatun yatyi tsaa ra, cua quitsi ra tsihin yu na quitsi yu quitsi nyehe yu nu yucú ndo.

²⁴ Cuhva ndo nacumi tsi tandihí ra jaquihín ityi tsi ndo, tan tsi tandihí nyivi yihí cuenda ra Cristo. Nyivi Italia nu nyí yu, tsahá ñi nacumi tsi ndo.

²⁵ Tan na nasoco Nyoo tsi tandihí ndo. Na cuvi tsi tacan ñi.

Carta Tsa Jacuhun Ra Santiago Tsi Nyivi Israel Tsa Yihí Cuenda Ra Cristo

Nu tsahá ra Santiago nacumi tsi nyivi

¹ Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesu-cristo. Jaquitsí yu nacumi tsi tandihí nyooho tsa cuví ndo tata tsa utsi uvi ra sehe ra Israel tan iyó ndo ñuu nyivi tsa ñavin tata ra Israel cuví.

Tsa tsiñi tuñi tsa tsahá Nyoo tsi yo

² Yañi, cusii iñi ndo tun cuaha tundoho nyehé ndo. ³ Tyin tsitó ndo tyin tsihin tsa nyehé ndo tundoho tan cua cuahnú ca ndo tsihin tsa tsinú iñi ndo. Tan cua cunyeé iñi ndo nyehe ndo náa ndihí ca tundoho vatsí siqui ndo. ⁴ Jaña ndo na quitsi maa tundoho can siqui ndo, tyin tun tsa cunyeé iñi ndo yahá ndo tundoho can, cua cuví ndo nyivi tsitsa tsihin tuhun Nyoo, tan nduve ca náa cua cumañi tsi ndo tan cua cunyeé ndo yaha ndo tandihí maa tundoho tsa cua quitsi siqui ndo.

⁵ Ndáa nyooho cumañi tsa tsiñi tuñi tsi, ndacan ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihí nyivi tan ña tuhvá ra tyicuhvá itsi, tan ndi ña cuxaán ra tsi ñi tun tsicán ñi náa tsicán ñi tsi ra. ⁶ Maa tyin cuñi tsi ndacan yo itsi tsihin tsa tsinú vaha iñi yo. Tan ña caca iñi yo tyin ña cua cuhva ra itsi tsi yo. Tyin tun caca iñi yo tyin ña cua ñihí yo tsa tsicán yo, cuví yo tumaa ndutya ñuhu tsa tandahá tatyí ityí ihya tan ityí can. ⁷ Ra tsa javahá tacan, ña taahán tsi caca iñi ra tyin cua cuhva Nyoo tsa tsicán ra. ⁸ Tyin uvi xaan tsicá iñi ra. Ña tyaá iñi ra tsa tsicán ra, tyin ña iin cuñi ra. Vityin cuñi ra tsa cuñi ra, tan inga tsa cuñi tucu ra tyaan. ⁹ Tatun iyó iin ra yañi yo, ndaahvi ra, na cusii iñi ra tyin cahnu cuví ra jahá Nyoo. ¹⁰ Tatun iin ra yañi yo, tan cuca ra, tun cua ndundaahvi ra nu ñuhu ñayivi ihya, taahán tsi cusii iñi ra tsihin Nyoo tyin tsitó ra tyin cuví ra tumaa cuví ita tsa iyó tsitsi cuhu, tyin ita can iin yaha ñi cucyó can. ¹¹ Tyin ihñi xaan cuví tsitsi cuhu jahá ñicanyii. Tacan tan na ityí ita can. Tan canacavá can tan ndihí tsa sii caá can. Tan tacan cuví ra cuca, tyin cua quitsi tuhun tsiihi tsi ra tan cua cundihi tsa cuca ra.

Nacaa cunyeé iñi yo nyehé yo tundoho

¹² Sii xaan cuví tsi ra tsa cua cunyeé iñi nyehe tundoho tyin tsa yaha nyehe ra tundoho cua ñihí ra ñayivi nyito tsa catyi Nyoo tyin cuhva ra tsi ñi tsa cuñi tsi ra. ¹³ Tatun ndáa nyooho tsicá iñi ndo tsa javaha ndo

tsa ña vaha, ña cuñi ndo tyin Nyoo tsahá tsa caca iñi ndo tacan. Tyin Nyoo ña tsicá iñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha. ¹⁴ Maa tyin nyooho tsa javahá tsa ña vaha, javahá ndo can tyin cuñi ndo javaha ndo can. Tan yacan cuenda tsicoó cuatyí ndo. ¹⁵ Tatun cua cuhva yo tsa caca iñi yo tuhun ña vaha, coo quivi cua javaha yo cuhva tsicá iñi yo tan cua coo cuatyí yo. Tan tatun maa ñi yacan cua javaha yo, cua tatsi tuñi Nyoo tsi yo tsa cuenda can tan cua cúu yo.

¹⁶ Yañi, cuñi xaan yu tsi ndo. Ña jandavi ñaha ndo tsi ndo. ¹⁷ Tandihí tsa vaha tan tsa vii tsa ñihí yo, queé tsi ityi siqui tyin maa Nyoo Jutu yo tsahá itsi. Tan maa ra javahá ñuhu tsa iyó andivi: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama. ¹⁸ Tan tsahá ra ñayivi tsa tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihí ca tsa javahá ra, tyin tacan cuñi maa ra.

Ityi nditsa tsa taahán tsi cuhun yo

¹⁹ Yacan cuenda yañi, intuhun intuhun yo tan taahán tsi cuhun iñi yo tsa tyaá soho yo, maa tyin ña yatyi xaan nacahan yo tan ndi ña yatyi xaan cuxaan yo. ²⁰ Tyin nyivi tsa cuxaán, ña javahá ñi tsa taahán iñi Nyoo. ²¹ Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayivi ihya. Ndaahvi jaha ndo tsi ndo tan tñi cuenda vaha ndo tuhun Nyoo tsa tatsi ra añima ndo. Tyin tuhun Nyoo can iyó tunyee iñi itsi tsa jacacú tsi tsi yo. ²² Javaha ndo cuhva caahán tuhun Nyoo, tan ña tyaá soho ñi maa ndo itsi, tyin tatun tyaá soho ñi maa ndo itsi juvin ñi tsi maa ndo jandavi ñaha ndo. ²³ Tyin nyivi tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyivi nyehé nuu ñi nu inu. ²⁴ Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi. ²⁵ Maa tyin nyivi tsa iin nyita ñi tyaá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sii cua cuví tsi ñi ican tan cua quita vaha tandihí tsa javahá ñi. ²⁶ Tan nyivi tsa catyi tyin tuhun Nyoo yihí ñi, maa tyin yatyi xaan yuhu ñi cahan ñi tsa caquiñi, nduve nacatyi tsicá ñi tuhun Nyoo tyin juvin ñi tsi maa ñi jandavi ñaha ñi. ²⁷ Tyin tsa cuenda Nyoo, nyivi tsa nditsa tsinú iñi tsi ra juvin ñi cuví ñi tsa javahá tyehen: Jatyinyeé ñi tsi nyivi ndaahvi tsa tsihi yí, tan jahá cuenda ñi tsi tsa nyihí tsa nduve ca sihi tan jutu, tan jahá cuenda ndihí tucu ñi tsi maa ñi tsa ña javaha ñi tsa ña vaha.

2

Na inducu ñi cuñi yo tsi nyivi tyin ña siin caá intuhun ñi tan inga ñi

¹ Yañi, nyooho tsinú iñi ndo tsi Jutu Mañi yo Jesucristo, ra tsa cahnu xaan cuví, yacan cuenda ña taahán tsi cahnu jaha ndo tsi iin nyivi tan ñavin ca inga ñi. ²⁻³ Tatun cua quihvi iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsi ra jahma xiñu, *znácaa* cua cahan ndo tsihin ra? ¿A ña cua catyi ndo, “Cunya nu tyayu vaha ihya”? Tan juvin ñi cuhva can tan quihvi tucu iin ra ndaahvi nditsi ra jahma tyaaahnyá, tan catyi ndo tsihin ra, “cunya nyityi juvin o cunya nu ñuhu ihya”. ⁴ Ña vaha tsa javahá ndo tacan, tyin ña inducu jahá ndo tsa ñayivi tsi ra naha, tan tsicá iñi ndo tsa ña vaha.

⁵ Yañi tsa cuñi xaan yu, tyaa soho ndo tuhun ihya: Nyoo nacatsi ra tsi nyivi ndaahvi nu ñuhu ñayivi ihya, tyin nducua ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin yacan cuví tsa catyi ra tyin cuhva ra tsi nyivi tsa cuñi tsi ra. ⁶ Maa tyin nyooho tsahá ndo ticanuu tsi nyivi ndaahvi. ¿A ña tsitó ndo tyin juvin nyivi cuca tsahá ndaahvi tsi ndo, tan tsindacá ñi tsi ndo nuu ra cumí tyiñu? ⁷ Tan ¿a ña tsitó ndo tyin nyivi can caahán ñi ndavaha ñi sivi ii ra Cristo, ra yihí ndaha tsi ndo?

⁸ Ley Nyoo tsa ñiñi ca catyi tsi: “Cuñi ndo tsi nyivi tumaa tsa cuñi ndo tsi maa ndo.” Tatun javahá ndo tsa catyi ley can, vaha javahá ndo. ⁹ Maa tyin tun intuhun ñi nyivi cuñi ndo, tan ña cuñi ndo tsi inga ñi, tsicoó cuatyí ndo tyin catyi ley Nyoo tyin iyó cuatyí nyivi javahá tacan. ¹⁰ Tyin tatun iin nyivi tsa tyaa yahvi tandihí ley, tan ña tyaa yahvi ñi intuhun tsi, cuví tsi tumaa tsa ña tyaa yahvi ñi tandihí ley. ¹¹ Tyin Nyoo catyi ra tyin ña coo inga ñaha tsi rayii, tun iyó ñasihi ra. Tacan tucu ñiñaha, tsa iyó yii, ña cuví coo inga rayii tsi ñi. Tan juvin ñi catyi tucu ra tyin ña cañhi yo nyivi. Yacan cuenda tatun iin ra nduve inga ñaha tsi ra, maa tyin tsahñi ra iin nyivi, juvin ñi ña tyaa yahvi ra tsa catyi ley. ¹² Maa tyin ley ra Cristo tsa jacacú tsi yo cua catyi tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo. ¹³ Tyin nyivi tsa ña cundaahvi iñi tsi tahan ñi, Nyoo cua tatsi tuñi ra tsi ñi, tan ña cua cundaahvi iñi ra tsi ñi. Maa tyin ñi tsa cundaahvi iñi tsi inga ñi, cua quita vaha ñi quivi cutuñi ñi.

¿Ndáa tsa jacacú tsi yo, tsa tsinú iñi yo tyin vaha ra Cristo o tsa javahá yo tsa vaha?

¹⁴ Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinu iñi yo tsi Nyoo ñi tsi yo? ¹⁵ Na jaha

yo tuhun: Iin tsaha iin ra yañi yo nduve jahma ra tan nduve tsa catsi ra tan tsahan ra yuvehe un, ¹⁶ Maa tyin yoocho ña tsaha un jahma ra tan ndi tsa catsi ra tan catyi un tsihin ra: “Cuaahan tan Nyoo cuhun tsihin un. Na coo ca jahma un tan tsa catsi un”, catyi un. Nduve nacatyí cahan un tacan tyin ña tsaha un tsa tsiniñi ñuhu tsi ra. ¹⁷ Tan tacan ñi cuñi tucu yo tsihin tsa tsinú iñi yo, tun catyi yo tyin tsinú iñi yo tsi Nyoo tan ña jatyinyee yo tsi nyivi, nduve yahvi nyaá catyi yo tyin tsinú iñi yo.

¹⁸ Yihí ndo cua catyi ndo: “Yoocho tsinú iñi un tsi Nyoo tan yuhu javahá yo tsa vaha. Tan catyi un tyin tsihin tsa tsinú iñi ñi yo tan cuví cacu yo.” Maa tyin yuhu catyi yu tyin juvin ñi cahnu cuví tucu tsa javahá yo tsa vaha. Tyin yoocho ña cuví janaha un tsa tsinú iñi un tsi Nyoo tsi yu tun ña javaha un tsa vaha. Maa tyin yuhu cuví janahá yu tsa tsinú iñi yu tsi Nyoo tsi un tsihin tsa javahá yu tsa vaha. ¹⁹ Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda ñihi nahnu tsihin tsa yuuhvi nahnu tyin ña cua cacu nahnu. ²⁰ Ña soho xaan çaça iñi un. Cutuñi iñi tyin tun tsinú iñi yo tan ña javahá yo tsa vaha, nduve yahvi nyaá tsa tsinú iñi yo. ²¹ Ra Abraham, tsii tsaaahnu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyi maa Nyoo tsihin ra. ²² Ihya nyehé yo tyin tsa cuenda tsa tsinú iñi ra Abraham tsi Nyoo javahá ra tsa catyi ra tsihin ra tyin javaha ra. Tan tsa javahá ra yacan, quituvi vaha tsa tsinú iñi ra tsi Nyoo. ²³ Tacan tan cundaá tsa catyi nu tutu Nyoo tyehen: “Ra Abraham tsinú iñi ra tsi Nyoo, yacan cuenda cuví ra ra vaha nuu Nyoo.” Tan iyó tucu inga nu catyi tsi: “Ra Abraham, cuví ra ra vaha iñi tsi Nyoo.”

²⁴ Tan ihya cuví nu cutuñi iñi yo tyin vaha yo nuu Nyoo tatun tsinú iñi yo tsi ra tan javahá yo tsa vaha tan ñavin tsihin tsa tsinú iñi ñi yo tsi ra. ²⁵ Tan tacan tucu ña Rahab tsa tsicá nuu tsihin rayii. Yahá tsa javahá ña cuatyí, javahá ña tsa vaha quivi tsahá ña nu tsiyucu xeehe ra tsa jacuhun ra Josué. Tan jatyinyee ña tsi ra naha tsa cuhun ra naha inga ityi. Tan tsa cuenda yacan, catyi Nyoo tyin vaha ña. ²⁶ Tan tacan tucu cuví cuñu ñuhu nyivi. Tatun nduve ca tsa nyitó ñi iyó tsitsi cuñu ñuhu can, nduve ca yahvi nyaá can. Tan tacan cuví tucu yoó, tatun ña javahá yo tsa vaha, nduve yahvi nyaá tsa tsinú iñi yo.

3

Nacaa jaha cuenda yo cuhva caahán yo

¹ Nyooho yañi, ña yatyi xaan cuñi ndo cuvi ndo ra cahan tuhun Nyoo. Tyin tsitó ndo tyin nyuhu tsa caahán ndi tuhun Nyoo, tatun ña vaha cahan ndi, ñihi ca cua tatsi tuñi Nyoo tsi ndi tan ñavin ca nyivi tsa ña caahán tuhun Nyoo. ² Tyin tandihi maa yo tan tsicoó cuatyí yo, maa tyin ra tsa ña javahá cuatyí tsihin tsa caahán ra, juvin ra cuví ra vaha tyin cuví ndaca ñaha ra nanii cahnu cuñu ñuhu ra. ³ Tumaa ra tsa tyihí yoho yuhu cuayu cuví ndaca ñaha ra tsi ti, vasu ndi maa cahnu ti. ⁴ Tan tacan tucu iin yutun ndoo tsa tsicá ndo ndutya ñuhu, vasu cahnu tsi maa tyin tsihin vitu luhlu tsa nyaá ityi xuu tsi, cuví jacahun ra jacacá itsi ndáa ityi cuñi maa ra, vasu ñihi xaan yihí tatyí. ⁵ Tan tacan tucu yaa yo, luhlu xaan tsi. Maa tyin cuaha tsa caquiñi cuví cahan yo tsihin tsi. Tumaa nu natñin iin ñuhu luhlu iin cuhu cahnu tan cayu tandihi maa yutun. ⁶ Tacan tucu yaa yo cuví tsi tumaa iin ñuhu luhlu. Tan cuví tucu tsi tumaa iin tsa quiñi cahnu tsa jativí tsi nanii cahnu cuñu ñuhu yo tan tandihi cuhva iyó yo ñayivi ihya, tyin juvin ñi maa nu ña vaha natyuhú itsi. ⁷ Nyivi cuví jandumasa ñi tandihi maa nu quiti tsa iyó: saa, coo, tan quiti tsa iyó tsitsi ndutya ñuhu. ⁸ Maa tyin yoñi cuví jandumasa yaa yo tyin cuví tsi iin tsa ña vaha tan ña tsahá tsi cundaca ñaha yo itsi. Tumaa iin coo tyihí ti venenu ti tsi nyivi, tan tsiihi ñi. Tacan cuví yaa yo. ⁹ Tyin juvin ñi tsihin yaa yo jacahnú yo tsi Nyoo Jutu yo. Tan juvin ñi tsihin can caahán tucu yo ndavaha ñi siqui nyivi tsa javahá Nyoo tumaa caá maa ra. ¹⁰ Juvin ñi tsihin yuhu yo jacahnú yo tsi Nyoo. Tan juvin ñi tsihin can caahán yo tsa caquiñi. Maa tyin yañi, ña taahán tsi tsa javahá ndo tacan. ¹¹ Tyin, ¿a cuví quita ndutya cuii tan ndutya uva tsitsi iin ñi ndohyo? Ña cuví. ¹² Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

Tsa tsiñi tuñi tsa vaha ca

¹³ Tatun yihí ndo tsitó ndo tan iyó tsa tsiñi tuñi tsi ndo, janaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyin javahá ndo can tsihin tsa tsiñi tuñi Nyoo tsa iyó tsi ndo. ¹⁴ Maa tyin tatun nyiyo iñi ndo tsitsi añima ndo tan cuñi xaan ndo nduvaha ndo nu nyivi, ña cahnu jaha ndo tsi ndo tan catyi ndo tyin iyó tsa tsiñi tuñi tsi ndo. Tyin tun cahnu jahá ndo tsi ndo, tyihí xeehe ndo tsa nditsa, cuví can. ¹⁵ Tyin tun tacan tsicá iñi ndo, ñavin tsa tsiñi tuñi Nyoo cuví can, tyin cuhva tsicá iñi nyivi ña tsitó tsi Nyoo tan cuhva tsica iñi nu ña vaha cuví can. ¹⁶ Tyin tatun nyiyo iñi ndo tan cuñi ndo nduvaha ndo nu nyivi, ticaña xaan tsicá iñi ndo. Tan iyó tucu tandihi inga nuu tsa ña

vaha nu yucú ndo. ¹⁷ Maa tyin tatun iyó tsa tsiñi tuñi Nyoo tsi ndo, cuiti iyó ndo, catsi iyó ndo. Tan nducú ndo cuhva coo vaha ndo tsihin nyivi tsihin tsa vita iñi ndo, tan vaha nyivi cuví ndo. Tan catsi vaha tsicá iñi ndo, tan cundaahvi iñi ndo tsi nyivi, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa nu iñi ndo. ¹⁸ Tatun iyó vaha yo tsihin nyivi, tan iyó taxin yo tsihin ñi, cua coo yo ñayivi cuiti.

4

Ña taahán tsi javaha yo cuhva cuñi cuñu ñuhu yo

¹ ¿Nacuenda iyó tsihi nu yucú ndo? ¿Nacuenda iyó cuatyí? Tsa cuenda tyin tsitsi añima ndo tsicá iñi ndo maa ñi maa tsa ña vaha. ² Iyó tsaha nda cuenda tsahñi ndo nyivi tyin cuñi ndo tsa cuñi ndo tan ña ñihi ndo can. Tatun nyehé ndo náa cuví can nyehé ndo, nyiyo iñi ndo can tan tsa ña ñihi ndo can quitsaha cañi tahan ndo. Ña ñihi ndo tsa cuñi ndo tyin ña tsicán ndo can tsi Nyoo. ³ Tatun tsicán ndo tsa tsicán ndo tsi ra tan ña ñihi ndo can, ña tsahá ra can tsi ndo tyin tsitó ra tyin cua jativí ndo can tsihin tsa taahán iñi ndo. ⁴ ¿Nacuenda javahá ndo cuhva cuñi nyivi, nyoocho tsa ña tsinú vaha iñi tsi Nyoo? ¿A ña tsitó ndo tyin tun javahá yo cuhva cuñi nyivi, ñi xaan iñi tsi Nyoo cuví yo? ⁵ Tan yacan iyó cuenda catyi nu tutu Nyoo tyin Tatyí li tsa tsahá ra coo añima yo, cuñi xaan tsi tsi yo tan cuñu xaan tsi tsi yo tyin cuñi tsi tsa jacahnú yo tsi intuhun ñi maa ra. ⁶ Tan jatinyeé xaan Nyoo tsi yo tsa nacuhvá yo tsi yo tsi ra. Tyin catyi ra tyin jatinyeé ca ra tsi nyivi ndaahvi tsa tsitó tyin tsiní ñuhu ra tsi ñi. Tan ña cuñi ra nyehé ra tsi ra tsa cahnu jahá tsi. ⁷ Yacan nacuhva vaha ndo tsi ndo tsi Nyoo. Ña tyaa yahví ndo nu caahán nu ña vaha tyin tun ña jahá ndo cuenda nu caahán nu, tacan tan cua cunu nu nyehé nu tsi ndo. ⁸ Ndúcu ndo cuhva cunyanaa vaha ca ndo tsi Nyoo tyin tacan tan natuhva ra tsi ndo. Nyoocho, nyivi iyó cuatyí, jandundii ndo tsi ndo. Tan nyoocho tsa tsicá iñi tyin cuví javaha ndo tsa iyó nu ñuhu ñayivi ihya tan juvin ñi cuhva can tan jacahnú tucu ndo tsi Nyoo, jandu iin ndo iñi ndo tan cuhva ndo añima ndo jacutu Nyoo tsa vaha, tyin tacan tan ndundii ndo nuu ra. ⁹ Cuiihya cuñi ndo. Vacu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa sií cuñi ndo, vacu ndo tsihin tsa cuiihya cuñi ndo. Tan tsa sií cuñi ndo na nanduvi tsi tucuiihya iñi. ¹⁰ Ndaahvi jaha ndo tsi ndo nuu Jutu Mañi yo, tyin tacan tan janducahnú ra tsi ndo.

Ña cahan nyaa ndo tsi nyivi

¹¹ Yañi, ña cahan ndo ndavaha ñi siqui iin yañi yo. Tyin nyivi caahán ndavaha ñi siqui

nyivi, o caahán nyaa ñi nyivi, siqui ley Nyoo caahán ñi ndavaha ñi tan caahán nyaa ñi cuví can. Tyin tun caahán nyaa yo ley Nyoo, juez jahá yo tsi yo tsa nuu tsa tyaá yahvi yo tsa caahán ley can. ¹² Tyin intuhun ñi ra tsahá ley can. Tan juvin ñi ra cuví Juez. Tan juvin ra cuví ra jacacú tsi yo, o jacunaá tsi yo. Tan ¿yoocho yoo ra cuví un tyin cahan nyaa un tsi inga nyivi, tan tatsi tuñi un tsi ñi tan jaha un tsi un tumaa juez?

Ña tsitó yo náa cua cuví tsi yo tyaan, yacan cuenda ña taahán tsi cahnu jaha yo tsi yo

¹³ Yihí ndo catyí ndo: “Vityin o tyaan cuhun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyí ndo. Maa tyin tyaá soho ndo tsa cua cahan yu ihya: ¹⁴ Ñayivi tsa iyó yo cuví tsi tumaa vico nuhu tsa tuhvá yihí tan iin yaha ñi naa ihñi nyico. Ndi ña tsitó ndo tsa cua cuví tyaan tan catyí ndo tyin cuhun ndo. ¹⁵ Vaha ca cahan ndo tyehe: “Coo yo juhva ca quivi tan javaha yo tsehe o yacan, tun Jutu Mañi yo tan cuñi ra.” ¹⁶ Maa tyin nyoocho ña caahán ndo tacan, tan cahnu xaan jahá ndo tsi ndo. Tan Nyoo ña taahán iñi ra nyehe ra tsi nyivi javahá tacan. ¹⁷ Tyin yoo tsa tsitó javaha tsa vaha tan ña javahá yo can, tsicoó cuatyí yo.

5

Nu tsahá cuenda ra Santiago náa cua tahan nyivi cuca

¹ Tyaa soho ndo tuhun caahán yu ihya, nyoocho nyivi cuca! Vacu ndo tsihin tsa cuihya cuñi ndo, çana tsa ndo tsa cuenda tundoho tsa cua nyehe ndo. ² Tyin tsa cuca tsa jacayá ndo, tsa ndihi can tyaahyú. Tan jahma vaha ndo, tsa ndihi maa can tsatsj tiquixin. ³ Xuhun cuaan tan xuhun cuitsin ndo tsa ndihi can cuxí. Tan cuxi can tsahá cuenda can tyin ña vaha javahá ndo tsihin xuhun ndo. Tan juvin can cuví tumaa ñuhu tsa cua cahmi tsi ndo. ¿Nacuenda jacayá ndo tsa cuca nu cua ndihi quivi ihya? ⁴ Tan ña tyahvi ndo yahvi tsa taahán tsi tsi nyivi ndaahvi tsa jahá tyiñu tyiñu ndo. Tan vityin tsicán ñi cuatyí tsaha ndo nuu Jutu Mañi yo, ra ndacá ñaha tandihi ángel tsa cuví andaru cuenda ra. Tan maa Jutu Mañi yo tsiñi ra tuhun caahán ñi ndaahvi can. ⁵ Iyó vaha xaan ndo nu ñuhu ñayivi ihya tyin cuca ndo. Tan javahá ndo cuhva cuñi maa ndo. Tumaa tuhvá nyivi janduxaahán quini tyin cuu ti, tacan javahá ndo tsihin ndo. Tan vityin tsa tsaá quivi tsa cua cuu ndo. ⁶ Tyin tyaá ndo cuatyí tsaha nyivi vaha tan tsahñi ndo tsi ñi. Tan ndi ña cahan ñi cuatyí siqui ndo.

Na cunyeé iñi yo cuatu yo tsi ra Cristo

⁷ Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi cuhu ndatú ra nda cuun savi tsa jihna tan nda ndihi cuun nyico tsi, tan naquihin ra tsa tatsj ra. ⁸ Tan tacan taahán tsi cunyeé iñi yo cuatu yo tsi Jutu Mañi yo. Jandu iin ndo iñi ndo tyin tsa yatyin cuii quitsi ra.

⁹ Yañi, ña tyaá ndo cuatyí tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñi quitsi ra. ¹⁰ Yañi, quihin cuenda ndo cuhva tsicoó ra cuví ndusu yuhu Nyoo tahán tsanaha. Tyin ra ican naha ra cunyeé xaan iñi ra naha nyehe ra naha tundoho quivi tsahá cuenda ra naha tuhun Jutu Mañi yo. ¹¹ Tsitó yo tyin si xaan cuñi ra tsa cunyeé iñi nyehe tandihi nuu tundoho, tumaa tsa cunyeé xaan iñi ra Job nyehe ra tundoho. Tan nu ndihi ña, cuaha xaan tsa vaha tsahá Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahvi iñi ra nyehe ra tsi yo. ¹² Maa tyin yañi, ña cahan ndo: “Naha Nyoo maa”. Tan ña cahan ndo: “Tsító vaha maa ra nyaá gloria”, tan ndi ña cahan ndo: “Tsító vaha maa ra javahá ñuhu ñayivi”, tan ndi ña cahan ndo inga ca tuhun tahan can. Tatun nditsa tuhun caahán ndo, “nditsa” catyí ndo. Maa tyin tatun tsitó ndo tyin ña nditsa, catyí ndo tyin “ña nditsa”, coto tatsi tuñi Nyoo tsi ndo.

¹³ Tun ndáa nyoocho nyehe tundoho, ndacan tahvi ndo tsi Nyoo. Tan nyoocho tsa si cuñi, çata ndo yaa Nyoo. ¹⁴ Tan nyoocho tsa cuhvi, çana ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihi ra naha acetye tsi ndo tsihin sivi ra Cristo. ¹⁵ Tan tatun tsinú iñi ra naha tsi Nyoo cuhva tsa tsicán tahvi ra naha, nyivi cuhvi can cua nduvaha ñi. Tan Jutu Mañi yo cua janduvita ra tsi ñi. Tan tatun tsicoó ñi cuatyí, Nyoo cua jaha ra tucahnu iñi tsi ñi. ¹⁶ Yacan cuenda nahma ndo cuatyí ndo tsi iin ndo tan tsi inga ndo. Tan ndacan tahvi ndo tsi Nyoo tsa cuenda inga ca nyivi na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo. ¹⁷ Tumaa ra Elías ra cuví ndusu yuhu Nyoo tahán tsanaha. Cuví ra iin rayi tumaa maa yo. Tan tsicán tahvi ra tsi Nyoo tyin na ña cuun savi. Tan ña cuun savi uñi cuiya sasava. ¹⁸ Yahá can tan tsicán tahvi nyico ra tsi Nyoo inga tsaha tyin na cuun savi. Tan cuun tsi inga tsaha. Tan tsahnu tsiti tsa tatsj nyivi.

¹⁹ Yañi, tatun iin nyivi tahan ndo nacoó ñi tuhun nditsa Jutu Mañi yo, tan cuanuhú ñi ñayivi inga tsaha, tan jatyinyee ndo tsi ñi tsa nanducu nyico ñi ityi Nyoo, ²⁰ coto ndo tyin tsa javahá ndo tacan tsihin ñi, jacacu ndo aña ñi tan ña cua cuhun ñi anyaya. Tan jahá Nyoo tucahnu iñi cuatyí ñi jahá ndo.

Carta Tsa Jihna Ñi Tsa Jacuhun Ra Pedro Tsi Nyivi Yihi Cuenda Nyoo

Nu quitsahq̄ tyaá ra Pedro carta tsa cuenda nyivi yihi cuenda Nyoo

¹Yuhu ra Pedro tava tyiñu ra Jesucristo tsi yu na caca yu tyiñu ra. Tyaá yu carta ihya tsa cuenda nyooho tsa iyó ñuu tsa cayucú Ponto, tan Galacia, tan Capadocia, tan Asia tan Bitinia tsa ñavin ñuu ndo cuví. ²Tyin nda tsanaha tan nacatsj̄ vaha maa Nyoo Jutu yo tsi nyooho tyin cuví ndo nyivi ra. Tan tsa cuenda tsa nacatsj̄ ra tsi ndo, jatyinyee Tatyí li ra tsi ndo tan nacuhv̄a ndo tsi ndo tsi ra, tan tyaá yahvi ndo tsi ra Jesucristo vityin, tan ndundí ndo tsihin ñiñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

Cuita iñi ndo tyin cua ñihi yo ñayivi tsaa coo yo

³Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñi ra nyehé ra tsi yo. Tan tsahá ra tsa nacacu tsaa yo inga tsaha tyin janandot̄o ra tsi ra Jesucristo. Yacan cuenda cuita iñi yo tyin cua ñihi yo ñayivi tsaa tsa ña cua naa maa. ⁴Tan tsa cuenda tsa nacacú tsaa yo, Nyoo cua cuhva ra tandihí tsa cumí vaha ra nda gloria tsi yo. Tan ña cua naa maa tsi, tan ndi ña cua tivi tsi, tan ndi ña cua ndahva tsi tumaa ndaahvá ita. ⁵Tan tsa cuenda tsa tsinú iñi yo tsi Nyoo, jahá cuenda ra tsi yo tsihin tunyee iñi ra nda cuanda ndihi cacu yo. Tan cua janaha ra tsi yo náa cuñi tsi catyí tsa cacú yo nu cua ndihi tyembu tyin tsa ndatú vaha can tsi yo.

⁶Yacan cuenda s̄i cuñi ndo, vasu ndi maa nyehé ndo tandihí nuu tundoho juhva quívi vityin. ⁷Tyin tandihí maa tundoho can tan taahán tsi nyehé yo can tyin tacan tan coto vaha yo tun nditsa tyin tsinú iñi yo tsi Nyoo. [Tyin tsa tsinú iñi yo cuví tsi tumaa xuhun cuaan.] Tan tumaa tsahmí yo xuhun cuaan tun cuñi yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan tsindihí ñi maa can. Maa tyin tun ña jandihí yo tsa tsinú iñi yo tsi Nyoo, cua quituvi yo nuu ra tan cua jacahnu nyivi tsi maa ra tan tsi maa yo quívi quitsi Jutu Mañi yo Jesucristo inga tsaha.

⁸Nyooho cuñi ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan s̄i xaan s̄i xaan cuñi ndo nda cuanda ña cuví

ñihi ndo cuhva catyí ndo najava cuhva tsa s̄i cuñi ndo, ⁹tyin nu ndihi cua cacu ndo tan yacan cuví tsa cua ñihi ndo jahá tsa tsinú iñi ndo tsi Nyoo.

¹⁰Ra ndusu yuhu Nyoo tsa tsicoq̄ tahan tsanaha nducú tuhun ra naha nácaa cua cacu yo. Tan nducú ra naha cuhva coto ra naha náa cuví tsi. Tyaá ra naha nu tutu cuenda tsa vaha tsa cua cuhva Nyoo tsi yo.

¹¹Tan Tatyí li ra Cristo tsa iyó tsihin ra naha jacot̄o tsi tsi ra naha náa ndihi tundoho cua nyehe ra Cristo, tan nácaa cua jacahnu Nyoo tsi ra. Tan nducú xaan ra naha cuhva coto ra naha yóo ra cua cuví ra Cristo tsa cua tahan tacan, tan ama cua cuví tuhun tsa catyí Tatyí li tsihin ra naha. ¹²Maa tyin jacot̄o Nyoo tsi ra naha tyin tyiñu tsa javahá ra naha, ñavin tsa vaha tsi maa tsi maa cuví can, tyin tsa vaha tsi maa yo cuví can. Tan tandihí tsa cahān ra naha juvin tsi cuví tuhun tsa jacacú ra Jesucristo tsi yo tsa tsa yaha tsinú ndo. Tan ra tsa cahān tuhun ihya naha ra, maa Tatyí li Nyoo jacahān tsi ra naha. Tan ra ángel naha ra cuñi xaan ra naha coto ra naha tuhun ihya.

Nyoo caná ra tsi yo tyin coo yo ñayivi cuiti

¹³Yacan cuenda jahā vaha ndo cuenda tsi ndo tsihin tsa javaha ndo. Cuiti coo ndo. Cuita iñi ndo tyin quívi quitsi ra Jesucristo inga tsaha cuaha tsa vaha cua cuhva Nyoo tsi yo tsa cuenda tsa vaha iñi ra. ¹⁴Cq̄o ndo tumaa iyó tsa nyihi tsa tyaá yahvi tsi jutu. Ña coo ndo tumaa tsicoq̄ ndo quívi tsa ndi cumañi ca nacoto ndo tsi Nyoo tyin tsanaha tsindac̄a ñaha tsa ña vaha tsa cuñi cuñu ñuhu ndo tsi ndo. ¹⁵Maa tyin vityin coo ndo ñayivi cuiti tyin maa Nyoo, ra tsa canā tsi ndo, cuiti iyó ra. ¹⁶Tyin tacan catyí ra nu tutu ra: “Cuiti coo ndo tyin maa yu cuiti iyó yu”, catyí Nyoo.

¹⁷Tatun tuhv̄a ndo tsicán tahvi tsi Nyoo tan catyí ndo tsihin ra “Jutu Mañi yu”, jahā cuenda ndo tsi ndo tan jahā ndo tsa ñayivi tsi ra tsitsi tsa iyó ndo nu ñuhu ñayivi ihya. Tyin Nyoo jahá ra cuenda cuhva iyó tsa intuhun intuhun yo, an cuví yo nyivi cuca, an nyivi ndaahvi. ¹⁸Nyoo nasama ra cuhva tsa ña vaha tsicoq̄ ndo, cuhva tsa janahá tsii tsaahnu ndo tsi ndo. Tan tsitó vaha ndo tyin ñavin tsihin xuhun cuaan o xuhun cuitsin tsa tsindihí ñi maa tyahvi ra tan cacú yo, ¹⁹tyin tyahvi ra tsihin ñiñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyí luhlu tsa ña pehe [tsa tuhv̄a nyivi Israel jamañi nuu Nyoo], tan tsih̄i ra vasu ndi maa nduve cuatyí ra. ²⁰Tsa ndi cumañi ca tsinu ñuhu ñayivi tsinyaa cuhva tyin tyehen cua tahan ra Cristo. Maa tyin ña cuví tsi tsa numi ñi. Nda cuanda vityin nu cua ndihi quívi, cuví tandihí can tsa cuenda tsa vaha tsi maa yo.

²¹ Tsa cuenda ra Cristo tan tsinú iñi ndo tsi Nyoo tyin juvin ra janandoto tsi ra Cristo tsa yaha tsihi ra tan jacahnu ra tsi ra. Tan yacan cuenda tsinú iñi ndo tsi Nyoo tan nyitá iñi ndo tyin cua naquihin ra tsi ndo.

²² Tsihin tunyee iñi Tatyí Iin Nyoo tyaá yahvi ndo tuhun nditsa. Tan tsa ndundi ndo jaha Nyoo tsa cuenda tsa tyaá yahvi ndo tuhun nditsa can. Tyin tacan tan cuví cuñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa nñi iñi ndo, tan tsihin tandihi tunyee iñi tsa iyó tsi ndo.

²³ Tyin tsa nacacú tsa ndo, maa tyin ñavin tumaa cacú nyivi nu ñuhu ñayivi ihya, tyin jutu ndo cacú ra naha jaha sihi ra naha tan tsihi ra naha. Tan nyoocho vityin nacacú tsa ndo tsihin Nyoo tsa ña cua cundihi maa, tyin tacan ñi cua coo maa tsi. ²⁴ Tyin catyí tuhun Nyoo tyehen:

Tandihi nyivi tsa iyó nu ñuhu ñayivi ihya cuví ñi tumaa cuhu.

Tan tsa cahnu tsa javahá ñi cuví tsi tumaa ita.

Tyin cuhu can na ityí can, tan cucoyó ita can. [Tacan cuví nyivi, tyin iin yaha ñi tsihi ñi.]

²⁵ Maa tyin tuhun Jutu Mañi yo tacan ñi iyó maa tsi.

Tan tuhun ihya cuví tuhun vaha tsa jacacú Nyoo tsi yo tsa caahán ndi tsihin ndo.

2

¹ Yacan cuenda nacoo ndo tandihi nuu tsa caquiñi. Ña jandavi ñaha ndo tsi nyivi, ña jaha ndo tyin vaha ndo tan ña nditsa, ña nyiyo iñi ndo nyehe ndo tsa iyó tsi inga nyivi, ña cahan ca ndo cuendu. ² Javaha ndo tumaa javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyoocho tuhun Nyoo tyin juvin tsi cua jacahnu tsi ndo tan nacoto vaha ca ndo tsi Nyoo nda cuenda ndihi cacú ndo, ³ tun nditsa tyin tsitó ndo tyin Jutu Mañi yo, vaha xaan ra cuví ra.

Ra Cristo cuví yuu nyito

⁴ Cunya naa ndo tsi Jutu Mañi yo. Tyin juvin ra cuví yuu nyito tsa ña cuñi nyivi cuatyí ñi. Maa tyin Nyoo nacatsi ra tsi Jutu Mañi yo tyin juvin ra cuví yuu sii caá tsa yahvi nyaá tsa cuenda ra. ⁵ Tatun nya naa vaha yo tsi ra Cristo, cua cuví yo tumaa iin vehe tyin maa Nyoo cuví ra tumaa ra javahá vehe. Cuhva ndo tsa jandu iin Nyoo tsi ndo tsihin ra Cristo tyin tun tsa nya naa vaha ndo tsi ra, cua cuví ndo tumaa ra jutu tsa javahá maa ñi tyiñu Nyoo. Cua jacahnu ndo tsi ra tan sii xaan cua cuñi ra. ⁶ Tyin catyí tucu nu tutu ra tyehen:

Yuhu nacatsi yu iin yuu tsa tsiñi ñuhu ca tan sii ca caá, tan tsaquin yu yuu can nu cua javaha yu vehe yu nda Sión.

Tan nyivi tsa tsinú iñi tsi ra tsa cuví yuu can, ña cua tahan ñi ticanuu. Tacan catyí Nyoo tuhun ra Cristo nu tutu ra.

⁷ Maa tyin tsa cuenda yoo tsa tsinú iñi tsi ra Cristo, ra cuví yuu can, tsiñi ñuhu xaan ra tsi yo. Tan tsa cuenda nyivi tsa ña tsinú iñi tsi ra, cuví ra tumaa iin yuu tsa caahán Nyoo tuhun nu tutu ra tan catyí tsi tyehen:

Yuu tsa ña cuñi ra javahá vehe cuatyí ñu ra, yacan cuví yuu tsa tsiñi ñuhu ca, catyí tsi.

⁸ Tan catyí tucu tsi:

Ra ican cuví yuu tsa cuaha xaan nyivi cua nañi tsa ha tan nduva ñi.

Cuví ra iin cava tsa janduvá tsi ñi, catyí tsi nu tutu Nyoo.

Nduva nyivi can tyin tsiñi ñi tuhun Nyoo, tan ña tyaá yahvi ñi itsi tyin tacan nyaá tyin cua javaha ñi.

Nyivi yihí cuenda Nyoo

⁹ Maa tyin nyoocho cuví ndo nyivi nacatsi maa Nyoo. Tan cuví ndo tumaa jutu tyin javahá ndo tyiñu nuu ra tyin juvin ra ndacá ñaha tsi yo. Tan cuví ndo nyivi ii ityi nuu ra tan cuví ndo nyivi maa ra, tacan tan cahan ndo tuhun vaha tsa javahá ra. Tyin juvin ra tava tsi yo nu naa tan tyiñi ra tsi yo nu nditsin tan nu sii caá. ¹⁰ Tsa ndi cumañi ca cuví ndo nyivi Nyoo, nduve yahvi nyaá ndo. Maa tyin vityin nyivi Nyoo cuví ndo. Quivi can yofi cundaahvi iñi tsi ndo, maa tyin vityin Nyoo cundaahvi iñi ra tsi ndo.

Nu catyí ra Pedro tyin coo yo, tan javaha yo tyiñu nuu Nyoo

¹¹ Yañi, cuñi xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayivi cuví ndo, tyin nda gloria cuví ñuu ndo. Yacan cuenda ña javaha ndo cuhva cuñi cuñu ñuhu ndo. Tyin cañi tahan cuñu ñuhu ndo tsihin aña ndo. ¹² Jaha cuenda ndo tsi ndo nu iyó ndo tyañu nyivi tsa ña tsitó tsi Nyoo. Tyin vasu caahán ñi ndavaha ñi siqui ndo, tan catyí ñi tyin ña vaha ndo, maa tyin quivi quitsi nyehe Nyoo tyiñu javahá yo cua nyehe ñi tyin vaha tsa javahá ndo tan cua jacahnu ñi tsi Nyoo.

¹³ Tyaa yahvi ndo tsi ra cumí tyiñu nu iyó ndo tsa cuenda tsa cuñi ndo tsi Nyoo. Tyaa yahvi ndo tsi ra cumí tyiñu, a cuví ra rey cahnu ca, ¹⁴ a iin ra jaquitsi ra rey tyin tatsi tuñi ra tsi ra iyó cuatyí naha ra tan naquihin ndaahvi ra tsi yoo tsa javahá tsa vaha. ¹⁵ Tyin Nyoo cuñi ra tsa javaha yo maa ñi maa tsa vaha tyin tacan tan ña ñiñi ca nyivi soho tan nyivi ña tsitó ná cahan ñi siqui yo.

¹⁶ Coo ndo tumaa iyó nyivi tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tyiñu nuu Nyoo tyin cuví ndo musu ra. ¹⁷ Jaha ndo tsa ñayivi tsi tandihi ñi nyivi. Cuñi ndo tsi ñi

yihí cuenda Nyoo. Jaha ndo tsa ñayivi tsi ra ndacá ñaha, tyin Nyoo nyehé ra tandihi tsa javahá yo.

Uvi taahan cuhva nyehé yo tundoho

¹⁸ Nyooho tsa cuvi musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra naha, vasu xaan ra naha a vasu vaha iñi ra naha. ¹⁹ Tyin tatun cunyeé iñi yo nyehé yo tundoho tsa janyehé nyivi tsi yo tsa cuenda tsa javahá yo tsa vaha nu Nyoo, cua tsaa can nuu ra. ²⁰ Maa tyin tatun tatsi tuñi nyivi tsi ndo tsa cuenda tsa javahá ndo tsa ña vaha tan cunyeé iñi ndo nyehé ndo tundoho, nduve náa catyi. Maa tyin tatun ña cundihi iñi ndo tan cunyeé iñi ndo nyehé ndo tundoho tsa cuenda tsa javahá ndo tsa vaha, yacan cuvi tsa vaha nuu Nyoo. ²¹ Tumaa tsa nyehé maa ra Cristo tundoho tsa cuenda yo, tacan taahán tsi cunyeé iñi yo nyehé yo tundoho tyin tsa cuenda yacan cana Nyoo tsi yo. ²² Ra Cristo ndi intuhun cuatyí ña javahá ra. Tan ndi iin tsaha tan ña jandaví ñaha ra tsi nyivi. ²³ Quivi jacuñi nyaa ñi tsi ra, ña jacuñi nyaa ra tsi ñi. Quivi tsa janyehé ñi tundoho tsi ra ña jayuhvi ra tsi ñi. Tyin intuhun ñi maa Nyoo cuvi ra tuhvá jacutuñi tsi nyivi tsihin tsa ndaa tan tsihin tsa nditsa. Yacan cuenda natyaa ra tsi ra ndaha Nyoo. ²⁴ Tyin cuhva tsa ticaá ra Cristo nu cruu can, tsicoso tandihi cuvi maa cuatyí yo tsata ra. Tacan cuvi tyin tacan tan ña javaha ca yo cuatyí, tan coo yo ñayivi cuiti. Tyin tsihin tsa ñicuehe ra, tan nduvahá yo. ²⁵ Tyin quivi can tsicá nuu yo cuvi yo tumaa mbee tsa ndoo ihñi, tsa nduve tsitoho. Maa tyin vityin nacuhvá cuenda yo tsi yo tsi ra Cristo, tan jahá cuenda ra añima yo. Cuví ra ityi nuu tsihin yo.

3

Nacaa taahán tsi coo nyivi tindaha

¹ Tacan tucu nyooho, ñiñaha tsa iyó yii. Tyaa yahvi ndo tsi yii ndo tyin tatun ña tsinú iñi ra tsi ra Cristo, cua tsinu ndihi iñi ra tsi ra Cristo tsihin cuhva javahá ñi ndo tyin nyehé ra tyin vaha tsahá ndo tsa quihí ndaha ra tsi ndo. Tan ña cuñí tsi cuaha xaan cahan ndo tsihin ra, ² tyin nyehé ra tyin catsi iyó ndo tan jahá ndo tsa ñayivi tsi ra. ³ Ña caca xaan iñi ndo janduvaha ndo tsi ndo ityi tsata ñi, tyin ña ñiñi xaan cuñi tsi tsa iyo xaan janduvaha ndo jiñi ndo, tan cuatyíñu ndo tsa cuvi xuhun cuaan tan cunditsi ndo jahma xiñu xaan. Ña nducu ndo tandihi yacan. ⁴ Maa tyin jandutyaquí ndo tsi ndo tsihin tsa quitá añima ndo tyin tun cuiti iyó yo tan vita iñi yo, tan taxin iyó yo, yacan cuvi tsa sii ca caá nuu Nyoo. Tan ña cua tivi maa can. ⁵ Tyin tsihin tsehe ndutyaquí ñiñaha tsa nacotó tsi Nyoo, ñi tsa tsicoo tahan tsanaha. Nyita iñi ñi tsi Nyoo tan tyaa yahvi ñi tsi yii ñi. ⁶ Tumaa

ñi Sara, tyaa yahvi ña tsi ra Abraham yii ña. Tan catyi ña: “Tata”, tsihin ra. Tatun nyooho tan javahá ndo tsa vaha tan ndi luxu maa tan ña nayuhvi ndo, cua cuvi ndo tumaa maa ña.

⁷ Tan tacan tucu nyooho, ra iyó ñasihi naha ra, cutuñi iñi ndo cuhva coo ndo tsihin ñasihi ndo. Jaha ndo tsa ñayivi tsi ñi tsa cuenda tsa vita ca cuñu ñuhu ñi tan ñavin ca cuñu ñuhu nyooho tan tsa cuenda tyin iin caa ñi tsahá ra tumañi iñi tsi ndo, tan yacan cuvi ñayivi iyó ndo. Javaha ndo tyehen tyin tacan tan tñn cuenda Nyoo tuhun caahán ndo tsihin ra.

Nu tsahá cuenda ra Pedro nácaa taahán tsi coo yo

⁸ Nu ndihi tuhun, iin ñi cuhva caca iñi tandihi ndo. Cundaahvi tahan iñi ndo tsi ndo. Cuñi tahan ndo tsi ndo tumaa tsa cuñi ndo tsi yañi ndo tsa cacu tsihin ndo. Vita cahan ndo tsihin tahan ndo, tan ña cahnu jaha ndo tsi ndo; cuvi ndo nyivi vaha.

⁹ Ña javaha ndo tsa ña vaha tsihin nyivi tsa javahá tsa ña vaha tsihin ndo. Ña cahan ndo tsi ñi tatun caahán ñi tsi ndo, tyin Nyoo cana ra tsi ndo tyin javaha ndo tsa vaha tsihin ñi tyin tacan tan cua nasoco ra tsi ndo. ¹⁰ Tyin tuhun Nyoo catyi tsi tyehen:

Nyivi tsa cuñi coo ñayivi tsihin tsa sii, cuñi tsi jaha ñi cuenda yaa ñi, tan ña cahan ñi tsa ndavaha ñi,

tan ndi ña cahan ñi cuendu.

¹¹ Jandihi ndo tsa javahá ndo tsa ña vaha, tan javaha ndo tsa vaha.

Nducu ndo cuhva coo taxin ndo, tan coo ndo tacan.

¹² Tyin Jutu Mañi yo jahá cuenda ra tsi nyivi vaha.

Tatun caahán ñi tsihin ra, tyaá soho ra tsa caahán ñi.

Maa tyin nyivi javahá tsa ña vaha, ña cuñi ra nyehé ra tsi ñi.

¹³ Ndi intuhun maa nyivi tan ña cuvi javaha ñi tsa ña vaha tsihin ndo tatun nyooho tan maa ñi tsa vaha nanducú ndo.

¹⁴ Cusi iñi ndo vasu ndi maa nyehé ndo tundoho tsa cuenda tsa javahá ndo tsa vaha. Tan ña nayuhvi ndo tun jayuhvi nyivi tsi ndo.

¹⁵ Jacahnu ndo tsi ra Cristo tsitsi añima ndo. Cuhva ndo tsa cundaca ñaha ra tsi ndo. Caca iñi ndo tuhun Nyoo tyin tatun ndaca tuhun nyivi tsi ndo nacuenda tsinú iñi ndo tsi ra, cuvi cuhva cuenda ndo tsi ñi.

Tan javaha ndo can tsihin tsa ña cahnu jahá ndo tsi ndo tan jaha ndo tsa ñayivi tsi ñi. ¹⁶ Catsi coo ndo tyin tun catsi iyó ndo ña cua nducahan nuu ndo nuu Nyoo.

Tan tatun caahán nyivi ndavaha ñi siqui ndo tsa cuenda tyin vaha cuahán ndo tsihin ra Cristo, juvin ñi maa ñi tan cua nducahan nuu ñi tsa cuenda tsa cahan ñi siqui ndo.

¹⁷ Vaha ca nyehé yo tundoho tsa cuenda tsa javahá yo tsa vaha tatun Nyoo cuñí, tan ñavin ca tsa nyehe yo tundoho cuenda tsa ña vaha. ¹⁸ Tyin ra Cristo nyehe ra tundoho tan tsihi ra iin tsaha ñi tsa cuenda cuatyin tandihi yo. Ra vaha cuví ra maa tyin nyehe ra tundoho tan tsihi ra tsa cuenda yo tsa cuví yo nyivi caquiñi, tyin tacan tan cuví tsaa yo nu nyaá Nyoo. Tsihi cuñi ñuhu ra, maa tyin nandoto nyico ra tsihin Tatyí li ra. ¹⁹ Tacan tan tsihin Tatyí li ra tsahan ra tsicahan ra tsihin añima nyivi tsa yucú anyaya. ²⁰ Tan ñi ican cuví ñi tsa ña tyaa yahví tsi Nyoo quivi tsicoq ra Noé tahañ tsanaha, tyin ñi tsinú yutun ndoo tacan tsa ndatú Nyoo tsa ndu uvi ñi ñi cuatyí ñi. Maa tyin ña cuaha ñi cacú quivi cuñ savi cahnú tsa tsahñi ndutya ñuhu tsi ñi. Una taahan ñi ñi cacú tsitsi yutun ndoo tyin nandaq yutun ndoo can nu ndutya ñuhu. ²¹ Tan tacan tucu maa yo tumaa tsa cacú ñi ican, tacan cacú yo quivi tsicoondutya yo. Maa tyin ñavin nyahyu yo nacatya ndutya can tsa tsicoondutya yo. Yacan cuñí tsi catyi tsa tsicán tahvi yo tsi Nyoo na nacatya ra añima yo tan cacú yo jahá tsa nandoto ra Jesucristo. ²² Tan nandaq ra nda gloria, tan nyaá ra xiin cuaha Nyoo vityin. Ndacá ñaha ra tsi ángel tan tandihi tatyí ña vaha tsa ndacá ñaha tsi nyivi.

4

Jaha tyiñu ndo nuu nyivi yihí tuhun Nyoo tsihin ndo nácaa tsahá maa Nyoo tsi ndo.

¹ Yacan cuenda janyee ndo ñi ndo nyehe ndo tundoho tumaa nyehe ra Cristo tundoho tsihin cuñi ñuhu ra. Tyin nyivi tsa nyehe tundoho tsihin cuñi ñuhu ñi, ña javahá ca ñi tsa caquiñi tsa cuñí cuñi ñuhu ñi. ² Tyin tacan tan tandihi quivi coo ñi cua javaha ñi cuhva cuñí Nyoo, tan ñavin cuhva cuñí cuñi ñuhu ñi. ³ Vityin tsindihi tsa javahá ndo tsa caquiñi tsa taahán ñi nyivi tsa ña tsitó tsi Nyoo. Tsicoq ndo cuhva cuñí ndo, cuaha tsa caquiñi javahá ndo, tan javahá ndo tsa caquiñi tsa cuñí cuñi ñuhu ndo. Javahá ndo vico tan tsiñi ndo. Tan jachahnu ndo tsitoho tsa ña taahán tsi jachahnu ndo. ⁴ Tan vityin tsa ña cutahán ca ndo tsihin ñi tan ña javahá ca ndo tsa caquiñi tsa javahá ñi, iyo cuñí ñi. Tan caahán ñi ndavaha ñi siqui ndo. ⁵ Maa tyin tandihi tsa caahán ñi tan tsa javahá ñi cua nacuhva cuenda ñi can tsi ra cua jacutuñi tsi nyivi nyitó tan nyivi tsihi. ⁶ Yacan cuenda jacoto ra Cristo tuhun vaha tsi ndiyi. Tyin tacan tan cuvi coo añima ñi tumaa iyó Nyoo, vasu ndi maa tsihi ñi nu ñuhu ñayivi ihya tumaa tsihi tandihi ca nyivi.

⁷ Tsa yatyin cuí cundihi tandihi maa tsa iyó nu ñuhu ñayivi ihya. Yacan cuenda catsi

cqo ndo tan ña jandihi ndo tsa ndacan tahvi ndo tsi Nyoo. ⁸ Tsa jihna ñi taahán tsi tsa cuñi tahan ndo tsi ndo, tyin tatun cuñi tahan yo tsi yo, cuaha tsaha cua jaha yo tucahnu ñi tsi ñi. ⁹ Tatun tsaa iin nyivi vehe ndo, vaha tyannu ndo tsi ñi tan ña caca ñi ndo tyin jatyañu ñi tsi ndo. ¹⁰ Tan cuñí tsi tsa jaha tyiñu intuhun intuhun ndo nuu nyivi tahan ndo nácaa tsahá maa Nyoo tsi ndo. Tyin siin siin tsa tsahá Nyoo tsi tsa intuhun intuhun yo. Tan taahán tsi cuatyíñu yo can tsihin tahan yo. ¹¹ Tatun tsahá Nyoo tuhun cahan un tsihin nyivi, cahan, maa tyin maa ñi tuhun tsa tsahá ra tsi un. Tatun tsahá ra tyin javaha un tyiñu nuu nyivi, javaha tsihin tunyee ñi tsa tsahá maa ra. Tandihi tsa catyi Nyoo tyin javaha ndo, javaha ndo can, tyin tacan tan jachahnu nyivi tsi Nyoo tsa cuenda ra Jesucristo. Tyin intuhun ñi maa Nyoo taahán tsi jachahnu yo. Tan na cundaca ñaha ra tsihin tunyee ñi ra tacan ñi maa. Tan na cuvi tsi tacan.

Sii cuñí ndo tun nyehe ndo tundoho tsa cuenda ra Cristo

¹² Yañi tsa cuñí xaan yu, ña iyo xaan cuñi ndo tatun vatsí tundoho ñihi siqui ndo. Ña cuñi ndo tyin ña taahán tsi nyehe ndo tundoho. ¹³ Cu sii ñi ndo tyin cuvi nyehe ndo tundoho tumaa nyehe ra Cristo tundoho. Tyin tacan tan quivi quitsi nyico ra Cristo inga tsaha, sii cua cuñi ndo nyehe ndo tsa cahnú cuví ra. ¹⁴ Tatun caahán nyivi ndavaha ñi siqui ndo tyin nyicún ndo tsi ra Cristo, sii cuñi ndo, tyin nyaá Tatyí li Nyoo tsihin ndo. Maa ñi caahán ñi ndavaha ñi siqui ra Cristo, maa tyin nyoocho jachahnu ndo tsi ra. ¹⁵ Tatun nyehe ndo tundoho tsa cuenda yacan, vaha, tan ñavin ca tsa nyehe ndo tundoho tsa cuenda tsa tsahñi ndo, o tsa suhú ndo, o javahá ndo tsa ña vaha, o tsa tyihí ndo tsi ndo nu ña taahán tsi. ¹⁶ Maa tyin tun nyehe ndo tundoho tsa cuenda tsa yihí ndo cuenda ra Cristo, ña nducahan nuu ndo. Jachahnu ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

¹⁷ Tyin tsa tsaa quivi tsa quitsahá jacutuñi Nyoo tsi tandihi nyivi. Tan jihna ca yoo tsa yihí cuenda ra cua cutuñi. Tatun tyehen tatsi tuñi Nyoo luxu ñi tsi yoo, ¿nácaa cua tatsi tuñi ra tsi nyivi tsa ña tyaa yahvi tuhun caahán ra? ¹⁸ Tatun yí cacú añima nyivi vaha, ¿nácaa cua cacú añima ñi quíñi iyó, ñi ña vaha? ¹⁹ Yacan cuenda tatun nyehe ndo tundoho cuhva cuñí Nyoo, cuñí tsi tsa jañihi ca ndo javaha ndo tsa vaha. Tan tyaa cuenda ndo añima ndo ndaha ra tyin maa ra javahá tsi yo, tan cua javaha ra tumaa caahán ra.

5

Nu tsahá cuendará Pedro tsiyo nácaa coo yo

¹ Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuví tucu maa yu. Tan cuví yu tsandaa tyin nyehe yu tandihí tundoho tsa tahan ra Cristo. Tan cua cutahan yu tsihin tandihí ca ra naha quívi quítsi ra Cristo inga tsaha tsihin tsa cahnu cuví ra. ² Jaha cuenda ndo tsi nyívi yihí tuhun Nyoo tsa yihí ndaha ndo, tumaa jahá cuenda vaha iin ra mbee jana ra. Javaha ndo can tsihin tsa níi íñi añima ndo tan ñavin tsihin tsa ñíñi, maa tyin cuhva cuñí Nyoo. Ña javaha ndo can tsa cuenda tsa cuñí ndo xuhun. Tandihí tyiñu javahá ndo, javaha ndo can tsihin tsa cacu íñi ndo. ³ Tyin tun vaha iyó ndo nyehé ñi, tacan cua coo ndihí ñi tyin nyehe ñi tyin ña ndacá ñaha ñihí ndo tsi ñi. ⁴ Tacan tan quívi cua quítsi ra cuví ityi nuu tsihin nyoocho tsa jahá cuenda mbee jana Nyoo, cua cuhva ra tsa síi caá tsa ña cua tíví maa tsi ndo.

⁵ Tacan tucu nyoocho, ra cuatyí tan ñi cuatyí, tyaa yahví ndo tsi ra tsahnu naha ra. Tan tandihí ndo ndaahví jaha ndo tsi ndo tan tyaa yahví tahan ndo tsi ndo. Tyin catyí nu tutu Nyoo tyehen:

Nyoo ña cuñí ra nyehe ra tsi nyívi tsa yaa xaan,

Maa tyin jatyinyeé ra tsi ñi tsa ña yaa.

⁶ Yacan cuenda ndaahví jaha ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee íñi tsa iyó tsi ra, tyin tacan tan cuví jacahnu ra tsi ndo quívi cua tahan tsi. ⁷ Tyaa cuenda ndo tandihí tsa tsicá xaan íñi ndo ndaha Nyoo tyin maa ra jahá cuenda tsi ndo.

⁸ Catsi cùhun íñi ndo tan jaha vaha ndo cuenda ndáa tsa vaha tan ndáa tsa ña vaha, tyin nu ña vaha, nu xaan íñi tsi yo, tsicá nuu nu nanducú nu yóo jaha canaa nu tumaa tsicá nuu ndicaha xaan nanducú tí tsa catsi tí. ⁹ Ñihí cùnyecu ndo tsihin tsa tsinú íñi ndo tsi Nyoo tyin tacan tan cuví jaha ndo tsi nu ña vaha. Tyin juvin ñi tundoho tsa nyehé nyoocho tan nyehé tucu tandihí ca nyívi yihí cuenda ra Cristo taníi cahnu nu ñuhu ñayívi.

¹⁰ Maa tyin Nyoo jatyinyeé ra tsi yo, tan tsa yaha nyehe ndo tundoho juhva quívi, Nyoo cua jacutsa ca ra tsi ndo, ñihí cùnyecu ndo tsihin tsa tsinú íñi ndo, tan cua cuhva ca ra tunyee íñi tsa iyó tsi ra tsi ndo. Tan juvin Nyoo cuví ra tsahá tandihí tsa vaha tsi yo, tan maa ra cana tsi yo tyin ndu iin yo tsihin ra Cristo tyin coo yo nu síi caá tsihin ra tacan ñi maa. ¹¹ Na jacahnu yo tsi ra tan na cundaca ñaha maa ra tacan ñi maa. Tan na cuví tsi tacan.

Nu tsahá ra Pedro nacumi tsi nyívi nu ndihí ña

¹² Jaquitsí yu carta ihya tsi ndo tsihin ra Silvano, yañi yo. Tyin tsitó yu tyin níi xaan íñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihí ndo janahá tsi tyin nditsa tsa cuñí xaan Nyoo tsi yo. Yacan cuenda ña nacoo ndo itsi.

¹³ Nyívi yihí cuenda Nyoo ñuu Babilonia tsa nacatsí Nyoo tumaa nacatsí ra tsi nyoocho, jaquitsí ñi nacumi tsi ndo. Tan ra Marcos, sehe yu tsa cuenda Jutu Mañi yo, jaquitsí ndihí ra nacumi tsi ndo.

¹⁴ Cuñí tahan ndo tsi ndo tan cùhva tahan ndo nacumi tsi ndo.

Na coo ca tsa taxin añima tandihí nyoocho tsa iin ñi cuví tsihin ra Jesucristo.

Tan na cuví tsi tacan ñi.

Carta Tsinu Uvi Tsa Jacuhun Ra Pedro Tsi Nyivi Yihí Cuenda Nyoo

*Nu tyaá ra Pedro inga carta tsa cuenda
nyivi yihí cuenda Nyoo*

¹ Yuhu ra Simón Pedro cuví yu musu ra Jesucristo, tan cuví yu iin ra tava tyiñu ra tyin caca yu tyiñu ra. Tyaá yu carta ihya tsa cuenda nyooho tsa natsinu vaha iñi tsi Nyoo tumaa tsa tsinú iñi nyuhu. Inducu ñi tsinú iñi yu tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvín ra cuví ra jacacú tsi yo. ² Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxin ca tsi. Yacan ñihí ndo tsa cuenda tsa nacotó ndo tsi ra tan tsi Jutu Mañi yo Jesús.

*Nacaa taahán tsi coo nyivi yihí cuenda
Nyoo*

³ Nyoo, tsihin tunyee iñi tsa iyó tsi ra, tsahá ra tandihí tsa tsiní ñuhu tsi yo tyin tacan tan coo yo ñayivi tsa iyó ra tan cuví yo tumaa maa ra. Tandihí tsehe ñihí yo tsa cuenda tsa tsahá ra tsa nacotó yo tsi ra tsa caná tsi yo. Tyin caná ra can tsi yo tsihin tsa cahnu cuví ra tan tsihin tsa iyo tsa javahá ra. ⁴ Tan tsihin tandihí tsa vaha can, tsahá tucu ra tsa catyi ra tyin cuhva ra tsi yo. Maa tyin cahnu xaan tan yahvi xaan can. Maa tyin tsahá ra can tsi yo tyin tacan tan cuví coo yo tumaa maa ra tyin tsa nacotó yo tandihí tsa caquiñi tsa javahá yo, tan ña cua tivi yo tumaa tivi nyivi nyicún tsa ña vaha tsa iyó nu ñuhu ñayivi ihya. ⁵ Yacan cuenda cuñi tsi tsinú ca iñi yo tsi Nyoo tan ñavin yacan ñi tyin cuñi tucu tsi nducu yo cuhva coo cuñi yo. Tan cuñi tucu tsi nducu yo cuhva cutuñi vaha iñi yo cuhva cuñi Nyoo tsihin yo. ⁶ Yaha can tan nducu yo cuhva cundaca ñaha yo cuñu ñuhu yo tan cuhva tsicá iñi yo. Yaha can tan nducu yo cuhva tsa ña yatyi xaan cundihi iñi yo. Yaha can tan nducu yo cuhva coo yo ñayivi iyó Nyoo. ⁷ Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyivi tumaa tsa cuñi maa Nyoo tsi tandihí yo.

⁸ Tatun tacan iyó ndo tan tacan nducú ndo cuhva tsa coo tandihí tsehe tsi ndo, cua cutyiñu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihí yacan. ⁹ Maa tyin nyivi tsa nduve yacan iyó tsi, cuví ñi tumaa iin ra cuaa. Ña cutuñi iñi ñi tsa taahán tsi coto ñi. Tan tsa naq iñi ñi tyin ndatsi Nyoo cuatyí ñi tahan tsanaha. ¹⁰ Nyoo caná tsi ndo tan nacatsi ra tsi ndo. Yacan cuenda

yañi, tun javahá ndo tandihí tsa caahán yu tuhun ihya, ña cua nduva ihñi ndo. ¹¹ Tacan tan ña yñi cua quihvi ndo nu ndacá ñaha ra Jesucristo, ra cuví Jutu Mañi yo tan ra jacacú tsi yo. Tan cua coo cuñi ndo tsihin ra.

¹² Yacan cuenda ña jandihí yu tsa janducuhún iñi yu tuhun ihya tsi ndo, vasu tsa tsitó maa ndo itsi, tan vasu ñi cuñi ndo javahá ndo tuhun nditsa tsa cutuhva ndo. ¹³ Tan cuñi yu tyin vaha tsa janducuhún iñi yu tuhun ihya tsi ndo tsitsi tsa ndi iyó ca yu. ¹⁴ Tyin tsa jacotó Jutu Mañi yo Jesucristo tsi yu tyin ña naha ca tan cua nacoo yu ñuhu ñayivi ihya. ¹⁵ Tan cua jañiñi yu tsi yu tsa janducuhún iñi yu tuhun ihya tsi ndo tyin tacan tan quivi cúu yu ña naa iñi ndo itsi.

*Nu nacatyí tuhun ra Pedro nacaa nyehe ra
naha tsa cahnu cuví ra Cristo*

¹⁶ Ñavin tsa nandacú iñi ñi maa ndi tan cahán ndi tsihin ndo quivi jacotó ndi tuhun Jutu Mañi yo Jesucristo tsi ndo. Tsa nditsa cuví tsi tyin tsihin tinuu ndi nyehe ndi tsa cahnu cuví ra. Tan jacotó ndi tsi ndo tyin iyó xaan tunyee iñi tsi ra tan cua quitsi ra inga tsaha. ¹⁷ Tyin nyehe ndi nu jacahnu Nyoo Jutu yo tsi ra tan nyehe ndi nu janduxiñu ra cuhva caá ra. Tan si xaan cuví nu cahán Nyoo tan catyi ra: “Ra ihya cuví Sehe yu, tan cuñi xaan yu tsi ra. Tan si xaan cuñi yu tsihin ra”, catyi Nyoo tuhun ra Jesús quivi can. ¹⁸ Juvín nyuhu tsiñi ndusu Nyoo tsa quitsi ityi andivi quivi tsiyucu ndi yucu ii tsihin Jutu Mañi yo.

¹⁹ Tuhun ihya janahá tyin nditsa tsa tyaá ra cuví ndusu yuhu Nyoo nu tutu tahan tsanaha. Tatun tyaá yahvi vaha ndo tuhun can, vaha javahá ndo. Tyin tuhun can cuví tsi tumaa iin ñuhu tsa jandunditsín tsa naa ca. Maa tyin ra Jesucristo cuví ra tumaa tiñuu cahnu tsa caná tsa cua tuvi tyin jandunditsín ra tsitsi añima yo. ²⁰ Maa tyin cuñi tsi coto ndo tyin ña cuví nacatyí tuhun tsa intuhun ñi maa yo tsa cuñi tsi catyi tsa tyaá ra ndusu yuhu Nyoo. ²¹ Tyin ra cuví ndusu yuhu Nyoo tahan tsanaha ña cahán ra naha cuhva cuñi maa ra naha. Maa tyin cahán ra naha cuhva cuñi Nyoo tyin maa Tatyí Ii Nyoo jaquihin ityi tsi ra naha.

2

*Ra jacuahá tsa ña nditsa
(Judás 4-13)*

¹ Maa tyin tsicoo tucu ra cahán cuendu naha ra nu tsicoo nyivi Israel tahan tsanaha. Catyi ra naha tyin cuví ra naha ndusu yuhu Nyoo tan ña nditsa. Tan tacan can coo tucu ra vatya naha ra nu yucú ndo. Xeehe xaan cua jacuahá ra naha tsa ña nditsa tsa cuví jativi tsi ndo. Tan cua catyi ra naha tyin ña nditsa tuhun Jutu Mañi yo tan juvín ra jatá tsi ra naha. Yacan cuenda numi ñi

cua cunaa ra can naha ra. ² Tan cuaha xaan nyivi cua cunycun tsi ra naha tsihin tsa caquiñi tsa javaha ra naha. Tan cuaha xaan ñi cua cahan ndavaha ñi siqui tuhun tsa nditsa vaha ra Cristo. ³ Tan tsa cuenda tsa cuñi ra naha xuhun, cua nducu ra naha cuhva jandavi ñaha ra naha tsi ndo tsihin tsa jacuaha ra naha maa ñi tsa ña nditsa. Maa tyin ndatú Jutu Mañi yo tatsi tuñi ra tsi ra naha tyin tsanaha iyó maa tuhun tsa cua cunaa ra naha.

⁴ Tyin ndi ña jahá Nyoo tucahnu iñi tsi ángel tsa tsicoq cuatyí tahañ tsanaha. Jacuhun ra tsi nahnú anyaya. Tsaññi ra tsi nahnú tsihin cadena, tan nacoq ra tsi nahnú nu naa nda cuanda tahañ tsi jacutuñi ra tsi nahnú. ⁵ Tan ndi ña jahá ra tucahnu iñi tsi nyivi ña vaha tsa tsicoq tsanaha. Jacuñ ra savi xaan tsaññi tsi ñi. Maa tyin jacacú ra tsi intuhun ñi ra Noé tsihin utsa taahan nyivi ra. Ra ican cahan ra tsihin nyivi na nducu ñi cuhva coo vaha ñi tsihin Nyoo. ⁶ Tacan javahá tucu ra tsihin ñuu Sodoma tan ñuu Gomorra, janaq ra itsi. Tsaññi ra ñuu can tan nanduví tsi nyaa, tyin coto nyivi caquiñi tsa iyó vityin tan nyivi tsa cua coo náa cua tahañ ñi. ⁷ Maa tyin jacacú ra tsi ra Lot tyin vaha iyó ra nuu ra. Cuihiya cuñi ra Lot nyehé ra cuhva iyó nyivi caquiñi can. ⁸ Tandihí quivi tsa tsicoq ra Lot ñuu can, cuihiya cuñi añañi ra tsa cuenda tsa tsiñi ra tan nyehé ra tsa caquiñi javahá ñi can. Tyin maa ra, ra vaha cuví ra, tan ñi ican maa ñi tsa ña vaha javahá ñi. ⁹ Tacan Jacacú Nyoo tsi yo tatun vaha iyó yo nuu ra. Maa tyin naquihín vaha ra tsi nyivi caquiñi nda cuanda tahañ tsi quivi cutuñi ñi.

¹⁰ Yaha ca cua tatsi tuñi Nyoo tsi nyivi tsa javahá tsa ña vaha tsa cuñi cuñu ñuhu ñi, ñi tsa ña cuñi cundaca ñaha Jutu Mañi yo tsi ñi. Tan ra vatya tsa yaa xaan naha ra, javahá ra naha cuhva cuñi maa ra naha. Tan ña yuuhví ra naha caahán ra naha ndavaha ñi siqui ra iyó ca tunyee iñi tsi tumaa Nyoo a ángel, a tatyí ña vaha. ¹¹ Tan ángel, vasu ndi maa iyó ca tunyee iñi tsi ra naha tan ñavin ca nyivi, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

¹² Maa tyin ra vatya can naha ra cuví ra naha tumaa quiti tsa ña cutuñi iñi tan javahá ti naha ti tsa cuñi maa ti naha ti. Tyin quiti, ¿náa cuenda iyó ti? Iyó ti tyin tiin yo tsi ti, tan caññi yo tsi ti. Tacan ra can naha ra: Caahán ra naha ndavaha ñi siqui tsa ña cutuñi iñi ra naha, tan cua cúu ra naha tumaa tsihi quiti can naha ti. ¹³ Cua nyehé ra naha tundoho tsa cuenda tsa janyehé ra naha tundoho tsi inga nyivi. Si xaan cuñi ra naha tsihin tsa caquiñi javahá ra naha nu tuvi. Tsaññi ra naha ticanuu nu yucú ndo nu iyó vico tatun cutahán ra naha tsihin ndo.

Nyaá xaan ra naha tusi iñi. Maa tyin juvin ñi tsi maa ra naha jandavi ñaha ra naha.

¹⁴ Tandihí ñaha tsa nyehé ra naha, cuñi ra naha coo ra naha tsihin ñi. ña quitatú ra naha tsa javahá ra naha tsa caquiñi. Jandavi ñaha ra naha tsi nyivi tsa ña ñihi nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha. ¹⁵ Nacoq ra can naha ra ityi vaha tan naquihín ra naha ityi tsa cuahán nu cua cunaa ra naha tyin javahá ra naha tumaa javahá ra Balaam, sehe ra Beor. Tyin ra Balaam cuñi ra jaha canaa ra xuhun tsihin tsa ña vaha tsa javaha ra. ¹⁶ Tacan tan nacahan burru jana ra tsihin ra, tumaa caahán nyivi, tan tsa nacahan ti ña tsaññi ti cuhun ra javaha ra tsa ña vaha tsicá iñi ra.

¹⁷ Tan tacan tucu maa ra can naha ra. Cuví ra naha tumaa iin soco ityi nu nduve ndutyí yihí. Tan cuví tucu ra naha tumaa vico tsa tindahá tatyí ñihi. Maa tyin tsa nyaá tsa cua cuhun ra naha nu naa xaan tan ican cuví nu cua ndoo cuí ra naha. ¹⁸ Yaa xaan caahán ra naha. Maa tyin tandihí tsa caahán ra naha nduve yahvi nyaá can. Tan tsihin tandihí tsa ña vaha tsa javahá ra tan tsihin tsa ña vaha tsa cuñi cuñu ñuhu ra naha jandavi ñaha ra naha tsi nyivi tsa tsa yaha quita mahñu nyivi tsa javahá tsa caquiñi. ¹⁹ Catyí ra naha tsihin ñi tyin cua coo nuña ñi. Maa tyin juvin ñi maa ra naha tsaññi tsa cundaca ñaha tsa caquiñi tsi ra naha. Tyin tatun tsaññi yo tsa cundaca ñaha tsa cundaca ñaha tsi yo, musu can cuví yo. ²⁰ Tyin nyivi tsa nacoto tsi Jutu Mañi yo Jesucristo, ra jacacú tsi yo, tsa yaha nacoq ñi tsa caquiñi tsa iyó nu ñuhu ñayivi ihya maa tyin tatun javaha nyico ñi tsa caquiñi, cahnú ca cuatyí ñi cua coo nu Nyoo. ²¹ Vaha ca tun tsatyin ña nacoto ñi ityi vaha, tan ñavin ca tsa nacoq ihñi ñi tsa tsaññi Nyoo tsi ñi tsa tsa yaha nacoto ñi tsi ra. ²² Maa tyin cundaa tsa tuhvá nyivi caahán: "Ina tsatsí nyico ti tsa ndutsan ti. Tan quini tucu, tun tsa yaha tsityí ti, quihví nyico ti nu xahan nyahyu." Tacan cuví ñi can tyin javahá nyico ñi tsa javahá ñi nda jihna.

3

Quivi cua quitsi nyico Jutu Mañi yo

¹ Yañi, cuñi xaan yu tsi ndo. Carta ihya cuví carta tsinu uvi tsa jaquitsí yu tsi ndo. Tan nu nduvi taahan carta ihya tsaññi cuenda yu tsi ndo na caca vaha iñi ndo tan ña naa iñi ndo tsa cutuhva ndo. ² Ndúcuhan iñi ndo tsa cahan ra cuví ndusu yuhu Nyoo tahañ tsanaha. Tan ndúcuhan tucu iñi ndo tsa jacuaha ndi tsi ndo. Tyin cuví ndi ra tava tyiñu Jutu Mañi yo Jesucristo, ra jacacú tsi yo.

³ Coto jihna ndo tyin nu cua ndihi quivi cua quitsi nyivi cua vacu nducu tuhun Jutu Mañi yo. Tan cua coo ñi cuhva ña vaha cuñi cuñu ñuhu ñi. ⁴ Tan cua catyi ñi: “¿Náa ra Jesucristo tsa catyi tyin cua quitsi ra inga tsaha? ¿Numaa nyii ra? Tyin nda quivi tsa tsihi tsi tsahnu yo tan nda cuanda tsa tsinu ñuhu ñayivi tan nda vityin caá ñi maa tahan ñi caá”, cua catyi ñi. ⁵ Tyin maa ñi ña cuñi ñi coto ñi tyin nda tyembu tsahnu cahān Nyoo tan javahā ra andivi tan ñuhu ñayivi. Quita ñuhu ñayivi tsitsi ndutya, tan tsihin ndutya tsinu tsi. ⁶ Tsa yahā javahā Nyoo ñuhu ñayivi juvin ñi maa tsihin ndutya naa ñuhu ñayivi quivi cuñ savi xaan. ⁷ Maa tyin andivi tan ñuhu ñayivi tsa iyó vityin ndatú tsi tsa cayu tsi tumaa catyi maa Nyoo. Cua cayu andivi tan ñuhu ñayivi tsihin ñuhu quivi cua cutuñi nyivi tan cua naa nyivi caquiñi.

⁸ Maa tyin nyoocho yañi yu tsa cuñi xaan yu, ña naa iñi ndo tyin tsa cuenda Jutu Mañi yo tsa iin quivi cuvi tsi tumaa mil cuiya, tan tsa mil cuiya cuvi tsi tumaa tsa iin quivi tsa cuenda ra. ⁹ Vasiqui yihí ndo tsicá iñi ndo tyin maa Jutu Mañi yo ña cuñi naha quitsi. ñaha ca quitsi ra tyin ndatú jihna ra nda ndu uvj iñi tandihí nyivi tan nasama ñi cuhva iyó ñi tyin ña cuñi ra tsa cunaa ndi intuhun yo.

¹⁰ Maa tyin quivi cua quitsi Jutu Mañi yo, yofñi maa cua coto tyin cua quitsi ra quivi tsa ña ndatú yo tsi ra. Cua quitsi ra tumaa iin ñasuhu. Tan ñihni cunahma tan cua naa andivi. Tan cua janaa ñuhu tandihí tsa iyó ityi siqui. Tan ñuhu ñayivi cua cayu tsi tsihin ñuhu tsihin tandihí tsa iyó nuu tsi.

¹¹ Tacan cua naa tandihí tsa iyó. Yacan cuenda cuñi tsi cuiti coo yo tumaa iyó maa Nyoo. ¹² Cuatu ndo quivi quitsi Nyoo. Nducu ndo cuhva quitsi ñi ra tyin quivi tsa cua quitsi ra cua naa andivi jaha ñuhu. Tan tandihí tsa iyó cua naa tsi tsihin tsa ihñi ñuhu can. ¹³ Maa tyin yoo ndatú yo andivi tsaa tan ñuhu ñayivi tsaa tsa catyi Nyoo tyin cuhva ra tsi yo. Tan maa ñi maa tsa vaha tsi Nyoo cua coo ican.

¹⁴ Yacan cuenda yañi, tsitsi tsa ndatú yo tsi Jutu Mañi yo, nducu ndo cuhva coo vaha ndo tsihin Nyoo, tyin tacan tan quivi quitsi ra, sii cua cuñi yo tan cua coo taxin añima yo tyin nduve ca cuatyí yo iyó. ¹⁵ Coto ndo tyin Jutu Mañi yo ña cundihi iñi ra ndatú ra tsi yo tyin cuñi ra tsa cacu cuaha nyivi. Juvin ñi tyehen caahān tucu ra Pablo yañi yo nu carta tsa jaquitsi ra tsi ndo. Tyaa ra itsi tsihin tsa tsiñi tuñi tsa tsahā Nyoo tsi ra. ¹⁶ Tandihí ñi nu carta ra tan caahān ra tuhun ihya. Vasu yihí tsa yñi xaan cutuñi iñi yo. Tan nyivi tsa ña cutuñi iñi, ñi tsa ña ñihni nyaá tsihin Nyoo, sin cuhva cutuñi iñi ñi itsi. Juvin ñi tacan javahā ñi tsihin tuhun

Nyoo tsa tyaa inga ca ra naha. Tan tsa tacan javahā ñi, juvin ñi tsi maa ñi jacunaá ñi.

¹⁷ Yacan cuenda yañi, vityin tsa tsitó ndo tuhun ihya tsa ndi cumañi ca cuvi tsi, jaha ndo cuenda tsi ndo tan cuñi yu tsa coto ndihi ndo cuhva jandavi ñaha ra caquiñi can naha ra, tyin tacan tan ña nacao ndo cuhva vaha tsa cuahān ndo. ¹⁸ Maa tyin cuñi tucu tsi nacoto vaha ca ndo tsi Jutu Mañi yo ra Jesucristo, ra jacacú tsi yo. Tan cuahnu ca ndo tsihin tsa vaha ra tsa tsahā ra tsi yo. Na jacahnu yo tsi ra vityin tan tacan ñi maa.

Tan na cuvi tsi tacan ñi.

Carta Tsa Jihna Ñi Tsa Tyaa Ra Juan

Cua coo yo ñayivi nyito

¹ Ihya tyaá ndi tuhun ra tsa iyó nda ndi cumañi coo tandihi tsa iyó. Tsiñi ndi tsa cahān ra quivi tsica ndi tsihin ra. Nyehe ndi tsi ra tsihin tinuu ndi tan cutuñi iñi ndi yóo ra cuví ra. Tan tñin ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsahā ra ñayivi nyito iyó yo. ² Tan quivi tsaa ra nyehe ndi ñayivi nyito can tan cuví ndi tsandaa tsa cuenda can. Tan jacotó ndi tsi ndo náa cuví ñayivi tsa ña cua naa tyin iyó tsi tsihin Jutu yo Nyoo, tan tsaa tsi nu iyó yo. ³ Nacatyí tuhun ndi tsihin ndo tsa nyehe ndi tan tsa tsiñi ndi. Tyin tacan tan cuví ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra. ⁴ Tan tyaá ndi tuhun ihya tsa cuenda ndo tyin tacan tan coto ndo tandihi tsa tsahá Nyoo tsi ndo tan si xaan cua cuví tsi ndo.

Nyoo, ñuhū cuví ra

⁵ Vityin nacatyí tuhun ndi tsihin ndo tsa cahān ra Cristo tsihin ndi. Catyí ra tsihin ndi tyin Nyoo ñuhū cuví ra. Tan nduve tsa naa tsi ra, [nduve tsa ña vaha tsicá iñi ra cuví can]. ⁶ Tun catyí yo tyin iin ñi cuví yo tsihin ra, tan ndi iyó ca maa yo nu naa, jandaví ñaha yo tan ña javahá yo tsa nditsa. ⁷ Maa tyin tatun iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyivi yihí tuhun Nyoo tsihin yo, tan nacatyá ra Jesucristo Sehe Nyoo tandihi cuatyí yo tsihin ñi ra.

⁸ Tatun catyí yo tyin nduve cuatyí yo, juven ñi maa yo jandaví ñaha yo, tan nduve tsa nditsa iyó añima yo. ⁹ Maa tyin tatun naahmá yo cuatyí yo nuu Nyoo, cuví cuíta iñi yo tsi ra tyin cua jaha ra tucahnu iñi tsi yo tsa cuenda cuatyí yo tan cua nacatya ra tandihi cuatyí yo tyin maa ra vaha ra tan javahá ra cuhva catyí ra tyin ña vatya ra. ¹⁰ [Nyoo catyí ra tyin iyó cuatyí yo], tan tatun catyí yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó añima yo.

2

Ra Cristo cuví ra caahán ndaahvi tsaha yo

¹ Sehe nyihi yu, caahán yu tandihi tuhun ihya tsihin ndo, tyin tacan tan ña javahá ca ndo tsa ña vaha. Maa tyin tatun iin ndo tan javaha ndo tsa ña vaha, ña nayuhvi ndo tsa ña cuví ca nduvaha ndo nuu Nyoo, tyin iyó

iin ra caahán ndaahvi tsaha yo nuu Nyoo. Tan ra ican cuví ra Jesucristo, ra cuítí iyó. ² Juvin ra jahá tucahnu iñi tsi yo tyin tsihi ra nu cruu tsa cuenda cuatyí yo. Tan ñavin tsa cuenda maa ñi maa yo tsihi ra, tyin tsihi ra tsa cuenda tandihi cuí nyivi iyó nu ñuhu ñayivi.

³ Tatun tyaá yahvi yo tsa caahán Nyoo, nacotó yo tsi ra. ⁴ Maa tyin tatun iin ra tsa catyí tyehen: “Yuhu tsitó yu tsi Nyoo”, tan ña tyaá yahvi ra tsa caahán Nyoo, cuví ra iin ra vatya. Tan nduve tsa nditsa iyó añima ra. ⁵ Nyivi javahá tsa caahán Nyoo, ñi ican cuví ñi cuítí tsi ra tsihin tsa nñi iñi añima ñi. Tan tsihin yacan tsitó yo tyin iin ñi cuví ñi tsihin ra. ⁶ Nyivi catyí tyin iin caa ñi iyó ñi tsihin Nyoo, taahán tsi coo ñi tumaa tsicoo maa ra Jesucristo quivi quítsi ra nu ñuhu ñayivi ihya.

Taahán tsi tsa cuítí tahan yo tsi yo

⁷ Yañi, ñavin tuhun tsaa jacotó yu tsi ndo, tyin cuví tsi tuhun tsahnu tsa tsa tsitó maa ndo nda quítsi ca tsi. Tan juven tsi cuví tsa tsa yahá tsiñi ndo. ⁸ Maa tyin ña tsindihí tsa tsaa tsi tyin tyaá yahvi yo itsi tan tsa tyaá yahvi yo itsi, cuítí tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñihi ca jandunditsin ñuhū tsa nditsa.

⁹ Nyooho tsa catyí tyin iyó ndo nu nditsin, tan ndasi cuítí ndo nyehe ndo tsi nyivi yihí tuhun Nyoo tsihin ndo, ndi iyó ndo nu naa. ¹⁰ Maa tyin nyivi tsa cuítí tsi nyivi yihí tuhun Nyoo tsihin ñi, iyó ñi nu nditsin. Tan nduve maa cuatyí cuví janduva tsi ñi. ¹¹ Maa tyin nyivi ndasi cuítí nyehe tsi nyivi yihí tuhun Nyoo tsihin ñi, iyó ñi nu naa. Tan ña tsitó ñi numaa cuahán ñi tyin ña nditsin nyehé ñi tyin tumaa tsa cuaq ñi jahá tsa naa can.

¹² Jaquitsí yu tandihi tuhun ihya tsi nyooho tsa ndi nacuhvá cuenda tsi ndo tsi Nyoo. Tyin tsa yahá jahá Nyoo tucahnu iñi cuatyí ndo tsa cuenda tsa tsihi ra Jesucristo cuenda yo. ¹³ Nyooho tsa tsa tsahnu tsihin tuhun Nyoo, tyaá yu carta ihya tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayivi. Tan tyaá tucu yu itsi tsa cuenda nyooho ra tsa ndi cuahan cutuñi vaha iñi tuhun ra Cristo tyin jahá canaa ndo tan ndi jahá canaa ca ndo tsi nu ña vaha.

Tan tyaá tucu yu itsi tsa cuenda nyooho, tsa ndi nacuhvá cuenda tsi ndo tsi Nyoo, tyin nacotó ndo tsi Nyoo Jutu yo. ¹⁴ Jaquitsí yu carta ihya tsi nyooho tsa tsa tsahnu tsihin tuhun Nyoo, tyin nacotó ndo tsi ra tsa iyó maa tan tsinu ñuhu ñayivi. Tan jaquitsí yu carta ihya tsi nyooho tsa ndi cuahan cutuñi vaha iñi tuhun ra Cristo, tyin iyó xaan tunyee iñi tsi ndo jahá tuhun Nyoo tsa iyó añima ndo. Tan jahá canaa ndo tsi nu ña vaha.

¹⁵ Ña cuñi ndo tsa caquiñi tsa iyó nu ñuhu ñayivi ihya. Tyin nyivi cuñi tandihi yacan, ña cuñi ñi tsi Nyoo Jutu yo. ¹⁶ Tyin tandihi tsa ña vaha tsa iyó nu ñuhu ñayivi ihya, tsa cuñi cuñu ñuhu yo, tsa nyehé yo tan cuñi yo coo tsi yo, tan tsa cuñi yo nduyaa yo tsihin tsa iyó tsi yo, tandihi yacan tsahá ñuhu ñayivi ihya tsi yo, tan ñavin Nyoo Jutu yo tsahá can. ¹⁷ Ñuhu ñayivi ihya cua cundihí can, tan cua cundihí ndihí tucu tandihí tsa caquiñi tsa cuñi nyivi javaha ñi. Maa tyin nyivi tsa javahá cuhva cuñi Nyoo, cua coo cuii ñi tsihin ra.

Nu tsa ndasi cuñi nyehé tsi ra Cristo

¹⁸ Nyoooho, tsa cuví ndo tumaa sehe yu, coto ndo tyin tsa cua ndihí quívi. Tan nyoooho tsiñi ndo tyin vatsi nyivi tsa ña cuñi nyehé tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tsihin yacan nacotó yo tyin tsa tahan tsi cundihí quívi. ¹⁹ Nyivi can ña yihí ca ñi tuhun Nyoo tsihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa tyin tacan cuví tyin tacan tan coto yo tyin ñavin nyivi yihí tuhun Nyoo tsihin yo cuví ñi.

²⁰ Maa tyin nyoooho tsa tsitó ndo tsa caahán Nyoo tyin tsahá ra Cristo Tatyí Ii Nyoo iyó aña ndo tan jacotó tsi tandihí tsi ndo. ²¹ Jaquitsí yu carta ihya tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo tyin ña cuví quita tuhun vatya tsihin tuhun nditsa.

²² ¿Yóo cuví nyivi vatya? Nyivi vatya cuví ñi catyí tyin ra Jesús ñavin ra Cristo cuví ra. Tan juvin ñi ican cuví ñi ndasi cuñi nyehé tsi ra Cristo. Tyin ña tsiñi ñi tsi Jutu yo Nyoo, tan tsi ra Jesucristo Sehe ra. ²³ Tan tandihí nyivi tsa ña tsiñi ñi tsi Sehe Nyoo, nduve Nyoo Jutu yo iyó tsihin ñi. Maa tyin nyivi tsa caahán tsihin tsa ñi ñi aña ñi tsihin nyivi tyin ra Jesucristo cuví Sehe Nyoo, iyó Nyoo Jutu yo tsihin ñi.

²⁴ Yacan cuenda naquihin vaha ndo tsiñi aña ndo tandihí tsa tsiñi ndo nda quívi jihna ñi. Tyin tun naquihin vaha ndo itsi tsiñi aña ndo, cua coo ndo iin caa ñi tsihin Nyoo Jutu yo tan tsihin Sehe ra. ²⁵ Tan ñayivi nyito can cuví tsa catyí ra Jesucristo tyin cuhva ra tsi yo.

²⁶ Tyaá yu tuhun ihya tyin cahvi ndo itsi tsa cuenda tyin tsa iyó cuaha nyivi cuñi jandavi ñaha tsi ndo. ²⁷ Maa tyin ra Jesucristo tsahá ra Tatyí Ii Nyoo iyó aña ndo, yacan cuenda ña tsiñi ñuhu ca tsa jacuaha nyivi tsi ndo. Tyin juvin ñi maa Tatyí Ii Nyoo jacuahá tandihí maa tyiñu tsi ndo. Tan tsa nditsa cuví tsi, ñavin cuendu cuví tsi. Yacan cuenda jañihi ndo cunyanaa vaha ndo tsi ra Cristo tumaa jannahá maa Tatyí Ii Nyoo tsi ndo.

²⁸ Tan vityin nyoooho, tsa cuví tumaa sehe yu, cunyanaa vaha ca ndo tsi ra Cristo tyin tacan tan quívi quitsi ra, iin cuñi yo tsihin ra. Tan iin cuñi tucu maa ra tsihin yo. Tan inga tucu tuhun ña cua tahan yo ticanuu nuu ra quívi tsaa ra. ²⁹ Vityin tsa tsa tsitó ndo tyin vaha ra Cristo, cuñi tsi coto ndihí ndo tyin tandihí nyivi javahá tsa vaha, sehe Nyoo tsi ñi.

3

Nyivi cuví sehe Nyoo

¹ Nyehé ndo, Nyoo Jutu yo cuñi xaan ra tsi yo, tyin jacunañi ra sehe Nyoo tsi yo. Tan cuví yo sehe ra. Tan tsa cuenda yacan, nyivi taahán iñi tsa iyó nu ñuhu ñayivi ihya ña cutuñi iñi ñi cuhva tsicá iñi yo tyin ña nacoto ñi tsi maa ra. ² Nyoooho yañi, tsa cuví yo sehe ra vityin, maa tyin ñaha ca coto yo náa cua cuví yo. Maa tyin tsitó yo tyin quívi quitsi ra Jesucristo, cua cuví yo tumaa cuví maa ra, tyin cua nyehé vaha yo tsi ra tan cua nyehé tucu yo nácaa caá ra. ³ Tandihí yoo tsa ndatú tsa cua cuví tacan, nducú yo cuhva janduvaha yo tsi yo, tan cuví yo tumaa maa Jutu Mañi yo Jesucristo, tyin maa ra cuiti iyó ra.

⁴ Tandihí nyivi tsa tsicoó cuatyí, ñi ican cuví ñi tsa ña tyaá yahvi ley Nyoo. Tyin tun javahá yo tsa ña vaha, cuñi tsi catyí tyin ña tyaá yahvi yo ley Nyoo. ⁵ Nyoooho tsa tsitó tyin ra Cristo quitsi ra nu ñuhu ñayivi ihya tyin quinyaa ra cuatyí yo, tan tsitó tucu ndo tyin maa ra nduve cuatyí ra. ⁶ Tandihí yoo tsa iyó iin caa ñi tsihin ra, ña jañihí ca yo javahá ca yo tsa ña vaha. Maa tyin nyivi javahá tsa ña vaha, ñaha ca nyehé ñi tsi ra, tan ñaha ca coto ñi tsi ra. ⁷ Nyoooho, tsa cuví tumaa sehe yu, coto jandavi ñaha nyivi tsi ndo. Tyin nyivi javahá tsa vaha, cuví ñi nyivi vaha, tumaa vaha maa ra Cristo. ⁸ Tyin nyivi javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quívi jihna ñi. Yacan cuenda quitsi ra Jesucristo, Sehe Nyoo, tyin janaa ra tandihí tsa javahá nu.

⁹ Tandihí yoo tsa tsa yahá nacacú tsaa jaha Nyoo, ña taahán ca iñi yo javahá yo tsa ña vaha, tyin iyó yo ñayivi tsahá Nyoo tsi yo. Yacan cuenda ña javahá ca yo tsa ña vaha, tyin tsa yahá nacacú tsaa yo tan vityin cuví yo sehe Nyoo. ¹⁰ Cuví nacotó yo ndáa nyivi cuví sehe Nyoo, tan ndáa nyivi cuví sehe nu ña vaha, tyin tandihí nyivi tsa ña javahá tsa vaha tan ña cuñi tsi nyivi yihí cuenda Nyoo, ñavin sehe Nyoo tsi ñi.

Na cuñi tahan yo tsi yo

¹¹ Tyin tsa tsiñi ndo nda quívi jihna ñi cuví: Tsa cuñi tahan yo tsi yo. ¹² Ña taahán tsi javaha yo tumaa javahá ra Caín, tyin ra Caín cuví ra iin ra cuenda nu ña vaha. Tan

tsahñi ra tsi yañi ra. ¿Náa cuenda tsahñi ra tsi yañi ra? Tsa cuenda tyin ra yañi ra javahá ra tsa vaha, tan maa ra javahá ra tsa ña vaha.

¹³ Nyooho yañi, ña iyo cuñi ndo tun ndasi cuñi nyivi ña yihí tuhun Nyoo nyehé ñi tsi ndo. ¹⁴ Yoo tsa cuñi tsi nyivi yihí tuhun Nyoo tsitó yo tyin iyó yo ñayivi nyito, tyin juvin tsi janahá tsi yo tyin ña cuví ca yo nyivi tsihi. Maa tyin nyivi ña cuñi tsi nyivi yihí tuhun Nyoo, cuví ñi tumaa nyivi tsihi. ¹⁵ Nyivi ndasi cuñi nyehé tsi nyivi, cuví ñi tumaa nyivi tsahñi nyivi. Tan tsitó ndo tyin ndi intuhun ñi tsahñi nyivi, tan ña cua cuhva Nyoo ñayivi nyito coo ñi. ¹⁶ Tsitó yo náa cuví tsa cuñi tahan yo tsi yo tyin tsa yaha janahá ra Jesucristo tsi yo nácaa taahán tsi cuñi tahan yo tsi yo. Tyin maa ra nda cuenda tsahá ra ñayivi ra tsa cuenda yo tsa catyi tsa cuñi ra tsi yo. Tacan taahán tsi javaha tucu maa yo. Cuñi tsi cuhva yo nda cuenda ñayivi iyó yo tsa cuenda nyivi yihí tuhun Nyoo. ¹⁷ Tatun yihí yo tan iyó luxu tsa iyó tsi yo, tan nyehé yo tyin cumañi tsa cumañi tsi inga nyivi, tan jahá yo tumaa tsa ña nyehé ñi yo, ¿a cuñi yo tsi Nyoo tsa tacan javahá yo? Ña cuñi yo tsi ra. ¹⁸ Nyooho tsa cuví ndo tumaa sehe yu, na ña cuñi yo tsi nyivi tsihin tuhun caahán ñi yo, na cuñi tahan yo tsi yo tsihin tsa quitá tsitsi aña yo tan javahá yo tumañi ñi tsihin tsa ñi ñi yo.

Nacaa javaha yo tan coo vaha yo tsihin Nyoo

¹⁹ Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo. ²⁰ Tatun tuví ñi tsitsi aña yo tyin iyó cuatyí yo, na ña cuita ñi yo yacan. Na cuita ñi yo tsi Nyoo tyin juvin ra tsitó tandihí tsa iyó aña yo tan cahnu ca cuví ra tan ñavin ca aña yo. ²¹ Yañi, tatun tuví ñi yo tyin nduve cuatyí yo, na ña nayuhvi yo nyehé yo tsi Nyoo. ²² Tan tandihí tsa cua ndacan yo tsi ra, cua cuhva ra can tsi yo, tyin tyaá yahvi yo tsa caahán ra, tan javahá yo cuhva taahán ñi ra. ²³ Tyin tyiñu tsa tsahá ra tsi yo yacan cuví tsa tsjnu ñi yo tyin ra Jesucristo cuví Sehe ra, tan tsa cuñi tahan yo tsi yo, tumaa tava tyiñu ra tsi yo. ²⁴ Nyivi tyaá yahvi tyiñu tsahá ra tsi ñi, iyó ñi tsihin ra, tan iyó tucu maa ra tsitsi aña ñi. Tan tsitó yo tyin iyó ra tsihin yo tsa cuenda Tatyí li ra tsa tsahá ra tsi yo.

4

Tatyí li Nyoo tan tatyí nu ña vaha

¹ Nyooho yañi tsa cuñi xaan yu, ña tsjnu ñi ndo tsa caahán nyivi catyi tyin tuhun Nyoo caahán ñi. Nyehé jihna ndo tatun nacatsí tahan tsa caahán ñi tsihin tuhun Nyoo. Tyin vityin cuaa xaan nyivi jandavi

ñaha iyó. Catyi ñi tyin Nyoo caahán tsa caahán ñi tan ña nditsa ñi. ² Cuví nacoto ndo tsi nyivi tun juvin Tatyí li Nyoo jacahán tsi ñi o ñavin. Ñi tsa iyó Tatyí li Nyoo tsihin, catyi ñi tyin quee ra Jesucristo nda gloria tan quitsi ra nu ñuhu ñayivi ihyá, tan cuví ra ñi rayi tumaa maa yo. ³ Maa tyin tandihí nyivi tsa catyi tyin ñavin tacan cuví, ñavin Nyoo jacahán tsi ñi. Tatyí ña vaha, tsa ndasi cuñi nyehé tsi ra Cristo, jacahán tsi ñi. Tsa tsitó ndo tyin nyaá tsa cua quitsi nu jandavi ñaha can. Tan vityin tsa iyó nu nu ñuhu ñayivi ihyá tan jandavi ñaha nu tsi nyivi.

⁴ Nyooho tsa cuví ndo tumaa sehe yu, nyivi cuenda Nyoo cuví ndo. Tan tsa yaha jahá canaa ndo tsi nu caahán tsa ña nditsa. Tyin Nyoo iyó ra aña ndo tan cahnu ca cuví ra tan ñavin ca nu ña vaha, tsa iyó aña nyivi tsa taahán ñi tsa iyó nu ñuhu ñayivi ihyá. ⁵ Ñi ican, cuenda nu ñuhu ñayivi ihyá cuví ñi. Yacan cuenda caahán ñi cuenda tsa iyó nu ñuhu ñayivi ihyá. Tan inga nyivi cuenda nu ñuhu ñayivi ihyá tyaá soho ñi tsa caahán ñi ican. ⁶ Maa tyin yoo cuví yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñi ñi tyaá soho ñi tsa caahán yo. Tsihin yacan cuví nacoto yo ndaa nyivi iyó Tatyí li Nyoo tsihin, tan caahán ñi tsa nditsa tan ndaa nyivi yihí tatyí ña vaha tan jandavi ñaha ñi.

Nyoo cuñi xaan ra tsi tandihí nyivi

⁷ Nyooho yañi, na cuñi tahan yo tsi yo, tyin Nyoo janahá ra tsi yo nácaa taahán tsi cuñi tahan yo tsi yo. Tyin tandihí yoo tsa cuñi tsi nyivi, sehe Nyoo cuví tsi yo, tan nacotó yo tsi Nyoo. ⁸ Nyivi ña cuñi tsi inga nyivi, ña nacotó ñi tsi Nyoo, tyin Nyoo cuñi xaan ra tsi yo tan tsi tandihí nyivi. ⁹ Nyoo janahá ra tsi yo tsa cuñi ra tsi yo tsihin tsa tsahá ra Sehe mañi ra quitsi nu ñuhu ñayivi ihyá, tyin cuhva ra ñayivi nyito coo yo. ¹⁰ Nyehé ndo, nácaa tsa cuñi Nyoo tsi yo. Ñavin jihna ca maa yo cuñi tsi ra, tyin jihna ca maa ra cuñi tsi yo. Tan jaquitsi ra Sehe ra tyin tacan tan cuví ra tsa cuenda yo tan quinyaa ra cuatyí yo.

¹¹ Nyooho yañi, tatun tacan cuñi Nyoo tsi yo, juvin ñi tacan taahán tsi tsa cuñi tucu maa yo tsi nyivi tumaa tsa cuñi maa Nyoo tsi yo. ¹² Ndi intuhun maa nyivi, tan ñaha ca maa nyehé ñi tsi Nyoo, maa tyin tatun cuñi tahan yo tsi yo, iyó Nyoo aña yo. Tan ñi vaha ñi yo cuñi yo tsi ra tan tsi nyivi. ¹³ Tan tsitó yo tyin iyó vaha yo tsihin ra tan maa ra iyó ra aña yo, tyin tsahá ra Tatyí li ra iyó aña yo. ¹⁴ Nyuhu nyehé vaha ndi tan cuví ndi tsandaa tyin jaquitsi Nyoo Jutu yo tsi Sehe ra tyin jacacu ra tsi yo tsa cuví yo nyivi iyó nu ñuhu ñayivi ihyá. ¹⁵ Tandihí nyivi tsa tsjnu ñi tan caahán tyin ra Jesús cuví Sehe

Nyoo, iyó Nyoo ańima ńi. Tan iyó ńi iin caa ńi tsihin ra.

¹⁶ Yoo tsító yo tan tsinú ińi yo tyin Nyoo cuńi ra tsi yo, tan cuńi ra tsi tandihi nyivi. Tan tandihi yoo tsa cuńi tahan yo tsi yo, iyó yo iin caa ńi tsihin Nyoo; tan Nyoo iyó ra tsitsi ańima yo. ¹⁷ Tyin tatun cuńi yo tsi Nyoo tsihin tsa ńi ińi ańima yo, ńa cua nayuhvi yo nyehe yo tsi ra na tahan tsi quivi cutuńi tandihi nyivi nuu ra. Tyin tumaa iyó ra Jesucristo, tacan iyó yo nu ńuhu ńayivi ihya. ¹⁸ Nyoo cuńi ra tsi yo, tan tatun cuńi yo tsi ra, nduve tsa nayuhvi yo. Tatun ńi ińi yo cuńi yo tsi Nyoo ńa nuńa ca nu quihvi tuhun yuuhvi can ańima yo, tyin Nyoo jatsiyo ra tandihi maa yacan. Tyin tatun yuuhvi yo, yihí can tyin tuví ińi yo tyin iyó cuatyi yo. Tan yuuhvi yo tsa cua tatsi tuńi Nyoo tsi yo. Tyin tatun yuuhvi cuńi yo, yuuhvi yo tyin ńaha ca cuńi yo tsi Nyoo tumaa taahán maa tsi cuńi yo tsi ra.

¹⁹ Yoo cuńi yo tsi Nyoo tyin jilna ca maa ra cuńi tsi yo. ²⁰ Tatun iin nyivi tan catyi ńi: “Yuhu cuńi yu tsi Nyoo”, tan ndasi cuńi ńi nyehé ńi tsi nyivi tahan ńi, nyivi vatya cuví ńi. Tyin tatun ndasi cuńi yo nyehé yo tsi nyivi tahan yo tsa tuhvá yo nyehé, ńácaa cua cuńi yo tsi Nyoo tsa ńa cuví nyehé yo? ńa cua cuví. ²¹ Tava tyińu Nyoo tsi yo tyin tun cuńi yo tsi ra, tacan cuńi tsi tsa cuńi tahan yo tsi yo.

5

Tatun ńi ińi yo tsinú ińi yo tsi Nyoo cuví jaha canaa yo tsi tsa ńa vaha

¹ Tandihí nyivi tsa tsinú ińi tyin ra Jesús cuví ra Cristo ra quee nda gloria jahá Nyoo, juvin ńi cuví sehe Nyoo. Tyin tatun cuńi yo tsi iin ra iyó sehe, cuńi ndihi yo tsi sehe ra. ² Tatun cuńi yo tsi Nyoo tan javahá yo tsa caahán ra, cua cuńi ndihi yo tsi nyivi cuví sehe ra. ³ Tyin tsa cuńi yo tsi Nyoo yacan cuví tsa tyáa yahvi yo tsa tsahá cuenda ra tsi yo. Tan tandihí tsa tsahá cuenda ra tsi yo, ńa yii javaha yo can. ⁴ Tyin tandihí yoo tsa cuví sehe Nyoo, jahá canaa yo tsi tsa ńa vaha tsa iyó nu ńuhu ńayivi ńayivi ihya. Cuví jaha canaa yo can tyin tsinú ińi yo tsi Nyoo. ⁵ Maa ńi maa nyivi tsa tsinú ińi tyin ra Jesús cuví Sehe Nyoo, ńi ican cuví ńi cuví jahá canaa tsa ńa vaha tsa iyó nu ńuhu ńayivi ihya.

Tatyí Ii Nyoo cuví tsandaa cuenda ra Jesús Sehe Nyoo

⁶ Ra Jesucristo quitsi ra nu ńuhu ńayivi ihya. Tan tsa tsicoondutya ra tsihin ndutya tan tsa tsatí ńińi ra janahá tyin Sehe Nyoo cuví tsi ra. Navin tsa tsicoondutya ńi ra. tyin nda cuenda tsa tsatí ńińi ra. Tan juvin ńi maa Tatyí Ii Nyoo cuví tsandaa tyin tacan cuví. Tan Tatyí Ii Nyoo ńa jandaví ńaha tsi. ⁷ Nda andivi iyó uńi taahan tsa cuví

tsandaa: maa Nyoo Jutu yo tan ra Cristo ra cuví Tuhun tsa Caahán Nyoo, tan Tatyí Ii Nyoo. Tsa nduńi taahan ra naha, iin ńi cuví ra naha. ⁸ Tan nu ńuhu ńayivi ihya iyó tucu uńi tsandaa: Tatyí Ii Nyoo tsa iyó ańima yo caahán tyin ra Jesús cuví Sehe Nyoo. Tsa tsinu uvi cuví nu tsicoondutya ra Jesús, nu catyi Nyoo tyin juvin ra Jesús cuví Sehe ra. Tan tsa tsinu uńi cuví nu tsatí ńińi ra Jesús. Tan tsa nduńi taahan yacan nacatsi tahan caahán can. ⁹ Yoo naquihín yo tsa caahán ra cuví tsandaa nu ńuhu ńayivi ihya. Tan Nyoo cahnu ca cuví ra tan ńavin ca ra ńuu ńayivi ihya. Yacan cuenda taahán tsi naquihín yo tsa caahán ra, tan juvin ńi maa ra catyi tyin Sehe ra cuví tsi ra Jesús. ¹⁰ Nyivi tsa tsinú ińi tyin Sehe Nyoo cuví tsi ra Jesús, tsító ńi tsitsi ańima ńi tyin nditsa. Nyivi tsa ńa tsinú ińi tsi ra, jahá ńi tyin vatya Nyoo, tyin ńa cuńi ńi tsinu ińi ńi tsa caahán Nyoo tsandaa cuenda Sehe ra. ¹¹ Tan tyehen caahán Nyoo tsihin yo: Catyi ra tyin tsahá ra ńayivi nyito coo yo tan ńihi yo itsi tatun tsinú ińi yo tyin ra Jesucristo cuví Sehe ra. ¹² Nyivi iyó Sehe Nyoo ańima, iyó ńi ńayivi nyito. Tan nyivi nduve Sehe Nyoo iyó ańima, ńa iyó ńi ńayivi nyito.

Nu ndihí cahan ra Juan tan nu tsahá ra tyińu tsi nyivi

¹³ Tyáa yu tuhun ihya tsa cuenda nyooho tsa tsinú ińi tsi ra Jesús Sehe Nyoo, tyin tacan tan coto ndo tyin tsa iyó ndo ńayivi nyito tsa ńa cua naa maa.

¹⁴ Nditá ińi yo tsi Nyoo tyin tatun tsicán yo tsa tsicán yo tsi ra tan cuhva cuńi maa ra tsicán yo, tsító yo tyin maa ra tsini ra tsa caahán yo. ¹⁵ Tan tsa tsító yo tyin tsini ra tsa tsicán yo, tsító tucu yo tyin tsa ńihí yo tsa tsicán yo tsi ra.

¹⁶ Tatun iin nyivi tan nyehe yo tyin javahá ńi cuatyi tsa ńa taahán tsi cúu ńi, taahán tsi cahan ndaahvi yo tsihin Nyoo tsa cuenda ńi na jaha ra tucahnu ińi tsi ńi tsa cuenda cuatyi can. Maa tyin tatun javahá ńi cuatyi tsa taahán tsi cúu ńi, ńa ndacan tahvi yo tsa cuenda ńi. ¹⁷ Tandihí tsa caquini tsa javahá nyivi, cuatyi cuví can. Tan iyó tucu cuatyi tsa ńa jaha Nyoo tucahnu ińi.

¹⁸ Tsító yo tyin nyivi tsa nacacú tsaa jahá Nyoo, ńa jańihí ca ńi javaha ńi cuatyi. Tyin jahá cuenda Sehe Nyoo tsi ńi tan ńa tsahá ra tsa tiiń nu ńa vaha tsi ńi.

¹⁹ Yoo tsa tsító yo tyin cuenda Nyoo yihí yo. Tan tandihí nyivi tsa taahán ińi tsa iyó nu ńuhu ńayivi ihya, nu ńa vaha ndacá ńaha tsi ńi.

²⁰ Tan tsító tucu yo tyin quitsi Sehe Nyoo, tan tsahá ra tsa cutuńi ińi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo Sehe Nyoo. Tan iyó yo iin caa ńi

tsihin ra. Tan juvin maa ra cuví Nyoo tsa nditsa. Tan iyó ra ñayivi nyito tsa ña cua naa maa. ²¹Nyooho tsa cuví tumaa sehe yu, jaha cuenda ndo tsi ndo tsihin tsitoho tsa jacahnú nyivi, tyin ñavin Nyoo cuví can.

Tan na cuvi tsi tacan ñi.

Carta Tsinu Uvi Tsa Tyaa Ra Juan

Nu caahán ra Juan tyin cuñí xaan ra tsi nyivi yihí cuenda Nyoo

¹ Yuhu ra tsahnu cuenda vehe ñuhu, jaquitsí yu carta ihya tsi yoocho, cuhva yu, tan tsi sehe un tyin cuví un ñaha tsa nacatsi maa Nyoo. Cuñí xaan yu tsi ndo tsihin tsa nñi ñíña añima yu. Tan cuñí ndihi tucu tandihi nyivi tsa tsitó tsa nditsa tsi ndo, yacan ñavin yuhu ñi cuñí tsi ndo. ² Cuñí ndi tsi ndo tsa cuenda tsa nditsa tsa iyó tsitsi añima yo. Tan tacan ñi maa cua coo tsa nditsa can tsihin yo. ³ Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi ñíñi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñí xaan ra tsi yo.

⁴ Sñi xaan cuñí yu tyin tsitó yu tyin juhva sehe un vaha xaan nyicún ñi tsa nditsa, tumaa tava tyiñu maa Nyoo Jutu yo tsi yo. ⁵ Hermana, caahán ndaahvi yu tsihin un vityin, na cuñi tahan yo tsi yo. Tyiñu ihya cuñí yu cahan yu tsihin un, yacan cuenda jaquitsí yu carta ihya tsi un. Ñavin tuhun tsa ndi tsahá Nyoo tsi yo cuví tsi. Tyin tsa iyó maa tsi nda nu quitsahá. ⁶ Tsa cuñí yo tsi Nyoo, yacan cuví tsa javahá yo tandihi tsa tava tyiñu ra tsi yo. Tan yacan cuví tsa cahan Nyoo tyin javaha yo. Tan juvin tsi cuví tsa tsiñi ndo nda quivi jhna ñi: Coo ndo tsihin tsa cuñí ndo tsi Nyoo tan tsi nyivi.

Nu tsahá cuenda ra Juan nácaa jaha cuenda yo tsi yo tsihin nyivi jandavi ñaha

⁷ Caahán yu tyehen tsihin un tyin cuaha xaan nyivi jandavi ñaha iyó nanñi cahnu nu ñuhu ñayivi. Catyí ñi tyin ña nditsa tsa quitsi ra Jesucristo cacu ra tsihin cuñu ñuhu tan cuví ra ra ñayivi. Nyivi tsa caahán tacan, ñi jandavi ñaha cuví ñi. Tan ñi ndasi cuñi nyehé tsi ra Cristo cuví ñi. ⁸ Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñiñi ca ndo tandihi tsa cua cuhva Nyoo tsi ndo.

⁹ Tandihí nyivi tsa ña naquihín vaha tuhun tsa jacuahá ra Cristo tsi yo, tan jacuahá ñi inga ca tuhun, nduve Nyoo iyó tsihin ñi. Maa tyin nyivi naquihín vaha tuhun jacuahá ra Cristo tan tyaa yahvi ñi itsi, iyó Jutu yo Nyoo tan ra Jesucristo Sehe ra tsihin ñi. ¹⁰ Tatun tsaá nyivi yuvehe ndo, tan cuñí ñi jacuahá ñi tsi ndo tsa ña jacuahá ra Jesucristo, ña cuhva ndo cunyeu ñi yuvehe ndo tan ndi ña cuhva ndo nacumi tsi ñi. ¹¹ Tyin

tun cuhva yo nacumi tsi ñi, cuñí tsi catyi tyin javahá ndihi yo tsa ña vaha tsa javahá ñi.

Nu ndihí cahan ra Juan

¹² Iyó cuaha ca tuhun cuñí yu cahan yu tsihin ndo. Maa tyin ña cuñí yu cahan yu can tsihin carta. Tyin tyaa yu cuhva tsa quitsi yu nu yucú ndo. Tyin tacan tan natuhun vaha ca maa yo, tan cusii ca ñíñi yo.

¹³ Ihya vatsi nacumi tsi un jahá sehe ña tahan un tsa nacatsi ndihi maa Nyoo.

Tan na cuvi tsi tacan ñi.

Carta Tsinu Uñi Tsa Tyaa Ra Juan

Nu caahán ra Juan tyin vaha cuahán ra Gayo tsihin Nyoo

¹ Yooho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihya tsi un, tyin cuví un iin ra vaha iñi tsi yu tan tsa tsitó maa un tyin cuñí xaan yu tsi un tyin iin caa ñi nyicún yo tsa nditsa.

² Yañi, tsicán tahvi xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tsihin Nyoo, na nasoco ra tsi un tacan tan coo vaha un tan ña cuhvi un. ³ Yuhu sii xaan cuñi yu quivi quitsi juhva ra yañi yo naha ra nu nyí yu. Tan nacatyí tuhun ra naha tsihin yu tyin nditsa tsa iyó un cuhva jacuahá ra Cristo, tan nyicún un tsa nditsa. ⁴ Nduve inga ca tsa sii cuñí yu tumaa tsa sii cuñí yu tsa tsitó yu tyin sehe yu cuenda Nyoo nyicún ñi tsa nditsa.

⁵ Yañi, cuñí xaan yu tsi un. Vaha xaan javahá un, tyin jatyinyeé un tsi ra yañi yo naha ra. Tsa vaha ca javahá un cuví tsa jatyinyeé un tsi ra yañi yo tsa quee inga ñuu. naha ra. ⁶ Tandihí ra naha, tan nacatyí tuhun ra naha nuu tandihí nyivi tsicá vehe ñuhu tyin cuñí xaan un tsi ra naha. Jaha tumañi iñi, jatyinyee ca tsi ra yañi yo naha ra, cuhva tsa tsiní ñuhu tsi ra naha tumaa taahán iñi maa Nyoo. Tyin tacan tan jañihi ca ra naha cuhun ra naha cahan ra naha tuhun Nyoo. ⁷ Tyin tyiñu ra Jesucristo tsicá ra naha. Tan ña cuñí ra naha tsa jatyinyee nyivi tsa ña tsitó tsi Nyoo tsi ra naha. ⁸ Yacan cuenda maa yo taahán tsi jatyinyee tsi ra naha tsihin tsa tsiní ñuhu tsi ra naha. Tan tacan tan cutahan yo tsihin ra naha nu caahán ra naha tuhun nditsa.

Nu caahán ra Juan tyin ña vaha javahá ra Diótfrefes

⁹ Yuhu jacuhun yu iin carta tsi nyivi tsicá vehe ñuhu, maa tyin ra Diótfrefes ña cuñí ra tyaa soho ra tsa caahán yu tyin cuñí xaan maa ra cuví ra ityi nuu tsihin nyivi. ¹⁰ Yacan cuenda tatun quitsi yu nu yucú ndo cua jan-daa yu tyiñu tsihin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña naquihín vaha ra tsi ra hermano tatun tsaá ra naha. Tan tatun cuñí nyivi tsicá vehe ñuhu naquihín vaha ñi tsi ra hermano can naha ra, tyasí ra Diótfrefes tsi ñi, tan tavá ra tsi ñi vehe ñuhu.

¹¹ Yooho yañi yu tsa cuñí xaan yu ña javaha un tsa ña vaha tumaa javahá ra can, maa tyin javaha tsa vaha. Tyin ra javahá tsa vaha, cuenda Nyoo cuví ra, tan ra javahá tsa ña vaha, ña tsitó ra tsi Nyoo.

Nu caahán ra Juan tyin vaha xaan tsinú iñi ra Demetrio tsi Nyoo

¹² Tandihí nyivi tan vaha caahán ñi tuhun ra Demetrio. Tan vaha xaan tyaa yahvi ra tuhun Nyoo, tan juvin ñi maa tuhun Nyoo janahá tyin ra vaha cuví ra. Tan juvin ñi cuví tucu nyuhu tsandaa tsa cuenda ra, tan tsitó ndo tyin tsa nditsa caahán ndi.

Nu ndihí cahan ra Juan

¹³ Cuaha xaan tuhun cuñí yu jacoto yu tsi un, maa tyin ña cuñí yu jacoto yu can tsi un tsihin carta. ¹⁴ Tyin tyihí yu cuhva tsa quitsi yu nu iyó un tsa numi ñi, tyin tacan tan natuhun vaha ca maa yo. ¹⁵ Na coo tsa taxin aña un. Ra vaha iñi tsi yo tsa iyó ityi ihya jaquitsí xaan ra naha nacumi tsi un. Tan cuñí yu jaha un tumañi iñi cuhva un nacumi tsi tsa intuhun intuhun ra vaha iñi tsi yo.

Carta Tsa Jacuhun Ra Judas Tsi Nyivi Yihí Cuenda Nyoo

Nu tyaa ra Judas carta tsa cuenda nyivi cana Nyoo

¹ Yuhu ra Judas cuví yu musu ra Jesucristo. Tan cuví yu yañi ra Jacobo. Tyaa yu carta ihya tsa cuenda nyoo tsa cana Nyoo Jutu yo. Cuñi xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo. ² Na nyehe ndaahvi Nyoo tsi ndo. Tan na cutuñi ca iñi ndo nácaa tsa cuñi ra tsi yo. Tan na naquihin ca ndo tsa taxin tsahá ra tsi yo coo aña ndo.

*Nu caahán ra Judas tuhun nyivi tsa jacuahá tsa ña nditsa
(2 Pedro 2.1-17)*

³ Tyihí yu cuhva tyaa yu iin carta tsa cuenda ndo yañi, tyin cuñi yu cahan yu tsihin ndo nácaa jacacú Nyoo tsi yo. Maa tyin vityin tyaa yu nu carta ihya tan jañiñi yu tsi ndo na ña cuhva ndo tsa sama cuhva tsinú iñi ndo tsa vaha tsa tsahá Nyoo tsi yo tsa cuví yo nyivi yihí cuenda ra. Tyin iin tsaha ñi janahá ra nácaa tsinu iñi yo tsi ra tan ña cua nasama ra itsi. ⁴ Yacan cuenda jaha cuenda vaha ndo tsi ndo tyin quihví xeehe juhva ra jandaví ñaha naha ra. Catyí ra naha tyin tsa yahá jaha Nyoo tucahnu iñi tsi yo, tan yacan cuenda cuví ñi javaha maa yo tsa cuñi yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyí Nyoo tahañ tsanaha tyin ra tsa javahá tacan, cua cunaa ra naha.

⁵ Vasu ndi maa tsa tsitó ndo tsa javahá Nyoo tahañ tsanaha, maa tyin cuñi yu janducuhun iñi yu tsi ndo tyin Jutu Mañi yo tava ra tsi nyivi Israel ñuhu Egipto, jacacu ra tsi ñi ndaha nyivi Egipto can. Maa tyin tsa yahá can janaa ra tsi tandihí maa ñi tsa ña tsinu iñi tsi ra. ⁶ Tan juvin ñi tacan javahá tucu Nyoo tsihin ángel tsa ña tyaa yahvi tsi ra. Tsahá ra tyiñu tsi nahnu, maa tyin nacoo nahnu can. Tan yacan cuenda tsaháñi ra tsi nahnu tsihin cadena nu naa tan jahá cuenda ra tsi nahnu nda tahañ tsi quivi cutuñi nyivi. ⁷ Tacan tucu nyivi ñuu Sodoma tan ñuu Gomorra, tan nyivi ñuu nyihí tsa tsicoq nicanduvi ñuu can. Janaa Nyoo tsi ñi tsa cuenda tsa caquiñi tsa javahá ñi. Tyin rayi can naha ra tsicoq ra naha tsihin ñaha. Tan ñiñaha tsicoq ñi tsihin iin rayi tan inga ra. Tan cuaha ca tsa caquiñi javahá ñi tyin rayi tsicoq ra naha tsihin ra ndusihi. Tan tsa cuenda yacan, nyehe ñi tundoho na cayú ñi quivi tsahmí Nyoo ñuu

ñi. Tan yacan janahá tsi yo tyin nyivi javahá tsa caquiñi, cua cayu ñi tsihin ñuhu tsa ña cua ndahva maa.

⁸ Vasu ndi maa tacan cuví, vityin ndi iyó ra jandaví ñaha naha ra. Cuñi ra naha tyin vaha javahá ra naha. Maa tyin jatívi ra naha cuñu ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi sigui ra iyó ca tunyee iñi tsi tan ñavin ca maa ra naha. ⁹ Tan ndi ángel Miguel tsa cahnu cuví nuu Nyoo, ña cana iñi ra javahá ra tacan. Tyin quivi cañi tahañ ra tsihin nu ña vaha tsa cuenda cuñu ñuhu ra Moisés, ña cana iñi ra cahañ ra ndavaha ñi sigui nu. Intuhun ñi tsa catyí ra tsihin nu: “Na tatsi tuñi Jutu Mañi yo tsi un” catyí ángel Miguel can tsihin nu ña vaha. ¹⁰ Maa tyin ra tsa jatyañú tsi ndo can naha ra, caahán ra naha ndavaha ñi tyin ña tsitó ra naha. Tan javahá ra naha tumaa javahá quiti, tyin quiti ña cutuñi iñi ti. Ica ñi maa ti naha ti tsa cuñi cuñu ñuhu ti naha ti. Tan tacan tucu ra can naha ra. Tsihin tsa caquiñi tsa javahá ra naha jatívi ra naha juvin ñi tsi maa ra naha.

¹¹ Jndahvi ra ndaahvi can naha ra! tyin javahá ra naha tumaa javahá ra Caín. Tan tsa cuenda tsa cuñi ra naha jaha canaa ra naha xuhun, nacoo ra naha ityi Nyoo tumaa javahá ra Balaam. Tan cua cunaa ra naha tumaa cunaa ra Coré, tyin tsihi ra can tsa cuenda tsa ña tyaa yahvi ra tsa cahañ ra cuví ityi nuu tsihin ra. ¹² Ra tsa jatyañú tsi ndo naha ra tsahá ra naha ticanuu tsi ndo nu ndu iin ndo. Tyin tsatsi ra naha tan tsihi ra naha tsihin tsa si cuñi ra naha, tan ña cahán nuu ra naha tsa ña jahá ra naha tsa ña yivi tsi Nyoo. Cuví ra naha tumaa ra tsa ña jahá cuenda vaha mbee, tyin juvin ñi tsi maa ra naha jahá cuenda ra naha. Cuví ra naha tumaa vico tsa yihí ityi sigui tun tsa cua cuun savi tan cuahán tsi tsihin tatyí tan ña cuun savi. Cuví ra naha tumaa yutun tsa ña tsahá tsi. Tyin yutun tsa ña tsahá tsi cuví tun tumaa yutun tsa tsa tsihi vasu ndi nyitó tun. Tan tumaa tsa uvi tsaha cua cúu tun tyin cua tyahnya cuí yoho tun. ¹³ Tan juvin ñi cuví tucu ra can naha ra tumaa ndutya ñuhu xaan tsa nacoo tiñuu nu nyiti tyin tsahá ra naha ticanuu. Tan cuví tucu ra naha tumaa tiñuu tsa iyó andivi tsa tsinaa. Tsa nyaá maa tsa cua ndoo cuí ra naha nu naa. Tacan ñi maa tsa cua tahañ ra naha.

¹⁴ Tuhun ra can naha ra cahañ ra Enoc tahañ tsanaha. Ra Enoc tsa tsinu utsa tsa cuví tata ra Adán. Cañan ra tuhun tsa tsaha maa Nyoo tsi ra, tan catyí ra: “Nyehe yu nu vatsí Jutu Mañi yo tan cuenda mil ángel ra vatsí tsihin ra ¹⁵ tyin vatsí ra vatsí tatsi tuñi ra tsi nyivi caquiñi tsa cuenda tandihí tsa ña vaha tsa javahá ñi, tan nyivi caahán

ndavaha ñi siqui ra”, catyi ra Enoc tahan tsanaha. ¹⁶ Ra tsa jatyañú tsi ndo naha ra, ña ndoó ra naha vaha tsihin tsa tsahá Nyoo tsi ra naha. Caahán ra naha tan catyi ra naha: “Yií xaan, cahnu xaan tundoho nyehé yo.” Javahá ra naha tsa cuñi cuñu ñuhu ra naha. Yaa xaan caahán ra naha. Tan tsa caahán ra naha tsa vaha tsihin nyivi, javahá ra naha can tyin cuñi ra naha tsa cahan nyivi tyin vaha xaan iñi ra naha.

Nu tsahá cuenda ra Judas tsi nyivi yihi cuenda Nyoo

¹⁷ Yañi, ña tyaa yahvi ndo tsi ra can naha ra. Maa tyin nducuhun iñi ndo tuhun tsa cahan ra tsa tava tyiñu Jutu Mañi yo Jesucristo, ¹⁸ tyin catyi ra naha tyehen: “Nu cua ndihi quivi cua coo ra vacu nducu tuhun Nyoo. Cua coo ra naha tsihin tsa ña vaha tsa tsicá iñi ra naha.” ¹⁹ Ra tsa cahan ra naha tuhun cuvi ra cuñi jasiin tsi yo. Tyin tyaa yahvi ra naha cuhva cuñi cuñu ñuhu ra naha tan nduve Tatyí Ii Nyoo iyó tsihin ra naha.

²⁰ Maa tyin nyoocho yañi, jandu iin ndo iñi ndo tsihin tsa tsinú iñi ndo tsi ra Cristo. Ndaçan tahvi ndo tsi ra tsihin tunyee iñi Tatyí Ii maa ra. ²¹ Nducu ndo cuhva cunyanaa vaha ca ndo tsi Nyoo, tyin tacan tan coto ndo tyin cuñi xaan ra tsi yo. Tan cuatu ndo quivi cuhun yo coo cuii yo tsihin ra. Tyin yacan cuvi tsa cua cuhva Jutu Mañi yo Jesucristo tsi yo tsa cuenda tsa cundaahvi iñi ra tsi yo.

²² Cahan yuhu ndo tsihin nyivi tsa ña tsinú iñi, na tsinu iñi ñi. ²³ Nducu ndo cuhva cacu ñi tsa cua cayu. Cundaahvi tucu iñi ndo nyehe ndo tsi inga ñi tsa javahá tsa caquiñi. Maa tyin jaha ndo cuenda tsi ndo tsa ña cua javaha ndo tsa caquiñi tsa javahá ñi, tyin nda cuanda jahma nditsi ñi tan ña vaha can.

Nu ndihi cahan ra Judas tan jacahnu ra tsi Nyoo

²⁴⁻²⁵ Intuhun ñi Nyoo iyó, tan iyó xaan tsa tsiñi tuñi tsi ra. Ra ican cuvi ra tsa jacacú tsi yo. Tan iyó xaan tunyee iñi tsi ra tsa jahá cuenda ra tsi yo tsa ña coo ca cuatyí yo quivi cua cuhun yo tsihin ra nu cahnu cuvi nu nyaá ra. Tan sií xaan cua cuñi yo.

Na coto yo tsa cahnu xaan cuvi ra. Na jacahnu yo tsi intuhun ñi maa ra tyin cahnu xaan cuvi ra. Tan iyó xaan tunyee iñi tsi ra. Na cundaca ñaha intuhun ñi maa ra tandihi. Tyin nda nu quitsi tsi, tan vityin, juvin ra ndacá ñaha tan tacan ñi maa cua cundaca ñaha ra.

Tan na cuvi tsi tacan ñi.

Tsa Janaha Ra Jesucristo Tsi Ra Juan

Tsa nyehe ra Juan

¹ Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuyatyin cuii javaha ra tsa cua javaha ra. Tan jaquitsi ra Jesucristo iin ángel ra tan tsaha cuenda ra tandihi tsa cua cuvi tsi yuhu, ra Juan, ra cuvi musu ra. ² Tan caahán yu tandihi tsa nyehe yu. Tan cuvi yu tsandaa tsa cuenda tuhun Nyoo tsa jacotó ra Jesucristo tsi yu.

³ Sií xaan cuvi tsi nyivi tsa cua cahvi tuhun Nyoo tsa nyaá nu tutu ihya tan cuñi ñi tuhun caahán tsi tan tyaa yahvi ñi itsi, tyin tandihi tuhun tsa nyaá nuu tutu ihya, tsa yatyin cuii cundaa tsi.

Nu jacuhun ra Juan tutu tsi nyivi tsa utsa taahan vehe ñuhu

⁴ Yuhu ra Juan jaquitsi yu tutu ihya tsi nyoocho, nyivi tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí ií tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juvin ra cuvi Nyoo nda tsanaha, tan vityin, tan juvin ra cua quitsi. ⁵ Tan naquihin tucu ndo tsa vaha jahá ra Jesucristo. Tyin ra ican cuvi ra tsandaa tan tsa nditsa. Juvin ra cuvi ra tsa nandotó tsa jihna ñi. Tan ndacá ñaha ra tsi ra cuvi rey tsa iyó nu ñuhu ñayivi ihya naha ra. Tan cuñi xaan ra tsi yo, tan nacatyá ra tsi yo tsihin ñiñi ra. ⁶ Tan tsaha ra tsa cuvi yo rey tan cuvi yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundihi maa tsa ndacá ñaha ra! Tan nacuvi tsi tacan.

⁷ ¡Nyehe jihna ndo! ¡Tsa vatsí ra Cristo nu vico andivi! Tandihi nyivi tsa ñaícuehe tsi ra tan cua nyehe ñi tsi ra. Tan tandihi ñi cua vacu xaan ñi tyin cua nayuhvi ñi nyehe ñi tsi ra inga tsaha tyin juvin ñi maa ra cuvi. Nditsa, tacan cua cuvi, tan na cuvi tsi tacan ñi.

⁸ Catyí Jutu Mañi yo:

—Yuhu cuvi ra jihna ñi, tan yuhu cuvi ra cua coo nu cua ndihi quivi, tumaa letra A tan Z—catyí Jutu Mañi yo, ra iyó tandihi tunyee iñi tsi. Tacan ñi iyó maa ra: Juvin ra cuvi Nyoo nda tsanaha, tan vityin, tan juvin ra cua quitsi.

Nu nyehe ra Juan tsa iyo caá ra Cristo

⁹ Yuhu ra Juan cuvi yu yañi ndo. Tan iin caa ñi nyehe yu tundoho tsihin ndo, tan ndacá ñaha Nyoo tsi yo, tan iin caa ñi cunye xaan iñi yo náa cuvi tsi yo tyin jatinyee ra Jesucristo tsi yo. Nyíi yu vehe caa ñuhu

Patmos tsa canyii mahñu ndutya ñuhu. Nyíi yu vehe caa tsa cuenda tsa caahán yu tuhun Nyoo tsa jacuahá ra Jesucristo. ¹⁰ Tan iin tumingu quivi jacahnú yo tsi Jutu Mañi yo, tuví iñi yu tsa nyaá Tatyí Ii Nyoo tsihin yu. Tan tsiñi yu iin ndusu ñihi xaan ityi tsata yu, tumaa ndusu trompeta. ¹¹ Tan catyí tsi tsihin yu tyehen:

—Yooho, Juan. Yuhu cuvi ra jihna ñi, tan yuhu cua coo nu cua ndihi quivi. Tyaa nu iin tutu tandihi tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe ñuhu ñuu Pérgamo, vehe ñuhu ñuu Tiatura, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea—catyí ndusu can tsihin yu.

¹² Tacan tan nyico coo yu tyin cuñi yu nyehe yu yóo caahán tsihin yu. Tan nyehe yu utsa taahan candileru xuhun cuaan. ¹³ Tan mahñu tsa utsa taahan candileru can, nyehe yu nyaá iin ra tsa caá tumaa caá rayíi ñuhu ñayivi ihya. Nditsi ra jahma cañi nda nu tsaha ra. Tan yihí iin cinturón xuhun cuaan yiqui nyica ra. ¹⁴ Tan ixi jiñi ra cuitsin tsi, tumaa cuitsin ixi mbee, tan tumaa cuitsin catyí. Tan tinuu ra caá tsi tumaa caá nu cayú ñuhú. ¹⁵ Tan xiñú xaan tsaha ra tumaa xiñú iin caa tsa nañi bronce tsa tuhvá yo nacuhvá tsa yaha quita can tsitsi ono nu cayú ñuhú. Tan ñihi xaan ndusu ra tumaa ndusu ndutya cuaha. ¹⁶ Tan ndaha cuaha ra nyecú utsa taahan tiñuu andivi. Tan tuhun quitá yuhu ra caá tsi tumaa caá mityi tsa xaan nduvi tsiyo yuhu. Tan nuu ra caá tsi tumaa caá tun ñihi xaan nyehe ñicanyii.

¹⁷ Cuhva tsa nyehe yu tsi ra, nduva yu tsaha ra tumaa tsa tsiñi yu. Maa tyin tsiyo ra ndaha cuaha ra siqui yu, tan catyí ra tsihin yu:

—Ña nayuhvi un. Yuhu cuvi ra jihna ñi, tan yuhu cua coo nu cua ndihi quivi. ¹⁸ Yuhu nyito yu vasu tsiñi yu, maa tyin vityin ña cua cundihi maa tsa iyó yu. Tan iyó ndatu tsi yu tsa catyí yu ama taahán tsi cuu nyivi, tan tatun cuhun ñi anyaya o ña cuhun ñi. ¹⁹ Tyaa nu libru tandihi tsa nyehe un, tan tsa iyó vityin, tan tsa cua coo nu cuahán ca tsi. ²⁰ Tuhun ihya cuvi tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñi tsi catyí tsa utsa vehe ñuhu.

2

Nu quitsahá tsahá cuenda ra Cristo tsi nyivi tsicá tsa utsa vehe ñuhu: Tsa tsahá cuenda ra tsi nyivi tsicá vehe ñuhu ñuu Éfeso

¹ Jacuhun tutu tsi ra caahán tuhun yu tsihin nyivi tsicá vehe ñuhu ñuu Éfeso. Tan catyi tsihin ra tyehen: “Tyehen catyi ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan: ² Yuhu tsitó yu tandihi tsa javahá ndo. Tan nyehé yu tyin ñihi xaan jahá tyiñu ndo tan cunyeé xaan iñi ndo. Tan tsitó yu tyin ña cuñi ndo nyehé ndo tsi nyivi caquiñi. Tan tsitó yu tyin tuhva ndo nducu cuhva tsi ra tsa catyi tyin ra tsicá tyiñu Nyoo cuví ra naha, tan tsitó ndo tyin ña nditsa ra naha. ³ Cunyeé xaan iñi ndo. Tan nyehé xaan ndo tundoho tan jahá tyiñu xaan ndo tsa cuenda yu tsihin tsa ña ndu uvi iñi ndo. ⁴ Maa tyin iyó iin tsa ña vaha javahá ndo, tyin ña cuñi ca ndo tsi yu vityin tumaa tsa cuñi ndo tsi yu quivi jihna ñi. ⁵ Yacan cuenda nducuhun iñi ndo numaa nda nduva ndo. Tan nasama ndo cuhva iyó ndo, tan javaha nyico ndo tumaa javahá ndo quivi naquihin cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatun ndu uvi iñi ndo cuatyí ndo, ña cua quitsi yu quinyaa yu itsi. ⁶ Cuaha tsa ña vaha javahá ndo, maa tyin iyó tucu tsa vaha javahá ndo, tyin ña cuñi ndo nyehe ndo tsa caquiñi tsa javahá nyivi yihí cuenda ra Nicolás. Tacan tucu yuhu ña taahán iñi yu nyehé yu yacan. ⁷ Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu. Catyi ra tyehen: Tatun cuvi jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito aña ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó.”

Tsa tsahá cuenda ra Jesucristo tsi nyivi tsicá vehe ñuhu ñuu Esmirna

⁸ Jacuhun ndihi tutu tsi ra caahán tuhun yu tsihin nyivi tsicá vehe ñuhu ñuu Esmirna, tan catyi tsihin ra tyehen: “Tyehen catyi ra cuví tsa jihna ñi, ra cua coo nu cua ndihi quivi, ra tsa tsihí tan nandoto: ⁹ Yuhu nyehé yu tandihi tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyivi Israel ndavaha ñi siqui ndo. Tan ndi ñavin ñi Israel cuví ñi tsitsi aña ñi tyin cuenda nu ña vaha, nu nañi Satanás, cuví ñi. ¹⁰ Maa tyin ña nayuhvi ndo tsa nyehé ndo tundoho. Tyin nu ña vaha cua tyihí nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quivi cua nyehe ndo tundoho. Maa tyin cunyanyicun vaha ndo tsi Nyoo nda cuenda cuu ndo. Tan yuhu cua cuhva yu ñayivi coo ndo tsihin Nyoo. ¹¹ Nyooho tsa iyó soho, tyaa soho ndo tsa caahán Tatyí li Nyoo tsihin

nyivi tsicá vehe ñuhu. Catyi ra tyehen: Tatun cuvi jaha canaa ndo tsi nu ña vaha, ña cua cuhun ndo anyaya, quivi cuu nyivi tsa tsinu uvi tsaha.”

Tsa tsahá cuenda ra Jesucristo tsi nyivi tsicá vehe ñuhu ñuu Pérgamo

¹² Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Pérgamo. Tan catyi tsihin ra tyehen: “Tyehen catyi ra tsa ndahá mityi tsa xaan nduvi tsiyo yuhu: ¹³ Yuhu nyehé yu tandihi tsa javahá ndo. Tan tsitó yu tyin vaha javahá ndo tyin ña jandihí ndo tsa tsinu iñi ndo tsi yu. Tan tacan ñi tsinu maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyivi tsi ra Antipas, ra tsa cuví tsandaa cuenda yu. ¹⁴ Maa tyin quituvi juhva tsa javahá ndo nuu yu: Tyin ñuu Pérgamo nu yucú ndo ihya, yihí ra tsa ña cuñi jandihí cuhva tsa javahá ra Balaam, ra tsicoo tsanaha. Tyin ra Balaam natyuhu ra tsi ra Balac, na jacatsi ra cuñu quiti tsa jamañi nyivi nu tsitoho tsi nyivi Israel. Tan natyuhu ra tsi ra na catyi ra tsihin ñi tyin ñavin cuatyí cuví tun iin ñaha tan iyó ña tsihin iin rayi vasu ña tindahá ñi, tan tacan tucu ñi rayi. ¹⁵ Tan juven ñi iyó tucu juhva nyivi tsa ña cuñi nacoo tsa jacuahá ra yihí cuenda ra Nicolás. Tan yuhu ndasi cuñi yu nyehe yu tsa jacuahá ra can naha ra. ¹⁶ Yacan cuenda janumi ndo nasama ndo cuhva iyó ndo. Tyin tatun ña nasama ndo cuhva iyó ndo, cua quitsi yu nu yucú ndo tsa numi ñi tan cua cañi tahan yu tsihin nyivi tsa javahá tacan tsihin mityi [tsa cuví tuhun] quitá yuhu yu. ¹⁷ Nyooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu: Tatun cuvi jaha canaa ndo tsi nu ña vaha, cua cuhva yu tsa catsi ndo paan tsa cuví maná tsa nyii xeehe. Tan cua cuhva yu iin yuu cuitsin tsi ndo. Tan nu yuu can nyaá iin sivi tsaa tsa yofi tsitó; intuhun ñi nyivi tsa cua naquihin yuu can cua coto sivi can.”

Tsa tsahá cuenda ra Jesucristo tsi nyivi tsicá vehe ñuhu ñuu Tiatira

¹⁸ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Tiatira. Tan catyi tsihin ra tyehen: “Tyehen catyi Sehe Nyoo, ra tsa caá tinuu tumaa caá nu cayú ñuhu. Tan tsaha ra caá tumaa caá caa bronce tsa xiñu xaan. ¹⁹ Yuhu nyehé yu tandihi tsa javahá ndo. Tan tsitó yu tsa cuñi xaan ndo tsi nyivi. Tan tsitó yu tyin tsinu xaan iñi ndo tsi yu, tan jatyingee ndo tsi nyivi, tan cunyeé xaan iñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quitsi tsi. ²⁰ Maa tyin iyó juhva tsa cuñi yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá

tumaa javahá] ña Jezabel [tsa tsicoq tahañ tsanaha]. Ña ican jacuahá tsi ndo, catyí ña tyin Nyoo tsahá tuhun caahán ña, maa tyin jandavi ñaha ña tsi nyívi tsa jahá tyiñu tyiñu yu tsihin tuhun jacuahá ña. Tyin catyí ña tyin ñavin cuatyí cuví tsa coo iin rayíi tsihin ñaha o iin ñaha tsihin rayíi tun ña tindahá ñi. Tan jacuahá ña tyin cuví catsi ñi nyayu tsa jamañi nyívi tsi tsitoho. ²¹ Yuhu tsa ndatu xaan yu tsa nasama ña cuhva iyó ña, maa tyin ña cuñi ña javahá ña can. Ña cuñi ña jandihí ña tsa tsicá nuu ña tsihin rayíi. ²² Tan vityin cua quihin cuehe tsi ña tan ña cua cuví nduvita ña. Tan nyívi javahá tsa caquiñi tsihin ña, cua cuhva yu tundoho nyehe ñi tatun ña ndu uvi iñi ñi tsa javahá ñi. ²³ Tan cua cahñi yu sehe ña. Tacan tan cua coto tandihí nyívi tsicá vehe ñuhu, tyin yuhu tsitó yu tandihí tsa tsicá iñi ñi, tan tandihí tsa iyó añima ñi. Tan tsa intuhun intuhun nyoocho cua cuhva yu tsa taahán tsi tsi ndo tsa cuenda tsa javahá ndo. ²⁴ Maa tyin tandihí ca nyoocho tsa iyó ñuu Tiatira, nyoocho tsa ña naquihin cuenda cuhva jacuahá ña, ndi ña javahá ndo tsa catyí nyívi tyin cuví tuhun xeehe cuenda nu ña vaha, ña tyaá yu inga tsa yíi siqui ndo. ²⁵ Maa tyin jañihi ndo javahá ndo tsa vaha nda cuenda quitsi nyico yu. ²⁶ Tan nyoocho tsa jaha canaa tsi nu ña vaha, tan javahá ndo cuhva cuñi yu nda cuenda nu ndihí tuhun, cua cuhva yu ndatu tsi ndo tsa cundaca ñaha ndo tsi nyívi iyó nu ñuhu ñayívi ihyá. ²⁷ Tumaa tsahá Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatun tsa cuví caa cua tatsi tuñi ndo tsi nyívi. Tan cua tahví cuatyí ndo tsi ñi tumaa tsa tahví cuatyí yo quisi. ²⁸ Tan cua cuhva yu tiñuu cahnu tsa caná tsa naa ca coo tsihin ndo. ²⁹ Nyoocho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu.”

3

Tsa tsahá cuenda ra Jesucristo tsi nyívi tsicá vehe ñuhu ñuu Sardis

¹ Jacuhun tucu tutu tsi ra caahán tuhun yu tsihin nyívi tsicá vehe ñuhu ñuu Sardis. Tan catyí tsihin ra tyehen: “Tyehen catyí ra tsa iyó tsa utsa tatyí i Nyoo tan tsa utsa tiñuu: Yuhu nyehé yu tandihí tsa javahá ndo. Tan vasu catyí nyívi tyin nyito ndo, maa tyin tsa cuenda yuhu, tsa tsihi ndo. ² Jaha cuenda vaha ndo tsa vaha tsa iyó luxu ca tsi ndo. Tyin coto ndihí ndihí tuhun yu nu yucú ndo. Nyehé yu tyin nuu Nyoo ña vaha maa tsa javahá ndo. ³ Ndycuhun iñi ndo tsa vaha tsa cutuhva ndo. Cuanycun ndo can, tan nasama ndo cuhva iyó ndo. Tyin tun ña naquihin vaha ndo tsa vaha, sana iñi ndo tan cua quitsi yu nu yucú ndo, tumaa iin ñasuhu. ⁴ Maa tyin iyó juhva nyoocho, nyívi

Sardis, tsa ña janyahyu jahma; ña javahá ndo tsa caquiñi cuví can. Tan juvin nyoocho cua cunditsi jahma cuitsin tsihin yu, tan cua caca ndo tsihin yu, tyin tacan taahán tsi tsi ndo. ⁵ Tan nyoocho tsa cua cuví jaha canaa tsi nu ña vaha, cua cunditsi ndo jahma cuitsin tsihin yu. Tan ña cua janaa yu sivi ndo nu libru nu nyecú sivi tandihí nyívi cua coo nyito tsihin Nyoo. Tan cua catyí yu tsihin Jutu yu, tan ángel ra tyin nacotó yu tsi ndo. ⁶ Nyoocho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu.”

Tsa tsahá cuenda ra Jesucristo tsi nyívi tsicá vehe ñuhu ñuu Filadelfia

⁷ Jacuhun tucu tutu tsi ra caahán tuhun yu tsihin nyívi tsicá vehe ñuhu ñuu Filadelfia. Tan catyí tsihin ra tyehen: “Tyehen catyí ra ii, ra nditsa, ra yihí ndaha ndaha tucu ra rey David, ra tsa nuña yuvehe tan ndi intuhun nyívi tan ña cuví nacasi. Tan tatun nacasi ra, ndi intuhun ñi tan ña cuví nuña ñi. Tyehen catyí ra: ⁸ Yuhu nyehé yu tandihí tsa javahá ndo. Tan nuña yu iin yuvehe tsa cuenda ndo tan yoñi cuví nacasi itsi, [tyin tsahá yu tsa cahan ndo tuhun Nyoo tsihin nyívi, tan yoñi cuví casi tsi ndo]. Tan iyó luxu tunyee iñi tsi ndo, tan tyaá yahvi ndo tsa caahán yu, tan ña catyí ndo tyin ña nacotó ndo tsi yu. ⁹ Tan nyívi yihí cuenda nu ña vaha, ñi vatya, ñi catyí tyin nyívi Israel cuví ñi, maa tyin ñavin nyívi Israel cuví ñi tsitsi añima ñi; cua jacuiñi tsiti yu tsi ñi nuu ndo, tyin tacan tan coto ñi tyin yuhu cuñi yu tsi ndo. ¹⁰ Tyin cunyeé xaan iñi ndo tumaa catyí yu tsihin ndo tyin cunyeé iñi ndo. Tan yacan cuenda cua jaha cuenda yu tsi ndo tan nduve náa cua tahan ndo quívi cua jaquitsi yu tundoho cahnu siqui tandihí nyívi, tyin cua nducu cuhva yu tsi tandihí ñi iyó nu ñuhu ñayívi. ¹¹ Yatyí cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyívi tsa vaha tsa cua ñihi ndo. ¹² Nyoocho tsa cua cuví jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu sivi Nyoo yu tsi ndo, tan sivi ñuu Nyoo yu, ñuu Jerusalén tsa tsa cua queue nda andívi, tan juvin ñi cua tyaa tucu yu sivi tsa yu tsi ndo. ¹³ Nyoocho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu.”

Tsa tsahá cuenda ra Jesucristo tsi nyívi tsicá vehe ñuhu ñuu Laodicea

¹⁴ Jacuhun tucu tutu tsi ra caahán tuhun yu tsihin nyívi tsicá vehe ñuhu ñuu Laodicea. Tan catyí tsihin ra tyehen: “Tyehen catyí ra tsa nditsa, ra jandaá tsa caahán ra tyin javahá ra, tan tsihin ra javahá Nyoo tandihí

maa tsa iyó: ¹⁵ Yuhu nyehé yu tandihí tsa javahá ndo. Tan cuví ndo tumaa ndutya tsa ña vitsin tan ndi ña ihñi, tyin ndi ña tsinú vaha iñi ndo tsi yu, tan ndi ña jandihí tucu ndo tsa tsinú iñi ndo tsi yu. Vaha ca tsa tsinu vaha iñi ndo tuhun caahán yu, o jandihí cuíi ndo tsa tsinú iñi ndo tsi yu. ¹⁶ Maa tyin tsa cuenda tsa cuví ndo tumaa ndutya vixin ñi ndi ña vitsin tan ndi ña ihñi ndo, cua ndutsan yu tsi ndo. ¹⁷ Tyin nyoocho catyí ndo tyehen: 'Yuhu cuca xaan yu, vaha xaan iyó yu. Nduve náa cumañi tsi yu,' catyí ndo. ¿A ña jahá ndo cuenda tyin cuiihya cuñi ndo nyehé ndo tundoho tsitsi añima ndo, ndaahvi ndo, cuaa ndo, tan tandií ndo tsitsi añima ndo? ¹⁸ Yacan cuenda tsahá cuenda yu tsi ndo tyin tsi maa yu jata ndo xuhun cuaan tsa cayu tan naa tsa nyahyu tsi, tyin tacan tan nducuca ndo. Tan jata ndo jahma cuit sin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandií ndo. Tan jata ndo numeri quihví tinuu ndo tyin tacan tan cuví nyehé ndo. ¹⁹ Yuhu tsahá cuenda yu tan tatsí tuñi yu tsi tandihí nyivi tsa cuñi xaan yu. Yacan cuenda catyí yu tsihin ndo: Jandu iin ndo iñi ndo tsihin tsa ñi iñi añima ndo tan javaha ndo tsa vaha. ²⁰ ¡Nyehe jihna! Yuhu nyaá yu yuvehe tan cañi ndaha yu. Nyivi tsa cua cuñi ndusu yu, tan nuña ñi yuvehe, cua quihví yu tan cuxiñi yu tsihin ñi. Tan maa ñi cuxiñi ñi tsihin yu. ²¹ Cua cuhva yu tsa cunyecu ndo tsihin yu nu ndacá ñaha yu tatun cuví jaha canaa ndo tsi nu ña vaha. Tumaa tsa jahá canaa yu tsi nu, tan vityin nyaá yu tsihin Jutu yu nu ndacá ñaha ra. ²² Nyoocho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu" —catyí ra Jesucristo.

4

Tsa cuví nda gloria

¹ Tsa yahá can, tan nyehe yu ticoho iin yuvehe nda andivi. Tan tsiñi yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Ndáa nyehe tan janaha yu tsi un tsa cua cuví nu cuahán ca tsi —catyí ndusu can tsihin yu.

² Tan juvin ñi cuhva can tan tuví iñi yu tsa nyaá Tatyí li Nyoo tsihin yu. Tan nyehe yu nyaá iin tyayu nda gloria. Tan nu tyayu can nyaá iin ra nyaá. ³ Tan nuu ra tsa nyaá nu tyayu can, xiñu tsi tumaa xiñu yuu vaha tsa nañi jaspe tan tumaa xiñu yuu cornalina. Tan tanií cahnu yuhu tyayu can tsinú nduvi coo cuiya, tan xiñu ti tumaa xiñu yuu vaha tsa nañi esmeralda. ⁴ Tan nyehe yu nyecú oco cumi ca tyayu nu nyecú oco cumi ra tsahnu naha ra, tsinú nduvi tyayu can nu nyaá tyayu tsa nyaá mahñu can. Nditsi ra

naha jahma cuit sin. Tan yihí corona xuhun cuaan jiñi intuhun intuhun ra naha. ⁵ Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhu ityi nuu tyayu can, tan tsa utsa ñuhu can cuví tsa utsa tatyí li Nyoo. ⁶ Tan ityi nuu tyayu can iyó tucu iin tsa caá tumaa caá ndutya ñuhu, tan xiñu xaan can tumaa xiñu yutyi.

Nii canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can. ⁷ Iin tsa nyito can caá can tumaa caá ndicaha. Tan tsa tsinu uvi tumaa caá indiqui lee. Tan tsa tsinu uñi, tumaa caá nuu rayii caá nuu can. Tan tsa tsinu cumi tumaa caá tasu tsa cuahán ndavá. ⁸ Tan iyó iñu nditsin tsa intuhun intuhun tsa nyito can. Tan tanií cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandihí tsi tsa caahán tsi tyehen nduvi tan ñiñu:

Ra ii cuví un; ra ii cuví un; ra ii cuví un.

Jutu Mañi yu, Nyoo, iyó tandihí tunyee iñi tsi un.

Tacan ñi iyó maa un, juvin un cuví Nyoo nda tsanaha tan vityin, tan juvin un cua quitsi.

⁹ Tan jacahnú tsa cumi tsa nyito can tsi Nyoo, tan nacuhvá tsi naha tsi tyahvi nyoo tsi ra nyaá nu tyayu can, ra tsa iyó tandihí tyembu. Tan tahan ñi tsaha tsa javahá tsi naha tsi tacan, ¹⁰ tsa oco cumi ra tsahnu can naha ra tsicuñi tsiti ra naha tan jacahnú ra naha tsi ra iyó tandihí tyembu. Tan tsaquin ra naha corona ra naha nu nyaá tyayu can. Tan catyí ra naha:

¹¹ Jutu Mañi ndi, Nyoo ndi cuví un.

Yoocho taahán tsi jacahnú ndi.

Tan taahán tsi tsi un tsa cundaca ñaha un.

Tyin maa un javahá tandihí tsa iyó.

Tan tsa cuenda tsa iyó iñi maa un, tan tsicoo tandihí tsa iyó, catyí ra naha.

5

Nu nyehe ra Juan iin tutu tan Mbee Ticatyi Luhlu tsa cuví ra Jesucristo

¹ Tacan tan nyehe yu tyin ra tsa nyaá nu tyayu can ndahá ra iin tutu tsihin ndaha cuaha ra. Tan yihí tuvi tutu can tan nyaá letra ityi nuu tan ityi tsata can. Ndasí tsi tsihin utsa sellu. ² Tan nyehe yu iin ángel tsa nyee xaan. Tan caná tsaa ra tan catyí ra:

—¿Yóo taahán tsi nacani tutu ihya tan jocon sellu ihya? —catyí ra.

³ Maa tyin ndi intuhun tsa iyó andivi tan nu ñuhu ñayivi, tan tsitsi ñuhu, tan cuví nacani tutu can. Nduve maa náa cuví nyehe nuu tsi. ⁴ Tan tsacú xaan yu, tsa tsitó yu tyin yofi maa cuví nacani tutu can tan cuví

cahvi, tan cuví nyehe nuu tsi. ⁵ Tacan tan catyí iin ra tsahnu tsa nyaá can tsihin yu:

—Ña vacu ca un. Tyin ra cuví Ndicaha [o cuñí tsi catyí, ra ndacá ñaha], ra cuví tata ra Judá, tan tata ra rey David, ra ican jaha canaa tan juvin ra cua nacani tutu can tan jocon tsa utsa sellu tsa ndasí tutu can —catyí ra.

⁶ Tacan tan mahñu tyayu can tan mahñu tsa cumi tsa nyito can, tan mahñu ra tsahnu can naha ra, nyehe yu nyaá nyityi iin Mbee Ticatyi Luhlu. Tan caá ti tumaa caá iin mbee tsa tsahñi nyivi tan jamañi ñi. Tacan caá ti. Tan iyó utsa ndiquí ti tan nyecú utsa tinuu ti. Tan tinuu can cuví tsa utsa tatyí ii tsa jacuhun Nyoo tanií cahnú nu ñuhu ñayivi.

⁷ Tan ra Mbee Ticatyi Luhlu can tsahan ra nu nyaá ra nyaá nu tyayu can tan quihín ra tutu tsa ndahá ra can nu ndaha cuaha ra. ⁸ Cuhva tsa quihín ra tutu can, tandihí tsa cumi tsa nyito can tan tandihí tsa oco cumi ra tsahnu can tsicuiñi tsi ti ra naha nuu ra. Tan tsa intuhun intuhun ra tsahnu can naha ra ndahá ra naha arpa tsa iyó cuerda tumaa iyó cuerda nuu guitarra. Tan tsitú cutu tsitsi copa xuhun cuaan ndahá ra naha. Tan cutu can cuví tandihí tsa tsicán tahvi nyivi yihí cuenda Nyoo. ⁹ Tan tsitá ra naha iin yaa tsaa, tan catyí ra naha:

Yooho cuví ra taahán tsi quihín tutu ihya tan jocon un tsa utsa sellu tsa ndasí itsi.

Tyin tsahñi nyivi tsi un. Tan tsihin niñi un jata un tsi ndi tyin coo vaha ndi tsihin Nyoo.

Tan cuví ndi nyivi ñuu nyihi tan ñuu nahnu tsa iyó tanií cahnú nu ñuhu ñayivi, nyivi caahán siin siin yuhu, tan nyivi siin siin tata.

¹⁰ Tsaḥa un tsa cuví ndi rey tan jutu tsa cuenda Nyoo Jutu yo.

Tan cua cundaca ñaha ndi tsi nyivi iyó nu ñuhu ñayivi, catyí ra naha, tsitá ra naha.

¹¹ Yahá can tan tsiñi yu ndusu tan nyehe yu nyecú cuenda millón ángel tanií canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can. ¹² Tan ñihi caahán ángel can naha ra, tan catyí ra naha:

Ra Mbee Ticatyi Luhlu tsa tsahñi nyivi, juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsiñi tuñi tan tandihí tunyee iñi.

Na jacahnú yo tsi ra tan na jacahnú tandihí nyivi tan tandihí tsa iyó tsi ra, tyin cahnú xaan cuví ra, catyí ángel can naha ra.

¹³ Tan tsiñi tucu yu tsa caahán tandihí tsa javahá Nyoo; tandihí tsa iyó andivi, tan nu

ñuhu ñayivi, tan tsitsi ñuhu, tan tsitsi ndutya ñuhu; tan catyí tsi naha tsi:

Cahnú xaan cuví ra tsa nyaá nu tyayu.

Cahnú xaan cuví ra Mbee Ticatyi Luhlu.

Tan tunyee iñi tsa iyó tsi ra naha ña cua cundihi maa tsa iyó tsi.

Tan taahán tsi tsa jacahnú yo tan tyaa yahvi yo tsi ra naha tacan ñi maa —catyí tandihí tsa javahá Nyoo.

¹⁴ Tan catyí tsa cumi tsa nyito can:

—iNa cuví tsi tacan! —catyí tsi naha tsi.

Tan tsicuiñi tsi tsa oco cumi ra tsahnu can naha ra tan jacahnú ra naha tsi ra tsa ña cua cundihi maa.

6

Nu jocon ra Jesucristo tsa utsa sellu tsa ndasí tutu can

¹ Tacan tan nyehe yu nu jocon ra Mbee Ticatyi Luhlu can sellu tsa jihna ñi tsitsi tsa utsa sellu can. Tan tsiñi yu ndusu iin tsa nyito can tan ndusu tsi cuví tumaa nu caahán savi, tan catyí tsi:

—iÑaha, tan nyehe un! —catyí tsi tsihin yu.

² Tacan tan nanyehe yu tan nyehe yu iin cuayu cuitsin, tan ra yosó tsi ti ndahá ra iin nduva. Tan ñihi ra iin corona yihí jiñi ra, yacan jaha canaa ra, tan ndi nyaá ca cua jaha canaa ca ra.

³ Tan tsa jocon ra Mbee Ticatyi Luhlu can tsa tsinu uvi sellu can, tsiñi yu tsa caahán inga tsa nyito can tan catyí tsi:

—iÑaha, tan nyehe un! —catyí tsi tsihin yu.

⁴ Tan quita iin cuayu cuaaha. Tan ra tsa yosó tsi ti ñihi ra ndatu tsa quinyaa ra tsa taxin iyó nu ñuhu ñayivi, tyin tacan tan cahñi tahan nyivi tsi ñi. Tan ñihi ndihi ra iin mityi cahnú cundahá ra.

⁵ Tan tsa jocon ra Mbee Ticatyi Luhlu can tsa tsinu uñi sellu can, tsiñi yu tsa caahán inga tsa nyito can tan catyí tsi:

—iÑaha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi ti, ndahá ra iin ticitaya.

⁶ Tan tsiñi yu caahán iin ndusu mahñu tsa cumi tsa nyito can, tan catyí tsi:

—Tumaa tyahvi nyivi tsi iin musu tsa iin quivi, tacan yahvi tsa intuhun ñi kilu nuñi. Tacan tucu ñi tsa uñi kilu cebada. Tan ña jativi ndo acetye tan vinu —catyí ndusu can.

⁷ Tan tsa jocon ra Mbee Ticatyi Luhlu can tsa tsinu cumi sellu can, tsiñi yu tsa caahán intuhun ca tsa nyito can, tan catyí tsi:

—iÑaha, tan nyehe un! —catyí tsi tsihin yu.

⁸ Tan nanyehe yu, tan nyehe yu iin cuayu cuaan. Tan ra yosó tsi ti nañi ra Tuhun Tsiihi. Tan tsata ra can vatsi inga ra tsa

nañi Nu Yucú Añima Ndiyi. Tan ñihí ra naha tunyee iñi tsa cahñi ra naha tsa cuaha nyivi iyó nu ñuhu ñayivi. Tyin tsitsi tsa sava nyivi iyó nu ñuhu ñayivi, cua cahñi ra naha sava ñi. Tan cua cahñi ra naha tsi ñi tsihin tsa jacoo ra naha catyi, tan tsihin tama, tan tsihin cuehe, tan tsihin quití xaan iyó nu ñuhu ñayivi.

⁹ Tan tsa jocon ra Mbee Ticatyí Luhlu can tsa tsinu uhun sellu can, nyehe yu xuu altar. Tan ican yucú añima nyivi tsa tsihi tsa cuenda tsa jacoto ñi tuhun Nyoo. ¹⁰ Tan caná tsaa ñi tan catyi ñi tyehen:

—Jutu Mañi ndi, ra ii cuví un, tan jandaá un tandihi tsa caahán un tyin javaha un. ¿Ama cua tatsi tuñi un tsi nyivi tsa tsahñi tsi ndi tsa cuenda un? —catyi ñi.

¹¹ Tacan tan ñihí intuhun intuhun ñi jahma cuitsin tsa cunditsi ñi. Tan catyi ra tsihin ñi na quitatu ñi tan cuatu ñi juhva ca quivi, nda cuanda cahñi nyivi tsi tandihi ca ñi tsa jahá tyiñu tyiñu ra Cristo, ñi tsa taahán tsi cúu tumaa tsihi tucu maa ñi.

¹² Tan tsa jocon ra Mbee Ticatyí Luhlu can tsa tsinu iñu sellu can, nyehe yu tyin ñihí xaan taán. Tan ndutuun ñicanyii tumaa tuun jahma nyivi iyó tucuihaya iñi. Tan yoo ndu-cuaaha tsi tumaa cuaaha ñiñi. ¹³ Tan tiñuu cucoyo tsi nu ñuhu ñayivi tumaa cucoyo tsiti yutya yutun tatun ñihí yahá tatyí. ¹⁴ Tan andivi tsiquihí tuvi tsi tumaa tyihí tuvi yo iin ndaha tutu. Tan tandihi yucu tan ñuhu nyihí tsa cayucú mahñu ndutya ñuhu nasama nu cayucú tsi. ¹⁵ Tan tandihi rey tsa iyó nu ñuhu ñayivi tsihin ra nahnú naha ra, tan ra cuca naha ra, tan ra cuví ityi nuu tsihin andaru naha ra, tan ra iyó xaan tunyee iñi tsi naha ra, tan tandihi nyivi tsa cuví musu, tan ñi tsa ñavin musu cuví, quihví xeehe ñi tsitsi yavi yuu tan tyañu cava tsa iyó yucu nahnú. ¹⁶ Tan catyi ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tyayu can tsi ndi tan coto tatsi tuñi ra Mbee Ticatyí Luhlu can tsi ndi.

¹⁷ Tyin tsa tsaa quivi cahnu tsa cua tatsi tuñi ra tsi ndi, tan yoñi cunyehe iñi can —catyi ñi.

7

Nu ñihí nyivi Israel tuñi cunyaq nutyaan ñi

¹ Tsa yaha can tan nyehe yu nyecú cumi ángel tsa ndihí tsa cumi tutun ñuhu ñayivi ityi nu tuhvá tatyí quee tyin tacan tan ña yaha tatyí nu ñuhu ñayivi tan nu ndutya ñuhu tan nu yutun. ² Tan nyehe tucu yu quee inga ángel, ityi nu caná ñicanyii, tan ndahá ra tuñi Nyoo nyito. Tan caná tsaa ra tsi tsa cumi ángel tsa ñihí ndatu tsa jatívi nu ñuhu ñayivi

tan nu ndutya ñuhu. Tan catyi ra tsihin ra naha:

³ —Ña jatívi naha ndo nu ñuhu ñayivi, ndi nu ndutya ñuhu, tan ndi nu yutun tsa ndi cumañi ca janaha ndi yóo nyivi cuví musu Nyoo, tyin cua tyaa ndi tuñi nutyaan intuhun intuhun ñi —catyi ángel can.

⁴ Tan catyi ra tsiñi yu tyin cientu uvi xico cumi mil cuví nyivi Israel tsa tsinyaa tuñi can. ⁵ Utsi uvi mil nyivi tata ra Judá tsinyaa tuñi, tan utsi uvi mil nyivi tata ra Rubén, tan utsi uvi mil nyivi tata ra Gad, ⁶ tan utsi uvi mil nyivi tata ra Aser, tan utsi uvi mil nyivi tata ra Neftalí, tan utsi uvi mil nyivi tata ra Manasés, ⁷ tan utsi uvi mil nyivi tata ra Simeón, tan utsi uvi mil nyivi tata ra Leví, tan utsi uvi mil nyivi tata ra Isacar, ⁸ tan utsi uvi mil nyivi tata ra Zabulón, tan utsi uvi mil nyivi tata ra José, tan utsi uvi mil nyivi tata ra Benjamín. Tandihí ñi can tan tsinyaa tuñi Nyoo tsi ñi.

Nu nyehe ra Juan tsi nyivi nditsí jahma cuitsin

⁹ Tsa yaha can tan nyehe yu yucú cuaha nyivi. Tan yoñi maa cuví nacahvi tsi ñi, tyin cuaha xaan ñi. Yucú nyivi quee tandihí nuu nyihí tan nuu nahnú tsa iyó tanñi cahnu nu ñuhu ñayivi. Tan yucú nyivi caahán siin siin yuhu. Tan yucú nyivi siin siin tata. Tan nyecú ñi nuu ra nyaá nu tyayu, tan nuu ra Mbee Ticatyí Luhlu. Ndisí ñi jahma cuitsin. Tan ndahá ñi ndaha ndicaha. ¹⁰ Tan tandihí ñi caná tsaa ñi tan catyi ñi:

Nyoo Jutu yo, ra nyaá nu tyayu, tan ra Mbee Ticatyí Luhlu, juvin ra naha jacacú tsi yo —catyi ñi caná tsaa ñi.

¹¹ Tan tandihí ángel naha ra nyecú ra naha tanñi canduvi nu nyaá tyayu, nu nyecú ra tsahnú naha ra, nu nyecú tsa cumi tsa nyito. Tan tsicuiñi tsiti ra naha tan tsaquín ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo. ¹² Tan catyi ra naha: Tyehen taahán tsi jacahnu ndi tsi un, Jutu Mañi ndi tyin iyó xaan tsa tsiñi tuñi tsi un:

Nacuhvá xaan ndi tyahvi nyoo tsi un. Tan jacahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuví tsi tacan tandihí tyembu, catyi ra naha.

¹³ Tacan tan tsicá tuhun iin ra tsahnú can tsi yu tan catyi ra:

—¿Yóo nyivi cuví ñi nditsí jahma cuitsin ihya? ¿Tan ndáa ityi quee ñi? —catyi ra.

¹⁴ Tan catyi yu tsihin ra:

—Maa un tsitó, tata.

Tan catyi ra tsihin yu:

—Nyivi ihya cuví ñi nyehe tundoho cahnu. Maa tyin nacatyá ñi jahma ñi tsihin

niñi ra Mbee Ticatyi Luhlu tan nducuitsin tsi. ¹⁵ Yacan cuenda nynecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan ñiñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tsihin tsa nyaá ra tsihin ñi. ¹⁶ Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñi ñi tsihin tsa ihñi. ¹⁷ Tyin ra Mbee Ticatyi Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihi ndutya nuu ñi —catyí ra tsihin yu.

8

Nujocon ra Jesucristo tsa tsinu utsa sellu tan nu quitá iin ángel tsihin iin cuu xuhun cuaan

¹ Tan tsa jocon ra Mbee Ticatyi Luhlu tsa tsinu utsa sellu tsa ndasí tutu can, ndutaxin nda andivi tumaa sava hora.

² Yahá can tan nyehe yu nynecú utsa ángel ityi nuu Nyoo. Tan intuhun intuhun ra naha quihñ cuenda ra naha iin trompeta. ³ Yahá can tan tsaá inga ángel tsa ndahá iin cuu xuhun cuaan. Tan tsinyaá nyityi ra ityi nuu altar can. Tan quihñ cuenda ra cuaha xaan cutu, tyin cuhva cuenda ra itsi iin caa ñi tsihin tsa tsicán tahvi nyivi tsi Nyoo nuu altar xuhun cuaan tsa nyaá ityi nuu tyayu Nyoo. ⁴ Tan quitá yuhma cutu tan yuhma tsa tsicán tahvi nyivi tsi Nyoo ndaha ra, tan cuahán yuhma can nu nyaá Nyoo. ⁵ Tacan tan ángel can quihñ ra cuu can tan jacutú ra can tsihin tuun ñuhu tsa quitá nu altar can. Tan tyoso ra can nu ñuhu ñayivi. Tan quitsahá caahán savi, tan iyo cuví. Tan ñihi tatsa, tan quitsahá taán.

Nu tiví ángel naha ra trompeta

⁶ Tacan tan tsa utsa ángel tsa ndahá trompeta can, ndatú ra naha tsa tiví ra naha can.

⁷ Tsa tiví iin ángel can trompeta tsa ndahá ra, quitsahá cuñ savi tan cucoyó yuu savi, ñihi cayú ñuhu tan sacá nuu niñi tsihin can. Tan tsa yatyin cayú sava ñuhu ñayivi, tan tsa yatyin tucu sava cuhva nyaá cuhu tsitsa tan tandihi cuhva nyaá cuhu cuii.

⁸ Tan tsa tiví tsa tsinu uvi ángel can trompeta tsa ndahá ra, nyehe yu cayú tumaa iin yucu cahnu. Tan nacavá can mahñu ndutya ñuhu. Tan tsa yatyin sava ndutya ñuhu can nanduví tsi niñi. ⁹ Tan tsa tandihi quití iyó tsitsi ndutya ñuhu can tsihi tsa yatyin sava ti naha ti. Tan tahví cuatyí tucu tsa yatyin sava yutun ndoo cuaha tsa iyó tsitsi ndutya ñuhu can.

¹⁰ Tan tsa tiví tsa tsinu uñi ángel can trompeta tsa ndahá ra, nacavá iin tiñuu

cahnu. Cayú tsi tumaa cayú yiti. Tan nacavá tsi siqui tsa yatyin ña sava yutya nahnú tan tsa yatyin ña sava nu ndohyo. ¹¹ Tan sivi tiñuu cahnu can cuví Ajenjo. Tan tsa yatyin ña sava ndutya tsa iyó, ndu uvá tsi tumaa tsa uva xaan ajenjo can. Tan cuaha xaan nyivi tsihi tyin tsihi ñi ndutya tsa ndu uvá can.

¹² Tan tsa tiví tsa tsinu cumi ángel can trompeta tsa ndahá ra, ndu naá tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu ndunaa tsi naha tsi. Tan tsa cuenda tsa ndunaa juhva ñicanyii, ndunaa nu ñuhu ñayivi cumi hora tsa iin iin nduvi. Tan tsa cuenda tsa tiví juhva yoo tan tiñuu, ña ndunditsin maa nu ñuhu ñayivi cumi hora tsa iin iin tsacuaa.

¹³ Yahá can tan nyehe yu iin ángel ndavá ra mahñu andivi tan tsiñi yu tsa caahán ra. Tsihin tsa ñihi ndusu ra catyí ra:

— ¡Ndahvi nyivi iyó nu ñuhu ñayivi tsa cua tiví tsa uñi ca ra ángel naha ra trompeta tsa ndaha ra naha! —catyí ángel can.

9

¹ Tacan tan tsa tiví tsa tsinu uhun ángel can trompeta tsa ndahá ra, nyehe yu quee iin tiñuu ityi andivi. Tan nacavá can nu ñuhu ñayivi. Tan quihñ cuenda can ndaha tucu tsa cuenda yavi cunu tsa nduve maa nuu tsindihi. ² Tacan tan nuñá can yuhu yavi can. Tan quitá cuaha yuhma tumaa quitá yuhma tsitsi iin ono cahnu. Tan tsaá yuhma can nuu ñicanyii tan nasacá nuu can tsihin tatyí. Tan ndunaa nu ñuhu ñayivi. ³ Tan tsitsi yuhma can quitá tica xama. Tan ndavá ti naha ti nu ñuhu ñayivi. Tan ñihí ti naha ti ndatu tsa tyaa ti naha ti tsi nyivi tumaa tyaa tujuhma tsa iyó nu ñuhu ñayivi. ⁴ Quihñ ti naha ti tuhun tyin na ña jatívi ti naha ti cuhu tsa iyó nu ñuhu ñayivi, ndi cuhu cuii, tan ndi yutun. Maa tyin na tyaa ti naha ti tsi nyivi tsa nduve tuñi Nyoo nyaá nutyaan. ⁵ Ña ñihí ndatu ti naha ti tsa cahñi ti naha ti tsi nyivi, tyin tyaa ñi maa ti naha ti tsi ñi. Tan quihí xico ti tsi ñi uhun yoo. Tan xico uhvi can uhvi tsi tumaa uhvi nyivi tsa tyaa tujuhma. ⁶ Quívi can nyivi cua nanducu ñi tuhun tsihi. Maa tyin ña cua nañihi ñi can. Tan vasu ndi maa cuñi ñi cúu ñi, tuhun tsihií cua cunu tsi nuu ñi tyin ña cua cúu ñi.

⁷ Tica xama can caá ti tumaa caá cuayu tsa tsicá cuatyí. Tan jiñi ti naha ti yihí tsa caá tumaa caá corona xuhun cuaan. Tan nuu ti naha ti caá tumaa caá nuu nyivi. ⁸ Tan ixi jiñi ti naha ti caá tumaa caá ixi jiñi ñaha. Tan nuhu ti naha ti caá can tumaa caá nuhu ndicaha. ⁹ Tan soo ti naha ti caá tumaa caá caa. Tan ñihi xaan cundatsán nditsin ti naha ti, tumaa cundatsán carreta cuayu cuaha tsa tsinú nu iyó cuatyí. ¹⁰ Tan juhma ti naha ti caá tumaa caá juhma tujuhma, tyin yihí iñu

can. Tan tsihin can cua tyaa ti naha ti tsi nyivi tsitsi tsa uhun yoo. ¹¹ Tan iyó iin nu cuví ityi nuu tsihin tica xama can naha ti. Tan nu ican cuví tatyí tsa ndacá ñaha yavi cahnu tan cunu tsa nduve maa nu tsindihi. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñí tsi catyi: Nu Janaá.

¹² Tsa yahá iin tundoho, tan cumañi uvi taahan ca.

¹³ Tan tsa tiví tsa tsinu iñu ángel can trompeta tsa ndahá ra, tsiñi yu iin ndusu tsa quitá tsitsi tsa cumi ndiquí tsa nyecú tutun altar xuhun cuaan tsa nyaá ityi nuu Nyoo. ¹⁴ Tan ndusu can caahán tsi tsihin tsa tsinu iñu ángel tsa ndahá trompeta can, tan catyi tsi:

—Ndatsi tsi tsa cumi ángel tsa nuuhñi yatyin yuhu yutya cahnu Eufrates —catyi ndusu can.

¹⁵ Tacan tan ndatsi ra tsi tsa cumi ángel can, tyin tsa ndatu xaan ra naha ora can, quivi can, yoo can, cuiya can, tyin cahñi ra naha tsi tsa yatyin sava nyivi iyó nu ñuhu ñayivi. ¹⁶ Tan tsiñi yu tyin uvi cientu millón andaru tsa yosó cuayu.

¹⁷ Tacan nyehe yu cuayu jahá Nyoo. Tan ra yosó cuayu can naha ra nyaá caa cuaaha, azu tan cuaan yiqui nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu ti naha ti quitá ñuhu tan yuhma tan azufre. ¹⁸ Tan tsa yatyin sava nyivi iyó nu ñuhu ñayivi tsihi tsihin tsa uñi tsa quitá yuhu cuayu can naha ti: ñuhu tan yuhma tan azufre. ¹⁹ Tyin iyó tunyee iñi tsi ti naha ti tsitsi yuhu ti naha ti tan nu juhma ti naha ti. Tyin juhma ti naha ti caá tumaa caá coo tan nuu juhma ti naha ti caá tumaa caá jiñi coo. Tan tsihin yacan jañicuehé ti naha ti tsi nyivi.

²⁰ Maa tyin tandihi ca nyivi tsa ndoo, ñi tsa ña tsihi tsihin tundoho can, ña jandihí ñi tsa javahá ñi tsa ña vaha. Ndi tsa jacahnú ñi tatyí ña vaha tan ndi tsi tsitoho tsa tsinu tsihin xuhun cuaan, xuhun cuitsin, bronce, yuu, tan yutun: tsitoho tsa ña cuví nyehe, ndi ña tsiñi, ndi ña cuví caca. ²¹ Ndi ña jandihí ñi tsa tsahñi ñi nyivi, tan javahá ñi tsa tasi. Tan ñiñaha ña jandihí ñi tsa tsicá nuu ñi tsihin rayi, tan rayi ña jandihí ra naha tsa tsicá nuu ra naha tsihin ñaha vasu ndi maa ña tindahá ñi. Tan ña jandihí ñi tsa suhú ñi.

10

Ángel tsa ndahá libru luhlu

¹ Tacan tan nyehe yu inga ángel tsa iyó xaan tunyee iñi. Quee ra ityi andivi tan vatsi nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú. ² Tan ndahá ra iin libru luhlu

nuhá nuu tsi. Tan tsañi tsaha cuaha ra nu ndutya ñuhu tan tsaha satyin ra nu ñuhu ñayivi. ³ Tacan tan cana tsaa ra, tumaa taná ndicaha tsa cuxaán ti. Tan cuhva tsa cana tsaa ra, tsiñi yu utsa ndusu tumaa cuví nu caahán savi, tan intuhun intuhun tsi caahán tsihin ndusu maa tsi. ⁴ Tsa yahá tsa tsiñi yu tsa utsa ndusu can, tan cua tyaa yu can nu tutu. Maa tyin tsiñi yu caahán iin ndusu nda andivi, tan catyi tsi tsihin yu:

—Naquihin xeehe tuhun tsa cahan tsa utsa ndusu can. Tan ña tyaa un can nu tutu —catyi ndusu can.

⁵ Tacan tan ángel tsa nyehe yu tsa tsañi nu ndutya ñuhu tan nu ñuhu ñayivi, jandaa ra ndaha cuaha ra ityi andivi. ⁶ Tan ángel can catyi ra:

—Na nyehe maa Nyoo ra ña cua cundihi maa, ra tsa javahá andivi tan ñuhu ñayivi tan ndutya ñuhu tan tandihi tsa iyó nuu tsi tyin nduve ca tsa cucuee. ⁷ Tyin cuhva tsa cua quitsaha tiví tsa tsinu utsa ángel can trompeta tsa ndahá ra, cuhva can cua cundaa tuhun xeehe tsa catyi Nyoo tyin javaha ra, tumaa cahan ra tsihin ra jahá tyiñu tyiñu ra, ra cuví ndusu yuhu ra —catyi ángel can.

⁸ Tan ndusu tsa quitá andivi, tsa cahan jihna tsihin yu, juvin tsi caahán tsihin yu tyehen:

—Cuaahan cuaquihin libru luhlu tsa nandica tsa ndahá ra ángel tsa tsañi nu ndutya ñuhu tan nu ñuhu ñayivi —catyi tsi.

⁹ Tacan tan tsahan yu nu nyaá ángel can tan tsican yu libru luhlu can tsi ra, tan catyi ra tsihin yu:

—Juhun, catsi itsi. Vixi xaan tsi cua cuví tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyi ra tsihin yu.

¹⁰ Tacan tan quihin yu libru luhlu tsa ndahá ra, tsatsi yu. Tsa ndi nyii tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa coco yu itsi, ndu uva tsi tsitsi yu. ¹¹ Tacan tan catyi ra naha tsihin yu:

—Cuñi tsi tsa cahan nyico un inga tsaha tuhun tsa caahán Nyoo siqui nyivi tsa iyó ñuu nyihi tan ñuu nahnu, tan nyivi caahán siin siin yuhu, tan siqui ra cuví rey naha ra —catyi ra tsihin yu.

11

Nduvi ra tsa cuví tsandaa naha ra

¹ Tacan tan tsahá ra naha iin ndoo tsi yu. Caá tsi tumaa caá yutun tsa tuhvá yo tyihi cuhva tsihin. Tan catyi ra naha tsihin yu:

—Nduvita tan tyihi cuhva un vehe ñuhu Nyoo tan altar ra, tan cahvi najava taahan nyivi jacahnú tsi ra tsitsi vehe can. ² Maa tyin ña tyihi cuhva un nuquehe vehe ñuhu can, tyin tsa cuenda nyivi inga ñuu cuví can. Cua vaca tsaha ñi nu ñuu ii tsitsi tsa uñi

cuiya sasava. ³ Tan yuhu cua jacuhun yu uvi ra tsa cua cuvi tsandaa tan cahan tuhun yu tsitsi tsa mil uvi cientu uñi xico quivi. Tan cunditsi ra naha jahma tucuihya iñi.

⁴ Tan tsa nduvi tsandaa can cuvi uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayivi. ⁵ Tan nyivi tsa cua cuñi jañicueehe tsi ra cuvi tsandaa can naha ra, cua naa cuñi nuu ñi. Tyin cua quita ñuhu yuhu ra naha, tan tsihin can cua cahmi ra naha tsi tandihi nyivi xaan iñi tsi ra naha. ⁶ Tan iyó ndatu tsi ra naha tsa casi ra naha nu cuun savi tandihi quivi tsa cua cuhva cuenda ra naha tuhun caahán Nyoo tsihin ra naha tsi nyivi. Tan iyó tucu ndatu tsi ra naha tsa jananduvi ra naha ñiñi ndutya. Tan iyó tucu ndatu tsi ra naha tsa janyeha ra naha tundoho tsi nyivi iyó nu ñuhu ñayivi tsihin tandihi nuu cuehe. Tan cuvi javaha ra naha yacan najava tsaha cuñi maa ra naha. ⁷ Maa tyin tsa cua ndihi cuhva cuenda ra naha tuhun Nyoo tsi nyivi, cua quita quiti xaan yavi cunu can, tan cua cañi tahan ti tsihin tsa nduvi taahan ra cuvi tsandaa can. Tan cua jaha canaa ti tsi ra naha. Tan cua cahñi ti tsi ra naha. ⁸ Tan cua cava cuñi ñuhu ra naha tsitsi calle ñuu nu tsahñi nyivi tsi Jutu Mañi yo tan tyaa ñi tsi ra nuu cruu. Tan cua cuvi ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyivi ñuu can]. ⁹ Tan tsitsi tsa uñi quivi sasava, cua nyehe tandihi nyivi cuñi ñuhu ra naha; nyivi iyó tandihi ñuu nyihi, nyivi tandihi ñi tata, tan ñi caahán siin siin yuhu, tan ñi iyó ñuu nahnu, cua nyehe ñi cuñi ñuhu ra naha. Tan ña cua cuhva ñi tsa quihí xeehe cuñi ñuhu ra naha tsitsi ñuhu. ¹⁰ Tan sii xaan cua cuñi ñi tsa cuenda tsa cua cúu ra can naha ra. Tan nda cuenda cua jacuhun ñi regalo tsi tahan ñi tsa cuenda tsa sii cuñi ñi tsa cua cúu nduvi taahan rayi tsa cahan tuhun Nyoo tsihin ñi. Tyin cuñi maa ñi tyin tsahá xaan ra naha tundoho tsi ñi. ¹¹ Maa tyin tsa cua yaha tsa uñi quivi sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihi nyivi tsa cua nyehe tyin cua nandoto ra naha, cua nayuhvi xaan ñi. ¹² Tan tsa yahá tsa tsihi ra naha tan nyehe yu nandoto ra naha, tan catyí iin ndusu ityi andivi tsihin ra naha:

—Ñaha ndo nyehe

Tacan tan nandaa ra naha ityi andivi tsitsi vico. Tan nyehe nyivi xaan iñi tsi ra naha nu nandaa ra naha. ¹³ Tan ñihi xaan tañ cuhva can. Tan tsitsi ñuu can tanj cuaha xaan vehe. Tsitsi tsa utsi utsi vehe, tanj intuhun intuhun tsi. Tan tsihi utsa mil nyivi jahá tsa tañ can. Tan nyivi tsa ña tsihi, jacahnú ñi tsi Nyoo, ra nyaá andivi, tsa cuenda tsa yuhvi ñi.

¹⁴ Yacan cuvi tundoho tsa tsinu uvi tsa nyehe nyivi, maa tyin tsa vatsi tsa tsinu uñi.

Nu tiví tsa tsinu utsa ángel trompeta tsa ndahá ra

¹⁵ Tan tsa tiví tsa tsinu utsa ángel can trompeta tsa ndahá ra, tsifñi yu ndusu ñihi xaan ityi andivi, tan catyí tsi:

Tandihí nu ndacá ñaha rey nu ñuhu ñayivi, tsa yahá nanduví tsi tsa tsii Nyoo Jutu yo tan ra Cristo.

Tan ña cua ndihi maa tsa ndacá ñaha ra naha, catyí ndusu can.

¹⁶ Tacan tan tsa oco cumi ra tsahnu tsa nyecú nu nyaá Nyoo, tsicuiñi tsiti ra naha tan tsaquín ra naha nuu ra naha nda nu ñuhu. Tan jacahnú ra naha tsi Nyoo. ¹⁷ Tan catyí ra naha:

Jutu Mañi ndi Nyoo ndi. Ra iyó tandihi tunyee iñi tsi.

Tacan ñi iyó maa un. Juvín un cuvi Nyoo nda tsanaha tan vityin, tan juvin un cua quitsi.

Tsahá xaan ndi tyahvi nyoo tsi un, Tyin tsa naquihín cuenda un tunyee iñi un. Tan tsa quitsahá ndacá ñaha un.

¹⁸ Tan vasu ndi maa cuxaán nyivi iyó tandihi ñuu nahnu.

Maa tyin tsa tsaa quivi tatsi tuñi un tsi ñi. Tan tsa tsaa quivi tsa jacutuñi un tsi ndiyi.

Tan cuhva un tsa vaha tsa taahán tsi tsi nyivi jahá tyiñu tyiñu un, ñi tsahá cuenda tuhun caahán un,

ñi tsa nacuhvá cuenda añima ñi tsi un, tan jacahnú ñi sivi un.

Vasu ndi maa cahnu cuvi ñi o ndaahvi ñi.

Tan tsa tsaa cuhva tsa janaa un tsi nyivi jativí tsi nyivi iyó nu ñuhu ñayivi, catyí ra naha.

¹⁹ Tacan tan nuñá yuvehe ñuhu Nyoo tsa iyó gloria, tan tsitsi vehe ñuhu can quituvi tsatun cuenda tsa ndoo ra tyiñu tsihin yo. Tan quihvi tatsa. Tan ñihí cuvaá tan caahán savi. Tan tañ. Tan ñihi xaan cucoyo yuu savi.

12

Nu nducú coo xaan tsa iyó ndaha tsi ñaha

¹ Tacan tan quituvi tsa iyo cahnu ityi andivi. Quita iin ñaha tan ndítsi ña ñicanyii tumaa ndítsi yo jahma. Tan tsañi ña nu yoo. Tan yihí iin corona tsa utsi uvi tiñuu jiñi ña. ² Tan ñaha ihya ñuhú sehe ña. Tan tsacú xaan ña tsihin tsa cuhvi tsitsi ña, tyin nyehé xaan ña tundoho. ³ Tacan tan quita inga tsa iyo ityi andivi. Tan nyehe yu iin coo xaan tsa iyó ndaha. Cuaaha ti tan cahnu ti. Tan iyó utsa jiñi ti, tan utsi ndiqui ti. Tan yihí corona intuhun intuhun jiñi ti. ⁴ Tan tsihin juhma ti jacoyo ti tsa yatyn sava tiñuu tsa iyó andivi nu ñuhu ñayivi. Tan coo can tsicuiñi ti nuu ñaha tsa cua cacu sehe, tyin

cuñí ti catsi ti sehe ña náa cuhva cacu ñi maa tsi. ⁵ Tan ñaha can jacacú ña iin rayii. Tan juvin ra cua cundaca ñaha tandihi nyívi iyó nu ñuhu ñayívi. Nihi xaan cua cundaca ñaha ra tumaa tsa tsihin iin tatun tsa cuví caa. Tan tsa yahá cacú ra, naquihin Nyoo tsi ra cuahán ra nu nyaá ra nu tyayu ra. ⁶ Tan cuahán ñaha can tsinú xeehe ña ñuhu ityi, nu janduvahá Nyoo coo ña, tyin ican cua cuhva ra tsa catsi ña tsitsi tsa mil uvi cientu uñi xico quívi.

⁷ Yahá can tan tsicoq cuatyí nda andívi, cañi tahan ángel Miguel tan tandihi ángel tsa cutahán tsihin ra tsihin coo xaan can. Tan coo can tsihin tandihi tatyí ña vaha tsa cutahán tsihin ti, cañi tahan ti tsihin ángel Miguel. ⁸ Maa tyin ña cuví jahá canaa ti tsa cañi tahan ti. Tan ña ñihí ca ti nu ndoo ti nda andívi tsihin tatyí ña vaha tsa cutahán tsihin ti. ⁹ Tacan tan tavá Nyoo tsi nu coo xaan can, nu Coo Tsaahnu, tan juvin ñi nu cuví nu ña vaha tan Satanás, juvin nu jandaví ñaha tsi tandihi nyívi iyó nu ñuhu ñayívi. Maa nu tan tatyí ña vaha tsa cutahán tsihin nu cucoyo nahnú nda nu ñuhu ñayívi.

¹⁰ Tacan tan tsifñi yu iin ndusu ñihí xaan ityi andívi, tan catyí tsi:

—Vityin tsa tsaa quívi tsa jacacú Nyoo tsi nyívi. Tsa jahá canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyin tsa tavá ra naha tsi nu tsa tyaa xaan cuatyí siqui ñi nuu ra naha nduvi tan ñihu. ¹¹ Tan jaha canaa ñi tsi nu tsihin niñi ra cuví Mbee Ticatyi Luhlu, tan tsihin tuhun Nyoo tsa cahán ñi tsihin nyívi. Ña nayuhví ñi cúu ñi tan tsahá cuenda ñi ñayívi ñi. ¹² Yacan cuenda cusii iñi nyooho tsa iyó andívi. Maa tyin jandahvi nyívi tsa iyó nu ñuhu ñayívi tan nu ndutya ñuhu! Tyin nu ña vaha nacavá nu nu ñuhu ñayívi nu yucú ñi. Tan xaan xaan cuñi nu tyin tsitó nu tyin ña cuaha ca quívi tan cundihi tsa jandaví ñaha nu tsi ñi.

¹³ Tan tsa nyehe nu coo xaan tsa iyó ndaha can tyin nacavá nu nu ñuhu ñayívi, quitsahá nyaá ndaha nu tsi ñaha tsa tsicoq sehe yii can. ¹⁴ Maa tyin tsicoq uvi nditsin nahnú ñaha can tan caá can tumaa caá nditsin tasu. Tsicoq can tyin tacan tan cuví ndava ña tan cuhon ña cunu xeehe ña nu tsiqui nu ña cuví ñihí coo can tsi ña. Ican cuví nu cua ñihí ña tsa catsi ña tsitsi tsa uñi cuiya sasava. ¹⁵ Tan nu coo can tavá nu ndutya tsihin yuhu nu, tyin coo yutya cahnu, tan tañi ñaha can tsitsi yutya can. ¹⁶ Maa tyin ñuhu ñayívi jatinyee tsi tsi ña, tyin ndatá tsi tan nanyee yutya tsa javahá nu coo tsihin ndutya tsa quitá yuhu nu. ¹⁷ Tan tsa ña cuví jaha canaa nu tsi ña, quitsahá cañi tahan nu tsihin nyívi cuví tata ña, ñi tsa tyaa yahvi tuhun caahán Nyoo, tan nyicún ñi tsihin tsa ñi iñi añima ñi tsa nditsa tsa caahán ra Jesucristo.

13

Nu nyehé ra Juan uvi quití caquiñi

¹ Tan tsinyaa nyityi yu nu nyiti yuhu ndutya ñuhu, nyehe yu quitá iin quití caquiñi nu ndutya ñuhu can. Tan iyó utsa jiñi ti, tan utsi ndiqui ti. Tan iin tan iin ndiqui ti yihí iin corona. Tan intuhun intuhun jiñi ti nyaá iin sivi tsa caahán ndavaha ñi tsi Nyoo. ² Quití caquiñi can caá ti tumaa caá cuiñi. Tsaha ti caá tumaa caá tsaha oso. Tan yuhu ti caá tumaa caá yuhu ndicaha. Tan nu coo xaan tsa iyó ndaha can tsahá nu ndatu tsi quití caquiñi can tsa cunyaa ti nu tyayu nu. Tan tsahá nu ndatu tsi ti tsa cundaca ñaha ti. ³ Tan nyaá iin nu caahví tsa cua cahñi tsi ti jiñi ti, maa tyin ndaha nu caahví can. Tan tsa nyehe nyívi iyó nu ñuhu ñayívi ihya can, iyo xaan cuñi ñi. Tan quitsahá nyicún ñi tsi ti. ⁴ Tan jacahnú ñi tsi nu coo xaan can, tyin tsahá nu ndatu tsi quití can. Tan jacahnú tucu ñi tsi quití can, tan catyí ñi:

—¿Yoñi maa cuví tumaa cuví quití ihya? ¿Tan yoñi cuví cañi tahan tsihin ti? —catyí ñi.

⁵ Tan ñihí tucu quití can ndatu tsa cahan ndasi ti tan cahan ti ndavaha ñi siqui Nyoo. Tan cua cundaca ñaha ti uvi xico uvi yoo.

⁶ Tacan javahá ti: Cahán ti tsi Nyoo. Cahán ti ndavaha ñi nu iyó ra, tan sivi ra, tan tsa iyó andívi. ⁷ Tan tsicoq tucu ndatu tsi ti tsa cañi tahan ti tsihin nyívi yihí cuenda Nyoo nda cuanda cuví jaha canaa ti tsi ñi. Tan ñihí ndatu tucu ti tsa quihí ndaha ti tsi nyivi ndihi ñi tata, nyívi caahán siin siin yuhu, nyívi iyó tandihi ñi ñuu nyihí, tan ñuu nahnú. ⁸ Tan nyívi tsa ña cua coo ñayívi tsaa tsihin ra cuví Mbee Ticatyi Luhlu, ra tsa tsihí, ña cua coo ñi ñayívi tsaa can tsa cuenda tyin ña tsinyaa sivi ñi nu libru ra tsa ndi cumañi ca tsinu ñuhu ñayívi. Tandihí maa ñi can cua jacahnú ñi tsi quití caquiñi can.

⁹ Tatun yihí ndo iyó soho ndo, tyaa soho ndo tuhun ihya: ¹⁰ Nyívi tyihí tsi inga nyívi vehe caa, cua cuhun tucu maa ñi vehe caa. Tan nyívi tsa tsahñi tsihin tsa xaan, juvin ñi maa tsihin can cua cúu ñi. Yacan cuenda nyooho tsa yihí cuenda Nyoo cuñi tsi cunyee iñi ndo tan tsinu iñi ndo tsi ra.

¹¹ Yahá can tan nyehe yu quitá inga quití caquiñi tsitsi ñuhu. Tan iyó uvi ndiqui ti, caá can tumaa caá ndiqui mbee ticatyí luhlu. Maa tyin caahán ti tumaa caahán coo xaan tsa iyó ndaha can. ¹² Tan ndacá ñaha ti tumaa ndacá ñaha inga quití caquiñi can. Tan nyehe inga quití can tsa ndacá ñaha ti. Tan natyuhú ti tsi ñuhu ñayívi tan nyívi iyó nu tsi na jacahnú ñi tsi inga quití caquiñi tsa cuñi cúu jahá tsa caahví tsa tsinyaa tsi ti. ¹³ Tan cuaha xaan tsa iyo javahá ti nda cuanda quitá ñuhu andívi tan janacavá ti can nu ñuhu ñayívi tyin nyehe nyívi. ¹⁴ Tan jandaví

ñaha ti tsi nyivi iyó nu ñuhu ñayivi tsihin tsa iyo tsa cuví javaha ti nuu quiti caquiñi tsa jihna ñi. Tava tyiñu ti na javaha ñi iin tsi-toho quiti caquiñi tsa tyahnya caahvi tsihin mityi, tan ña tsiñi ti. ¹⁵ Tan quiti caquiñi tsa tsinu uvi can tsicoq ndatu tsi ti tsa cuhva ti tsa coo nyito tsitoho quiti caquiñi tsa jihna can tyin tacan tan cuví cahan tsi tan cahñi tsi tsi tandihi nyivi tsa ña cua jacahnú itsi. ¹⁶ Tan siin tyin catyí tsi tyin cunyaa tuñi tsi tandihi nyivi; nyivi nyihi, nyivi tsahnu, nyivi cuca, nyivi ndaahvi, nyivi iyó nuña, tan nyivi iyó tsitoho. Tan cua cunyaa tuñi can ndaha cuaha ñi a nutyaan ñi. ¹⁷ Tan yofi maa cuví jata tan xico tatun nduve tuñi can nyaá tsi ñi, o tatun nduve sivi ti, o número sivi ti nyaá tsi ñi. ¹⁸ Tuhun ihya cuñi xaan tsi tsa tsiñi tuñi. Nyivi cutuñi iñi, na jaha cuenda ñi número quiti caquiñi can. Tyin número rayii cuví can. Tan número can cuví iñu cientu uñi xico iñu.

14

Nu tsitá cientu uvi xico cumi mil nyivi iin yaa tan jacahnú ñi tsi Nyoo

¹ Yahá can tan nyehe yu tsi ra cuví Mbee Ticatyí Luhlu, nyaá nyityi ra jiñi yucu Sión. Tan yucú cientu uvi xico cumi mil rayii tsihin ra. Ra ihya naha ra cuví ra tsa nyaá sivi ra tan sivi Jutu ra nutyaan. ² Tacan tan tsiñi yu cucayú ityi andívi, tumaa cucayú yutya nahnu, tan tumaa caahán savi tsa ñihi xaan, o tumaa cuví nu javacú ra naha guitarra cuaha. ³ Tan tsitá ra naha iin yaa tsaa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandihi ra tsahnu naha ra. Tan yofi maa cuví cutuhva yaa can, maa ñi maa tsa cientu uvi xico cumi mil rayii tsa cacú nu ñuhu ñayivi cuví tsitá can. ⁴ Ra ihya naha ra cuví ra tsa ña tsica nuu tsihin ñaha, tyin ii ra naha. Tan nyicún ra naha tsi ra cuví Mbee Ticatyí Luhlu tandihi ñi ityi cuahán ra. Cacú ra naha tan juvin ra naha jamañi tsi ra naha nuu Nyoo tan nuu ra cuví Mbee Ticatyí Luhlu tsa jihna ñi. ⁵ Yofi cuví catyí tyin vatya ra naha, tyin tsa cuenda Nyoo nduve ca cuatyí ra naha iyó tan yucú ra naha nu nyaá ra nu tyayu ra.

Tuhun tsa jacoto uñi ángel

⁶ Tacan tan nyehe yu ndavá inga ángel ityi andívi. Tan nyisó ra tuhun Nyoo tsa ña cua cundihi maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyivi iyó nu ñuhu ñayivi; nyivi iyó tandihi ñi ñuu nahnu, tan ñuu nyihi, nyivi tandihi ñi tata, tan nyivi caahán siin siin yuhu. ⁷ Tan ñihi xaan cahan ra tan catyí ra:

—Nayuhvi ndo tsi Nyoo, tan jacahnu ndo tsi ra. Tyin tsa tahanan tsi cuhva tsa cua cutuñi nyivi. Jacahnu ndo tsi ra javahá andívi tan

ñuhu ñayivi, tan ndutya ñuhu tan ndohyo —catyí ángel can.

⁸ Tan catyí inga ángel tsa vatsí nyicún tsi ra:

—Tsa nduvá ñuu Babilonia tsa cuví ñuu cahnu, tsa taní tsi. Tyin nyivi iyó ñuu can jacuahá ñi tsa caquiñi tsa javahá ñi tsi inga nyivi iyó nu ñuhu ñayivi. Tumaa tsa tsiñi ñi tsihin vinu ña vaha, jaha ñi Babilonia cuví can —catyí ángel can.

⁹ Tacan tan vatsí tsa tsinu uñi ángel, tan ñihi cahan ra tan catyí ra:

—Tatun ndáa nyivi jacahnu tsi quiti caquiñi can tan tsitoho ti, o cuhva ñi tsa cunyaa tuñi ti nutyaan ñi o ndaha ñi, ¹⁰ cua nyehe xaan ñi tundoho tyin cua tyihi Nyoo tsi ñi nu ñuhu, tan nu azufre. Tumaa tsa cua jachoh ra vinu xaan tsi ñi nuu ángel tan nuu ra cuví Mbee Ticatyí Luhlu cuví can. ¹¹ Tan ña cua cundihi maa tsa quita yuhma nu nyehe ñi tundoho, tan ña cua quitatu maa ñi nduvi tan ñiñu. Ñi ihya cuví ñi tsa jacahnú tsi quiti caquiñi can tan tsi tsitoho ti, tan tsahá ñi tsi ñi cunyaa tuñi sivi ti. ¹² Yacan cuenda nyivi yihí cuenda Nyoo, tan tyaa yahvi ñi tuhun caahán ra, tan tsinú iñi ñi tsi ra Jesús, cuñi tsi tsa cunyeé iñi ñi —catyí ángel tsa tsinu uñi can.

¹³ Tacan tan tsiñi yu iin ndusu tsa quee nda andívi, tan catyí tsi tsihin yu:

—Tyaa tuhun ihya: “Vityin tan ityi nuu, sií xaan cua cuví tsi nyivi cua cúu tun tsinú iñi ñi tsi Jutu Mañi yo.”

Tan catyí Tatyí Ii Nyoo:

Nditsa, sií xaan cua cuví tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

Nu cua tatsi tuñi Nyoo tsi nyivi

¹⁴ Tacan tan nyehe yu iin vico cuitsin. Tan nu vico can nyaá iin ra caá tumaa caá ra ñuu ñayivi. Yihí corona xuhun cuaan jiñi ra. Tan ndahá ra iin mityi yacua tan xaan.

¹⁵ Tan quita inga ángel tsitsi vehe ñuhu tan ñihi xaan cana tsaa ra tsi ra nyaá nu vico can. Tan catyí ra:

—Vityin jaha tyiñu tsihin mityi un, jataca cosecha un tsa iyó nu ñuhu ñayivi. Tyin tsa tsaa cuhva, tan tsa iyó nu ñuhu ñayivi tsa tsityí tsi —catyí ra.

¹⁶ Tacan tan ra tsa nyaá nu vico can jayahá ra mityi ra nu ñuhu ñayivi, tan naquihñi ra tsa iyó nuu tsi.

¹⁷ Tacan tan quita inga ángel tsitsi vehe ñuhu tsa iyó andívi. Tan juvin ñi ndahá tucu ra iin mityi yacua tsa xaan. ¹⁸ Tan quita inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan cana tsaa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juvin, tan cahnaya cuenda ndoco yucu

vixi tsa nañi uvas tsa iyó nu ñuhu ñayivi, tyin tsa tsityi tsi —catyí ra.

¹⁹ Tan jahahá ángel can mityi ra nu ñuhu ñayivi tan tsahnya ra uvas can. Tan tyihí ra itsi iin nu tyihí ra tyin cua cuhñi ra itsi tan quita ndutya tsi. Tan yacan cuñi tsi catyi tsa cua tatsi tuñi Nyoo tsi nyivi. ²⁰ Tan nacuhñi ra uvas can ityi tsata ñuu, tan cuñi tsi catyi tyin cuaha xaan nyivi tsihi, tan nu cuvi can, cuaha xaan cuaha xaan ñiñi ñi tsati. Tan tsaá tsi nda nu sucun nu yihí frenu yuhu cuayu, tan tsinú tsi tumaa uñi cientu kilómetro.

15

Nu quitá ndihi utsa taahan ña tundoho tsa cua nyehe nyivi

¹ Nyehe yu inga tsa iyo cahnu andivi tan nayuhvi xaan yu, nyehe yu utsa ángel tsa vatsi ndacá utsa taahan ña tundoho. Tsihin tundoho ihya cua cundihi tsa xaan cuñi Nyoo nyehé ra tsi nyivi tsa ña tyaa yahvi tuhun caahán ra.

² Tan nyehe tucu yu iin tsa caá tumaa caá ndutya ñuhu tsa tsinú tsihin yutyi. Tan tumaa tsa nasacá ñuhu tsihin tsi. Tan nyivi tsa cunyeé jahá canaa tsi quiti caquiñi can tan tsi tsitoho ti, tan ña tsinyaa número sivi ti tsi ñi, tandihi ñi tan yucú ñi yuhu tsa nyehe yu can. Tan ndahá ñi tsa caá tumaa guitarra tsa tsahá Nyoo tsi ñi. ³ Tan tsitá ñi yaa ra Moisés, ra jahá tyiñu tyiñu Nyoo, tan yaa ra cuvi Mbee Ticatyi Luhlu. Tan catyi yaa can tyehen:

Cahnu tan iyo xaan caá tandihi maa tsa javahá un,

Nyoo, Jutu ndi, iyó tandihi tunyee ifñi tsi un. Ndoó xaan tan nditsa xaan ityi un, Yooho Rey cuenda tandihi nyivi iyó nu ñuhu ñayivi.

⁴ ¿Yóo ña cua nayuhvi tsi un, yooho Jutu Mañi ndi?

¿Yóo ña cua jacahnu tsi un?

Tan intuhun ñi maa un cuvi ra ii.

Tan cua quitsi nyivi quee tandihi maa ñuu, tan cua jacahnu ñi tsi un, tyin nyehe ñi tsa vaha tsa javahá un, catyi yaa tsitá ñi.

⁵ Tacan tan nyehe yu nuñá yuvehe ñuhu tsa nyaá nda andivi nu yucú vaha nduvi tabla tsa nyaá ley Nyoo nuu. ⁶ Tan quita utsa ángel tsa vatsi ndacá tsa utsa tundoho can tsitsi vehe ñuhu can. Ndisi ra naha jahma vaha, cuitsin tan xiñu. Tan yihí cinturón xuhun cuaan yiqui nyica tsa intuhun intuhun ra naha. ⁷ Tacan tan iin tsa nyito can, tsahá can intuhun intuhun coho xuhun cuaan tsi tsa intuhun intuhun tsa utsa ángel can. Tan tsityi maa can tsihin tsa xaan Nyoo tsa cua tatsi tuñi ra tsi nyivi. Ra ican ña cua cundihi maa tsa iyó ra. ⁸ Tan tsityi maa tsitsi vehe ñuhu can tsihin yuhma tsa

cuenda tsa cahnu xaan cuvi Nyoo tan tsa cuenda tunyee ifñi tsa iyó tsi ra. Tan yofi maa cuvi quihvi tsitsi vehe ñuhu can tsitsi tsa ndi cumañi ndihi tsa utsa tundoho tsa vatsi ndacá tsa utsa ángel can.

16

Coho tsa yihí tundoho tsa cua jaquitsi tsa utsa ángel

¹ Tacan tan tsiñi yu iin ndusu ñihi xaan tsa quita tsitsi vehe ñuhu nu nyaá Nyoo. Tan catyi tsi tyehen tsihin tsa utsa ángel can:

—Cuacoyo ndo tsa yihí tsitsi coho ndahá ndo juven siqui nyivi iyó nu ñuhu ñayivi, tyin Nyoo cua tatsi tuñi ra tsi ñi —catyi ndusu can.

² Tacan tan tsahan iin ángel can tsicoyo ra tsa yihí tsitsi coho ra siqui nyivi tsa nyaá tuñi quiti caquiñi can tan jacahnu ñi tsitoho ti. Tan quita nu caahvi xaan tan uhvi xaan tsi ñi.

³ Tacan tan coyó tsa tsinu uvi ángel can tsa yihí tsitsi coho ra nu ndutya ñuhu. Tan ndutya ñuhu can nanduví tsi ñiñi tumaa ñiñi ndiyi, tan tandihi tsa nyito tsa iyó tsitsi ndutya ñuhu can tsihi tsi.

⁴ Tacan tan coyó tsa tsinu uñi ángel can tsa yihí tsitsi coho ra nu yutya nahnu tan nu ndohyo tan nanduví tsi ñiñi. ⁵ Tacan tan tsiñi yu tsa caahán ángel cuenda ndutya tan catyi ra:

—Jutu Mañi yu, yooho vaha xaan un tyin tatsi tuñi un tsi nyivi tyehen. Jutu Mañi yu, Nyoo ii cuvi un tyin nda nu quitsahá tandihi tan nda cuenda vityin tacan ñi iyó maa un. ⁶ Tatsi tuñi un tsi ñi tyin maa ñi tsati ñi ñiñi nyivi yihí cuenda un tan ñiñi ra cuvi ndusu yuhu un. Tan vityin yooho tumaa tsa jacohó un ñiñi tsi ñi tyin tacan taahán maa tsi tsi ñi —catyi ángel can.

⁷ Tan tsiñi tucu yu nacahan inga ndusu ityi nu nyaá altar Nyoo tan catyi tsi tyehen:

—Ndisa, Nyoo, Jutu Mañi yu, ra iyó tandihi tunyee ifñi tsi, vityin tsa tatsi tuñi un tsi nyivi tsihin tsa nditsa tan tsihin tsandaa —catyi ndusu can.

⁸ Tan coyó tsa tsinu cumi ángel can tsa yihí tsitsi coho ra nu ñicanyii. Tacan tan tsicoy ndatu tsi ñicanyii can tsa cahmi tsi tsi nyivi tsihin ñuhu tsi. ⁹ Tan tandihi nyivi ndasi xaan cayú ñi jahá ñicanyii can. Maa tyin vasu ndi maa tacan tahán ñi, ña nasama ñi cuhva tsicoy ñi, tan ndi ña jacahnu ñi tsi Nyoo. Tan cahán ñi ndavaha ñi siqui Nyoo, ra tsa jaquitsi tundoho can siqui ñi.

¹⁰ Tan coyó tsa tsinu uhun ángel can tsa yihí tsitsi coho ra siqui tyayu quiti caquiñi can. Tan ndunaq nu ndacá ñaha ti. Tan nyivi cuenda ti, nda cuenda tsatsi yihí ñi yaa ñi tsa cuenda tsa nyehé xaan ñi tsa uhvi. ¹¹ Maa

tyin vasu ndi maa tacan cuvi, ña jandihí ñi tsa javahá ñi tsa ña vaha. Tan cahān ñi ndavaha ñi siqui Nyoo, ra nyaá andiví, tsa cuenda tsa uhvi nu caahvi ñi.

¹² Tan coyo tsa tsinu iñu ángel can tsa yihí tsitsi coho ra nu yutya Eufrates cahnu. Tan ndoco ndutya can tyin tacan tan nuña ityi nu cua yaha ra rey tsa quee ityi nu caná ñicanyii naha ra. ¹³ Tacan tan nyehe yu quita tatyí ña vaha tsa caá tumaa caá sahva yuhu tsa intuhun intuhun quiti. Iin can quita yuhu quiti caquiñi, inga can quita yuhu coo xaan tsa iyó ndaha inga can quita yuhu tsa cuví ndusu yuhu vatya. ¹⁴ Tatyí ña vaha can cuví tatyí nu ña vaha, tan nahnu tsa nyityi javahá nahnu. Quita nahnu, jandu iin nahnu tandihí rey tsa iyó nu ñuhu ñayiví, tyin cañi tahan ra naha quivi tsa quivi janaha Nyoo tyin iyó tandihí tunyee iñi tsi ra. ¹⁵ Tan catyí ra Cristo:

—Nyehe ndo tyin tsa vatsí yu tumaa vatsí iin ñasuhu tyin iin ñasuhu sana iñi ndo tan quihví ra tsitsi vehe ndo tacan yuhu. Si xaan cua cuví tsi nyiví ndatú quivi quitsi yu tan tsa iyó vaha jahma ñi tyin quivi cua tsa yu ña cua nducahan nuu ñi tyin ña tandií ñi —catyí ra Cristo.

¹⁶ Tan cua ndu iin ra cuví rey naha ra nu nañi Armagedón tsihin yuhu hebreo.

¹⁷ Tan coyo tsa tsinu utsa ángel can tsa yihí tsitsi coho ra nu tatyí, tacan tan quita iin ndusu nu nyaá tyayu Nyoo tsitsi vehe ñuhu tsa nyaá nda andiví. Caná tsa tsi tan catyí tsi:

—Tsa iyó vaha vityin.

¹⁸ Tacan tan vaa ña maa cuví tan caahān savi tan cañi tatsa. Tan ñihi xaan tañ nu ñuhu ñayiví. Tan ña tuhva maa tañ tacan tsa ndi quitsaha iyó nyiví nu ñuhu ñayiví. ¹⁹ Tan uñi nu ndatá ñuu cahnu Babilonia can, jahā tsa tañ. Tan tandihí ca ñuu tsa cayucu nu ñuhu ñayiví tan tsi. Nyoo ña naa maa iñi ra tsa javahā nyiví Babilonia. Yacan cuenda janyehe xaan ra tundocho tsi ñi. ²⁰ Tandihí maa ñuhu tsa iyó tsitsi ndutya ñuhu tan tandihí yucu, tandihí maa tsi tsinaa. ²¹ Tan cucoyo cua yu savi nahnu xaan tsa quee andiví siqui nyiví. Vee xaan tsi. Tumaa vee uvi xico kilu, tacan vee tsa intuhun intuhun yuu savi can. Tan nyiví cahān ñi ndavaha ñi siqui Nyoo tsa cuenda tundocho yuu savi can, tyin cuví tsi iin tundocho cahnu xaan tsa cuenda ñi.

17

Nu cua tatsi tuñi Nyoo tsi ñuu ña vaha

¹ Tacan tan quita iin ángel tsitsi tsa utsa ra tsa ndahá coho can naha ra, natuhva ra nu nyaá yu, tan catyí ra tsihin yu:

—Ñaha tyin janaha yu tsi un nácaa cua cutuñi ñaha ña vaha tsa tsicá nuu tsihin rayii,

ñā tsa nyaá nu ndutya cuaaha. ² Tyin ra cuví rey nu ñuhu ñayiví tsicoo ra naha tsihin ña, tan tsa cuenda ña tiví tandihí nyiví iyó nu ñuhu ñayiví —catyí ra tsihin yu.

³ Tacan tan nyehe yu iin tsa janaha Tatyí Ii Nyoo tsi yu, tan tsindaca ángel can tsi yu nu tsiqui nu nduve maa nyiví iyó, tan juvin ñi ican nyehe yu iin ñaha yosó iin quiti cuaaha caquiñi. Nyecú sivi tsa caahān ndavaha ñi tsi Nyoo tsi ti. Iyó utsa jiñi ti tan utsi ndiqui ti. ⁴ Tan ñaha can nditsi ña jahma tijinda tan cuaaha. Tan cuaaha xaan xuhun cuaan iñi tsi ña, tan yuu vaha, tan perla. Tan ndahá ña iin taza xuhun cuaan tsitú tsihin tsa ña vaha tan tsa caquiñi tsa javahá ña. ⁵ Tan nyaá iin sivi tsa cuví iin tuhun xeehe tsa ña cutuñi iñi nyiví nutyaan ña. Tan catyí can tyehen: “Ñaha ihya cuví ñuu Babilonia cahnu, sihi tandihí ñiñaha tsa tsicá nuu tsihin rayii tan sihi tandihí tsa ña vaha tsa iyó nu ñuhu ñayiví.” ⁶ Tacan tan nyehe yu tyin tsiñi ñaha can jahā tsa tsihi ña niñi nyiví yihí cuenda Nyoo, ñi tsa tsihi tsa cuenda tsa cahān ñi tuhun ra Jesús. Tsa nyehe yu tsi ña, iyo xaan cuñi yu. ⁷ Tacan tan catyí ángel can tsihin yu:

—¿Nacuenda iyo xaan cuñi un? Cua jacoto yu tsi un náa cuñi tsi catyí tuhun xeehe ñaha ihya tan quiti caquiñi tsa yosó ña, quiti tsa iyó utsa jiñi tan utsi ndiqui. ⁸ Quiti caquiñi tsa nyehe un can, juvin ti cuví quiti tsa tsicoo tan vityin nduve ca ti iyó. Maa tyin cua quita ti tsitsi yavi cunu tsa nduve nu tsindihi. Ican nyii ti tsa ndi cumañi ca cuhun ti nu cua cundihi cuñi ti. Nyiví iyó nu ñuhu ñayiví, ñi tsa nduve sivi nyaá nu libru Nyoo nda quivi tsinu ñuhu ñayiví, iyo xaan cua cuñi ñi nyehe ñi tsi quiti can. Libru can catyí yoo nyiví cua coo cuñi.

⁹ Tuhun ihya cuñi tsi tsa cutuñi iñi yo itsi: Tsa utsa jiñi quiti can cuñi tsi catyí tsa utsa yucu tsa nyaá ñaha can nuu. ¹⁰ Tan juvin ñi cuñi tucu tsi catyí can utsa rey. Uhun ra naha tsa yaha tsindaca ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quivi quitsi ra, ña naha cua cundaca ñaha ra. ¹¹ Tan quiti caquiñi tsa tsicoo tan vityin nduve ca ti iyó, juvin ti cuví iin rey tsitsi tsa utsa taahan rey can, tan cua cuví tucu ti rey tsa tsinu una. Tsa yaha cundaca ñaha nyico ti, tacan tan cua cuhun ti nu cua cundihi cuñi ti.

¹² Tan tsa utsi ndiqui tsa nyehe un can, cuñi tsi catyí utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha ra naha iin ora, iin caa ñi tsihin quiti caquiñi can. ¹³ Tsa utsi rey can inducu ñi cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quiti caquiñi can. Tan tandihí ndatu tsa iyó tsi ra naha cua nacuhva ra naha tsi

ti. ¹⁴ Tan cua cañi tahan ra naha tsihin ra Mbee Ticatyi Luhlu. Maa tyin ra Mbee can, cua jaha canaa ra tsi ra naha. Tyin juvin ra yihí ndaha tsi tandihí ra ndacá ñaha. Tan yihí ndaha tucu ra tsi tandihí ra cuví rey naha ra. Tan nyívi yihí cuenda ra, maa Nyoo cana tsi ñi tan nacatsj ra tsi ñi. Tan níi xaan cuñí ñi nyicún ñi tsi ra.

¹⁵ Tan catyí tucu ángel can tsihin yu:

—Ndutya cuaha tsa nyehe un can, nu nyaá ñaha tsicá nuu can, yacan cuví nyívi iyó tandihí ñuu nyihí tan ñuu nahnu, ñi caahán siin siin yuhu. ¹⁶ Rey tsa cuví tsa utsi ndiqui quiti caquiñi tsa nyehe un can, ndasi cua cuñi ra naha nyehe ra naha tsi ñaha tsicá nuu can. Cua nacoo ihñi ra naha tsi ña. Tan cua jatandí ra naha tsi ña; tan cua catsi ra naha cuñi ñuhu ña. Tan cua cahmi ra naha tsi ña. ¹⁷ Tyin Nyoo tsahá ra tsa caca iñi rey can naha ra tyin javaha ra naha cuhva cuñi maa Nyoo. Tyin iin ñi cuhva cua caca iñi ra naha, tan cua cuhva ra naha ndatu tsi quiti caquiñi can tsa cundaca ñaha ti tumaa rey nda cuanda cundaa tuhun caahán maa Nyoo. ¹⁸ Ñaha tsa nyehe un can, juvin ña cuví ñuu cahnu tsa ndacá ñaha tsi tandihí ra cuví rey nu ñuhu ñayivi.

18

Nu naá ñuu Babilonia

¹ Tsa yaha yacan tan nyehe yu quee inga ángel ityi andívi tan iyó xaan tunyee iñi tsi ra. Tan ndunditsin ñuhu ñayivi jaha tsa nditsin ra. ² Tan cana tsaa ra tsihin tsa ñihi ndusu ra, tan catyí ra:

—Tsa tsindihí nuu ñuu Babilonia cahnu. Nanduvj tsi nu iyó tatyí ña vaha, vehe tandihí nuu tatyí ña vaha, tan taca saa ña vaha tsa ña taahán iñi nyívi. ³ Tyin tandihí nyívi tiví ñi tsa cuenda cuatyí javahá ñuu Babilonia can. Ra cuví rey nu ñuhu ñayivi naha ra tumaa tsa tsicoq ra naha tsihin ñaha tsa cuví ñuu Babilonia can. Javaha ra naha cuatyí tsihin ña. Tan nyívi ñuhu ñayivi nducuca ñi tsihin tsa cuaha xaan tsa yahvi tsa jatá nyívi ñuu can.

⁴ Tacan tan tsiñi yu ndusu Nyoo ityi andívi, tan catyí tsi:

—Quita ndo ñuu ihya, nyoocho tsa cuví nyívi yu, ña cutahan ndo tsihin nyívi ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundoho tumaa nyehé maa ñi. ⁵ Tyin tsa canyíi tucuti cuatyí nyívi iyó ñuu can, nda cuanda tsaa can nu nyaá yu. Tan ñuhú iñi yu tsa ña vaha javahá ñi. ⁶ Cuhva ndo juvin ñi maa tsa tsahá ñi tsi inga nyívi tsi ñi; cuhva ndo uvi ca tsaha siqui tsa javahá ñi. Tacan janyehe ndo tundoho tsi ñi. Cuhva ndo tundoho nyehe ñi tsa ñihi uvi ca tsaha tan ñavin ca tsa tsahá maa ñi tsi inga nyívi. ⁷ Yacan cuenda cuhva

ndo tsa iyo xaan tahan ñi tsihin tundoho nyehe ñi jaha ndo. Tahan ñi cuhva tsa jacahnú xaan ñi tsi ñi tan cusíi xaan iñi ñi juvin cuhva can janyehe ndo tundoho tsi ñi. Tyin tsicá iñi tsitsi añima ñi: “Ihya nyecú yo tumaa iin reina. Ñavin ñaha ndaahvi cuví yo, tan ndi ña cua nyehe yo tundoho”, cuñí ñi, tsicá iñi ñi. ⁸ Yacan cuenda iin quívi ñi cua quítsi tundoho siquí ñuu can, cua quítsi tuhun tsíihí, tucuíihya iñi, tama, tan cua cayu tsi tsihin ñuhu. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyívi ñuu can —catyí Nyoo.

⁹ Ra cuví rey nu ñuhu ñayivi ihya tumaa tsa tsicoq ra naha tsihin ñaha tsa cuví ñuu can, cua vacu xaan ra naha, tan cuiihya cua cuñi ra naha na nyehe ra naha yuhma tsa cayu ñuu can. ¹⁰ Tan tsa cuenda tsa yuuhví ra naha tundoho can, nda sava ñi cua cunyecu ra naha. Tan cua catyí ra naha:

—¡Ndahvi yoocho, ñuu cahnu Babilonia, ñuu tsa tsicoq cuaha tunyee iñi tsi! Tyin iin yaha ñi tsaa tundoho nyehé un —cua catyí ra naha.

¹¹ Tan ra tsa xicó ndaha tyiñu naha ra, juvin ñi cua vacu xaan ra naha tan cuiihya cua cuñi ra naha tsa cuenda ñuu can. Tyin yofñi ca cua jata tsa xico ra naha. ¹² Tyin xicó ra naha xuhun cuaan, xuhun cuitsin, yuu sii caá, perla, jahma linu, jahma seda, tan jahma tijinda cuaaha. Tan xicó tucu ra naha tandihí nuu vitu tami tan náa ndihí tsa tsinú tsihin yiqui nuu landa, tan vitu sii caá, tan caa tsa cuví bronce, tan caa tsa cuví hierro, tan yuu tsa cuví mármol. ¹³ Tan xicó tucu ra naha canela, náa ndihí ca yucu tsa quihví tsihin tsa tsatsi yo, tan tsa tami tumaa cutu, tumaa mirra, tan tumaa ndutya tami. Tan xicó tucu ra naha vinu, aceteye, yutyí paan vaha, tan trigu. Tan juvin ñi xicó tucu ra naha quiti cuenda carga, tan mbee, cuayu, carreta, tan nda cuanda nyívi tsa cuví musu tan xicó ra naha. ¹⁴ Tan catyí ra naha tsihin nyívi ñuu can tyehen:

—Nduve ca tsa sii caá tsa tsicoq tsi un, tsa taahán xaan iñi un. Tan tsa tsindihí tandihí tsa cuca un. Tan ña cua ñihi ca maa un tandihí yacan —catyí ra naha.

¹⁵ Ra tsa xicó tandihí can, nducuca ra naha tsa cuenda tsa jatá nyívi ñuu Babilonia can tsa xicó ra naha. Nda sava cua cunyecu ra naha tsa cuenda tsa yuuhví ra naha tsa cua nyehe nyívi can tundoho. Tan cua vacu xaan ra naha tan cuiihya cua cuñi ra naha. ¹⁶ Tan cua catyí ra naha:

—¡Ndahvi ñuu cahnu can! Cuví tsi tumaa iin ñaha tsa nditsí jahma linu, jahma tijinda cuaaha. Tan cucutú ña tsihin xuhun cuaan, tan yuu sii caá tan perla. ¹⁷ ¡Tan iin yaha ñi

ndihí tsa cuca xaan can! —cua catyí ra xicó can naha ra.

Tan tandihí ra cuví capitán tsa jacacá yutun ndoo nu ndutya, tsihin nyivi yucú tsitsi can tan tandihí ra jahá tyiñu nu ndutya ñuhu naha ra, nda sava cua ndoo ñi. ¹⁸Tan tsa cua nyehe ñi yuhma tsa cayú ñuu can, cua cana tsaa ñi, tan cua catyí ñi:

—¿Náa inga ñuu tsicoq tumaa ñuu cahnu ihya? Nduve —cua catyí ñi.

¹⁹Tan cua coso ñi nyaca jiñi ñi, tan cua vacu xaan ñi. Tan cuihiya cua cuñi ñi, cua cana tsaa ñi, tan cua catyí ñi:

—¿Ndahvi ñuu cahnu can! Tyin tsihin tsa cuca tsi tan nducuca tandihí yoo tsa tsicá nuu nu ndutya ñuhu tsihin yutun ndoo. ¡Tan vityin iin yaha ñi naq tsi! —cua catyí ñi.

²⁰Maa tyin nyoocho cusii iñi ndo nyehe ndo tsa taahán ñuu can, nyoocho tsa iyó andivi, tan nyoocho ra tsicá tyiñu ra Cristo tan nyoocho ra cuví ndusu yuhu Nyoo, tan tandihí ca nyoocho tsa yihí cuenda Nyoo. Cusii iñi ndo tyin tsa cuenda tsa javahá ñi tsa ña vaha tsihin ndo tan tatsi tuñi Nyoo tsi ñi.

²¹Tacan tan iin ángel tsa iyó xaan tunyee iñi tsi, cañihí ra iin yuu tsa caá tumaa caá iin yoso cahnu xaan, tan jacuhun ra can tsitsi ndutya ñuhu, tan catyí ra:

—Tyehen cua cundihí nuu ñuu Babilonia cahnu. Tan ndi iin tsaha ca tan ña cua nyehe ca ndo itsi. ²²Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tiví tiyoo, tan ndi caa. Tan ndi ña cua coo ca ra jahá tyiñu náa ndihí ca tyiñu. Tan ndi ña cua cucayu ca molino. ²³Tan ndi ñuhu tyuma, tan ña cua cayu ca tsitsi ñuu can. Ndi ña cua cuñi ca yo ndusu nyivi nu iyó vico tindaha. Tacan cua cuví vasu ndi maa ra xicó tsa tsicoq ñuu can naha ra, cahnu xaan tunyee iñi tsicoq tsi ra naha, tan jandaví ñaha xaan nyivi iyó ñuu can tsi tandihí nyivi iyó nu ñuhu ñayivi tsihin tuhun tasi.

²⁴Tyin cuaha xaan niñi ra cuví ndusu yuhu Nyoo canyí tsitsi ñuu can tyin tsahñi ñi tsi ra naha. Tan canyí tucu niñi inga ca nyivi yihí cuenda Nyoo, tan niñi tandihí nyivi tsa tsahñi nyivi naniñi cahnu nu ñuhu ñayivi.

19

¹Tsa yaha yacan, tan tsiñi yu ndusu nyivi cuaha ityi andivi. Tan catyí ñi:

¡Cahnu xaan cuví Nyoo! Jutu Mañi yo, Nyoo cuví ra ra jacacú tsi yo. Tan tsi maa ra taahán tsi jacahnu yo, tyin iyó xaan tunyee iñi tsi ra.

²Tyin tsihin tsa vaha tan tsandaa tan tsa nditsa jacutuñi ra.

Tatsj tuñi ra tsi ñaha tsicá nuu tsa cuví ñuu Babilonia

tsa jativi xaan tsi nyivi iyó nu ñuhu ñayivi tsihin tsa caquiñi tsa javahá ña tsihin ñi.

Tan tatsj tuñi ra tsi ña tsa cuenda tsa tsahñi ña tsi nyivi jahá tyiñu tyiñu ra.

³Tan catyí ñi inga tsaha:

—¡Cahnu xaan cuví Nyoo! Yuhma tsa cayú ña, ña cua cundihí maa tsa ndaa tsi ityi siqui —catyí ñi.

⁴Tan tsa oco cumi ra tsahnu tan tsa cumi tsa nyito tsa nyecú nu nyaá tyayu Nyoo, tsicuiñi tsiti ra naha nda nu ñuhu. Tan jacahnu ra naha tsi Nyoo nu nyaá ra nu tyayu ra. Tan catyí ra naha:

—¡Cahnu xaan cuví Nyoo! ¡Na cuví tsi tacan! —catyí ra naha.

⁵Tan nu nyaá tyayu Nyoo, nacahan iin ndusu, tan catyí tsi:

Jacahnu ndo tsi Nyoo Jutu yo tandihí nyoocho tsa jahá tyiñu tyiñu ra, tan tyaá yahvi ndo tsi ra, nyoocho nyivi nyihi tan nyivi tsahnu.

Nu iyó vico tindaha ra Mbee Ticatyí Luhlu tan nyivi tsini iñi tsi ra

⁶Tan tsiñi tucu yu ndusu tumaa cuví nu cuaha xaan nyivi yucú, o tumaa ndusu nu cuaha xaan yutya o tsa ñihi xaan caahán savi. Tan catyí tsi:

¡Cahnu xaan cuví Nyoo Jutu yo, ra iyó tandihí tunyee iñi tsi! Tyin tsa quitsahá ndacá ñaha ra.

⁷Na cusii iñi yo tan na cutu yo tsihin tsa sii. Na jacahnu yo tsi ra,

Tyin tsa tsaa cuhva tsa coo yo vico tindaha ra Mbee Ticatyí Luhlu.

Tan yoo cua cuví yo tumaa ñasihi ra, tan ndatú yo quivi tindaha yo tsihin ra.

⁸Tyin tsa ñihi ndatu yo tsa cunditsi yo jahma cuitsin tsa ña nyahyu ca tsa cuví jahma linu.

Tyin jahma linu can cuñi tsi catyí tsa vaha tsa javahá nyivi yihí cuenda ra.

⁹Tacan tan quitsahá catyí ángel can tsihin yu:

—Tyaa tyehen nu tutu: “¡Sii xaan cuví tsi nyivi tsa cua cuhun nu tindaha ra Mbee Ticatyí Luhlu!”

Tan catyí tucu ra tyehen:

—Tuhun ihya cuví tuhun nditsa Nyoo —catyí ra tsihin yu.

¹⁰Tacan tan tsicuiñi tsiti yu nuu ángel Nyoo can tsa cua jacahnu yu tsi ra. Maa tyin catyí ra tsihin yu:

—Ña jacahnu un tsi yuhu, tyin yuhu musu Nyoo ñi cuví tucu yu tumaa yocho, tan tumaa tandihí ra yañi un tsa tsini iñi tuhun nditsa tsa cahan ra Jesucristo. Tsi Nyoo taahán tsi jacahnu yo —catyí ra tsihin yu.

Tyin tsa cahan ra Jesús, yacan cuví tsa jandu iin iñi tsi ra cuví ndusu yuhu ra, ra tsahá cuenda tuhun caahan Nyoo tsihin yo.

Nu nyehe ra Juan tsi ra tsa yosó cuayu cuitsin

¹¹ Tacan tan nyehe yu tichó andívi. Tacan tan quituví iin cuayu cuitsin. Tan ra yosó tsi ti nañi ra Ra Nditza Tsa Nii Iñi Jahá Tyiñu Tyiñu Nyoo. Tyin tsihin tsa ndaa jacutuñi ra tsi nyivi, tan ndaa javahá ra tsa cañi tahan ra. ¹² Tan tumaa caá nu cayú ñuhu, tacan caá tinuu ra. Tan cuaha xaan corona yihí jiñi ra. Tan intuhun ñi maa ra tsitó iin sivi tsa nyaá tsi ra. ¹³ Tan nditsí ra jahma cahyi tsihin ñiñi. Tan nañi ra Tuhun Nyoo. ¹⁴ Tan nyicún andaru andívi tsi ra, nditsí ra naha jahma vaha tsa cuví linu, cuitsin tsi tan ña nyahu tsi. Tan yosó ra naha cuayu cuitsin. ¹⁵ Tan quitá iin mityi xaan yuhu ra, yacan cuví Tuhun Nyoo; tsihin yacan cua jañicueehe ra tsi nyivi iyó nu ñuhu ñayivi. Tan ñihi cua cundaca ñaha ra tsi ñi tsihin tatun tsa cuví caa. Cua tatsi tuñi ra tsi ñi tumaa javahá ra tavá ndutya yucu vixi tsa cuví uva tsihin tsaha ra. Tan cua jacoho ra vinu tsa tsinú tsihin uva tsi ñi, tsehe cuñi tsi catyi tyin cuxaán Nyoo tsihin ñi tan cua tatsi tuñi ra tsi ñi tyin tsahá xaan ñi tsihi tsi Nyoo, ra iyó tandíhi tunyee iñi tsi. ¹⁶ Nu jahma ra tan nu sihin ra can nyaá letra tsa catyi tyehen: “Ra ihya cuví ityi nuu tsihin tandíhi rey. Tan juvin ñi ra cuví ityi nuu tsihin tandíhi ra ndacá ñaha naha ra.”

¹⁷ Tacan tan nyehe yu nyaá nyityi inga ángel nu ñicanyii. Tan ñihi xaan cana tsaa ra tsi tandíhi saa tsa ndavá ityi andívi, tan catyi ra tsihin ti naha ti:

—Nuu ndo tan ndu iin ndo tan cuxiñi ndo tsa tsahá Nyoo catsi ndo. ¹⁸ Cua catsi ndo cuñu ra cuví rey naha ra tan ra cuví ityi nuu tsihin andaru naha ra tsihin tucu ra xaan naha ra. Tan catsi ndo cuñu cuayu tan cuñu ra tsicoso tsi ti naha ra. Catsi ndo cuñu tandíhi ra naha, ra iyó tsitoho tan ra nduve tsitoho, tahan ñi nyivi nyihi tan nyivi tsahnu —catyi ra tsihin saa can naha ti.

¹⁹ Tacan tan nyehe yu quitu caquiñi can tsihin ra cuví rey tsa iyó nu ñuhu ñayivi tsihin andaru cuenda ra naha. Ndu iin ra naha tsa cua cañi tahan ra naha tsihin ra yosó cuayu cuitsin can tan andaru cuenda ra. ²⁰ Tñin ra yosó cuayu cuitsin can tsi quitu caquiñi can iin caa ñi tsihin ra cuví ndusu yuhu vatya can, tyin nuu quitu caquiñi can javahá ra vatya can tsa nyityi, tan tsihin yacan jandaví ñaha ra tsi nyivi tsa tsahá cunyaa tuñi quitu caquiñi can, tan tsi ñi jacahnú tsitoho ti. Tan jacuhun nyito ra tsi nduvi taahan ra naha nu ñuhu tsa cayú tsihin azufre. ²¹ Tan tandíhi ca ñi tsihi ñi tsihin mityi xaan tsa quitá yuhu ra yosó cuayu cuitsin can. Tan tandíhi maa saa, tsatsi xaan ti naha ti cuñu ñi.

20

Nu nyehe ra Juan tsa cuenda tsa mil cuiya

¹ Tsa yaha can tan nyehe yu quee iin ángel ityi andívi, ndahá ra ndaha tucu yuvehe yavi cunu tsa nduve maa nu tsindihi. Tan ndahá tucu ra iin cadena cahnu. ² Tñin ángel can tsi nu coo xaan tsa iyó ndaha, tsa cuví Coo Tsaahnu can, tan cuví tucu nu ña vaha, tan nañi nu Satanás. Tsahñi ra tsi nu tsihin cadena iin mil cuiya. ³ Tan jacuhun ra tsi nu tsitsi yavi cunu xaan can. Nacasi ra yuhu yavi can, tan tyaa ra iin sellu yuhu can tyin tacan tan ña jandaví ñaha ca nu tsi nyivi iyó nu ñuhu ñayivi, nda yaha mil cuiya. Tsa yaha mil cuiya can, cua ndatsi nyico nu juhva ca quivi.

⁴ Yaha can tan nyehe yu nyecú cuaha tyayu. Tan nuu can nyecú nyivi tsa ñihi ndatu tyin tatsi tuñi ñi tsi nyivi. Tan nyehe tucu yu añima nyivi tsahnya nyivi jiñi tsa cuenda tsa cahan ñi tuhun Nyoo tsa tsahá cuenda ra Jesús tsi ñi. Nyivi ihya ña jacahnú ñi tsi quitu caquiñi can, ndi tsi tsitoho ti, tan ndi ña tsahá ñi cunyaa tuñi ti nutyaan ñi, tan ndaha ñi. Nyehe yu nandoto ñi can tan tsindacá ñaha ñi tsihin ra Cristo tsitsi tsa mil cuiya can. ⁵ Ñi ihya cuví ñi tsa nandoto tsa jihna ñi. Maa tyin inga ndiyi ña nandoto ñi tyin cua nandoto ñi nda yaha mil cuiya can. ⁶ Isii xaan cuví tsi ñi tsa nandoto jihna tyin nacatsi Nyoo tsi ñi! Tan ña cua cuhun ñi anyaya nu tatsi tuñi Nyoo añima ña vaha tsa cua cúu nyivi tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuví ñi tumaa jutu tan cua cundaca ñaha ñi tsihin ra Cristo mil cuiya.

⁷ Tsa yaha mil cuiya can, cua ndatsi Satanás nu nyii nu nuuhí nu. ⁸ Cua quita nu, jandaví ñaha nu tsi nyivi Gog tan Magog, ñi xaan iñi tsi Nyoo tsa iyó nani cahnu nu ñuhu ñayivi. Cua jandu iin nu tsi andaru ñi can tyin cuhun ra naha cuatyí. Cuaha xaan ra naha, tumaa cuaha nyiti yuhu ndutya ñuhu. ⁹ Tacan tan nyehe yu quee ra naha nani cahnu nu ñuhu ñayivi. Tan tyasi nduvi ra naha nu iyó nyivi yihí cuenda Nyoo ñuu Jerusalén tsa cuñi xaan Nyoo. Maa tyin Nyoo januu ra ñuhu tsa quee andívi tan tsahmí tsi tsi tandíhi ra naha. ¹⁰ Tan nu ña vaha tsa jandaví ñaha tsi ñi, jacuhun Nyoo tsi nu anyaya nu cayú ñuhu tsihin azufre, nu jacuhun ra tsi quitu caquiñi can tan ndusu yuhu vatya can. Ican cua nyehe nahnu tundoho tacan ñi maa, nduvi tan ñiñu.

Nu cutuñi nyivi ityi nu nyaá tyayu cuitsin nu nyaá Nyoo

¹¹ Tacan tan nyehe yu iin tyayu cuitsin cahnu. Tan nyehe yu tsi ra nyaá nuu can. Tan nyehe ra nu naa ñuhu ñayivi tan andívi. Tan ña ñihi tsi numaa cava tsi. ¹² Tan nyehe

yu tandihí aña nuyivi tsihi, tahan ñi nyivi tsahnu tan nyivi nyihí, nyecú nyityi ñi ityi nuu Nyoo. Tacan tan nuña libru tsa nyaá tandihí tsa javahá ñi quivi tsicoq ñi. Tan nuña tucu inga libru nu nyecú sivi nyivi tsa cua coo nyito tsihin Nyoo. Ndiyi can cua cutuñi ñi tsa cuenda náa ndihí ca tsa javahá ñi tsa nyaá nu libru can. ¹³Tan ndutya ñuhu nacuhvá cuenda tsi aña nuyivi tsa tsihi tsa cumi tsi. Tan nu yucú aña nyivi tsihi tan Tuhun Tsiihi, nacuhvá cuenda nahnu aña nuyivi tsa yihí ndaha nahnu. Tan tandihí ñi cua tahan ñi nácaa javahá maa ñi. ¹⁴Tacan tan Tuhun Tsiihi can tan nu yucú aña nuyivi tsihi can cua jacuhun ndihí Nyoo nduvi taahan can anyaya cahnu nu cayú ñuhu. Tan tsehe cuví tuhun tsiihi tsa tsinu uvi. ¹⁵Juvin ñi ican jacuhun ra tsi nyivi tsa nduve sivi nyaá nu libru nu nyecú sivi nyivi cua coo nyito tsihin Nyoo tacan ñi maa.

21

Nu nyehé ra Juan andivi tsaa tan ñuhu ñayivi tsaa

¹Yahá can tan nyehé yu iin andivi tsaa tan iin ñuhu ñayivi tsaa, tyin andivi tan ñuhu ñayivi tsa tsicoq jihna naa tsi. Tan tacan tucu ndutya ñuhu naa tsi. ²Yuhu ra Juan nyehé yu ñuu ii tsa cuví Jerusalén tsaa tsa quee nda nu nyaá Nyoo andivi, nyehé yu nuu tsi. Tan sii xaan caá cucutú tsi tumaa cucutú iin ñaha cua tindaha. ³Tan tsiñi yu iin ndusu ñihí tsa quita nda andivi, tan catyí tsi:

—Nyehé jihna! Iyó Nyoo mahñu nyivi. Cua coo ra tsihin ñi. Maa ñi cua cuví ñi nyivi ra. Tan cua cunyaa ra tsihin ñi, tan cua cuví ra Nyoo cuenda ñi. ⁴Juvin ñi maa ra cua nacuhva ndutya nuu ñi. Ña cua coo ca tuhun tsihi tan ndi tucuihya iñi. Ña cua vacu ca nyivi tyin ña cua nyehé ca ñi tundoho. Tan ña cua nyehé ca ñi tsa uhvi. Tyin tandihí tsa tsicoq, tsa tsindihí tsi —catyí ndusu can.

⁵Tacan tan ra nyaá nu tyayu cahnu can, catyí ra:

—Nyehé jihna. Jandutsaa yu tandihí maa tsa tsicoq.

Tan catyí tucu ra:

—Tyaa tuhun caahán yu ihya, tyin tuhun nditsa cuví tsi. Cúta iñi tuhun ihya tyin cua cundaa tsi —catyí ra tsihin yu.

⁶Tsa yahá cahan ra yacan tan catyí tucu ra:

—Tsa iyó vaha tandihí vityin. Yuhu cuví ra jihna ñi, tan yuhu cuví ra cua coo nu cua ndihí quivi: tumaa letra A cuví tsi letra jihna ñi tan tumaa letra Z cuví tsi letra nu ndihí ña. Nyivi tsa na ityi iñi cua cuhva yu ndutya coho ñi; tuhun ihya cuñí tsi catyí: Ñi cuñí tyaa soho tuhun yu, cua cuhva yu ñayivi tsa

ña cua naa maa coo ñi, tan nduve yahvi tsi cua coo. ⁷Nyivi jahá canaa tsi nu ña vaha, cua ñihí ñi tandihí tsa caahán yu tuhun ihya, tan cua ndoo ñi tsihin can. Tan yuhu cua cuví yu Nyoo ñi tan maa ñi cua cuví ñi sehe yu. ⁸Maa tyin nyivi yuuhví xaan, ñi ña tsinú iñi, ñi quíñi iyó, ñi tsahñi, ñiñaha tsicá nuu tsihin rayii, tan rayii tsicá nuu tsihin ñaha, ñi tasi, ñi jacahnú tsitoho, ñi vatya; tandihí maa nyivi ihya taahán tsi cuhun ñi anyaya cahnu nu cayú ñuhu tsihin azufre, nu cuví tsa tsinu uvi tuhun tsiihi, nu tatsí tuñi Nyoo aña ña vaha.

Nu nyehé ra Juan nácaa cua cuví ñuu Jerusalén tsaa

⁹Tacan tan tsitsi tsa utsa ángel tsa ndahá coho tsitú tsihin tundoho, quita iin ra tan natuhvá ra nu nyaá yu tan catyí ra:

—Cohon tsihin yu tan janaha yu nyivi yihí cuenda ra Cristo tsi un, ñi tsa cuví tumaa ñasiihi ra Mbee Ticatyí Luhlu —catyí ra tsihin yu.

¹⁰Tan janahá Tatyí Ii Nyoo tsi yu tyin tsindacá ángel can tsi yu iin yucu sucun tan cahnu. Tan janahá ra ñuu ii, ñuu Jerusalén cahnu can tsi yu. Juvin ñi cuhva tsa vatsí nuu tsi tsa quee tsi andivi nu nyaá Nyoo. ¹¹Xiñu xaan ñuu can tsihin tsa sii caá Nyoo. Xiñu xaan tumaa iin yuu vaha tan sii caá, tumaa yuu jaspe, tumaa nyehé yo tsa nyaá inga tsiyo tsihin yutyí, tacan caá tsi. ¹²Nii canduvi ñuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú sivi tsa utsi uvi sehe ra Israel ra cuví tsii tsaaahnu yo naha ra. ¹³Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tyisó ñicanyii. ¹⁴Utsi uvi yuu yihí nu cacú tsaha tsi. Tan nuu yuu can nyecú sivi tsa utsi uvi ra tsa tava tyiñu ra Mbee Ticatyí Luhlu.

¹⁵Tan ángel tsa cahan tsihin yu, ndahá ra iin metru tsa tsinú tsihin xuhun cuaan, tsihin yacan tyihí cuhva ra ñuu can, tan yuhu cora can tan nani canduvi cora ñuu can. ¹⁶Iyó cumi taahan tutun ñuu can. Tan inducu ñi tsa quiihin tan tsa cañi tsi. Tan tyihí cuhva ángel can ñuu can tsihin metru xuhun cuaan can. Tan quita uvi mil uvi cientu kilómetro. Iin ñi cuhva tsa cañi tan tsa sucun tan tsa quiihin. ¹⁷Tacan tan tyihí cuhva ra cora ñuu can. Tan quita uñi xico cumi metru tsa quiihin, tyihí cuhva ra tumaa tyihí cuhva nyivi.

¹⁸Tsihin yuu jaspe samá cora ñuu can. Tan maa ñi maa xuhun cuaan cuví ñuu can. Tan caá tsi tumaa caá yutyí tun ndoó vaha tsi. ¹⁹Tan tsaha cora can samá tsi tsihin tandihí ñi nuu yuu sii caá: yuu tsa jihna ñi cuví jaspe; tsa tsinu uvi cuví zafiro; tsa

tsinu uñi cuví ágata; tsa tsinu cumi cuví esmeralda; ²⁰ tan tsa tsinu uhun cuví ónice; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu iñn cuví topacio; tsa tsinu utsi cuví crisoprasa; tsa tsinu utsi iñn cuví jacinto; tan yuu nu ndihi ña cuví amatista. ²¹ Tsa utsi uvi yuhu cora can tsinú tsi tsihin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnú ñuu can, maa ñi maa xuhun cuaan cuví tsi, tumaa iñn yutyi. Tyin iñn yutyi cuví nyehe yo tsa nyaá inga tsiyo tsi tsihin tsi, tacan caá tsi.

²² Ña nyehe maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandihí tunyee iñi tsi, tan ra Mbee Ticatyí Luhlu cuví vehe ñuhu ñuu can. ²³ Ña tsiniñ ñuhu tsa jandunditsin ñicanyii ñuu can tan ndi tsa jandunditsin yoo. Tyin juvin ñi maa tsa nditsin Nyoo tan tsa nditsin ra Mbee Ticatyí Luhlu jandunditsin tsitsi ñuu can. ²⁴ Tandihí nyivi tsa cacú añima, cua caca nuu ñi nu nditsin can. Tan ra cuví rey nu ñuhu ñayivi naha ra cua cundaca ra naha tsa cuca ra naha tan tandihí tsa cahnú cuví ra naha ñuu can. ²⁵ Ña cua cundasi yuhu cora tsa tsinu cahñi, tan ña cua coo tsacuaa ñuu can. ²⁶ Tan tandihí tsa cuca, tan tsa cahnú, tsa iyó nu ñuhu ñayivi cua tsaa tsi ñuu can. ²⁷ Maa tyin ña cua cuví quihvi tsa caquiñi, ndi intuhun nyivi javahá tsa caquiñi, tan ndi ñi vatya. Intuhun ñi maa nyivi iyó sivi nu libru ra Mbee Ticatyí Luhlu cua cuví quihvi, tan cua coo nyito tsihin ra tacan ñi maa.

22

¹ Tacan tan janahá ángel can iñn yutya cuii xaan tsi yu. Nduya tsa tsahá tsa coo nyito yo cuví. Cuii xaan tsi tumaa cuii iñn yutyi vaha. Tan quitá ndutya can nuu nyaá tyayu Nyoo tan nu nyaá ra Mbee Ticatyí Luhlu. ² Mahñu tsitsi ityi cahnú ñuu can tan nduvi tsiyo xiin yutya can, nycú yutun tsa tsahá tsa coo nyito yo. Tsahá tun naha tun tsiti tan iñn tan iñn yoo. Tan tsa iñn cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyivi iyó nu ñuhu ñayivi. ³ Nduve maa tsa ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tsihin ra Mbee Ticatyí Luhlu. Tan cua jacahnú nyivi yihí cuenda ra tsi ra. ⁴ Tan cua nyehe tsihin nuu ñi tsi ra. Tan cua cunyaa sivi ra nutyaan ñi. ⁵ Ña cua coo ca tsacuaa ican. Tan nyivi tsa cua coo ican ña tsiniñ ñuhu ñuhu candili tsi ñi, ndi ñuhu ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tsihin ra tacan ñi maa.

Nu janahá tsi tyin tsa cuyatyn quitsi ra Cristo

⁶ Tacan tan catyí ángel can tsihin yu:

—Tuhun ihya cuví tuhun nditsa, tan cuví cuita iñi un itsi tyin cua cundaa tsi. Maa Nyoo Jutu yo ra cahñn tsihin ra cuví ndusu yuhu ra tahn tsanaha, juvin ra jacuhun ángel ra, tyin janaha ra tsi nyivi jahá tyiñu tyiñu ra náa cua cuví tsa numi ñi —catyí ra.

Tan catyí Jutu Mañi yo:

⁷ —¡Tsa cuyatyn quitsi yu! —catyí ra.

¡Sii xaan cuví tsi nyivi tsa javahá cuhva caahán tuhun Nyoo tsa nyaá nu libru ihya!

⁸ Yuhu ra Juan, tsiniñ yu tan nyehe yu tandihí tuhun ihya. Tsa yahá nyehe yu tan tsiniñ yu itsi, tsicuiñi tsiti yu tsaha ángel tsa janahá itsi tsi yu, tyin jacahnú yu tsi ra. ⁹ Maa tyin catyí ra tsihin yu:

—Ña jacahnú un tsi yuhu, tyin yuhu, musu Nyoo ñi cuví yu, tumaa yoocho tan tandihí ca ra yañi un tsa cuví ndusu yuhu Nyoo, tan tumaa tandihí ca nyivi tyaa yahvi tuhun nyaá nu libru ihya. Intuhun ñi Nyoo taahán tsi jacahnú yo —catyí ra tsihin yu.

¹⁰ Tan catyí tucu ra tsihin yu:

—Ña tyihí xeehe un tuhun Nyoo tsa nyaá nu libru ihya, tyin tsa yatyin cuii cundaa tsi. ¹¹ Maa tyin jaña ndaha tsi nyivi caquiñi, na javaha maa ñi cuhva cuñi maa ñi. Tan nyivi iyó cuatyí, na coo ca cuatyí ñi. Maa tyin nyivi javahá tsa vaha, na jañihi ca ñi javaha ñi tsa vaha. Tan nyivi tsa jandu ii Nyoo, na cunicun vaha ca ñi tsi ra —catyí ra tsihin yu.

¹² Tan Jutu Mañi yo catyí ra:

—Nyehe ndo. Tsa cuyatyn quitsi yu. Tan tyahvi yu tsi intuhun intuhun nyivi tsa cuenda tsa javahá ñi, a javahá ñi tsa vaha o tsa ña vaha. ¹³ Yuhu cuví ra jhñna ñi, tan yuhu cuví ra cua coo nu cua ndihi quivi, tsa iyó maa yu nda nu quitsahá tandihí tan tacan ñi maa cua coo yu nu cua ndihi tumaa letra A cuví tsi letra jhñna ñi tan letra Z cuví tsi letra nu ndihi ña —catyí Jutu Mañi yo.

¹⁴ Sii xaan cuví tsi nyivi tsa nacatyá jahma, [ñi janduvahá añima], tyin cua ñihi ñi ndatu catsi ñi tsiti yutun tsa tsahá tsa coo nyito añima yo. Tan cuví quihvi ñi yuhu cora ñuu can. ¹⁵ Maa tyin nyivi javahá tsa caquiñi, tumaa ñi tasi, rayi tsa tsicá nuu tsihin ñaha tan ñiñaha tsa tsicá nuu tsihin rayi, tan ñi tsahñi, tan ñi jacahnú tsitoho, tan tandihí ñi vatya, tan ñi jandavi ñaha; tandihí maa ñi can, ña cua quihvi ñi tsitsi ñuu can.

¹⁶ Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihí tuhun ihya tsi nyivi tsicá vehe ñuhu. Yuhu cuví nyivi tsahnú ra rey David. Tan cuví tucu yu tata ra. Tan cuví tucu yu tiñuu cahnú tsa xiñu xaan, tsa caná tsa naa ca —catyí ra.

¹⁷ Tatyí Ii Nyoo tan nyivi yihí cuenda ra, ñi tsa cuví tumaa ñasihi ra Mbee Ticatyí Luhlu, catyí ñi tyehen:

—Naha ñi, Jutu Mañi yu —catyí ñi.

Tan nyivi tsa tsiñi tuhun ihya, na catyi ndihi ñi:

—Naha.

Tan nyivi na ityi iñi tan tandihi nyivi cuñi quitsi, na quitsi ñi tan coho ñi ndutya tsa tsahá tsa coo nyito aña yu, tan nduve náa cua tyahvi ñi.

¹⁸ Tan tandihi nyoocho tsa tsiñi tuhun Nyoo tsa nyaá nu libru ihya, cuñi yu catyi yu tsehe tsihin ndo: Nyivi tsa cua janducuaha ca tuhun ihya, Nyoo cua janducuaha ca ra tundoho tsa nyaá nu libru ihya siqui ñi.

¹⁹ Tan nyivi tsa cua quinyaa juhva tuhun Nyoo tsa nyaá nu libru ihya, Nyoo cua

quinyaa ra tsa taahán tsi tsi ñi tsa nyaá nu libru tsa caahán yoo nyivi cua coo nyito, tan ña cua cuhva ca ra coo ñi ñuu ii. Tan ña cua ñihi ñi tsa vaha tsa caahán libru ihya tuhun.

²⁰ Tan Jutu Mañi yo, ra tsa tsahá cuenda tuhun ihya catyí ra tyehen:

—Tsa nditsa tyin tsa cuyatyin quitsi yu —catyí ra.

Tan yuhu catyí yu:

—Na cuvi tsi tacan. Naha ñi, Jutu Mañi yu, Jesús —catyí yu.

²¹ Na naquihin tandihi ndo tsa vaha tsa tsahá Jutu Mañi yo Jesucristo tsi yo.

Tan na cuvi tsi tacan ñi.